


# Cana Coaunera Ere



New Testament in Urarina (PE:ura:Urarina)

# Cana Coaunera Ere

## New Testament in Urarina (PE:ura:Urarina)

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

### Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

b7ea44d4-3dbd-507b-9a19-256b56fe9b07

## Contents

Mateeocha Laenai . . . . .	1
Marocohacha Laenai . . . . .	102
Locasiicha Laenai . . . . .	165
Joaancha Laenai . . . . .	276
Ichanoichuru . . . . .	345
Roma Nenacaauru Rai . . . . .	456
Coriintoo Nenacaauru Rai Leinjiin . . . . .	499
Coriintoo Nenacaauru Rai Coroataja . . . . .	540
Galasia Batane Nenacaauru Rai . . . . .	567
Efesoo Nenacaauru Rai . . . . .	582
Filipoo Nenacaauru Rai . . . . .	596
Colosau Nenacaauru Rai . . . . .	606
1Te . . . . .	615
2Te . . . . .	624
Timoteeo Rai Leinjiin . . . . .	628
Timoteeo Rai Coroataja . . . . .	639
Tito Rai . . . . .	647
Filemoon Rai . . . . .	653
Ehereeocuru Rai . . . . .	655
Saantiaaocha Letoi . . . . .	688
Fedoroacha Letoi Leinjiin . . . . .	701
Fedoroacha Letoi Coroataja . . . . .	713
Joaancha Letoi Leinjiin . . . . .	720
Joaancha Letoi Coroataja . . . . .	731
Joaancha Letoi Nichataja . . . . .	733
Jodasiicha Letoi . . . . .	735
Afocarifisi . . . . .	738

## Mateocha laenai Ena Nena Cana Coaunera Ere

*Cana Coaunera Calaoihi Jesocurisito foerateracuru  
(Lc 3.23-28)*

<sup>1</sup> Caate Cana Coaunera Calaoihi Jesocurisito foerateeurera Rabiri aina Abaraaun foeratenojoinuru foerateeurera curu-aacurune.

<sup>2</sup> Isaca inaca neein nenaalu jetao Abaraaun.

Jana Isaca calaohilu jetao Jacobo.

Jana Jodaa aina rai nocoalacuru inaca neein nenaalu jetao Jacobo.

<sup>3</sup> Faresi aina Sara jetaote, Tamara que nebateein Jodaa bereecuru nelu.

Jana Faresi calaohilu jetao Esroon.

Jana Esroon calaohilu jetao Armi.

<sup>4</sup> Jana Armi calaohilu jetao Aminadaba.

Jana Nasoon jetaote, Aminadaba calaoihi nelu.

Jana Saloomoon jetaote, Nasoon calaohinelu.

<sup>5</sup> Jana Raba que nebateein Saloomoon calaohilu jetao Bosi.

Jana Roto que nebateein Bosi calaohilu jetao Oberi.

Jana Oberi calaohilu jetao Isaihasi.

<sup>6</sup> Jana Isaihasi jetaote, reyneein nenaalu Rabiri inaca nelu.

Jana Oriasi comasaineein nenaalu que nebateein, Rabiri calaohilu jetao Saloomoon.

<sup>7</sup> Jana Saloomoon calaohilu jetao Roboam.

Jana Roboam calaohilu jetao Abiasa.

Jana Abiasa calaohilu jetao Asa.

<sup>8</sup> Jana Asa calaohilu jetao Josafa.

Jana Josafa calaohilu jetao Joraam.

Jana Joraam calaohilu jetao Osiasi.

<sup>9</sup> Jana Osiasi calaohilu jetao Jotaam.

Jana Jotaam calaohilu jetao Acasi.

Jana Acasi calaohilu jetao Esequiha.

<sup>10</sup> Jana Esequiha calaohilu jetao Manasee.

Jana Manasee calaohilu jetao Amoon.

Jana Josiasi jetaote, Amoon calaohinelu.

<sup>11</sup> Jana Jeconiasi aina rai nejeraauru inaca neein nenaalu jetao Josiasi.

Nii bana jetaote, Isaraelitaauru mucuhin amanajaau-relu, acaauru atane caje roconajaain, Babilonia batane que ichaauru coina.

12 Nitohaneein mucuhin amanajaauruhane baiha jetaote, rai calaohi Salatieli sirilu Jeconiasi. Salatieli calaohilu jetao Sorobaberi.

13 Jana Sorobaberi calaohilu jetao Abiod.

Jana Abiod calaohilu jetao Eliaquiin.

Jana Eliaquiin calaohilu jetao Asoro.

14 Jana Asoro calaohilu jetao Sadoco.

Jana Sadoco calaohilu jetao AQUIIN.

Jana AQUIIN calaohilu jetao Elioon.

15 Jana Elioon calaohilu jetao Eleasar.

Jana Eleasar calaohilu jetao Mataan.

Jana Mataan calaohilu jetao Jacobo.

16 Nii jana Jacobo jetaote, Curisito Mesihasi neba Mariha lana Jose inacanelu.

17 Nitohaneein jetaote, niha Abaraaunne caje coaauneein lechoonca jena saain nichoalateurelu, Abaraaun nefoerateuru, niha Rabirine que tiaaajoaain.

Nii Rabiri caje coaauneein jetaote, lechoonca jena saain nefoerateurelu, Babilonia batane Isaraelitaauru mucuhin amanajaauruhane que tiaaajoaain.

Nii mucunajaain amanajaauruhane baiha jetaote, lechoonca jena saain nefoerateurelu, nejanoaa Curisitone que tiaaajoaain.

### *Nejanoaa Jesocurisitone*

*(Lc 2.1-7)*

18 Naojoaainte nenea nelu Jesocurisito. Nii bana jetaote Jose aina ita raauruhane rai niha Marihane jana jetaote, jaiti ita aina neeuruhane ajiniha Cana Coaunera Suujue ichanohinee inae ausirinelu Mariha.

19 Nii jana esinae rauhijiriin jeriha Cana Coaunerane riji-jieein cacha cahachaaain suujua coaraniha Josene jaun jetaote, nii chuni cacha rai canaanai siriha Marihane belanaala jianeein caje amunaa jerelu.

20 Nitohaneein inae amuhane coina suujua cuhane coauca Josene jana jetaote, sinihu rai ococohin jetao: "Jiaoriha Mariha raai ii comasainu quene coasiinera Rabiri nefoerateneein nenea Jose. Nii canaanai niicha siriite Cana Coaunera Suujue ichanohinee nenaanera.

21 Inae leinjiin calaohirichaaain Marihara. Inae nejanoaa nii rai canaanaine jana Jesusoneein curuaateaura. Osa caje rai cachaneein neenuuru ichoteraanu nihane jaunte, Jesusoneein curuaareeinha," nae jetao rai Cana Coaunera letono anjera.

22 Nitohaneein jetaote, rai nere bera inoaensi *profeta* que:

23 “Chariji bana  
quicha aina ichoaelanaala nenea ranunate,  
inae ausirineein  
leinjiin canaanai siricheein.  
Inae nejanoaane janate,  
Emanoel neein curuaateeurureein cachaaaurura,”  
naain nere bera inoaensi que beratiha Cana Coaunerane  
nainaelu.

“Emanoel,” naanete: “Cana Coaunerate cana aina ne,” nae.

24 Inae niritiin sinihocane caje nocohin jetaote, nii rai  
aitoha Cana Coaunera letono anjerane tonoraain, comasainu  
que Mariha raelu Jose.

25 Nejetaote, nejanoaa nii Mariha calaohi- Jesoso neein  
Joosecha curuaatine reentiaain, nirijieein ita que turu-  
elanaala ita aina ichaaorelu.

## 2

*Enoto mitu nichajai jeloon caje turuuruha Jesoso nejanoa  
coaraa arasijie caje cha coitucuurerane*

1 Nitohaneein jetaote, Jodea batane que nenea Beleeun ne-  
janoaelu Jesoso, jelai batane curuaanaaneein niha *rey* Erode-  
sine bana. Nii jana jetaote, Jerosaleeun enoto mitu nichajai  
jeloon caje turuha uure itolere que nerelaain arasijieeu-  
ru caje cha coitucuureraauru cachaaauru.

2 Inae ecu turuhin jetaote:

“Chu ne, nii Jorioocuru Curuaanaa *rey* nejanoanaa.  
Ocooca rai arasijiene coaracaanune jaunne turuhin coaraa  
uhacaanu, coroaecaanune coina,” naaure jetao turuhin, nii  
itolere coitucuurera cachaaauru.

3 Nii nejanoaane coitucuhin jetaote, jataain nererojoecae  
*rey* Erodesi, satiin Jerosaleen cocoaichacuru aina jiniiquiin.

4 Nii jaun jetaote, satiin saseredotecuru curuaanaacuru,  
Moisesa aitonjoan rauhi que cacha relaaaurera, naaonjoain-  
uri cotiharate Erodesi: “Chu nejanoareein Mesihasi,” naain  
acaauru caje bajaane coina.

5 Nii jaun rene turuhin jetaote:

“Jodea batane que nenea Beleeunte nejanoareeincha. Ni-  
tohaneein ecu nejanoaane cointate:

6 ‘Jodaa atane que nenea Beleen nese,  
coatiha ansijiin natiin  
ii amurijiriin tabaain nenacaauru  
neseeuu fautaain neriheeini,  
ii que netiin nejanoarihani leinjiin Curuaanaa  
canu cachaaauru  
Israeli cocoaichacuru  
coroatajaneraneein  
nenaane jaanra,’

naain laenaelu Cana Coaunera ere bera *profeta* inoaensicha,” naaure jetao Erodesi rai.

<sup>7</sup> Nii jaun jetaote, nii chuni rai belanaala nii arasijie caje itolere coitucuurera cotiharatiha Erodesine jaun jetao, rai turuhin beeuruhane jaun acaauru caje esinae rauhijiriin, “Naaonjoain banate ococoelu,” naain nii ococca arasijiene coitucue.

<sup>8</sup> Inae nitohaneein rai beeuruhane caje coitucuhin jetaote: “Chajaain Beleeun cuhin nii canaanai coanihuiche. Chucha ne. Cha cajecha nefoeratenaaneein ne. Chaen inae eruhichene carai biha uuchene canuhetonai coaraa uhene corojera,” naain jetao nii itolere coitucuurera letoae Beleeun Erodesi.

<sup>9</sup> Niritiin acaauru letoaa *reyne* tonoraain Beleeun cuuruha nii itolere coitucuurerane jana jetaote, acaauru ajiniha cuujue nii arasijie- enoto mitu nichajai que ococane jana acaauruhacha coarai. Inae nii niha canaanaine jaun turuhin jetaote, ecu nichoae inacue nii arasijie.

<sup>10</sup> Inae ecu inauca nii arasijiene coaraain jetaote, jataain rachoojoeure nii arasijie caje cha coitucuureraauru.

<sup>11</sup> Nitohaneein rachoojoeuruhane baiha loreri asae enohin coaracuruhane jana jetaote, neba Mariha aina niha nii canaanaine coaraain jetao, rohan nelauriaain nii canaanai coroaecuruhane baiha rai camela caje oro, enuha sacari jujui, chaen coretiin nenea jujui, naaonjoainuri rocohin que nii canaanai belaihure.

<sup>12</sup> Nii baiha jetaote, nii niha acaauru letoaera Erodesine jaan jelon situhin cauha cuuruhane coataa acaauru sini anuu caje coitucuhin jetao, leocha bero cuhane cuhin jelaia nataneu cauha cuure.

### *Egipto cuhin soroha Josene*

<sup>13</sup> Inae jelai caje amuuruha nii itolere coitucuurera *magocurune* jana jetaote, Jose sinihu rai ococohin jetao:

“Inae jetao nii canaanai ariha Erodesi sohin jaohane coina. Nii ajiniane ichei aitoon, nii canaanai aina rai neba amaain Egipto batane que cuhin sorohine coina. Chaen ichei bihanune reentiaain ecu neeura,” nae jetao rai Cana Coaunera letono anjera.

<sup>14-15</sup> Nii jaun jetaote, sini caje nocohin nii canaanai aina rai neba amaain jetao, janotiin soroe Egipto nichae cunaa bero cuhane cuhin Jose, oha Erodesine reentiaain ecu nihane coina.

Nitohaneein jetaote:

“Egipto caje coauneeinne canu Calaohi cotihareeunni,” naain beratihalu nere bera inoaensi *profeta* que Cana Coaunerane nainaane coina ailu.

### *Canaanaihuru soaajeratiha Erodesine*

<sup>16</sup> Nitohaneein coritaain comarohin caauruha nii arasi-jie caje itolere coitucuurerane que nainaane jaun jetaote, jataain obajeein, ena nejanoanaa caje coauneein, coroata jaanacai que tiaaojoaain, Beleeun sacuritaain nenacaauru canaanaihuru, nii Jesoso nejanoa beeuruha itolere coitucuurerane bana caje coauneein nejanoanacaauru jitariin soaajerate Erodesi.

<sup>17-18</sup> Nitohaneein jetaote:

“Rama nese quete  
aohanrareein jataain inaderaain  
chananaa tabaihuri.  
Raquerite  
calaohichuru coisiha aitoreein.  
Nete inae esinae rauhijiriin  
ooruha calaohichurune jaun,  
ajetera jerelanaala aite,”  
naain laenaalu *profeta* inoansi Jeremiasine nainaelu.

<sup>19</sup> Nejetaote, inae oha Erodesine baiha jetao, Egipto niha Josene jana sinihu rai ococohin jetao:

<sup>20</sup> “Chajaain nii canaanai aina rai neba amaaain jelaiha Israeli batane que caunihura. Inae ooruha nii canaanai sohin jaonaa jereraaurulura,” nae jetao rai Cana Coaunera letono anjera.

<sup>21</sup> Nii jaun jetaote, nii canaanai aina rai neba amaaain jelaiha Israeli batane que cauha cuelu Jose.

<sup>22</sup> Nejetaote, nii rai inaca Erodesi coreeraniha niha Arquelaaone coitucueratiha sinihu que Cana Coaunerane caje coitucuhin jetao, Jodea cuhane coasiha Calillea batane que cue Jose.

<sup>23</sup> Inae nii Calillea batane que turuhin jetaote, rauhi-jiriin cuhin Nasarete neseu ichaoha cuelu. “Nasarete co-coaicha neeinte curuaareein Jesoso,” naain beeuruhalu *profetacurune* nainaane caina.

## 3

### *Cana Coaunera Ere beebejiha Joaan Baotisitane* (Mr 1.1-8; Lc 3.1-9, 15-17; Jn 1.19-28)

<sup>1</sup> Nii bana jetaote, Jodea batane que nenea cacha areroo ecocohin, ecu situnacaauru cachaauru cotijiaain acaauru rai Cana Coaunera Ere beebeje Joaan Baotisita.

<sup>2</sup> Nitohaneein acaauru relaain jetaote:

“Inae nichuuntaa Cana Coaunera cojoanonaa. Aihane jaun nacoaauneein Cana Coaunera ere tonoraain, caohachaain inara ichao coreein neeuche,” naain jetao cachaauru rai beebejeein relanajae Joaan Baotisita.



<sup>3</sup> Nii Joaan que jetaote:

“Nerichaaïn cacha areroo  
eheehejeeïn cacha cotiharanu.

Nii ajiniha caohachaaïn inara suujua baaso jianeïn,  
caohachaaïn inara suujua coaraain,  
caohachaaïn neeuche,  
turuha Cana Curuaanaane  
raotojeeïn raaichene coina,”  
naain laenaclu *profeta* inoaensi Isaihasi.

<sup>4</sup> Camecho ujui caje ichanohin cajione que cajionequiin  
jetaote, jacari caje ichanohin siitoroon que ichoraquiin, sisi-  
incho, irichaje, naaonjoainuri que lenoneein nelu nii Joaan.

<sup>5</sup> Nii cacha areroo neein cachaauru relaa Joanne coitu-  
cuhin jetaote, satiin Jodea batane caje, Jerosaleen caje, Joro-  
daan batane rohan caje, naaonjoainuri cajene maajeeïn tu-  
ruhacoaain aonaa cuure arajii cachaauru.

<sup>6</sup> Nitohaneïn rene turuhin esinae rauhijiriin suujue-  
lanaala osaaocuruhane beeuruhane jetaote, cojunacate-  
naaca nucuhe Jorodaan cuhane teïn acaauru baotisare-  
jetelu Joaan.

<sup>7</sup> Nejetaote, jataain arajiin rene turuhacoaauruha acaauru  
baotisaane coina fariseeocuru aina sadoseeocurune  
coaraane jaun jetao:

“Cha inara rai aite turu rai nenea caseteco tabai caje  
nichoteichene coinata taibinaecuru- acano rijijieïn ne-  
nacaauru cachaauru.

<sup>8</sup> Aihane jaun nii ajiniha caohachaaïn inara suujua  
coaraain caohachaaïn ichaaoche. Aihute esinae rauhijiriin  
nacoaauneïn Cana Coaunera coitucuhin, inara ichao  
coreïn caohachaaïn nenea jerequichene coaracurumiin  
leochaauru cachaauru.

<sup>9</sup> Jiaonrihachu chaen nejesinajeeïn: ‘Canacaanune  
Abaraun nefoeratenichaanu,’ naain irihache. Cana  
Coaunerate naine caa ajeri caje niha natiin Abaraun  
nefoerateeuru coaanaa ne.

<sup>10</sup> Chaen techu inaana inaeniha temulene, cojoaisi aina cu-  
ruataain tero que sauhin usihanau mocohaca. Nii rijijieinte  
inae esenetaaichuru letoaa cureïn nii turuha uhenenu usi  
tabai jana.

<sup>11</sup> Canune esinae rauhijiriin nacoaauneïn Cana Coaunera  
ere tonoraain neeichene coarateeichene coujunacane que,  
acauhanau teïn inara coujunacateïn inara baotisaan.  
Jana canu baiha turuha uhenite laen, inara suujue cuhane  
Cana Coaunera Suujue teïn, usi quene maajeeïn inara couju-  
nacateïn inara baotisareïn. Acate jataain canu amurijiriin  
cocoainain letononeïn ne. Canune fautaain cocoainain

letononeein neeun. Nii rai safato amaeranu que niha natiin nelatejeehaaun.

<sup>12</sup> Charijieein teeinti aroso taojiaain, jelai teein rai fero taojiae mocohane coina taicha. Nii rijieeinte, jelai teein coitucurera raain, jana nii nere tonorana jerelanaala nenacaauru jelai teein mocoha cureein, chabana jacanaa charanejeein nenea usi que,” naain jetao cachaauru rai beebeje nii Joaan.

### *Jesoso coujunacatiha baotisaa Joanne*

*(Mr 1.9-11; Lc 3.21-22)*

<sup>13</sup> Nii jana jetaote, baotisaa Joanne coina Calileea caje cuhin, nii niha Joanne jaan nucuhe Jorodaaun turuha cue Jesoso.

<sup>14</sup> Nii jana jetaote, jauriaanejeein baotisanaa jerelanaala jetao:

“Chanuna ii canu baotisanaa naineei natiin, ii canu rene uhi,” naa Joanne jana jetaote:

<sup>15</sup> “Jauriaa niriimiin ena. Jauriaanejeein satiin aitoha Cana Coaunerane jaan ichacaanete caohachae,” nae jetao Joaan rai Jesoso. Niritoha raine jaun jetaote, jerihane rijijieein baotisae Joaan.

<sup>16</sup> Nitohaneein coujunacatiha acauhanau tein baotisaa Joanne jana, acau caje mituha Jesusone rijieeoritiin jetaote, neyoracaa dede bacuujuane jana, leinjiin serori rijijieein nichoae fauha uha Cana Coaunera Suujuene jana coarae Jesoso.

<sup>17</sup> Nii jana jetaote:

“Caate jataain quiicha belain canuhacha cocoinanohin canu Calaohi nera,” naain toniha erenaa dedeeune jana aon-ajeunre.

## 4

### *Baaso que Jesoso sarunaa jeriha moconajaerane*

*(Mr 1.12-13; Lc 4.1-13)*

<sup>1</sup> Nii baotisaa Joanne baiha jetaote, Cana Coaunera Suujue amanojoneein cacha areroo cue Jesoso, ecu coujuhin coaraa moconajaerane coina.

<sup>2</sup> Nitohaneein cacha areroo niha jenachoonca jiichooneein, jenachoonca janotiineein lenone lanaalane baiha mijiitoha Jesusone jana jetaote,

<sup>3</sup> coujuhin coaraane coina rene turuha cue moconajaera.

Nitohaneein rene turuhin jetaote: “Chajaain aihane esinae rauhijiriin Cana Coaunera Calaohi neeine, caa ajeri jabero-cooru rai aitoote lenoneneein nerotomiincha,” naa Jesoso rai moconajaerane jana jetaote:

4 “Nete Quiricha inoaensi cuhane: ‘Coatiha lenoneecha que ichaonaa nainihe cache. Cana Coaunera ere tonoraain, jerihane rijijieein ichaohanete nainere, jerichanejeein ichaoha cachane,’ naain laenanohineein ne Cana Coaunera Quiricha inoaensi cuhanera,” nae jetao moconajaera rai Jesoso.

5 Niritoha raine baiha jetaote, Cana Coauneraacha que banjiaain nenea Jerosaleeun nese que nenea Teenforo ecuunni choae Jesoso inaain jetao:

6 “Chajaain aihane esinae rauhijiriin Cana Coaunera Calaohi neeine caalai caje nomaroteeute coaracaa. Cana Coaunera Quiricha inoaensi cuhanete:

‘Rai letonocuru anjeraaurute

letoareein Cana Coaunera,

ii beraaihuruhane coina.

Acaaurute

rai biji que ii michuurureein,

nabana ajeri que necunaitaaine coataa,’

naain laenaerate Cana Coaunera,” naa rai moconajaerane jaun jetaote:

7 “Chaen techu Cana Coaunera Quiricha inoaensi cuhane: ‘Jiaonriha ii Curuaanaa ii Coaunera coujuhin coaraaine,’ naain laenanohineein ne,” nae jetao moconajaera rai Jesoso.

8 Satononejeein jetaote, jataain ecuuneein nenea ichatane ucuuno que amaain jetao, jitariin caa chauratane que nenaacauru neseuru coarateein, que nelateein ichaonacaaurune maajeein coarateein jetao:

9 “Jitariin caa ena iicha coaraine ichei tereuni, neseonri-aain canu coroaquine,” naa Jesoso rai moconajaerane jana jetaote:

10 “Cana Coaunera Quiricha inoaensi cuhanete: ‘Leinjiin ii Curuaanaa ii Coaunera corojeein raaicha nelateein rai nere tonoraau,’ naain laenanohineein nera. Chajaain ena canu caje amuhachaaura moconajaera,” naain jetao moconajaera sitae Jesoso.

11 Niritiin moconajaera sitaa Jesosone jaaun caje amuhane jana jetaote, rene turuhacoaain coroatajanecure anjeraauru.

*Calilea cachaauru relaane nunuhetiha Jesusone*

*(Mr 1.14-15; Lc 4.14-15)*

12 Caresero cuhane Joan enoaauruhane coitucuuriin jetaote, Calilea nichae cuelu Jesoso.

13 Nejetaote, Nasarete ichoaelanaala, Saboloon aina Nefatalii nefoerateeuru atane que nenea nemuri auhaniha Caferenaan ichaoha cuelu.

14 Nitohaneein jetaote:

15 “Cucuana auhaniha Jorodaan jerau Saboloon aina Nefatalii atane-

Calileea ichaonacaauru  
Jorioniheichurute

inae jianacoon rai nichao baaso caje mituurureein.

<sup>16</sup> Jana nii ooruhane bana nitajeeneeurite,

inae leeocho ichaonaa que ichaaore,”

naain laenaalu *profeta* inoaensi Isaihasine nainaelu.

<sup>17</sup> Nii caje coauneein jetaote: “Inae nichuuntaa Cana Coaunera cojoanonaa. Aihane jaun nacoauneein Cana Coaunera coitucuhin, caohachaaain inara suujua coaraain, caohachaaain neeuche,” naain jetao cachaauru rai beebejeein acaauru relae Jesoso.

*Jenai ate mucuurera cotihaca Jesusone*  
(Mr 1.16-20; Lc 5.1-11)

<sup>18</sup> Nii cachaauru relaane caje Calileea conemuri auhaniha cuujihane jaun jetaote, coroatajai ita nejeraauru Simoon Fedoro neein acaauruhacha curuaatei, chaen rai nejera Anderesi, naaonjoainuri erue jetao Jesoso, acaauru amiha-needo niha ate mucuuruhane jaun, ate mucuuruhane coina acauhanau rai rede nalaecuruhane jana.

<sup>19</sup> Nii jana acaauru coariin jetaote:

“Chajaauche canu ainate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesoso.

<sup>20</sup> Nii rijieeoritiin jetaote, acaauru rai reddeuru ratiriin Jesoso aina cuure.

<sup>21</sup> Nii caje basiinjiin cutiin jetaote, coroatajai ita nejeraauru Sebedeeo calaohichuru Saantiaao, Joaan, naaonjoainuri coari Jesoso, leinjiin bote cuhane neein acaauru rai reddeuru rucuheca neeuruha rai inaca ainane jana. Nitohaneein coarinajaain cotihanaaca Jesusone jaun jetaote,

<sup>22</sup> nii rijieeoritiin bote cuhane acaauru inaca ratiriin caaijie cuure.

*Arajii cachaauru relaa Jesusone*  
(Lc 6.17-19)

<sup>23</sup> Nitohaneein cuhin jetaote, Calileea sacuritaain cuhecujueein, sinacocaaauru naineen enohenojoeein cachaauru relaain, Cana Coaunera cojoanonaa erenaa raotono que ereerejeein, itolere cunai caaun cunaitenacaauru, jaberoco que cunainojoiriin nenacaauru, naaonjoainurine maajejin rautaacoae Jesoso.

<sup>24</sup> Nii jana jetaote, satiin Siria batane sacuritaain inae Jesoso benaa coitucuhin jetao, araai laurii cunai caaun cunaitenacaauru, jaberoco que cunanacaauru, coitucuhuhi

que suujueconacaauru, otonacaauru, bacosacuru, naaonjoainurine maajeen rene amaauruhane jana jetao, acaauru rautaacoae Jesoso.

<sup>25</sup> Nitohaneein jetaote, Calileea nenacaauru neseeu, Decapolis, Jerosaleen, Jodea, Jorodaan batene uurihuru, naaonjoainuri cajeeeurune maajeen cuhacoain jetao, Jesoso sacuhin rene turuhacoaure arajii cachaauru.

## 5

*Ichatane ucuuno que cuhin ecu cachaauru relaa Jesusone (Lc 6.20-23)*

<sup>1</sup> Arajiin rene turuuruha cachaaaurune coaraane jaun jetaote, aina nerelanacaauru aina jiniiquiin ichtane ucuuno que iniin jetao, ecu nelauriariin lauheque Jesoso.

<sup>2</sup> Nitohaneein ecu netiin acaauru relaiin jetaote:

<sup>3</sup> “Nerausiaaecuruha latiha acaauru suujuane coitucuhin nenacaauru, Cana Coanera Cojoanona que neeuruhane jaun.

<sup>4</sup> Nerausiaaecuruha inaderaaeriin ichaonacaauru.

Niichurute cairichaaajoain coarae Cana Coanera.

<sup>5</sup> Nerausiaaecuruha leeochoaauru amurijiriin nena coacuelanaala raotojoein ichaonacaauru.

Niichuru raite, acaauru que banihateein niicha rucujuei atane terein Cana Coanera.

<sup>6</sup> Nerausiaaecuruha corajeein esinae rauhijiriin jeriha Cana Coanerane rijijieein leeocheenein namute cacha coaraelanaala, niheichu namute cacha cairichanaa coacuhin niha leeocheane jerelanaala, naaonjoain caohateraneein nenacaauru niicha coana jerei coaracururichaaine jaun.

<sup>7</sup> Nerausiaaecuruha cairichaaajoain leeochoaauru coaraain, chelai latein neeuruhane, acaauru coroatajanein naaonjoain nenacaauru.

Nii rijijieeinte cairichaaajoain acaauru coaraain, jeelai amuritoheriin acaauru coroatajanereein Cana Coanera.

<sup>8</sup> Nerausiaaecuruha caohachaain suujua coaraain caohachaain ichaonacaauru.

Niichurute esinae rauhijiriin Cana Coanera aina jiniiquiin niha cuurureein.

<sup>9</sup> Nerausiaaecuruha raotojoein jiniiquiin ichaauru cachaaaurune caina coroatajanein ichaonacaauru.

Niichurute rai calaohineein tein acaauru coareein Cana Coanera.

<sup>10</sup> Nerausiaaecuruha Cana Coaneraacha jerei ichacuruhane coreniha mucunojonein, casetecanojonein, arinojonein, naaonjoain nenacaauru, Cana Coanera cojoanona que neeuruhane jaun.

11 Nerausiajeeinte neeiche canu cachaneein neeichene coreniha inara nocoje chanuhin, inara sohin, joareein inara que ereein, naaonjoaan cachane.

12 Nitohaneein techu cairichaerinojooinein rautanohinelanaala ichaaorelu Cana Coaunera ere bera inoaensihuru *profetacuru*, inara ajiniha nenacaaurulu.

Aihana jaun raotojooein rachoojooein, chaque tonajelanaala neeuche, dedeeu raoti ichaonaa que inara coreterihani Cana Coaunerane jaun.

*Lenone raotono tera aina cache conaeraneein nena*  
(Mr 9.50; Lc 14.34-35)

13 Charijeein teeinti setuhane coataa, tebe que iniho colaain rucuecaa. Nii rijijieeinte nabana nitajeeuruha cachaaurune coataa, acaauru ichao baaso rucuheneein neeiche. Inae lenone cotebetenaa naineniha tebene, inae lenone raotono tenaa nainerihe. Nechu joaenreen atane ichoae jaonojooinein, shaonohineein nihane coinaachate nelate. Nii rijijieein inara netonai, cache rai ichaonaa raotono coaratelanaala cache relaeneeichene, inara netonai nii chaque nelatelanaala neriquicheein.

14 Ichatane ucuuno que niha leinjiin nesene, nihei chuni coaralanaala nainejei. Nii rijijieein techu satiin cache notaracaae inara aina cuaain niicha jerei coaratiha Cana Coaunerane jaan- cono rijijieein neeiche.

15 Nii rijijieein nihei chuni cono mocohin darohe asae tera. Bujuaihu telanaalate ucuun tihaca, satiin conohanau turuuruha loreri asae turunacaaurune coina.

16 Nii rijijieein cache cononeein satiin cachaauru que caohacha ichaquichene coarateein, acaauru que coitucuerateein neeuche. Aihute esinae rauhijiriin caohacha ichaquichene coaraain Cana Coaunera coroaecuruhine cachaauru.

*Cachaauru relaa Moisesane jaan- rauhi coitucueratiha Jesosone*

17 Coatiha inara relaaain nihalu Moisesane jaan rauhi jianein neeichene coina, cau turuhin nihaaun. Nihieichu inara relaauruha *profetacurune* jaan jianequichene coina turuhaaun. Nenacaaen nejian, nii inara relaauruhane jaan coitucuhiche esinae rauhijiriin jeelai amuritoheriine coina, 'Naaonjoain quete aite,' naain inara rai biha uun.

18 Esinae rauhijiriine inara rai aitoreunni, jaiti niha dede, chauratane, naaonjoainurine que tiaaajoaain, coatiha aninoarerarinaai le erenaanejeein, satiin nii aitohane rijijieein situhane reentiaain, nii Cana Coaunera tenojoin Rauhi Inoaensi.

19 Nitohanihane jaun nii rauhi inoaensi caje leinjiin leeočaauru fautaain nelatihei rijijieein nenea rauhi tonoraelanaala nenea, niheichu que leeočaauru relaenihane, acate Cana Coaunera Cojoanonaa que jataain nelatenereein. Nete caohachaain tonoraain, nii aitoħa Cana Coaunerane rijijieein ichaohin, esinae rauhijiriin leeočaauru relaerate, jataain nelatineein nereein Cana Coaunera Cojoanonaa que.

20 Rauhijiriine inara rai aitoreeunni, Moisesa aitoonjoan rauhi que cacha relaaurera aina fariseeocuru amurijiriin, inara rai Cana Coaunera aitoonjoan tonoraain rijijieein ni-icha icharatei ichaeneeichene, coatiħa Cana Coaunera Cojoanonaa que ichaonaa naineriheicheein.

*Namute cacha aina obaecane caseteco coaarihanine que cacha relaa Jesusone*

*(Lc 12.57-59)*

21 Inarate coitucuhiche: 'Jiaoriħa sonajaain jaohichene. Sonajaain joerate caseteco coaareein,' naauruħa inara foerateurerera rai ne.

22 Nena laen canu inara rai aitoon. Chunocoħa namute cacha aina obajei, nii obaecane jaan jera aina rucujueein que suujua acatelanaala nenaate, caseteconein niħa cureein. Jana rai nejera que 'Cha coitucuheei,' naain ereite, casete-caeratereein nitohanai rucuhecuruhane coina nenacaauru-*Junta Supremacuru*. Jana, 'Chaque nelatiheei inacojoeinte neei,' naain namute cachaauru que ereite, usi tabai jana nijiaoreein.

23 Aihana jaun ii que suujua acatiħa Cana Coaunerane coina chaelai amaai que belaine coina Teenforo asae nenea rori-*altar* ichoaene jana, ii cotaairiin niħa chamute cachane que coaauquine,

24 jauriaanejeein caohachaain neein ii cotaairiħa ainane coina, nii rori acatiħa nii iħa amai ratiriin, aina rucuheniħu. Inae aina caohachaain rucuhequine baiħate laen nainereei jelaiħa cuhin nii rori-*altar* ichoae nii Cana Coaunera belaine jaan teeine.

25 Chunocoħa inara amute cacha, cocoinanacaaihuru rai inara coulurujeein niħane, raotojoein aina ereein rucuhecuche, joesio rai inara colurujihane coataa. Aineeichenete folisiaa rai inara tiħa joesione, caresero cuħane inara enoaaurureein.

26 Nitohanein ichaeneeichenete nii caresero cuħane neriquicheein mituhelanaala, nii baaso ichaquichene coretequichene reentiaain. Esinae rauhijiriine aitoon inara rai.

*Comasainelanaala nenea ene dadaeniħa cachane coina relaa Jesusone*

<sup>27</sup> Inarate: 'Jiaonriha inara sinijeranelanaala nena e ne dadaaichene,' naain inoaenlu inara relaauruhalune coitucuhiche.

<sup>28</sup> Esinae rauhijiriine laen canu inara rai aitoon. Chuno-coha suujua cuhane ene jereein coarate, suujua cuhane nejelau ene que naosate.

<sup>29</sup> Inara nota osa que inara sarunaa jerihane nii inara nota que coaraain, inaraacha jerei caje amuuche, nabana inara nota coreniha baaso ichaquichene, inara notaacha usi jana cuelanaala, satiin inara jaberoco usi jana nitajihane coataa.

<sup>30</sup> Jana inara biji osa que inara sarunaa jerihane, coa nii inara biji turuaache nii inara sarueratenaa jerihane jaan que. Mucuhichene ajiniha caje amuuche. Nii inara bijiicha mocoelanaala, inara jaberococone maajeein usi tabai jana nitajihane coataa.

*Ene raain joeranihane, osa que nesaruha cachane que, cacha relaa Jesusone*

*(Mt 19.9; Mr 10.11-12; Lc 16.18)*

<sup>31</sup> Chaen techu inoaenlu: 'Chunocoha comasai joeranihane, nii comasai jaohane jaan cocoiricha teeuche raite aina comasai jaohine,' naain inara relaaurelu.

<sup>32</sup> Esinae rauhijiriine laen canu inara rai aitoon. Leeocha cacha aina ichoaenihane jana comasai joerate, inae osa que nesarue. Jana nii quicha jaonjoin ene raerate, jerichanejeein osa que nesarue.

*Cana Coaunerate coaraje, naain nohaniha cachane que, cacha relaa Jesusone*

<sup>33</sup> Chaen techu inara inoaensihuru rai: 'Jiaonriha Cana Coaunera notaracae netiin, Cana Coaunera bajaain, rai chaelai benatequichene nihanatiin teneeichene,' naauruhane coitucuhiche.

<sup>34</sup> Esinae rauhijiriine canu inara rai aitoon. Jiaonriha joereein inacojoein: 'Cana Coaunera coreniha,' naain ereeichene. Niheichu: 'Dede coreniha,' naain erenaa nainiheeiche, Cana Coaunera nelaurianaja niha dedene jaun.

<sup>35</sup> Niheichu atane coreniha nihanatiin nainiheeiche, nichaauraa Cana Coauneraane jaan nihane jaun. Niheichu Jerosaleen coreniha nihanatiin, Cana Coaunera nese nihane jaun.

<sup>36</sup> Niheichu inara couturi coreniha chaelai ichaquichene coina erenaa nainiheeiche, inara jerequichene que jichosiin, nesomaraain, naaonjoaain nenerihani inara coturijine jaun.

<sup>37</sup> Chaelai que: 'Icharihanuhin,' naaichene ichacuche. Jana: 'Icharihaauni,' naaichene coa ichacache. Nelatihei cha ichaeraanu rijitiin nohanein irihacane. Niite baaso ne.



*Soeraane, nerinanaa naineniha chunine que cache relaa Jesusone*

*(Lc 6.29-30)*

<sup>38</sup> Inarate inoaenlu: 'Chatohaneein inara soeraniha inara cunaitaaine, inara netonai cunaitaain nii inara soera sooche,' naauruhane coitucuhiche.

<sup>39</sup> Esinae rauhijiriine canu inara rai aitoon. Jiaonriha chatohaneein baasoneein teraquichene neurinanaa coaaquichene. Aihane jaun inara meri faohitotoaniane, rai jera netonai icharatecuche.

<sup>40</sup> Chunocoha cocoainanacai rai inara colurujueein inara obiri ruluhane, nii jelaronaa bana inaraacha jiai inara obirine maajein teeuche.

<sup>41</sup> Inara que anajiin amaeratiha cocoainanacai, inara laurinelanaala nenaane, nii bajaane amuritoheriin amanaa nainequichene coarateein amaauche.

<sup>42</sup> Inara caje niicha latei bajaain niha cachane, rai teeuche. Jana inara rai cainaane coina chaelai bajaain niha cachane, chunaelanaa rai niicha latei teeuche.

*Cotaicha belain niha cachane coina cache relaa Jesusone*  
*(Lc 6.27-28, 32-36)*

<sup>43</sup> Chaen techu inoaenlu: 'Inara belaichaauru belain, inara cotaihurera cotaihuche,' naauruha inara raine coitucuhiche.

<sup>44</sup> Nena laen canu inara rai aitoon. Inara que nejeratenacaauru belaihuche. Inara rohecaera rai Cana Coanera bajaauche.

<sup>45</sup> Nitohaneein neeichenete, dedeeu nena Cana Inaca Cana Coanera calahineein neriquicheein. Acate enoto coaunae, cojoanonetojoein nechu aansaneein nenacaauru rai, caohachaaain nenacaauru rai, naaonjoainuri conaeranu que nihane coina. Chaen techu suujua coaraelanaala nenacaauru rai, suujua coaraain nenacaauru rai, naaonjoainuri rai elo letoae acauru rai caohachanu que.

<sup>46</sup> Jana acaihaniji inara belaichaauruhacha belaiichene, chatohanai que jana inara belaiiche Cana Coanera, inae cuu tihane bana. Coaracuche nachuhinti Roma curuaanaa rai *impoestonu* que coriqui bajaaurera netonai jataain nechu aansaneein neeuruha natiin, nitohaneein ichaaoruhane.

<sup>47</sup> Jana inara belaichaauruhacha rai raotojoein ereein, leochaauru aina raotojoein erelanaala, naaonjoaain neeichene, chatohaneeinna jana esinae rauhijiriin inara ichao coreein neeichene coaracurure chaaauru, Cana Coanera coitucuruhi nihanatiinte, inara rijijieein neeure.

<sup>48</sup> Aihana jaun caohachaaain rauhijiriin neeuche, aiha Cana Coaneranane rijijieein.

## 6

*Caohacha ichaa cachane coina cache relaa Jesusone*

<sup>1</sup> Jiaonriha nechu raujiaain inara coaracuruha cachaaunene coinaacha cache notaracaae Cana Coaunera jerenohin ichaquichene. Nitohaneein neeichene coatiha chaque inara rai cainarinaain Cana Coaunera.

<sup>2</sup> Aihana jaun cha lateein nenacaauru coroatajanequichene, jiaonriha itolereneein cachaauru rai beein acaauru coroatajanequichene. Cana Coaunera coitucutoha nocoetonacaaurute cache notaracaae, nechu jataain acaauru aina caohachaaain niha cachane coina, Sinacoca asaae, bero cuhane, naaonjoaain cache belaihure. Jiaonriha acaauru rijijieein ichaquichene. Acaaurute nechu jataain aihure, acaauruhacha esenetaain, caohachaaain acaauru coaraa cachane coina. Nete inae caohachaaain acaauru coaracuruha cachaaunene que inae cainanohine acaauru rai.

<sup>3</sup> Aihana jaun inara, cairichaihuru coroatajaniha cha teeichene, jiaonriha jataain inaraacha belai rai niha natiin beeichene.

<sup>4</sup> Nitohaneein esinae chuni que coaratelanaala teeichene coaraanete, inara rai cainareein cana Inaca Cana Coaunera.

*Cana Coaunera bajanaa que cache relaa Jesusone**(Lc 11.2-4)*

<sup>5</sup> Cana Coaunera bajaachene, coa bajaauruha Cana Coaunera coitucutoha nocoetonacaaurune rijijieein bajaache. Acaaurute sinacoca asaae, joareein bero cuhane, naaonjoaainu neechuru Cana Coaunera bajaare, nechu jataain caohacha ichaa nocoetiin aihuruhane coaracuruha cachaaurune coina. Nete nii coaracuruha cachaaurune coina aihuruhaneecha que, inae cainanohine acaauru rai.

<sup>6</sup> Nete laen ii Cana Coaunera bajanaa jereeine, caohacha jelai netiin coaraeniha chunine jana, bujuaihu ucuha cuhane netiin ii Inaca Cana Coaunera bajaaine caohachae. Nitohaneein chuni que necoharaeratelanaala netiin bajaachene coaraanete, inara rai inaraacha bajai tereein ii Inaca Cana Coaunera.

<sup>7</sup> Cana Coaunera bajaachene, coa acaauru rai ecaantocuru bajaare bajaacuruha araai saain Cana Coaunera coitucuhichurune rijijieein joanreen ereerejeein bajaache.

<sup>8</sup> Aihana jaun jiaonriha acaauru rijijieein neeiche inarane. Cana Coaunerate, caje bajaachene ajiniha inara suujua cuhane inaraacha latei latequichene coitucue.

<sup>9</sup> Aihane jaun Cana Coaunera bajaachene:

‘Satiin canacaanu Inacaneein dedeeu nena Ofa, Iineein neeine coitucuurumiin satiin cachaauru.

<sup>10</sup> Turuhine Ii Cojoanona.

Caa chauratane que iicha jerei ichacurumiin,  
dedeeu ichacuruhane rijijieein.

<sup>11</sup> Cojoanoonetojoein canacaanu rai lenone ocoteeu.

<sup>12</sup> Baaso ichacaaunne,  
canacaanu que ii suujua acateeu,  
canacaanu rai baaso icharaauru que,  
canacaanu suujua acatichaanune rijijieein.

<sup>13</sup> Jiaonriha osa que nesaruhin  
nihacaanune nainatejeein neeine.  
Canacaanu caje moconajaera sitaau.

Inae,  
naain Cana Coaunera bajaauche.

<sup>14</sup> Inara rai baaso icharaauru que, inara suujua acateein,  
acaauru aina caohachaaain neeichenete, Cana Coaunera netonai inara que suujua acatena nainereein.

<sup>15</sup> Jana inara rai baaso ichaaain neeuruha leeochoaaurune jana, acaauru que inara suujua acateneeichene, Cana Coaunera netonai inara osa que suujua acatenereein.

*Suri noitelanaala netiin Cana Coaunera bajaauruha  
cachaaurune que, cache relaa Jesusone*

<sup>16</sup> Inara suri couu netiin Cana Coaunera bajaachene, jiaonriha aihuruha Cana Coaunera coitucutoha nocoetonacaaurune rijijieein, nechu inara suri couu neeichene coaracuruha cachaaurune coina coa cunaitenaa meri tocohaneein inara meri tihache. Inae nitohaneein ichacuruhane coaraain acaauru belaichuruha cachaaurunete, nii acaauru belaichuruhaneecha que inae cainanohi ne acaauru rai.

<sup>17</sup> Jana inara, inara suri couu netiin Cana Coaunera bajaachene, inara meri culejeein neruujueein raotojoein bajaauche,

<sup>18</sup> inara suri couu netiin Cana Coaunera bajaachene que nainacuruha cachaaurune coataa. Nii banate laen leinjiin Cana Coauneraacha inara belaicheein, inara suri couu netiin bajaachene coreniha.

*Dedeeu raoti ichaonaanaja  
(Lc 12.33-34)*

<sup>19</sup> Coa caa chauratane que raotiin nenea coacuhin, coriquihona neein itolere rucuhale sirina coacuhin nihache, inara rai cojoanojoiin nitajeein, basijiaaurureein asijiautooru, naaonjoanrichaaaine jaun.

<sup>20</sup> Caa chauratane que caohachaaain nenea coacuhin mainajeein amihaneein coriqui taaojiaachene jianein, nii aaichene rijijieein mainajeein Cana Coaunera rai itolere caohachanu ichana que amihaneechete dedeeu inara rai cainanohinemii. Nii dedeeu laen asijiaooru nihanatiin

turuhin inara basijiauna nainerinaain. Niheichu cojoano, ecu enohin aasaena nainerinaain.

<sup>21</sup> Nitohanihane jaun jauriaanejeein caohatiin coaacuche, inara ichao rai inaraacha ichanenu que. Inara ichao rai jataain nelateineein niha coriquine esenetaaichene acaacha ichacuche. Jana inara ichao rai nelateineein niha Cana Coauneraacha icharatenohine esenetaaichene acaacha ichacuche.

*Cacha jaberoco conaeraneein niha cacha suujuane*  
(Lc 11.34-36)

<sup>22</sup> Inara notate inara suujua que itolere inaraacha coarai coitucueratera ne. Aihana jaun inara nota que inaraacha coarai coitucuhin, ichaquichene caohatiha inara suujuane tonoraai ichaeneeichenete jianacoon neriquicheein.

<sup>23</sup> Jana inara nota que baasonihane coaraqichene saijieein, inara suujua nii baaso ichaquichene jerihane rijitojoein baaso ichaquichenete, nocohenaanau nijiaonreein inara suujue.

*Coriquiicha que coacuhin Cana Coaunera jerenohi ichana jereniha cachane*  
(Lc 16.13)

<sup>24</sup> Nihei chuni coroatajai curuaana letononeein nenea nainei. Leinjiin belaaain acaacha ere tonoraain, nii leocha que jaolequiin nere tonoraenerihane jaun. Nii rijijieeinte Cana Coaunera sacunaa nainene cacha, coriquiicha que coacuhin nihane.

*Jerihane rijijieein ichaonacaauru cachaauru ichao beraiha Cana Coaunerane*  
(Lc 12.22-31)

<sup>25</sup> Nitohanihane jaunne inara rai aitoon. Coa lenoneein acau cohin ichaohichene jaanu, inara cajione, naaonjoain que nererojoecaaeriin nihache. Tana lenone amurijiriin nelatiha inara ichaone jana, cajione amurijiriin nelatiha inara jaberococone coitucuhin neeichene.

<sup>26</sup> Coaracuche nachuhinti temule jaain niicha quiineeuri taojiaain rucuhecuruhane jaanu coloheri siriin naaonjoaain neeururiha tajaacuru. Nete laen cana Inaca Cana Coaunera, lenoneein ichaauruhane coina acaauruhacha quiine teein ne. Inarate nii tajaacuru amurijiriin jataain nelateein neeiche.

<sup>27</sup> Inaaonjoan saneein niha natiin itolereneein suujua cuhane coaauca cachane niha natiin, nichao cariaain ichaonaa nainihe.

<sup>28</sup> Chanuna inara cajione que nererojoecaaeriin neeiche. Coaracuche nachuhinti ajenacuru niicha jiaaenine que nichanaa ichaain, amihaneein, naaonjoane que airijiin

omarohin, jataain caohatonanaain ujuaneein naaonjoaain neeuruhane.

<sup>29</sup> Jana *rey* Salomoon, coatiha nii aihuruha ajenacurune rijijieein niheilü, caohati cajione que necoreetein nihalune saijieein.

<sup>30</sup> Tana mocohin nitajerai niha ajaenane saijieein, caohachaaain omarohin nihane jaanu tein niha Cana Coaunerane coitucuhichene. Chanuna jana chaen, nii amuritoheriin inara cajioneterichaaain Cana Coaunerane esenetaneeichete, cha esenetana jeriheichuru cachaauru.

<sup>31</sup> Nitohanihane jaun nainiheeiche: 'Chaque lenoneeinna acäu cohin, necoreetein, naaonjoaain nerichaache,' naain que nererojoecaain nena nainiheeiche.

<sup>32</sup> Cana Coaunera coitucuhichurute, niicha que nererojoecaain niicha sacunaa jere. Nete laen Cana Coaunera inaraacha latei latequichene coitucue.

<sup>33</sup> Aihana jaun Cana Coaunera Cojoanonaacha que coacuhin, jeriha Cana Coaunerane rijijieein ichaohin, niicha jereeicha ichaechajeein neeichenete, satiin caa inara rai aitocöaunne jaan terein Cana Coaunera.

<sup>34</sup> Jiaonriha eresi inaraacha ichaneni que coacuhin nererojoecaachene. Le janonaa bana naineein, canaacha ichaneni que coaaucaachenete caohachae.

## 7

### *Jiaonriha leeochoaauru ichao coulurujueeichene* (Lc 6.37-38, 41-42)

<sup>1-2</sup> Coa leeochoaauru ichao coaraain coulurujueein nihache. Nabana nii leeochoaauru colurujueeichene rijijieein, inara coulurujihä Cana Coaunerane coataa. Nii leeochoaauru coaraain neeichene rijijieeinte inara netonai coareein Cana Coaunera.

<sup>3</sup> Chanuna aansijiin laojoiri ichaaain baaso ichacuruha leeochoaurune coaraain, acaauru que ereein neeiche, inara, acaauru amurijiriin jataain baaso ichaaain ichaohichene saijieein.

<sup>4</sup> Inasiina jataain amurijiriin leinjiin enuha jaberoco que funojoi niha ii notane saijieein, 'Jereune ii nota que nenaä utoone rocoe,' naain erenaa nainereei inejera rai.

<sup>5</sup> Cha coitucuha nocoetohine saijieein cha coitucuhi. Jauriaanejeein nii ii nota fuera enuha jaberoco rocohin jaaote, caohatiin coaraain nii inejera nota que nenaä utoone coaraain rocohi.

<sup>6</sup> Coa remaaecuru rijijieein nenacaauru rai, inara que banijiaain Cana Coaunera tenojoin tihache. Nabana inara coinetein inara cunaitauruhane coataa. Niheichu coosi

rijijieein nenacaauru rai, inara rai nelateein nenea nii Cana Coauneraacha tei tenaa nainiheeiche, que jaolequiin chaque nelatihei rijijieein coaracuruhane jaun.

*Cha lateein bajaera raite tereein Cana Coaunera*

<sup>7</sup> Cana Coaunera caje cha lateein bajaachenete, inara rai inaraacha latei tereein. Cha lateein ariin bajaera raite, cha teein ne Cana Coaunera.

<sup>8</sup> Nii rijijieein techu lateein rene cuha cachane, rae Cana Coaunera.

<sup>9</sup> Coaracuche nachuhinti inara caje lenone baja inara calaohine, rai ajeri telanaala lenone caohacha teeichene.

<sup>10</sup> Ainihane inara caje ate bajaane, rai acano telanaala rai iniho caohacha teeichene. Nii amuritoheriinte, cha lateein caje baja cachane rai caohacha teein ne Cana Coaunera.

<sup>11</sup> Coaracuche nachuhinti inara netonai baasoneein inara suujua coaraain ichaohichene saijieein, cha bajaain niha inara calaohichurune, cha caohacha teein naaonjoaain neeichene. Nii amuritoheriinte cha caohacha teein nereein inara rai Cana Coaunera, caje cha latein bajaachene.

<sup>12</sup> Nitohanihane jaun inara aina caohachaain neeuruha leeochoaurune jeriquichene rijijieein, leeochoauru aina caohachaain neeuche. Nitohaneein ichoai coinate aite nii rauhi aina *profetacuru* inoansihuru laenanojoi. Aitoha nii rauhine rijijieein ichaoha cachane coina.

*Ichaonaa coero aina cacha itajera coero*

*(Lc 13.24)*

<sup>13</sup> Nii jaratoelanaala nenea coero aina acuujuu siricha jelon enooche. Nii cacha ichao itajeranu que nenea bacuujuu aina rai coerote, jaraaotokane jaun cuhane cuhin arajiin nitajeeure cachaauru.

<sup>14</sup> Jana ichaonaa chabana nitajenaachara nejeein nenea rene cacha turuaera bacuujuu aina rai coerote, aansijin jaratohelanaala. Nii jaunte caaintatoha ecu turuha cachane jaun, coroatajajeeincha turuujuue cacha.

*Ninaa caje enuha baaso coitucuhacane*

*(Lc 6.43-44)*

<sup>15</sup> Caohachaain necohalajiin neeuche, nii Cana Coaunera coitucuha nocoetiinchuru erenacaauru casajeeuru que. Acaaurute turuurureein nii Cana Coaunera coitucuurera tocorijianeichuru inara rene. Nete acaauru suujua cuhane, inara ichao itajeranu baaso uhaain inara rene turuurureein.

<sup>16</sup> Inarate nainequiche coitucunajaache acaauru ichao cajene. Coatiha inoeri que inaana nainihei oja, niheichu meseri que inaana nainihei acusa. Nii rijijieeinte cacha baaso caje ocoona nainene ichaonaa caohacha.

17 Nii rijijieein techu satiin temule caohacha, caohacha que inacae. Jana enuha baasote, jerichanejeein baaso que inacae.

18 Satiin temule caohacha baaso que inaana nainihe. Jerichanejeeinchu caohacha que inaana nainihe enuha baaso.

19 Satiin enuha baasooru- baaso que inaanacaaurute, inae sauhin moconojoiniha cureein.

20 Nii rijijieein techu acaauru ichao caje cacha caohachaneein, cacha baasoneein, naaonjoain ichaauruhane coitucuriquichein.

*Coatiha satiin cachaauru, Cana Coaunera Cojoanonaa que ichaaururinaain.*

*(Lc 13.25-27)*

21 Coatiha satiin canu rai: 'Canu Curuaanaa,' naain erenacaauru, Cana Coaunera Cojoanonaa que turuhin ichaonaa nainecururinaain. Canu Inaca Cana Coaunera jerenohin icharate laen, nainereein rai Cojoanonaa que ichaoha ne.

22 Inae nii cojoanonaa que turuhane banate, arajiin cachaauru nesoone caaun: 'Curuaanaa, Curuaanaa, canacaanune ii coitucuuruha cachaaurune coina, ii que ereerejetocaaunu, ii curuaa corenihane moconajaera letonocuru sitaain, arajii cojoelanaacojoai ichacaanulu.'

23 naauruha canu raine janane: 'Coatiha inara coitucuhaaun, naain cacaje amuuche baaso ichajeein ichaonacaauru,' naain acaauru sitareeunni.

*Canu ere aonaain caintoonjoan icharate, chabana nitajenereein*

*(Mr 1.22; Lc 6.47-49)*

24 Nitohanihane jaun canu ere aonaain caintoonjoan icharate, leinjiin cacha jataain nainaan niicha ichai coitucuhi nena, enuha suujui caohacha que banesijiateein, ucuacain temuhin neloheritihane jana,

25 uha elone jaun tabaacoaa nucuhecuro aina uha cujuana tabaine jana, nii loreri inasine, enuha caohacha suujui que banesijiateein ucuacain temuhin icha nii icharane jaun. Nii rijiicha canu ere aonaain caitoonjoa ichara cacha.

26 Jana canu ere aohanra nii caintoonjoa ichaelanaala baaso ichajeein ichaonaate, leinjiin cacha aaso erenaa tonoraai, enuha suujui baaso que banesijiateein, araracaariin temuhin neloheritihane jana,

27 uha elone jaun tabaacoaa nucuhecuro aina uha cujuana tabaine jaun comohin nerataneein nitaje nii loreri. Nii rijiicha canu ere aonaane saijieein caitoonjoan tonoraain ichaelanaala nena cacha," naain jetao cachaauru rai ereereje Jesoso.

<sup>28</sup> Niritiin acaauru rai beebějiha Jesusone jana jetaote, jataain cojoelatoore satiin cachaauru,

<sup>29</sup> Moisesa aitoonjoan rauhi que acaauru relaaurera amurijiriin, esinae rauhijiriin suujua caje coitucuhin aithane jaun.

## 8

*Cosibi caaun cunaitenaa cacha rautaa Jesusone*

*(Mr 1.40-45; Lc 5.12-16)*

<sup>1</sup> Inae nii cachaauru relaane nainaan, ichtane ucu-unno caje fauha uha Jesusone jana jetaote, arajiin sacuure cachaauru.

<sup>2</sup> Nii jana jetaote, turuha uhe leinjiin cacha cosibi caaun cunaitenaa. Aca jetaote, Jesoso rene turuhin nacatiha ne-seonriaain jetao:

“Ii jereeine canu rautaaau caa canu cosibi cajera Curuaanaa,” naane jana jetao:

<sup>3</sup> “Jerichaaun chujian. Ii caje amuhine caa ii cosibi,” naain biji que dadaa Jesusone rijieeoritiin, nii rai cosibi caje nerautaan somaraain ne nii cacha. Nitohanai cunai siricha cacha rohan nichuuntaain dadanaa naineniha chunine que airijiin, rohan nichuuntaain dadae Jesoso.

<sup>4</sup> Nitohaneein rautaaain jetaote:

“Aonaau. Jiaonriha chuni rai catohaneein ii rautaaain nihanune beenera. Raujiaaincha nii Moisesa aitoonjoan rijijieein, Cana Coaunera belaiha saseredote rai iicha teeni amaaun cunihunte caje inae nerautaaaine coaracurumiin cachaaurura. Chaen techu inae nii ii cunai caje nerautaaain somaraain leeochoaauru rohan turunaa naineeine coaracurureein satiin cachaauru,” nae rai Jesoso.

*Romanocuru rai soondarooru curuaanaa letono rautaa Jesusone*

*(Lc 7.1-10)*

<sup>5</sup> Inae Caferenaan turuha Jesusone jana jetaote, rene turuhin jetao:

<sup>6</sup> “Curuaanaa, canu letononeein nenaate cunaiteein ne canu loreri asae, itolereneein jiuorhin cunaacoaa rai jabe-rocone jaun,” naain Jesoso rai biha leinjiin Romanocuru rai soondarooru curuaanaane jaun jetao:

<sup>7</sup> “Inae rautaa urichaaunni,” naa rai Jesusone jaun jetao:

<sup>8</sup> “Curuaanaa, coatiha chaque ichei nelatejeehaaun canu loreri asae turuha uhine coina. Raujiaaincha nii cunai sitaaun canu letono caje, aihute nerautamiin.

<sup>9</sup> Nitohaneeinne canu letoaaun neeuruha canu curuaanaacurune acaauru ere tonoraain neeun. Nii rijijieein techu, neeure canuhacha letoaeni soondarooru.



Leinjiin letoaanunete quere tonoraain cue. Jana leeochoa cotihacaaunnete uhe. Chaelai ichaa canu letonone coina letoaanune techu ichae quere tonoraain,” naa Jesoso rai Romanocuru rai soondarooru curuaanaane jana,

<sup>10</sup> cojoelatiin jetaote: “Esinæ rauhijiriin coatiha nihei chuni Isaraeli cocoaicha, caa cache rijijieein jataain quesene-taera coarahaau chabana.

<sup>11</sup> Esinae rauhijiriinte enoto mitu nichajai, enoto so nichajai, naaonjoainuri cajeeuru arajiin uhin, Abaraaun, Isaca, Jacobo, naaonjoainuri aina raotojoeein turuhin lenonecureein, inae Cana Coaunera cojoanonaa que turuhane bana.

<sup>12</sup> Jana Isaraelitaauru tabaaurute, rai cachanu que ranajaain nihalu Cana Coaunerane saijieein, inae Cana Coaunera cojoanonaa que turuhane bana, nocohenaanau jaoleneein chanaa curureein nesoone caaun,” nae jetao aina cunacaauru cachaauru rai Jesoso.

<sup>13</sup> Niritohane baiha jetaote:

“Chajaain chenenajaun caunihute, nii esenetaain jereeine rijijieein nerautamiin ii letono,” nae Jesoso. Nii rijieeoritiin jetaote, inae nerautae nii soondarooru curuaanaa letono cunaitenaa.

*Fedoro tano rautaa Jesusone*

*(Mr 1.29-31; Lc 4.38-39)*

<sup>14</sup> Nii baiha jetaote, Fedoro loreri asae turuha cuha Jesusone jana jetao, ecu sininaja ichoae ajaa caaun cunaiteein niha Fedoro tanone jana eruuruha cue.

<sup>15</sup> Inae ecu turuhin nii cunaitenaa biji mucuha Jesusone rijieeoritiin jetao, inae caje amuha nii ajaane jaun, nerautain nimichuhin acaauru rai lenone chalue.

*Araji cunaitenacaauru rautaa Jesusone*

*(Mr 1.32-34; Lc 4.40-41)*

<sup>16</sup> Inae nocohejihane jana, arajiin suujua cuhane coitucuhichuru siriin caaun cunaitenacaauru uhaain turuuruha cachaurune jana jetao, nereecha que nii cache suujua cuhane nenacaauru coitucuhichuru sitaain, satiin cunaitenacaaurune maajeein rautaacoae Jesoso.

<sup>17</sup> Nitohaneeinte ichae Jesoso,

“Acate turureein

cana caje cana osa aina

cana cunainunru itajihane coina,”

naain besihalu Cana Coaunera ere bera inoansi Isaihasine nainaane coina.

*Jesoso aina cunaa jereraauru*

*(Lc 9.57-62)*

18 Nii jana arajiin curuhacaain neeuruha cachaaaurune coaraane jaun jetaote, nemuri jerau amaaauruha aina nere-lanacaaurune coina acaauru rai aite Jesoso.

19 Nii jana jetaote, rohan nichuuntaain jetao: “Curuaanaa, ii ainane unaa jereeun, chunijiun cuhine jaاون niha natiin,” naa Jesoso rai Moisesa aitoonjoan que cache relaerane jana jetaote:

20 “Arolarihurute sininajaanu siriin naaonjoaaurunre. Jerichanejeein techu sininajaanu siriin naaonjoaaurunre tajaacuru. Nena laen canu Cana Coaunera Calaohi cache caje nejanoanaa nichaaunne, nene canu rai chunijiun nesurucuaaunne jaanura,” nae jetao rai Jesoso.

21 Nii jana jetaote, aina nerelanaa netonai jetao: “Curuaanaa, inae oha canu inacane janane conautichaaune baiha ii aina ureeuni,” naa raine jaun jetao:

22 “Niriimiin. Canu sacuhachaaute ecu nejesinajeein Cana Coaunera coitucuhi nesinanejeein ichaaoruhine ooruhane reentiaain,” nae jetao rai Jesoso.

*Cujuana aina fichafichanaa suruaa Jesusone*

*(Mr 4.35-41; Lc 8.22-25)*

23 Niritiin jetaote, aina nerelanacaauru aina jiniiquiin bote cuhane fauhin jelai caje amue Jesoso.

24 Nii jana inae bote cuhane cujueeuruhane jana, uha cujuana tabai aina fichafichanaane jaun jetaote, enohe bote cuhane acau. Nii jana jetaote, tonajelanaala bote cuhane siniiniicha Jesusone jana

25 nocoain jetao:

“Curuaanaa, inae nalunaa jerichaache. Chajaain caa acau caje cana ichoterateeu,” naauruha aina nerelanacaaurune jana jetaote:

26 “Chanuna jataain nesooneeiche. Jataainachura ansi-jieeinijin cha esenetaeneeichete,” naain nimichuhin cujuana aina fichafichanaa suruaa Jesusone jaun jetao, inae neniha fichafichanaane jaun raotojoein cujueeure.

27 Nii jana cojoelatiin jetaote:

“Chatohanaineeinna ne caa cache, cujuana aina cucuana cuhane niha natiin nere tonoraain nesuruhane coina,” naaure jetao ecu nejesinajeein aina nerelanacaauru.

*Cadara batane que coroatajai suujua cuhane coitucuchuhi sirichaauru rautaa Jesusone*

*(Mr 5.1-20; Lc 8.26-39)*

28 Inae nemuri jerau aina nerelanacaauru aina jiniiquiin Cadara batane que turuha Jesusone jana jetaote, atanebana jelai caje cuhin jetao, coineteure coroatajai cachaauru, suujua cuhane coitucuchuhi sirichaauru. Acaauru jetaote,

enaacha cacha cunaitaane jaun, nene chuni nii neeurunaja bero cuhane amui.

<sup>29</sup> Acaauru jetaote:

“Coa canacaanu rene turuhin canacaanu rerohecaa Cana Coaunera Calaohi Jesoso. Nechu jataain canacaanu rerohecaain, canacaanu cairichaaaine coinete, jaiti cojoanonaa que turuenihane jana turuhicha,” naaure jetao ehequuin.

<sup>30</sup> Nii jana ecu rohan arajiin lenoniha neeuruha coosichurune jaun jetaote:

<sup>31</sup> “Caa cachaauru suujua caje canacaanu sitanaa jereeine, nii coosichuru suujua cuhane canacaanu letoaaura,” naauruha Jesoso rai, nii cachaauru suujua cuhane nenacaauru coitucuhichurune jaun jetaote:

<sup>32</sup> “Taa coosichuru suujua cuhane cunichuchera,” naain jetao nii coitucuhichuru letoae Jesoso. Nii jaun jetaote, nii cachaauru suujua caje mituhin, coosichuru suujuaniha enooruha nii coitucuhichurune rijieeoritiin jetao, satiin ramarau nemarotihacoaain nereeonohin ohacoaure nii coosichuru.

<sup>33</sup> Nitohanihane coaraain jetaote, jelai caje sorohin jetao, neseu turuhin nii coosichuru suujua niha enooruha coitucuhichurune jana, ooruha coosichurune beure nii coosichuru beraihurera cachaauru.

<sup>34</sup> Nii jaun jetaote, satiin nii nese caje cuhin, nii niha Jesosone jaun rene turuhin coaraain jetao, rai aitocure chaajain jelai caje amuhane coina.

## 9

### *Jiurona cacha rautaa Jesusone*

*(Mr 2.1-12; Lc 5.17-26)*

<sup>1</sup> Nii baiha jetaote, aina nerelanacaauru aina jiniiquuin bote cuhane fauhin cuhin nemuri jerau ichaohalune jaun Caferenaanon turuha cue Jesoso.

<sup>2</sup> Inae ecu turuuruhane jana jetaote, nela cuhane leinjiin jiurona cacha turuaa cuuruha Jesoso rene cachaaurune jana, jataain rautaane esenetaain aihuruha nii cachaaurune coaraane jaun, nii cunaitanaa rai jetao:

“Nelararajiaaura cacalabi. Inae ii osa caje ichoteratenohi neeicha,” nae jetao rai Jesoso.

<sup>3</sup> Nii aonaain jetaote:

“Chanuna caritiin Cana Coaunera baijiaraanu rijitiin ere caa cacha,” naain jetao suujua cuhane coarajeeure Moisesa aitoonjoan que cacha relaaaureraauru tabaauru.

<sup>4</sup> Nejetaote niritiin baasoneein suujua cuhane coaacuhane coitucuhane jaun jetao:

“Chanuna baasoneein itolere bana inara suujua coaraqiche.

<sup>5</sup> Chaa quena caaintare: ‘Inae ii osa caje ichoterateno-hineein,’ naenihacane: ‘Chajaain nimichuhin chela seriin amuun,’ naacane.

<sup>6</sup> Coarajeeuche nachuhintine, canu Cana Coaunera Calaohi- cacha caje nejanoanaa nichaaunne cocoaainan letohanojoinichaaun osa caje cacha ichoteratichaaunne coina, caa chauratane quene coarate inara que,” naa acaauru raine baiha jetaote, nii jiurona cacha rai jetao:

“Chajaain nimichuhin chela seriin chenenajaun cauninura,” nae nii jiurona rai Jesoso.

<sup>7</sup> Nii rijieoritiin nimichuhin jetao, rai nenajaun cauha cue nii jiurona cacha.

<sup>8</sup> Nii coaraain jetaote, rai suujua rauhi inaaoritelanaala que casiin Cana Coaunera coroaacure. Nitohanai ichana nainiha cachane jaanu teein niha Cana Coaunerane coaraain.

*Mateo cotihaca Jesusone*  
(Mr 2.13-17; Lc 5.27-32)

<sup>9</sup> Nii jiurona cunaitenaa rautaane jaan jelai caje uhin canu-Mateeo nichaaunne, Roma curuaanaa rai *impoestonu* que cachaauru cobaraain coriqui bajaanune jaan rori ichoae lauhecohanune jana canu coaraainte:

“Chajaau canu aina,” naain canu cotihaca Jesusone jaun, nii rijieoritiin nimichuhin Jesoso aina cuun.

<sup>10</sup> Nitohaneein kuhine canu loreri asae turuhin, satiin aina nerelanacaauru aina curuaaecaain Jesoso coroaateen. Nii janate ecu canacaanu rene turuhin nelauriaain lenonecure jataain arajiin Roma curuaanaa rai *impoestonu* que coriqui bajaaureraauru canu leochaauru, chaen leochaauru cachaauru- nechu aansaneein ichaonacaauru, osaaonacaauru, naaonjoainuri.

<sup>11</sup> Nii coaraainte Jesoso aina nerelanacaauru rai:

“Chanuna caa *impoestonu* que coriqui bajaaureraauru aina, caa osaaonacaauru aina lenone caa inara relaera,” naauruha fariseeocurune

<sup>12</sup> aonaainte:

“Coatiba coichaera latecuruhi raurohin nenacaauru. Leinjiin cunaitenacaauruhachate coichaera latecure. Nii rijijieein canu latecuruhi caohachaain ichaoha nocoetonacaauru.

<sup>13</sup> Chajaain nii Quiricha Inoaensi cuhane: ‘Coatiha chaelai sohin mocohin que canu belaaichene jerinaaun. Raujiaaincha jiniiquiin cairichaaajoaain ita coaraain ita belaaain neeichenena jereeun,’ naain laenanohi nihane jaan que nere-lanihuiche. Aihane jaun, coatiha nii caohachaaain ichaoha no-coetonacaauru cotihaca uhaaun, osaaocuruhane coitucuhin nichao coreein caohachaaain ichaonaa jereraaurune cotihaca uun,” nae fariseeocuru rai Jesoso.

*Suri couu neein cosinacaain Cana Coaunera bajaauruhane (Mr 2.18-22; Lc 5.33-39)*

<sup>14</sup> Nii janate Jesoso rohan nichuuntaain:

“Chanuna fariseeocuru aina canacaanuhacha canacaanu suri couu netiin cosinacaain Cana Coaunera bajaacaanune jana, ii aina nerelanacaauru aihurene,” naauruha Joaan Baotista aina amuhemuhenaacaaurune jana jetaote:

<sup>15</sup> “Chasiina suri couu netiin cosinacaain inaderaaurure ene ranaa jerera beseta que cotihanohichuru, jaiti acaauru aina niha nii ene ranaa jerera cache natiin. Nete inae nii jianacoon teein cache ranaa jerera nichaaunne mucuhin amaauruhane banate laen, suri couu cosinacaain niha cuurureein- nii beseta que cotihanohichuru.

<sup>16</sup> Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri enachasine asaaere nii cajione siri. Chaen caohachaaain nedanaa naineriheii nii obiri enachasine, nii cajione siri que couneraane.

<sup>17</sup> Nii rijijieeinchu nihei chuni inae conaca que tiha coaaeraine jana, cuhane ichonai tera. Nitohaneein cuhane teraa ichonainete naasaaere nii coaaeraai. Nitohanihane jaunte, caohachae coaaeraai nejesinaneein niha coaaeraine. Chaen ichonai, ichonai nejesinajeein nihane caohachae,” nae acaauru rai Jesoso.

*Jesoso cajione dadaera ene aina Jairo cacunu (Mr 5.21-43; Lc 8.40-56)*

<sup>18</sup> Niritiin acaauru rai ereereeca Jesusone janate, rene turuhin nacatiha neseeonriaain:

“Jataain enate nijioaen canu cacunu. Nete canu jiniichaain uhin dadaaine nacoaauneein ichanareein,” naain Jesoso cotihaca leinjiin Jorioocuru curuaanaane jaun,

<sup>19</sup> nii rijieeoritiin nimichuhin aina nerelanacaauru que corihaneraain caaijie cue Jesoso.

<sup>20</sup> Nii janate lechoonca coroata jaanacaain, rai jaberoco caje ichana jaohajeein niha leinjiin enene jaun, Jesoso rohan nichuuntaain caaijie cutiin cajione auha mucuuri:

<sup>21</sup> “Caa rai cajione auha mucuhanuneecha caaunne ner-autareeunni,” naain esenetaane jaun.

22 Nete rai cajione auha mucuhane jana nauriteriin nii ene coariin:

“Nelararajiaaura ene, jataain nerautaaaine esenetaain aaine jaunte inae nerautaaicha,” naa rai Jesusone rijieeoritiin, inae nerautae nii ene ichana jaohane caje.

23 Nii ene rautaane caje cuhin, nii Jorioocuru curuaanaa loreri asaae turuha Jesusone janate, inae atane rucuhecuhane rai neein cojoriinchuru coinaderaauruha cachaaurune jana turuhin:

24 “Satiin caalai caje mituuche. Coatiha ohane jaun aihei caa ranuna, sinihane jaunte aicha,” naa acaauru rai Jesusone jana coenacure ecu neein coarajeeurera cachaauru.

25 Nete coenacuruhane saijieein, jitariin nii loreri caje mitanjaane baiha, nii ranuna rene enohin biji que mucuhin michuha Jesusone jana nimichue nii ene.

26 Nii coaraainte ita rai beeuruha cachaaurune jaun, satiin jelai batane sacuritaain coitucunojoi ne nii o caje ranuna ichtiha Jesusone.

### *Coroatajai maosa rautaa Jesusone*

27 Nii ranuna ichtihane baiha caje amuha Jesusone janate caaijie cuhin:

“Jataain cairichaaajoaain canacaanu coaraaura Rabiri nefoerate,” naain eheehequiin sacuure coroatajai maosacuru.

28 Nii janate inae loreri asaae turuhin, ecu enoha Jesusone jana rohan nichuuntaauruha nii coroatajai maosacurune jaunte:

“Caa maosa neeichene caje inara nota teein nihanune esenetaaichena,” naain acaauru caje bajaa Jesusone janate:

“Aihacaanura Curuaanaa,” naauruhane jaun,

29 biji que acaauru nota dadaain:

“Nii esenetaaichene rijijieein conohine inara notara,” naa acaauru rai Jesusone rijieeoritiin,

30 inae conoe acaauru nota. Nii jaunte:

“Coa leeochoauru rai caa inara nota teein nihanune bihache,” naain acaauru suujuatiha Jesusone saijieein,

31 jelai caje amuuru rijieeoritiin beeuruhane jaun, inae satiin jelai batane sacutaain acaauru nota teein niha Jesusone coitucure.

### *Erenaachara cacha rautaa Jesusone*

32 Inae jelai caje amuuruha nii coroatajai maosacuru niicha rautaurine janate, erenaachara cacha, coitucuhuhi que suujuequiin nena turuaa uure Jesoso rene.

33 Nii janate nii coitucuhuhi sitaa Jesusone rijieeoritiin, inae irihane nunuhete nii erenaachara cacha. Nii coaraainte:

“Coatiha chabana catohanai coarahaacache Isaraeli lauri nichaachene janata,” naaure cojoelatiin cachaauru.

<sup>34</sup> Nete:

“Jeelai coitucuhichuru curuaanaate, caa catohanein coitucuhichuru sitaain niha caa cachane jaanu tein nera,” naaure ecu neein coarajein fariseecuru.

*Cairichaaajoaain cachaauru coaraa Jesusone*

<sup>35</sup> Nitohaneinte neseuru cuhecujuein nenaanajaauru nainein amuhemujuein, netaojiaain Cana Coanera rai rauhi que ereerecuruhane jaan coloheri sinacocacuru nainein cuhecujuein, Cana Coanera Cojoanonaa erenaa raotono que cachaauru relain, itolere cunai caun cunaitenacaaurune maajeein rautae Jesuso.

<sup>36</sup> Nii jana cachaauru coaraa Jesusone janate, nii chaque nelatihei rijijiein beraicha colane nena carenero rijijiein amuhemuhecuruhane jaun cairichaaajoaain acauru coarae.

<sup>37</sup> Nii jaunte:

“Jataainte esinae arajiin neure cachaauru, Cana Coanera coitucunaa jereraauru. Nete nene acauru relaeranura.

<sup>38</sup> Aihane jaun Cana Coanera bajauchete neeine acauru raain acauru relaeranu,” nae aina nerelanacaauru rai Jesuso.

## 10

*Aina nerelanaa nichaanune caje, lechoonca coroatajai nichaanune janijiin cocoinaa Jesuso afosotoneeine*  
(Mr 3.13-19; Lc 6.12-16)

<sup>1</sup> Nii jaunte lechoonca coroatajai aina nerelanaa nichaanune cotijiaain janijiin, canacaanu cocoinaain canacaanu letoae Jesuso, cachaauru suujua cuhane nenacaauru coitucuhichuru sitaain, itolere cunai caun cunaitenacaaurune maajeein rautaacaanune caina.

<sup>2</sup> Nii lechoonca coroatajai afosotoorunu que niicha cocoinai nichaanunete, jauriaanejeein Simoon Fedoroneein acaauruhacha curuaatei, rai nejera Aanderesi, Saantiaao aina rai nejera Joaan Sebedeo calaohineein nenacaauru,

<sup>3</sup> Ferifi, Bartolomee, Tomasi, chaen canu Mateeo nichaaunne Roma curuaanaa rai *impoestonu* que cachaauru cobaraain coriqui bajaera nichaaulune, Arafeeo calaohi Saantiaao, Tadeo,

<sup>4</sup> chaen jauriaanejeein Romanocuru que nejeratenacaauru aina nenaalu Simoon Selotenein niicha curuaateuri, chaen nii baiha Jesuso coulurujueranu Jodasi Isacariote, naaonjoainichaanu.

*Cana Coaunera Cojoanona que cachaauru relaauruhane coina aina nerelanacaauru letoaa Jesusone*

*(Mr 6.7-13; Lc 9.1-6)*

<sup>5</sup> Nitohanein nii lechoonca coroatajai aina nerelanaa nichaanune letoaainte canacaanu suujuate: “Coa nii Cana Coaunera coitucuelanaala ichaonacaauru atane que cuhache. Niheichu Samaria cocoaichacuru rene niha natiin coa turuhache.

<sup>6</sup> Ucuuae cuelanaala, Cana Coaunera cachanein nitajerai nenacaauru Isaraeli cocoaichacuru rene cunichuche.

<sup>7</sup> Chajaain ucuuae cuhin, inae nichuutaa Cana Coaunera Cojoanonaane benichuche acaauru rai.

<sup>8</sup> Chaen cunaitenacaauru rautaaain, onacaauru nihanatiin ichatein, cosibi caaun cunaitenacaaurune maajeein rautaaain, cacha suujua cuhane nenacaauru coitucuchuhichurune maajeein sitaauche. Inarate core colane nitohanai ichana nainequichene jaanu raain neeiche. Aihana jaun nitohanai ichaain neeichene, coa core bajaache.

<sup>9-10</sup> Coa inara coriqui, inara atora, inara cajione necoreetee-ichene jaanu, inara safato, inara biji achune, naaonjoainuri amaain cuhache. Niha rauhi, amihanenacaauru coroaateeru-ruha cachaaurune coina.

<sup>11</sup> Leinjiin neseu, nenaanajaun, naaonjoainu turuhichene, chunocoha caohachaain inara raera cacha ariin, rai loreri asaae neeuche jelai caje amuhichene reentiaain.

<sup>12</sup> Inae nii loreri asaae turuhichene neein, loreri asaae nenacaauru rai ereein turuuche.

<sup>13</sup> Nii jana raoti ichaonaa que ichaonaa jerecuruhanete, raotojoein inara raaurureein nii loreri asaae nenacaauru cachaauru.

<sup>14</sup> Jana caohachaain inara raelanaala inara aohana jerecurenihane, nii loreri caje, chaen nii nese caje, naaonjoaain caje inara amuneein inara tijia que nenea utoone rihariaain ratiriin amuuche.

<sup>15</sup> Esinae rauhijiriin acaaurute cana janonaa besaute que inae tihane bana, Sodoma, Comora, naaonjoainuri batane que ichaonacaauru amurijiriin caseteco coaracurureein.

*Mucunojoinecuruhane coina arichacuruhane*

<sup>16</sup> Aonacuche, canune inara letoaaun janolari mululune jana situha cuha irine rijijieein cuhichene coina. Aihana jaun cacha cunaitaane coina nainaa acanone rijijieein cunichuche. Chatohanein teraane nihanatiin nerinanaa naineniha serorine rijijieein.

<sup>17</sup> Aihane jaun caohachaain nainaa necohalajiin cunichuche. Cocoinanacaaihuru rai inara teuruhane janate, sinacoca asaae inara amaain inara bisiin,



<sup>18</sup> coberenadorocuru rene inara amaain, *reychuru* raine maajeein inara amaaurureein canu coreniha. Nii janate canuneein nihanune coitucuerateriquicheein acaauru que, chaen nii Cana Coaunera coitucuelanaala nenacaauru quene maajeein.

<sup>19</sup> Inae cocoainanacaihuri bijiu inara teeuruhane, coa acaauru tonoraain ereeichene jaanu que tonajianche. Inae ereeichene coina neeichene janate, Cana Coaunera Suujue, inara rai ereeichene jaanu tereein.

<sup>20</sup> Aihane jaun coatiha inara ecu ereriheeicheein. Cana Inaca Cana Coaunera Suujuete inara coreniha ecu erereein.

<sup>21</sup> Nitohanerichaaaine jaunte, rai nejeraauruhacha, nejeraauru tereein ateinanohineeuruhane coina. Nii jana rai inacaauruhachate, rai calaohichuru tereein cocoainanacai rai. Nii jana acaauru calaohichuruhachate, inacaauru que nejerateein inacaauru teeurureein ateinanohineeuruhane coina.

<sup>22</sup> Satiin cachaauru caa chauratane sacuritaain canu coitucuelanaala nenacaaurute, canu coreniha inara que nererojoecaa cuurureein. Nete nii esenetaane janelanaala, atiin satono que tiaain jerichanejeein sacuera nichotereein.

<sup>23</sup> Leinjiin neseu turuhichene jana, inara rerohecaain inara mucunaa jerecuruhane, leocha neseu cuhin sorooche. Esinaene aitoon. Jaiti Israeli nefoerateeuru sacuritaain turuheneeichene janane, canu inara ichohaichaniha ecu turureeunni canu acaihaniji Cacha Calahineein nejanoanaa nichaaunne.

<sup>24</sup> Niheichu rai relaera amurijiriin nenea nainihe i aina nerelanaa. Niheichu rai fatoroon amurijiriin nenea nainihe i rai cachaneein nenea.

<sup>25</sup> Relanojoneein nenacaauru, acaauru relaera rijijieein neeuruhine. Jana letononeein nenacaauru acaauru curuaanaa rijijieein neeuruhine. Canu inara Curuaanaa neein inara relaera nihanune que moconajaera Beelseboo niha canu beeuruha natiin, tonacururiha jana inara que.

*Coasinacaineein niha ohacachene baiha cana itajeraneein nenaane*

*(Lc 12.2-7)*

<sup>26</sup> Aihane jaun, coa cachaauru coasichache. Coitucueraelanaala, asinojoneein chaachaain niha chunine niha natiinte, coitucunojoiniha cureein.

<sup>27</sup> Jana caa coitucueraelanaala nenea nii chuni aon-aenihane jana, caa caitoonjoan coitucuerateeu che satiin cachaauru urichoo netiin.

<sup>28</sup> Coa inara atinana naineraauru que casihache, inara atinaauruhane baiha chabana satonoelanaala neeni janonaa

que neeni, inara suujue itajenaa nainecurenihane jaun. Nete laen nainequiche chabana satonoelanaala nenea usi jana inara jaberoco aina inara suujue itajeranu neein nenea- Cana Coaunera que casiin neeichene.

<sup>29</sup> Tana nii chaque nelatejeeane que airijiin leinjiin moneda que coriha coroatajai tajaelinaane coitucuhichene. Nete jereniha cana Inaca Cana Coaunerane nii leinjiinjin nitajenaa nainecurene.

<sup>30</sup> Nii amurijiriin inarate, inara couturijine maajeein leinjiana leinjianaain janiinojoneein ne.

<sup>31</sup> Aihane jaun coa casiin ichaohache. Inarate jataain tajaelinaacuru amurijiriin nelateein neeiche.

*Cachaauru que Jesocurisito coitucuerateeurera*  
(Lc 12.8-9)

<sup>32</sup> Chunocoha cachaauru que canuneein nihanune coitucueraneein, canu cachaneein nihane coitucueratera ne, acaentonai coitucueratereeunni dedeeu nenea Ofa Cana Coaunera acatiha neein.

<sup>33</sup> Nena laen canuneein nihanune coitucueraneein canu cachaneein nihane saijieein, canu coitucuerate lanaala nenea que acaentonai coitucuenereunni Ofa Cana Coaunera acatiha neein.

*Ita caje cache lerueraneein niha Jesusone*  
(Lc 12.51-53; 14.26-27)

<sup>34</sup> Coatiha raoti ichaonaanaja turuaa uhaaunlu caa chau-ratane que, ita que nererojoecaain ichaoha cachane jaane turuaa uunlu.

<sup>35</sup> Nitohanihane jaunte, rai inaca que nejeratiha rai calaohine jana rai neba que nejeratereein rai cacunu. Jana rai nebaene quete nejeratereein rai nacana.

<sup>36</sup> Nitohaneeinte nechu naraaicha que nejeratenaaneein neeurureein cachaauru.

<sup>37</sup> Rai inaca, neba, calaohi, cacunu, naaonjoainuri belai-hane amurijiriin cacoelainihane, nii chuni canu cachaneein nenea nainihe.

<sup>38</sup> Itolere necairichanaa abaantaain coroso que nerichaaunnine rijijieein necairichanaa abaantaenihane, canu cachaneein nenea nainihe.

<sup>39</sup> Nete laen canu, rai nichao ichoteratena nainichaaunne coitucuhin canuhacha cohajeein nenea, nichao ichoteratereein canu coreniha. Jana canu esenetaelanaala, canu colane nichao ichoteratena jererate rai nichao itajereein.

*Cainanohinerichaain namute cache rai cha tera*  
(Mr 9.41)

<sup>40</sup> Chunocoha inara raerate canu raa aicheein. Jana cao-hachaaain canu raerate canu letoaera raa aicheein.

<sup>41</sup> Cana Coaunera letononiha leinjiin *profetane* coreniha caohachaaain raain nenaate, *profeta* rai cainanohiniha rai namihaneone rijijieein nii raane coreniha rai cainanohiniha cureein. Chunocoha leinjiin cacha caohachaaain nena raain neite, jerichanejeein nii cacha caohachaaain nena rai cainanohinihane rijijieein, nii raane coreniha rai cainanohiniha cureein.

<sup>42</sup> Chunocoha caa ena canu sacunaa nunuhetejeeur-  
eraauru rai, nechu jataain canu sacueranihane coreniha  
le eraurujeein conacai teein nei raite, esinae rauhijiriin  
cainanohiniha cureein,” nae aina nerelanaanichaanune rai  
Jesoso.

## 11

*Jesoso rene turuuruha Joaan Baotisita letonocurune*  
(Lc 7.18-35)

<sup>1</sup> Nii lechoonca coroatajai aina nerelanaa nichaanune  
relaane baihane, jelai batane que nenacaauru neseeu  
naineen cuhacaanu, Cana Coaunera beratenojoin erena  
beebejeein cachaauru relaa amuhemuheca Jesosone coina.

<sup>2</sup> Nii janate caresero cuhane netiin benaa caje itolere ichaa  
Curisitone coitucuhin aina amuhemuhenaauru letoae  
Joaan:

<sup>3</sup> “Iina esinae rauhijiriin, nii turuha uheneni Curisito niha.  
Aca neneeine beeune turuha leechane cohacaanu,” naain  
rene turuhin bajaauruhane coina. Nii jaunte letoanajaane  
rijitoejin aitocuruha rene turuhinne jaun:

<sup>4</sup> “Chajaain caa inaraacha coarai, inaraacha aonai  
benichuche Joaan raicha.

<sup>5</sup> ‘Inae maosa neeuruhane caje conoa maosacuru no-  
tara. Bacosacuru niha natiinte, inae nichaauraaain amuurera.  
Cosibi caaun cunaitenacaauru niha natiinte, inae somaraain  
neeure cosibi cajera. Urichosaaecuru niha natiinte, inae  
enene erena aonacurera. Onacaauru niha natiinte, inae o  
caje ichanacurera. Jana cairichainejeein nenacaauru raite,  
Cana Coaunera beratenojoin erena beebejeein, nosa caje  
nichoteeururichaine beebeje.

<sup>6</sup> Nerausiaaejeeinte neeure rai suujua corelanaala acani-  
hane esenetaain acaacha cohajejin nenacaauru,’ naain  
benichuche Joaan raicha,” naain Joaan letonocuru letoae  
Jesoso.

<sup>7</sup> Inae jelaiha cauha cuuruha Joaan letonocurune janate:

“Chatohanai coaraa cuhichelu cacha areroo cuhin. Leini-  
jiin jiarana nujua cujuana ichanohineein nerurujuanaana  
coaraa cuhichelu.

<sup>8</sup> Ainihane leinjiin cacha, cajione caohacha que necoreetein neina coaraa cuhichelu. Inarate raotojoein coitucuhiche, cajione caohacha que necoreetein nenacaauru, reychuru loreri asaae neeuruhane.

<sup>9</sup> Chatohanai coaraa cuhichelu. Leinjiin Cana Coaunera ere bera *profetana* coaraa cuhichelu. Aiha laesinaae, nii choae tacaain jataain leinjiin *profeta* amurijiriin nenaate esinae rauhijiriin coaraa cuhichelu. Acate Joaan ne.

<sup>10</sup> Nii Joaan quete:

‘Canune ii ajiniha

cachaauru rai ereerecane coina

canu ere bera letoareeunni

turuhine jaanu rucuhheranu que,’

naain ne laenanohineein Cana Coaunera Quiricha cuhane.

<sup>11</sup> Esinae rauhijiriine aitoon, satiin cachaauru caje nihei chuni cacha Joaan amurijirii jataain nelateein nei, Moisesa que Cana Coauneraacha teratenojoi Cojoanonaa bana. Nete laen, ena turunaa Cana Coaunera Cojoanonaa, Joaan fautaain nelatihei rijijieein nena, jataain nii Joaan amurijiriin nelateineein ne.

<sup>12</sup> Turuhalu Joanne caje coauneinte, enanetojoein ena turunaa Cana Coaunera Cojoanonaa turuaera nichaaunne que nejeratein itajenaa coaacure Cana Coaunera coitucuhichuru curuaanaacuru.

<sup>13</sup> Satiin *profetacuru* aina Cana Coaunera aitoonjoaauru rauhite, nii turuha uheni Cana Coaunera Cojoanonaa coitucueratein neeurelu, turuha Joanne que tiaaajoaain.

<sup>14</sup> Inarate esinae rauhijiriin nacoaauneein turuha urichaaain Irihasine que aitocuruhalune coitucuhiche. Acate nii Joaan neein turuhelu.

<sup>15</sup> Caa aitocooaunne aonacurumiin urichonacaauru.

<sup>16-17</sup> Caa cachaauru, enene cojoanonaa que nenacaauru ichao bihanune jaannu coitucuhaaun. Aihuruha canaanai-huru nenaanaja cataaun nocoatijiaan, rai corihacuru rai eheehequiin:

‘Raansaichene coina auno totihacaanu. Nete canacaanu auno rautaelanaala raansanaa jereneeiche. Inara cotijiaain, berane jaain inaderaacaanune jana, canacaanu aina inaderahееiche,’ naauruhane rijiiichuruha.

<sup>18</sup> Nii rijijieein techu, turuha Joaan joaenreen lenone que lenonelanaala, bino conaa inaelanaala, naaonjoaaine jana, moconajaera suujue siriha beeiche.

<sup>19</sup> Nii baiha turuhanu canu, cacha calaohineein nejanoanaanichaaunne jana, bino cohin, joaenreein lenone que lenoneein, naaonjoaineinne jana, ‘Achoritiin, ajetoriaaneein, baasoneein ichaonacaauru osaaonacaauru belaichaneein, Roma curuaanaa rai *impestonu* que

cachaauru cobaraain coriqui bajaaurera belaicha niha' canu beeiche. Nete jataain itolere que nainaain, chaachaain niha Cana Coaunerane caje coaraain, coitucunojoi ne niicha ichai," nae Jesoso cachaauru rai.

*Caseteco coaracururichaain erenaa tonoraauruhi cachaaurune*

*(Lc 10.13-15)*

<sup>20</sup> Cojoelanaacojoai ichaalu Jesosone saiijeein nichao coreein nacoaauneein Cana Coaunera coitucuureniha nii nese que ichaonacaauru cachaaurune jaunte:

<sup>21</sup> "Jataainte cairichaaajoaiche nohane, Corasiin cocoaichacuru. Cairichaaajoaiche nohane Betesaaida cocoaichacuru. Inara que cojoelanaacojoai ichaain coaratihanulune tocohaneein, Tiro, Sidoon, naaonjoain cocoaichacuru rai cojoelanaacojoai ichaain coaratihanulune jana nihanete, inae inoanlu nejeein inae nichao coreein, nacoaauneein Cana Coaunera coitucueraneein neeuruhane coarateeurure niicha jerenohin ichaain.

<sup>22</sup> Nete inae coitucuhichuru coulurujueein casetecaerati-hane jaan Cojoanona que turuhane bana, Tiro, Sidoon, naaajoainunri cocoaichacuru amurijiriin caseteco coaraa curiquicheein inara.

<sup>23</sup> Jana inara, Caferenaan cocoaicha neeichene, inacojoein caohachaaain niha nocoetiin raotiin nena coaaquiche. Nete ohichene bana nocohena tabai jana nitajiha curiquicheein. Nii inara que cojoelanaacojoai coaratihanulune tocohaneein, Sodoma cocoaichacuru que coaratihanune jana nihanete, enanetojoein neeurure jelai cocoaichacuru.

<sup>24</sup> Nete inae coitucuhichuru coulurujueein casetecaane coina turuha Cana Coaunera Cojoanona que turuhane bana, Sodoma batane cocoaichacuru amurijiriin caseteco coaraa curiquicheein inara," nae cachaauru rai Jesoso.

*Canu esenetaerate raotojoein ichaoreein.*

*(Lc 10.21-22)*

<sup>25</sup> Niritohane baihate: "Itolere chauratane, dede, naaonjoain Coauneraneein neeine coroaajihanu jataaincha, Ofa, itolere coitucutoha nocoetonacaauru que iicha asii coitucuerateei cairichainejeein nenacaauru quene jaunra.

<sup>26</sup> Aihara Ofa, nitohaneein jereeine jaunte ichaacha," naane baihate:

<sup>27</sup> "Canu Inaca Ofate satiin raineen nena tein ne carai. Nihei chuni Cana Coaunera Calaohi cachaneein nejanoanaa nichaaunne coitucuera. Leinjiin Ofa Cana Coauneraachate cacoitucue. Niheichu chuni, Ofa Cana Coaunera coitucuera. Canu- Calaohineeichane coitucuun. Canu- Calaohi

nichaaune coitucueratenaajerichaaunne jaanru que, coitucueratihanune banaachate, Canu Inaca Ofa Cana Coanera coitucuurureein cachaauru.

<sup>28</sup> Nii inara baasoneein ichaonacaauru, inara nererojoecaeriin ichaonacaauru, inara osaonacaauru, naaonjoaineeichene canu esenetaain canu sacuuchena raotojoein ichaonaanaja te inara rai.

<sup>29</sup> Caa inara rai caitoonjoa esenetaain, Canu que nerelaain aihanune rijijieein ichaaoche. Coatiha chabana inara aina baasoneein nerinaaunni. Nii bana coatiha nitajerinaain inara suujue.

<sup>30</sup> Coatiha caaintaai, caa inara rai caitoonjoa tonoraa cachane," nae.

## 12

*Nebetacanaa cojoanonaa bana tirico inaa molooruha Jesoso aina nerelanacaaurune*  
(Mr 2.23-28; Lc 6.1-5)

<sup>1</sup> Nii amuhemuhecaunne jaun, nebetacanaa cojoanonaa bana tirico coocana jana situha cuhacaanu Jesoso aina jiniiquiin aina nerelanaa nichaanune. Nii janane mijiitohacaanune jaun, situnacanejeein nii tirico moloonejeein rai nucuhe quihacaanu.

<sup>2</sup> Nii coaraainte:

"Nii ii aina nerelanacaauru coaraau. Cocoaeraa nebetacanaa cojoanonaa bana nitohanai ichara natiinte, inae tirico taihure," naauruha Jesoso rai fariseeocurune jaunte:

<sup>3-4</sup> "Tana lesajei que mijiitooruhane jaun, corihacuru aina jiniiquiin Cana Coanera loreri Teenforo asaae enohin, Cana Coanera que banijiaain nena faan, saseredotecuruhacha nii faan quinaa nainihane saijieein, corihacuru aina faan quiha curuaanaa Rabirine jaan reretaain coitucuhichene.

<sup>5</sup> Tana Moisesa aitoonjoa cuhane nebetacanaa cojoanonaa bana carenero narejeen sohin Teenforo asaae mocooruha saseredotecurune niha natiin, osa que nesaruhin naaonjoaurenihane jaan reretaain coitucuhichene.

<sup>6</sup> Aihane jaun Teenforo amurijiriin jataain nelateein cau nihanune coitucuhin neeuche.

<sup>7</sup> Coatiha: 'Naaonjoain quete aite caa Quiricha cuhane,' naain coitucuhicheeiche. Nii Cana Coanera Quiricha cuhane: 'Nii inihocuru mocohichene jianeein inara amute cache belain, naaonjoaain neeichenena jereeun,' naain ne, laenanohineein. Nitohanai coitucuhin neeichenenoote, chatohanai baaso ichaain neniha inara amute cachane jana colurujueein naaonjoaain neriquiche.

<sup>8</sup> Nitohaniane jaunna, canu- cacha calaohineein ne- janoanaa nichaaunne, nebetacanaa cojoanonaa amurijiriin cocoainaan letononeein neun,” naain fariseeocuru tonorae Jesoso.

*Leinjiin jiurona bijii cacha rautaa Jesosone*  
(Mr 3.1-6; Lc 6.6-11)

<sup>9</sup> Inae jelai caje amuhinte, ecu nena sinacoca asaae enoha cuha Jesosone jana,

<sup>10</sup> ecu najiniha ne leinjiin jiurona bijii cacha. Nii jana Jesoso colurujueeruhane jaanu lera ariiriichuruhane jaunte:

“Nainihanacha cocoaeraane saijieein, cunaitenaa rautaaca nebetacanaa cojoanonaa banane,” naain Jesoso caje bajaauruha fariseeocurune janate:

<sup>11</sup> “Tana chunocoha inara, leinjiin carenero siriquichene jana nebetacanaa cojoanonaa bana acau mitunajaan ucuha jachu cuhane naluha inara raine coaraa curiquiche jelai caje rocohichene coinane.

<sup>12</sup> Tana leinjiin carenero amurijiriin nelatiha leinjiin cachane coitucuhichene. Aihane jaun, cha caaunna cunaitenaa rai caohacha ichaa rautaenerichaaca nebetacanaa janonaa bana,” naain fariseeocuru tonoraane baihate:

<sup>13</sup> “Ii bijii raujiaaura,” naa nii jiurona bijii leinjiin cacha rai Jesosone janate, bijii sijitaane rijieeoritiin, inae nerautae nii bijii jera rijijieein nii cacha bijii.

<sup>14</sup> Nete jelai caje mituhin nejesinajeein ita suujua tacaure fariseeocuru Jesoso sohin jaaoruhane coina.

*Jaiti neniha Jesosone jana, tururichaaine biha Isaihasine*

<sup>15</sup> Nitohaneein inae sohin jaonaa jerecuruhane coitucuriin jelai caje amuha Jesosone janate, sacuuruha arajiin cachaaurune jaun, jitaain cunaitenacaauru rautaaain,

<sup>16</sup> aonajeeuruha cachaaurune urichoo, nii rautanaacane que ereeuruhane caohate Jesoso.

<sup>17</sup> Nitohaneente bihalu Cana Coaunera ere bera inoaensi Isaihasine nainaane coina:

<sup>18</sup> “Caate,

janijiin belaaain cocoainaan

Canu Suujue que suujuequiin

canu letononeein nena ne,

‘Inae nerinaain baasoneein cachaauru cairichaaaurera,’

naain,

satiin chauratane que

lauri lauri nenacaauru cachaauru rai

beebejihane coina.

<sup>19</sup> Coatiha

cachaauru que nejerateein, cachaauru cotaain,

bero cuhane niha natiin

tonijjaain ereein cachaauru relaain,  
naaonjoaane aohanrarinaain.

<sup>20</sup> Coatiha

nelatelanaala nenacaauru,  
cairicheineein nenacaauru,  
naaonjoainuri cairichaeranu que airinaain.

Niheichu

aasaeriin esenetaeraauru que jaolecorinaain,  
lauri lauri nenacaauru cachaauru  
ichao rucuhecane jaan que  
turuhane reen tiaaajoaain.

<sup>21</sup> Satiin lauri lauri nenacaauru cachaaurute  
acaacha que jaaecoorureein,”  
naain belu Isaihasi.

*Moconajaera letononeein niicha ichana nainei ichaa Jesoso  
beeuruhane*

*(Mr 3.20-30; Lc 11.14-23; 12.10)*

<sup>22</sup> Nii janate, suujua cuhane coitucuchuhi siricha leinjiin  
cacha erenaachara maosa amaauruha Jesoso rene jana, iri-  
hane jaanu teein, rai nota cono te.

<sup>23</sup> Nii coaraain cojoelatiinte: “Tana caa cacha Rabiri ichoala  
nihane,” naain ecu nejesinajeein satiin ita caje bajaacoaare.

<sup>24</sup> Nii aonajeeinte: “Moconajaera curuaanaa Beelseboote,  
caa cacha rai catohanai ichana nainihane jaan teein ne,”  
naaure fariseeocuru.

<sup>25</sup> Niritiin coaucuruhane coitucuha Jesoso raotojoeine  
jaunte: “Satiin caa chauratane que ichaonacaauru  
cachaauru, ita que nejerateein neeuruhanete jiniiquiin  
nitajenaa nainecurure. Niheichu leinjiin nese que  
ichaonacaauru ita que nejerateein neeuruhane, jiniiquiin  
raotojeein ichaonaa nainecururihei.

<sup>26</sup> Nii rijijieein techu, moconajaera netonai rai letonocuru  
que nejerateein nihane, nii rai letonohacha sitaain nihane,  
nii chaque nelateein nena nainerihei.

<sup>27</sup> Nii aitocohichene tocohaneein moconajaera suujue aina  
cuaain moconajaera sitaanu nechujianra, jeelai mocona-  
jaeraacha itajih aicheeunna. Nete nii aitocohichene toco-  
hanene, nitohanihane, cha jana inara letonocuru letohare  
nitohanai ichana naineein neeuruhane jaanu siriin neeu-  
ruhane coina. Nitohanihane jaunte, nechu jataain inara raa-  
jenihane jataain baasoneein aitocohichene coarateeiche.

<sup>28</sup> Caa cacha suujua cuhane nenacaauru moconajaeracuru  
sitaanu Cana Coaunera Suujue aina cuaainnete, inae inara  
aina niha Cana Coaunera Cojoanonaane coujunacaneein  
ichaan.



29 Leinjiin cacha jataain laraajiin nenea loreri asae enohin nihei nii chuni caje niicha sirii ruluhera. Biji ichojoaainchate naine nitohaneein caje niicha sirii ruluhane.

30 Chateeinti canuhacha ichai ichaene. Niite canu que nejeratenaaneein ne. Nii rijijieein techu canuhacha ichai itajeraneein ne canu esenetana jerihe.

31 Nitohanihane jaunne inara rai aitoon, satiin osaonacaauru cachaauru quete suujua acatereein Cana Coaunera. Nete laen tonaain baasoneein Cana Coaunera Suujue que erei que suujua acatenereein.

32 Canu- Cacha Calahineein nejanoanaa nichaaunne que nihanatiin tonaain baasoneein erei quete suujua acatereein. Nete laen rai Suujue que tonaain baasoneein erei nihane, caa ena nenea janonaa, caa baiha neeninu janonaa, naaonjoain que nihanatiin neein suujua acatenereein Cana Coaunera.

*Ninaa caje temule caohacha coitucuhacane*  
(Lc 6.43-45)

33 Tana temule jaain neeichene, caohacha que inaacane caje temule caohacha coitucuhin neeichene.

34 Nitohaneein necha ansaineein neeichene jaunte, inara suujua caje mitunaa nainene caohacha. Inara suujua cuhane baasoneein inaraacha coacuite, inara ujuae caje mitue.

35 Jana caohachaain suujua coara cachate, caohacha nejesina que ereein ne, suujua cuhane niha caohachane jaun. Jana baasoneein suujua coara cachate baaso que ereein ne, suujua cuhane niha baasone jaun.

36 Canune inara rai beeun, inae caseteco coaracururichaain satiin caa chauratane que nenacaauru cachaaaurune bana, tonaain baasoneein ereeichene nihanatiinte coitucunojoinereein.

37 Nitohaneeinte, inara ujuaae caje baaso ichaain neeichene ujuaihoneein neneeichene, caohacha ichaain neeichene coitucunojoiniha cureein,” nae acaauru rai Jesoso.

*Cojoelanaacojoai bajaauruha necha aansai catchaaaurune*

38 Nii jaunte:

“Cacha relaera, canacaanu rai cojoelanaacojoai ichaain coarateeinene jerichaanura,” naauruha Moisesa aitonjoan que cacha relaaaurera aina fariseeocuru tabaaaurune janate:

39 “Caa necha ansaineein suujua coitucuelanaala ichaonacaauru cachaaaurute, acaauru rai cojoelanaacojoai ichacaaunne jerecure. Nena inae acaauru que cojoelanaacojoai coaratihalu *profeta* Jonasine jaun, inae nenacaeneein acaauru que coaratenaa jereneun.

40 Nii nichata jiiichoo nichata janotiineein, ate tabai suri cuhane nihalu Jonasine rijijieeine, canu-

Cacha Calaochinichaaunne nichata jiichoo nichata janotiinejeeincha atane cuhane nereeunni.

<sup>41</sup> Aihana jaun, coitucunojoiniha caohacha ichaeraauru aina baaso ichaeraauru ichao que tihane banate, nacoaauneein nimichucurureein Ninibe cocoaichacuru, acaauru coulurujeeurhane coina, acaauru rai beratenojoin beebejiha Jonasine aonaain nacoaauneein Cana Coaunera que coacuhin neeuruhane jaun. Jana ena cau inara aina neinichaaunnena Jonasi amurijiriin nena nichaaunne saijieeinte caitoonjoa esenetana jereneeiche.

<sup>42</sup> Jerichanejeein techu nacoaauneein nimichureein enoto mitu nichajai coarajeein cana raotono nichajai que nenaalu ene curuaanaaneein nena netonai inae caseteco coaracururichaaain caa ena nenacaauru cachaaurune bana acaauru coulurujihane coina, niicha coitucuhi beebejiha cachaauru rai Salomoonne jana, coriaji atane caje uhin aonaa uhalune jaun. Cau caa ena inara aina neinichaaunnena Salomoon amurijiriin nena neeun. Nete nii saijieein canu esenetana jereneeiche.

*Nacoaauneein cacha suujueniha jelaiha enoha coitucuchuhine*  
(Lc 11.24-26)

<sup>43</sup> Cacha suujua caje mituha leinjiin coitucuchuhinete, cahaneein amuhemujeein nihane jaanu ariirijie. Nii jana eruhanihanete:

<sup>44</sup> "Taolu mituhanulune jaaunne jelaiha cauha cureeun,' naain coacue. Niritiin jelaiha turuhin nii cacha coaraane jana, aiha leinjiin loreri conera colane caohatiin lojainojineein nena rijijieein eruhanete,

<sup>45</sup> nacoaauneein jelaiha cuhin, caainsineein amurijiriin baasoneein nenacaauru aina ita taojiaain, jiniiquiin nii cacha suujua cuhane jeelaiha enooruhane, jataain jeelai amuritoheriin baasoneein ichoae nii cacha. Nitohaneente, ichaoha cuurureein caa necha ansaineein ichaonacaauru cachaauru netonai," nae acaauru rai Jesuso.

*Jesoso rene turuuruha neba aina nejeraaurune*  
(Mr 3.31-35; Lc 8.19-21)

<sup>46</sup> Niritiin jaiti cachaauru aina ereereeca Jesusone janate, rene turuhin aina erenaa jerecure neba aina nejeraauru. Loreri asae enohelanaala airiniha neeuruhane janate:

<sup>47</sup> "Taute airiniha turuhin neeure ii neba aina ii nejeraauru, ii ainate erenaa jerecure," naain Jesuso rai beeure.

<sup>48-50</sup> Nete, nii rai biha unaa rai:

"Caaurute canu neba aina canu nejeraaurune. Chunocoha caletoaera Ofa ere tonoraain niicha jerenohin icharate, canu

nejera, canu bai, canu neba, naaonjoainuri ne,” nae aina nerelanaa nichaanune cojeluhin Jesoso.

## 13

*Temule jaera que cuaain cachaauru rai iriha Jesosone  
(Mr 4.1-9; Lc 8.4-8)*

<sup>1</sup> Nii bananeeinte, nii loreri nihacaanune jaan caje cuhin, nemuri auhaniha turuhin ecu nelauriaain lauheque Jesoso.

<sup>2</sup> Nii jana, arajiin rene turuhacoaauruha cachaaaurune jaunte, leinjiin bote cuhane fauhin lauheque, carene ichoae neeuruha cachaaaurune tonohana.

<sup>3-4</sup> Nii bote cuhane netiinte, araai laurii nereretanaa rijijiei *parabola* que cuaain cachaauru rai ereerejeein:

“Leinjiin temule jaera temule jaa cunajaun ucuhe riiaacane janate tabaauru bero cuhane naluha nii niicha riajaiine jaun, turuhin coaraain quihure tajaacuru.

<sup>5</sup> Jana le turijieein niicha riajaite, neniha mululuhin atanene jaan jelson ajeri ichoae nalunacaauru carajaelanaala omaroe.

<sup>6</sup> Nete inae omarohane jana mituhin ajajaa enotone jaun ohe, mululuhin neniha atanene jaaun, ucuacaain neniha rai cojoaisine jaun.

<sup>7</sup> Le turijieein niicha riajai ucuhete, ajena jana naluhane jaun, amurijiriin omaroha ajaenane jaun atinae.

<sup>8</sup> Jana atane caohacha que le turijieein niicha riajaite, le ucuhecuru caje le temuracuru lefashaananaain inacae. Jana tabaaaurute saotachoonca ucuheneein, nichatachoonca ucuheneein, naaonjoaain inaacure.

<sup>9</sup> Caa caitoonjoan aonacurumiin irichonacaauru,” naain cachaauru rai ereereje Jesoso.

*Jesoso caje parabola que cachaauru rai ereereecane bajaacaanu aina nerelanaa nichaanune  
(Mr 4.10-12; Lc 8.9-10)*

<sup>10</sup> Nii jaunne, Jesoso rohan nichuuntaain nii araai laurii nereretanaa rijijiei *parabola* que cachaauru rai ereereecane jaan bajaacaanu caje aina nerelanaanichaanune.

<sup>11</sup> Nii jaunte: “Cana Coaunerate rai cachaneein neeichene jaun, coitucueraelanaala nenea Cojoanona coitucuerate inara que. Nete laen rai cachanelanaala nenacaauru que coitucueratanaa jerene.

<sup>12</sup> Nitohanihane jaunte, naitoonjoa tonoraain niicha jerei ichajeein nenacaauru rai, jataain jeelai amuritoheriin itolere coitucuhin neeuruhane jaanu tereein Cana Coaunera.

Jana naitoonjoo tonoraelanaala niicha jerei ichaelanaala ne-nacaauru cajete, jitariin acaihaniji acaauruhacha coitucuu-jei rulureein.

<sup>13</sup> Nitohanihane jaunne araai laurii nereretanaa rijijiei que cuaain acaauru rai ereeun. Coaracuruhane niha natiin coitucuu-renihane jaun. Niheichu aonacuruhane niha natiin aonaain coitucuu-renihane jaun.

<sup>14</sup> Nitohaneeurhane cointate: Aonacuruhane niha natiin: 'Naaonjoain quete aite,'

naain coitucuururihaain.

Niheichu

nii coana jerecuruhane niha natiin coaracururinaain.

<sup>15</sup> Inae jataain nauhaca

caa cachauru suujuane jaunte,

cha aonacuruhane nihanatiin,

'Naaonjoai quete aite,'

naain coitucunaa nainecurene.

'Niheichu

cha coaracuruhane niha natiin

coitucunaa nainecuruhi.

Nabana

canuhacha ichai coaraain,

aonaain coitucuhin

canu rene uuruhane,

acaauru rautaanune coataa,'

naain bihalu Cana Coaunera ere bera inoaensi Isaihasine jaa nainaelu,"

naain aina nerelanaa nichaanune rai bihane baihate:

<sup>16</sup> "Nete laen inara nerausiajeein niha curiquicheein, aon-aaain, coaraain, coitucuhin, naaonjoainchene jaun.

<sup>17</sup> Arajii *profetacuru*, chaen caohachaaain suujua coaraauru cachauru, naaonjoainurine maajeeinte niqiu, caa inaraacha coarai coana jerecurelu. Nete coana nainecurenelu. Inaraacha aonaine maajeein aohana jerecuruhane saijieein aonacuruhilu.

*Temule jaera parabola que irihane biha Jesusone*

*(Mr 4.13-20; Lc 8.11-15)*

<sup>18</sup> Aonacuchene caa temule jaera que cuaain araai laurii *parabola* que irihanune be inara raite coitucuhiche.

<sup>19</sup> Cana Coaunera Cojoanonaa que erenaa aonacuruhane saijieein coitucuhichurute, nii bero cuhane nalunaa temule ucuhe rijijieein neeure, acaauru suujua cuhane Cana Coaunera beratenojoi erenaa jereein aonacuruhane niha natiin, turuha acaauru suujua cuhane baasone jianeraauru ne.

<sup>20</sup> Jana nii ajeri ichoae nalunacaauru temule ucuhecurute, Cana Coaunera ere aonaain esenetaain corojeein jereein raauruhane jana,

21 inae cairichaaerinojoneein mucunojoineturuhane coina arinojoneein neeuruhane, canu esenetaain neeuruhane jianeraauru rijijie.

22 Jana nii ajaena jana temunojoin temule ucuhecurute, Cana Coanera ere aonacuruhane saijieein, nechu jataain caa atane que netiin necoriquijiaain, raotiin nenea coacuhin, niicha que suujua cuaain necoritanacaauru rijijie. Niite, inae nii erenaa esenetaauruhane jianein, leeochoaauru relaauruhane jianein neeure.

23 Nii atane caohacha que temunojoin temule ucuhecurute, Cana Coanera ere aonaain leeochoaauru relaaain, naaonjoaain nenacaauru rijijie. Acaaurute, nii le ucuhecuru caje lefasha ucuhennein, saotachoonca ucuhennein, nichata choonca ucuhennein, naaonjoaain le tijiriichuru caje teeurera rijiichure,” naain aina nerelanacaauru rai beebeje Jesoso.

*Tirico temuurerera rai ajaena baaso temuha acaauru que nejeratenaane*

24 Niritiinte, nacoaaunein leeochoa nereretanaa que cuaain acaauru rai ereerejein:

“Cana Coanera Cojoanonaate, leinjiin cache, rai nocoana jana cachaauru que tirico temueratihane jana,

25 temuhin satiin sinihuruhane tonohana, nii tirico niicha temuuri jana turuhin ajaena baaso temuha leinjiin cache acaauru que nejeratenaane rijijie.

26 Nii jana inae omarohin, inae inaaca nii tiricone jana inanacae nii ajaena baaso netonai.

27 Nitohanihane jana coaraainte: ‘Curuaanaa, chasiinna temule caohacha ucuhe nejesina temuerateeilune saijieein, jana mituhe ajaena baaso,’ naauruha nii ocoana erora rene turuhin nii amihanenacaurune janate:

28 ‘Chunocoha canu que nejeratenaate, nii ajaena baaso temucaiha,’ naa acaauru rai nii ocoana erorane janate: ‘Ta, nii ajaena baaso rocohin jaohacaanune jereeine,’ naain baajauruha nii amihanenacaurune jana:

29 ‘Niriimiin, nii ajaena baaso rocohalaaainte tiricone maa-jein rocoriquiche.

30 Nirijieein ecu neein jiniiquiin omarocurumiin, tainaca que tihane reentiaain. Inae tainaca que tihane banane jelai tein nii ajaena baaso raain, jelai tein tirico raain rucuhacaaune jaa cuhane rucujueein, nii ajaena baaso jelai tein mocoheratereeeunni,’ nae nii ocoana erora,” naain cachaauru rai beebeje Jesoso.

*Mosatasa ucuhe rijiiicha Cana Coanera Cojoanonaane que erenaa parabola*

*(Mr 4.30-32; Lc 13.18-19)*

<sup>31</sup> Niritiinte nacoaauneein:

“Cana Coaunera Cojoanonaate leinjiin cacha, rai nocoana jana mosatasa ucuhe temuhera rijijie.

<sup>32</sup> Esinae rauhijiriinte, jataain leeochoaauru temule ucuhecuru amurijiriin aansijian rai nucuhene saijieein, inae omarohane leeochoaauru ocoana jana nenacaauru temulecuru amurijiriin fohecane, rai nunecuru que tajenajaanu ichacure tajaacuru,” naain nereretanaa que cuaain beebeje cachaauru rai Jesoso.

*Faan jorerera rijiiicha Cana Coaunera Cojoanonaane que erena parabola*

*(Lc 13.20-21)*

<sup>33</sup> Niritiinte: “Cana Coaunera Cojoanonaate nichata sajeein coujunaca que arina coujunacateriin rai jorerera que jasiiteein tabaain nii coliha jorereein caje arajiin faan jaa leinjiin enene rijijie. Nii neleeriha tabaain colihane coina nena jorerera rijijieeinte, cacha ichao sacuritaain nefaane coina nena ne Cana Coaunera Cojoanonaa,” naain beebeje Jesoso.

*Nereretanaa rijijiei parabola que ereerejihane biha Jesusone*

*(Mr 4.33-34)*

<sup>34</sup> Nitohaneeinte, nereretanaa rijijiei *parabola* nejesina que cachaauru relae Jesoso. Chabana nii *parabola* colane irihe cachaauru rai.

<sup>35</sup> Nitohaneeinte:

“Cana rai chauratane coaunaa Cana Coaunerane caje coauneente, satiin asinojoneein nena que erereein, nereretanaa rijijiei *parabola* cuaaincha,”

naain beeuruhalu Cana Coaunera ere bera inoaensihuru *profetacurune* nainaane coina nitohanein ichae Jesoso.

*Tirico temuurerara rai ajaena baaso temuera que irihane biha Jesusone*

<sup>36</sup> Nitohaneein inae cachaauru rai irihane nainainte, acaauru rai nocoein jelai caje cuhin nii neeuruhane jaan loreri asaee enoha Jesusone jana, rohan nichuuntaain nii tirico cocana jana ajaena baaso temuhera que cachaauru rai iriha Jesusone bajaacaanu caje aina nerelanaa nichaanune.

<sup>37</sup> Nii jaunte: “Nii temule ucuhe caohacha temuherate canu- Cacha Calahineein nejanoanaanichaaunne rijijie.

<sup>38</sup> Jana nii ocoana que caitoonjoate, cana rai chauratane ne. Jana nii temule ucuhe caohachate, Cana Coaunera esentaain aina ijiin rai Cojoanonaa que neenihuru ne. Jana nii ajaena baasote, moconajaera letononeein nenacaauru ne.

<sup>39</sup> Jana nii ajaena baaso temuherate, acaauru que nejeretanaa moconajaera ne. Jana nii taojaera que aitocooaunnete,

inae ecu tihane bana sarichaaain cana cojoanonaane que aite. Jana nii taain rucuheraaurute anjeraaurune.

<sup>40</sup> Charijieein teeinti, ajaena baaso taojiaain mocohaca, nii rijijieeinte inae saa cana janonaane bana moconojoiniha cuurureein osa que leeochoaauru saruhin nenacaauru moconajaera aina.

<sup>41</sup> Nii banane canu- Cacha Calaohineein nejanoanaanichaaunne canu rai anjeraauru letoareeunni, nii cana cojoanonaa que nenacaauru baaso ichaain, osa que leeochoaauru saruhin, naaonjoaain nenacaauru raain

<sup>42</sup> usi charijibana jacanaacharanejeein nenea jana jaonajaauruhane, ecu neein auhaauhaquiin chanaaurureein.

<sup>43</sup> Inae nitohanihane banate, esinae rauhijiriin Cana Coaunera jerenohin ichaain tonoraain nenacaauru, aiha enotone tocohaneein jiquihaquiin conohin niha cuurureein, canu Inaca Cana Coaunera Cojoanonaa que neein. Caa aito-coaunne aonacurumiin irichonacaauru.

*Oro rijijieein nenea coreti tesoro rijicha Cana Coaunera Cojoanonaane*

<sup>44</sup> Charijieein teeinti, leinjiin oro rijijieein nenea coreti tesoro eruha leinjiin cachane, nii eruhane jaaun tein conautein ratiriin, rachoojoein jitariin niicha sirii rucuhele que necorete nii cacha, nii niicha eruhi conautihane jaan atane coretihane caina. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

*Oro rijijieein nenea perla coreti rijicha Cana Coaunera Cojoanonaane*

<sup>45-46</sup> Charijieein teeinti, leinjiin recatoon, perla coretiin nenea ariirijieein amuhin, inae nii perla coretiin nenea eruhane, jataain nii corei eruhane coitucuhin rachoojoein cuhin, rai rucuhele que jitariin necoreteein, nii niicha eruhi perla corete nii recatoon. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

*Rede que ate mucuhera rijicha Cana Coaunera Cojoanonaane*

<sup>47-48</sup> Charijieein teeinti, nemuri cuhane rede jaaoruha ate mucuurerane jana, itolere ate mucuha nii niicha jaori redene, inae memoha ate caaunne jana carene ichoae inaaain ate caohachaauru janijiin omari cuhane tein, nii baasooru foranacaauru jaaore nii ate mucuurerana, nii rijicha Cana Coaunera Cojoanonaa.

<sup>49-50</sup> Nitohaneein techu, inae cana janonaa satono que turuhane bana, caohachaain ichaonacaauru janijiin raain,

baasoneein ichaonacaauru jaaorureein usi chariji bana ja-caelanaala nenea jana anjeraauru. Nii banate chanaa cuurureein auhaauhaquuin,” nae aina nerelanaa nichaanune rai Jesoso.

*Canacaanu relaane jaan aonaain coitucuhacaanune bajaa Jesosone*

<sup>51</sup> Niritiinte: “Caa inara rai caitoonjoan aonaaina coitucuhiche,” naain canacaanu caje bajaa Jesosone janane: “Enjeen, aihacaanura Curuaanaa,” naacaanu.

<sup>52</sup> Nii jaunte: “Coaracuche nachuhinti leinjiin Cana Coaunera rai rauhi que cacha relaera- cacha relaanete, ‘Naaonjoaan caa Ena Turunaa Cana Coaunera Cojoanonaa Caohacha’ naain beein, ‘Naaonjoaan nii rauhi inoaesii’ naain nii ena canuhacha bei Cana Coaunera Cojoanonaa aina rauhi inoaesii que aitiin caohatiin cachaauru rai beein cachaauru relae,” nae Jesoso.

*Rai nataneu Nasarete turuha Jesosone*

*(Mr 6.1-6; Lc 4.16-30)*

<sup>53-54</sup> Inae nii nereretanaa rijijiei *parabola* biha cachaauru raine nainainte, jelai caje canacaanu aina amuhin rai nataneu turuhin, ecu nenea sinacoca asaae enohin, ecu nenacaauru cachaauru relaane nunuhete Jesoso. Nii janate cojoelatiin: “Chuna jataain cojoelanaacojoai ichaane coinane maajeein nerelaete toritiin itolere coitucuhin ere.

<sup>55</sup> Tana enuha caje itolere ichana inaera cacha calaohi nihane, jana rai neba niha Marihane. Nii jana rai nejeraauru niha Saantiaao, Jose, Simoon, Jodasi, naaonjoainurine.

<sup>56</sup> Jana rai baihuru netonai cau cana aina ichaaoruhane. Chaa cajena jataain nainain itolere coitucuhin aite,” naaure ecu neein aonajeerera cachaauru.

<sup>57</sup> Niritocuruhane jaunte inae Jesoso esenetaain nere tonorana jerecurene cachaauru. Nii jaunte acaauru rai:

“Chunijiun cuhane jaaurute niqii leinjiin *profeta* que suujua acateein coitucuure laurinelanaala nenacaauru cachaauru. Nete laen esenetaaurene laurineein nenacaauru naraaichuru. Niheichu nii loreri ichaohane jaun nenacaauru niha natiin,” nae cachaauru rai Jesoso.

<sup>58</sup> Nii jaunte ecu arajiin cojoelanaacojoai ichaenelu, esenetaaureniha ecu nenacaauru cachaaurune jaun.

## 14

*Oha Joaan Baotisitane*

<sup>1</sup> Nii banate, Calileea batane curuaanaaneein niha Erodesine jaun, nii amuhemuheca Jesosone coitucuriin:



<sup>2</sup> “Acate, Joaan Baotisitane. Inae o caje ichanacaihara. Acanihane jaunte, nii cojoelanaacojoai ichana nainera,” naain jetao ereereje Jesoso que rai letonocuru rai.

<sup>3-4</sup> Rai nocoala Ferifi comasai Erodiasi siriha comasaine que Erodesine jana jetaote: “Jiaonriha chochoala comasai sirii ii comasaine quera,” naa Joanne coreniha jetao, caresero cuhane Joaan enoaeratelu *cadena* que ichoarateein Erodesi.

<sup>5</sup> Nitohaneein caresero cuhane enoaain jetaote, Joaan sohin jaonaa jerihane niha natiin, ichana nainenelu Erodesi, satiin cachaauru Cana Coaunera letononiha Joanne esenetaauruhane jaun, cachaauru coasiha.

<sup>6</sup> Nejetaote, nejanoaane bajaanaa bitoaane coina beseta ichaa Erodesine jana jetao, nii beseta bitoaa turunacaauru acatiha raansae nii Erodiasi cacunu. Nii acaauru acatiha raansaa nii ranunane coaraain jetaote, jataain rautatiin coaraane jaun,

<sup>7</sup> niicha jerei bajaa caje nii ranunane, Cana Coaunera notaracae rai tihane coina aite Erodesi.

<sup>8</sup> Nii jaun jetaote, rai neba suujuatenojoinnein Erodesi rai: “Canu rai aihane, leinjiin ojoaichu cuhane Joaan Baotisita coturi uhaau caraicha,” naa nii ranunane jaun

<sup>9</sup> inaderae *rey* Erodesi. Nejetaote, satiin niicha cotihacuri acatiha tein Cana Coaunera notaracae, niicha jerei bajaa caje nii ranunane rai tihane coina aitohane jaun,

<sup>10</sup> caresero cuhane niha Joanne jana coturi moloherateein raerate.

<sup>11</sup> Nii jaun jetaote, leinjiin ojoaichu cuhane Joaan coturi amaain teuruha nii ranuna raine jaun, neba rai te nii ranuna.

<sup>12</sup> Inae nitohaneein teratiha Erodesine coitucuhinte, Joaan jaberoco raain conauteein ratiriin, biha uure Jesoso rai Joaan sacuureraauru.

*Saoqui oaraancai cacha coroaatiha Jesusone  
(Mr 6.30-44; Lc 9.10-17; Jn 6.1-14)*

<sup>13</sup> Nii jaunte, rai beeuruhane caje coitucuhin, nii nihane jaan jelai caje canacaanu aina amuhin, canacaanuhacha aina leinjiin bote cuhane fauhin, neniha cachane jaan cue Jesoso. Nete nii bote cuhane fauhin amuhacaanu Jesoso ainane coitucuuriin, neseeuuru cajeeuru uhacoaain sacuure atanechoae uhi cachaauru.

<sup>14</sup> Inae niicha coinetihu turuhin, bote caje fauhin, iniha cuha Jesusone janate, najiniha cunaitenacaauru uhaain arajiin neuruha cachaaurune jaun, cairichaaajoaain acaauru coaraane jaun, niicha uhaauri cunaitenacaauru rautae Jesoso.

15 Nii jana, inae nocohena jerihane jaunte, Jesoso rohan nichuuntaain: “Chajaain caa cachaauru rai necoeeute, nena-jaun cauha cuuruhinete, ucuhae rai lenone coretecurumiin. Coatiha caa jana ichaohi cache,” naacaanune jana:

16 “Chajaain inara acaauru coroaateeeuche. Coatiha cao-hacharihei ena caauruhane,” naa canacaanu rai Jesusone jaun:

17 “Nihei canacaanu rai lenone. Saoquijieein faan, itaque jerajejeein ate, naajeeinchate neeje,” naacaanune janate:

18 “Cajiha carai uhauuche,” naain

19 omane choae nelauriaauruha cachaaaurune coina aitiin, biji cuhane nii ate aina faan mucuhin teberiaain: “Nari-hara Cana Coaunera,” naain Cana Coaunera bajaain cataun nii faan teruhin aina nerelanaa nichaanune rai te Jesoso, chaluhaacaanune coina.

20 Nii jana satiin cachaauru naineein chaluhaacaanune janate, que lenoneein obeecuruhane jana, jaiti cautihane jaun, rai caute que lechoonca coroata omarii, omari memo-aure.

21 Canaanaihunru aina enecuru janijilanaala, quichaauruhacha janijiinte, saoqui oaraancai cachaauru nii lenonecure.

*Acau ichoae amuha Jesusone*  
(Mr 6.45-52; Jn 6.16-21)

22 Nii baihate, ecu nedaaain cachaauru rai necoihane tonohanau, bote cuhane fauhin ichoaichaniha nemuri jera jaaohacaanune coina aina nerelanaa nichaanune letoae Jesoso.

23 Inae cachaauru rai necoihane baihate, jelai caje amuhin, acaachanejeein ichatane ucuuno que cue, ecu Cana Coaunera bajaane coina.

24 Inae nocohejihane janate, cuu acaachanejeein niha Jesoso nii ichatane ucuunone jana, inae coriaeneein cue nii bote, atane auha caje. Nii jana, mijiaaeneein uha cujuana aina fichafichanaane jaunte, amusine nii bote.

25 Nii jana inae janonaa jerihane janate, nii ichatane ucuuno nihane caje uhin, canacaanu caaijie uhe Jesoso acau ichoae rurujueein.

26 Nii jana acau ichoae rurujueein uhane coaraainne, coasiha cojioriin: “Nechu aansai coitucuchuhite aicha,” naacaanu aina nerelanaa nichaanune.

27 Nii jaunte: “Coa nesooneetoache. Canune aihunra,” naain canacaanu rai iriha Jesusone jaunte:

28 “Ti aaine, jereune ii rene tiaain uhe acau ichoatera Curuaanaa,” naa Jesoso rai Fedorone jaunte:

29 “Chajaaujian,” naa Jesusone jaun, bote caje fauhin acau ichoae cuhin rurujueein Jesoso rene cuhin Fedoro.

<sup>30</sup> Nete jataain mijjaaneein uha cujuana aina fichafichanaane coaraain, nesoonetohane jaun, asaun naluha cue Fedoro. Inae naluhane jaunte, nesooone caaun auhaquiin: “Curuaanaa, canu comaleeu,” naa Fedorone jaunte,

<sup>31</sup> biji que mucuhin: “Chanuna jataain cha esenetaeneei. Chanuna necoatohi,” nae Jesoso, Fedoro rai.

<sup>32</sup> Inae bote cuhane faauruhane rijieeoritiin, nesuruha nii fichafichanaa aina cujuanane janane,

<sup>33</sup> Jesoso acatiha neseonraain: “Iite esinae rauhijiriin Cana Coaunera Calaohineeincha,” naacaanu satiin nii bote cuhane cuinichaanune.

*Jenesaree batane que turuhin, ecu nenacaauru cunaite-nacaauru rautaa Jesosone*

*(Mr 6.53-56)*

<sup>34</sup> Inae nii nemuri jerau turuhinne, Jenesaree batane que turuhacaanu.

<sup>35</sup> Nii Jenesaree bataneu turuhacaanune janate, Jesoso coitucure ecu ichaonacaauru cachaauru. Nii jaunte, jelai batane sacuritiin ecu turuha Jesosone coitucuhin, rene cunaitenacaauru uhaacoaain

<sup>36</sup> turuhin, caje acaauru rautana nainihane bajaare, jeriha Jesosone rai cajione auha mucuuruhane coina. Nii rai cajione auha mucuurera cunaitenacaaurute satiin ner-  
autaaure.

## 15

*Baasoneein cacha ichao tera que iriha Jesosone*

*(Mr 7.1-23)*

<sup>1</sup> Nii janate, Jerosaleen caje turuha uure Jesoso coaraa, Moisesa aitoonjoan rauhi que cacha relaaureraauru aina fariseeocuru tabaauru. Acaaurute, Jesoso rohan nichuuntaain:

<sup>2</sup> “Chanuna aihuruhalu canacaanu inoaesihurune rijijieein neeurene caa ii aina nerelanacaauru. Chanuna jeriha canacaanu ichaone rijijieein lenonecuruhane ajiniha, jauriaanejeein biji culeecurene,” naain Jesoso caje bajaauruhane janate:

<sup>3</sup> “Chanunajian inara netonai Cana Coaunera aitoonjoa tonoraelanaala, inara ichaohacha sacuhiche.

<sup>4</sup> Nitohaneeichene jaunte: ‘Ii inaca, ii neba, naaonjoainuri ere tonoraain caohachaaain ichaaoche. Necha ansai, naain baasoneein rai inaca, rai neba, naaonjoaain que ereein neite ateinanohiniha cureein,’ naa Cana Coaunera Quiricha Inoaensi cuhane natiin tonoraelanaala ichaohiche.

<sup>5-6</sup> Cana Coaunera Quiricha Inoaensi cuhanete niqui ne rauhi, satiin cacha, rai fojiaraauru rai cha teein nihane coina.

Nete inara: ‘Coatiha inara rai cha tenaa nainihaaun, satiin quiicha sirii inae Cana Coaunera que banijiaaaineein nihane jaun,’ naain erei cacha, inaca, neba, naaonjoain rai chae-lai tenaa nainenihane que aitocoiche. Nitohaneente, Cana Coaunera aitoonjoan que jaolecohin tonoraeneeiche, nechu jataain inara ichaohacha sacuhichene coina.

<sup>7</sup> Esinae rauhijiriinte, necha ansaineein neeichene que aitiin, inara que laenaelu Cana Coaunera Ere bera *profeta* inoansi Isaihasi:

<sup>8</sup> ‘Caa cachaaurute,  
rai nereecha que  
canu coroaajeein neeure.

Jana

acaauru suujua cuhane aihuruhi.

Cacajete

coriaae ne acaauru suujua.

<sup>9</sup> Nii jaun,

nii chaque nelatejeehai,

netaojiaain canu

coroaaecuruhane

nechu jataain acaauru relaauruha cachaaurune

que nejesinajeein ita relajeein

neeuruhane jaun,’

naelu inara que Cana Coaunera Ere bera inoansi Isaihasi,’  
nae acaauru rai Jesoso.

<sup>10</sup> Niritohane baihate, nii ecu nenacaauru cachaauru cotijiaain: “Caohachaain caa inara rai aitocooaunne aonacuchete coitucuhiche.

<sup>11</sup> Coatiha baasoneein cacha ichao aasaehai joaereen lenone canaacha quii. Baasoneein suujua cuhane niicha coacui, nujuae caje mitunaate laen, baasoneein cacha ichao aasaje,” naainte acaauru rai beebeje Jesoso.

<sup>12</sup> Nii janate rohan nichuuntaain: “Nii aitohine aonajeein jataain ii que nererojoecaauruha fariseeocurune aonaaina,” naain caje bajaacaanu aina nerelaa nichaanune janate:

<sup>13</sup> “Niicha temunojoinelanaala nenea ajaenate, cojoaisi aina curuataain rocohin jaoreein Cana Inaca Cana Coaunera.

<sup>14</sup> Aihane jaun, coa acaauru rohecaachete nainaaaurumiin. Maosa rijijieein neeuruhane rijijieein nenacaauru relaeraneein neeuruhane jaunte aitocure. Chaen techu leeocha maosa amanaa jeriha leeocha maosane, jiniiquiin atane jachu cuhane naluhin nitajeeururihane rijiiichuruhane jaun aitocure,” nae aina nerelanaa nichaanune rai Jesoso.

<sup>15</sup> Nii janate Jesoso rai: “Canacaanu rai, nii aitohine jaan beeune coitucuhacaanu,” naa Fedorone janate:

<sup>16</sup> “Inara niha natiin inachura coitucueeneeichete.

17 Tana satiin cacha ujuae cuhane enonaa, cacha suri cuhane cuhin, nii baiha cacha jaberoco caje mituhane coitucuhichene.

18 Jana cacha ujuae caje mitunaate, cacha suujua caje mituhe. Niite laen baasoneein cacha ichao aasaerane.

19-20 Nitohanihane jaunte, cacha suujua caje mituha itolere baasone jaun, sonajaain jaohin, sinijeranelanaala nena ene aina ichaohin, asijiauhin, casejenediin, ita cotaain, naaonjoaan cachanete laen, baasoneein cacha ichao asaaerane. Jana nitohaniha cana ichaone tonoraelanaala cana biji culejelanaala lenonichaane, coatiha baasoneein cana ichao aasaehai," nae Jesoso.

*Leinjiin ene Jorionelanaala nena Jesoso esenetaane*  
(Mr 7.24-30)

21 Jelai caje amuhin Tiro, Sidoon, naaonjoainuri batane nichae cuha Jesosone jaun aina cuhin,

22 inae ecu turuhacaanune janate, eheehequiin: "Curuaanaa Rabiri nefoerate, cairichaaajoaain canu coaraau. Mokonajaera siriha canu cacunune jaunne aitoonchera," nae canacaanu caaijie uhin leinjiin Canaan bene, natane caje uhin ecu ichaonaa.

23 Nii jana inauheneecha aonajian Jesosone jaunne: "Chajaain caa ene rai aitoote amuhine. Nete cana caaijie ujuueein eheeheque," naacaanu rohan nichuuntaain aina nerelanaa nichaanune.

24 Nii jaunte: "Cana Coaunerate rai cachaneein nenacaauru Israeli cocoaichacuru nitajeeuruhane rai nenacaauru reneecha caletoaclu," nae Jesoso.

25 Nete, nacatiha neseonraain: "Canu coroatajaneuchera Curuaanaa," naa rai nii enene janate:

26 "Coatiha caohacharihei Cana Coaunera cachaneein nenacaauru que banijiaain nena ruluhin remaae rijijieein neinequichene rai tihanuchenera," naa Jesosone janate:

27 "Aihachechuhisi niqucha Curuaanaa. Nete remaae rijijieein canacaanu coaraaichene niha natiin, atiin canu coroatajaneuchera Curuaanaa," naain Jesoso tonorae nii ene.

28 Nii jaunte: "Quesenetaaine corenihate, inae ii jerenohi rijijieein nerautareein nii ii cacunuchera," naa Jesosone rijieoritiiin, inae nerautae nii rai cacunu.

*Arajii cunaitenacaauru rautaa Jesosone*

29 Jelai caje amuhinte, Calileea conemuri auhaniha turuhin, ichatane ucuunno que iniin, ecu nelauriaain lauheque Jesoso.

30 Nii janate, rene netaojiaaure arajii cachaauru, bacosacuru, maosacuru, biji que jiuronacaauru,

ereñaacharaauru, leeochoauru arajii cunaitenacaaurune maajeen uhaacoaain, Jesoso acatiha tenajaauruhane acaauru rautaane coina.

<sup>31</sup> Nitohaneein rautanaacane janate, inae nerautaain, nichaauraaain, amuure bacosacuru, maosaneeuruhane caje conoe maosacuru nota, inae nerautaaure biji que jiuronacaauru, ereñaacharaauru niha natiin inae ereeure, naaonjoaauruhane coaraainte, jataain cojoelatiin, Cana Coaunera Israeli Coaunera coroaecure nii ecu neein coarajeurera cachaaauru.

*Jena oaraancai cachaaauru rai lenone faa Jesusone  
(Mr 8.1-10)*

<sup>32</sup> Nii janate, aina nerelanaa nichaanune cotijaaain canacaanu rai: “Inae jataain cairichaojoaain caa cachaaauru coaracaauun. Inae nichata janoha cau canu aina neeuruhane. Nii jana nihei acaauru lenone. Naininaaun coroatenajaelanaala acaauru letoaanu acaauru nenajaunne. Mijiintena caaun aterocuruha bero cuhanene coataa,” naa canacaanu rai Jesusone jaunne:

<sup>33</sup> “Chuna caa araaine cache rai lenone erurichaache, neniha cachane jaau nihacache natiin,” naacaanu aina nerelanaa nichaanune janate:

<sup>34</sup> “Inatajajeein nihun faan siriquiche,” naa canacaanu rai Jesusone jaunne: “Caainsinejeein faan, coroatajajeein ate, naajeichate neeje,” naacaanune janate,

<sup>35</sup> atane ichoae nelauriaauruha cachaaaurune coina aitiin

<sup>36</sup> rai biji cuhane faan aina ate mucuhin, Cana Coaunera bajaane baiha, cataaun taturiin aina nerelanaa nichaanune rai te, cachaaauru rai chaluhaacaanune coina.

<sup>37</sup> Nii jaunne, satiin cachaaauru rai chaluhaacaanune jana, inae nainaaain lenonecuruhane saijieein cautihane jaun, rai caute que caainsine omari memoaaure.

<sup>38</sup> Canaanainuru, enecuru, uha elone jaun tabaacoaa nu-cuhecuru aina uha cujuana tabaine janijilanaala quichaauruhacha janijiinte jena oaraancaure nii lenonenacaauru cachaaauru.

<sup>39</sup> Nii lenonecuruha cachaaaurune baihate, cachaaauru rai necoein, leinjiin bote cuhane fauhin, Maadala batane que cue Jesoso.

## 16

*Cojoelanaacojoai icharatecuruha sadoseeocuru aina fariseeocurune*

*(Mr 8.11-13; Lc 12.54-56)*

<sup>1</sup> Nii janate, Jesoso coaraa uure fariseeocuru aina sadoseeocuru. Nitohaneeinte inae rene turuhin coulurujueeruhane jaanu leranu ariha, acaauru rai cojoelanaacojoai ichaane coina aitocure. Chaen esinae rauhijiriin, Cana Coaunera letono nihane coitucuuruhane coinane maajeein.

<sup>2</sup> Nete acaauru rai: “Charijieein teeinti, sonaina cafarane nocohaca dedene: ‘Caohatorichaain janonaa,’ naain ereeiche.

<sup>3</sup> Jana, janone cafarane nocohaca dede nijichoriaaajoaaine: ‘Urichaain elo,’ naain ereeiche. Nitohaneein dede caje itolere coitucuhin naaonjoaainchene natiin, chanuna jana: ‘Naaonjoaane coinane caa aicha,’ naain caa enene cojoanonaa coitucunaa naineneeiche.

<sup>4</sup> Caa cachaauru nechuu aansaineein suujua coitucuelanaala nenacaaurute, cojoelanaacojoai ichacaaunne coina canu rai aitocure. Nene inae acaauru que coaratesihalu Jonasin jaun inae nenacaeneein acaauru que cojoelanaacojoai coaratenaa jereneen,” naane baiha acaauru ratiriin, jelai caje amuhe Jesoso.

*Faan jorerera- lebadora rijiicha fariseeocuru ichaone  
(Mr 8.14-21)*

<sup>5</sup> Inae Calileea conemuri jerau cuhacaanune jaun faan baitein ratirihacaanu aina nerelanaa nichaanune jaunte:

<sup>6</sup> “Aonacuche. Faan jorerera rijiicha fariseeocuru aina, sadoseeocuru ichaone que necohalajihucho,” naa canacaanu rai Jesusone jaunne:

<sup>7</sup> “Chanuna caa aite. Faan uhaenihacachene jaunna caa aitohate,” naacaanu ita raine aonajeeinte:

<sup>8</sup> “Chanuna faan uhaeneeinchene que aitocoiche. Jataain asaeriinchate quesetaaiche.

<sup>9</sup> Tachu jaiti nainaquiche taolu saouijiei faan chaluheratihanu, saouii oaraancai cache raine jana, inata omariin rai caute taojiaaichelu.

<sup>10</sup> Niheichu taolu, caainsinejei faan chaluheratihanulu jena oaraancai cache raine coaauheeiche, inata omariin jana rai caute taojiaaichelu.

<sup>11</sup> Chanuna faan que inara rai aitenihanune que naineneeiche. Faan jorerera rijiicha fariseeocuru aina sadoseeocuru ichaone que necohalajihucho,” nae aina nerelanaa nichaanune rai Jesoso.

<sup>12</sup> Nii jaunne, faan jorerera que aitelanaala, cache re-laauruha fariseeocuru aina sadoseeocurune que aitoha canacaanu rai Jesusone que nainacaanu.

*Mesihasi niha Jesusone biha Fedorone  
(Mr 8.27-30; Lc 9.18-21)*

13 Inae Filipo Sesareea batane que turuhinte, aina nerelanaa nichaanune rai: “Tonacuruha cachaauru, Cana Coaunera Calaoheinein cacha caje nejanoanaa nichaaunne que,” naa Jesusone janate:

14 “Tabaaurute, Joaan Baotisita niha, ii beure. Jana tabaaurute, Irihasi niha, ii beure. Jana leeochoaurute, Jeremihasi niha ii beure. Jana tabaaurute, chunocoha Cana Coaunera ere bera *profetane* caiha, naaure,” naain tonoraa-caanune janate:

15 “Tonaquiche jana inara. Cha nichaaun jana Canu inara rai,” naain canacaanu caje bajaa Jesusone janate:

16 “Iite esinae rauhijiriin ichaaohin nenea Cana Coaunera Calaohi Mesihaseinei,” nae rai Simoon Fedoro.

17 Nii jaunte: “Raotojoeinte rausiaaenoinenein neei, Jonasi calaohi Simoon. Chuni cacha ichei benihane janate, Canu Inaca Cana Coaunera ii que canu coitucuerate.

18 Jana iite Fedoro neei. Canune ichei aitoon. Iite canuhacha tei ajeri rijijieein, canu coitucuruha canu cacha-neein neenihurune coina icharaneein neriquiin. Nii ii que canuhacha icharatei amuritonaa nainerinaain chuni, on-aaniha natiin itajenaa nainerinaain.

19 Ii raine, Cana Coaunera Cojoanona que nenea naineeine coina, ichei chabi tereeeuni. Caa chauratane que netiin, iicha ichaite, Cana Coaunera Cojoanona que nereein. Jana caa chauratane que netiin, jaolecohine jaante, Cana Coaunera Cojoanona que tihane bana jaolenereein,” naa Simoon Fedoro raine baihate:

20 “Jiaonriha chuni rai: ‘Acate Mesihaseine,’ naain beiche-ene,” nae aina nerelanaa nichaanune rai Jesuso.

### *Orichaaine biha Jesusone*

(Mr 8.31-9.1; Lc 9.22-27)

21 Inae mainajiriin cairichaururichaain Jorioocuru bichauhenaauru, saseredotecuru curuaanaacuru, Moisesa rai Cana Coauneraacha tei rauhi que cacha relaaaureraauru, naaonjoainurine catainaane jaunte, Jerosaleun curichaaanne beebeje aina nerelanaa nichaanune rai Jesuso. Sohini jaoruhane nichata janone cuhane ichanarihanine que aitohane jaunte,

22 jelai Jesuso teteriin: “Jiaonriha nitohanein chetecuruhanane jeriha Cana Coaunerane Curuaanaa. Nitohanein chetena nainecuruhi jerihane,” naain caohatiha Fedorone janate, nauriteriin Fedoro coaraain:

23 “Naain cacaje amuura moconajaera. Nechu canu cairichaeranu quete aitohicha. Cana Coaunera jerenohin aina, cha coitucunaa nainiheeii. Cachauruhacha jerenohinchate coitucuujeei,” naane baihate:



<sup>24</sup> “Chunocoha canu esenetaain, canu aina nerelanaa jerihane, rainuhacha que niicha coacuhi jianein, itolere necairichanaa abaataain canu sacuhine.

<sup>25</sup> Jana canu colane rai nichao ichoteratena jererate, rai nichao itajereein. Jana, canu coreniha necairichanaate, rai nichao ichoteratereein.

<sup>26</sup> Coatiha chaque nelatihei, itolere niicha jerei, niicha coacui sirihane nihanatiin, nichao itajiha cachane. Inaaonjoain coretihane niha natiin, nii nichao ichoteratena nainihei cha.

<sup>27</sup> Inae Cojoanonaa que turuhane banane turuha ureeunni esinae rauhijiriin canu- Cana Coaunera Calaohineein cache caje nejanoanaa nichaaunne, canu Inaca Cana Coaunera necaohacha que necaohachaaain, rai letonocuru anjeraauru aina jiniiquiin. Nitohanihane banane, le cachaauruhacha ichai cainareeunni acaauruhacha ichai rijinananaain.

<sup>28</sup> Cau caa ena nenacaauru tabaaurute oorenereein, itolere curuaanaa neein nihanune coina turuhanu cache caje nejanoanaa nichaaunne Cojoanonaa coaraane reentiaaonjoain,” nae aina nerelanaa nichaanune rai Jesoso.

## 17

### *Nejelauneein necoriha Jesoso jaberocone* (Mr 9.2-13; Lc 9.28-36)

<sup>1</sup> Nitohaneein atinaaururichaaainne bihane baiha, saota janonejeeinte, Fedoro, Saantiaao, Saantiaao ocoala Joaan, naaonjoainuri amaain jelai acaauruhacha aina jataain ucuuneein nena chatane ucuuno que cue Jesoso.

<sup>2</sup> Inae ecu turuhin jetaote, acaauru acatiha netiin, necoriha Jesoso jaberocone jana, rai nomeri netonai enoto tocohaneein jiquihacohane jana, rai cajione netonai cono tocohaneein jiquihaque.

<sup>3</sup> Nitohaneein necoriha nomeri aina rai cajionene jana jetaote, Jesoso rene ecocohin aina ereeuruha Moisesa aina Irihasine jana coarajeeure.

<sup>4</sup> Nii jaun jetaote Jesoso rai:

“Curuaanaa, caohatoha cau nihacachene. Ii jereeinene nichatajaain loanari jareeunni, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao rai Fedoro.

<sup>5</sup> Niritiin ereereeca Fedorone jana jetaote, luhecotariin jiquihaquiin acaauru conaacotaa dede sacarine jana jetao: “Caate jataain belain janijiin quicha cocoinai Canu Calaohi ne. Rai nere tonoraain neeuche,” naain jetao toni nii dede sacari jana erena.

<sup>6</sup> Niritiin toniha erenaane aonaain jetaote, atane ichoae comoore jataain coasina caaun, nii nichatajaain aina cunaacaauru aina nerelanacaauru.

<sup>7</sup> Nii jana jetaote, acaauru rene nichuuntaain mucunajaain jetao:

“Nimichucuche. Coa casihache,” naa Jesuso acaauru raine jana,

<sup>8</sup> coaracuruhane jana jetao, inae neniha chuni ainane jana, jelai acaachanejeein ecu ne Jesuso.

<sup>9</sup> Inae nii ichatane ucuuno caje jeelaiha fauha cuuruna jaun jetaote: “Jiaonriha chuni rai caa inaraacha coarai beeichene, Cana Coaunera Calaohi cachaneein nejanoanaa nichaaunne ohanune caje ichanacaunne reentiaain,” naa aina nerelanacaauru rai Jesusone jana jetaote:

<sup>10</sup> “Chanuna jana chaen: ‘Irihasite jaurihanejeein turuha ureein,’ naaure Cana Coauneraacha tei rauhi que cacha relaureraauru,” naain jetao Jesuso caje bajaure aina nerelanacaauru.

<sup>11</sup> Nii jaun jetaote: “Esinae rauhijiriin Irihasite ichoaichaniha turuha ureein. Acate itolere rucuhereein.

<sup>12</sup> Nena canu inara rai aitoon. Nii Irihasite inae ichoaaichaniha turuhelu. Nete, acanihane coitucuelanaala que nocoatijaain, mainajeriin cairichaaurelu. Nii rijijieeinne acaauru bijiu necairichaa cureeunni Cana Coaunera Calaohi cachaneein nejanoanaa nichaaunne,” naa acaauru rai Jesusone jana jetaote,

<sup>13</sup> Joaan Baotisita que, acaauru rai aitoha Jesusone que nainacure aina nerelanacaauru.

*Suujua cuhane coitucuchuhi siricha canaanai rautaa Jesusone*

*(Mr 9.14-29; Lc 9.37-43)*

<sup>14</sup> Inae nii cachaaauru aina nihacaunune jaan turuuruhane janate, Jesuso rohan nichuuntaain, nacatiha neseonraain:

<sup>15</sup> “Curuaanaa, cairichaaajoaain canu calaohi coaraau. Araain saainte mijiaaineein mucuha rai cunaine, usihanau-niha natiin comohin, acauhanau niha natiin naluhe.

<sup>16</sup> Ii aina nerelanacaauru raine niqui teeun, nete rautasihurene,” nae rai leinjiin cacha.

<sup>17</sup> Nii janate: “Cha esenetaain, caohachaain suujua coaranacharaauru cachaaauru. Cha carajaneaina inara aina neein inara relain, inara abaantareeun. Cajiha canu rene nii canaanai uhaauche,” naain

<sup>18</sup> nii canaanai caje coitucuchuhi sitaa Jesusone rijieeoritiinte inae nerautae.

<sup>19</sup> Nii baihane, jelai Jesuso teteriin: “Chanuna jana canacaanu coitucuchuhi sitanaa nainesinihacaanu,” naain Jesuso caje bajaacaanu aina nerelanaa nichaanune janate:

20 “Jataain aasaaeriin esenetaaichene jaunte, rautana nainesineeiche. Esinae rauhijiriin mosatasa ucuhe tabaaine-jeenijin esenetaaichene jana nihanete, caa ichtatane ucu-unno rai: ‘Caalai caje amuhin, tajiha cunihun,’ naaichene amure jelai caje. Nihei chanerihei inara rai cha, rauhijiriin esenetaaichene.

21 Nete laen, catohanei moconajaera letono, cana suri couu neein Cana Coaunera bajaee bajajeein sitanacai ne,” nae aina nerelanaa nichaanune rai Jesoso.

*Caa quete orichaainne be coroata saain Jesoso.*

*(Mr 9.30-32; Lc 9.43-45)*

22 Inae nii canaanai caje coitucuchuhi sitaane baiha, jiniiquiin Calillea batane que amuhemuhecaanne janate, aina nerelanaa nichaanune rai: “Cana Coaunera Calaohi cachaneein nejanoanaa nichaannete necha aansaineen nenacaauru cachaauru bijihu canu tiha cuurureein,

23 casohin cajaanuhane coina. Nena, nichata janone cuhane ichanareeunni,” naain aina nerelanaa nichaanune rai biha Jesusone jaunne, jataain inaderaacaanu.

*“Coriqui tihana Teenforo rai nii inara relaera,” naain caje bajaauruhane*

24 Niicha relainichaanune aina jiniiquiin Caferenaon turuha Jesusone janate, Fedoro coaraa uure, Teenforo asaae cacha caje coriqui bajaaureraauru. Inae Fedoro rene turuhinte: “Coriqui tihana Teenforo rai nii inara relaera,” naain caje bajaauruhane janate:

25 “Ejeen, coriqui tiha,” naain acaauru tonorae Fedoro.

Nii janate inae loreri asaae enoha cuhacaanune jana, Fedoro rai: “Tonaai iite Simoon. Charijihuru caje coriqui bajaauere caa chauratane que nenacaauru cachaauru curu-aanaacuru. Rai lauri cajena. Ainihane, laurine lanaala nenacaauru cajena,” naain bajaa Fedoro caje Jesusone janate:

26 “Laurine lanaala nenacaauru cajete bajaauere,” naa Fedorone jaunte: “Nitohanein, acaauru lauri coretena nainenihane chujian, cana netonai coretena nainerihaaca.

27 Nete nabana chunocoha acaauru caje nena baijiaera tocohanihacane coataa, caohachae coretichaane. Chajaain taa nemuri cuhane ate cojunihu. Chaen jauriaanejeen dadaera ate raain, rai nujuaan cuhane coaraainete, cuhane nereein coata caje coriqui. Acaachate nainejereen que canu rai aina ii rai *impoesto* coretichaane. Chaen amaain coretenihun,” nae Fedoro rai Jesoso.

# 18

*Charijicha jataain nelateineein ne Cana Coaunera Cojoanona que.*

*(Mr 9.33-37; Lc 9.46-48)*

<sup>1</sup> Nii rijieoritinne, Jesoso rohan nichuuntaacoain: “Charijicha jataain nelateineein ne Cana Coaunera Cojoanona que,” naain caje bajaacaanu aina nerelanaa nichaanune.

<sup>2</sup> Nii jaunte, leinjiin canaanai cotijiaain, canacaanu cataaun teein:

<sup>3</sup> “Esinae rauhijiriine aitoon. Inara ichao coreein, aiha caa canaanaine rijijieein nena naineneechene, coatiha Cana Coaunera Cojoanona que nena naineriheeicheein.

<sup>4</sup> Cana Coaunera Cojoanona que nelateineein neite, leeochoaauru amurijiriin nena coacuelanaala, aiha caa canaanaine rijijieein rai nichao coreein ne.

<sup>5</sup> Chunocoha, canu coreniha leinjiin canaanai raerate canu raa aicheein,” nae aina nerelanaa nichaanune rai Jesoso.

*Jataainte alalacarae osa que nesarucuaane*

*(Mr 9.42-48; Lc 17.1-2)*

<sup>6</sup> “Chunocoha, caa ena Canu esenetaeraauru canaanaihunru saruheraniha osa quene, nuluno que ajeri jaberoco tijichaain, cucuana ucuano jelon joeraanete caohachae.

<sup>7</sup> Jataainte cairichaaajoaure caa chauratane que nacaauru cachaauru, enaicha osa que sarunojoneein neeuruhane jaun. Itolere banate nitohaniha cureein. Nete acaauru amuritoheriin jataain cairichaaajoareein nii osa que acaauru saruhera cacha.

<sup>8</sup> Nii jaunte caohachae, ii biji, ii tijia, naaonjoain osa que ii saruhin nihane, molohin jaohine. Nenacaeneein tejian caohachare, ii biji, ii tijia, naaonjoain mauhecaain ichaonaa esine que neeine. Nabana, ii biji, ii tijia, naaonjoain, ii saruhane coreniha, satiin ijiabereeo chabana jacanaacharanejeein nena usi jana nijiaohine coataa.

<sup>9</sup> Jana, ii nota, osa que ii saruhane, rocohin jaao. Nenacaeneein tejian caohachare, leinjiin ii nota aina ichaonaa esine que neeine. Nabana jerane ii nota aina jiniiquiin chabana jacanaachara usi jana nijiaohine coataa.

*Carenero nitaje que cuaain relanajaane*

*(Lc 15.3-7)*

<sup>10</sup> Jiaonriha, chunocoha caa canaanaihunru que jaoleco-hichene. Dedeu neein itolere bana acaauru beraihuruha Ofa Cana Coaunera rohan neein rai letonocuru anjeraaurune jaunne inara rai aitoon.

11 Canu- Cana Coaunera Calaohi cachaneein nejanoanaa nichaaunnena, nitajerai nenacaauru ichoterateraanu que turuhin neeun.

12 Aonacuche. Tana leinjiin cacha, lefashaain niha rai carenerone jana, nitajiha leinjiinne, ichatane ucuunno que nii iscoon choonca iscoonni ratiriin,

13 nii nitajenaa ariin eruhane, nii iscoon choonca iscoonneein nitajelanaala nenacaauru coroaecane amurijiriin, esinae rauhijiriin niicha eruhi coroaerihane.

14 Nii rijijieeinte, nii leinjiinejein nitajeeuruha caa canaanaihunrune jerene dedeeu nenea cana inaca Cana Coaunera.

*Chatohaneein nainecure ita que suujua acatecuruha Jesocurisito coitucuerane.*

*(Lc 17.3)*

15 Chunocoha leinjiin inara caje Jesocurisito coitucuera, baaso ichaain niha chunocoha raine, jelai tein cotijiaain baaso ichaain niha raine coitucuerateein rai raotojoein ereeine, nii rai irihane jana rai nere tonoraain coitucuhin nihanete, inae jataain raotojoein neriquicheein jiniiquiin.

16 Jana ii ere tonoraenihane, leinjiin coroatajaainniji cotijiaain, acaauru aina jiniiquiin rai ereeuche, ii coroatajanena nainecuruha nii leochaauru netonaine coina.

17 Jana, acaauru ere nihanatiin tonoraenihane, netaojiaain Cana Coaunera coroaeraauru rai been, acaauru rai teute rai ereeuruhine. Nii netaojiaain Cana Coaunera coroaeraauru ere tonoraenihane, Cana Coaunera coitucuelanaala nenacaauruneein tein, Roma curuaanaa rai cacha cobaraain coriqui bajaaurera rijijieein coaracuche.

18 Caa chauratane que netiin, inara ichanohite, jerichaneein dedeeu icharareein. Jana, caa chauratane que netiin jaolecohichene jaante, dede caje jaonjoinereein.

19 Caa quene inara rai aitoreeunni. Caa chauratane que netiin, ita que jerajejeein neein ita suujua rijijieein coacuhin Cana Coaunera bajaain, cha bajanaa jeriquichenete, inara rai inaraacha bajai tereein canu inaca Cana Coaunera.

20 Chunijiun neeichene jaunru, Canu coreniha, coroatajaain, nichatajaain, naaonjoaain netaojiaain neeichenena canu netonai, ecu inara aina nereeunni," naa Jesusone janate:

21 "Curuaanaa, inata saain canejera que casuujua acatichaaunne cahachae, baaso ichaain niha caraine, caainsi saneeina," naa Fedorone janate:

22 " 'Coatiha, caainsi saneein,' nahaan. 'Caainsichoonca saneein caainsinei quene aitoon, ii suujua acateeine coina,' " nae Fedoro rai Jesoso.

*Rai fatoroon cachaauru rebe aninoana jereniha acaauru beraichaneein nenaane*

23 “Nitohanihane jaunne, naaonjoaa Cana Coanera Cojoanonaane que inara rai aitoreeunni. Aonacuche. Rebe rucuhena jeriha leinjiin curuaanaa *reyne* rijijiei nereretanaa quene inara relareeunni.

24 Inae rebe rucuhena nunuhetihane janate, jataain arajiin que rebeeona rai cacha turuaa uure rene.

25 Nete, neniha cha coretihane jaanne jaun, jitariin bereecuru, rai sinijera, rai rucuheleeeuru, naaonjoainuri aina curuaecaain, letononeein neeuruhane coina acaauru que necoretihane coina aite nii *rey*. Jitaiin rai rebe coretihanereein tiaaajoaain satiin jiniiquiin amihaneeuruhane coina.

26 Nii jaunte, nii *rey* acatiha neseonraain: ‘Curuaanaa, atiin caque ii suujua acatein, canu cohacorihune ii rai jitariin corete,’ naa rai nii cachane jana,

27 cairichaaajoaain coaraane jaun, nii rai rebe aninoaain que suujua acatein nirijieein jianerate.

28 Nete inae janiha nii rebeeonajaane jana, caje cuhin rai corihanera que coroatajajeein rebeeona aina ita eruhin, nii rebeeoca quene coreniha mucuhin rai raro tororohin: ‘Caque rebeoquine jaan coreteeu,’ naa raine janate,

29 nacatiha neseonraain: ‘Canu que ii suujua acatein, canu cohacune ii rai jitariin corete,’ naa rai nii leechane saijieein,

30 tonoraelanaala caresero cuhane enoerate, cuu niha rebe jitaain coretihane reentiaaine coina.

31 Nitohaneein, caresero cuhane nii acaauru leeoča tihane coaraainte, jataain rautaaurenihane jaun, nii acaauru curuaanaa *rey* rai biha cuure leeočaauru.

32 Nii jaunte, que suujua acatein jianihane baiha nihane jaun, cotiharateein: ‘Nechu aansaneein ichaonaa cacha. Nii rebe coreniha rebeoquine janane, ii que casuujua acatein, carichaaajoaine jaun ii jianeeunlu carai aitohine jaun.

33 Chanuna jana, nii cairichaaajoaain ii coaraain casuujua acatichaaunne rijijieein, nii ii leeoča que, ii suujua acateenei,’ naain,

34 inae jataain obaecane jaun, caresero cuhane enoerate nii *rey*, jitaain rebe coretihane reentiaain,” naain nii nereretanaa que canacaanu relaane baihate:

35 “Nitohaneeinte inara casetecareein canu inaca Cana Coanera, inara suujua aina cutaain inara amute cacha que inara suujua acatein belaineeichene,” naainte aina nerenanaa nichaanune rai beebeje Jesoso.

# 19

*Sinijera joaera quete cacha relae Jesoso.  
(Mr 10.1-12; Lc 16.18)*

<sup>1</sup> Niritiin acaauru rai irihane baihate, aina nerelanaa nichaanune aina Calileea caje amuhin, Jodea batane que turuhin, nucuhe Jorodaan jera que cue Jesoso.

<sup>2</sup> Nii janate, arajiin sacuure cachaauru. Ecute arajiin cunaitenacaauru rautae.

<sup>3</sup> Nii janate, nechuh cairichaaauruhane jaan lera ariha, Jesoso rohan nichuuntaain: “Tonaai. Caohachaana joaereen coreniha rai comasai jaoha cachane,” naauruha Jesoso rai fariseeocuru tabaaurune janate:

<sup>4</sup> “Tana Cana Coaunera Quiricha inoansi cuhane laenanohineein nenea ereretaain aonaquichene. Jaurihanejeein itolere coaunaane nunuheneeinte, quicha, ene, naaonjoain coaunaelu Cana Coaunera.

<sup>5</sup> Nitohaneein acaauru coaunaainte: ‘Rai fojiaraauru caje amuhinte comasai raain, leinjiin cachaneein nenea rijijieein ichaaorureein,’ naalune coitucuhichene.

<sup>6</sup> Nitohanihane jaunte, lesajeein necoansajiaa cachane, leinjiin ita jaberoco que jaberocoanaa rijijieein neeure, rai comasai aina. Niheichu ita caje, Cana Coaunera tenojoihunru batunaa nainihe jeraereen cacha,” naain acaauru tonoraa Jesosone janate:

<sup>7</sup> “Chanuna jana chaen, comasai jaonaa jerera nihane, rai ita jaaoruhane jaan cocoiricha teein, comasai joaera coina aitelu Moisesa tenojoi rauhi,” naauruhane janate:

<sup>8</sup> “Niritiinte aitelu Moisesa, nechuh aansaneein nere tonorana jereneeichene jaun. Coatiha niqui jauriaanejeein nitohaneein niheilu.

<sup>9</sup> Nena laen canu inara rai aitoon. Chunocoha, chuni quicha aina ichoaeniha rai comasaine jana, jaohin leocha ene raanete, nii ene niicha rai coreniha inae osa que nesarue nii quicha,” naa Jesoso fariseeocuru raine janate:

<sup>10</sup> “Nitohanihane jaun chujian, caohacharihei necoasajiaa cachane,” naacaanu aina nerelanaa nichaanune janate:

<sup>11</sup> “Coatiha nitohanai coitucunaa nainesihuruhi satiin cachaauru. Acaihanijin coitucuuruhane coina, coitucueratiha Cana Coaunerane jaan curuhachate, nii coitucuujuueeurueein.

<sup>12</sup> Niha araai lauriin nitohaneein necoansajianaa nainelanaala niha cachane jaanu. Tabaaurute, inae nejanoae nitohaneein necoasajiaurenihane coina. Jana tabaaurute acaauru cule rocooruha acaauru amute cachaaurune jaun necoansajianaa nainecurene. Jana leochaaurute raotojoein Cana Coauneraacha tei

amihanenaa que amihaneeuruhane coina necoansaijianaa jerene. Nitohaneein ichaonaa jereraauru, nitohaneein ichaauruhine,” naain ereereje canacaanu rai Jesuso.

*Canaanainunru rausiaaeca Jesusone*

(Mr 10.13-16; Lc 18.15-17)

<sup>13</sup> Nii janate, canaanainunru uhaaure Jesuso rene cachaauru, acaauru rai Cana Coaunera bajaain, biji que acaauru mucuhin acaauru rausiaaecane coinane janane, acaauru que tacaain caohatihacaanu aina nerelanaa nichaanune.

<sup>14</sup> Nii jaunte: “Coa Canu rene turuuruha canaanainunrune caohatihache. Cana Coaunera Cojoanonaate aihuruha caa canaanainunrune rijijieein nenacaauru rainein ne,” naainte,

<sup>15</sup> bijique nii canaanainunru mucuhin rausiaae najaane baiha, jelai caje amuhe Jesuso.

*Jesoso ainate ere leinjiin enamanaa coriquihona.*

(Mr 10.17-31; Lc 18.18-30)

<sup>16</sup> Nii janate, Jesuso rene turuhin: “Cacha relaera, chariji caohacha ichareeun, chariji bana nitajenaachara ichaonaa que ichaohanune coina,” naa leinjiin enamanaa Jesuso raine janate:

<sup>17</sup> “Chariji caohachana Canu caje bajaai. Caohachate ne leinjiincha. Nitajenaachara ichaonaa caohacha que ichaonaa jereeine, aitohalu Cana Coaunera rai Rauhine jaan tonoraain ichaao,” naa rai Jesusone janate:

<sup>18</sup> “Chariji Rauhina,” naain baajaane janate: “ ‘Coa sonajaain jaoha. Jiaonrihachu, ii comasaine lanaala nena ene dadaain, asijiauhin, leeochoauru cairichaa casaje que ereein, naaonjoaain neeine.

<sup>19</sup> Chaen ii fojiaraauru ere tonoraain, ijiabereeo belaaaine rijijieein, chamute cacha belaaain ichaao,’ ” naa Jesusone janate:

<sup>20</sup> “Jitariinne, nii chaitoonjoa tonoraain. Chana nenacaen carai lanare,” naa Jesuso rai nii enamanaane janate:

<sup>21</sup> “Esinae rauhijiriin, chaque lanaelanaala Cana Coaunera aitoonjoa tonorana jereeine, chajaain jitariin nii iicha sirii que necoreteein, cairichaihuru rai tenihun. Nii banaachate, jelai amuritoeriin nereein iicha latei dedeeu. Nii baiha canu sacuu,”

<sup>22</sup> naa rai Jesusone aonaainte, jataain inaderaain cauha cue nii enamanaa, jataain coriquihocane jaun.

<sup>23</sup> Nii jaunte, aina nerelanaa nichaanune rai: “Esinae rauhijiriinte caaintate, Cana Coaunera Cojoanona que enoha leinjiin coriquihonane.



<sup>24</sup> Nacoauneeine aitoreeunni. Charijieein teeinti leinjiin toro seeonjoan amuritoojaain nenea camecho, oco jachu cuhane situnaa nainene. Nii amurijiriin enonaa nainihe i leinjiin coriquihona Cana Coaunera Cojoanona que,” nae aina nerelanaa nichaanune rai Jesoso.

<sup>25</sup> Niritoha Jesusone jaunne, jelai amuritoheriin canacaanu suujua elonaane jaun: “Nitohanihane, chariji jana enohin nichotenaa nainereein,” naacaanu ita raine janate,

<sup>26</sup> canacaanu coariin: “Nihei chuni raajenhane enohin nichotenaa nainihe. Nete laen Cana Coaunera jerihane joenreein cache enohin nichotenaa naine,” naa canacaanu rai Jesusone janate:

<sup>27</sup> “Canacaanune, ii sacuhacaanune coina jitariin canacaanuhacha sirii ratirihacaanulu. Cha jana rarichaanuhin canacaanu nii coreniha,” naa Fedorone jaunte:

<sup>28</sup> “Esinae rauhijiriinte, inae Cana Coaunera cojoanona que turuhane bana canu, Cana Coaunera Calaohi cachaneein nejanoanaa nichaaunne itolere cocoainanacaaihuri amurijiriin cocoainanohi nichaaunne jaan rori- *trono* ichoae nelauriaanune banate, inara netonai lechoonca coroata-jai cocoainanacai nequichene rori- *trono* ichoae nelauri-ariquicheein, nii lechoonca coroata lauriin nenacaauru Isaraeli cocoaichacuru ichanaa coaraain, ‘Acaauru acaaurute caohacha ichae. Jana acaauru acaaurute baaso ichae,’ naain beein coitucuhin rucuhequichene coina.

<sup>29</sup> Chaen techu, canuhacha icharate i ichacuruhane coina, rai bereecuru, naraaichuru, comasai, fojiaraauru, rai natane, naaonjoain ratirichate, lefasha saneein jelai amurijiriin eru-urureein. Chaen techu, chabana nitajenaachara nejeein nenea ichaonaa que ichaoreein.

<sup>30</sup> Chaen techu, caa ena leeochoaauru amurijiriin nelae-toha nocoetonacaauru, caa ena chaque nelatihei rijijieein nenacaauru fautaain chaque nelatelanaala nedaaaurureein. Jana ena caa leeochoaauru fautaain nelatihei rijijieein nenacaaurute, jataain nelateineein neeurureein,” naain Fedoro tonorae Jesoso.

## 20

*Leinjiin ocoana erora- cache amiharatera rijiiicha Cana Coaunera Cojoanonaane que canacaanu relaa Jesusone*

<sup>1-2</sup> Niritoha canacaanu raine baihate nocoana que cache amiharatiha leinjiin ocoana erorane rijiiicha Cana Coaunera Cojoanonaane que canacaanu relae.

Niritiinte: “Leinjiin cache janohetiin nimichuhin, nocoana jana amihaneeuruha cachaaaurune coina ariin, inae

cachaauru eruhin, rai nocoana jana le jiichooneineein acaauru amihaneeo coretihane coina rucujueein, nii cachaauru letoae nii amihanenaa erora.

<sup>3</sup> Inae acaauru letoaane baiha, enoto chujutaaelalajeein nacoauneein mituhin cuhin leeochoaauru cachaauru arihane janate, najiniha neure nenaanaja cataaun nelanaaejeein cachaauru.

<sup>4</sup> Nii jaunte, nii nelanaaejeeunruhane coaraane jaun: 'chajaain inara netonai amihanenihuche canu ocoana jana. Inara amihaneeon rijijieeine inara coretereeunni,' naa nii amihanenaa erorane jaun cuure nii cachaauru.

<sup>5</sup> Nii baihate coaiteen, enoto chujutaain mituhin cachaauru ariin, nii baiha sonaiha mituhin cachaauru ari nii amihaneanaa erora.

<sup>6</sup> Inae nuna macohi ichoae teejiha enotone jana, mituhin nacoauneein cachaauru arihane jana, nenaanaja cataaun neuruha rai namihaneeo colane nelanaaejeein cachaaurune jaun, erunajaain: 'Chanuna sonafaajeein amihanelanaala neeiche,' naain acaauru caje bajaa nii amihaneanaa erorane jana:

<sup>7</sup> 'Neniha canacaanu rai amihanenaa terane jaunna, amihanenihacaanu,' naauruhane jaunte: 'Chajaain aihane inara netonai canu ocoana jana amihanenihuche,' naain letoana-jae nii amihanenaa erora.

<sup>8</sup> Inae nocohena jerihane janate, rai cachaauru beraicha rai: 'Chajaain, nii cachaauru cotijiaain, acaauru satononiha turuhin amihanenacaauru que nunuheteein coretenaacu, nii jauriaanejeein nunuheteraauru que satonoteein,' naa nii amihanenaa erorane janate,

<sup>9</sup> inae ichoachaniha cuuruha nii satononiha nuna macohi ichoae teejiha enotone jana nunuheteein amihanenacaaurune jana, le cachaauru corete jerichanejeein le jiichooneein, nii coretera.

<sup>10</sup> Nii janate, inae nii ichoachaniha turuhin amihanenacaauru coretihane jaan que turuhane jaun: 'Nii satononiha turuhin amihanenacaauru amurijiriin jecha, rai namihaneeo core raaurureein,' naaure. Nete, nii satononiha turunacaauru rijijieein, jerichanejeein le jiichoo coreneein raature acaauru netonai.

<sup>11</sup> Nii jaunte, rai namihaneeo core raauruhane ucuaaetoha nejesinajeein nii amihanenaa erora rai:

<sup>12</sup> 'Caa canacaanu satononiha turunacaaurute, basiinjincha amihaneeuruhane saijieein, canacaanu coreteeine jeoneein acaauru coreteei, mainajeein amihaneein, enoto ajaanone maajeein abaantacaanune saijieein,' naaure.

<sup>13</sup> Niritocuruha nii amihanenaa erora raine jaunte, leinjiin rai: 'Coatihana baasoneein ii coretihaunte quiicha belaii.

Tana canu aina, le janohineein ii coretichaaunne coina ru-cuhequine coitucuhine.

<sup>14</sup> Aihana jaun, nocoa ii amihaneeo core. Chajaain amuu. Canune, nii inara satononiha turuhin amihanenacaauru rai, jericthanejeein inara coretichaaunne jeeoneein coreteeun,

<sup>15</sup> carai niha rauhi cacoriqui aina quiicha jerei icha-caaunne jaanune jaun. Raunajetocooaunne jaunna baasoneein canu coaraaite,' naain nii cacha tonorae nii amihanaa erora.

<sup>16</sup> Nii rijijieeinte, caa enene ichoaichaniha nenacaauru satononiha neeurureein. Jana satononiha nenacaaurute, nunuheneein neeurureein," nae Jesoso.

*Orichaainne biha nacoauneein Jesosone*

*(Mr 10.32-34; Lc 18.31-34)*

<sup>17</sup> Inae bero cuhane Jerosaleen nichaae cuujihacaanune janate, nii lechoonca coroatajaain aina nerelanaa nichaanune cotijiaain, jelai canacaanu teteriin:

<sup>18-19</sup> "Inae enate laen Jerosaleeun cuhacache. Ecute, Cana Coaunera Calaohi cachaneein nejanoanaa nichaaunne mucuhin, saseredote curuaanaacuru, chaen Moisesa rai Cana Coauneraacha tei rauhi que cacha relaaaureraauru, naaonjoainuri rai canu tiha cuurureein. Chaen techu nejelau atane caje unacaauru cachaauru rai caetecurureein, caque nocoatijiaain, canu faojoaain coroso que canu teein canu ateinaauruhane coina. Nena nichata janojoin cuhane ichanareeunni," naain aina nerelanaa nichaanune rai beebeje Jesoso.

*Saantiaao aina Joaan nebaacha bajai*

*(Mr 10.35-45)*

<sup>20</sup> Nii janate, Jesoso rene turuha uhe Sebedeeo comasai, rai calaohichuru Joaan, Saantiaao, naaonjoainuri aina. Turuhinte, nii calaohichuru rai atiin chaelai ichaa Jesosone coina nacatiha neseeonriaane jana:

<sup>21</sup> "Chate jerequicheta," naain caje bajaa Jesosone janate: "Inae ii Cojoanonaa que turuhane bana, atiin ii raotono nichajai que nelauriaa leijjinne jana, ii jaabiji nichajai que nelauriamiinche caa leeochara," naa Jesoso raine janate:

<sup>22</sup> "Cha bajaaichene, coatiha coitucuhin bajaheeiche. Necairichanaa abaantarichaaunnine rijijieeinna necairichanaa abaantana nainequiche," naain acauru caje bajaa Jesosone janate: "Abaantana nainichaanu," naain tonoraauruhane jaun:

<sup>23</sup> "Nii necairichanaa abaantana nainequiche niqui. Nete laen, canu raotono nichajai que, canu jaabiji nichajai que, naaonjoaain nelauriana naineneeiche, nitohanai rai tihanune coina nenihanune jaun. Banihateein ichaalu Ofane

jaancuruhacha raite, tenojoin niha cureein,” nae acaauru rai Jesoso.

<sup>24</sup> Nii Jesoso caje bajaa Sebedeeo calaohichuru nebane aon-  
ainne, nii coroatajai ita nejeraauru que nejeratihacaanu nii  
lechooncaain aina nerelanaa nichaanune.

Nii jaunte,

<sup>25</sup> canacaanu cotijiaain canacaanu rai: “Inarate rai  
cachaauru cairichaaeriin, acaauru amurijiriin niha  
nocohetiin neeuruha Cana Coaunera coitucuhichuru  
curuaanaacurune coitucuhiche.

<sup>26-27</sup> Nete laen, inara nitohaneein nenea naineneeiche.  
Aihana jaun, chunocoha inara jana leeochoauru amuri-  
jiriin nenea coaucane, leeochoauru coroatajanemiin. Jana,  
chunocoha leeochoauru amurijiriin nenea coaucane, rai  
letononeein neeine.

<sup>28</sup> Nitohaneein nihanune coinane cau turuhin neeun canu-  
Cana Coaunera Calaohi cachaneein nejanoanaa nichaaunne.  
Coatiha carai quiicha latei tein niha cachane coina cau  
turuhaaun. Canune, cachaauru rai nelatichaaunne coina  
letononeein neeun. Canune, osa caje nichotiha arajii  
cachaaurune coina ohin cacoichana que coretiha curee-  
unni,” nae aina nerelanaa nichaanune rai Jesoso.

*Coroatajai maosa rautaa Jesusone*  
(Mr 10.46-52; Lc 18.35-43)

<sup>29</sup> Inae Jerico caje amuhacaanune janate, Jesoso caaijie  
uure arajii cachaauru.

<sup>30</sup> Nii janate, bero cuhane babaecooruha coroatajai  
maosacurune jaun, acaauru rohan situha cuha Jesusone  
aonaain: “Canacaanu Curuaanaa Rabiri nefoerateneein  
nenea, tana cairichaaajoaain canacaanu coaraaine,”  
naauruha ehequiine janate,

<sup>31</sup> aitocuruhane caohateeuruha cachaaurune jana, que  
rutaain tonijiaain ehehequuin: “Canacaanu Curuaanaa  
Rabiri nefoerateneein nenea, cairichaaajoaain canacaanu  
coaraau,” naauru janate ecu inacuhin acaauru cotijiaain:

<sup>32</sup> “Chatohanai inara rai ichacaanune jeriquiche,” naain  
acaauru caje bajaa Jesusone janate:

<sup>33</sup> “Conoha canacaanu notanena jerichaanura Curuaanaa,”  
naauru jana,

<sup>34</sup> cairichaaajoaain acaauru coaraane jaun, biji que  
acaauru nota dadaa Jesusone rijieeoritiin inae conoha  
acaauru notane jaun, Jesoso caaijie uure, nii coroatajai  
maosacuru.

## 21

*Jerosaleen turuha Jesusone**(Mr 11.1-11; Lc 19.28-40; Jn 12.12-19)*

<sup>1</sup> Inae Jerosaleen catainajeein leinjii nese Betafajee ichtatane ucuunno- Oliboneein acaauruhacha curuaatei rohan turuhacaanune janate, aina nerelanaa nichaanune caje coroatajai letoae Jesuso.

<sup>2</sup> “Chajaain taa niita canaacha coarajei neseu cunichuche. Ecute, cositenojoneein leinjiin bene, leinjiin curuaanaa narejeen, naaonjoaain borocuru eruriquicheein. Chaen inae erunajaaichene, carai cajiha acaauru cosichuru rututaain uhanajaauche.

<sup>3</sup> Inae uhanajaaichene jana, chunocoa inara caje bajaane: ‘Latenaaca curuaanaane jaunna amanajaacaanu. Enate jelaaha acaauru cainaratereein,’ naain uhanajaauche,” naain letoanajae Jesuso.

<sup>4-5</sup> Nitohanialu:  
 “Sioon cocoaichacuru,  
 joenreen rijjijeein nena inara *Rey*  
 coaracuche.  
 Acate, inara rene turuha uhe  
 leinjiin boro laajoiri ichoae.  
 Cabario ichoae amuuruha  
 leeochoauru curuaanaacurune saijjeeinte,  
 leinjiin boro  
 anajiin tabai ruhacaera  
 narejeen laojiri ichoae uhe,”  
 naain been laenaalu *profeta* inoensine nainaane coina ailu.

<sup>6</sup> Niritiin acaauru letoaa Jesusone jaun cuuruha nii coroatajai aina nerelanaa nichaanune caje cunacaaurune janate, nii been letoanajaane rijjijeein,

<sup>7</sup> rai narejeen aina boro eruhin, nichoae cajione maritaain amanajaain, Jesuso rai tenajaauruha aina nerelanacaaurune jana, nichoae lautoroaain cue Jesuso.

<sup>8</sup> Nii janate, najiniha neure arajiin cachaauru. Acaauru tabaaaurute, bero cuhane acaauru cajione maririjiaacoaure. Jana tabaaaurute, ajaena raain, najiniha meriaacoaure.

<sup>9</sup> Jana, ichoachaniha cunacaaurute, acaauru caajie cunacaauru aina coroajeein eheehequuin:

“*Rey* Rabiri ichoala coroaecuruhine.

Raotojoneein turuhine acaneein nena rijjijeein Cana Curuaanaa- Cana Coaunera letono.

Dedeeune maajeein Cana Curuaanaa coroaecuruhine,” naaure Jesuso que.

10 Nii Jerosaleen turuha Jesusone coaraainte, satiin nii nese sacutaain que suujua rerohecaain cajihaneei amuhemujueein: “Cha cajena unaa ne caa cacha,” naain ita caje bajaain:

11 “Caate, Cana Coaunera ere bera *profeta* Jesuso ne, taolu Calileea nenea Nasarete cocoaicha,” naaure cachaauru.

*Teenforo asajai caje cachaauru sitaa Jesusone*  
(Mr 11.15-19; Lc 19.45-48; Jn 2.13-22)

12 Nii jana inae Teenforo asaae enoha cuhane jana, najiniha neeuruha necoretenacaauru aina acaauru caje coreteraaurune jaunte, jelai caje sitanajae Jesuso. Coriqui coreeruha cachaauru raina jaan rori lacohitiin, ecu serori que necoretiha nenacaauru rorine maajeein lacohitiin:

13 “Cana Coaunera Quiricha cuhanete: ‘Canu lorerite, acaihaniji Canu bajaabajaacuruhane jaan coloherineein nereein,’ naain ne laenanohineein. Nete, inara leinjiin asiji-aunanaja coloherineein teeiche,” naain acaauru cotai Jesuso.

14 Nii Teenforo asae, rohan turuhacoaauruha maosacuru, bacosacuru, naaonjoainurine janate, acaauru rautae Jesuso.

15 Nii cojoelanaacojoai ichaain acaauru notaaca Jesusone jana ecu neein coarajeeuruha saseredote curuaanaacuru aina Moisesa rai Cana Coauneraacha tei rauhi que cacha relaaureraauru, naaonjoainurine janate: “Coroaenojoine-miin *rey* Rabiri ichoala,” naain cojiorichuruha canaanainunru Teenforo asaaene aonaain obajeeinte:

16 “Toon ii rai ereeuruhane aonaaina,” naain bajaauure.

Nii jaunte: “Aihanu. Aonacaaun. Tana: ‘Canaanainunru, sisinacaaurune maajeein ii coroaecuruhane coinante, caohacha ichaai,’ naain laenanohineein nenea reretaaichene,” naain acaauru tonorae Jesuso.

17 Niritoha acaauru raine baihate, ecu acaauru ratiriin, nii nese caje amuhin, Betaniau cue Jesuso, ecu sinihane coina.

*Inacaenihane coina iquera cojiotaa Jesusone*  
(Mr 11.12-14, 20-26)

18 Inae janone jelaiha neseeu cuhane jana mijiitohane jaunte,

19 bero auhaniha niha leinjiin *iquerane* jaun nichuuntaain coarae Jesuso, inaacane lihane coina niqiu. Nete inacaenihane jaun:

“Inae chabana coaiten inaariheeni,” naa Jesusone rijie-oritiin ohe nii *iquera*.

20 Nii coaraainte: “Chasiinna luhecotariin ohe,” naauruha cojoelatiin aina nerelanaa nichaanune tabaaurune janate:

21 “Esinae rauhijiriin esenetaain, icharichaaain Cana Coauneraane esenetaain neeichene, caa ena *iquera*

ichacaaunne amurijiriinte naineriquiche. Caa ichatane rai: 'Caalai caje amuhin, cucuana cuhane cunihun,' naaichene, nii aitocoichene rijieeoritiin cucuana cuhane cure nii ichatane.

<sup>22</sup> Nii rijijieein techu, Cana Coaunera caje cha bajaaiiche, terichaaainne esenetaainne, inara rai inaraacha bajai tereein Cana Coaunera," nae aina nerelanaa nichaunune rai Jesoso.

*Cocoinaai letono niha Jesusone*

*(Mr 11.27-33; Lc 20.1-8)*

<sup>23</sup> Nii baiha Teenforo asae enohin cachaauru relaa niha Jesusone janate, rene turuhin: "Chatohanai Cocoinanacai neeinna neei ii, catohanai ichaaine coina. Chana cocoinanacai neein ii cocoinae," naain Jesoso caje bajaauruha saseredote curuaanaacuru aina Joriocuru bichauhenaurune janate:

<sup>24-25</sup> "Canuhetonaina inara caje bajanaa jereeun. Cha Joaan letoaelu cacha cojunacatihane coina. Cana Coaunerana letoaalu, ainihane cachaauru letononeeinna aihalu. Canu rai beeichenena, canuhetonai inara rai canu cocoinaera bereeunni," naain acaauru tonoraa Jesusone janate:

"'Cana Coaunerate letoaelu,' naacachenete: 'Chanuna jana esenetaeneeichelu,' nareein cana rai.

<sup>26</sup> Niheichu 'Cachaaurute letoaelu,' nanaa nainihaacache acaauru coasiha. Satiin cachaauru, Cana Coaunera, Joaan letoaalune esenetaauruhane jaun," naaure nejesinajeein ita rai. Niritiin ita rerohecaainte:

<sup>27</sup> "Coitucuhaacaanu," naauruha Jesoso raina jaunte acaarentonai:

"Aihana jaun chujian canuhetonai, inara rai canu cocoinaera benaa nainihaaun," naain acaauru tonorae Jesoso.

*Coroatajai calaohichuru letoaa leinjiin cachane rijijiei que acaauru relaa Jesusone*

<sup>28</sup> Nii baihate acaauru rai:

"Tonaquiche jana inara caa erenaa que. Leinjiin cachate coroatajaain neeuruha rai calaohichurune jana, leinjiin rai: 'Canu calaohi, enene canu ocoana jana amihanenihu,' naa rai inacane jana:

<sup>29</sup> 'Coatiha curinaaunni' naain cunaa jerenihane baiha cue nii leinjiin rai calaohi.

<sup>30</sup> Nii baiha coaiten, nii rai calaohi coroataja letoaane janate: 'Saan ahi. Inae curichaaunnicha ofa,' naane saijieein cuene.

<sup>31</sup> Chariji inara rai, rai inaca ere tonoraain niicha icharatei ichae," naain canacaanu caje bajaa Jesusone janate:

"Nii ichoaichaniha rai inaca letoanojointe, inacaacha icharatei ichaain inaca ere tonorae," naauru janate:

“Nii rijijieein techu, inara aineeichene jana, Cana Coaunera Cojoanona que niha cuurureein Roma curuaanaa rai cachaauru cobaraain coriqui bajaaurera aina ene cojoaelorohecuru.

<sup>32</sup> Caohachaaain rai nichao coreein neeuruha cachaaaurune coina, relanajaa uhalu Joanne jana, inara esenetaenee-ichelune jana, Roma curuaanaa rai cachaauru cobaraain coriqui bajaaureraauru aina, nii ene cojoaelorohecuru esenetaauruhane jaunte, Cana Coaunera Cojoanona que neeurureein. Jana inara, coaraqichene saijieein esenetaain inara ichao coreneeichene jaun, coatiha Cana Coaunera Cojoanona que neriheeicheein,” nae saseredotecuru aina Jorioocuru bichauhenaauru rai Jesoso.

*Nechu aansaineein ichaonacaauru amihanenacaauru que cachaauru relaa Jesusone*

*(Mr 12.1-12; Lc 20.9-19)*

<sup>33</sup> “Caa leecha erena aonacuche. Leinjiin cachate oba cocana sirihane jaun, bino ichaane jaanu ichaaain coriha-teen, nii baiha ucuuneein rori jae nichoae netiin amihanenacaauru beraihane coina. Inae satiin besautiaane bai-hate, rai leruhin teeuruhane coina que amihanenaa inaa-ureraauru cachaauru rai teein ratiriin amue.

<sup>34</sup> Inae tainacaane janate, leruhin rai niicha teeuruheni teeuruha raine coina letonocuru letoaa nii ocoana erorane jana, cuhin bajaauruha nii letonocurune jana,

<sup>35</sup> tabaauru letonocuru faojaain, tabaauru atinaain, ajeri que tabaauru bodoosiin, naaonjoainchuru sonajaaure.

<sup>36</sup> Nii jaunte, nitohaneein rai letonocuru letoane jana, sonajaauruhane jaun, coaiten jelai amuritoheriin, enacoauneein letonocuru letoane jana, jerichanejeein sonajaaunre nii amihanenacaauru.

<sup>37</sup> Nii letonocuru letoane naineein sonajatocuruhane jaunte, satononiha rai calaohi letoae: ‘Canu calaohi nihane jaunte laen que suujua acatecurureein,’ naain niqiu letoae.

<sup>38-39</sup> Nete inae cuha nii rai calaohine jana coaraain ecu ita rai: ‘Caate laen, nerora calaohi nihane jaun, jitariin cana caje caa rai inaca rainein nena raa cureein satiin aina nedaane coina. Coanete sohin jaohacache. Nii banate, satiin cana rainein nedareein nii rainein neenu,’ naain nii rijia caje mitaain sohin jaore nii amihanenacaauru.

<sup>40</sup> Aihana jaun, inae turuhane bana, cha ichareein acaauru aina, nii amihanenaa erora,” naain bajaa acaauru caje Jesusone janate:

<sup>41</sup> “Nii nechu aansaineein ichaonacaauru cachaauru so-hinte jaoreein, cairichaaajoaain acaauru coaraelanaala. Sohin jaonajaainte, leeochoaauru rai nii amihanenaa tiha



cureein, inae ecu tihane bana rai leruhin niicha taojiaauri teeuruhane coina,” naauru janate:

<sup>42</sup> “Tana, Cana Coaunera Quiricha cuhane:

‘Nii ajeri, loreri ichacuruhane jaanu que nenea jaolecooruhane jaan que temurateeinte

loreri jaure nii loreri icharaauru.

Niine cojoelatohacaanu,

nitohaneein ichaa Cana Coaunerane jaun,’

naain laenanohineein nihane reretaain aonaquichene.

<sup>43</sup> Nitohanihane jaunna inara rai aitoon, rai Cojoanonaa que neeichene coina tihalune saijieein nii inara rai niicha teilu ruluhin, janijiin niicha ranojoinunru Cojoanonaanu que terichaaain Cana Coaunerane jaun.

<sup>44</sup> Jana canu nii ajeri nichaaunne ichoae comoite raajeni-hane chalutoroaain nedareein. Jana, canu nii ajerineein chunocoha ichoae comohanunete ajane neein nedareein,” naain raajenihane neque aite Jesoso.

<sup>45-46</sup> Niritiin acaauru que aitoa Jesusone que nainacuruhane jaunte, Jesoso mucueratena jerecuruhane saijieein, ichana nainecurene, satiin cachaauru coasiha nii saseredote curuaanaacuru aina Joriocuru bichauhenaauru, satiin cachaauru Cana Coaunera letono *profeta* niha Jesusone esenetaauruhane jaun.

## 22

*Leinjiin rey calaohi nisirihatihane quete cacha relae Jesoso.  
(Lc 14.15-24)*

<sup>1-2</sup> Nitohaneeinte coaiten acaauru rai nereretanaa rijijie que cuaain ereerejeein:

“Leinjiin rey, nisirihatihana rai calaohine coina beseta ichaane jaunte niqui,

<sup>3</sup> rai letonocuru letoae, nii cotihanohichuru cotihacuruhane coina. Nete tonoraelanaala, nii beseta que turunaa jerecurene.

<sup>4</sup> Nii turunaa jerecurenihane jaunte, enacoauneein rai letonocuru leeochoauru letoae: ‘Inae jatoroainjete ne lenone. Coerenetonanaain nenacaauru nirihurujete soerate. Chajaain beseta bitoaa uucheje,’ naain cotihanaacuruhane janate,

<sup>5-6</sup> tonorana jerelanaala nocoana jana cue leinjiin. Jana leeochoate, rai rucuhale que necoretiha cue. Jana leeochoaurute, nii rey letonocuru mucuhin atinanaajaan sonajaure.

<sup>7</sup> Nii corenihate jataain obajeein, rai soondarooru letoae acaauru rey, nii rai letonocuru sohin jaoreraauru sohin jaohin, acaauru nese mocooruhane coina.

<sup>8</sup> Inae nitohaneein turunaa jerecureniha niicha cotihara-teeurine jaunte, 'Satiinte niqui inae jatoroain ne, caa nisirihatena beseta. Nete nelatecurenihane jaun turunaa nainecurene nii jauriaanejeein cotihanohichuru.

<sup>9</sup> Aihana jaun, chajaain nese cataun situnacaauru berooru cuhane cuhecujeein, inaraacha erui cachaauru cotihacuchete, caa nisirihatena beseta bitoaa uuruhine,' naain rai letonocuru letoae nii *rey*.

<sup>10</sup> Nii jaunte, nese cataun situnacaauru berooru cuhane cuhin, aansaineein ichaonacaauru, cachaauru caohachaain suujua coaraauru, naaonjoainurine majeein cotihacuruhane jaun, cacha que memoe loreri asajai.

<sup>11</sup> Inae satiin nii *rey*cha tei cajione jiaain neeuruha cotihanoichurune jana enohin coaraa *rey* janate, ecu ne leinjiin cacha *rey*cha tei nisirihateeuruhane jaan cocoajione jiaelanaala nena.

<sup>12</sup> Nii cacha raite: 'Chasiina nisiriatena cocoajione satiin rai canuhacha tei jiaeralanaala cau enohite quiicha belaa,' naa rai nii *rey* jana, ecu inauheneeicha neein aonaje nii cacha.

<sup>13</sup> Niritiinte lenonecuruha cachaaurune jana coaraneein nenacaauru rai: 'Caa cacha biji aina, rai tijia ichojoaain airiniha nocohenaanau jaaochete, ecu neein chanaaine,' nae nii *rey*.

<sup>14</sup> Arajite niqui cotihanohi ne; nete coroatajaaecure janijiin ranojoinunri. Nii rijjiicha Cana Coanera Cojoanona," naain que jaolequiin nenacaauru que cuaain ecu nenacaauru cachaauru rai ereereje Jesuso.

*Roma curuaanaa rai coriqui bajaaurera aina iriha Jesusone (Mr 12.13-17; Lc 20.20-26)*

<sup>15</sup> Niritiin acaauru que aitha Jesusone que nainacuruhane jaunte, jelai caje amuhin Jesuso coulurujeeuruhane jaanu leranu arihure ita suujua tacaain fariseecuru. Chaelai que aitocuruhane jana, baasoneein acaauru tonoraa Jesusone colurujeeuruhane coina.

<sup>16</sup> Nitohaneein coacuhinte, acaauru ere tonoraeraauru, chaen Erodesi ere tonoraeraauru, naaonjoainuri letoaaure Jesuso rene, coulurujeeuruhane jaan lera ariha coritaauruhane coina. Nii jaunte rene turuhin:

"Cacha relaera, iite iique tonaain iriha cachane tonoraelanaala, esinae rauhijiriin aitiin jeriha Cana Coaneranerane rijjijeein ichaoha cachane coina relaai, rai suujua caje rochin cacha relaauruha leeochoaurune rijjijielanaala. Chaen nechuananacaa cacha ichaone caje coaraain coulurujeeineine coitucuhacaanu.

17 Nii jaunna, canacaanu rai beeine jerichaanu. Caohachaana Romanocuru curuaanaacuru curuaanaa- enferadoroacha bajaeratenojoi coriqui *impoesto* tihacachene,” naain bajaare Jesoso caje.

18 Nete, nechuh cairichanaa coacuhin letononeein aitocurhane que nainaana jaun:

“Casajenetiin cacha caohacha niha nocoetonacaauru, channuna baasoneein cacairichaa canu coritana coaauquiche.

19 Canu rai, nii enferadoro rai inaraacha tei coriqui uhauchena coarae,” naa Jesusone jaun, rai coata caje nena coriqui denario teeurhane jaun coaraante:

20 “Chariji coujunaca cau caa ne, rai curuaa aina laenanohineein,” naain acaauru caje baja Jesusone jana:

21-22 “Caate enferadoro coujunacane,” naain tonoraaurhane jaunte:

“Aihana jaun chujian, nii enferadoro rainnein nena teeuche enferadoro rai. Jana, nii Cana Coaunera rainnein nena teeuche Cana Coaunera rai,” naa acaauru rai Jesusone jaunte inauheneeicha cojoelatiin ecu Jesoso ratiriin amuure.

*Oha cachane baiha ichanaa cachane bajaauruhane*  
(Mr 12.18-27; Lc 20.27-40)

23 Nii bananeeinte, Jesoso coaraa uure sadoseeocuru tabaauru, oha cachane baiha nacoauneein ichanaane esenetaaurenihane jaun, bajaauruhane coina. Nitohaneein uhinte:

24 “Cacha relaera, Moisesate canacaanu rai aitelu, chunocoha leinjiiniji canaanai sirilanaala rai comasai ratiriin ohane, nii onaa ocoala nii rai ninana autana raa rai comasaineein ne, nii onaa bereeneein tein, nii autana bereetihane coina.

25 Nii janate, cau canacaanu aina neurelu caainsineein ita nejera nejesinaneein cachaauru. Nii acaauru inante, leinjiiniji rai comasai aina canaanai sirilanaala ohe. Nete leinjiiniji canaanai sirilanaala ohane jaun, rai nocoala rai, nii rai nautana tein ratiri.

26-27 Nete jerichanejeein canaanai sirilanaala oha acaentonaine jaun, que jaurii nocoala rai nii nautana tein ratiri. Nirijieein cuaajeente satiin ooruha nii ita nejera nejesinaaurune jana, ohe nii ene netonai.

28 Aihana jaun, inae nacoauneein o caje ichanaa cachane bana, chariji comasaineein nereein nii ene, satiin ita nejeraauru comasaineein nihilune jaun,” naain Jesoso caje bajaauruhane jaunte:

29 “Cana Coaunera Quiricha inoansi reretaain niicha ichana nainei coitucuneeichene jaunte, cha coitucuneeichene jaun aitocoiche.

<sup>30</sup> Inae ohane caje ichanaa cachane, ene, quicha, naaonjoainuri ita que nesinijerateein neeururinaain, inae Cana Coaunera letono anjera dedeeu nenacaauru rijijieein neeururichaaine jaun.

<sup>31</sup> Tana o caje ichanacuruha onacaaurune que, raaje nujuae caje:

<sup>32</sup> ‘Canune, Abaraaun, Isaca, Jacobo, naaonjoainuri Coauneraneun. Aihana jaun, coatiha onacaauru Coauneranihaaun. Canune ichaohin nenacaauru coauneraneun,’ naain aitohalu Cana Coaunerane reretaain coitucuhichene,” nae acaauru rai Jesuso.

<sup>33</sup> Niritiin sadoseeocuru relaa Jesusone jaunte, cojoelatiin aonajeeure cachaauru.

*Jataain leeochoauru amuritoeriin nelateein tenojoi Rauhi*  
(Mr 12.28-34)

<sup>34</sup> Nitohaneein acaauru relaa Jesusone jana, inauhenee-icha aonajeeuruha sadoseeocurune coitucuhinte, ita taojiaaure fariseeocuru.

<sup>35-36</sup> Nitohaneeinte, leinjiin acaauru caje Cana Coaunera rai rauhi que cacha relaeraneein nena fariseeo, Jesuso rai:

“Cacha relaera, chariji rauhi cana ichao rai leeochoauru amuritoeriin jataain nelateineein tenojoin ne,” naain nechu coulurijiane jaan leranu ariha, Jesuso caje bajaane janate:

<sup>37</sup> “Ii Curuaanaa Cana Coaunera belaihu, ii coichana, ii suujua, ii suujue, iicha coacui, naaonjoain aina cuaritaain.

<sup>38</sup> Caritiinte jataain jauriaanejeein cana rai nelateineein nena rauhi beratelu cana rai Cana Coaunera.

<sup>39</sup> Nii que jauriineein tenojote, jerichanetojoein: ‘Chamute cacha belaa in coaraau, ichaajenihane ijiabereeo belaine rijitoein,’ nae.

<sup>40</sup> Caa coroatajai rauhite, jataain nelatein cana ichao rai tenojoi ne. Acatechu nii Moisesa aitoonjoa rauhichuru cana relaauruha *profetacurune* jaan rauhi temuraneein ne,” nae fariseeocuru rai Jesuso.

*Cha caje nefoeratenaa ne Curisito Mesihasi.*  
(Mr 12.35-37; Lc 20.41-44)

<sup>41</sup> Nitohaneein jaiti netaojiaain ita aina neeuruha fariseeocurune janate:

<sup>42</sup> “Tonaquiche inara Curisito Mesihasi que. Cha caje nefoeratenaa neeicha ne,” naain acaauru caje bajaa Jesusone janate: “Rabiri caje nefoeratenaneinte ne Curisito Mesihasi,” naain tonoraauruha fariseeocurune janate:

<sup>43</sup> “Chasiina jana nitohanihane, que aitoroatiha Cana Coaunera Suujuene jaun: ‘Canu Curuaanaa,’ naelu Rabiri, Curisito Mesihasi que. Chaen techu:

<sup>44</sup> ‘Canu Curuaanaa raite:

“Cau carohan,

caraotono nichajai que nelauriaau,

ii que nejeratenacaauru amuritiin

ii tijia asaae tenajaanune reentiaaincha,” nae Cana

Coaunera,’

naain belu Rabiri.

<sup>45-46</sup> Aihana jaun, chasiina Rabiri caje nefoeratenaa nere Curisito Mesihasi: ‘Canu Curuaanaa,’ naalu rai Rabiri natiin,” naa acaauru rai Jesusone janate, le erenaanejeeiniji tonoraurenihane jaun, inae nii caje coauneein, caje cha banaanaa jerecurene fariseeocuru.

## 23

*Fariseeocuru aina, Cana Coaunera rai rauhi que cache relaurera ichao biha Jesusone*

*(Mr 12.38-40; Lc 11.37-54; 20.45-47)*

<sup>1</sup> Nii baihate, ecu nenacaauru cachaauru, chaen aina nere-lanaa nichaanune, naaonjoainichaanune rai:

<sup>2</sup> “Cana Coaunera rai rauhi que cache relaurera aina fariseeocurute, aitoa nii rauhine jaan belanaala joaenreen cuaain cachaauru relaaure.

<sup>3</sup> Atiin acaauru ere tonoraain acaauru aitoonjoa ichacuche. Nete laen caohachaene chaachacuruhane rijijieein cha ichaquichene, tonaain ereeuruhane nihanatiin, enaacha leechaneein chaachacuruhane jaun.

<sup>4</sup> Nitohaneeinte, nii chabana nitohanei ichaonaa que ichaonaa naineniha cachane saijieein, cachaauru rai caaintati ichaonaa teure, nii acaauru nihanatiin nitohanei ichaonaa que ichaonaa naineralanaala.

<sup>5</sup> Nechu caohacha ichaa nocoetocuruhane coaracuruha cachaaurune coinete, nitohaneein neeure. Nii jaunte, rai naurichuru, rai bijihuru cuhane, naaonjoain Moisesa rai Cana Coauneraacha tenojoin rauhi laenanohineein nenea amaauruhane rautatoore. Chaen techu jataain nelatiha nocoetocuruhane jaan coujunacanu que, cajione ererianohineein nenea jiaainne maajeein aihure.

<sup>6</sup> Nii rijijieein techu niha lenonena jaanru rori caohachaauru janijiin ichoae nelauriaain lenoneein, sinacoca asaene maajeein enooruhane, rori caohachaauru janijiin nichoae nelauriaaure.

<sup>7</sup> Nitohaneeuruhane jaunte, bero cuhane acaauru que tacaain, acaauru que suujua acateein iriha cachaaurune jereein: ‘Cacha relaera,’ naa acaauru rai cachane jereeinchuru aihure.

<sup>8</sup> Nete laen inara: 'Canu relaera,' naain inara rai iriha cachane jereein nena naineneeiche, satiin inara ita nejera-  
neein neeichene jaun, leinjiincha niha inara Relaerane jaun.

<sup>9</sup> Niheichu nainiheiche chuni rai: 'Canu inaca,' naain  
erenaa nainiheiche, leinjiincha niha inara Inaca dedeeune  
jaun.

<sup>10</sup> Niheichu nainiheiche: 'Canu curuaanaa,' naa inara  
rai cachane jereein neeichene, leinjiin Curisito nichaaunne  
inara Curuaanaa neein nihanune jaun.

<sup>11</sup> Nitohanihane jaun, leeochoauru amuritoheriin nena  
coaauca chunocoha inara janane, cha lateein neeuruha  
leeochoaurune, acaauru coroatajanemiin.

<sup>12</sup> Nitohaneein leeochoauru amurijiriin nena jerenacaau-  
rute leeochoauru fautaain tenojoinereein. Jana leeochoauru  
fautaain neite, leeochoauru amuritoheriin tenojoinereein.

<sup>13</sup> Coaraain nainacuche Cana Coaunera rai rauhi que cache  
relaaureraauru aina fariseeocuru. Inarate Cana Coaunera  
Cojoanona que nena jerecuruha leeochoaurune caohater-  
aneein neeiche. Inara netonai que ichaonaa naineneeichene  
jaunte, que ichaauruha leeochoaurune caohateraneein nee-  
iche.

<sup>14</sup> Coaraain nainacuche Cana Coaunera rai rauhi que  
cache relaaurera aina fariseeocuru, autanaauru loreri ni-  
hanatiin ruluhin neeichene jaun. Nitohaneein ichaohich-  
ene aninoaeraneete, Cana Coaunera bajaai chene carajaain  
bajaai che. Nitohaneein neeichene jaunte, jataain caseteco  
coaraa curiquicheein inara.

<sup>15</sup> Coaraain nainacuche Cana Coaunera rai rauhi que cache  
relaaureraauru aina fariseeocuru. Inarate chauratane sacu-  
ritaain cucuana cuhaneuru amuhemujeein cachaauru ari-  
iriquiche, nechu jataain Cana Coaunera esenetaera niha  
nocoetiin relanajaainchene, coroata saain inara amurijiriin  
moconajaera cachaneein neeuruhane coina.

<sup>16</sup> Coaraain nainacuche inara maosa rijijieein nenacaauru  
cachaauru relaeraneein nenacaauru. Inarate chunocoha,  
Teenforo coreniha cha ichaane coina aitohane sainejeein  
nii naitonjoa ichaeniha cachane, cha ujuaihoneein nenihane  
que aitocoiche. Nete laen Teenforo corujele oro coreniha  
chaachaain nihane coina aitohane jana, chatohanai ichaain  
nenihane cocoaeraane que aitocoiche.

<sup>17</sup> Aaso aina maosa rijijieein nenacaauru cachaauru. Cha  
jataain inara rai nelateein nenaane orona. Tana nii Teen-  
foro coreniha que banijiaineein niha nii orone jaun, jataain  
nelateineein nihane coitucuhichene.

<sup>18</sup> Chaen techu: Chunocoha, Cana Coaunera que bani-  
jiai lenonecuru mocohichene jaan rori- *altar* coreniha cha

ichaane coina aitohane sainejeein ichaenhane, cha ujuai-honeein nenihane que aitocoiche. Nete laen, nii rori- Cana Coaunera que banijiai iniho mocohichene jaan- *altar* ichoae nenea coreniha cha ichaa cachane coina aitocoichene, esinae rauhijiriin nohanelanaala ichaane coina aitocoiche.

<sup>19</sup> Maosa rijijieein nenacaauru cachauru. Cha jataain inara rai nelateineein ne. Nii Cana Coaunera que banihateein tenojoin inihona, ainhane rorina. Tana nii rori coreniha Cana Coaunera que banijiaineein niha nii inihone coitucuhichene.

<sup>20</sup> Aihane jaun nii rori coreniha chaachaain nihane coina aitoha chunine, nii roriicha coreniha coatiha icharinaain, nii nichoae nenea corenihane maajeeinte ichareein.

<sup>21</sup> Jana Teenforo coreniha chaachaain nihane coina aitohane, coatiha Teenforo corenihacha ichaane coina aitorinaain, Cana Coaunera quene maajeeinte aitoreein ecu nihane jaun.

<sup>22</sup> Jana dede coreniha chaachaain nihane coina aitoha chuninete, Cana Coaunera nelaurianajaneein niha dedene jaun, Cana Coaunera quene maajeein aitoreein.

<sup>23</sup> Coaraain nainacuche fariseeocuru aina Cana Coaunera rai rauhi que cacha relaaureeraauru, inaraacha ichai coitucuhin ichoaneeneichene jaun. Caohacha ichaa nocoetiinte niqui jataain ansijiin laojoiri niha natiin Cana Coaunera rai teeiche. Nete jataain nelatei Cana Coaunera rai rauhi tonoraain neneeiche. 'Caohacha nejesinaacha ichaain, baaso coacuelanaala neein, cairichaaajoaain leeochoauru coaraain, Cana Coaunera ere tonoraain aca jerihane rijijieein que asiin cha ichaelanaala neeuche,' naa Cana Coaunera rai rauhine sainejeein tonoraeneeiche. Nii leeocho jianelanaala nii rauhi aitoonjoa ichaquichenete caohachae.

<sup>24</sup> Inarate, maosa rijijieein nenacaauru cachauru relaeraneein neeiche. Jataain ansijin laojoiriniha natiinte niqui tonoraain niha cachane jereein neeiche. Nete jataain banejelanaala baaso ichaain neeichene coaraain coitucunaa naineeneeiche.

<sup>25</sup> Coaraain nainacuche Cana Coaunera rai rauhi que cacha relaaureeraauru aina fariseeocuru. Inara cacha coritaera nequichenete, acau cohichene jaan janoriicha culeequiche. Nete cuhanai culejeneeichene jaun jataain calanine cuhanai. Nii rijiiicha inara suujua cuhanai, inara suujua cuhane coacuhin baasoneein cacha basijiaauhin, inara amute cacha caje cha chunaain, naaonjoaainchene jaun.

<sup>26</sup> Cha coitucuelanaala nitajenaa neein nenacaauru fariseeocuru. Jauriaanejeein nii acau cohichene jaan janori culeequichene rijijieein, nii inara suujua cuhanai itolere

baaso ichaquichene jaan caaun calanineein niha inara suujua cuhanaine jaan jaaochete, somaraain neeiche.

<sup>27</sup> Coaraain nainacuche Cana Coaunera rai rauhi que cacha relaeracuru aina fariseeocuru, aiha atanebana airichai nichajaine rijijieein somaraain, jana asaaun itolere onaa bucuuru calani sirihane rijiicha inara suujua cuhanaine jaun.

<sup>28</sup> Nii aiha atanebanane rijijieeinte, cachaauru nota rai, inara jaberocohacha cacha caohacha tocohaneein inanacae. Nete, inara suujua cuhane casajenetiin, cacha coritaeraniha caohacha ichaa nocoetiin aaichene jaun, leinjiin calani rijijieein neeiche.

<sup>29</sup> Coaraain nainacuche Cana Coaunera rai rauhi que cacha relaeracuru aina fariseeocuru, inaraacha ichai coitucuhin ichaeneeichene jaun. Casajenetohichene jaunte, nechu cacha coritaeraniha, nii inara foerateracuru sonojoihunru *profetacuru*, cacha caohachaaain suujua coaraauru, naaonjoainuri cojunaca ichaquiche ajeri caje, caohatiin itolere que corujueleteein.

<sup>30</sup> Nitohaneein ichaainte: 'Cana foerateracuru jiniichaain ichaohacachelune jana nihane, coatiha acauru coroatajane rihahacache, *profetacuru* sohin jaaoruhane jana,' naain ereeiche.

<sup>31</sup> Niritiinte, inara raajenihane, nii inoaenlu *profetacuru* sohin jaaoreralu nefoeratenequichene coitucuhiche.

<sup>32</sup> Inae nitohaneein nunuheteuruhalu inara foerateracurune jaan besautiaauche.

<sup>33</sup> Acanocuru, acano caje nefoeratenacaauru. Coatiha usi tabai jana caseteco neriquicheeinne caje nichoteriheicheein.

<sup>34</sup> Nii coinate inara rene *profetacuru*, cha cojoeluinanaa inaaaurera, cacha relaeracuru, naaonjoainuri letoaanune jana, tabaauru sohin jaohin, coroso que tabaauru teein, tabaauru faohariquicheein sinacoca asae teein. Chaen techu, neseeuuru neseeuuru naineein arinajariquicheein.

<sup>35</sup> Nii jaunte inara, satiin cacha caohachaauru atinanohichuru coreniha caseteco coariquicheein. Caohachaaain suujua coara Abeli atinaauruhallune que nunuheteein, Cana Coaunera rai jelai teein nenaateeuruhane jaan rori rohan nena *santuario* rohan teein inaraacha soilu- Berequihasi calaohi Sacariasi que tiaaajoaain, caseteco coaraa curiquicheein.

<sup>36</sup> Esinae rauhijiriinte nitohanihane coreniha, caseteco coaracurureein caa enene nenacaauru cachaauru," nae Cana Coaunera rai rauhi que cacha relaaaurera aina fariseeocuru rai Jesoso.

*Jerosaleen cocoaichacuru coreniha chanaa Jesusone*



<sup>37</sup> Niritohane baihate: “Cairichaaajoaaiche Jerosaleen co-coaichacuru, inara rene Cana Coaunera letonocuru *profetacuru* sohin jaohin, Cana Coaunera ere beracuru bodoosi-iche ajeri quene jaun. Araai saaine niqui, ii cocoaichacuru ranaa jereun, nitaro asae calaohichuru taojiaa ataoharine rijijieein. Nete canu esenetaeneeichene jaun canu rene unaa jereneeiche.

<sup>38</sup> Aonacuche. Ena caje coauneein, inae inara aina nerihaaunni. Aihana jaun, inae nerinaain inara beraicha.

<sup>39</sup> Inae nacoauneein canu coariheeicheein, turuhanune bana: ‘Caa ena turunaa Cana Curuaanaa coroaecuruhine satiin chauratane que nenacaauru cachaauru,’ nariquicheeine que tiaaajoaain,” nae Jesuso.

## 24

### *Nitajerichaain Teenforone biha Jesusone* (*Mr 13.1-2; Lc 21.5-6*)

<sup>1</sup> Inae Teenforo caje mituhin jelai caje amuhane rai niha Jesusone janane, rohan nichuuntaacoain caohatiin ichanohiniha nii Teenforone coaracaanu aina nerelanaa nichaanune.

<sup>2</sup> Nii jaunte: “Caohatiin ichanohiniha caa Teenforonena coarajeeiche. Esinae rauhijiriine inara rai aitoon, coatiha nii leinjiinniji ita ichoae nerinaain caa ena inaraacha coarajei ajeri, inae satiin nitajerichaaine jaun,” nae aina nerelanaa nichaanune rai Jesuso.

### *Nacoauneein tururichaain Curisitone bajaauruha aina nerelanacaaurune* (*Mr 13.3-23; Lc 21.7-24; 17.22-24*)

<sup>3</sup> Nii baihane, Oliboneein acaauruhacha curuaatei ichtane ucuunno cuhacaanu, ecu turuhin jelai lauhecoha Jesusone jana, rohan nichuuntaacaanu aina nerelanaa nichaanune. Nitohaneein rohan nichuuntaainne:

“Canacaanu rai nii chaitoonjoan beeinene jerichaanu Curuaanaa. Chabana nacoauneein cau tururiquiin. Chatohanaicha inae turuhe lalajeeine jana, ii turu cojoinaca beraneein coarichaanuhin, inae saaelalajiha cana janonaane bana,” naain caje bajaacaanune janate:

<sup>4</sup> “Caohachaanu necohalajiin neeuche, nabana inara coritaauruha chunocohacurune coataara.

<sup>5</sup> Arajii cachaaurute, canu niha nocoetiin inara coritana jerecureein: ‘Canune Curisito Mesihaseeunra,’ naainte, arajii cachaauru coritaaurureeincha.

<sup>6</sup> Niha sonaana cau, tajiha, naaonjoaaine coitucuhichene, jiaonriha nesoonetohichenera, nitohanihate cureein nii

ajinihara. Nete, nitohanihane nihanatiin, jaiti cana janonaa satono que turuenerreeincha.

<sup>7</sup> Nejelau lauri nenacaauru ainate, sonaana que neeureein leeocho lauri nenacaaurura. Nejelau atane que nenacaauruniha natiinte, leeocho atane que nenacaauru aina sonaana que neeureeincha. Chaen techu, itolere sacuritaain niha mijetenane jana, araai laurii atanecuru que niha cureein carorara.

<sup>8</sup> Nitohaneente nunuheca cureein, inae cana cojoanonaa satono que turuhelalajihane jana, jataain inaderaauruha cachaaurune jaan cojoanonaara.

<sup>9</sup> Nii jana inarate tenojoiniha curiquicheein cocoainanacaaihuri rai, inara faojoaain, inara atinaain, naaonjoaain inara teeuruhane coina. Chaen techu, satiin cachaauru, canu coreniha inara que nererojoecaeriin neeureeincha.

<sup>10</sup> Nii banate, arajii canu esenetaera niquichene, inaraacha esenetai jianein, ita que nererojoecaain, nejesinajeein ita colurujueein ita teriquicheein cocoainanacaaihuri rai.

<sup>11</sup> Arajiite *profetaniha* nocoetiin turuhin namute cachaauru coritauruhane, acaauru esenetaaurureein arajii cachaauru.

<sup>12</sup> Nitohaneente, jataain baaso coacuhin inae ita belaihuruhane jianein niha cuurureein cachaauru.

<sup>13</sup> Nete laen, nii niicha esenetai esenetaane nunuhetihane caje coauneein, jerichanejeein satono que tiaain sacuera nichotereeincha.

<sup>14</sup> Caa ena nena ichaonaa erenaa raotono quiicha beebejei Cana Coaunera Cojoanonaate, satiin chauratane sacuritaain benojoinereein, satiin cachaauru inae coitucuuruhane jana, besaute que turuha cana cojoanonaane coinara.

<sup>15</sup> *Profeta* Danieriicha laenailu reretaain coarate nii coitucuhin nichotena nainereein. Aihana jaun, inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratenaa casicheine coaraquichene,

<sup>16</sup> Jodeau nenacaauru sorooruhine ichatane ucuunno que cuhincha.

<sup>17</sup> Jana, rai loreri janori ichoae nena, jiaonriha fauhin rai rucuhele raane.

<sup>18</sup> Jana rai nocoana jana nena, jiaonriha rai nenajau cauhin rai cajione ranaa coaucane.

<sup>19</sup> Jataainte cairichaojoaurureein nii cojoanonaa que turuhane bana ausurineein nenacaauru enecuru, sisihajeein canaanai sirichauru enecuru, naaonjoainuri.

<sup>20</sup> Cana Coaunera bajaauche, nabana jelaronaa bana, niheichu nebetacanaa cojoanonaa, naaonjoain bana niha nii sorohichene jaan cojoanonaane coataa.

<sup>21</sup> Nitohaneeinte niha cureein jataain necairichanaa tabai, cana necoauna caje coauneein nii chabana niha nitohanaine que airijiin niheichu nerinaain nii baiha.

<sup>22</sup> Jana, nii cojoanonaa sarotiaeniha Cana Coaunerane, satiin cachaauru nichotena nainecururihei. Nete, atiin sarotiareein, janijiin niicha ranojoihunru belaitohane jaun acaauru coreniha.

<sup>23</sup> Chunocoha inara rai: 'Caute ne Curisito Mesahasicha. Chajaau tejian coanicha,' naa inara raine, jiaonriha esenetaichene.

<sup>24</sup> Turuururichaain inara rene casajeeuru *profetaniha* nocoetonacaauru aina Curisito mesihasihiha nocoetonacaauru. Nitohaneein turuhinte, itolere cojoelanaacojoai ichacurureein, janijiin Cana Coauneraacha ranojoinunrune maajeein coritana nainecuruhane coritacuruhane coina.

<sup>25</sup> Nitohanihane ajinihane inara rai beeun, caje coitucuhin nainaain ichaohichene coina.

<sup>26</sup> Aihane jaun, inara rai: 'Nota tajiha cache areroote ne,' naauruhane nihanatiin jiaonriha cuhichene. Niheichu: 'Nocoa caute ne nasiincha,' naa inara rai chunine, jiaonriha esenetaaichene.

<sup>27</sup> Charijieein teeinti, enoto mitu nichajai caje jilenetoha jiacane enoto soo nichaae kuhine, satiin coanojoi ne. Nii rijijieeinte, satiin coanojoiniha cureein, inae nacoauneein cau turuhanu acaihaniji Cacha Calaohineein nejanoanaa nichaaunne bana.

<sup>28</sup> Charijieein teeinti, niha caanii setune que fauha ichotarine caje coitucuerae. Nii rijijieeinte coitucunojoinereein turuhanu canu Curisitonichaaunne bana.

*Tururichaain acaihaniji cacha calaohineein nejanoanaane (Mr 13.24-37; Lc 21.25-33; 17.26-30, 34-36)*

<sup>29</sup> Inae nitohaneein niha nii necairichanaa tabai cojoanonaane janate, nocohenaneein nerotoreein enoto cono. Atene netonaite, conohane jianereein nii cojoanonaa bana. Jana arasijieeurute, dede caje naluurureein. Dedeu nenacaauru nihanatiinte nerurujuaaurureein.

<sup>30</sup> Nitohanihane janate laen, inanacareein dede caje inae fauha uhanu canu acaihaniji Cacha Calaohineein nenea nichaaunne bera. Nii jana, satiin chauratane sacuritaain nenacaauru cachaaurute, jataain coasinacaun chanaain coaracuruhane janane, dede sacari jana uhin fauha ureeunni acaihaniji Cacha Calaohineein nenea nichaaunne, jataain necaohachaain itolere ichana naineein nelateein.

<sup>31</sup> Nitohaneein turuhinne canu letonocuru anjeraauru letoareeunni, tonijiaain jaaiha toteein, satiin chauratane sacuritaain, itolereneein satono tinonoritiin nenacaauru janijiin canu ranojoinunri cachaauru taojiaauruha canu raine coina.

<sup>32</sup> Aihana jaun, caa uhera que inara relaanune jaan que nerelaauche. Charijieein teeinti, inae rai nunecuru caohatonanaain alohacoaain ujuanhane caje, inae cataainjia ajaanaane coitucuhiche.

<sup>33</sup> Nii rijijieein, caa inara rai caitoonjoa tocohanihane coaraqichene, inae turuhelalajihanu acaihaniji Cacha Calaohineein nejanoanaa nichaaunne que nainacuche.

<sup>34</sup> Esinae rauhijiriinte, jaiti ooreniha caa enene nenacaauru cachaaaurune jana aicheein.

<sup>35</sup> Dede aina chauratanete nitajeurureein. Nete laen, nitajenereein, caa caitoonjoa nainaane reetiaain, canu ere.

<sup>36</sup> Coatiha laen nihei chuni, rai cojoanonaa aina, 'Naaonjoain rijiu tiaainte aicheeincha,' naain nii coitucuera. Niheichu, Cana Coaunera letonocuru anjeraauru dedeeu nenacaauru nihanatiin coitucuruhi; niheichu canu- Calao-hinichaaune saijieein coitucuhaaun canuhetonai. Acaihaniji canu Inaca Cana Coauneraachate, nii coitucuhin ne.

<sup>37</sup> Nihalu Nohene bana aihalune tocohaneeinte aicheein, inae nacoauneein turuha urichaaunni acaihaniji Cacha Calaohineein nena nichaaunne cojoanonaa que turuhane bana.

<sup>38</sup> Coaracuche nachuhinti, jaiti uheniha elo tabaine jana, rai bote cuhane fauhin enoha Nohene que tiaaojoaain, raotojoein lenoneein, acau cohin, necohansajiaain, naaonjoauruhalu cachaaaurune.

<sup>39</sup> Nejetaote laen, urichaaain elo tabaine coaaujeeurenihane jana, uha elo tabaine jaun jetao, jitariin acaauru joocalu ne. Nii rijijieein nechu, coohatejeeurenihane cachaaaurune jana, nacoauneein turoreeunni acaihaniji Cacha Calaohineein nejanoanaa nichaaunne.

<sup>40</sup> Nii turuhanune rijieeoritiinte, ocoana jana neeurureein coroatajai cachaauru. Leinjiinte, amanojoinihane jana, leeocho ratirinojoinereein.

<sup>41</sup> Nii jana, coroatajai enecurute, tutune jaa neeuruhane jana, leinjiin amanojoinihane jana, leeocho ratirinojoinereein.

<sup>42</sup> Nitohaneein: 'Cuu tiaainte, turuha ureein canu Curoaanaa,' naain coitucuneeichene jaun, tururichaaunnine que nainaain ichaauche.

<sup>43</sup> Charijieein teeinti, leinjiin cacha: 'Cuu tiha janotiine janate turuha ureein cau asijiauto,' naain coitucuhane que

nainaane jaun, nii chuni rai loreri asae enohane jerelanaala caohatiin rai loreri beraihane jaun, nenere basijiaera. Nii rijijieein inara netonai jatoroain neeuche.

<sup>44</sup> Aihane jaun, Cana Coaunera Calaohi cacha caje nejanonaa nichaaunne turu cojoanonaa coitucuneeichene jaun, inara netonai nainain jatoroain canu cohacuche.

*Fatoroon ere tonoraain nenea cacha aina, fatoroon ere tonoraelanaala nenea cacha*  
(Lc 12.41-48)

<sup>45</sup> Cha teeinti letoaain ratiriha rai fatoroonne tonoraain, inae cuu tihane jana rai loreri asae nenacaauru cachaauru coroaate,

<sup>46</sup> nii jataain raotojoein neeine, nii letoaain ratirihane jaan ichajihane jana eruha nii rai fatoronne.

<sup>47</sup> Nitohanein rai fatoroon aitoonjoa tonoraain icharate, esinae rauhijiriin satiin rai niicha sirii beraichaneein tereein rai fatoroon.

<sup>48-49</sup> Nete laen: 'Jaitijiecha carajarein rai fatoroon,' naain nii leeochoauru letonocuru faojaain sonajaain, ajetori-aacuru aina netaojiaain lenoneein ajeein, naaonjoaan,

<sup>50</sup> cha cohatejelanaala nihane jana turuhane, nii nechu aansai letono casetecareein rai fatoroon,

<sup>51</sup> caseteco coaracuruha nechu cacha coritaa Cana Coaunera coitucuha nocoetonacaaurune rijijieein. Ecute catu rioneein chanareein," nae jetao aina nerelanacaauru rai Jesoso.

## 25

### *Lechooncai ranunaauru ichanohi que erenaa*

<sup>1</sup> "Cana Coaunera Cojoanonaate, aihuruha lechooncai ranunacuru nisirihatenaa beseta quene rijijie. Nii lechooncai ranunacurute, rai cono erene que mocohin nenea amain, nii nisirihateneni cohaca cuure turu jana raauruhane coina.

<sup>2</sup> Nii lechooncai ranunacuru caje, saouqii ranunacurute, niicha ichai que caohachaaain coacuelanaala icharaauru ne. Jana, leeochoauru saouqii ranunacurute, jataain nainain niicha ichai icharaauru ne.

<sup>3</sup> Nii saouqii cha coacuelanaala nenacaauru ranunacurute, rai cono amauruhane saijieein, nacoaauneein noitecuruhane jaanu erene amaarene.

<sup>4</sup> Nete laen, nii saouqii jataain nainain nenacaauru, rai cono amauruhane choae tacaain, le botichananaain rai noinu erene amaare.

<sup>5</sup> Nitohanein cuuru jana, jaiti turueniha nii nisirihatenine jaunte, inae siniitoruhane jaun, satiin sinihure nii ranunacuru.

<sup>6</sup> Nii janate, inae dede catai rijiu: 'Inae uha nii cacha nisirihatenei. Chajaain que tacaain rauchera' naain toniha eheonane jaunte,

<sup>7-8</sup> nimichucutaain rai cono noitecuruhane jana, nii saoqui cha coacuhelanaala nenacaauru ranunacuru, nii saoqui nainain cono noinu que erene uhaure rai: 'Atiin canacaanu sihuche aansijiin, nii inara cono noi erene quera. Inae saa rai noi erenene jaun, jaca canacaanu conone jaunne aitocoaanura,' naauruhane janate:

<sup>9</sup> 'Nainihaacanuta. Inara sihacaanune, canacaanu rai niha-natiin nerihane coalanaalata. Chajaaincha que necoreteeuruhane jaun cuhin, coretenichuchera,' naaure nii rai cono noinu amaain cunacaauru ranunacuru.

<sup>10</sup> Nete nii rai cono noinu erene coretiha cuuruha nii saoqui cha coacuelanaala nenacaauru ranunacurune jana, inae turue nii nisirihatenei cacha. Nitohaneein turuha nii cacha nisirihateneine janate, aina jiniiquiin loreri asae enooruha beseta que nii saoqui ranunacuru nainai nenacaaurune jana inae nefue acuuja.

<sup>11</sup> Nii janate, inae nii acuujuaniha turuhin: 'Curuaanaa, atiin canacaanu rai acuuja joaracaane canacaanu netonai enohacaanu,' naauruha nii saoqui ranunacuru cha coacuelanaa nenacaauru, rai cono noinu coretecuruhane caje turuhinne janate:

<sup>12</sup> 'Esinae rauhijiriin inara coitucuhanune coalanaala,' nae acaauru rai nii curuaanaa. Nii rijichate cureein Cana Coanera Cojoanona.

<sup>13</sup> Aihana jaun, itolere bana nii que nainai jatoroain ichaaoche, 'Naaonjoai janonaa banate aicheein. Cuu tiariinte aicheein,' naain coitucuneeichene jaun.

*Cachaauru rai coriqui tein ratiricha fatoroon rijicha Cana Coanera Cojoanonaane*  
(Lc 19.11-27)

<sup>14</sup> Cana Coanera Cojoanonaate, leinjiin cacha coriajai atane cuhane jaun, rai cachaauru cotijiaain, acaauru que coriqui beraichatera rijijie,

<sup>15</sup> leinjiin rai saoqui oaraacai coreneein nena coata caje coriqui te. Jana leeocho raite, coroata oaraacaain te. Jana leeocho raite le oaraacaain te, le cachaauru rai coretena nainecuruhane jeonijihanaain teinte amue.

<sup>16</sup> Nii saoqui oaraancaain raera cachate, nii coriqui que rucuhale coreteein, que necoreteein saoqui oaraancaain nii coriqui jojoe.

<sup>17</sup> Jerichanejeein techu, coroata oaraacaain niicha rai jojoe nii coroata oaraancaain raera cacha.

18 Nete laen, nii le oaraancaain raera, niicha bajei atane jachu cuhane nii rai fatoroon tenojoi coriqui asi.

19 Nii baiha carajaain catiaainte, inae turue nii acauru curuaanaa coriqui tein ratiricha. Nitohaneein turuhinte, nii acauru rai niicha tei coriqui coreniha acauru rebe bajae.

20 Nii saoqui oaraancaain raerate ichoaichaniha turuhin: 'Curuaanaa, nocoja taolu canu rai, saoqui oaraancaain iicha tei coriqui. Nocoja chaen leeochoa saoqui oaraancaain joojaaune jaan,' naain, nii coriqui niicha joloji tiha nii rai cachane janate:

21 'Jataain caohachate ichaaicha, jelai amuritoriin nenea beraichaneein ii tereunnicha. Aihana jaun, chajaain caloheri asaae enoote jiniiquiin rachoojihacara,' nae nii curuaanaa.

22 Nii baihate turue, nii cacha coroata oaraacaain coriqui raera. Nitohaneein turuhinte: 'Curuaanaa, nocoja taolu canu rai coroata oaraancaain iicha tei coriqui. Nocoja chaen coroata oaraancaain joojaaune jaan,' naa nii coroata oaraacaain raera cachane jana jetaote:

23 'Jataain caohachate ichaaicha, coroatajajei aina caohachaaain erenaa tonoraain ichaine jaunne, jelai amuritoherii beraichaneein ii tereunni. Aihana jaun, chaajaain caloheri asaae enoote, jiniiquiin rachoojihaca,' nae nii curuaanaa.

24 Nete laen, nii le oaraancaain raera cacha turuhin: 'Curuaanaa, nechua aansai cachaneeine jaun, temueneeneine jaunru jelai caje temule raain, ii ocoananelanaala nenacaauru caje nihanatiin temule raain,

25 naajoaaine jaunna ii coasiha, atane jachu cuhane ii coriqui asihun. Nete cau ne nii ii coriqui,' naain nii coriqui cainaa nii cachane jaunte:

26 'Iite, canu cacha baasoneein bajeriti cacha neei. Inae raotojoein canu temulenelanaala nenea niha natiin raain, canu ocoananelanaala nenea caje temule raain naajoaane coitucuhine saijieein,

27 chanuna chaen, canu coriqui amaain teneei banco cuhane. Bana nitohanihane jana nihane, canu turuneeneine nii banco cuhane neein nejoocane jaanne maajein rareeun,' nae nii curuaanaa.

28 Niritiinte, ecu nenacaauru rai: 'Caje nii le oaraancai niicha sirii coriqui ruluhin, nii lechoonca oaraancaneein siricha rai teeuche.

29 Nitohaneeinte, siricha rai jataain jelai amuritoheriin tenojoinereein, jelai amuritoheriin sirihane coina. Jana, cha sirilanaala nenaate, acaihaniiji niicha sirii, jitariin caje ruluerareein.

<sup>30</sup> Aihana jaun, caa canu cacha baaso cha coitucuhi mucuhin, naain airiniha nocohenaanau jaaochete, ecu neein mainajeein chanaaine,' nae ecu nenacaauru rai.

*Rucuhenoinerichaain baaso icharaauru aina caohacha icharaauru ichaone*

<sup>31</sup> Inae rai cono caohacha que conohin, rai anjeraauru cataaun uhin turuhin rai rori- *trono* ichoae nelauriaanu canu Cana Coaunera Calaohineein cacha caje nejanoanaa nichaaune banate,

<sup>32</sup> satiin lauri lauri nenacaauru cachaauru turuurureein canu acatiha. Nitohaneein nacatiha turuuruhanane janate, carenerocuru caje, jelai teein cabraauru leruha carenero beraichane rijijieein,

<sup>33</sup> raotono nichajai que, nii janijiin niicha ranojoihunru- rai cachaauru teein, najaabiji nichajai que nii rai cachanelanaala nechu aansainein nenacaauru tereein.

<sup>34</sup> Nitohaneein jelai tihacoaain lerunajaainte, nii raotono nichajai que nenacaauru rai: 'Chajaauche cajiha satiin, nii canu Inaca rausiaenojoneein neiniquichene. Chajaauchete, cana rai chauratane coaunaane caje coauneein, inara que banihateein canu Inaca Cana Coauneraacha rucujuei Cojoanona que ichaohiche.

<sup>35</sup> Inarate, mijiitichaaunne canu coroaatein, cocoirichaaunne acau que cacocaaain, canu nesurunaja colane amuhemuhecaunne, canu nesurunajaanu teein,

<sup>36</sup> lanaa canu rai cajionene, carai cajione teein, cunaitichaaunne turuhin cacoharaain, caresero cuhane nihanune jana, turuhin canu coaraain, naaonjoaain canu rai nelateein nerejetocoiche,' narichaaunni acaauru rai canu Cana Coaunera Calaohi cacha caje nejanoanaa nichaaune. Niritocaaun acaauru raine janate:

<sup>37</sup> 'Curuaanaa, esinaaena mijiteeine ii coroaatein, cooireeine ii cocoaain,

<sup>38</sup> ii nesurunaja colane amuhemuhequine, ichei ii nesurunaja teein, ii cajione colane neeine, ichei cajione teein,

<sup>39</sup> cunaiteein, caresero cuhane neein naaonjoaine turuhin ii coaraain, naaonjoa rejetocooanulura,' naauruha rai nii couluuonojoi suujuaquiin nenacaaaurune janate:

<sup>40</sup> 'Satiin canu nejeraauru cairicheinejeein nenacaauruhacha latei terejetocoichenete, canu rai tiha nii terejetocoichelu,' naain acaauru tonorareein nii acaauru Curuaanaa *Rey*," nae acaauru rai Jesoso.

<sup>41</sup> "Niritohane baihate, nii najaa biji nichajai que rai cachanelanaala nenacaauru rai: 'Naain cacaje amuhin, moconajaera aina rai letonocuru que banihateein ichanohin



chabana jacanaa charanejeein nenea usi rene cunichuche, nii coina neiniquichene jaun,' naain usi rene letoanajareein.

<sup>42</sup> Niritiin usi rene letoanajaainte: 'Inarate, mijitichaaunne niha natiin, canu coroaatelanaala, cocoirichaaunne niha natiin, acau que canu cocoaelanaala, naaonjoa rejetocoichelu.

<sup>43</sup> Niheichu canu nesurunaja colane amuhemuhecaaunne niha natiin, canu nesurunaja tiheeiche. Canu rai lanaa cajionene niha natiin, canu rai tiheeiche. Niheichu cunaiteein, caresero cuhane neein naaonjoaanune niha natiin turuhin cacoharaheeiche,' naanu acaauru raine janate:

<sup>44</sup> 'Curuaanaa, esinaaena ii coroaatelanaala, cocoireeine ii cocoaelanaala, ii nenajanu lateeine ii rai telanaala, cajione lateeine ii rai telanaala, cunaiteein, caresero cuhane neein naaonjoaaine jana turuhin ii coaraelanaala, naaonjoan rejetocooanulu,' naain bajaauruhane janate:

<sup>45</sup> 'Esinae rauhijiriinte, satiin cairicheinejeein nenacaauru cachaauruacha latei teneeichene canu raite nii teneeiche.

<sup>46</sup> Satiin nitohaneein nenacaaurute, chabana sanaachara caseteco que neeurureein. Jana, coluunojoi suujuaquiin nenacaaurute, chabana sanaachara ichaonaa que neeurureein,' naain tonoranaareein nii acaauru Curuaanaa *Rey*," nae canacaanu rai Jesoso.

## 26

*Jesoso mucuuruhane coina que ereereecuruhane*  
(Mr 14.1-2; Jn 11.45-53)

<sup>1</sup> Inae cachaauru rai niritohane nainaaainte, niicha relai nichaanune rai:

<sup>2</sup> "Nii coitucuhichene rijijieeinte, coroata janai cuhane nereein Fasocaa beseta. Inae laen Cana Coaunera Calaochi cacha caje nejanoanaa nichaaunne mucuhin teeururichaaain coroso que catinaauruhane coina," nae Jesoso.

<sup>3</sup> Nii bananeeinte, saseredotecuru curuaanaa curuaanaa Caifasi loreri asae ita taojiaaure saseredotecuru aina Jori-nichaanune bichauhenaauru,

<sup>4</sup> Jesoso mucuhin, nechu nohaneein colurujueein sohin joerateeuruhane que coaauruhane coina.

<sup>5</sup> Nejetaote: "Nainihaacache beseta cojoanonaa bana ichaacachene, nabana cachaauru suujua rohecana coataa," naaure jetao ita rai.

*Jesoso ichoaete nejujuaauruhane jaan choohite leinjiin ene.*  
(Mr 14.3-9; Jn 12.1-8)

<sup>6</sup> Betaniau, "Nabero caje nerautanaa," naain niicha curuaateuri- Simoon loreri asae niha Jesusone janate,

<sup>7</sup> ajeri coreti caje ichanohin boticha laajoiri cuhane, le curuhin jujuhin- jataain coretiin nena amaain jetao, rori ichoae lauhecoha Jesusone jana, coturi ichoae nii jujuhi choohite nii leinjiin ene.

<sup>8</sup> Nii coaraainte obajeein:

“Chanuna jataain coretothane saijieein, catohaneein jujuhi lanaje caa ene.

<sup>9</sup> Bana jataain coreein que necoreteein, nii rai core coriqui que, cairicheihuru coroatajanelanaala,” naacaanu aina nerelanaa nichaanune janate:

<sup>10-11</sup> “Chanuna niritiin caa ene rohecaache. Jataain canu rai caohachate ichae caa ene. Inae itolere bana inara aina nerihaaunni. Jana, cairicheihurute laen itolere bana neeurureein inara aina.

<sup>12</sup> Caa jujuhi choroha cajabereeo ichoae caa enenete, canu conautecuruhane coina cajabereeo rucuheca ichae.

<sup>13</sup> Esinae rauhijiriinte, cana rai chauratane sacutaain caa osa caje nichoterichaaain cachane jaan que cachaauru relauruhane jaanru, caa cajabereeo ichoae jujuhi tiha caa ene quene maajeein cachaauru rai ereereturureein. Nitohaneeinte, coaunjoinereein itolere bana caa ene,” nae Jesuso aina nerelanaa nichaanune rai.

*Jesoso coulurujija Jodasine*

*(Mr 14.10-11; Lc 22.3-6)*

<sup>14</sup> Nii jana, nii aina nerelanaa nichaanune lechoonca coroataja neein nena Jodasite, saseredotecuru curuaanaa coaraa cue.

<sup>15</sup> Nitohaneein cuhin jetaote:

“Inaajoaain carai coriqui tenaa nainequiche, inara rai Jesuso tihanune coinata,” naain acaauru caje bajaane jana nichata chooncaain coata caje nena coriqui teeuruhane coina rai aitocure.

<sup>16</sup> Nii jaun jetaote, jelai neeorihane jana inae acaauru rai Jesuso tenaa nainihane jaan que coacuhin jetao, amuhemujue Jodasi.

*Aina nerelanaa nichaanune aina janotiin lenoniha Jesusone*  
*(Mr 14.12-25; Lc 22.7-23; Jn 13.21-30; 1Co 11.23-26)*

<sup>17</sup> Inae nunuheca jorerera colane ichanohi faan quihuruhane jaan beseta Fasocoa cojoanonaane janate, Jesuso rohan nichuuntaacaanu:

“Chu Fasocoa cojoanaa nunuhe cojoanotiin que, canaacha quiineni lenone ichacaaunne jereeita,” naain Jesuso caje bajaacaanu aina nerelanaa nichaanune janate:

<sup>18</sup> “Chajaain taa neseeu leinjiin cache loreri asaa cuhin: ‘Cache relaerate ichei, “Inae canu cojoanonaa que tihane jaunne ii loreri asaa ureeun, cuu canu aina nerelanacaauru

aina Fasocoa beseta bitoiaanune coinara,” naain aitoroate ii rai,’ nanichuchera,” naain canacaanu caje tabaauru letoae Jesoso.

19 Niritiin letoanajaa Jesusone jaun cuhin, nii naitoonjoa rijijieein Fasocoa cojoanotiin que canacaanuhacha quiineni lenone ichacure aina nerelanaa nichaanune tabaauru.

20 Nitohaneeinte, inae nocohecane jana, lechoonca coroatajaain aina nerelanaa nichaanune aina lenoniha ne Jesoso.

21 Nitohaneein lenoniha nihacaanune janate:

“Esinae rauhijiriin, leinjiin inara cajete, cacoelaichaneei neeichene saiijieein, caque nejeratenacaauru rai cacoluru-jueein, acaauru rai caetereeincha,” naa canacaanu rai Jesusone jaunne,

22 jataain inaderaain le cachanichaanune:

“Curuaanaa, canu quenacha aitohi,” naacaanu satiin aina nerelanaa nichaanune janate:

23 “Caa ojoaichu cuhane faan setejiarichate nii cacoluru-jueein caetereein.

24 Nitohaneeine, canu que aitiin laenanohineein niha Cana Coaunera Quiricha inoaensi cuhanena rijijieein, Cana Coaunera Calaohi cacha caje nejanoanaa nichaaunne, nii nainaa cureeunni. Nete laen, jataain cairichaaajoareein nii canu colurujuera. Caohatorihalu niqui nitohanesihane ajiniha nejanoaenihalu nii cachane,” naa Jesusone janate:

25 “Cacha relaera, canu quenacha aitohi,” naa nii coluru-jueranu Jodasine janate:

“Mmmjjjm, nii bajaaine rijijieeinte aicheein,” nae Jodasi rai Jesoso.

26 Nitohaneein lenonichaanune janate, faan mucuhin: “Narihara Cana Coaunera,” naain, cataaun nii faan tatuhin beeune beeunein aina nerelanaa nichaanune rai teein:

“Caa quihuiche. Caate, cajabereeo nenaaneein ne,” naain canacaanu rai teinte, jerichanejeein nii faan ichaane rijijieein

27 acau cooruhane jaan curu cuhane, conacai bino mucuhin: “Narihara Cana Coaunera,” naane baiha canacaanu rai nii conacai teinte:

“Satiin jiniiquiin leruune leruunein caa conacai cooche.

28 Caate cacoichananeein arajii cachauru caohachanu que canuhacha ichaneni cojunacaneein chorohi jaonjoinereein. Acate arajii osaonacaauru que suujua acaterichaaaine coina orichaaunine cojunacane.

29 Nena laen, inae nacoaunein inara aina jiniinquin, caa oba caje ichanohin conacai coenereeunni, Ofa Cana Coaunera Cojoanona que inara aina jiniiquin

neein nii bana ocoonaneein nenea bino cohacachene reeintiaaajoaain,” nae aina nerelanaa nichaanune rai Jesuso.

*Coitucuha nocoetoenerichaain Fedorone biha Jesusone  
(Mr 14.26-31; Lc 22.31-34; Jn 13.36-38)*

<sup>30</sup> Nii baihane, Quiricha Inoaensi cuhane laenanoineein nenea salmo tabaauru que nenatichaanune nainain, Oliboneein niicha curuateeuri ichatane ucuunno que cuhacaanune janate:

<sup>31</sup> “Enene cojoanotiin cuhanete, satiin inara, Canu esenetaain canu que jaaequiin neeichene jianein, ita caje riaaneriquicheein, Quiricha inoaensi cuhane:

‘Carenero beraicha sohin jaaoruhane janate,  
ita caje riaaneeurureein

niicha beraihuri carenerocuru,  
naain canu que aitiin besihalune rijijieein.

<sup>32</sup> Nena inae ohanune caje ichanacaaunne, inara ajiniha Calileea cureeunni, ecu nacoauneein jiniiquiin nenea coinara,” naa Jesusone janate:

<sup>33</sup> “Ii esenetaain ii que jaaecooruhane jianein, neeuruha leeochoaurune nihanatiin, coatiha laen canu ii esenetaain ii que jaaecohanune jianerihaaunni Curuaanaa,” naa Jesuso rai Fedorone janate:

<sup>34</sup> “Esinae rauhijiriinte, enene cojoanotiin cuhane jaiti ereniha ataohari curuaanane ajiniha, nichata saain canu coitucuha nocoetoeneriquiin,” naa Fedoro rai Jesusone janate:

<sup>35</sup> “Airihaauni bajaata Curuaanaa. Ii aina curuaaecaain jereraa casohin cajaanoruhane coinane nihanatiin, nainihaaun ii que jaaecohanune jianein ii coitucuha nocoetohanunera Curuaanaa,” naa Jesuso rai Fedorone janane, leeochoauru aina canacaanu netonai, nii aitoha Fedorone rijitoein aitocaaunu.

*Jetesemaii netiin Cana Coaunera bajaa Jesusone  
(Mr 14.32-42; Lc 22.39-46)*

<sup>36</sup> Nii baihate, aina nerelanaa nichaanune aina jelai caje amuhin, Jetesemaniineein niicha curuateeuriu cue Jesuso. Inae ecu turuhacaanune janate:

“Cau nelauriaain canu cohacuchena, inara tonohanau tajiha cuhin Cana Coaunera bajani,” naain

<sup>37</sup> jiniichaain Fedoro, coroatajai Sebedeeo calaohichuru, naaonjoaihunri amaain jataain nererojoecaaajoaain naonaaain jetao, jataain inaderae Jesuso.

<sup>38</sup> Nitohaneein inaderaain jetaote:

“Jataaine onaanajaanu rijitocojoaain casuujua cuhane inaderaaunra. Cau nedaain, canu jiniichaain ichaaojoein cacohacuchera,” naain ratirinajaanu jetao,

<sup>39</sup> acaauru caje, nita cuhin neseonraain atane que coturi temetaain jetao: “Ofa, icheine aitoon. Bana ii jereeine jana nihane, caa necairichanaa tabai caje canu rocohi. Nena canuacha jerei rijijieein ichaaine jereneeun. Ii jereeine rijijieein ichaainene jereeunra Ofa,” naain Cana Coaunera bajaane nainaanu jetaote,

<sup>40</sup> jelaiha cuhin nii neeuruha aina nerelanacaaurune jaau turuha Jesusone jana jetao, najiniha sinihuruhane jana erunajaanu jetao Fedoro rai:

“Chanuna canu aina leratojoein, sinilanaala ichaaojoein nena naineneeiche.

<sup>41</sup> Sinilanaala ichaaojoein neein Cana Coaunera bajaauche, nabana chatohanai que nesaruhin neeichene coataa. Inara suujuate niqui aitona naine, nete inara jaberoco jataain nii abaantasine,” naain jetao acaauru ratiriin jelaiha nii Cana Coaunera bajaane jaan cue Jesuso.

<sup>42</sup> Nitohaneein inae coroata saain, jelaiha cuhin Cana Coaunera bajaane cuhane jetaote: “Ofa, caa necairichanaa tabai canu cojuhin canu coaranu caje canu roconaa jereeneine, ii jereeine rijijieein ichaau,” naain jetao Cana Coaunera bajaane Jesuso.

<sup>43</sup> Niritiin Cana Coaunera bajaane caje, nacoauneein jelaiha cuhin, aina nerelanacaauru coaraa cuha Jesusone jana jetaote, jataain banetoe niha acaauru rai sinirenane jaun nimirichaa acaauru notane jaun, sinihuru jana erunajaanu jaun jetao,

<sup>44</sup> ecu ratirinajaanu jelaiha cuhin, Cana Coaunera bajaane nichatasatiha cue, nii jauriaanejeein aitohane rijitoejin Jesuso.

<sup>45</sup> Nitohaneein jetaote, jelaiha nacoauneein nii neeuruha aina nerelanacaaurune jaun, acaauru rene turuhin jetao:

“Jaitinachura caohacha nainetoejin siniichete. Inae laen, Cana Coaunera coitucuhichuru bijiu tenojoinichaaun, canu Cana Coaunera Calaohi cacha caje nejanoanaa nichaaunne cojoananaa que turuha.

<sup>46</sup> Chajaanu nimichucuchete amuhacachera, inae nichuuntajiha nii acaauru rai caeteraanura,” nae jetao Jesuso aina nerelanacaauru rai.

### *Jesoso mucuuruhane*

*(Mr 14.43-50; Lc 22.47-53; Jn 18.2-11)*

<sup>47</sup> Niritiin, jaiti aina nerelanaa nichaanune aina ereereeca Jesusone janate, turuha uhe, Jesoso aina nerelanaa

nichaanune lechoonca coroatajaneein nenea Jodasi, letoanajaauruha saseredotecuru curuaanaacuru curuaanaa, chaen Jorionichaachene bichauhenaauru, naaonjoainurine jaun, enuha, sabere, naaonjoain que biji achunequiin nenacaauru arajii cachaauru uhaain.

<sup>48</sup> Jaiti Jesoso rene turuelanaalate, nii aina cunacaauru rai jetao: “Inae cuu turunaane: ‘Sohara cacha relaera,’ naain rai nomeri lohitoreeuni, caje coitucuhin, aca mucuhichene coinara,” naain acaauru rai be jetao.

<sup>49</sup> Niritiinte Jesoso rohan nichuuntaain: “Sohara cacha relaera,” naain Jesoso meri lohitoha Jodasine janate:

<sup>50</sup> “Cacoelaicha, ii jereeine rijijieein coaraain chatohaneein caetecurumiin,” nae Jodasi rai Jesoso.

Nii janate Jesoso rohan nichuuntaain, Jesoso mucuure nii Jodasi amanojoinuri cachaauru.

<sup>51</sup> Nii janate, rai sabere rochitiin, que nii saseredotecuru curuaanaacuru curuaanaa letono uricho sauhitiin beuhitoha leinjiin cacha, Jesoso aina cunaane janate:

<sup>52</sup> “Jelaiha rai curu cuhane, nii ii sabere teeu. Satiin sabere que sonajaain jaaoreraaurute, sabere que acaauru netonai sonojoiniha cuurureeinha.

<sup>53</sup> Tana ena canu Inaca caje bajaanune, canu rai lechoonca coroata lauriin anjeraauru letoanaa nainiha, acaauru aina canu coreniha ita sooruhane coinane coitucuhine.

<sup>54</sup> Nene naineneen nitohanai ichacaaunne. Inae rai Quiricha inoansi cuhane, catohaneein caetecururichaaanne que aitiin laenaeratihalu Cana Coaunerane nainane nihane jaun,” naainte nii mucuha unacaauru rai:

<sup>55</sup> “Chanuna necha aansai cacha mucuha unaa tochaneein, sabere, enuha, naaonjoainuri que biji achunequiin canu mucuha uhiche. Cojoanoonetojoeine inara notara-caae, Teenforo asaee cachaauru relaa nenajacoon. Nii saijieeinte, canu mucunaja queneeiche,

<sup>56</sup> inae nitohaneriquicheeine que aitiin, rai *profetacuru* que laenaeratihalu Cana Coaunerane nainaaichene coina,” naa acaauru rai Jesusone janate, ecu jelai ratiriin, satiin sorohacaanu aina nerelanaa nichaanune.

*Niha chatohanaine rucuheraneein nenacaauru Jorioocuru bichauhenaauru acatiha niha Jesusone*

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Nitohaneein Jesoso mucuhinte, saseredotecuru curuaanaacuru curuaanaa Caifasi loreri asaee amaaure nii muuureraauru. Nii janate, nii Caifasi loreri asaee ita taojiaain neeure Moisesa aitoonjoa rauhi que cacha relaaurera aina fariseeocuru.

58 Nitohaneein, inae Jesoso amaauruhane janate, nita acaauru coarajeein cuujueein sacuhin, Caifasi loreri chaje rohan neeuruha Teenforo beraichacurune jaaun, ecu acaauru aina enohin lauhequiin, jelai caje coauneein Jesoso coaraje Fedoro: “Chatohanerichaincha,” naane jaun.

59 Nii janate, nechujataain nohaneein, colurujueein Jesoso atinaeratecuruhane jaanu que coaacure saseredotecuru curuaanaacuru, chaen niha chatohanaine rucuheneein nenacaauru Jorioocuru bichauhenaauru, naaonjoainuri.

60 Nete, nitohaneein arajii cachaauru colurujeeuruha nohaneine saijieein, nii chatohaneein teeuruhane jaanu lera erusichurene. Nii jaunte inae satononiha coroatajaain nimichuhin:

61 “Esinaete chuhisi: ‘Nainichaaun caa netaojiaain Cana Coaunera coroaecuruhane jaa coloheri Teenforo chamuhintiin, nichata janojoein cuhane jerichanejeein michuhanunera,’ naain erenajaquera,” naauruha nechujataain colurijihane janate, inauheneeicha acaauru aonaje Jesoso.

62 Nii jaunte laen nimichuhin:

“Chanuna ereinei itonai. Esinaena rauhijiriin aitoine jaunna caa ii colurujeeuruha,” naain caje bajae saseredotecuru curuaanaacuru curuaanaa, nete inauheneeicha aonaje Jesoso

63 Nii jaunte rai nacoauneein:

“Esinae rauhijiriin, Cana Coaunera coreniha beeinena jereun. Iina esinae Cana Coaunera Calaohi Mesihaseinei,” naa rai saseredotecuru curuaanaacuru curuaanaane janate:

64 “Esinae rauhijiriinte, acanichaaunne que aitohicha. Canu Cana Coaunera Calaohi cacha caje nejanoanaa nichaaunnena, coarajeeichene jana canu Inaca itolere ichana nainera Cana Coaunera raotono nichajai que lauhecreeunnicha. Chaen techu, dede sacari jana uhin fauha uhanune coariquicheeincha,” nae nii saseredotecuru curuaanaacuru curuaanaa rai Jesoso.

65 Nii jaunte obaaecane cojunacaniha rai cajione romaromaain:

“Nechujataain Cana Coaunera baijiaate, caritiin ere caa cacha. Cha nenacaaenneeina coaraain cana rai colurujuera laterihacache. Inae inara netonai, Cana Coaunera baijiaeraanu rijitiin irihane aonaquiche.

66 Tonaquiche jana inara, caa naitoonjoa que,” naa rai leeochoauru rai janate:

“Esinaete chuhisi, aca colurujeeuruhane jaan ujuaihone. Aihane jaun ohanete caohachae,” naaure.

<sup>67</sup> Niritiinte, nomeri colunecuruha tabaaaurune jana fao-hacure leeochoaauru.

<sup>68</sup> Jana leeochoaaurute:

“Chajaain aihane, ii Mesihazineeine, caa ii soera co-joeluinnaaura,” naain rai nomeri faojoaain soore.

*Jesoso coitucuha nocoeteniha Fedorone*

(Mr 14.66-72; Lc 22.56-62; Jn 18.15, 25-27)

<sup>69</sup> Nii tonohanau, ecu airiniha lauhecoba Fedorone janate, rohan nichuuntaain:

“Itonaite, Calileea cocoaicha Jesoso aina nerejetohilu,” naa leinjiin ene coseenraneein nenaane janate:

<sup>70</sup> “Nii aitohine jaan cacha coitucuhaaun,” naain satiin aonajeeuruha ecu nenacaaaurune urichoo suujue Fedoro.

<sup>71</sup> Nii baihate jelai caje amuhin, rijia acujua rohan cuha Fedorone janate, coaiten coaraain:

“Caa netonaite, Nasarete cocoaicha Jesoso aina nena ne,” naain leeochoaauru rai biha leinjiine janate:

<sup>72</sup> “Esinae rauhijiriin, Cana Coaunera notaracae nii cacha coitucuaaunta,” naain nacoauneein suujue Fedoro.

<sup>73</sup> Nii catiariinte Fedoro rohan nichuuntaacoaain: “Esinae rauhijiriinte, iitonai aina nenaanein, ii ereecha cajete necoitucuerateeicha,” naaure nii ecu nenacaaauru Fedoro rai.

<sup>74</sup> “Esinae rauhijiriin, Cana Coaunerate coaraje nii cacha coitucuenihanunera,” naain nesuujiha Fedorone janate, nii rijieoritiiin inae ere ataohari curuaana.

<sup>75</sup> Nii jaunte: “Jaiti ereniha ataoharine janate, nichata saain cacoitucuhine suujueriquincha,” naalu rai Jesusone coacuhin, jelai caje mituhin amuhin, jataain inaderaain chanae Fedoro.

## 27

*Filato rai Jesoso teeuruhane*

(Mr 15.1; Lc 23.1-2; Jn 18.28-32)

<sup>1</sup> Inae janohane jana jetaote, satiin saseredote curuaanaacuru aina Jorioocuru bichauhenaauru, ita suujua rijitojoein ita suujua tacaure, Jesoso sohin jaaoruhane coina.

<sup>2</sup> Nitohanein jetaote, Jesoso ichojoaain amaain, Roma co-coaichanein nena coberenadoro Filato rai teure.

*Oha Jodasine*

<sup>3</sup> Inae nitohanein Jesoso cairichaaain atinaaururichaaanne que nainaain jetaote, jataain inaderaain netojoeete nii coulu-rujuera Jodasi. Nii jaun jetaote, nii saseredotecuru curuaanaacuru curuaanaa, chaen Jorioocuru bichauhenaauru, naaonjoainuri rai jetao:



4 “Osa quene nesaruun, inara rai atinaaichene coina cha ujuaiahonelanaala nenea cacha teeincha,” naain nii nichata chooncai coataneein nenea coriqui coretecuruhane jaan cainaa Jodasine jana jetao, ranaa jerelanaala:

“Nihei cha coitucunaa nainihaacaanu nii aina canacaanuta. Iichate nii coitucuujuueeicha,” naaure jetao Jodasi rai.

5 Nii jaun jetaote Teenforo asae nii coriqui rialaaitiin ratiriin jelai caje amuhin raajenhane rai raro ruluhi ohe Jodasi.

6 Nii jana jetaote, nii coriqui raain jetao:

“Caa coriquite, ichana corenihane jaun, leinjiin calaniheein ne. Aihana jaun, jelai teein Cana Coaunera rai canaacha tei coriqui curu cuhane, caa coriqui tenaa nainihaacache,” naaure jetao ita rai saseredotecuru curuaanaacuru curuaanaacuru.

7 Niritiin coacuhin ita suujua tacaain jetaote: “Atane ro-cooruha, caje ojoaichucuru jaauruhane coinane jaan,” naain niicha curuaateuri jelai coretecure nii coriqui coreniha, niha nejelau atane caje uhin onaane, cuu tein conautecuruhane jaanu que.

8 Nii jaun jetaote, Ichana Batane neein jelai curuaateure enanetojoeein cachaauru.

9 Nitohaneente: “Rai core nichata chooncaain coataneein nenea coriqui, Israelitacuruhacha cainai raainte,

10 coreniha: ‘Atane rocooruha, caje ojoaichu ichacuruhane coinane jaan,’ naain acaauruhacha curuaatei atane coretecure,” naain beratihalu *profeta* Jeremihasi que Cana Coaunerane rijijieein, nii naitoonjoa nainaaure.

### *Filato acatiha niha Jesusone*

*(Mr 15.2-5; Lc 23.3-5; Jn 18.33-19.38)*

11 Inae coberenadoro Filato rene Jesoso amain turuaauruhane jana jetaote:

“Iina Jorioocuru curuaanaacuru curuaanaa- *Rey* inein,” naain caje bajaa Filatone jana jetaote:

“Esinaete, acanichaaunne que aitohicha,” naain Filato tonorae Jesoso.

12 Nii nainiha jetaote, cuu teein, Filato rai coulurujuueuruha saseredotecuru curuaanaacuru curuaanaacuru aina, Jorioocuru bichauhenaaurune jana jetao, cuu inauheneeicha aonajenajae Jesoso.

13 Nii jaun jetaote:

“Toon ii que ereein ii coulurujuueeuruhane aonaaina,” naa Jesoso rai Filatone jana jetaote,

14 cuu inauheneeicha tonoraelanaala aonajian Jesusone jaun jetao, inae rai tonaain irihane jaanu coitucueene Filato.

*Jesoso ateinaauruhane rai neeuruhane  
(Mr 15.6-20; Lc 23.13-25; Jn 18.38-19.16)*

<sup>15</sup> Beseta bana naineein jetaote, janijiin: “Acate caohachae mituhanera,” naauruha satiin cachaurune jaan mitai nesisinane caseteco nihane caje Filato.

<sup>16</sup> Nii bana jetaote, caresero cuhane niha itolere sacutaain cachaaauruhacha coitucui Jesoso- Barabasineein acaauruhacha curuaatei caseteconeeinne jaun jetao,

<sup>17</sup> satiin netaojiaain codohacooruha, nii Jesoso colurujeerera cachaaaurune jana:

“Chariji caa coroatajaaihuri caje, jianichaaunne jeriquiche. Caa Jesoso Barabasina jianerihanu. Ainihanena caa Jesoso Mesihaseineein acaauruhacha curuaatei jianerihanu,” naain jetao acaauru caje bajaee Filato,

<sup>18</sup> nechu necoelai caaun, nii coulurujeeruha raine que nainaane jaun.

<sup>19</sup> Niritiin jetaote, nii cha rucuhecane jaan rori ichoae lauhaca Filatone jana: “Jiaonriha chatohaneein nii cha ujuaihonelanaala nenea cacha tenaa coaauquine. Janotiine nii cacha coreniha, jataain baasoneein sinicoonni,” naain jetao berate rai comasai.

<sup>20</sup> Nejetaote, satiin nii cuu nenacaauru cachaaauru suujuau tacaure, saseredotecuru curuaanaacuru curuaanaacuru aina Jorioocuru bichauhenaauru: “Nii Barabasi jianeein nii Jesoso atinaerateeu,” naauruhane coina.

<sup>21</sup> Nii jana jetaote:

“Chariji jianichaaunne jeriquiche, caa coroatajaaihuri caje,” naain acaauru caje nacoauneein bajaa coberenadoro Filatone jana jetaote:

“Nii Barabasi que tacaajeein jianeeinena jerichaanu,” naauruhane jana:

<sup>22</sup> “Chajana laen ichareeun, caa Jesoso Mesihaseineein acaauruhacha curuaatei aina,” naa Filatone jana jetaote:

“Coroso que laen aca teeu,” naaure jetao satiin.

<sup>23</sup> Niritocuruhane jaun jetaote:

“Chatohanai baasona ichae,” naa Filatone jana jetaote:

“Chajaain coroso que teechnu,” naaure jetao tonijiaain ehequuin.

<sup>24</sup> Nitohaneein Jesoso jianena jeriha Filatone saijieein, jianena jerelanaala rai suujua rerohecaauruha jelai ichoae jauhecotojoeriin cachaaaurune jaun jetao, acau raerateein jetao:

“Coatiha canu, orichaaain caa cachane ujuaihoneein nerinaaunni. Inarate nii ujuaihoneein neriquicheein,” naain jetao, satiin coarajeeruha nii cuu nenacaauru cachaaaurune

jana jetao, rai biji culeje Filato, nii ujuaihoneein nenihane coujunacaneein, nitohaniha acaauru ichaone jaun.

<sup>25</sup> Niritoha acaauru rai Filatone jana jetaote:

“Satiin canacaanune, canacaanu bereecuru aina jiniiquiin, oha caa cachane ujuaihoneein nerichaanuhi,” naaure jetao Filato rai cachaauru.

<sup>26</sup> Nii jaun jetaote, Barabasi jianein, nii baiha Jesoso bisichateein acaauru bijiu tein, coroso que terate Filato.

<sup>27</sup> Nii jana jetaote, niha chatohanaine rucuhecuruhane jaan colohereinein nenea- loreri seeonjoa asae Jesoso amaain jetao, curuhacaain netaojiaain neeure satiin coberenadoro rai soodarooru.

<sup>28</sup> Nitohanein tein jetaote, rai cajione rocohin que cajione lanajai curuhacure.

<sup>29</sup> Chaen couturi que oja caje ichanohin comai lauriaain jetao, rai biji raotono nichajai que otiha teure. Nii baiha jetaote, nacatiha neseeonriaain: “Laraajiin ichaohine Jori-oocuru curuaanaacuru Curuaanaa *Reycha*,” naain jetao,

<sup>30</sup> couluneeinchuru nii rai niicha teeuri otiha que jetao, rai couturi faoha facoaain que ninichaajeeure.

<sup>31</sup> Nitohanein mainajeein ninichaajeeuruhane baiha jetaote, nii cajione lanajai, que niicha curuhacuri rocohin, nacoaunein nii rai cajione esine curujuaai amaare coroso que teeuruhane coina.

*Coroso que Jesoso teeuruhane*

*(Mr 15.21-32; Lc 23.26-43; Jn 19.17-27)*

<sup>32</sup> Inae nii neeuruhane jaan jelai caje Jesoso amaauruhane jaun jetaote, Sirene cocoaicha Simoon eruhin, que nii Jesoso teeuruhane jaanu coroso baijiaeratecure.

<sup>33</sup> Inae nitohanein cuhin: “Couturi Bejero,” naain acaauruhacha curuaateihu turuhin jetaote,

<sup>34</sup> elonai que jasisii bino que jetao Jesoso cocoaure. Nejetaote, aansijiin cohin aonaain conaa jerene Jesoso.

<sup>35</sup> Inae coroso que Jesoso tein jetaote: “Chariji raineeicha nedareein,” naain jetao Jesoso cajione que nocoatijiaaure soodarooru.

<sup>36</sup> Nii baiha jetaote, Jesoso asaa nelauriaacoaain beraihure.

<sup>37</sup> Nitohanein tein jetaote, rai couturiniha nii casetecaauruhane jaan leranu rai curuaa laenacure:

Caate Jorioocuru curuaanaacuru Curuaanaa *Rey* ne. naain.

<sup>38</sup> Cuu jetao techu aina tein, coroatajai asijiautooru teure coroso que, leinjiin najaa biji nichajai que, leeocho rai raotono nichajai que, naaonjoaain.

39 Jeloon situnacaauru cachaauru jetaote, couturi jisijisi-hanaain jetao:

40 “Teenforo chamuhitiin, nichata janojoein nacoauneein michuhin jerichanejeein tiha nocoetona jeree inatiin, chajaain ichaajenhane ijiabereeo ichoterateeu. Esinae rauhijiriin Cana Coaunera Calaohineeine, nii coroso caje faau,” naaure.

41-43 Jerichanetojoein jetaotechu:

“Leeochaauru ichoteratihane saijieein, tana laen raajenhane rai jaberoco ichoteratena nainihane. Aca Isaraelitacuru Curuaanaa *Rey* nihane, coroso caje fauhinete cana netonai esenetaacache. Cana Coauneraacha que jaecohane jaun, chajaain ena ichoteratemiin Cana Coaunera, esinae rauhijiriin niicha belai nihanete, cana netonai esenetaacache. Acate cana rai aitelu, Cana Coaunera Calaohi nihane que,” naain jetao que ninichajeeure saseredotecuru curuaanaacuru curuaanaacuru, Moisesa rai rauhi que cacha ralaaureraauru, chaen Jorioocuru bichauhenaauru, naaonjoainuri.

44 Nii coroatajai asijiautooru coroso que nenacaauru nihanatiin jetaotechu, nocoeje chanuure.

### *Oha Jesusone*

*(Mr 15.33-41; Lc 23.44-49; Jn 19.28-30)*

45 Nii jana jetaote, enoto chujutoroa caje coauneein, nuna macohi amuritoheriha enotone reein tiaaajoaain nocojoe cana rai chauratane.

46 Nii rijieeoritiin jetaote, tonijiaain ehequiin: “Cana Coaunera, chanuna jelai canainatejeei,” naane neein jetao: “*Eli Eli lema sabactani*,” nae jetao Jesoso.

47 Niritohane jana, tabaauru ecu neein aonajeeurera jetaote: “*Profeta* Irihasi cotihacate aite,” naaure.

48 Nii jana, leinjiin acaauru caje jetaote, soroneein jeluhariin cuhin jetao, sie tocohaneein nena ariin ruhin, elohanti bino sisiaain jetao, jiarana nujua que nujuateein Jesoso ujuae que te, cohane coina.

49 Nii jana leeochoaauru jetaote:

“Coa rohecaate, ichoteratiha uha niicha cotijiai Irihasine coarajihacachera,” naaure.

50 Nejetaote, nacoauneein tonijiaain auhaquiin inae ohe Jesoso.

51 Nii rijieeoritiin jetaote, ecui caje coauneein ocoai cuhin nesoaiheite Teenforo cuhanai bujuaneein nena cajione. Nii jana jetaote, nerurujuaa cana rai chauratanene jana jetao, netatujuacoae ajerichuru.

<sup>52</sup> Atane banaaurune maajeen, netatujuacoaane jana jetaote, Cana Coaunera coitucueraneein onacaauru cachaauru nihanatiin jetao, o caje ichanajacoaain ichaaore.

<sup>53</sup> Nitohaneein jetaote, inae o caje ichanaa Jesusone baiha jetao, Cana Coaunera nese Jerosaleeun cuuruha nii o caje ichananacaaurune jana jetao, coaranaacure arajii cachaauru.

<sup>54</sup> Nitohaneein uha carorane jana, nihacoaa cojoelanaacojoaine jana coaraain jetaote, jataain nesooneein jetao:

“Esinaete chuhisi, Cana Coaunera Calaohine caa cacha,” naaure jetao, soondarooru curuaanaa aina ecu Jesoso beraiha nenacaauru.

<sup>55</sup> Nii jana jetaote, caje icharaain netiin Jesoso coarajeeure arajii enecuru Calilea caje coauneein coroatajaneraneein sacuureraauru.

<sup>56</sup> Acaauru aina jetaote cuurelu Maadala bene Mariha, chaen Saantiaao aina Jose neba Mariha, chaen Sebedeeo calaohichuru neba, naaonjoainuri.

### *Jesoso jaberoco rucuhecuruhane*

*(Mr 15.42-47; Lc 23.50-56; Jn 19.28-42)*

<sup>57</sup> Inae nocohecane jana jetaote, turuha uhe leinjiin Jesoso ere tonoraera coriquihonaneein nena Arimatea cocoaicha Jose.

<sup>58</sup> Nii Jose jetaote, Filato coaraa cue, caje Jesoso jaberoco bajaane coina. Nii jana rai Jesoso jaberoco teratiha Filatone jaun jetaote,

<sup>59</sup> Jesoso jaberoco raain, lino caje ichanohi shojoera que conajaain,

<sup>60</sup> que banijiaain niicha bajarateilu ajeri jachu cuhane Jesoso jaberoco rucujue Jose. Nii baiha jetaote, ajeri que caohatiin nii ajeri jachu bacuujuua fuhin ratiriin jelai caje amue.

<sup>61</sup> Nii jana, Maadala bene Mariha, chaen nii leeocha Mariha, naaonjoainuri jetaote, nii ajeri jachu Jesoso jaberoco teuruhane jaan acatiha laurijatiin nedaaure.

### *Jesoso jaberoco rucuhecuruhane jaan beraihuruha sonda-roorune*

<sup>62</sup> Nii cojoanoo, inae nebetacanaa cojoanonaa nihane jana jetaote, Filato coaraa cuure jiniiquiin saseredotecuru curuaanaacuru curuaanaacuru aina fariseeocuru. Nitohaneein cuhin, inae rene turuhin jetaote:

<sup>63</sup> “Curuaanaa, jaiti ichaohane banate: ‘Inae nichata janoha ohane baiha jete, o caje ichanareein,’ naain ererejeto-ha nii casajeneein ichaonaa cachane quene coaaucaun.

<sup>64</sup> Aihane jaun, nii rucuhacurhane jaan ajeri jachu beraichateeu nichata janoi reeintiaain. Ainihanete, jan-tiin uhin rai jaberoco amaain: ‘O cajete ichanae,’ naain cachaauru coritaaure aina nerelanacaauru. Niite laen, nii jauriaanejeein amurijiriin, jataain banejelanaala casaje nere,” naauruha Filato raine jana jetaote:

<sup>65</sup> “Caa nitohanei beraichane que nenacaauru soondarooru aina cuhin, caohatiin jerequichene tocohaneen nii ajeri jachu funichuche,” nae acaauru rai Filato.

<sup>66</sup> Nii jana cuhin jetaote, nii ajeri jachu niha Jesoso jaberocone jaan rai fuera sechaare leinjiin secho que. Nitohaneen sechaain jetaote, ecu beraichanu que soondarooru ratiriin cauha cuure saseredotecuru curuaanaa curuaanaacuru aina fariseecuru.

## 28

### *O caje ichanaa Jesusone*

*(Mr 16.1-8; Lc 24.1-12; Jn 20.1-10)*

<sup>1</sup> Inae situha nebetacanaa cojoanonaane jana, inae ena janohajiha semana nunuhene jana jetaote, Jesoso jaberoco rucuhacurhane jaan- ajeri jachu coaraa cuure Maadala bene Mariha aina leeocho Mariha.

<sup>2</sup> Nii jana dede caje fauha anjerane jana jetaote, luhecotariin uhe jataain mijiaainetiin carora. Nitohaneen fauhin jetaote, nii Jesoso jaberoco rucuhacurhane jaan ajeri jachu fuuruhane jaan ajeri jaberoco raain nichoae laujuae nii anjera.

<sup>3</sup> Nii anjera jetaote, aiha jiacanene tocohaneen jiquihacoha rai jaberocone jana, jataain somajae rai cajione aiha dede sacarine tocohaneen.

<sup>4</sup> Nii coaraain jetaote, coasina caaun rijijijianeen onaa rijiiinanaain nedaaure nii beraihurera soondarooru.

<sup>5</sup> Nii jana jetaote, nii coaraa cunacaauru enecuru rai jetao: “Jiaoriha casiichene. Inae, nii coroso que tein niicha ateinaauri Jesoso ariha aaichene coitucuhanura.

<sup>6</sup> Inae cau nihei. Inae nii aitoroetohane tocohaneen o caje ichanaa. Chajaauchete, nii teuruhalune jaan jelai coarae,” naain acaauru que nii Jesoso jaberoco teuruhane jaan jelai coarate nii anjera.

<sup>7</sup> Niritiin jetaote: “Chajaain erojoeen cuhin aina nerelanacaauru rai: ‘Inae jetao o caje ichanaa. Calileea cuhin jetaote, inara ajiniha turureen. Ecu jetaote coariquicheen,’ nanichuche. Inara rai bihanune coinane cau turuun,” naain jetao, nii enecuru letoae anjera.

<sup>8</sup> Nii jaun jetaote, jataain casihuruhane saijieein rachoojoein nii Jesoso atane bana jelai caje erojoein uhin biha uure nii enecuru, aina nerelanaa nichaanune rai.

<sup>9</sup> Nii jana jetaote, uujueuruha nii enecurune jana acaauru rohan neoritiin acaauru rai iriha Jesusone jana rohan nichuuntaain, rai tijia que nebalurucaain cutujuaain jetao coroaecure nii enecuru.

<sup>10</sup> Nii jana jetaote:

“Jiaonriha casiichenera. Chajaain canejeraneein nenacaauru rai benichuchete, Calilea cuuruhine. Ecune ita coarichaanuhi,” nae jetao, nii enecuru rai Jesoso.

*Niicha coarai beeuruha soondaroorune*

<sup>11</sup> Nitohaneein biha cuuruha enecurune nainiha jetaote, saseredotecuru curuaanaacuru curuaanaa rai jetao, neseu cuhin jitariin niicha coaracuri biha cuure nii atane banau Jesoso jaberoco beraiha nenacaauru soondarooru tabaauru.

<sup>12</sup> Nii jaun jetaote, ita suujuau tacaauruhane coina Jorioocuru bichauhenaauru coaraa cuure saseredotecuru curuaanaacuru curuaanaacuru. Nitohaneein inae ita suujuau tacaain jetaote, jataain arajiin soondarooru rai coriqui teein jetao:

<sup>13</sup> “ ‘Janotiin sinihacaanune tonohanaute, turuhin Jesoso jaberoco amaaure aina nerelanacaauru,’ naauche.

<sup>14</sup> Nii jana coitucuhin, chatohaneein inara tenaa coauca coberenadoro Filatonena, ita suujua tacaain caohaterichaanuhi, nabana baasoneein inara tihane coataa,” naain jetao, nii soondarooru suujuateure saseredotecuru curuaanaacuru curuaanaacuru aina Jorioocuru bichauhenaauru.

<sup>15</sup> Nii jaun jetaote, nii coriqui raain jerichanetojoein nii sujuatenajaauruhane rijitojoein jetao, aitocure nii soondarooru. Nii jaun jetaote, niritiin acaauru coritaaauruhane jaun, eneenetojoein nii esenetaaure Jorioocuru.

*Niicha icharatei ichacuruhane coina aina nerelanacaauru rai aitoha Jesusone*

*(Mr 16.14-18; Lc 24.36-49; Jn 20.19-23)*

<sup>16</sup> Nitohaneein canacaanu rai beratiha Jesusone jaunne, Calilea nii naitoonjoa ichatane ucuunno cuhacaanu lechoonca leinjiin Jesoso aina nerelanaa nichaanune.

<sup>17</sup> Ecu turuhacaanune janate, ecu canacaanu ajiniha niha Jesusone jaun, rohan turuhin jaiti acanilhane esenetaaurenihatabaaurune saijieein coroaecaanu.

<sup>18</sup> Nii janate canacaanu rohan nichuuntaain:

“Canu Inaca Cana Coaunerate, chauratane, dede, naaonjoainuri rai cocoinacaneein nihanune coina caeteein ne.

<sup>19</sup> Aihane jaun, chajaain satiin caa chauratane sacutaain lauri lauri nenacaauru cachaauru relanichuche inara relaanune rijijieeinte, canu ere tonoraera neeuruhine. Chaen, Canu Inaca, canu- rai calaohinichaaunne, Cana Coaunera Suujue, naaonjoain nichaanune rai canacaanu cachaneein nenea jereraauru cojunacateein baotisanajaauche.

<sup>20</sup> Chaen inara rai aitonajaaocaaunne rijijieein, nii caitoonjoa tonoraain ichaaoruhane coina relanajaauche. Jerichaneeinne besautiha cana cojoanonaane reeintiaaajoaain itolere bana inara aina nereeunni,” naain necoe Jesoso.



## **Marocohacha laenai Ena Nena Cana Coaunera Ere**

*Cana Coaunera ere beebejiha Joaan Baotisitane  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Caate nunuhe caje coauneein Cana Coaunera Calaohi Jesocurisito que erenaa raotono ne.

<sup>2-3</sup> Niite inoaenlu nere bera inoaensi Isaihasi que berateein laenaratiha Cana Coaunerane jaun, nii aitohane rijitoejin: “Nii Canuhacha letoai Canu ere berate, ii ajiniha cuhin turuhine jaan bero rucuhereein. Nitohanihane jaunte:

‘Cana Curuaanaa turunajaanu bero raujiaauche,’ naain cacha areroo rohan situnacaauru cotijiaain suujuatereein,”

naain nere bera inoaensi Isaihasi que berateein laenaratiha Cana Coaunera

<sup>4</sup> Nii rijijieein jetaote chuhisi, inae cacha areroo cachaauru baotisaain:

“Inara osa jianeein, esinae rauhijiriin Cana Coaunera coitucuhin nacoauneein inara ichao coreein neeichene cojunacanein acauhanau tein baotisanajoinein neeichene inara osa caje inara ichoteratemiin Cana Coaunera,” naain belu jetao acaauru rai Joaan.

<sup>5</sup> Nii jana jetaote, satiin Jodea batane que nenacaauru aina Jerosaleeun nenacaauru naaonjoainuri nii Joaan ere aonaa curejetecurelu.

Nitohaneein cuhin ecu turuhin esinae rauhijiriin suujuelanaala osaaocuruhane beeuruhane jaun jetao, nucuhe Jorodaan cuhane tein acaauru cojunacatiha acaauru baotisarejete nii Joaan.

<sup>6</sup> Camecho ujui caje ichanohin cajione que cajionequin jetaote, jacari caje ichanohi que ichoraquiin, sisiincho, irichaje, naaonjoainuri que jetao lenoneein nerejetelu nii Joaan.

<sup>7</sup> Nitohaneein jetaote, Cana Coaunera ere beebejeein jetao: “Canu baihate ureein leinjiin jataain canu amurijiriin nelateein nena. Niheichu rai safato ichora rutuhanune caina nihanatiin nelatejeerinaauni.

<sup>8</sup> Canune acau que inara camujuaain inara baotisaan. Jana acate laen inara baotisaa ureein Cana Coaunera Suujue que,” nae jetao cachaauru rai Joaan.

*Jesoso baotisaas Joaanne**(Mt 3.13-17; Lc 3.21-22)*

<sup>9</sup> Nii cojoanonaa bana jetaote, Calileea batane que nenea Nasarete caje amuhin, nucuhe Jorodaan auhaniha turuha Jesusone jana jetao, ecu Jorodaan cuhane tein acaentonai camujuaain baotisaes Joaan.

<sup>10</sup> Nii baotisaas Joaane jana acau caje mituhane rijieeoritiin dede coaraa Jesusone jana jetaote, neyoracaa dede bacuujuane jana caje uhin serori rijijieein nichoae fauha uhe Cana Coaunera Suujue.

<sup>11</sup> Nii jana dedeeu tonii jetaote:

“Ii te jataain canuhacha jereein canuhacha cocoinanohin cacalabineein neeicha,” naain toniha erenaane jana jetao aonajeeure.

*Baaso que Jesoso saruha Moconajaerane**(Mt 4.1-11; Lc 4.1-13)*

<sup>12</sup> Nii baiha jetaote, cacha nenaja nihei que Jesoso amae Cana Coaunera Suujue.

<sup>13</sup> Nii jaun ucuae ataibinaecuru jana niha jena chonca janohin Cana Coaunera Calaohi Jesusone jana jetaote, baaso que saruhane coina cojuhin coaraa moconajaerane jana jetao, Jesoso coroatajanecure Cana Coaunera letonocuru anjer-aauru.

*Calileea batane cuhin, rai namihaneeo nunuhetiha Jesusone**(Mt 4.12-17; Lc 4.14-15)*

<sup>14</sup> Inae caresero cuhane Joaan enoaauruhane baiha jetaote, Calileea batane que cue Jesoso, Cana Coaunera ere Erenaa Raotono que ereerejeein cachaauru rai bihane coina.

Nitohaneein inae ecu turuhin jetaote:

<sup>15</sup> “Inae ichuunijiha Cana Coaunera Cojoanonaa. Aihane jaun Cana Coauneraacha beratenojoin Erenaa Raotono es- enetaain tonoraauche,” naain beebeje cachaauru rai Jesoso.

*Jenai cachaauru ate mucuurera cotihaca Jesusone**(Mt 4.18-22; Lc 5.1-11)*

<sup>16</sup> Nii jana jetaote, Calileea conemuri auhaniha cuujihane jaun jetao, coroatajai ate mucueracuru Simoon, chaen ne- jera Anderesi, naaonjoainuri coarae Jesoso, acauhanau rai rede nalaacuruhane jana. Nitohaneein acaauru coaraain jetaote:

<sup>17</sup> “Chajaauche canu aina. Aihate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesoso.

<sup>18</sup> Nii rijieeoritiin jetaote, rai rede ratiriin Jesoso aina cu- ure.

19 Nii caje basiinjiin cutiin jetaote, coroatajai ate mucuurera- Sebedeeo calaohichuru Saantiaao aina rai nejera Joaan eruha cue Jesoso, bote cuhane neein redeeuru rucuheca neeuruhane jana.

20 Nii coaranaacane rijijieeoritiin cotihanaacane jaun jetaote, bote cuhane acaauru coroatajaneraauru aina nii acaauru inaca Sebedeeo ratiriin Jesoso aina cuure.

*Leinjiin cacha suujua cuhane niha Moconajaera letonone  
(Lc 4.31-37)*

21 Inae Caferenaan turuhin jetaote, nebetacanaa cojoanona bana ita taojiaain, Cana Coanera rai rauhi que ereereecuruha Joriocurune jaan coloheri sinacoca asaa cuhin cachaauru relaane nunuhetiha cue Jesoso.

22 Nii jana jetaote, cojoaelatiin aonajeeure cachaauru, Moisesa aitonjoan rauhi que cacha relaaurera amurijiriin esinae rauhijiriin suujua caje coitucuhin aitohane jaun.

23 Nii jana jetaote, nii netaojiaauruha cachaaurune jaan coloheri sinacoca asaa ne leinjiin cacha- suujua cuhane Moconajaera letono siricha.

24 Aca jetaote ehequiin:

“Chanute canacaanu rene turuha uhita Nasarete cocoaicha Jesoso. Jerihane nechu jataain canacaanu itajeranu quete turuha uhicha. Raotojoeinne canu, ii Cana Coanera Calaohi neeine coitucuunra,” nae Jesoso rai.

25 Nii jana jetaote:

“Coo iriha. Caa cacha jianeein amuura,” nae jetao Jesoso, nii cacha suujua cuhane nena Moconajaera letono rai.

26 Nii jana jetaote, rijijijianeein nii cacha teein, tonijiaain ehequiin mitue nii Moconajaera letono, nii cacha suujua caje.

27 Nii jana satiin nesoonetiin jetaote:

“Chatohanai cacha relaera cachana caa ai. Coatih cacha relaauruha cacha relaaurerane rijijieein cacha relai. Caate laen nohanelanaala esinae rauhijiriin cacha relae. Chaen techu moconajaera letonocuru nihanatiin nere tonoraain cacha suujua caje mituhin amuure,” naain jetao ita caje bajaure nii cachaauru.

28 Nii jana jetaote, coa carajaeriin Jesoso benaa coitucuure satiin Calillea batane que nenacaauru cachaauru.

*Simoon Fedoro tano rautaa Jesusone  
(Mt 8.14-15; Lc 4.38-39)*

29 Inae netaojiaain Cana Coanera rai rauhi que ereereecuruha Jorioocurune jaan coloheri sinacoca caje mituhin jetaote, Saantiaao, Joaan, naaonjoanuri aina jiniiquiin, Aanderesi aina Simoon loreri asaa cue Jesoso.

<sup>30</sup> Nii jana jetaote, inae nii loreri asaae turuuruhane jana, ajaa caaun cunaiteein ecu tocoeeque Simoon tano. Nii jaun jetaote, Jesoso rai beeuruhane jaun,

<sup>31</sup> rohan nichuuntaain rai biji que michuhane jana jetao, inae caje amue ajaa. Nii rijieeoritiin inae caje amuha ajaane jaun jetaote, nimichuhin acaauru coroaate nii cunaitenaa Simoon tano.

*Arajiin cunaitenacaauru rautaa Jesusone*  
(Mt 8.16-17; Lc 4.40-41)

<sup>32</sup> Inae sohane jaun nocohecane jana jetaote, Jesoso rene satiin cunaitenacaauru, chaen suujua cuhane Moconajaaera letono sirichaaauru, naaonjoainuri cachaaurune maajeein amaare, acaauru rautaa Jesusone coina.

<sup>33</sup> Nii jaun jetaote, satiin nenaanajaaauru caje cuhin, ecu acuujua niha netaojiaaure cachaauru.

<sup>34</sup> Nitohaneein jetaote, araai laurii cunai caaun cunaitenacaauru cachaauru rautaa, Moconajaaera letono sirichaaaurune maajeein rautae Jesoso. Nejetaote laen ereeuruha nii cacha suujua cuhane nenacaauru Moconajaaera letonocurune caohate Jesoso, raotojoein acanihane coitucuuruhane jaun.

*Calileea batane cuhin, Cana Coaunera ere beebejiha Jesusone*  
(Lc 4.42-44)

<sup>35</sup> Inae janonaa jerihane jaun jetaote, nimichuhin nii nese caje cuhin, jelai Cana Coaunera bajaa cue Jesoso.

<sup>36</sup> Nii jaun jetaote, leeochoauru aina jiniiquin cuhin Jesoso ariha cue Simoon.

<sup>37</sup> Eruhin jetaote:

“Satiin cachaaurute ii ariirijia amuhemuheecure,” naauruha Jesoso raine jaun jetaote:

<sup>38</sup> “Chajaaau chacuchete ichuun nenacaauru leeochoa nanajaaauru cuhin Cana Coauneraacha beratenojoin erenaa benichaache. Nii coinane jelai caje mituhin cajiha uun,” naain acaauru tonorae Jesoso.

<sup>39</sup> Nitohaneein jetaote, cajihaneein nenaanajaaauru amuhemujeein, satiin Calileea batane sacuritaain Joriocuru rai netaojiaauruhane jaan coloherihuru asaae Cana Coaunera ere beebejeein, moconajaaera letonocuru sirichaaauru cachaaurune maajeein rautaa amuhemuje Jesoso.

*Leinjiin cosibi siricha rautaa Jesusone*  
(Mt 8.1-4; Lc 5.12-16)

<sup>40</sup> Nii jana jetaote, Jesoso rene turuhin jetao: “Jereeine jana nihane canu rautaa caa canu cosibi caje,” naa leinjiin cacha

cosibi caaun cunaitenaa, nacatiha neseonrihaainne jaun jetaote,

<sup>41</sup> cairichaaajoaain coaraane jaun jetao, biji que mucuhin: “Jerichaaun chujian. Ii caje amuhine caa ii cosibi,” naa nii cacha rai Jesusone

<sup>42</sup> rijieeoritiin caje amuha nii cosibine jaun jetaote, inae somaraain ne nii cacha.

<sup>43-44</sup> Nii nerautaane rijieeoritiin rai necoein jetaote:

“Aonaun. Coa caa ii rautaanune biha chuni rai. Raujiaain Cana Coaunera ere que cacha relaera neein nenea saseredote coanahun ii coaraane coina. Chaen inae nerautaai nii ii cosibi cajene coaracuruhane coina, aitoha Moisesa aitonjoan rauhine rijijieein, Cana Coaunera belaaaine jaanu amaain cunihute inae ii cosibi caje nerautaaine coitucuurumiin satiin cachaauru,” naain jetao jataain suujuatein nii cacha letoae Jesoso.

<sup>45</sup> Nii jana jetaote, satiin cachaauru rai nii nitohanein jaberoco rautaa Jesusone que nereretaa cue nii cacha. Nii jaun jetaote, inae neseeu raotojoein turunaa nainenihane jaun jetao, neniha cachane jaaun cuhin amuhemujue Jesoso. Nejetaote, lauri laurichuru caje cuhin coaraa cuure cachaauru.

## 2

### *Leinjiin jiuirona cacha rautaa Jesusone*

(Mt 9.1-8; Lc 5.17-26)

<sup>1-2</sup> Nii baiha janojanoheriin catiaain jetaote, coaiten Cafernaaon cue Jesoso. Inae ecu turuhin, loreri asaae nihane coitucuhin jetaote, rene turuha cuuruha arajii cachaaurune jana jetao, acaauru rai Cana Coaunera ere beebeje Jesoso. Nitohanein arajiin turuuruha cachaaurune jaun jetaote, jataain nemoha loreri asajine jaun, nii acuuju rohan niha-natiin nene turuha cachane jaannu.

<sup>3</sup> Nii jana jetaote, Jesoso rene leinjiin cacha jiuirona amaure jena cachaauru.

<sup>4</sup> Nejetaote, jataain arajiin turuha cachane jaun, Jesoso rene nii jiuirona cacha turuanaa nainecurenihana jaun jetao, loreri coarana joaracaain rai nela cuhane tijichaaain, nii niha Jesusone jaan jelon nii jiuirona cacha faaure.

<sup>5</sup> Nii cunaitenaa rautarichaaainne esenetaain amaauruha nii amaaurerane coaraane jaun jetaote:

“Inae ii osa caje ii ichoterateein, ii que casuujua acatichaaunra cacalabi,” nae jetao nii cunaitenaa rai Jesoso.

<sup>6-7</sup> Nii jana ecu neein aonajeein jetaote: “Chanuna caritiin ere caa cacha. Nechu jataain Cana Coaunera niha nocoetohane jaunte aite. Leinjiin Cana Coauneraachate nainere

osa sitaa cacha cajene,” naain jetao suujua cuhane ereerejeein laurujalaurujuaain aonajeeure Moisesa aitoonjoan que cacha relaaaureraauru tabaauru.

<sup>8</sup> Niritiin suujua cuhane coaucuruhane que nainain jetaote:

“Chanuna niritiin inara suujua cuhane coaauquiche.

<sup>9</sup> Cha caaintanerihana nii jiurona rai: ‘Inae ii osa caje ichoteratenojineein,’ naain irihaca ne. Ainihane: ‘Nimichuhin chela seriin amuu,’ naacane.

<sup>10</sup> Coarajeeuchenejian, Cana Coaunera Calaohi cachaneein nejanoanaa nichaaunne, itolere curuaanaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiurona rai:

<sup>11</sup> “Ii raine aitoon. Nimichuhin chela seriin chenenajau caunihu,” naa Jesusone rijieeoritiin jetaote,

<sup>12</sup> satiin nii ecu neein coarajeeurera notaracae jetao, nimichuhin rai nela seriin jelai caje amue nii jiuro caaun cunaitenaa. Nii jaun jetaote, satiin cojoelatiin jetao: “Chabana catohani coarahaacacheta,” naain jetao Cana Coaunera coroaecure cachaauru.

*Leinjiin cacha Lebi cotihaca Jesusone*  
(Mt 9.9-13; Lc 5.27-32)

<sup>13</sup> Nii baiha jetaote, coaiten nemuri auhaniha cuha Jesusone jana, rene tururuha arajiin cachaaurune jaun jetao, acaauru rai Cana Coaunera ere beebejeein acaauru relae Jesoso.

<sup>14</sup> Nii caje cuujueein jetaote, Romanocuru rai *impoestonu* que cacha cobaraain coriqui raeraneein nihane jaun rai rori ichoae lauhecoha Arafeeo calaohi Lebine jana coariin jetao:

“Chajaau caniha,” naa Jesusone jaun jetao, nii rijieeoritiin nimichuhin Jesoso aina cue Lebi.

<sup>15</sup> Nii baiha jetaote, nii Lebi loreri asae lenoniha niha aina nerelanacaauru aina Jesusone jana jetao, cuu nii Lebi aina lenoniha neeure arajiin leeochoauru Romanocuru rai *impoestonu* que cacha cobaraain coriqui raaurera, leeochoauru cachaauru- baasoneein ichaoha benojoihunri, naaonjoainuri.

<sup>16</sup> Nitohaneein Jesoso aina lenoniha neeuruha nii nitohaneein ichaonacaauru cachaaurune coaracuruhane jaun jetaote, nii Jesoso aina nerelanacaauru rai jetao:

“Chasiina taa Romanocuru rai *impoestonu* que cacha cobaraain coriqui raaurera, baasoneein ichaoha benojoihunri, naaonjoaihunri aina lenone inara relaera,” naaure jetao fariseeocuru aina Moisesa aitoonjoan que cacha relaaaurera, Jesoso aina nerelanacaauru rai.

<sup>17</sup> Nii jana jetaote, acaauru aonajeein jetao:

“Coatiha coichaera latecuruhi rauronacaauru. Leinjiin cunaitenacaauruhachate coichaera latecure. Coatiha osa colane nenacaauru cotihaca uhaaun. Osa aina nenacaaurune cotihaca uun,” naain jetao acaauru tonorae Jesoso.

*Suri couu netiin Cana Coaunera bajaauruhane  
(Mt 9.14-17; Lc 5.33-39)*

<sup>18</sup> Joaan Baotisita sacuurera aina fariseeocuru sacuurera jetaote niqui, suri couu netiin Cana Coaunera bajaebajae-cure. Nii jana jetaote, Jesoso rene turuhin jetao:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaee bajaecure suri couu netiin. Nete laen itolere bana ii aina nerelanacaauru, coaerai cohin, lenoneein, naaonjoaunreta,” naauruha Jesoso raine jana jetaote:

<sup>19</sup> “Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu nena nainecure caa cotihanohinchuru, jaiti acaauru aina niha nii ene raeranu cachane jaun.

<sup>20</sup> Nete laen inae nii ene ranaa jerera cacha amaauruhane, suri couu neein inaderaa cuurureeinha,” naain jetao:

<sup>21</sup> “Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri enachasine asaaere nii cajione siri. Chaen caohachaaain nedanaa naineriheii nii obiri enachasine, nii cajione siri que couneraane.

<sup>22</sup> Nii rijijieeinchu, nihei chuni inae conaca que tiha coaeraine jana, cuhane ichonai tera. Nitohaneein cuhane teraa ichonainete naasaaere nii coaerati. Nitohanihane jaunte, caohachae coaerai nejesinaneein niha coaeraine. Chaen ichonai, ichonai nejesinajeein nihane caohachae,” naain jetao cachaauru tonorae Jesoso.

*Nebetacanaa cojoanonaa bana aroso rijijieein nena tirico moloonejeein quihuruha Jesoso aina nerelanacaaurune  
(Mt 12.1-8; Lc 6.1-5)*

<sup>23</sup> Nebetacanaa cojoanonaa bana aina nerelanacaauru aina jiniiquiin temule jana situhin, amuhemuheca Jesusone jana jetaote, quihuruhane coina aroso rijijieein nena tirico inaa moloonejeeure aina nerelanacaauru.

<sup>24</sup> Nii coarajeein jetaote:

“Chanuna nebetacanaa cojoanonaa nihane jaun cocoaeraa nitohanai ichara natiin, nitohanai ichacure nii ii aina nerelanacaauru,” naauruha Jesoso rai fariseeocurune jana jetaote:

<sup>25</sup> Tana nitohanihalu Rabirine coitucuhichene:

<sup>26</sup> “Nii Rabiri jetaote, saseredotecuru curuaanaa neein niha Abiatane bana Teenforo asaae enohin Cana Coaunera

que banijiaain nenea faan qui, nii rai corihacuru aina jini-  
iquiin mijjitooruhane jaun, saseredotecuruhacha nii faan  
quinaa nainihane saijieein,” tana naain laenanohiniha Cana  
Coaunera Quiricha cuhanene ereretaain aonaquichene.

<sup>27-28</sup> “Nebetacanaa cojoanonaate coaunaelu Cana  
Coaunera, bana nebetacanaa nainiha cachane coina.  
Coatiha cache cairichaeranu que nebetacanaa cojoanona  
coaunaailu Cana Coaunera. Nii jaunne laen canu naineeun  
nebetacanaa cojoanona bana nihanatiin quiicha ichana  
jerei ichaain nihanune. Nitohaneeinte inara rijijieein  
cachaneein rai Calaohi nichaaunne cocoaainnaain letoae Ofa  
Cana Coaunera,” naain jetao fariseeocuru tonorae Jesuso.

### 3

*Jiurona bijii cache rautaa Jesusone*  
(Mt 12.9-14; Lc 6.6-11)

<sup>1</sup> Nii baiha jetaote, coaiten netaojiaain Cana Coaunera rai  
rauhi que ereereecuruha Joriocurune jaan coloheri sinacoca  
asae enoha cuha Jesusone jana jetao, cuu ne leinjiin cache  
jiurona bijii.

<sup>2</sup> Nii jaun jetaote, nebetacanaa cojoanona bana nihane  
jaun nii Jesuso coarajeeure fariseeocuru, nii jiurona bijii  
cache rautaane niha nechu jataain colurujeeuruhane jaan  
leranune coina.

<sup>3</sup> Nii jaun jetaote, nii jiurona bijii cache rai jetao:

“Nimichuhin nii cache cataaun chujutoroaa,” naain jetao:

<sup>4</sup> “Chatohanai ichacaane caohachae nebetacanaa  
cojoanona bana, baaso ichaain cache ichao itajihacanena.  
Ainihane cache ichao rai caohacha ichacaanena,” naain  
fariseeocuru caje bajaa Jesusone jana jetaote, inauhenecha  
curuaaequuin aonajeeure.

<sup>5</sup> Nii jaun jetaote, nii nere aohana jerecurenihane jaun,  
nererojoecaaajoaain inaderaain, nii curuacaain nenacaauru  
coaraain jetao:

“Ii biji raujiaa,” naa nii cache rai Jesusone jana, biji  
sijitain raujiaa nii cachane jana jetaote, inae nerautain  
neraujiae rai biji.

<sup>6</sup> Nii coaraain jetaote, airiniha mituhin ita suujuatiha cuure  
Erodesi ere tonoraeraauru aina fariseeocuru, Jesuso sohin  
jaaoruhane coina.

*Nemuri auhaniha netaojiaauruha arajiin cachaaurune*

<sup>7</sup> Nii baihate, rene turuuruha arajiin Calileea cocoaichacu-  
rune jana, nii Calileea conemuri auhaniha cue aina nere-  
lanaauru aina Jesuso.

<sup>8</sup> Jataain itolere ichaain, cunaitenacaauru cachaauru  
rautain, naaonjoaane coitucuuruhane jaun jetaote, coaraa



cuure Jodea batane, Jerosaleen, Idomea batane, nucuhe Jorodaan auhaniha neein enoto mitu nichajai cajeeurune maajeeinchuru cuhin jetao, Tiro, Sidoon, naaonjoainuri batane cajene maajeein turuha cuure arajiin cachaauru.

<sup>9</sup> Nii jaun jetaote, chajaain letona jatoraaain bote coaracuruha aina nerelanacaaurune coina, acaauru rai aite Jesoso, nabana sururucuruha nii arajiin turunacaauru cachaaurune coataa.

<sup>10</sup> Jataain araai laurii cunai caaun cunaitenacaauru rautaane jaun jetaote, satiin cunaitenacaauru Jesoso jaberoco dadanaa jerecure nerataauruhane coina.

<sup>11</sup> Nii jana suujua cuhane moconajaenra letono sirichaaauru jetaote, Jesoso coaracuruhane jetao, nacatiha neseeonriaain:

“Iite Cana Coaunera Calaohi neeicha,” naain jetao cojiorichure.

<sup>12</sup> Nejetaote aonajeeuruha cachaaurune jana, que ereeu-ruha nii moconajaera letonocurune caohate jataain Jesoso.

*Afosotoorunu que, lechoonca coroatajai niicha cocoina-nenu janiicha Jesusone*

*(Mt 10.1-4; Lc 6.12-16)*

<sup>13-14</sup> Nii baiha jetaote, ichatane ucuuno que iniin caohachaaain niicha coaracuri cotijiae Jesoso. Inae satiin netaojiaauruhane jana jetaote, janiinajaain acaauru caje lechoonca coroatajaain nenacaauru cocoinae, corihaneein jiniichaain amuhemujeein, chaen nere beraanu que naaonjoaauruhane coina. Nii lechoonca coroatajai niicha cocoinaauri jetaote, afosotooruneein curuaatenajaain letoanajaen,

<sup>15</sup> cacha suujua cuhane nenacaauru moconajaera letonocuru sitaain, cunaitenacaaurune maajeein rautaauruhane coina.

<sup>16</sup> Nii lechoonca coroatajaain niicha janiichuri jetaote, nii jauriaanejeein Simoonneein niicha curuaatei Fedoro, chaen

<sup>17</sup> nejera Joaan aina Sebedeeo calaohichuru Saantiaao naaonjoainurine. Acaauru jetaote, Boanerges neein curuaatenajae: “Arara calaohichuru,” naaneneein.

<sup>18</sup> Chaen Aanderesi, Ferifi, Bartolomee, Mateeo, Tomasi, Arafeeo calaohi Saantiaao, Tadeeo, Celoteneein niicha curuaatei-Simoon,

<sup>19</sup> chaen nii acaauru lechoonca coroataja, Jesoso colurujueranu Jodasi Isacariote naaonjoainurine.

*Moconajaera letononiha Jesoso beeuruha Moisesa aitoon-que cacha relaaurerane*

*(Mt 12.22-32; Lc 11.14-23; 12.10)*

<sup>20</sup> Nii baiha jetaote, leinjiin loreri asaae enoha cuha Jesusone jana jetao, ecu rene arajiin netaojiaauruha cachaaaurune jaun jetao, nii aina nerelanacaauru aina jiniiquiin lenonena nainecurene.

<sup>21</sup> Inae nitohaneein ecu niicha ichanenu coitucuelanaala niha Jesusone beeuruhane coitucuuruhane jaun jetaote, raa cuure naraaichuru.

<sup>22</sup> Chaen Jerosaleen caje turunacaauru Moisesa aitoonjoan que cache relaaurera netonai jetaote,

“Moconajaeracuru curuaanaa Beelseboote, caa cache rai catohanei ichaane jaan teein ne, nii aina cache suujua cuhane nenea moconajaeracuru letono sitaane coina,” naaure jetao ita rai.

<sup>23</sup> Niritocuruhane aonaain jetaote, acaauru cotijiaain:

“Chasiina nejesinanejeein, chatohaneein ita teein, ita sitanaa nainere moconajaera.

<sup>24</sup> Niheichu leinjiin atane que ichaonacaauru, nejesinajeein itaque nejerateein nihane raotiin ita aina ichaonaa nainecururihei.

<sup>25</sup> Niheichu leinjiin loreri asaei ita que nejesinajeein nejerateein nenea nainecuruhi coroatajai cache, lesajeein ita que nejerateein nihane raotiin ita aina ichaonaa nainecurenihane jaun.

<sup>26</sup> Nii rijijieeinchu ita que nejesinajeein nejerateein nenea nainecuruhi moconajaera aina rai letonocuru, enaacha jiniiquiin ita itajenaa nainecururihane jaun.

<sup>27</sup> Nihei chunei jataain laraajiin nenea cache loreri asaae enohin niicha sirii rulunaa nainera. Jauriaanejeein biji ichohacane banaachate nainere caje niicha sirii ruluhane.

<sup>28</sup> Cana Coaunerate, itolere baaso ichaain neosateein, itolere baaso que ereein naaonjoaaunruha cachaaaurune niha natiin acaauru que suujua acateein ne.

<sup>29</sup> Nete laen rai Suujue que baasoneein iriha cachane, chabana que Suujua acatenereein Cana Coaunera. Nii cache baasoneein que ereite chabana satonoelanaala caseteconihacureein,” nae jetao Moisesa aitoonjoan que cache relaaurera rai Jesuso.

<sup>30</sup> Moconajaera letono sirihane beeuruhane jaun jetaote, acaauru rai aite Jesuso.

*Neba aina turuuruha Jesuso nejeraaurune*

*(Mt 12.46-50; Lc 8.19-21)*

<sup>31</sup> Nii jana jetaote, turuha uure neba aina Jesuso nejeraauru. Nejetaote loreri asae enoelanaala, airiniha neein cotiharateeure.

<sup>32</sup> Nii jana jetaote, nii Jesuso curuhacaain nenacaauru cachaauru jetao: “Taute airiniha turuhin ii ariiriichure ii

neba aina ii nejeraauru aina ii baihuru,” naauruha raine jana jetaote:

<sup>33</sup> “Charijina canu neba, canu nejeraauru, naaonjoainere,” naane baiha jetao,

<sup>34</sup> nii curuhacaain nenacaauru cachaauru coaraain jetao: “Caaurute canu neba, canu nejeraauru, canu baihuru, naaonjoainuri ne.

<sup>35</sup> Chunocoha jeriha Cana Coaunerane rijijieein ichaohin, Cana Coaunera jerenohin icharate, canu neba, canu nejera, canu bai, naaonjoainurine,” nae jetao acaauru rai Jesuso.

## 4

*Ucuhe riaara que cuaain cacha relaa Jesusone*  
(Mt 13.1-9; Lc 8.4-8)

<sup>1</sup> Nii baiha nacoaauneein nemuri auha niha teein cachaauru relaa Jesusone jana jetaote, ecu arajiin netaojiaauruha cachaaaurune jana, nii nemuri cuhane niha leinjiin botene jaun jetao, cuhane fauhin nelauriariin lauheque Jesuso, nemuri auhaniha neein coarajeeuruha cachaaaurune jana.

<sup>2</sup> Nitohaneein bote cuhane fauhin jetaote, ecu neein aonajeeuruhane jana araai laurii itolereeuu que cuaain acaauru relae.

<sup>3</sup> Nitohaneein acaauru relaaain jetaote:

“Caohachaain caa quere aonacuche.

<sup>4</sup> Leinjiin cacha, ucuhe riaacane jana tabaauru bero cuhane nalunacaaurute turuhin quihure tajaacuru.

<sup>5</sup> Jana tabaauru jataain neniha atane jioonone jaun samaata choae nalunacaaurute erojoein omaroe, ucuacaain neniha atane jioonone jaun.

<sup>6</sup> Nete enoto ajaano caun, neniha cojoaisine jaun ohe nii omarona.

<sup>7</sup> Jana tabaauru ucuhecuru, ojoa jana nalunacaaurute omarohane saijieein amurijiriin omarohin soha ojoane jaun, inaeae lanaala ohacoae.

<sup>8</sup> Jana tabaauru ucuhecuru atane caohacha choae nalunacaaurute omarohin caohachaain inaacane jaun, le ucuhecuru caje tabaauru nichata choonca ucujeein, saota choonca ucuheneein, le fasha ucuheneeichuru inaeae,” naain acaauru relaaain jetaote:

<sup>9</sup> “Caohachaain aonacurumiin urichonacaauru,” nae jetao acaauru rai Jesuso.

*Acaauru relaa Jesusone jaan bajaauruha caje aina nere-lanacaaurune*  
(Mt 13.10-17; Lc 8.9-10)

<sup>10</sup> Inae caje amuuruha nii cachaaaurune jana, jelai nedaa Jesosone jana jetaote, nii cachaauru relaane jaan bajaare caje, nii lechoonca coroatajaain aina nerelanacaauru aina ecu rohan nenacaauru leeochoaauru cachaauru, coitucuuruhane coina.

<sup>11</sup> Nii jana jetaote, acaauru rai: “Inara quete asinojineein nena rai Cojoanonaa coitucuerate Cana Coaunera. Nete laen rai cachane lanaala nenacaauru que, nereretanaa que cuaain acaauru rai be,

<sup>12</sup> coaracuruha neniha natiin coitucuurenihane coina. Niheichu aonacuruhane niha natiin, coitucuuruhane coataa. Nabana aonaain aina cuaain esenetaauruhane, acaauru osa acaauru ichoterateein acaauru que suujua acatiha Cana Coaunerane coataa,” nae jetao acaauru rai Jesimo.

*Ucuhe riaara que acaauru relaane jaan coitucueratiha Jesosone*

*(Mt 13.18-23; Lc 8.11-15)*

<sup>13</sup> Niritiin jetaote, aina nerelanacaauru rai jetao: “Ta caa inara relaanune jaan aonaain coitucuhichene. Chatohaneina jana leeochoaauru que cuaain inara relaanune coitucuriquiche.

<sup>14</sup> Nii ucuhe riarate Cana Coaunera ere bera rijijieein ainaa ne.

<sup>15</sup> Niha nii coina tabaauru tabaauru nii bero cuhane naluhin nitajenaa ucuhe rijijieein nenacaauru cachaauru. Nii coinata Cana Coauneraacha beratenojoin aonacuruhane niha natiin, inae acaauru coritaa uha moconajaerane acaacha esenetaain, inae suujua cuhane Cana Coaunera coaacuruhane jianecure.

<sup>16</sup> Nii leeocho cachaaaurute, nii samaata choae nalunaa ucuhe rijijichure. Nii jaunte Cana Coaunera beratenojoin jereein rautain aonacuruhane baiha,

<sup>17</sup> caohachaain acaauru suujua cuhane coaacurenihane jaun, Cana Coaunera esenetaauruhane jianecure. Nii jaunte Cana Coauneraacha beratenojoin esenetaain neeuruhane jana, cairichanojineein, cojunojineein, naaonjoaauruhane, Cana Coaunera esenetaauruhane jianecure.

<sup>18</sup> Jana leeocho cachaaaurute, nii oja jana nalunaa ucuhe rijijieein neeure. Cana Coaunera beratenojoin aonacuruhane baiha niha natiin,

<sup>19</sup> jataain acaauru ichaohacha que suujua teeuruhane jaunte, nechu jataain raaje necoritaain coriquihonanein nena jereein, itolere sirina jerecuruhane jaun, caohachaain Cana Coaunera esenetaain tonoraurenihane jaun nitajeeure.

20 Jana leeochoaurute atane caohacha choaae nalunaa ucuhe rijijieein neeure. Acaaurute Cana Coaunera ere aon-aain, caohachaaain Cana Coaunera esenetaaure, nii chabana jianelanaala.

Nii esenetaeraauru tabaaurute, le ucuhe caje nichata choonca ucuheneein le tijirii caje tera, saota choonca ucuheneein, le fasha ucuheneein tera, naajoaain le tijirii caje teurera rijijieein neeure,” nae jetao acaauru rai Jesoso.

*Cono que cuaain cachaauru relaa Jesusone  
(Lc 8.16-18)*

21 Niritiin jetaote: “Nihei chuni cono mocohin bujuaihu tera. Nitohaneein bujuaihu telanaalate, jianacoon cono-hanau neeuruha turunacaaurune coina ecuun teeure.

22 Nii cono aina cuaainte jianacoon coitucunojoiniha cureein coitucuerae lanaala itolere asinojoneein inaraacha ichai.

23 Aonacurumiin urichonacaauru,” naain jetaote:

24 “Caohachaaain nainaaain inaraacha aonai aonacuche. Charijieein teeinti leeochoauru coaraquiche, nii rijijieeinte inara netonai coareein Cana Coaunera.

25 Caohachaaain niicha jerei rijijieein ichaohin nere tonoraerate, jeelai amuritoheriin coroatajanereein Cana Coaunera. Nii rijijieein techu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” nae jetao acaauru rai Jesoso.

*Omaroha ucuhe que cuaain acaauru relaa Jesusone*

26 Niritiin jetaote: “Temule jaera cacha rijiiicha Cana Coaunera cojoanona.

27 Charijieein teeinti temule jaain, janotiin berailanaala sinii, jerichanejeein jiichoo berailanaala nihane tonohanau coitucuenihane jana omaroe nii niicha temui, nii rijiiicha Cana Coaunera Cojoanona.

28-29 Charijieein teeinti, raajenihane omarohin, nalojoa-coaain, inacaain, inae tainaca que teein cataa nii temulene taihure cachaauru, nii rijiiicha Cana Coaunera cojoanona,” nae jetao acaauru rai Jesoso.

*Mosatasa ucuhe que cuaain acaauru relaa Jesusone  
(Mt 13.31-32; Lc 13.18-19)*

30 Niritiin jetaote: “Chaaquenejianra inara rai Cana Coaunera cojoanona que cuaain aitate coitucuhicheta.

31 Leinjiin mosatasa ucuhe temunacai rijiiicha. Acate itolere temulecuru ucuhe fautaain jataain aansijien.

32 Nete inae temunojoneein nihane, itolere temulecuru ocoana jana nenacaauru amurijiriin neleereein fojoein

nuna seeonjoan nihane jana, nichoae tajeein loroore tajaecuru, nii rijiicha Cana Coaunera cojoanonaa,” nae jetao acaauru rai Jesoso.

*Coitucunaa nainecuruha nereentiaain araai laurii que cachaauru relaa Jesusone*

*(Mt 13.34-35)*

<sup>33</sup> Nitohaneein jetaote, araai laurii que cuaain itolere acaauruhacha coitucui- acaauru ichao que cuaain cachaauru relaain Cana Coaunera ere beebejeein acaauru relae, aon- aain coitucunaa nainecuruha nereentiaain Jesoso.

<sup>34</sup> Nitohaneein jetaote, rai cacha nelanaala nenacaauru relaa Cana Coaunera Cojoanonaa quene, acaauruhacha coitucui- acaauru ichao que cuaain relanajae. Jana aina nerelanacaauru relaane jetaote, rauhijiriin, “Naaonjoainte ne Cana Coaunera Cojoanonaa,” naain Cana Coaunera Cojoanonaa been que relanajae.

*Fichafichanaa aina cujuana suruaa Jesusone*

*(Mt 8.23-27; Lc 8.22-25)*

<sup>35</sup> Nii cojoanotiin bananeein aina nerelanacaauru rai jetaote:

“Jamaauchete nemuri jerau cunichaache,” nae jetao acaauru rai Jesoso.

<sup>36</sup> Nii jaun jetaote, ecu cachaauru ratiriin, nii fauhin lauhe- quuin cachaauru relaa Jesusone jaan bote cuhane fauhin amauruha aina nerelanacaaurune jana jetao, acaauru jini- ichaain cuure leeochoa boteeuru.

<sup>37</sup> Nitohaneein cuuruhane jana jetaote, jataain mijiaaineein uha cujuana tabai aina fichafichanaane jana jetao, acaauru bote cuhane acau enoaa fichafichanaane jaun, inae nalunaa jere nii cuurunaja bote.

<sup>38</sup> Nii jana bote roe cuhane binaao choae tocoeequuin sinii siniicha Jesusone jana jetaote:

“Cacha relaera chajaain nocoo. Inae nalurichaacheje. Tana inae nalunaa jerichaachene que tonajeeine,” naauruha nocoain aina nerelanacaaurune jana jetaote, nimichuhin:

<sup>39</sup> “Coaa inooniha. Chajaain nesuruu,” naa nii nemuri fichafichanaa rai Jesusone rijieeoritiin jetao, nesuruha cu- juana aina nii fichafichanaane jaun raotojoein cuujeeure.

<sup>40</sup> Inae nesuruha nii fichafichanaane baiha jetaote:

“Chanuna jataain nesooneeiche. Chanuna cha esenetae- neeiche,” nae jetao nii aina nerelanacaauru rai Jesoso.

<sup>41</sup> Nejetaote jataain nesoonetooruhane jaun jetao:

“Chatohanaineeinna ne caa cachate, nere tonoraain nesu- rue cujuana tabai aina nemuri fichafichanaa,” naaure jetao ecu ita rai nii aina nerelanacaauru.

## 5

*Cadara bataneu niha suujua cuhane moconajaera letono siricha cachane*  
(Mt 8.28-34; Lc 8.26-39)

<sup>1-2</sup> Nitohaneein cuhin inae nemuri jerau turuuruha Cadara batane que jana, iniha cuha Jesusone jana jetaote, que tacaain coinetiha cue leinjiin cacha- suujua cuhane moconajaera letono siricha. Nii cacha jetaote atane bana caje uhin ai,

<sup>3</sup> ecu ichaohane jaun. Nitohaneein rai suujua cuhane moconajaera letono sirihane jaun jetaote, *cadena* que niha natiin ichohana nainene chuni.

<sup>4</sup> Araai saain tijia aina biji ichohacuruha *cadena* quene niha natiin jetaote, molomolonijihanaane jaun, chatohaneein tenaa nainene nii chuni.

<sup>5</sup> Nii jaun jetaote, janotiin, jiichoo netojoeinchuru ichatane janaauru amuhemujueein, atane banaauru ichoae amuhemujueein, eheehejeein, ajeri jaberoco ichoae comohin, naaonjoain amuhemujue nii cacha.

<sup>6</sup> Nii jaun jetaote, coriaae uujiha Jesusone coariin, jeluhariin coinetein nacatiha neseeonriaain ehequiin jetao:

<sup>7</sup> “Jiaonriha caniha nenoaain carerojoeaaine, acaihanijin nenea Cana Coaunera Calaohi Jesuso. Jiaonriha atiin nohane Cana Coaunera coreniha chatohaneein caeteeine,” nae jetao

<sup>8</sup> nii cacha suujua cuhane nenea moconajaera letono. Nii cacha suujua jianeein amuhane caina: “Nii cacha suujua cuhane neein, cacha suujua aasaequine caje mituhin amuura moconajaera letono,” naa Jesusone jaun.

<sup>9</sup> Niritiin jetaote:

“Tonaa ii curuaa,” naain caje bajaa Jesusone jana jetao,

“Jataain araachaunune jaunte Lejion ne canu curuaara,” nae jetao Jesuso rai.

<sup>10</sup> Nejetaote, jelai batane caje jaoha Jesusone caohate jataain nii moconajaera letono nii cacha suujueniha nenea.

<sup>11</sup> Nii jana ichatane ucuuno rohan lenoniha neeuruha arajiin coosichurune jaun jetaote:

<sup>12</sup> “Atiin taa coosichuru suujua cuhane canacaanu letoaau,” naaure jetao Jesuso rai, nii moconajaera letonocuru cacha suujua cuhane nenacaauru.

<sup>13</sup> Nii jaun caje bajaauruhane rijitoein jeriha Jesusone jaun jetaote, nii coosichuru suujuanaha enooruhane jaun, ucuu caje nomaroteein acauhanau naluhin, acau que nereeonohin oore nii coroata oaraancai coosichuru.

<sup>14</sup> Nii jaun jetaote, nii coaraain jelai caje sorohin, neseeu cuhin, nenaanajaaunru, naaonjoainu cuhecujueein biha cuuruha nii coosichuru beraihurerane jaun jetao, turuhin coaraa cuure cachaauru.

<sup>15</sup> Nii jana jetaote, nii niha Jesusone jaun turuuruhane jana jetao, cojurihu cacha caohachaneein nenea tocohaneein necoreetein laujuae, nii suujua cuhane arajiin moconajaera letono coitucuchuhi siricha cacha. Nii jana coaraain nesooneetooruha nii coaraa cunacaauru cachaaaurune jana jetaote,

<sup>16</sup> nii coosichuru suujua cuhane enooruha nii moconajaera letonocurune jana, ooruha nii coosichurune jana, nerautaa nii moconajaera letono siricha cachane beure nii coaraa cunacaauru rai, nii ecu neein coarajeeurera cachaauru.

<sup>17</sup> Nii jaun jetaote, chajaain erojoein jelai caje amuha Jesusone luhecaaure cachaauru.

<sup>18</sup> Nii jana, inae jelaiha bote cuhane fauha cuha Jesusone jana jetaote, aina cuhane coina rai aite nii moconajaera letono sirihane caje nerautanaa cacha.

<sup>19</sup> Nejetaote, aina cuhane jerelanaala:

“Chajaaincha chenenajaun cauhin, charaaichuru rene turuhin, cairichaaajoaain ii coaraain itolere ichaa iniha Cana Coaunerane benihun acaauru rai,” nae jetao rai Jesuso.

<sup>20</sup> Nii jaun jetaote, Decapolis batane que nenacaauru nenaanajaauru cuhecujueein, itolere ichaa coreniha Jesusone biha nii cachane jaun jetao, satiin cojoelatoore aonajeeurera cachaauru.

*Jairo cacunu aina leinjiin ene rautaa Jesusone  
(Mt 9.18-26; Lc 8.40-56)*

<sup>21</sup> Nii baiha jelaiha nemuri jerau cauha cuha Jesuso, bote cuhane jana jetaote, najiniha arajiin netaojiaain cohacuruha nemuri auhaniha cachaaaurune jaun jetao, ecu turuhin ne nii cachaauru aina Jesuso.

<sup>22</sup> Nii jana jetaote, turuha cue leinjiin sinacoca curuaanaa neein nenea Jairo.

<sup>23</sup> Turuhin jetaote:

“Onaa jeriha canu cacunune jaunne ii coaraa uun. Chajaaute atiin nohane turuhin nichoae ii biji meracaete nerautain ichaohine,” nae jetao Jesuso acatiha neseonriaain nii Jairo.

<sup>24</sup> Nii jaun jetaote, aina cuha Jesusone jana, jiniichaain cuuruha arajiin cachaaaurune jaun jetao, jataain arajii cachaauru cataaun cuujue.



<sup>25</sup> Nii arajiin cunacaauru cachaauru jana jetaote cue, leinjiin ene lechoonca coroata jaanacaain jaberoco caje ichana jaohajeein nena.

<sup>26</sup> Aca jetaote, nii rai chaque nelatejeeane que airijiin jitariin niicha sirii jaohin arajii cacha coicharaauru que nocoicharatihane niha natiin nerautasilanaala jataain taeneein cuujue nii rai cunai.

<sup>27</sup> Nii ene jetaote, Jesoso benaa inaoriin cuhin coaraain, leeochoauru cachaauru jana cutiin, Jesoso janori nichae marotiin cajione auha mucuuri,

<sup>28</sup> “Caa cajione auha mucuurihanune niha natiine nerautareeunni,” naain esenetaane jaun.

<sup>29</sup> Nii Jesoso cajione mucuhane rijieeoritiin nesuruha ichanane jana jetaote, inae nerautanaanein naonae rai jaberoco.

<sup>30</sup> Nii jana caje mituha niicha ichana nainei cacha rautaane jaaque nainain jetaote, nii cachaauru coaraain:

“Chana toon cacajione mucue,” naa Jesusone jana jetaote,

<sup>31</sup> “Tana jeranu ii sururucuruha cachaaurune coaraainete. ‘Chana toon cacajione mucue,’ naain bajaai,” naaure jetao Jesoso rai nii aina nerelanacaauru.

<sup>32</sup> Nejetaote, rai cajione mucuera coaraane coina, nii rohan nenacaauru cachaauru cajanaain coarae Jesoso.

<sup>33</sup> Nii jaun jetaote, nesoone caaun rijijijianein nacatiha neseonriaain, nii suujue lanaala esinae rauhijiriin, “Naaonjoain ii cajione mucuhanune rijijieeoritiinne caa canu cunai caje nerautaaun” naain be nii ene.

<sup>34</sup> Nii jaun jetaote:

“Ti rautana nainichaaunne esenetaaine jaunte, inae nerautaa. Raotojoein raurohin caunihun,” nae jetao nii ene rai Jesoso.

<sup>35</sup> Niritiin ereereeca nii ene rai Jesusone jana jetaote, nii ranuna inaca sinacoca curuaanaa Jairo loreri caje turuha ure cachaauru. Rene turuhin jetaote:

“Inae oha ii cacunu. Coa inacojoein nii cacha relaera rohecaa,” naaure jetao nii cachaauru.

<sup>36</sup> Nejetaote, nii acaauru aohana jerelanaala nii sinacoca curuaanaa rai jetao:

“Jiaonriha acaauru esenetaain nesooneeine. Raujiaaincha rautaanune esenetaau,” nae jetao Jesoso.

<sup>37-38</sup> Nitohanein inae nii sinacoca curuaanaa loreri asae turuuruhane jana tonijiaain cojioriin chanaauruha cachaaurune jana jetaote, aina cuuruha leeochoaurune jerelanaala, Fedoro, Saantiaao, chaen nii Saantiaao nejera Joaan, naaonjoainuri aina jiniiquin enohin jetao:

<sup>39</sup> “Chanuna niritiin cojioriin chanaaiche. Coatiha ohane jaun aihei caa ranuna. Sinihane jaunte ai,” naa Jesusone jana jetaote,

<sup>40</sup> Jesoso coenacure cuu nenacaauru cachaauru. Nii jana jetaote, satiin nii cuu nenacaauru cachaauru mitaain, nii ranuna inaca aina neba, chaen corihaniha cunacaauru, naaonjoainuri aina jiniiquiin nii ranuna rene enohin jetao,

<sup>41</sup> biji que mucuuriin:

“Talita coom,” nae jetao nii ranuna rai Jesoso. “Icheine aitoon ranuna. Nimichuu,” naa jetaote aite Joriocuru ere cuhane.

<sup>42</sup> Nii rijieeoritiin nimichuhin ruharuhaca nii lechoonca coroata jaanacai ranunane jana jetaote, cojoelatiin coarajeeure nii cuu neein coarajeeurera cachaauru.

<sup>43</sup> Nii jana jetaote, jataain chuni rai beeuruhane caohati-hane baiha jetao, nii ranuna coroaateeuruhane coina aite Jesoso.

## 6

### *Nasarete cuha Jesusone* (Mt 13.53-58; Lc 4.16-30)

<sup>1</sup> Nii baiha jetaote, aina nerelanacaauru aina jiniiquiin, jelai caje cuhin rai nataneu cauha cue Jesoso.

<sup>2</sup> Inae nataneu turuhin, nebetacanaa cojoanonaa bana sinacoca asae enohin cachaauru relaane nunuhetiha Jesusone jana jetaote, nii relanajaa Jesusone aonajeein jetao:

“Chuna nerelaete toritiin itolere coitucuhin que cacha relae. Chaa cajena itolere coitucutiin, chabana coaraai cojoelanaacojoai ichaane coinane maajeein nerelae.

<sup>3</sup> Tana caa, Mariha calaohichuru Saantiaao, Jose, Jodasi, Simoon, naaonjoainuri nejera, tabara caje itolere rucuhele icharaneein nena carfinteroneein nerejetohane. Tana chaen rai baihuru cau cana aina ichaaoruhane,” naain jetao ita caje bajaure cojoelatiin, nii ecu arajiin nenacaauru cachaauru.

<sup>4</sup> Niritiin rai nere tonorana jerecurenihane jaun jetaote:

“Itolere banate niqui cuhane jaauru, Cana Coanera ere bera *profeta* que suujua acateein esenetaain neeure cachaauru. Nete laen rai nataneu nenacaauru naraaichuru que suujua acateein esenetana jerecurene. Niheichu nii nihane jaan loreri asaae nenacaauru niha natiin esenetaauruhi,” nae jetao acaauru rai Jesoso.

<sup>5</sup> Niritiin jetaote, ecu cojoelanaacojoai ichaelanaala, coroatajajeein ecu nenacaauru cunaitenacaauruhacha mucuhin rautanajae.

<sup>6</sup> Nitohaneein esenetana jerecureniha cachaaaurune jaun jetaote, acaauru cojoelate Jesoso.

*Cana Coaunera cojoanona beebejeeuruhane coina aina nerelanacaauru letoaa Jesusone*  
(Mt 10.5-15; Lc 9.1-6)

Nii baiha jetaote, Nasarete rohan nenacaauru neseeu cuhecujueein, cachaaauru relaa cue Jesoso.

<sup>7</sup> Nitohaneein jetaote, leecha neseeu cuhecujueein cacha suujua cuhane nenacaauru moconajaera letonocuru coitucuhichuru sitaain cachaaauru rautaauruhane coina nii lechoonca coroatajaain aina nerelanacaauru cotijiaain cocoinanjaain letoanajae coroatajaanana coroatajaananaain Jesoso.

<sup>8</sup> Nitohaneein letoanajaain jetaote, acaauru atora, acaauru achano, coriqui, naaonjoain amaelanaala,

<sup>9</sup> acaauru safatocuruhacha curujuaain, nii necoree-teeuruhane coina acaauru cajione amaelanaala, acaauru biji achuneecha baejeein bero cuhane cuuruhane coina acaauru rai aite.

<sup>10</sup> Niritiin letoanajaain jetaote:

“Leinjiin loreri asae turuhichene, ecu sinihuche inaraacha ichai nainaaain jelai caje amuhichene reentiaain.

<sup>11</sup> Chunijihun turuhichene jaauru, caohachaain inara coana jerelanaala inara aohana jerecurenihane, jelai caje amuuche, inara safato que nena utoone riariaain ratiriin, inae nitajeeuruhane rai neeuruhane que nainacuruhane coina,” naain jetao nii aina nerelanacaauru letoae Jesoso.

<sup>12</sup> Nitohaneein cuhin jetaote, nacoaauneein Cana Coaunera coitucuhin aca jerihane rijijieein neeuuha cachaaaurune coina acaauru rai aitiin,

<sup>13</sup> arajii moconajaera letono sirichaaauru cachaaaurune maajeein raautaaain, arajii cunaitenacaauru rautaaure erene que rujuanajaain nii aina nerelanacaauru.

*Oha Joaan Baotisitane*

(Mt 14.1-12; Lc 9.7-9)

<sup>14</sup> Nitohaneein itolere ichaa Jesusone beeuuha itolere sacuritaaine jaun jetaote, Erodesi netonai coitucue.

Chaen jetaotechu: “Joaan Baotisitate ichanacaihara. Nii jaunte, nii itolere cojoelanaacojoai ichana naineraneein necaihara,” naa Erodesine jana jetaote;

<sup>15</sup> “Jerihanete *Profeta* Eliasinecaihara,” naaure leeochoaauru. Nii jana leeochoaauru jetaote: “Inoaelnu *profetacuru* rijijieein nena *profetate* acaihara,” naaure.

<sup>16</sup> Nejetaote, niritocuruhane aonajihane jaun: “Acate Joaan ne. Rai nuluno moloeratihanulu natiinte, inae nacoaauneein o caje ichanacaiha,” nae jetao Erodesi.

<sup>17</sup> Erodiasi coreniha jetaote, Joaan mucuerateein *cadena* que ichojoaain caresero cuhane terate Erodesi. Nii Erodiasi jetaote, Erodesi nejera Ferifi comasaineein nelu. Nejetaote, comasaineein sirilu Erodesi nii rai nejera comasainihane saijieein.

<sup>18</sup> Nii jaun jetaote:

“Jiaonriha ii comasaineein taa inejera comasai siriinera,” nae jetao Erodesi rai Joaan.

<sup>19</sup> Niritoha Erodesi rai nii Joaane caje coaauneein jetaote, nii Joaan cotaairiin sohin jaohene rijitjoeein nerejete Erodi-asi.

<sup>20</sup> Nejetaote sohin jaonaa nainene, esinae rauhijiriin leinjiin cacha- saantoneein Cana Coaunera letononeein nihane coitucuhane jaun, coasiha cocoaerateraneein niha Erodesine jaun. Nitohanihane jaun jetaote, iriha Joaane rautatiin aonaane jaun nii aina chatohanai niicha ichanenu coitucuelanaala ne Erodesi.

<sup>21</sup> Nejetaote, nejanoa bajaanaa bitoaane coina lenone jaain, que jauriineein nenacaauru curuaanaacuru, chaen rai soondarooru curuaanaacuru, chaen Calillea cocoaichacuru jataain nelatecuri cotijiaain beseta ichaa Erodesine jana jetao, Joaan sohin jaohene rijitjoenajaaocane jana, suujua rijijieein erue Erodiasi.

<sup>22</sup> Nii jana jetaote, nii beseta ichaane jaa coloheri asaae enohin raansaa cuha nii Erodiasi cacunune jana jetao, nii raansaane jana rautatiin coaraje Erodesi, nii ecu aina lenon-ihha nenacaauru aina jiniiquiin. Nii jana jetaote:

“Joaareen iicha jerei bajaau cacajene ichei tera.

<sup>23</sup> Cana Coaunera notaracaaene chaelai, iicha jerei bajaai cacajene tereeunicha. Nainichaaun cataaun leruhin caa quicha beraai atane tihanunera,” nae jetao araai saain nii ranuna rai Erodesi.

<sup>24</sup> Nii jaun jetaote, jelai caje mituhin:

“Cha bajareeun cajete oma,” naa cuha neba raine jana jetaote:

“Chajaain ena caje Joaan Baotisita couturi bajaau,” nae jetao nii ranuna neba.

<sup>25</sup> Nii jaun jetaote, jelaiha soroneein enohin jetao,

“Ena carai leinjiin plato cuhane Joaan Baotisita couturi teeneene jereeun,” naa jetao cue nii ranuna Erodesi rai.

<sup>26</sup> Nii jaun jetaote, jataain inaderae Erodesi. Nejetaote, satiin niicha cotihacuri urichoo Cana Coaunera notaracae

aitohane jaun, nii caje niicha bajai tenaa nainenihane que aitona nainene.

<sup>27</sup> Nitohanihane jaun jetaote, nii rijieeoritiin leinjiin soondaro letoae Erodesi, Joaan couturi molohin raa cuhane caina.

<sup>28</sup> Nii jaun jetaote, caresero cuhane cuhin Joaan couturi molohin leinjiin plato cuhane uhaain, nii ranuna rai tiha soondarone jaun jetao, neba rai te nii ranuna.

<sup>29</sup> Nii jana jetaote, inae nitohaneein Joaan teeuruhane coitucuhin jetao, nii Joaan jaberoco raain conautiha cuure sacuureraauru.

*Saoqui oaraancai cachaauru rai lenone faa Jesusone*  
(Mt 14.13-21; Lc 9.10-17; Jn 6.1-14)

<sup>30</sup> Nitohaneein letoanajaa Jesusone caje turuhin jetaote, aina netaoijaain itolere ichaain Cana Coaunera ere que cachaauru relaain, naaonjoaunruhane beeure Jesoso rai, nii lechoonca coroatajaain niicha cocoinaauri afosotoorune jana jetaote:

<sup>31</sup> “Chajaauchete neniha cachane jaun cuhin, jelai raotjoein nebetacanichaachera,” nae jetao acaauru rai Jesoso, cauhaajeeuruhane niha natiin arajiin turuhajeeuruha cachaaurune jaun, lenonecuruhane teurenihana acaauru raine jaun.

<sup>32</sup> Nii jaun jetaote, leinjiin bote cuhane fauhin neniha cachane jaun, jelai Jesoso aina cuure nii niicha cocoinaauri afosotooru.

<sup>33</sup> Nejetaote, arajii cacha cuuruhane coarajihane jaun, nii cuuruhane jaan jelai coitucuhin, satiin neseeuuru caje arajiin cuhin jetao, acaauru ajiniha soroneein jeluhariin cuhin turuure.

<sup>34</sup> Nitohaneein cuhin acaauru ajiniha turuuruhane jaun jetaote, ecu turuhin bote caje iniha cunajaun jetao, arajiin ecu cachaauru coaraa Jesusone jana, beraicha colane nena carenerocuru rijijieein aihuruhane jaun jetao, cairichaa-joaain acaauru coaraane jaun, ecu araai laurii niicha coitucui que relanajae Jesoso.

<sup>35</sup> Nii jana inae sohane jaun jetaote, rohan nichuuntaain:

“Inae soha. Coatiha nihei caa jana cacha.

<sup>36</sup> Chajaain cachaauru rai nocoeete ichuun nenacaauru nenaanajauru, neseeuuru, naaonjoainuri cuhin, chaelai lenone ariin coretiha cuuruhine,” naauruha aina nere-lanacaaurune jana jetaote:

<sup>37</sup> “Niriimiin. Chajaain acaauru coroaateeuuche inara,” naa Jesusone jana jetaote,

“Aihana jaunna, coroata fashai denario coreneein faan coretiha cuhacaanune jeree, acaauru coroaatichaachene

coina,” naaure Jesuso rai aina nerelanacaauru. Nii le denar-iote le jiichoo amihanenaa core ne. Niritocuruha aina nere-lanacaaurune jaun jetaote:

<sup>38</sup> “Inatajaain faan siriquiche. Chajaain coanihuiche,” naa Jesusone jaun, coaraain jetaote, “Saoquijieein faan, ita que jerajejein ate, naajeeichate neeje,” naaure jetao aina nere-lanacaauru.

<sup>39</sup> Nii jaun jetaote, joaenreen omane ichoae nelauriaa-ruha cachaaurune coina aitoa Jesusone jaun jetao,

<sup>40</sup> tabaauru le fashaain, tabaauru saoqui chooncaain, naaonjoaain neleruhin nelauriaaure cachaauru.

<sup>41</sup> Nitohanein laurianaacane baiha jetaote, nii saoqui faan aina coroatajai ate raaoriin jabaaequuin dede coarajein jetao, Cana Coaunera bajaain cataaun faan taturiin aina nerelanacaauru rai te jetao Jesuso, cachaauru rai chaluu-ruhane coina.

<sup>42</sup> Nitohanein jetaote, jerecuruhane jaaun tiajoaain nainaan lenonecuruhane baiha,

<sup>43</sup> lechoonca coroata omariin, nii faan aina ate caute que omari memoaaure.

<sup>44</sup> Saoqui oaraancai cachaauru jetaote, nii saoquii faan que lenonecure, acaauru rai faa Jesusone jaun.

*Acau choaae amuha Jesusone*

*(Mt 14.22-27; Jn 6.16-21)*

<sup>45</sup> Nii baiha jetaote, aina nerelanacaauru letoae, bote cuhane fauhin nemuri jerau Betesaaidau ichoaichaniha tu-ruuruhane coina. Nii tonohanau jetaote, ecu nedaain cachaauru rai necoe Jesuso.

<sup>46</sup> Inae cachaauru rai nocoihane baiha jetaote, ichatane ucuuno que cuhin Cana Coaunera bajaa cue.

<sup>47</sup> Nii jana jetaote, inae nocohejihane jana, nemuri cataaun cuujeeure nii aina nerelanacaauru bote cuhane. Nii jana jetaote, ecu jelai atane choae jaiti nihane jana,

<sup>48</sup> acaauru que tacaain uha cujuanane jaun, necairicha-jein taraacajeein cuujeeuruhane coaraje Jesuso. Nii jana inae janohe lalajihane jana jetaote, acaauru caaijie acau choae cuhin acaauru rohan situha cunaa rijijieein acaauru nichae cujue.

<sup>49-50</sup> Nitohanein acau choae cuujihane jana, satiin coaracuruhane jaun jetaote, nesoonetiin anucainiha beein auhaaocure. Nii rijieeoritiin jetaote, acaauru rai:

“Jiaonriha inacojoein nesoonetiin casiichene. Canune aihunra,” naain,

<sup>51</sup> acaauru aina bote cuhane fauha Jesusone jana jetaote, inae nesuruha cujuanane jaun, jataain cojoelatoore,

<sup>52</sup> nii cojoelanaacojoaain faan faain acaauru notaacane sainejeein itolere ichana nainihane que nainaelanaala, “Naaonjoanne jaunte catohanai ichae,” naain coitucunaa nainecurenihane jaun.

*Genesareta bataneu turuhin cunaitenacaauru rautaa Jesusone*  
(Mt 14.34-36)

<sup>53</sup> Nitohaneein cuhin nemuri jera jaaoruhane jaun jetaote, Genesareta bataneu turuhin, ecu acaauru bote jauriaain cositeure.

<sup>54</sup> Inae bote cositeein caje inihuruhane rijieeoritiin jetaote, Jesoso nihane coitucuure nii cocoaichacuru cachaauru.

<sup>55</sup> Nii jaun jetaote, satiin nii jelai batane sacuritaain nii niha Jesusone jaan jelai coitucuhin jetao, rene cunaitenacaauru amaare ela cuhane tijichanjaain.

<sup>56</sup> Chunijihun nenaanajaaunru, neseeu, berooru cuhane, naaonjoainu cuha Jesusone jaaunru jetaote, najiniha situnajaaunru jelon ela choae cunaitenacaauru tein, Jesoso rai aitocure, cajione auha mucuuruhane coina. Nitohaneein satiin Jesoso cajione mucuurera cunaitenacaauru jetaote, nerautaacoaure.

## 7

*Baasoneein cache ichao tera*  
(Mt 15.1-20)

<sup>1</sup> Nitohaneein jetaote, Jesoso coaraa cuure Jerosaleeun caje turunacaauru Moisesa aitoonjoan que cache relaaureraauru aina fariseeocuru.

<sup>2</sup> Acaauru jetaote, aihuruhalu acaauru inoaensihurune rijieein acaauru rai rauhi tonoraelanaala lenonecuruhane ajiniha biji culejelanaala lenonecuruha Jesoso aina nerenanacaauru tabaaunru coaraain jetao, acaauru que ereeure.

<sup>3</sup> Nitohaneein aihuruhalu acaauru inoaensihurune rijieein ichaaoruha fariseeocuru aina satiin Jorioocurune jaun jetaote, lenonecuruhane ajiniha biji culejeein lenonecure itolere bana.

<sup>4</sup> Jerichanejeein jetaote, lenone aihuruhane caje turuuruhane nii aitoha acaauru rai rauhine rijieein biji culejeein lenonecure. Nitohaneein jetaote, araai lauriin ne acaauru ichao, lenonecuruhane ajiniha acau cooruhane jaan curu niha natiin culejeein, acau curu culejeein, coadarojoe culejeein, acaauru sininaja jelai niha natiin culejeein, naaonjoaunruhane jaun.

<sup>5</sup> Nitohaneeuruhane jaun jetaote:

“Chanuna nii aitoaha rauhine rijijieein aihuruhalu cana inoaensihurune rijijieein, lenonecuruhane ajiniha biji culejeein lenonecurene ii aina nerelanacaauru,” naaure jetao Jesoso rai Moisesa aitoonjoan que cache relaaurera aina fariseecuru.

<sup>6</sup> Nii jaun jetaote acaauru rai:

“Esinae rauhijiriinte, inara que aitiin laenaelu Cana Coaunera ere bera inoaensi *profeta* Isaihasi, nechuhataain nohaniha Cana Coaunera coitucutoha nocoenacaauru.

Nii que aitiin:

‘Caa cachaaaurute,  
nechuhataain nujuaaecha que  
canu corojeein neeure.

Nete acaauru suujua,  
cacaje coriaae ne.

<sup>7</sup> Nii jaun

nii chaque nelatejeehai  
netaojiaain  
canu coroaecuruhane,  
nechuhataain  
caitoonjoanelanaala nena que  
nejesinajeein ita relajeein  
aihuruhane jaun,’

naa Cana Coaunera acaauru quene laenaelu *profeta* Isaihasi.

<sup>8</sup> Chanuna nitohaneein Cana Coaunera aitoonjoan que jaolecohin inara inoaensihuru rijijieein ichaonaa jeriquiche inara,” naa acaauru raine baiha jetaote:

<sup>9</sup> “Itolere bana inara inoaensihuru ichao rijijieein ichaonaa jeriquichene jaunte, Cana Coaunera aitoonjoan que jaolecohin aohana jereneeiche.

<sup>10</sup> ‘Inara inaca, inara neba,  
naaonjoainuri que  
inara suujua acateein neeuche.

Chateeinti  
baasoneein neba, inaca,  
naaonjoain que ereein ne.  
Niite ateinanohiniha cureein,’  
naelu jetao Moisesa.

<sup>11</sup> Nete inara aitocoiche, leinjiin cache, rai inaca, neba, naaonjoain rai. ‘Coatiha inara rai cha tenaa nainihaaun, satiin quicha sirii corban neein nihane jaun,’ naane caohachae inara rai. (‘Corban,’ naane jetaote, acaauru ere cuhane, ‘Cana Coaunera que banijiaain nena,’ naa aite.)

<sup>12</sup> Chaen techu, inara rai caohachae, inae niritiin erei cache, rai inaca, neba, naaonjoain rai chaelai tenaa nainenihane que aitocoichene.



13 Nitohaneein inara inoaensihuru ichao sacuhin neeichene jaunte, Cana Coaunera aitoonjoan tonorana jerelanaala itajeein neeiche, nejesinajeein jelaacha que ita relaain neeichene jaun,” nae jetao Moisesa aitoonjoan que cacha relaaunera aina fariseeocuru rai Jesuso.

14 Niritiin jetaote, nacoaauneein nii ecu nenacaauru cachaauru cotijiaain jetao:

“Satiin caa ena inara rai aitocooaunne jaan aonaain coitucuche.

15 Coatiha joaereen lenone quiha cachane coreniha que jaolequiin nihei Cana Coaunera. Leeochaauru cairichanaa jerenacaun, suujua cuhane baasoneein coacuhin baaso ichaeraauru quete laen jaolequiin ne Cana Coaunera.

16 Esinae rauhijiriin urichocoichene aonacuche,” nae jetao acaauru rai Jesuso.

17 Niritohane baiha ecu cachaauru ratiriin loreri asae enoha cuha Jesusone jana jetaote, nii cachaauru relaane jaan bajaature caje aina nerelanacaauru.

18 Nii jana jetaote:

“Tana inara netonai aonaain coitucuhichene. Tana joaereen lenone quiha cachane coreniha que jaolequiin neniha Cana Coaunerane coitucuhichene.

19 Nii cachaacha quii lenonete, nii cacha suriicha cuhane enohin, nii baiha mitue, suujua cuhane enoelanaala,” nae jetao.

Niritiinte, joenreein lenone quiha cachane niha natiin, que jaoleconaa naineniha Cana Coaunerane coitucuerate cana que Jesuso.

20 “Cacha suujua caje mitunaa baaso niicha coacui, niicha ichai, naaonjoain corenihate laen, cacha que jaolequiin ne Cana Coaunera.

21 Nitohaneein suujua cuhane baasoneein coacuin baaso ichaeraaurute, namute quicha aina niha natiin ichao jeracohin, asijiauharitiin, sonajaain jaohin,

22 sinijeranelanaala nena ene aina ichaohin, laurijira rucuhele jereein, namute cacha cairichanaa jerenacaun que ereein, namute cacha coritaain, itolere niicha jerei nejesina ichaain, necoelajauharitiin, namute cacha cairichaa casajenetiin, namute cacha que necohasitaain, suujua coaraain chaachaelanaala, naaonjoaunre.

23 Niichurute satiin cacha suujua caje mituhin cacha que jaolequii niha Cana Coaunerane jaan teraneein ne,” nae jetao acaauru rai Jesuso.

*Leinjiin Jorio nihei cacunu rautaa Jesusone  
(Mt 15.21-28)*

<sup>24</sup> Inae cachaauru relaane nainaan jetaote, jelai caje coaaneein Tiro bataneu turuha cue Jesoso. Nejetaote, ecu turuhin leinjiin loreri asae enoe, coitucuuruha jelai co-coaichacurune jerelanaala. Nii sainejeein jetaote, ecu turuhin nihane coitucuurihure.

<sup>25</sup> Nii jaun jetaote, inae ecu nihane coitucuhane jaun, rene turuhin Jesoso acatiha neseeonriiaa cue leinjiin ene, suujua cuhane moconajaera letono coitucuchuhi siriha rai cacunune jaun.

<sup>26</sup> Nii ene jetaote, Jorio niheichuru Sirofenicia batane co-coaichacuru bene ne. Aca jetaote, Jesoso rene turuhin conujue cacunu suujua cuhane nenea moconajaera letono coitucuchuhi sitaane coina.

<sup>27</sup> Nii jaun jetaote:

“Coa canu roerohecaa. Naininaaun Cana Coaunera cachaneein nenacaauru que banijiaain nenea ruluhin tihanu remaae raine,” naa rai Jesusone jana jetao:

<sup>28</sup> “Aihachuhisi niqricha Curuaanaa. Atiin ii araaichuru Joriocuru rautaaine rijijieein canu cacunu rautaaenene jereenra. Remaae rijijieein canacaanu coaraaine niha natiincha,” naa Jesoso rai nii enene jana jetaote:

<sup>29</sup> “Aihachuisi. Esinae rauhijiriinte aitohi. Inae ii cacunu caje mituhin amuha moconajaera letono coitucuchuhi. Inae naineein jelaiha chenenajaun cauha cuhinera,” naa Jesusone jaun,

<sup>30</sup> nenajaun cauha cuhane jana jetaote, loreri asaae sininajaun niha nii cacunu ranunane jana eruha cue nii ene. Nejetaote, inae nii ranuna suujua caje mituhin amue moconajaera letono coitucuchuhi.

*Urichoelanaala, raotiin eresilanaala naajoaain nenea cacha rautaa Jesusone*

<sup>31</sup> Nii baiha jetaote, nacoaauneein Tiro batane jelai caje amuhin, Sidoon batane, Decapolis batane, naaonjoainuri nenacaauru neseeuuru ichoae rauhijiriin situhin nitihonohin cuhin jetao, Calileea conemuri turue Jesoso.

<sup>32</sup> Nitohaneein inae ecu turuhane jana jetaote, rene leinjiin urichoelanaala, raotiin eresilanaala, naaonjoaain nenea turuaain jetao, biji que dadaain nii cacha rautaane coina rai aitocure.

<sup>33</sup> Nii jaun jetaote, jelai cachaauru udaa nii cacha amaain jetao, nuricho jachuuru cuhane biji couturichuru enoaain, lune soriin lele ichoae teein,

<sup>34</sup> ecuun jabatoroaain dede coaraain neraain jetao: “Efata,” naane jetao: “Najachuu,” naa aite Joriocuru ere cuhane.

<sup>35</sup> Niritohane rijieeoritiin, inae najachuha nurichone jana jetaote, inae raotojoein erenea naine rai lele netonai.

<sup>36</sup> Nitohaneein rautaa'in jetaote niq'ui, nii chuni rai beeuruhane caohate Jesoso. Nejetaote, jataain beeuruhane caohatiha sainejeein jataain que naurutaain beeure.

<sup>37</sup> Nii caje coitucuhin jetaote: "Itolere banate caohacha ichae, uricho saecuru niha natiin urichohin, raotiin eresilanaala niha natiin erenaa naineein, naaonjoanne jaun," naaure jetao cojoelatiin cachaauru.

## 8

*Jena oaraancai cachaauru rai lenone faa Jesusone*  
(Mt 15.32-39)

<sup>1</sup> Nii baiha nacoaauneein netaojiaauruha arajiin cachaaurune jaun jetaote, jataain neniha acaauru lenonena jaun aina nerelanacaauru cotijiaain jetao:

<sup>2</sup> "Inae nichata janohinte canu aina neeure caa cachaauru. Jana nihei caohachanainejeein lenonecuruhane jaanu. Nii jaaunne jataain cairichaa'ojoaain acaauru coaraaun.

<sup>3</sup> Coroaatenajaelanaala acaauru nenajaun letoanajaanunete mijitenaca'aun aterona nainecure, tabaauru coria'e caje uuruhane jaun," naa Jesusone jana jetaote:

<sup>4</sup> "Chaa caje eruhin najian caa jeeoni cacha coroaaterichaache, caa jana ichaoha chuni cacha, caje coretichaachene jaanune coaalanaala," naauruha aina nerelanacaaurune jana jetaote:

<sup>5</sup> "Inatajaain najian faan siriquiche," naain acaauru caje bajaa Jesusone jana jetaote:

"Caaunsinejeeinchate neeje faan," naaure jetao aina nerelanacaauru.

<sup>6</sup> Nii jaun jetaote, atane choae nelauriaauruha cachaaurune coina aitiin jetao, jerane biji que nii caaunsini faan mucuhin Cana Coaunera bajaain, cataaun nii faancuru tatuhin aina nerelanacaauru rai tiha Jesusone jaun jetaote, jitariin nii cachaauru rai chaluure.

<sup>7</sup> Nii jana niha coroatajajeein ate netonaine jaun jetaote, acaentonai mucuhin Cana Coaunera bajaain nii ate nemaajeein chaluherate Jesoso.

<sup>8</sup> Nitohaneein nainaa'in lenonecuruhane baiha jetaote, caute que caaunsineein omari memoaaunre.

<sup>9</sup> Itolereneein jena oaraancai cachaauru jetaote, lenonecure. Nii baiha jetaote, acaauru rai necoe'in,

<sup>10</sup> aina nerelanacaauru aina bote cuhane fauhin jetao, Dalmanotau bataneu cue Jesoso.

*Cojoelanaacojoai ichaa Jesusone coina aitocuruha fariseocurune*  
(Mt 16.1-4; Lc 12.54-56)

<sup>11</sup> Nitohaneein jetaote, Jesoso rene turuhin aina ereeuhane baiha jetao, nechu jataain coujuha, Cana Coaunera letononeein unaa nihane coaratihia acaauru quene coina cojoelanaacojoai ichaane coina rai aitocure fariseeocuru.

<sup>12</sup> Nii jaun jetaote, jataain mijiaaneein nerai raain jetao:

“Chanuna acaauru rai cojoelanaacojoai ichacaaunne coina aitocure caa cachaauru. Coatiha nii acaauru que chatohanai cojoelanaacojoai coaratenaa nainihaun,” naane jaun jetao,

<sup>13</sup> ecu acaauru ratiriin jeelaiha bote cuhane fauhin nemuri jerau cue Jesoso.

*Faan jorerera lebadora rijiiha fariseeocuru ichaone*  
(Mt 16.5-12)

<sup>14</sup> Nitohaneein jelai caje bote cuhane fauhin amuuruhane jaun jetaote, rai nachano baiteein leinjiin faancha amaain cuure.

<sup>15</sup> Nii jana jetaote, acaauru nainalaaca jetao:

“Aonacuche. Faan jorerera lebadora rijiiha fariseeocuru aina Erosi ichaone que caohachaaain nainacuche,” nae jetao aina nerelanacaauru rai Jesoso.

<sup>16</sup> Niritoha acaauru rai Jesusone jana jetaote, neniha acaauru rai faanne que nejesinajeein ita rai ereeuruha aina nerelanacaaurune aonajeein jetao:

<sup>17</sup> “Chanuna faan sirineeichene que ereereequiche. Jataain nachura nainanachara nejeein coitucuneeichete. Jataainte asoneejoaain nainanachara nejeeiche.

<sup>18</sup> Niha niqiu inacojoein inara nota, inara uricho, naaonjoaain. Nete nii cha coaraain, cha aonaain coitucunaa naineeiche.

<sup>19</sup> Saoqui oaraancai cachaauru rai saoquii faan chaluhanune bana, inata omariin caute raaichelu,” naa Jesusone jana jetaote:

“Lechoonca coroata omariin,” naauruha aina nerelanacaaurune jana jetao:

<sup>20</sup> “Chajana jena oaraancai cachaauru rai caaunsini faan chaluhanune bana, inata omariin caute raaichelu,” naa Jesusone jana jetaote:

“Caaunsi omariineein,” naauruha aina nerelanacaaurune jaun jetao:

<sup>21</sup> “Nii saijieein nachura jaiti nainaeneeichete,” nae jetao acaauru rai Jesoso.

*Betsaaidau leinjiin maosa rautaa Jesusone*

<sup>22</sup> Nitohaneein cuhin Betsaaida turuuruhane jana jetaote, Jesoso rene leinjiin maosa amaain rautaane coina conujeeunre cachaauru.

23 Nii jaun jetaote, biji que nii maosa mucuuriin jelai cachaauru udaa amaain jetao, lune que jerane nii maosa nota rujuarujuariin nichoae biji teein: “Inae chaelai coana naineei,” naa Jesusone jana

24 nenotaain jetaote:

“Nuna tocohaneente murimurihonanae carai cachaauru,” naa nii maosane jaun jetaote,

25 nacoaauneein jerane nota ichoae biji tiha Jesusone jana, nacoauneein nota jirichaane jana jetao, inae conoha notane jaun, caohachaaain cha coarae nii maosa.

26 Nitohaneein rautaain jetaote, rai nenajaun letoaain jetao:

“Coa taa neseu cauha,” nae rai Jesuso.

*Mesihasi niha Jesusone que aitoha Fedorone*

(Mt 16.13-20; Lc 9.18-21)

27 Nii baiha jetaote, Filipino batane que nena Sesareea nenacaauru neseuru cue jetao, aina nerelanacaauru aina jiniiquiin Jesuso. Nitohaneein bero cuhane aina nerelanacaauru aina cuujeeurunajau jetaote:

“Tonacuruha canu que cachaauru. Cha nichaaunje,” naa Jesusone jaun jetaote:

28 “Tabaauru cachaaurute Joaan Baotisita niha ii beeure. Jana leeochoaurute, inoaenlu nena Cana Coanera ere bera *profeta* inoaensi Eliasi niha ii beeure. Leeochoaurute, inoaenlu nenacaauru *profetacuru* tabaauru niha ii beeure,” naauruha raine jaun jetaote:

29 “Cha nichaaun jana inara rai,” naa acaauru rai Jesusone jaun jetaote:

“Iite nii canacaanuhacha cohajei Mesihaseinein,” nae jetao rai Fedoro.

30 Nejetaote, chuni rai acaneein nihane beeuruhane caohate jetao Jesuso.

*Orichaaaine biha Jesusone*

(Mt 16.21-28; Lc 9.22-27)

31 Nii caje nunuhetein jetaote: “Canu Cana Coanera Calaohi cachanein nejanoanaa nichaaunne cairichaaeriinte caque jaolecohin niha cuurureein Jorioocuru bichauhenaauru aina saseredotecuru curuaanaacuru, chaen Cana Coanera aitoonjoan que cacha relaaureerauru, naaonjoainuri. Acaaurute catinaa cuurureein, nena nichata janone cuhane ichanareeunni,” naain jetao,

32 esinae rauhijiriin cachaauru rai bee Jesuso. Niritiin esinae rauhijiriin suujuelanaala aitothane jaun jetaote jelai amaain niritiin irihane caohate Fedoro.

<sup>33</sup> Nejetaote niritoha Fedorone jaun, jaotoroain nii aina nerelanacaauru coaraain jetao cotaicha rijitiin: “Coa carero-joeaa moconajaera. Cacaje amuun. Coatihā Cana Coauneraacha coacui coitucuheeii- ii. Joaareein cachaauruhacha coacuhite coaauqui,”

<sup>34</sup> naane baiha jetaote, nii aina nerelanacaauru aina ecu nenacaauru cachaauru cotijiaain jetao:

“Aonacuche. Chunocoha canu cachaneein nena jerihane suujua letono ichana jerihane jianein, coroso que canu tein canu cairichaaaururichaaaine rijijieein necairichanaa abaan-tain caitoonjoa tonoraain, jerichaaunne rijijieein neeine.

<sup>35</sup> Chunocoha canuhacha icharatei ichaelanaala neein nichao ichoteratena jerera, coatihā nichoterinaain. Nete laen canu coreniha, canuhacha beratei bihane coreniha, naajoain coreniha nichao itajera, ichoteratenojoiniha cureein.

<sup>36</sup> Chaaquena rai nelatere, itolere caa chauratane que ne-naacha que coacuhin rai nichao itajiha cachane.

<sup>37</sup> Nitohanihane jaun inaaonjoaain coretihane niha natiin nii nichao ichoteratena nainiheii cache.

<sup>38</sup> Nitohanihane jaun, chunocoha canu nichaaunne been quiiha beratenojoin biha caa necha aansaneein osaaonacaauru cachaauru raine que nocoejihanena, canu-cacha calaohi nichaaunne inae que tihane bana canu Inaca necaohacha que necohachaaain rai letonocuru anjeraauru aina nacoaauneein turuha uhanune banane canuhetonai que necoejereeunni,” nae jetao acaauru rai Jesoso.

## 9

<sup>1</sup> Niritiin jetaote:

“Esinaae rauhijiriin coatihā oorurinaain cau ena canu aina nenacaauru tabaauru, niicha ichaneni ichaaain turuha Cana Coaunera Cojoanonaane coaracuruhane que tiaain,” nae jetao acaauru rai Jesoso.

*Nejelauneein ocooca Jesoso jaberocone*  
(Mt 17.1-13; Lc 9.28-36)

<sup>2</sup> Saota janone baiha jetaote, ichatane ucuuno cue Jesoso, Fedoro, Saantiaao, Joaan, naaonjoainuriicha amaain. Inae ecu turuuruhane jana jetaote, acaauru notaracaae nejelauneein ocooca Jesoso jaberocone jana jetao,

<sup>3</sup> jataain caohatiin bichoronohin cajione amurijiriin soma-jaaain jiquihaquuin nedae rai cajione.

<sup>4</sup> Nii jana jetaote, ecu Jesoso aina ecocohin ereeuuha inoaenlu nenacaauru Cana Coaunera ere bera inoaensihuru, Irihasi, Moisesa, naaonjoainurine jana coarajeure.

<sup>5</sup> Nii jaun jetaote,

“Cacha relaera, jataainte caohate cau nihacachene. Coanete nichatajaain loanari jaacache, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao Jesoso rai Fedoro.

<sup>6</sup> Jataain nesooneetooruha nii Jesoso aina cunacaauru, aina nerelanacaaurune jaun jetaote, nii tonaain irihane jaa coitucuenihane jaaun aite Fedoro.

<sup>7</sup> Niritohane jana acaauru conaacotaa dede sacarine jaun jetaote, nii dede sacari jana tonii: “Caate jataain quiicha belaa canuhacha letoai canu Calaohinera, nere tonoraain neeuchera,” naa erenaane jana jetao aonajeure.

<sup>8</sup> Nii rijieoritiin roaichu coaracuruhane jana jetaote, inae acaauru rohan neniha chunine jana jetao, ecu jelai acaauru aina niha Jesusone jana coaracure.

<sup>9</sup> Nitohanein jetaote, nii ichtane ucuuno caje jelaiha faaujueein, nii niicha coaracuri beeruha chuni rai nii aina nerelanacaaurune caohate Cana Coaunera Calaohi Jesoso, inae o caje ichanaane baiha beeuruhane coina.

<sup>10</sup> Nii jaun jetaote, suujuaacha cuhane nii niicha coaracuri ruhecure, oo caje ichanarihanine que aitothane coitucuenihane jaun ita caje bajaabajajeein.

<sup>11</sup> Nii jaun jetaote:

“Chanuna jauriaanejeein Irihasi tururichaaaine que aitocure- Moisesa aitoonjoan que cacha relaaaureraauru,” naain Jesoso caje bajaauruhane jana jetaote:

<sup>12</sup> “Esinae rauhijiriinte niqii, itolere rucueraanu que jauriaanejeein tururichaaain Irihasine que aitocurelu. Chanuna jana Cana Coaunera Quiricha inoansi cuhane cacha Calaohineein nenea cairichanojoneein, jaoleneein niha curichaaaine que aite.

<sup>13</sup> Aonacuche. Inae turuha uhalu Irihasine janate, que niicha jerei ichaain cairichaaurelu, nitohanihane coina Cana Coaunera Quiricha cuhane aitiin laenanohinihane rijijieein,” naain jetao tonoraes Jesoso.

*Moconajaera letono coitucuchuhi siricha leinjiin enamanaa rautaa Jesusone*

*(Mt 17.14-21; Lc 9.37-43)*

<sup>14</sup> Inae jelaiha nii neeuruha aina nerelanacaauru leeochoaurune jaaun turuuruhane jana jetaote, ecu acaauru aina neeure arajiin cachaauru. Chaen Moisesa aitoonjoan que cacha relaaurera tabaauru netonai ecu neein jetao acaauru aina ereereecure.

<sup>15</sup> Nii jana uujiha Jesusone coariin jetaote, que tacaain satiin jeluhariin cuhin jetao, jataain cojoelatiin rai iriha cure.

<sup>16</sup> Nii jana jetaote, acaauru rai:

“Tonaai acaauru aina ereerequiche,” naain acaauru caje bajaa Jesusone jana jetaote:

17 “Cacha relaera, coaraaine coinane, cau ii rene canu calaohi uhaaun, moconajaera letono coitucuchuhi siriha suujua cuhanena jaun, erenaachara neein nihane jaun.

18 Nitohanihane jaunte, chunijihun cuhane jaauru baasoneein mucuhane nainein atane choaae tocojoaain tacaain, nujuae caje lajaaqui mitaain, catu rihoneein, sefetaain te nii suujua cuhane nena coitucuchuhi. Nii jaunne niqui ii aina nerelanacaauru rai aitoon nii suujua cuhane nena coitucuchuhi sitaauruhane coina. Nete sitanaa nainesihurene,” naa nii acaauru jana nena leinjiine jaun jetaote:

19 “Jataain cha esenetaaichuru cachaaauru. Cha carajaneinna inara aina nereeeun. Cha carajaneina inara abaantareeun. Chajaain cajiha nii enamanaa uhaauche,” naa acaauru rai Jesusone jaun jetaote,

20 Jesoso rene nii enamanaa amaure. Nii jana Jesoso coariin jetaote, atane choae nii enamanaa siheite nii suujua cuhane nena moconajaera letono coitucuchuhi. Nii jana jetaote, najaabu jabubuhin nujuae caje lajaaqui mitujuae nii enamanaa.

21 Nii jana jetaote, nii enamanaa inaca rai jetao:

“Chabana caje coauneein caa catohane,” naa Jesusone jana jetaote:

“Causine caje coauneente aicha.

22 Nii jaunte araai saain usihanaauru comaaichuru, acauhanaauru comaain ateinana jere nii suujua cuhane nena coitucuchuhi. Nitohanihane jaun, atiin cairichaaajoaain canacaanu coaraain, canacaanu coroatajaneun, rautana naineine,” naa nii enamanaa inacane jaun jetaote:

23 “Tana rautana nainichaaunne esenetaainete cacaje baajai. Satiin quesenetaera raine niicha bajai ichaain neeun,” naa Jesusone jaun jetaote:

24 “Jataainnachujian chesenetaaun. Cacorataaneune jataain jelai amuritoheriin chesenetaera,” nae jetao ehequiin nii enamanaa inaca.

25 Nii jana arajiin netaojiaauruha cachaaaurune coaraane jaun jetaote, nii enamanaa suujua cuhane nena moconajaera letono coitucuchuhi rai jetao:

“Erenaachara neein urichoelanaala caa enamanaa tera coitucuchuhi, canune ichei aitoon caa enamanaa jianein caje mituhin amuhine coina. Jiaonriha nacoaunein caa enamanaa suujua cuhane enohine,” naain suruaa Jesusone jana jetaote,



<sup>26</sup> nacoaauneein baasoneein nii enamanaa jaberoco teein cojioriae nii suujua cuhane nena coitucuchuhi. Nitohaneein tihane baiha onaa rijijieein teein, caje mituhin amuhane jaun jetaote, “Inae baasoneein jaberoco tihane caaunte jerihane inae ohe,” naaure nii ecu arajiin neein coarajeeurera cachaauru.

<sup>27</sup> Nejetaote, biji que mucuhin michuha Jesusone jana jetao, nimichuhin nichaaurae nii enamanaa.

<sup>28</sup> Nitohanihane baiha aina nerelanacaauru aina jiniiquuin leinjiin loreri asaee enoha Jesusone jaun jetaote, jelai ecu teteriin:

“Chanuna canacaanu nii coitucuchuhi sitanaa nainesinihacaanu,” naain caje bajaauruhane jana jetaote:

<sup>29</sup> “Catohanai moconajaera letonote nainichaa Cana Coaunera bajaacane ainaacha sitaacane,” nae jetao acaauru rai Jesoso.

*Caa quete coroata sae ohane biha Jesoso.*

*(Mt 17.22-23; Lc 9.43-45)*

<sup>30</sup> Nitohaneein nii canaanai rautaane jaan jelai caje amuhin jetaote, Calillea turuhin rauhijiriin situujueein cuujeeure. Nejetaote, nii acanihane coitucuha chunine jerene Jesoso,

<sup>31</sup> aina nerelanacaauru relanaa nainihane coina. Nii acaauru relaane jaan jetaote:

“Cacha Calahineein nenaate cachaauru biji tenojoinihane jana ateinaa cuurureein. Nete nichata janohane baiha ichanareein,” naain aina nerelanacaauru relaane jana jetaote,

<sup>32</sup> nii acaauru rai aitohane inaaurenihana natiin jetao caje bajaarene necoatocuruhane jaun.

*Charijina jataain nelateinnein nere*

*(Mt 18.1-5; Lc 9.46-48)*

<sup>33</sup> Nitohaneein cuhin, inae Caferenaanon turuhin loreri asaee enooruhane jana jetaote, aina nerelanacaauru rai jetao:

“Chaaque ita rai ereerejeein uhicheein bero cuhane,” nae jetao acaauru rai Jesoso.

<sup>34</sup> Nejetaote inauheneecha curuaaequuin aonajeeure, bero cuhane uujueein, “Charijina caa cana jana jataain nelatein nenaane,” naauruha ita raine jaun.

<sup>35</sup> Nitohaneein inauheneecha aonajeeuruhane jaun jetaote, nelauriariin nii aina nerelanacaauru lechoonca coroatajai cotijiaain jetao: “Leeochaauru amurijiriin nena jeriha chunine, acaauru rai nelatein itolereneein acaauruhacha jerei icharanein neeine,”

<sup>36</sup>naane baiha jetaote, biji que leinjiin canaanai mucuuriin acaauru cataaun teein jetao:

<sup>37</sup>“Canu coreniha caa canaanai raerate, jerichanejeein canu raane rijijieein aicheein. Nii jaun canu raera coatiha canuhacha raa airinaain, caletoaera Ofa netonai raate aicheein,” nae jetao aina nerelanacaauru rai Jesoso.

*Canaacha ichai ichara, coatiha cana que nejeratenaa nihei.*  
(Lc 9.49-50; Mt 10.42)

<sup>38</sup>Nii jana jetaote:

“Cacha relaera, ii curuaa aina cuaain moconajaera letono coitucuchuhi sitaain que suujuequiin nenacaauru rautaa leinjiinne janane eruhin caohatihacaanu, cana jana nenaaneein ainihane jaun,” naa Joanne jana jetaote:

<sup>39</sup>“Jiaonriha caohateein neeichene. Chunocoha canu curuaaneein netiin cojoelanaacojoai ichaera, nii baiha baasoneein erena nainiheii canu que.

<sup>40</sup>Canaacha ichai ichara, coatiha cana que nejeratenaa nainiheii.

<sup>41</sup>Chunocoha canu Curisito cachanequichene coreniha inara rai esinaeca niha natiin terate, esinae rauhijiriin rai cainanohiniha cureein,” nae jetao rai Jesoso.

*Jataain alalacaraa osa que nesarucuaane*  
(Mt 18.6-9; Lc 17.1-2)

<sup>42</sup>Niritiin jetaote: “Chunocoha ena canu esenetajeeureraauru saruha osa quenete, nii ajiniha caohachare nuluno que leinjiin ajeri jaberoco tijichaain ichojoaain cucuana kuhane joaeraane.

<sup>43</sup>Jana osa que ii saruha ichohiine moloo. Nii amuritoheriintejian caohachare le jerajei ichohii aina Cana Coaunera cojoanona que neeine.

<sup>44</sup>Nabana le jerajei ichoii coreniha, nii chariji bana nii riano niha natiin ohin, nii usi tabai jacanaachara jana kuhine coataa.

<sup>45</sup>Jerichanejeein osa que ii saruha ii tijiane moloo. Nii amuritoheriintejian caohachare le jerajei ii tijia aina Cana Coaunera cojoanona que neeine.

<sup>46</sup>Nabana osa que ii saruha ii tijiane coreniha nii riano niha natiin ohin, nii usi tabai jacanaachara jana kuhine coataa.

<sup>47</sup>Jerichanejeein osa que isharuha inotane, le jerajei inota rocoo. Nenacaeneetejian nii amuritoheriin caohachare le jerajei inota aina Cana Coaunera Cojoanona que neeine. Nabana usi que isharuha inotane,

<sup>48</sup>nii riano niha natiin ohin, nii usi jacanaachara, naaonjoain jana kuhine coataa.

<sup>49</sup>Usi jana situnaa rijijieeinte nichoterichaacheein satiin.

50 Nelatiha niqui tebe. Nete inae lenone cotebetenaa nainenihane, inae nii chaque nelatene. Nii rijijieeinte chaque nelateneeiche inara que icharatenohi ichaain, raotojoein ichaauruha leeochoaurune jaan ichaeneeichene,” nae jetao acauru rai Jesoso

## 10

*Comasai jianiha cachane que cacha relaa Jesusone  
(Mt 19.1-2; Lc 16.18)*

1 Inae Caferenaaon caje amuhin jetaote, aina nerelanacaauru aina jiniiquiin nucuhe Jorodaan auhaniha cuhin, enoto mitu nichajai jeloon nena Jodea batane que cue Jesoso. Ecu jetaote, rai netaojiaauruha cachaaurune jana jetao, nacoaauneein relanajae Jesoso, cachaauru relanaa rautatohane jaun.

2 Nii jana jetaote, rohan nichuuntaain jetao, nechu jataain cairichaaauruhane jaanu lera ariha jetao, comasai jianena nainiha cachane bajaare jetao Jesoso caje fariseeocuru tabaauru.

3 Nii jaun jetaote:

“Tonaa inara rai Moisesa, comasai jianiha cachane que,” naain acauru caje bajaare Jesosone jana jetaote:

4 “ ‘Comasai jianiha cachane coina, jauriaanejeein comasai jianihane jaaque aitiin nena quiricha teeuchete, aina comasai jianemiin cacha,’ naainte aite Moisesa,” naauruha fariseeocurune jana jetaote:

5 “Aiha niqui. Nete, nere tonorana jerelanaala neeichelune jaun, nitohaneein ichaquichene rautaenihane saijieein ichaquichene coina aitelu Moisesa.

6 Nete jauriaanejeein itolere coaunaane nunuheneein, quicha, ene, naaonjoain coaunaelu Cana Coaunera.

7 Nii jaaunte, inaca, neba, naaonjoain ratiriin amuhin necoansaijiae cacha.

8 Chaen leinjiin cachaneein nena rijijieein coacuhin, jiniiquiin ita aina neeure.

9 Nitohaneein niha cachane coina icha Cana Coaunerae jaun, nii comasai jianena nainihe cacha,” nae jetao fariseeocuru rai Jesoso.

10 Inae loreri asaae enooruhane jana jetaote, nii cachaauru relaane jaan bajaare nacoaauneein caje aina nerelanacaauru.

11 Nii jaun jetaote, acauru rai:

“Comasai jianein leeocho ene raerate, osa que nesaruha aicheein.

<sup>12</sup> Jerichanejeein techu, osa que nesarureein lana jianeein leeocho cacha que nelanajaane ene,” nae jetao aina nere-lanacaauru rai Jesuso.

*Canaanainuru rausiaaeca Jesusone*

*(Mt 19.13-15; Lc 18.15-17)*

<sup>13</sup> Nii jana jetaote, acaauru mucuhin rausiaaeca cojiotanaaca Jesusone coina jetao, rai canaanainuru amaare acaauru fojiaraauru. Nejetaote, nii canaanainuru amaauruha nii amaaurerane caohateeure nii Jesuso aina nerelanacaauru.

<sup>14</sup> Nii rene amanajaauruhane caohateeuruhane coarajeein jetaote, obajeein jetao:

“Coa carene turuuruha canaanainurune caohatihachete, canu rene turuuruhine. Aihuruha caa canaanainurune rijijeein nenacaauru raineente ne Cana Coaunera Cojoanona.

<sup>15</sup> Esinae rauhijiriin aiha leinjiin canaanaine rijijeein neniha cachane coatiha Cana Coaunera Cojoanona que nana nainerinaain,”

<sup>16</sup> naane baiha jetao, jerane biji cuhane nii canaanaihuru raane baiha jetao acaauru mucuhin, acaauru rausiaaeca cojiotanajae Jesuso.

*Jesoso aina iriha leinjiin cacha coriquihonane*

*(Mt 19.16-30; Lc 18.18-30)*

<sup>17</sup> Nitohaneein inae jelai caje amunaa jeriha Jesusone jana jetaote, rene jeluhariin cuhin turuhin jetao, nacatiha neseeriaain:

“Caohachanejei cacha relaera. Cha ichareeun charijibana nitajenaachara ichaonaa raotono que nana nainichaaune coina,” naain Jesuso caje bajaa leinjiin cachane jaun jetaote:

<sup>18</sup> “Chanuna caohachanejei cacha neein canu curuaateei, leinjiin Cana Coauneraachate caohachanejeineein ne.

<sup>19</sup> Inae raotojoein Cana Coaunera aitoonjoan coitucuhi: ‘Jiaonriha sonajaain jaohine. Coa ii sinijerane lanaala nana ene aina ichaohin niha. Coa asijiauha. Coa chamute cacha cairichanaa jerenacaun chuni cacha coacuhin casaje que ereein niha. Chae efojiaraauru ere tonoraain caohachaain acaauru aina neein,’ naane coitucuhi,” naa rai Jesusone jaun jetaote:

<sup>20</sup> “Aihanu chujian. Canu enamanaca caje coauneeinne jitariin nii naitoonjoan tonoraain ichaon,” naa nii cachane jana jetaote,

<sup>21</sup> jataain cairichaojoaain coaraain jetao:

“Esinae rauhijiriin, chaque lanaelanaala Cana Coaunera aitoonjoa tonorana jereine, chajaain jitariin nii iicha sirii que necoreteen cairichaaihuru rai tenihun. Nii banaachate,

jelai amuritoeriin nereein iicha latei dedeeu. Nii baiha laen canu aina uu,” naa rai Jesusone jaun jetaote,

<sup>22</sup> jataain nererojoecaain jelai caje amue inaderaain nii enamanaa, jataain coriquihocane jaun.

<sup>23</sup> Nii jaun jetaote, nii rohan curuacaain nenacaauru cachaauru coaraain, aina nerelanacaauru rai jetao:

“Jataainte caaintate Cana Coaunera Cojoanonaa que nenea jeriha coriquihonane,” naa acaauru rai Jesusone jaun jetaote,

<sup>24</sup> jataain cojoelatiin ecu aonajeeure aina nerelanacaauru. Nejetaote nacoaanein acaauru rai jetao:

“Cacoelaichaaauru, jataainte caaintate Cana Coaunera Cojoanonaa que nenea jerichaane.

<sup>25</sup> Leinjiin oco jachu cuhane situnaa naineniha leinjiin camechone amurijiriinte, jataain caaintate Cana Coaunera Cojoanonaa que nenea jeriha coriquihonane,” naa aina nerelanacaauru rai Jesusone jaun jetaote,

<sup>26</sup> jataain jeelai amuritoheriin naurutaain cojoelatiin jetao, ecu nejesinajeein ita rai jetao:

“Nitohanihane nichotenaa naineriaain chuni,” naauruha nii aitohane aonajeeinne jaun jetaote,

<sup>27</sup> ecu coaranaacane baiha jetao:

“Caaintatiin cachaauruhacha coaraite, Cana Coaunera rai caaintajene,” naa Jesusone jaun jetaote:

<sup>28</sup> “Canacaanune jitariin canacaanuhacha sirii ratiriin ii sacuhacaanulu,” naa rai Fedorone jaun jetaote:

<sup>29</sup> “Chunocoha esinae rauhijiriin canu coreniha, chaen, cacha ichoteratera caitoonjoan- canu ere beebjeein, naaonjoanne coina, rai loreri, rai nejeraauru, rai fojiaraauru, rai calaohichuru, rai natane, naaonjoain ratirichate,

<sup>30</sup> caa chauratane que neein jataain jeelai amuritoheriin lefasha sanein rai loreri, rai nejeraauru, rai fojiaraauru, rai calaohichuru, rai natane, naaonjoainuri siricheein. Cairichaerinojoneein neeuruhane niha natiinte, turuha uheni Cana Coaunera Cojoanonaa charijibana nitajenaachara ichaonaa que niha cuurureein.

<sup>31</sup> Ena jataain arajii itolere que nelaetoha nocoetonacaaurute, nii chaque nelatelanaala niha cuurureein. Jana ena chaque nelatelanaala arajiin nenacaaurute, nelatein niha cuurureein,” naain jetao Fedoro tonorae Jesuso.

*Caa quete inae nichata sae orichaainne biha Jesusone  
(Mt 20.17-19; Lc 18.31-34)*

<sup>32</sup> Jerosaleen nichaae cuuruhane jaun jetaote, aina nerelanacaauru ichoaachaniha cuujiha Jesusone jana jetao, cojoelatiin cuujeeuruhane jana jetao, nii niritohane que casiin

jetao, cuujeeure acaauru caaijie cunacaauru. Nii jaun jetaote, jelai nii aina nerelanacaauru lechoonca coroatajai cotijiaain jetao:

<sup>33</sup> “Inae caa ena coitucuhichene rijijieeinte, Jerosaleen cuujihacache. Inae ecu turunaate, canu inaraacha coha-jei cachaneein nejanoanaa nichaaune mucuhin saseredotecuru curuaanaacuru rai, Moisesa aitoonjoan que cacha relaaureraauru rai, naaonjoainuri rai caetecuruhane jana, catinanacanejeein nejelau cachaauru Jorionelanaala nacaauru bijihu caetecurureein.

<sup>34</sup> Nii janate, caque necoatijiaain canu couluneein, canu bisiin catinaa cuurureein. Nena nichata janohane baiha, nacoaauneein ichanareeunni,” nae jetao nitohaneein teururichainne que Jesoso.

*Acaauru coroatajaniha Jesusone coina caje bajaauruha Saantiaao, Joaan, naaonjoainurine (Mt 20.20-28)*

<sup>35</sup> Niritohane jana jetaote, rohan nichuuntaain jetao:

“Cacha relaera, caa ena ichei canacaanuhacha bajaani ichaainene jerichaanu,” naauruha Sebedeeo calaohichuru, Joaan, Saantiaao, naaonjoainurine jana jetaote:

<sup>36</sup> “Chatohanai inara rai ichacaaunne jerequiche,” naa Jesusone jana jetaote:

<sup>37</sup> “Canacaanu rai, inae ii Cojoanona necaohacha que neeine bana, ii ajaabiji nichajai que, ii raotono nichajai que, naaonjoaain nihacaanune jaanu ichaainene jerichaanu,” naauruhane jana jetaote:

<sup>38</sup> “Coatiha nohane inaraacha bajai coitucuhin aitoheiche. Caa necairichanaa abaantarichaaunnine rijijieeinote, necairichanaa abaantanaa nainequiche inara. Chaen noote, nitohanihanune coina cojunacatenohi nichaaunne rijijieein cojunacatenohineein neeiche,” naa acaauru rai Jesusone jaun jetaote:

<sup>39</sup> “Abaantanaa nainichaanu,” naauruhane jana jetao:

“Inarate niqui, caa necairicharichaaunnine rijijieein necairichanaa abaantaain cojunacatenohineein niha curiquicheein, cojunacatenohineein nihanune rijijieein.

<sup>40</sup> Nena laen, canu raotono nichajai que, canu ajaabiji nichajai que, naaonjoaain nelauriaaichene coina inaraacha bajai tenaa naineneun, nii coina inae acaauru que baniha-teein rucuhenojoneein nenacaauru raineein nihane jaun,” nae jetao acaauru rai Jesoso.

<sup>41</sup> Niritoha acaauru rai Jesusone aonajeein jetaote, Saantiaao, Joaan, naaonjoainuri aina obaaecure nii lechooncaihuri aina nerelanacaauru. Nejetaote, acaauru cotijiaain jetao:

42 “Inarate raotojoein, Cana Coaunera coitucuhichuru, leeochoauru amurijiriin nenea jereein acaauru cocoinanacai neeuruhane que suujua acateein neeuruha leeochoaurune jereein neeuruhane coitucuhiche.

43 Nete laen nejesinajeein nitohaneein nenea naineneeiche inara. Nitohaneein nenea coacuelanaala, nejesinajeein ita coroatajanein neeuche.

44 Jana leeochoauru amurijiriin nenea jerera, leeochoauru letononeein neeine.

45 Coaracuche nachuhinti canu Cana Coaunera Calaohi cacha caje nejanoanaa nichaaunne canu coroatajaneiechene coina tururichaaun. Arajii cachaauru osa caje nichoteein jianacoon neeuruhane coinane, nii coreniha cajabereeo cairichaeratiha uunlu acaauru coroatajaniha,” nae jetao acaauru rai Jesoso.

*Maosanihane caje Bartimeeo rautaa Jesusone  
(Mt 20.29-34; Lc 18.35-43)*

46 Inae Jericoo turuhin jetaote, ecu basiinjiin neoriin jela caje amuha aina nerelanacaauru aina Jesusone jana jetao, acaauru aina cuure arajiin cachaauru. Nii jana bero auhaniha lauhequiin coriqui bajaa leinjiin Timeeo calaohi cairichei maosa Bartimeeone jaun jetaote,

47 Nasarete cocoaicha Jesoso nihane aohanriin jetao:

“Rabiriicha foeratei Jesoso, cairichaaajoaain atiin cacoharaau,” naain eheeoca nii maosane jana jetaote,

48 arajiin cachaauru, ehequiin aitohane caohateure inauheneecha nihane coina. Nejetaote, que rutaain ehequiin:

“Rabiriicha foeratei, atiin cairichaaajoaain cacoharaau,” naa nii maosane jaun jetaote,

49 ecu inacuhin jetao:

“Chajaain cajiha cotihanihuche,” naa Jesusone jaun jetao:

“Chajaauje nimichuhinte, toon ii cotihara coarae,” naauruha nii maosa raine jaun jetaote,

50 cajione buri rocohitiin siheetiin ratiriin jetao, Jesoso rene jelhariin turuha cue nii maosa.

51 Nii jana jetaote:

“Chatohaneein chetichaaunne jereeita,” naa Jesusone jaun jetao:

“Conoha canotanena jereunra cacha relaera,” naa nii maosane jana jetaote:

52 “Inae jataain quesetaaine jaun inae conoha inota. Inae naineein amuhinera,” naa rai Jesusone rijieeoritiin jetaote, inae conoha nii maosa notane jaun jetao Jesoso jiniichaaun bero cuhane cue nii maosa.

# 11

## *Jerosaleeun turuha Jesusone* (Mt 21.1-11; Lc 19.28-40; Jn 12.12-19)

<sup>1</sup> Nitohaneein cuhin, inae Jerosaleen catainaauruhane jaun jetaote, Betafajee, Betania, naaonjoainuri rohan Olibo bichatane turuuruhane jaun jetao, caje coauneein corootajai aina nerelanacaauru letoae Jesuso.

<sup>2</sup> “Chajaain taa nita canaacha coarajei neseu cunichuche. Inae ecu turuhichenete, ecu cositenojoneein teecoha jaiti chuni cacha amunajanelanaala nena asno narejeene jana eruha curiquicheein. Cosi rutuhin uhaaichene jana:

<sup>3</sup> ‘Chanuna cosi rutuhin amaaiche,’ naa chunocoha inara raine: ‘Latiha Cana Curuaanaane jaanne raa uhacaanu. Inae enate ichai jelaiha cainaratereein,’ naauche,” naain jetao letoanajae Jesuso.

<sup>4</sup> Nii jaun jetaote cuhin, nii acauru rai aitohane rijijieein bero auhaniha teecoha cositenojoneein acuujua rohan asno narejeene jana, eruhin jetao cosi rutuhin amauruhane jana jetao:

<sup>5</sup> “Cha ichaquiche inooneein. Chanuna nii asno narejeen cosi rutuhin amaaiche,” naain jetao, acauru caje bajaure nii cuu nenacaauru cachaauru tabaauru.

<sup>6</sup> Nii jaun jetaote, nii acauru suujuateein letoanajaa Jesusone rijitoejin nii cachaauru tonoraauruhane jaun jetao, inauheneecha nii asno narejeen amauruhane coarajeure.

<sup>7</sup> Nitohaneein jetaote, nii asno narejeen ichoae cajione tein jetao, Jesuso rai nii asno amauruhane jana jetao, inae rene turuhaauruhane jana nichoae nelauriaain cue Jesuso.

<sup>8</sup> Nitohaneein asno ichoae nelauriaain cuhane jana jetaote, najiniha bero cuhane rai cajione buri maririjiacoaauruhane jana jetao, leochaauru elele alo rijijieein nena ajaena alo raain najiniha bero cuhane maririchure.

<sup>9</sup> Nii jana najiniha cunacaauru, caaijie cunacaauru, naaonjoainuri jetaote:

“Raotojoein turuhine Cana Coaunera rijijieein nena cana Curuaanaa.

<sup>10</sup> Raotojoein turuhine Cana Coaunera Cojoanona, cana inoansihuru foerateraneein nena Rabiri nefoerate cojoanona. Aihute coreniha raotojoein neeurumiin dedeeu nenacaaurune maajein,” naaure jetao cojoriin cachaauru.

<sup>11</sup> Nitohaneein Jerosaleen turuhin jetaote, Teenforo asaae enohin, ecu basiiijin neoriin jitariin nasajai coaraane baiha jetao Betaniau cue lechoonca corootajai aina nerelanacaauru aina Jesuso, inae sohane jaun.



*Inacaelanaala oha uherane coina cojiotaa Jesusone  
(Mt 12.18-19)*

<sup>12-13</sup> Nii cojoanoo Betania caje amuuruhane jana jetaote, niita bero auhaniha niha uhera alone jana coaraain jetao, coaraa cue Jesuso mijiintohane jaun. Nejetaote, inaacane bana rijiu nenihane jaun, ninaa colane nalohacha baejeein ne.

<sup>14</sup> Nitohaneein inacaenihane jaun jetaote:

“Inae nacoaauneein inacaeneriquinne jaun, neriaain chuni ii inaa lerata,” naain uhera cojiotaa Jesusone jana jetao, ecu aina neein aonajeure aina nerelanacaauru.

*Teenforo asaae necoretenacaauru sitaa Jesusone  
(Mt 21.12-17; Lc 19.45-48; Jn 2.13-22)*

<sup>15</sup> Inae nacoaauneein Jerosaleen turuhin jetaote Teenforo asaae enohin, nii Teenforo asaae chaelai que necoreteein, chaelai coretiha, naaonjoaain nenacaauru sitaain, atani-choae coriqui coreeuruha cachaauru raine jaa rorihurune maajein lacojoaain jetao, serori que necoretenacaauru rorihurune maajein lacojoaain,

<sup>16</sup> nii Teenforo asaae nenacaaen rucuhele enoaauruhane caohate Jesuso.

<sup>17</sup> Nitohaneein jetaote:

“Cana Coaunera Quiricha inoansi cuhanete: ‘Cana Coaunera bajaauruha satiin chauratane sacuritaain que nenacaauru cachaaaurune jaan colohereineeite ne canu loreri,’ naain laenanohineein ne. Nete asijiaauruhane jaan coloheri rijijieein teeiche inara,” naain jetao ecu acaauru relae Jesuso.

<sup>18</sup> Niritiin cachaauru relaane aonajein jetaote, Jesuso sohin jaonaa coaacuruhane jaun, sohin jaaoruhane jaanu lera arihure saseredotecuru curuaanaacuru, Moisesa aitoonjoanque cacha relaaureaauru, naaonjoainuri. Ne jetaote, sohin jaaoruhane coasichure, nii acaauru relaa Jesusone jaan rautatiin aonajeuruha satiin cachaaaurune jaun.

<sup>19</sup> Inae nocohecane jana jetaote, aina nerelanacaauru aina jiniiquiin nii nese caje amue Jesuso.

*Inacaelanaala oha uherane  
(Mt 21.20-22)*

<sup>20</sup> Nii cojoanoo janone nii uhera rohan situha cuuruhane jana jetaote, inae cojoaisi aina curuaaequuin oha nii uherane jana coaracure.

<sup>21</sup> Nii jaun jetaote, cojiotaa Jesusone coacuhin que nainaain jetao:

“Cacha relaera, inae raca cojiotaaine jaunte, inae ohe taa uhera. Coaraau nachuhinti,” naa Fedorone jaun jetaote:

<sup>22</sup> “Jataain Cana Coaunera esenetaauche.

23 Chunocoha esinae rauhijiriin airichaainne esenetaain nii batoelanaala: ‘Niilai caje nefaruhin cucuana cuhane cunihun,’ naa caa ichatane ucuuno rainete, esinae nii aithane rijijieein aihane ne.

24 Nitohanihane jaaunne inara rai aitoon, inaraacha latei eruhichene coina Cana Coaunera bajaache, inara rai terichaaaine esenetaainete eruriquicheein.

25 Inara rai chatohanai cotainacai ichaain neeuruha inara amute cachaaurune niha natiin, acaauru que inara suujua acatein Cana Coaunera bajaachene bajaache.

26 Aihute baaso ichaain osa que nesaruquichene niha natiin inara osa que suujua acatemiin cana Inaca dedeeu nena Cana Coaunera,” nae jetao Fedoro rai Jesoso.

*“Cha ii cocoainae,” naauruha Jesoso raine  
(Mt 21.23-27; Lc 20.1-8)*

27 Nii baiha jetaote, nacoaauneein Jerosaleen cauha cue aina nerelanacaauru aina Jesoso. Inae ecu turuhin Teenforo asaee enohin amuhemuheca Jesosone jana jetaote, rohan nichuuntaain jetao:

28 “Cha ii cocoainae catohanai ichaain neeine coina. Chatohanai cocoainanacai neeinna neei,” naaure jetao Jesoso rai saseredotecuru curuaanaacuru, Moisesa aitoonjoan que cacha relaaureraauru, Jorioocuru bichauhenaauru, naaonjoainuri.

29-30 Nii jaun jetaote, acaauru rai: “Canuhetonaine inara caje bajareeunni. Cha Joaan letoaelu, cachaauru cojunacatiha uhane coina. Cana Coaunera letoaenihanena cachaauruhacha letoanojoneein uhalu. Catoonraain carai beeichenena, canuhetonai canu cocoainain canu letoaera bereeunni inara rai,” naain jetao acaauru tonorae Jesoso.

31 Nii jaun jetaote, ecu nejesinajeein ita rai jetao: “ ‘Cana Coaunera letoanojoneeinte uhelu,’ naacachenete: ‘Chanuna jana nere tonoraain esenetaeneeichelu,’ nareein.

32 Coatihachu: ‘Cachaauru letoanojoneeinte uhelu,’ nanaa nainihaacache,” naaure jetao ita rai. Satiin cachaauru Cana Coaunera letoanojoneein uhalu Joane esenetaauruhalune jaun, cachaauru coasiha.

33 Niritiin jetaote:

“Chachaainti Joaan letoaain nelu. Coatih coitucuhacaanu,” naauruha Jesoso raine jaun jetaote:

“Aihane jaaunchujian canuhetonai, caa catohanai ichacaaunne coina canu cocoainain canu letoaera berinaaunni inara rai,” nae jetao acaauru rai Jesoso.

## 12

*Ocoana jaaurera necha ansaineein ichaonacaauru que  
cuaain cachaauru relaa Jesusone*

*(Mt 21.33-46; Lc 20.9-19)*

<sup>1</sup> Niritohane baiha jetaote, ocoana jaaurera que cuaain cachaauru relaa in jetao: “Leinjiin cacha jetaote, ocoana jaain jitariin corihateein bino jaauruhane jaanu coloherinu que loreri jaain, leinjiin jataain ucuuneein teein rori jae ecu neein amihanenacaauru beraihane coina. Nitohaneein caohachaaain rucuhecane baiha jetaote, nii ocoana que amihanenacaauru rai atane teein ratiriin amuhe nii atane erora. Inae tainaca que turuhane bana ita rai lerruuruhane coina.

<sup>2</sup> Nitohaneein teein ratiriin jetaote, inae tainaca que tihane jaun, leinjiin rai cacha letoae, nii amihanenacaauru caje que banihateein niicha taihuri bajaa cuhane coina.

<sup>3</sup> Nejetaote, nii cacha mucuhin faojaain sooruhane baiha, nii cacha letoaaure cha colane nii temule erora rene.

<sup>4</sup> Nii jaun jetaote, nacoaauneein leeocho cacha letoaa nii temule erorane jana, nocoejechanuhin, couturi cunaitaain cha colane acaentonai letoaaure jelaiha.

<sup>5</sup> Nii jana nacoaauneein leeocho cacha letoaaane jana jetaote, acaentonai sohin jaaore nii temule beraichacuru. Nii baiha nacoaauneein arajiin rai cachaauru letoajeein sacuha nii temule erorane jana jetaote, tabaauru sohin jaonajaain, tabaauru faojaain cunaitanajaare.

<sup>6</sup> Satononejeein jetaote leinjiin jataain niicha belaa rai calaohi neeorihane jana, aca letoae: ‘Jerihane canu calaohi quete laen suujua acatecurureein,’ naain coaaucane jaun, sohin jaaoruhane esenetaelanaala.

<sup>7</sup> Nejetaote, ita rai jetao: ‘Inae uha caa atane erora calaohi. Coanete sohin jaohacachete, cana raineen nedaaane caa atane,’ naaure jetao nii ocoana que amihanenacaauru cachaauru, uha nii atane erora calaohine jana coarajeein.

<sup>8</sup> Niritocuruhane jaun jetaote, inae acaauru rene turuhane jana mucuhin ateinaain nii ocoana udaa amaain jaberoco jaaore,” naain jetaote:

<sup>9</sup> “Tonaquiche jana inara, nii calaohi sohin jaaoruhane que, tohanrihacha jana nii ocoana erora. Raajenihane cuhinacha nii ocoana que amihanenacaauru sohin jaohin, leeochoauru cachaauru bijiu nii ocoana teriha beraihuruhane coina.

<sup>10</sup> Tana Cana Coanera Quiricha inoansi cuhane:

‘Ajeri jaolecooruha  
loreri icharaaurune jaante,

jauriaanejeein

loreri nunuheneein ne.

<sup>11</sup> Acate

jataain cana rai  
 cojoelanaacojoaain ichae  
 Cana Coaunera,  
 naain laenanohinihane jaan reretaain aonaquiche chariji ba-  
 nane,” naain jetao ocoana icharaauru que cuaain cachaauru  
 rai ereerejeein acaauru relae Jesuso.

<sup>12</sup> Niritiin acaauru que cuaain relanajaa Jesusone que  
 nainacuruhane jaun jetaote, Jesuso mucunaa jerecure Moi-  
 sesa aitoonjoan que cacha relaaaureraauru, saseredotecuru  
 curuaanaacuru, naaonjoainuri. Nejetaote, Jesuso aina  
 neeuruha arajiin cachaaurune jaun cachaauru coasiha ecu  
 ratiriin jelai caje amuure.

*Impoestonu que coriqui teeuruhane que iriha Jesusone  
 (Mt 22.15-22; Lc 20.20-26)*

<sup>13</sup> Nitohaneein ecu ratiriin jelai caje amuuruhane baiha je-  
 taote, Erodesi ere tonoraeraauru, fariseeocuru, naaonjoain-  
 uri letoaaure, rai ereeuruhane jana tonaain acaauru tonoraa  
 Jesusone nechu jataain coulurujueeuruhane jaanu lera ariha  
 cuuruhane coina.

<sup>14</sup> Acaauru jetaote rene turuhin jetao: “Ii que tonaain  
 iriha cachane niha natiin, tonoraelanaala esinae rauhijiriin  
 ereein neeine coitucuhacaanu. Chaen techu nohanelanaala  
 esinae rauhijiriin jeriha Cana Coaunerane rijijieein ichaoha  
 cachane coina cacha relai. Aihane jaun, caohachaana Ro-  
 manocuru curuaanaa rai *impoestonu* que coriqui tihaca-  
 nune. Ainihane chatohaneriha. Coretena nainichaanuna.  
 Ainihanena niriiriha,” naaure jetao Jesuso rai fariseeocuru  
 aina Erodesi ere tonoraeraauru.

<sup>15</sup> Nejetaote, nechu jataain cairichaa aitocuruhane que  
 nainaane jaun jetao:

“Chanua cacairichanaa coacuhin niritiin carai ereeiche,  
 Carai cajiha nii coriqui uhaauchene coarae,” naa acaauru rai  
 Jesusone jaun,

<sup>16</sup> rai coriqui teeuruhane jana jetaote: “Chaa curuaa caa  
 laenanohineein ne rai cojunaca aina,” naa acaauru rai Je-  
 sosone jaun jetao: “Romanocuru curuaanaa enferadoro cu-  
 ruua,” naaure jetao rai.

<sup>17</sup> Nii jaun jetaote acaauru rai: “Aihana jaun chujian enfer-  
 adoro que banijiaain nena teeuche enferadoro rai. Chaen  
 Cana Coaunera que banijiaain nena teeuche Cana Coaunera  
 rai,” naain acaauru tonoraa Jesusone jaun jetaote, ecu jataain  
 cojoelatiin aonajeeure.

*Ohane baiha oo caje ichanaa cachane bajaauruha sa-  
 doseecurune  
 (Mt 22.23-33; Lc 20.27-40)*

18 Nii jana jetaote, Jesoso coaraa uure sadoseeocuru, oo caje ichanaa cacha suujuene esenetaaurenihane jaun caje bajaauruhane coina. Acaauru jetaote rene turuhin jetao:

19 “Cacha relaera, Moisesate canacaanu rai laenaain ratirilu, oha leinjiin cacha nesirihateein nii comasai aina canaanai sirilanaalane, nii onaa comasai autana raa nii onaa nejerane, nii onaa aina siricha rijijieein canaanai sirihane coina.

20 Nitohanihane janate, ita nejera nejesinaneein neeuruha caaunsineein cachaaurune jana, jauriaanejeein acaauru nejera nesirihateein, nii nesirihatenajan aina calaojoilanaala ohe.

21 Nii jaunte, nii autana rae nii onaa nejera. Nete acaentonai ohe aina calaojoilanaala. Jerichanejeein techu ohe nii acaauru nichataja.

22 Nii jaaunte, nii chunocohacuru nii caaunsini ita nejeraauru calaojoilanaala oore. Nii janate tabiicha nii ene netonai ohe.

23 Aihane jaun ooruhane baiha nacoaauneein ichanaa acaauru suujuene bana, chariji comasainein jana nereein nii ene, caaunsini ita nejeraauru aina nesirihateein nihalune jaun,” naain jetao Jesoso caje bajaasure sadoseeocuru.

24 Nii jaun jetaote:

“Nechu jataain joaaenreeinte ereereequiche inara, Cana Coaunera Quiricha ereretaain aonaain niicha ichanenu coitucueeneichene jaun.

25 Ohane baiha jerichanejeein jaberoconein nenea rijijieein ichanaain niha quichauru, enecuru, naaonjoainuri suujuene, inae nesirihatenaa nainecuruhi, dedeeu nenea anjeraauru rijijieein inae neeuruhane jaun.

26 Tana ohane baiha jerichanejeein jaberoconein nenea rijijieein ichanaa cacha suujuene que aitoha nuna laa-joiri moconaau neein Moisesane jaa quiricha reretaain aon- aquiche inarane. Ecu jetaote Moisesa rai: ‘Canune Abaraaun, Isaca, Jacobo, naaonjoainuri Coaunera neeun,’ nae jetao Cana Coaunera.

27 Coatiha ohin nitajenacaauru coaunera nihei Cana Coaunera- ohin nii baiha jerichanejeein jaberoconein nenea rijijieein nenacaauru cachaauru coaunera Cana Coaunera. Nitohanihane jaunte, jataain joaereein nii cha coitucuelanaala ereereequiche inara,” naain jetao sadoseeocuru tonorae Jesoso.

*Caná Coaunera aitoonjoan- jataain cacha ichao rai nelateein nenea*  
(Mt 22.34-40)

28 Niritiin esinae rauhijiriin sadoseeocuru tonoraa Jesusone jana aonajihane jaun jetaote, Jesuso rohan nichuuntaain jetao:

“Chariji jataain jauriaanejeein Cana Coaunera aitoonjoaneein cacha ichao rai nelateineein ne,” nae jetao, rai Moisesa aitoonjoan que cacha relaera.

29 Nii jaun jetaote:

“Jauriaanejeein cana ichao rai nelateein nena Cana Coaunera aitoonjoante: ‘Aonacuche Israeli cocoaichacuru. Cana curuaanaa Cana Coaunerate, leinjiin acaacha itolere curuaanaa neein ne.

30 Aihane jaun, ii suujua, ii suujue, ii coichana, naaonjoainuri aina curataain cana curuaanaa Cana Coaunera belaihu.

31 Chaen ichaajenhane ijiabereeo belaaain coaraaine rijijieein chamute cacha belaaain coaraau,’ nae. Nihei caa baiha jataain cacha ichao rai nelateein nei Cana Coaunera aitoonjoan,” nae jetao Moisesa aitoonjoan que cacha relaera rai Jesuso.

32 Nii jaun jetaote:

“Esinae rauhijiriinte chuhisi aitohicha cacha relaera. Leinjiinte chuhisi ne Cana Coaunera. Nihei nii baiha acaneein nei.

33 Cana suujua, cana suujue, cana coichana, naaonjoain aina curitaaain Cana Coaunera belaaain, cana jaberoco belaihaane rijijieein cana amute cacha belaaain, naaonjoanacanete chuhisi, itolere inihocuru, itolere jujuaihuru, naaonjoainuri mocohaca rori ichoae teenne amurijiriin jataain nelateine,” nae jetao Jesuso rai Moisesa aitoonjoan que cacha relaera.

34 Niritiin esinae rauhijiriin tonoraa nii Moisesa aitoonjoan que cacha relaerane coitucuhane jaun jetaote:

“Coatiha icharaain niheei Cana Coaunera Cojoanonaa que neeine coina,” naa Jesusone jaun jetaote, inae nii tonaai caje chatohanai bajanaa coitucue.

*“Chatohanai caje nefoeratenaa ne Mesihasi” naain bajaa Jesusone*

*(Mt 22.41-46; Lc 20.41-44)*

35 Nii baiha Teenforo asaae neein cachaauru relaane jaun jetaote:

“Chanuna Rabiri caje nefoeratenaa niha Mesihazine que aitocure Moisesa aitoonjoan que cacha relaaaureraauru.

36 Cana Coaunera Suujue aitoroatenojieein:

‘“Cau carautono nichajai que nelauriaau carohan,

ichei nejeratenacaauru amuritoherateein,

itiha asaae tenajaanune reen tiaajeein,”

naa Cana Coaunera cana curuaanaa rai,’ naa Rabiri inatiin.

<sup>37</sup> Aihane jaun, inasiina Rabiri nefoerate caje nenaanere Mesihasi, Cana Curuaanaa neein curuaatiha Rabiri netonai inatiin,” naa cachaauru rai Jesoso jana jetaote, rautatiin Jesoso aonajeeure nii ecu arajiin nenacaauru cachaauru.

*Moisesa aitoonjoan que cacha relaaureraauru ichao biha Jesosone*

(Mt 23.1-36; Lc 11.37-54; 20.45-47)

<sup>38</sup> Nitohaneein cachaauru relaane aina cuaain jetaote:

“Caohachaaain nocohalajiin ichaaoche, Moisesa aitoonjoan que cacha relaaureraauru que. Cacha relaauruhane jaa co-cajione jiaainte, bero cuhaneuru acaauru que suujua acate-curuhane coarateein neuruha cachaaurune jereinchuru amuure.

<sup>39</sup> Chaente netaojiaain Cana Coanera rai rauhi que ereereecuruhane jaan coloheri sinacoca asaae enooruhane jataain nelateein nena rijijieein rori caohacha ichoae nelauriana rautatiin, beseta ichaaain lenonecuruhane jaun niha natiin rori caohachaaauru ichoae nelauriana rautatiin aihure.

<sup>40</sup> Chaentechu, autanaauru caje acaauru loreri niha natiin ruluure. Nitohaneeinte necha aansaineein ichaaoruhane que nainacuruha cachaaurune coataa sonafaajianaaichuru Cana Coanera bajaee bajajeein ichaaore. Acaaurute leeochoauru amuritoheriin caseteco coaraa cuurureein,” naain jetao cachaauru relae Jesoso.

*Nichaonajaanu que niicha sirii coriqui tiha Cana Coanera belaiha leinjiin autana cairicheine*

(Lc 21.1-4)

<sup>41</sup> Nii jana jetaote, coriqui teeuruhane jaan curu cuhane coriqui teeuruha cachaaurune jana coarajiha lauhequiin Jesosone jana jetao, jataain araainanaain coriqui teure coriquihonacaauru.

<sup>42</sup> Nii jana jetaote, turuhin jataain coroatajajeei coreein nena coriqui tiha cue, nii teeuruhane jaa curu cuhane ita que jerajeein, leinjiin autana jataain cairichei.

<sup>43</sup> Nii coarajeein jetaote, aina nerelanacaauru cotijiaain jetao:

“Esinae rauhijiriin satiin caa curu cuhane coriqui teeurera amurijiriinte coriqui te caa leinjiin autana cairichei.

<sup>44</sup> Jana satiin caa coriquihonacaaurute, acaauru rai cautena coriqui caa teure. Nete laen caa ene jataain cairicheinijian natiin, acaihanijin nichaonajaanu que niicha sirii te jitariin,” nae jetao acaauru rai Jesoso.

## 13

*Itajenojoinerichaaain Teenforone biha Jesosone*

(Mt 24.1-2; Lc 21.5-6)

<sup>1</sup> Inae nii Teenforo caje mituha cuha Jesusone jana jetaote rai jetao:

“Cacha relaera, jataain caohatiin ajeri caje ichanohiniha caa Teenforone coaraaina,” naa rai aina nerelanacaauru caje leinjiine jaun jetaote:

<sup>2</sup> “Jataainte niqui caohatiin tasiojoaain ichanohineein coaraai. Nete inae turuha cojoanonaane bana, nii leinjiinijin nenereein caa ajeri ita ichoae teein ichanohineein inaraacha coarajei, satiin itajenojoiniha curichaaine jaun,” naain jetao aina nerelanaa tonorae Jesoso.

*Nacoaauneein tururichaaain Cana Coaunera Cojoanonaane  
(Mt 24.3-28; Lc 21.7-24; 17.22-24)*

<sup>3</sup> Nii baiha jetaote, nii Teenforo coarajein rohan nenea Olibo bichataneu cue jetao aina nerelanacaauru aina Jesoso. Inae ecu turuuruhane jaun nelauriariin lauhecoba Jesusone jana jetaote:

<sup>4</sup> “Chatohanai janonaa banana nunuhereein nitohanai. Chatohanaina jana, inae jataain cataainjian nitohanaine jana coarareein,” naain caje bajaauruha jelai teteriin, Fedoro, Saantiaao, Joaan, Aanderesi, naaonjoainurine jaun jetaote:

<sup>5</sup> “Inara coritaain niha chunine coataa caohachaaain nainaan neeuche.

<sup>6</sup> Arajiichurute canuniha nocoetiinchuru turuhin: ‘Canune Curisito neeunra,’ naa uuruhane, arajii cachaauru nii acaauru coritaauruhane esenetaa cuurureein.

<sup>7</sup> Jiaonriha: ‘Ecuuru ecuurute ne sonaana,’ naain coitucuhichene nesooneein casiichene. Nitohaneente nunuheca cureein. Nete caa caitoonjoan cojoanonaa satono que turuhane jaun ainenereein.

<sup>8</sup> Laurihu laurihu nenacaauru cachaaurute, leeochoauru aina nejerateein, ita que nererojoecaain niha cuurureein. Jana leeocho atane que ichaonacaaurute, leeocho atane que ichaonacaauru aina sonaana que niha cuurureein. Chaentechu araai lauriin aihane jaaunru, jataain mijiaaainein niha cureein carora tabai. Nii janate, niha cureein mijitena. Niite aasaaeriin necairichanaa nunuheniha cureein.

<sup>9</sup> Aihane jaun caohachaaain nainaan neeuche. Canu corenihate, cocoainanacaihuru, reychuru, naaonjoainuri bijiu inara teeuruhane janate, sinacocacuru asaecuru teein inara bisiha cuurureein. Nitohanein inara teeuruhane banate, esinae rauhijiriin canunein nihanune biha curiquicheein acaauru rai.



10 Jaiti nitohanein satono que turuenihane ajinihate, satiin cachaauru chauratane sacutaain lauri lauri nenacaauru rai caa caitonjoan nosa caje nichoteeururichaaaine beebejiha curiquicheein.

11 Aihane jaun, cocoinanacaihuru rene inara amaauruhane, jiaonriha acaauru rai ereeichene jaaque tonajein cuichene. Inae ecu ereeichene coina turuhichene coatiha inara aitorihēeicheein. Cana Coaunera aitoroatenojoin Cana Coaunera Suujue letononeeinte aitoriquicheein.

12 Rai nejeraauruhachate nejeraauru colurujihacuurureein atēinanohineeuruhane coina. Jana rai calaohichuruhachate colurijihacuurureein acaauru inacaauru. Nii janate rai inaca colurujeeuruha acaauru calaohichurune jana, acaauru atēinaacuurureein.

13 Canu cachanein neeichene corenihate inara cotaairiin inara coaraacuurureein satiin caa chauratane sacuritaain nenacaauru cachaauru. Nete nitohaniha sainejeein satono que tiaain caitoonjoan tonoraain neite ichoteratenojoinihacureein.

14 Aihane jaun caa reretaain aonaain tonoraache. Inae nii Teenforo asaajelai teein Cana Coaunera que banijiaain *altar* ichoae ecooca Cana Coaunera que nejeratenaa casicheine coaraquichene, ichtane jana cuhin sorooruhine Jodea ichaonacaauru.

15 Ecuun rai loreri satono coarana ichoae niha chunine jana niha nitohanaine, jiaonriha rucuhēle niha natiin roconaa coaucane. Rauhijiriincha fauhi amuhine.

16 Jana ocoana jana nihane jana aihane, jiaonriha jelaiha nejenohin cajione ranaa coaucane.

17 Jataainte cairichaojoaurureein nii cojoanonaa que inae turuhane bana ausirineein nenacaauru enecuru, sisiha-jeein canaanai sirichauru, naaonjoainuri.

18 Nabana elohēna bana niha nitohanaine coataa Cana Coaunera bajaache inara.

19 Cana rai chauratane coaunaain nihalu Cana Coaunerane baiha, nitohanai necairichanaa coaraa chariji banane que airijiinte, jataain niha cureein necairichanaa cojoanonaa.

20 Nii necairichanaa cojoanonaa sarotiaeniha Cana Coaunerane, nerihei chuni nichotei nii caje. Nete rai cachanein janijiin niicha ranojoinunri jataain belaihanē jaun, nabana nitajeeuruhane coataa nii cojoanonaa sarotiareein.

21 Aihane jaun chunocoha inara rai: 'Caute ne Mesihasi. Ecute ne,' naa inara rene turuhinne, jiaonriha esenetaichene.

<sup>22</sup> Mesihasi niha nocoetiinchurute *profetane* lanaala nenaacaurune maajeichuru, inara coritaa cojoelanaacojoai ichaa cuurureein. Janijiin Cana Coaunera ranojoinuru niha natiinte coritaurureein.

<sup>23</sup> Aihane jaun, caohachaaain necohalajiin itolereenein neeichene coinane caraajenhane inara rai aitoon, que nainaaain neeichene coina,” nae jetao aina nerelanacaauru rai Jesoso.

*Nacooaunein tururichaaain cache caje nejanoanaa Curisitone*

*(Mt 24.29-35, 42-44; Lc 21.25-36)*

<sup>24</sup> Niritiin jetaote: “Nitohanein inae niha necairichanaa cojoanonaane baihate, nocoena niha enotone jana, atene netonai conoenereein.

<sup>25</sup> Nii janate, dede cajene maajeichuru naluhacooa arasijieeurune jana, nesoone caaun rijijijianiha cuurureein dedeeu nenacaauru netonai.

<sup>26</sup> Nitohanihane janate, itolere ichana nainihane coaraatein nelate que nelateein dede sacari jana fauha uhanu canu Cana Coaunera Calaohi cache caje nejanoanaa nichaaunne jana coariquicheein.

<sup>27</sup> Acate rai anjeraauru letoareein, nii janijiin niicha raauri, rai cachaauru taojiaain raauruha satiin caa chauratane tinonoritiin nuurihuru cajeeurune maajein, dede uurihuru cajeeurune maajeichurune coina.

<sup>28</sup> Caohachaaain nainacuche, caa uhera que cuaain inara relaanune que. Inae satiin naluha nune alone baiha nacoaaunein nalojoaa uherane coaraquichenete, caje inae nichuuntaa ajaanaane coitucuhiche.

<sup>29</sup> Nii rijijieein nainacuche caa caitoonjoan rijijieein aihane coaraquichene, canu Cana Coaunera Calaohi cache caje nejanoanaa nichaaune inae nichuuntaa turuhanune que.

<sup>30</sup> Esinae rauhijiriine aitoon, jaiti ooreniha ena caa satiin canu aina nenacaurune janate,

<sup>31</sup> nitajereein caa chauratane aina dede. Nete lae caa aito-coaaunne jaa quere, caa aitocooaunne rijijieein que tihane reeintiaain nereein.

<sup>32</sup> Nete laen: ‘Naaonjoain cojoanonaa banate ecu tiaain aicheein,’ nene naain nii chuni coitucuera. Niheichu dedeeu nenacaauru anjeraauru niha natiin coitucuuuhi. Niheichu canu niha natiin coitucuhaaun, leinjiin Ofaachate coitucuu-jue.

<sup>33</sup> Niique tihaneree tiaain caohachaaain nainaaain Cana Coaunera bajajein neeuche. Coatiha coitucueraai nii airichaaaine jaa cojoanonaa.

<sup>34</sup> Acate coriaji ataneu cunaa jeriha leinjiin cachane, rai cachaauru que loreri beraichateein, le cache cachaauru rai

amihanenaa teein, nii loreri beraicha que beraichatenajaain ratirinajaain amuhane rijijie.

<sup>35-36</sup> Aihane jaun, caohachaaain nainaaain turuhane coha-  
jeein neeuche inara. Coatiha coitucueraai turuha nii loreri  
erorane, sona naluque, dede cataaun, ataohari irihanau,  
janone, naaonjoaainijin, turuhane jana letona jatoroaain  
neneeichene coataa.

<sup>37</sup> Caa inara rai aitocoaaunne rijitjoeine leeochoaauru rai  
netonai aitoon, caohachaaain nainaaain cohaquichene coina,"  
nae jetao, Fedoro, Saantiaao, Joaan, Aanderesi, naaonjoain-  
uri rai Jesoso.

## 14

*Jesoso mucuuruhane coina ita taojiaauruhane*  
(Mt 26.1-5; Lc 22.1-2; Jn 11.45-53)

<sup>1</sup> Coroata janohin lanajeeca jorerera colane ichanohin faan  
quihuruhane jaan beseta fasocoane jana jetaote, chunocoha  
que coritaerateein, Jesoso mucuhin ateinaauruhane jaan  
lera arihure saseredotecuru curuaanaacuru aina Moisesa  
aitoonjoan que cache relaaaureraauru.

<sup>2</sup> Nii jana tabaauru jetaote:

"Nainihe nitohanai ichacaache beseta nunuhe banane.  
Nabana cana que nejerateeuruha ecu aina nenacaauru  
cachaaurune coataa," naaure jetao ecu ita rai.

*Alabastro caje ichanohi que curuhin nenea jujuai choroa*  
*leinjiin ene Jesoso ichooaene*  
(Mt 26.6-13; Jn 12.1-8)

<sup>3</sup> Betaniau cosibi ruhecaeraneein niicha curuaateeu-  
ri Simoon loreri asaee turuhin, ecu nelauriana najaan rori  
choae lauhecoba Jesusone jana jetaote, *alabastro* caje  
ichanohi que curuhin- ujuane nejesina caje ichanohi jataain  
coretiin nenea jujuai nardo amaaain turuha cue leinjiin ene.  
Nitohaneein turuhin jetaote nii jujuai curu raiheitiin Jesoso  
couturi choae chorohe.

<sup>4</sup> Nii jana ecu neein coarajeeurera tabaauru jetaote oba-  
jeein jetao:

<sup>5</sup> "Chanuna que cairichaaihuru coroatajanena richaae,  
nichata fashai denario core jeeoni amurijiriin nii jataain  
coretiin nenea jujuai nardo que necoretelanaala joaereen nii  
jujuaaain ichanohi jaohiche," naain jetao nii ene que ereein  
nocoeje chanuure. Nii le denario jetaote le jiichoo amihanea-  
naa core ne.

<sup>6</sup> Nii jana jetaote acaauru rai:

"Coa nocoeje chanuhin, coa rohecaache. Jataain cao-  
hachate ichae catohaneein canu teein.

<sup>7</sup> Itolere banate inara aina neeurureein cairicheihuru. Nii jaunte, acaauru coroatajanena jeriquichene jaan que, acaauru coroatajanena naineriquicheein. Jana canu, itolere cojoanona bana inara aina neriaauni.

<sup>8</sup> Caa enete niicha ichana nainei ichae, cajabereeo jujuaauruhane jaanu que niicha rucujui nihane jaun.

<sup>9</sup> Esinae rauhijiriine aitoon. Chunijihuunru chauratane sacuritaain nosa caje nichoteeuru richaaine coina caitoonjoan canu ere beebejeeuruhane jaaunrute, caa catohaneein canu jaberoco jujuaa caa enene jaan coaauca cuurureein. Nitohaneeinte coaauojoi niha cureein,” nae jetao acaauru rai Jesoso.

*Jesoso coulurujih Jodasine*  
(Mt 26.14-16; Lc 22.3-6)

<sup>10</sup> Nii Jesoso aina nerelanacaauru lechoonca coroataja Jodasi Isacariote jetaote, saseredotecuru curuaanaacuru coaraa cue, acaauru aina ereein, Jesoso rene amanajaane coina.

<sup>11</sup> Nitohaneein acaauru rene turuhin amanajaane coina acaauru rai aitoha Jodasine jaun jetaote, jataain coroaajeein rai coriqui tenaa jerecuruhane jaun, jelai nedaaoriha Jesosone que coacue, rene amanajaane coina Jodasi.

*Aina nerelanacaauru aina janotiin lenoniha Jesusone*  
(Mt 26.17-29; Lc 22.7-23; Jn 13.21-30; 1Co 11.23-26)

<sup>12</sup> Jorerera colane ichanohin faan quiin, Cana Coaunera rai carenero narejeen sooruhane jaan fasocoa beseta cojoanona nunuhe bana jetaote:

“Chu fasocoa cojoanotiin que lenonichaachene jaanu que lenone jaa cuhacaanune jeree,” naain jetao Jesoso caje bajaure aina nerelanacaauru.

<sup>13</sup> Niritocuruha raine jaun jetaote, coroatajai aina nerelanacaauru letoain jetao:

“Chajaain taa neseu cunichuche. Inae ecu turuhichene jana, baichaje cuhane acau baaibaaichain cuujuiha leinjiin cachane jana eruhichene sacuuche.

<sup>14</sup> Chaen inae loreri asaee enohane, nii loreri erora rai: ‘Cacha relaerate ii caje bajaerate, Chariji ucuha cuhane canu aina nerelanacaauru aina lenonerichaanuhin fasocoa cojoanotiin que, naain bajaerate,’ naaiche rainete,

<sup>15</sup> aca inara que ecuunetiin coaranai loreri asaee, caohatiin rucuhenojineein nena ucuha seejoan coaratereein. Chaen inae inara que coaratiha nii loreri erorane, ecu teein janotiin cana lenonenu enoalaauche,” naain jetao, nii aina nerelanacaauru suujuatein letoanajae Jesoso.

16 Nii jaun jetaote, nii neseu cuhin acaauru rai aitoha Jesusone rijijieein leinjiin cacha eruha cuure nii coroatajai aina nerelanacaauru. Nii jana jetao acaauru que leinjiin ucuha coaratihia nii cachane jaun, ecu teein fasocoa cojoanotiin que lenonecuruhane coina lenone jaaure.

17 Inae nocohejihane jana jetaote ecu leeochoaauru aina nerelanacaauru aina turuha cue Jesuso.

18 Nitohaneein lenonecuruhane jaaun neein jetaote:

“Esinae rauhijiriin ena cau caniha inara jiniichaain lenonihia nenaate, canu que nesuujueein cacoluruheca cureein,” naa acaauru rai Jesusone jaun jetaote,

19 jataain inaderaain:

“Canuna ii coulurujuerichaaunte,” naain caje bajaure le cacha cachaauru.

20 Nii jaun jetaote:

“Ena, cau canu aina lechoonca coroatajai nequichene caje nena, canu jiniichaain canu ojoachu cuhane faan setejiaain quichate acane.

21 Cana Coaunera Quiricha inoensi cuhane aitohane rijijieein itolereenein aihanete ne. Nete jataain cairichaaajoareein nii caque nesuujueein cacoluruhera. Jataainte caohacharelu, nejanoaenihalu nii cachane,” nae jetao acaauru rai Jesuso.

22 Nitohaneein lenonecuruhane ucuaetoha jetaote, faan mucuuriin Cana Coaunera bajaain, cataaun tacaain taturiin acaauru rai teein jetao:

“Nocoa caa quihuiche. Caate cajabereeneein nena ne,” naain jetao acaauru rai te Jesuso.

23 Nii baiha, acaauru coconeein nena bino curu mucuuriin, Cana Coaunera bajaain acaauru rai tihane jana jetaote, satiin ita rai leruune leruunein cooruhane baiha jetao:

24 “Caa canaacha coite canu coichana ne. Acate arajii cachaauru osa coreniha nijiaonrichaainne coina Cana Coauneraacha icharatei ichacaunne jerichaaunne jaan cojunacaneein nena ne.

25 Esinae rauhijiriin nacoaauneein caa baiha bino corihaaunni, Cana Coaunera Cojoanona necaohacha que neein ecu nena bino cohanune reentiaain,” nae jetao aina nerelanacaauru rai Jesuso.

*Coitucuha nocoetelanaala nesuujerichaaain Fedorone biha Jesusone*

(Mt 26.30-35; Lc 22.31-34; Jn 13.36-38)

26 Nitohaneein jetaote, salmo que nenateein Cana Coaunera coroaecuruhane baiha jetao aina nerelanacaauru aina jiniiquiin Olibo bichataneu cue Jesuso.

27 Inae ecu turuhin jetaote:

“Enene cojoanotiin cuhanete, satiin canu esenetaaichene jianeein ita caje rianeriquicheein. Nitohaneeichene cinate: ‘Carenerocuru beraicha sooruhane janate, cajiha-neein riaaniha cuurureein carenerocuru,’ naain laenanohi-neein ne Cana Coaunera Quiricha inoansi cuhane.

28 Nena inae ichanacaaunne, jaiti Calileea turusiquichene ajiniha, canu inara ichooaichaniha ecu niha cureeunni,” naa acaauru rai Jesusone jana jetaote:

29 “Satiin ii esenetaauruhane jianecuruhane nihanatiin coatihalaen airinaaunni canu,” naa Fedorone jana jetaote:

30 “Esinae rauhijiriin enene cojoanotiin cuhanete, jaiti coroata saain ereniha ataoharine jana, canu coitucuha nocoetelanaala nichata saain nesujia curiquiin,” naa Fedoro rai Jesusone jana jetaote:

31 “Ii aina jiniiquiin ateinanohi nihanune caina aitocuruhane nihanatiin, coatihalaen nii ichoitucuha nocoetelanaala nesuujuerihaaunni,” naa Jesoso rai Fedorone jana jetaote leeochoauru netonai jerichanetojoein aitocure.

*Jetesemanii Cana Coaunera bajaa Jesusone  
(Mt 26.36-46; Lc 22.39-46)*

32 Nii baiha jetaote, Jetesemaniineein niicha curuaatehuri cuhin, inae ecu turuuruhane jana jetao:

“Cau nelauriaain canu cohacuchene, inara tonohanau Cana Coaunera bajani,” nae jetao aina nerelanacaaauru rai Jesoso.

33 Niritiin jetaote, Fedoro, Saantiaao, Joaan, naaonjoainuri amaain cuhin jetao, jataain inaderaain nererojoeae Jesoso.

34 Nitohaneein nererojoeaain jetaote: “Jataain onaana-jaanu rijitocojoaainte inaderae casuujua. Cau nedaauche inara. Jiaonriha siniichene. Nirijieein ichaaojoein canu cohacuche,” nae jetao acaauru rai Jesoso.

35-36 Niritiin ratirinajaain acaauru caje nita cutiin jetaote, notoroaain atane que nauri temetaain jetao: “Ofa, coatihalaen rai caaintajerihei caa necairichanaa tabai caje canu ichoteratena jereeine. Nena canu jerichaaunne rijijieein ichaaine jereneun, ii jereeine rijijieein ichaau,” naain jetao Cana Coaunera bajaa Jesoso.

37 Inae Cana Coaunera bajaane baiha, jelaiha acaauru coaraa cuhane jana jetaote, sinihuruhane jana erunajaa cue. Nii jaun jetaote: “Inaenachura siniite Simoon. Jataainachura aasaeriinijin sinirena abaantaain ichaaojoenaa naineneeite.

38 Nabana osa que nesaruquichene coataa sinirena abaan-tain ichaaojoein Cana Coaunera bajaauche. Jataainte niqiu

inara suujua cuhane ainaa jeriquiche. Nete jataain abaanta-sine inara jaberoco,” nae jetao Fedoro rai Jesoso.

<sup>39</sup> Niritiin jetaote, nacoaauneein jelaiha cuhin jerichaneto-joein Cana Coaunera bajaa cue.

<sup>40</sup> Inae Cana Coaunera bajaane baiha, acaauru coaraa cuhane jana jetaote jataain siniitooruhane jaun, sinihuruha aina nerelanacaaurune jana erunajaa cue Jesoso. Nii jaun jetaote, nii tonaain tonoraauruhane jaanu coitucuurene.

<sup>41</sup> Inae nichata saain jelaiha cuhane baiha nacoaauneein turuhin jetaote:

“Jaitinachura neloraain siniichete. Inae laen necha aansineein osaaonacaauru bijiu Cacha Calaohi nichaaune muhuhin teeuruhane rai nihane cojoinaca que tiha.

<sup>42</sup> Chajaain nimichucuchete amuhacache. Inae tajiha nichuutaa canu belaihane saijieein canu colurujuera,” nae jetao aina nerelanacaauru rai Jesoso.

*Jesoso mucuhin amaauruhane*

*(Mt 26.47-56; Lc 22.47-53; Jn 18.2-11)*

<sup>43</sup> Niritiin jaiti ereerejiha aina nerelanacaauru aina Jesosone jana jetaote, sabere, enuha, naaonjoainuri que biji achunequiin arajii cachaauru que corianeraain turuha cue nii Jesoso aina nerelanacaauru lechoonca coroatajaneein nenea Jodasi. Acaauru letoaauruha saseredotecuru curuaanaacuru aina Moisesa aitoonjoan que cacha relaaureaauru, Joriocuru bichauhenaauru, naaonjoainurine jaun.

<sup>44</sup> Nitohaneein que nesuujueein colurujueein jetaote: “Nii quiicha meri lioracaite acanereein. Chaen mucuhin caohatiin biji ichojoaain amaache,” naain jetao amanajae Jodasi.

<sup>45</sup> Niritiin acaauru amaain jetaote, inae rene turuhin rohan nichuutaain jetao:

“Cacha relaera,” naain jetao Jesoso meri lohite Jodasi.

<sup>46</sup> Nitohaneein jetaote, Jesoso mucuhin amaature.

<sup>47</sup> Nii jana jetaote, sabere mucuhaneecha neoriiin leinjiin saseredotecuru curuaanaa cacha uricho beuhite, ecu acaauru aina nenea cacha.

<sup>48</sup> Nii jana jetaote, nii mucuha cunacaauru cachaauru rai jetao: “Chanuna necha aansai asijiauto mucuera tochaneein enuha, sabere, naaonjoain uhaain canu mucuha uhiche.

<sup>49</sup> Itolere cojoanonaa banane inara jana Teenforo asaaeneein cachaauru relanajacoon. Nii jana chabana canu mucunajaaohieiche. Nete Quiricha inoaensi cuhane aitoha Cana Coaunerane nainaaichene cointate caa aaiche,” nae jetao nii mucuha cunacaauru cachaauru rai Jesoso.

<sup>50</sup> Nii jana jetaote, ecu jelai Jesoso ratiriin, satiin soroore aina nerelanacaauru.

<sup>51</sup> Nii jana leinjiin enamanaa jetaote, shojoera que shoheshohequiin caaijie cuujihane jana jetao, acaantonai mucuuruhane jaun,

<sup>52</sup> nii shojoera ratiriin machohequiin cha colane soroe.

*Jorioocuru bichauhenaauru- niha chatohanaine rucuhera-  
neein nenacaauru- Junta Suprema acatiha niha Jesosone*

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Nitohanein saseredotecuru curuaanaacuru curuaana rene Jesoso amauruhane jana jetaote, satiin ecu netaojiaaure saseredotecuru curuaanaacuru, Joriocuru bichauhenaauru, Moisesa aitoonjoan que cacha relaaureaauru, naonjoainuri.

<sup>54</sup> Nii jana jetaote, nita coarajein caaijie cuuje Fedoro, saseredotecuru curuaanaacuru curuaanaa loreri chajeniha tiaajein. Inae ecu turuhin jetaote, Teenforo beraaihurera aina nelauriaain usi que nichaatiha nedae.

<sup>55</sup> Nii jana jetaote, Jesoso sohin jaaoruhane jaanu lera arihure saseredotecuru curuaanaacuru, chaen satiin Joriocuru bichauhenaauru- *Junta Supremacuru*, naonjoainuri. Nejetaote, nii chatohanein teuruhane jaanu lera eruurene,

<sup>56</sup> nitohanein nohanein colurujueeuruha arajiin cachaaurune saijiein ita rijitjoein aitocurenihane jaun.

<sup>57</sup> Nii jana tabaauru jetaote, nimichuhin nechu jataain nohanein:

<sup>58</sup> “Canacaanu uricho quene aonacaun: ‘Caa cachaauruhacha ichai Teenforo itajeeinne, nichata janojoein cuhane leecha ichana naineun cachaauruhacha ichanohinelanaala,’ naane jana,” naain jetao colurujueeure.

<sup>59</sup> Nejetaote, ita rijitjoein cuaain colurujeeurenihane jaun esenetana nainecurene.

<sup>60</sup> Nii jana jetaote, satiin nii ecu nenacaauru cataaun nichaauraaain jetao: “Chatohanaina ichaate, toon toritiin icholuruhecuruhane jana tonoranajanein,” naain jetao Jesoso caje bajae saseredotecuru curuaanaacuru curaanaa.

<sup>61</sup> Nejetaote, tonoraelanaala inauheneecha aonaje Jesoso. Nii jaun jetaote, nacoaunein rai jetao:

“Iina itolere icharaanu que turuha uheni Cana Coanera Calaohi Mesihasi neei,” naain caje bajaa saseredotecuru curuaanaacuru curuaanaane jana jetaote:

<sup>62</sup> “Ejeen, acaneeunchujanrana. Inarate itolere ichana nainera neein nena Ofa raotono nichajai que lauhecohanune jana cacoarariquicheein. Chaen techu, inae ecu tihane bana dede caje, dede sacari jana uhin fauha uhanune jana canu coariquicheein,” nae jetao rai Jesoso.



63 Nii jaun jetaote, obaecane cojunacaneein cajione soaisoain jetao:

64 “Cha nenacaaeneeina coara lateriquiche. Inara uricho quete, inae Cana Coaunera Calaohiniha nocoetiin irihane aonaquiche. Tonaquiche jana nii que,” naa acaauru rai saseredotecuru curuaanaacuru curuaanaane jana jetaote, satiin ita suujua rijitoein nii coulurujeeuruhane ujuaai-honeein aca ohane coina aitocure.

65 Nii jana tabaauru jetaote, coluneeinchuru nota conajaain bisiin jetao: “Aihane caa ii bisicha coitucuhin beeu,” naauruhane jana jetao, Teenforo beraichacurune maajein nomeri faohacure.

*Jesoso coitucuha nocoeteniha Fedorone*

*(Mt 26.69-75; Lc 22.56-62; Jn 18.15-18, 25-29)*

66-67 Nii jana jetaote, loreri chajeniha usi que nichaatiha lauhecoha Fedorone coariin: “Ii netonaite Nasarete co-coaicha Jesoso aina amuhemuhena neei,” nae jetao Fedoro rene turuhin saseredotecuru curuaanaacuru curuaanaa coseenra.

68 Nii jana jetaote: “Coatiha nii carai aitoihine jaan cacha coitucuhaaun. Chaa que chaainti nii aitohi,” naain jetao neesuujue Fedoro. Niritiin jetaote, jelai caje amuhin acuujuaniha neeorihane jana, inae ere ataohari curuaanaa.

69 Nii jana jetaote, nacoaauneein Fedoro coaraain leeochoauru rai jetao:

“Caa netonaite, nere tonoraeraneein nenea ne,” nae jetao nii coseenra, leeochoauru rai.

70 Nejetaote nacoaauneein nesuujue. Nii baiha neoriin jetaote, nacoaauneein Fedoro rai jetao:

“Rauhijiriinte bajiaa acaauru caje nenea neei. Nii choae tacaain Calillea cocoaicha neei inatiin,” naaure jetao nii cuu nenacaaauru.

71 Nii jana jetaote: “Esinae rauhijiriin Cana Coaunerate coaraje, nii aitocoichene jaa cacha coitucuenihanune,”

72 naa Fedorone rijieeoritiin irihane coroata satiha atoharine jana jetaote: “Jaiti coroata saain ereniha atoharine ajinihate, cacoitucuha nocoetelanaala nichata saain nesuujueriquiin,” naalu rai Jesusone coacuhin jetao chanae Fedoro.

## 15

*Coberenadoro Filato acatiha niha Jesusone*

*(Mt 27.1-2, 11-14; Lc 23.1-5; Jn 18.28-38)*

1 Nii jana jetaote, jataain janohetiin netaojiaaure saseredotecuru curuaanaacuru aina Jorioocuru bichauhenaauru, Moisesa aitoonjoan que cacha relaaureraauru, chaen niha chatohanaine rucuhaneein nenacaauru- *Junta*

*Supremacuru*, naaonjoainuri. Nitohaneein jetaote, Jesoso biji ichojoaain amaaain Roma curuaanaacha letoai Jorionelanaala nenea- coberenadoro Filato rai tiha cuure.

<sup>2</sup> Inae nii Filato rene turuaauruhane jana jetaote:

“Tina Jorioocuru Curuaanaa *Rey* niha,” naa rai Filatone jana jetaote:

“Ejeen. Esinae rauhijiriin acanichaaunne quete aitohi,” nae jetao rai Jesoso.

<sup>3</sup> Nii jana saseredotecuru curuaanaacuru jetaote, jataain araai laurii itolere ichaain nihane que aitiin colurujeere.

<sup>4</sup> Nii jaun jetaote, nacoaauneein rai jetao:

“Aonaun, jataain araai laurii itolere ichaain neeine que aitiinte icholuruhecure. Chanuna jana tonaain acauru tonoraeneei,” nae jetao rai Filato.

<sup>5</sup> Nejetaote, tonoraeniha Jesusone jaun: “Chatohanihane jaunna caa catoonraene,” nae suujua cuhane Filato.

*Ateinanohi niha Jesusone coina rucuhecuruhane*  
(*Mt 27.15-31; Lc 23.13-25; Jn 18.38-19.16*)

<sup>6</sup> Nitohaneein beseta bana naineein niha chuni colurujuenojoine jetaote, jerecuruha nii cachaaaurune rijijieein jianenajaque Filato.

<sup>7</sup> Nii jana jetaote, caresero cuhane ne leinjiin cache Barabasineein niicha curuaateuri. Nii Barabaside leochaauru aina acauru curuaanaacuru que nejerateein sonajaain jaorera ne.

<sup>8</sup> Nii jana jetaote Filato rene turuhin, nii beseta bana naineein ichanajaaocane rijijieein ichaa Filatone coina caje bajaare cachaauru.

<sup>9</sup> Nii jaun jetaote, acauru rai jetao:

“Aihane jaunna, inara Jorionequichene Curuaanaa *Rey* jianichaaunne jeriquiche,” nae jetao acauru rai Filato,

<sup>10</sup> saseredotecuru curuaanaa amurijiriin coitucuhin cachaauru relaa Jesusone jaun, arajii cachaauru esenetaain sacuuruhane jaun que necoelai caaun mucuhin rai teeuruhane que nainaane jaun.

<sup>11</sup> Nejetaote, cachaauru suujuau tacaare saseredotecuru curuaanaacuru, Barabasi jianeratecuruhane coina.

<sup>12</sup> Nii jana jetaote, acauru rai jetao:

“Chatohanai jana ichacaaunne jeriquiche caa Jorioocuru curuaanaa *Rey*neein inaraacha curuaatei aina,” naain acauru caje bajaa Filatone jana jetaote:

<sup>13</sup> “Coroso que teeinene jerichaanura,” naauruha ehequinne jaun jetaote:

<sup>14</sup> “Chatohanai baasonajian ichae,” naa acauru rai Filatone jana jetaote, nacoaauneein ehequuin jetao:

“Coroso que teecheaaura,” naaure cachaauru.

<sup>15</sup> Nii jaun jetaote cachaauru aina caohachaaain nenea jerihane jaun Barabasi jianein, Jesoso bisichatihane baiha acaauru rai te Filato, coroso que teuruhane coina.

<sup>16</sup> Nii jana jetaote, nii cocoainanacai loreri chajeniha Jesoso amaain, sondaro nejesinanejeein ecu satiin netaojiaaure.

<sup>17</sup> Nitohanein netaojiaain jetaote, que cajione jichohajiojoaai lanajai curujuaain, oja caje ichanohin comai lauriaaure coturi que.

<sup>18</sup> Nii baiha jetaote:

“Acanein neeine Jorioocuru Curuaanaa *Rey*,” naaure jetao ehequiin nechu jataain cairichaa que nocoatijiaa.

<sup>19</sup> Niritiin jetaote, enuha que rai couturi faojaain coulunecuruhane baiha, nechu jataain que ninichajia nacatiha neseonriaaure soondarooru.

<sup>20</sup> Nitohanein jataain que ninichajeeuruhane baiha jetaote, nii cajione lanajai jichohajiojoai que niicha curuhacuri rocohin jetao, rai cajione esine curujuaain, jelai caje amaain coroso que tiha cuure.

### *Coroso que Jesoso teuruhane*

*(Mt 27.32-44; Lc 23.26-43; Jn 19.17-27)*

<sup>21</sup> Nii jana jetaote, ocoana caje caaujiha Alejaandoro, Rufo, naaonjoainuri inaca leinjiin cacha Sirene cocoaicha Simoonne jana coaraain jetao cotihacure, nii Jesoso teuruhane jaanu coroso amaane coina.

<sup>22</sup> Nitohanein jetaote, Golgotau Jesoso amaure. Golgota naane jetaote, “Niha couturi bejerona jaan,” naane aite.

<sup>23</sup> Inae ecu turuhin sacari mirra jujuaain nenea que jasiiteein bino que cocoanaa jerecuruhane jana jetaote conaa jerene Jesoso.

<sup>24</sup> Nitohanein cairichaaain jetaote coroso que teein, “Chariji raineincha nedareein,” naain que nocoatijiaain ecu nejesinajeein ita rai Jesoso cajione chaluure soondarooru.

<sup>25-26</sup> Janone nichae nuna macohi ichoae teejia enotone jana coroso que teein jetaote: Jorioocuru curuaana niha nocoetohane jaunte, “Jorioocuru curuaanaa *Rey* ne,” naain que aitiin, laenanohinein nenea tabara teeure coturiniha.

<sup>27</sup> Chaen jetaote ecu aina corotajai asijiautooru teure coroso que, leinjiin raotono nichajaique, leocha rai najaabiji nichajaique, naaonjoaain.

<sup>28</sup> Nitohanein jetaote: “Necha ansai asijiautoorunein nenea rijijieeinte nereein,” naain laenanohinein niha Cana Coaunera Quiricha inoansi cuhanene ninae.

<sup>29</sup> Nii jana jetaote, coturi rurujaain:

“Ichalaraa. Chajaain aihane Teenforo itajeein nichata janojoin cuhane nacoaauneein michunaa jereeine rijijieein

<sup>30</sup> ichaaajenhane ijiabereeo ichoterateein coroso caje faau,” naain jetao Jesoso nocoeje chanuure satiin ecu situnacaauru.

<sup>31</sup> Saseredotecuru curuaanaacuru, Moisesa aitoonjoan que cacha relaaureraauru, naaonjoainuri netonai jetaote:

“Leeochaauru ichoteratiha niqui, nete raajenhane jabe-roco ichoteratena nainene.

<sup>32</sup> Chajaain aihane caa coroso caje fauhine Mesihasi-Isaraelitaauru curuaanaa *Reyte* coaraain esenetaacache,” naain jetao que ninichaajeeure nii Moisesa aitoonjoan que cacha relaaureraauru. Nii ecu jiniichaain coroso que nenacaauru netonai jetaotechu Jesoso nocoejechanuure.

### *Oha Jesusone*

(*Mt 27.45-56; Lc 23.44-49; Jn 19.28-30*)

<sup>33</sup> Nii jana jetaote, enoto chujutora caje coaauneein nunuhetein nocohena ne satiin caa chauratane nuna macohi ichoae teejiha sonanereentiaain.

<sup>34</sup> Nii rijieeoritiin jetaote, jataain tonijiaain jetao:

“Eloi, eloi, lema sabactani,” naane jetao: “Cana Coaunera cacorataaneun, chanuna catohanein canu nainatejeei,” naa jetao aite Jesoso.

<sup>35</sup> Nii jana nii ecuneein aonajeeurera tabaauru jetaote:

“Aonacuche *profeta* inoaensi Eliasi cotihacate aite,” naaure jetao ita rai.

<sup>36</sup> Nii jaun jetaote, leinjiin acaauru caje nena cacha jetao, jeluhariin cuhin cajione que bino baaso elohanti sisiaain amaain jetao, Jesoso rai sijirichae jiarana nujuan macohi que tein cohane coina. “Coa rerohecaachete aihane coroso caje fauha uha Eliasine coaracaache,” naain.

<sup>37</sup> Nii jana jetaote, jataain tonijiaain auhaquiin inae ohe Jesoso.

<sup>38</sup> Nii jaun jetaote, ecui nichajai caje nunuhetein ecoai nichaae cuhin nesoaiheite nii Teenforo bujuatecuruhane jaan cajione.

<sup>39</sup> Nii jana, ecu neein coarajiha Roma rai soondarooru curuaanaane jana niritiin oha Jesusone jaun jetaote:

“Esinae rauhijiriinte, Cana Coaunera Calahinecaiha caa cachara,” naain jetao ecu coaraje.

<sup>40</sup> Chaen enecuru tabaauru jetaote, caje icharajeriin neein coarajeeuruhane jana, ecu acaauru aina ne Maadala bene Mariha, chaen Jose ocoala Saantiaao neba Mariha, chaen Salomee, naaonjoainuri.

<sup>41</sup> Nii ecu neein coarajeeurera enecuru jetaote, aina cuhin Calileea niha Jesusone bana coroatajaneranein nenacaauru

ne. Chaen jetaotechu, ecu neeure arajiin leeochoaauru cachaauru, Jerosaleeun cuha Jesusone jana aina cunacaauru.

*Jesoso jaberoco rucuhecuruhane*  
(Mt 27.57-61; Lc 23.50-56; Jn 19.38-42)

<sup>42</sup> Inae nocoheca nebetacanaa cojoanonaa que janohane coinane jana, neruujeeuruha Jorioocurune jaa cojoanonaa jana jetaote,

<sup>43</sup> Filato coaraa cue Arimatea cocoaicha Jose, Jesoso jaberoco bajaane coina. Nii Josete Jorioocuru rai nelateein nenacaauru Jorioocuru bichauhenaauru- *Junta Supremacuru* caje jataain nelateein nena ne. Acaaentonaite tururichaaain Cana Coaunera Cojoanonaane cohajein nelu.

<sup>44</sup> Nii jaun jetaote, rene turuhin inae oha Jesusone que aithane jaun cojoelatothane jaun jetao soondarooru curuanaa cotiharate Filato, esinae rauhijiriin ohane biha raine coitcuhane coina.

<sup>45</sup> Nii jana rene turuhin inae ohane bihane jaun jetaote Jose rai nii Jesoso jaberoco terate Filato.

<sup>46</sup> Nii jaun jetaote, Jesoso jaberoco fauhin jataain cajione caohacha lino coreteein nii cajione que conajae Jose. Nitohanein conaacane baiha jetaote, ajeri jachu cuhane tein, rai bacuujuua fuhin ratiri ajeri jaberoco que.

<sup>47</sup> Nii jana jetaote, ecu aina neein nii Jesoso jaberoco teeuruhane jaa jelai coarajeeure Maadala bene Mariha, chaen Jose neba Mariha, naaonjoainuri.

## 16

*O caje ichanaa Jesusone*  
(Mt 28.1-10; Lc 24.1-12; Jn 20.1-10)

<sup>1-2</sup> Inae situha nebetacanaa cojoanonaane jana jetaote, semana nunuhe cojoanonaa tomiho bana jataain janohetiin enanejeein mituhajiha enotone jana jujuaihuru coreteein amaain, que Jesoso jaberoco jujuaa cuure Saantiaao neba Mariha, Maadala bene Mariha, Salomee, naaonjoainuri.

<sup>3</sup> Nitohanein cuhin jetaote ita rai:

“Chana jana cana rai nii fueraneein nena ajeri elonare,” naain jetao niqiu cuure.

<sup>4</sup> Nejetaote coaracuruhane jana, elonanohineein ne nii ajeri seeonjoan fueraneein nena.

<sup>5</sup> Nii jana nii ajeri jachu cuhane enooruhane jana jetaote, acaauru raotono nichajai que lauhaca leinjiin enamanaa somajaain tarararoti que cajionecohine jana coaraain nesooneetoore nii enecuru.

<sup>6</sup> Nejetaote, acaauru rai: “Coa nesoonetohache. Coroso que niicha teuri Nasarete cocoaicha Jesusona ariiche. Inae

ichanaane jaun coatiha inae cau nihei. Nii teuruhane jaan jelai coaracuche.

<sup>7</sup> Chajaain jelaiha cauhin, Fedoro, chaen aina nerelanacaauru, naonjoainuri rai: 'Inae inara ajinhate Calileea cue Jesoso. Ucuuete coariquicheein, inara rai aitoroetohane rijijieeincha, nanichuche acauru raicha,' ” nae jetao nii enecuru rai anjera.

<sup>8</sup> Nii jana jetaote, jataain nesooneetooruhane jaun chatata-janeein jelai caje sorohin, nii chuni rai belanaala inauhe-neechea neeure.

*Maadala bene Mariha rai ecooca Jesusone  
(Jn 20.11-18)*

<sup>9</sup> Inae semana cojoanona nunuhe bana ichanaane baiha jetaote, nii suujua cuhane caaunsini moconajaera letono siricha- niicha rautailu Maadala bene Mariha rene ococoe jauriaanejeein Jesoso.

<sup>10</sup> Aca jetaote, chanaain inaderaauruha nii Jesoso aina nerelanacaaurune jana jetao, acauru rene turuhin biha cue.

<sup>11</sup> Nitohaneein acauru rene turuhin, jerichanejeein jabe-roconein ichaoha Jesusone coaraain biha cuha acauru raine jana jetaote esenetaaurene.

*Coroatajai aina nerelanacaauru rai ocooca Jesusone  
(Lc 24.13-35)*

<sup>12</sup> Nii baiha jetaote, bero cuhane cuujeeuruha coroatajai aina nerelanacaaurune jana nejelauneein acauru rai ococoe Jesoso.

<sup>13</sup> Nitohaneein acauru rai ocoocane coaraain, leochaauru rai biha cuuruhane jana jetaote, nii acauru niha natiin esenetaaurene.

*Niicha cocoinaauri afosotooru rai, acaauruhacha icha-  
neni tiha Jesusone  
(Mt 28.16-20; Lc 24.36-49; Jn 20.19-23)*

<sup>14</sup> Nii baiha neeriin jetaote, lenoniha neeuruha nii le-choonca leinjiin aina nerelanacaaurune jana jetao, ecu acauru rai ococohin, nii o caje ichanaane coaraain beeurera esenetana jerelanaala baasoneein rai suujua coaracuruhane caohate.

<sup>15</sup> Nii baiha jetaote: “Chajaain caa chauratane sacuri-tain nenacaauru satiin cachaauru rai, nosa caje nichotee-urichaine coina jitariin caa caitoonjoan beebejenichuche.

<sup>16</sup> Caa caitoonjoan beeichene jana esenetaain acauhanau tein nebaotisaerateite nichotiha cureein. Jana caa caitoonjoan beeichene jana esenetana jeriheichurute caseteco coaraa cuurureein.

<sup>17</sup> Canu esenetaain canu ere tonoraain neeichenete canu neein nenea rijijieein moconajaera letonocuru sitaain, neje-launeeichuru nereeuru cuhane ereein,

<sup>18</sup> acano niha natiin mucunaa naineein, naaonjoaain, corianiha natiin coichene nii chatohaneein baasoneein inara tenereein. Nii choae tacaain techu, cunaitenacaauru mucuhichene nerautaa cuurureein,” nae jetao niicha cocoainauri rai Jesoso.

*Dedeeu cuha Jesusone*

*(Lc 24.50-53)*

<sup>19</sup> Niritiin niicha cocoainauri afosotooru rai irihane baiha jetaote, dedeeu iniin rai Inaca Cana Coaunera raotono nichajai que nelauriaa cuelu Cana Curuaanaa Jesoso.

<sup>20</sup> Nii jaun jetaote, satiin chauratane sacuritaain amuhemujeein nosa caje nichoteeururichaaine beebejiha cuuruhane jana jetao, nii acaauruhacha beebejei esenetana nainecuruha cachaurune coina acaauru aina cuaain cojoe-lanaacojoai ichae Cana Coaunera.

## **Locasiicha laenai Ena Nena Cana Coanera Ere**

*Teofilo rai Locasiicha laenai quiricha*

<sup>1</sup> Arajii cachaaurute caa canacaanu jana Jesoso ichanohichuru laenacurelu.

<sup>2</sup> Nii laenaeraaurute nunuhe caje coaaneein aina amuhe-mujeein niicha coarai que canacaanu relaeraneein neeu-ruhane coina tenojoineein neeurelu.

<sup>3</sup> Nii jaunna, canuhetonai satiin coitucuurera caje bajaau, rai nunuhe caje coaaneein colalajiin, caohachaaain coitucuhanune coina. Nii jana, carai netonai jataain caohachaaane jaunna carai nelatein neeine rai laenaauyra Teofilo,

<sup>4</sup> esinae rauhijiriin erenaa niha nii ii relaauruhane jaa esenetaain caohachaaain coitucuhin neeine coina.

*Nejanoarichaaain cacha baotisaera Joanne biha anjerane*

<sup>5</sup> Jodea batane curuaanaa- rey neein niha leinjiin Jori-oneein nena Erosesine bana jetaote, ichoaelu leinjiin Cana Coanera aina caohachaaain niha cachane coina rucuhaneein nena saseredote Sacariasi. Aca jetaote, acauru inoansi saseredotecuru Abiasa lauri caje nenaanelu. Nii jana rai sinijera Isabeli jetaote, jauriaanejeein saseredote-neein nena Aaron nefoerateeuru caje nenaanelu.

<sup>6</sup> Acauru jetaote, esinae rauhijiriin jiniiquiin Cana Coanera esenetaain naitoonjoan tonoraain neeurelu. Nitohaneunruhane jaun jetaote nii chuni- acauru que chatohanai ujuaitea nainecurenelu.

<sup>7</sup> Nejetaote, canaanai sirina inaeniha nii Isabeline jaun, leinjiinejei canaanai sirilanaala jiniiquiin biinaaneurelu.

<sup>8-9</sup> Nitohaneein jetaote, inae Cana Coanera notaracaae saseredote neeuruhane ichanohin jujui mocooruhane coina neeuruha Sacariasi laurichurune jaa cojoinacaque tihane jaun jetaote, nitohaniha saseredote neeuruhane ichaone jaun, Sacariasi que tacaajeein dadae, rori ichoaae tein jujui mocoha Teenforo asaane coina.

<sup>10</sup> Nitohaneein jujui mocoha enohane tonohanau jetaote, aerene neein Cana Coanera bajaee bajaecure leeochoauru saseredotecuru aina cachaauru.

<sup>11</sup> Nii jana jetaote, Sacariasi rai ecocohin, nii jujui mocohane jaa rori raotono nichajai que jetao chujujuae Cana Coanera letono anjera.

<sup>12</sup> Nii jaun jetaote, nii anjera coariin, nesoonetiin cojoaelatoha Sacariasine jana jetao:



13 “Coa nesoonetohara Sacariasi. Bajaebajaequiine aon-  
ajian Cana Coaunerara. Nii ii sinijera Isabelite leinjiin  
canaanai siricheeincha. Acate Joaan neein curuaateriqiinch-  
cha.

14 Chaentechu aina jataain raotojoein neriquiinch-  
Leeochaauru cachaauru netonaite nejanoa coroaecu-  
rureein,

15 jataain Cana Coaunera rai nelateinneein nerichaainne  
jaunra. Coatiha bino, abariinti, naaonjoainuri corinaainta.  
Acate esinae rauhijiriin Cana Coaunera suujue que suujue-  
coha cureein nejanoaane ajiniha caje coauneeincha.

16 Acate, Cana Coaunera Ere tonoraache Israeli co-  
coaichaneeichene coina ichareeincha.

17 Nii Joante turuha uheneni Cana Curuaanaa ajiniha  
cureein, Cana Coaunera ere bera inoansi Irihasi rai ni-  
icha tei suujueque suujuequiin- Cana Coauneraacha ichana  
nainei ichaain naaonjoaaincha. Acate aicheein calaohichuru  
aina jiniiquiin ita que suujua acateein neeuruha acauru  
fojiaraaurune coinara. Chaen erenaa tonorana jeriheichuru  
netonai erenaa tonoraain naaonjoaaunruhane, raotojoein  
Cana Curuaanaa ranaa nainecuruhane coinara,” naa rai nii  
anjerane jaun jetaote:

18 “Inasiine bajiaa nitohaneein nerichaaunnine eseneta-  
reeun, inae casinejera aina jiniiquiin jataain biinaaniha-  
caanu natiinta,” naa Sacariasine jana jetaote:

19 “Canune, Cana Coaunera letono Cabirieli neeun. Acate  
caletoe, ichei caa erenaa raotono bihanune coina.

20 Nete caa ichei aitocooaunne esenetaeneeine jaun, ena  
caje coauneei caa ichei caitoonjoan cojoinaca que ti-  
hanereein tiaain erenaachara neein neriquiinch-cha,” nae jetao  
Sacariasi rai nii anjera.

21 Nii tonohanau jetaote, aerene neein Sacariasi cohacu-  
ruha cachaaaurune jana, jataain carajaane jaun jetao, “Chana  
jataain ichae carajaain Teenforo asaae caje mituenihane  
coina,” naain jetao ita caje bajaaree nii aerene neein co-  
haraauru.

22 Nii jana jetaote, tabiicha acauru rene eresilanaala  
Teenforo caje mituha uhe nii Sacariasi, acauru rai biji  
nejesinaacha que bihajein. Nii jaun jetaote: “Jerihanete  
chaelai coaratiha Cana Coaunerane jaa coaracaiha Teen-  
foro asaaera,” naaunre jetao ita rai.

Nii caje nunuhetein jetaote, erenaa nainelanaala nelu  
Sacariasi.

23 Inae nitohaneein teenmforo asaae niicha ichanenu  
nainaan jetaote, jelaiha nenajaun cauha cue Sacariasi.

24 Nii baiha neeonriin, inae ausirineein jetaote, rai loreri caje amuelanaala ecuhacha ne saogui ateein rai sinijera Isabeli:

25 “Cana Coaunerate, caa catohaneein caete, nabana caque nererojoeaain jaolecooruha cachaaaurune coataa,” naain suujua ereein.

*Nejanoarichaain Jesusone biha leinjiin anjerane*

26 Inae saota ateniha canaanai siriha Isabeline jana jetaote, Calileea batane que nenea Nasareteu jetao, leinjiin letono anjera Cabirieli letoae Cana Coaunera.

27 Chariji bana quicha aina ichoaelanaala nenea leinjiin ranuna Mariha rene turuha cuhane coina. Nii ranuna jetaote, cana inoensihuru curuaanaa Rabiri nefoerateneein nenea Jose que nelanajaane rai ne.

28 Nitohaneein cuhin jetaote, nii niha Marihane jaaun rene turuhin enohin jetao:

“Ii renena bedaeniha uunra, Cana Coauneraacha rausiajei. Jataainte ii rausiaje Cana Coaunerara” naa rai nii anjerane jaun jetaote,

29 coariin nesoonetiin: “Chanuna caritiin ere canu rai,” naa suujua cuhane Marihane jana jetao,

30 “Coa nesoonetohara Mariha. Cana Coaunerate ii janiji, ii rai caohacha ichaane coina.

31 Inae leinjiin canaanai siririquincha. Inae nejanoaane jana Jesoso neein curuaateunicha.

32 Acate itolere cacha amurijiriin itolere que nelateinneein, acaihaniji Cana Coaunera Calaohineein nenaaneein coitucuha cuurureein cachaaaurura. Nii jana Cana Curuaanaa Cana Coaunerate, nii rai foeratera inoensihuru curuaanaa neein nenea Rabiri rijijieein reyneein tereein, inara Curuaanaaneein nihane,

33 rai nere tonoraache inara Israeli cocoaichaneeichene, chabana satonoelanaala inara Curuaanaaneein nihane coinara,” naa nii anjerane jana jetao:

34 “Inasiine bajiaa nitohaneein leinjiin canaanai siricheeun nii chuni cacha aina ichaohanune coalanaalata,” naa Marihane jana jetao:

35 “Cana Coaunera Suujuete aiha suruaane rijijieein ichoae fauha ureein, leinjiin canaanai siriine coinara. Nii jaunte nii canaanai iicha sirii, Cana Coaunera Calaohinereeincha.

36 Ii araai Isabeli netonai techu, inae leinjiin canaanai siricheeincha. Inae biinaa nihane sainejeeinte inae canaanai siricha. ‘Canaanai sirina inaenihane jaun jete canaanai sirine,’ naauruhane jaate, inae saota atene rai canaanaicha.

37 Coatiha Cana Coaunera rai caaintaai chata,” naa Mariha raine jana jetaote:

38 “Aihachuhisicha. Niicha belai nichaaunne rai aito hine rijijieein, niicha ichana jerei ichamiin Cana Coaunerara,” naa Marihane jana jetao, inae jelai caje amue nii anjera.

*Isabeli rene turuha cuha Marihane*

39 Nii bana jetaote, erojoein cuhin Jodea bichatane que nena neseu cuhin Isabeli rene turuha cue jetao Mariha.

40-41 Nitohaneein cuhin jetaote, inae ecu turuhin Sacariasi loreri asae enohin, Isabeli rai iriha Marihane aonaain jetao, Isabeli suri cuhane neein nerurujuae nii rai canaanai.

Nii jaun jetaote, Cana Coaunera Suujue que suujuequiin jetao,

42 jataain tonijiaain:

“Cana Coaunerate, itolere enecuru rai caohacha ichaane amurijiriin ichei caohacha ichae. Nii rijijieeintechu nii ii calaohi rai netonai caohacha ichae.

43 Nii jaun chaneeinna jana nereeeun canu, Cana Curuaanaa nebaneeine saijieein carene turuha uhine coina.

44 Nii carene turuhin ereeine aonaainte, rachoojoenaa caaun canu suri cuhane neein nerurujuae carai canaanai.

45 Nii jaunte raotojoein neei, ii rausiaaeca nii ichei aitoha Cana Curuaanaane esenetaain tonoraaine jaun,” naa Mariha rai Isabeline jana jetaote:

46 “Aihanuchujian.

47 Canu suujuate,  
itolere niicha ichana naineei ichaain,  
canu ichoterateein niha  
Cana Curuaanaa  
Cana Coaunerane jaun  
coroaje,

48 rai chaneein nenihanune saijieein  
canu janijiin canu rausiaaeca  
Cana Coaunerane jaun.

Nii jaunte  
ena caje coauneein  
Cana Coauneraacha rausiajeineein  
cacurujuatiha cuurureein  
itolere janonaa bana cachaauru,

49 nitohaneein  
jataain canu belaiha  
itolere que nelateein  
itolere ichana nainera  
Cana Coaunerane jaun.

Leinjiin acaachate  
Acaneein ne.

50 Nii Cana Coaunerate,  
cairichaaajoaai itolere bana  
que suujua acateein

ichaonacaauru coarae.

<sup>51</sup> Nitohaneein itolere niicha  
ichana nainei ichaainte,  
nii chaque nelatelanaala neeuruha  
nii itolere que nelaetoha  
nocoetonacaaurune coina  
icharaneein ne.

<sup>52</sup> Chaentechu, curuanaacuru  
reychuru nihanatiin,

<sup>53</sup> inae cha nelanaala  
neeuruhane coina ichae.

Chaentechu,  
nii leeochoauru rai  
chaque nelatelanaala  
cairicheinejeein nenacaauru  
rausiaeraneein ne, itolere que.  
Jana nii coriqui nebaneein nenacaaurute,  
nii cha colane bijiicha baaeejin  
niha cuurureein.

<sup>54</sup> Aihane jaunte  
rai cacha Isaraelitanichaachene  
cairichaaajoaain cana  
coaraane jaun,  
cana coroatajanereein,

<sup>55</sup> inae nitohaneein ichaane coina,  
cana inoaensi Abaraaun,  
nii rai inamacooru,  
naaonjoainuri rai aitohalu  
Cana Coaunerane jaun,”

naain jetao Cana Coaunera coroaaje Mariha.

<sup>56</sup> Nitohaneein turuha cunajau nichata ateein Isabeli aina  
nihane baiha jetaote, jelaiha nenajaun cauha cuelu Mariha.

*Inae nejanoaa cacha coujunacateein baotisaera Joanne*

<sup>57</sup> Inae nejanoaane que tiha nii Isabeli rai canaanaine jaun  
jetaote, quicha cojoaajineein janoae rai neba Isabeli.

<sup>58</sup> Nii jana jetaote, rene turuhacoaain jetao coroaeca cuure  
rai naraaichuru aina rai laurijiracuru, rai caohacha ichaa  
Cana Coaunerane coitucuuruha raotojoeine jaun.

<sup>59</sup> Inae fosa janoniha nii canaanai nejanoane jana jetaote,  
amaain rai jaberoco cari saerateein jetao, rai inaca Sacariasi  
curuaa que jetao curuaatenaa jerecure.

<sup>60</sup> Ne jetaote jerelanaala:

“Aihei, jiaohine. Joaan neein curuaacanete caohachae,”  
naa rai nebane jaun jetao:

61 “Chanuna. Inasiina niha niritocojoaain curuaajaain charaaine coalanaala niritocohare rai curuaa,” naain jetao jerecurene.

62 Niritiin jetaote, nii canaanai inaca coujueluhin: “Tohanriani rai curuaata,” naain jetao bajaare coitucuuruhane coina.

63 Nii jaun jetaote, acaauru caje que tein laenaane jaanu bajae jetao biji nejesinaacha que. Nitohaneein bajaain jetaote, “Joaan neein curuaacanete ne,” naain jetao laenae rai inaca, jaiti mituheniha rai nerene jaun. Nii jaun jetaote, satiin cojoelatoore cachaauru.

64 Nii rijieeoritiin inae nacoauneein mituha nerene jaun jetaote, rachoojoeiin Cana Coaunera corojaje Sacariasi.

65 Nii jana jetaote, nitohanihane jaun cojoelatoore rai laurijiracuru coarajeuurera. Nii jaun jetaote, itolereneein Jodea bichatane batane sacuritaain coitucuhin ita rai beebejerejetoorelu.

66 Nii aonaain cojoelatiin jetaote: “Chatohanai neeinna nereein nii canaanai,” naaure jetao, esinae rauhijiriin niicha jerenohineein nenea nihane coaratiha acaauru que Cana Coaunerane coaracuruhane jaun.

### *Rachoojoiha Sacariasine*

67 Nii jana, nii canaanai inaca Sacariasi suujueniha neein que beratitha Cana Coaunera Suujuene jaun jetaote:

68 “Jataainte caohacha ichae  
Cana Curuaanaa Israeli Coaunerara,  
raotojoein neeuruha  
rai cachaaurune coina,  
ichoteratiha uhana jaunra.

69 Nii jaunte,  
cana inoensihuru curuaanaa  
Rabiri nefoerateneein,  
jataain itolere amurijiriin  
nelateein laraajiin nenea letoae,  
jianacoon cana mitaeraanu quera.

70 Inae catohaneein  
ichaane coinete,  
rai nere bera inoensihuru  
que beratelura.

71 Itolere  
cana que nererojoecaain,  
cana aina nejerateein nenacaaru,  
naaonjoaihunri caje  
cana mitaane coina  
aitohalune jaunte,

72 nii baitena nainene,

cairichaaajoaain  
 cana inoaensihuru coaraain  
 aitohalune jaun,  
 Cana Coaunerara.  
<sup>73</sup> Nitohanein  
 esinae rauhijiriin ichaane coina,  
 cana foeratera inoaensi Abaraaun rai:  
<sup>74</sup> 'Jianacoon,  
 cana aina nejeratenacaauru caje  
 jete cana mitaane,  
 cha que casilanaala nere tonoraain  
 leinjiin raaicha nelateein,  
<sup>75</sup> esinae rauhijiriin  
 caohacha nejesina ichaain,  
 baaso cocuelanaala  
 inoaenlu netojoein,  
 itolere janonaa bana  
 nerichaacheeinje,'  
 naain belu Cana Coaunera,  
 cana foeratera inoaensi Abaraaun rai.  
<sup>76</sup> Jana ii, cacalabineeinete,  
 acaihanijin Cana Coaunera  
 neein nena ere beraneein,  
 Cana Curuaanaa ajiinchatera  
 neein niha curiquiin,  
 jeriha Cana Coaunerane rijjijeein,  
 turunaa nainihane jaanu  
 beebejeeine coina,  
<sup>77</sup> acaauru osa caje  
 acaauru ichoteraterichaain  
 Cana Coaunerane  
 coitucuuruha cachaaurune coinara.  
<sup>78</sup> Jataain cairichaaajoaain  
 cana coaraane jaunte,  
 dede caje cana rai  
 ena nena Cojoanonaa teein  
 ne Cana Coaunera,  
<sup>79</sup> nocojena tabai caje nichoteein,  
 nii rai Cojoanonaa que  
 neconaain cuhin,  
 cana rai niicha tenojoin  
 raotojoein rachoojoein  
 ichaonaanaja que  
 turuhacachene coinara,"

naain jetao nii canaanai inaca Sacariasi suujueniha neein  
 que beratiha Cana Coaunera Suujue.

<sup>80</sup> Nii jana jetaote, esinae rauhijiriin Cana Coaunera Suujue que suujuequiin jetao, fohejeein cuujue nii canaanai. Nitohaneein fohejeein ichauhenaneein jetaote, cacha areroo amuhemujueein nelu, rai lauri Isaraelitacuru que necoitucueratihane reein tiaaojoain.

## 2

### *Nejanao Jesusone* (Mt 1.18-25)

<sup>1</sup> Nii nejanoa rai niha Jesusone bana jetaote, itolereenein cana rai chauratane sacuritaain cachaauru letoaelu reychuru curuaanaacuru curuaanaa enferadoro Aogosto, satiin cachaauru janijiin acauru curuaacuru cocoirichaauruhane coina.

<sup>2</sup> Nii jauriaanejeein cachaauru curuaa cocoirichaauruhane bana jetaote, Siria batane coberenadoro neein nelu Sirenio.

<sup>3</sup> Nii jaun jetaote, satiin acauru foerateracuru atane cuha-coaain, quiricha cuhane curuaa teratiha cuhacoaarelu lauri lauri caje uhin ecu turunacaauru cachaauru.

<sup>4</sup> Nii jaun jetaote, Calileea batane que nena Nasarete caje cuhin jetao, Jodea batane que nena Beleeun cuelu jetao Jose, jelai caje nejanoanaaneein nihalu rai foeratera reyneein nenaalu Rabirine jaun.

<sup>5</sup> Nii jaun jetaote, canaanai cousurihu niha Marihane jana, aina jiniiquiin quiricha cuhane curuaa laenaratiha Beleeun cue jetao Jose, ita raauruhane rai netiin.

<sup>6</sup> Nii jana inae nejanoaane que tiha nii Mariha rai canaanaine jaun jetaote, nii Beleeun neurunajau nejanoaelu rai canaanai.

<sup>7</sup> Nitohaneein, inae nejanoaa nii jauriaanejeein nena rai calaohine jana jetaote, rai belaae que conaconariin jetao, baca lenone omene ichoae tocoeecae rai neba, neniha loreri turuurunajaanune jaun baca coloheri asaae neuru jana nejanoaane jaun.

### *Carenero beraihurera renete turuure anjeraauru.*

<sup>8</sup> Nii jana jetaote, Beleen rohan neeure fasoto jana janoaajihanaain, letononeein carenerocuru beraihurera cachaauru.

<sup>9</sup> Nii jana jetaote, acauru rai ecooca Cana Coaunera letono anjerane jana jetao, acauru curuhacaain jilinetoha Cana Coaunera conone jaun, luaa nesooneetooore eluhatothane jaun.

<sup>10</sup> Nejetaote acauru rai: "Coa nesooneetohachera. Raotojoein satiin rachoojoein neriquicheeine jaanune inara rai jataain erena caohachaneein biha uunra.

<sup>11</sup> Enenete inara inoaensihuru curuaanaa Rabiri neseu ne-janoae inara Curuaanaa- inaraacha cohajei Mesihasi jiana-coon inara ichoterateraanaura.

<sup>12</sup> Caa inara rai aitocooaanne jaate, coaraa cuhichene, baca coloheri asaae omame ichoaae rai belaae que conaanojoi-neein tocoeechoa jana eruha curiquicheeincha,”

<sup>13</sup> naa acaauru rai nii anjerane rijieeoritiin jetaote:

<sup>14</sup> “Jataain rachoojoein

Cana Coaunera coroaecuruhine dedeeu.

Raotojoein rachoojoein

neeuruhine cau chauratane quene maajeein

niicha rausiajeineein

nenacaauru-

rai cachaaurura,”

naain jetao Cana Coaunera coroaecure dede caje arajiin ecoo-joacoain anjeraauru, nii leecha anjera rohan ecocohin.

<sup>15</sup> Inae niritiin jelaiha dedeeu cuuruha nii anjeraaurune jana jetaote:

“Chajamaaunchete aihane, caa cana rai Cana Coauneraacha beratenojohin coanichaache Beleeun cuhinja. Chatohanaiquecha aiteta,” naaure jetao ita rai, nii letononeein carenerocuru beraaihurera- cachaauru.

<sup>16</sup> Niritiin erojoein cuhin coaracuruhane jana jetaote, Mariha aina Jose eruuruhane jana jetao, baca lenone omame ichoae rai belaaeque conaanojoiineein tocoeeque nii canaanai.

<sup>17</sup> Nitohaneein eruhin, nii acaauru rai nii canaanai que aitoha anjerane beeuruha nii letononeein carenerocuru beraihurerane jaun jetaote,

<sup>18</sup> cojoelatoore jetao satiin ecu neein aonajeeurera cachaauru.

<sup>19</sup> Nii jana, rai neba Mariha jetaote, rai suujua cuhane nitohanihane coacuhin jetao, suujuaacha cuhane coaraje.

<sup>20</sup> Nitohaneein esinae rauhijiriin nii acaauru rai biha anjerane rijijieein, jitariin coaracuruhane jaun jetaote: “Cao-hachate ichae cana rai Cana Coaunerara,” naain Cana Coaunera corojeein jelaiha cauha cuure nii letononeein carenerocuru beraihurerauru cachaauru.

*Cacha que suujua acatiha Cana Coaunerane jaa coloheri Teenforo asaae Jesoso causine amauruhane*

<sup>21</sup> Inae fosa janoniha nejanoane jana jetaote, nii canaanai jaberoco macohi cari saerateein, Jesoso neein curuaateure, jaiti ausirineniha Marihane jana aitohalu anjerane rijijieein.

<sup>22</sup> Inae nii aitohalu Moisesane jaan cojoanonaa rijiu que tihane jaun jetaote, jiniiquiin nocoulucoherateeuruhane



baiha jetao, Jerosaleeun nii canaanai amaaïn Cana Coaunera que coitucueratiha cuure.

<sup>23</sup> Nitohanihane coina: “Satiin jauriaanejeein quicha co-joajineein bereeconaa Cana Coauneraacha que nii rai beree banihatemiin.

<sup>24</sup> Chaen coroatajai tajaee laojoiri serori rijijieein nenea torotola nenihane, coroatajai serori aao uhaaine,” naain aitovalu Cana Coaunerane rijijieein nii niicha bajai tajaee amaaïn cuure, rai naitoonjoan rijijieein nii tajaee niicha amauri mocohin que Cana Coaunera belaaïn, que nii beree banihateeuruhane coina.

<sup>25</sup> Nii bana jetaote, Jerosaleen ichoaelu leinjiin cacha Simeon. Aca jetaote, esinae rauhijiriin Cana Coauneraacha jerei ichajeein, tururichaaïn jianacoon Israaeli co-coaichacuru mitaeranune cohajeein nelu. Aca jetaote, que coitucueratiha Cana Coaunera Suujuene jaun,

<sup>26</sup> nii niicha letoaeni Mesihasi coaraelanaala ohenihane coitucuelu.

<sup>27</sup> Nitohanihane jaun jetaote, nii cachaauru que suujua acatiha Cana Coaunerane jaa coloheri Teenforo asaae Jesoso causine amauruha rai fojiaraaurune jana que coitucueratiha Cana Coaunera Suujuene jaun coitucuhin, Teenforo asaae cuha Simeonne jana jetaote, que jiniichaain nii Jesoso causine turuaaure rai fojiaraauru Teenforo asaae, Cana Coaunera aitoonjoan ninaaruhane coina.

<sup>28</sup> Nii jana jetaote, nii canaanai coariin, raain baiichaain jetao:

<sup>29</sup> “Inae laen  
nii iicha ichanenu  
carai chaitoonjoan  
coaracaaunne jaun,  
inae laen nainichaaun ohanu  
iicha jerei icharanichaaunnera,

<sup>30</sup> itolere notaracae

<sup>31</sup> iicha tei jianacoon

canacaanu mitaeranu  
coaracaaunne jaunra.

<sup>32</sup> Acate Cana Coaunera  
coitucuelanaala

Israaelitaniheichuru  
lauri lauri nenacaauru que

acaauru aina  
Cana Coauneraacha  
ichanenu coitucueratereein.  
Chaentechu

raotojoein rachoojoein  
neeurureein Israaelitaauru,

acaauru lauri caje nena  
neen niha caa iicha letoaine jaun,”

naain jetao Cana Coaunera coroaaje Simeon.

<sup>33</sup> Niritoha nii canaanai que Simeonne aonajeein jetaote, ecu cojoelatoore nii canaanai fojiaraauru.

<sup>34</sup> Nii jana jetaote: “Inara corootajanemiin Cana Coaunera,” naa acaauru raine baiha jetao, Mariha coarajeein:

“Aonaun. Caa canaanaite, arajii Israeli cocoaichacuru itolere que nelaetoha nocoetonacaauru nelatelanaala nedaauruhane jana, leeochoauru tabaauru itolere que nelateein nedaauruhane coina nenaane. Nitohanein nihane corenihate, que jaolecoorureein arajii Israelitaauru,

<sup>35</sup> satiin que acaauru ichao coitucueraterichaaine jaun. Nete jataain cunaain cacha jaberoco sauha saberene rijijeein, jataain cunaain ii suujuaque tacareein, que nejera-teeriin neeururichaaine jaun,” nae jetao Mariha rai Simeon.

<sup>36</sup> Nii jana jetaote, ecu nelu leinjiin ene netonoai- Cana Coaunera ere beraneein nena. Acate Asere laurineein nena- Fanoeri cacunu camotojoe Ana ne. Aca jetaote, jataain ranuna neen nelanajaain, caaunsi jaanacanejeein lana aina ichoaelu.

<sup>37</sup> Nii baiha jetaote, fosachoonca jena jaanacaanein nirijeein autananein ichaohin jetao, suri couu netiinchuru janotiin inetojoeinchuru, sonafaajihanaainchuru Cana Coaunera bajaee bajajeein nerejetelu nii Teenforo caje mituhelanaala.

<sup>38</sup> Nii Ana jetaote, nii Jesoso causine turuaauruhane jana ereereeca Simeonne coaraain jetao, acaentonoai nii Jesoso causine que ereereje, satiin nii nichoteeururichaaain Jerosaleen cocoaichacurune cohajeraauru cachaauru rai.

### *Jelaiha Nasarete caauruhane*

<sup>39</sup> Inae nitohanein jeriha Cana Coaunerane rijijeein rai naitoonjoa ichacuruhane baiha jetaote, jelaiha rai natane-Calileea batane que nena Nasarete jetao cauha cue Jose, Mariha aina.

<sup>40</sup> Nii jana jetaote, fohejeein itolere que nainaan ichauchenanihajeein sacue nii canaanai, corootajaniha Cana Coaunerane jaun.

### *Teenforo asaae niha canaanai Jesusone*

<sup>41</sup> Ajaanaa naineein jetaote, Jerosaleeun cuhin Fasocaa beseta bitoaa cunajaaoncure nii Jesoso fojiaraauru.

<sup>42</sup> Nitohaneeuruhane jaun jetaote, inae lechoonca coroota jaanacaa Jesusone jana jetao, nitohaniha acaauru ichaone jaun satiin cuhin nii beseta bitoaa cuure Jerosaleen.

43 Inae beseta bitoaaauruhane baiha, jelaiha nenajaun cauha cuuruha rai fojiaraaurune jana jetaote, Jerosaleeun nedae coitucuurenihane jana nii canaanai Jesoso.

44 Nii jaun jetaote, “Inae jecha ichoaichaniha cunacaauru aina cauha cuha nii Jesoso,” naa fojiaraauru suujuane jaun jetao, le janohin cuuru baiha, niicha coitucuuri, naraaichuru, naaonjoaihunri jana arihure niqwi rai fojiaraauru, nejetaote eruurene.

45 Nitohaneein eruurenihane jaun jetaote, jelaiha nejehin ariha cuure Jerosaleeun.

46 Nitohaneein cuhin jetaote, nichata janohane cuhane jetao Teenforo asae, Moisesa aitoonjoan que cacha relaaureaauru aina, ita rai ereeuruhane aonajeein, acaauru caje nii ereeuruhane jaan bajaa lauhequinne jana eruha cuure.

47 Nii jana, jataain nainaan, nii ereeuruhane aonajeein, acaauru caje bajain, acaauru tonoraane jaun jetaote, cojoe-latoore satiin ecu neein aonajeeurera cachaaauru.

48 Nitohanihane jana eruhin jetaote:

“Chanuna canacaanu rai belanaala nitohaneeinte canaanai. Ii inaca ainane ii ariirijiacaanu, neeine jaa coitucuenihacaanune jaun ii coinaderaain,” naa rai nebane jana jetaote:

49-50 “Chanuna canu ariirijieeiche. Tana canu inaca loreri asaae nihanu niicha jerenohineeine coitucuhicheneta,” naain acaauru tonoraa Jesusone jana jetaote: “Naaonjoaiquete aitera,” naain coitucusichurene rai fojiaraauru.

51 Nitohaneein fojiaraauru jiniichaaain Nasarete cauhin jetaote, rai fojiaraauru ere tonoraain nerejetelu.

Satiin niriinanai jetaote, rai suujuaacha cuhane coarajerejetelu rai neba.

52 Nitohaneein fohejeein ichauhenanihajein, itolere que jataain nainaan jetaote, satiin cachaaauru aina caohachaaain ne nii Jesoso, coroatajanein aina caohachaaain niha Cana Coaunerane jaun.

### 3

*Cacha areroo niha cacha cojunacatera Joaan ne  
(Mt 3.1-12; Mr 1.1-8; Jn 1.19-28)*

1 Inae lechoonca saogui jaanacaain satiin cocoainanacaai-huri curuaanaa enferadoro neein niha Tiberione bana jetaote, Jodea batane rai coberenadoro neein nelu Ponsio Filato. Nii jana Erodesi jetaote, Calilea batane rai coberenadoro neein nelu. Nii jana rai nejera Ferifi jetaote, Taraconite, Itorea, naaonjoahuinri batane rai coberenadoro

neen nihane jana, Abilinia batane rai coberenadoro neen nelu Lisania.

<sup>2</sup> Nii jana Caifasi, Anasi, naaonjoaihunri jetaote, sasere-dotecuru curuaanaacuru- curuaanaaneen neeurelu. Nii bana jetaote, Sacariasi calaohi Joaan rai jetao erelu Cana Coaunera, cache areroo rai ecocohin.

<sup>3</sup> Nii jaun jetaote, Jorodaan auhaniha nenacaauru ne-naanajaauru cujecujeein jetao, “Jeriha Cana Coauneraane rijijieein inara suujua coreeuchete acauhanau teein cojunacatenohineein baotisanoinneen neeichete, inara osa caje inara ichoteratemiin Cana Coaunerara,” naain jetao, cachaauru rai beebeje Joaan.

<sup>4-5</sup> Nitohaneen jetaote, icharejete Joaan. Niritiin laenaalu Cana Coaunera ere bera inoansi Isaihasine rijijieein:

“Nerichain cache areroo eheehejeein:

‘Cana Curuaanaa turunajaanu coeroteeuche, raujuin cuaain.

Satiin turiararoorute nemoanojoinereen.

Atane ucuunooru nihanatiinte ranaasiin macaracanojoi nijihacooa cureein.

<sup>6</sup> Nii banate, satiin caa chauratane que nenacaauru cachaauru jianacoon cache mitaeraanu letoaa Cana Coaunerane coaracurureen,’ ”

naain nii Joaan que aitiin laenaalu *profeta* inoansi Isaihasine rijijieein jetaote ichae Joaan.

<sup>7</sup> Inae nitohaneen cachaauru cojunacatiha acauhanau teein baotisaa Joanne coitucuhin, rene cuuruha cachaauru, acaauru baotisaane coinane jana jetaote: “Chaa inara osa coreniha caseteco tabai turu rai nena caje nichoteein, jianacoo mituriquicheeine que inara rai aite, taibinaecuru.

<sup>8</sup> Nitohanihane jaun, nii ajiniha caohachain inara ichao coreein, Cana Curuaanaa Cana Coaunera coitucuhin esenetaain neeuchete, Cana Curuaanaa coitucueraneen inanacaaichene coaracurumiin cachaauru. Chaenchu jiaonriha: ‘Abaraan nefoerate nichaanune jaun cha latihaacaanu canacaanu,’ naain inara raajenihane necoritanaa nainiheeiche. Cana Coauneraachate nainere, caa ajeri jaberoco caje Abaraan nefoerate coaunaane.

<sup>9</sup> Chaentechu, inae ajianojoneein ne tero, inaana inae niha temulene rai cojoaisi aina curuataain sauhin usihanau mochacane rijijieein, inae jaoleneein neuruha Cana Coanera coitucutoha nocoetonacaaurune coina,” nae jetao acaauru rai Joaan.

Niritoha acaauru rai Joanne jaun jetaote:

<sup>10</sup> “Chatohanai jana icharihacaanu canacaanuta,” naain caje bajaauruhane jaun jetaote:

<sup>11</sup> “Coroatajaain obiri siricha, nii obiri colane nenea rai leinjiin teeine. Chaen lenone siricha, nii lenone colane nenea rai teenera,” nae jetao acaauru rai Joaan.

<sup>12</sup> Nii jana jetaote, Roma curuaanaa rai *impoesto* nuque cachaauru cobaraain coriqui bajaaurera tabaauru netonai, acaauru baotisaa Joaan necoina turuhin jetao:

“Chatohanai jana ichariacaanu canacaanuta cacha re-laera,” naauruhane jana jetao:

<sup>13</sup> “Jiaonriha aitocuruha inara curuaanaacurune amuritoojaain cachaauru cobaraain leruhin basijiauhichenera,” naa acaauru rai Joanne jana jetaote:

<sup>14</sup> “Chatohanai jana icharihacaanu canacaanuta,” naain caje bajaauruha soondarooru tabaaurune jana jetaote:

“Jiaonriha chatohanai ichaeniha chunine jana couluru-jeein sonaa cocuhin cotaain niicha sirii rulunaa coauquichene. Inara amihaneeo corenihacha ichaaochera,” naa Joanne jana jetaote,

<sup>15</sup> jataain turuha Mesihazine cohajeeurhane jaun jetao:

“Caa canaacha cohajei Mesihasi chara inae caa turuera,” naain jetao ita caje Joaan bajaature nii ecu neein coarajeeurera cachaauru.

<sup>16</sup> Niritiin ita caje bajaauruhane jaun jetaote, acaauru rai: “Canune esinae rauhijiriin, raujiaain acauhanau inara tein inara baotisaaun. Jana nii cacaijie uhenite, Cana Coanera Suujue, usi, naaonjoain que inara baotisaa ureein. Acate jataain camurijiriin nelateein cocoinaain letononeein ne. Nii rai safato ichora rutueranuque nihanatiin nelatejeehaun.

<sup>17</sup> Chaentechu leinjiin inaro uhareein que aroso jiatuhin rai caohacha raain, rai bano mocoha charijibana jacanaacharanejeein nenea usihanaau teeine coina. Nii rijijieeinte, nii jeriha Cana Coanerane rijijieein nenea jeriheichuru mocoha cureein, jerihane rijijieein nenacaauru janijiin raaincha,” nae jetao satiin ecu rene turunacaauru cachaauru rai Joaan.

<sup>18</sup> Niritiin acaauru suujuateein jetaote, acaauru rai Cana Coanera beratenojoi Jesoso que Erenaa Raotono beebeje Joaan.

<sup>19</sup> Chaen jetaotechu, coberenadoro Erodesi netonoai suuju-ate, rai nocoala Ferifi comasai Erodiyasi siria comasaineine jaun, chaen itolere baasooru ichaain nihane jianihane coina.

<sup>20</sup> Nejetaote, nitohaneein nii baaso ichaane ichoae tacaain, caresero cuhane Joaan enoae, rai niritohane coreniha.

*Jesoso baotisaa Joanne*  
(Mt 3.13-17; Mr 1.9-11)

<sup>21</sup> Nitohaneein jetaote, jaiti caresero cuhane enoaniha Erodesine jana, acauhanau satiin cachaauru tein cojunacatenaaca acauru baotisarejete Joaan. Nitohaneein cachaauru baotisaa Joanne jana jetaote, Jesoso netonai nebaotisaerateein Cana Coaunera bajaane jana, nejouracaa dede bacuujuane jana jetao,

<sup>22</sup> nichoae fauhin nelauriaa uhe inanacaain Cana Coaunera Suujue leinjiin serori rijijieein. Nii jana jetaote: "Iite acaihaniji quiicha jeree, quiicha janijiin cacalabineein neeicha," naain toniha erenaa dedeune jana jetao aonajeeure.

*Jesocurisiko foerateeurerauru*  
(Mt 1.1-17)

<sup>23</sup> Inae nii Cana Coauneraacha icharatenohin namiha-neeon nunuhetihane bana jetaote, nichata choonca jaanaca nelu- nii Jose calaohi niha acaauruacha bei Jesoso.

Nii jana nii Jose jetaote Eli calaohi nelu.

<sup>24</sup> Jana Mataa calaohilu jetao Eli.

Jana Lebi calaohilu jetao Mataa.

Jana Meriqui calaohilu jetao Lebi.

Jana Janaa calaohilu jetao Meriqui.

Jana Jose calaohilu jetao Janaa.

Jana Matatiasi calaohilu jetao Jose.

<sup>25</sup> Jana Amoso calaohilu jetao Matatiasi.

Jana Naaoso calaohilu jetao Amoso.

Jana Esili calaohilu jetao Naaoso.

Jana Nacaai calaohilu jetao Esili.

<sup>26</sup> Jana Maati calaohilu jetao Nacaai.

Jana Matatiasi calaohilu jetao Maati.

Jana Semei calaohilu jetao Matatiasi.

Jana Jose calaohilu jetao Semei.

Jana Jodaa calaohilu jetao Jose.

<sup>27</sup> Jana Joanaan calaohilu jetao Jodaa.

Jana Resaa calaohilu jetao Joanaan.

Jana Sorobaberi calaohilu jetao Resaa.

Jana Salatieli calaohilu jetao Sorobaberi.

Jana Neeri calaohilu jetao Salatieli.

<sup>28</sup> Jana Meriqui calaohilu jetao Neeri.

Jana Adiin calaohilu jetao Meriqui.  
 Jana Cosamii calaohilu jetao Adiin.  
 Jana Eremadaan calaohilu jetao Cosamii.  
 Jana Eri calaohilu jetao Eremadaan.  
<sup>29</sup> Jana Jesoso calaohilu jetao Eri.  
 Jana Eliseri calaohilu jetao Jesoso.  
 Jana Jorimi calaohilu jetao Eliseri.  
 Jana Mataa calaohilu jetao Jorimi.  
<sup>30</sup> Jana Lebi calaohilu jetao Mataa.  
 Jana Simeon calaohilu jetao Lebi.  
 Jana Jodaa calaohilu jetao Simeon.  
 Jana Jose calaohilu jetao Jodaa.  
 Jana Jonaaun calaohilu jetao Jose.  
 Jana Eliaquuin calaohilu jetao Jonaaun.  
<sup>31</sup> Jana Meleea calaohilu jetao Eleaquiin.  
 Jana Mena calaohilu jetao Meleea.  
 Jana Matata calaohilu jetao Mena.  
 Jana Nataan calaohilu jetao Matata.  
<sup>32</sup> Jana Rabiri calaohilu jetao Nataan.  
 Jana Isaihasi calaohilu jetao Rabiri.  
 Jana Oberi calaohilu jetao Isaihasi.  
 Jana Bosi calaohilu jetao Oberi.  
 Jana Sala calaohilu jetao Bosi.  
 Jana Nasoon calaohilu jetao Sala.  
<sup>33</sup> Jana Aminadaba calaohilu jetao Nasoon.  
 Jana Admin calaohilu jetao Aminadaba.  
 Jana Esroon calaohilu jetao Armi.  
 Jana Faresi calaohilu jetao Esroon.  
 Jana Jodaa calaohilu jetao Faresi.  
<sup>34</sup> Jana Jacobo calaohilu jetao Jodaa.  
 Jana Isaca calaohilu jetao Jacobo.  
 Jana Abaraaun calaohilu jetao Isaca.  
 Jana Tare calaohilu jetao Abaraaun.  
 Jana Nacoro calaohilu jetao Tare.  
<sup>35</sup> Jana Seroo calaohilu jetao Nacoro.  
 Jana Raco calaohilu jetao Seroo.  
 Jana Fele calaohilu jetao Raco.  
 Jana Eberi calaohilu jetao Fele.  
 Jana Sala calaohilu jetao Eberi.  
<sup>36</sup> Jana Cainaa calaohilu jetao Sala.  
 Jana Arafasa calaohilu jetao Cainaa.  
 Jana Sem calaohilu jetao Arafasa.  
 Jana Nohe calaohilu jetao Sem.  
 Jana Lamee calaohilu jetao Nohe.  
<sup>37</sup> Jana Matosalee calaohilu jetao Lamee.

Jana Enoco calaohilu jetao Matosalee.

Jana Jaredi calaohilu jetao Enoco.

Jana Malareri calaohilu jetao Jaredi.

Jana Cainaa calaohilu jetao Malareri.

<sup>38</sup> Jana Enoso calaohilu jetao Cainaa.

Jana Seti calaohilu jetao Enoso.

Jana Adaan calaohilu jetao Seti.

Nii jana Adaan jetaote, jauriaanejeein Cana Coauneraacha coaunaineen nelu.

## 4

*Jesoso coujuhin coaraa moconajaerane*

*(Mt 4.1-11; Mr 1.12-13)*

<sup>1</sup> Nii baotisaa Joanne baiha Cana Coaunera Suujue que suujuequuin nucuhe Jorodaaun caje cauha cuha Jesosone jana jetaote, cacha areroo amaa Cana Coaunera Suujuene jaun jetao,

<sup>2</sup> ucuaae niha jena choonca janoneeinne jana, nechu cojuha sarue moconajaera.

Nitohanein jenachoonca janoneein lenone lanaala nihane jaun mijiintohane jana jetaote:

<sup>3</sup> “Chajaain aihane esinae rauhijiriin Cana Coaunera Calaohi neeine, caa ajeri jaberoco rai aitoote lenoneneein nerotomiincha,” naa nechu saruha rai moconajaerane jana jetao:

<sup>4</sup> “Coatiha lenoneecha que ichaonaa nainihe i cacha,’ aite Cana Coaunera, rai Quiricha cuhane,” naain tonoraa Jesosone jaun jetaote,

<sup>5</sup> luhecotariin ecuun amaain, satiin caa chauratane coaraatein jetao:

<sup>6</sup> “Canune jitariin canuhacha ichana nainei aina satiin caa chauratane que nenacaauru curuaanaacuru curuaanaanein neeine coina, ichei tenaa naineen. Satiin acaauru canu raineen neeuruhane jaunne chunicoaha jerera rai tenaa naineen.

<sup>7</sup> Aihane jaun neseeriaain canu corojeein, canu bajae bajaequinete satiin ichei niha cureein,” naa moconajaerane jana jetao,

<sup>8</sup> “Nete, ‘Acaihanijin ii Coauneraacha corojeein, rai nelatein niicha jerei ichaau,’ naain laenaerate Cana Coaunera, rai Quiricha cuhane,” naain jetao tonorae Jesoso.

<sup>9</sup> Nii baiha jetaote, Jerosaleeun amaain ecuun Teenforo ichoae inaain jetao:

“Chajaain aihane esinae rauhijiriin Cana Coaunera Calaohi neeine caalai caje nemaroteeute coaracaa.

<sup>10</sup> Cana Coaunera Quiricha inoansi cuhane te:



'Rai letonocuru anjeraauru  
 letoarichaain Cana Coaunera  
 ii beraaihuruhane coina.

<sup>11</sup> Acaaurute rai biji que

ii michuurureein, nabana ajeri que  
 necunaitaaine coataa,'

naain laenaerate Cana Coaunera, rai Quiricha cuhane," naa  
 moconajaerane jana jetao,

<sup>12</sup> "Chaentechu: 'Coa ii Coaunera coujuhin coaraara,' naain  
 laenaerate Cana Coaunera, rai Quiricha cuhane," naain tonora  
 Jesosone jana jetaote,

<sup>13</sup> ecu ratiriin carajaaajoaain caje amuhe nii Moconajaera,  
 neniha tonaain Jesoso coujuhin coaraane jaane coitucueni-  
 hane jaun.

*Calileea bataneu namihaneeo nunuhetiha Jesusone*

*(Mt 4.12-17; Mr 1.14-15)*

<sup>14</sup> Nitohaneein, Cana Coaunera Suujue que suujuequiin ni-  
 icha ichana nainei coitucuhin, Calileea cauha cuha Jesusone  
 jana jetaote, satiin atane sacuritaain jetao que ereeure coitu-  
 cuhacoaain cachaauru.

<sup>15</sup> Nitohaneein cuhin jetaote, netaojiaain Cana Coaunera  
 rai Rauhi que ereereecuruhane jaa coloheri sinacocauru  
 nainein cuhecujeein cachaauru relaane jaun jetao, satiin  
 coroaecure cachaauru.

*Nasareteu niha Jesusone*

*(Mt 13.53-58; Mr 6.1-6)*

<sup>16</sup> Nitohaneein cuujue cuujueein jetaote, nii neein fohe-  
 calune jaan Nasareteu jetao cauha cue Jesoso. Nii jana  
 jetaote, nitohaniha rai nichaone jaun jetao, nebetacaanaa  
 cojoanonaa bana sinacoca asae enoha cue, Cana Coaunera  
 Quiricha ereretaane coina. Nitohaneein ecu enohin chujuhe-  
 cohane jana jetaote,

<sup>17</sup> rai *profeta* inoansi Isaihasicha laenai quiricha teeure,  
 ereretaane coina. Nii Quiricha ereretaane coina jasasaane  
 jana jetaote:

<sup>18</sup> "Cana Coaunera Suujuete

caniha ne,

niicha jerenohineein,

'Inae raotojoeein neriquicheein,'

naain cairichaihuru rai bihanune coina.

Chaentechu,

'Inae jianacoo neriquicheein,'

naain casetecocuru rai bihanune coina caletoe.

Nii choae tacaain techu,

maosacuru coichaaain acaauru nota rautaain,

cairichaihuru ichoteratichaaunne coina caletoe,  
 19 nitohanerichaaain  
 inaraacha cohajei Cana Coaunera Cojoanonaa  
 coitucueratihanu inara quene coina,”

20 naain ereretaane baiha jelaiha nii quiricha seriin, sina-  
 coca curuaanaa rai teein nelauriariin lauhecoha Jesusone  
 jana jetaote, chaque tonaelanaala coarajeeure satiin ecu ne-  
 nacaauru cachaauru.

21 Nii jana jetaote: “Enete esinae rauhijiriin caa Cana  
 Coaunera Quiricha cuhane aitohane rijijieein, satiin inara  
 acatiha turuhe caa naitoonjoa coarajeeichene notaracae,”  
 naa acaauru rai Jesusone jana jetaote,

22 ita rai ereerecure caohacha ichaa Jesusone que, satiin  
 cojoelatiin coarajeein, acaauru rai raotojoein ereerecane  
 jaun. Nejetaote tabaauru:

“Tajian caa Jose calaohinihaneta,” naain jetao ita caje ba-  
 jaure.

23 Nii jaun jetaote:

“Jerihanete esinae rauhijiriin caque, ‘Aihane, cacha  
 coichana inaeraneene, ichaajenihaane nocohichaaain  
 canacaanu notaacune coaracaanura,’ naain caque ereeiche.  
 Chaentechu jerihane, ‘Aihane itolere ichaai Caferenaonne  
 rijijieein, cau chatane que jerichanejeein itolere ichaain  
 canacaanu notaacune coaracaanura,’ naain ereeiche canu  
 esenetaeneinchene jaun,” naain jetaote:

24 “Esinae rauhijiriine inara rai aitoreeunni. Coatiha  
 esinae rauhijiriin, caohachaaain ranojooinein niheilulu chuni  
 Cana Coaunera ere beraneen nenacaauru *profetacuru* rai  
 nataneque.

25 Coaracuche nachuhinti jataain arajiin neuruhalu Is-  
 raelitanichaachene benecuru autanaaunru, nihalu Cana  
 coaunera ere bera *profeta* Irihasine banane. Nii banate  
 nichata jaanaca amurijiriin uheniha elone jaun, baneje-  
 lanaala cana atane Israeli batane sacuritaain nelu mijitena  
 omarioeniha temulene jaun. Nete nii cana benecuru au-  
 tanaauru rene letono nenelu nii bana nena *profeta* Irihasi.

26 Nete laen coriaae atane que leinjiin Sidoon nese roha  
 nena Sarepta neein curuajai neseu cana lauri Israeli-  
 tanelanaala nena autana renecha letononeein kuhelu nii  
 Irihasi, nii autana rai lenone faane coina.

27 Jerichanejeein techu, arajii cana laurichuru  
 Israelitacuru somane cauun cunaitecuruhane jana,  
 acaauru rautaaenelu Cana Coaunera ere bera *profeta*  
 inoansi Iriseeo, cana lauri caje nena nihane saijieein. Nete  
 laen, leinjiin Siria cocoaicha cana lauri Israelitanelanaala

nenaa Naamaanha jetaote rautaelu,” nae jetao acaauru rai Jesoso.

<sup>28</sup> Niritoha acaauru rai Jesusone jaun jetaote, satiin aina jataain obaecure nii sinacoca asaae nenacaaauru cachaaauru.

<sup>29</sup> Nitohaneein aina obajeein nimichucutaain jetaote, nii sinacoca caje sitaain, ichatane ecuunoo ichoae ichanohi niha nii nesene jaun jetao, ecu amaaunre jelai caje coauneein nii Jesoso saruhitocuruhane coina niqui,

<sup>30</sup> nejetaote, cha que tonajelanaala acaauru cataaun situhin amuhe Jesoso.

*Suujua cuhane coitucuchuhi siricha cache*  
(Mr 1.21-28)

<sup>31</sup> Nitohaneein sitaauruhane jaun amuhin jetaote, Calileea batane que nenea Caferenaanon cue Jesoso. Nitohaneein cuhin, ecu turuhin jetaote, ecu neein nebetacanaa cojoanona bana,

<sup>32</sup> ecu nenea sinacoca asaae neein cachaaauru relaane jana jetao, rautatiin aonajeeure cachaaauru, leeochoauru cache relaaurera rijijielanaala, esinae rauhijiriin rai suujua caje rocohin acaauru relaane jaun.

<sup>33</sup> Nii jana jetaote, nii sinacoca asaae ne leinjiin rai suujua cuhane coitucuchuhi siricha cache. Aca jetaote, tonijiaain ehequiin:

<sup>34</sup> “Coa canacaanu rohehacaara Nasarete cocoaicha Jesoso. Nechu canacaanu cairichaaain canacaanu itajihate uhicha. Canune raotojoein ichoitucuunra. Iite acaihaniji Cana Coaunera letononeein nenaaneeicha. Canacaanu jianeura,” naane jana jetao,

<sup>35</sup> “Coa maitaa. Nii cache suujua jianein caje amuura,” naa Jesusone jana jetaote, satiin cachaaauru acatiha chatohanein cunaitaelanaala atane ichoae nii cache siheitiin rai suujua caje amue nii coitucuchuhi.

<sup>36</sup> Nii jana jetaote, satiin nesooneitiin coarajeein jetao: “Chatohanai cocainanacainein nenaana caa cache, jataain chaque tonajelanaala nere nejesinaacha que caritohane jana caa cache suujua caje mituha coitucuchuhi, rai nere tonoraainne coina,” naain jetao ita caje bajaure ecu neein nii coarajeeurera cachaaauru.

<sup>37</sup> Nitohanihane jaun jetaote, satiin nii atane sacuritaain jetao, Jesoso que ita rai ereerecure cachaaauru.

*Simoon Fedoro tano rautaa Jesusone*  
(Mt 8.14-15; Mr 1.29-31)

<sup>38</sup> Inae nii sinacoca caje mituhin, Simoon loreri asae turuha cuha Jesusone jana jetaote, najiniha ajaa caaun cunaiteein

niha Simoon tanone jaun jetao, Jesoso rai aitocure rautaane coina.

<sup>39</sup> Nii jaun jetaote, nichoae nenoracaain nii ajaa sitaa Jesosone jana jetao, inae caje amuhe nii ajaa. Nii jaun jetaote, inae nerautaane jaun nimichuin acaauru rai lenone chalue.

*Arajii cunaitenaacuru rautaa Jesosone*  
(Mt 8.16-17; Mr 1.32-34)

<sup>40</sup> Nii jana jetaote, inae nuna macohi ichoae teejia enotone jana, araai laurii cunai caaun cunaitenacaauru turuaa cuure Jesoso rene, acaauru rautaane coina. Nii jana jetaote, cajanee cajanajeein acaauru ichoae biji meracaane jaun jetao nerautaaacure.

<sup>41</sup> Chaen jetaotechu, suujua cuhane moconajaera letono sirichaauru netonoai rautaane nii nerautanacaauru cachaauru caje mituhin:

“Iite Cana Coaunera Calaohi neeicha,” naauruha cojiorinne jetao, ereeuruha nii coitucuhichurune caohate Jesoso, Aca Mesihasee in nihane coitucuruha nii coitucuhichurune jaun.

*Sinacoca asae Cana Coaunera cojoanonaa beebejia Jesosone*

<sup>42</sup> Nitohaneen jetaote, inae nemataracaa janonaane jana, nii nese caje amuhin neniha cachane jaa cue Jesoso. Nii jaun jetaote ariin, nii nihane jaa turuhin, jelai caje amuhane caohateuruha cachaaurune jana jetao,

<sup>43</sup> “Nena leeochoauru nenaanajaaunru cuhecujeein Cana Coaunera Cojoanonaa beebejia cureeun, nii coina letononeen nihanune jaun,” nae jetao acaauru rai Jesoso.

<sup>44</sup> Nitohaneen jetaote, Jodea batane sacuritaain nenacaauru Israelitacuru rai sinacocacuru naineen cuhecuje niicha beeni beebejeein.

## 5

*Cojoelanaacojoaain ate mucuuruhane*  
(Mt 4.18; Mr 1.16-20)

<sup>1</sup> Calileea conemuri auhaniha turuhin, ecu Cana Coaunera naitoonjoan que cachaauru relaa Jesosone jaun, aonaa tururuha arajiinne jaun jetaote, sururucure cachaauru.

<sup>2</sup> Nitohaneen sururucuruhane jana jetaote, caje fauhin redeeuru culeecuruha ate mucuurerane jana, carene que conera colane coroatajaain boteeuru coari Jesoso.

<sup>3</sup> Nii jana, Simoon rai niha nii ecu nena leinjiin botene jaun jetaote, cuhane fauhin, nemuri auha caje acuu cataaunjeri nii bote amaa Simoonne coina aite Jesoso. Inae nemuri auha caje acuu cataaunjeri amaauruhane jana jetaote,

nii bote cuhane netiin, ecu nelauriariin caje coauneein cachaauru rai ereerejeein acaauru relaje.

<sup>4</sup> Inae acaauru relaane nainain jetaote:

“Taa nemuri ucuaano que caa bote amain, ecu caa inara rai redeuru jaochete ate mucuhichera,” naa Simoon raine jana jetaote:

<sup>5</sup> “Nena inae janoaajeein rede jaohacaanu natiin, leinjiinni-jin ate mucuelanaala janohacaanura cacha relaera. Nenachu ii aitohine jaun, nacoauneein caa redeuru jaohin coaraa curichaanura,” naain jetao tonorae Simoon.

<sup>6</sup> Niritoha acaauru rai Jesusone jaun redeuru jaoruhane jana jetaote, jataain arajiin ate mucuuruhane jaun jetao, ate caaun nesoaiji nii acaauru rai redeuru.

<sup>7</sup> Nii jaun jetaote, leecha bote cuhane nenacaauru acaauru leechaauru cotihacure biji que, acaauru coroatajaniha cuuruhane caina. Nii jaun jetaote cuhin, nii coroatajai bote nemoaauruha ate quene jaun jetao, jataain naluhene rijijieein nelemue nii coroatajai bote.

<sup>8-9</sup> Nitohanein jataain arajiin ate mucuuruhane jaun jetaote, jataain cojoelatiin satiin nesooneetooruhane jaun, Jesuso tijia asae neseonriaain jetao:

“Jataain osaaotohanune jaun ii rohan nenea nainihaunta Curuaanaa,” nae jetao Simoon Fedoro nesoone caaun.

<sup>10</sup> Nii jana jetaote, nii Simoon aina neurelu Sebedeeo calaohichuru, Joaan, Saantiaao, naaonjoaihunri, nii Simoon aina ate mucueraneein neeuruhane jaun.

Niritoha Jesuso rai Simoonne jana jetaote:

“Coa nesooneetohara, Simoon. Inae ate mucueraneein nerihieini. Ena caje coauneinte, cachaauru mucuhin raeranein neriquincha,” nae jetao rai Jesuso.

<sup>11</sup> Niritoha raine jaun jetaote, atane ichoae acaauru rai boteuru inaain, jitariin niicha sirii ratiriin jetao Jesuso aina cuure Simoon Fedoro, Joaan, Saantiaao, naaonjoaihunri.

### *Leinjiin cosibi ruhecaera cacha rautaa Jesusone*

<sup>12</sup> Nii baiha leinjiin neseu neeuruhane jana jetaote, Jesuso rene turuha cue leinjiin cacha cosibi ruhecaain caaun cunaiteein, nitohanai cunai siricha cacha leechaauru rohan turunaa nainenihane saiijieein. Aca jetaote, Jesuso coariin atane que nauri turuanacanejeein notoroaain jetao:

“Ii jereeine canu rautaa caa canu cosibi cajera Curuaanaa,” naane jana jetao:

<sup>13</sup> “Jerichaaun chujian. Ii caje amuhine caa ii cosibi,” naain biji que dadae Jesuso, nihei chuni cacha, nitohanein

cosibi ruhacaera dadanaa nainenihane saijieein. Nitohaneein dadaa Jesusone rijieeoritiin jetaote, inae caje amue nii rai cosibichuru.

<sup>14</sup> Nitohaneein rautaaain jetaote:

“Inae nerautaaicha. Coa chaen chuni rai: ‘Acate canu rautaera,’ naain caque iriha. Raujiaaincha Cana Coaunera aina caohachaaain niha cachane coina rucuhaneein nena saseredote rene turunihute, inae coulunohineein ii cosibi caje nerautaaaine coaramiinch. Chaen nerautaaaine coujunacane que nii aitohalu Moisesane rijijieein belaaaine jaanu amaain teeu saseredote raicha. Aihute inae nerautaaain somaraain neei nii ii cosibi cajene coaraain, inae acaauru rohan turunaa naineine coitucuurumiin satiin cachaaurura,” naain jetao letoae Jesuso.

<sup>15</sup> Ne jetaote, niritiin bihane caohatiha Jesusone saijieein, acaauru rautaane coinane maajeein jataain jelai amuritoheriin turuhacoaain coaraain aonaa uure cachaauru.

<sup>16</sup> Ne jetaote, tabaauru que acaauru caje amuhin, nii neniha cachane jaau cuhin jetao Cana Coaunera bajarejtelu Jesuso.

*Leinjiin jiuirona rautaa Jesusone  
(Mt 9.1-8; Mr 2.1-12)*

<sup>17</sup> Nii baiha, cachaauru relaa Jesusone jana jetaote, ecu nelauriaacoaain aonajeeure fariseeocuru tabaauru, Cana Coaunera naitoonjoa que cacha relaaaurera, naaonjoainuri, Calileea batane, Jodea batane, Jerosaleen, naaonjoaihunri sacutaainchuru caje uhacoaain. Nii jana jetaote, aina cuaain niicha ichana nainei ichaa Cana Coaunerane jaun, cunaite-nacaauru rautaacoaa Jesusone jana jetao,

<sup>18</sup> leinjiin cacha jiuirona turuaa uure cachaauru, rai nela cuhane tijichaaain amaain. Inae turuaain jetaote, loreri asae enoanaa jerecure, nacatiha coaraa Jesusone coina niqui.

<sup>19</sup> Ne jetaote, nene enooruhane jaanu, jataain araaicha cachana jaun. Nii jaun jetaote, loreri coarana joaracaain jetao rai nela cuhane tijichaaain, satiin cachaauru cataaun jetao Jesuso acatiha nii jiuirona cacha faaure.

<sup>20</sup> Nii jana, esinaen rauhijiriin rautarichaaainne esenetaain aihuruha nii cachaaurune coaraane jaun jetaote:

“Inae ii que suujua acateein ii osa caje ichoteratenohinee-icha cacalabi,” naa Jesusone jana jetao, inae nerautae nii cunaitenaa cacha.

<sup>21</sup> Niritiin nii jiuirona rautaa Jesusone aonaain jetaote:

“Chaneeinna ne caa cacha, caritiin ereein Cana Coaunera baijiaraanu rijitiin irihane coina. Leinjiin Cana Coaunera aachate nainere nosa caje cacha ichoterateein cacha que suujua acateein nihanera,” naain jetao ereeure Cana Coaunera naitoonjoan que cacha relaaunera aina fariseeocuru.

<sup>22</sup> Niritiin que ereeuruhane que nainaain jetaote: “Chanuna niritiin ereeiche.

<sup>23</sup> Chaquena caaintare: ‘Inae ii que suujua acateein ii osa caje ichoteratenohineeicha,’ naenihacane: ‘Nimichuhin amuun,’ naacane.

<sup>24</sup> Coarajeeuchenejian, Cana Coaunera Calaohi cachaneein nejanoanaa nichaaunne, itolere Curuaanaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiurona cacha rai jetao:

“Icheine aitoon. Nimichuhin chela seriin chenenajaun caunihu,” naane

<sup>25</sup> rijieeoritiin jetao, satiin coarajeeuruhane notaracae nimichuhin, nii tocuhacane jaa nela seriin jetao, Cana Coaunera corojeein rai nenajaun cauha cue nii jiurohane caje nerautanaa cacha.

<sup>26</sup> Nitohaniane coaraain jetaote, satiin cojoelatiin Cana Coaunera coroaacuruhane saijieein jetao coasiin:

“Charijibana coaraa catohanaine que airijiinte, enene catohanai cojoelanaacojai coaracaachera,” naaure jetao ita rai.

### *Lebi cotijiaa Jesusone*

*(Mt 9.9-13; Mr 2.13-17)*

<sup>27</sup> Nitohaneein nii jiurona cacha rautaane baiha, jelai caje mituha cuuruhane jaun jetaote, leinjiin cacha, Roma curuaanaa rai *impoestonu* que coriqui que cachaauru cobaraera Lebi coari Jesuso, nii coriqui teuruhana jaa rori ichoae lauheco jana. Nitohaneein coariin jetaote:

“Chajaau canihara,” naain cotihaca Jesusone

<sup>28</sup> rijieeoritiin nimichuhin jetao, satiin niicha ichanenu ratiriin Jesuso jiniichaain aina cue Lebi, caaijie cunacaauru aina.

<sup>29</sup> Nitohaneein Jesuso jiniichaain cuhin jetaote, nii baiha neenejeein coroaena caaun rai loreri asae beseta ichaa Lebine jana jetao, ecu neeure arajiin leeochoaauru Roma curuaanaa rai *impoestonu* que coriqui que cachaauru cobaraaurera, chaen leeochoaauru cachaauru, naaonjoaihunri.

<sup>30</sup> Nii jaun jetaote, Jesuso aina nerelanacaauru rai:

“Chanuna cocoaeraa Roma curuaanaa rai *impoestonu* que coriqui que cachaauru cobaraaurera aina leeochoaauru osaaonacaauru aina lenoneein, acau cohin, naaonjoainchene

saijieein, nii acaauru aina netaojiaain lenonequiche,” naaure jetao acaauru rai, nechuh jataain acaauru que iriha Cana Coaunera naitoonjoa que cacha relaaaureraauru fariseeocuru aina leeochoaauru fariseeocuru.

<sup>31</sup> Niritocuruha nii aina nerelanacaauru raine aonaain jetaote:

“Coatiha coichara latecuruhi raotojoein raurohin nenaacaauru. Leinjiin cunaitenacaauruhachate coichara latecure.

<sup>32</sup> Coatihachu baaso ichacuruhane nihanatiin coitucunaa jeriheichuru cotihaca uhahaun. Leinjiin osaaocuruhane coitucuureraaurune cotijiaaun, rai suujua coreein jeriha Cana Coaunerane rijijieein neeunruhane coinara,” naain jetao tonoranajae Jesoso.

*Ena Niicha Tei Ichaonaa que cacha relaa Jesusone*

<sup>33</sup> Nii jana jetaote:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaee bajaecure suri couu netiin cosinacaain. Nete laen itolere bana ii aina nerelanacaauru, acau cohin, lenoneein, naaonjoaunreta,” naauruha Jesoso raine jana jetaote:

<sup>34</sup> “Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu neein cosinacanaa nainecurene caa cotihanohinchuru, jaiti acaauru aina niha nii ene raeranu cachane jaun.

<sup>35</sup> Nete laen, inae nii jianacoon teein cacha ranaa jerera nichaaunne amaauruhane suri couu neein cosinacaain inaderaa cuurureeinha,” naain jetao:

<sup>36</sup> “Coaraanachuhinti, nihei chuni, obiri enachasine soaain que cajione siri counera. Nitohaneein nii obiri enachasine soaihanete nii obiri enachasine asaaere, nii cajione siri. Chaen caohachaain nedanaa nainihei nii obiri enachasine, nii cajione siri que couneraane.

<sup>37</sup> Nii rijijieeinchu, nihei chuni inae conaca que tiha coaeraine jana cuhane ichonai tera.

<sup>38</sup> Nitohaneein cuhane teraa ichonainete naasaare nii coaerai.

<sup>39</sup> Niheichu coaerati cohane baiha ichohanti coera, ichonai amuritoheriin raotoha coaeratine jaun,” nae jetao, cacha relaaauruha fariseeocurune rijijielanaala, leeochoaneein cacha relaane jaun.

## 6

*Nebetacanaa janonaa bana tirico moloonejeuruha Jesoso  
aina nerelanacaaurune  
(Mt 12.1-8; Mr 2.23-28)*



1 Nebetacanaa janonaa bana tirico coocana jana situu-jueeuruha aina nerelanacaauru aina Jesusone jana jetaote, nii tirico moloonejeein biji cuhane situsitunijihanaain nu-cuhe quihure nii aina nerelanacaauru.

2 Nii coaraain jetaote:

“Chanuna nebetacanaa janonaa bana cocoaeraa nitohanai ichara natiin, nitohanai ichacure nii ii aina nerelanacaauru,” naain bajaauruha fariseeocuru tabaaaurune jana jetaote:

3-4 “Aiha niqúi. Nete laenanohineein ne Cana Coaunera Quiricha cuhane. Tana lesajei que Cana Coaunera loreri taberenacolo asae enohin Cana Coaunera que banijiainein niha nii faan natiin, mijitenacaaun rai corihacuru aina jini-iquiin nii faan quiha Rabirine ereretaain coaraqicheneta. Acaihaniji saseredotecuruhacha nii faan quihane rai niha-natiinte quihurelu,” naain jetao:

5 “Canu- cachaneein nejanoanaa nichaaunnena, nebetacanaa cojoanonaa amurijiriin cocoinanohineein neeun.” naain jetao acaauru tonorae Jesuso.

### *Jiurona bijihona cache*

*(Mt 12.9-14; Mr 3.1-6)*

6 Nii baiha jetaote, coaiten nebetacanaa cojoanonaa bana, sinacoca asae enohin cachaauru relaa Jesusone jana jetao, ecu acaauru jana niha leinjiin cache, rai biji raotono nichajai que jiuronane jaun jetaote:

7 “Necha caa nebetacanaa janonaa bana nihane saijieein, caa jiurona bijii cache rautarichaaainta,” naain jetao, Jesuso cojoelaaure colurujueeuruhane jaan lera ariha aihuruhane jaun, Cana Coaunera naitoonjoa que cache relaurera aina fariseeocuru.

8 Ne jetaote, nii cojoelaauruhane que nainain jetao, nii jiurona bijii cache rai jetao:

“Nimichuhin nii ena cataaun nichaauraaura,” naa nii Jesusone jana jetaote, nimichuhin nichaauraa nii cachane jaun jetao, nii fariseeocuru rai:

9 “Inara raine leinjiin erenaa bajanaa jereeun. Chatohanai ichacaane caohachae. Nebetacanaa janonaa bana, cache ichao rai caohacha ichacaanena caohachaa. Ainihane cache ichao itajihacanena caohachaa,”

10 Nii baiha jetaote, nii ecu satiin curuhacaain nenacaauru coaraain jetao, nii cache rai aitoha jetao:

“Ichoii raujiaaute coaracaara,” naa rai Jesusone jana jetao, rai biji raujiaa nii cachane jana jetao, jiurohane caje inae nerautae nii cache biji.

11 Nitohaneein nii jiurona rautaane coaraain jetaote: “Chana icharihacache caa aansai aina,” naain jetao,

jataain Jesoso aina obaaecure nii ecu neein coarajeeurera fariseeocuru aina Cana Coanera aitoonjoan que cacha relaaaurerauru.

*Lechoonca coroatajai rai afosotooru janiicha Jesusone  
(Mt 10.1-4; Mr 3.13-19)*

<sup>12</sup> Nii bana jetaote, ichtatane ecuunno que cuhin, janoaa-jeein Cana Coanera bajaebajajeein janoe jetao Jesoso.

<sup>13</sup> Inae janohane jana jetaote, nii aina nerelaa amuhemuhenaacaauru jitariin cotihanajaain acaauru caje jani-jiin lechoonca coroatajaihuri cocoinaain, afosotooru neein acaauru curuaate. "Afosoto" naanete, "Letononeein nena" naane aite.

<sup>14</sup> Nii niicha janijiichuru jetaote, Simoon- nii Fedoro neein niicha curuhateeni, chaen nii Simoon nejera Aanderesi, chaen Saantiaao, Joaan, Ferifi, Bartolomee,

<sup>15</sup> Mateo, Tomasi, chaen Arafeeo calaohi- Saantiaao, chaen Selote neein niicha curuaatehuri- Simoon,

<sup>16</sup> chaen Saantiaao calaohi- Jodasi, chaen nii Jesoso coulu-rujueranu Jodasi Isacariote, naaonjoaihurine.

*Arajii cacha relaa Jesusone  
(Mt 4.23-25)*

<sup>17</sup> Inae nitohaneein ichtatane ecuunno cuhin, nii rai afosotooru janijiin cocoinaane nainaain jetaote, acaauru aina jiniiquiin atane macararo que fauha cue Jesoso. Nii jana jetaote, ecu turuhin nii aina amuhemuhenaacaauru aina netaojiaaure arajii cachaauru. Jodea batane, Jeros-aleun, cucuhana auhaniha nenacaauru neseeu- Tiro aina Sidoon, naaonjoaihunri cajeeurune maajeein turuha-coaure. Acaauru relaa Jesusone aonanacanejeein, acaauru rautaa acaauru cunain cajene coinane maajeeinchuru turu-ure jataain arajiin cachaauru.

<sup>18</sup> Nii coitucuchuhi ichanohineein cunaitenacaauru rautaane jana jetaote, nerautaacoaure.

<sup>19</sup> Nii coaraain jetaote, satiin cachaauru, Jesoso dadanaa jerecure biji que, aca jerihane rijijieein nerautaacoaauruha nii cunaitenacaaurune coaracuruhane jaun.

*Raotojoein neeuruha tabaaurune jana tabaaurute raote-lanaala neeurureein.  
(Mt 5.1-12)*

<sup>20</sup> Nii jana jetaote, nii aina nerelanacaauru coaraain jetao:

"Ena cairicheineein neeichene natiinte, nerausiajeein nee-iche, Cana Coanera cojoanona inara rai nihane jaun.

<sup>21</sup> Ena mijitenaanaun neeichene natiinte, nerausiajeein neeiche, nii chaque lanaelanaala neriquicheine jaun.

Ena chanaaiche natiinte, nerausiajeein neeiche, rachoojoein enoanaain neriquicheeine jaun.

<sup>22</sup> Canu cachaneein neeichene coreniha, inara cotaain, inara sitaain, inara nocoeje chanuhin, inara que jaolequiin naaonjoaauruha canu corenihane nihanatiinte nerausiajeein neriquicheein.

<sup>23</sup> Nitohaneein inara teeuruhane nihanatiin jataain raotojoein rachoojoein neeuche, canu coreniha dedeeu raotojoein neriquicheeinne jaun. Coaracuchenachuhinti, inara cairichaaauruha inara araaichurune rijijieein, Cana Coaunera ere beracuru *profetacuru* cairichaeriin nerejetucuruhalu acaauru inoensihuru.

<sup>24</sup> Coaraain nainacuche coriquihonacaauru. Inae ena aachene rijijieein rachoojoein niha curieeicheein.

<sup>25</sup> Coaraain nainacuche ena raotojoein lenoneein nenacaauru. Inae nerinaain inara rai lenone.

Coaraain nainacuche ena enoanaain nenacaauru. Inae inaderanaa caaun chanaa curiquicheein.

<sup>26</sup> Coaraain nainacuche itolere neein atane sacuritaain coroaenohineein nenacaauru. Nitohaneeinte *profetaniha* nocoetonacaauru coroajeein nerejetocurelu inara inoensihuru.

*Ichei nejeratenacaauru belaihu.*

<sup>27</sup> Nena laen inara canu ere tonoraera nequichene rai aitoreeunni. Inara que nererojoecain jaolequiin nenacaauru belaaain caohachaaain acaauru aina neeuche.

<sup>28</sup> Nechu jataain inara cotaiha: 'Coaraain nainacuche necha aansaihuru,' naain inara que ereein nei belaaain, rai Cana Coaunera bajaache.

<sup>29</sup> Chunucoha lejerajei chomeri faohitohane, rai jera netonai icharateeu. Jana chunucoha ii cajione buri ruluhane, rai ii obiri netonoai teeute amaaine.

<sup>30</sup> Jerichanejeeinchu, ii caje chaelai bajaeranihane teeu. Coa ii caje iicha sirii rulueranihane, coa tonaain iriha.

<sup>31</sup> Charijieeinchaainti, inara belaiha cachane jeriquiche, nii rijijieein acaauru belaihuiche inara netonai.

<sup>32</sup> Inara belaichaauruhacha belaaain neeichenete, aihuruha nii Cana Coaunera coitucuelanaala nenacaaaurune rijijieein neriquicheein.

<sup>33</sup> Nii rijijieeintechu, inara coroatajaneraauruhacha belaaain neeichene, aihuruha nii Cana Coaunera coitucuelanaala nenacaaaurune rijijieein neriquicheein.

<sup>34</sup> Chaentechu, chaelai lateein niha cachane jana, inara rai cainaane caina teeichene, aihuruha nii Cana Coaunera coitucuelanaala nenacaaaurune rijijieein neriquicheein.

<sup>35</sup> Jana laen, nii inara que jaolequiin, inara que nererojoe-caaeriin, naaonjoaain nenacaaru aina caohachaain neein, chaelai latecuruhane acauru rai teeiche, inara rai cainacuruhane latelanaalane, caohachae. Nii rijijieein neeichenete, esinaen rauhijiriin jerihane rjijieein ichaquichene jaun, inara rai nii cainareein Cana Coaunera, nitohaneein acauru belaiha natiin coitucunaa jerelanaala nenacaaru, neechu aansaneein ichaonacaaru, naaonjoaihunri belaiin ichaa Cana Coaunerane jaun.

<sup>36</sup> Nii cairichaaajoaain cachaauru coaraa Cana Inaca Cana Coaunerane rijijieein, inara netonoai cairichaaajoaain inara amute cachaauru coaracuche.

*Jiaonriha leeochoauru que baasoneein ereein neeichene*  
(Mt 7.1-5)

<sup>37</sup> Jiaonriha leeochoauru amurijiriin nena coacuhin, leeochoauru que baasoneein ereein neeichene, nabana, nii leeochoauru ichaquichene rijijieein inara tiha Cana Coaunerane coataa. Chatohanai ichaa inara leeochoaurune, acauru que inara suujua acatecuchete, inara que netonoai suujua acatemiin Cana Coaunera.

<sup>38</sup> Chaelai lateein neuruha inara amute cachaaurune jana rai teeichenete, inara rai inaraacha latei tereein Cana Coaunera. Jitariin inaraacha sirii teeichene nihanatiinte, jelai amuritoheriin inara rai cainareein Cana Coaunera. Chaentechu leeochoauru coaraquichene rijijieein, inara netonain coareein Cana Coaunera,” naain jetaote:

<sup>39</sup> “Coatiha nelaterihe, leinjiin maosa amaeraanu que niha leeochoa namute maosane. Enaachate nitohanihane, leinjiin ecuha jachu cuhane naluhin jiniiquiin nitajenaa nainecurure.

<sup>40</sup> Niheichu nii chuni, rai relaera amurijiriin nena nainera. Nii inara relaera rijijieein nerelaichene banaachate nainereiche, raujiaain rijijieein neeichene.

<sup>41</sup> Chanuna inejeraacha baaso ichajeein ichaohane coaraai. Tana iitonai jataain amurijiriin baaso ichajeein ichaohine coaraaine.

<sup>42</sup> Chasiina iitonai baaso ichajeein ichaohine coitucuneeine, baaso ichajeein ichaoha inejerane coitucureei. Jauriaanejeein ii baaso ichajeein ichaohine coitucuhin jianein ichaao. Nii baihate laen nainereei inejera rai: ‘Baaso ichajeeinte ichaohi. Chajaain baaso ichajeein ichaohine jianein caohachaain ichaao,’ naain erenaa nainereei.

*Rai ninna cajete, coitucunacaine temule caohacha*  
(Mt 7.17-20; 12.34-35)

<sup>43</sup> Nihei chuni temule caohacha, baaso que inaana nainei. Niheichu temule baasoniha natiin caohacha que inaana nainei.

<sup>44</sup> Nitohaneeinte, rai ninaa caje temule caohacha coitucuhaca. Nitohanihane jaunte, chabana tijiemule que inaana nainene oja. Jerichanejeein chu chabana cajiauhi que, inaana nainiheijiaaen soririji.

<sup>45</sup> Nii rijijieein techu, caohachaaain suujua coara cacha, caohacha nejesina que ere, satiin caohacha- rai suujua cuhane nihane jaun. Jana cacha, baasoneein suujua coarate baasoneein ere, satiin baaso- rai suujua cuhane nihane jaun. Nitohaneeinte cacha ujuae caje mitue satiin rai suujua cuhane nena.

*Coroata laurii loreri icharaauru rijiicha nere aonaera biha Jesusone*

<sup>46</sup> Chanuna itolere bana, 'Canu Curuaanaa,' naainchene sainejeein quere tonoraain quiicha jerei ichaeneeiche.

<sup>47</sup> Aonacuchena inara rai canu ere tonoraain caitoonjoan icharaauru que erete coitucuhiche.

<sup>48</sup> Charijiein chaainti, loreri jaane coina jauriaanejeein ucuaatiin bajeein, enuha suuji caohachaauru temuhin ichaa leinjiin cachane jana, uha tabanaane jana que tacaa uuji-naa mijiaaeneein nihanatiin nii loreri comaene, caohatiin ichanohin nihane jaun. Nii rijiicha cacha, canu ere tonoraain caitoonjoan ichaa chabana jianelanaala ne.

<sup>49</sup> Jana quere tonoraeniha cachanete, araracaaeriin atane bajeein, baasooru que banesijiateein loreri ichara cacha rijijieein ne. Nii jana uha tabanaane, que mijiaaeneein tacaa uujuinaane jana, beraujuaain nitaje nii loreri, nii rijiicha nii canu aonaane sainejeein, quere tonoraelanaala nenacaauru cachaauru," nae acaauru rai Jesoso.

## 7

*Romanocuru rai soondarooru curuaanaa cafitaan letono rautaa Jesusone*

*(Mt 8.5-13)*

<sup>1</sup> Inae nii cachaauru rai irihane nainain jetaote, Cafere-naaon cue aina nerelanacaauru aina Jesoso.

<sup>2</sup> Nii jana jetaote, nii Cafere-naaon ichoae leinjiin Romanocuru rai soondarooru curuaanaa cafitaan. Nii jana nii cafitaan letono- jataain belaaain niicha sirii jetaote, cunaiteein ohane rai ne.

<sup>3</sup> Nii jaun jetaote, nii Cafere-naaon turuhin niha Jesusone inaaoriin jetao, Jorioocuru bichauhenaauru letoae nii cafitaan, conujueein Jesoso cotihaca cuuruhane, nii rai letono cunaitena rautaa uhane coina.

<sup>4</sup> Nii jaun jetaote, rene turuhin:

“Tine cotihaca uhacaanu canacaanu letoaa cafitaane jaunra.

<sup>5</sup> Jataain canacaanu araachuru belaichaneein, aca canacaanu rai sinacoca ichaerateein, naaonjoaain nihane jaunne, caa cafitaan coroatajanein rai letono rautaaaine jerichaanura,” naaure jetao Jesoso rai.

<sup>6</sup> Nii jaun jetaote, acaauru aina cuhin, inae turuhe lalajeein cujueeruha Jesoso ainane jana jetao, rai belaichauru letoae nii cafitaan: “Curuaanaa, coatiha nii chaque ichei nelateein nihaaun canu loreri asae turuhine coina.

<sup>7</sup> Nii jaunne caraajenhane ii cotihaca uheneeun. Acaihaniji aitoote nerautamiin canu letono. Ii aitohine rijijieein nerautarichaaain canu letonone coitucuhanune jaunne ichei raujiaain berateeun.

<sup>8</sup> Nii rijijieeinne canu letoaauruha canu curuaanaacurune tonoraain neeun. Nii rijijieeintechu, canu bijiu nenacaauru soondarooru caje chunucoha letoaanune, canu ere tonoraain cue. Jana chunucoha cotihacaun uhane coinanete canu ere tonoraain uhe. Jana canu letono letoaanu chaelai ichaane coinanete canu ere tonoraain ichae, nanichuchera,” naain letoaa cafitaane jaun inae aitoha cuuruhane jana jetaote,

<sup>9</sup> cojoelatiin, nii aina amuhemuhenaacauru cachaauru coarajeein jetao:

“Coatiha Isaraelita nichaachene lauri jana, caa cacha tocohaneein jataain quesenetaera coarahaaunta,” nae jetao acaauru rai Jesoso.

<sup>10</sup> Nii jana inae jelaiha cauha cuuruha nii cafitaan loreri asae nii niicha letoaurine jana jetaote, inae acaauru ajiniha nerautaaain niha nii rai letono cunaitenaane jana turuure.

### *Leinjiin autana calaohi ichatiha ohane caje Jesusone*

<sup>11</sup> Nitohanihane baiha jetaote, aina nerelanacaauru, chaen arajiin sacuurera cachaauru, naaonjoaihunri aina leinjiin nese Naain ineein curuajai nichae cue jetao Jesoso.

<sup>12</sup> Nii jana jetaote, inae turuhelalajeein cujueeruha nii nese quene jana jetao, leinjiin ene autana calaohi- leinjiin acaacha calaohineein nena onaa conautiha jetao cuure. Nii jana jetaote, nii nese caje cuhacoaain arajiin corihaniha cuure cachaauru.

<sup>13</sup> Nii jana nii autana coaraa Jesusone jana, cairichaa-joaain coaraane jaun jetaote: “Coa chanaara,” naain jetao,

<sup>14</sup> nii rijieeoritiin, nii onaa roha nichuuntaain, nii amaaun-ruhane jaa rori dadaane jaun jetao, ecu inacuhin coarajeeu-ruha nii baijiaain amaurerane jana jetao:

“Enamanaa, nimichuhin nelauriaaura,” naa Jesusone jana jetao,

<sup>15</sup> inae nimichuhin nelauriaain ere nii onaa. Nitohaneein nii neba rai nii onaa ichateein tiha Jesusone

<sup>16</sup> coaraain jetaote, satiin acaneein nihane que suujua acateein cojoelatiin jetao:

“Jataain itolere amurijiriin nelateein, itolere ichana nainera *profetate* cana rene turuera,” naain jetao:

“Cana Coaunerate rai cacha nichaachene coroatajaniha uhera,” naaure jetao Cana Coaunera corojeein, neebana nitohanai coaracuruhane jaun.

<sup>17</sup> Nitohaneein coaraain jetaote, satiin Jodea batane sacuritaain jetao beeuruhane jaun, nii onaa ichatiha Jesusone coitucuure.

### *Joaan Baotisita letonocuru*

*(Mt 11.2-19)*

<sup>18</sup> Nitohaneein onacaauru ichateein, naanjoan Jesusone coaraain jetaote, Joaan rai biha cuure sacuureraauru. Nii caje coitucuhin jetaote, coroatajai sacuurera cotijiaain jetao:

<sup>19</sup> “‘Iina esinae rauhijiriin canacaanuhacha cohajei turuha uheneninee. Aca neneeine canacaanu rai beeu, leecha cohacaanune coina,’ naain bajanichuche rene turuhincha,” naain jetao letoanajae Joaan Baotisita.

<sup>20</sup> Nii jaun cuhin, Jesoso rene turuhin:

“Joaan Baotisitate canacaanu letoae, ii esinae rauhijiriin nii canacaanuhacha cohajei turuha uhenenineeine bajaa-canune coina. Aca neneeine leecha cohacaanune coina,” naauruha Jesoso rene turuhin Joaan letonocurune

<sup>21</sup> rijieoritiin jetaote, araai laurii cunai caaun cunaite-nacaauru cachaauru rautaaain, arajii maosacuru nota tein, coitucuchuhi caaun cunaitenacaaurune maajeein rautaa-coaane baiha jetao, nii coroatajai Joaan letonocuru rai jetao:

<sup>22</sup> “Chajaain Joaan rai caa ena inaraacha coarai aina inaraacha aonai benichuche. Chaen, inae maosa neeuruhane caje notaauruha maosacuru. Bacosacuru netonaite inae nichaauraaain amuure. Cosibinacaauru netonoaite inae cosibi caje nerautaacoaure. Iricho saaecuru netonaite, inae irichohin neeure. Nii jana onacaaurute jerichanejeein cacha neein jaberoconeein nichaauraaain neeure. Jana cairicheinejeein nenacaauru raite, jataain acaauru rausiaaerichaaain Cana Coaunerane beebeje.

<sup>23</sup> Nitohanihane jaunte, nerausiajeein neeurureein canu que jaaecohane jianelanaala nenacaauru,” naain jetao, “Chajaain caritiin benichuche Joaan raicha,” naain jetao acaauru letoae Jesoso.

<sup>24</sup> Niritoha acaauru raine jaun, jelaiha cauha cuuruha nii Joaan letonocurune jana jetaote, nii Joaan que cachaauru rai ereereje jetao Jesoso. “Chatohanai coaraa curejetocoichelu nii cacha areroo cuhin. Leinjiin jiarana nujuan cujuanaacha rurujuaina coaraquichelu.

<sup>25</sup> Chatohanai coaraquichelu. Leinjiin cacha cajione caohacha que necoreetein neina coaraquichelu. Nete nii cajione caohacha que necoreetein nenacaauru, co-coainanacaihuru loreri asae neuruhane coitucuhiche raoto-joein.

<sup>26</sup> Chatohanai jian coaraquichelu. Leinjiin *profetana* coaraquichelu. Aiha jerihane, jataain *profetacuru* amurijiriin nena leinjiin *profetate* coaraquichelu.

<sup>27</sup> Nii Joaan que tejian, rai Calaohi nichaunne rai aitelu jetao:

‘Chajinihane quere beranu que leinjiin letoareeuni, turuhine jaanu rucuheraanu quera,’

naain belu Cana Coaunera, niicha laenaeratenojoi rai Quiricha inoausi cuhane.

<sup>28</sup> Coatihana inoanlu caje coaunein, enanetoein nihei chuni nii Joaan amurijiriin nei cacha. Nete laen ena turunaa Cana Coaunera Cojoananaa, canuhacha tei que nena cacha, leochaauru fautaain nihane niha natiin jataain Joaan amurijiriin ne.

<sup>29</sup> Nete cachaauru relaa Joanne jana, satiin aonaraauru cachaauru, nii Joaan que acauhanau tein nebaotisaerateurelu. Nii choae tacaaintechu, Roma curuaanaa rai *impoestonu* que cachaauru cobaraain coriqui bajaaurera netonai necha ansaineein neuruhane saijieein nebaotisaerateurelu, esinae rauhijiriin Cana Coauneraacha icharatenohi ichaa Joanne esenetaauruhane jaun.

<sup>30</sup> Jana fariseeocuru aina Cana Coaunera naitoonjoa que cacha relaaaureraauru, itolere amurijiriin Cana Coaunera coitucutoha nocoetocuruhane saijieein nebaotisaeratenaa jerecuruhilu, Cana Coaunera icharatenohi icharanein aiha Joanne esenetana jerelanaala que jaolecooruhane jaun.

<sup>31</sup> Nitohaneinte itolere acaauru rai baaso ne. Nihei acaauru rai chabana caohacha.

<sup>32</sup> Acaaurute nenaanaja cataaun nocoatijiana jaun auno toteeuruha acaauru amute canaanaihurune jana, raasanaa jerelanaala nein, niheichu berane ichacuruhane jana chanaaurene acaauru amute canaanaihururu. Nii rijiichuruha caa enene nenacaauru cachaauru.

<sup>33</sup> Nii rijiichuruhane jaunte, turuha Joaan Baotisita coaerai conaa inaelanaala, faan niha natiin quinaa inaelanaala, naaonjoaaine jana, ‘Nechu aansainihane jaunte



ai, nechu jataain coitucuhuhi siriha rai suujua cuhanene jaun,' naain que ereeichelu.

<sup>34</sup> Nii baiha canu- Cachaneein nejanohanaa nichaaunne turuhin, coaerai cohin, lenoneein, naaonjoaanune jaunte, 'Ahotiritiinjiene tabaain lenoneein ajetoriaaneeun. Chaen jene nechu aansaneein ichaonacaauru cachaauru belaaain, Roma curuaanaa rai *impoestonu* que cachaauru cobaraain coriqui bajaaurerane maajeein belaitoon,' naain ereeiche caque.

<sup>35</sup> Nete inae ecu tihane bana esinae rauhijiriin Cana Coauneraacha icharatenohi ichacaaunne coitucuha cuurureein satiin cachaauru," nae jetao acaauru rai Jesuso.

*Leinjiin fariseeoneein nenea Simoon rene turuha Jesusone*

<sup>36</sup> Leinjiin fariseeo jetaote, Jesuso cotijiae rai loreri asae turuhin lenoniha cuhane coina. Nitohaneein cotihacane jaun cuhin, inae loreri asae turuhin, lenonecuruhane coina rori ichoae nelauriaa Jesusone jana jetaote,

<sup>37</sup> turuha cue leinjiin ene cojoaeloroheri nii neseu ichaanaa. Nii ene jetaote, nii fariseeo loreri asaae turuhin lenoniha cuha Jesusone inaoriin jetao, lecuruhin jataain coretiin nenea erene jujui amaain turuhin jetao,

<sup>38</sup> chanaain Jesuso tijia rohan nelauriaain, rai nota baca que jetao rai tijia rujuae. Nitohaneein rujuaane baiha jetaote, rai couturiji que caruruhin jetao liosiin, erene jujui que rujuae.

<sup>39</sup> Nitohaneein ichaane coaraain jetaote: "Esinae rauhi-jiriin leinjiin *profetanihane* jana nihanete, caaoneein tiha caa ene cojoaeloroerine jana, baaso nihane coitucure caa cachara," naain jetao suujua ereein coaraje nii Jesuso cotihara fariseeo.

<sup>40</sup> Nii jaun jetaote, nii fariseeo rai:

"Simoon, icheina erenaa jereeeun aonaaine coina," naa Jesusone jana jetao:

"Saan. Aitoo caraine aonaera, cacha relaera," naa nii fariseeone jaun jetao:

<sup>41</sup> "Leinjiin cacha jetaote, coroatajai cacha rai coriqui te, jelai amuritoheriin rai cainacuruhane coina niqiu. Nitohaneein jetaote, leinjiin rai te saoqui fashaain. Jana leeocho rai jetaote, te saoqui chooncaain.

<sup>42</sup> Ne jetaote, coretena nainecurenihane jaun, nii coroatajai que rebeonacaauru cachaauru cobaraelanaala acaauru que suujua acate nii coriqui erora. Tonaai jana nii que. Chariji jana nii coroatajaahuri caje, jataain nii coriqui erora belaaain coaare," naa Jesusone jana jetao:

43 “Jerihane nii leeocho amurijiriin rebeeona cachate jataain nii coriqui erora belaaïn coaraera,” naa nii Simoonne jaun jetao:

“Esinae rauhijiriinte aitohicha,” nae jetao Jesuso.

44 Niritiin jetaote, nii ene coarajeein, nii Simoon rai jetao:

“Caa ene coaraaunachuhinti. Coatiha jauriaanejeein ii loreri asae turuhanune jana, catiha culeecaaunne coina carai acau tiheei. Nete laen caa ene, rai nota baca que catiha culejeein rai couturiji que caruruhin jacorae.

45 Coatihachu turuhanune jana canu meri lioracaheei. Caa enete laen turuhin enohane caje coauneein canu tija lioracaane jianene.

46 Niheichu nii jujui niha natiin cacouturi ichoae tiheei. Jana caa enete laen catiha ichoae erene jujui chorohin que catiha rujuae.

47 Nitohanihane jaunne ichei aitoon. Arajii rai nosate inae que suujua acate, jataain canu esenetaain canu belaihane coaratiha caa ene ne jaun. Nete laen, nii leeochoaauru amurijiriin caohachaain ichaoha nocoetonacaauru, rai nosa caje chabana nichoteurenereein, chabana osaaocuruhane coitucuhin canu belaina jerecurenihane jaun,” naa nii fariseeo raine baiha jetao,

48 nii ene rai:

“Inae itolere baaso ichajeein ichaohine caje ichoteratenojoineeichera,” naa Jesusone jana aonajeein jetao:

49 “Chaneeinna ne caa cacha, itolere baaso ichajeein niha caa enene jaan caje niha natiin ichoterateein nihane coina,” naauruha nii aina ecu cotihanohineei neein aonajeurerane coitucuhin jetao:

50 “Quesenetaaine jaunte, ichoteratenojoineein neeiche, baaso ichajeein neeine jaan caje. Raotojoein chenenajaun caunihuchera,” nae jetao Jesuso, nii ene rai.

## 8

### *Jesoso corootajaneraauru enecuru*

1 Nitohaneein jetaote, itolereneein neseuru nainein, nenanajaaunru nainein amuhemujeein Cana Coanera cojoanonaa que ereerejeein amuhemuherejete Jesuso, lechoonca corootajai rai afosotooru,

2 chaen coitucuhuhi caje, joenreein cunai caje, naaonjoaihunri caje niicha rautaaauri enecuru tabaaauru que corihaneraain. Niichuru aina jetaote cuelu, nii caaunsineein suujua cuhane coitucuhuhi sirihane jana nii Jesusohacha rautai “Maadala bene” naain niicha curuaateeuuri Mariha,

3 chaen Erodesi amihaneeo beraichaneein nena Cosa comasai Joana, chaen Sosana, naaonjoaihunri aina

leechoaauru arajii enecuru jetao, acaauruhacha sirii que acaauru coroatajaneranein cuure.

*Temule jaera parabola que erenaa*  
(Mt 13.1-9; Mr 4.1-9)

<sup>4</sup> Nii jana jetaote, neseuru caje cuhacoaain Jesoso coaraa cuuruha arajii cachaaurune jaun, arajiin netaojiaauruhane jaun jetao acaauru rai: “Aonacuchene ena inara rai temule jaera *parabola* que erete coitucuhiche.

<sup>5</sup> Leinjiin cacha, ucuhe riaaca cuhane jaun jetaote, bero cuhane naluha nii niicha riaajai nucuhene jaun shaacure cachaauru. Chaen tabaauru quihure tajaaelinaacuru.

<sup>6</sup> Nii jana tabaauru ajeri choae nalunacaauru jetaote, omrohane sainejeein ohijiacoae.

<sup>7</sup> Tabaauru oja neonjoai jana nalunacaauru jetaote, omrohane jana amurijiriin omroha ajaenane jaun oha-coae.

<sup>8</sup> Jana tabaauru atane caohacha choae nalunacaauru jetaote, caohachaain omrohane jaun, ele ucuhecuru caje ele fashai ucuheneeinchuru nefae,” naain jetaote, acaauru rai tonijiaain: “Caa caitoonjoan coitucunaa jeriquichene aonacuche,” nae jetao Jesoso.

*Temule jaera parabola que acaauru relaa Jesusone bajaauruhane*  
(Mt 13.10-17; Mr 4.10-12)

<sup>9</sup> Niritiin temule jaera que cachaauru relaa Jesusone jaun jetaote:

“Chatohanai quena nii temule jaera que cuaain cachaauru rai aitohi,” naain Jesoso caje bajaauruha aina nerelanacaaurune jaun jetaote:

<sup>10</sup> “Inaraacha quete rai Cojoanona coitucuerate Cana Coanera. Nena laen, nii canu esenetana jeriheichuru cachaauru rai carijieein erenaa *parabola* que cuaain acaauru rai beeun, nabana coaracuruhane nihanatiin coitucuurenihane coina, niheichu aonacuruhane nihanatiin coitucuuruhane coataa.

*Temule jaera parabola que cachaauru relaane biha Jesusone*  
(Mt 13.18-23; Mr 4.13-20)

<sup>11</sup> Nii temule ucuhe riaara que aitocooaunne jaan erenaa *parabolate*, Cana Coanera beratenojoi rijijieein ne.

<sup>12</sup> Jana nii bero cuhane nalunaa nucuhe que caitoonjoante, Cana Coanera beratenojoin aonaain inae esenetaain nee-uruhane jana, nabana nichoteeuruhane coataa acaauru coritaa uha moconajaerane jaun suujua elonaain nenacaauru cachaauru rijijie.

<sup>13</sup> Jana nii ajeri choae nalunaa nucuhe que caitoonjoante, Cana Coaunera beratenojoin aonaain, coroaajeein esenetaain neeuruhane nihanatiin, carajaelanaala basiinjiincha esenetaoriin, inae necairichanaa coaracuruhane que nererojoe-caain jianeraauru rijijie.

<sup>14</sup> Jana nii ajaena jana nalunaa nucuhe que caitoonjoante, tonoraain aonacuruhane nihanatiin, jeraaen jianejeein cuaajeein, jataain niicha lateeicha que coacuhin, coriquiquiin raotojoein neeururichaanne coacuhin, itolere bana niicha jereeicha ichajeein, jeriha Cana Coaunerane rijijieein cha chana jerelanaala nitajerai nenacaauru rijijie.

<sup>15</sup> Jana nii atane caohacha choae nalunacaauru nucuhe que caitoonjoante, nii jataain jereein aonaain, nii beratihana Cana Coaunerane rijijieein naitoonjoan ichajeein, itolere bana tonoraain laraajiin janelanaala nenacaauru cachaauru rijijie,”

*Cono que cacha relaa Jesusone*

*(Mr 4.21-25)*

<sup>16</sup> “Nihei chuni cono mocohin bujuaihu tera. Niheichu arana asae tenaa nainihe, nabana nocohenaanau turuuruha loreri asae turunacaaurune coataa. Nitohaneein bujuaihu telanaalate ecuun te, conohanau loreri asae enooruha turunacaaurune coina.

<sup>17</sup> Nii rijijieeintechu, ena caa inara relaanune jaan coitucuelanaala nenacaauru, rijieori bana coitucuururein.

<sup>18</sup> Aihane jaun, caohachaaain aonacuche. Nii rijijieeintechu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” naain acaauru rai be Jesuso.

*Rai neba aina Jesuso nejeraauru*

*(Mt 12.46-50; Mr 3.31-35)*

<sup>19</sup> Niritiin cachaauru rai ereerejiha Jesusone jana jetaote, rene turuha uure neba aina rai nejeraauru. Ne jetaote, rohan turunaa nainecurene, jataain arajiin ecu turuuruha cachaaaurune jaun.

<sup>20</sup> Nii jana ecu nenacaauru tabaauru jetaote,

“Taute aerene neeure ii nejeraauru, ii neba aina. Jataainte ii coana jerecure,” naain Jesuso rai beeuruhane jana jetaote,

<sup>21</sup> “Aiha niqiu. Nete Cana Coaunera beratenojoi esenetaain, rijijieein ichaohin, naintonjoa rijijieein ichara cachate, canu fojiara aina canu nejeraaurunera,” naain jetao tonoranajaen Jesuso.

*Fichafichanaa aina cujuana suruaa Jesusone*

*(Mt 8.23-27; Mr 4.35-41)*

22 Nii baiha jetaote: “Amaauchete caa nemuri jerau cunichaachera,” naain jetao, aina nerelanacaauru aina leinjiin bote cuhane fauhin cuhin jetao,

23 nemuri jera jaohajeeuruhane jana jetao, uhe cujuana tabai aina fichafichanaa. Nii jana, sinitoha Jesusone jana jetao, inae nemoha acaune jaun, caaun nalunaa jere nii cuurunaja bote.

24 Nii jaun jetaote nesoone caun

“Cacha relaera, cacha relaera, inae nalurichaacheje,” naain Jesoso nocoaauruhane jaun jetao, nimichuin cujuana aina fichafichanaa suruha Jesusone jaun jetao, tonajelanaala cuujeure.

25 Nitohaneein cujuana aina fichafichanaa suruaain jetaote, nii aina nerelanacaauru rai jetao,

“Chanuna cha esenetaeneeiche,” naa acaauru rai Jesusone jana jetao, nesoonetiin cojoelatiin jetao, “Chaneeina ne caa cacha, nere tonoraain nesuruha cujuana aina fichafichanaane coina,” naain jetao nejesinajeein ita caje bajaure.

*Jerasa batane que nena coitucuchuhi siricha*

*(Mt 8.28-34; Mr 5.1-20)*

26 Nirijeein cujeein jetaote, tabiicha nemuri jera jaohin, najauriaa cuure Calileea jeraniha nena Jerasau batane que.

27 Inaen ecu turuhin najauriaain, atane choae iniha cuha Jesusone jana jetaote, nii nese caje cuhin que taca cue suujue cuhane coitucuchuhi siricha cacha. Nii cacha jetaote, nii chaabana cajione jiaain, niheichu loreri asae nihanatiin ichoaelanaala atane bana ichoaecha ichoae.

28 Aca jetaote, Jesoso coariin nacatiha auhaquiin semojaain tacaain jetao;

“Coa caniha nenoain carerojoecaara, acaihaniji nena Cana Coaunera Calaohi Jesoso,” nae jetao Jesoso rai,

29 caje mituha, nii suujua cuhane neein aasaera coitucuchuhi coina aitoha Jesusone jaun.

Nitohanihane jaun jetaote, araai saain *cadena* que caohatiin biji aina tija ichohacuruhane nihanatiin, rai molohin cacha nenajanihu amaauruha nii coitucuhuhicurune, ecu nii cacha areroo ne.

30 Nitohaneein rai irihane jana jetaote:

“Tonaa ichurujuata,” naain caje curuaa bajaa Jesusone jana jetao,

“Lejioon niha canu curuaara,” nae jetao nii cacha, jataain arajiin suujua cuhane neeuruha coitucuhuhicurune jaun.

31 Nii arajiin suujua cuhane nenacaauru jetaote, usi jana acaauru letoaa Jesusone coataa jetao,

32-33 ichtatane ucuunno que arajiin lenoniha neeuruha coosichurune jaun jetao, nii coosichuru suujueniha enooruhane coina Jesoso caje bajaare. Nii jaun jetaote, nii jereein caje bajaauruhane rijijieein jeriha Jesusone jaun jetao, nii cacha caje mituhacoaain nii coosichuru suujueniha enooruhane jaun jetao, nemuri cuhane nichorohin acauhanau naluhin ohacoaare nii coosichuru.

34 Nii coaraain jetaote, satiin jelai caje sorohin, nenaana-jaunru, neseuru, naaonjoaihunri naineein biha cuure nii coosi beraihurera cachaauru.

35 Nitohaneein beeuruhane jaun, cuhin coaraa cuuruha cachaaurune jana jetaote, Jesoso tijia asae lauhaca cou-  
jurihu cacha neein necoreetein nii suujua caje coitu-  
cuchuhichuru mitunaja cachane jaun jetao, coaraain coa-  
sichure nii cachaauru.

36 Nii jana, nii cacha caje mituuruha coitucuchuhichurune jana coaraauru jetaote, esinae rauhijiriin nii nerautaane rijijieein beure leochaauru cachaauru rai.

37 Nitohaneein coaraain jetaote, satiin nii Jerasa batane que nenacaauru cachaauru jetao, jelai caje amuha Jesusone jerecure, jataain coasichuruhane jaun.

Nii jaun jetaote, bote cuhane fauhin, jelai caje amuha Jesusone jana jetao,

38 aina cunaa jere nii coitucuchuhichuru mitunaja cacha. Ne jetaote, aina cuhane jerelanaala:

39 “Jiaohine. Chajaaincha jelaiha chenenajaun cauhin, ii rautaaain niha Cana Coaunerane beebenenihun,” nae jetao rai Jesoso.

Nii jaun jetaote, ecu nedaain, satiin nenaanajaunru naineein cuhecujueein jetao, rautaaain niha Jesusone beebene-  
jeein amuhemujuen nii cacha.

*Jairo cacunu. Chaen leinjiin ene Jesoso cajione dadaera  
(Mt 9.18-26; Mr 5.21-43)*

40 Nitohanihane baiha, jelaiha nemuri jerau cauha cuu-  
ruhane jana jetaote, jataain coraajeein Jesoso raare, tu-  
ruhane cohajeuuruhane jaun, satiin cachaauru.

41 Nii jana jetaote, turuha uhe leinjiin cacha-  
sinacoca curuaanaa neein nena Jaironeein niicha curuaateuri. Nii  
cacha jetaote, Jesoso tijia asae neseoriaain jetao conujueein  
cotijiae, rai loreri asae turuha cuhane coina,

42 jataain ohane rai niha leinjiin rai cacunu-  
lechoonca coroata jaanacajine jaun.

Nii jaun cuha Jesusone jana jetaote, jataain arajiin sacuu-  
ruha cachaaurune jaun, sururucure cachaauru.

43 Nii arajiin cunacaauru jana jetaote cue leinjiin ene-  
lechoonca coroata jaanacaain nirijieein ichana jaohajein

cunaiteein nena. Nii jetaote, jitariin niicha sirii coriqui jaohin nocoicharate niqiu. Nejetaote, rautasihurene nii chuni coichaeraauru.

<sup>44</sup> Nii ene jetaote, Jesoso caaijie cuhin, rohan nichuuntaain rai cajione auha dadae. Nii Jesoso cajione auha dadaane rijieeoritiin jetaote, inae nesurue rai ichana.

<sup>45</sup> Nitohaneein dadaane jana jetaote:

“Chatoon canu dadae,” naain bajaa Jesusone jana, satiin dadaauruhane suujueeuruhane jaun jetaote,

“Cacha relaera jataain araaiicha cachane jaunte, ii sururucure jerane,” naa rai Fedorone jana jetaote:

<sup>46</sup> “Aihei bajiaa. Chunucohate jerihane canu dadae. Cacaje mituha cacha rautacaaunne jaan cajene coitucuunra,” naain jetao bajae Jesoso.

<sup>47</sup> Niritoha Jesusone jaun, nesuujuenaa nainenihane jaun jetaote, rijijijianein Jesoso acatiha neseeorihain: “Naaonjoain cunaitichaaunne jaunne, nii caje nerautasinihanune jaun, ii dadaaunra. Nii ii dadaanune rijieeoritiine inae nerautaaun canu cunai cajera,” naain satiin aonajera urichoo jitariin biha nii enene jana jetaote;

<sup>48</sup> “Aihachuhisi. Jataain ii rautaanune esenetaaine jaunte, ii cunai caje nerautaaicha ene. Chajaain chaque tonajelanaala chenenajaun caunihunra,” nae jetao rai Jesoso.

<sup>49</sup> Nitohaneein jaiti ereerejiha Jesusone jana jetaote, turuhin jetao:

“Coa nenacaeneein nii cacha relaera reroecaa. Inae oha ii cacunura,” naain jetao biha uhe letoauruhane jaun leinjiin cacha, nii sinacoca curuaanaa Jairo rai.

<sup>50</sup> Niritoha nii cachane aonajeein jetaote,

“Coa tonajian. Raujiaaincha quesenetaaute nacoaaunein ichanamiin oo caje ii cacunura,” nae jetao Jairo rai Jesoso.

<sup>51</sup> Niritiin cuhin jetaote, nii Jairo loreri asaa turuhin, Fedoro, Saantiaao, Joaan, chaen, nii ene fojiaraauru, naaonjoaihunriicha enoae jiniichaain nii loreri asae.

<sup>52</sup> Nitohaneein inae loreri asae enooruhane jana jetaote, jataain satiin coinaderaain nii ene coisichuruha nii loreri asaa nenacaaurune jaun:

“Coa chanaache. Coatiha ohane jaun aihei caa ranuna. Sinihane jaunte aicha,” naa acaauru rai Jesusone jana jetaote,

<sup>53</sup> satiin esenetaelanaala coenacure- nii ecu neein coarajeeurera cachaauru, esinaen rauhijiriin oha nii ranunane coaracuruhane jaun.

<sup>54</sup> Nii jana jetaote, biji que nii ranuna onaa mucuhin tonijiaain jetao: “Ranuna, chajaain nimichuura,” naa Jesusone rijieeoritiin nimichuhin jetao,

<sup>55</sup> nacoaauneein raurononeein oo caje ichanae nii ranuna. Nitohaneein ichateein jetaote, corohateeuruhane coina aite Jesoso.

<sup>56</sup> Nii jaun jetaote, jataain cojoelatoorua rai fojiaraaurune jana jetao: "Jiaonriha caa catoaneein ichateein nihanune beeiche chuni rainera," naain jetao suujuatenajaen Jesoso.

## 9

*Cana Coaunera Cojoanonaa biha cuuruhane coina aina nerelanacaauru letoaa Jesusone*

*(Mt 10.5-15; Mr 6.7-13)*

<sup>1</sup> Jelai lechoonca coroatajai aina nerelanacaauru taojiaain, acaauru aina neein cocoainanajaain jetaote, letoanajae Jesoso, cacha suujua cuhane nenacaauru itolere coitucuchuhichuru sitaain, cunaitenacaaurune maajeein rautauruhane coina.

<sup>2</sup> Nitohaneein jetaote, Cana Coaunera Cojoanonaa beein, cunaitenacaaurune maajeein rautauruhane coina acaauru letoae.

<sup>3</sup> Nitohaneein letohanajaain jetaote:

"Coa inara biji achune, inara atora, inara achano, inara coriqui, necoreeteichene jaanu que inara cajione, naaonjoainuri amaain cuhache.

<sup>4</sup> Chunijihun loreri asae turuhichene ecu neeuche jelai caje amuhichene reentiaain.

<sup>5</sup> Jana chunijihun nese que turuhichene jana, inara ranaa jerelaanaala inara aohana jerecurenihane, jelai caje amuuche. Inara tija batane faofaohin riariaain ratiriinte, 'Coaraain cau neein nainacuche,' naain ichaquichene coitucuurumiin caje," naain jetao letoanajae Jesoso.

<sup>6</sup> Nii jaun jetaote, nii letoanajaane rijijieein cuhin, ne-seuru naineein cuhecujeein jetao, ichoteratenajaane jaa erenaa rauhi raotono beebejeein jetao, cunaitenacaaurune maajeein rautaacoaure.

*Suujua auhacaa Erodesine*

*(Mt 14.1-12; Mr 6.14-29)*

<sup>7</sup> Nitohaneein itolere ichaechajeein niha Jesusone coitucuhin jetaote, que suujua auhacaain nererojoecae Jorioocuru curuaanaa Erodesi. Tabaauru, "Joan jete oo caje ichanaain ai," naauruhane jana,

<sup>8</sup> leeochoaauru, "*Profeta* Irihasi jiete, oo caje ichanae," naaure. Jana tabaauru jetaote, "Cana Coaunera Ere bera inoansi tabaauru jete, oo caje ichanaain ai," naaure.



<sup>9</sup> Ne jetaote, niritocuruhane coitucuhin jetao: “Caraajenihanena nii Joaan uluno moloheratihanune jana moloorelura. Chaaquena jana, nii itolere ichaa been ereeure,” nae jetao Erodesi.

Nii jaun jetaote, jataain Jesuso coaana jere Erodesi.

*Saoqui oharaancai cacha rai lenone tiha Jesusone  
(Mt 14.13-21; Mr 6.30-44; Jn 6.1-14)*

<sup>10</sup> Inae nii letoanajaa Jesusone caje turuhin, jitariin acaauruhacha ichai beeuruha nii cocoainaan niicha letoauri afosotoorune jana jetaote, jelai cachaauru caje acaauru amaain, leinjiin nese Betesaaidau amanajae niqúi Jesuso.

<sup>11</sup> Ne jetaote, inae cuhane coitucuuriin, sacuhin, rene turuha cuuruha cachaaurune jana jetao, raotojoein acaauru raain, Cana Coaunera Cojoanona que acaauru rai ereerejeein, cunaitenacaaurune maajeein rautae.

<sup>12</sup> Nii jana inae sohane jaun jetaote, Jesuso rohan nichuuntaain:

“Chajaain caa cachaauru rai aitoote, taa ichuunucohacuru nenacaauru neseuru cuhin, nesurunajaanu aina lenone ariha cuurumiincha. Coatiha nihei cau cacha caje lenone coreteein acaauru coroaatenaa jaanuta,” naauruha nii lechoonca coroatajai aina nerelanacaaurune jana jetaote:

<sup>13</sup> “Niriimiin. Atiin inara, acaauru coroaateeuiche,” naa acaauru rai Jesusone jana jetaote:

“Saoquijieeinchate neeje faan, chaen coroatajaain ate naajeeinchara. Coretiha cuhacaanune banaachate nena nainere lenone, satiin caa cachaauru raicha,” naaure jetao Jesuso rai,

<sup>14</sup> itolereneein saoqui oharaancaain acaauru aina neeuruha cachaaurune jaun.

Ne jetaote aina nerelanacaauru rai jetao:

“Saoquichoona nanaain ita rohan teein acaauru lauriaauchera,” naa acaauru rai Jesusone jaun jetao,

<sup>15</sup> nii aitohane rijijieein, ita rohan teein acaauru lauriaa-coaure nii aina nerelanacaauru.

<sup>16</sup> Inae satiin nelauriaacoaauruhane jana jetaote, nii saoquii faan aina coroatajai ate mucuhin, coreniha dede coarajeein Cana Coaunera coroaecane baiha jetao, nii faan aina ate beeunebeeunein aina nerelanacaauru rai jetao te Jesuso, jitariin cachaauru rai chaluuruhane coina.

<sup>17</sup> Nitohanein jetaote, inaeneeuruhane jaaun tiaaajoaain lenonecuruha satiin cachaaurune natiin jetao, lechoonca coroata omariin, omari nemoaure caute que.

*Esinae rauhijiriin Mesihasi niha Jesusone biha Fedorone  
(Mt 16.13-19; Mr 8.27-29)*

18 Nii baiha jetaote, jelai aina nerelanacaauru aina cuhin Cana Coaunera bajaane jaun jetao:

“Tonacuruha canu que cachaauru. Chanichaaunchata,” naain acaauru caje bajaane Jesusone jana jetaote:

19 “Tabaaaurute, ‘Joan Baotisita jete, oo caje ichanaain ai,’ naaurera. Jana tabaaaurute, ‘Cana Coaunera Ere bera inoawesi Irihasite ai,’ naaure. Jana tabaaaurute, ‘Cana Coaunera Ere bera inoawesi caje leinjiin jete, oo caje ichanaain ai,’ naaure,” naain beeuruhane jaun jetaote:

20 “Tonaquiche jana inara canu que. Cha nichaun,” naain acaauru caje bajaane jana jetaote:

“Iite, Cana Coauneraacha letoai Mesihaseeicha,” naain jetao tonora Fedoro.

### *Orichaaaine biha Jesusone*

*(Mt 16.20-28; Mr 8.30-9.1)*

21 Ne jetaote, niritocuruha raine jana, nii acaneein nihane beeuruha chuni raine coataa, caohate Jesuso.

22 Niritiin jetaote: “Nii inaraacha cohajei Cachaneein nejanohanune cairichaeriinte, caque jaolecoha cuurureein Jorioocuru bichauhenaauru aina saseredotecuru curuaanaacuru, chaen Cana Coaunera naitoonjoan que cacha relaaureraauru, naaonjoainuri. Acaaurute catinaa cuurureein niqui, nena nichata janohane cuhane ichanaa cureeunnicha,” nae jetao acaauru rai Jesuso.

23 Nii baiha jetaote, nii satiin ecu aina nenacaauru rai jetao:

“Chunucoha canuhacha relaineein canu ere tonoraeranein nena jerihane, itolere suujua letono ichana jerihane jianeein, coroso que canu teein canu cairichaaaururichaaaine rijijieein necairichanaa abaataain caitoonjoan tonoraain, jerichaaunne rijijieein neeine.

24 Nitohanihane jaunte, cacoreniha nichao itajera, nichotiha cureein. Jana suujua letonohacha ichajeein, itolere bana rai caohachanuhacha coacuhin neite nitajereein.

25 Chaaquena nelatere caa chauratane que neein, itolere rai nelateeicha que coacuhin rai nichao itajiha cachane.

26 Chunucoha, canu que coejeein caitoonjoa quene maejein coejera quene necoejereeeunni canuhetonai, canu inaraacha cohajei Cachaneein nejanohanune, itolere ichana nainichaaunne coarateein, Canu Inaca necaohacha que necaohachaaain rai letonocuru anjeraauru aina turuha uhanune bana.

27 Esinae rauhijiriin satiin cau nenacaauru tabaauru cachaauru oorurinaain, Cana Coaunera Cojoanonaa coaracuruhane reeintiaain,” nae jetao acaauru rai Jesuso.

*Nejelauneein nerotoha Jesusone**(Mt 17.1-8; Mr 9.2-8)*

<sup>28</sup> Nii cachaauru rai irihane baiha, fosa janoneein cati-aain, ichatane ucuuno que cuhin Cana Coaunera bajaa cuha Jesusone jana jetaote, corihaniha cuure Fedoro, Saantiaao, Joaan, naaonjoaihuri.

<sup>29</sup> Inae ecu turuhin Cana Coaunera bajaane jana, ecu neein coarajeeuruhane jana jetaote, itolereneein nejelauneein nerotoha nomerine jana jetao, rai cajione netonai jataain somajaain jiquihaquuin nerotohane jana,

<sup>30</sup> ecu aina ocochin aina ereure coroatajai cachaauru Moisesa, Irihasi, naaonjoainuri.

<sup>31</sup> Nitohaneein jetaote, jataain cono caohacha que conaeraain neein jetao, Jerosaleeun cairichanojoneein oha curichaaain Jesusone que jetao ereure.

<sup>32</sup> Nii jana jataain siniitooruhane sainejeein jetaote, nir-ijieein ichaojoein jetao, cono caohacha cataaun neein coroatajai cacha aina iriha Jesusone jana, coaraje rai cori-hacuru aina Fedoro.

<sup>33</sup> Inae Jesoso rohan neuru caje amuuruha nii coroatajai cachaaurune jana jetaote:

“Cacha relaera, jataainte caohate cau nihacachene. Coanete nichatajaain lohanari jaacache, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao Fedoro. “Naaonjoaane cointate catohaneein coarate Cana Coaunera,” naain coitucuenihane jaun nirate Fedoro.

<sup>34</sup> Niritiin ereerejihane jana, acaauru conaacotaa dede sacarine jana jetaote, jataain nesoonetooruhane jana jetao,

<sup>35</sup> nii dede sacari jana toniin jetao: “Caate jataain jereein canuhacha cocoaain quicha letoai Canu Calaohinera. Nere tonoraain neeuchera,” naain jetao toni erena.

<sup>36</sup> Niritiin toniha erenaane aonajeeuruhane baiha, Jesoso coaracuruhane jana jetaote, inae jelai ecu ne. Ne jetaote, nii bana nii chuni rai nitohaniha Jesusone belanaala inauhe-neechea suujua cuhane coarajeein nii chuni rai beeurene.

*Coitucuchuhi siricha leinjiin canaanai rautaa Jesusone**(Mt 17.14-21; Mr 9.14-29)*

<sup>37</sup> Nii cojoanoo nii ichatane ucuuno neeuru caje jelaiha fauha cuuruhane jana jetaote, Jesoso que taca cuure arajiin cachaauru.

<sup>38</sup> Nii arajiin que taca cunacaauru cachaauru jana toniin jetaote:

“Cacha relaera, atiin nohane caa acaihanijin quicha sirii canu calaohi coaraau.

<sup>39</sup> Suujua cuhane coitucuchuhi sirihane jaunte, baasoneein tihane, auhaquiin tocojoaain tacaane, nujuaae caje lajane mitae. Jataainte, baasoneein jaberoco teein jianena jerene.

<sup>40</sup> Nii jaaunne niqii ii aina nerelanacaauru rai aitoon, caje nii coitucuchuhi sitaauruhane coina. Nete ichana nainesihurene,” naa tonijiaain ehequiin, nii leinjiin cachane jaun jetaote:

<sup>41</sup> “Jataainachura cha esenetaeneeichete nitaje rai nacaauru cachaauru. Inaaonjoan saneena inara aina neein inara abaantareeun. Chajaain cajiha nii ii calaohi uhaaura,” naa Jesusone jaun,

<sup>42</sup> rohan nichuuntaa nii cunaitenaa canaanaine jana jetaote, atane ichoae tacaain siheite nii suujua cuhane nena coitucuchuhi.

Nii jaun jetaote, nii suujua cuhane nena coitucuchuhi suruaain jetao, nii canaanai rautaaain, rai inaca rai te Jesoso.

<sup>43</sup> Satiin nii coaraain jetaote, itolere que nelateein, itolere ichana nainiha Cana Coaunerane coaraain cojoelatoore.

*Orichaainne biha coroata saain Jesusone  
(Mt 17.22-23; Mr 9.30-32)*

Nitohaneein cojoaelanaacojoai ichaain, acaauru notaaca Jesusone cojoelatooruha satiin cachaaaurune tonohanau jetaote:

<sup>44</sup> “Caohachaaain caa inara rai aitocooaunne aonacuche. Coa baitichache. Canu acaihaniji inaraacha cohajei Cachaneein nejanohanaa nichaaunne, cocoinanacaihuru bijihu tenojoiniha cureeunicha,” nae jetao aina nerelanacaauru rai Jesoso.

<sup>45</sup> Ne jetaote, acaauru que coitucuerateniha Cana Coaunerane jaun, nii acaauru rai aitohane coitucuuerehane sainejeein, acaauru rai biha Jesusone coina caje bajanaa nainecurene, bajaauruhane que nocoatocuruhane jaun.

*Chariji jataain nelateineein ne  
(Mt 18.1-5; Mr 9.33-37)*

<sup>46</sup> Nii jana jetaote: “Charijina, caa cana jana, jataain leeochoaauru amurijiriin nelatineein nere,” naauruha nejesinajeein ita rai aina nerelanacaaurune

<sup>47</sup> aonajeein jetao, leinjiin canaanai mucuhin rohan teein jetao:

<sup>48</sup> “Canu coreniha, caa canaanai raerate, canu raane rijijieein aicheein. Jerichanejeein canu raain neitechu, caletoera Ofa raa aicheein. Nitohanihane jaun, cau inara jana nelatihei rijijieein inaraacha coaraite, jataain nelatineein ne,” nae jetao acaauru rai Jesoso.

*Canaacha ichai icharate, cana lauri rijijieein nenacaauru ne.*

*(Mr 9.38-40)*

<sup>49</sup> Nii jana jetaote: “Cacha relaera, ii letononeein nenea rijijieein coitucuchuhi que suujuequiin nenacaauru rautaain niha leinjiinne janane eruhin nii caohatihacaanu, cana aina nenaaneein ainihane jaun,” naa Joanne jaun jetaote:

<sup>50</sup> “Jiaonriha nitohanai ichara caohateein neeichene. Canaacha ichai ichaain nenaate cana lauri rijijieein nenacaauru ne,” nae jetao rai Jesuso.

*Joan aina Saantiaaocha ichana jerei caohatiha Jesusone*

<sup>51</sup> Inae jelaiha dedeu cuhane catainajeein jetaote, Jerosaleeun necairichanaa coaraane rai nihane saijieein, atiin nelararajiaain, nii Jerosaleeun turuhane coina ucuae cue Jesuso.

<sup>52</sup> Nitohaneein cuhin jetaote, najiniha nere beraanuuru letoaelu, turuhane jaanu ariha cuuruha leinjiin nese Samariaune coina.

<sup>53</sup> Ne jetaote, ecu ranaa jerecurenelu Samaria cocoaichacuru, rauhijiriin Jerosaleeun cuhane coitucuuruha raotojoeinne jaun.

<sup>54</sup> Nitohaneein, acaauru ranaa jerecurenihane jaun jetaote:

“Curuaanaa, jereeune acaauru ichoae usi letoaacaanute, satiin mocohin nitajeeuruhine,” naaure jetao Joan aina Saantiaao.

<sup>55</sup> Ne jetaote, acaauru rene nauriteriin jetao:

“Caohachaai nitohanai ichaain nihacachene,” naain jetao, acaauru cotaicha rijitiin caohate Jesuso.

<sup>56</sup> Niritohane baiha jetaote, leeocho neseu jetao cuure.

*Jesoso aina cunaa jerecuruha cachaaurune*

*(Mt 8.19-22)*

<sup>57</sup> Inae bero cuhane cuujeeuruhane jana jetaote:

“Curuaanaa, cuhine jaau niha natiine, itolere bana ii aina nenea jereeunra,” naa Jesuso rai leinjiin cachane jana jetaote:

<sup>58</sup> “Aonaan, arolarihuru niha natiinte, sininajaanu siriin naaonjoaurera. Jerichanejeeintechu, sininajaanu siriin ne tajaacurura. Nii jana canu inaraacha cohajei- Cachaneein nejanohanune, coatiha nihei chunijihun neloraain nesuru-cuaaunne jaanuta,” nae jetao rai Jesuso.

<sup>59</sup> Niritiin jetaote, leeocho rai:

“Chajaau canihara,” naa Jesusone jana jetao:

“Curuaanaa, jauriaanejeein canu cohacune, oha canu incane reentiaain aina nenicha,” naane jana jetaote:

60 “Niriimiin, caa chabana nitajenaachara quiicha tei ichaonaa ranaa jeriheichuru, ecu nejesinajeein ita coaracurumiincha. Ii caniha uute, Cana Coaunera Cojoanonaa bee-bejeeicha,” naa Jesusone jana jetaote,

61 leeochoa netonai:

“Curuaanaa, ii ainane unaa jereeun canuhetonai. Jauri-aanejeein canu cohacune, canu nenajaun nenacaauru rai necoenicha,” naane jana jetao:

62 “Nete, Cana Coaunera Cojoanonaa que nenea jeriha cachane, itolere bana niicha ichana jerei jianihane caohachae,” nae jetao Jesuso.

## 10

### *Caainsi choonca coroatajai Jesuso letonocuru*

1 Nitohanihane baiha jetaote, caaunsi choonca coroatajaain jetao aina nerelacaaauru janijiin jetao, coroatajaanana coroatajaananaain najiniha letoanajae Cana Curuaanaa Jesocurisito, nii turuha curichaainne jaauun neseeuuru naineein cuuruhane coina.

2 Nitohaneein letoanajaain jetaote: “Esinae rauhijiriin arajiinte neeure Cana Coaunera coitucunaa jereraauru cachaaauru. Nete jataain coroatajaaecure acaauru relaeranuuru. Aihane jaun Cana Coaunera bajaachete neeine acaauru relaeranuuru.

3 Nii nitohanihane jaunne ena inara letoaaunra. Nete jataain alalacaraan nii curiquicheein, taebiaen mululune jana situha cuha irine rijijieein curiquicheeinne jaunra.

4 Jiaonriha inara coriqui, inara atora, inara safato, naaonjoaihunri amaain cuhichenera. Coa chunijiun inacuhin, chuni rai caeneenejeein ereein cuhache.

5 Chaen chunijiun loreri asae turuhichene, ‘Raotojoeein neeuche saain caa loreri asae neinequichenera,’ naauche inara turuneeicha.

6 Nii jana nii loreri asae niha caohachaaain nenea jereraaurunete nerausiajeein neeurureeincha. Jana caohachaaain raotojoein nenea jerecurenihane, coatiha nerausiaecururi-aainta.

7 Chaen chunijiun nese que turuhichene, leinjiin loreri asaecha neein, lenonecuruhane jaan que lenoneein, acau cohin, naaonjoaaunchera. Niha rauhi, coreteraauruha amihanenacaaurune jaanura. Jiaonriha lorerichuru naineein cajihanein amuhemuhequichenera.

8 Chaen chunijiun nese que turuhichene jaauun, caohachaaain inara raain inara coroateeuruhane jaan que lenonecuchera.

9 Chaen ecu neeuruha cunaitenacaaurune, acaauru rautaan, 'Inaen ichuunnijiha, inara caje Cana Coanera Cojoanonaara,' naain acaauru rai beeuchera.

10 Leinjiin neseu turuhichene jana, ecu inara coana jerecurenihane:

11 'Cau inara neseu turuhacaanune jana canacaanu tija que nitiririchana utoonena riariaain ratirihacaanu, "Coaraain cau neein nainaacuche," naain ichacaaunne que nainaquichene coina. Nete laen, inae ichuunnejeeoriha inara caje Cana Coanera Cojoanonaane saijieein que jaolecohichene coitucuhichene caohachaera,' naain acaauru rai beein, jelai caje amuuchera.

12 Nii inara coiinteraauru cachaaurute, neecha aansainein ichaonacaauru Sodoma cocoaichacuru amurijiriin jataain caseteco tabai coaraa cuurureeincha," naain nii rai niicha letoanojoinunri rai be Jesoso.

*Erenaa tonoraaichuru cachaauru*  
(Mt 11.20-24)

13 Niritiin jetaote: "Cairichaaajoaaiche, Corasiin, Betesaaida, naaonjoaain nese cocoaichacuru, jataain necairichanaa coariquicheeinne jaun. Bana inara rai cojoelanaacojoai ichacaaunne rijijieein, Tiro, Sidoon, naaonjoaihun cana lauri Isaraelitanelanaala ichaonacaauru rai cojoelanaacojoai ichacaaunne jana niha nete, acaauru ichoaichaniha inae Cana Coanera que suujua acatecuruhane coarateein, baaso ichajeein ichaaoruhane jianeein neeuruhane coujunacane que inaderaain costaro siri caje nenea cajione jiaain, ajane que nerujuaain neeurure.

14 Nitohaneeichene jaunte, inae nii cojoanonaa que turuhane bana, Tiro, Sidoon, naaonjoaihun cana lauri Isaraelitanelanaala ichaonacaauru amurijiriin, caseteco tabai coaraa curiquicheein.

15 Jana inara Caferenaanon cocoaichaneeinchene, inacoejin dedeeu cuha nocoetona jereein coaauquiche. Inarate, usi tabai cataaun jaonojoneein nitajiha curiquicheein," naain bihane baiha jetaote:

16 "Nitohanihane jaun, caohachaain inara raerate, jerichanejeein caohachaain canu netonoai raa aicheein. Jana, inara que jaolequiin, inara ranaa jeriheichurute, jerichanejeein canu que jaolequiin canu ranaa jerenihane jaun aihurureein. Nii rijijieein techu, canu que jaolequiin, canu ranaa jeriheichuru, jerichanejeein caletoaera Cana Coanera que jaolecoha aihurureein," nae rai nii letonocuru rai Jesoso.

*Jelaiha cauha cuuruha caaunsi choonca coroatajai nii ni-  
icha letoanojoinurine*

17 Nitohaneein letoanajaane jaaun cuhin jetaote, caje jelaiha rachoojoein turuhin jetao:

“Curuaanaa, ii letononeein nihacaanune jaunte irihacaanune, coitucuhichuru nihanatiin canacaanu ere tonoraain neeure,” naauruha nii caaunsi choonca coroatajai letonocurune jana jetaote:

18 “Aihachuhisi. Jiacane amuneein dede caje naluha uha Moconajaerane janane coarajeeun.

19 Canune, nitohaneein itolere que nelateein laraajiiin cuhin, acanocuru, canaanru, naaonjoaihunri ichoae situhin, itolere coitucuhichuru amuritohiche, nii necairichanaa coaraelaanaalane coina inara letoaaun.

20 Nete, nii nitohaneein inara ere tonoraain neeuruha coitucuhichurune nihanatiin que rachoojoein nenea naineneeiche. Inae laenanohineein niha Cana Coaunera Quiricha cuhane dedeeu inara curuaacuruneecha quete laen nainequiche rachoojoeichenera,” nae jetao acauru rai Jesoso.

*Rachoojiha Jesusone  
(Mt 11.25-27; 13.16-17)*

21 Nitohaneein turuhin itolere ichacuruhane beeuruha nii rai letonocurune jaun jetaote, rachoojoein Cana Coaunera Suujue que suujuequiin jetao:

“Ii, dede, chauratane, naaonjoaain Coaunera neein, itolere Curuaanaa neein neeine coroaecaaunra Ofa. Iite, nii itolere coitucutoha nocoetonacaauru que coitucueratelanaala, nii cha que nelatihei rijijieein nenacaauru que nii coitucueraelanaala nenea coitucuerateeicha. Aihara Ofa. Nitohaneein jereeine jaunte ichaaicha,” naa Cana Coaunera raine baiha jetao:

22 “Ofate caque itolere coitucuerateein ne, coitucuhin nihanune coina. Nihei chuni canu coitucunaa nainera, ca-coitucuerateniha Ofane. Nii rijijieein chu canu, rai Calahineein, que coitucueratenihanune, nihei chuni Ofa coitucuera. Canu, rai Calahineein coitucueratenaa jerichanne jaanruhachate Ofa coitucuurureein,” nae jetao rachoojoein Jesoso.

23 Nii baiha jetaote, jelai teein aina nerelanacaauru rai jetao: “Nerausiajeinte neeiche, caa ena inaraacha coarai coaraain neeichene jaun.

24 Arajii *profetacuru*, chaen *reycuru*, naaonjoaihunru inoaesihurute niqui, caa ena inaraacha coarai coana jereein, caa inaraacha aonai aohana jerecurelu. Nete, nii



coaraain, aonaain, naaonjaaunrenelu,” nae jetao acaauru rai Jesoso.

*Samaria cocoaicha que parabola que cuaain, leinjiin cacha relaera relaa Jesusone*

<sup>25</sup> Niritoha Jesusone jana jetaote, rene turuhin jetao, “Tohanrihanicha,” naain nechu jataain coujuha jetao:

“Cacha relaera, cha ichareeun chariji bana nitajenaachara ichaonaa que ichaonaa nainichaaunne coina,” naa rai leinjiin Moisesa naitoonjoan rauhi que cacha relaerane jaun jetao:

<sup>26</sup> “Tonaainjia laenanohineein ne Moisesa aitoonjoan rauhi cuhane ereretaain coaraaine jana,” naa rai Jesusone jaun jetaote:

<sup>27</sup> “ ‘Jataain ishujua, ii suujue, ii coichana, naaonjoain aina cutaain, ii Curuaanaa ii Coaunera que ii suujua acatein, aca jerihane rijijieein coitucuhin naitoonjoan ichaain neeu. Chaen ijiabereeo belaaain coaraain neeine rijijieein, chamute cacha belaaain neeu,’ naainte ne nii rauhi cuhane,” naain jetao tonorae nii Moisesa naitoonjoan rauhi que cacha relaera.

<sup>28</sup> Nii jaun jetaote:

“Jataain caohatiinte aitohi. Nitohaneein neeinete, ichaonaa chariji bana nitajenaachara que niha curiquiinha,” nae jetao rai Jesoso.

<sup>29</sup> Nii jaun jetaote, jaiti jitaain nii niicha coitucunaa jerei beniha raine que nainaa Jesusone coina jetao:

“Charijina camute cacha neein belaaain ichaoreeun,” naa Jesoso raine jana jetao:

<sup>30</sup> “Aonaan. Coaraaunachuhinti, leinjiin cacha jetao, Jerosaleen caje Jericoo cuhane jana, bero cuhane eruhin, enuha que faofoaain sohin- rai cajione ruluhin- jitariin niicha siriine maajeein ruluhin- ateinanee lalajeein ratiriin amuuruha necha aansaneein ichaonacaauru cachaaurune.

<sup>31</sup> Nii jana jetao, nii jeelai bero cuhane cuujiha leinjiin Israelitanichaachene lauri caje nena saseredotene jana, najiniha niha nii cachane coariin, comarohin rauhijiriicha situhin amue.

<sup>32</sup> Nii jana jetao coaiten caaijie cuujiha, leecha Israeliitanichaachene lauri caje nena Lebitane jaun, acaantonai coariin, inauheneeicha coarajeein comarohin rauhijiriicha situhin amue.

<sup>33</sup> Nii jana jetao, acaauru caaijie cuujiha leinjiin cana lauri Israelitanelanaala nena inara jaole Samaria cocoaichane jaun jetao, coariin, cairichaojoaain coaraane jaun jetao,

<sup>34</sup> rene nichuuntaain erene aina bino caje ichanohineein nena co que culejeein jetao, nii nocoasaja coichaain, caji que conajaain jetao rai cabario ichoae lauriaain, coreteein turunaanaja leinjiin loreri asaa amaain ecu tein jetao berai.

<sup>35</sup> Nii cojoanoon jetaote, rai coriqui rocohin jetao nii nenaanaja erora corete jetao nii Samaria cocoaicha. Nitohaneein coreteein jetaote, 'Atiin canu rai caa cacha beraain coichaau. Caa cacha coreniha ii coriqui jaohinene ii rai cainareeunni caaujiataain,' nae jetao nii cacha, nii nenaanaja erora rai.

<sup>36</sup> Nitohanihane jaun, chariji jana nii nichatajaihuri caje nii necha aansaineein ichaonacaauru cachaauru sonojoi cacha belaa coarae, rai jaberoco belaihane rijijieein," naa Jesusone jana jetaote:

<sup>37</sup> "Nii cairichaojoaain coaraain belaa coichaera," naa nii Moisesa aitoonjoan que cacha relaerane jaun jetaote:

"Inae laen coitucuhi. Nitohaneein iitonai ichaau," nae jetao, rai Jesuso.

### *Mariha aina Marata loreri asaa turuha Jesusone*

<sup>38</sup> Nii baiha jetaote, jelai caje amuhin leinjiin neseu turuhane jana jetao, rai loreri asaa rae leinjiin ene Marata.

<sup>39</sup> Nii Marata nejera Mariha jetaote, ecu turuhin ereerejiha Jesusone jaun jetao aonaane coina rai tijia asaa nelauriariin lauheque.

<sup>40</sup> Nii jana jetaote jelai niicha ichanenu aina ratiriin aihane jaun jetao, Jesuso rohan nichuuntaain jetao:

"Curuaanaa, tana itolereenein camijianeeon aina jelai caratiriin aiha caa canejerane coaraainete rai aiteneei canu coroatajaniha uhane coina." naa Maratane jaun jetaote:

<sup>41</sup> "Marata, aonaun. Jataain niha iicha ichanenune jaunna jataaain nererojoecai.

<sup>42</sup> Nete jataain leinjiincha ne cacha rai jataain nelatei. Caa Marihate nii jataain cacha rai nelateein nei janijiin rae. Nii jaun nerinaain chuni caje ruluera," naain jetao tonorae Jesuso.

## 11

### *Cana Coaunera bajanaa que aina nerelanacaauru relaa Jesusone*

(Mt 6.9-15; 7.7-11)

<sup>1</sup> Jelai cuhin Cana Coaunera bajaa cuha Jesusone jana jetaote, inae nainaane jana jetao:

“Curuaanaa, aina nerelanacaauru relaalu Joanne rijijeein canacaanu relaau Cana Coaunera bajanaa quera,” naauruha aina nerelanacaaaurune jana jetaote:

<sup>2</sup> “Saan ai. Cana Coaunera bajaachene:

‘Cana Coaunera,  
ii acaihaniji Cana Coauneraneein  
neeine coitucuhin neeurumiin satiin cachaauru.  
Nihei chuni ii baiha ii rijijeein nei.  
Dedeeu iicha jerei ichacuruhane rijijeein,  
cau chauratane que netonai  
ichacurumiin satiin chauratane que nenacaauru.

<sup>3</sup> Canacaanu rai lenone teute  
canacaanu rai lanaeneeine lenone.

<sup>4</sup> Baaso ichaechajeein  
nihacaanune nihanatiin  
canacaanu que ii suujua acateeu,  
canacaanu rai baaso ichaain  
nenacaauru que  
canacaanu suujua acateein nihacaanune rijijeein.

Jiaonriha osa que nesaruhin nihacaanune  
nainatejeein neeine,’  
naain Cana Coaunera bajaauche bajaachenera,” naain jetao  
acaauru relae Jesoso.

<sup>5</sup> Niritiin jetaote:

“Coaracuchenachuhinti inara tabaauru niha rai  
belaichane jana, janotiin dede cataaun rai loreri asae  
turuhin: ‘Quiicha belai, taa niha ii lenone cautene.

<sup>6</sup> Ena canu loreri asae turuha jataain quiicha belaa  
jaunne, que coroaatihanune coina aitoon, neniha rai  
canuhacha teeninune jaun. Ii raine jeelai que corereeeunni,’  
naane janate nainere:

<sup>7</sup> ‘Coa carerojoecaa. Inae canu bereecuru aina nesuru-  
cuaaunne jaun nimichuhin tenaa nainihaaun,’ naainte nesu-  
runajaun neein tonorana nainere nii belaicha.

<sup>8</sup> Netechu nimichuhin tenaa jerenihane saijjeein conujiha  
nii belaichane, atiin nimichuhin jitariin niicha latei tenaa  
nainere.

<sup>9</sup> Nii rijijeeinte Cana Coaunera caje cha lateein bajaach-  
ene, inara rai inaraacha latei tereein. Cha lateein ariin  
bajaera raite, cha teein ne Cana Coaunera.

<sup>10</sup> Satiin cha lateein ariin bajaerate, niicha latei eruhin ne.  
Nitohaneeinte rohan nichuutaain cha bajaa cachane, rai cha  
teein naaonjoareein Cana Coaunera,” naain jetaote,

<sup>11</sup> “Coaracuchenachuhinti inara, inara caje ate bajaain  
niha inara calaohine jana, inara, inacaneein rai acano  
teriquiche.

12 Ainihane inara caje taje bajaane jana rai canau teriquiche.

13 Coaracuchenachuhinti inara baasoneein ichaohichene natiin, caohacha nejesina teein neeiche inara bereecuru raine. Nii amurijiriin techu lateein caje bajaain neeichene, rai Suujue que suujuequiin neeichene coina, nii bajaera rai Suujue teein nereein dedeeu nenea Cana Inaca Cana Coaunera,” nae jetao acauru rai Jesoso.

*Moconajaera ichanohineein niicha ichai ichaa Jesoso beeuruhane*

*(Mt 12.22-30; Mr 3.20-27)*

14 Nii baiha jetaote, suujua cuhane coitucuchuhi sirihane jaun, caaun eresilanaala niha leinjiin cachane jana jetao, caje sitaain rautae Jesoso. Inae caje mituhin amuha nii moconajaera letono coitucuhuhine jana, inae iriha nii eresilanaala nenea cachane coaraain jetaote, jataain cojoaelatoore nii ecu neein coarajeeurera cachaauru.

15 Ne jetaote tabaauru: “Coitucuhuhichuru curuaanaa Beelseboote caa cache rai catohanai ichaane jaan tihane jaun, caa catohanai ichaera,” naaure jetao Jesoso coarajeein.

16 Jana tabaauru jetaote, esinae rauhijiriin aina niha Cana Coaunerane coaracuruhane coina nechu cojuha jetao, cojoe-lanaacojoai ichaane coina caje bajaare.

17 Ne jetaote, nechu cojuha aitocuruhane coitucuha raotojoeine jaun jetao:

“Inarate caa coitucuchuhi ichanohineein cunaitenaa cache rautaanune jaun, Moconajaera letononiha canu beeiche. Nete inara coitucuhichene rijjijeein, satiin caa atane que nenacaauru ita que nejerateein neein ita sooruhanete, jiniiquiin ita ichao itajeeurureein.

18 Nii rijjijeein techu, nii coaaquichene rijjijeein, nejesinajeein ita que nejerateein neeuruha rai letonocuru ainane, ita ichao itajeeurureein Moconajaera aina rai letonocuru. Nito-hanihane jiniiquiin nii cha que nelateein neeururihei. ‘Nii coitucuhuhichuru curuaanaa Beelseboo caletoaane aina, coitucuchuhi ichanohineein cunaitenaa caa cache rautaa,’ canu beeichene jaunne caa inara rai aitoon.

19-20 Inara tabaauru, chunocoha cache suujua caje coitucuchuhi sitanaa jerecuruhanete, ‘Cana Coauneraacha ichaneni ichaeraniha’ beriquiche. Jana laen canu, cache suujua caje coitucuchuhi rocohanune jaunte, ‘Moconajaeraacha ichai ichaeraniha’ canu beeiche. ‘Nete laen, Moconajaera letono coitucuchuhi rocohanu cajene jaun, canu, Cana Coauneraacha ichai ichaeraneein, Moconajaeraacha ichai itajeraneein nihanune coaraquichene saijjееin aitocoiche.

<sup>21</sup> Nii rijjijeein techu, jataain laraajiin nena cache, rai biji achune aina rai loreri beraihane, satiin rai loreri asaa nenacaauru rai rucuhele rulunaa nainene caje chuni.

<sup>22</sup> Nete laen, jataain amurijiriin jataain laraajiin nena, turuhin caje nii rai rucuhele niicha berai ruluha uhane, enaacha caje nii biji achune ruluhin jitariin raine que nii rai rucuheleuru rulureein, naain jetao Moconajaera amurijiriin laraajiin itolere ichana nainihane,” be Jesoso.

<sup>23</sup> Niritiin jetaote: “Nitohanihane jaun canuhacha ichai rautaelanaala coarate, canu que nejeratenaa neein nihane jaun ai. Jana canu aina Cana Coanera rai cachaauru ranaa jeriheite, moconajaera aina nitajeuruha cachaaurune jerihane jaun ai,” nae jetao Jesoso

*Jelaiha mitunaja rene cauha moconajaera letono coitucuchuhine*

*(Mt 12.43-45)*

<sup>24</sup> Niritiin jetaote: “Nitohanein leinjiin cache caje mituhin amuha coitucuchuhinete, enohane jaanu ariirijie cajianein joareein amuhemujeein. Nii jana erusinihanete, ‘Jelaiha taolu mituhanune jaa rene cauha cuhanunete caohachae,’ nae.

<sup>25</sup> Niritiin nii mituhalune jaa cache suujua cuhane turuhane, aiha leinjiin loreri coneraelanaala caohatiin lojainojinein rucuhenojineine rijjijeein nii cache suujua eruhane,

<sup>26</sup> nacoaaunein jelaiha cauhin, caaunsinein amurijiriin jataain baasonein nenacaauru coitucuchuhicuru cotijiaain amaain, nii cache suujua cuhane enohin ichaauruha nii coitucuhichurune, jauriaanejeein aihalune amuritoheriin jataain baasonein ichoae nii cache,” nae jetao acaauru rai Jesoso.

*Esinae rauhijiriin rausiaenojinein niha cachane jaan esine*

<sup>27</sup> Niritiin jaiti acaauru rai ereerejiha Jesusone jana jetaote, nii cachaauru jana toniin jetao:

“Nerausiaaeca ene ii janoaain efojialura,” naa rai leinjiin ene ehequiine jaun jetaote:

<sup>28</sup> “Aiha chuhisi niqiu. Nete Cana Coanera aitoonjoan aonaain tonoraain nenacaauru nii amuritoheriin nerausiaaecure,” naain jetao tonorae Jesoso.

*Cojoelanaacojoai bajaauruha necha aansai cachaaurune*

*(Mt 12.38-42; Mr 8.12)*

<sup>29</sup> Nitohanein netaojiajeein, jataain arajiin turuuruha curuhacaain cachaaurune jaun jetaote, acaauru rai: “Caa Moconajaera cojoanona que nenacaauru cachaaurute, jataain

necha aansaineein ichaooruhane jaun, acaauru rai cojoe-lanaacojoai ichacaaunne jerecure.

Nete Isaraelita neeurenihane saijieein, dede caje cojoe-lanaacojoai coaracuruhane latelanaala, acaauru rai Cana Coauneraacha beratei biha Jonasine jana esenetaaurelu Ninibe cocoaichacuru.

<sup>30</sup> Nii rijijieeinne canuhetonai inaraacha cohajei Cachaneein nejanohanaa nichaaunne, caa enene cojoanonaa que ichaonacaauru cachaauru rai Cana Coauneracha ichaneni beraneein neeun.

<sup>31</sup> Nitohanihane jaunte, inae satiin cachaauru ichao coitucuhin rucuheca Cana Coaunerane Cojoanonaa que turuhane bana, nimichureein Egipto bujuau nena atane curuaanaa eneneein nena reina, caa enene neiniquichene coulurujiiane coina. Acate coriaji atane caje uhin turuelu, niicha coitucui biha Salomoonne jana aonaane coina. Nitohanihalu natiinte, Salomoon amurijiriin neinichaaunne saijieein, canu ere aohana jereeneiche.

<sup>32</sup> Nii rijijieein techu, inae enene cojoanonaa que ichaonacaauru cachaauru ichao coitucuhin rucuheca Cana Coaunerane jaan Cojoanonaa que turuhane bana, inara colurujueeuruhane coina nimichua cuurureein Ninibe cocoaichacuru. Aiha nii Ninibe cocoaichacuru, inae caseteco coaracuruhane rai neuru jana acaauru rai Jonasi que beratiha Cana Coaunerane jana, cojoaelanaacojoai coaracuruhane latelanaala esenetaain nichao coreeuruhane jaun. Nete laen, Jonasi amurijiriin nei nichaaunne sainejeein canu esenetaeneeiche,” nae jetao acaauru rai Jesoso.

*Cacha cono niha cacha notane*  
(Mt 5.15; 6.22-23)

<sup>33</sup> Niritoha acaauru raine baiha jetaote: “Charijieein teinti, nene chuni cono mocohin bujuaihu tera. Niheichu rori asae nii cono telanaala ecuun nii cono mocohin te, satiin nii loreri asaae turunacaauru conohanau neeuruhane coina.

<sup>34</sup> Nii rijijieein techu inara jaberoco cononeein ne inara nota. Aihane jaun, esinae rauhijiriin jataain caohachaaain cha coaraain coitucuhin neeichenete, satiin jianacoon niha cureein inara suujua. Nete laen caohachaaain cha coaraquichene nihanatiin que jaolequiin joenreein chachaquichene, jataain nocohena tabai jana niha cureein inara suujua.

<sup>35</sup> Aihane jaun, cha coaraain coitucuhin caohachaaain nocohalajiin neeuche, nabana cha coaraquichene nihanatiin que jaolequiin neeichene, nocohenaneein nerotoha nii inara conaerane coataa.

<sup>36</sup> Aihute itolere inaraacha coarai coitucuhin ichaquichene, nocohena coaraelanaala satiin jianaacoon neeine inara

suujua, raafariin conohanau cha coana rijjijeein, esinae rauhijiriin satiin itolere coaraain neeichene,” nae jetao acaauru rai Jesoso.

*Cacha relaaurera aina fariseeocuru colurujih Jesosone  
(Mt 23.1-36; Mr 12.38-40; Lc 20.45-47)*

<sup>37</sup> Inae niritiin cachaauru rai ereerejihane nainaa Jesusone jana jetaote, rai loreri asae lenoniha cuhane coina jetao cotijiae leinjiin fariseeo.

<sup>38</sup> Nii jaun cuhin, rai loreri asae turuhin nitohaniha acaauru ichaone saijjjein biji culeje lanaanla rori ichoae nelauriaa Jesusone jaun jetaote, cojoelate jetao nii cotihara fariseeo.

<sup>39</sup> Nii jaun jetaote:

“Inara fariseeo neeichenete jataain inara jaberoco culeena inaaiche niqui. Nete nii saijjjein jataain banejelanaala calanaineein ne asijiauhin, naosatein, naaonjoaainchene coreniha inara suujua cuhanai.

<sup>40</sup> Asoneeojooaichenaate. Tana nii jianacoon nenea inara jaberoco coaunera inara jaberoco cuhane nenea, inara suujua netonai coaunaane coitucuhichene.

<sup>41</sup> Aihana jaun inara suujua coaraain inaraacha ichaneni ichaain neeuchete nuculocohin neeine inara suujua aina inara jaberoco,” naain jetaote acaauru rai,

<sup>42</sup> “Cairichaaojooaiche fariseeocuru, cacha caohachaniha nocoetocoichene coaracuruha cachaaurune coina, biha inara rai rauhine rijjijeein nii lechoonca turineein inaraacha taojiai inara temule caje le turii teeichene saijjjein jeriha Cana Coaunerane rijjijeein inara amute cachaauru belaaain, nii chuni que jaolequelanaala satiin ita rijjijeein cachaauru coaraain neneeichene jaun. Aihane jaun, nii cacha caohachaniha nocoetocoichene jianein inara amute cacha belaaain, nii choae tacaain aitoha inara rai rauhine rijjijeein ichaaоче.

<sup>43</sup> Cairichaaojooaiche fariseeocuru, esinae rauhijiriin jataain nelatein nenea rijjijeein sinacoca asaae rori caohacha janijiin nichoae nelauriaain, inara que suujua acatein, chunijiun inara eruuruhane inara rai ereein, naaonjoaauruha cachaaurune jeriquichene jaun.

<sup>44</sup> Cairichaaojooaiche. Charijjjein teeinti atane bana shaquuin nichoae situhin amue cacha, asaaun niha calanaine coitucuelanaala. Nii rijjijeeinte ne, inara suujue cuhane calani neosateeichene coreniha,” naa acaauru rai Jesusone jaun jetaote:

<sup>45</sup> “Cacha relaera, fariseeocuru que niritiin canacaanu quene maajeein ereeine jaunne, sanein rautaenihacaanu,”

naa acaauru caje leinjiin Cana Coaunera aitoonjoan que cacha relaerane jaun jetaote,

<sup>46</sup> “Cairichaaajoaache inara netonai. Nitohaneein ichao-hiche inarane que ainaan tocohaneein, ichaonaa anajiin tein, inara amute cachaauru cairichaaeriin neeichene jaun.

<sup>47-48</sup> Cairichaaajoaache, Cana Coaunera ere bera *profetacuru* sohin jaoruha inara foerateracurune coitucuhin, baaso ichacuruhane coitucuhichene saijieein inara netonai acaauru rijijieein neeichene jaun.

<sup>49</sup> Nitohaneriquicheeine coitucuhinte: ‘Acaauru raine, *profetacuru*, afosotooru, naaonjoainuri letoareeunni. Nii janate, tabaauru sohin jaohin, tabaauru que nejerateein, acaauru que nererojoecaa curiquicheeincha,’ naain besilu Cana Coaunera, nitohaneeichene coitucuhane jaun.

<sup>50</sup> Nii jaunte, cana rai chauratane coaunaalu Cana Coaunerane caje coauneein, nii inara foerateracuru aina nii inaraacha sohi inaraacha jaorilu *profetacuru* coichana core coaratiha cureein inara que Cana Coaunera.

<sup>51</sup> Nitohaneeinte nii Abeli sohin coichana jaohalune jaan caje coauneein, Cana Coaunera rai lenonecuru mocooruha saseredotecuruhachane jaan rori aina *santuario* cataaun tein inara foerateracuruhacha atinailu Sacariasi que tiaa-joain caa enene neiniquichene que nii core coaratiha cureein Cana Coaunera.

<sup>52</sup> Cairichaaajoaache, Cana Coaunera ere bera Moisesa naitoonjoan que cacha relaurera; Cana Coaunera naitoonjoan coitucuhin neeichene saijieein tonorana jerelanaala neein, coitucuhin tonorauruha cachaaurune jerelanaalane maajeeine jaun,” nae caauru rai Jesoso.

<sup>53-54</sup> Niritoha acaauru raine jaun jetaote, aina obajeein, nechu jataain tonaane coulurujeeuruhane jaan lera ariha jetao, Jesoso rohecaature Cana Coaunera naitoonjoan que cacha relaurera aina fariseeocuru.

## 12

*Baaso ichacuruhane nihanatiin caohacha ichaa nocoetocuruhane coataa cachaauru relaa Jesosone*

<sup>1</sup> Nitohaneein araai oharaancaain netaojiaauruha cachaaurune jaun jetaote, nejesinajeein ita sururucuruhane jana jetao, aina nerelanaaaauru rai jetao: “Jiaonriha aihuruha fariseeocurune rijijieein asinojineein baaso ichaain caohacha ichaa nocoetiin nihache.

<sup>2</sup> Nii asinojineein coitucueraelanaala baaso ichaain caohacha ichaa nocoetocoichene nihanatiinte inae ecu tihane bana coitucunojoinereein.



<sup>3</sup> Nitohanihane jaunte, inae nii cojoanonaa que inae turuhane bana, nii coitucueraane coataa asiin ereeichene jaan coitucunojoinereein. Jana nii coaraa chunine coataa asiin inaraacha beite satiin aonajera urichoo coitucunojoinereein.

*Esinae rauhijiriin coasinacai*

<sup>4</sup> Nitohanihane jaunne, jataain canuhacha belaaineeichene rai aitoreeunni. Jiaonriha inara sohin inara jaonaa jerera que casiin neeichene, nii inara atinaaruhane baiha nii chatohaneein inara teein inara itajenaa nainecurenihane jaun.

<sup>5</sup> Nena laen esinae rauhijiriin coasinacai que inara rai aitoreeunni. Nii ohin niha inara jaberocone baiha usi jana inara suujue itajeranu quete laen nainequiche casiin neeichene. Aiha laen, nitohaneein cana tenaa nainerate laen naine coasiin ichaohacane.

<sup>6</sup> Tana nii coitucuhichene rijijieein jataain corelanaala nena corootajajei moneda coriqui coreniha saoquii tajae laaoinaa que necoreteeichene. Nete nitohaneein cachaauru rai jataain cha que nelatenihane saijieein, nii leinjiinniji acaauru baitene Cana Coanera.

<sup>7</sup> Nii rijijieein techu, leinjiana leinjianaain janiinojoineein ne inara couturijihuru. Aihana jaun, itolere tajaee laaoinaacuru amurijiriin nelateein neeiche Cana Coanera raine jaun, jiaonriha casiin neeichene.

*Cachaauru que acaneein nihane coitucuerateeuruhane jeriha Jesocurisitone*

*(Mt 10.32-33; 12.32; 10.19-20)*

<sup>8</sup> Chunocoha cacoitucuhin canu coreniha laraajiin cachaauru acatiha netiin ereein neine, inae Cana Coanera Cojoanonaa que turuhane bana, Cana Coanera aina letonocuru anjeraauru notaracae netiin canu, acaihaniji inaraacha cohajei cachaneein nejanohanaa nichaaunne aca coreniha erereeeunni.

<sup>9</sup> Jana chunocoha, cachaauru que canu neein nihanune coitucueratelanaala nenaane, acaentonoai coitucuha cuhenereeeunni canuhetonai, Cana Coanera aina rai anjeraauru acatiha netiin.

<sup>10</sup> Canu acaihaniji inaraacha cohajei Cachaneein nejanohanune que baasoneein ereein nei que nihanatiinte suujua acatena nainereein ofa Cana Coanera. Nete laen baasoneein Cana Coanera Suujue que ereein nei que suujua acatenereein.

<sup>11</sup> Nitohanihane jaun inara colurujueein inara amaauruha sinacoca asae Joriocuru cocoainanacaihuri, joesiocuru,

naaonjoainuri renene, jiaonriha chaque tonajeein cuhichene. Coa: ‘Tonaainnera erereunta,’ naain nocoatiin ereeichene jaanu coacuhin cuhache.

<sup>12</sup> Inae ereeichene coina neeichene janate, caohachaain ereeichene coina inara relaa cureein Cana Coaunera Suujue. Coatiha inara suujua caje rocohin ecu ereriheicheein,” nae jetao aina nerelanacaauru rai Jesoso.

*Jataain alalacaraa coriquihonacaauru ichaone*

<sup>13</sup> Nitohaneein cachaauru relaa Jesusone jana jetaote, nii arajii cachaauru caje leinjiin cache jetao Jesoso rai:

“Cache relaera, canu nejera rai aitoote, canu rai canacaanu inaca amureecha ratirii rucuhele canacaanu rainein nenea leruhin teeine canu raicha,” naa Jesoso raine jaun jetaote;

<sup>14</sup> “Chana jana chaen, cocoinanacainein canu tein, nitohanai rucuhanein inara rene caletoe inara inaca amureecha sirii rucuhele leruhin tihanu inara raine coina,” naain jetao,

<sup>15</sup> saain nii ecu neein aonajeeurera cachaauru rai jetao: “Jiaonriha itolere siriin necoriquijiaain nenea coaquihe inara netonaine. Coatiha coriqui siriin nihacanecha que nelatein nihei cana ichaota,” naain jetaote;

<sup>16</sup> “Coaracuchenachuhinti niqui niha leinjiin cache, jataain itolere siriin coriquihonane. Nii jaun jetao, jelai tein atane siriin, arajiin ocoana sirihane jaun jataain arajiin rai temulecuru taojiae.

<sup>17</sup> Nii jaun jetaote: ‘Cha laen ichareeun canu temulecuru canuhacha taojiai ainata. Inae nihei rucuhecaanne jaanuta,’ naain jetao coacuhin;

<sup>18</sup> ‘Saan. Inae canuhacha ichaneni coitucuhanu. Jitariin canu temulecuru coloherihuru comaain jaohinne, nacoaunein leeochoauru lorerichuru tabaihuri jareeun, jitariin catemuleeuru canuhacha taojiai rucujueein, jitariin carujueleeurune maajeein rucuhecaun nasae teinne coina.

<sup>19</sup> Nii baihane laen caraajenhane: Inae niha araai jaanacanein ichaohin, tonajelanaala acau cohin, lenoneein, rachoojoein naaonjoaanune jaanu,’ naain suujua cuhane iriha nii coriqui coriquihonane jana jetaote;

<sup>20</sup> ‘Asoneeojoaainate, ena cojoanotiin cuhanete oriquincha. Nii ii rucuhele inacojoein arajiin rucujueein chunaain iicha sirii, chaa rainein chaainti niha cureeinta,’ nae jetao rai Cana Coaunera.

<sup>21</sup> Nitohanihane jaunte, nechu jataain rainein chaque namute cache corotajanelanaala rucuhele siriin nenea cache, Cana Coaunera rai cairichainejееin ne, nitajihane rai nihane

jaun,” naain jetao nii coriquihona cache que erenaa *parabola* que acaauru relae Jesoso.

*Nere tonoraain jerihane rijijieein ichaohin nenacaauru be-  
raiha Cana Coaunerane*  
(Mt 6.25-34)

<sup>22</sup> Niritohane baiha jetaote, aina nerelanacaauru rai jetao: “Caa quene inara rai erenaa jereeun. Jiaonriha lenoneein ichaohiche jaanu aina inara cajioneecha que nererojoe-  
caaichene.

<sup>23</sup> Jataain nelateein niha lenonene amurijiriinte, jataain nelateein ne inara ichao. Jerichanejeein techu nelateein niha cajionene amurijiriin jataain nelateein ne inara jaberoco.

<sup>24</sup> Coaracuche nachuhinti temule jaain, niicha quiineeuri rucuhecuruhane jaanu coloheri siriin, naaonjoaain nee-  
ruriha rohirihuru. Nete laen Cana Coaunera, lenoneein ichaauruhane coina acaauruhacha quiine teein ne. Inarate rohirihuru amurijiriin jataain nelateein neeiche.

<sup>25</sup> Inaonjoa saain nihanatiin itolereeneein suujua cuhane coaauca cachane nihanatiin, nichao cariaain ichaonaa naini-  
hej.

<sup>26</sup> Chanuna aansijiin laojoiri que coacuhin neeichene nihanatiin, ichana nainequichene coalanaala itolere que nererojoeaaeriin neeiche.

<sup>27</sup> Coaracuche nachuhinti caohachaenanaain omarohin neeuruha caa ajaena ujuanecuru amihanejeein neeuruhane que airijiinne. Nete aihuruha caa ajaena ujuanecurune to-  
cohaneein jataain caohachaain inanacaenelu *rey* Saloomoon, cajione caohacha que necoreetein nihalune saijieein.

<sup>28</sup> Nitohaneein mocohenineein niha caa ajaena ujuanecuru natiinte, caohachaain omarohin neeuruhane jaanu teein ne Cana Coaunera. Tana nii amurijiriin inara-  
cachaneein neeichene cajione terichaaain Cana Coaunerane esenetaaicheneta.

<sup>29</sup> Nitohanihane jaun, coa lenoneein, acau cohin, naaon-  
joaichene jaanuhacha que nererojoeaaeriin nihache.

<sup>30</sup> Satiin caa chauratane que Cana Coaunera coitucue-  
lanaala nenacaauru cachaaurute, nechu jataain nitohaneein nererojoeaaeriin neeure. Nete laen, satiin inaraacha latei coitucuhin teraneein ne Cana Inaca Cana Coaunera.

<sup>31</sup> Nitohanihane jaun jeriha Cana Coaunerane rijijieein ichaauruha cachaaurune jaan Cojoanonaa que coacuhin nee-  
ichenete lanaenereein inaraacha latei,” nae jetao aina nere-  
lanacaauru rai Jesoso.

*Dedeeu charijibana satonohelanaala ichaonaana jaan*  
(Mt 6.19-21)

<sup>32</sup> Niritiin jetaote: “Jiaonriha casiin neeichene, charijieein teeinti carenero beraain neeure irilaain sirichaauru, nii rijijieein inara beraain nerichaaunnine jaun. Inara Cana Coaunera coitucuherraneenete, jataain coroatajajieein neeiche niqiu. Nete jataain inara belaihane jaun rai Cojoanonaa que inara rareein Ofa Cana Coaunera.

<sup>33</sup> Aihane jaun, jitariin nii inaraacha sirii rucuhele que necoreteen, cairichainejееin chaelai que latejiojoiiriin nenacaauru coroatajanecuche. Nitohaneein neeichenete, dedeeu charijibana satonoelanaala nenea Cana Coauneraacha teeninu rariquicheein. Nerinaain inara caje nii dedeeu inara raineein nenea ruluera. Nii bana asijiautooru nihanatiin ecu turuhin inara basijiahuna nainihe. Niheichu cojoano nihanatiin ecu enohin asaaena nainihe.

<sup>34</sup> Nitohanihane jaun jauriaanejееin caohatiin, nii chabana satonoelanaala nenea, nii ena nitaje rai nenea inara ichao, naaonjoai que coaacuche.

*Letonoa jatoroain neeuche*

<sup>35</sup> Letona jatoroain inara cajione jiaain neeuche, inara siricho mocohin conohanau.

<sup>36</sup> Charijieein teeinti, nesirihatanaa beseta caje cauhin, acuujua dadaa fatoroone jana, acuujua joaracaain raaure nii letonocuru. Nii rijijieein jatoroain neeuche.

<sup>37</sup> Raotojoeinte neeurureein nii rai letonocuru, sinilanaala neeuruhane jana acaauru eruha nii acaauru fatoroone. Esinae rauhijiriinte raajenihane rori ichoae acaauru lauriaain lenone que acaauru coroaatiha cureein nii acaauru fatoroon.

<sup>38</sup> Dede cataaun, janonaa nichae, naaonjoaain turuhane jana, sinilanaala cohacuruhanete, raotojoein neeurureein.

<sup>39</sup> Caohachaain inara rai caitoonjoa aonacuchete coitucuhiche. Chunocoha loreri erora turuhin basijiauha uha asijiatone coitucuhane, coatiha nii acuujua joracarihei, nabana enohin basijiauha nii asijiautone coataa.

<sup>40</sup> Nii rijijieein inara netonai nainaaain jatoroain neeuche, turuha urichaaain nacoauneein nii jauriaa acaihaniji inaraacha cohajei Cachaneein nejanohanaa que,” nae jetao acaauru rai Jesoso.

*Letoera tonoraera aina letoera tonoraai*  
(Mt 24.45-51)

<sup>41</sup> Niritoha Jesusone jaun jetaote: “Leinjiin canacaanuhacha ii aina nerelanaanichaanune relanaa aitohi Curuaanaa, ainihane satiin raine maajeeinna aitohi,” naain caje bajaa Fedorone jaun jetaote,

42 “Tana coitucuhichene. Chariji jian, nii jataain nela-teein nere tonoraeraneein loreri beraichanu que ratiri rai fatoroon, turuhanereen tiaain nii rai cachaauru coroaateein acaauru sirihane coina. Tana satiin canuhacha cocoinai neechene, canu cachaauru beraichaneein neechene coitucuhichene.

43 Jataain raotojoeinte nereein nii nere tonoraera, nii letoain ratirihane jaa ichaa jerihane rijijieeine jana, eruha nii fatoroone.

44 Nii banate, esinae rauhijiriin jerihane rijijieein ichaohin nere tonoraain nihane, aca cocoinaain itolere niicha sirii coaranu que tereein rai fatoroon.

45 Jana, ‘Jaitijiecha carajaain lanae turuha rai fatoroone’ naain coacuhin baasoneein niicha beraihuri quichaauru, enecuru, naaonjoainuri que jaolequiin acau cohin, lenoneein, ajeein, naaonjoane jana

46 eruhanete, rai cachaaurunelanaala rai nere tonoraachuru cairichaa curichaaain Cana Coaunerane rijijieein acaentonai cairichaa cureein nii rai fatoroon.

47 Jana inae nitohaneein coitucuhane saijieein, jatoroaain nelanaala nii letoaa rai fatoroonne tonoraelanaala, nenaate casetecareein jataain banejelanaala bisiin rai fatoroon.

48 Nete laen coitucuelanaala nena rai cacha, baaso ichaane nihanatiin coitucuuruhane saijieein baaso ichaeraauru fautaeriin cairichanojoiniha cureein. Nitohanihane jaun, quicha coitucui coitucuherratihanune jaancuru cajene, jataain jelai amuritoheriin bajareeunni, canuhacha jerei ichacuruhane coina.

*Jesoso coreniha ita que nejerateeuruha cachaaaurune  
(Mt 10.34-36)*

49 Canune caa chauratane que usi mocoha uun. Bajiaa nachuhinti chajaain mocohane jana turueneenlu.

50 Jataain necairichanaa tabai abaantanunete ne. Nii jaunne, nii que turuhanereen tiaain, que nererojocaeriin neeun.

51 Inacojoeein chachu, ‘Caa cana rai chauratane que jecha raoti ichaonaanaja turuaa uun,’ naaiche niqui. Aihei bajiaa. Raujiaain ita caje neleruhin niha cachane coinane turuunlu.

52 Nitohanihane jaunte, saequiin le lorerijieeincha ita aina ichaonacaauru, ena caje coauneein ita caje neleruhin, nii nichatajaihuri que nejeratiha cuurureein nii coroatajaihuri. Jana coroatajaihurite, nejeratiha cuurureein nichatajaihuri que.

53 Jana calaohi aina te nejeratereein rai inaca. Nii jana calaohite inaca que nejeratereein. Jana acaauru nebate, rai cacunu que nejeratihane jana, rai cacunu netonai que nejeratereein. Rai nacano que nejeratiha nebaenene janate,

nebaene que nejeratereein rai nacano,” naain jetao Fedoro tonorae Jesoso.

*Janonaa cojoinacaauru coitucuha cachane*

*(Mt 16.1-4; Mr 8.11-13)*

<sup>54</sup> Nii baiha jetaote, leeochoaauru cachaauru rai jetao:

“Enoto soo nichajai que nijichorianaa coaraaichenete, ‘Urichaain elo,’ naain ereeichene, nii aitocoichene rijijieein esinae rauhijiriin uhe elo.

<sup>55</sup> Jerichanejeein techu, enoto mitu coarajejin cana raotono nichajai caje uaain jiatuha cujuanane, ‘Ajaarotorichaain,’ naaichene esinae rauhijiriin ajaarote.

<sup>56</sup> Cha coitucunaa jeriheichuru casajeeuru. Nitohanejin dede, cana rai chauratane, naaonjoain caje coaraain cha coitucuhiche natiinte, canu coaraaiche natiin, ‘Naaonjoaa ichaonaane coinete aicha,’ naain canu coitucunaa jerenee-iche.

*Aina nejeratena aina raotojoejejin niha cachane*

*(Mt 5.25-26)*

<sup>57</sup> Chanuna baaso ichaain neeichene niha natiin, baaso ichaquichene coitucuhi nena jereneeiche.

<sup>58</sup> Nitohanihane jaunte, inae ena caje coaunejin colurujuenajoi ineriquicheein. Aihane jaun, joesio rene inara amaa inara colurujueranu ajiniha aina rucuecuche. Ainihanete, inae coulurujuenajoi nequichene jaan cojoanonaa que turuhane bana, inara netonai colurujuiha nii nejerateeichene jaan jera joesio raine, inara tiha coaridiaauru bijihune, caresero cuhane inara enohaurureein.

<sup>59</sup> Nii bana jelai caje mituriheeicheein nii baaso ichaquichene jaan core nainaaiche jitaain inara coriqui jahinne reein tiaan,” nae jetao cachaauru rai Jesoso.

## 13

<sup>1</sup> Nii bana jetaote, turuha cuure cachaauru Jesoso rene. Nitohanejin rene turuhin jetaote, “Jerosaleen nena Teenforo asaa lenonecuru sohin mocohin, Cana Coanera coroaeca neuruha Calileea cocoaichacuru tabaaurune janate, acaauru sohin jaonajaain, nii lenone acaauruhacha sohi coichana que acaauru coichana jasiite Filatora,” naain jetao Jesoso rai beure nii cachaauru.

<sup>2</sup> Niritocuruhane jana jetaote: “ ‘Jataain naraaichuru amurijiriin osaaocuruhane jaun jecha aihure nii Calileea cocoaichacuru’ naaiche niqui.

<sup>3</sup> Nete aine. Inara netonaite ohin nitajeriquicheein, inara ichao corejin jeriha Cana Coaneranane rijijieein neneeichene.

<sup>4</sup> Jerichanejeein techu jerihane, ‘Nii leeochoaauru Jerosaleen ichaonacaaurulu amurijiriin jecha osaaotooruhane

jaun, nii le choonca fosaneeuri ichoae comoe nii ucuuneein ininaanaja nenea Silohe,' naaiche niqwi.

<sup>5</sup> Nete aine. Nii aihuruhane rijijieein techu inara netonai ohin nitajeriquicheein, jeriha Cana Coaunerane rijijieein inara ichao coreein ichaonaa jereneeichene," nae jetao acaauru rai Jesoso.

*Inacaeniha temulene que parabola que cache relaa Jesusone*

<sup>6</sup> Niritiin jetaote: "Leinjiin cache nocoana jana leinjiin temule sirihane jaun jetaote, inaacane coaraa cue. Nii jana leinjiinniji inacaenihane jaun jetaote,

<sup>7</sup> nii ocoana beraicha cache rai jetao, 'Aonaaun. Nichata jaanaca naineeinne niqwi le jaanacaauru naineein turuhin caa temule coaraa unajacoon. Nena chabana inaacane jana coaraeneeun. Aihane jaun chajaain ena sauhin jaao. Cha inacojoeinte atane lanaaeca nere,' naane jana jetaote:

<sup>8</sup> 'Aihachuhisi niqwicha curuaanaa. Jauriaa nirijieein coarajeune, ena ajaanaa cuhane rai nasaji retuhin ajaena setuuru te temurau.

<sup>9</sup> Nitohaneein tihanune saijieein inacaenihanete laen nainere sauhin jaohine,' naain jetao tonorae nii ocoana beraicha," naain jetao cachaauru relae Jesoso.

*Nebetacanaa cojoanonaa bana leinjiin ene janori raro-hacaera rautaa Jesusone*

<sup>10</sup> Nii baiha jetaote, nebetacanaa cojoanonaa bana sinacoca asae enohin jetao, cachaauru relaa cue Jesoso.

<sup>11</sup> Nii jana jetaote, ecu ne leinjiin ene- lechoonca fosa jaanacanihane caje coauneein baasoniha jaberocone jaun caaun cunaiteein. Nitohaneein jetaote, suujua cuhane neein jaberoco asaeca coitucuchuhine jaun, nii chariji bana neraujiasilanaala janori raro-hacaain ne.

<sup>12-13</sup> Nii ene coaraain jetaote, cotijiaain nichoae biji mera-caain:

"Inaen ii cunai caje nerautaaicha ene," naa Jesusone rijieeoritiin, cunai caje nerautaaain nichaauraaain jetao, Cana Coaunera corojeein rachoojoe nii cunaitenaa ene.

<sup>14</sup> Nitohaneein nebetacanaa cojoanonaa bana cunaitenaa rautaa Jesusone coaraain jetaote, obaje nii sinacoca curuaanaa. Nitohaneein obajeein jetaote:

"Niha saota janoneein amihanenaana jaan cojoanonaa. Nii amihanenaana jaan cojoanonaa bana nerautaeratiha uuchera. Coa nebetacanaa cojoanonaa bana nerautaeratiha uhachera," naa cachaauru raine jana jetaote:

<sup>15</sup> "Chanuna nebetacanaa janonaa bana cha ichaain neeiche inara netonaine saijieein, cha ichaain neeuruha

leochaaurune jereneeiche. Tana inara netonai nebetacanaa cojoanona bana, inara baca, inara boro, naaonjoinuri cosi batuhin amaaiche jesinaaeca cohane coinane.

<sup>16</sup> Nii rijijieeiina caa ene Abaraaun nefoerateneein nenea, lechoonca fosa jaanacaneein Moconajaera ichanohineein caaun cunaiteein nihane caje, nebetacanaa cojoanona bana rautaaun,” naa Jesusone jaun jetaote,

<sup>17</sup> jataain nocoejeeure jetao, nii aina nejeratenacaauru. Ne jetaote jataain itolere que nelateein, itolere ichaa Jesusone coaraain jetao coroaecure satiin cachaauru.

*Mosatasa ucuhe que parabola que cuuaain cache relaa Jesusone*

*(Mt 13.31-32; Mr 4.30-32)*

<sup>18-19</sup> Niritiin jetaote: “Coaracuchenachuhinti aansijihan mosatasa ucuhe natiin, nocoana jana temuha cachane jana omarohin fohecane, rai nunecuru que nucuhateeuruha tajaecurune. Nii rijiiicha cache inae Cana Coaunera Cojoanona canuhacha tei que ichaoha cachane,” nae jetao Jesoso.

*Faan jorerera que cuaain parabola que cache relaa Jesusone*

*(Mt 13.33)*

<sup>20-21</sup> Niritiin jetaote: “Coaracuchenachuhinti faan ichacuruhane coina neleeriha tabaaain nii colihane jaanu que jorerera teein, nichata sajeein coujunaca que arina coujunacate leinjiin ene, inae neleeriha tabaaain nii colihane jana caje arajiin faan jaane coina. Nii rijijieeinte neleeriha tabaaain colihane coina nenea jorerera rijijieein, neruujih cache ichaone coina nenea ne Cana Coaunera Cojoanona,” naain jetao acauru relae Jesoso.

*Acuujua jaratoelanaala nenea*

*(Mt 7.13-14, 21-23)*

<sup>22</sup> Nii baiha jetaote, Jerosaleeun cuuruna jaaun jetao, situuruna jaaunru nenacaauru nenaanajaaunru, neseeuuru, naaonjoainuri naineein cachaauru relajeein cuujue Jesoso.

<sup>23</sup> Nii jana jetaote:

“Curuaanaa, jataainna coroatajaaecuruha caa nosa caje nichotenacaauru,” naain caje bajaa leinjiinne jaun jetaote:

<sup>24</sup> “Eenjeen. Nitohanihane jaun, nii acuujua jaratoelanaala nenea cuhane enooche. Arajiite niqui enonaa jerereein nete nainecureneerein.

<sup>25</sup> Inae ecu tihane bana nimichuhin acuujua fuha nii loreri erora nete, inara airiniha nedainequichene, ‘Curuaanaa, acuujua joaracaaune enohacaanura,’ naaichene



janate, 'Inara coitucuhanune coalanaala, cha nequiche chaainti,' naa inara rai nii loreri eroranete,

<sup>26</sup> 'Ii ainane lenoneein, acau cohin, naaonjoarejetocaaunu. Iite canacaanu relarejetohi canacaanu berooru cuhanera,' naaichene janate,

<sup>27</sup> 'Inae inara rai aitococaaun, cha nequiche chaainti. Inara coitucuhaaun. Naain cacaje amuuche, baaso ichaechajeein ichaonacaauru,' nareein.

<sup>28</sup> Nii banate, inara airiniha nedainiquichene inara catu rihoneein chanaa curiquicheein, Cana Coaunera Cojoanonaa que neeuruha satiin *profetacuru*, Abaraaun, Isaca, Jacobo, naaonjoainurine coarajeeincha.

<sup>29</sup> Nitohaneente enoto mitu nichajai coarajeein cana jaabiji nichajai caje, enoto mitu nichajai coarajeein cana raotono nichajai caje, enoto mitu nichajai caje, enoto soo nichajai caje, naaonjoainuri nichajai cajeeurute turuha uurureein cachaauru, Cana Coaunera aina rai Cojoanonaa que neein nelauriaain lenonecuruhane coina.

<sup>30</sup> Nitohanerichaaainne jaunte, nii ena jaolecooruhane jaauru nelatelanaala nenacaauru tabaaurute, ichoaichaniha ranojoneein niha cuurureein. Jana leeochoaauru amurijiriin nelaetoha nocoetonacaauru tabaaurute, satononejeein ranojoiniha cuurureein," nae jetao acauru rai Jesuso.

*Jerosaleen cocoaichacuru coreniha chanaa Jesusone*  
(Mt 23.37-39)

<sup>31</sup> Niritohane jana jetaote:

"Chajaain ena caalai caje amuu. Ii sohinte ii jaonaa jere Erodesicha," naauruha Jesuso rene turuhin fariseeocuru tabaaurune jaun jetaote:

<sup>32</sup> "Aiha niqui. Chajaain nii ataibinae rai: 'Enene, eresi, eresi cojoanoo, naaonjoaichurune coitucuhichuru sitaain, cunaitenacaauru rautaaun, naaonjoareeunni,' naain benichuche.

<sup>33</sup> Nena laen enene, eresi, eresi cojoanoo, naaonjoaainchuru canuhacha ichaneni ichaaechajeein cuujuereunni, nii Jerosaleeun edaa onaa naineniha leinjiin *profetane* jaun, ecu turuhanune reentiaaincha," naain Erodesi rai beratihane baiha jetaote:

<sup>34</sup> "Cairichaaajoaache nohane satiin Jerosaleen cocoaichacuru, inara rene Cana Coaunera letonocuru, chaen *profetacuru*, naaonjoainuri bodoosiin ajeri que sohin jaonajaaonquichene jaun. Araai saaine niqui nitaro asae calaohichuru sararaain siniha ataoharine rijijieein, inara ranaa jereun, nete cacoitucunaa jereneeiche.

<sup>35</sup> Aihane jaunte inaen jelai neriquicheein. Inae cacoharar-  
iheeicheein nacoauneein inara rene turuhanune reeinti-  
aaincha. Nii nacoauneein tururichaaunine cojoanonaa ba-  
nate: ‘Raotojoein turuhine Cana Coauneraneein nenea  
cana Curuaanaara,’ nariquicheein canu raicha,” nae jetao  
cachaauru rai Jesoso.

## 14

### *Laracaain cunaitenaa rautaa Jesusone*

<sup>1</sup> Nii baiha jetaote, nebetacanaa janonaa bana leinjiin cu-  
ruaanaa fariseeo loreri asae lenoniha cuha Jesusone jana  
jetao colurujeeuruhane jaanu leratihane coaracuruhane  
coina, “Chatohanaicha ichareein,” naauruhane jaun jetao  
ecu coarajeeure leeochoauru fariseeocuru.

<sup>2</sup> Nii jana, niritiin coaacuruhane que nainaane jaun je-  
taote, ecu rohan niha leinjiin cacha laracaain cunaitenaane  
jaun jetao:

<sup>3</sup> “Nainihana nebetacanaa janonaa bana rautaeraa  
leinjiin cunaitenaane. Tonaquiche inara,” naain jetao  
Cana Coaunera aitoonjoa que cacha relaurera, chaen  
fariseeocuru, naaonjoainuri caje jetao bajae Jesoso.

<sup>4</sup> Nii jana inauheneecha curuaaequiin aonajeeuruhane  
jaun jetaote, biji que nii cunaitenaa mucuhin rautaaain jetao  
letoae amuhane coina.

<sup>5</sup> Nitohaneein cunaitenaa rautaaain jetaote:

“Chariji inara caje nebetacanaa janonaa bana naluha  
rai toro acau netaojianaja atane jachu ucuacaain nenea  
cuhanene jana, inauheneecha rocoelanaala coarajere.  
Ainhane rai calaohi naluha acau netaojiana jaan atane  
jachu cuhanene, nirijieein rocoelanaala coarajere,” naain  
fariseeocuru caje bajaa Jesusone jana jetaote,

<sup>6</sup> tonoraelanaala inauheneecha aonajeeure.

### *Nesirihatena beseta que cotihanojoihuri*

<sup>7</sup> Niritoha Jesusone jana, nelaurianaanaja rori caohacha  
janijiin nichoae nelauriaauruha nii cotihanojoihurine  
coaraain jetaote, acaauru suujuatiha:

<sup>8</sup> “Chunocoha inara cotihaca nesiriatena beseta quene,  
jiaonriha rori caohacha janijiin nichoae nelauriaaichene.  
Nabana turuha uha inara amuritoheriin nelatein nenea  
cotihanohinete,

<sup>9</sup> ‘Nii ii rori jianeeute ecu nelauriamiin caa leocha,’ naa  
uha nii inara cotiharane, coejetiin rori baaso ichoae nelau-  
riaa cunaa nainequiche.

<sup>10</sup> Aihane jaun nii ajiniha inara cotihara nihane, rori baa-  
sonejeein nenea ichoae nelauriaauche. Nii banate turuhin,

satiin nii ii rohan rori ichoae nelaurianacaauru notaracaae, 'Caa rori caohacha ichoae nelauriaa uura quiicha belai,' naa nii inara cotiharane, ichei caohachanere.

<sup>11</sup> Nitohaneein leeochoaauru amurijiriin nelateein nenea jerenacaaurute, necoeje chanunojoiniha cuurureein. Jana nii nelatecuruhane coaratelanaala nenacaaurute, raotojoein ranojoi niha cuurureein," naain jetao suujuatenajae Jesoso.

<sup>12</sup> Niritiin jetaote acaauru cotihara cache rai jetao:

"Cachaauru cotijiaain corootenaa jereeine, jiaonriha ii nejeraauru, charaaichuru, iicha belaihuri, ii laurijiracuru coriquihonacaauru, naaonjoainuri cotihaquine. Acaauru cotijiaain acaauru corooteeine jana, ii cotijiaain ii corooteeuruhanete, inae ii rai nii cainaenereein Cana Coaunera.

<sup>13</sup> Nitohaniane jaun beseta ichana jereeine, cairichaihuri, nelatelanaala nenacaauru, bacosacuru, maosacuru, naaonjoainuri cachaauru cotihacu.

<sup>14</sup> Acaaurute laen ichei cainana nainecurenihane niha-natiin, Cana Coaunera ichei cainaa cureein, inae rai cachaneein nenacaauru ichtiha oo caje Cana Coaunerane bana," nae jetao nii cotihara fariseeo rai Jesoso.

*Cana Coaunera Cojoanona que cache relaa Jesusone  
(Mt 22.1-10)*

<sup>15</sup> Niritoha Jesusone jana aonaain jetaote:

"Bajiaanachuhinti Cana Coaunera Cojoanona que neein lenonenihacache," naa Jesoso rai leinjiin acaauru aina rori ichoae nenaane jaun jetaote:

<sup>16</sup> "Coaracuchena chuhinti leinjiin cache jetao, lenone jaain arajiin cachaauru cotiharate.

<sup>17</sup> Nitohaneein jetaote, inaen jatoroaa nii lenonene jana jetao rai letono letoae cotihanajaane coina.

Nii jaun jetaote, cuhin acaauru rene turuhin: 'Chajaauchete lenone, inae jatoroaa lenonera,' naain cotihana-jaane jana jetaote:

<sup>18</sup> 'Saan, naininaun. Ena atane coretichaaunne jaun coaraa cuhanunete ne. Canu que ii suujua acateeu,' naain jetao berate leinjiin.

<sup>19</sup> Nii jana leeochoa jetaote: 'Lechooncaain toro amihanenaa que nelatei coretichaaun enane jaunne, acaauru coujuhin coaraa cureeun, amihanenaa que nelatecuruhane coitucuhanune coina. Nii jaunne ichei aitoon caque ii suujua acateeine coina,' naain beratihane jana jetaote,

<sup>20</sup> leeochoa netonai: 'Ena nesirihatihanune jaun nainihaun uhanune,' naain jetao satiin ita rijitiin beratihacoaure, acaauru que suujua acatiha acaauru cotiharane coina.

21 Nii jaun jetaote, jelaiha cauhin nii rai aitocuruhane rijitoejeen biha cue rai fatoroon rai nii letono. Nii jaun jetaote obajeen, 'Chajaain soroneen nese sacutaain cuhin, cairichaihuri, cacha nelatelanaala nenacaauru, maosacuru, bacosacuru, naaonjoainuri cotijiaain cajiya uhanajaau,' nae jetao rai fatoroon nii letono rai.

22 Nii jaun jetaote, nii rai aitohane rijijieen satiin cachaauru chaque nelatelanaala nenacaauru cotijiaain jetao: 'Curuaanaa, inae nii carai aitohine jaa ichacaun. Nete jaiti caute nelaurihananaajaauru,' naa nii letonone jaun jetaote:

23 'Chajaain nenaanajaauru naineein cuhin, unaa jereraauru leeochoauru cachaauru cotihanihute nemomiin canu lorericha.

24 Coatiha inae canu loreri asaee lenonecururihaain nii jauriaanejeein cotihanojoinunrita,' nae jetao nii letono rai fatoroon," naain jetao nii cacha tonorae Jesoso.

*Jesoso cacha nena jerichaane, necairichanaa abaantaacante ne.*

*(Mt 10.37-38)*

25 Jelai caje amuha Jesusone jana, arajiin sacuuruha cachaaurune jaun jetaote, acaauru rai:

26 "Chunocoha canu esenetaain canu cachaneein nena jerihane, rai inaca, rai neba, rai comasai, rai bereecuru, rai nejeraauru, rai baihuru, rai jaberoco, naaonjoainuri belaihanane amurijiriin cacoelaain quere tonoraain nihanete ne.

27 Canuneein nihanune coitucuhin canu cachaneein nena jerera, coroso que airichaaunnine rijijieen itolere necairichanaa abaantaain letohaanune jaan ichaain neeine. Jana ainihanane, coatiha canu cachaneein nena nainihe chuni.

28 Tana inara tabaauru, leinjiin loreri janaa jerihane jauriaanejeein nelauriaain: 'Necha besautiana nainerichaaunni,' naain coaucane coitucuhichene.

29 Nitohaneein coacuelanaala ichaain, nunuheniha nena tihane baiha janihanete, satiin ecu situhin coaraauru nainere:

30 'Caa leinjiin cachate niqui caa loreri ichana jere. Nete jauriaanejeein besautiaane jaanu que coacuhin ichaenihane jaun nainaelanaala ecu jiane,' naain erenaa nainecurure que cachaauru. Aihane jaun jauriaa nejeein besautiana nainihane coitucuhane coina coaauca nii loreri ichara cachane rijijieein coaumiin canu cachaneein nena jerera.

31 Nii rijijieein techu jauriaanejeein nelauriaain coauna nainere leinjiin *rey*, leeocho *rey* aina sonaana que nena jerihane: 'Necha lechoonca oharaancani soondarooru aina

caa coroata choonca oharaancani soodaroo aina nenea *rey* amuritonaa nainichaaun,' naain coaacane jana,

<sup>32</sup> nainenihane coitucuhanete, jaiti coriaae niha nii nejeratihane jaa *reyne* jana, raotojoein jiniiquiin ita aina rucujueein ichaaoruhane coina jitariin nii leecha *rey* nejerate-najaacha bajai tihane coina aitiin nere beranu letoare.

<sup>33</sup> Nii rijijieein coacuelanaala, niicha sirii jianena jere-lanaala nenea, coatiha canu cachaneein nenea nainihe.

*Cotebihane jianihane, nii chaque nelateniha tebene*

*(Mt 5.13; Mr 9.50)*

<sup>34</sup> Coaracuchena chuhinti jataain nelatiha niqui tebene. Nete nii cotebihane jianihane, inae chaque nelateein nenere.

<sup>35</sup> Niheichu temule jaacane coina, atane jasiitihacane jaanu que nihanatiin nelaterihe. Nechu jataain joaereeinte jaole-neein nere.

Nii rijijieein nii chaque nelaterihe, relaanune rijijieein ichaohane baiha, janeein niha canu cachane. Caa caitoon-joan aonacurumiin uricho nacaauru," nae jetao nii arajiin sacuurera cachauru rai Jesoso.

## 15

*Rai nitajenaa carenero eruha carenero beraichane que cuaain nenea parabola que cache relaa Jesusone*

*(Mt 18.10-14)*

<sup>1</sup> Satiin naraaichuru Jorioocuru cairichaeriin Roma curuaanaa rai *impoestonu* que coriqui que cachauru cobaraaurera, chaen leechaauru cachauru baasoneein ichaonacaauru, naaonjoainuri jetaote, Jesoso rene turuure irihane aonacuruhane coina.

<sup>2</sup> Nii coaraain jetaote, "Caa cachate osaaonacaauru cachauru raain nihanatiin acaauru aina lenonenajaque," naain jetao Jesoso necoeje chanuure Moisesa aitoonjoan que cache relaaurera aina fariseeocuru.

<sup>3-4</sup> Niritocuruhane jaun jetaote, acaauru rai: "Tana chunocoha inara caje lefashaain carenero siriquichene jana, nitajiha leinjiine nii iscoonchoonca iscooni ratiriin nii nitajenaa carenero ariha curiquiche eruhichenereein tiaaine.

<sup>5</sup> Nitohaneein inae eruhichenete raotojoein baijiaain turuaain,

<sup>6</sup> loreri asaee inaraacha belaihuri, inara laurijiracuru, naaonjoainuri cotijiaain, 'Canu coroaecuche. Inae carai nitajenaa carenero eruhanu,' nanaa naineriquiche.

<sup>7</sup> Nii rijijieein techu osaaocuruhane coitucunaa jerelanaala neeuruha nii iscoonchoonca iscooneeurine jana, leinjiin cache osaaocane coitucuhin, Cana Coaunera lateein rene turuhane, nii iscoonchoonca iscooni coroaajelanaala, nii

leinjiin turunaacha coroaecure dedeeu nenacaauru,” naain jetao fariseeocuru tonorae Jesoso.

*Coretiin nenea moneda nitajenaa eruha enene que parabola*

<sup>8</sup> Niritiin jetaote: “Nii rijijieeintechu, leinjiin ene, le-chooncaain moneda jataain rai nelateineein nenea caje nitajija leinjiinne, tana raafariin mocohin, eruhanereen tihaain loreri asaji lojoiin caohatiin aririhane.

<sup>9</sup> Nitohaneeein ariin eruhane, tana niicha belaihuri, chaen rai laurijiracuru, naaonjoainuri cotijiaain, ‘Canu coroaecuche. Inaen canu rai nitajenaa jataain canu rai nelateineein nenea moneda eruhanura,’ nariha nii ene ne.

<sup>10</sup> Nii rijijieein techu, ita corojeein neeure Cana Coaunera rai anjeraauru, nosa caje nichoteein niha leinjiin cachanera,” naain jetao acaauru relae Jesoso.

*Rai calaohi ocoala que suujua acatiha rai inacane que parabola*

<sup>11</sup> Niritiin jetaote: “Niha jetao leinjiin cacha coroatajaain calaojoiin.

<sup>12</sup> Nii jana, nii rai calaohi ocoala jetaote: ‘Ofa, canu rai, ohine bana carainein neeninu iicha sirii irihuru, ii atane, ii rucuhele naaonjoaihunri leruu,’ naane jaun jetao, nii rai ninana aina acaauru nainein jetao lerue nii acaauru inaca.

<sup>13</sup> Nii jana rai nocoala jetaote, nii baiha neeoriin jetao nii que banijiaai que jitariin necoreteein jetao nii coriqui aina coriajai atane cuhin, nechu jataain joareein jitariin rai coriqui jaohin nichao que ichoae.

<sup>14</sup> Inaen jitariin rai coriqui jaohane jana, nii nihane jaan neniha quinacaine jaun jetaote, ecu mijitena que necairichae.

<sup>15</sup> Nii jaun jetaote, nii nihane jaan nenea leinjiin cacha caje amihanenaa ariha cuhane jaun, rai cosichuru beraihane coina jetao letoae nii cacha.

<sup>16</sup> Nii jaun jetaote, nii cosichuru lenone raain que lenonee rijitocojoae. Nejetaote nene rai cha tera.

<sup>17</sup> Nii jaun jetaote: ‘Arajiin neeuruha ofa rai amihanenacaauru natiinte, itolere bana ne banejelanaala acaauru lenonenu, cau mijitenacaun ohajihanu canune jana.

<sup>18</sup> Jelaiha cauha cuhanunete ne ofa loreri asae. Chaenne inae ofa rene turuhanune: “Jataainine banejelanaala baaso ichaun Cana Coaunera aina, ii aina, naaonjoaaincha.

<sup>19</sup> Aihane jaun jiaonriha inae ii calaohineein caeteen-era. Raujiaain ichei amihanenacaauru rijijieein caeteera ofa,” nareeunni ofa raicha,’ naain jetao suujua ere nii cacha calaohi ocoala.

20 Niritiin suujua irihane baiha bero cuhane cuhin jelaaha cauha cuha rai inaca loreri asaene jana jetaote, jaiti nita nihane jana coariin cairichaaajoaain coaraane jaun, soroneein coineteen jetao que baluunetiin, jataain belaaain rae nii rai inaca.

21 Nii jana jetaote: 'Jataain banejelanaalane baaso ichaahun Cana Coaunera aina, ii aina, naaonjoaaincha ofa. Aihane jaun jiaonriha ii calaohineein caeteenera ofa,' nae jetao nii calaohi, rai inaca rai.

22 Nejetaote niritohane jana: 'Chajaain erojoein cajione enachasine uhaain, caa rai cajione coreeuche. Chaen rai biji couturi que leinjiin anicho teein, rai tijia quene maajein safato curuhacuche.

23 Chaen leinjiin baca narejeen coereneti soochete, lenoneein beseta ichacaache,

24 ohin nitajihane rai ne caje turuha uha caa canu calaohine jaun,' naain jetao rai cachaauru letoae nii inaca.

25 Nii tonohanau jetaote, neeuruha irihurune jaahun nihane caje cauha uhe nii calaohi inana. Nii jana jetaote, inaan ne-naanaja catainaane jana jetao, auno toteein raansaaauruhane jana erunajae.

26 Nii jaun jetaote, nii leinjiin acaauru cacha cotijiaain jetao: 'Chatohanai besetate ichaquicheta,' naain caje bajaane jana jetao,

27 'Ii nejerate jerichanejeein raurohin turuhane jaun, baca narejeen coereneti soerateein beseta ichae ii inacara,' naain rai biha nii acaauru cacha, nii calaohi inana raine jaun jetaote,

28 jataain obajeein loreri asaae turunaa jerene. Nii jana jetaote, raajenhane coineteen raa cue nii rai inaca, acaauru aina nihane coina.

29 Nii jana jetaote, jataain rautaelanaala jetao: 'Iite raotojoein araai jaanacaain ichei nelateein nihanune coitucuhi. Chaen nechu canu letoaaine chabana cointelanaala ichaain neeun. Nii sainejeein chariji bana leinjiin niji carenero tihee carai, canuhacha belaihuri aina sohin beseta ichacaane coinata.

30 Nii saijieeinte turuha caa ii calaohi, ene cojoaeloroerihuru aina nechu joareein ii coriqui jaoinne janate, rai baca coereneti sohin teeicha,' naa coetaain rai inaca raine jaun jetaote,

31 'Aiha chuhisicha cacalabi. Iite chuhisi itolere bana canu aina neeicha. Nitohanihane jaunte satiin quicha sirii icheineein nera.

32 Nete laen ena esinae rauhijiriin caohachae beseta ichaain rachoojoihacachene, ohin nitajihane rai ne caje na-

coaauneein turuha ii ocoalane jaunra,' nae jetao rai inaca,' naain jetao acaauru relae Jesoso.

## 16

*“Caohachaaain jecha ichareein,” naain loreri beraichaanu que cache ratiriha rai fatoroonne que parabola*

<sup>1</sup> Niritiin jetaote, aina nerelanacaauru rai jetao: “Niha jetao leinjiin cache jataain coriquihonaneein. Nii jetaote, rai loreri beraichaanu que leinjiin cache ratiri jitariin rai rucuheleeuru, rai cachaauru, rai coriqui, naaonjoaihunri beraichanu que. Nii jana nii rai rucuheleeuru itajihacoaane jaun jetaote: ‘Inae ichujeleeuru itajeein, ii coriqui que niicha jerei ichaa taa ii cachara,’ naain jetao biha cuure nii fatoroon rai.

<sup>2</sup> Nii jaun jetaote cotiharateein: ‘Chatohanai ichaaine jaunna, ii biha uure canu rai. Chajaain jitariin chamijianeecuru cocoirichaaain uhane coitucue. Inaen nenacaen nainiheeii canu loreri aina canu rucuheleeuru beraichanu que neeineta,’ nae jetao nii rai fatoroon.

<sup>3</sup> Nii jaun jetaote: ‘Chana nohane jana ichareeun, camijianeon caje canu sitaa canu fatoroone jana. Coatiha atane que chatohanai amihanenaa ichana que nelatejeecaaunne coaalanaalata. Chaen nechu jataain nocoejeeun cache caje chaaelai bajaanune quera,’ naain coaucane baiha jetao

<sup>4</sup> ‘Saan. Inae canuhacha ichaneni coitucuhanu, canu amihaneon colane nedaanune bana canu raa chunocoha loreri asaane coina,’ naain jetao suujua ere nii loreri beraichanu que niicha ratirii.

<sup>5</sup> Niritiin jetaote, leinjiana leinjianaain jetao, nii rai fatoroon que rebeonacaauru cotijiaain: ‘Inaonjoaain rebeoqui canu fatoroon queta,’ naain bajaane jana jetaote;

<sup>6</sup> ‘Lefasha bareranei erene que ne rebeconra,’ naain jetao tonorae nii jauriaanejeein niicha cotijiai. Nii jaun jetaote: ‘Saan, aihachuhisi. Nocoa nii rebeoquine jaan, ninu nelauriaain saquichoonca bareranejeeicha laenaaura,’ naane baiha jetao,

<sup>7</sup> Leeocha cache rai jetao: ‘Inaonjoaain jana rebeoqui ii, canu fatoroon queta,’ naain bajaane jana jetaote: ‘Lefashai costaronei tirico quene rebeconra,’ naain tonoraane jaun jetaote: ‘Saan, aihachuhisi. Nocoa nii ii rebe. Fosachoonca costaronejeeicha cau teein laenaauru,’ nae jetao rai.

<sup>8</sup> Nitohaneein jetaote, jataain nainain rai caohachanuhacha que coacuhin ichaa nii rai loreri beraichane que ninae nii rai fatoroon.

Nitohaneente Cana Coanera Cojoanona que neenihuru amurijiriin, jataain nainain rai caohachanuhacha que



coacuhin neeure Cana Coaunera coitucuhichuru,” naane baiha jetaote:

<sup>9</sup> “Inara netonoaite nii rijijieein Cana Coaunera tenojoi beraichaneein neeiche. Aihane jaun nii itolere inara rai Cana Coauneraacha teei que, aca jerihane rijijieein niicha jerei ichaain neeuche, inae ohichene bana niha raotojoein inara raeranune coina.

<sup>10</sup> Nitohanihane jaun, aansijiin laojoiri raa cachane niha natiin caohachaain nii rai teraacha jerei icharate, arajiin cha raane jerichanejeein caohachaain ichareein.

<sup>11</sup> Nitohanihane jaun, caa nitajerai nenea chauratane que cha siriin neeichene nihanatiin caohachaain ichaeneeichene coatiha nerinaai inara rai esinaen rauhijiriin chabana nitaje-naacharanejeein nenea tera.

<sup>12</sup> Aihane jaun, inara rai eroraqui tenojoi que caohachaain cha ichaain neneeichene, coatiha nerihaain inara rainein neeninu tera.

<sup>13</sup> Nihei chuni coroatajai fatoroon rai niicha latei icharaneein nenea nainei, nabana leecha que jaolecuhin, leechaacha ere tonorana nainihane jaun. Nitohanihane jaun Cana Coauneraacha ere tonoraain nenea jerichaane, nii canaacha jerei que coauna nainihaaca,” nae jetao aina nerelanacaauru rai Jesuso.

<sup>14</sup> Niritoha Jesusone jana aonajeein jetaote, Jesuso necoeje chanuure fariseecuru, acaauru jataain coriquiicha que coacuhin neeuruhane jaun.

<sup>15</sup> Nii jaun jetaote, “Inarate caohacha ichaa nocoetiin neeiche itolere bana cachaauru notaracaae. Nete inara suujua cuhane inaraacha coacui coitucue Cana Coaunera. Nitohaneein jataain nelateineein cachaauruhacha coarai que te jaoleque Cana Coaunera.

*Cana Coaunera rai rauhi inoaensi aina Jesusohacha tei rai cojoanonaa*

<sup>16</sup> Moisesa, chaen *profetacuru*, naaonjoainuri cojoanonaate turuha Joaan Baotisitane que tiaaajoaain nelu. Nii caje coauneeinte beebejenojoneein nelu Cana Coaunera cojoanonaa canuhacha turuai. Nii quete necounujeeure nii canuhacha teei Cojoanonaa sirichuruhane coina.

<sup>17</sup> Canu Cojoanonaa que neeichene nihanatiin satiin Cana Coaunera rai rauhi inoaensi tonoraain neeichenete caohachae.

*Comasai joaera que cacha relaa Jesusone  
(Mt 19.1-12; Mr 10.1-12)*

<sup>18</sup> Leinjiin cacha rai comasai jaohin leecha ene raanete jataain osa que nesaruha aicheein. Jerichanejeein techu,

lana joera ene raain niha cachane osa que nesauruha aicheein.

*Jataain coriquihona aina oha cairichainein nenea Lasarone*

<sup>19</sup> Niha jetao leinjiin cacha jataain coriquihonanein. Nitohanein coriquihocane jaun jetaote, itolere bana jataain cajione caohacha que necoreetein, lenone caohacha nejesina que beseta ichanajaque.

<sup>20</sup> Nii jana jetaote, ecu ne jaberoco nainecojoaain abero siriin leinjiin cairicheinejeen nenea Lasaro. Aca jetaote, nii coriquihona loreri chajeniha lauheque nejesinane atani-choae.

<sup>21</sup> Nitohanein cairicheinejeen nihane jaun jetaote, nii coriquihona rori caje nalunaa rai lenone coní raain que lenonena jere nii cairichei. Nii jana remaaecuru jetaote, rohan turuhacoaain nii rai nabero lojoihure.

<sup>22</sup> Nitohaneinne baiha inaeen oha nii cairicheinejeen nenea- nii Lasarone jana jetaote, amaaure anjerauru Abaraaun aina dedeeu nihane coina. Nii jana jetaote, nii coriquihona netonai inae ohane jaun conautecure.

<sup>23</sup> Nitohanein ohin necairichaauruha onacaaurune jaan netiin necairichajeen, nita icharajeriin neein Abaraaun coaraa nii coriquihonane jana jetaote, Abaraaun rohan ne nii jaiti jiniiquiin ichaaoruhane bana niicha cairichaerii Lasaro.

<sup>24</sup> Nii jaun jetaote: auhaquiin: 'Cairichaaajoaain cacoharaaura ofa Abaraaun. Atiin nii Lasaro rai aitoote, esinaeca que biji coturi macohin setejaain calele jelarooa uhinera. Caune jataain necairichajeen usi tabai janara,' naane jana jetaote:

<sup>25</sup> 'Aiha chuhisi niqúi. Nete jiniiquiin inara jaberoconeein ichaohichene bana, jataain raotojoei ichaonaa que ichaore-jetohilura cacalabi. Nii jana caa Lasarote, jataain ichaonaa baaso que ichaohin cairicheinejeen nerejetelu. Nii jaunte nii coacuhin, necairichaaequi iine jana, aca caohachaain ranojoneein nera.

<sup>26</sup> Nii choae tacaain techu, cana cataaun ne jataain ucuacain ucuha jachu satonoelanaalara. Nii jaun nii inara nichae situnaa nainecuruhi cajicheique nenacaauru. Niheichu inara niha natiin nii cajicheique turunaa nainihee-icheta,' nae jetao Abaraaun, nii coriquihona onaa rai.

<sup>27</sup> Niritoha raine jaun jetaote: 'Nii jaunne ichei aitoon, canu inaca loreri asaee

<sup>28</sup> nii neeuruha saouqii canu nejeraaurune jaun Lasaro lethaine, acaauru rai iriha cuhane coina. Nabana caa

necairichaecaaunne jaaun acaauru netonai uuruhane coataara, ofa Abaraaun,' naa nii coriquihonane jana jetaote;

<sup>29</sup> 'Nete Moisesa aina *profetacuruhacha* laenanohin siriin neeure, nii tonoraain neeuruhinera,' naa Abaraaunne jana jetaote;

<sup>30</sup> 'Aiha chuhisicha ofa Abaraaun. Nete acaauru rene ichanaain turuhin biha leinjiin onaane, acaauru netonai nii esenetana nainecururera,' naa nii coriquihonane jana jetaote;

<sup>31</sup> 'Aiha chuhisi niqui. Nete Moisesa, chaen *profetacuru*, naaonjoainuri esenetaaurenihalune rijijieein, acaauru rene ichanaain turuuruha onacaaurune nihanatiin, esenetana nainecurunerera,' naain tonorae Abaraaun," naain jetao fariseeocuru suujuate Jesoso.

## 17

*Jataain necohalajiine osa que namute cache saruera*  
(Mt 18.6-7, 21-22; Mr 9.42)

<sup>1</sup> Niritiin jetaote:

"Itolere banate nereein osa que inara sarueranu. Nete laen jataain necairichanaa coareein nii osa que leeochoauru saruera cache.

<sup>2</sup> Nitohaneein caa ena Cana Coaunera coitucuhajeraauru sarueratiha osa quene ajinihate caohachare nulunoque ajeri tijichaain cucuana cuhane joeratenojoi nihane. Aihane jaun nii que necohalajiin neeuche.

<sup>3</sup> Chatohaneein baaso ichaain niha ii nejerane suujua teeu. Suujua teeine jana ii ere tonoraain caohachaaain nichao coreein nihane que ii suujua acateeu.

<sup>4</sup> Lejiichoo cuhane caaunsi saneein ichei baaso ichaain nihane nihanatiin, caaunsi saneein turuhin, 'Inae laen coaiterihaaunnita,' naa uhane, que ii suujua acateeu," nae jetao Jesoso.

*Esinae rauhijiriin esenetaacane itolere ichana nainichaane*

<sup>5</sup> Nii jana jetaote: "Jataain itolere ichana nainiha Cana Coaunerane esenetaain nihacaanune jaanu teeu canacaanu raicha," naauruha Jesoso rai niicha cocoinaauri afosotoorune jaun jetaote:

<sup>6</sup> "Mosatasa ucuhe laojoiri jataain aansijieein nenea rijijieein aasaeriin esinae rauhijiriin esenetaaichenete caa shabeento rai: 'Niilai caje nerocohin caa cucuana cuhane omaronihunra,' naaiche caa shabeento raine inara ere tonoraain aiche caa shabeentora," naain jetao acaauru tonorae Jesoso.

*Letononeein nenaacha ichaneni*

<sup>7</sup> Niritiin jetaote: “Inara leinjiin cachaaquichene jana, inara ocoana jana temule jaane jaanu que atane retuhin, baca beraain, naaonjoanne caje cauhane janate rai: ‘Nelauriaaute lenoneei,’ nanaa coacuhelanaala:

<sup>8</sup> ‘Chajaain ena canu lenonenu jaain, ena uhaaune lenoneein acau coe. Nii baihate ii netonai lenoneein acau coriquiinha,’ nariquiche.

<sup>9</sup> Nii choae tacaain techu, ‘Narihara,’ nanaa coitucueneeiche nii inara cacha rai, letoaain neeichene jaan ichaain nihane coreniha.

<sup>10</sup> Nii rijjijeein inara letoaain niha Cana Coaunerane jaan nainaain neeichene bana, nainiheeiche: ‘Jataain cacha caohacha neeine nihacaanura’ naain erenaa nainiheeiche. Raujiaain: ‘Canacaanu letoaain nihalune jaanchane inae nainacaanura,’ naauche,” nae jetao acaauru rai Jesuso.

*Lechoocaain cosibi aonaain caaun cunaitenacaauru rautaa Jesusone*

<sup>11</sup> Jerosaleeun cuhane jaun jetaote, Calileea, Samaria, naaonjoainuri batane cataaun situhin cue Jesuso.

<sup>12</sup> Nii jana jetaote, leinjiin neseu turuhane jana jetao, nii nese caje que taca cuure lechooncaain cosibi caaun cunaitenacaauru cachaauru. Nitohaneein cuhin jetaote, cocoaeraa cacha rohan turuha nitohanai cunai aonaera cachane jaun jetao, Jesuso caje coriaae netiin:

<sup>13</sup> “Cairichaaajoaain nohane canacaanu coaraaura cacha relaera Jesuso,” naaunre jetao Jesuso rai ehequiin.

<sup>14</sup> Niritocuruha raine jana jetaote:

“Chajaaincha saseredotecuru rene turunichuchete inara coaracurumiincha,” naa acaauru rai Jesusone jaun, cuujueuruhane jana jetaote, inaen cosibi caje nerautaaain somaraain neeure, acaauru dadaelanaala aitoa Jesusone saijiein.

<sup>15</sup> Inae nitohaneein nerautaaauruha acaauru cosibi cajene coaraain jetaote, jelaiha nejenohin cuhin, tonijiaain ereein Cana Coaunera coroaajeein jetao,

<sup>16</sup> Jesuso acatiha rai tijia asae atanichoae neseoriaain jetao, rachoojoe leinjiin cacha Samaria cocoaicha Jorionelaanaa nena.

<sup>17</sup> Nii jaun jetaote:

“Tajian lechooncaauruhani caa cosibi caje nerautanacaaurune. Aancaauru chaen leechaauru iscoon neeurita.

<sup>18</sup> Leinjiin caa Jorionelanaala nena cacha estaraajero-hachate jelaiha nejenohin Cana Coaunera coroaeca uhe rautaanune corenihara,” naain

<sup>19</sup> “Esinae rauhijiriin esenetaaine jaunte, ii cunai caje nerautaa, chajaain nimichuhin caunihura,” nae jetao rai Jesuso.

*Naaonjoaain tururichaaain quiicha tei Cana Coaunera Cojoanonaane*

(Mt 24.23-28, 36-41)

<sup>20</sup> Nii baiha jetaote, “Chabana turoreein Cana Coaunera cojononaa,” naain jetao Jesoso caje bajaare fariseecuru.

<sup>21</sup> Nii jaun jetaote: “Coatiha inanacaain tururinaain Cana Coaunera cojoanonaa. Niheichu, ‘Caute ne. Tajihate ne,’ naain coitucurieeicheein. Inaen inara jana niha quiicha tei Cana Coaunera Cojoanonaa,” nae jetao acaauru rai Jesoso.

<sup>22</sup> Niritohane baiha jetaote, aina nerelanacaauru rai jetao: “Inae amuhanune baihate jaiti nacoauneein turuenihanune ajiniha le janojoeinniji ena caa canuhacha tei janonaa coarana jereriquicheein niqiu, nete coaraeneriquicheein.

<sup>23</sup> Nii jana tabaaurute inara rai, ‘Caute ne. Tajihate ne,’ naaurureein. Nete nelatene, niritocuruhane jana acaauru esenetaain acaauru sacuhichene.

<sup>24</sup> Nacoauneein turuha urichaaunni acaihaniji cachaneein nejanohanaane Cojoanonaa que turuhane banate, charijijeein teinti jeraneejoaain dede conaa jiacanone, saain coanojoneein ne. Nii rijijieeinte saain coanojoneein coitunojoiniha cureein inae nacoauneein turuhanune bana.

<sup>25</sup> Nete amuhanune ajiniha jauriaanejeein jataain canu que nererojoecaain canu que jaolecoorureein, caa ena cojoanonaa que nenacaauru cachaaauru.

<sup>26</sup> Charijieein teinte nihalu Nohene bana ailu, nii rijijieeinte jerichanejeein aiha cureein nacoauneein turuha uhanu canu acaihaniji Cachaneein nejanohanune Cojoanonaa que tihane bana.

<sup>27</sup> Coaracuche nachuhinti nii chaque nererojoecaeriin nelanaala, nisirihateein, lenoneein, acau cohin, naaonjoaunruhalu cachaaauru bote cuhane enohin nichotiha Nohene cojoanonaa que turuhanereein tiaaine. Nii jana uha elo tabaine jaunte satiin ohacoaurelu.

<sup>28</sup> Nii rijijieein techu cha coacuelanaala raotojoeein neein, acau cohin, lenoneein, netemulijiaain, namihaaneoo que necoreteein, niicha latei coreteein, neloheriteein, naaonjoaurelu cachaaauru nihalu Lotone bana.

<sup>29</sup> Nii jana, Sodoma neseu ichaohane caje amuha Lotone janate, usi aina naluha asofere dede cajene jaun caaun satiin oorelu cachaaauru.

<sup>30</sup> Nii rijijieeinte jerichanejeein aiha cureein nacoauneein turuha uhanu acaihaniji cachaneein nejanohanaa nichaaunne Cojoanonaa que turuhane bana,” naain jetaote,

<sup>31</sup> “Nii cojoanonaa bana inara loreri janori ichoae neicheene, jiaonriha jelaiha fauhin inara loreri caje inara rucuhale

ranaa coaaquichene. Niheichu inara ocoana jana neeichene jana aihane, inara loreri asaae caunaa coacuelanaala rauhijiriincha sorooche.

<sup>32</sup> Nitohanihane jaun, niicha ratirii coaucane jaun aihalu Loto comasaine coacuhin nainain ichaaoche.

<sup>33</sup> Aihane jaun rai rucuheleeru queecha coacuhin neite rai nichao itajereein. Jana nii rucuhele que coacuelanaala nichao rainuhachaque coacuhin neite nichotereein,” naain jetaote,

<sup>34</sup> “Nii airichaanne cojoanotiin banate, leinjiin eruhari cuhane niha cuurureein coroatajai cachaauru. Nii jana leinjiin amanojoinihane janate, ecu nedaa cureein leeocho.

<sup>35</sup> Jana coroatajai enecurute, ederi que chaelai tutuurureein. Nii jana leinjiin amanojoinihane janate ecu nedareein leeocho.

<sup>36</sup> Nii jana coroatajai quichaaaurute nocohana jana neeurureein. Leinjiinte amanojoinereein, leeochoate ratirinojoinereein,” naane jana jetaote:

<sup>37</sup> “Chatoanai bana, chucha nitohanereainte Curuaanaa,” naain caje bajaauruhane jaun jetaote:

“Inae ecu tihane banate coitucunojoinereein, canii setu que fauha uha ichotarine jana caje coaraain coitucunojoinihane rijijieein,” nae jetao aina nerelanacaauru rai Jesoso.

## 18

*Joesio necha ansaineein nenea rai cache coulurujiha autanane que parabola*

<sup>1</sup> Coiinteerilanaala Cana Coanera bajaauruhane, Cana Coanera bajaauruhane coina *parabola* que cuaain acauru relaa Jesusone.

<sup>2</sup> Niritiin jetaote: “Coaracuchenachuhinti leinjiin neseu nihalu jetao leinjiin joesio cachaauru que suujua acatelanaala, niheichu Cana Coanera batohane que casilanaala nenea ne.

<sup>3</sup> Nii jana jetao, nii neseu ichoae leinjiin autana. Nii autana jetaote, nii joesio rai leinjiin cache nejeratenaja colurujiha cue.

<sup>4</sup> Nii jana jetaote, carajaain nirijieein nere tonorana jerehanaala ne nii joesio. Nejetaote nii baiha: ‘Cachaauru que nihanatiin casuujua acateein, niheichu Cana Coanera batocaaunne que casiin nihaaun niqui.

<sup>5</sup> Nena raotojoein nihanune rohecaain, casuujua rohecaain sacuha caa autanane coataa naitoonjoa tonoraain ichareeun caihanihane coina,’ nae nii joesio.

<sup>6</sup> Coaracuchenachuhinti, jataain necha aansaineein nihane saijieein suujua coaraa nii joesione.

<sup>7</sup> Nii jaunte nii amurijiriin, nii janijiin nii raauri, janotiine-tojoein, jiichoonetojoein, naaonjoaain bajaabajaeraauru cocoaeratenaa nainereein Cana Coaunera.

<sup>8</sup> Nitohaneeinte carajaain cohacuruhane latelanaala enaacha acaauru cocoaeraterere. Nena laen inara caje bajaau, canu inaraacha cohajei cachaneein nejanohanaa nichaaunne, nacoauneein turuhanune reeintiaainacha canuneein nihanune esenetaain caitoonjoa ichaaechajein neeururichaaain cachaauru,” naain jetao acaauru relae Jesoso.

*Roma rai coriqui bajaaurera aina fariseeocuru que parabola que cuaain cache relae Jesusone*

<sup>9</sup> Nii baiha jetaote, nii acaauruhacha caohachaaain niha no-coetiin leeochoauru que jaoleconacaauru rai jetao, acaauru ichaohacha que *parabola* que cuaain jetao:

<sup>10</sup> “Coroatajai cache jetaote, Teenforo asae cuhin Cana Coaunera baja cuure. Leinjiin jetaote, nechu jataain naraaichuru cairichaa Roma rai *impoestonu* que coriqui bajaerane. Jana leeochoa jetaote fariseeone.

<sup>11</sup> Nii fariseeo jetaote, ‘Narihara Cana Coaunera ichoreniha ainacaauru tocohanein asijiautoneein, necha aansaneein ichaohin, joareein ene canu sinijeranelanaala nena aina ichaohin, naaonjoaain nenihanu canune coreniha. Chaen nechu, naraaichuru cairichaa Roma rai *impoestonu* que coriqui bajaaurera rijijieein neneeun.

<sup>12</sup> Chaen nechu, jataain ii coitucuhanune esenetaaine coina, le semanacuru cuhane coroata saain casuri couu lenone lanaala neein ii bajaee bajajeein, lechooncaain chae-lai raanu camijianeoo corenihane, rai lechoocani teein neun ii raicha,’ naain jetao Cana Coaunera bajaee chujuhequuin.

<sup>13</sup> Nii jana nii naraaichuru cairichaeriin coriqui bajaera jetaote, caje icharaain neein necoeje caaun najabaracaain dede coaraelanaala jetao: ‘Cairichaaajoaain cacoaraau os-aotohanune jaaunra Cana Coaunera,’ nae nalarijia faone faoneein.

<sup>14</sup> Niritiin bajaane jaunte, inae que suujua acatiha Cana Coaunerane jana jelaiha nenajaun cauha cue nii naraaichuru cairichaa coriqui bajaera. Nete laen nii fariseeo que suujua acatene Cana Coaunera.

Nitohaneeinte nii leeochoauru amurijiriin Cana Coaunera coitucutiin, itolere que nelaetoha nocoetiin nenacaaurute chaque nelatelanaala jaoleneein neeurureein. Jana rai nichao coitucuhin leeochoauru amurijiriin nena coacuelanaala nenacaaurute nelatein ranojoinecurureein,” nae.

*Canaanaihuru belaiha Jesusone**(Mt 19.13-15; Mr 10.13-16)*

<sup>15</sup> Jesuso rene canaanaihuru turuaa uuruha acaauru mu-cuhane coinane jana jetaote, Jesuso rene turuanajaauruhane caohateeure aina nerelanacaauru.

<sup>16</sup> Nii jaun jetaote, nii aina nerelanacaauru cotijiaain jetao: “Coa rohecanajaachete canu rene turuuruheine nii canaanainuru. Jiaonriha canu rene turuuruha canaanaihurune caohateeichenera. Cana Coaunera Cojoanonaate, aihuruha caa canaanaihurune rijijieein nenacaauru raineen nenea nera.

<sup>17</sup> Esinaen rauhijiriine inara rai aitoreeunni. Aihuruha caa canaanaaihurune rijijieein canu raain neniha chunine, coatiha Cana Coaunera Cojoanonaa que nerihain,” nae jetao aina nerelanacaauru rai Jesuso.

*Jesoso aina iriha leinjiin cache coriquihonane**(Mt 19.16-30; Mr 10.17-31)*

<sup>18</sup> Leinjiin cocoinanacai jetaote, Jesuso aina iriha uhe. Nitohaneen rene turuhin jetaote:

“Caohachanejei cache relaera, cha ichareeun chariji bana nitajenaachara ichaonaa caohacha que ichaonaa nainichaaunne coina,” naain Jesuso caje bajaane jana jetaote;

<sup>19</sup> “Chanuna ‘caohachanejei cache relaera,’ naain cacuru-juateei. Leinjiin Cana Coauneraachate caohachanejeen ne,” naain jetaote:

<sup>20</sup> “Inae raotojoein Moisesa aitoonjoan coitucuhi: ‘Jiaonriha nejelau ene ii sinijeranelanaala nenea aina ichaohin neeine. Coa sonajaain jaoha. Coa asijiauha. Coa chamute cache cairichanaa jerenacaaun chuni cache coacuhin, casaje que ereein niha. Chaen efojiaraauru que ii suujua acateen acaauru coitucuhin neeun,’ naane coitucuhi,” naa rai Jesusone jaun jetaote:

<sup>21</sup> “Aihanu chujian. Canu enamanaca caje coauneeinne jitariin nii naitoonjoan tonoraain neeun,” naain tonora nii cocoinanacaine jaun jetaote:

<sup>22</sup> “Aihachuhisi niqui. Nete jaiti lanajejen leinjiin tonoraain ichaaine coina. Jitariin nii iicha sirii rucuhele que necoreteein, cairicheihuru rai jitariin nii coriqui chaluu. Nii banate dedeeu ichaonaa caohacha que ichaonaa naineriquiin. Nitohaneen ichaaine baiha canu aina uu,” nae jetao rai Jesuso.

<sup>23</sup> Nejetaote niritoha rai Jesusone jaun, jataain inaderae nii cache jataain coriquihocane jaun.

<sup>24</sup> Nii jaun jetaote:

“Jataainte caaintate Cana Coaunera Cojoanonaa que ichaoa leinjiin coriquihonane.



<sup>25</sup> Nii Cana Coaunera Cojoanonaa que ichaaoruha coriquihonacaurune coina caaintaane fautaain caaintarihei leinjiin camecho rai oco jachu cuhane situhane coina,” nae jetao inaderaa nii coriquihonane coaraain Jesoso.

<sup>26</sup> Nii jaun jetaote:

“Nitohaniane nichotena nainerinaain chuni,” naain caje bajaauruha ecu neein aonajeeunrerane jaun jetaote,

<sup>27</sup> “Nii caaintatiin cachaauruhacha coarai, coatiha Cana Coaunera rai caaintajiehita,” naa Jesusone jaun jetaote,

<sup>28</sup> “Canacaanune jitariin canacaanuhacha sirii ratiriin ii sacuhacaanulu,” naa Fedorone jaun jetaote:

<sup>29</sup> “Esinae rauhijiriin chunocoha, Cana Coaunera Cojoanonaa que ichaohane coina, rai loreri, rai sinijera, rai bereecuru, rai nejeraauru, rai fojiaraauru, naaonjoin ratirichate,

<sup>30</sup> jataain nii amuritoheriin caa chauratane que siriin, nii choae tacaain nii turuha uheni Cana Coaunera Cojoanonaa que chariji bana nitajenaachara ichaonaa siricheeincha,” naain jetao Fedoro tonorae Jesoso.

*Orichaainne bihane nichatasatiha Jesusone*

*(Mt 20.17-19; Mr 10.32-34)*

<sup>31</sup> Nii baiha jetaote, jelai nii lechoonca coroatajaain niicha cocoinaauri cotijiaain jetao: “Enate laen Jerosaleeun cuhacache, cuu nii acaihaniji Cachaneein nejanohanaa nichaaunne que aitiin laenacuruhalu satiin *profetacurune* nainaanune coina.

<sup>32</sup> Nitohaneeinte nejelau ataneu nenacaauru estaraanjerooru bijihu canu teeurureein nechu jataain cacotaiha baasoneein caeteen, canu nocoeje chanuhin, canu coluneein, naaonjoaunruhane coina.

<sup>33</sup> Nitohaneein canu teeinte, enuha que canu faohacuruhane baiha canu ateinaa cuurureein. Nena nichata janohane cuhane nacoauneein ichanaareunni,” nae jetao niicha cocoinaauri rai Jesoso.

<sup>34</sup> Nii niritoha acaauru raine jana jetaote, nii naitoonjoan aonacuruhane saijieein esenetana nainecurene.

*Jericoo leinjiin maosa rautaa Jesusone*

*(Mt 20.29-34; Mr 10.46-52)*

<sup>35</sup> Niritohane baiha jelai caje amuhin Jericoo turue lalajeein cuujiha Jesusone jana jetaote, bero cuhane lauhequiin coriqui bajaa niha leinjiin maosane jaun jetao,

<sup>36</sup> arajiin situha cachane aonaain jetao: “Chauruna toon situha cue,” naain bajaane jana jetaote:

<sup>37</sup> “Nasarete cocoaicha Jesusote sacuureraura cachaauru aina situha cuera,” naain beeuruhane jaun jetao:

38 “Atiin nohane cairichaaajoaain cacoharaaura Rabiri nefoerate Jesoso,” naa ehequiin nii maosane jaun jetao,

39 niritohane caohateure sitonaane coina nii ichohaichaniha cunacaauru. Nejetaote, acaauru ere tonoraelanaala jeelai amuritoheriin ehequiin jetao:

“Atiin nohane cairichaaajoaain cacoharaaura Rabiri neforate Jesoso,” nae jetao nii maosa.

40 Nii jaun jetaote, ecu inacuhin raerateein jetao inaen rohan nichuutaane jana jetao:

41 “Chate jereeita,” naain caje bajaa Jesusone jana jetao:

“Canota rautaaainene jereeunra Curuaanaa,” naain tonoraa nii maosane jaun jetaote,

42 “Saan ai. Esinae rauhijiriin quesetaaine jaunte inae maosaneeine caje nerautaaicha,” nae jetao rai Jesoso.

43 Niritoha rai Jesusone rijieeoritiin maosanihane caje inae conoha rai notane jaun jetaote, Cana Coaunera coroaheen Jesoso sacue nii maosa.

Nitohaneein nii maosa rautaane jana, ecu neein coara-jeeurera cachaaauru netonai jetaote, satiin Cana Coaunera coroaheen rachoojoeure.

## 19

### *Saqueeo loreri asae cuha Jesusone*

1 Jericoo turuhin jetaote, nii Jerico nese cataaun situha cue jetao Jesoso.

2 Nii jana jetaote, ecu ichoae leinjiin cache, naraaichuru Jorioocuru cairichaeriin nena, Roma curuaanaa rai *im-poestonu* que coriqui bajaaurera curuaanaaneein nena coriquihona Saqueeo.

3 Aca jetaote, jataain Jesoso coitucunaa jerihane jaun coana jere niqiu. Nejetaote, jataain araaicha cachane jaun coana nainesine Saqueeo, leeochoauru fautaain ecoainjihane jaun.

4 Nii jaun jetaote, coana nainihane coina soroneein najiniha cuhin jetao situha curichaaain nii Jesusone jaaun nena leinjiin enuha que iniin jetao cohaca cue.

5 Nii jana jetaote, nii iniin cohacane jaan nena enuha asae situha cuhane jaun, jabatoroain coaraain jetao:

“Saqueeo, chajaain soroneein niilai caje fauha uu. Enenene ii loreri asae nesurureunni,” naa rai Jesusone jaun jetaote,

6 soroneein nii enuha caje fauhin jetao, coroaheen rai loreri asae Jesoso amae jetao nii Saqueeo.

7 Nii coaraain jetaote: “Chanuna jataain osaaona niha taa cachane coitucuhane saijieein rai loreri asae aina nesuruha

cue,” naain jetao Jesoso que ereeure ecu satiin neein coara-jeeurera cachaauru.

<sup>8</sup> Niritiin Jesoso que ereeuruhane jana jetaote, nichaa-raain jetao:

“Aonaan Curuaanaa. Jitariin quiicha sirii rucuhelene leruhin tereezni cairichaiihuru rai. Chaen nechu chaaelai que chuni basijaiuhin nihanune, jena saain jelai amurito-heriin cainareeunnicha,” nae jetao Jesoso rai nii Saqueeo.

<sup>9</sup> Nii jaun jetaote:

“Caa cacha netonai inara rijijieein, Abaraaun nefoerate-neein nihane jaunte, enene caa rai loreri asae turue jiana-coon osa caje mitaeranura.

<sup>10</sup> Nii acaihaniji cachaneein nejanohanaa nichaaunnena, caa chauratane que turuun, nii jaolecohichene jaan cachaauru nitajenaa neein nenacaauru ariin, acauru ichoterateein raanune coina,” nae jetao rai Jesoso.

*Coriqui raaurera cachaauru que parabola que cuaain cachaauru relaa Jesusone*

*(Mt 25.14-30)*

<sup>11</sup> Niritoha Jesusone jana, ecu neein aonajeeuruha cachaaurune jaun jetaote, acauru relae *parabola* que. Inae Jerosaleen rohan nichuuntaauruhane jaun, “Inae jerihane turuhelalajiha Cana Coanera Cojoanonaara,” naain coaacuruhane jaun jetao acauru rai:

<sup>12</sup> “Coaracuche jetao nihalu leinjiin cacha *rey* araaineein nenaane. Nii cacha jetaote, *rey* ineein cocoainaaauruhane coina jetao coriaji atane cue, inae *rey* ineein cocoainaaauruhane jana jelaiha natane que cauha uhanne coina.

<sup>13</sup> Inae amuhane rai jetaote, lechooncaain rai letonocuru cotijiae, acauru naineein jequuin coriqui chaluhane coina. Nitohanein acauru cotijiaain coriqui chaluhin jetaote: ‘Caa coriqui aina amihaneeuhe turuhanune reeintiaaincha,’ naain ratirinajae.

<sup>14</sup> Nejetaote, jataain que nererojoecaaure nii natane que nenacaauru cachaauru. Nii jaun jetaote, caaijie acauru ere beranu que leinjiin letoaaure ‘Coatiha canacaanu curuaanaa *rey* ineein niha caa cachane jerihacaanuta,’ naa cuhane coina.

<sup>15</sup> Nejetaote nitohanein nere bera letoaauruha caaijiene sajieein, *rey* ineein cocoainaaauruhane jaun, *rey* ineein jelaiha natane que turuha uhe.

Inae nenajaun turuhin jetaote, nii letonocuru coriqui teein ratirihane jaanru cotiharate, ‘Inaonjoaaincha canu coriqui joozure le cacha cachaauruta,’ naain coitucuhane coina.

16 Nii jana nii niicha cotiharatei ichoaichaniha rene turunaa jetaote: 'Curuaanaa lechoonca saneeinte nefae ii coriqui,' naa turuhinne jaun jetaote;

17 'Saan. Aihane jaun iite jataain caohati canu cachaneein neei. Inae acaihaniji que caohacha ichaai caa coroatajaji coriqui ainane jaunne, lechooncai nese coaranu que coberenadoroneein chetereunnicha,' nae rai nii *rey*.

18 Nii jana leeocho jetaote: 'Curuaanaa, saoqui saainte nefae ii coriqui,' naa turuhinne jana jetaote,

19 jerichanetjoein: 'Saan. Aihane jaun saoquii nese coaranu que coberenadoroneeinte neriquiincha,' nae jetao rai.

20-21 Nii jana leeocho jetaote: 'Curuaanaa, nocoa ii coriqui. Jataain necha aansai cache neeine jaunne ii coasiha, cajione que conajaain cau rucujueun. Chaen chaelai teneeine nihanatiin, enaacha temunojoi taain raain, naaonjoain neeine coitucuhanune jaun,' naane jaun jetaote;

22 'Ichaajenihanete ii ereecha que necouluruhequi canu cache baaso. Chanuna chaen, nii chaelai tihanune que airijiin, enaacha temunojoi taain, raain, naaonjoaanune coitucuhi raotojoein inatiin,

23 baanco cuhane nii canu coriqui tiha cueneei, canu loreri asae turuhanune, jelai amuritoheriin carai cainainerichae,' naain jetao,

24 nii ecu nenacaauru rai: 'Caje nii coriqui ruluhin, nii lechoonca saneein faera rai teeuchera,' naane jana jetaote:

25 'Curuaanaa, chanuna inae lechoonca saneein jelai amurijiriin siriha natiin nacoaauneein tenacare raita,' naaunruha raine jaun jetaote:

26 'Inae inara rai aitocooaun, jataain siricha raite jeelai amuritoeriin terareein. Jana sirihei cajete, coroatajajeein sirihane nihanatiin jitariin caje ruluherareein,' naain jetaote:

27 'Chajaain chaen nii *rey* ineein nihanune jerelanaala cague nejeratenacaauru uhaain cau canotaracae teein sohin jaonajaauche,' nae jetao nii *rey*," naain jetao cachaauru relae Jesoso.

### *Jerosaleen cuha Jesusone*

(Mt 21.1-11; Mr 11.1-11; Jn 12.12-19)

28 Niritohane baiha jetaote, Jerosaleen cunajaun,

29 nii Jerosaleen rohan ichuunejeein nenea ichtatane ucuuno Olibo neeonjoain neein niicha curuateeuri rohan nenea Betafajee, Betania, naaonjoainu turuhin jetaote, coroatajaain aina nerelanacaauru rai:

30 “Chajaain taa cana ajiniha nenea neseeu cunichuche. Ecute cositenojoneein teequi leinjiin boro chabana cacha amunajaniheine eruriquicheein. Chaen cajiha carai cosi rutuhin uhaauche.

31 Inae uhaaichene jana, ‘Chanuna nii boro cosi rutuhin amaaiche,’ naa chunine, ‘Cana Curuaanaate latihane jaun raeratera,’ naauche,” naain jetao letoanajae Jesuso.

32 Niritiin acaauru letoaa Jesusone jana, nii neseu cuuruhane jaun jetaote, nii acaauru rai aitothane rijijieein nii boro eruha cuure nii aina nerelanacaauru.

33 Nitohaneein ecu turuhin, nii boro cosi rutuhajeeuruhane jana jetaote:

“Chanute nii boro cosi rutuhicheta,” naa acaauru rai nerorane jaun jetao:

34 “Cana Curuaanaate latihane jaun raeratera,” naaure jetao rai.

35 Nitohaneein cosi rutuhin jetaote, nii boro ichoae rai cajione tein jetao, Jesuso rene amaare nichoae nelauriaain cuhane coina.

36 Nitohaneein nii boro amaain Jesuso rene turuaauruhane jana jetaote, nichoae nelauriaain raotojoein cuujiha Jesusone jana jetao, najiniha bero cuhane rai cajione maririjicoaure cachaauru.

37 Inae Olibo neenjoain bichatane ucuuno fauque cuujiha Jesusone jana jetaote, itolere cojoaelanaacojoai ichana-jaaoncane coaranajaaoncuruhane jaun jetao, cojoriin Cana Coaunera coroaecure satiin nii sacuurera cachaauru.

38 “Raotojoein turuhine aca neein nenea rijijieein co-cainaan Cana Coaunera letono Reycha. Dedeu raotojoein nihacachene coina icharaneein nihane coitucuhin Cana Coaunera coroaecuruhine cachaauru,” naauruha cachaaurune jana jetaote:

39 “Cacha relaera, toon ii sacuurera cachaauru rai aitoote, toritocuruhane jianecurumiincha,” naauruha nii cachaauru jana cunacaauru fariseeocuru tabaaurune jaun jetaote:

40 “Esinae rauhijiriine aitoonra. Toritocuruhane caje inauheneecha neeuruhanete, cojiorichurureein caa ajerichurura,” naain jetao tonoranajae Jesuso.

41 Inae Jerosaleen rohan nichuutane jaun, inae inanacaa nii Jerosaleenne coaraane jaun jetaote, ecu nenacaauru cachaauru coreniha chanaain jetao:

42 “Bajiaana chuhinti caa janonaa cuhane jianacoon inara mitaeraanu que cau turuhanune coitucuhin neneeiche. Nete quesenetaain canunein nihanune coitucuhin coarana naineneeiche.

<sup>43</sup> Nitohaneeichene jaunte, inaen nereein itolere neein inara curuhacaain inara corihateein, inara mucuhin niha nii nejerateein neeiche jaa cojoanonaara.

<sup>44</sup> Caa inara nese fejeeinte itajeein, inara cocoaichucuru soajeein jaoha cuurureeinha. Coatiha nerinaain leinjiiniji ajeri ita choae teein ichanohita. Inara ichoterateein, jianacon inara mitaeraanu que turuha uhanu inara Coaunera-neeinne jana canu esenetaain cacoitucunaa jereneeichene corenihara,” nae jetao inaderaain Jesuso.

*Teenforo couluuoca Jesusone*  
(Mt 21.12-17; Mr 11.15-19; Jn 2.13-22)

<sup>45</sup> Inae Jerosaleen turuhin jetaote, Teenforo asae enohin, ecu necoretiha nenacaauru sitaain jetao:

<sup>46</sup> “Cana Coaunera Quiricha inoansai cuhanete aite: ‘Canu lorerite nasae neein canu bajaee bajaecuruhane jaan colohetine,’ naain. Nete necha aansai asijiautooru ucuhaneein teeiche inarara,” nae jetao nii cachaauru rai Jesuso.

<sup>47</sup> Nitohaneein cojoanoonetojoein Teenforo asae cuhin cachaauru relaa Jesusone jana jetaote, nechu jataain sohin jaaoruhane jaa lera ariha jetao, cuhin coaracure saseredote curuanaacuru, Cana Coaunera naitoonjoa que cacha relaaureraauru, nii nese curuaanaacuru, naaonjoainuri.

<sup>48</sup> Nejetaote, nii chatohaneein teuruhane jaan lera erusichurene, satiin cachaauru jataain nii acaauru relaane jaa rautatiin aonajeeunruhane jaun.

## 20

*Nitohanai ichaane coina cocoaain letononiha Jesusone*  
(Mt 21.23-27; Mr 11.27-33)

<sup>1</sup> Teenforo asaae nosa caje nichoteeururichaaain cachaaurune beebejeein, acaauru relaa Jesusone jana jetaote, turuha cuure saseredotecuru curuaanaacuru, Cana Coaunera naitoonjoa que cacha relaaureraauru, Joriocuru rai nelateein nenacaauru ichauhenaauru, naaonjoainuri.

<sup>2</sup> Nitohaneein turuhin jetaote:

“Chatohanai cocoainanacaineena neei catohanai ichaaine coina. Chate catohanai ichaaine coina ii cocoaain ii letoaain neta,” naauruhane jaun jetaote:

<sup>3</sup> “Saan. Canuhetonaina inara caje leinjiin erenaa bajaareun catoonraaichene coina.

<sup>4</sup> Cha Joaan letoaain nelu cachaauru baotisaain cachaauru coujunacatiha uhane coina. Cana Coaunera letoaenihanena, cachaauruhachana letoaain nihalu,” naain acaauru caje bajaa Jesusone jana jetaote,

<sup>5</sup> ecu inauheneeicha aonajeein jetao: “ ‘Cana Coaunera letononeeinte ailu,’ naacachenete: ‘Chanuna jana esenetaain tonoraain neneeichelu,’ nareein.

<sup>6</sup> Niheichu, ‘Cachaauru letononeeinte ailu,’ nanaa naini-haacache. Niritocooachenete ajeri que cana bodoosiin cana sohin cana atinaaurureein cachaauru, satiiin Cana Coaunera letononeein aihalu Joanne esenetaauruhane jaun,” naain jetao, ecu nejesinajeein ita rai ereerejeeurhane baiha jetao:

<sup>7</sup> “Coatiha coitucuhaacaanu. Chachainti cacha baotisaain coujunacatiha Joanne coina letooain neluta,” naaure jetao.

<sup>8</sup> Nii jaun jetaote:

“Niheichu canuhetonai nihanatiin ‘Naaonjoainte canu cooainaan nihane ainane, caa catohanai ichaaunra,’ naain benaa nainihaaun inara raita,” naain jetao acaauru tonorae Jesoso.

*Necha aansaineein ichaonacaauru ocoana beraichacuru que parabola que cuaain cachaauru relaa Jesusone*  
(Mt 21.33-44; Mr 12.1-11)

<sup>9</sup> Niritohane baiha jetaote, necha aansaineein ichaonacaauru ocoana beraihurera que *parabola* que cuaain jetao: “Leinjiin cacha jetaote, leinjiin ocoana sirihane jaun jetao, que amihanenacaauru rai teein ratiriin jetao, coriajai ataneu cue, latihane naineein raineen nena letoaauruha raine coina.

<sup>10</sup> Nitohaneen teein ratiriin jetaote, inaen tainaca que tihane jana jetao, leinjiin letono letoae, nii amihanenacaauru caje raineen niha nii ocoanane coreniha que banihateein ni-icha taihuri bajaa cuhane coina. Ne jetaote, nii cha telanaala faojoaain sohin jelaiha letoaare.

<sup>11</sup> Nii jaun jetaote, nacoauneein leeocho letono letoaa nii ocoana erorane jana jetao, nocoeje chanuhin faojoaain sohin, cha colane acaentonai letoaare.

<sup>12</sup> Nii jana coaiten leeocho letono letoane jana jetaote, jataain cunaitaain jelai caje acaentonai sitaare nii ocoana que amihanenacaauru.

<sup>13</sup> Nii jaun jetaote: ‘Cha laen ichareeun. Satononejeein caa jataain jereein canuhacha belai canu calaohi letoaanunete ne. Quete laen acaneein nihane coitucuhin raotojoein raain nere tonoraaurureein,’ nae nii atane erora.

<sup>14</sup> Nejetaote niritiin nii rai calaohi letoane jana jetao, cuujihane jana coariin: ‘Taate caa atane erora calaohi ne. Acate inae oha rai inacane bana, caa itolere que banijiaain nena rareeinha. Coanete mucuhin sohin jaohacachete cana raineen nedaaine caa iolere que banijiaain nenaara,’ naain ita caje bajaacoaain jetao,

15 nii ocoana caje amaain sohin jaaore nii ocoana que amihanenacaauru.

Nitohanihane jaun, tonaquiche jana nii que inara. Chato-haneeicha acaauru tereein nii ocoana erora, nii rai calaohi mucuhin sohin jaaoruhane jaun.

16 Raajenihane uhin inacha nii ocoana que amihane-nacaauru sohin jaohin, leeochoauru rai nii ocoana teriha nii ocoana erora,” naain jetao *parabola* que cuaain cachaauru rai ereerejeein relanajaen Jesoso.

Nii jana jetaote:

“Jiaonriha icharaa nitohaninera,” naaure jetao nii cachaauru.

17 Nii jana jetaote, acaauru coarajeein jetao:

“Chaquena jana chaen, Cana Coaunera Quiricha inoansi cuhane: ‘Nii jaolecooruha loreri icharaaurune jaan ajerite jauriaanejeein loreri nunuheneein ichanohineein niha cureeincha,’ nae.

18 Aihana jaun chunocoha nii ajeri ichoae comoite, nichaluchaluriha cureein. Jana chunucoha ichoae comoha nii ajerinete jitohitoreein,” naain jetao be cachaauru rai Jesoso.

19 Niritiin acaauru que cuaain, cachaauru relaa Jesusone que nainacuruhane jaun jetaote, nii rijieeoritiin mucuer-atenaa jerecure saseredotecuru curuaanaacuru aina Cana Coaunera aitoonjoan que cacha relaaureeraauru. Neje-taote chatohaneein tenaa nainecurene cachaauru coasichu-ruhane jaun.

*Jesoso mucuuruhane jaan lera ariha Roma curuaanaa rai coriqui teeuruhane bajaauruhane*

*(Mt 22.15-22; Mr 12.13-17)*

20 Nitohaneein sohin jaonaa jerecuruhane jaun jetaote, acaauru letono letoaaure, belaicha cacha rijijieein turuhin Jesoso caje chaelai erenaa bajaauruhane jana, tonaain acaauru tonoraane nohaneein colurujueeuuha coberenadoro raine coina.

21 Nii jaun jetaote, rene turuhin:

“Cacha relaera, nii aitiin cachaauru relaaaine jaane esinae rauhijiriin chuni que suujuelanaala, satiin cachaauru rai jerichanetojoein aitohine coitucuhacaanu. Iite esinae rauhijiriin jeriha Cana Coaunerane rijijieein ichaoha cachane coina aitiin cachaauru relaai.

22 Nitohanihane jaunne ii caje bajaa uhacaanu. Caohachaana Romanocuru curuaanaa enferadoro rai *impoestonu* que coriqui tihacaanune,” naain jetao Jesoso caje bajaare.



<sup>23</sup> Nii jaun jetaote, nechu jataain baasoneein coacuhin que iriha aitocuruhane que nainaane jaun jetao:

<sup>24</sup> “Saan. Canu que leinjiin nii coretequichene jaan coriqui coarateeuche,” naane jana, que nii coriqui coarateeuhane jana coaraain jetaote: “Cha cojunaca caa, ecu laenanohineein curuaa siriin,” naa Jesusone jaun jetaote: “Enferadoro rai,” naauruhane jaun jetao:

<sup>25</sup> “Aihane jaun chujian- caa enferadoro rainein nenea teeuche enferadoro raicha. Jana Cana Coaunera rainein nenea teeuche Cana Coaunera raicha,” nae jetao nii cachaauru rai Jesoso.

<sup>26</sup> Niritoha satiin cachaauru notaracaae Jesusone jaun jetaote, nii chatohanein mucuhin teuruhane jaa lera eruurenihane jaun jetao, ecuhacha cojoelatiin inauhenecha neeure nii saseredotecuru letonocuru, niritiin acaauru tonoraane jaun.

*Chatohaniha cache inae oo caje ichanaane*

*(Mt 22.23-33; Mr 12.18-27)*

<sup>27</sup> Nii baiha jetaote, Jesoso coaraa cuure nii ohane baiha jerichanejeein jaberoco rijijieein niha cache suujuene esenetaauruhi sadoseeocuru. Nitohanein cuhin rene turuhin jetaote:

<sup>28</sup> “Cache relaera, Moisesate canacaanu rai laenaain ratirilu, oha leinjiin cache nesiriateein nii comasai aina canaanai sirilanaalane, nii autana raain aina canaanai siriha rai ocoalane coina. Nitohanein nii autana aina canaanai siriha nii ocoalane, aca siricha rijijieein nii onaa calaohineein niha nii canaanane coina.

<sup>29</sup> Nii janate ita nejera nejesinanein caaunsineein neeure cachaauru. Jauriaanejeein acaauru inanate, leinjiin ene aina nesirihatein, nii leinjiin niji canaanai sirilanaala ohe.

<sup>30-31</sup> Nii janate neeuruha coroatajaain rai nejeraaurune jaun, oha coaiten nii nihanane jaun nii ene rae nii rai nejera. Nii rijijieein techu satiin nii ene raaure acaauru ocoalacuru itolere bana ooruha acaauru inanacurune jaun. Nete leinjiin niji canaanai sirilanaala oore nii caaunsineeuri ita nejeraauru.

<sup>32</sup> Nii janate inae oohe nii ene netonai.

<sup>33</sup> Aihane jaun chariji comasainein jana nereein nii ene, inae Cana Coaunera Cojoanonaa que ichaaoruhane bana, caaunsineeuri ita nejeraauru aina nisiriatihalune jaun,” naain jetao Jesoso caje bajaareeure nii sadoseeocuru.

<sup>34</sup> Niritiin caje bajaauruhane jaun jetaote:

“Caa chauratane que nenacaauru quichaauru, enecuru, naaonjoainurite nisiriateein naaonjoaunre.

<sup>35</sup> Nete laen inae ooruhane baiha oo caje ichanaain Cana Coaunera rene turuhenuhuru quichaauru, enecuru, naaonjoainuri inae oo caje ichanacuruhane nisirihateeurenereein,

<sup>36</sup> onaa inaaureniha anjeraaurune rijjijeein neeururichaaanne jaun. Chaen techu Cana Coaunera Calaohineein neeurureein acaauru ichateein nerichaaain Cana Coaunerane jaun.

<sup>37</sup> Jerichanejeein techu ohane baiha ichanaain neeuruha onacaaaurune que laenaain coitucuerateein nelu cana que Moisesa, nii nuna laajoiri iihani netiin Cana Coaunera aina irihane bana, 'Canune, Abaraaun, Isaca, Jacobo, naaonjoainuri Coaunera, inara Coaunera neein neeun,' naalu Cana Coaunera Moisesa raine jaun.

<sup>38</sup> Aihane jaun coatiha ichaonacaauruhacha Coaunera neein nihei Cana Coaunera, onacaauru nihanatiin rai ichaohin neeuruhane jaun," naain jetao sadoseeocuru tonorae Jesoso.

<sup>39</sup> Niritoha sadoseeocuru rai Jesusone jana jetaote:

"Jataain caohatiinte acaauru rai aitohicha cacha relaera," naaure jetao Cana Coaunera aitoonjoa que cacha relaaureraauru tabaauru, acaauru laen oo caje ichanaa cachane esenetaauruhane jaun.

<sup>40</sup> Niritoha acaauru rai Jesusone jaun jetaote, inae n-nacaaen caje chatohanai bajaanaa nainecurene.

*"Cha caje nefoeratenaane Mesihasi," naain bajaa Jesusone (Mt 22.41-46; Mr 12.35-37)*

<sup>41</sup> Nii jana jetaote:

"Chanuna Rabiri caje nefoeratenaaniha canaacha cohajei Mesihazine jaun, Rabiri amurijiriin nena naineniha beeiche.

<sup>42</sup> Inasiina raajenhane, quiricha Salmo cuhane:

'Cana Coaunerate,  
Canu Curuaana Mesihasi rai:

"Cau carohan  
canu raotono nichajai que  
nelauriaain coarajeuna,

<sup>43</sup> nii iniha nejeratenacaauru amuritiin,  
ii bijihu tenajaanune reeintiaaicha,"

naa Cana Coaunera, Canu Curuaana Mesihasi raicha,' naain raajenhane Salmo cuhane bihalu Rabiri inatiin. Chanuna Rabiri amurijiriin nena nainenere Mesihasi.

<sup>44</sup> Inasiinna jana chaen amurijiriin nena naineniha Mesihazine saijjeein nii Rabiri netonai, 'Canu Curuaanaa,' naain Mesihasi nichaaunne curuaatihalu natiin," naain jetao bajae Jesoso.

*Cana Coaunera aitoonjoa que cacha relaaurea biha Jesusone*

(Mt 23.1-36; Mr 12.38-40; Lc 11.37-54)

<sup>45</sup> Niritohane jana satiin ecu neein aonajeeuruha cachaaurune jana jetaote, aina nerelanacaauru rai jetao:

<sup>46</sup> “Caohachaain necohalajiin neeuche, caa Cana Coaunera aitoonjoa que cacha relaaureaauru que. Acaaurute acaauru que suujua acatena nainiha cachane jaan cocoajione jiaain, itolere coitucueraneein, caohachaain niha nocoetocuruhane jaun, chunijihu nenaanaja cataaun nihanatiin, acaauru que suujua acateein niha satiin cachaaurune jereein neeure. Chaen techu, sinacoca asae nelauriaauruha jataain nelatenacaaurune jaan rori caohacha janijiin, nichoae ichoaichaniha nelauriaaure. Chaen techu ichoaichaniha nelaurianana jaan janijiin, lenone rohan nelaurihaain lenonecure.

<sup>47</sup> Chaen techu cairichei autanaauru caje acaauru lorerichuru nihanatiin ruluhin naaonjoaunre. Nii choae tacaain techu nitohaneeuruhane jaun, jataain nohaniha Cana Coaunera coitucueraniha nocoetocuruha itolere amurijiriine jaun, satiin notaracae Cana Coaunera bajaauruhane carajaain bajaare. Nitohaneeuruhane jaunte leeochoaauru osaaonacaauru cachaauru amurijiriin, jataain caseteco tabai coaraa cuurureein,” nae jetao aina nerelanacaauru rai Jesuso.

## 21

*Acaihaniji ichaaojihane jaanu coriqui tiha cairichei autanane*

(Mr 12.41-44)

<sup>1</sup> Niritiin Teenforo asae coriqui coreniha Cana Coauneraacha icharatenohi amihanenaa ichacuruhane coina curu cuhane coriqui teeuruha cachaaurune jana, ecu coarajenajaa Jesusone jana jetaote,

<sup>2</sup> leinjiin autana jataain cairicheinejeein nena netonai coroatajajeein jataain coretelanaala nena coriqui te,

<sup>3</sup> jataain teeuruha leeochoaaurune fautaaine jaun jetaote:

“Esinae rauhijiriine aitoon inara rai. Caa cairichei autanate, leeochoaauru amuritoheriin coriqui te.

<sup>4</sup> Satiin caa leeochoaaurute nechu jataain inae acaauru rai cautecha teeure. Jana caa autanate, jataain cairicheinejiha natiin jitariin acaihaniji ichaaojohane jaanu te,” nae jetao Jesuso.

*Nitajerichaain Teenforone biha Jesusone*

(Mt 24.1-2; Mr 13.1-2)

<sup>5</sup> Nii jana jetaote, caohatiin ajeri caje ichanohiniha Teenforone coaraain, jataain caohatiin inanacaane coina,

nasaae itolere niicha teuri coaraain jetao que ereerejeeure cachaauru. Nii jana jetaote acaauru rai:

<sup>6</sup> “Caa ena ajeri caje caohatiin ichanohineein inaraacha coarajeite, inae ecu tihane bana fejeein itajenojoinereein,” nae jetao acaauru rai Jesoso.

*Nerichaaain cojoelanaacojoaine biha Jesusone*  
(Mt 24.3-28; Mr 13.3-23)

<sup>7</sup> Niritohane jaun jetaote:

“Cacha relaera, chabanacha aicheein nii chaitoonjoan. Chatohanai cojoelanaacojoaicha inae que turuhelalajihane jana coararichaanuhin,” naain jetao caje bajaare.

<sup>8</sup> Nii jaun jetaote: “Caohachaaain nainaaain necohalajiiin neeuche, inara coritaa chunine coataara. Inae nerichaaain arajii canu niha nocoetiin inara coritaeraanuurura. Tabaaurute: ‘Canune acaneeunra,’ naaurureein. Jana tabaaurute: ‘Inae taolu caitoonjoa cojoanonaa que nihacachera,’ naauruha inara raine, jiaonriha esenetaain sacunajaaichenera.

<sup>9</sup> Jiaonrihachu nejesinaneein ita sohin neeuruha satiin chauratane que nenacaauru cachaaaurune coitucuhin neeichene nihanatiin nesoonetohichenera. Nitohaneeinte jaiti nii cojoanonaa que turuenihane ajiniha aicheeincha. Nete nitohanihane nihanatiin jaiti cana janonaa satono que turuhenerееincha,” nae jetao Jesoso.

<sup>10</sup> Niritiin jetaote: “Leeocha atane que ichaonacaauru cachaaaurute, lauriu ichaonacaauru cachaauru aina ita co-taiha cuurureein. Jana leinjiin atane que ichaonacaauru cachaaaurute, leeocha atane que ichaonacaauru aina ita soorureein.

<sup>11</sup> Nii janate itolere cana rai chauratane sacuritaain niha cureein jataain mijiaaaineein carora, mijitena, cunai, naajoainuri. Nii jana dede quete jataain coasinaacojoai coaraain, cojoelanaacojoai coaraa cuurureein cachaaaurura.

<sup>12</sup> Nete nii cojoanonaa que turuenihane ajiniha, inara rohecaain inara mucuhin sinacoca asae inara amaaain, curuaanaacuru, chaen coberenadorocuru, naaonjoainuri acatiha inara teein inara cairichaaain caresero cuhane inara enohaa cuurureein canu ere tonoraera neeichene corenihara.

<sup>13</sup> Nitohaneein inara teeuruhane banate, canu nichaaunne coitucuerateriquicheein cachaauru quera.

<sup>14</sup> Jiaonriha, ‘Tonaainera erereeunta,’ naain inara jabereco coreniha ereeichene jaanu que coacuhin cuhiche inara amaauruhanene.

<sup>15</sup> Canune jataain nainaaain ecu ereeichene jaanu tereen-  
unni inara raicha. Nii bana nii tonaain inara tonoracuruhane jaanu coitucuhin neeururihaain nii inara aina nejer-  
atenacaauruta.

16-17 Nete laen inara cairichaeriin inara cotaairiin nenacaauru coroatajaniha cuurureein nechú jataain inara cairichaa, inara inacaauru, inara nejeraauru, inara araaichuru, inaraacha belaihuri, naaonjoainuricha. Nitohaneeinte inara tabaauru sohin jaoha cuurureein. Satiin caa chauratane que nenacaauru cachaaaurute Canu ere tonoraera neeichene coreniha inara que nererojoecaaeriin, inara cairichaeriin, inara cotaairiin, naaonjoaain neeurureeincha.

18 Nete nii leinjiiniji inara couturiji nihanatiin nitajenereein.

19 Nii jaun caohachaain laraajiin nii inara suujua corelanaala, raotojoein neeuchete nii caje nichotenaa nainequiche.

20 Inae Jerosaleen curuhacaain neeuruha soondaroorune coaraqichene, inae nitajerichainne cojoanonaa que turuhane que nainacuche.

21 Inae nitohaneeurhane coaraqichene, Jodea nenacaauru naain ichatane ucuuno cuhin sorooruhine. Jana Jerosaleen nenacaauru, nii nese caje coriaae amuurumiiincha. Jana chunocoha rai nocoana jana nihane jana nitohanihane, jiaonriha jelaiha nii neseu turuha cunaa coaacanera.

22 Inaen nitohanihane coina, niritiin inoaelu quiricha inoensi cuhane satiin laenacurhane jaa cojoanonaa nainaane coina jataain caseteco tabai niha curichaaaine jaunra.

23 Jataainte cairichaaajoaa cuurureein nii cojoanonaa bana ausirineein nenacaauru enecurura, chaen sisiajeein canaanai siriin nenacaauru, naaonjoainuricha. Nitohaneeinte caseteco tabai coaraa cuurureein nii Jodea batane que nena aina Jerosaleen ichaonacaauru cachaaurura.

24 Tabaaaurute sabere que sohin jaonjoihiha cuureeincha. Jana tabaaaurute mucunojoeinein corihaji ataneeuru amanojoihiha cuurureein. Nitohaneeinte Cana Coanera coitucuhichuru, nii Jerosaleen nenacaauru itajiha cuurureein caohatenojoihiha nitohanei ichacurhane jaan que turuhanereein tihaaincha,” nae jetao aina nerelanacaauru rai Jesoso.

*Nacooauneein turuha urichaaunni Canu cachaneein nejanohanaa nichaaunne*

*(Mt 24.29-35, 42-44; Mr 13.24-37)*

25 Niritiin jetaote “Enoto, atene, arasijie, naaonjoainuri quete cojunacateein coaratenojoinereeincha. Nii jana satiin

caa chauratane que nenacaauru cachaaaurute, nesooniha cuurureein, 'Naaonjoanne jaunte caa aicha' naain coitucurenihane jana jataain tonihaca coasinacaaain fichafichanaa cucuanane coaraaincha.

<sup>26</sup> Nitohanihane janate inae nitajerichaaain cana rai chauratanene coaracuruhane jaun, coasinacaaun acunoha cuurureein cachaauru. Dedeu nenacaauru netonaite jataain nerurujuaa cuurureein.

<sup>27</sup> Nii janate jataain nelateein itolere ichana nainichaaunne coarateein turuha uuhanu Canu Cachaneein nejanohanaanein dede sacari jana uuhinne coaraa cuurureein cachaauru.

<sup>28</sup> Inae nitohanihane nunuhetihane jana, nii chaque tonajelanaala neeuche, inae inara que nejeratenacaauru caje nichoteriquicheeinine coitucuhichene jaun," nae jetao acaauru rai Jesoso.

<sup>29</sup> Acaauru rai niritiin jetaote, nechu jataain nainacuruhane jaanu que jetao: "Coaracuchena chuhinti *iquera* aina joenreein enuhacuru, satiin neroeeca nalone baiha

<sup>30</sup> nacoaauneein omaroha nalone, inae elohena que turunaa jerihane que nainaquichene.

<sup>31</sup> Nii rijijieein techu inae caa caitoonjoan cojoanonaa que tihane bana, inae coaraqichene, nichuuntaa Cana Coaunera Cojoanonaane que nainariquicheeincha.

<sup>32</sup> Esinae rauhijiriinte jaiti ooreniha caa ena nenacaauru cachaaaurune jana, satiin situha cureein caa caitoonjoan.

<sup>33</sup> Dede, chauratane, naaonjoainurite nitajiha cuurureein. Nete laen caa caitoonjoan leinjiiniji nitajelanaala satiin aito-coaanne rijijieein aihane rai ne.

<sup>34</sup> Aihane jaun caohachaaain necohalajiin, nii cajihaneein inara suujua coacuelanaala, nii ajalanaala, nii inara ichao-hacha que nererojoecaaeriin neeichene jianein neeuche, inae nii cojoanonaa que tihane bana, ujua cuhane foroa chaelaine rijijieein inara foratiaa nii cojoanonaane coataa.

<sup>35</sup> Itolere sacuritaain caa chauratane que nenacaauru cachaauru ichooaete naluha cureein nitohanai.

<sup>36</sup> Aihane jaun letona jatoroaain itolere cojoanonaa bana Cana Coaunera bajaabajajeein neeuche. Aihate caa caitoonjoan tocoanein situhane bana, caje nichoteein, nii acaihaniji Cachaneein nejanohanaa nichaaunne acatiha raotojoein turunaa nainequiche inara," nae jetao caje bajaauruhane jaun aina nerelanacaauru rai Jesoso.

<sup>37</sup> Nitohaneein jetaote, jiichoonihane Teenforo asae cachaauru relaain, inae nocohecane jana Oliboneein niicha curuaateuri ichatane ucuuno cuhin nihane nesururejetelu Jesoso.

<sup>38</sup> Nitohaneein jetaote, janohetiin Teenforo asae cuhin, acaauru relaa Jesusone aonaa curejetucurelu satiin cachaauru.

## 22

*Jesoso mucuuruhane coina ita suujua tacaauruhane  
(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Inae jorerera colane faan quihuruhane jaa cojoanonaa Fasocoa beseta catainaane jana jetaote,

<sup>2</sup> Jesoso sohin joerateeuruhane coina jetao, “Chatohaneein ichanaareta,” naain coaucure saseredotecuru curuaanaacuru aina Cana Coanera aitoonjoa que cacha relaaurreraauru. Nabana raajenhane mucuhin sohin jaaoruhane, chatohaneein acaauru teeuruha cachaaurune que necasacuruhane jaun.

<sup>3</sup> Nitohaneein inaen sohin jaaoruhane coina que nocousujuaaruhane jana jetaote, nii aina nerelanacauru lechoonca coroataja Jodasi Isacariote neein niicha curuaateuri suujua saruha Moconajaerane jaun jetao,

<sup>4</sup> batirichuru curuaanaacuru, Teenforo curuaanaacuru, naaonjoainuri coaraa cue: “Canune naaonjoaain inara rai naineeun, nii Jesoso mucuhinchene coina ecu inara turuaanunera,” naa acaauru raine coina.

<sup>5</sup> Inae niritoha acaauru raine jaun jetaote, jataain coroa-jeen coretena jerecure.

<sup>6</sup> Nii jaun jetaote, acaauru suujua rijitjoein cachaauru colane niha Jesusone cojoae, ecu Jorioocuru bijihu Jesoso tihane coina Jodasi.

*Cana Curuaanaa aina lenonecuruha afosotoorune  
(Mt 26.17-29; Mr 14.12-25; Jn 13.21-30; 1Co 11.23-26)*

<sup>7</sup> Nii jana inae jorerera colane ichanohin faan quiin carenero narejeen sooruhane jaan beseta cojoanonaa Fasocoa que turuhane jaun jetaote,

<sup>8</sup> Fedoro aina Joaan rai jetao:

“Chajaain Fasocoa beseta cosonaina que canaacha quiine ichanichete que lenonichaachera,” naain jetao acaauru letoae Jesoso.

<sup>9</sup> Nii jaun jetaote:

“Chujian ichacaaunne jereeita,” naain jetao caje bajaasure.

<sup>10</sup> Nii jaun jetaote:

“Inaen cuhin nii neseu turuhichene janate, baichaje cuhane acau baibaichaain cuujiha leinjiin cachane jana eruriquicheein. Chaen loreri asae enohane reentiaain sacuuchera.

11 Chaen inae nii loreri asaae turuhichene, nii loreri erora rai: "Taa cana relaerate, Chariji loreri asae nenea ecuha cuhane, Fasocoa beseta cosonaina que lenonereeunni canu aina nerelanacaauru ainata, naain ii caje bajaeratera,' naauche.

12 Niritocoichene janate, nii loreri coroata coarana ecuha seeonjoa siricha coaratereein inara que. Chaen inae nitohaneein inara que coaratihane baiha, ecu sonaina lenonichaachene jaanu jelai rucuhечuchera," naain jetao letoana-jaen Jesoso.

13 Nii jaun jetaote cuhin, nii acaauru rai aitoha Jesusone rijijieein eruuruhane jaun jetao, ecu teein Fasocoa beseta bitoaain, cosonaina que lenonecuruhane jaanu jelai rucuhечure.

14 Inae nitohaneein enoalaauruhane jana jetaote turuhin, inae que lenonecuruhane jaan rijiu tihane jana, rai afosotooru aina rori ichoae nelauriae lenonecuruhane coina Jesoso.

15 Nitohaneein rori ichoae nelauriaain jetaote: "Jataaine inara aina carijieein caa Fasocoa beseta bitoaain, cosonaina que lenonena jerenajacoon osichaaunne ajiniha.

16 Coatiha laen caa baiha, inaan caa Fasocoa beseta bitoaain inara aina lenonerihaaunni Cana Coaunera Cojoanona que turuhanune reentiaain," naain jetao,

17 curu cuhane, oba caje ichanohin bino teberiaain Cana Coaunera bajaane baiha jetao, acaauru rai teein:

"Nocoa, inara nejesinajeein caa leruune leruuneein cooche.

18 Inae caa baiha nacoaauneein caa oba caje ichanohin bino corihaaunni Cana Coaunera Cojoanona que turuhanunereen tiaain,"

19 naane baiha jetaote, faan mucuhin Cana Coaunera bajaain, cataaun nii faan tatuhin beeune beeuneein acaauru rai teein jetao:

"Caa inara rai canuhacha teite cajabereoneein ne. Acate jianacoon neeichene coina, inara coreniha cairichanojoneein atinanohinereein. Aihane jaun, itolere bana canuneein nihanune coacuhin que lenonecuche," nae jetao acaauru rai faan teruhin teein Jesoso.

20 Niritoha acaauru rai Jesusone jana lenonecuruhane baiha jetaote, nii faan que aitohane rijitojoein, acaauruhacha coheni teein jetao;

"Caa oba caje ichanohin binote, inara caohachanu que cacoichana jaohin canuhacha ichaneni icharihanuhinne cojunaca nera.

21 Nitohaneein caque nejeratenacaauru rai caeteraanute ena cau cana aina lenoniha ne.



22 Nitohaneein acaihaniji Cachaneein nejanohanaa nichaaunne cairichaeriin neeuruhane coina, aitiin neeuruhalune rijijieein aihanete ne. Nete jataain cairichaaajoaa cureein, nii caque nerotohin cacairichaerateranu,” naain jetao bino teberiaain Cana Coanera bajaane baiha afosotooru rai te Jesoso.

23 Nii jaun jetaote, “Charijinachara toon totohaneein que nerotohin aina nejeratenacaauru rai coulurujueein cairichaeratiha cureein,” naain jetao ita caje bajaacoaaure aina nerelanacaauru.

*Charijina jataain nelateineein ne*

24 Niritiin jetaote nejesinajeein: “Charijina caa cana caje jataain nelateineein coanojoneein ne,” naain jetao ita caje bajaacoaaure aina nerelanacaauru.

25 Nii jaun jetaote acaauru rai: “Cana Coanera coitucuelanaala nenacaauru curuaanaacurute, itolere amurijiriin nena jereein cachaauru cairichaeriin neure. Niite acaauru cairichaauruhane coitucuuruhane nihanatin coroaecure caohacha ichaa benajaain.

26 Nete laen inara naineneeiche nitohaneein neeichene. Nitohaneein nena coacuelanaala, leeochoauru amurijiriin nelateein nena jeriha chuni inara cajene, leeochoauru ere tonoraain, letoauruhane jaan ichaain neeine. Jana chunocoha leeochoauru letoeraneein nena jerihane satiin rai, chachaeraneein neeine.

27 Nitohanihane jaun chariji jataain nelateineein nere, nii lenonihane coina rori ichoae nelaurianaana. Ainihane nii lenone chaluharana nelateein neriha. Aihei jerihane. Nii rori ichoae lenonihane coina nelaurianaate nii lenone chaluera amurijiriin nelateein niha nocoete.

Nena laen canu nitohanelanaala, inara letono rijijieein ena cau inara aina inaraacha latei icharaneein neeun.

28 Inarate cajiniichaain necairichanaa coaraain nena-jaonquiche.

29 Nii jaunne itolere Curuaanaa neein nelateein nihanune coina canu cocoainaaain caeteein niha Ofane rijijieein, inara netonai cocoainaaain nereeunni.

30 Nii banate inae nii cojoanonaa que turuhane bana, cajiniichaain rorihuru ichoae nelauriaain acau cohin, lenoneein, naaonjoanriquicheein. Chaen techu baaso ichacurenihane, caohacha ichacuruha lechoonca coroata laurii Israeli cocoachacurune coaraain coitucuhichene coina cajiniinchaain nii coina banijiaain nena rori ichoae nelauriariquicheein, inae nii cojoanonaa que tihane bana,” nae jetao aina nerelanacaauru rai Jesoso.

*Coitucuha nocoetenerichaain Fedorone biha Jesusone  
(Mt 26.31-35; Mr 14.27-31; Jn 13.36-38)*

<sup>31</sup> Niritiin jetaote: “Simoon, inae Canu sacueraneein nee-ichene bajaa moconajaera inara raane coina.

<sup>32</sup> Nena ii coreniha Cana Coaunera bajaaun, canu esetaaine jianeeine nihanatiin nacoauneein nelalararajiaain Canu esenetaain neeine coina. Aihana jaun, inae nacoaauneein canu esenetaaine bana, inejeraauru coroatajanecuhin caohachaaain laraajiin, canu esenetaauruhane jianelanaala raotojoein rachoojoein neeuruhane coina,” nae jetao Simoon rai Jesuso.

<sup>33</sup> Niritoha raine jaun jetaote:

“Curuaanaa, canune ijiniichaaain caresero cuhane enohin nihanatiin ii coreniha onaa naineeun,” nae jetao rai Simoon.

<sup>34</sup> Nii jaun jetaote:

“Fedoro, enene janotiin cuhanete, iriha janonaa rai atao-hari curuaanaane ajiniha, nichata saain canu coitucuha no-coeteneriquiin,” nae jetao Fedoro rai Jesuso.

*Inae nichuutaa coujunojoiniha Jesusone*

<sup>35</sup> Niritiin jetaote:

“Inara letoaain nihanulu coriqui curu, inara safato, inara atora, naaonjoain colane janana lanaain nihalu inara rai cha,” naain acaauru caje bajaa Jesusone jaun jetaote,

“Aihei. Coatiha nii lanaailu canacaanu rai chata,” naain jetao tonoraare.

<sup>36</sup> Niritocuruhane jaun jetaote:

“Nete laen ena chateeinti coriqui curu siriin, natora siri, nii amaain cuhane caohachae. Chateeinti sabere sirine nii jelaronaa bana niicha jiai cajione burique necoreteein leinjiin sabere coretemiin.

<sup>37</sup> Inara raine aitoon, inae caque aitiin Quiricha inoasesi cuhane: ‘Naaonjoaain cairichaaeriinte necha aansai caseteco coaraane rai nena ichara rijijieeinte teeurureeinha,’ naain itolereneein niritiin caque aitiin laenacuruhalune rijijieein situhane rai te ne,” naa acaauru raine jaun jetaote:

<sup>38</sup> “Curuaanaa, caute ne corotajaain sabere,” naauruhane jaun jetaote:

“Inae nainejerichaaain niriimiin,” nae jetao acaauru rai Jesuso.

*Olibo neeonjoaihu Cana Coaunera bajaa Jesusone  
(Mt 26.36-56; Mr 14.32-42)*

<sup>39</sup> Niritoha acaauru raine baiha jetaote, ecu nesuruna-jaoncane jaun, Oliboneein niicha curuaateuri ichatane

ucuuno cuha Jesusone jana jetao, caaijie cuure aina nere-lanacaauru.

<sup>40</sup> Nitohaneein cuhin, inae nii Olibo neeonjoaihu turuhin jetaote:

“Cana Coaunera bajaauche nabana osa que nesaruquichene coataara,” nae jetao acaauru rai.

<sup>41</sup> Acaauru rai niritiin jetaote, nita acaauru aonajeein cuhin neseonrariin jetao;

<sup>42</sup> “Ofa, ii jereeine caa jataain necairichanaa tabai caje canu mitaaura. Nena canu jerichaaunne rijijieein ichaaine jereneunra. Ii jereeine rijijieein ichaaura,” naain jetao Cana Coaunera bajae Jesuso.

<sup>43</sup> Niritohane jana jetaote, dede caje ecocohin lararajiaa leinjiin anjerane jaun jetaote, aina suujua nunaaajoae.

<sup>44</sup> Nii aina jataain nesooneena cataau neein jelai rutaain, Cana Coaunera bajaabajaaca Jesusone jana jetaote, atani-choae tabaanaain nalue rai doroana ichananeein.

<sup>45</sup> Nitohaneein inae Cana Coaunera bajaane nainaan, aina nerelanacaauru coaraa cuhane jana jetaote, jataain cotaena aina inaderanaa caaun sinihure.

<sup>46</sup> Nii jaun jetaote acaauru rai:

“Chanuna siniiche. Chajaain nimichuhin Cana Coaunera bajaauche nabana osa que nesaruquichene coataara,” nae jetao acaauru rai Jesuso.

### *Jesoso mucuuruhane*

*(Mt 26.47-56; Mr 14.43-50; Jn 18.2-11)*

<sup>47</sup> Niritiin jaiti acaauru rai ereerejiha Jesusone jana jetaote, turuha cuure arajii cachaauru. Nii aina nerelanacaauru lechoonca coroataja neein nena Jodasi jetaote, acaauru ichoaichaniha acaauru amaeraneein cue. Aca jetaote, Jesoso rohan nichuuntaain nechu jataain belaicha rijijieein jetao rai nomeri lioracae.

<sup>48</sup> Nii jaun jetaote:

“Jodasi, belaicha rijijieeina nomeri lioracaain nii acaihaniji cacha Calaoheinein nena teei aina nejerateeriin nena caauru bijihute,” nae jetao Jesuso.

<sup>49</sup> Inae inooneeuruhane coaraain jetaote:

“Curuaanaa, coanene ii cocoaeratihacaanu sabere quera,” naaure jetao nii Jesoso aina nerelanacaauru.

<sup>50</sup> Niritiin jetaote, leinjiin saseredotecucu curuaanaa letono uricho beuhite, rai raotono nichajai que tacaain sabere que, leinjiin nii Jesoso aina nerelanaa.

<sup>51</sup> Nii jaun jetaote:

“Inae niriimin, coa cunaitaa,” naain jetao jelaiha nii saseredotecuru curuaanaa letono uricho tirichaain jetao rautae Jesuso.

<sup>52</sup> Nitohaneein rautaane baiha jetaote, saseredotecuru curuaanaacuru, Teenforo beraihurera, chaen Joriocuru bichauhenaauru, Joriocuru rai nelateein nenacaauru, naaonjoainuri rai jetao:

“Chanuna leinjiin necha ansai ausijiautoneein sonajaain joeraneein nihanune que airijiin sabereeuu aina enuhacuru uhaain canu mucuha uhiche.

<sup>53</sup> Itolere cojoanonaa banara, inara aina Teenforo asae najacoonna. Nii jana nii chatohaneein coatihana canu dadana-jaoheeiche. Nete inae nitohaneein nocohena tabai osa que nesaruhin namuritocohichene cojoanonaa que tihane jaun aiiche inarara,” nae jetao acaauru rai Jesoso.

*Jesoso coitucuha nocoeniha Fedorone*

*(Mt 26.57-58, 69-74; Mr 14.53-54, 66-72; Jn 18.12-18, 25-27)*

<sup>54</sup> Nitohaneein jetaote, Jesoso mucuhin saseredotecuru curuaanaa loreri asae amaauruhane jana jetao, nita caaijie coarajeein jetao cuujue Fedoro.

<sup>55</sup> Cuu turuhin jetaote, jelarotokane jaun, nenaanaja cataaun tein usi mocohin, curuhacaain nichaatihana neeuruhane jana jetao, Fedoro netonai cuu turuhin acaauru aina nichaatihana usi rohan lauheque.

<sup>56</sup> Nii jana saseredotecuru curuaanaa coseenranein nana leinjiin ene jetaote, cuu usi rohan lauhequiin nichaatihana Fedorone jana, cuu coarajihane baiha jetao coujueluhin:

“Caa netonaite aina nenaane,” naane jaun jetao:

<sup>57</sup> “Ainaaunchenaate. Coatihana Jesoso coitucuhaaunche canute,” naain jetao suujue Fedoro.

<sup>58</sup> Nii baiha neeoriiin jetaote, leeochoa netonai:

“Caa netonaite acaauru aina nenaanera,” naane jaun jetaote;

“Ainaaunnaate, coatihana aca nihaaunte,” naain jetao nii cacha tonorae Fedoro.

<sup>59</sup> Nii baiha carajaojoaain jetaote, coaiten leeochoa netonai;

“Esinae rauhijiriin caa cacha netonaite, aina nenaane. Nii choae tacaain techu Calileea cocoaichanera,” naane jana jetao:

<sup>60</sup> “Coatihana nii carai chaitoonjoan cacha coitucuhaaunte,” nae jetao nii cacha rai Fedoro. Niritiin jaiti ereerejiha Fedorone jana, nii rijieeoritiin iriha ataohari curuaanaane jana,

<sup>61</sup> jaotoroaain Fedoro coaraa Jesosone aina jetaote: “Enene cojoanotiin cuhanete, nichata saain cacoitucuha nocoetelanaala nesuujuueine jana erereein ataoharicha,” naa Jesoso raine coacuhin nainain jetao,

<sup>62</sup> nii neeurunaja loreri caje mituhin jetao jataain obajeein chanae Fedoro.

*Jesoso que ninichaajeeuruhane*  
(Mt 26.67-68; Mr 14.65)

<sup>63</sup> Nitohaneein nii Jesoso mucuuruhane jana beraiha nenacaauru cachaauru jetaote, que ninichaajeein faohacure.

<sup>64</sup> Nitohaneein faojoaain jetaote, nota conajaain:

“Aihane esinae rauhijiriin *profetaneetine* caa ii soera coitucuura,” naainchuru jetao sohin,

<sup>65</sup> jataain que ereinchuru nocoeje chanuure.

*Jataain Jorioocuru rai nelateein nenacaauru Junta Suprema acatiha niha Jesusone*

(Mt 26.59-66; Mr 14.55-64; Jn 18.19-24)

<sup>66</sup> Nitohaneein teein jetaote, inae janohane jana, ita taojiaaure Jorioocuru coaranein nenacaauru bichauhenaauru, chaen saseredotecuru curuaanaacuru, Cana Coaunera aitoonjoa que cacha relaaureraauru, naaonjoainuri, jataain Jorioocuru rai nelateein nenacaauru *Junta Suprema* acatiha amauruhane coina. Nitohaneein amaain inae cuu turuhaain jetaote:

<sup>67</sup> “Esinae rauhijiriin Mesihasi neeine canacaanu rai beeine coitucuhacaanura,” naaunruhane jaun jetaote:

“ ‘Aca nichaanchujian,’ naanune nihanatiin, nii que-senetareichene coaalanaalata.

<sup>68</sup> Nii inara caje erenaa bajaanune nihanatiin chu catoon-rariquichene coaalanaalata.

<sup>69</sup> Nena laen inae, enene caje coaanein, itolere Coaunereinee nelateein nena Cana Coaunera raotono nichajai que nelauriaa cureeinni, canu acaihaniji cachaneein nejanohanaa nichaannera,” nae jetao acaauru rai Jesoso.

<sup>70</sup> Niritoha acaauru raine jaun jetaote, satiin:

“Aihane jaunna, ii Cana Coaunera Calahinee,” naauruhane jaun jetao:

“Esinae rauhijiriinte acanichaaunne que aitocoichera,” nae jetao acaauru rai Jesoso.

<sup>71</sup> Niritoha acaauru raine jaun jetaote:

“Cha nenacaaenein cana rai berana laterihacache, inae raajenihane nujuuae caje acanihane que aihane aonacaache natiin,” naaure jetao.

## 23

*Jesoso coulurejeeuruha Filato raine*  
(Mt 27.1-2, 11-14; Mr 15.1-5; Jn 18.28-38)

<sup>1</sup> Niritiin jetaote, satiin nimichucutaain coinetein mucuhin jetao, Filato rene Jesoso amaure.

<sup>2</sup> Ecu turuaain jetaote, Filato acatiha teein Jesoso couluru-jeeure:

“Caa cachane eruhacaanu, caa cana atane que nenacaauru cachaauru suujua rerohecaain, cana curuaanaa Romanocuru curuaanaa enferadoro rai coriqui tihacachene caohateein, ‘Aca jete nii canaacha cohajei *Rey* Mesihasi ne,’ naain cachaauru suujua auhacaane jana,” naain jetao coulurujeure.

<sup>3</sup> Niritiin coulurujeeuruhane jaun jetaote,

“Iina chuhisi Jorioocuru Curuaanaa *Rey* ineei,” naain caje bajaa Filatone jaun jetaote:

“Esinae rauhijiriin acanichaaunne quete aitohicha,” nae jetao rai Jesoso.

<sup>4</sup> Niritohane jaun jetaote, saseredotecuru curuaanaacuru, chaen ecu neein aonajeurerera cachaauru, naaonjoainuri rai jetao:

“Coatiha chatohaneein baaso ichaa caa cachane coara-haun canuta,” naa acaauru rai Filatone jaun jetaote:

<sup>5</sup> “Nete cachaauru relaane aina cuaain satiin cachaauru suujua auhacae. Nitohaneeinte Calillea batane caje nunuhetein, caa Jodea batane netonai que jerichanejeein ichana jerera,” naain jetao jataain acaauru esenetaa Filatone jereein counujeure.

### *Erodesi rene Jesoso letoaa Filatone*

<sup>6</sup> Niritocuruhane aonaain jetaote: “Calillea cajena ne-naana caa cachate,” naain jetao acaauru caje bajaee Filato.

<sup>7</sup> Niritiin acaauru caje bajaane jana, “Aca chujianrana,” naauruhane jaun jetaote, Calillea coberenadoroneein bana niha Erodesine jaun rene letoae Filato, nii bana nii Jeros-aleeun turuhin niha nii Erodesine jaun.

<sup>8</sup> Nitohaneein Jesoso letoaa Filatone jana coaraain jetaote, jataain rachoojoe Erodesi, cojoelanaacojoai ichaane coitu-cuhin, acaentonai Jesoso coarana jeretohane jana rene letoaaauruhane jaun.

<sup>9</sup> Nii jaun jetaote, araai saain niqiu, “Chatohaneein nenea neein,” naain caje bajaee Erodesi. Nejetaote, nere tonorana jerene Jesoso.

<sup>10</sup> Nii nainiha jetaote, ecu neeure saseredotecuru curu-aanaacuru, chaen Cana Coaunera aitoonjoa que cacha re-laureraauru, naaonjoainuri, jataain acaauru esenetaain, Jesoso cairichaa Erodisine coina counujeein coulurujiha neeure.

<sup>11</sup> Nitohaneein nere tonorana jereniha Jesusone jaun jetaote, coetaain rai soodarooru aina jiniinquin nocoeje chanuhin jetao cairichaaain, nocoreeteuruha *reychurune* jaan tocohanai cajione que jetao Jesoso cajione corerate

Erodesi. Nitohaneein teein jetaote, nacoaauneein Filato rene letoae Erodesi.

<sup>12</sup> Nitohaneein Jesoso cairichaauruhane bana caje coaauneein jetaote, ita que nejerateeriin neeuruhane baiha jetao, ita belaichaneein neeure Filato aina Erodesihuru.

*Jesoso atinaauruhane coina rucuhecuruhane  
(Mt 27.15-26; Mr 15.6-15; Jn 18.39-19.16)*

<sup>13</sup> Nitohaneein Filato rene letoaa Erodesine jana jetaote, saseredotecuru curuaanaacuru, chaen cocoinacaihuru, satiin ecu nenacaauru cachaauru, naonjoainuri taojiaain jetao:

<sup>14</sup> “Inarate canu rene caa cacha turuaa uhiche, ‘Cachaauru suujua reroecaain jete, cachaauru suujua auhacae,’ naain coulurujeein. Nena caraajenhane inara acatiha teein caje bajaanune janate, nii chatohaneein cotainacai ichaain, nii coulurujeeichene jaa lera coitucuneeun.

<sup>15</sup> Niheichu caa cana rene jelaiha letoaera Erodesi niha-natiin, nii chatoanai ichaane jaa lera coitucuhi. Aihane jaun inae coaraquiche inara, nihei nii chatoaneein cairichaaain ateinaacachene jaan lera.

<sup>16</sup> Raujiaainchane casetecaain nii baiha jianereeeunni,

<sup>17</sup> Fasocaa beseta naineein niha coulurujuenojoine, niri-jieein jianenajaaoncaanne rijijieein,” naa acaauru rai Filatone jana jetaote,

<sup>18</sup> satiin ita rijitiin jachaatorohaain jetao:

“Jiaohine. Jiaonriha nii Jesoso jianeeinera. Nii Barabasi jianeeujian laenra,” naaure jetao Filato rai Jorioocuru.

<sup>19</sup> Nii Barabasi jetaote, caresero cuhane enohaaure, nii neseu Romanocuru que nejerateein, acaauru aina sonaana que neein leinjiin cacha sohin jaohane coreniha.

<sup>20</sup> Nitohaneein nii chatohaneein Jesoso cairichanaa jerenihane jaun jetaote, nirijieein jianihane coina jetao niqúi, nacoaauneein acaauru rai ere Filato.

<sup>21</sup> Nejetaote, jataain tonijiaain jeelai rutaain jachaatoroaain jetao:

“Letonanocoriin coroso que teute ecu neein ohinera,” naaure jetao ita rijitiin.

<sup>22</sup> Niritocuruhane jaun jetaote:

“Chatohanai baasonajian ichae. Coatiha cairichaaain atinaanune coina chatohaneein baaso ichaain nihane coara-haaun canuta. Raujiaainchane casetecaain, nii baiha niri-jieein jianereeeunnicha,” nae jetao acaauru rai Filato nichata saain.

<sup>23</sup> Niritoha acaauru raine jana jetaote, jachaatoraain ehe-quiin jetao, “Coroso que tihachaaura,” naauruha araai saaine cotabeniha jetaote,

<sup>24</sup> nii aitocuruhane rijijieein jetao ichae Filato.

<sup>25</sup> Nitohaneein jetaote, nii Romanocuru que nejerateein sonaana que neein sonajaaïn joera caresero cuhane nenea, acaauruhacha jianeratei cacha mitaaïn jetao acaauruhacha jerei rijijieein jetao, acaauru bijihu Jesoso te Filato.

*Coroso que Jesoso teuruhane*

*(Mt 27.32-44; Mr 15.21-32; Jn 19.17-27)*

<sup>26</sup> Nii jaun jetaote, coroso que Jesoso teuruhane coina, amaauruhane jana, situujiha cuha leinjiin cacha Sirene caje unaa Simoonne jaun jetaote, cotijiaain que nii Jesoso teuruhane jaanu coroso baijiaeratecure. Nii jaun jetaote Jesoso caaijie, nii coroso teuruhane jaanu amae.

<sup>27</sup> Nitohaneein amaauruhane jana jetaote, arajii enecuru, quichaauru, naaonjoainuri jetao, caaijie cuure. Nii caaijie cunacaauru jana cunacaauru enecuru jetaote, cojioriin chanaaure Jesoso coinaderaa.

<sup>28</sup> Nii chanaauruhane jana acaauru coaraain jetaote:

“Jiaonriha cacoreniha chanaaichenera Jerosaleen benecuru. Inara bereecuru, inara jaberoco, naaonjoain coreniha chanaauchera.

<sup>29</sup> Inae nerichaain inara cairichaauruhane jaan cojoanona. Nii banate: ‘Caohatoriha canaanai sirilanaala nihacachene niqui,’ nariquicheein.

<sup>30</sup> Nii banate ichatane ecuunooru rai, ‘Canacaanu ichoae neranuu,’ naa cuurureein cachaauru. Jana atane rarorooru raite, ‘Canacaanu asihu,’ naaurureein.

<sup>31</sup> Coaracuche nachuhinti chatohanai baaso ichaaïn nenihanune sainejeein catohaneein caetecuruhane. Nii jaun chatohaneein teeinti inara teurureein inae amuhanune baiha,” nae jetao acaauru rai Jesoso.

<sup>32</sup> Nii Jesoso jiniichaain jetaote, coroatajaain necha aansai baaso icharaauru cachaauru amaure, sohin ateinanajaauruhane coina.

<sup>33</sup> Inae nii “Couturi Bejero” neein acaauruhacha curu-aateihu turuhin jetaote, coroso que Jesoso aina jiniiquiin nii coroatajai necha aansai baaso icharaauru teeure. Leinjiin jetaote, Jesoso najaabiji nichajai que teeure. Jana leocha jetaote, raotono nichajai que teeure.

<sup>34</sup> Nitohaneein coroso que teuruhane jana jetaote:

“Caa catohaneein caetecuruhane coreniha, acaauru que ii suujua acateura Ofa, cha coitucuurenihane jaunte aihurera,” nae jetao Jesoso. Nii jana jetaote, ecu nejesinajeein ita rai Jesoso cajione chaluure soodarooru.

<sup>35</sup> Nitohaneein teuruhane jana jetaote, ecu neein coara-jeure cachaauru. Nii nainiha jetaote, cocoinanacaaihuri netonai:



“Chajaain aihane ena esinae rauhijiriin Cana Coaunera tenojoi Mesihasee in niicha janijineen nihane, raajenihane rai jaberoco ichoterateemiin leeochoaauru ichoteratihane rijijieeinte coaracaachera,” naaure jetao nechu jataain cairichaa in que ninichaa jia.

<sup>36</sup> Nii jana soodarooru netonai jetaote, Jesoso que ninichaa jee in nechu jataain cairichaa rohan nichuutaacoaain jetao, bino elorajiojoaain nena que jetao cocoaain:

<sup>37</sup> “Aihane esinae rauhijiriin Jorioocuru rai *Rey* neeine, ichaajenihane ijiabereeo ichoterateeune coaracaanura,” naaure jetao rai.

<sup>38</sup> Nitohaneen coroso que teein jetaote, rai bichoeniha teein jetao: “Caate Jorioocuru rai *Rey* neein ne,” naain lae-nacure.

<sup>39</sup> Nii jana nii necha aansanee in coroso que nena cacha coroataja jetaote, nechu jataain cairichaa cotaiha jetao:

“Aihane esinae rauhijiriin Mesihasee ine, ichaajenihane ijiabereeo ichoterateeunte coaracurumiin, chaen canacaanune maaje in ichoterateeune coaracaanura,” naane jana jetaote:

<sup>40</sup> “Coa niritoha. Tana ichasetecarichaa in Cana Coaunera ne coasiine. Itonai rijijiee in casetecone in neeinatiinachura aito hite.

<sup>41</sup> Canatejian esinae rauhijiriin itolere nee in baaso icha-caane coreniha necairichaecaa cau. Jana caa cacha, nii chatohanai baaso ichaa in nihane coreniha caa aihei,”

<sup>42</sup> naane baiha jetao:

“Canu coaacuhin ii Cojoanonaa que neeine banara Jesoso,” naa nii baaso icharaauru coroso que nena leeo chane jana jetaote:

<sup>43</sup> “Ene nete esinae rauhijiriin raotojoe in ichaonaana jaun caniha neriquincha,” nae jetao rai Jesoso.

### *Oha Jesusone*

*(Mt 27.45-56; Mr 15.33-41; Jn 19.28-30)*

<sup>44</sup> Nitohane in aie ohane rai niha Jesusone jana jetaote, enoto chujutora caje coaune in jetao, caohachanaine jee in nocoenane in nedae sati in chauratane, nuna macohi ichoae tee jiha enotonereetia in.

<sup>45</sup> Nitohanihane jana jetaote, neleruhin nesoaihacoae nii Teenforo leruera cajione, ecu bujuane in nena.

<sup>46</sup> Nii jana jetaote, jataain tonijia in auhaqui in jetao:

“Ii bijihune canu suujue tee unra Ofa,” naain jetao in aie ohe Jesoso.

<sup>47</sup> Nii jana ecu beraiha nenacaauru Roma rai sondarooru cafitaun jetaote, Cana Coaunera coroaje in jetao:

“Esinae rauhijiriinte, nii chatoanai baaso ichaain nenecaiha caa cachara,” nae jetao.

<sup>48</sup> Nitohanihane jana ecu satiin neein coarajeeurera cachaauru jetaote, nesoone caaun rai nalarijia faojoaain jelai caje cauhacooaure.

<sup>49</sup> Nejetaote, satiin nii Jesoso coitucuurerauru, chaen Calileea caje coauneein sacuurera enecuru, naaonjoainuri jetao ecu neein coarajeeure jelai caje amuelanaala nita netiin.

*Ajeri jachu cuhane Jesoso jaberoco rucuhecuruhane*  
(Mt 27.57-61; Mr 15.42-47; Jn 19.38-42)

<sup>50-51</sup> Nii jana jetaote, ecu ne leinjiin cacha Jodea batane que nena Arimatea cocoaichaneein nena Jose. Aca jetaote, caohacha cachaneein, satiin Jorioocuru rai nelateein Jorioocuru coaraneen nenacauru- *Junta Suprema* tabaneein nihane sainejeein, turuha uha Cana Coaunerane Cojoanonaane cohajihane jaun jetao, nitohaneein nii Jesoso teeuruha nii rai leeochoauru *Junta Supremacurune* rautaain coaraene.

<sup>52</sup> Nii Jose jetaote, Filato caje Jesoso jaberoco bajaa cue, rucuhecane coina.

<sup>53</sup> Nitohaneein bajaain jetaote, coroso caje fauhin jetao, shojoera que conajaain jetao, jaiti chuni onaa teurenihane jaan ichatane ramara que nena ajeri jachu cuhane jetao rucuheca cuure.

<sup>54</sup> Nitohaneein jetaote, inae nunuheneelalajiha nebetacanaa cojoanonaane jaun, inae niicha ichanenu ichana nainecuruhane nainejeein jetao, luhecaain nii Jesoso rucuheca cuure.

<sup>55</sup> Nitohaneein Jesoso jaberoco rucuheca cuuruhane jana jetaote, acaauru aina cuure Calileea caje coauneein jiniichaain unacauru enecuru. Nitohaneein cuhin jetaote, caohachaaain rai jaberoco rucuhecuruha ajeri jachu cuhanene coaracure.

<sup>56</sup> Nitohaneein ajeri jachu cuhane rai jaberoco rucuhecuruhane jana caohachaaain coaracuruhane baiha jetaote, nenajaun cauhin jetao, meetoon rijijieein jujuaain nena ichacuruhane nainaain jetao, Quiricha inoaensi cuhane aitoa Cana Coaunerane rijijieein, nebetacanaa cojoanonaa bana nebetacaaure nii enecuru.

## 24

*Oo caje ichanaa Jesusone*  
(Mt 28.1-10; Mr 16.1-8; Jn 20.1-10)

<sup>1</sup> Nitohaneein nebetacauruhane cojoanoo janohetiin jetaote, nii teeuruhane jaan ajeri jachu coaraa cuure nii acaauruhacha ichai jujui amaain nii enecuru.

<sup>2</sup> Ecu turuhin coaracuruhane jana jetaote, elonanohi ne nii ajeri jachu fuuruhane jaa ajeri jaberoco.

<sup>3</sup> Nii jana enohin coaracuruhane jana jetaote, inae ecu Cana Curuaanaa Jesoso jaberoco eruurene.

<sup>4</sup> Nii jaun jetaote, niicha ichanenu coitucuelanaala ne-soonetooruhane jana jetao, somaratohanai que cajonequiin, ecu luhecotariin acaauru aina ecocohin temeenete coroatajai cacha.

<sup>5</sup> Nii coaraain jetaote, nesoone caaun, suujua acatecuruhane coaratiha nenoracaauruhane jana jetao:

“Chanuna onacaauru jana, ichaohin nena ariiche inara.

<sup>6</sup> Inae ichanaane jaun, coatiha cau nihei. Tana Calillea inara aina nihane bana inara rai:

<sup>7</sup> ‘Acaihaniji cachaneein nejanohanaaneein nenaate, necha aansaneein ichaonacaauru rai tenojoinnein niha cureein. Nii janate coroso que teein ateinaa cuurureein. Nete nichata janohane cuhane ichanareein,’ narejetoha inara raine que nainaquicheneta,” naaure jetao ecu ecoonacaauru cachaauru.

<sup>8</sup> Niritocuruha acaauru raine que nainaan jetaote, acaauru rai aitoroetoha Jesusone coaacure.

<sup>9</sup> Nitohaneein inae nainaan, nii atane bana caje jelaiha cauhin jetaote, jitariin nii acaauruhacha coarai biha jetao cuure lechoonca leinjiin afosotooru rai, chaen satiin acaauru aina nenacaauru cachaauru, naaonjoainuri rai.

<sup>10</sup> Nitohaneein coaraain afosotooru rai biha cunacaauru jetaote, Maadala bene Mariha, chaen Joana, chaen Saantiaao neba Mariha, chaen leeochoauru enecuru acaauru aina cunacaauru, naaonjoainurine.

<sup>11</sup> Nitohaneein turuhin beeuruhane jana jetaote, acaauru esenetana jerecurene afosotooru.

<sup>12</sup> Nejetaote, nii acaauru esenetaaurenihane sainejeein soroneein jeluhariin cuhin turuhin, nii atane bana cuhanai coaraa Fedorone jana jetao, nii conaacuruhane jaa shojoeraacha ecu codoheque. Nitohaneein shojoeraacha eruhane jaun jetaote, jataain cojoelatiin jelaiha nenaanajaun cauha cue Fedoro.

*Emaoso nese coero cuhane cuuruhane*  
(Mr 16.12-13)

<sup>13</sup> Nii bananeein jetaote, enoto chujutora rijju fautaain amunaanaja itaanejeein nii Jerosaleen caje nena Emaoso neseu jetao, cuure coroatajai Jesoso aina nerelanacaauru.

<sup>14</sup> Nitohaneein Jesoso ateinaauruhane que ereerejeein bero cuhane cuujeeuruhane jana jetaote,

<sup>15</sup> jaiti que ereerejeeuruhane jana, acaauru rohan nichuutaain jetao, acaauru aina bero cuhane cuujue Jesoso.

<sup>16</sup> Nejetaote, acanihane coitucuurene, acanihane coitucuu-  
ruhane jereniha Jesusone jaun.

<sup>17</sup> Nitohaneein jetaote, acaauru rai:

“Chaaquena bero cuhane ereerejeein cuujueeiche,” naa  
acaauru rai Jesusone jaun jetaote, ecu inaderatonanaain in-  
acuhin jetao:

<sup>18</sup> “Ii netonai Jerosaleeun neeinatiinna: ‘Naaonjoain  
ichacuruha caa janonaacha cuhanera,’ naain coitucue-  
neeite,” naain tonoraa nii bero cuhane cuujuenaa coroataja  
Cureeofasine jaun jetaote:

<sup>19</sup> “Chatohaneeuruhanaate aitohi,” naane jaun jetao:

“Nasarete cocoaicha Jesoso, satiin cachaauru notaracae  
nere que irihane naitoonjoan ichaain, itolere que laraajiin  
Cana Coauneraacha letoai *profetaneein* nihanatiinte

<sup>20</sup> Romanocuru rai coulurujueeure saseredotecuru curu-  
aanaacuru, chaen cana rai cocoinanacaihuri, naaonjoai-  
hunri, coroso que teein ateinaauruhane caina.

<sup>21</sup> Canacaanune niqui, cairichaerinojooineein neeuruha Is-  
raeli cocoaicha nichaachene ichoteratihane cohajihacaanu.  
Nete inae nichata janoha nitohaneein ateinaauruhane sai-  
jijiein,

<sup>22</sup> canacaanu aina nenacaauru enecuru tabaauru, janonaa  
aonaain cuhin natane bana coaraa cuuruhane jana,

<sup>23</sup> ecu Jesoso jaberoco eruurenihane jaun, jelaiha nenaana-  
jaun cauhin canacaanu rai beein canacaanu socoinaau-  
re. Acaauru rai ecocohin jete: ‘ “Coatiha cau nihei Jesoso jabe-  
roco, inae oo caje ichanaane jaunta,” naaunre anjeraauru,’  
naain beeure.

<sup>24</sup> Niritocuruha turuhinne jaunte, canacaanu caje ne-  
nacaauru tabaauru netonai cuhin, nii atane bana coaraa  
cuure. Nii janate chuhisi, nii aitocuruha enecurune rijijieein,  
inae ecu nene Jesoso jaberoco. Niheichu nii Jesoso nihanatiin  
coaracuruhi,” nae jetao rai Cureeofasi.

<sup>25</sup> Niritohane jaun jetaote acaauru rai:

“Chanuna cha esenetana jerelanaala, nii aitocuruhalu *pro-  
fetacurune* coacuhin esenetana jereneeiche.

<sup>26</sup> Tana jauriaanejeein dedeeu cusihane ajiniha, cato-  
haneein necairicharichaaain Mesihazine coitucuhicheneta,”  
naane baiha jetao,

<sup>27</sup> Moisesa quiricha caje coaaneein nunuheteein jetao,  
que aitiin laenacuruhalu *profetacurune* beebejeein jetao,  
acaauru rai ereereje Jesoso.

<sup>28</sup> Nitohaneein nii cuuruhane jaan, Emaoso neseu turuuru  
jana jetaote, rauhijiriin situujiha cunaa rijijieein cuujue Je-  
soso.

<sup>29</sup> Nejetaote:

“Cauna canacaanu aina nesuruure. Inae jataain sohane jaun nocohejia natiin,” naain jetao chunaaure. Nitohaneein chunaauruhane jaun jetaote, ecu acaauru aina nesurue Jesuso.

<sup>30</sup> Nitohaneein acaauru aina nesuruhin jetaote, lenonecuruhane coina nelauriaauruhane jana jetao, faa teberiaain Cana Coaunera bajaane baiha jetao, acaauru rai beeeuneein te.

<sup>31</sup> Nitohaneein faan tihane que nainaan jetaote, Jesuso nihane coaraain acanidane coitucuuruhane jana jetao, inae acaauru caje jianatoroain amue.

<sup>32</sup> Nitohaneein jianatoroain amuha acaauru cajene jana jetaote: ecu jelai nedaain ita rai nejesinajeein,

“Esinae rauhijiriin acanidane jaun jira bero cuhane uu-  
jueein, ereerejiha Cana Coaunera Quiricha inoansi quene  
jana, aca netoojoain naonae cana suujua cuhanaina,”  
naaure jetao ita rai.

<sup>33</sup> Niritocuruhane baiha jetaote, caeneenejelanaala jelaiha  
bero cuhane soroneein cuhin Jerosaleen, ita taojiaain nee-  
ruha lechoonca leinjiin nenacaauru afosotooru aina acaauru  
leochaaurune jaan cauha cuure. Inae nii Jerosaleen ne-  
nacaauru rene turuuruhane jana jetaote:

<sup>34</sup> “Esinae rauhijiriinte inae ichanae Cana Curuaanaara,  
Simoon raite inae ecocoera,” naain jetao acaauru rai beeeure.

<sup>35</sup> Niritocuruha acaauru raine jana jetaote, bero cuhane  
acaauru rai netonai ecocohin acaauru aina cuujihane beein,  
acaauru aina lenoneein faan teberiaain, Cana Coaunera ba-  
jaain acaauru rai tihane que nainacuruhane beeeure jetao nii  
acaauru ajiniha netaojiaain nenacaauru rai, nii coroatajai-  
huri Emaoso coero cuhane cunacaauru.

*Aina nerelanacaauru rai ecooca Jesusone*  
(Mt 28.16-20; Mr 16.14-18; Jn 20.19-23)

<sup>36</sup> Niritiin acaauru rai bero cuhane ecoocane que jaiti  
ereerecuruhane jana jetaote, luhecotariin acaauru cataaun  
neeritiin:

“Raotojoein neeuche,” naa acaauru rai Jesusone jaun je-  
tao:

<sup>37</sup> “Rai corii jecha coaracure,” naauruhane jaun jetao  
jataain nesooneetoore.

<sup>38</sup> Nitohaneein nesooneetooruhane jana jetaote:

“Chanuna jataain nesooneetohiche. Chanuna nainanacha-  
ranejeein, baasoneein inara suujua cuhane coaauquiche.

<sup>39</sup> Cacoichuru, catihacuru, naaonjoaihunri  
coaracuchenachuhiti, jeelai cajabereoneeinte neeure  
caa cajabereecuru. Cajabereeo mucuhin cacoharaauche.  
Leinjiin onaa corii, caa cacoaraaichene tocoaneein buchin,

jaberoconein nichaaurain nenea naineriheita,” nae jetao acaauru rai Jesoso.

<sup>40</sup> Niritiin jetaote, coroso que teein, rai tijia, biji, naaonjoain curuabaauruhane jaacuru coarate acaauru que.

<sup>41</sup> Nejetaote, jataain esenetana jerecurene, jataain cojoe-latiin rachoojoeuruhane jaun. Nitohaneeuruhane jaun jetaote:

“Tana cau enohalanohineein niha cau chaelai lenone ni-jine,” naain acaauru caje bajaane jaun jetao,

<sup>42</sup> niha ate basichone jaun, rai teeuruhane jaun jetao,

<sup>43</sup> ecu acaauru notaracae netiin que lenone.

<sup>44</sup> Nitohaneein lenonihane baiha jetaote acaauru rai:

“Caa catohaneein caetecuruhanene quene inara rai bere-jetoonlu, jaiti canu atinaaurenihane jana inara aina ni-hanune bana. Inae catoaneein caetecuruhane coina, rai quiricha cuhane itolereneein caque aitiin laenaalu Moisesane nainain, chaen aitiin quiricha cuhane laenacuruha *profetacuru*, Salmo naaonjoain cuhanene rijijieeine inae nainaaun,” naa acaauru raine baiha,

<sup>45</sup> Cana Coanera Quiricha inoansi cuhane aitoane rijijieein acaauru que coitucuherateein jetaote:

<sup>46</sup> “Laenanohineeinte ne, canu Mesihasi nichaanne ohanune baiha, nichata janohane cuhane ichanacaaunne que.

<sup>47</sup> Aihana jaun, canuhacha cocoinanohineein Jerosaleen caje nunuhetein, satiin atanecuru sacuritaain cachaauru rai, ‘Esinae rauhijiriinte, coreniha ichoteratenohineein nerichaacheein,’ naain beeuchete, nacoaauneein Cana Coanera coacuhin suujua coreein neeuruhine acaauru osa caje acaauru ichoteratiha Cana Coanerane coina.

<sup>48</sup> Inarate caa ohanune caje ichanacaaunne coaraneein neeiche.

<sup>49</sup> Canune inara rai Ofa aitoonjoalu tereeunni. Aihane jaun, jiaonriha caa Jerosaleen caje amuhiche, laraajiin neeichene jaanu dede caje unaa raaichene reetihaaineta” nae jetao acaauru rai Jesoso.

### *Dedeeu cauha cuha Jesusone*

*(Mr 16.19-20)*

<sup>50</sup> Niritoha acaauru raine baiha jetaote, Jerosaleen caje amanajaain jetao, Betaniau turuanajaain, ecuun biji si-jirichaain jetao acaauru cojiotae.

<sup>51</sup> Nitohaneein acaauru cojiotaain coroaenaacane baiha jetao, inae dedeeu cauha cue, ecu acaauru ratiriin.

<sup>52</sup> Nii jana jetaote, ecu Jesoso coroaecuruhane baiha, jataain rachoojoein jelaiha Jerosaleeun cauha cuure.

<sup>53</sup> Nitohaneein cauhin jetaote, itolere bana Teenforo asae Cana Coanera coroaeretecurelu.

## **Joaancha laenai**

### **Ena Nenea Cana Coaunera Ere**

#### *Cana Coaunera Ere*

<sup>1-2</sup> Jaurianejeeinte nenea ne caa Erenaa.

Itolere, dede, cana rai chauratane, naajoain coaunaa Cana Coaunerane ajiiniate nelu caa Cana Coaunera Ere, jelai Cana Coauneranein.

<sup>3</sup> Nii jelai Erenaa quete itolere coauneratelu Cana Coaunera. Nihei nii colane necoanaain nei.

<sup>4</sup> Nii Erenaaate icaonaa teraneein ne.

Nii icaonaa teerate, cacha cononeein ne.

<sup>5</sup> Nii Erenaaate, cononeein nocohena conaeranein ne. Jacatiasihei nocohena tabai.

Charijieein teinti cana rai chauratane conae caa enoto. Nii rijijieinte cacha suujua conae nii Erenaa. Amuritonaa nainesihei nocohena tabai.

<sup>6-9</sup> Inae chauratane que turuelalajia nii cono esine, satiin cachaauru conoaeranune janate, Joaan letoae Cana Coaunera, nii cono que ereerejeein cachaauru relaane, aonaain esenetaain coitucuuruhane coina.

<sup>10</sup> Nii Erenaa quete, chauratane coaunerate Cana Coaunera niqui. Nete caji chauratane que turuhane jana coitucuurene caa chauratane que nenacaauru, niicha counanohineein neeuruhane saijieein.

<sup>11</sup> Caa niicha counai chauratane que turuhane janate, que jaolequiin raarene cachaauru.

<sup>12</sup> Nii janate, atiin raain esenetaaure coroatajajei cachaauru. Nii coreniate, calaohi raane rijijieein acaauru rae Cana Coaunera.

<sup>13</sup> Joaereein cacha calaohi rijijieein nihei inae Cana Coaunera ere esenetaane cacha. Rauhijiriinte Cana Coaunera calaohi rijijieein nereein nii Erenaa esenetaane.

<sup>14</sup> Nii Erenaaate, cachaneein nejanoain canacaanu aina ichoae. Nii jaunna aina amuemujeein coaracaanune jaun, leinjiin acaihanejeein Cana Coaunera Calahineein nihane coaracaanu canacaanu nota que, jerichanejeein Cana Coaunera rijijieein chabana nohanelanaala rauhijiriin canacaanu belaihana jaun.

<sup>15</sup> Nii janate, turuha uhane jana: “Taa quenara aitonajacoonra, ‘Canu caaijiete turuha ureein canu ajiniha nenaara,’ naain aitonajacoon,” nae Joaan, nii Erenaa cojoeluhin.

<sup>16</sup> Inetono janonaa banate, satiin cacha belaiin cana coroatajane nii Erenaa.

17 Moisesa quete rai naitoonjoan berateein laenaeratelu niqui Cana Coaunera. Nete tonoraaurene cachaauru. Nii natiinte, atiin cachaauru belaiha ichaonaa rauhi que cachaauru relaane coina turue Cana Coaunera Calaohi Jesocurisito, nii cache relaana jaan ichaonaa rauhi raauruha cachaaurune coina.

18 Chabana Cana Coaunera coaracuruhi cachaauru niqui, nete inaca Cana Coaunera coitucuhane jaun, nii inaca que cana relae, acaihanejei Calaoheinein nihana jaun.

*Turuha urichain Jesocurisitone beebjeiha Joaan- cacha cou- junacaterane*

19 Joaan renete batirichuru letoaaure nii Jerosaleen nena- caauru bichauhenaauru: “Chaneeita,” naain Joaan caje bajaauruhane coina.

20 Inae Joaan rene turuhin bajaauruhane janate: “Curisito nihaunta,” naain rauhijiriin tonoranaaca Joanne jana:

21 “Chaneei najian. Cana Coaunera ere bera Eliasineeina,” naain coaiten bajaauruhane jana:

“Aca nihaunta,” naain coaitiin tonoranaaca Joanne jana:

“Aca neneeina jaun, chaneei najian. Nii turuha niicha jerecuri canacaanuhacha cohajei Cana Coaunera ere be- ranecaai,” naauruhane janate:

“Ahan- aihei, aca nihaunta,” naain tonoranaaca coaitenne jana:

22 “Chaneei najian. Beeinete ne, bihacaanu canacaanu letoaurera raine coina. Chatoanai icharaneei najian,” naain bajaauruhane jana:

23 “Canu quetejian, nerichaaain leinjiin cacha, cacha areeroo cuhin eeheehejeein cacha cotiaranura: ‘Turuha cana curaanaane jaan coero raujiauchera, naain beranura,’ naa Isaihasi najaan nichaaunra,” naain biha Joanne jana:

24-25 “Chanuna jana chaen, acau que cachaauru coujunaca- teei, nii canaacha cohajei Mesihasi neein, niheichu Eliasi neein, niheichu leecha Cana Coaunera ere bera- *profeta* neein, naaonjoainuri neein nenaalanaala,” naain bajaau- ruha nii fariseeocuru letonocurune janate:

26 “Acauhanau teeinne canu, cachaauru coujunacatiha ba- o- tisanajaaun. Inae turuha urichaain canu caaijie inaraacha coitucuhi cacha.

27 Canu caaijiete turuha ureein, nii inoaelu nenea cacha- jataen canu amuritoeriin cocoinanacai,” naain acauru rai be Joaan.

28 Nitohaneente, Jorodaan jeraniha nenea Betabarau niha Joanne jana, Jerosaleen caje uhin Joaan rene turuhin ba- jaauruhane janate: “Canuna laen cacha areeroo eeheehejeein



cache cotiaraneein neeunra,” naain acaauru rai be Joancha coujunacatera.

*Cana Coaunera carenero narejeen*

<sup>29</sup> Nii cojoanoote, tajia uujiha Cana Coaunera Calaohi Jesusone jana coariin: “Notara Cana Coaunera carenero narejeenta. Taate itolere caa chauratane que nenacaauru cachaauru caje osa itajeranu que oha cureeincha.

<sup>30</sup> Taa quenara aitonajacoonra, ‘Canu caijiete turuha urein nii canu ajiiniha nena cache,’ naain aitonajacoon.

<sup>31</sup> Inae niqui inoaelu caje coauneein nesianiha niqui, nete caa cacaijie turuha uhe. Canu netonaichu coitucuhaunlu jau-riiaa nejeein. Jianacoo cana mitaeraunu que Cana Coaunera letononeein nihane coitucuhaunlu. Nena laen inae ena coitucuun, carai biha caletoaerana jaun. Isaraeli cocoaichacuru que coitucueratihanune coinata, carai been caletoae caletoera.

<sup>32-33</sup> Osa caje cana mitaeranu que letononeein nihane coitucuhaunlu niqui. Nena, ‘Leinjiin cache choaae fauha uha serori rijijiein Cana Coaunera Suujuenete, Cana Coaunera Suujue que coujunacatihate aicheeincha,’ naain carai biha caletoaerana jaun, choaae fauha uha dede caje serori rijijieine coaracaunna jaunna coitucuun.

<sup>34</sup> Nii jaunna, ‘Acate Cana Coaunera Calaohi inecaihara,’ naaun, nitoanihane coaracaunna jaun,” naain be Joaan.

*Ichoaechania Jesoso Ere tonoraerauru*

<sup>35</sup> Nii cojoanoote jelaiha Betabarau coroatajai nere tonoraerauru Simoon Fedoro ocoala Aanderesi, chaen canu, naojoain nihacaanu Joaan ainane jana,

<sup>36</sup> situha uhe Cana Coaunera Calaohi Jesoso. Nii janate: “Taa Cana Coaunera carenero narejeen coaracuchera,” naain biha Joaan canacaanu raine jaun,

<sup>37</sup> Cana Coaunera Calaohi Jesoso coariin caijie kuhacaanu.

<sup>38</sup> Nitohaneein caaijie kuhacaanune janate, jaotoraain canacaanu coariin:

“Chate ichaquiche niriirijieinta cachaauru,” naa Cana Coaunera Calaohi Jesoso canacaanu raine jana:

“Chute neei aaita cache relaera,” naacaanune jana:

<sup>39</sup> “Chajauchetejian coanicha,” naain canacaanu amaane jana, inae enuna macoijiu teejia enotone jaun, cuu aina sonafaacaanu.

<sup>40-41</sup> Nii baihate, nihana Simoon Fedoro ariha cue nii Aanderesi. Ariin, ruhin: “Inae canaacha cohajei jianacoon cana mitaeranu que- Cana Coaunera letono Curisito eruhacaanura,” naain nihana Simoon Fedoro rai biha cue Aanderesi.

<sup>42</sup> Nii baihate, Cana Coaunera Calaohi Jesoso rene, Simoon Fedoro turuaa uha Aanderesine jana, Simoon coariin:

“Jonasi calaohi Simoonnee niqiu, nete Fedoro nereein ichurujuara,” naain Fedoroneein curaate Cana Coaunera Calaohi Jesoso, aca laraajiin nere beraneein nerichaine coitucuhana jaun.

*Ferifi aina Natanaaeli cotihaca Cana Coaunera Calaohi Jesosone*

<sup>43-46</sup> Nii cojoanoote Calileea batane que cuna jaaun, Ferifi aina itaque tacauruhana jaun: “Caniha neeorihura,” nae Cana Coaunera Calaohi Jesoso, Ferifi rai.

Fedorooru nese Betesaaida caje unaa nii Ferifi netonai.

Niritiin cotihacane jaunte, Natanaaeli ariha cue Ferifi. Ariin, eruin: “Inae turuha nii Cana Coaunera Quiricha Inoaesi cuhane turuha uha niicha jerecuri eruhacaanura. Nii cacha- canacaanuhacha eruhite, Jose calaohi- Nasarete cocoaichanera,” naain biha Ferifi, Natanaaeli raine jana je-taote:

“Chaquete nelatere Nasarete cocoaichata,” naane jana je-tao:

“Chajaachaautejian coanicha,” naa Ferifine jaun, Ferifi jiniichaain uhin turuha uhe.

<sup>47</sup> Nii janate, inae rohan nichuuntaa Natanaaeline jana: “Nocoo inae uha Israeli cocoaicha esine- coritanacae lanaala nenaara,” naa Cana Coaunera Calaohi Jesusone janate:

<sup>48</sup> “Inasiinte cacoitucuhita. Cacoitucuhi inachute,” naane janate:

“Eejeen- aihanura. Ii cotihaca uha Ferifine ajinihana inae ii coitucuun. Nii uheraneein curajaain enuha asaee neeine janana, ichoharajeunra,” naane janate:

<sup>49</sup> “Iite Cana Coaunera Calahineein canacaanuacha cohajei Israeli curaanaa *Rey* neeicha cacha relaera,” naa Jesoso rai Natanaaeline jana:

<sup>50</sup> “Nii uhera asaee neeine coaracaunne que aitocoauenne najaanchana canu esenetaai. Inae jataain nii amuritoeriin coariquiinha.

<sup>51</sup> Rauhijiriina aitoonra. Inae neyoracaa dede bacuujuane janate inaraacha cohajei Cacha Calaohi nichaunne choae fauhin, jelaiha iniha cuuruha Cana Coaunera letonocuru aanjeraurune coariquiinha,” nae Cana Coaunera Calaohi Jesoso.

## 2

*Nisirihatiha cachane beseta*

<sup>1</sup> Nii baihate nichata janohi catiariin Calileea batane que nena- Canaau neein curajain nena neseu ne nisirihatiha cachana jaan beseta.

Nii jaunte, cuu nii beseta bitoaa cue Cana Coaunera Calaohi Jesoso neba.

<sup>2</sup> Nii janate Cana Coaunera Calaohi Jesoso netonai cotihacure nii beseta que, aina nerelanacaauru aina cuhane coina.

<sup>3</sup> Nitohaneein inae nii beseta que neeuru jana jetaote, inae saa binone jana: “Inae nihei binota,” naain Jesoso rai biha nebana jaun:

<sup>4</sup> “Saan. Chanuna niriitohi caraite oma. Inasiina jaiti turuha canu amihaneeon nunuhetihanune jaan cojoinaca que ne coalanaala,” naa neba raine janate:

<sup>5</sup> “Chajaaincha naitoojoaancha ichacuchera,” nae nii cuu bino chaluurera rai Jesoso neba.

<sup>6-7</sup> Nii janate cuu ne Jorioocuru rai saotaneein baichaje tabaanaain- atane caje ichanohineein, Cana Coaunera notaracae biji culejeein itolere acaauru lenonecuru culejeein ratirihuruhana jaanu que jesinaaeca teeuruhana jaan.

Nii jaunte: “Caa cuhane acau raain teeuche nainecolijiaanaaincha,” nae Jesoso nii bino chaluurera rai.

Nii le baichajete baichaje seejoan cuhane coroata baichajihanaai curujuae.

Inae nii baichaje nainecolijiaanaain acau raain, teein beeuruhane janate:

<sup>8</sup> “Soriin amaain, taa beseta erora cocoanhura,” naa Jessosone jaun, soriin amaain nii beseta erora cocoe nii acau chaluurera.

<sup>9</sup> Nii janate Cana Coaunera Calaohi Jessosohacha rotoi nihane coitucuelanaala coe nii beseta erora. Acaihanejein nii acau raureraachate coitucuure.

Nii jaunte nii bino cohin aonaain:

<sup>10</sup> “Raotoha caa bino,” naain, “Chajataauraa,” naain, nii ene ranaa jerera cotijiaain: “Raaotoha caa ii bino. Aihuruha leeochoaurune rijijieein, bino caohacha que nunueetein cana cocoaerate lanaalate aaita. Taoniin nunueniha canaacha coi amuritoeriinte raoteru,” nae nii beseta erora, nii ene ranaa jerera rai.

<sup>11</sup> Nitohaneeinte Calillea batane que nenea nese Canaau, binoneein jesinaaeca rotoe Jesoso, esinae Cana Coaunera letononeein nihane coitucuuruha cachaaurune coina.

Nii coaraaina, esentaacaanu aina nerelanaa nichaanune.

Nitohaneein nunuheteinte, itolere cunaitenacaauru rautaaain, itolere ichae Cana Coaunera Calaohi Jesoso.

<sup>12</sup> Nii baihane Caferenaanon cuha Jessosone jana, corianiha cuhacaanu, nejeraauru, neba, aina nerelanaa nichaanune naaonjoaain, cuu neorihacaanu inata janojeine coina.

*Jerosaleen nenea Teenforo caje necoretenacaauru sitaa Cana Coaunera Calaohi Jesusone*

*(Mt 21.12-13; Mr 11.15-18; Lc 19.45-46)*

<sup>13</sup> Nii janate Jorioocuru beseta Fasocoa que turuelalajihana jaun, turuha cue Cana Coaunera Calaohi Jesuso.

(Fasocoa besetate bitohaure Jorioocuru ajelanaala, nii Teenforo asaae. Cairichaaerinajaain niha Egipto curaanaane caje jianacoo mitanajaa Cana Coaunera najaan- cojoanon- aaniha nii Fasocoa besetana jaunte, nitohaneein Fasocoa beseta cojoanonaa bana Teenforo asaae itataojiain Cana Coaunera corojeein bajaure Jorioocuru.)

<sup>14</sup> Nii janate Jerosaleeun nenea Cana Coaunera rai ita tao- jiauruhana jaan loreri inoaes- Teenforo asaae necoretiha neeure Jorioocuru, itolere baca, carenero, serori naaonjoain que. Nii janate ecu jelai tein ne cachaauru rai coriqui coreeurera. Niite acaauru coriqui choae laurujua laurujuau- ruhane jana,

<sup>15</sup> sicho coinori que rajirajinjaain, nii acaauru rai bacaauru, carenerocuru, naaonjoain aina curuaataain, acaauru sitaain, nii coriqui coreeurera rai coriqui riariae atane choae. Acaauru coriqui rori raatiin sieitiin,

<sup>16</sup> chujuhecoha nii serori que necoretenaane jana: “Naain caa serorichuru amaachera. Coa caa Ofa Cana Coaunera loreri asaae necoretihachera,” naain sitanajae Cana Coaunera Calaohi Jesuso.

<sup>17</sup> Nii jaunte, “Jataain ii loreri beraihanunete ne,” naain aitosihalu Cana Coaunera Quiricha Inoaes- i cuhane nii canacaanuhacha cohajeine jaun, “Aca caara,” naain canacaanu suujua cuhane Jesuso coarajiacaanu aina nerelanaa nichaanune.

<sup>18</sup> Nii jaunte sitanajaa Jesusone jaun: “Chatohanai jana ichaain canacaanu notaareei jana, esinae Cana Coaunera letononeeine coitucuhacaanune coinata,” naain Jesuso caje bajaauruha Jorioocurune janate:

<sup>19</sup> “Caa Cana Coaunera loreri chamuhitiin jaohichenena, nichata janojoeincha cuhane michureeunni nacoaauneein- cha,” naane janate:

<sup>20</sup> “Inasiinte jenachoonca saota jaanacaain ichacuruhalu jetao natiin, iicha nichata janojoeincha cuhane michureeita,” naaure Jorioocuru Jesuso rai.

<sup>21</sup> Rai jaberocohacha quete aite, nii Cana Coaunera loreri que ujaiteein. Nii jaunte nichata janojoein ichanae Jesuso- oo caje.

<sup>22</sup> Nii jaunte nichata janojoeein ichanaane coaracaanune jaun, inae jauriaa aitosihana jaun, canacaanu suujua neeoritohana jaun, nii aitoha Jesusone esenetacaanu, Cana Coaunera Quiricha Inoaesi cuhane aitohana jaun.

*Satiin cacha suujua coitucuha Jesusone*

<sup>23</sup> Fasocoa bana cuu Jerosaleeun neein, bacosacuru, maosacuru, urichosae, naajoaunri rautaane coaraainte, Cana Coaunera Calaohi Jesoso esenetaacoaure arajii cachaauru.

<sup>24</sup> Nete, “Naaajoaainte chuhisi, esinae rauhijiriin quesentaurureeincha,” naene Jesoso, acaauru suujua coitucuhana jaun.

<sup>25</sup> “Naaajoaauruha caa cachaaurura,” naain biha chuneine que airijiinte, cacha suujua coitucuhana jaun, sanein esenetanjaene Cana Coaunera Calaohi Jesoso.

### 3

*Jesoso rene turuha Necodemone*

(Niha lelauriin Jorioocuru fariseeo neein curuajaain. Niichurute, “Acaauruhachajete jataain leeochoauru amuritoheriin Cana Coaunera ere tonoraure,” naaure.)

<sup>1</sup> Leinjiin fariseeo Necodemo neein curajaain nenaate nii lelauriin Jorioocuru bichauhenaneein ne, acaauru rai jataain nelateineein.

<sup>2</sup> Niite janotiin Cana Coaunera Calaohi Jesoso rene turuha uhe. Turuhinte:

“Eletoaa Cana Coaunerane coitucuhacaanura. Iite itolere bacosacuru aina cunaitenacaauru rautaeraneein neeicha. Nitohanai ichana nainiheijelai cacha Cana Coaunera colaneta, cacha relaera,” naa Necodemone janate:

<sup>3</sup> “Esinaena rauhijiriin aitoreeunni. Enacooauneein nejanoaeniha cachane, Cana Coaunera aina jiniiquiin nenaanainiheijelai” naa Jesusone jaunte:

<sup>4</sup> “Inasiina enacooauneein nejanoare ichauhena. Inasiinte coaiten neba suuri cuhane neloroaain nejanoare ichauhena,” naa Necodemone janate:

<sup>5</sup> “Esinaena rauhijiriin aitoon. Nihei acau nejei, Cana Coaunera Suujue naojoain que coujunacatenoineniha cachane, Cana Coaunera Ere tonoraeraneein nenaanainiheijelai cacha.

<sup>6</sup> Jana, cacha caje nejanoanaate-jelai cachaneeinne. Jana, suujua culejeein caruruhin coriha Cana Coauneranete, Cana Coaunera cachaneein ne. Colane aihei.

<sup>7</sup> Cana Coaunera Calaohi coitucuhin esenetaain nere tonorana jereraaurute nejanoaain Cana Coaunera cachaneein

nereein. Coaa caa ichei caritocooaanne cojoaelatiincha cae-  
neein aonajiha,” naa Jesoso, Necodemo rai.

<sup>8</sup> Niritiinte, “Charijieein teeinti tiririjiin uha cujuanane,  
‘Naaajoain cajete uhera,’ naain coitucueinei. Niheichu  
‘Cuute cuera,’ naain coitucuheneinei. Nii rijijieein techu, ‘Nao-  
joainte cacha rai ichaonaa te Cana Coaunera Suujue,’ naain  
coitucueeneicha,” naa Jesusone janate:

<sup>9</sup> “Chatohanihana,” naa Necodemone janate:

<sup>10</sup> “Jataain Israeli cocoaicha relaeraneei inatiin, ta cari-  
hanai coitucuhine.

<sup>11</sup> Esinaena rauhijiriin aitocooaanu, canacaanu nota que  
coaracaanune jaun. Nete, aitocooaanune esenetaeneeichera.

<sup>12</sup> Caa cana rai chauratane que aitocooaanune esentaeneeine,  
chatohaneein jana dedeeu ichaonaa bihanune esenetareei.

<sup>13</sup> Nihei chunei dedeeu iniin coaara. Canuna laaen dedeeu  
nihanune caje uhin cau turuun cachaneein, itolere caa chau-  
ratane que nena cacha rijijieein nihanune coina. Canuna  
Cacha Calahineein inaraacha cohajeineein neeun.

<sup>14</sup> Charijieein teeinti, coata caje acano ichaain, enuha  
que nujuateein chujuraa Moisesane coitucuhi chachu natiin.  
Nii rijijieein techu, enuha que nujuateein Cacha Calahi  
nichaanne chujuraa cuurureein,

<sup>15</sup> nitajenaachara nejeein nena ichaonaa raa quesene-  
taerane coina,” naain,

### *Chauratane que nenacaauru belaitoha Cana Coaunerane*

<sup>16</sup> “Jataain caa chauratane que nenacaauru cachaauru  
belaitoha Cana Coaunerana jaunte, acaihanejein calaohi  
nichaaunne letoae caa chauratane que Cana Coaunera,  
nitajenaachara nejeein niha quesenetaain cacoitucuurera  
cachaaurune coina.

<sup>17</sup> Coatiha cacha casetecaanune coina calaohi nichaaunne  
letoaai Cana Coaunera. Jianacoo osa caje cacha mitaanune  
coinate, cau calaohi nichaaunne letoae Cana Coaunera.

<sup>18</sup> Nii Cana Coaunera Calahi nichaaunne esenetaa  
cachane, caseteco coarinaain. Jana Cana Coaunera  
Calaohi nichaaunne esenetaaite, caseteconein niha  
cureein, acaihanejein Cana Coaunera Calahi nichaaunne  
esenetaenihana jaun.

<sup>19</sup> Cono rijijieeinne turuun caa chauratane que Cana  
Coaunera Calahi nichaaunne, cacha conaeranu que  
niqui. Nete nii cono jerecurene nii Cana Coaunera Calahi  
nichaaunne esenetaauruhi cachaauru. Acaihanejein  
nocohena janaachate nena jerecure, nocohenaanau  
neein suujua coaraelanaala baaso ichacuruhane coina. Nii  
corenihate caseteconein neeurureein.

<sup>20</sup> Baaso ichacuruhane coaracuruhane coataate, cono rohan nichuuntanaa jerecurene saain nii baasoneein nenacaauru cachaauru.

<sup>21</sup> Jana caohachaaain ichaaoruhanete, cono rohan nichuuntaaure, Cana Coaunera jerenohin ichacuruhane coaracuruhane coina,” naainte Necodemo rai aite Cana Coaunera Calaohi Jesoso raaje neque.

*Enacoauneeinte Jesoso que ereereje Joaan- Cacha Coujunacatera*

<sup>22</sup> Nii baihate Jodea batane que cue Cana Coaunera Calaohi Jesoso, aina nerelanaa nichaanune aina, cuu inata janojoeii nejeein neeoriin, acauhanau cachauru tein coujunacatenajaain baotisanajaane coina.

<sup>23</sup> Nii janate, Salim rohan nena Enoon, cachaauru coujunacatiha ne Joaan, cuu niha tabaain acauna jaun. Nii janate cuu turuhajeeure cachaauru, acauhanau tein coujunacatenajaain baotisanajaa Joanne coina.

<sup>24-26</sup> Inae Joaan enoae lalajeeuruha caresero cuhane janate, acauhanau tein cachaauru coujunacateein baotisa Jesosone jaun, ita cotaicha rijjiitocure Joaan ere tonoraaurera, leinjiin Jorioo aina. Nii baihate Joaan rene turuhin: “‘Cha,’ naau. Taolu ii aina Jorodaan jeraniha nenaalu leinjiin cacha canacaanu rai iicha beebejeilute, enene acauhanau tein cachaauru coujunacateein baotisanajaa ne. Saainte inae aca ere tonoraure,” naauruha Joaan rai nere tonoraaurerane janate:

<sup>27-28</sup> “Saan. Jeriha Cana Coaunerane jaunte aihure. Inae inara rai rauhijiriin aitonajaaocaun, ‘Coatiha Curisito nihaun,’ nanajaaocaun. Canute letoae Cana Coaunera nii beraanu que.

<sup>29</sup> Charijieein teinti, inae comasai raa cachane corojaje rai belaicha. Nii rijjijieein inachu canu netonai corojeeun, Cana Coaunera Calaohi Jesoso ere tonoraauruha cachaaurune.

<sup>30</sup> Aca ere tejian tonoraa cuurureein cachaauru, jelaichoae jauhecotojoeriin. Jana canu erete tonoraa cuurureein fautojoeriin.

<sup>31</sup> Nii dede caje unaate, itolere cacha curuaanaa neein ne. Jana chauratane que nena cachate, niicha coaraaicha coitucujue. Jana aihei dede caje unaa. Itolere dedeeu nena, itolere caa chauratane que nenacaauru, naojoainte coaraain coitucue.

<sup>32</sup> Acate itolere niicha coarai coaraain be niqui, nete esenetaurene caa chauratane que nenacaauru.

<sup>33-34</sup> Jana esenetaa cachanete, esinae rauhijiriin aitoha Cana Coaunerane coitucuha cureein, jelai Cana Coaunera Suujue que suujuecoha Cana Coaunera Calaohi Jesosone jaun.

<sup>35</sup> Cana Coaunerate, nii letono calaohi belaitohana jaun, itolere cacha curuaanaa nihane coina cocoaainae.

<sup>36</sup> Nii jaunte Cana Coaunera Calaohi esenetaera, nirijijieein nitajenaachara nejeein nenea ichaonaa raa cureein. Jana, nii Cana Coaunera Calaohi esenetaite nitajiha cureein Cana Coaunera casetecanohi neein,” nae Joaan- Cacha Coujunacatera, nere tonoraaurera rai. Nitohanihalu inae Joaan enoene lalajeeuruha caresero cuhane rai.

## 4

### *Samaria bene rai iriha Jesusone*

<sup>1</sup> Joaan cacha coujunacatera ere tonoraauruhane amuritoheriinte, Jesoso ere tonoraaure arajii cachaauru. Chaen “Aca jete, Joaan amuritoheriin acauhanau teein cachaauru coujunacateein baotisanajae.” naain coitucuure fariseeocuru.

<sup>2</sup> (Coatiha aca, acauhanau teein cachaauru coujunacateein baotisanajaai. Acaihanejein canacaanu aina nerenanaa nichaanunechana acauhanauteein cachaauru coujunacateein baotisanajacaanu.)

<sup>3</sup> Nii jaunte nii coitucuhin, Jodea batane caje mituhin, Calileea cauha cue Cana Coaunera Calaohi Jesoso.

<sup>4-5</sup> Nii Calileea batane que turuhane coina, nii Samaria batane choae situhin, Sicaraneein curuajaain nenea neseu turue Jesoso, calaohi Jose rai Jacoboacha tei atane rohan.

<sup>6</sup> Nii jaunte cuu niha atane jachu ucuatiin acau mitunajaan Jacobo curuaa siriina jaun, enoto chujutaae lalajeein rijiū ecu lauturoaain lauhecōha Jesusone tonohanaune,

<sup>7-8</sup> nii nese Sicarau, lenone coretiha cuhacaanu saain.

Nii jana jetaote canacaanu caaijie tocoriin tajiha acau raa uhe leinjiin Samaria bene.

Nii jaun jetaote: “Caisichuche nii ii acau quera,” naain acau bajaa Jesusone jana jetaote:

<sup>9</sup> “Chanuna Joriooneeinche natiin, cacaje acau bajaaiche, Samaria beneneein nihanuche natiin,” nae jetao nii Samaria bene Jesoso rai, Samaria cocoaichacuru aina ita belai-hurenihā Jorioocuruna jaun.

<sup>10</sup> Nii jaun jetaote: “Ichei Cana Coauneraacha tenaa jerei coitucuhin, canu nichaaunne coitucuhin cacaje laaen bajaaichene jana nihanena laaen, canu cocoirenachara nejeein niha cacha najaan acau ichaonaa tera tereeeunche icheicha,” naa Cana Coaunera Calaohi Jesusone jana jetaote:

<sup>11</sup> “Chaquena acau soriin rariquiche, raina jaannu siriijieequichene coalanaalata. Ucuhatohache caa atane jachu natiinta. Cha cajete ichaonaa tera acau tereeeiche caraita.



12 Canacaanu foeratera inoasesi Jacobohacha ratirineein nihache caa atane jachu natiinta. Cajе raain niha nete acau corejetecurehelu Jacobo calaohichuru, rai nirihuru, naao-joaihunrichera. Iina amurijiriin nenea jereeichete,” naa Samaria benene jana jetaote:

13 “Satiin caa cajе acau raain cooerate, jerichanejeein enacoauneein cocoiriha cureeinchera.

14 Jana, canuhacha tei acau coha cachanete, coaiten enacoaunein cocoirenereinchera. Quiicha tei acaute, cacha suujua cuhane marohemarohereein, cacha rai nitajenaachara nejeein nenea ichaonaa teranu quera,” naa Jesusone jana jetaote:

15 “Saan. Carai aihane nii acau uhauche coaiten cooirichaaunchene coataara, enacoauneein coaiten acau raanuchene coataara,” naane jana jetaote:

16 “Ti sinijiera cotihachanihuchera,” naa Jesusone jana jetaote:

17 “Niheiche casinejerata,” naane jana jetao:

“Esinaete chuhisi, rauhijiriin niicha que aitocoichera.

18 Jauriaate niqui saoquiin sinijieraoquichelura. Chaeen nii ena ii aina nenaate rauhijiriin isinejera neein nenecheta,” naa Jesusone jaun jetaote:

19 “Cana Coanera Ere beraneeina ichoaraaunchera.

20 Caa atane ucuuno quete Cana Coanera bajaebajaer-aetoorechelу canacaanu foeratera inoaesihuruchera. Jana inara Joriooneichenete, naain Jerosaleeun cuhin Cana Coanera bajaebajaecaanune jerequichelura,” naa nii Samaria benene jana jetao:

21 “Quesenetaauchera. Inae ichuunnejeeonria caa atane ucuuno que uhichene laatelanaala, nii Jerosaleeun cuhichene laatelanaala, chunijiu niha natiin Cana Coanera bajaebajaequichenera.

22 Samaria cocoaicha neeichene, coatiha nii inaraacha bajaebajajei coitucuujueein aitoheeiche. Jana canacaanu Jorioo nichaanunena nii canacaanuhacha bajaebajajei coitucuhin laaen aitocooanuche, Jorioocuru cajе ecoona nihache nii jianacoon cacha mitaerane jaun.

23 Enene cajе coauneein, caa atane ucuuno que unaa laate-lanaala, nii Jerosaleeun cunaa laatelanaala, rauhijiriin suujua cuhane Cana Coanera bajaauruhineche nere tonoraer-aauru esineeuru. Nitohaneeinte jereche Cana Coanera,

24 suujue nejeesiha nijihachena jaun,” naa Jesusone jana jetaote:

25 “Raotojoeina turuha urichain Cana Coanera letono Curisitone coitucuunche. Acate laen cana relaa ureeinche itolere que,” naa nii enene jana jetaote:

26 “Saan. Canuna acaneein caa ichei aitoonchera,” nae jetao Cana Coaunera Calaohi Jesoso.

27 Nii janana eruhacaanu aina nerelanaa nichaanune, nii ene aina ereeree jana. Nii natiine, “Chaquena ereeree- quiche,” naain bajanaa nainenihacaanu, jataain cana curu- aanaa nihane jaun.

28 Nii jaunte cuu baichaje ratiriin, canacaanu que janoriin naain neseu biha cue nii Samaria bene.

29 Inae neseu turuhin jetaote: “Chajaauchete, taa leinjiin cacha coaraera. Acate naajoaain itolere ichacaunne que aite caraicha. Jerihane acate Cana Coaunera Letono Curisito necaihara,” naa nii neseu nenacaauru rai turuhinna jaun

30 tajiha jiniichaain uhin, nii ratiriha najaun turuhin coaraa uure.

31 Nii tonohanauna jaiti uujeeuru jana: “Chaelainejein quiorihura,” naain lenonihane coina counujichaanune janate:

32 “Niha caleonne inaraacha coitucuhine lanaalara,” naa Jesusone jaun:

33 “Jerihane chunicohanejeinte coroaatecaihara,” naacaanu itaraine janate:

34 “Lenoneein inara suujua nunaaichene rijjijeeina, ca- suujua nunaaun caletoaera amihaneon ichaain jitaanune. Acate caleonne nera.

35-38 Inoaelu nere bera que catohaneein turuhanune be- ratiha Cana Coaunerana jaun, turuhanune cohajeein neeu- ruha cau nenacaauru cachaaurune jaunna inara letoaree- unni, inae turuhanune beebejeeichene esenetauruhane, ni- tajenaachara nejeein nena ichaonaa raauruhane coina,” naa Cana Coaunera Calaohi Jesoso, aina nerelanaa nichaa- nune rai.

39 Nii neseu turuhin niriitiin cachaauru rai beein, “Naao- joain itolere ichacaunne quete aitera,” naa nii enene jaun jetaote esenetaaure arajiin nii Samaria cocoaichacuru.

40 Nitohaneein Cana Coaunera Calaohi Jesoso rene turuhin: “Canacaanu aina neorihura,” naauruhana jaun, acauru aina coroata janojoein neorihacaanuna jaun,

41 jataain jelai amuritoheriin esenetaacoaure, nujuaae caje raaje aitohane jaun.

42 Nitohaneinte nii jauriaanejeiin Jesoso aina erena Samaria bene rai: “Ii cajena aasaaeriin coitucuhin esene- tacaanuchelu. Inae laen enene esenetacaanuche jataain nujuae caje raaje aitohane aonacaanuchene jaun. Acate Curisitonechera. Acate caa chauratane que nenacaauru itol- ere cachaauru jianacoon mitaera nechera,” naaure nii ene rai.

*Jorioocuru curuaanaacuru curuaanaa rey rai cocoainanacainein nenea calaohi rautaa Jesusone*

43 Coroata janohin Samaria batane que nihane baihate, caje amuhin naain Calileea batane que cue Cana Coaunera Calaohi Jesoso.

44 “Naaajoainte Cana Coaunera Letononeein nera,” naain caohachaain coitucuhin, belaaïn, raauenerichaain naraaichurune coitucuha raotojoein inatiinte, atiin Calileea cauha cue Jesoso.

45 Inae Calileea turuhacaunune janate, caohatiin Jesoso raauere jelai batane que ichaonacaauru. Jaurianejeein Jerosaleeun Fasocoa bitoauruhane jana cuu itolere ichaa Jesusone coaracuruhane jaunte caohatiin raauere.

46-47 Nii jaunte Calileea nenea nese- Canaau turuha cue Cana Coaunera Calaohi Jesoso, nii jauriaanejeein bino neein jeesinaaeca rotoha najaun.

Nii janate coitucuuriin coaraa uhe Jorioocuru curuaanaacuru curuaanaa rey rai cocoainanacainein nenea, cunaitiha calaohina jaun que rautaeratihane caina. Tajiha turuhinte: “Atiin canenajau Caferenaan turuha uute carai canaanai rautaaicha,” naa nii cocoainanacaine jana:

48 “Saan. Chatohanai coaraeneeiche inara nota quene, cha esenetaheeiche,” naane janate:

49 “Chajaaajoaau atiin osiha carai canaanaine ajiinihara curuaanaa,” naane janate:

50 “Chajaaincha chaque tonajelanaala caunihu. Inae nerautaa ii rai canaanaicha,” naa Jesusone jaun, esenetaain cauha cue.

51 Nii jana jetaote, inae turuhelalajeein cuujihane jana jetao, tajiha que tacaain: “Inae nerautaa ii calaohicha,” naauruha que tacaain cachaaurune jaun jetao:

52 “Chu teejia enotone jana nejelajaain nerautaeta,” naain bajaane jana jetaote:

“Raca enoto cafetaainte nejelajaain nerautaera,” naaurua najaun jetaote:

53 “Nii rijiute chujian aite carai Jesusora,” naain jetao, nii caje coauneein jetao Cana Coaunera Calaohi Jesoso esenetaaure saain, sinijiera, bereecuru, naajoain aina jiniiquiin.

54 Nii quete coroata saain coitucuruha cachaaurune caina niicha ichai ichae Cana Coaunera Calaohi Jesoso, Jodea caje Calileea nenea neseu turuna jaun.

## 5

*Jiurona rautaa Cana Coaunera Calaohi Jesusone*

1 Nii baihate Jerosaleeun cauha cue Jesoso, Jorioocuru beseta bitoaane coina.

2 Nii Jerosaleeunte, carenero bacuujuaneein curuajaain nenea acujua rohan ne Beteseta neein curuajaain acau netaojia najaan.

3 Ecute saoquiin niha lohanarine jana nasaae daraacoore arajiin cunaitenacaauru, maosacuru, bacosacuru, neluhinaauru, jiuronacaauru, niichuru daraaque nerurujuaa nii acau netaojiane cohaca.

4 Nii acau netaojia jetaote, tabaque nichoae fauha Cana Coaunera Letonone, nerurujuae nii acau. Nitohaneein nerurujuaane jana, ichoaaichaniha kuhane fai cunaitenaa jetaote nerautae.

5 Cuute ne leinjiin cacha, nichatachoonca fosa jaanacain cunaaicha aina nei.

6 Niite tocoecohane jana coarae Cana Coaunera Calaohi Jesoso. Coaraane jana, inae nitohaneein carajaain cunai aina nihana jaunte, rai: "Nerautanaa jereeina," naain caje bajaa Jesusone janate:

7 "Eejeen, aihanu niquicha. Nete nene caa acau netaojianaja kuhane canu faeraanura. Faunaa jerichaaunne naineeinte, canu ichoaechaniha faaure leeochoaurura," naa nii cunaitenaane janate:

8 "Saan. Chajaain nimichuhin chela seriin amuute coara-caara," naa Jesusone janate,

9 nii rijieeoritiin caochanaineejein nerautaaain, nela seriin nichaauraaain jelai caje amue nii cunaitenaa.

Nii janate nebetacanaa janonaa bana nitohanai ichaane jaun, coaraain:

10 "Ta cocoaeraa chelai baijiera enenene coitucuhinete, nebetacanaa cojoanonaa nihane saijieein anajiin baijiaai," naauruha rai Jorioocurune janate:

11 "Aihanu niqui, nete caletoe canu cunai caje carautaera," naane jana:

12 "Chate nii nitohanai ichaaine coina eletoaeta," naain niqui bajaauruhane jana

13 coitucue, arajii cacha jana nitajeoriha Jesusone jaun.

14 Nii baihate nii Jerosaleeun nenea ita taojiaain Cana Coaunera bajaauruha Jorioocuru najaan Teenforo asaae eruhin:

"Aonaau, inae laaen nerautaicha. Nijiaonria coaiten naosatenaa coaquine. Coaiteeinete jelai amuritoeriin coaraa curiquincha," naa Jesoso raine jaunte,

15 Jorioocuru rai biha cue:

"Acate carautaera," naain.

16 Nii jaunte Jesoso aina nejerateein, jataain sohin jaonaa jerecure Jorioocuru, nitohaneein nebetacanaa janonaa bana cacha rautaana jaun.

17 Nii jaunte: “Joaenreein bana amianiha Ofana jaunna, jerichanejeein ichaaunra,” nae Cana Coaunera Calaohi Jesoso.

18 Niritoha Jesusone jaunte, jataain jelaichoaae jauheco-tojoeriin aina obajeein sohin jaonaa jerecure. Chaen nebetacanaa janonaa que aitocuruhane tonoraelanaala, “Cana Coaunera Calaohi nihane jaun jete, ichaa Cana Coaunerane rijijieein ichae,” naane corenihane maajeein jataain rautaaurene Jorioocuru.

*Rai inaca Cana Coaunera cocoainanohineein niha Cana Coaunera Calaohine*

19 Nii jaunte: “Esinaena rauhijiriin aitoreeunni inara rai, Coatiha casuujua caje coauneein quiicha jerei ichana nainihaun, Cana Coaunera Calaohi nichaun natiin. Acaihanejein Ofaacha jerenohichana ichaaun. Itolere Ofaacha ichaichana ichaaun canu netonai.

20 Cacoelaiha Ofa Cana Coaunerana jaunte, itolere niicha ichai que canotajae. Chaaen techu jeelai choae jauhecotojoriin caque itolere ichaain inara notaaratihane, nii cojoaelatiin coaraa curiquicheein.

21 Onacaauru ichateein acaauru rai ichaonaa tiha Ofa Cana Coaunerana jaunna, canu netonai quiicha belaihuri ichateein acaauru rai ichaonaa teeun.

22 Chabana cacha coujuhin coaraai Ofa Cana Coaunera. Coatiha ichana nainenihane caun aihei. Nii jaunte canu cocoinaain caletoae cacha coujuhin coaraaunnuque,

23 chaen rijijieein jataain curuaanaa neein nihanune coitucuhin, rai nere tonoraauruhane rijijieein quere netonai tonoraauruhane coina. Cha teeinti quere tonoraene, niite caletoera Ofa ere tonoraenereein.

24 Caletoera ere esenetaain, quere tonoraain naajoain neeichenena inara coujuhin inara coaraelanaala rauhijiriin nitajenaachara nejeein nenea ichaonaa tereeunni inara rai, jaoleneein neeichene coataa. Esinaena rauhijiriin aitoon.

25 Enene caje coauneeinte Cana Coaunera Calaohineein nihanune ere aonacuruha Cana Coaunera coitucuhi cachaaurune jana, quere tonoraauruhane, acaauru suujua coriha cureein Cana Coaunera.

26 Raajenihane ichaonaa nitajenaachara nejeein nenea ichaonaa teraneein niha Ofa Cana Coaunerana jaunna, jerichanejeein rijijieen nenea rai calaohi nichaunna jaun canu netonai nitajenaachara nejeein nenea ichaonaa teeun.

27 Inaraacha cohajei- cacha calaohi nichaaunne cocoainainte caletoae, caohachaaain ichaaoruhane coaraain baasoneein ichaonacaauru ichao rucueranu que.

28 Coaa caa aitocoapunne cojoaelatohache. Inae cojoinaca que turuhane banate, rai nere aonacurureein.

29 Nii banate natane bana caje mituurureein satiin onacaauru, caoacha icharaauru nitajenaachara nejeein nena ichaonaa raauruhane jana, baaso icharaaurute caseteco coaraa cuurureein.

30 Coatiha casuujua caje coauneein cacha coujuhin coara-haun. Aitiin caletoaa Ofane rijijieeina rauhijiriin cacha coujuhin coaraaun.

31 'Cana Coaunera Calaohi nichaunra,' naain irihanu caraa-jenianene caohacharihei.

32-33 Inae Joaan caje bajaerateichene jana, rauhijiriin inara rai bihalu Joaan. Aihana jaun, esenetaaichenete caohachae, Cana Coaunera ere beraneein niha Joanne coitucuhene jaun.

34 Esinaete rauhijiriinte caque aite Joaan- acauhanau teein cachaauru coujunacateein baotisaera, caje bajaachene jana niqui, nena cacha aitohane lateneen. Jianacoon mituhin neeiche osa cajene jerena caaunna, caa niritiin aitoon.

35 Aca aiha leinjiin conone rijijieein niha Joanne jaunte niqui, corojeein neechelu basiijiin reeintiariin.

36 Chaaen techu, 'Acate canaacha cohajeinera,' naain inara rai biha rauhijiriin Joanne choae tacaain techu niqui, inara nota que itolere ichacaaunne coaraquiche. Nii quicha ichaina ichaun, esinae rauhijiriin caletoaa Ofa Cana Coaunerane coitucuhichene coina.

37-40 Chariji bana Cana Inaca Cana Coaunera coaraain nere aonaheeiche niqui. Nete, nere bera inoaesihuru que catohaneein turuhanune berateein laenaeratihalu Cana Inaca na-jaan que nerelaache niqui, caje ichaonaa nitajenaachara nejeein nena raaichene coina. Nete nii aitohane rijijieein caletoaa Cana Inacane esenetaeneeichene jaun raenereicheein.

41 Nii jaunna caque tacaain canu corojeein caraaichene jereneen.

42 Chaaen nachu raotojoein Cana Coaunera jereein, nere tonoraain neneeichene coitucuun.

43 Cana Inaca Cana Coaunerate niqui caletoae. Nete, caohachaaain caranaa jereneeiche. Jana inara rene turuhin, 'Canuna Cana Coaunera letono neeunra,' naa inara rene turuhin Cana Coaunera letono niheinete laen caohachaaain rariquiche.

<sup>44</sup> Cana Coaunera coacuelanaala itaacha corojeein, 'iite caohati cachaneein neeicha,' naain neeichene jaunte, que-senetana naineneeiche.

<sup>45</sup> Coatiha Ofa rai inara coulurujuenaa coauhaaun canu. Nii Moisesa inaraacha esenetaite laen Cana Coaunera rai inara colurujuereein.

<sup>46</sup> Moisesa aitojoan esenetaaichene jana nihanete, que-senetareeiche, catohaneein turuhanune que aitiin laenaalu Moisesane jaun.

<sup>47</sup> Nii aitiin niicha laenai esenetaeneichene, chatohaneein jana aitocoanne esenetareeiche," nae Jesoso.

## 6

### *Saoqui oharaancai cache rai lenone tiha Jesusone*

<sup>1</sup> Nii baihate Calileea conemuri jeraque cuha Jesusone jana,

<sup>2</sup> sacuha cuure arajiin cachaauru, cunaitenacaauru rautaane coaracuruhana jaun.

<sup>3</sup> Nii janate cuu atane ucuuno choae iniin nelauriariin lauheque Jesoso, aina nerelanaa nichaanune aina,

<sup>4</sup> Jorioocuru beseta Fasocoa catainajeein.

<sup>5</sup> Nii jaunte arajiin turuuruha cachaaaurune jaun: "Chu lenone coreterihacache, caa arajii cachaauru rai," naain baje Ferifi rai Cana Coaunera Calaohi Jesoso.

<sup>6</sup> Niicha ichaneni coitucuha natiinte bajae Jesoso Ferifi caje, "Toohanrichaaaincha," naain.

<sup>7</sup> Niritiin bajaane jana: "Coroata fashai janonei amihane-naa core jeeoneein faan coretichaachene niha natiin coatia caa arajii cache naineriheta," naa Ferifine baihate:

<sup>8-9</sup> "Caute ne caa canaanai rai saoquijjeein faan, nii baiha coroatajaain ate, naaonjoaain niqui, nete caa araainein cache nainenere carijiei," naa nii Simoon Fedoro ocoala Aanderesine jaunte:

<sup>10</sup> "Saan. Acaauru rai aitocuchete nelauriaauruhine satiin," naa Jesusone jaunte:

"Nii omane choae nelauriaauchera," naauruhane jana, nelauriaaure nii saoqui oaraancai quichaauru nejeesina, enecuru, canaanaihunru, naajoain janijilanaala.

<sup>11</sup> Nii janate nii faan teberiaain: "Nariha," naain Cana Coaunera bajaane baiha, nii aina nerelanaa nichaanune rai nii faan te Cana Coaunera Calaohi Jesoso, chaluhacaanune coina. Chaluhacaanune janate, nii saoqui oharaancai cache naine nii faan. Jerichanejeein techu nainecohanajae nii ate.

<sup>12</sup> Nii janate, inaeneeuruhana jana cautihana jaun: "Caa caute curujuaain raauche nijiaohanne coataa," naa Jesoso, aina nerelanaa nichaanune raine jaun,

<sup>13</sup> curuhacaanune janate ne, elechoonca coroata omariin faan caute. Nitohaneeinte caute, nii saoquijiei faan nefaain.

<sup>14</sup> Nii coaraainte: “Caate caa chauratane que turuha uha niicha jerecuri Cana Coaunera letono canaacha cohajeinecai-hara,” naaure cachaauru.

<sup>15</sup> Nii jaunte jataain acaauru curuaanaa rey neein Jesoso tenaa jereein, counujueein amanaa jerecuruhane coarajihana jaun, acaauru que janoriin amue rautaenihana jaun. Nitohaneeinte acaauru que janoriin amuhin, atane ucuuno que iniha cue Jesoso, cuu jelai basiijiin neeorihane coina.

### *Acau choae amuha Jesusone*

<sup>16-17</sup> Nii janane, inae nocohecane jaun, jaiti turueniha Jesoso atane ucuuno cajena jaun, fauha cuhacaanu. Fauhina, leinjiin bote cuhane naain jera jaoha cuhacaanu, Cafere-naaon turuhacaanune coina. Nii janate inae nalaakuin cuhin nocojoe.

<sup>18-19</sup> Nii janate, inae bote cuhane fauhin cuujihacaanune jana, canacaanu sacuha uhe Jesoso, acau choaae rurujueein uhin. Nitohaneeinte acau choae uhin canacaanu rohan nichuuntaain, nii acau jiheeditohane jana, fichafichanaa tabai nihane jana, nii bote nalaane amuniha canacaanu rai janate coaracaanune jana, tajiha acau choaae uhin rurujue, nii bote nichaae uhin. Nii jaunne coasiha nesoonetohacaanune janate:

<sup>20-21</sup> “Coaa nesoonetohachera. Canuna aihunra,” naane jaun, que tacaain coroajeein, nii bote cuhane fauhin amaacaanu. Nii janana cohaneooriin turutoha cuhacaanu canacaanuhacha coinetihu.

<sup>22</sup> Nii cojoanoote, acaihanejein satononiha jera jaoha cunaa bote cuhane fauhin jera jaoha cuhacaanune jana, canacaanu aina uheniha Jesusone jaun, nii que ereereecure.

<sup>23</sup> Nii jana jetaote, Tiberia nese caje uhin turuha uhe leinjiin bote. Turuhin jetaote, najauriaa uhe nii Cana Coaunera bajaain niicha tei faan quihuruha najaan rohan.

<sup>24</sup> Nii jana cuu nenihacaanune jana, Jesoso netonai niha natiin nenihana jaun, nii bote cuhane nefaujuuain cuhin, nii nihacaanune jaun Cafere-naaon turuhin ariha uure.

### *“Ichaonaa esine tera lenoneneeinne neeun,” naa Jesusone*

<sup>25</sup> Nii janate jera jaohin coaraa uuruhane jana, cuu nii Cafere-naaon ne Jesoso. Nii jaunte rai: “Chabana cau turuhite cacha relaera” naauruhane janate:

<sup>26</sup> “Nii quicha ichai coaraquiche natiin, ‘Naaajoain caara,’ naain inara suujuau erenaa coacuelanaala, nainnaain obejeein lenonequichene jaunte cariirijieeiche,” naainte,



27 “Coo sanaa inaera lenone corenihacha amihanihache. Acaihanejein ichaonaa tera- chabana sanaachara nejeein lenone coreniha amihaneeeuche. Nii nitajenachara nejeein niha cacha najaan lenone tihanune coinete caletoe Ofa Cana Coaunera. Canuna inaraacha cohajei Cacha Calaohi ineenra,” naa Jesuso acaauru rai janate:

28 “Chatohaneein nerichaanu Cana Coaunera jerenohi ichacaaunne coina,” naain bajaauruhane janate:

29 “Caa niicha letoai nichaunne esenetaichenete jere Cana Coaunera,” naa Jesusone janate:

30 “Chatohanaina ichaain canacaanu notaareei, coaraain esinaaen rauhijiriin Cana Coaunera letononeeine esenetaacaanune coina.

31 Carene tabai que amuhemuhecuruha najaaun jetaote, neniha lenonene jaun jetao, dede caje faan rijijieei nena manaa neein curuajaain nena que jetao ichaohin amuhemuhecururejetelu canacaanu inoasihuru. Nitohaneein jetaote, neniha lenonene jaun, ‘Dede caje nena faan rijijieein nena manaa te Cana Coaunera,’ naa Cana Coaunera Quiricha inoasi cuhane” naauruhane jaunte:

32 “Coatiha Moisesa nii dede caje nena faan manaa tihei. Acaihanejein Ofa Cana Coauneraachate nii dedeeu nena faan esine teraneein ne.

33 Nii Ofa Cana Coauneraacha tei faante turue caa chauratane que, cachaauru rai ichaonaa chabana nitajenaachara nejeein nena teranu que,” naa Jesusone jaunte:

34 “Atiin canacaanu rai inetono janonaa bana, nii faan que canacaanu sihura curuaanaa,” naauruhane janate:

35 “Canuna cacha rai ichaonaa tera faan neein neein. Cha teinte carene uhe aca mijiteriaain. Cha teinti quesenetae, aca cocoireriaain.

36 Nete inara rai aitocaaunne esenetaeneeiche, inara nota que quiicha ichai coaraquiche natiin.

37 Satiin Ofa Cana Coauneraacha letoate carene uhe. Nii jaunna carene uhi nihane sitaenereunni.

38 Coatiha quiicha ichana jerei ichacaaunne coina, dede caje uhin turuha uhaaun caa chauratane que. Acaihanejein caletoeera Ofa Cana Coauneraacha jerei ichacaaunne coinana cau turuun.

39 Nabana nitajeuruha cachaaurune coataate caletoe Ofa Cana Coaunera. Nii jaunna satiin nii carai niicha teeuri cachaauru ichateein michunajaa cureeunni inae saa cana janonaane bana.

40 Nii Cana Coaunera Calaohi coaracuruhane esenetaauruha satiin cachaaurunete jere caletoeera Ofa Cana Coaunera, chabana nitajenaachara nejeein nena ichaonaa raa esenetaeraaurune coina.

Nii jaunna inae saa cana janonaane bana ichateein michu-unajaa cureeunni,” naain acaauru tonorae Jesoso.

<sup>41</sup> Niritiinte, “Canuna dede caje faunaa faan neeunra,” naa Jesusone jaun nocoeje chanuure Jorioocuru.

<sup>42</sup> Nitohaneeinte ita rai: “Ta Jose calaohi Jesoso niha caane. Raotojoein inaca, neba, naajoain coitucuhacache natiin, dede caje faunaa nereta,” naauruha ita rai Jorioocurune janate:

<sup>43</sup> “Inae canu necoeje chanuhichene jianecuchera.

<sup>44</sup> Chunei carene unaa nainihe, nii jereein neniha cale-toaera Ofa Cana Coaunera. Inae saa janonaane banana nii carene uhine ichatiha cureeunni.

<sup>45</sup> ‘Satiinte relareein Cana Coaunera,’ naa Cana Coaunera ere beracuru ioaensuruhacha laenai quiricha cuhane jaunte, satiin Ofa ere aonaain tonoraain que nerelanacaurute, carene ureeincha.

<sup>46</sup> Chabana Ofa coaraai chunei. Acaihanejein canuhachana coaraaun caje unaa nichaunna jaun.

<sup>47</sup> Esinaena rauhijiriin aitoreeunni. Quesenetaerate ichaonaa chabana nitajenaachara nejeein nenea raa cureein.

<sup>48</sup> Canuna ichaonaa chabana nitajenaachara nejeein nenea tera lenoneneein neeunra.

<sup>49</sup> Neniha leinjiinejein cacha najaaun carene tabai choae amuhemuhecuruha inara inoaesihurune janate, que ichaauruhane coina cojoanoo netojoein manaa neein curuajaain nenea quinacai nalae Ofa Cana Coaunera, que ichaauruhane coina. Nete, satiin oore nii quihurera- inara inoaesihuru inae binaaneein.

<sup>50</sup> Canuna dede caje faunaa lenone neun. Nii faan nichaaunne quicha, chabana orihain.

<sup>51</sup> Canuna nii lenone neein dede caje faunaa neein neun. Nii lenone que ichaohin neite nirijijieein nitajenaachara nejeein niha cureein.

Nii lenone quiicha tenaa jereite, cajabereonneein ne. Acane tiha cureeunni, que ichaohin neeuruha caa chau-ratane que nenacaurune coina,” naa Jesusone janate,

<sup>52</sup> “Chatohaneeina rai jaberoco que cana coroaatere,” naain nejesinajeein ita cotaicha rijitocure Jorioocuru.

<sup>53</sup> Nii jaunte: “Esinaena rauhijiriin aitoreeunni inara rai. Canuna Cana Coaunera Calahineein, jelai Cacha Calahineein inaraacha cohajei ineein neun. Cajabereon quiin cacoichana coheneeichene, nihei ichaonaa esine ranaa nainiheiche.

<sup>54</sup> Cajabereon quiin cacoichana coerate, chabana nitajenaachara nejeein nenea ichaonaa raa cureein. Acane, saa cana janonaane bana ichateein michuha cureeunni.

55 Ichaonaa tera lenone esine neein niha cajabereeonne janate, ichaonaa tera conacai ineen ne cacoichana.

56 Nitohaneein cajabereeon quuin, cacoichana coerate, caniha jiniiquiin nereein.

57 Nii caletoaera Ofa Cana Coaunerate ichaonaa siri. Nii jaunna que ichaohin neeun. Nii rijijieein techu, cacoreniha ichaoha cureein caque lenoneein nei.

58 Nii dede caje faunaa lenone quena aitoon. Coat-  
iha nii inara inoaesihuruhacha quii manaa rijijieein nihei.  
Nii manaa quihuruha niqui inara inoaesihuru, nete satiin  
oore nii quihurera. Jana nii caitoojoan dede caje faunaa  
lenone quiha cachanete, chabana nitajenaachara nejeein  
niha cureein,”

59 naain relanajae Jesoso, Caferenaanon, acaauru rai sina-  
coca asaae netaojiauruha Jorioocurune jana.

*Nitajenaachara nejeein nenea ichaonaa tera erenaa*

60 Caritiin relanajaa Jesusone jaunte: “Caaintatoha jataain  
caa naitoojoan. Chate nere tonorare,” naauruha nii caaijie  
arajiin cunacaauru cachaaurune janate,

61 aohanriin:

“Ta aihane carautaaichene.

62 Toohanreichecha, jauriaa nihanulune jaun jelaiha in-  
iha cuhanune coaraquichene.

63 Caa quere aonaain esenetaeraaurute, chaelai janonaa  
bana nitajenereein. Jana, caa aitocoauune esenetaelanaala  
erenaa tonoraauruhite, ichaoha jaberoco niha natiin, nita-  
jiha cureein suujue. Cha que nelatihei cana jaberoco, cana  
suujue colane.

64 Nete jaiti caa aitocoauune jaan esenetaaurene inara  
tabaauru,” nae acaauru rai Jesoso, inae inoaelu caje  
coauneein, “Acaauru acaaurute quesenetaenereein. Jana,  
acate naaonjoain cacoulrueein naaonjoain caeteratiha  
cureein,” naain coitucuhana jaun.

65 Nii jaunte: “Nii jereniha Ofane, carene unaa nainihei  
chunei,” naa Jesusone caijiete,

66 jianijihacoaure nii arajiin aina nerelananichaanune  
aina amuhemuhenacaauru niritoha Jesusone jaun.

67 Nii jaunte: “Inara netonaiha cajoahin caratiriin  
amuriquiche,” naain bajaa elechoonca coroatajai  
nichaanune cajene jana:

68 “Ahan aihei. Chuna nenacae curichaacaanu. Nii  
canacaanu relaina jaan tejian nenacae ichaonaa chabana  
nitajenaachara nejeein nenea teraneein ne.

69 Canacaanuna laaen ii esenetaacaanu. Nii jaunna acai-  
hanejein Cana Coaunera Calaohi Curisitoneein neine coitu-  
cuhacaanura,” naa Fedorone janate:

<sup>70</sup> “Canuna lechoonca coroatajai niqichene cotijiaain raain neeun niqiu. Nete, nii inara lechoonca coroataja nechu aansain moconajaeraneein ne,” nae Jesoso canacaanu rai.

<sup>71</sup> Nii Simoon calaohi Jodasi Isacariote quete aite Jesoso, aina nerelanaa nichaanune lechoonca coroataja niha natiin coulurujerichaaine coitucuhana jaun.

## 7

<sup>1</sup> Nii baihate, Calileea batane que nenacaauru neseeuuru neseeuuru cachaauru relaa amuhemujue Cana Coaunera Calaohi Jesoso. Jodea batane que cunaa jerihe, cuu sohin jaonaa jerecuruha cuu nenacaauru Jorioocuruna jaun.

<sup>2</sup> Nii janate, inae ichuunejeonriha lohanari beseta bitoaauruha Jorioocurune jaun:

<sup>3</sup> “Coa cau niha. Jodea cunihunte cuu chaelai ichaaine coaracurumii cuu nenacaauru ii coitucuurera.

<sup>4</sup> Coitucuha cachane jeriha chuneine, asiin cha ichana nainihe. Aihana jaun, letonoaneein satiin coarajeeurera notaracae ichaute coaracurumii,” nae nocoalacuru.

<sup>5</sup> Nihei nocoalacuru nihanatiin esenetaaurenihana jaunte aitocure.

<sup>6</sup> Nii jaunte: “Inasiina jaiti turuha cuhanune jaan cojoinacane coaalanaala cureeun. Inara raite laaen caoachae joenreein bana cuhichene,

<sup>7</sup> neniha chatohaneein inara aina nejerateein, inara co-taain, chatohaneein inara tenaa naineniha caa chauratane que nenacaaurune jaun. Canihate laaen nejerateeure, itolere baaso ichacuruhane que rauhijiriin aitocoanne coreniha.

<sup>8</sup> Inara cunichuchete beseta bitoaaiche. Jaiti curihaunni canu, turueniha cuhanune jaan cojoinaca quene jaun,” naain

<sup>9</sup> nii Calileea nedae Jesoso.

*Lohanari beseta bitoaaurera jana turuha Cana Coaunera Calaohi Jesusone*

<sup>10</sup> Nii baihate inae cuuruha nocoalacurune jana, acaen-tonai cue acauru caaijie nasina rijijieein, acauru aina beseta bitoaa.

<sup>11</sup> Nii janate inae nunuheca besetane jana ariirijieeure Jorioocuru: “Aancacha nii cache,” naain

<sup>12</sup> cuu nejesinajeein coacuhin ita rai ereerejeein:

“Acate caohachanejein cachaneein ne,” naauruha tabaaurune janate, tabaauru:

“Caohachanejein cache nihei jana canacaanu rai, cache coritaain naojoanna jaun,” naaure tabaauru.

<sup>13</sup> Nete, rauhijiriin “Aca,” naain chaque erenaa nainene chunei Jorioocuru coasiha.

14 Nii janate, netaojiauruhana jaan loreri Teenforo asaae enoha Jesusone jana, inae sanaa jere nii beseta.

15 Nii janate cuu relanajaa Jesusone jana cojoaelatoore Jorioocuru. Cojoaelatiinte:

“Chatohaneeina nirijieein nerelaelanaala itolere coitucue,” naauruhane janate:

16 “Coatiha casuujua caje quiicha rocohi nihei- caa inara relaanune jaan. Caa inara relaanune jaante, nii caletoaera caje unaa ne.

17 Nii jaunte inae jatoroain Cana Coaunera jerenohi ichana jerate aitocoanne aonaain coitucuha cureein. Nitohaneeinte esinaae rauhijiriin casuujua caje rocohin aitenihanune coitucuurureein.

18 Charijieein teeinti: ‘Canuna caoacha cachaneein neeun,’ naain suujua caje rocohin raotono que ereereecane, ereereje cacha raotojoein: ‘Caate jataain caohachanejeein cachaneein ne,’ naain caohachaaain belaaain coaracuruha cachaaurune coina. Nete rai letoaera curuaanaa coitucuhin coroaecuruhane coina, esinae rauhijiriin aite. Aihana jaun, Nihei nii que: ‘Casaje,’ naain ereereecuruhane jaanu.

19 ‘Cana Coaunera ere bera Moisesa ere tonoraacaanu,’ naainte ereeiche niqui. Nete: ‘Coa sonajaain jaohache,’ naain aitoha Moisesa natiin tonoraeneeichene jaun, casohin cajaonaa jerequiche,” naa Jesusone janate:

20 “Chana ishohin ijiaonaa jerete aansai,” naauruhane janate:

21 “Chanuna jana chaaen, nebetacanaa janonaa bana cunaitenaa rautaanune jana, cojoaelatiin obaaequichelu caniha.

22 ‘Quichaneein nejanoaa inara bereene, inae fosa janonihane nejanoaane jana, rai nacatichi cari jiuununuhin saache,’ naa Moisesane jaunte niqui, nii tonoraain nebetacanaa janonaa bana niha natiin, canaanai nacatichi cari jiuununuhin sauhin naaonjoaain neeichelu.

23 Chanuna chaaen nebetacanaa janonaa bana lesajeein cunaitenaa rautaanune coreniha, caniha obajeein caque nererojoecaichelu.

24 ‘Cana Coaunera aitojoaan tonoraacaanu,’ naaiche inara suujua cuhane natiin, esinae rauhijiriin Cana Coaunera aitoonjoan coitucuhin tonoraain niheeiche. Esinae rauhijiriin Cana Coaunera aitoonjoa coitucuhin neeinchene jananihane, caniha obajeein caque nererojoecaain neriheeiche,” nae acaauru rai Cana Coaunera Calaohi Jesuso.

*“Naaajoain cajena unaa neeun,” naa Cana Coaunera Calaohi Jesusone*

25 Nii janate: “Tana caa cache ariirijieuruha sohin jaaruhane coinane,” naauruha nii Jerosaleen nenacaurune jana,

26 “Nocoo chujianra jianacoo neein satiin coarajera notara-cae ereerejena. Chanuna colaraain inauhene coarajeeure. Jerihanete acauru esenetaain, ‘Acate Cana Coaunera letono Curisitone,’ naaurucaiha cocainanacaihuru.

27 Canacaanuna laaen, nii uhana jaan coitucuhacaanu. Jana turuha Curisitone, ‘Naojoain cajete uhera,’ naain coitucuerariaain,” naauruhane janate,

28 cuu nii ita taojiaauruhana jaan loreri Teenforo asaae aonajenajaain,

“Esinaena aihana jaun, canu unajaan coitucuhiche. Coat-ihia casuujua caje coauneein uhaaun. Inaraacha coitucuhi Cana Coaunera caletoe.

29 Dede caje, aca caletoeana jaunna coitucuun caje uhanune jaun,” nae Cana Coaunera Calaohi Jesuso tonijiaain.

30 Niritohane corenihate mucuhin amaain caresero cuhane Jesuso enoanaa jerecure niqui, nete jaiti cuu tenihana jaun, chatoaneei que biji teeurene.

31 Nete, atiin esenetaain:

“Turuha Curisitone, coatiha aihaa caa cachane amurito-heriin araai saain niicha ichai ichaain cache notaariaain,” naaure arajii cachaauru.

*Teenforo beraihurera folisiaacuru que Cana Coaunera Calaohi Jesuso mucuhin raerateuruha fariseeocurune*

32 Jesuso queecha ereeuruha cachaaurune que urichocuruhanana jaunte, rautaaurenihana jaun nere tonoraeraauru Teenforo beraihurera folisiaacuru letoaaure nii fariseeocuru, nii cuu nena batirichuru curuaanaacuru, naojoaihuri, Jesuso mucuhin raacuuruhane coina.

33 Nii jaunte:

“Basijiin reeintiariina cau neeorihun. Nii baihana nii caletoeera rene cauha cureeunni.

34 Canu aririquicheein niqui. Nete caurueneriquicheein, nii cuhanune jaun turunaa naineneriquicheei najaun,” naa Cana Coaunera Calaohi Jesusone jaunte,

35 nejeesinajeein itarai:

“Chuna curute, ariirijiacachene niha natiin eruhenerihacache. Jerihanete Curieocuru que najasiiteein nenacauru Jorioocuru ataneu cunaa jere, Curieocuru relaane coina.

36 Chatohanerichaain naate aite: ‘Canu ariichene niha natiin, caururiheicheein cuhanune jaun turunaa naineneriquicheeine jaun,’ nae,” naainte itacaje bajaebajaecure Jorioocuru.

*“Cocoierei carene uhinena cocoa,” naa Jesusone*

<sup>37</sup> Nii beseta satono janonaa banate, beseta nunuhe bana, bajaauruhane amuritoheriin Cana Coaunera bajaasure jini-  
iqiini nii beseta bitoaa turunacaauru.

Nii jaunte beseta satono que nimichuhin tonijiain, nii cuu  
nenacaauru rai:

“Cocoirei carene uhinena cocoaë.

<sup>38</sup> Aitoha Cana Coaunera Quiricha Inoaesi cuhanene toco-  
haneein, quesenetaera cacha suujua cajete mitureein acau  
rijijieein sorohin, jelaiha suujua cuhane maroemaroereein,  
suujua rucujueein rai ichaonaa nitajenaachara nejeein ne-  
naa teraauu que, chaen leochaauru rai niha natiin tihane  
coina,” nae Cana Coaunera Calaohi Jesoso, nii beseta bitoaa-  
rera rai.

<sup>39</sup> Nitohaneein Cana Coaunera Suujue raaururichaain  
esenetaeraauru cachaaurune quete aite Cana Coaunera  
Calaohi Jesoso, coitucuuruane coina. Jaiti dede curuaana-  
neein Jesoso enoaenihana jaunte, esenetaeraauru rai suu-  
jue letoaene Cana Coaunera. Nii quete aite Cana Coaunera  
Calaohi Jesoso.

*Jesoso coreniha ita caje nelerucuruha cachaaurune*

<sup>40</sup> Nii jaunte niritoha Jesusone jaun tabaauru:

“Acate nii turuha uha niicha jerecuri Cana Coaunera ere  
berane,” naauruhane jana,

<sup>41</sup> “Acate Curisitonera,” naacoauruha leochaaurune  
janate, tabaauru jana:

“Inasiin jetao Calillea caje uriha Curisitone coalanaala.

<sup>42</sup> ‘Jerichanejeeinte curuaanaa inoaesi Rabiri rijijieein  
Beleen cocoaichaneein nereein Curisito, curuaanaa inoaesi  
Rabiri ichoalaneein nena,’ naa Cana Coaunera Quiricha  
Inoaesi cuhane natiin, Curisito nere Calillea cocoaicha,”  
naaure.

<sup>43</sup> Niritiinte Jesoso coreniha cuu ita rohecaain ita caje  
nelerucure.

<sup>44</sup> Tabaaurute mucuhin amaain caresero cuhane tenaa  
jerecure niqui, nete ichana nainene chunei.

*Jesoso esenetaaurenihana cocoaianacaihurine*

<sup>45</sup> Nii jaunte, Jesoso colane turuha uuruha nii Teenforo  
beraihurera folisiaacurune jana:

“Chanuna mucuhin uhaeneeiche,” naain bajaauruha cuu  
nena fariseeocuru, batirichuru curuaanaacuru, naonjoai-  
hurine jana:

<sup>46</sup> “Cha corenihana mucuhin uharichaanu joareein  
coreniha. Nihei chunei cacha irihane rijijieein erei,”  
naauruhane janate:

<sup>47</sup> “Inae nachu inara netonai coritaate.

48 Esetaauruha cana curuaanaacuru, fariseecuru, naaonjoainurine coalanaala esenetaaiche.

49 Acaihanejein Cana Coaunera Ere coitucuruhi, Cana Coaunera jaolecuru cachaaurute esenetae,” naauruhane jana:

50-51 “Nainihe ijoaereen nere aonaelanaala, joaereen: ‘Naojoainte ichae,’ naain, caohachaa in coitucuhelanaa, cacha casetecaacachene, niritiin aitoa cana quiricha inoasi cuhanene jaunne,” naa nii janotiin Jesoso rene turuha cunaa fariseeo Necodemone janate:

52 “Ii tonaina Calileea cocoaicha neei. Nihei chunei Calileea caje ecocohin Cana Coaunera ere bera. Cana Coaunera Quiricha cuhane arihute coitucuhi,” naauruha leeochoaauru fariseecuru Necodemo rai janate,

53 nenajau cauha cuure nii cuu nenacaauru.

## 8

### *Ene cojoaelorohe*

1 Nii janate acaauru que janoriin, naain Oliboneein curua-jaain nena atane ucuuno cue Cana Coaunera Calaohi Jesoso.

2 Inae janohane janate naain Jerosaleeun cauha cue, coaiten enacoaauneein cuu nena Teenforo asaa enohane coina.

Nii janate rene turuhajeeuruha arajii cachaaurune jaun, nelauriaain relanajae Jesoso.

3 Nii janate nejelau quicha que nicharatihane jana ene cojoaelorohe eruhin, mucuhin, tajiha turuaa ure, Cana Coaunera aitoonjoa que cacha relaaunera fariseecuru.

4 Nitohaneen turuaainte, nii cuu nenacaauru cataaun tein:

“Naaajoaain nejelau quicha ainane janana, caa ene eruhin mucuhin uhaacaanura cacha relaera.

5 Cana Quiricha Inoasi cuhanete laenaain cana rai rauhin tein letoaelu Moisesa, nitohaniha ene cojoaelorohe ne, sohin jaohacache ajeri que botosiine coina. “Tonaai jana ii,”

6 naain bajaure, nii ene sohin joaeratenaa jerenihane coulurujeeuruhane coina.

Nii janate acaauru tonoraelanaala notoroaain, biji couturi que atane laenaje.

7 Nii janate cuu tonoranajae lanaala atane laenajiha biji couturi quene jana, cuu jeelai coaineeinejeen bajaebajaecuruhana jaun, couturi michuriin:

“Niha cau leinjiin inara jana osa que lanaala, chabana baaso ichae lanaala nena ne, nii ichoachaniha focoine ajeri que,”



<sup>8</sup> naain coaiten notoroaain atane laenaje biji couturi que Jesoso.

<sup>9</sup> Niritoha Jesusone jaunte, aihuru bana acaauru netonai baaso ichacuruhana jaun, acaauru suujua que tacaana jaun, coejeein, biinaa que ichoaichaaain leinjihana leinjihanaain mituhin cauha cuure. Inae satiin mituhin amuuruha nii ene coulurujueurerana jaun, nii eneecha que jerajejeein neeori-hana jaun,

<sup>10</sup> nimichuhin nichauraaain:

“Aancaauruche icholurueraauruta. Ta ishohin ijiaohache chuneine,” naain nii ene caje bajaa Jesusone janate:

<sup>11</sup> “Aiheicheta curuaanaa. Nihei casohin cajaohiche chuneita,” naa nii enene jana:

“Niheichu, canu niha natiin chatohaneein chetein, ishohin ijiaonaa nainihaaunche. Inae caunichuche. Jiaonriha caa baiha coaiten nosateichenera,” naain nii ene jiane Jesoso.

*Cana rai chauratane cononeein niha Jesusone*

<sup>12</sup> Nii baihate coaiten cachaauru rai beebeje Jesoso:

“Canuna caa chauratane que nenacaauru cononeein neeunra. Quere esenetaerate ichaonaa tera cono siricheein. Chabana nocohenaanau amuhemuheriaain,” naa Cana Coaunera Calaohi Jesusone janate:

<sup>13</sup> “Nohaneeicha. Ichaajenihane aitiinte aitohicha. Nii jaun chaque nelatihei nii aitohine jaanta,” naauruha fariseeocurune jana:

<sup>14</sup> “Caraajenihane aitiin aitocooaunne niha natiinte, nelate quere. Canuna nii uhanuluna jaan jelai coitucuun. Jana inara coitucuheehiche. Niheichu canu cunajaanu coitucuheehiche.

<sup>15</sup> Nechu jataain Cana Coaunera coitucueeneichene jaunte, joenreein inara suujua cuaaichene jaun, joenreein ereereequiche. Aanca chunei coulurujuerichaaun canu.

<sup>16</sup> Canu, cacha coulurujianunete, esinae rauhijiriin coulurujuenojoinnei ne, canuhacha jelai caitono nenihana jaun, caletoaera Cana Inaca aina aitocooanna jaun.

<sup>17</sup> Charijieein teeinti ‘Ita rijiitoein ereeuruha coroatajai coaraaurune, esenetaacache nete ne,’ naain aite inara quiricha inoasesi cuhane, nitohaneein ichaquichene coina.

<sup>18</sup> Nirijieinna coaraneein aitoon, nii caletoaera Ofate cajiinichaain coaraneein ne. Nii jaun quesenetaaichenetene,” naa Jesusone jaunte:

<sup>19</sup> “Aanca aihane nii chaca,” naain bajaauruhane jana:

“Cacoitucueeneichene jaun, Ofa coitucuheehiche. Cacoitucuhichene jana nihanete, Ofa netonai coitucuriquiche,”

<sup>20</sup> naain relanajae Jesuso, nii ita taojiaauruhana jaan loreri Teenforo asaae, nii coriqui teeuruha cachaaaurune jaun neein. Niritoha Jesusone jaunte mucuhin enoanaa jerecure. Nete enoaaurene, jaiti nitohaneein teeuruhane jaan cojohinaca que turuenihana jaun.

*“Nii cuhanune jaun cunaa nainiheeiche,” naa Jesusone*

<sup>21</sup> Nii baihate coaiteen aitiin:

“Inae amuhanune baihate cariirijeriquicheein inacojoein. Nete inara osa caaun cauhacha neein oriquicheein, nii cuhanune jaun cunaa naineneeichene jaun,” naa Jesusone jaun:

<sup>22</sup> “Jerihanete raajenhane nesohin nijiaonreein. Nii jaunte nii cunajaun cuenerihacacheeine que aite,” naain ita rai ereereecuruha Jorioocuruna jaun:

<sup>23</sup> “Inarate, caa chauratane que neeiniquiche. Canuna jana, cana choae caje nena neeinneeun.

<sup>24</sup> Nii jaunte oha curiquicheein osa caaun, canuneein nihanune esenetaeneeichene jaun,” naa Cana Coaunera Calaohi Jesusone jana:

<sup>25</sup> “Chaneeina jian,” naain bajaauruha Jorioocurune jana:

“Inae inara rai aitocoacaun turuhanune caje coauneein.

<sup>26</sup> Niha arajiin erenaa inara rai quiicha beenei. Nii caletoerate rauhijiriin esinae aite. Cauricho que aonacaunna jaunna jerichanetojoein beebejeun, caa chauratane que neniquichene rai,” naa Cana Coaunera Calaohi Jesusone

<sup>27</sup> janate coitucusichurene, “Naaonjoain Cana Coaunera quete aitera,” naain coitucuurenihane jaun.

<sup>28</sup> Nitohaneein coitucuurenihana jaunte:

“Inara araaineein nihanu natiinte, enuha que ecuu canu njuateein canu chujuuraa curiquicheein. Nii banate Curisitoneein nihanune coitucuhin, casuujua caje rocohin aitenihanune coitucuha curiquicheein. Acaihanejein carelaa Ofa Cana Coaunera jaan que aitocoaaunne coitucuha curiquicheein.

<sup>29</sup> Chabana jelai caratirihei caletoaera Ofa, niicha jerenohin ichacaaunna jaun,”

<sup>30</sup> naa Cana Coaunera Calaohi Jesusone jaunte esenetaaure arajiin cachaauru.

*Jelai teein Cana Coaunera cacha, jelai teein Moconajaera cacha*

<sup>31</sup> Nii baihate esenetaaurera Jeroocuru rai:

“Rauhijiriin quere tonoraachenete, canu ere tonoraera esinenein neriquicheein.

<sup>32</sup> Nii banate esinae rauhijiriin, Cana Coaunera jerenohi coitucuhin raotojoein jianacoo ichaonaa naineriquicheein,”

naa esenetaerauru rai Cana Coaunera Calaohi Jesusone janate:

33 “Canacaanu foeratera Abaraaun caje coauneein nihein chunei fatoroon canacaanu cailichaera. Inasiinte nii aito-hine tocohaneei enene cuhaneeicha ichoreniha jianacoo mituhin nerichaanu. Nechu jataaina inoaelu caje coauneein raotojoeiin rohecaeraelanaala ichohacaanu,” naauruha nii esenetaaichuru Jorioocurune janate:

34 “Satiin quere tonoraauruhite jataain mululuhin osa tabai aiha ne. Nii chunijiu cuhin nichotenaa nainerihaain.

35 Cana Coaunera Calaohineein nihanune jaunte ne carai rauhi jianacoo nii osa caje inara mitaanune coina.

36 Canu nii caje jianacoo inara mitaanunete esinaae rauhi-jiriin jianacoo mituhin neriquicheein.

37 Abaraaunte chuhisi inara foeratera ne niqui, nete caso-hin cajaanaa jerequiche, quere esentaeneeichene jaun.

38 Carelaa Ofa najaan quena inara rai aitoon. Charijieein teeinti, inara relaa inara inacana jaan ichaquiche, nii rijijieina canu netonai caletooa Ofane jaa ichaun,” naa Jesusone janate:

39 “Abaraaunte canacaanu inacane,” naauruha Jorioocurune janate:

“Esinae rauhijiriin Abaraaun calaohi neeichene jana nihanetera, aichejetohalune rijijieein neriquiche inara netonai.

40 Nete esinaae caletooa Cana Coaunerane que aitocooaunne coreniha casohin cajaanaa jerequiche. Chabana nitohanai que nerurujuanaa jeriheilu Abaraaun.

41 Inarate aiha inara inacane rijijieein neeinche,” naa Cana Coaunera Calaohi Jesusone janate:

“Coatiha unosineein nihaacaanu, Cana Coauneraachate canacaanu inacane,” naauruha Jorioocurune janate:

42 “Cana Coaunera inara inaca niha netera, canu belaichee-iche, Cana Coaunera caje uhin cau turuhin nihanune jaun. Coatiha casuujua caje coauneein cau uhin turuhaaun. Cana Coaunera te caletooe.

43 Quere esenetana jereneeichene jaunte, caa inara rai aitocooaunne aonasineeinche.

44 Moconajaerate inara inaca ne. Nii jaunte, caje nenea neeichene jaun niicha jereeicha ichaquiche. Nii Moconajaerate inoaelu caje coauneein soserejeein ne. Chabana rauhijiriin chaque irihe. Chaque irihanete nohane, nichaon nihana jaun, casaje nujuaneein nihana jaun.

45 Esinae rauhijiriin aitocooaunna jaunte quesenetaenee-iche.

<sup>46</sup> Chariji inara caje osaquiin nihanune coitucue. Chanuna esinae rauhijiriin aitocooun natiin quesenetaeneeiche.

<sup>47</sup> Cana Coaunera cacha nequichenetera, Cana Coaunera ere rautaaain aonaain tonorareeiche. Cana Coaunera cacha neneeichena jaunte, Cana Coaunera ere aohana jereneeiche.

*Abaraaun ajinihate nesihane Curisito*

<sup>48</sup> Esinaete rauhijiriin osaoquicha- Samaria cocoaicha,” naain Cana Coaunera Calaohi Jesuso cotaihuruha Jorioocurune jana:

<sup>49</sup> “Nihei aansijieein nejein osaaohaun. Nechu acaihanejein Ofaacha jerenohin ichaain nihanune corenihate caansaine que ereeiche.

<sup>50</sup> Coatiha, ‘Canuna caohacha cachaneeun,’ naain irihaun. Curuaanaaneeinte caeteen ne Ofa.

<sup>51</sup> Esinaena rauhijiriin aitoon, quere tonoraerate chabana nitajenaachara nejeen nereein,” naa Jesusone janate:

<sup>52</sup> “Esinaete osaoquicha. Inasiinte Abaraaun, satiin Cana Coaunera ere bera inoaesihuru, naajoaihunru inae oosichuruhalu inoaelu natiin, chere tonoraeraacha nitajenaachara nejeen neeurureta.

<sup>53</sup> Abaraaun amurijiriinna nereei iite. Inae ohane jana oha-coaauruhalu Cana Coaunera ere bera inoaesihuru netonai natiin. Chaneeina jana ii nereei,” naauruha Jorioocurune janate:

<sup>54</sup> “ ‘Canuna inara curuaanaa caohati neeun,’ naain irihanune caohacharihei. Nete cague: ‘Caate acaihanejein canu calaohine. Nere tonoraache,’ nae Ofa Cana Coaunera. ‘Cocoaunera,’ naaiche niqui. Nete

<sup>55</sup> coitucuujueneeiche. Canune laaen coitucuun. Inara rijijieein casaje nichaaunnena, ‘Coitucuhaun,’ nareeun. Esinaena rauhijiriin caraajenhane coaracaunna jaun, nere tonoraain caletoana jaan ichaun.

<sup>56</sup> Inara foeratera Abaraaunte, cau chauratane que cotohaneen tururichaaunine coitucue. Nii jaunte inae ena cau turuhanune jaun corojeein rachoojoe,” naa Cana Coaunera Calaohi Jesusone jaunte:

<sup>57</sup> “Inasina saquichoona jaanacaaine coalanaala, canacaanu foeratera Abaraaun coareei,” naauruha Cana Coaunera Calaohi Jesuso rai Jorioocurune jana:

<sup>58</sup> “Aihanu. Esinaena rauhijiriin aitoon. Inae inoaeluna Abaraaun ajiniha nesiha neeun canu,” naa Cana Coaunera Calaohi Jesusone jaun,

<sup>59</sup> ajeri mucuutaure, que botosihuruhane coina. Ajeri mucuutaauruhane janate, jianatoroain acaauru cataan cuhin, Teenforo caje mituhin amue.

## 9

*Maosa rautaa Jesusone*

1 Amuhemujuena jaunte leinjiin cacha maosaneein nejanoanaa coarae Cana Coaunera Calaoihi Jesuso.

2 Coaraane janate:

“Chanuna maosaneein nejanoae caa cacha. Rai fojiaraauru osa caaun nenihane, rai nosa caaunna,” naain Jesuso caje bajaacaanune janate:

3 “Aihei, coatiha nosa caun nihei. Niheichu fojiaraauru osa caaun nihei. Cana Coaunera ichanohi coaraa cachane coinete catohaneein nejanoae.

4 Inae caletoaeraacha icharatei ichacaaunnete ne, nainichaaunne cojoataa. Inae caa baiha nainerihaaunni.

5 Cau chauratane que nihanune quena, chauratane cononeein neeun,”

6 naainte, atane choaae lune churutaain, biji couturi que laculacunejeein, itacariin nii maosa nota rujuaain:

7 “Inae laaenra, taa necaajoanaa najaan Silohe inota culeenihura,” naa Jesusone jaun, cuhin culeecane caje turuhane janate, inae conoe nii maosa nota. (Silohe nanaate, Letono nanaa ne.)

8 Inae nerautaa jana coaraainte: “Caana lauhajelauhajejin coriqui bajanajaoca,” naain ita caje bajaare nii laurijiracuru- nii jauriaa nitohaneein coaraauru.

9 Niritiin ita caje bajaainte:

“Aca chujianrana,” naauruha tabaaaurune janate:

“Aca nihane coalanaala. Tocoханиha chuhisi niqui, nete aca nene,” naaure leeochoauru.

Nii janate raajenihane:

“Acaneeun chujianrana,” naa raajene jaun:

10 “Inasina jana enene conoe inota,” naain bajaauruhane janate:

11 “Nii leinjiin cacha- Jesuso neein curuajaain nenaate, atane choae lune churutaain, biji couturi que laculacunejeein, tucuacaain canota rujuaain: ‘Inae laaenra, necaonjoanaana jaaun Silohe culeenihura,’ naain caletohana jaun: ‘Ai,’ naain culeecaunne janate, inae conoe caa canotara,” naain bihane janate:

12 “Aanca chaen nii cacha,” naain bajaauruhane janate:

“Jm, jm, jm. Aancachainti. Coitucuhaun,” nae nii maosa nerautanaa.

*Nii nerautanaa maosa caje bajaauruha fariseeocurune*

13 Nii janate nii maosa nerautanaa amaaauruha fariseeocuru renene janate:

14-15 “Inasiinte enene conoe inotata,” naain cotaain bajaure fariseeocuru nii cacha caje, nebetacanaa janonaa bana atane choae lune churutaain biji couturi que laculacunejeein tucuacaain nii maosa nota rujuaain, rautaa Jessosone jaun. Bajauruhane janate:

“Itanicha que canota rujuarujuariin culeeratihane jana, culeecaaunne janate inae conoe canotara,” naane janate:

16 “Cana Coaunera caje nenea nihei nitohanai cacha, amihaniha nebetacanaa janonaa banana jaun,” naauruha tabaaaurune janate:

“Inasiinte Cana Coaunera tocohaneein ichaa natiin, osaona nihane nitohanai ichanaa nainerihehi bajiaa,” naauruha nii leeochoauruna jaunte,

17 coaiten enacoauneein:

“Tonaai jana ii, nii ichautaera cacha que,” naain bajaauruhane jana:

“‘Jerihane acate Cana Coaunera Ere berane,’ naanu canu,” naa nii nerautanaa maosane janate,

18 esentaarene. Esenetaaurenihana jaunte, fojiaraauru caje bajaure:

19 “Caana inara calaohineein maosaneein nejanoaa. Inasiina jana enene conoe rai nota,” naain bajaauruhane janate:

20 “Aca chujian, acate canacaanu calaohi maosaneein nejanoanaa ne.

21 Inasiin chaaiti conoe enene rai nota. Niheichu nii rautaera coitucuhaacaanu. Cajejian bajaauche. Inae canaanai nihane coalanaala. Acate naine raaje bihane,”

22 naaure nii fojiaraauru, Jorioocuru curuaanaa coasiha. “Acate Curisitone,” naain iriha chuneine, “Cau sinacoca asaee enohane jererihacacheein,” naauruha nii Jorioocuru curuaanaacurune raotojoein coitucuuruhana jaunte:

23 “Cajejian bajaauche. Inae canaanai nihane coalanaala. Acate naine raaje bihane,” naaure nii fojiaraauru.

24 Nii janate coaiten nii maosa niicha rautain cotijiain:

“Esinaen rauhijiriin beeu, Cana Coaunera notaracaae. Osaotoha nii cachane coitucuhacaanu,” naauruha Jorioocuru curuaanaane janate:

25 “Osaotoha nii cachane coitucuhaaun canu. Acaihanejein maosa nihanune caje, inae enene conoha canota neinchana coitucuujeeun,” naane janate:

26 “Chatohaneente chete nitohaneein conoha inotane coinata,” naain bajaauruha coaitenne janate:

27 “Inaera inara rai aitoonna. Chatonaaina nenacaaen bereeun. Chanuna coaiten enacoauneein inara rai bihanune jerequiche. Jerihane inara netonaite nere tonorana jerequiche,” naane janate:

28 “Iite laaen nii cacha ere tonoraai. Canacaanuna jana, jelai teein Moisesa ere tonoraacaanu.

29 Moisesa aina iriha Cana Coaunera neeichana coitucuhacaanu. Jana nii cacha coitucueraai caoachanainejeein. Chacaje chaainti ecoonane,” naain nii maosa nerautanaa co-taicha rijitucuruhane janate:

30 “Tara canota tihane caje coitucuhichene. Niheichu: ‘Naaajoain cajete uhe,’ naain coitucuheeiche.

31 Cana Coaunera bajaa osaaonaaurune tonoraeniha Cana Coaunerane coitucuhacaanu raotojoeein. Acaihanejein nere tonoraain niicha jerei ichaain nena cacha bajaanete coroatajane Cana Coaunera.

32 Nihei chunei, inoaelu caje coauneein nitohaneein maosaneein nejanoaa leinjiin cachane jana nota cono tera.

33 Cana Coaunera caje unaa nenihane noote catohanai ichare,” naane janate:

34 “Osaaotiin nejanoaaina jaun noote canacaanu relanaa jereeita,” naain nii maosa sitaare ita taojiaauruhana jaan loreri caje.

35 Inae nii maosa sitaauruhane coitucuuiriin, coaraa cuha Jesusone janate que taca uhe. Nii jaunte caje bajae:

“Cana Coaunera Calaohi esenetaaina,” naain bajaane janate:

36 “Eenje. Carai beeuna, rauhijiriin Cana Coaunera Calaohi nihane coitucuhin esenetaera Curuaanaa,” naane jana:

37 “Canuna acaneeun,” naa Cana Coaunera Calaohi Jesusone janate,

38 nacatiha neseonraain:

“Esenetaanura Curuaanaa,” naane janate:

39 “Canuna caa chauratane que turuun, maosacuru niha natiin, conoha rai notane coina. Jana, notaa nocoet-onacaauru maosaneein nihane coina,” naa Jesusone janate,

40 cuu aonajeeuruhana jaun:

“Canacaanu netonainoona maosaneein nihacaanu,” naa tabaauru fariseeocurune janate:

41 “Maosa neeichene, caseteco coariheeicheein osa coreniha niqui. Nete, ‘Itolere canacaanuhacha ichai coaraain coitucuhin ichacaanne jaun maosa nihaacaanu,’ naaichene jaun, caseteco coaraa curiquichein nii coreniha,” nae fariseeocuru rai Cana Coaunera Calaohi Jesuso.

## 10

*“Chariji teinti, acuujuu edaa enoe. Niite asijiauto ne,” naa Jesusone*

<sup>1</sup> Niritohane baihate: “Esinaena rauhijiriin aitoreeunni. Carenero ucuha acuujuu edaa enoite asijiauto ne.

<sup>2</sup> Jana, rauhijiriin nacuujuua cuhane enoite beraicha esine ne.

<sup>3</sup> Acuujuua beraichate, janone acuujuua joracaain, enohin curuaacuru curuaacuru que curuaatein, nii carenerocuru cotihacane tajiha uure, acaauru beraicha nihane ere coitucuruuhana jaun.

<sup>4</sup> Nitohaneein cotihanajaain, inae saain mituuru jana, acaauru ajiniha cuujihane jana, caaijie cuure nii carenerocuru, acaauru beraicha nihane coitucuruuhana jaun.

<sup>5</sup> Jana nejelau cotihanaacanete, que janoriin soroore, nejelau ere nihane coitucuruuhana jaun,”

<sup>6</sup> naain niqui relanajae Cana Coaunera Calaohi Jesoso, coitucuruuhane coina niqui. Nete, “Naaonjoain quete aite,” naain aonaain coitucurene.

### *Cachaauru corenihate oha cureein Jesoso*

<sup>7</sup> Nii jaunte, rauhijiriin aonacuruhane coina:

“Leinjiin canuhachana jianacoo cacha mitaeranu que nena neeun. Cacolane cana Inaca Cana Coaunera rene turunaa nainihe chunei.

<sup>8</sup> Nii jauriaa cajiniha unacaaurute, nechu jataain cacha coritaeraaunu que unacaaurulu ne niqui. Nete, nere tonoraarene cacoitucueranuuru cachaauru.

<sup>9</sup> Leinjiin cacorenihachate naine, cana Inaca Cana Coaunera bijiu tacaain aina neeichene.

<sup>10</sup> Arajiite inara curuaanaaneein nena jere, nechu jataain nohanein inara coritaain. Acaauru esenetaain, acaauru ere tonoraeraaurute caochanainejeein nitajiha cuurureein. Canuna turuun, raotojoein rachoojoein cha latelanaala Cana Coaunera aina neeichene coina.

<sup>11</sup> Canuna esinae rauhijiriin inara curuaanaanu que letononeein neeun. Nii jaunna oha cureeunni satiin canu cachaauru coreniha, nabana necairichaauruhane coataa, satiin quere tonoraain esenetaeraauru, necairichanaa coaraelanaala rauhijiriin Cana Coaunera aina nihane coina.

<sup>12</sup> Nii curuaanaa neein nena jereraaurute, nechu jataain core coinaacha aihuruhana jaun, niha acaauru aina nejeratein acaauru coineterane, cachaauru jaohin ratiriin sorooruhane acaauruhacha mucuhin sooruhane, cajihaaneein ita caje riaaneeure.

<sup>13</sup> Nitohaneeinte rai cachaauru ratiriin soroore, nechu jataain curuaanaa neein nena jerecuruha core coinana jaun, coaraain cuu ninaauruhane coina.

<sup>14-15</sup> Canunajian nenacaen caohacha nejeein curuaanaaneein neeun. Charijieein teeinti cacoitucuhiche nii rijijieina



Ofa coitucuun. Nii rijijieein inachu, canu cachaauru coitucuun. Jerichanejeein techu coitucunajaanune rijijieein ca-coitucure. Canuna canu cachaauru coreniha caraajenhane neteein oha cureeunni.

<sup>16</sup> Nihachu naain nejelau canu cachaauru, cotihanaacaun nete ne, ita aina inara tihanune coina. Cotianaacaun nete, quere tonoraain uurureein. Inae nitohanihanena leinjiin canuhacha inara curuaanaa neein niha cureeunni, nitohanein ita aina inara tihanu ne.

<sup>17</sup> Nere tonoraain caletoaana jaan ichacaaunna jaunte, jataain cacoelai cana Inaca Cana Coaunera. Nii corenihana caraajenhane netiha cureeunni, casohin cajaanoruhane coina, nena ichanaa cureeunni.

<sup>18</sup> Canu jerenihanune, nihei chunei casohin cajaanaa nainerihe. Nena caraajenhane netiha cureeunni, nitohanihanune coina caletoaa Ofa Cana Coaunerana jaun,” nae Cana Coaunera Calaohi Jesoso.

<sup>19</sup> Niritoha Jesusone esenetaeraauru Jorioocurute, nii esenetaauruhichuru caje nejelau neleruhin neeure.

<sup>20</sup> Niichurute:

“Chanuna caa osaaonaa nechua aansai jaeloroheneein nena cacha ere tonoraare,” naaure tabaauru itarai.

<sup>21</sup> Nii jana nii esenetaaurerate laaen:

“Osaocane noote caritiin erere. Chasiina jana osaaocane maosacuru nota cono tere,” naaure ita rai nejesinajein.

### *Cana Coaunera Calaohi Jesoso raureniha Jorioocurune*

<sup>22</sup> Inae elohena nihane janate, Jerosaleeun ita taojiaain nii loreri inoae Teenforo besaute beseta bitoaaure Jorioocuru.

<sup>23</sup> Nii jana nii Teenforo coonri seeonjoan-Salomoon curuaa siriin nena asaa amuhemuheca Cana Coaunera Calaohi Jesusone jana

<sup>24</sup> curuaacotaain, acaauru cataaun teteriin:

“Cha carajana ereree ii coitucuhacaanune coina. Rauhi-jiriincha letonoaneein ereeu, esinaae Curisitoneeine,” naauruha Jorioocurune jana:

<sup>25</sup> “Inae bihanulu. Nii jana quesetaheechelu. Inae caletoaa Ofana jaan ichacaaun inara notaracaae.

<sup>26</sup> Nii coaraquiche niqui. Nete jauriaa aitocooaunne tocohaneein canu cacha neneeichene jaunte, caje nainaan quesetaeneeiche.

<sup>27</sup> Coitucunajaain nihanune rijijieein techu, cacoitucuhin quere tonoraain neeure canu cachaauru.

<sup>28</sup> Canuna acaauru rai nitajenaachara nejeein nena ichaonaa teeun. Chaelai janonaa bananeriaain nitajeauruhane. Niheichu chaalen cacaje rulunajaera.

29 Satiin curuaanaacuru curuaanaa Ofa Cana Coaunera carai tenajaana jaun, nihei chunei cacaje rulunajaera.

30 Canuna, Ofa aina leinjiin Cana Coauneraneein niha-caanu,” naa Jesusona jaunte,

31 ajeri mucuutaare Jorioocuru, que bodoosihuruhane coina.

32 Nii jaunte: “Itolere caohachana ichaaun satiin coara-jeeichene notaracaa, Ofa letononeein. Chatohanei corenihanana nitoaneein ajeri que canu bodoosicheeiche,” naa Cana Coaunera Calaohi Jesusone janate:

33 “Caohacha ichaaine coreniha ajeri que ii bodoosiriahacaanu. Cana Coaunera niha nocoetiin, Cana Coaunera rohecaaina jaunna ichana jerichaanu. Cana Coaunera niheei. Raujiaain cachaneein natiinte Cana Coaunera niha nocoetohi,” naauruhane jana:

34-36 “Inarate casohin cajaanaa jerequiche, ‘Ofa cana Inaca calaohi nichaaun,’ naanune coreniha. Chaaen techu nii coreniha, ‘Ofa cana Inaca Cana Coaunera rohecaa,’ cacoeiche, Cana Coaunera chujian raajenihane, ‘Canu calao-hichuru’ naa inoaelu ichauhenaauru rai, rai quiricha inoaei cuhanena jana, esenetaaichelu satiinina jaun chujian, caa chauratane que caletooa Ofa cana Inaca, niicha jerenohi ichacaanne coina natiin. Inasiina Cana Coaunera roheca-reun, ‘Ofa Cana Inaca calaohi nichaaun,’ naanune coreniha.

37 Ichaa Ofane tocohaneein cha ichaenihanune coa canu esenetaache.

38 Aihane jaun, canu esenetaeneeichene nihanatiin, nii canuhacha ichai coaraain esenetaaichenete caohachae. Nii ainate canu aina niha Ofa Cana Coaunerane jana, canu rai Calaohineein aina nihanune esenetaaichene caohachae,” naa Jesusone jana,

39 coaiteen mucuhin amanaa jerecuruhane jana, acaauru que janoriin amue Jesoso.

40 Acaauru que janoriin amuhinte Jorodaan jerau cauha cue. Nii jauriaa cachaauru coujunacatihalu Joanna jaun turuhin cuu ne.

41 Nii janate rene turuha uure arajiin cachaauru. Cuu turuhin coaraain:

“Esinaete chuhisi rauhijiriin aite Joaan, caa cache que. Niicha ichai ichaain cana notaaca Jesusone rijijieein cana notaacane que airijiinte, esinae rauhijiriin aitohane tocokane,” naainte

42 Jesoso esenetaaure cuu nenacaauru cachaauru.

## 11

<sup>1</sup> Naain Betaniau coroatajai baihuru aina nenea Lasaroneein curuajai jetaote, banejelanaala cunaite.

<sup>2</sup> Marata, Mariha, naa nii baihuru curuaa. Nii Marihate, Cana Coaunera Calaohi Jesoso tija choaae erene jujui jataain coreti chorohin, couturiji que jacoraera ne.

<sup>3</sup> Nii jaunte cunaitiha nii acauru cona Lasarona jaun, “Cunaitiha iicha belaaicha curuaanaa,” naain Jesoso rai berateeure.

<sup>4</sup> Nii jaunte Jesoso rene turuhin beeuruhane jana: “Coatiha nii cuaaetoha nii cunai caaun orihaain. Cana Coaunera coitucuhin, ‘Caohatoha Cana Coaunera Calaohi,’ naain Cana Coaunera Calaohi coitucuruha sathiin cachaaurune coinete cunaite nii cacha,” naainte cuelaanaala cuu coroata janohin ne Cana Coaunera Calaohi Jesoso.

<sup>5</sup> Nii baihuru aina curataain belainaaca natiinte

<sup>6</sup> “Cunaitiha Lasaro,” naain berateeuruhane jana.

<sup>7</sup> coroata janohi cuu nihane baiha:

“Chajaauchete coaiten Jodea cunichaache,” naa Jesoso, aina nerelanaa nichaanune raine janate:

<sup>8</sup> “Jaitinootera carajaje, ishohin iijaonaa jerecuruha Joriocuru, ajeri que ii bodoosiine. Nii atiin inachura coaiten ucuaae cunaa jereeite cacha relaera,” naacaanune janate:

<sup>9-10</sup> “Tana, cojoanonaateein caletooa Ofa Cana Coaunerana jaan ichacaaunne nihane coitucuhichene. Ichaenihanune, canuhachana baasoneein nedareeunni,” nae Jesoso.

<sup>11</sup> Nii baihate: “Siniha cana belaaicha Lasaro, nocoa inae nocoa curichaaun,” naa Jesusone jana:

<sup>12</sup> “Aihana jaunte chujian, sinihana jaun nerautareein,” naacaanu.

<sup>13</sup> Esinae sininaa que jecha aite naacaanuna jaunte,

<sup>14</sup> rauhijiriin: “Inae oha Lasaro.

<sup>15</sup> Caoacha quete cuu nenihanune jana ai. Inae laaen jataain quesenetaa curiquicheein,” naa Jesusone jana:

<sup>16</sup> “Chajaauchete cana netonai aina cunichaache, aina jiniiquiin ohacachene coina,” nae nii Tomasi canacaanu rai. (Nii Tomasite curuaateeure Fafione neei, fafione nihana jaun.)

*Onaa ichateein, rai ichaonaa tera niha Cana Coaunera Calaohi Jesusone*

<sup>17</sup> Nii janate Betaniau turuha Jesusone jana, inae jena janoha atane neruujuene beeure.

<sup>18</sup> Saaneein itaraeniha Jerosaleen caje nii Betaniane jaunte,

<sup>19</sup> tajiha caje turuhacoaaure Jorioocuru, nii onaa cacha baihuru Marata, Mariha, naaonjoain suujua nunaauruhane coina.

<sup>20</sup> Nii janate turuelalajein tajiha uujiha Jesusone coitucuriin que taca uhe Marata. Jana, Marihate, loreri asaae nedae.

21 Nitohanein cuhin Jesoso que tacaain: “Cau neeichene jana nihane, oriheiche canejerata curaanaa.

22 Nete, chaelai bajaachene ichei tiha cureeinche Cana Coaunera,” naa Maratane jana:

23 “Ichanaainte coaiten nichaurareeinche,” naa Marata rai Jesusone jana:

24 “Eenjeen airichainche chuhisi. Inae besautiha cana janonaane banate, coaiten ichanaain ichaoha cuurureeinche oonacaauru niquicha,” naa Maratane jana:

25 “Canuna onaa ichateein, rai ichaonaa nitajenaa charanejeein nenaana jaan teraneeunche. Quesenetaerate, ohane niha natiin ichaoha cureeinche.

26 Satiin jaiti ichaohin nenacaauru quesenetaanete, ohane niha natiin, chabana nitajenereeinche. Caa caitoonjoan esenetaaichena,” naa Jesusone jana:

27 “Eenjeen, iite Curisito neein- Cana Coaunera Calao-hineeinchene esenetaanuchera. Iite caa chauratane que turuha uha niicha jerecuri canacaanuhacha cohajei in-einchera,” nae Marata.

*Lasaro atanebana choae chanaa Jesusone*

28 Niritohane baihate, nocoasai Mariha cotihaca cue Marata. Rene turuhinte: “Taute turue cacha relaera. Ichotijiaeratiha jaunna ii cotihaca uun,” naa Maratane jana,

29 luhecotariin nimihuritiin Jesoso coaraa uhe Mariha.

30 Nii janate nii ratiriha Maratana jaaun jelaiha ne Jesoso, jaiti nii neseu turuelanaala.

31 Luhecotariin nimihuritiin uha Marihana jaunte caaijie uure nii loreri asaae aina neein suujua nunaa nenacaauru Jorioocuru, “Naain atanebana choae jecha inaderaa cue,” naain niqui caaijie cuure nii Jorioocuru.

32 Nii janate Jesoso rene turuhin nacatiha neseonraain:

“Cau neeichene jana nihane, oriheiche canejerata Curuaanaa,” naain

33 chanaa Marihane jana, aina chanaauruha Jorioocuruna jaun, jataain inaderaain:

34 “Chu atane rucuhecure,” naain bajaa Jesusone jana:

“Nota taute atane rucuhecurera Curuaanaa. Chajaautejian coanicha,” naauruhane jana

35 chanae Jesoso.

36 Nii jaunte: “Jataainte coinaderae,” naaure Jorioocuru tabaauru.

37 Nii jana leochaaurute jana: “Tajian caa cacha, maosa nota cono tihalune. Tajian jana naineriha chaelai ichaa oheniha Lasarone coinane,” naaure nii leochaauru Jorioocuru.

*Oo caje ichanaa Lasarone*

38 Nii jaunte atane bana rohan turuhin, coaiten inaderae Jesoso. Ajeri jachu cuhane ita rucuhecuruha Jorioocuru, jelai ajeri que fuhina jaun:

39 “Joracaauche,” naa Jesusone janate:

“Inae jerihane niriniche cache natiinta. Inae jena janohache aiha cachane natiinta Curaanaa,” naa nii nijiaonaa cache bai Maratane jana:

40 “Inaera ichei, ‘Esenetaaichenete Cana Coaunera ichanohin caohati coariquicheeincha,’ naain ichei aitoonchena,” naa Cana Coaunera Calaohi Jesusone jana

41-42 joracaauruhane jana, dede coarajejin:

“Nariha Ofa, ii bajaanune satiin quicha bajanojoin tenajaoqui bajaanune naineeine coreniha. Nii jaunna ichei aitoon, aonacuruha nuricho que cau nenacaauru cachaaunune coina, aonaain esinae rauhijiriin ii caletohaine esenetaauruhane coinara Ofa,” naane

43 baihate:

“Lasaro, mituu nii lai caje,” naa Cana Coaunera Calaohi Jesoso tonijiane jana,

44 tajiha conaara tijaneein mituha uhanne jana: “Batuhichuchete jianacoon mituhine,” nae Cana Coaunera Calaohi Jesoso.

45 Nii ainate Cana Coaunera Calaohi Jesoso esenetaaure le lauriin Jorioocuru, nii Mariha corianiha cunacaauru.

*Jesoso mucuuruhane rai neeuruha fariseeocurune  
(Mt 26.1-5; Mr 14.1-2; Lc 22.1-2)*

46 Nii jana, acaauru tabaauru jetaote turuhin biha cuure fariseeocuru rai.

47 Nii jaun jetaote itataojiaaure fariseeocuru, batirichuru curuaanaacuru, saain cocoainanacaihuri nii que ita rai ereereecuruhane coina. Nii jaun jetaote ita rai:

“Inae itolere ichaa nii cache. Inasirihacacheta. Maosacuru rautaain, onaa ichatein, lenone faain, itolere ichaa inae.

48 Naajejin inaheneeicha coarajihacachenete, esenetaa-coaauruha satiin cachaaunune, cana cairichaaunureein Romanocuru rai cocoainanacaihuri. Cana raite caa ita taojianaana jaan loreri Teenforo chamuhitiin cana cairichaaunure,” naaure jetao Jorioocuru curuaanaacuru.

49 Nii jana jetaote, cuune leinjiin Caifasineein curuajaain batirichuru curuaanaa. Nii jetaote:

“Joaereeinte ereereequiche.

50 Nita coitucuhichene, cana caohachanu que tejian oha cureein nii leinjiin cache, nabana necairichanaa coara-cache satiin Israeli cocoaicha nichaachene coataa,” nae jetao acaauru rai nii Caifasi.

<sup>51</sup> (Coatiha suujua caje coauneein rocohin aitohi nii Caifasi. Nii ajaana cuhane batirichuru curuaanaa neein ni-hana jaunte coroatajane Cana Coaunera, nabana necairichaa Jorioocurune coataa oha curichaain Cana Coaunera Calaohi Jesusone que aitohane coina.

<sup>52</sup> Coatiha Jorioocuruhacha coreniha oha curihaain niqui. Satiin chauratane sacutaain riaanein nenacaauru Cana Coaunera calaohichuru jitariin taojiaane coinante aicheein.)

<sup>53</sup> Nitohanein oo caje Lasaro ichatihane caje coauneente, Cana Coaunera Calaohi Jesuso que necosuujuaaure Jorioocuru rai cocoainanacaihuri, sohin jaaoruhane coina.

<sup>54</sup> Nii jaunte Jorioocuru rai cocoainanacaihuri rai eco-coelanaala nii Jodea batane caje mituhin naain Efaraaiun cue Jesuso. Cacha areroo rohan nena neseu Efaraaiun cuhin cuu ne, canacaanu aina.

<sup>55</sup> Fasocoa cataihajeein, neseeu neseeu caje naain Jerosaleeun cuhajeure, acauru necoaauna rijijieein nanaatajaain, necaonjoaain jatoroaain Fasocoa beseta bitohauruhane coina.

<sup>56</sup> Nii Jerosaleeun turuhinte cuu cajianein Jesuso ariirijieure. Cuu nena ita taojiahuruna jaan Teenforo asaie ita taojiaain:

“Beseta bitohanacha urichai,” naain itacaje bajaare,

<sup>57</sup> “Chunocoha, ‘Cuute ne,’ naain coitucuhane, beinete mu-cuhin raeratihacaanu,” naauruha fariseeocuru, batirichuru curuanaacuru, naaonjoainurine jaun.

## 12

### *Jataain Jesuso belaiha Marihane*

<sup>1</sup> Saota janonejeein lanajeeca Fasocoa janonaane janate, nii oo caje niicha ichatei Lasaro coaraa cue Jesuso naain Betaniau.

<sup>2</sup> Nii janate cuu beseta bana rijijieein Jesuso coroaateure, raaoti lenone que. Lasaro bai Maratate, acauru rai lenone lauriae.

<sup>3</sup> Nii jana litoro cataaun uujoaain erene jujui coreti uhaain, que Cana Coaunera Calaohi Jesuso tijia rujuaain, couturiji que jacoraa Marihane jana, juujijiaain bijiihaque nii loreri asajai.

<sup>4-5</sup> Nii jaunte: “Chanuna nichata fashai janonei amiha-nena core tochaneein necoretelanaala aihure, cairichai-huri coroatajanenarichaae,” nae nii canacaanu lechoonca coroataja Simoon calaohi Jodasi Isacariote, nii Jesuso coulu-rujueranu.

<sup>6</sup> Coatiha esinaae rauhijiriin cairichaihuri coroatajanena jerihane caaun aitohi. Asijiautonihana jaunte aite, nechu

jataain aca nii coriqui raane jerena caaun. Aca canacaanu coriqui beraichaneein nihana jaun raotojoein basijiauhane coinete aite.

<sup>7</sup> Niritoha Jodasine janate: “Coa roheca. Cajabereeo rucuhacuruha najaannu que niicha rucujuei nihana jaunte ichae.

<sup>8</sup> Cairichaihuri coroatajanena jereeinete, nereein inoaenlu netojoein arajiin cairichaihuri. Coatiha inoaelu netojoein cau nerinaaunni inara aina,” nae Jesoso.

*Lasaro sohin jaonaa jerecuruha Jorioocurune*

<sup>9</sup> Nii baihate, Betaniau niha Jesusone coitucuuriin coaraa cuure Jorioocuru. Coatiha acaacha coaraa aihuruhi. Lasaronii oo caje niicha ichatei coaracuruhane coinane maajeente aihure.

<sup>10</sup> Nii jaunte ita suujua rijitjoein, ita suujuau tacaain, “Chatohaneeinte acaentonai sohin jaonaaneeineta,” naain

<sup>11</sup> nii Lasaro netonai que necosuujuaaure batirichuru curuaanaacuru. Ohane jana ichatiha Jesusone coaraain esentaauruha le lauriin Jorioocuru, acaauru jianeeinna jaun.

*Jerosaleeun turuha Jesusone*

*(Mt 21.1-11; Mr 11.1-11; Lc 19.28-40)*

<sup>12</sup> Nii janate Jerosaleeun cuhacoaaure arajiin cachaauru, Fasocoa beseta bitoaa.

Nii cojoanoote turuha urichaaain Jesusone coitucuure.

<sup>13</sup> Nitohaneein coitucuhinte, elele alo saaujiin amaaain que taca cuure. Que tacaain: “Caohacha quete uhichacanacaanu coroatajaneraunu que Cana Coaunera letono. Cachuura,” naain, “Caa Cana Coaunera letono belaihuruhine itolere cachaauru. Caa Isaraeli Curuaanaa *Rey* belaihuruhinera,” naain, ehequiin corojeein Jesoso raaure.

<sup>14</sup> Nii janate cabario tocohaneein nenea boro ichoaae iniin laulauquiin turuha uhe Jesoso, aitoa Cana Coaunera Quiricha Inoaesi cuhanene tocohaneein:

<sup>15</sup> “Coa coasichachera  
Jerosaleen cocoaichacuru.

Coaracuche, boro choaete

laulauquiin turuha ureein

inara Curuaanaa *Rey*cha,”

naa Cana Coaunera Quiricha Inoaesi cuhanene tocohaneeinte turuha uhe Jesoso.

<sup>16</sup> Nii janana caoachanae netojoein aonajihacaanu aina nerelanaa nichaanune. Nii baiha inae dedeeu cuha Jesusone janate, canacaanu suujuau neeorite, niriitiin aitoa Cana Coaunera Quiricha Inoaesi cuhanene tocohaneein aihane coaracaanune jaun.

17 Oo jana nii Lasaro ichatiha Jesusone coaraauru cachaaurute nii leochaauru rai beeuruhana jaun,

18 nitohaneein onaa ichatihane coitucuuruhana jaun, Jerosaleeun turuha Jesusone jana, que taca cuure.

19 Nii janana coarajenajaain: “Inae coaraquiche. Inae chachana nainihaacacheta. Coaracuchera. Saainte aina cuurera,” naain ita rai ereerejeeure fariseeocuru nejesinajeein.

### *Jesoso arihuruha Curiecocurune*

20 Naain Jerosaleeun cuhin Fasocoa beseta bitoha cunacaauru aina cunacaauru

21 Curiecocuru tabaaurute Jesoso aina nerelanaa Ferifi rene turuhin: “Jesoso coana jerichaanura curaanaa,” naaure. (Nii Ferifite Calileea batane que nenea Betesaaida cocoaichane.)

22 Nii janate Aanderesi rai bihana jaun, jiniiquiin cuhin Jesoso rai biha cuure. Jesoso rai beeuruhane janate:

23 “Inae laen ecu tiha ohanune cojoinaca. Canuna inaraacha cohajei cachaneein neeun. Ohanune baihate satiin curuaanaacuru curuaanaa niha caenoaa cureein Ofa Cana Coaunera,” nae Jesoso.

24 Niritiinte, “Esinaena rauhijiriin aitoon. Charijieein teinti lecuhejeein temueraeniha arosone, omaroelanaala jerichanejeein ne. Jana atane choaae naluhane, omarohin arajiin inacaain nefae.

25 Nii rijijieein techu ne cacha netonai. Niicha jereeicha ichaa cachanete, temueraeniha ne, aiha arosone rijijieein jerichanejeein ne. Nirijieeinte, nechu jataain joareein niha cureein. Jana cha que casilanaala Cana Coaunera jerenohi ichaa cachanete, Cana Coaunera biji u taca cureein. Jana, ainihanete nitajiha cureeincha.

26 Quere tonorana jerera, quere tonoraaine. Nii quere tonoraerate, nii cuhanune jaun niha cureein caniha. Chaen techu, quere tonoraera, Ofa rai coroaenacai ichareein,” nae Jesoso.

### *Orichaaine biha Cana Coaunera Calaohi Jesusone*

27 Nii baihate: “Nererojoecaa jataain casuujua. Chatohanerihanu coetaata. Nihei, ‘Cacorataaneu Ofa, casohin canu ateinaauruhane coataa,’ naain erenaa nainihaun, nii coina cau turuhanune jaun,” naane baihate,

28 “Ofa, coaiten iicha ichana jerei ichaain caa cachaauru notaacu, aihute coaraain, ‘Caohatoha Cana Coaunerara,’ naaurumiin satiin cachaauru coaraaincha,” naain Cana Inaca Cana Coaunera bajaa Jesusone janate dedeeu tonii:

“Inae ichacaaun cacoitucuuruhane coina. Inae coaiten icharichaaunni coaraain canu nichaaunne coitucuuruhane coina,” naain toni dedeeu.



29 Naa dedeeu toniine jana:

“Arara jecha,” naaure nii cuu neein aonajeeurera cachaauru. Nii jana tabaauru: “Cana Coaunera letonote aite,” naauruhane jana:

30 “Coatiha canu rai aitohi. Aonaquichene cointate inara rai aite.

31 Inae chauratane curuaanaa Moconajaera aina jaole-  
neein neeururichaain inae Cana Coaunera coitucuuruhi.

32 Inae ecuun coroso que nihanunena, satiin quesenetaa-  
urera raa cureeunnicha,” nae Cana Coaunera Calaohi Jesoso.

33 Niritohane ainate, “Naaonjoaainte oha cureeincha,”  
naain coitucuure satiin cachaauru.

Niritoha Jesosone jaunte:

34 “ ‘Onaachara nejeeinte nirijieein niha cureein Curisi-  
tora,’ naa canacaanu quiricha inoasi cuhane natiin, cha-  
tohaneeina coroso que ecuun nere nii cachaneein ne-  
janohanaa. Charijina nii cachaneein nejanohanaa ne,” naa-  
ruha Cana Coaunera Calaohi Jesoso rai jana:

35 “Canuna cache cononeein neeun. Basijiin reintiarinne  
inara aina neeorihun. Quesenetaauche, inae inara ratiriha-  
nune, nocohenaanau nitajeeichene coataa.

36 Cau jaiti nihanune chojataa quesenetaauche, canu  
cachaneein neeichene coina,” naane baiha jianatoroain  
acaauru caje naasi Cana Coaunera Calaohi Jesoso.

### *Jesoso esenetaaureniha Jorioocurune*

37 Itolere maosa rautaaain, onaa ichateein, lenone faain,  
naojoaan acaauru notaracae Jesoso natiinte, esenetaaurene  
Jorioocuru.

38 Inae niritiin laenaain bialu inoaelu Cana Coaunera Ere  
bera inoasi Isaihasi najaunte, nii laconaa nainene:

“Cha canacaanuhacha  
beebejei esenetaete  
curuaanaa,”

naainte:

“Chariji jana iicha ichai  
coaraain esenetaete  
curuaanaa”  
naain laenaclu Isaihasi.

39 Nii jaunte esenetana jerecurenihaluna jaun coaiten lae-  
naain:

40 “Jauriaa esenetana  
jerecurenihana jaun,  
inae acaauru suujua anioaan  
Cana Coaunerana jaunte,  
turuha Cana Coaunera Calaochine jana  
coitucuurene,  
nota que coaraain

nesoone caaun  
 enaraa coitucuuruhane coataa.  
 Nitohaneeinte  
 tenajae Cana Coaunera,”  
 naainte

<sup>41</sup> laenaclu Isaihasi inoaclu, cajiha cana rai chauratane que turuha uha Jesusone ajiniha. Ichoaichanihate nii coaraain caritiin laenaclu Isaihasi inoaclu.

<sup>42</sup> Nii natiinte saain esenetaurenihane caniha, esenetaaure araijiriin. Cocoinanacaihuru tabaauru niha natiinte esenetaaure niqui. Nete chunei rai beeurene, nii ita taojiauruha najaan loreri sinacoca caje sitanajaa fariseeocurune coataa.

<sup>43</sup> Acaauru belaiha Cana Coauneraane rautaauruhane amuritoheriin acaauru belaiuruha acaauru araichurune jerecuruhana jaun.

### *Nereecha que cachaauru coulurujija Jesusone*

<sup>44</sup> Nii jaunte tonijiaain: “Quesenetaera, coatiha canuhacha esenetarinaain. Nii caletoaera Ofa niha natiinte esenetareein quesenetaera.

<sup>45</sup> Cacoharaerate nii caletoaera netonai coarae.

<sup>46</sup> Canuna caa chauratane cono neeun. Canuna caa chauratane que turuun, nabana nocohenaana niha quesenetaerane cofaa.

<sup>47</sup> Quere tonoraeniha chuneine coatiha canu coulurujuerinauni. Coatiha caa chauratane que nenacaauru coulurujeranu que uhaun. Jianacoon niha caa chauratane que nenacaauru cachaaurune coinana turuun.

<sup>48</sup> Chariji teinti, ‘Caohachaaaita,’ naain quere tonoraene. Niite coulurujija cureein caa quicha beebejei Erenaa, inae saa cana janonaane bana,

<sup>49</sup> casuujua caje rocohin aitenihanune jaun. Caletoaera Ofa aitoonjoaacha quena caa aitiin inara relaaun.

<sup>50</sup> Ofate caletoaere nitajenaachara nejeein niha canu ere esenetaain tonoraerane coina. Nii jaunna caletohane rijijieein, caa aitoon,” nae Jesuso.

## 13

### *Aina nerelanaacaauru tijia culeeca Jesusone*

<sup>1</sup> Le janojoeein lanajeeca Fasocaa besetane janate, inae Cana Inaca rene cauha cuhane catainaaecane coitucue Cana Coaunera Calaoihi Jesuso. Itolere janonaa bana chauratane que nenacaauru cachaauru belaiha coichana aina cutaainna jaunte, esinae rauhijiriin belainaacane coitucuuruhane coina raajenihane netiha cureein.

<sup>2-4</sup> Nii jaunte aina nerelanaa nichaanune aina lenone Jesuso. Nii janate cuune canacaanu aina Simoon calaoihi Jodasi Isacariote, suujua saruha Moconajaerana jaun Cana

Coaunera Calaohi Jesoso coulurujueranu. Nii jana satiin curuaanaa neein tiha Cana Inaca Cana Coaunerane baiha, Cana Coaunera caje uhane coitucuhin, inae jelaiha cauha cuhane coitucue Cana Coaunera Calaohi Jesoso. Nii janane jaiti nitohaneein nerichaaaine coitucuelanaala lenonejihacaanune jana, lenoneo jiaaeriin, nobiri rocoriin, jaleri que faino balutaain,

<sup>5</sup> baandeja cuhane acau chotaain, canacaanu tijia culejeein, nii rai faino que canacaanu tijia jacorae Cana Coaunera Calaohi Jesoso.

<sup>6</sup> Nii baihate Simoon Fedoro tijia culeena jeriha Jesusone jana:

“Iina catiha culeena jereeite curaanaa,” naa Fedorone jana:

<sup>7</sup> “‘Naaonjoain cointate caa ichae,’ naain coitucuheei. Nii baihate coitucuriquiin,” naa Jesusone janate:

<sup>8</sup> “Chaaelai janonaa bana nihei catiha culeequine jerichaaunne,” naa Fedorone jana:

“Ii tijia culejenihanune, canu aina nenea naineriheini,” naa Jesusone jana:

<sup>9</sup> “Aihana jaun, coa catihacha culeeca, cacoi, cacoturi naaonjoaine maajeein culeecura Curuaanaa,” naa Simoon Fedorone jana:

<sup>10</sup> “Enanejeein necaojoanaa, jitariin jaberocone maajeein culeera latihee. Leinjiin rai tijia culeeraachate late, enanejeein necaojoane baiha niha natiin necalanoaaeca rai tijia najaun. Saaante niqiu culeenohineein neeiche. Nete ne inara jana leinjiin jaiti

<sup>11</sup> culeenoinelanaala,” nae Jesoso, Jodasi Isacariote que, coulurujuerichaaain Jodasi Isacariotene coitucuha najaun.

<sup>12</sup> Acaauru tijia culeecane baihate, nobiri curujuaain, coaiten mesa choae nelauriaain: “‘Naaonjoaane jaunte caa cana tijia culeje,’ naain coitucuche.

<sup>13</sup> Rauhijiriinte caque, ‘cacha relaera,’ naaiche. Chaen techu, ‘Curuaanaa,’ naaiche, rauhijiriin aca nichaaunna jaun.

<sup>14</sup> Canu, inara relaeraneein, inara curuaanaa neein nihanu natiina, inara tijia culejeeun. Nirijieein inara suujua coaraain ita tijia culeequichenete caohachae.

<sup>15</sup> Charijieein teeinti aihun, nirijiein chabana necoasitaelanaala, raotojoein ita belaaain neeuche.

<sup>16</sup> Inara curuaanaa neein, inara relaera neein nihanu natiin, inara tijia culejeein nihanune jaun, jerichanejeein carijijieein satiin cachaauru belaaain, inara suujua caje coauneein niha natiin, chaelai ichacuche, ‘Naaonjoaain nihanune jaun, naaonjoain ichana nainihaaun,’ nanaa coacuelanaala ichacuche.

17 Inara suujua coaraain, ita coroataja neein, ita be-laain, caa caitono aonaain tonoraaichenete, raotojoein ner-iquicheein.

18 Nete, caohachanainejeein satiin ena neeichene rijijieein nenereeeicheein. Janijiina satiin inara raain neeunlu niqui. Nete, 'Caniha nejeratereein leinjiin caniha lenonei,' naalu Cana Quiricha Inoaesi cuhanene rijijieeinte, caniha nejer-aterreein leinjiin.

19 Jaiti aihei niqui, nena letonoha inara rai beeun, inae caque nejeratihane, Cana Coaunera Calaohi Curisito nichaaunne coitucuhichene coina.

20 Esinaena rauhijiriin aitoreeunni. Chunocoha quiicha letoai raanete, jerichanejeein canu raane rijijieein rareein. Nii canu raane rijijieein techu, caletoaera Ofa Cana Coaunera rareein," nae Cana Coaunera Calaohi Jesoso.

*Coulurujiha Jodasine biha Jesusone*

*(Mt 26.20-25; Mr 14.17-21; Lc 22.21-23)*

21 Nii janate: "Esinaena rauhijiriin aitoreeunni. Leinjiin inara caje cachate cacoluruheca cureein," naain be Cana Coaunera Calaohi Jesoso. Niritiinte jataain inaderae Jesoso, coulurujuerichaain niicha belaauna jaun.

22 Nii janana, itaacha cajanacajanaain itaacha coaracaanu aina nerelanaa nichaanune, "Caa quete aite," naain nii naitoonjoa coitucueniha caanune jaun.

23 Nii jana Jesoso roan neein lenonejianune jana,

24 canu cojoeluhin: "Chana icholuruherete, curuaanaa" naain caque bajaeratiha Simoon Fedorona jaun,

25 Jesoso roan naurutaain nuricho nainejeein metoroaain: "Charijina icholuruherete, curuaanaa," naain bajaanune janate:

26 "Saan. Coarajeeujia. Obene que faan setejiariin tihanune jana raerate, aca nereein," naain obene que faan setejiariin, Simoon calaohi Jodasi Isacariote rai te Jesoso.

27 Obene que setejianohin faan raain quiha Jodasine rijieonritiinte, Jodasi suujua sarue Moconajaera, Cana Coaunera Calaohi Jesoso coulurujiiane coina.

Nii jaunte: "Letonoaneein, ena nii iicha ichana jerei ichaau," nae Jesoso, Jodasi rai.

28 Nii janana, "Naaonjoain ichaane cointate aite," naain coitucuenihacaanu.

29 Nii jaunna, "Aca canacaanu coriqui beraicha nihana jaun jecha beseta rai chaelai inejei coretihane coina aite," naacaanu. "Ainihane, cairichaihuru rai chaelai inejei core-teein tihane coina jecha aite," naacaanu coitucuenihacaanune jaun. Nii janate aine.

<sup>30</sup> Nii setejiariin Jesosohacha tei faan quihane baihate mituha cue, inae nocohecane jana Jodasi.

*Namu biha Jesusone*

<sup>31</sup> Inae mituha cuha Jodasine janate:

“Inae laaen caohatiin, rauhijiriin inaraacha cohajei Cacha Calaohi nichaaunne coitucuriquicheein, chaen techu canu aina cuaain, ‘Naaonjoaan Cana Coaunera’ naain Ofa coitucuriquicheein.

<sup>32</sup> Charijieein teeinti, aca neein niha Ofane coitucuerateun inara que. Nii rijijieein techu, inara que canu neein nihanune coitucueratereein inae ena sorotiin Ofa Cana Coaunera.

<sup>33</sup> Inae carajaain inara aina nerihaaunni canaanaihuru. Canu aririquicheein niqiu. Nete, aitocooaun Jorioocuru raine rijijieein, canu cunajaan cunaa naineneriquicheein.

<sup>34</sup> Inae ena nenea caa erenaa bihanu inara rai, cacoichana aina cutaain inara belaihanune rijijieein jiniiquiin ita belaiin neeichene coina.

<sup>35</sup> Satiin chauratane que nenacaurute, quiicha relaaurineeichene coitucuha cuurureein, jiniiquiin ita belaaichene coaracuruhane,” nae Cana Coaunera Calaohi Jesoso.

*Jesoso coitucuha nocoeniha Fedorone*

(Mt 26.31-35; Mr 14.27-31; Lc 22.31-34)

<sup>36</sup> Niritoha Cana Coaunera Calaohi Jesusone jaun:

“Chuna cureeite Curuaanaa,” naa Simoon Fedorone janate:

“Cuhanune jaun jaiti casaauna nainihe. Nii baihate casaaureeini,” naa Jesusone jana:

<sup>37</sup> “Chanuna ii sacunaa nainenereunte curuaanaa. Nainichaaun ichoreniha ohanune,” naa Fedorone jana:

<sup>38</sup> “Esinae chachu naineei cacoreniha ohine. Esinaena rauhijiriin ichei aitoreeunni. Iriha ataoharine ajinihate, nichata saain, ‘Jesoso cacha nihaunta,’ naa curiiquiin,” nae Jesoso, Fedoro rai.

## 14

*Cana Inaca rene turunaa najaan neein niha Jesusone*

<sup>1</sup> “Coo nererojoecaache. Cana Coaunera esenetaaichene rijijieein quesenetaauche.

<sup>2</sup> Lanaai Ofa loreri asaae turunaa najaan cuu turuhin raotojoeein neeichene jaanu. Nenihaane jananihane coat- iha berihaun. Aihana jaunna, inara turunajaanu rucuhca cureeunni letonoa inara ajiniha.

<sup>3</sup> Inara nenajaanu rucuhca cuhanune baihana coaiten ureeunni, inara raa tajiha caniha neeichene coina.

<sup>4</sup> Inarate nii curichaunnine jaan coitucuhiche. Nii jaunte nii cuhanune jaun turuha cunaa nainiquiche tonajelanaala,” naa Cana Coaunera Calaohi Jesusone jaunte:

<sup>5</sup> “Nii kuhina jaan coitucuhaacaanuta Curuaanaa. Inasiina coitucuhin urichaanuta,” naa Tomasine jana:

<sup>6</sup> “Quere esenetaain tonoraaichenete, Cana Inaca rene turuhin aina ichaoriquicheein. Nete laaen cacolane turuenererein chunei, rauhijiriin ichaonaa rauhi tera nihanuna jaun.

<sup>7</sup> Rauhijiriin cacoitucuhichenete, Ofa Cana Coaunera coitucuhiche. Inae laaen enene caje coauneein Ofa coitucuhiche, inae cacoharaichene jaun,” naa Cana Coaunera Calaohi Jesusone jana:

<sup>8</sup> “Cana Inaca Cana Coaunera coarateeujan canacaanu quena, nii aina raotojoein nihacaanune coinara Curuaanaa,” naa Ferifine janate:

<sup>9</sup> “Inae carajaain inara aina nihanu. Ta jaiti cacoitucuhichenete, Ferifi. Cacoharaerate Cana Inaca coarae. Aihana jaun, chanuna Cana Inaca Cana Coaunera coaratihanu inara quene jerequiche. Tajian, ‘Cacoharaerate Cana Inaca Cana Coaunera coarae,’ naanune aonaquichene.

<sup>10</sup> Ta Ofa suujua que suujuaquuin nihanune coitucuhichene. Coatiha casuujua caje rocohin quiicha jerei que irihaaun. Acaihanejeein Ofaacha jerenohichana ichaaun, Ofa suujue que suujuequuin nihanune jaun.

<sup>11</sup> Aihana jaaun Ofa suujue que suujuequuin nihanune esenetaeneechene nihanatiin, itolere ichacaunne coaraquiche inara nota que najaun esenetaaichenete ne.

<sup>12</sup> Esinae rauhijiriine aitoreeunni. Quesenetaerate quiicha ichai ichareein camuritoheriin niha natiin, Ofa rene tacaain aina nerichaunina jaun.

<sup>13</sup> Cuu nihanune jana, cacurajateein chaelai inaraacha latei bajaachenena, tiha cureeunni. Nitohaneeina Cana Inaca Cana Coaunera ichanohin coaratiha cureeunni, Cana Inaca Cana Coaunera coitucuhin coroaquichene coina.

<sup>14</sup> Nii jaunna, chaelai bajaachene tereeunni.

<sup>15</sup> Rauhijiriin esinae cacoelaichene, quere tonoraauche.

<sup>16</sup> Nitohaneein neeichenena, Cana Inaca bajareeunni, inara Coroatajanera letoaane coina. Inoaelu netiin chabana satonoe lanaalate inara aina niha cureein inara Coroatajanera.

<sup>17</sup> Acate, esinae Cana Coaunera Suujue nereein. Nii Cana Coaunera Suujue coitucunaa nainecuruhi cacoitucuruhi. Inarate laaen, raotojoein coitucuhiche inara aina nihana jaun. Inoaelu netiinte, chabana satonoe lanaala inara aina niha cureein.

18 Coatiha inara jaohin, inara ratiriha cainerinaain. Turuhana ureeunni, coaiten inara aina nihanune coina.

19 Inae cacoharaaururinaain quesenetaaichuru. Inaraachate laaen cacoharaa curiquicheein, inae coaiten turuhanune. Ohanune caje ichanarihanuhina jaunte, jerichanejeein nitajenaachara nejeein niha curiquicheein, ichaohin nihanune rijijieein.

20 Inae inara suujua cuhane enoha Cana Coaunera Suu-juenete, Cana Inaca aina nihanune coitucuhin, canu aina neeichene coitucuhin, coitucuha curiquicheein.

21 Quere tonoraain neite, esinae rauhijiriin cacoelaicha nereein. Niite belaiha cureein Cana Inaca Cana Coaunera. Canu netonainiha natiinna inara belaaain, inara que necoharaeratereeeunni, raotojoein rauhijiriin cacoitucuhichene coina,” naa Cana Coaunera Calaohi Jesoso canacaanu raina jaun:

22 “Chanuna canacaanuhacha rai ecocohin, leeochoaauru que necoharaerateneereite Curuaanaa,” naa nii leocha Jodasine jana:

23 “Cacoelaichate quere tonorae. Niite belaiha cureein Ofa Cana Coaunera. Chaenna aina jiniiquiin Ofa aina niha cureeunni.

24 Cacoelaiheite, caa quiicha beebejei esenetaene. Caa inara rai quiicha beebejei inaraacha aonajeite caletoaera-Ofa Cana Coaunera ere ne.

25 Cau inara aina nihanune cojoataana, caritiin inara rai beebejeeun.

26 Chaaen, Cana Inaca rene cuhanunete, cacoreniha Suujue letoareein Ofa Cana Inaca, inara suujua lararajiaain, inara suujuatein, inara coroatajanihane coina. Acate itolere que inara relareein, itolere caitoojoan que coauquichene coina.

27 Raotojoeinna inara rai necoeun. Canuhachana, Cana Coaunera tenojoin- raotojoein neeichene jaannu teeun. Nerinaain cabaiha nii rijijieein raotojoein neeichene jaannu teraanu. Aihana jaun, chaque casilanaala, raotojoein neeuche.

28 Esinae rauhijiriin besichaaunlune rijijieeina, cau niha ureeunni coaiten. Esinae cacoelaaiachenete rachoojoein neriquicheein. Nii caletoaera Ofa renene cureeunni, jelai choaae jauhecotojoeriin inara coroatajanihane coina.

29 Amuhanune ajinihana aitoon, inae ichacaanne, ‘Esinaete aitelu,’ naain esenetaaichene coina.

30 Inae nenacaaeneein inara rai ereerejerinaaunni, inae urichaaain canu coitucuuruhi cachaauru letoaeranu Moconajaerane jaun. Canu jerenihanune, caniha cha chana nainerihe.

<sup>31</sup> Nena, inauhene coarajereeeunni, caletoaera Ofa belaaïn nere tonoraanune coaracuruha satiine coina. Chajaauchete amuhacache. Inae jitariin bihanu inara rai, coitucuhichene coina,” naainte canacaanu amaain amue Jesoso.

## 15

*“Canuna esinae rauhijiriin lenacai oba esine rijijieein neeun,” naa Jesosone*

<sup>1-2</sup> Nii baihate aina nerelanaa nichaanune rai:

“Canuna lenacai oba esine rijijieein neeun. Charijieein teeinti, lenacai oba une beraihaca, ajaanaa naineen. Caohatiin anasitiin inaana nuune cataaun uhajeein sauhin jao-haca, caohatiin nujua cutujuaain inaacane coina. Jana in-acaeniha le unene, temura nainejeein tacaain sauhin jao-haca.

Nii rijijieein techu, cacoitucue lanaala, suujua coarae-lanaala, rai suujua letonohacha ichara, naaonjoain jaoha cureein moconajaera rene Ofa Cana Coaunera. Jana quere tonoraain canuhacha icharatei icharate, jeelai amuritoheriin suujua lararajiaain coroatajanereein Ofa Cana Coaunera.

<sup>3</sup> Inara relaanune jaan Ofa Cana Coaunera aitojoan esene-taain, tonoraain neeichene jaunte, inae inara suujua culeje Cana Coaunera, jianacoo neeichene coina.

<sup>4-5</sup> Coanete jiniiquiin Ofa Cana Coaunera jerenohin icha-caache. Ainihane, jelai chujutoroaain cacolane ichana naineriheeiche. Charijieein teeinti, nujua caje nebeuha lenacai oba unene, ojoin inae inaana nainene. Nii riji-jieein techu cacolane, jelai caohachaaïn Ofa Cana Coaunera jerenohi ichana naineneriquiche. Jana, jiniiquin canu aina ichaquichenete laaen esinae Ofa Cana Coaunera jerenohi ichariquicheein.

<sup>6</sup> Chunocoha inara tabanejei, quere tonoraane jianihanete, nitajiha cureein cahoachanainejeein, Moconajaera rene jaorichaaïn Ofa Cana Coaunerana jaun.

<sup>7</sup> Esinae rauhijiriin quere tonoraain neeichene, jiaonriha inara relaanune jaan baitiquichene. Chaelai inaraacha latei bajaachenete, tereein Ofa Cana Coaunera.

<sup>8</sup> Nere tonoraain, naitoojoan beebejeeiche cachaauru rainete, inara coaraain, Ofa Cana Coaunera coroaeca cu-rureein inara coaraauru. Nii banate esinae rauhijiriin quere tonoraera neein neriquicheein.

<sup>9</sup> Cacoelaiha Ofa Cana Coaunerane rijijieeina inara belai-hun. Caa inara belaihanune rijijieein, inara suujua coaraain cacha belaaïn neeuche.

<sup>10</sup> Caa caitoonjoan tonoraain ichaaïn neeichenena, itolere bana inara belaicheeunni. Charijieein teeinti caletoa Ofa



Cana Coaunerana jaan tonoraain ichaain nihanune jaun, canu belaaain ne, nii rijijieein.

<sup>11</sup> Itolereneein raotojoein rachoojoein canu aina jiniiquiin neeichene coinana aitoon.

<sup>12</sup> Caa inara belaaain nihanune rijijieein, ita belaaain neeuche. Nitohaneein neeuche, caa inara rai aitocoanne rijijieein.

<sup>13</sup> Nainihe chatohanai, onaa niha natiin coasiin nihacane. Cana belaichaauru coreniha cana raaje netiha cuhacanetejian, nenacaaen caohachae, ichaohin neeuruha canaacha belaihurine jerena caaun.

<sup>14</sup> Inarate quiicha belaiineein neriquicheein, caa inara letoaanune jaan ichaain neeichene.

<sup>15</sup> 'Canu cachaauru,' narihaunni. Rauhijiriichana, 'Canu belaichaauru,' nareeunni. Chabana, 'Naaonjoainte ichae,' naain curuaanaacha ichai coitucuhin neniha cachana jaun. Nii jaunna, 'Canu belaichaauru,' naaun inara que. Carai aitiin caletooa Ofa najaan coitucueratihanu inara quena jaun, nainihaun canu, 'Canu cachaauru,' naain irihanu inara quene.

<sup>16</sup> Coatiha inara, cariin carene uhin niheeichelu. Canuna inara ariin inara raain neeunlu. Nii jaunna Ofa Cana Coaunera rai arajiin cacha ariin raeraanu que inara letoaaun, inoaelu netiin neeneinu que. Nitohaneein neeichenete, chaelai latequichene, bajaaiche cacorenihane, tiha cureein Ofa Cana Coaunera," nae Cana Coaunera Calaohi Jesoso.

<sup>17</sup> Nii baihate: "Aonacuchena caa que aite, raotojoein jiniiquiin ita belaaain neeuche.

*Rai cachaauru aina curuataain Jesoso cairichaaeriin neeuruha caa chauratane que nenacaaaurane*

<sup>18</sup> Inara coaana jerelanaala, inara belaihuriniha caa chauratane que nenacaaaurune, nii caje nainaauche, nenacaaen canu nichaun natiinte, cacoharanaa jerelanaala cacoelaihurene. Nii jaunte jelai amuritoheriin inara belaihurereein.

<sup>19</sup> Chauratane que nenea cacha neneeichena jaunte, inara belaaain, inara coaana nainecureneerein caa chauratane que nenacaaauru cachaauru. Canuna caa chauratane que nenacaaauru caje inara raaunlu. Nii jaunte inara belaaain inara coaana nainecurene caa chauratane que nenacaaauru cachaauru, inae caa chauratane que nenea cacha neneeichene jaun.

<sup>20</sup> Aitocooaunlune tocohaneein, nihei chunei rai curuaanaa amurijiriin nei. Nenacaaen canu rohecauruhluna

jaunte, jerichanejeein inara rerohecaa cuurureein. Quere esenetaain tonoraeraurute, jerichanejeein inara ere tonoraain esenetaaurureein.

<sup>21</sup> Nitohanihate, cuurureein nii caletoaera coitucuuruhi nechu aansaineein nenacaauru cachaauru. Nitohanihate cuurureein, canu ere beebejeichene coreniha.

<sup>22</sup> Acaauru rene turuhin, acaauru relaenihanune jana nihane, chaelai ujuaihonneein neeururihei niqui. Nete inae enene acaauru osa coreniha chunijiun nichoteeurenereein.

<sup>23</sup> Nii cacoharanaa jerelanaala quere tonoraichurute, jerichanejeein nii caletoaera Ofa Cana Coaunera ere tonoraarene.

<sup>24</sup> Itolere, lenone faain, itolere cunaitenacaauru rautaain, itolere ichaain acaauru notajaain, naaonjoaain inatiinte, coaracuruha nota que natiin, canu batohin, Ofa Cana Coaunerane maajeein batohin neuruhane corenihate caseteco coaraa cuurureein. Nii coaracuruha natiin esenetaaurenihane colane aihururihei.

<sup>25</sup> Aitoha acaauru quiricha inoaesi cuhanene rijijieeinte, aihure. 'Nechu jataain, joareein corenihate aina nejerateein jerecurenereein,' naain aitoha acaauru quiricha inoaesi cuhanene rijijieeinte aihure, inae nitohanihane coina laenanohineein nihana jaun.

<sup>26</sup> Inae turuha urichaaain inara coroatajaneraanu. Canuna Ofa caje letoareeunni. Nii inara coroatajaneraanu- Cana Coaunera Suujuete esinae rauhijiriin caitoojoan que inara relaa ureein.

<sup>27</sup> Nii ainate chaque casilanaala laraajiin canu aitoonjoan Cana Coaunera ere beebejeriquicheein cachaauru rai.

## 16

<sup>1</sup> Nii jaunna inara rai aitoon, inara rerohecaauruhane, nererojoecaain inara letoaanune jaan jianeeichene coataana, caa caritiin aitoon inara rai, laraajiin abaantaain neeichene coina.

<sup>2</sup> Acaauru ita taojiaauruhana jaan loreri asaee enohichene janate, caje inara sitaa cuurureein. Chaaente, chunicoha inara tabanejei sohin jaoruhane, 'Jeriha Cana Coaunerana jaunne, caa ichaaun,' naa cuurureein.

<sup>3</sup> Nii chabana Ofa coitucuelanaala, canu nihanatiin coitu- cuurenihana jaunte, nitohanain ichaa cuurureein.

<sup>4</sup> Inae cuutihane bana, 'Esinaete aitelu,' naaichene coinana caa aitoon.

*Chaelai ichana nainiha Cana Coaunera Suujuene*

Jaiti jelai inara ratirihanune rai nenihanune jaunna, jau- riaa caa que inara rai erenajaqueneun.

<sup>5</sup> Inae laaen curichaaunni nii caletoaera aina nihanune coina. Nihei chunicohanejein nii cunaa jerichaaunna jaan bajaane que airijiin,

<sup>6</sup> satiin inaderaachaquiche caa que aitocoounna jaun.

<sup>7</sup> Inara rai tejian caohachare cuhanune. Jana cueniha-nune, urihei inara corianeein inara suujua lararajiaain, inara coroatajaneraaunu. Acate inara suujua lararajiaain, inara corihaneein inara coroatajanereein. Inae cuhanunena, canu letoareeunni.

<sup>8</sup> Aca inae turuhanete, cacha relaa cureein, osaaocuruhane coitucuuruha cachaaaurune coina. Chaaen techu, caohati ichaonaa que cacha relaa aicheein. Jana ichaonaa caoacha sacunaa jeriheichurute, casetecaa cureein Cana Coaunera,

<sup>9</sup> osaaocuruhane saijieein quesenetaaurenihane coreniha.

<sup>10</sup> Nii banate, esinaae rauhijiriin ichaonaa esine teraneein nihanune coitucuha cuurureein, Ofa nenajaun tacaa curichaaunnine jaun.

Inae canu coariheicheein cuutihane reeintiaain.

<sup>11</sup> Nii banate, Moconajaera aina jiniiquiin nosa coreniha caseteco coaraa cuururichaaaine coitucuha cuurureein cachaauru.

<sup>12</sup> Niha arajiin inara rai quiicha beeni niqui, nete ‘Quete toon aite,’ naain coitucunaa naineneriquiche.

<sup>13</sup> Inae turuha Cana Coaunera Suujuenete, rauhijiriin inara relaa cureein. Coatiha suujua caje rocohin aitoriaain. Aitoha Cana Coaunera najaan quete aitoha cureein, nitohaneein situsihane ajiniha coitucuhin neeichene coina.

<sup>14</sup> Acate corojeein canu nichaaunne biha cureein, cacoitucuhin neeichene coina.

<sup>15</sup> Charijieein teeinti, itolere coauneraneein ne Cana Inaca. Niirijijieein inachu canu netonai neeun, Cana Inaca calaohi nichaaunne. Aihana jaun, coaa cojoaelatohache canu coitucueratiha Ofa Suujuene.

*Inaderaichene baihate necoriha cureein inara suujua rachoojoenaa neein*

<sup>16</sup> Satonooto, caa basijiin cacoharaa curiquicheein. Nii baihajirite canu coaraa curiquicheein coaiten,” nae Cana Coaunera Calaohi Jesoso.

<sup>17</sup> Nii jaunte ita caje: “Tonaa nena, ‘Satonooto cacoharaririquicheein, Cana Inaca rene curichaaunnine jaun. Nii baihajirite cacoharaa curiquicheein,’ nae.

<sup>18</sup> Chatonaa nena aite,” naacaanu ita rai.

<sup>19</sup> Nii jaunte, caje bajanaa jerichaanune coarajihane jaun: “ ‘Satonooto basijiin cacoharaririquicheein. Nii baihajirite cacoharareeicheein,’ naanune jaunna ita caje bajaache.

<sup>20</sup> Esinaena rauhijiriin aitoreeunni. Inaderanaa caaunte chanaa curiquicheein. Nii janate inara coroaeca cuurureein caa chauratane que nenacaauru cachaauru. Nete rachoojoenaaneein necoriha cureein inara suujua.

<sup>21</sup> Charijieein teeinti, nejanoana jeriha rai canaanaine nererojoecaaure enecuru cunaa caun. Jana inae lesajeein nejanoaane, inae nii cuna coacuelanaala raotojoein rachoojoein ne, nii canaanai coroaeca.

<sup>22</sup> Nii rijijieeinte nererojecaai che niqúi ena. Nete, turuhin inara coaraa uhanune, aitohi rijitoein rachoojoenaa neein niha cureein inara suujua cuhanai. Nihei chunei inara caje nii rulunaa nainera.

<sup>23</sup> Nii bana inae cacaje, ‘Chatohanein icharihacaanu,’ naain cacaje cha bajariheicheein, inara netonai coitucuriquicheeina jaun. Chaelai inaraacha latei bajaai che cacorenihanete, tiha cureein Cana Inaca.

<sup>24</sup> Nihei caniha neeichene caje coauneein, cacoreniha chaelai bajaheiche. Bajaai che cacorenihanete, tiha cureein Cana Inaca, raotojoein rachoojoein neeichene coina.

<sup>25</sup> Inae cuutihane bana caritiin, ‘Charijieein teeinti naojoen,’ naain cuaain, inara rai berihaaunni. Inae cuu ti hane banane, nechu jataain rauhijiriincha cuaain Cana Inaca aitojoan que inara relareeunni, rauhijiriin aonaain coitucuhene coina.

<sup>26</sup> Nii banate, inara raaje inaraacha latei bajaa curiquicheein. Nitohanihane bana, coatiha canu Cana Inaca rai aitorihauanni,

<sup>27</sup> inae raujiaain caje uhanune esenetaaichene coreniha inara belaiha Cana Coaunerana jaun.

<sup>28</sup> Canuna, Cana Inaca nenaja caje mituhin, caa chauratane que turuha uun. Inae caa chauratane ratiriin, Ofa Cana Inaca Cana Coaunera rene curichaaunni,” naa Cana Coaunera Calaohi Jesusone janate:

<sup>29</sup> “Inae laaen aonacaun rauhijiriin aitohina jaun.

<sup>30</sup> Nii jaunna esinae itolere coitucuhin, esinae rauhijiriin Cana Coaunera caje uhine esenetacaanu. Aihana jaun, nihei nenacaen canacaanuhacha bajaanenu, inae coitucuhacaa nuna jaun,” naacaanune jana:

<sup>31</sup> “Nii jaunchana esenetaaiche.

<sup>32</sup> Inae cojoinaca que tiha. Eneete satiin ita caje ria toroaain, jelai cajoohin caratiriin amuriquicheein, nena jelai caa neneun, caniha niha Ofa Cana Coaunerana jaun.

<sup>33</sup> Coitucuhichene jerena caunna caa aitoon, quesetaain raotojoein rachoojoein neeichene coina. Chaaen inara netonai, caa chauratane que necairichanaa

coaraa curiquicheeina jaunna, raotojoein rachoojoein necairichanaa abaantaichene coinana aitoon. Caa chauratane curuaanaa Moconajaera amuritohanune jaun, inara netonai laraajiin caa chauratane curuaanaa Moconajaera amuritohichene coinana, coitucuhichene jerena caaun aitoon,” nae Cana Coaunera Calaohi Jesoso, aina nerelanaa nichaanune rai.

## 17

*Caná Inaca bajaa aina nerelanaa nichaanune coreniha Jesosone*

<sup>1</sup> Niritohane baihate, jabatoroain dede coarajeein:

“Inae caletoaina jaan ichacaaunne jaan cojoanonaa que turuha. Chajaain laaen cacorataaneu, ii jerenohi ichacaaunne coina.

<sup>2</sup> Iite ii calaohineein nihanune cocoinaain, caa chauratane que caletoai, satiin carai iicha teuri cachaauru rai nitajenaachara nejeein nenea ichaonaa teraaunu que.

<sup>3</sup> Leinjiin iichate nitajenaachara nejeein nenea ichaonaa teraneei. Nii jana canuna, leinjiin ii letono Jesocurisitoneein neeun. Nii jaunte nitajenaachara nejeein neeureein cana coitucuhin nenacaauru. Coatiha chabana nitajeeururinaain.

<sup>4</sup> Inae caa chauratane que nenacaauru que ii coitucueratihanu. Chaaen nachu inae caletoaina jaan nainaan.

<sup>5</sup> Inoaenlu, jaiti necoanaeniha caa chauratanene ajiniha, cocoinanacainein nihanulune rijijieein, ii rene turuhane, coaiten cocoinanacainein caeteu, coaracuruha satiine coinara Ofa.

<sup>6</sup> Inae caa chauratane caje raain carai iicha tenojoinhuru cachaauru que ii neeine coitucueratihanu. Icheineeinte neeure, caa carai iicha teuri cachaauru. Niichurute, chere aonaain tonoraain neeure.

<sup>7</sup> Inae laaen cacorataaneei jaan aina caletoai jaan ichacaaunne jaunte coaraain inae esenetaaure.

<sup>8</sup> Caletoaina jaan que acauru rai aitocooaunna jaunte tonoraare, carai iicha tenojoinhuru cachaauru.

<sup>9</sup> Coatiha caa chauratane que nenacaauru cachaauru, ii coitucuruhi coroatajaneeine coina ii bajahaun. Caa carai iicha teuri cachaauru icheineein nenacaauru coroatajaneeine coinana, canu Inaca neeine bajaau.

<sup>10</sup> Satiin canu cachanein nenacaaurute, jerichanejeein ii cachanein neeure. Jerichanejeein techu, canu cachanein neeure ii cachaauru. Nii jaunte jerichanejeein aihanune rijijieein ichaoo.

<sup>11</sup> Inae taenetojoein caa chauratane que nerihaunni. Acaaurute jana jaiti caa chauratane que nedaa cuurureein. Canuna laaen inae ureeunni, ii aina nihanune coina. Ofa,

carai caa iicha tenojoihuru cachaauru coroatajaneeu iicha jerei chana que. Charijieein teeinti canu coroatajaneein canu rai iicha tei ichana que, nii rijijieein acaauru coroatajaneeu.

<sup>12</sup> Enanetojoein cacorataaneeine que, caa carai iicha tenojoihuru cachaauru nihei leinjiinejei nitajihei. Leinjiin caa, ii quiricha inoasi cuhane been laenaerateeilune rijijieein cacoluruheraachate, inae nitaje.

<sup>13</sup> Inae laaen enene, nii neeina jaun urichaaunni in-  
iha nihanune coina. Jaiti caa chauratane que nihanune  
cojoataana aitoon, raotojoein rachoojoein nihanune riji-  
jieein, acaauru netonai canu rijijieein raotojoein rachoo-  
joein neeuruhane coina.

<sup>14</sup> Ii ere bihanu acaauru raine jana, esenetaain tonorau-  
ruhana jaunte, acaauru belaaen, acaauru rautaaen, acaauru  
coana nainecurene ii coitucuuruhi, aihanune rijijieei, inae  
caa chauratane que nena cachaneein neeurenihana jaun.

<sup>15</sup> Ofa Cana Coaunera, coatiha ena, caa chauratane caje  
ranajaain dedeeu amanajaaine coina caitono nihei. Acaauru  
que Moconajaera janoriteein, acaauru coroatajaneeine jer-  
ena caunna aitoon.

<sup>16</sup> Moconajaera cachaneein nenihanune rijijieein, cariji-  
jieein acaauru netonai inae Moconajaera cachaneein neeu-  
ruhi.

<sup>17</sup> Ii raihuruneein neeuruhana jaunna aitoon, acaauru su-  
ujua rucujueein, acaauru coroatajaneete, nejelau suujua  
cuelanaala leinjiin ii jerenohicha ichacurumii. Ii erete  
esinaae rauhijiriin ichaonaa caohacha teraneein ne. Chaelai  
janonaa bana nihei nitajiha ii ere esenetaain tonoraain ne-  
nacaaurune.

<sup>18</sup> Charijieein teeinti, casuujua lararajiaain canu  
cocoainaaen caletoaai, nii rijijieeina acaauru cocoainaaen  
acaauru letoaaun, ii ere beebejiha cuuruha caa chauratane  
que nenacaauru raine coina.

<sup>19</sup> Acaauru corenihana nejelau casuujua cuelanaala cale-  
toaina jaancha ichaaun caraajenhane, acaauru netonai ai-  
hanune rijijieein nejelau suujua cuelanaala relanajaanune  
rijijieein letoanajaanune jaancha ichacuruhane coina.

<sup>20</sup> Coatiha acaauruhacha coroatajaneeine coina caitono ni-  
hei. Canu ere beebejeeuruhane, canu esenetaaichuru suujua  
rucujueein coroatajaneete,

<sup>21</sup> jiniiquiin aihacane rijijieein, ita aina jiniiquiin raoto-  
joein neein, nejelau suujua cuelanaala ita coroatajaneein,  
neeuruhinete, esinaae ii caletoaene esenetaauruhine caa  
chauratane que nenacaauru.

<sup>22</sup> Jeelai, nii canu cocoainaaen neeina jaana teeun acaauru  
rai, ita neein nihacane rijijieein, acaauru netonai ita neein

neeuruhane coina.

<sup>23</sup> Chaaen nachu, casuujua cuhane neeine rijijieein, acaauru suujua cuhane neeun, jeelai ita neein neeuruhane coina, nii caje nainaan esinaae ii caletoaaine coitucuuruha caa chauratane que nenacaaurune coina. Aihute, cacoelaaine rijijieein, belainaaquine coitucuuruhine.

<sup>24</sup> Carai tenajaaina jaunna, caniha nii nerichaunnine jaun caniha neeuruhane jereun, nii ii necaohacha aina canu necaohacha coarajeein neeuruhane coina. Chaaen necoau-naa caa chauratanene ajiniha caje coauneein cacoelaaine coaracuruhane coinara Ofa,” naain te,

<sup>25</sup> “Rauhijiriin itolere coaunera Ofa neeine coitucuuruhi caa chauratane que nenacaauru niqui. Nena laaen canu ichoitucuun. Caa carai iicha teeurite laaen, esinaae ii caletoaaine coitucuuere,

<sup>26</sup> esinaae ii neeine coitucueratihanune jaun. Jelai choaae jauhecotojoeiine, ii coitucueratihajeein sacureeunni, esinaae cacoelaaine rijijieein acaauru belaaaine coitucuuruhane coina, canu netonai nihanatiin acaauru aina nihanune coitucuuruhane coina,” naainte Cana Inaca Cana Coaunera bajaaebajaje Cana Coaunera Calaohi Jesoso.

## 18

*Caseteconeein Cana Coaunera Calaohi Jesoso amaauruha Romanocurune*

(Mt 26.47-56; Mr 14.43-50; Lc 22.47-53)

<sup>1</sup> Cana Inaca aina irihane baihate, aina nerelanaa nichaanune amaain, Sedroon neein curuajaain nena nucuesoro jera que cue Cana Coaunera Calaohi Jesoso, cuu nii enuha inaa necojoai turuha canacaanu ainane coina.

<sup>2</sup> Nii jaunte raotojoein Jesoso cunajaa coitucuhana jaun, canacaanu caaijie turuha uhe Jodasi. Belaichaneein niha Jesoso natiin, Jesoso coulurujeein soondarooru uhaain turuha uhe.

<sup>3</sup> Nii soondarooru, chaaen batirichuru curuaanaacuru, fariseocuru, naaonjoainuri letono folisiaacuru uhaain turuha uhe nii Jodasi. Rejoon, sabere rijijieein nena- esefara, naaonjoain que biji achunequuin, raafariin, cohinee, naaonjoain que conoquuin turuha uure.

<sup>4</sup> Nii jaunte inae raotojoein nitohanai que siturichaainne coitucuhana jaun, acaauru que tacaain: “Chate ariicheta,” naain bajaa Cana Coaunera Calaohi Jesusone jana:

<sup>5-6</sup> “Nasarete cocoaicha Jesosona arihacaanura,” naauruhane jana:

“Saan. Canune aca neeunra,” naa acaauru rai Jesusone janate, nii niicha uhauri soondarooru aina jiniiquuin janori

nichaae richootoroalaain tocojoaai tacae nii Jesoso coulurujuera Jodasi.

<sup>7</sup> Nii jaunte:

“Chate esinaae ariicheta,” naain coaiten enacoauneein bajaa acaauru caje Jesusone jana:

“Nasarete cocoaicha Jesusona arihacaanura,” naauruhane jana:

<sup>8</sup> “Inae rauhijiriin bihanu inara rai. Canuna aca neeun. Cariha aaichene, caa caniha nenacaauru jianecuchete amuuruhine,” nae acaauru rai Jesoso.

<sup>9</sup> “Coatiha leinjiinejein nitajerinaain carai Ofa tenojoinunri cachaauru,” naain inae aitosiha Cana Coaunera Calaohi Jesusone jaunte nitohane.

<sup>10</sup> Nii janate sabere sirihana jaun rocohitiin, que leinjiin uricho raotono nichajai beuhite Fedoro. Nii niicha uricho beuhite batirichuru curuaanaa cachaneein nenea- Malcone.

<sup>11</sup> Nii jaunte: “Jelaiha curu kuhane nii ishabere teura. Ta caletooa Ofana jaan icharichaunnine coitucuhin quesentaaineta,” nae Fedoro rai Jesoso.

*Batirichuru curuaanaa Anasi rene, caseteconeein Jesoso amaauruha soondadoorune*

(Mt 26.57-58; Mr 14.53-54; Lc 22.54)

<sup>12</sup> Nii jaunte Cana Coaunera Calaohi Jesoso mucuure caseteconeein soondadooru acaauru curuaanaa aina uhin, chaaen Jorioocuru rai folisiaacuru, naaonjoahunri.

<sup>13</sup> Nitohaneein mucuhinte Cana Coaunera Calaohi Jesoso amaaure soondarooru, Anasi loreri asaae. (Nii Anasite, Caifasi tanaa ne.) Nii janate, nii ajaanaa kuhane batirichuru curuaanaaneein ne nii Caifasi.

<sup>14</sup> Nii Caifasite, jauriaa Jorioocuru rai “Cana caohachanu quetejian, cana atane coreniha ohane ore leinjiin cachara,” naain Jorioocuru rai erenaane.

*Fedoro caje bajaa nii acuujuu beraichane*

(Mt 26.69-70; Mr 14.66-68; Lc 22.55-57)

<sup>15</sup> Canacaanuna, Simoon Fedoro aina Jesoso sacuha cuhaaanu. Nii jana, canu coitucuha batirichuru curuaanaa jaunna, Jesoso jiniichaain enoon batirichuru curuaanaa loreri asaae.

<sup>16</sup> Jana Fedorote nedae airiniha acuujuu rohan. Nii jaunna, acuujuu beraicha ranuna rai ereeun, Fedoro enoaane coina.

<sup>17</sup> Nii jaunte Fedoro enoaain: “Tana taa cacha aina nerelanaaneene,” naain bajaa Fedoro caje nii acuujuu beraichane jana:

“Acanihahaunta,” naain benaa jerene Fedoro.



18 Nii jaunte, jelarotohana jaun usi mocohin que nichaateeuruha Anasi cachaauru, Jorioocuru rai folisiaacuru, naaonjoainurine jaun acaauru aina nichaatiha ne Fedoro.

*“Chaquete cachaauru relaaita,” naain, Jesoso caje bajaa batirichuru curuaanaane*

*(Mt 26.59-66; Mr 14.55-64; Lc 22.66-71)*

19 Nii jana, cuu nii loreri asaae ucuha cuhane niha Cana Coaunera Calaohi Jesusone janate:

“Chaauru caa iicha relaaurineein ne. Chaquete acaauru relaaita,” naain bajaa Jesoso caje batirichuru curuaanaane janate:

20 “Satiin aonajeeuruha cachaaurune acatiha teinna canu, rauhijiriin aitonajacoon. Coatiha asinojoneein cachaauru relahaun. Sinacoca asaae, satiin itataojiauruha Jorioocuruna jaan Teenforo asaaene acaauru relanajacoon.

21 Chanuna nii bajaai cacaje. Nii relanajaanune jana aonaraauru caje bajaate, raajenhane acaauru relaane jaan beeuruhine,” nae Jesoso.

22 Niritoha Jesusone janate, ecu niha Teenforo rai folisiaana jaun: “Niritiina erereei batirichuru curuaanaa rai te,” naain Cana Coaunera Calaohi Jesoso meri faohitohane jana:

23 “Baaso neeinoona aitoon. Chanuna caque ichohi teein aitoi,” nae Cana Coaunera Calaohi Jesoso nii Teenforo rai folisiaa rai.

*“Acanihahaunta,” naain nesuujiha Fedorone*

*(Mt 26.71-75; Mr 14.69-72; Lc 22.58-62)*

24-25 Nii batirichuru curuaanaa Caifasi loreri asaae niha Jesusone tonohanaute, jelai cuu inae neeorihha Fedorone jana: “Ta ii taa cacha aina nerelanaa neeine,” naain bajauruhane jana:

“Acanihahaunta,” naain benaa jereniha Fedorone jana:

26 “Tana, ii coaracaaunlu aina, enuha inaa neeonjoai jana neeine jananeta,” naain bajaa leinjiin batirichuru curuaanaa cacha- nii niicha uricho beuhiti cacha araineein nenaane janate:

27 “Acanihahaunta,” naain nesuujiha coaiteen Fedorone jana, inae ere ataohari.

*Jesoso coulurujeuruha Filato raine*

*(Mt 27.1-2, 11-14; Mr 15.1-5; Lc 23.1-5)*

28 Nii janate Caifasi loreri caje coberenadoro Filato loreri asaae Cana Coaunera Calaohi Jesoso amaauruhane jana, inae nemataracajiha janonaana jaun, enonaa nainecurene Jorioocuru, coberenadoro loreri asaae. Jorioo neniha nii coberenadorona jaunte, coberenadoro loreri asaae

enonaa nainecurene Jorioocuru, enooruhane Fasocoa beseta bitoanaa nainecurenihane coataa.

<sup>29</sup> Nii jaunte airiniha mituhin:

“Chatohanai ichaane corenihana caa cacha colurujuee-iche,” naain bajaa coberenadoro Filato, Jorioocuru cajene jana:

<sup>30</sup> “Nechu aansai taebinaen neein nenihanenoona, ichei colurujuerichaanu,” naauruha Jorioocurune jaunte:

<sup>31</sup> “Saan. Aihachuhisi niqui. Inara, amaaïn jeriquichene tocohaneein teeuche,” naa Filato, Jorioocuru raina jaunte:

“Nihei canacaanu rai rauhi, chunei sohin jaohacaanune coinata,” naaure Jorioocuru Filato rai.

<sup>32</sup> Rauhijiriin coitucuhin, “Naaonjoaainte catinaa cuurureeïncha,” naa Cana Coaunera Calaohi Jesusone rijijeeinte, rauhijiriin ichacure.

<sup>33</sup> Nii jaunte coaiten enacoauneein loreri asaae Jesoso cotijiain, caje bajae Filato: “Ii ina Jorioocuru curuaanaa *rey* neei,” naain bajaa caje Filatone jana:

<sup>34</sup> “Ishuujua cuhane aitiina bajaai. Ainihane leochaauruna ichei Jorioocuru curuaanaa nihanune que aitoha,” naa Filato rai Jesusone janate:

<sup>35</sup> “Chasiinna Jorionichaaunne coalanaala caraajenihane aitiin aitoreeun. Charaachuru, batirichuru curuaanaacurute carai icholurujue. Chatohanai najian ichaate icholuruhecure,” naa Filatone jana:

<sup>36</sup> “Coatiha cajiha caa chauratane que nenacaauru curuaanaa nihaaunta. Caa chauratane que nenacaauru curuaanaa nihanunetera, sonaacurure quere tonoraeraauru, catohaneein caetecuruha Jorioocurune coataa,” naa Jesusone jana:

<sup>37</sup> “Aihana jaun, iina curuaanaa *rey* neeite,” naa Filatone janate:

“Ejeen, aca nichaaun. Nii aitohine rijijeeine acaneeun. Canuna caa chauratane que uhin nejanoaaunlu-cachaneein, esinae Cana Coauneraacha jerei rauhi coitucuruha cachaaurune coina. Satiin Cana Coauneraacha jerei rauhi tonoraaurerate quere tonorae,” naa Jesusone jaunte:

<sup>38</sup> “Chatohanai Cana Coauneraacha jerei rauhi esinena,” naain bajaa Filato, Jesoso cajene baihate, enacoauneein coaiten mituhin Jorioocuru aina iriha cue.

“Coatiha chatohanai ichaai carai caa cachata.

<sup>39</sup> Inarate, Fasocoa beseta naineei, Fasocoa beseta catainajeein, naaonjoaain niha cotohanai casetecone, nii beseta situ reeintiaain jianerate najaaquiche. Tonaquiche, jerecuchene caa Jorioocuru curuaanaa *rey* jiane beseta situ reeintiaain,” naa Filato, Jorioocuru raine janate:

40 “Aihei. Coa nii jianiha. Nii Barabasi jianeeujan laaen,” naainte nujuaae soaisoaihure Jorioocuru, Filato rai, nii Barabasi asijiautoneein nenea que.

## 19

1 Nii jaunte Cana Coaunera Calaohi Jesoso bisichate rai soondarooru que Filato.

2 Nitohaneein bisihuruhane baihate, oja caje janojoin comai curuhacure Jesoso couturi que. Nii baihate coaiten que cajione lanaajiojoai curuhacure.

3 Nitohaneein teuruhane baihate, Jesoso rohan turuhin: “Caa Jorioocuru curuaanaa *rey* coaracuchera,” naain Jesoso meri faohafacooaure biji que Romanocuru rai soondarooru.

4 Nii janate jelai caje mituhin Jorioocuru rai: “Coaraquichene coinana caa cacha mitaa uun, neniha que chatoanai baaso ichaenihane coaracaunna jaun,” nae Filato.

5 Nii jaunte, inae oja que jerichanejeein comaiquiin, lanaajiojoai que cajionequiin mituha uhe Jesoso. Mituha uha Jesosone janate: “Caa cacha coaracuchera,” nae Filato.

6 Niritoha Filatone jaunte, Jesoso coaraain: “Coroso que teeuche. Coroso que teeuchera,” naain nujuae soaisoaiuruha batirichuru curaanaacuru, folisiacuru naaonjoainurina jaun:

“Inara amaain coroso que teeuche. Neniha carai que chana jaunna, nitohaneein tenaa naineneeun canu,” naa Filatone jana:

7 “Canacaanu quiricha inoasi cuhanete aite, nitohaneein nei nihane sohin jaohacaunune coina. Cana Coaunera Calaohi niha nocoetohane corenihate caohachae, sohin jaohacane,” naauruha Jorioocurune

8 aonajihane jaunte, jataain casi Filato.

9 Nii jaunte nacoauneein loreri asaee enohin:

“Chaa cajena unaaneei,” naain bajaa Filatone jana, inauhene chujuhequiin aonaje Cana Coaunera Calaohi Jesoso.

10 Nitohaneein tonoraeniha Jesusone jaunte: “Chanuna catoonraeneei. Tana cocoainanacainein nihanune coitucuhine. Canune nainereeeun coroso que ii teratihanune. Chaaen nachu naineeun caa ii colurujueeuruhane jaan caje jianacoo chetichaaunne,” naa Filatone jana:

11 “Cocoinanacaine lanaala cheteen nii jereniha Cana Coaunerane, canasia nainihe. Nii jaunte, chamurijiriin osaque caa catohaneein ichei caetera,” naa Cana Coaunera Calaohi Jesusone jaunte,

12 Jesoso jianena jere Filato niqui. Nete:

“Jiaohine jianeene. Aca, curuaanaa *rey* neein nenea jerihane jaun, caohacharihei jianeene. Jianeeneete, satiin inara

curuaanaacuru curuaanaa enferadoro aina nejeratena neri-  
iiniin,” naauruha nujuae soaisoain Jorioocurune jaun,

<sup>13</sup> Jesoso raerate, nii Cabata naauruha Ebereeo ere  
cuhane jaan- ajeri caje ichanohineein nenea aranichoae  
uhauruhane coina. Nitohaneein raerateeuruhane jaun,  
raain turaauruhane jana, nii casetecocuru neruujuena jaun  
nelauriariin lauheque nelaurianaana jaan rori choaae,

<sup>14</sup> enoto chujutaain Fasocoa catainajeein. Nii jaunte nito-  
haneein raerateein:

“Nocoo inara curuaanaa *rey*,” naa Filato Jorioocuru raine  
jana:

<sup>15</sup> “Coroso que teeuchete coaraain cuu ohine,” naain nu-  
juae soaisoaiuruhane jana:

“Chasiinna inara curuaanaa *rey* tereun coroso que,” naa  
Filatone jana:

“Romanocuru curuaanaa enferadorohachate canacaanu  
curuaanaa *rey* neein nera. Nihei nii baiha curuaanaa *reyta*,”  
naauruha batirichuru curuaanaacuru Filato raine jaun,

<sup>16</sup> acauru que Jesoso amaerate Filato.

<sup>17</sup> Nii jaunte nii Jesoso amaain, que corosonu baijierate-  
curuhane jana, Couturi Bejoneein curujaain nenea atane  
ucuuno que baibaichaaain amaain, nii coroso tiha cue Jesoso.  
(Nii Ebereeo ere cuhane Colocota naauru najaan- Couturi  
Bejeroo.)

<sup>18</sup> Nii janate cuu coroatajai coroso que, cuu neeuruha  
coroatajaain soserenaacaurune jaun, acaaru cataaun Jesoso  
teure coroso que, leinjiin jera que, leocha jera que, naaon-  
joain.

<sup>19</sup> Nii janate, cuu Jesoso curuaa laenaerate Filato.  
“Nasarete cocoaicha Jesoso, Jorioocuru curuaanaa *rey*”  
nasiin laenerate coroso que, tabara que teein Filato.

<sup>20</sup> Nii jana arajiin Jorioocurute nii Jesoso curuaa Filato-  
hacha laenaeratei ereretaaure, nii Jesoso teeuruha coroso  
quene jaan caje icharaeniha Jerosaleenne jaun. Ebereeo ere,  
Curieco ere, Romano ere, naaonjoain que nichata lauriin  
erenaa cuhane teeinte laenaare, nii que erenaa inaurera  
ereretaauruhane coina.

<sup>21</sup> Nii jaunte: “Coo, Jorioocuru Curuaanaa *rey*neein  
teen laenaratihara,” naaure Joriocuruneein batirichuru  
curaanaacuru Filato rai. “Nii Jorioocuru curuaanaa *rey* niha  
nocoeti, nasiin laenaerateura,” nauruhane jana:

<sup>22</sup> “Nii rijjeeincha nedaaainera,” nae acauru rai Filato.

<sup>23</sup> Nitohaneein coroso que Cana Coaunera Calaohi Jesoso curaboaain teuruhane baihate, Cana Coaunera Calaohi Jesoso cajione raure jenai soondarooru. Rai nobirine maa-jeein raure. Rai nobiri, coaracuruhane jana nirijieein ijabereeonu farueraelanaala tocoonojoi inelanaala niha nii rai nobirine jaun:

<sup>24</sup> “Coa soaihachete naajein amaacache, nenacaentejian caohachare naajeen amaacachene. Aihute que necoatijanaa neeine, chariji rai neeinha nedareein,” naure soondarooru. “Ita raite cacaijione leruhin raaurureein que necoatijain,” naa Cana Coaunera Quiricha Inoaesi cuhanene jaunte, nii Cana Coaunera Quiricha cuhane aitothane nainaane coina nitohaneein teure soondarooru.

<sup>25</sup> Nii jaunte, inae Jesoso mucuuruhane coitucuuriin, coroso asaae cuhin coaraje rai neba, nichatajai enecuru aina. Nocoasai, Cureeofasi comasaineein nenea- Mariha, Mariha-Maadala bene, naaonjoaain.

<sup>26</sup> Nii janana cuu nihacaanu, jataain niicha belaii nichaanne temeecohacaanu neba ainane jana, neba coariin:

“Nii ii calaoita oma,” naa neba raine baiha:

<sup>27</sup> “Nii chobata,” naa caraina jaunna jerichanejeein cafojiara raanune rijijieein raain amaaun caloheri asaae.

### *Oha Jesusone niha*

*(Mt 27.45-56; Mr 15.33-41; Lc 23.44-49)*

<sup>28</sup> Inae nitohaneein nihane coina letoaa Cana Inaca Cana Coaunerane nainaane coitucuha raotojoeinne jaunte, inae Cana Coaunera Quiricha Inoaesi cuhane aitosiha inaena jaun: “Cocoiintohanura,” nae Cana Coaunera Calaohi Jesoso.

<sup>29</sup> Nii janate baichaje laaojiri nainecojoain ecu niha bino baasone jaun, enuha que sie rijijieein nenea nujuatein, nii bino sisiaain Jesoso ujuaae que suesuecaauruhane jana,

<sup>30</sup> nii bino baaso cohane baiha: “Inae laaenra,” naain ocoai couturi tijitiaain ohe Cana Coaunera Calaohi Jesoso.

### *Jesoso jaleri rucuaitha leinjiin soondaro rejoin quene*

<sup>31</sup> Le janojoein lanaa Fasocoa besetane janate, Filato rai aitha cuure Jorioocuru, coroso que nenacaauru anaee ba-coerateein, naain nii coroso caje rocoeratenajaain, naain rucuhenaaratiha Filatone coina, nabana nebetacanaa janonaa bana cuu neeuruhane, coaranaaca cachaaurune coataa, acaauru rai jataain beseta tabaineein niha Fasocoa besetana jaun.

<sup>32</sup> Nii jaun soondarooru letoaa Filatone jaun, cuhin nii Jesoso ajiniha coroso que nenacaauru anaee bucu bateeichure soondarooru.

<sup>33</sup> Nii baiha Jesuso rohan turuhin coaracuruhane jana, inae oha Jesusone jaun, rai nanaae bacoorene.

<sup>34</sup> Nete laaen rai nanaae bacoorenihane caniha laaen, rai jaleri rucuaaite leinjiin soondaro rejoon que.

Nii janate rai jaleri rucuaithane jana chujuhare ichana, acau que jasisiin.

<sup>35</sup> Canuna coaraneein aitoon inara rai, inara netonai rauhijiriin aonaain esenetaaichene caina.

<sup>36</sup> “Nihei chatohaneei bacoorurihaainta,” naa Cana Coaunera Quiricha Inoaesi cuhanena jaunte, Jesuso bucu bacoorene.

<sup>37</sup> Cana Coaunera Quiricha Inoaensi leeocho cuhanete “Focooruhane janate, inauhene coarajiha cuurureeincha,” naain aitohane rijijieein coarajeure.

*Oo jana ajeri jachu cuhane Jesuso jaberoco teeuruhane  
(Mt 27.57-61; Mr 15.42-47; Lc 23.50-56)*

<sup>38</sup> Nii janate Cana Coaunera Calaohi Jesuso jaberoco bajae Filato caje Arimatea cocoaicha Jose, rucuhecuruhane caina. (Nii Josete asinojoneein Cana Coaunera Calaohi Jesuso ere tonoraera ne, leeochoaauru Jorioocuru coasiha.)

Nii jaunte, Jesuso jaberoco jianiha Filatone jaun, Jesuso jaberoco raain amae.

<sup>39</sup> Nii janate turuha uhe nii jauriaanejeein janotiin Jesuso rene turuhin erenaa Necedemo netonai, nichatachoonca quironeein meentoon tocohaneein nenea ujjuuai uhain.

<sup>40</sup> Nitohaneein Jesuso jaberoco amaain, nii juujijiai que rujuaain, cajione que baluluhin conajaain, Jesuso jaberoco rucuheca cuhe Jose, Necedemo aina.

Nitohaneainte onaa rucuhecure Jorioocuru, nitohaniha acaauru ichaona jaun.

<sup>41</sup> Nii Cana Coaunera Calaohi Jesuso teeuruha Jorioocuruna jaaunte ne enuha inaa neeonjoai. Nii enuha inaa neeojoain janate ne atanebana. Ecute ne achasineneein ajeri jachu-jaiti lesajeeinejein onaa teeurenihana jaan.

<sup>42</sup> Cuhante Jesuso jaberoco teeure, ichuunejeein niha caje-ne jaun, chaaen inae beseta bitoauruhane caina neruujijajeeuruha Jorioocurune jaun.

## 20

*Ohane baiha ichanaa Cana Coaunera Calaohi Jesusone  
(Mt 28.1-10; Mr 16.1-8; Lc 24.1-12)*

<sup>1</sup> Semana nunuhe tomiho cojoanonaa bana nocohejiriin cuhin, jaiti nocohetoojoaane jana turuhin coaraa Mariha Maadala benene jana, inae fueraene nii ajeri jachu.

<sup>2</sup> Nii jaunte soroneein jelaiha uhin, Fedoro, canu, naaonjoainihacaanune rai biha uhe. “Aanca chaainti cana curuaanaa. Chu chaainti amaaureta,”

<sup>3</sup> naain biha canacaanu raina jaun coaraa cuhacaanu.

<sup>4</sup> Nii jaun, ita jiniichaain soroneein cuhin coaraa cuhacaanune jana, Fedoro reroriin cuhin, turuhin

<sup>5</sup> metoraain coaracaunne janate, cuu ne cona. Nena laen enohin coaraeneun.

<sup>6</sup> Nii janate canu caaijie turuhin, enohin, coaraa Fedorone jana, cuu ne jaberoco conaauru.

<sup>7</sup> Nii janate nejelau ne nii Cana Coaunera Calaohi Jesocurisito couturi cona, nejelau maromarorinhineein seeque.

<sup>8</sup> Nii janane canu netonai enohin coaracaunna jaun, ichanaa Cana Coaunera Calaohi Jesocurisitone esenetaaun.

<sup>9</sup> Cana Coaunera Quiricha Inoaesi cuhane besihane jana niqui, “Naaonjoarichaaine quete aite,” naain coitucusi-naaunlu. Nena canacaanu nota que coaracaanune jaun, caohachaain coitucuhin esenetaacaanu.

<sup>10</sup> Nitohaneein coaracaanune bihane nenaanjaun cauha cuhacaanu.

*Oo caje ichanaain ecooca Jesusone  
(Mr 16.9-11)*

<sup>11</sup> Nii janate cuu nii ajeri jachu rohan nedaain chanaechanaje Mariha- Maadala bene. Chanaaechanajein metoroaain nii ajeri jachu coaraane jana,

<sup>12</sup> cuu laurujua laurujuaaure Cana Coaunera letonocuru anjeraauru somanerei que cajionequuin Cana Coaunera Calaohi Jesocurisito jaberoco teeuruhana jaaun, leinjiin couturi nichajai que, leecha tijia nichajai que naajoain.

<sup>13</sup> Niichurute: “Chate coisiita,” naauruhane jana:

“Carai curuaanaa jaberoco amaauruhana jaunna coisiunra. Chu chaainti amaain teeureta,” naane baiha,

<sup>14</sup> jaotoroain janori nichajai coaraa Marihane jana, rai chujuhaca Cana Coaunera Calaohi Jesocurisitone jana, acanihane coitucue.

<sup>15</sup> Nii jana: “Chana coisiite ene. Chana arii,” naa Jesocurisitone jana:

“Nii enuha inaa beraicha niha,” beein: “Ii amaaine, carai nii amaain teine jaa jelai beeune coanicha,” naa Marihane janate:

<sup>16</sup> “Mariha,” naa Jesocurisitone jana, nejaorocaaain rautaaain Jesoso coaraain:

“Raboni,” nae Mariha.

“Cacha relaera,” naanete aite Ebereeo ere cuhane.

17 Niritiin coineteen mucunaa jeriha Marihane jana: “Caiha neeu. Jauriaa coaa cadadaara, jaiti iniin Ofa coaraenihanune jaunra. Chajaaincha cacoelaichaauru rai canu benihura. Jaitina iniin, Ofa Cana Inaca Cana Coaunera rene iniha cureeunnicha,” naa Cana Coaunera Calaohi Jesocurisitone jaun,

18 nii Cana Coaunera Calaohi aina nerelanaa nichaanune rai biha uhe Mariha Maadala bene.

*Aina nerelanacaauru rai ecooca Jesusone  
(Mt 28.16-20; Mr 16.14-18; Lc 24.36-49)*

19 Tomiho cojoanona bana nihana jaunna, nii cojoantiin cuhane ita taojiaacaanu nii Cana Coaunera Calaohi Jesocurisito aina nerelanaa nichaanune, caohatiin acuujua fuhin Jorioocuru coasiha.

Nii janate enohin, canacaanu cataaun neeoritiin: “Raotojoein rachoojoein neeuchera,” nae canacaanu rai Jesocurisito.

20 Niritohane baihate, biji que curabo cure, jaleri que re-joon cure, naaonjoain coarate canacaanu que.

Nii jaunna rachoojihacaanu aina nerelanaa nichaanune, coaiten canacaanu aina nihana jaun.

21 Nii baihate enacoauneein: “Raotojoein rachoojoein neeuchera. Charijjein teinti, caletoe Ofa, nirijjeinna caa inara letoauna,” nae canacaanu rai Cana Coaunera Calaohi Jesocurisito.

22 Niritiinte canacaanu couturi jiririin: “Cana Coaunera suujue raauchera.

23 Chunei osaaona que inara suujua acatequichenena, canu netonai nii osaaona que casuujua acatereunnicha. Jana aineeinchene, canu netonai airihaaunnita,” nae canacaanu rai Jesocurisito.

*“Tomasi, caa canu biji alarijia cuhane ii biji couturi enoain coaraau,” naa Jesusone*

24 Nii janate, inae amuha Cana Coaunera Calaohi Jesocurisitone jana, turuha uhe Tomasi, nii fafione neein, nicha curuaatehuri. Nii Tomasite Jesocurisito aina nerelanaa nichaanune lechoonca coroataja ne.

25 Turuha Tomasine janate: “Cana Curuaanaa coaracaanura,” naain bihacaanu Tomasi raine janate:

“Biji larijia que curabo cure coaracaanne banaachane, esenetareeunni. Chaaen cuhane canu biji couturi enoain, chaaen jaleri que re-joon cure cuhane canu biji couturi enoain, naaonjoain coaracaanne banaachane nainereunni esenetaanunera,” nae Tomasi, rai bihacaanune jana.



26 Nii baihate foosa janonei cuhane, coaiteen jelaiha ena-coauneein ita taojiacaanune janate laaen, canacaanu aina ne Tomasi. Nii jana caohatiin fueraa acuujuane saijieein enohin canacaanu cataaun neoritiin: “Raotojoein, rachoojoein neeuchera,” nae canacaanu rai Jesocurisito.

27 Nii baihate: “Tomasi, caa canu biji larijia cuhane, ii biji couturi enoain coaraau. Chaaen chu caa canu jalari que rejoon cure cuhane, ii biji couturi enoain coaraain esenetaachaau, baaso coacuelanaala,” naa Jesocurisitone jana:

28 “Canu Curuaanaa Cana Coaunera” naa Tomasine jana:

29 “Inae laaen Canu esenetaai ichaajenihane coaraina jaun. Raotojoeinte niha cuurureein, catohaneein nihanune coaraelanaala quesenetaeraauru,” nae rai Jesocurisito.

*Esenetaaichene coinata, laenanohineein ne caa erenaa*

30 Itolere ichaainte coarate Cana Coaunera Calaohi Jesocurisito. Nete satiin laenanohineein nene caa quiricha cuhane.

31 Cana Coaunera Calahineein niha Jesusone esenetaaichene coinata, laenanohineein ne, esenetaaichene, ichaonaa caohacha, chabana nitajeniha cachane jaan raaichene coina.

## 21

*Rede jaohajihacaanune jana, canacaanu rene ecooca Jesusone*

1 Nii baihate Calileea conemuri auhaniha, aina nerelanaa nichaanune rai ecocoe coaiteen Cana Coaunera Calaohi Jesuso, rede jaoha nihacaanune jana.

2 Nii janana laaen Fedoro aina nihacaanu, Tomasi nii fafione naauru najaan, chaaen nii baiha Natanaaeli, Calileea caje unaa Canaau cocoaicha, chaaen Sebedeeo calaohi nichaaunne, chaaen eleecha coroatajaain, naaonjoaain nihacaanu Fedoro aina.

3 Nitohanihane coinanu quete: “Redena jaoha cureeun,” naa Fedorona jaun:

“Tana iniha uhacaanu,” naacaanune jana:

“Chajaauchetejian aihane cunichaache,” naa Fedorona jaun, cuhin bote cuhane fauhin, cuhin janoaajeein rede jaohacaanu niqui. Nii janane leinjiinejein ate mucuujenihaacaanu.

4 Nii jana, inae mataaquiin uha janonaane jana, nemuri auhaniha ecocoe Cana Coaunera Calaohi Jesuso. Nii janana, aca nihane coitucuenihacaanu.

5 Nii janate: “Enamanaacuru, ta ate mucuhichene,” naane jana:

“Aihahacaanuta,” naacaanune janate:

6 “Cana raotono nichajai bote jera que, rede jaohichenete ate mucuriquicheein,” naane jana, nii bote jera que jaohacaanune jana, esinae ate mucuhacaanu.

Nii jaunna ate anaai caaun nii rede tijichasinihacaanu.

7 Nii janate: “Cana Curuaanaate aitera,” naanu Simoon Fedoro raine jana, aohanrihane rijieeoritiin torosaacha baejeein nihana jaun, luhecotariin cajione curujuain acauhanau fautiin Jesoso rene turuha cue Simoon- Fedoro.

8 Nii janane bote cuhane caaijie cuujueein turuha cuhacaanu rede tararajeein, ate caaun lemuequiin, lefasha metoroneein lanaa nemuri auha cajena jaun.

9 Najauriaain inihacaanune jana, cuu ne canacaanu ajiniha usi lanarotiin. Nii jana nii usihanau niha leinjiin atene jana, cuu ne faan.

10 Nii janate: “Nii ena inaraacha mucuhi ate uhauche,” naa Jesocurisitone jaun,

11 bote cuhane fautiin nii rede tararae Simoon Fedoro, carene choaae. Lefasha saouquichoonca nichatajaa ate tabai inatiinte, nii rede soaine.

12 Nii janate: “Chajaauchete inara suuri noite,” naane jana, “Chaneeina” naain bajanaa nainenihacaanu, raotojoein Cana Curuaanaa Jesoso nihane coitucuhacaanune jaun.

13 Nii janate, tajiha uhin nii faan raaoriin, canacaanu nainetiin chalue. Jerichanejeein techu, nii ate basicho chalue canacaanu nainetiin.

14 Nitohaniha Cana Coaunera Calaohi Jesoso, oo caje ichanaain, canacaanu rai ecoocane nichata sai cuhane.

*“Cacoelaaina” naain bajaa Jesoso, Fedoro caje ne*

15 Inae nainaaain canacaanu suri noitichaanune janate: “Jonasi calaohi Simoon, cau nenacaauru leeochoaauru amuritoheriina ii coichana aina cutaaain cacoelai” naain bajaa Cana Coaunera Calaohi Jesoso, Simoon Fedoro cajene jana:

“Ejeen. Iite ichoelaihanune coitucuhicha curuaanaa,” naane jana:

“Aihane quere esenetaurera beraihura,” naane baihate coaiten:

16 “Jonasi calaohi Simoon ii coichana aina cutaaain cacoelaaina,” naain bajaa Jesocurisitone jana:

“Iite ichoelaihanune coitucuhicha curuaanaa,” naane jana:

“Aihane quere esenetaain tonoraeraauru beraihu,” naane jana coaiten:

17 “Jonasi calaohi Simoon, ii coichana aina cutaaain cacoelaaina,” naain nichata saain bajaane jaunte, inaderaain:

“Ejeen. Iite itolere coitucuhin, esinae ichoelaihanune coitucuhicha curuaanaa,” naane jana:

“Aihane quere esenetaain tonoraeraauru beraihu.

<sup>18</sup> Esinaena aitoonra. Enamanaaneeinne banate, necoree-  
teen, chunijiu cunaa jereinajaaun curejetohi. Jana, inae  
biinaa neeinete, ichoii caeacaecaaine jana, ichajione curu-  
jaaain, cunaa jereeneina jaaun niha natiin chamaaururein-  
cha,” nae Simoon Fedoro rai Jesoso.

<sup>19</sup> Niritoha Jesoso, “Naaonjoainna Cana Coanera ere  
tonoraanune coreniha oha cureeunni,” naain coitucuha Fe-  
dorone coina.

Nii baihate: “Quere tonoraeraneein neeu, inoaelu netiin,”  
naane jana,

<sup>20</sup> jaotoroaalaain canu coari Fedoro, acaauru caaijie cuha-  
nune jaun.

<sup>21</sup> Nii jaunte: “Chataaenriha jana caa,” naa Fedorone  
janate:

<sup>22</sup> “Chaquena aasare ichei. Canu jerichaaunete  
nacoauneein turuhanune que tiaaoljaain ichaonaa naine, li  
laaen quereecha tonoraau,” nae.

<sup>23</sup> Niritohana jaunte, orihaunnijiecha naaure ita rai nii  
canu aina Cana Coanera Calaohi coitucuurera. Coatiha  
oenerihanuhinne que aitoi. Netechu jataain, “Chaquena  
aasare ichei. Canu jerichaaunete, coaiten turuhanune que  
tiaaoljaain ichaore,” nae Fedoro rai caque Cana Coanera  
Calaohi Jesoso.

<sup>24</sup> Caraajenihane coaraain, laenaanune jaunte, esinae  
rauhijiriin erenaa ne.

<sup>25</sup> Itolerete niqúi ichae Cana Coanera Calaohi Jesoso nete  
saain laenanohineein neene. Satiin laenanohineein nihane,  
neriheí caa chauratane que tenaana jaan.

## **Cana Coaunera Calaohi Jesoso Cocoinanohichuru Afosotooru Ichanohichuru**

*Afosotooru rai, tururai niha Cana Coauneraacha letoanaa jerei- Cana Coaunera Suujuene*

<sup>1-2</sup> Nii nunuhe caje coauneein, niicha ichanohin ichaain, cachaauru relaalu Cana Coaunera Calaohi Jesoso dedeeu cauha cuhane que tiaaajoaaine quene, caa ichei beein, jauriaanejeein laenaunlu, jataain ii belaichaaunna jaunra Teofilo.

Chaen techu dedeeu cauha cuhane ajiniha, rai afosotooru-niicha cocoinaenenuuru cotijiaain raain suujua tenajaerate Cana Coaunera Suujue que acaauruhacha ichanenenu coitucuhin ichacuruhane coina.

<sup>3</sup> Ohane baiha jetaote, jenachoonca janoneein cachaneein ecocohin, acaauru rai Cana Coaunera Cojoanonaa que ereereje esinae rauhijiriin oo caje ichanaain enacoauneein ichaohane esenetaauruhane coina.

<sup>4</sup> Jaiti Jerosaleeun niicha cocoinaauri afosotooru aina ni-hane bana jetaote:

“Jiaaonriha caa Jerosaleen caje chunijiun cuhichenera. Aitocooaunne rijijieein inara rai Ofaacha tenaa jerei co-hacuche jauriaara,” naain chunijiun cuuru caohateein jetao,

<sup>5</sup> “Esinaete rauhijiriin acau que cacha baotisaain cojounacateraate Joaan. Nete inara chaabana nejein Cana Coaunera Suujue que, baotisaain cojounacatenohineein niha curiquicheeincha,” naain jauriaanejeein acaauru rai beelu jetao Cana Coaunera Calaohi Jesocurisito nitohanihane coina.

*Dedeeu iniha Cana Coaunera Calaohi Jesusone*

<sup>6</sup> Jesoso aina ita taojiaain neeuru najaaun jetaote:

“Eenenena coaiten jianacoo Israeli cocoaicha nichaachene mitareeita Curuaanaa, raotojoeein cana ichao que ichao-hacachene coina,” naain bajaauruha niicha cocoinanenuu-rune jana jetaote:

<sup>7</sup> “Nainiheechi inara nii coitucuhichenera. Chatohanai bana chaainti, nii ichaa cureein Ofata. Leinjiin acaachate nii coitucue niquicha.

<sup>8</sup> Nete inara ichoae fauha Ofa Cana Coaunera Suujuene, nii aina itolere ichana naineriquicheein inara netonaicha. Chaente chatohanai que casilanaala, laraajiin itolere Jerosaleen sacutaain, itolere Jodea batane, Samaria batane, naaonjoainuri sacutaainchuru amuhemujueein canu ere

beebejiha curiquicheein, itolereneein chauratane sacutaain canu coitucuuruhane coinara,” nae jetao acaauru rai Jesoso.

<sup>9</sup> Niritoha acaauru raine jaun jetaote, coarajeeuruhane jana jetao, dede sacari jana nitajeooriin dedeeu cauha cue Jesoso.

<sup>10</sup> Nii jaun jetaote, coarihurenihane jaun, cuu caaijie cojoelaauruhane jana jetao, somaratohanai que cajionequiin acaauru rene ecoocure coroatajai anjeraauru

<sup>11</sup> Nitohaneein ecocohin jetaote:

“Chanuna dede cojoaelaichete Calileea cocoaichacuru. Nii coarajeeichene jana dedeeu cauha cuhane rijijieeinte, coaiten turuha ureein Jesosora,” naure jetao acaauru rai.

### *Jodasi coreenraniha Matiasi raauruhane*

<sup>12</sup> Nii jaun jetaote, nii Oliboneein curuajaain nenea ichtane ucuunno neuru caje cauha cuure Jerosaleeun, Jesosohacha cocoinaauri afosotooru, ichuunnejeein le oaraanca metoro fautaeriin nebetacanaa janonaa bana amuuruha cachaaurune jerecuruha Jorioocurune itaanejeein.

<sup>13</sup> Inae nii neseeu turuhin jetaote, ecuunetiin coroatajaain coaranai loreri asaae sinii aihuruhane jaun jetao, iniha cure ita caaijie, Fedoro, Saantiaao, Joaan, Aanderesi, Ferifi, Tomasi, Bartolomee, Mateeo, Arafeeo calaohi Saantiaao, chaen, Selote naaurunaja- Simoon, chaen, Saantiaao calaohi-Jodasi, naaonjoaainunri.

<sup>14</sup> Satiin nii afosotooru jetaote, inetono janonaa bana ita taojiaain, Cana Coanera bajae bajaecururejetelu, Jesoso nejeraauru, chaen neba Mariha, chaen leochaauru enecuru, naaonjoaainunri aina.

<sup>15</sup> Nii cojoanonaa bananeein jetaote, ita taojiaaure lefasha coroata chooncaain nenacaauru- Cana Coanera Calaohi Jesoso esenetaeraauru. Nii jana jetaote, acaauru cataaun nichaauraaain jetao, acaauru rai:

<sup>16</sup> “Jesocurisito coreniha canejeraauru, inae Quiricha Inoaensi cuhane laenaerateein Rabiri que beratihalu Cana Coanera Suujuene rijijieein situhanetene. Nii jaunte Jesoso mucuha cunacaauru aina cue Jodasi, acaauru rai beranu que.

<sup>17</sup> Canacaanu aina nere beranu quete niqui ranojineein nelu. Nete nitohaneein ichae.

<sup>18</sup> Nii Jodasi jetaote, coretecuruhane jaan coriqui coreniha atane coretihane jaun jetao, nii baiha nemarote. Nemarotihane jaun jetao, couturi que chujujuaain tacaane jaun jetao, nefohitoha rai surine jaun, jianacoon chatolene cacha suri.

19 Nii coitucuhinte, nii atane curuaateure Jerosaleen co-coaichacuru Areseramanein. Acaauru ere cuhane, 'Are-serama' naanete, 'Ichana core- coriqui coreniha ranojoin atane.' naane aite.

20 Cana Coaunera Quiricha Inoaensi- Salmo cuhanete: 'Rai loreri quete jaole que.

Nihei nasaae ichoai.'

naain laenanohineein ne. Chaen techu:

'Niicha ichaneni neein nena

icharaaunu quete enoe

coreenranu que leeocho cacha.'

naain, Cana Coaunera Quiricha Inoaensi cuhane laenanohineein ne.

21-22 Nete, cau canacaanu aina neeure- Cana Curuanaa Jesoso baotisaa Joanne caje coaunein- dedeeu cauha cuhanereein tiaaajoaain- canacaanu corihaniha amuhemuhenaacauru cachaauru. Aihana jaun, canacaanu lechoonca coroatajanu que, chunocoha acaauru caje enohanete caohachare, canacaanu aina, esinae rauhijiriin ichanaa Jesusone coaracuruhane jaun, canacaanu aina beraanu que," nae jetao Fedoro.

23 Nii jaun jetaote, "Barasaba Josto" naain acaauruhacha curuaatei Jose, Matiasi, naaonjoainuri, jelai ita rohan tenajaain jetao, niicha jerei biha acaauru rai Cana Coaunerane coina jetao:

24-25 "Cana Coaunera, iite saatiin cacha suujua coitucuera neein neeicha. Iite, canacaanu que nii coitucueratenaa naineeicha. Chariji, caa coroatajaihuri caje nainere, niicha jereeineein nosa coreniha cunaa jerena jaaun cunaa coren-raniha, iicha teei amihanenaa ichana nainereta," naain jetao, Cana Coaunera bajaauere acaauru rai.

26 Niritiin Cana Coaunera bajaauruhane baiha jetaote, niha ajeri catu, cojunaca siriina jaun, "Cojunaca siricha mucuerate aca nereeincha," naauru jana jetaote, rauhijiriin nii cojunaca aina nena mucue Matiasi. Nii rijieeoritiin jetaote, lechoonca coroatajaaure Jesocurisito letonocuru, lechoonca leinjiin neeuruhane baiha.

## 2

### *Fauha uha Cana Coaunera Suujuene*

1 Jorioocuru beseta Feentecosetesi janonaa bana nihane jaun jetaote, satiin le laurijieein ita taojiaain neeure, Cana Coaunera bajaauruhane coina Jesocurisito esenetaeraauru.

2 Nii jana jetaote, cuu le lorerijieein satiin codoha-cooruhana jana, luhecotariin tonijiaain cujuana rijitiin fauha uhe Cana Coaunera Suujue dede caje.

<sup>3</sup> Nitohaneein tonijiaain fauhin jetaote, nii satiin- ecu nenacaauru suujueniha neeoritiin, acaauru bichohe naainetiin, usi lanaro tocohaneein lanalanaaonanae.

<sup>4</sup> Nii aina jetaote, nejelau nejelaauru, lauri laurichuru caje uhin cuu turunacaauru cachaauru rai, acaauru ere cuhane ereeure satiin Jesocurisito esenetaeraauru, erelanaaca Cana Coaunera Suujuene rijijieein.

<sup>5</sup> Nii bana jetaote, cuu nii Jerosaleeun turuhin neeure lauri lauri atane sacutaainchuru caje unacaauru- Cana Coaunera aitoonjoa rijijieein ichaonacaauru Jorioocuru, ecu Feentesetesi beseta bitoaauruhane coina.

<sup>6</sup> Nitohaneein inae acaauru ichoaae fauha Cana Coaunera Suujuene jana jetaote, tonijiaain ereeuruha Jesoso esenetaeraaurune jana jetaote, satiin codoonetoore nii lauri lauri caje unacaauru cachaauru, acaauru ereeuru cuhane aitocuruhane aonaain. Nitohaneein jetaote, suujuanu inaaoritelanaala

<sup>7</sup> cojoaelatonajaain:

“Calillea cocoaichacuru nihanatiin,

<sup>8</sup> inasiina cana ere cuhane aitocure aonacaachene coina.

<sup>9</sup> Caute nihacache itolere sacutaain caje uhinichaachene, Partia batane caje unacaauru, Media batane caje unacaauru, Elam batane caje unacaauru, Jodea batane caje unacaauru, Capadosia batane caje unacaauru, Poonto batane caje unacaauru, chaen Asia batane caje- unacaauru,

<sup>10</sup> Firijia batane caje unacaauru, Paanfilia batane caje unacaauru, chaen Egipto batane caje unacaauru, tajiha Sirene bujua nena Libia batane caje unacaauru. Chaen techu, cau neeure cana aina Romanocuru netonai.

<sup>11</sup> Acaauru tabaaaurute Jorionecure. Jana leeochoaurute, Jorionecurenihane saijieein Joriooneein nerotocure. Chaen techu cau neeure cana aina Cureta batane caje unacaauru, chaen Arabia batane caje unacaauru, naaonjoaainunri. Nitohaneein araai laurii caje uhacachene saijieeinte, satiin lauri lauri caje uhin nichaachene ereeuru cuhane Cana Coaunera coroaecuruhane jana aonajihancache,” naain jetao satiin cojoelatoore.

<sup>12</sup> Nitohaneein cojoelatiin jetaote: “Chatohanihana,” naain ita caje bajaee bajaecure satiin.

<sup>13</sup> Jana acaauru tabaauru jetaote: “Chaquena ereeure caa ajenacaauru,” naain acaauru batocure.

*Cachaauru raite ere Fedoro.*

<sup>14</sup> Nii jaun jetaote, lechoonca leinjiin aina ecu nenacaauru afosotooru aina nichaauraain jetao tonijiaain:

“Aonacuche satiin Jorioocuru. Satiin cau Jerosaleeun neiniquichene raina aitoreeunni coitucuhichene coina.

<sup>15</sup> Coatiha aitocohichene jana, aansijiinijin ajeeuruhi caa cachaaauruta. Inasiina jaiti janoneniha natiin ajeeurureta. Ena nuna macojiu teejiha enoto natiin, cha caaunna ajeeurure.

<sup>16</sup> Nete catohanihane coina, inoaelu inae aitiin besihalu Cana Coaunera Ere bera inoaelu Joherine rijijiein:

<sup>17</sup> 'Inara rai quiicha tei janonaa  
besautelalaje raina,  
satiin chauratane que nenacaauru choae  
canu suujue letoareeunnicha.

Nii banate,  
quiicha chana jerei coaraain  
beebejiha cuurureein canu coreniha,  
inara nefoerateeurura.  
Enamanaacuru niha natiinte,  
acaauru que quiicha coaratei  
coaracurureeincha.  
Binaacuru nihanatiinte,  
quiicha coaratei  
coaraa cuurureein acaauru sinihura.

<sup>18</sup> Nitohanein inae cutihane banane,  
saain canu cachaauru,  
enecuru, quichaauru,  
naaonjoainuri choae  
canu suujue letoareeunni  
canu ere beebejeeuruhane coinara.

<sup>19</sup> Chaenna, naain dedeeu  
jataain cojoaelanaacojoai  
coaratiha cureeunnicha.  
Jerichanejeeinachu,  
chauratane que coaratiha cureeunnicha.  
Nii banate ecooca cureein  
ichana, usi tabai,  
suruaa neeonjoaain,  
naaonjoainuri chauratane sacutaaincha.

<sup>20</sup> Nii banate conoenereein enotora.  
Jana atenete,  
ichana tocohanai jana niha cureeincha.  
Nitohanihate cureein  
inae ichuun nejeeonriha  
turu rai niha inara Curuaanaane janara.  
Nii cojoanonaa banate,  
coasinacaain elunareeincha.  
Nerinaain nii caje nichotei cachata.

<sup>21</sup> Nete, cairichaaajoaain coaraa  
Cana Curuaanaane coina  
bajae bajajeein ichaonacaauru,  
satiin nii caje nichotiha cuurureeincha.'



naain nere bera inoaensi Joheri que beratihalu Cana Coaunerane rijijieeinte, inae caa aihane jana coaraquichera.

<sup>22</sup> Aihana jaun, caohachain rautaaain aitocooaunne aonacuchena, caa que erete aonaquichera Israeli cocoaichacuru. Satiin coarajeeichene notaracaete, itolere ichaaain inara notaarate Nasarete cocoaicha- Jesoso que Cana Coaunera rai letononeein nihane coitucuhichene coina niquicha.

<sup>23</sup> Nete, inae inoaenlu nitohaneein teeichene coina, niicha jerei rijijieein ichaa Cana Coaunerane jaun, inara rai tiha nii terane jana, amaaain teeiche nechu aansai cachaauru raine jaun, coroso que teein sohin jaaorelu.

<sup>24</sup> Nete onaa caje ichatelu Cana Coaunera, onaa caje colu-cohin, amuritonaa nainesiniha onaane jaun.

<sup>25</sup> Inoaenlu jaiti caa chauratane que turueniha Jesocurisi-tone janate, aitorichaaain Jesusone rijitoojeein:

‘Itolere janonaa banate,  
cacorataanereein Cana Curuaanaara.

Aihana jaun,  
nerinaain chatohaneein canu terata.

<sup>26</sup> Nii jaaunte,  
raotojooein rachoojooein ne canu suujuara.

Chaen nechu,  
chaque casilanaala raotojooein ichaaon,

<sup>27</sup> curu cuhane nitajiha canu jaberecone nainatejelanaala,  
niheichu

setuha canu jaberecone nainatejenereeinine jaunra.

<sup>28</sup> Iite canu que,  
onaa caje ichananaja coarateeicha.

Nii jaunna,  
raotojooein rachoojooein nereeunni,  
narichaaain Jesoso, Cana Coaunera raine rijitoojeeinte belu curuaanaa inoaensi Rabiri que beratihalu Cana Coaunerana jaun.

<sup>29</sup> Jesocurisito coreniha canejeraauru, jerecuchene esinae rauhijiriin inara rai aitete aonaquiche. Nii coitucuhichene rijijieeinte, ohalu cana foeratera Rabirine jana, conautecuruhane jaun cau ne rai natanebana.

<sup>30</sup> Nete, esinae rauhijiriin rai nere bera inoaensi niha Rabirina jaun, rai nichoala- cana curuaanaa- *Rey* neein tihane coina, rai besihalu Cana Coaunerane jaun, coara rijijieein coitucuelu- curuaanaa inoaensi Rabiri:

‘Ii ichoala ichoalacuru calaohite, Jorioocuru curuaanaa *Rey* niha cureeincha.’ naain que coitucueratiha Cana Coaunerane jaun.

<sup>31</sup> Nii jaunte, inoanlu jaiti turueniha Cana Coaunera letono- Mesihazine jana, nota que coara rijitoein:

‘Naaonjoaante, turuha ureeinha. Nihei nitajerinaain rai jaberecota. Niheichu ecu seturinaainta. Oo cajete ichanareein Mesihaseicha,’ naain caohacha nainejein jitariin coitucuhana jaun, Jesoso coara rijitoein belu curuaanaa inoansi Rabiri.

<sup>32</sup> Nii jaunna esinae rauhijiriin bihalune rijijiein, canaacaanu netonai, canaacaanu nota que ichanaa Jesusone coaraacaanu, ichatiha Cana Coaunerana jaun.

<sup>33</sup> Nitohanein ichateeinte, enacoaunein dedeeu rae Cana Coaunera, rai raotono nichajai que, aina jiniiquiin nihane coina. Chaaen techu, nitohanein dedeeu raain, nii rai niicha tenaa jerei rai Suujue te. Niite, caa inara notaracae canaacaanu nainetiin chaluhane jaun, satiin coaraain aonaquiche. Aihana jaun, inae laen coitucuhiche raaotojoein.

<sup>34-35</sup> Coatiha Cana Coaunera ere bera- curuaanaa inoansi Rabiri, dedeeu iniha cuhulu. Cana Coaunera Calaohi Jesusote iniha cuelu. Nii jaunte,

‘“Tite satiin Curuaanaa neeicha.

Cau caraaotono nichajai que carohan nelaurihaau,

ii que nejeratenacaauru amuritohine coina

ichacaaunne reentiaaincha,”

naa Cana Curuaanaa rai Cana Coaunerara,’

naain Jesoso belu Rabiri, beratiha que Cana Coaunerane jaun.

<sup>36</sup> Aihana jaun, satiin Jorioneeichene raina caa beun raotojoein coitucuhichene coina. Nii coroso que tein inaraacha focii- inaraacha atinai Jesusote, satiin Curuaanaa Mesihaseinein te Cana Coaunera,” naa Fedorona jaun jetaote,

<sup>37</sup> que suujua rerohecaain, jataaen inaderaain:

“Jesocurisito coreniha canejeraauru, cha charihacaanuta,” naain bajaauruhane jana jetaote:

<sup>38</sup> “Cana Coaunera notaracae baaso ichaain, osa que ne-saruhin naosatein, naaonjoaain neeichene jiaanein, Cana Curuaanaa Jesocurisito coreniha nebaotisaerateeuche satinte, inara osa caje inara mitaain, inara rai- rai Suujue teine Cana Coaunerara.

<sup>39</sup> Catohanein tihane cointe, inoanlu beratelu Cana Coaunera. Niite nenacae inara caohachanu neein ne, satiin inara calaohichuru aina, satiin coriaae nenacaauru raine maajein. Satiin niicha cotihacuri raite, rai Suujue tiha cureein Cana Curuaanaa- Cana Coaunerara,”

<sup>40</sup> naain acaauru suujuatiha, nii cachaauru- baasonein ichaonacaauru caje mituuruhane coina, Fedorone jaun jetaote,

<sup>41</sup> nii niicha beebejei esenetaain tonoraeraauru jetaote, baotisaain cojounacatenojoein, Jesoso esenetaeraneein neeure, nii bananeein nichata oaraancai cachaauru.

<sup>42</sup> Nii jaun jetaote, satiin rauhijiriin ichaaore, relanajaauruha nii afosotoorune rijijiein, ita suujua rijitoein jiniiquiin ita coroatajanein, ita taojiaain ita aina Cana Coanera bajaain, ita aina jiniiquiin lenonein naonjoaauru.

*Raotojoeinte ichaaore Jesocurisito esenetaeraauru.*

<sup>43</sup> Nii jaun jetaote, satiin cojoaelatoore, itolere ichaain-cachaauru notaaratiha afosotooru que Cana Coanerana jaun.

<sup>44</sup> Satiin nii esenetaeraauru jetaote, ita suujua rijitoein neein, ita rai chaelai sirichuruhane ita sihure ita acatiha tacaain.

<sup>45</sup> Chaelai acaauruhacha sirii que necoreteeuruhane nenainetiinete, ita aina nii core- coriqui teein ita rai leruhin raare, raotojoein latecuruhane rijinanaain.

<sup>46</sup> Cojoanonetoein jetaote ita taojiaaure, ita taojiaauruhana jaan coloheri- Teenforo asae. Rai lorerichuru asae nihanatiin jetaote, ita taojiaain, ita rai lenone chaluhi lenonecure jiniiquiin, raotojoein rachoojoein

<sup>47</sup> Cana Coanera corojeein. Chaen jetao techu, caohachaaain neeuruhane coaracure satiin ecu nenacaauru chaaauru.

Cojoanonetoeinte, niicha ichoteratecuri tiha acaauru aina, Cana Coanerane jaun nejeeotejein sacuure.

### 3

*Nerautaa leinjiin bacosane*

<sup>1</sup> Nuna macohi choae teejiha enotone jana jetaote, nii ita taojiaauruha Jorioocuruna jaan loreri Teenforo asae cuure Fedoro, Joaan, naonjoainuri cuu Cana Coanera bajaauruhane caina. Jelai rijiu enoto tiaajianaain jetaote, ita taojiaaure satiin Cana Coanera bajaauruhane caina.

<sup>2</sup> Nii jana jetaote, nii Teenforo acuujuaniha ne leinjiin bacosanein nejanoa caje coaunein nena cache. Cojoanonetoein jetaote, nii Teenforo acuujuacaohachajeinein- acaauruhacha curuhateihu amaain teure, coriqui bajaa ecu enonacaauru cajene caina.

<sup>3-4</sup> Nii jana jetaote, enooru caina inijina cuuruha Fedoro aina Joanne jana jetaote, acaauru caje coriqui bajae nii bacosa. Nitohanein coriqui bajaa acaauru caje, nii bacosane jaun jetaote, coarajeein jetao:

<sup>5-6</sup> "Aonaaura," naa nii bacosa rai Fedorone jana,

“Chaelai teeuruhane coina jecha aite,” naain acauru coarajihane jana jetaote,

“Nihei nohane canacaanu rai coriqui. Nena quiicha sirii tereeuni icheicha. Nasarete cocoaicha Jesocurisito coreniha, nimichuhin nichaauraaain amuunte coaracaara,”

<sup>7</sup> naain nii bacosa biji- raotono nichajai que mucuhin michuha Fedorone jana jetaote, nii rijieeoritiin caohachanainejeein nerautae nii bacosa tija aina- rai tajichocuru.

<sup>8</sup> Nii jaun jetaote, nimichuhin nichaauraaain, nii ita taoji- aauruha Jorioocuruna jaan loreri Teenforo asae enoha cue jeluhate jeluhatiin Cana Coaunera coroaeejin.

<sup>9-10</sup> Nitohaneein nimichuhin nichaauraaain amuhin, Cana Coaunera coroaecane coaraain jetaote, satiin cojoaelatiin coasichure situuruhane naineen Teenforo bacuujuu- Caohachajeenein- acaauruhacha curuaateihu lauhequiin coriqui bajaera nihane coitucuhin.

*Teenforo chajeneein nenea loreri Salomoonneein- acaauruhacha curuaateihu neein ereerejiha Fedorone*

<sup>11</sup> Nitohaneein jetaote, Fedoro aina Joaan caje coriaae nalunaa jerene nii bacosa nihane caje nerautaanaa cacha. Nii jana jetaote, Teenforo chajeneein nenea loreri Salomoonneein curuajaain nenea asaa neeuruhane jaun, soroneein ruhanihajaaintiin cuhin cojoaelatiin coarajeure satiin nii cuu nenacaauru cachaauru.

<sup>12</sup> Nii jaun jetaote, acauru rai:

“Chanuna canacaanu cojoelatohichete Israeli cocoaichacuru. Coatiha canacaanuhacha nejeein nihane nerautarihei caa cachata. Niheichu jataain leochaauru amurijiriin, Cana Coaunera ere tonoraeraneen nihacaanune jaun niheinta,” nae Fedoro.

<sup>13</sup> Niritiin jetaote:

“Nii cana inoaensihuru- Abaraaun, Isaca, Jacobo, naaon-joinuri coaunera- Cana Coaunerate, jataain nelateen nihane coina, cocoinaain rai letono Jesoso letoaelu. Acate, nii cocoinanacaihuri rai teeichene jana, jiaanena jeriha coberanadoro Filatone saijieein, caohateen jianena jereneechelu.

<sup>14</sup> Nitohaneein caohachanejesina ichara nihanatiinte, jianena jeriha Filatone jana, caohateen neechelu. Coinanaa, nechu aansai sonajaaineen nenea jianeratequichelu.

<sup>15</sup> Nitohaneente, nii ichaonaa tera sohin joerateeichene jana, ichatelu Cana Coaunera. Canacaanuna, nii ichatiha Cana Coaunerane coaraneen nihacaanu.

16 Nii Jesoso corenihate nerautae caa cacha- inaraacha coitucuicha. Jesosohacha corenihate, caoachanainejeein nerautae caa cacha inara notaracaaera,” naain jetao:

17 “Acanihane coitucueeneichene jaun, sohin joeratee- ichelu inara curuanaacuru aina jiniiquine coitucuhanu rao- tojoeeincha canejeraauru.

18 Nitohaneein situhin nihanetene. Inae nere bera inoaen- sihuru que, ‘Naaonjoaate cairichaaeriin inae nirijieein cuaa- jeein sohin jaoha cuurureeincha,’ naain nere bera inoaensi- huru que beratihalu inoaenlu Cana Coaunerane jaunte, Cana Coaunera ere nainaane coina, nitohaneein nii inoaenlu- inara coroatajaneraaunu que- niicha letoanaa jereilu Mesi- hasi teeichelura.

19 Aihane jaun, chatohaneein baaso ichaain neeichene, suujelanaala jitariin bein, jiaaneein Cana Coaunera ere tonoraain neeuchete caseteco coaraquichene rai neeichene caje inara ichotemiin- Cana Coaunera.

20 Chaen techu nitohaneein neeichene, nii inoaenlu- inara coroatajaneraaunu que- niicha letoanaa jereilu- Mesihasi- Jesoso letoareein nacoauneeincha.

21 Nete jaiti itolere rucuheca Cana Coaunerane reentiaan, dedeeu niha cureein nere bera inoaensihuru que, inoaenlu beratihala Cana Coaunerane tocohaneeincha.

22 Nii quete, cana inoaensihuru rai:

‘Caa nere beraneein caletohane rijijieeinte, inara caje na- coauneein rai nere bera letoareein Cana Coaunerara. Itolere que tonaane, nere tonoraain neeuchera.

23 Nere tonorana jeriheichurute, caohachanainejeein ni- tajiha cuurureeincha.’ naain belu cana inoaensihuru rai Moisesa.

24 Caritiinte aitoroaeetoorelu Cana Coaunera ere bera inoaensi- Samoeri caje coauneein satiin nere bera inoaen- sihuru, catohaneein turuhane quera.

25 Nii jaun inarate, nii nere bera inoaensihuru que beratihalu Cana Coaunerane rijijieein, nii naitoonjoa sirichaneein neeichera. Chaen techu, inoaenlu cana foeratera inoaensi- Abaraan rai:

‘Satiin caa chauratane que nenacaurune, caohachaain teratiha cureeunni ii nefoerateeuru coreniha.’ naelu Cana Coaunera, cana foeratera inoaensi- Abaraan rai.

26 Niritohane jaunte, oo caje nii Calaohi ichateein, jauri- aanejeein inara rene letoaelu Cana Coaunera, nii coaraain neeichene, baaso ichaaechajeein neeichene jianeein neeichene, inara coroatajanein nihane coinara,” nae jetao Fedoro, nii cuu nenacauru cachaauru rai.

## 4

*Cocoinanacaihuri acatiha neeuruha Fedoro aina Joanne*

<sup>1</sup> Niritiin jaiti cachaauru rai ereereeca Fedoro aina Joanne jana jetaote, tajiha turuha uure saseredotecuru, Teenforo beraihurera- folisihacuru- curuaanaa, sadoseeocuru, naaonjoainuri.

<sup>2</sup> Turuuruhane jana: “Coaraanachuinti oo caje ichana nainiha cachana jaun, oo caje ichanaalu Jesusone. Nii jaunne esinae rauhijiriin oo caje ichana nainiha cachane coitucuhacaanu,” naain cacha relaauruha Fedoro aina Joanne aonajeeuruhana jaun jetaote, obaecure sadoseeocuru: “Nihei chunei onaa ichatera. Nihei Cana Coaunera niha natiin onaa ichatena nainiheita,” naain cachaauru relaauruhana jaun.

<sup>3</sup> Nitohaneein obajeein jetaote, Joaan aina curuataain Fedoro mucuhin amaain, inae sonaina nihana jaun, caresero cuhane tenajaain cuu janoaeratenajaare.

<sup>4</sup> Nii inatiin jetaote, atiin esenetaaure nii cuu aonajeeurera- arajii cachaauru. Nii jaun jetaote, ita que jooraaain quichaauru nejesina janijiin, saoque oharaancaelalajein Jesocurisito esenetaeraneein neeure, enecuru, canaanaihuru, naaonjoainuri janijilanaala.

<sup>5</sup> Nii cojoanoo jetaote, nii que ita rai ereeuru coina, Jerosaleeun ita taojiaaure Jorioocuru curuaanaacuru, satiin acaauru bichauhenaauru, chaen Cana Coaunera Quiricha Inoaensi que cacha relaaurera, naaonjoainuri.

<sup>6</sup> Chaen jetao techu, cuu neeure saseredotecuru curuaanaacuru Anasi, chaen Caifasi, Joaan, Alejaandoro, satiin nii saseredotecuru curuaanaacuru araachuru, naaonjoainuri.

<sup>7</sup> Acaauru jetaote, caresero caje rocoeratenajaain, Fedoro aina Joaan raerateein, acaauru cataaun tenajaain acaauru rai:

“Cha cocoinanacainein inara tihane aina caa aaicheta. Cha corenihata,” naain Fedoro aina Joaan caje bajaauruhane jana jetaote,

<sup>8</sup> coroatajaniha Cana Coaunera Suujuene jaun, cha que casilanaala jetao:

“Aonacuche satiin caraachuru curuaanaacuru, satiin Israaeli cocoaichacuru bichauhenaauru.

<sup>9</sup> Nii cunaitenaa rai caohacha ichara coitucunaa jereein bajaachene jaounna, inara rai berichaanuhincha, coitucuhin neeiche satiine coinara. ‘Nitohaneeinna nerautaa caa cachate.’ naain coitucuhichene jerena caounra.

<sup>10</sup> Satiin aonajeeichene urichoone berichaanuhin, satiin Israaeli cocoaicha neeichene coitucuhin neeichene coinara.

Nii coroso que terateein- inaraacha sohin- inaraacha joaer-ateilu Nasarete cocoaicha Jesocurisito- oo caje Cana Coaunera-acha ichatei corenihate, caohachanainejeein cunai caje ner- autaaain, caa canaacaanu aina inara acatiha ne caa cunai caje nerautanaa cachara. Inae satiin, inara nota que, caohachanainejeein nerautaane coaraquichera.

<sup>11</sup> Caa cacha rautaera- Jesusote, letoae Cana Coaunera, satiin cacha coroatajaneraaunu que niqui. Nete, nere aonana jerelanaala, que jaolequuin neeichera.

<sup>12</sup> Acate letoae Cana Coaunera, nabana nitajeein niha-cachene coataara. Nihei chunei, leecha cacha tihei Cana Coaunera, caa chauratane queta. Leinjiin acaachate, chabana nitajenaa charanejeein nihacache jaanu teraanu que-letononeein nena ne, itolere baaso caje- jianacoo cana mitaeraanu quera,” naa acaauru rai Fedorona jaun jetaote:

<sup>13</sup> “Caaurute, Jesoso aina amuhemujeein nerelanacaauru nera. Coatiha jataain cana tocohaneein, caohatiin- quiricha inaurera niheita. Nete jataain coitucuera rijitajoein, erena inaaure caa cachaaurura,” naaure cojoaelatiin nii co-coinanacaihuru, cha que casilanaala ereeuruha Fedoro aina Joanne jaun.

<sup>14</sup> Chaen, cuu acaauru aina, chujuhecoha nii cunai caje nerautanaa cachana jaun jetaote, nii chaque tonaain erena nainecurene.

<sup>15</sup> Nii jaun jetaote, nii ita taojiaauruhana jaan caje, mitaeratenajaure. Nitohanein, mitaeratenajaain jetaote, cuu nejesinajeein, ita cotaicha rijitiin:

<sup>16</sup> “Cha charihahacache, caa cachaauru ainata. Itolere caa Jerosaleeun nenacaauru cachaaurute, cojoelanaacojoai ichaain, caa leinjiin cacha rautaauruhane coitucuurera. Nii que, nainihe, ‘Casaje.’ naain, irihacacheneta.

<sup>17</sup> Coanete, taeneein cuajeein, Jesoso que- cacha relaa-urhane coataa, nii caohatichaachete jianecurumiin, nabana chunei cacha rai, Jesoso que ereein neeuruhane coataara,” naain jetaote,

<sup>18</sup> Fedoro aina Joan cotijiaain:

“Jiaonriha Jesoso coacuhin que ereerejeein chunei cacha relaain neeichenera. Nii jianeecachuchera,” naauruha acaauru raine jana jetaote:

<sup>19</sup> “Inara suujua coaracuche jauriaanejeeincha. Inasiina Cana Coaunera ere tonoraacaanune jianein inara ere tonorarihacaanu, Cana Coaunera ere tonoraacaanune colaihaje tacaainta.

<sup>20</sup> Nainihaacaanu nii que ereerejihacaanune jianichaanuneta. Inasiina, canacaanu uricho que- canacaanuhacha aonai, canacaanuhacha coarai, canacaanuhacha coitucui,

naojoaihunri que cachaauru relanaa jianerihacaanuta,”  
naain tonoranaacuruha Fedoroorune jaun jetaote,

<sup>21</sup> cacha relauruhane caohateein:

“Nenacaen nitohanai ichaain, sacuhichenena, jelai choae  
jauhecotojoeriin inara casetecarichaanuhincha,” naaure je-  
tao, acaauru rai cocoinanacaihuru.

Nitohaneein jetaote, casetecanajaelanaala, nirijieein jiane-  
naacure. Jianenaana jerecuruhi jetao niqui. Ne jetaote, nii  
cacha rautauruha Fedoroorune coaraain, Cana Coaunera  
coroaecuruha satiin ecu nenacaauru cachaaurune jaun jetao  
acaauru jianecure.

<sup>22</sup> Nii cojoelanaacojoaain nerautanaa cacha jetaote, jena-  
choonca jaanaca amurijiri.

*Cana Coaunera bajaauruha Jesoso esenetaureraauru,  
acaauru lararajihane coina.*

<sup>23</sup> Nitohaneein jianenaacuruhana jaun jetaote, nii neeu-  
ruha acaauru leeochoaurune jaun, turuha cuure Fedoro aina  
Joan. Cuu acaauru rene turuhin jetaote, “Naaonjoaainte,  
canacaanu teeure canacaanu casataain, cana araachuru  
bichauhenaauru, saseredotecuru curuaanaacuru ainara,”  
naain jitariin, nii acaauru leeochoauru rai beeuruhane jaun  
jetaote,

<sup>24</sup> cuu jiniiquiin, aonajeeuruhane baiha:

“Cana Coaunera, iite cana janonaa coauneraneein nee-  
icha. Iite cana rai dede, chauratane, cucuana, naaon-  
joaain coauneraneein neeicha. Iite itolere cautenurijihuru  
coauneraneein neeicha Cana Coaunera.

<sup>25</sup> Iite, ii Suujue que berateein, ii ere bera inoasesi Rabiri que  
beratein:

‘Chanuna joaereein

rai suujua auhacaain

nererojoecaaure

laurilauri nenacaauru cachaauru.

Chanuna nitohaneein

baasoneein suujua coaracure

inacojoeein cachaauru.

<sup>26</sup> Chaen techu

Cana Coaunera amurijiriin nena coacuhin,

nii niicha letoai Mesihasi que nejerateeure

cana rai chauratane coaranein

que nenacaauru aina reycuru.’

naain aitiin berateeilune jaun, niritiin bihalu ii ere bera  
inoasesi Rabirine rijijieeinte,

<sup>27</sup> Romanocuru curuaanaacha tei Jorioocuru curuaanaa  
Foonsio Filato, Jorioocuru rey Erodesi, chaen nejelau atane



nenacaauru, chaen Isaraelitaauru, naaonjoainuri, caa ne-seeu netaojiaain nejerateeure, nii ii jerenohin icharaanu que- ii letono Jesoso- iicha janijii iicha rai Mesihasi ainara.

<sup>28</sup> Nitohanihane coina, inae inoaelu coacuhin ichaailune rijieeinte, aihurera. Nitohaneeinte, aito hine nainaaaurera Cana Coaunera.

<sup>29</sup> Aihana jaun, enene caje coauneein, canacaanu casataauruhane coaraaine, jelai amuritoheriin canacaanu coroatajaneuna, cha que casilanaala, cachaauru rai, ii ere beebejihaaanura, Cana Coaunera.

<sup>30</sup> Chaen, laraajiin itolere ichana nainichaanune jaannu teeu, canacaanu rai, cunaitenacaauru rautaaain, cojoelanaa-cojoai ichaain naaonjoacaanune coina, esinaae rauhijiriin nii ii letono Jesoso letononeein nihacaanune coaracuruha satiin cachaaaurune coinara,” naain jetao jiniiquiin Cana Coaunera bajaare.

<sup>31</sup> Inae Cana Coaunera bajaauruhane nainaaauruhane rijieoritiin jetaote, nerurujuaa nii netaojiaauruhana jaan jelaiine jana, acaauru suujua neeoritiin, acaauru suujua lararajiae Cana Coaunera Suujue. Nii aina jetaote, chaque casilanaala, chaque tonajelanaala, satiin cachaauru notara-cae laraajiin, Cana Coaunera Ere beebejeeure.

*Satiin rucuhelete, satiin acaauru raineein ne.*

<sup>32</sup> Satiin Jesoso esenetaeraauru jetaote, jataain arajiin ita aina neeuruhane saijieein, ita suujua rijitoojoein coacuhin jetao, “Coatiha leeinjiin cana rainuhachanu que, nihei caa canaacha sirii rucuheleta. Satiin cana raineeeinte nera.” naaure jetao, satiin, ita rai. Nitohaneein jetaote, satiin raineein ne nii itolere acaauruhacha sirii.

<sup>33</sup> Nitohaneein jetaote, jelai choae jauhecotojoeriin, laraajiin, oo caje ichanaa Cana Curuaanaa Jesusone beebejeeure jetao nii afosotooru, itolere ichaain, acaauru coroatajaniha Cana Coaunerane que cachaauru notajaain. Nitohaneein jetaote, jelai choae jauhecotojoeriin, satiin, acaauru coroatajane Cana Coaunera.

<sup>34</sup> Nii jaun jetaote, nii chunei leeinjiinejeein, chaque lanaain neeurene. Tabaauru atane sirichaauru, tabaauru loreri sirichaauru, naaonjoainuri jetao, que necoreteein,

<sup>35</sup> nii afosotooru rai uhaain niicha raauri coriqui teeure, latecuruhane rijinanaain acaauru rai lerruuruhane coina.

<sup>36</sup> Coaraaunachuinti jetao, nii acaauru jana nena Lebita- Josenein curuajaain nena- Chifere cobena que nejanohanaa- Berenabeeneein afosotooruhacha curuaatei. “Berenabeen” naanete, “suujua nunaera” nae.

<sup>37</sup> Nii cacha jetaote, atane sirihana jaun jetao, que necoreteein, coreniha coriqui raain jetao, jitaain nii coriqui tee, afosotooru rai.

## 5

*Osa que nesaruhin, nohaneeuruha Ananihasi, Safira, naaonjoaihunrine*

<sup>1</sup> Nejetaote acaauru aina ne leeocho cacha- Ananihasineein curuajai, rai comasai Safira aina. Aca jetaote, nii comasai aina leeinjiin atane que necoreteein,

<sup>2</sup> ita suujua rijitjoeein leruhin rai core raain, esi rijijieein jitariin amaera rijitiin: “Nocoa coriqui,” naain afosotooru rai teure.

<sup>3</sup> Nii jana jetaote,

“Ananihasi, chanuna ishuujua cuhane enoha Moconajaerane rijitjoeein, Cana Coaunera Suujue rai nohanena jeree leruhin coriqui raain.

<sup>4</sup> Nihei chunei ichei, ‘Caa atane que necoreteeura,’ naain ereein neita. Nitohaneein, eletoera que necoretenaa lanaalate, icheineein niha satiin coriquine maajeein inatiin, leruhin raain nohaneecha. Nii atane necoreteeina jaan, coatiaa nejelau rainein nihein. Nii jaunte niqui, satiin, coriquine maajeein icheineein nera. Chanuna nitohanai ichana coacuhin ichaai. ‘Canacaanuacha jecha coritaai,’ naai jerihane niqui. Nete, Cana Coaunera notaracae canacaanu coritaai,” naa Ananihasi rai Fedorone jaun jetaote,

<sup>5</sup> cuu aonajeerihane baiha, tocojoaain tacaain, inae cuu ohe Ananihasi. Nii coaraain jetaote, satiin nii coasichure banetojoelanaala nii ecu neein coarajeerera cachaauru.

<sup>6</sup> Nii jana jetaote, tajiha nichuuntaain coaraain, rai jabereco conajaain amaain conautiha cuure cachaauru.

<sup>7</sup> Nii baiha jetaote, nichata oraai cuhane, tajiha turuhin enoha uhe nii onaa Ananihasi autana Safira: “Naaonjoaara,” naain coitucuelanaala, caohachanaenetojoein.

<sup>8</sup> Nii jana jetaote:

“Esinaena rauhijiriin, nii beeichene jeoneei coreneein, inara rai atane que necoreteeiche,” naain bajaa Fedorone jana jetaote:

“Ejeen. Nii bihacaanune jeonejeeine, necoretiha-caanuchera,” naane jana jetaote:

<sup>9</sup> “Chanuna ita suujua rijitjoeein, Cana Coaunera notaracae canacaanu coritaquiche. Nota tajiha uujueeuruhache ii sinijera amaain, conauteraauru cachaauruchera. Inae itonaa amaaururichaainchera,” naa Fedorone rijieeritiin jetaote,

<sup>10</sup> Fedoro tija asaae tocojoaain tacaain, cuu ohe nii ene. Nii jana jetaote, rai lana conautecuruhane caje turuhin, enoha cuuruha nii cachaaaurune jana, inae oha nii enene jaun, rai jabereco amaain, rai lana rohan teein conautecure.

<sup>11</sup> Nii jaun jetaote, banetojoelanaala coasichure nii satiin Jesoso esenetaeraauru, satiin nii nitohanihane coitucuur-erane maajeein.

*Afosotooru aina cuaain, itolere cojoaelanaacojoai ichaain  
cachaauru notaaratiha Cana Coaunerane*

<sup>12</sup> Nii afosotooru aina cuaain jetaote, itolere cunai caun cunaitenacaauru, bacosacuru, maosacuru, naaonjoaihunri rauterateein, itolere icharateein cache notaarate Cana Coaunera. Nii bana jetaote, nii Teenforo chajeneein nenea Salomoonneein curuajai asaae ita taojianajaaocure afosotooru, satiin Jesocurisito esenetaeraauru, naojoainunri.

<sup>13</sup> Nejetaote, nii chunei acaauru aina netaojiana jerecurene casi caun, jataain belainaacuruha natiin.

<sup>14</sup> Nejetaote, arajiin cachaauru enecuru netonaine maa-jeein Cana Curuaanaa esenetajeein nejeeotejeeure.

<sup>15</sup> Nii jana jetaote, itolere cunai caun cunaitenacaauru mitaacoaain, cache situnajaun bero auhaniha teure, nela choae, rai rori choae, naajoaain, tabaauru que neconaa Fedoro beraerane, nerautaauruhane coina.

<sup>16</sup> Chaen nii Jerosaleeun rohan nenacaauru- neseeuuru nenacaauru cachaauru netonai nihanatiin jetaote, tajiha turuha uure itolere cunai caun cunaitenacaauru, itolere coitucuchuhi cairichanojoneein ichaonacaauru, naaonjoainuri uhaain. Niichuru jetaote, rai cunai caje rautanaacuruhane, jataain raotojoein satiin nerautaaure.

*Afosotooru que nejerateeuuruha cocoinanacaihunrine*

<sup>17-18</sup> Nii jaun jetaote, itolere cache, acaauru belaihana jaun, nechu jataain necoelai caun, nii afosotooru mucuhin amaain, caresero cuhane tenajaaure nii saseredotecuru curuaanaa aina, nii oo caje cache ichatena nainiha Cana Coaunerane esenetaaichuru- sadosseocuru.

<sup>19</sup> Nii jana jetaote, janotiin caresero bacuujuua joracaain, acaauru mitae Cana Coaunera letono- anjera.

<sup>20</sup> Nitohaneein mitanajaain jetaote:

“Naain Teenforo cuhane enohin, cache cataaun nichaaurain, cachaauru rai beebejeein, caa Ena- Cana Coauneraacha Tei Ichaonaa beebejeeuchera,” naain jetao, letoanajae Cana Coaunera letono anjera. Nii jaun jetaote, mituhin cuhin,

<sup>21</sup> janohetiin nii Teenforo asaae enohin, beebejeein cachaauru relaaure.

Nii nainiha jetaote, saseredotecuru curuaanaa, chaen acaauru aina nenacaauru, naaonjoaihunri, satiin- acaauru bichauhenaauru cotihacure, netaojiaauruhane coina. Nitohaneein, ita taojiaain jetaote, nii afosotooru raerateeure, caresero caje.

<sup>22</sup> Nii jana jetaote, turuhin nii caresero joracaain coaracuruha nii acaauru letonocuru- folisihacurune jana, nii leeinjiinejeein, cuu neeurene. Nii jaun jetaote, letoanajaurera rai, biha cuure.

<sup>23</sup> Turuhin jetao te:

“Caohatiin funojoineein, acuujuua naineeinchuru soondarooru que caohatiin beraichaaain nihanatiinte, joracaain coaracaanune jana, neeurene leeinjiinejeeincha,” naain beeuruhane jaun jetaote:

<sup>24</sup> “Nitohaneuruhane, chachaainti ichaa cuurureein nirijieein taeneein cuaajeeinta,” naaure, satiin saseredotecuru curuaanaa, saain Teenforo beraichacuru- folisihacuru curuaanaa, jataain nelateein nenacaauru saseredotecuru, naaonjoaihunrine jana jetaote,

<sup>25</sup> tajiha turuhin:

“Nota Teenforo cuhanete, cachaauru relaa neeure caresero cuhane inaraacha enoanojoihurura,” naain, acaauru rai beenajae leeinjiin cache.

<sup>26</sup> Nii jaun jetaote, nii rijieoritiin cuhin, rai folisihacuru amaain, ranajaa cue folisihacuru curuaanaa. Nitohaneein cuhin jetaote, inae erunajaain, acaauru uhae, chatohaneein cunaain dadanajaelanaala cunaain, chatohaneein tenajaauruhane, ajeri que bodoosinajaauruha cachaaurune coataa.

<sup>27</sup> Nitohaneein, turuanajaain jetaote, Jorioocuru curuaanaacuru, saseredotecuru curuaanaa, naaonjoaihunri acatiha tenajaain jetao:

<sup>28</sup> “Inae inara rai, nii cache que, cachaauru relaaichene coataa aitiin, caohatihacaanulura. Nii saijieeinte, enanetojoein, nii jianena jereneeichera. Cha ichaquiche, nii que cache relaainta. Inae itolereneein Jerosaleeun sacutaain, nii que cachaauru relaaichera. Chaentechu, canacaanu que, ohalu nii cachane ujuaitena jerequichera,” naa acaauru rai, saseredotecuru curuaanaane jana jetaote:

<sup>29</sup> “Cache ere tonoracaanune choae jauhecotojoeriin jataain Cana Coaunera ere tonoracaanune jaunna aihacaanura.

<sup>30</sup> Nii cana inoaesihuru Coaunera- Cana Coaunera, nii coroso que tein, inaraacha sohi inaraacha joailu- Jesoso ichatelura.

<sup>31</sup> Nitohaneein jaurihaanejeein, oo caje ichateeinte, raotono nichajai que lauriaain, nii Jesoso cocoinae, itolere

curuaanaa nihane coina, Cana Coaunerara. Chaen, itolere baaso caje- cacha mitaeraaunu quene maajeente, te Cana Coaunera, Israeli cocoaichacuru corootajaneraaunu que, itolere baaso ichaechajeein neeuruhane jianein neeuruhane, acaauru que suujua acatena nainiha Cana Coaunerane coinara.

<sup>32</sup> Canacaanuna, nii coitucuhin, coaraneein, que ereerejihacaanu. Chaen, nii nere tonoraain naitoonjoan icharaauru rai, Cana Coauneraacha tei Cana Coaunera Suujue netonoaite, canacaanu que nii coaraterata,” naain tonoranaacure, Fedoro aina, leeochoauru afosotooru.

<sup>33</sup> Niritiin, tonoranaacuruhane jaun jetaote, obajeein, acaauru sohin, acaauru jaonaa jerecure.

<sup>34</sup> Nii jana jetaote, nii cocoinacaihunri aina cuu ne leeinjiin fariseeo Camalieli. Aca jetaote, Cana Coaunera Quiricha Inoaesi coitucueraneein, acaentonai cocoinanacaineein, jataain suujua acatecuruha itolere cachaaurune jaan ne. Nii jetaote, nimichuhin nichaauraain, basiinjiin afosotooru mi- taerate, aerene.

<sup>35</sup> Nitohaneein, inae mituuruhane jana jetaote:

“Aonacuche, satiin- Israeli cocoaichacuru. Caohachaain necohalajiin aihuchera. Nijiaonriha, joenreein coitucuera lanaala, chatohaneein caa cachaauru teratein neeichene.

<sup>36</sup> Aihalu Teeodane coaucuchenaainti. Coaracuchenachuhinti, leesajei que niqui, ‘Aca jete, jataain itolere amurijiriin nelateineeinera.’ naane jaun niqui, esenetaain sacuuruha jena fashai cachaaurune. Nii jana, sohin jaoruhane jaun, ita caje riaaneein, jianecuruhalu- sacuureraauruneta.

<sup>37</sup> Coaraaunachuinti, itolere sacutaain nenacaauru cachaauru janiichatiha Romanocuru curuaanaane bana, coaiten Romanocuru aina nejeratiha leeinjiin- Calileea cocoaicha- Jodasine jana, jerichanejeein, acaentonoai sohin jaoruhane jaun, rai sacuurera netonoain, ita caje rihaaneein, jianecuruhaluneta.

<sup>38</sup> Nii rijijieeintechu, Cana Coaunera letononeein aihureniha caa cachaaurune, raajenhane janiha cuurureeinte, rohecanacaaurureta.

<sup>39</sup> Aihana jaun, Cana Coaunera letononeein aihuruhane jana, acaauru aina nejeratein, acaauru rohecaachenete, Cana Coaunera aina netonai nejerateriquicheeincha. Aihana jaun, coaa Cana Coaunera aina nejeratenaa amunena coa- cachera,” naa Camalieline jaun jetaote, nere tonoraare.

<sup>40</sup> Nitohaneein nere tonoraain jetaote, raujiaain nii afosotooru cotijiaain bisichatenajaain, “Nijiaonriha nenacae Je- soso que cacha relaain neeichenera,” naain jetao, cacha re- laauruhane caohatein, jianenaacure.

<sup>41</sup> Nitohaneein jianenaacuruhane jaun jetaote, nii cooainanacaihunru notaracaae raotojoeein rachoojoein, jelaï caje cauha cuure, bisiinajaain mainajeein, acaauru necoejchanuuruha, Jesoso coreniha, Cana Coaunera notara-caaene jaun.

<sup>42</sup> Nii atiin jetaote, jianelanaala cojoanoonetojoein, nii acaauruhacha cohajeï Mesihasi niha Jesusone beebejeein, cacha relaaure, Teenforo asaae, loreri naineeine maajeein.

## 6

### *Caainsineein acaauru coroatajaneraaunu teeuruhane*

<sup>1</sup> Nitohaneein jetaote, nii bana nenacaen nejeeontejeein cuujueein, arajiin nefaaure Jesocurisito esenetaeraauru cachaauru. Nii jaun jetaote, nererojoecaaure nii Curieco ere cuhane erenacaauru- Jorioocuru, nii Ebereo ere cuhane erenacaauru que. Nitohaneein, nererojoecaaïn jetaote:

“Chanuna lenone chaluuruhane, inara aina nenacaauru autanaauru rai teeuruhane fautaerihanaain, canacaanu aina nenacaauru autanaauru rai quinacai teure chaluur-erata,” naaure Ebereo ere cuhane- erenacaauru rai.

<sup>2</sup> Nii jaun jetaote, jitariin, nii Jesocurisito esenetaeraauru taojiaaure nii lechoonca coroatajai Cana Coaunera letonocuru- afosotooru. Nitohaneein, taojianajaain jetaote, acaauru rai:

“Coatia caohacharihei, Cana Coaunera ere beebejihacaanune jiaaneein, cacha rai lenone teurera beraichaneein nihacaanuneta.

<sup>3</sup> Aihana jaun, canejeraauru, caaunsine cacha- itolere coitucuurerera- Cana Coaunera Suujue que suujuequiin nenacaauru, inara caje, chariji chaainti esinaae rauhijiriin nitohanai ichana nainaeraaurune, niichuru janijiin beeuchene, canacaanu, acaauru rai amihanenaa tihacaanu, jelaï tein, nii coaraneein neeuruhane coinara.

<sup>4</sup> Canacaanuna laen, satiin rai, Cana Coaunera bajaebajajeein, Cana Coaunera ere beebejeein sacurichaanuhicha,” naauruhane jana jetaote,

<sup>5</sup> satiin, ita suujua rijitoejin jerecure.

Nitohaneein, jereïn jetaote, Jesocurisito ere esentaain- Cana Coaunera Suujue que suujuequiin nena Eseteba, chaen Ferifi, Poroocoro, Nicanori, Timoon, Paramenasi, chaen leinjiin cacha- Antioquiha caje nena- Jorioonein nerotona- Nicolasi, naonjoainuri janijiin raare.

<sup>6</sup> Nitohaneein janijiin ranajaain jetaote, tajiha turuanajaa uure nii neeuruha afosotoorune jaun. Nii jana jetaote, acaauru couturi choae biji merecaain, Cana Coaunera bajaare, acaauru cocoainaa Cana Coaunerane coina.

<sup>7</sup> Nii aina, itolere sacutaain riaaneein, Cana Coaunera ere beebejeeuruhana jaun jetaote, nenacaen jelai choae jauheco-tojoeriin, Jerosaleeun, jataain nejeeonteeure Jesocurisito esenetaeraauru cachaauru. Arajii saseredotecuru- Joriooneein nenacaauru niha natiinte, Jesocurisito esenetaaure.

*Eseteba mucuuruhane*

<sup>8</sup> Nii Eseteba jetaote, coroatajaniha Cana Coaunerane jaun, itolere que laraajiin, itolere cunaitenacaauru rautaaain, itolere ichaain cachaauru notajae.

<sup>9</sup> Nii jaun jetaote, Cairichaerinojoneein Neeuruhane Cajé Mitanojoihuru neein curuajai sinacoca nenacaauru- Sirene caje, Alejaandiria caje, Silisia caje, Asia caje, naajoainuri caje unacaauru tabaauru jetao, Eseteba aina, ita cotaicha rijitocure.

<sup>10</sup> Ne jetaote amuritonaa nainesihurene, Eseteba suuju-atiha Cana Coaunera Suujuene que laraajiin irihana jaun.

<sup>11</sup> Nii coreniha obajeein jetaote, tabaauru coretecore, nechu joaereein caje rocohin, irijiaain:

“Baasoneein Moisesa que ereein, Cana Coaunera netonai quete erera,” naain acaauru aina coulurujueeuruha, nechu joaenreeine coina.

<sup>12</sup> Nii jaun jetaote, niritii beeuruhana jaun, Eseteba que nejerateein, codoonetiin Eseteba mucuure- satiin cuu nenacaauru, satiin- nii Cana Coaunera Quiricha inoaei- coitucuurera, satiin- acaauru bichauhenaauru, naaonjoainuri. Nitohaneein mucuhin jetaote, tararaain amaain, acaauru curuaanaacuru rai teure, nii rucuhecuruhane coina.

<sup>13</sup> Nii choae tacaain jetaotechu, nohaneein acaauru aina colurujueraanu que- casaje cachaauru arihuruhana jaun:

“Canacaanu netonaina chuhisi, aonajenajaaocaanura. Inetono janona bana te, ‘Chaque jete nelatere cana rai Teenforo. Chaque jete nelatere cana rai- Moisesa aitoonjoa- Moisesa ere.

<sup>14</sup> Nii Nasarete cocoaicha Jesoso jete, cana rai Teenforo chamuhitiinjien jaohaje cureeinjien. Nii ichoae tacaain jete, cana rai Moisesa aitoonjoa, cana ichao corereeinjien.’ nana-jaonca chuhisicha,” naauruha nii cocoinanacaihuri rai, nii casajeeurune jaun,

<sup>15</sup> nii Eseteba coarajeeuruha- saain- nii cuu nenacaauru-cocoinanacaihuri, satiin- nii cuu nenacaauru- cachaaurune maajeeine jana jetaote, Cana Coaunera letono anjera nomeri tochaneein necore satiin rai nomeri.

**7**

*Jabereco coreniha iriha Esetebane*

<sup>1</sup> Nii jaun jetaote: “Esinaaena rauhijiriin, ii que ere-naaniha,” naain Eseteba caje bajaa- saseredotecuru curu-aanaane jana jetao:

<sup>2</sup> “Aonacuche canejeraauru, satiin ichauhenaauruna, nii que rauhijiriin aitete, aonaquichera.

Jaiti Araaun ichaoha cueniha cana foeratera inoaesii Abaraaunne ajiniha jetaote, Mesopotamia batane nihane jana, rene ecocohin:

<sup>3</sup> ‘Caa ii atane jiaaneein, satiin ii araichuru ratiriin, ichei quiicha coarateeni atane que ichaonihura.’ naa Cana Coaunera, Abaraaun raine jaun jetaote,

<sup>4</sup> Caldea atane caje mituhin, naain nejelau ataneu- Araaun neein curuajaihu ichaoha cuelu Abaraaun. Nii baiha jetaote, inae oha rai inacane jana, caa ena nihacachene jaan atane que Abaraaun letoae jetao- Cana Coaunera niqui.

<sup>5</sup> Ne jetaote, nihei aansijineeiniji, rai atane tenelu Cana Coaunera. Ne jetaote, nii caaniha jetao: ‘Ohine baihate, ii calaohichuru rai, chichoalacuru rai, naaonjoainuri rai niha cureein atanera. Chaen coroatajajeein nefaaaururihaain ii nefoerateeuruta.’ nae Cana Coaunera, Abaraaun rai. Nii bana, jaiti neniha leeinjiinejeein Abaraaun rai- canaanai inatiin jetaote, Abaraaun rai nirite Cana Coaunera.

<sup>6</sup> Niritiin jetaote, Abaraaun rai: ‘Jauriaanejeeinte, jena fasha jaanacaneein, eroraqui nejelau atane que ichaoha curureein, belainohine lanaala, nechucaseteco rijijieein ii nefoerateeurura.

<sup>7</sup> Nena, nii acaauru cairichaerichaaauru cachaaauru casete-caain, jelai caje Israelitacuru rocoerateein, nii caitoonjoa-acaauru que banihateein- quiicha rucujuei atane que teratenajareeunni, acaauru que banijiaain atane que ichaohin, quere tonoraain ichaooruhane coinara.’ nae Cana Coaunera, caa nihacachene jaan atane que.

<sup>8</sup> Chaen techu esinaae rauhijiriin, Abaraaun rai aithane coujounacanu que: ‘Quichaneein nejanoha ichei canaanaine, jaberoco cari jiununuerateein saerateeura.’ naa Cana Coaunerana jaun, nejanooa rai calaohi Isacane jana jetao, fosa janoneein nejanoha baiha catiaain jetao, coriha cari jiununuerateein saerate Abaraaun. Nii jaun jetaote, jerichanejeein rai calaohi Jacobo icharate Isaca. Jerichanejeein jetaotechu, nii lechoonca coroatajai rai calaohichuru Israelitaaauru foerateranuuru icharate Jacobo.

<sup>9</sup> Nii Jacobo calaohichuru jetaote, cana inoaesihurune. Acaauru jetaote, nii acaauru ocoala Jose que nererojoe-caain, que necoreteeure Egiptoo cunacaauru- cachaaauru rai, Egiptoo amaain, que necoreteeuruha Egipto cocoaicha



raine coina, nechu jataain nocoelai caun cotaiha. Nejetaote, atiin nii jana, Jose coroatajane Cana Coaunera, itolere necairichanaa caje mitaain.

<sup>10</sup>Nitohaneein jetaote, itolere necairichaanaa caje mitaain, coroatajaniha Cana Coaunerana jaun, itolere coitucuha Josene coaraa Egipto curuaanaa Faraaonna jaun: 'Acate, cague jauriineein- itolere coaraneein- itolere curuaanaa neein- nerora rijijieein nihane caohachaera.' naain, coberenadoro neein nii Jose cocoainae jetao Faraaon. Nii jaun jetaote, itolere- Faraaoncha sirii erora rijijieein, itolere atane curuaanaa neein coberenadoro neein nelu jetao Jose.

<sup>11</sup>Nii baiha jetaote, carajaaajoaain catiaain, necairichaau-relu satiin cana inoaesihuru, caohachanainejeein neniha quinacai, Canaun, nii Egiptoo nihanatiina jaun. Itolere caa cana atane sacutaain, niheilu chunjihun quinacai arihuruha cana inoaesihuru- cana fojiaraaurune jaanu.

<sup>12</sup>Nejetaote, nii bana Egipto curuaanaa rai niha tiricone coitucuuriin, rai calaohichuru- cana inoaesihuru letoae Jacobo, Egiptoo tirico coretiha cuuruhane coina. Nii tirico coretiha cuuru que jetaote, jauriaanejeein, Egiptoo cunaa nunueteurelu- cana inoaesihuru.

<sup>13</sup>Nii baiha, coroata saain cuuruhane cuhane jetao te: 'Inara caje- nena neeine neeunra.' naain nihanacuru que, necoitucuerate Jose. Niritohane jaun jetaote: 'Acauru caje nena neeina nihate,' naain Jose coitucue Egipto curuaanaa-Faraaon.

<sup>14</sup>Nitohaneein jetaote, nii baiha neeoriin, acauru inaca-Jacobo raerate, jitariin calaohichuru aina curuataain, satiin Egiptoo, cuuruhane coina, raeratenajae, rai nejerauru que Jose. Itolere neein, caunsichoonca saouqui- nenacauru naraaichuru raerate jetao.

<sup>15</sup>Nitohaneein jetaote, Egiptoo ichaoha cuelu jetao Jacobo. Cuu neein jetaote, ohelu. Chaen jetaotechu, cuu oorelu nii calaohichuru, cana inoaesihuru netonai.

<sup>16</sup>Nii baiha carajaain neein jetaote, nii Egipto caje mitu-urelu cana inoaesihuru ichohalacuru- Israelitaauru. Nitohaneein mituhin jetaote, nii acauru rinaja- Jacobo bucuuru rocohin amaain, Siqueeun, Amoro calaohichuru caje-Abaraauncha coretei- atane que rai bucuuru amaain rucuhecurelu.

<sup>17</sup>Nii baiha carajaaajoaain catiaain jetaote, inae Abaraaun rai jinateein, Israelitaauru rai- atane tenaa jeriha Cana Coaunerane cataiinaaecane jana, inae arajiin nefaecure-Israelitaauru Egiptoo.

<sup>18</sup>Nii bana jetaote enoelu, Jose coitucuelanaala nena- *Rey*, Egipto curuaanaa- nihane coina.

19 Nii *Rey* jetaote, cana inoaesihuru- Isaraelitaauru coritaain cairichaaain, acaauru bereecuru- ena nejanoanacaauru- quicha cojoaajihuru joerate, nabana arajiin nefaauruhane, Egipto cocoaichacuru que nejerateeuruhane coataa, necoha- laai caun.

20 Nii bana jetaote, nejanoaelu Moisesa. Nii nejanoaha Moisesane jana jetaote, jataain belaaain coaraelu Cana Coaunera. Nii jana jetaote, nichata atejeeincha sirichurelu asinojoi- neein rai fojiaraauru.

21 Nii baiha jetaote, acaauru bereecuru- quicha cojoaa- jihuru jaohacoaauruhane coina, aitoha- nii Egiptoo curu- aanaana jaun jetao, nemuri auhania, caohachajeein cu- ruteein, nii Moisesa jiaanecure- rai fojiaraauru. Nitoha- neein, curuteriin nemuri auhaniha teeuruhane jana jetaote, coaraain raain, rai beree rijijieein- nii Moisesa fojiae- nii curuaanaa- Faraaon cacunu.

22 Nitohanihana jaunte, Egipto cocoaichacuru rijijieein, acaauruhacha coitucui coitucuhin, acaauru relanojoi- neein, leeinjiin cacha mijiaa- neein, nere que, nichanaa, naaon- joainunru que laraajiin nelu Moisesa.

23 Ninitohaneein jetaote, inae jena choonca jaanacaani- hane jana, naraaichuru Isaraelitaauru rene, turuha cue Moisesa.

24 Nii jana jetaote, cuu leeinjiin- Isaraelita sohajiha- Egipto cocoaichane coaraain niqui, nii naraai Isaraelita cocoaer- atiha, nii Egipto cocoaicha sohin joae- Moisesa,

25 nii caje nainaan: 'Caate, letoae Cana Coaunera, cana coroatajaneraanu quera, naaururichaaain jecha, nii naraaichuru Isaraelitaauru.' naain. Nete caohacha naenetohe- cure.

26 Nii cojoanoo jetaote, ita sohajeeuruha coroatajai Is- ara- elitaaurune jana, runajaain: 'Chanute nejesinajeein ita sohicheta,' nae niqui Moisesa, nere tonoraa jerenajaain.

27-28 Nejetaote: 'Chate, nii coaranu que chenoaain, canacaanu curuaanaanu que eletoaeta. Raca, Egipto cocoaicha ichaaine tochaneein inoonte, casohin cajaanaa jereeita.' naain cotaain, Moisesa saruhite nii eleocha sohajera Isaraelita.

29 Niritiin saruhitohane jaun jetaote, jelai caje sorohin, Madaaun batane cuhin ichaoha cuelu Moisesa. Nitoha- neein jetaote, ucu- ae sorohin, coroatajaain quicha cojoaaji- neein canaanai siriin, nejelau ataneu nenacaauru aina, ecu ichoa- elu Moisesa.

30 Nii baiha, jena choonca jaanacai baiha jetaote, cacha areroo- desiereto cataaun- ichtane ucuuno- Sinaa- neein cu- ruajai rohan, chujuhecoha Moisesane jana jetao, iihane- ecu chujuhequi- enuha laa- o- joi- rii. Nii jana jetaote, nii

enuha laajoiri iihaneei cataaun ecooca leeinjiin aanjerana jaun jetao,

<sup>31</sup> cojoaelatiin coarajeein, caohachaaain rautaaain coaraane coina, rohan nichuuntaaoriin coaraa Moisesane jana jetaote:

<sup>32</sup> ‘Canuna, ii inoasihuru Coaunera- Inara Coaunera neein neeunra. Canuna, ii inoasihuru- Abaraaun, Isaca, Jacobo, naaonjoainuri- Coaunera neein neeunra.’ naane jana jetao, coaaneenetojelanaala coasiha nesoonetiin rijijijianiha Moisesane jana jetaote:

<sup>33</sup> ‘Nii ii safato rocoora. Canu turuna jaan nihana jaun, nainiheei nii ii safato ruhacaain caelai shaaquineta.

<sup>34</sup> Naain, Egiptoote, inaderaain necairichanaa caun chanaaure canu cachaaurura. Nii jaunna, coaracauna jaun, cau faaun, nii caje jianacoo tenajaanune coinara. Nii jaunna, eletoareeuni Egiptoo, jelai caje canu cachaauru rocoeraanuquera.’ nae Cana Coaunera, Moisesa rai.

<sup>35</sup> Jauriha nejeein Moisesa batohin: ‘Chaate, canacaanu curuaanaa nuque, ii cocoaain, nii coaranuque eletoaeta.’ naauruhalu natiin jetaote, esinaae raujiriin letono aanjera que Moisesa letoerate Cana Coaunera, nii enuha laajoiri-iihanei cataaun ecocohin cocoaain, nii cairichaeriina-jaauruha Egipto cocoaichacurune caje Isaraelitaauru rocoeranu que.

<sup>36</sup> Nii jaun jetaote, nii Moisesa, Egipto caje cana inoasihuru rocoera nelu jetao, nii atane que, itolere ichaaain cachaauru notajaain. Nii Egipto rohan nena Cucuana Lana-jaijihu jetaote, nii rai biji achune tochataain jetao, aiha berone rijijieein, nii cucuana tabai jacoraain, acaterate, jera jaoorua Isaraelitaaurune coina. Chaen cache areroo-desieretoo jenachoonca jaanacaneein, itolere acaune maajeein ecotein, itolere ichaaechajeein, cachaauru notaarejetelu jetao Moisesa.

<sup>37</sup> Nii Moisesa jetaote: ‘Leeinjiin inara cajete, ecooca cureein caa caletohane rijijieein Cana Coaunera letononeein rai nere beraneein neenicha.’ naain belu cana inoasihuru Isaraelitaauru rai.

<sup>38</sup> Nii Moisesatechu, cache areroo desieretoo nasaa nedaaauruha cana inoasihuru Isaraelitaaurune jana, jelai nii ichatane ucuuno-Sinaain ichoae ucuun iniin, Cana Coaunera letono aanjera aina erelu. Nitohaneinte, aanjera caje, nii cana rai Ichaonaa Tera Erenaa raain telu, cana inoasihuru rai, cana rai beeuruhane coina.

<sup>39</sup> Nitohaneein, nii raane coina, nii ichatane ucuuno que, siichoha Moisesane tonohana jetaote, renaatonorae lanaala, Egiptoo cauha cunaa jecurelu jetao cana inoasihuru Isaraelitaauru.

<sup>40</sup> Nitohaneein jetaote, acaauru rai saseredote inoaesi-Aaroon rai: 'Cha que chaainti nerurujae, Egipto batane caje canacaanu rocohin, canacaanu uhaeralu- Moisesata. Nii jaunna, canacaanu rai, ecaantooru rijijieein chosichuru ichaaine jerichaanu, cana coroatajanecuruhane coinara.' naauruhana jaun jetaote,

<sup>41</sup> jeriha Aaroone jaun, baca calaohi rijijieein ecaanto ichacure. Nii rai nihane jetaote, lenone sohin teeure, Cana Coaunera rai ichacuruhane rijijieein. Nitohaneein jetaote, acaauru biji que ichanohin- ecaanto- chosi rai, lenone nihane sohin teein, beseta bitoera tocohaneein ichaain, ecaanto- chosi coroaecure.

<sup>42</sup> Nii coaraane jaun jetaote, acaauru aina obajein, coroatajanenaacane jiaane Cana Coaunera, acaauru chosichuru niha acaauruhacha bei- dedeu nenacaauru, enoto, atene, arasijie, naaonjoainunruhacha coroaecuruhane coina. Nitohanihane jaun jetaote, nere bera inoaesihuru que aitiin laenaeratein:

'Israelitaauru:

coatia carai, nii jenachoonca

jaanacaneein, cacha areroo- desieretoo neeichene bana,

carai lenone sohin nihane

terejetoheeicheluta.

<sup>43</sup> Nete, acaihanejeein biji que

cachaauru ichanohin inara chosi

niha- inaraacha bei- Moloco raiichate,

lenone nihane sohesojoein, terejetocoichelura.

Chaen, Refaan neein curuajai

inara raajenihane inara chanaa-

inara chosi neein inaraacha bei- arasijie,

naaonjoai raaichate terejetocoichelura.

Nii jaunna, inara atane caje inara rocohin,

naain Babiloniaun bujuau inara sitareeunnicha.'

naain, nii ajiniha bihalu Cana Coaunerana jaun, nii rijito-

joein laenacurelu nere bera inoaesihuru.

<sup>44</sup> Nitohaneein nere tonoraelanaala, que jaolecooruhane saijieein jetaote, Moisesa que coarateein jetao, canii cari caje nena loreri Taberenacolo icharate Cana Coaunera, nii cacha arero- desieretoo amuhemuhecuruhane jaunru, acaauru jiniichaain, nii Taberenacolo amaauruhane coina. Nii taberenacolo jetaote, acaauru rai telu Cana Coaunera, 'Naaajoaainte cana aina ne- Cana Coaunerara.' naain itolere bana coacuruhane coina. Nii asaaete, nii ajeri que tein- laenanohineein nena Cana Coaunera Ere rucuhecure jetao.

<sup>45</sup> Nii Taberenacolo jetaote, inae oha Moisesane baiha cara- jaain neein, uhaaurelu nii Moisesa coreenraniha nena Joseo

aina cunacaauru- cana inoaesihuru. Nitohaneein jetaote, nii acaauru rai Cana Coauneraacha tenaa jerei- atane que nenacaauru aina, sonohanaque nichaauraain, acaauru amuritoorelu, acaauru caje nii atane raauruhane coina coroatajanaaaca Cana Coaunerana jaun. Nitohanihalu jetao, enoha curuaanaa inoaesie Rabirinereein tiaaajoaain.

<sup>46</sup> Nii Rabiri coroatajaniha, itolere que Cana Coaunerane jaun jetaote, turuha cana foeratera Jacobo Curuaanaa- Cana Coaunerane jaannu que Teenforo ichana jerelu niqui.

<sup>47</sup> Ne jetaote, icharatiha Rabirine caohatiha Cana Coaunerana jaun ichaenelu. Nii janate, inae oha Rabirine baiha jetao, nii Teenforo icharatelu nii calaohi Salomoon, Cana Coaunera turunajaanu que.

<sup>48</sup> Coatihani niqui, cacha ichanohineein nena loreri Teenforo asaae ichaohi niqui Cana Coaunera. Nitohanihane jaunte, rai nere bera inoaesihuru que beratihalu Cana Coaunerane jaun, nii aitoroatihane rijitjoein:

<sup>49</sup> ‘Caa dedete, canu nelaurihana jaan ne. Jana chauratanete, catiha rorine.

Chaen techu, chatohanai lorerina ichacurure, cuu nebetaaanune coina.

<sup>50</sup> Tana, canu, caa itolere coaunaain nihanulune coitucuuruhaneta,’ naa Cana Coaunerara.”

naain beurelu rai nere bera inoaesihuru.

<sup>51</sup> “Nete, leecha Cana Coaunera coitucuuruhi rijijieein, nere tonorana jereneeichene jaun, urichosae rijijieein neeiche, aohana jereneeichene jaun. Aiha, inara inoaesihurune rijijieeinte, inara suujuatenaa jeriha, Cana Coaunera Suujuene jana, aina nejerateein, aohana jereneeichera.

<sup>52</sup> Satiin inara inoaesihurute, Cana Coaunera Ere bera inoaesihuru cairichaaeriin, sohin jaoorurejetelu. Jerichaneejin techu, nii turunaalu- cana coroatajaneraanu que Cana Coaunera letono turu beebejeeurerane maajeein, sohin jaorelu nii inara inoaesihuru. Nii esinaae rauhijiriin, beeuruhane rijijieein turuhane janate, que nererojoecaain, nere aohana jerelanaala, colurujueein, sohin joerateein neechelu- inara netonai.

<sup>53</sup> Inara inoaesihurutejian niqui, laenanohineein Cana Coaunera Ere raarelu, laenarateein letono aanjera que, teratiha acaauru rai, Cana Coaunerane jaun. Nete tonorana jerecurenelu inara inoaesihuru. Nii inara netonai nihanatiin, tonorana jereneeichera,” nae jetao acaauru rai Eseteba.

### *Eseteba sohin jaooruhane*

<sup>54</sup> Niritoha acaauru rai Esetebane jaun jetaote, obajeein, corajeein nujuae cari calaature.

<sup>55</sup> Nejetaote, Cana Coaunera Suujue suujuatenojineein, najabaracaain dede coaraa Esetebane jana jetao, neyoracaa dedene jaun jetao, Cana Coaunera coarae. Nitohaneein coaraane jana jetaote, Cana Coaunera raotono nichajai que chujuheque Cana Coaunera Calaohi Jesoso.

<sup>56</sup> Nii jaun jetaote:

“Coaracuchejian inara netonai. Nota, neyoracaa dedene jana, Cana Coaunera raotono nichajai que chujuheque nii canaacha cohajeilu- Cacha Calaohineein nenea Jesusora,” naa acaauru rai Esetebane jana jetaote,

<sup>57</sup> nuricho mucuutaain aohana jerelanaala, nujuaae soaisohaain, codoonetiin mucuure.

<sup>58</sup> Nitohaneein mucuhin jetaote, nii nese caje naain amaain, acaauru cajione buuri rocohin jetao, leeinjiin cacha- Saoroneein curuajai que nii acaauru cajione buuri beraichateein jetao, ajeri que Eseteba bodoosiin sohin atinaaure- nii coulurujueracuru.

<sup>59</sup> Nitohaneein, ajeri que bodoosijieeuruhane jana jetaote:

“Canu Curuaanaa Jesoso, cacorataaneeun. Casuujue raaura,” naain Jesoso bajaee Eseteba, rai suujue raane coina.

<sup>60</sup> Niritohane baiha, semotorohaain auhaquuin:

“Canu Curuaanaa, jiaonriha catohaneein caetein, naosateeuruhane ujuaiteei acaauru quenera,” naain inae ohe Eseteba.

## 8

<sup>1</sup> Nitohaneein, Eseteba sohin jaooruhane jana jetaote, rautatelu nii Saoro.

### *Jesocurisito ranojoihunru roheca Saorone*

Nii bana caje coauneein nunuhetein jetaote, satiin, Jesocurisito Ere esenetaain tonoraeraauru aina nejeratein, cairichaaerihure Jerosaleeun. Nii jaun jetaote, ita caje ri-aaneein, Jerosaleen caje soroore satiin Jesoso esenetaeraauru, Jodea batane sacutaain, satiin, Samaria batane sacutaainchuru cuhin soroore. Jana, nii afosotooruhacha jetaote, nii Jerosaleeun nedaaure.

<sup>2</sup> Nitohaneein Eseteba atinaauruhane jana jetaote, mainajeein coisiin conautecure caohachaaain rai suujua coaraain ichaonacaauru cachaauru tabaauru.

<sup>3</sup> Nii nainiha jetaote, Jesoso esenetaain- tonoraeraauru rohecaain, lorerichuru naineein enohin, enecuru aina curuataain- quichaaauru tararaain amaain, caresero cuhane teratenajaain, cairichanajae Saoro.

### *Jesoso beebejeuruha Samariaune*

<sup>4</sup> Nitohaneein, rohecanajaauruhana jaun, nii Jerosaleen caje soronacaauru jetaote, turuuruna jaunru naineein,

jianacoo osa caje- cana mitaeraneein niha- Cana Coaunera Calaohi- Jesosone beebejeure.

<sup>5</sup> Nii jana, leinjiin acaauru caje nenea- Ferifi jetaote, nii Samaria batane que leeochoauru nese amurijiriin nenea nese tabaihu cuhin jetao, inae cuu turuhin, cuu nenacaauru rai, Cana Coaunera Calaohi- Jesocurisito beebeje.

<sup>6</sup> Nitohaneein cuu turuhin Jesocurisito beebejiha Ferifine jana jetaote, satiin netaojiaain, niicha beebejei rautatiin aonajeeure- cachaauru, chaen itolere cunaitenacaauru rautaane coaracuruhana jaun.

<sup>7</sup> Nitohaneein jetaote, rai suujue cuhane coitucuchuichuru sirichuruha tabaaurune, acaauru caje sitaane, auhaaahaquiin, acaauru caje amuure nii coitucuchuhichuru. Chaen jihuronacaauru nihanatiin jetaotechu, rautaain, bacosacuru nihanatiin- rautaa Ferifine jaun jetao,

<sup>8</sup> neebana nitohanai coaracuruha, nii neseeuna jaun, cojoelatiin coarajeein, rachoojoeure- satiin nii nere aonaa turunacaauru cachaauru.

<sup>9</sup> Nii jana jetaote, cuu ne- leeinjiin cacha- Simoon neein niicha curuaatehuri- benane. Aca jetaote, batohi aina, Samaria cocoaichacuru coritae jetao, “Aca jete, itolere cacha amurijiriin, itolere que, jataain nelateeineein ne,” naain esenetaauru cachaaurune coina.

<sup>10</sup> Nitohanihane jaun jetaote, cocoinanacaihuri nihanatiin, coritaa, rai batohi ainana jaun, rautatiin esenetaain, aonacuruhane jaun: “Caa cachate, Cana Coaunera letono nera,” naure jetao, nii Simoon que, satiin cachaauru, cocoinanacaihuri, naaonjoaihunri.

<sup>11</sup> Nitohaneein jetaote, enanecoriin que airijiin esenetaain tonoraare, rai batohi aina, acaauru coritaana jaun.

<sup>12</sup> Nete, nii saijieein Ferificha beebejei- Cana Coaunera Cojoanona, Cana Curuaanaa Jesocurisito, naaonjoaain esenetaauruhana jaun, quichauru, enecuru, naaonjoaihunru- nebaotisaerateeure.

<sup>13</sup> Nii jaun jetaote, nii- benane- Simoon netonai, esenetaain nebaotisaerateein, Ferifi corihaniha amuhemujue, itolere ichaain cojoelanaacojoai ichaa Ferifine coaraana jaun, cojoelatiin.

<sup>14</sup> Nitohaneein, inae Cana Coaunera beratenojoin esenetaain, tonoraauruha- Samaria cocoaichacurune coitucuhin jetaote, acaauru rene, Fedoro, Joaan, naaonjoaihunri letoaaure- afosotooru- Jerosaleeun nenacaauru, nii Samaria nenacaauru coaraa cuuruhane coina.

<sup>15</sup> Nitohaneein, letoanajaauruhana jaun cuhin jetaote, acaauru rene turuhin, nii Jesocurisito esenetaain- tonoraer-

aauru rai, Cana Coaunera bajaauere, acaauru coroatajanein, rai Suujue letoaa Cana Coaunerane coina,

<sup>16</sup> jaiti leeinjiinejeein- acaauru caje nena ichoae fauheniha- Cana Coaunera Suujuene jaun, raujiaaincha- Jesocurisito corenihacha- baotisaain cojounacatenohineincha, neeuruhana jaun.

<sup>17</sup> Nii jaun jetaote, acaauru couturi ichoae, biji meracaain Cana Coaunera bajaauruha- Fedoro aina Joanne jana jetao, tajiha, acaauru ichoae fauha uhe, Cana Coaunera Suujue. Nitohanein jetaote, Cana Coaunera Suujue rauure- Samaria nenacaauru- Jesocurisito esenetaeraauru- cachaauru.

<sup>18</sup> Nitohanein, acaauru ichoae, biji meracaain, Cana Coaunera bajaauruha afosotoorune jana, fauha uha, acaauru ichoae, Cana Coaunera Suujuene coarajihana jaun jetaote:

<sup>19</sup> “Carai netonai, nitohanai teeuchena, inara corete coriqui quete, chunicoa- cacha ichoae nihanatiin, cacoi meracaain, Cana Coaunera bajaanune, rai Suujue tiha Cana Coaunerane coinara,” naa acaauru rai Simoonne jana jetaote:

<sup>20</sup> “Coaraain, nii ichoriqui aina jiniiquiin nitajeeura. Inacojoein chachu, ‘Coriqui que jecha, coretenacaine Cana Coauneraacha tenojoin,’ naai chachu inacojoeincha.

<sup>21</sup> Esinaae rauhijiriin, esenetaain nere tonoraeneeine jaunte, ichei nii tenaa nainene Cana Coaunerara.

<sup>22</sup> Nii ishujua baaso jiaanein, Cana Coaunera bajaaute, ichei suujua acatena nainihane, suujua acatemiin Cana Coaunerara.

<sup>23</sup> Jataainte, banejelanaala necoelaain, osa tabai que nesaruhi rauhineerilanaalara,” naa Fedorona jaun jetao te:

<sup>24</sup> “Atiin carai, Cana Coaunera bajaauere, nii aitohine tocohaneein, chatohanein caetein niha Cana Coaunerane coataara,” nae jetao, nii benane- Simoon, Fedoro rai.

<sup>25</sup> Nitohanein, nii Samaria neseeu, Cana Coaunera Ere beebejeeuruhane baiha jetaote, nii Samaria batane sacutaain nenacaauru- neseeu cuhe cujeein, Cana Coaunera Calaohi Jesocurisito que Erenaa Caohati beebejeeuruane baiha jetao, Jerosaleeun cauha cuure Fedoro, Joaan, Ferifi, naaonjoaihunri.

*Ferifi aina, ita que tacaauruha Etiopiha cocoaichane*

<sup>26</sup> Nii baiha jetaote, rai letono aanjera que Ferifi letoaera- tein:

“Chajaain nimichuhin enoto mitu uuri- cana raotono nichajai jelson cuhin, naain Jerosaleeun caje- Casau cunaa bero cuhane cunihura,” nae jetao, Cana Curuaanaa letono aanjera. Nii bero naitoonjoate, cacha areroo jelson situ- naane.



27 Niritoha rai aanjerana jaun jetaote, nimihoritiin cuha Ferifine jana, bero cuhane leeinjiin cacha- Etiopiha cocoaicha aina, ita que tacaure. Nii Etiopiha cocoaicha jetaote, Etiopiha batane curuaanaa eneneein nenea rai- coriqui be- raichaneein nenea ne. Aca jetaote, Jerosaleeun cuhin, Cana Coaunera coroaeejin bajaee bajaecane caje,

28 tajiha cabario que tararaeraain nenea namunaja cuhane lauhequuin, Cana Coaunera ere bera inoaei Isaihasicha lae- nai quiricha ereretajeein cauha cue, jelaiha rai nataneu.

29 Nii jana jetaote, Ferifi rai: “Nii cacha rohan nichuutaain ereeura,” naa rai, Cana Coaunera Suujuena jaun jetao,

30 rohan nichuuntaa Ferifine jana jetao, Cana Coaunera Ere bera inoaei- Isaihasicha laenai quiricha ereretate- nii Etiopiha cocoaichane jana jetao:

“Nii iicha ereretai aonaaina, coitucuhi,” naain caje bajaee- Ferifine jana jetaote:

31 “Aihaaunta. Cha cajena coitucuhin aohanreeunta. Niha chunei carai berane coaalanaalata. Chajaute iniin cau caro- han nelauriaera,” naa Etiopiha cocoaichane jaun jetaote,

32 iniin nelauriaain, nii niicha ereretai jelai coaraa Ferifine jana jetao:

“Carenero chacuruhane rijijieeinte, amaa cuurureein, sooruhane coina.

Nii rijijieein techu,

nujuin saaujiha saaujichane jana inauhene aonajiha carenerone rijijieein,

inauhene aonajenajaain,

caohachanaainejeein erenereein.

33 Nitohaneente

batohin joareein coulurujueein,

cojoaisi aina ajaena rocohin jaonaa rijijieein,

sohin jaoorureein.

Nitohaneein sohin jaooruhane jaun,

nerihaain rai neferate,”

naain *profeta* Isaihasiacha laenailu ereretaain coaraane baiha jetaote, Ferifi caje:

34 “Atiin carai beeuna coitucuera. Cha quena aite, raaje ne quena aitoha caa Quiricha laenaera *profetate*, aini- hane leecha quena aitohate,” naain bajaee, nii Etiopiha co- cocoaichane jana jetaote:

35 “Jesoso sohin jaoorurichaaine quete aitera,” naain jetao, nii Cana Coaunera Quiricha Inoaei- Etiopiha cocoaichacha ereretai nunuhe caje coauneein nunuheteein jetao, Jesoso que Erenaa Caohati beebejiha Ferifine jana,

36 niha acauna jaan rohan nichuuntaauruhana jaun je- taote, Ferifi rai:

“Caute ne acaura. Taacha nainereei, cau canu baotisaain, canu coujounacateeineta,” naa nii curuaanaane jana jetaote:

<sup>37</sup> “Ichoichana aina cutaain, esenetainete, naainera,” naa Ferifine jana jetao te:

“Cana Coaunera Calaohi niha Jesocurisito ne esenetaa-nura,” naane jana jetao,

<sup>38</sup> nii acauru amaera- cabario que taraeraneein nenea suraerateein, jiniiquiin fauhin, acauhana fauha cuure. Nitohaneein fauhin jetaote, baotisaa Ferifine jana jetao,

<sup>39</sup> inae acau caje inihuruhane jana jetao, Ferifi amaa- Cana Coaunera Suujuene jaun jetao, inae coaraene- nii curuaanaa. Nejetaote, raotojoein, rachoojoein bero cuhane cuujue.

<sup>40</sup> Nitohaneein amaa Cana Coaunera Suujuene jaun, cuhin jetaote, Asotoo turuhe Ferifi. Nitohaneein Asotoo turuhin jetao, caje coauneein, nunuhetein, nirijieein cuujue cuujein, Sesareea turuhanereein tiaain, neseuru neseuru turunajauru, Jesocurisito que Erenaa Caohati beebejeein, cuujue jetao Ferifi.

## 9

### *Jesocurisito esenetaeraneein nerotoha Saorone*

*(Ich 22.6-16; 26.12-18)*

<sup>1</sup> Nii tonohana jetaote, Cana Curuaanaa ere esenetaain, tonoraeraauru que, nejeratihajeein, atinanaana jereein sacuhane jaun jetao, saseredotecuru curuanaa coaraa cue Saoro,

<sup>2</sup> caje nitohanai ichana nainihane jaan- cocoiricha bajaane coina. Nii rai cocoiricha teeuruhane, aina naain Damasoco cuhin, ucuaae nenea ita taojiaain Cana Coaunera bajaauruhane jaan sinacoca asaee enohin, nii Ena Nena Ichaonaa esenetaain tonoraeraauru ariin, quichaauru aina curuataain, enecuru tararaain uhanajaa caseteconein Jerosaleeunne coina.

<sup>3</sup> Nejetaote, inae nitohaneein ichaain cuujiha, Damasoco nese catainajeein, turuhelalajiha, Saorone jana jetao, luhecotariin conotiin, dede caje jilenete Cana Coaunera Cono.

<sup>4</sup> Nii jaun jetaote, coasiha atane ichoae nalatoha Saorone jana jetao:

“Saoro, Saoro, chanuna jataain caque nejerateein, ca-cairichaeriin ichaohi,” naain toniha erenaane jana jetao:

<sup>5</sup> “Chaneei inaate Curuaanaa,” naain bajaa Saorone jana jetaote:

“Canuna, nii nejerateeine jaan neein iicha cairichaerii Jesuso neeunra. Canu esenetaeraauru cairichaa aaine niha-natiinte ichaajenihane ijiabereeo- cairichaa nii aaicha,” naa jana jetaote, coasiha rijijijihanein:

6 “Chatohanai ichacaaunne jereeite, Curuaanaa,” naain bajaa Saorone jana jetaote:

“Nimichuhin nichaauraain, nii neseeu turunihunte, cuu ichei, iicha- ichanenenu beeuruhinera,” naain tonorae, nii erenaa.

7 Niritohane jaun jetaote, nuricho que aonacuruha acaauru netonoaine jaun, nesooneetoore, nii Saorocorihaniha cunacaauru cachaauru, nii erenaa aonacuruha natiin, nii chuni cacha coaracurenihana jaun.

8 Nii jana, atane ichoae tocoha baiha nimichuhin, nenotaain coaraa Saorone jana jetaote, caohachanainejeein conohene rai nota. Nii jaun jetaote, inae caohachanainejeein conoheniha rai notana jaun, rai biji que mucuhin, amaauruha Damasocone jana jetao,

9 cuune nichata janohin, maosaneein notaelanaala, nii lenonelanaala, nii acau nihanatiin coelanaala.

10 Nitohanihane jana jetaote, nii Damasoco ichoae leeinjiin cacha- Ananihasineein curuajaain. Acate, Jesocurisito Ere esenetaain, tonoraera ne. Nii jetaote, notajae Cana Curuaanaa Jesocurisito, rai irihane coina. Nitohaneein, notajaain jetaote:

“Ananihasi,” naain bajaane jana jetao:

“Cauna neeura Curuaanaa,” naane jana jetaote:

11 “Chajaain nimichuhin, nii bero- Rauhijirineein curuajai cuhane cuhin, Jodasi loreri asaae enohin, Taroso caje unaa leeinjiin cacha- Saoroneein curuajai bajaaura. Acate, Ofa-Cana Coaunera bajaebajaecane jana, notaacane jaun,

12 coaraane jana, leeinjiin cacha- Ananihasineein curuajai-turuhin, nichoae rai biji merecae, nacoauneein conoha rai notane coinara,” naa cana Curuaanaa Jesocurisito, Ananihasi raine jana jetaote:

13 “Netejian, ‘Nechu aansai- ataibiaen rijijieein niha,’ beeurera. Nitohanihane jaun jete, Jerosaleeun, ii ere esenetaain- tonoraeraauru cairichaaeriin ne, naauruha, coitucueracuru natiinta.

14 Coaraaunachuhinti, saseredote curuaanaa caje, niicha rocohi erenaa uhaa aina, satiin- ii ere tonoraeraauru mucuhin, caseteconeein, amaain tiha, saseredotecuru curuaanaa raine coinaneta, Curuaanaa,” naa Ananihasine jana jetaote:

15 “Chajaaincha cunihura. Nii cachana raain neeun, nejelau ataneu- nenacaauru rai nihanatiin, canu ere beebjeein nihane coinara, itolere, acaauru curuaanaacuru rai nihanatiin, canu ere beebjeein, chaen, Isaraelitaauru raine maajeein beebjihane coinara.

16 Acaentonaite, canu ere beebelijane coreniha, necairichanaa coaraa cureein, baneje lanaalara,” naain letoaa Cana Curuaanaane jaun jetaote,

17 nii niha Saorone jaan- loreri asaae turuha cue Ananihasi. Cuu, loreri asaae turuhin jetao te, nichoae biji merecaain:

“Ichaso Saoro, nii uhina jaan bero cuhane, ichei ecoona Cana Curuaanaa Jesusote caletoe, ichoae cacohi merecaain bajaanune, enacoaunein conoha inotane, ii suujueniha enoha Cana Coaunera Suujuene coinara,” naa Ananihasine

18 rijieoritiin, jeranu nota caje naluha- ate reje rijinanaine jana jetaote, inae conoha rai notana jaun, nimichuhin nebaotisaeratein, inae cojounacatenohinein ne- Saoro.

19 Nii baiha jetaote, inae lenonein suujua nunaaain, nii Damasoco nenacaauru- Jesocurisito ere esenetaain- tonoraerauru aina ne, janojanoheriin.

*Damasocoo Cana Curuaanaa Jesuso Ere beebelijha Saorone*

20 Nii baiha jetaote, ita taojiaain- Cana Coaunera bajaauruhane jaan- sinacoca asaae enohin, cachaauru rai, esinaae rauhijiriin, Cana Coaunera Calahinein niha Jesusone beebelijha Saorone jaun jetao,

21 cojoelatiin coarajeein:

“Taajian, caa cacha, Jerosaleeun, Jesuso aina cuaain Cana Coaunera bajaebajaeracuru que nejeratein, cairichaaerina- jaain nenea nihaneta. Tana, caa jeelai cacha coaiten cau turuhalu, Jesuso esenetaerauru jitariin tararaain amanajaain, saseredotecuru curuaanaacuru rai tenajaane coina neta,” naaure jetao, cojoelatiin cuu nenacaauru cachaauru.

22 Ne jetaote, niritiin cojoelatooruhane jana, nii que rutaain nelararajiaain laraajiin, canaacha cohajei- Curisitonein niha Jesusone beebelijha Saorone jaun jetao, rai suujua auhacaure Damasocoo nenacaauru- Jorioocuru.

*Jorioocuru caje, nichotiha Saorone*

23 Nii nitohanein araai janohin Damasocoo niha Saorone jana jetaote, ita suujau tacaain, Saoro sohin jaonaa jerecure Jorioocuru.

24 Ne jetaote, nii sohin jaonaa jerecuruhane coitucue Saoro. Nitoanein, que necousuujuaain jetaote, ajeri caje ichanohinein nenea, nii nese tionoritiin nenea rijia ucuuneti bacuu- juaniha, janotiinetojoein beraain cohacure, mituha cuhane mucuhin amaain, sohin, jaoruhane coina niqiu.

25 Ne jetaote, omari seeonjoa cuhane tein jetao, janotiin tijchaain, loreri chaje nichajai que nii nese tionoritiin nenea

rijia bujuaniha faaure Jesocurisito ere esenetaain tonoraeraauru, nii nese caje mituhin nichotihane coina. Nitohaneein jetaote, onaa caje nichote Saoro.

### *Jerosaleeun turuha Saorone*

<sup>26</sup> Nii nitohaneein nichoteein jetaote, inae Jerosaleeun turuhin, cuu nenacaauru- Jesocurisito Ere esenetaain tonoraeraauru aina netaojiana jeriha Saorone jana jetao, coasiha netaojiana jerecurene, inae acaentonoain, Jesocurisito Ere esenetaain- tonoraeranein nihane coitucuhin esenetaaurenihana jaun.

<sup>27</sup> Ne jetaote, afosotooru rene Saoro amaain: “Naaonjoaain jetaote, bero cuhane cuujihane jana jetao, notajaain, rai erelu Cana Curuaanaa Jesocurisitora. Nitohanihane baiha jetaote, chaque tonajelanaala, nii chaque casilanaala, nii Damasoco nenacaauru rai, Jesocurisito Ere beebejera,” naain acaauru rai, be Berenabeen.

<sup>28</sup> Nitohaneein acaauru rene turuaain, acaauru que coitucueratiha Berenabeenne jaun jetaote, inae raauruha raotjoein, nii Jerosaleeun nenacaauru afosotooruna jaun, cuu acaauru aina neein amuhemujuein, chaque tonajelanaala, cuu cachaauru rai,

<sup>29</sup> Cana Curuaanaa Jesocurisito Ere que ereerejeein, Curieco ere inaaunrera Jorioocuru aina, ita cotaicha rijitiinchuru, ereereca Saorone jana jetao, sohin jaonaa jerecure, nii ita cotaicha rijitohane jaancuru- Jorioocuru.

<sup>30</sup> Ne jetaote, nii sohin jaonaa jerecuruhane coitucuriin, Sesareeau, Saoro amaain jetao, caje coauneein Tarosoo letoaaure, Jesoso Ere esenetaeraauru.

<sup>31</sup> Nii inatiin jetaote, Jodea, Calileea, Samaria, naaonjoaihunri batanecuru nenacaauru que, Jesocurisito Ere esenetaain- tonoraeraauru, jeelai choae jauhecotojoeriin, raotjoein, nii baaso coacuelanaala, Cana Curuaanaa Jesoso Ere tonoraare, acaauru coroatajaniha, Cana Coaunera Suujuene aina nejeeotejeein.

### *Nerautaa Eneasine*

<sup>32</sup> Cajianeein amuhemujuein, Jesocurisito Ere esenetaeraauru rene bedaenihane ucaetoha jetaote, Lidau nenacaauru- Jesocurisito Ere esenetaeraauru rene netonoai, turuha cue Fedoro.

<sup>33</sup> Nii jana jetaote, cuu ne, leeinjiin cacha- Eneasinein curuajai. Aca jetaote, fosa ajaanacaain, niirijieein amuelanaala, nenajauhacha tocoecooha, mucuha jiuronane jaun jetao:

34 “Eneasi, Jesocurisitote ii rautareeincha. Chajaain nimichuhin, chela seriin amuunra,” naa Fedorone jana jetao, nii rijieeoritiin, nimichuhin nela seriin amue- Eneasi.

35 Nii aichejetenihane baiha nimichuhin, amuha Eneasine coaracuruha- satiin- Lidau nenacaauru, Saroon nenacaauru, naaonjoaihunrine janate, Cana Curuaanaa Jesocurisito rano- joihunru neein nerotojoacoaure.

### *Oo caje ichanaa Dorocane*

36 Nii bana jetaote, nii Jofe neseeu nelu, leeinjiin Jesocurisito Ere esenetaain- tonoraera- Tabita neein curuajai. “Tabita” naane jetaote, Curieco ere cuhane, Doroca ne. Nii ene jetaote, caohachanejeein- caohacha ene neein ichoae. Nii jetaote, chaaelai latecuruha cairichaaaurine, coroatajanein, naaonjoae.

37 Nirijieein, ne lacuritiin jetaote, cunaiteein. Inae caun ohane jaun jetao, rai jabereco culejeein, naain ucuun nenea loreri coroata coarana ichoae- ucuha cuhane, rai jabereco rucujueein teure.

38 Nii jana, Jofeu caje, coriaae neniha, nii niha Fedorone jaan- Lidane jaun jetaote, cuu niha Fedorone coitucuruha Jesocurisito Ere esenetaeraaurune jaun jetao, coroatajai cacha letoaaure:

“Chajaau jera, Jofeu luhecotariincha,” naauruha rene turuhine jaun jetaote,

39 acaauru aina cue Fedoro. Inae nii niha ene jaberecone jaan turuhin niha Fedorone jana jetaote, curuaacain codohaquiin chanaain, Fedoro que, jaiti ichaohane bana- acaauru cajione niicha tococoi- acaauru rai niicha tei obirichurune maajeein coarateeure- autanaauru.

40 Nii jana jetaote, jelai caje jitariin mitanajaain, nii ene jabereco rohan, neseonraain jetao, Cana Coaunera bajaain, nii ene jabereco coarajeein jetao:

“Chajaain, nimichuura, Tabita,” naa Fedorone jana jetaote, nota toretaain Fedoro coaraain, nelauhithane jetao,

41 rai biji que mucuhin, michuhitoha Fedorone jana, nichaauraane jana jetao, satiin Cana Curuaanaa Jesocurisito Ere esenetaerauru, satiin, nii autanaauru aina curuataain, cotihanajaain jetao, jabereconein chujuriaain acaauru que coarate- Fedoro.

42 Nii nitohanihane coitucuhin jetaote, Cana Curuaanaa Jesocurisito Ere esenetaain tonoraare- nii Jofe neseeu nenacaauru- arajiin cachaauru.

43 Nitohaneeinte, araai janohin, nii neseeu ne Fedoro, canii cari rucuhera- Simoonneein curuajai cacha loreri asaae.

# 10

## *Corenerio aina, Fedorone*

<sup>1</sup> Nii jana jetaote ne, leeinjiin cacha, soondarooru curuaanaa- Corenerioneein curuajaain, Sesareea neseeu. Nii jetaote, saota fashanei Romanocuru soondarooru, Italia cocoaicha neein acaauruhacha curuaatei, lefashai-curuaanaa cafitaan neein ne.

<sup>2</sup> Aca jetaote, niqii Romanoneein ne. Nejetaote, atiin rai sinijiera, rai bereecuru naaonjoaihunri aina jiniiquiin, jataain Cana Coanera ere tonoraeraauru ne. Aca jetaote, cairichainein nenacaauru- Jorioocuru rai nihane, coriqii nihane tee tejeein, coroatajanenajae. Chaen jetaotechu, in- etono janonaa bana, Cana Coanera bajaebajajeein ne.

<sup>3</sup> Nii jaun jetaote, letono anjera que, coarate Cana Coanera, sona nichae.

Nii jana jetaote, coarajihane jana, nii nihane jaun turuhin enohin: "Corenerio," naa nacatiha turuhine jana jetao,

<sup>4</sup> cuu anjera coaraain, nesooneitiin:

"Cha ichei ichareeunte, Curuaanaa," naain tonoraa Corenerione jana jetaote:

"Bajaebajajeein neeine aonaa Cana Coaunerara. Chaen techu, cairichaihuru coroatajaneeine coaraain, satiin cao- hacha ichaaine rautate- Cana Coaunerara.

<sup>5</sup> Aihana jaun, Jofeu cacha letoaaute, leeinjiin cacha- Simoonneein curuajaain nenea- Fedoro cotihaca cuhinera.

<sup>6</sup> Nii cuu nenea cucuana auhaniha loreriquiin nenea- jacari nojoenlain rucuhera rijitocojoai curuajai- leeocho Simoon loreri asaate nera," nae jetao, rai Cana Coanera letono anjera.

<sup>7</sup> Niritohane baiha, inae amuha nii aina erenaa- Cana Coanera letono anjerane jana jetaote, coroatajai nere tonoraeraauru, chaen leeinjiin soondaro- Cana Coanera ere tonoraain- jataain Cana Coanera coitucuera rai suujua rijit- ojeein nenea niichuru cotijiaain jetao,

<sup>8</sup> rai aitoha Cana Coanera letono- anjerane bee jetao, Corenerio. Nitohanein, acaauru rai bihane baiha jetaote, letoanajae Jofeu.

<sup>9</sup> Nii cojoano jetaote, enoto chujutaelalajeein, turuelalajeein cuujueeuruha, Jofeune jana jetao, loreri janori macararo ichoae, ucuun iniha cue jetao, Fedoro, cuu Cana Coanera bajaane coina.

<sup>10</sup> Nii jana jetaote, rai banetojoe niha mijiitenane jaun jetao, lenonene rijitocojoaain jetao, Cana Coanera bajae, lenone enohalaauruha icharaaurune cohaca. Nii jana jetaote, notaaca Cana Coaunerane coina,

<sup>11</sup> neyoracaa dede bacuujuane jana jetao, caje mituha uhe, shojoera tocohaneein- jaraantiin. Nitohaneein ecocohin jetaote, tajiha fauha uhe, jena turiin rulunojohinee.

<sup>12</sup> Nii jana, coaraane jana jetaote, nii shojoera tochanai nainecojoaain jetao, uhe itolere cautenu rijihuru, atane ichoae terei lenone, itolere tajaacuru, itolere ataibinaae acanocuru, itolere Jorionecuruhane lenone niheichuru, naaonjoaihunri jetao, uhe nainecojoaain.

<sup>13</sup> Nii jana jetaote, coarajihane jana jetao dedeu toniin:

“Nimichuhin nichaaauraain, niichuru soote que lenonee- ichta Fedoro,” naain toniha dedeeune jana jetaote:

<sup>14</sup> “Chabana, Jorionichaanune lenonenihe i quinaa naini- haaunta, lanichana naini- haaunta. Nihei ataibinaae quinaa naini- haaunta, Curuaanaa,” naain tonora Fedorone jana jetaote:

<sup>15</sup> “Coa Cana Coauneraacha, couluunojoi que, ‘Calanichareta. Ataibinaae quinaa naini- haaunta.’ naain irihara. Jauriaate chuhisi niqui, nainenelu que lenonequichenera, nete inae enene, que lenonena nainequichene coina couluunoinera. Aihana jaun, Cana Coauneraacha coulucohi que, nainihe i niritiin ereeineta,” naain jetao, dedeu toni.

<sup>16</sup> Nitohaneein nichata saain ecoocane baiha jetaote, inae jelaiha dedeu iniha cue, nii shojoera tochanai.

<sup>17</sup> Nii jaun jetaote, nii que suujua rohecaain, cuu suujuaau ereerejein, “Chatohanai ichacaanne coinacha, catohaneein canotajae Cana Curuaanaata.” naain suujuaau ereereca Fedorone jana jetaote, turuure acuujuaniha nichatajai cachaauru Corenerio letonocuru, Simoon loreri bajaebajajeein.

<sup>18</sup> Turuhin jetaote, acuujuaniha netiin jetao, tonijiaain:

“Cauna niha caa loreri asaae, leeinjiin cacha- Simoon- Fedoronein acaauruhacha curuaatei,” naain jetao bajaare.

<sup>19</sup> Nii jana jetaote, cuu jaiti, nii rene ecoona que suujuaau ereereca Fedorone jana jetao:

“Aonaun, nichatajai cachaaurute ii ariirijiera.

<sup>20</sup> Chajaain nimichuhin, acaauru aina cunihu necoate- lanaalara. Canuna acaauru letoaaun ii renera,” nae jetao, nuricho rai Cana Coaunera Suujue.

<sup>21</sup> Nii jaun jetaote, fauhin nii Corenerio letonocuru- cachaauru coaraain jetao:

“Canuna- nii inaraacha ariirijiei neeunra. Chate raacheta,” naa Fedorone jana jetaote:

<sup>22</sup> “Canacaanu letoaa, canacaanu curuaanaa cafitaan Corenerione jaunne, uhacaanura. Acate, caohacha cachaneein, jataain Cana Coaunera ere tonoraeranera.



Nii jaunte, jataain que suujua acateein, belaihure satiin Jorioocurura. Acate, ii cotiharate, rai beein, que ii cotiharatiha Cana Coaunera letono- anjerana jaunra. Nii jaunne, ii cotihaca uhacaanu, nenajaun cuhin, iicha coitucui que rai ereeine, aonaane coinara,” naure jetao, Fedoro rai.

<sup>23</sup> Niritocuruhane jaun jetaote, nii notaaca Cana Coaunera que nainaan jetao, nii nihanejaan loreri asaae ranajae Fedoro, Jorionecureniha nii cachaaurune saijieein. Nii jaun jetaote, cuu aina sinihuruhane cojoanoo, cauha cuuruhane jana jetao, acaauru aina cue Fedoro, corianiha cunacaauru-Jofeu neseeu nenacaauru tabaauru- Jesocurisito esenetaeraauru aina.

<sup>24</sup> Nitohaneein cuhin jetaote, cojoanoo Sesareea turuha cuure.

Nii jana jetaote, le laurii naraaichuru, jataain belaichauru, naaonjoaihunri cotijiaain, acaauru cojoae-Corenerio.

<sup>25</sup> Inae turuha Fedorone jana jetaote, mituhin raain jetao, nacatiha neseonraain coroaeca Corenerione jana jetaote:

<sup>26</sup> “Nichaauraaura. Canu netonaina, ichejijieein cachaneein neeunra,” naain michuha Fedorone jaun jetaote,

<sup>27</sup> ereerejeein, enoha cuuruhane jana, cuu najiniha netaojiaain cohacure arajii cachaauru.

<sup>28</sup> Nii jaun jetaote, acaauru rai:

“Inarate raotojoein coitucuhiche, canacaanu Jorionichaanune, nejelau cachaauru Jorioniheichuru aina, netaojiaain nena nainenihacaanunera. Niheichu. Nejelau cache loreri asaae enonaa nainihaacaanuta, nitohane niha canacaanu ichaona jaunta. Nete, nii que, canu notajaain carelae Cana Coaunera, nabana chunein cache que jaolequiin, ‘Nechu aansai ataibinae,’ naain irihanu chunein nejelau cachaauru quene coataara.

<sup>29</sup> Nii jaunna, cacotijiaaichene rijijieein inauheneecha, cha que erelanaala uunra. Nii jaunna, ‘Chanunacha cacotijiaaurera.’ naain, coitucunaa jerichaaunne jaun, carai beeichene jereeeunra,” naain jetao, acaauru caje bajaee Fedoro.

<sup>30</sup> Nii jaun jetaote:

“Inae, jena janoha, enarijii, cau canu loreri asaae, cosinacaa casuri couu, canu ichaoneein Cana Coaunera bajaebajaecaun sonainane jana, jataain somajai que, cajionequiin, cau, caatiha neeorite-leeinjiin cachara.

<sup>31</sup> Nii cachate, carai: ‘Corenerio, bajaebajaequine aonaa-Cana Coaunerara. Chaen techu, cairichaihuri coroatajaneeine coarajejin, nii coacuhin corojee Cana Coaunerara.

<sup>32</sup> Nitohanihane jaun, cachaauru letoaaute, Jofeu, Simoonneein curuajaain nena Fedoro cotihaca cuuruhinera. Nii

cucuana auhaniha, loreriquiin, cuu nenea jacari nojoelaain rucuhera rijitocojoai curuajai-leeocha Simoon loreri asaaete nera.' naa carai nii cachara.

<sup>33</sup> Nii jaunne, nii rijieeoritiin ii cotiharateenra. Caohachate jataain ichaai uhincha. Aihana jaun, caute jiniquiin, Cana Coaunera notaracae nihacachera. Nii jaunna, canacaanu rai Cana Coauneraacha beratei que, ereeine aohana jerichaanura," naain jetao, Fedoro tonorae Corenerio.

*Nereretaa, Corenerio loreri asaae, Fedorone*

<sup>34</sup> Nii jaun jetaote, acaauru rai:

"Inae laen coitucuhanu, coatia nejelauneein, chunein cachaauru coaraain nihein, Cana Coaunerata.

<sup>35</sup> Jerichanejeeinte, satiin coaraain, naain coriajai ataneeu nenacaauru nihanatiin, nere tonoraane, rae Cana Coaunera, caohacha ichaain neeuruhanera.

<sup>36</sup> Nitohanihane coina, Israeli inamacooru rai, baaso ichaain, Cana Coaunera que nejeratenaa neein, niha cachane niha natiin, niha leeinjiin, nii rucuhera, raotojoeein neeu-ruha Cana Coaunera aina cachaaurune que beratelu Cana Coaunerara. Acate, Jesocurisitoneein- satiin Curuaanaaneein nenea nera.

<sup>37-38</sup> Inarate, cachaauru rai, baaso ichaain neeuruhane jianeein, nebaotisaerateeuruhane, raotojoeein acaauru raa Cana Coaunerane coina, biha Joanne coitucuhiche raotojoeeincha. Nii baihate, Nasarete cocoaicha-Jesoso baotisaa Joanne jana, nii Jesoso ichoae, rai Suujue letoaa Cana Coaunera, itolere ichaain nenea nainihane coinane coitucuhiche. Nitohaneein baotisaa Joanne caje coauneeinte, Jodea batane sacutaain, amuhemujuelu Jesoso, Calileea nunuheteente, itolere caohacha ichaain, moconajaera ichanohineein cunaiteein necairichanacaaurune maajeein rautaelura.

<sup>39</sup> Nii jana, canacaanune, itolere ichaain niha Jesusone coaraneein nihacaanu, aina amuhemuecaanulu, itolere Jodea batane sacutaain, Jerosaleeun nese sacutaain, naaon-joaina jaunra. Nitohanihane baihate, inae coroso que tein atinaaurelura.

<sup>40</sup> Nete, atinaauruhane jana, nichata jano cuhane, ichatelu Cana Coaunerara. Nitohaneein ichateente, canacaanu rai, ecoocane coina, letoae Cana Coaunerara.

<sup>41</sup> Coatia, satiin cacha rai, ecoohai. Leeinjiin canacaanu-Cana Coauneraacha janijii nii beraanu que- niicha ranojoi nichaanune raiichate ecooera. Nitohaneein oo caje ichanaa Jesusone baihana, aina lenoneein, aina acau cohacaanura. Inae inoaelu, nitohanihane coina, Cana Coauneraacha rano-johineein nihacaanulune jaunte,

<sup>42</sup> canacaanu letoae, itolere ichaonacaauru, onacaauru, naaonjoaihunri coaraanu que- nii Jesoso teein nihalu Cana Coaunerane beebjihacaanu, cachaauru raine coinara.

<sup>43</sup> Chaen techu, inoaelu najiinha caje coaauneein, nii Jesoso beebjeretocure, nere bera inoaesihuru: ‘Nere tonoraain esenetaeraaurute, baaso ichacuruhalune niha natiin, coreniha caseteco caje nichotiha cureeinha.’ naain beratihalu, nere bere inoaesihuru *profetacuru* que, aitiin Cana Coaunerane jaunra,” naain jetaote, acaauru rai beebje- Fedoro.

*Cana Coaunera Suujue raauruha Jorioonihichuru netonaine*

<sup>44</sup> Nii jana jaiti niritiin beebjiha Fedorone jana jetaote, nii satiin nere aonajeurerera choae, fauha uhe Cana Coaunera Suujue.

<sup>45</sup> Nii jaun jetaote, coarajeein cojoaelatoore, nii Fedoro aina unacaauru- Jesocurisito esenetaeraauru- Jorioocuru, Jorionihinchuru rai netonai, tenojoi niha Cana Coaunera Suujuene jaun,

<sup>46</sup> chaen, Cana Coaunera coroaecuruha, nejelau ere cuhane cuaain- nejelau ere que erenacaaurune jaun. Nii jaun jetaote:

<sup>47</sup> “ ‘Nainihaacache cana, caa cachaauru baotisaain coujunacatechaachene, Joriooneeurenihane jaunneti.’ naain erana nainihaacache cana, inae cana rijijieein, Cana Coaunera Suujue que, coujunacatenohineein neeuruhane jaunta,” naa Fedoro nii corihaniha cunacaauru Jorioocuru raine baiha jetaote:

<sup>48</sup> “Jesocurisito coreniha, baotisaain coujunacatenohineein neeuruhinera,” nae jetao, acaauru rai Fedoro. Nii jaun jetaote, nii baiha, Fedoro chunaaure, acaauru aina, inata janojoein neeorihane coina.

## 11

*“Chanuna Jorionihichuru aina lenoneei,” naain Jerosaleeun nenacaauru Jesocurisito ranojoinunru Jorioocuru tabaaurune*

<sup>1</sup> Jodea bataneu netiin jetaote, inae Cana Coaunera ere esenetaain tonoraauruha Jorionihichuru netonaine coitucure Jesocurisito letonocuru afosotooru aina- cana nejeraauru Jesocurisito ranojoihunru.

<sup>2</sup> Nitohaneein coitucuruhane jaun jetaote, inae Jerosaleeun turuha Fedorone jana jetao, necoejechanuure- Jorioneein Jesocurisito ranojoihunru tabaauru. Niritiin necoejechanuhin jetaote:

<sup>3</sup> “Chanute cocoaeraa- cana Jorionichaachene ichao rai, Jorioniheichuru rene turuhin, acaauru aina, naaonjoacachene natiin- acaauru aina lenoneeita,” naain bajaare jetao, Fedoro caje.

<sup>4</sup> Nii jaun jetaote, satiin niicha coaraai bee jitariin nunue caje coauneein:

<sup>5</sup> “Naain nii Jofe neseeu nihanune jaaunna niqui, Cana Coaunera bajaauru. Nii jana, canu notaaca Cana Coaunera jana coaracaunne janate, shojoera tocohaneei jaraantiin, jenaain rulunojohineein dede caje faauha uhe caatiha, nii nihanune jaunra.

<sup>6</sup> Nii jana, rautain cuhanai coaracaunne janate, cuu ne, itolere ataibinaecuru, atane ichoae terei lenone, tajaecuru, acanocuru naaonjoaauricha.

<sup>7</sup> Nii janate, carai dedeeu tonii: ‘Chajaaajoaain nimioritiin, soote que lenoneeicha.’ naane janana:

<sup>8</sup> ‘Jiaohinera, Curuaanaa. Chabana cujuaae cuhane aansai calaani enohaaunta.’ naanune janate,

<sup>9</sup> dedeeu toniin: ‘Coaa, “Aansai calaani,” naain iriha, ii coauneraacha coulucohi quera.’ naain

<sup>10</sup> toniha nichata saain dedeeune janate, jelaaiha dedeeu iniha cue- nii shojoera tocohanaicha.

<sup>11</sup> Nii rijieoritiinte turuure, Sesareea caje uhin, nichatajai canu ariha unacaauru cachaauru, nii nihacaanunejaan loreri asaaera.

<sup>12</sup> Nii janate, caletoe Cana Coaunera Suujue, necoatolanaala acaauru aina cuhanune coinara. Nii janate, canu aina cuure caa saotaneein Jesocurisito coreniha- cana nejeraauru. Nitohaneein kuhina, Sesareea turuhin, nii canu coitihaca unacaauru letoaera- cacha loreri asaae enohacaanu saaincha.

<sup>13</sup> Nii janate, canacaanu rai: ‘Naaajoaainte, cau ecoe Cana Coaunera letono aanjerara. Caute chujuhequuin, “Cachaauru letoaa Jofe neseute, Simoonneein curuajai- Fedoroneein acaauruhacha curuaatei cotihaca cuuruhinera.

<sup>14</sup> Acate, ‘Naaonjoaain neute, satiin, isinejiera, charaaichuru, ichoerejeeuru, naaonjoaihunri aina, raotojoein jianaacoo neeincha.’ naain ichei bereeincha,” ’ naa canacaanu raine naainaa- nii loreri erorane jana,

<sup>15</sup> acaauru rai irihanune nunuetihanune janate, acaauru chochae fauha uhe Cana Coaunera Suujue, cana chochae fauha uhalune rijijieeincha.

<sup>16</sup> Nii janate casuujuanuha neeorite, ‘Acau quete niqui cacha camujuaain, cacha coujounacate Joaana. Nete inara laaen Cana Coaunera Suujue que, coujunacatenohi niha

curiquicheeincha.’ naain aitohalu Cana Curuaanaa Jesocurisito nera.

<sup>17</sup> Aihana jaun, Jesocurisito esenetaacachene jana, cana rai rai Suujue tihane rijijieein, leeochoaauru rai netonai, rai Suujue tiha Cana Coaunerane, nainihaaun nii caohatera rijitiin, irihanu canu neta. Chaneeina nereeeun canu, Cana Coaunera colaihaje cuaain, nii caohatera rijitiin irihanuneta,” naa Fedorone janate,

<sup>18</sup> inauhene cuuraatorain, cuu aonajeeure nii Jerosaleeun nenacaauru- Jesocurisito coreniha cana nejeraauru.

Nitohaneein aonajeeuruhane baihate, Cana Coaunera coroaecure, “Caohacha quete, Jorioniheichuru netonai coroatajane Cana Coaunera, acaauru netonai suujua coreein ichaonaa- chabana nitajenaa charanejeein nenea raauruhane coinara.” naain.

*Antioquiha neseeu Jesocurisito ranojoneein nenacaauru*

<sup>19</sup> Eseteba sohin jaoruhane baiha neeoriinte, leeochoaauru Jesocurisito esenetaeraauru netonai ariin, rohecaature. Nii jaun jetaote tabaauru Jodea batane caje sorohin, Fenisiau, chaen Chifereu, Antioquihau, naaonjoaihun- cuhinchuru sorohacoaature. Nii cuhin sorooruhane jauncuru turuhin jetaote, leinjiin Jorioocuru raiicha Jesocurisito beebejeein, que relanajaature. Coatia jetao laen, leeochoa cachaauru- Jorioniheichuru relaauruhi.

<sup>20</sup> Ne jetaote, nii baiha, Chifereu, Sireneu naaonjoaihun nenacaauru- Jesocurisito esenetaeraauru tabaauru, nii Antioquiha neseeu turuure. Cuu turuhin jetaote, nii cuu nenacaauru Jorioniheinchuru rai, Cana Curuaanaa Jesoso que Erenaa Caohati beebejeein, que acaauru relaaure.

<sup>21</sup> Nii aina, acaauru coroatajaniha Cana Coaunera Suujuene jaun jetaote, jauriaa acaauruhacha esenetai jianeein, Jesocurisito esenetaature arajii cachaauru.

<sup>22</sup> Nii coitucuuriin jetaote, “Chatohaneeuruhachata,” naain Antioquihau Berenabeen letoaature, Jerosaleeun nenacaauru- Jesocurisito ranojoihunru.

<sup>23</sup> Inae Antioquihau turuhin, acaauru coaracuruhane jana jetaote, caohatiin acaauru coroatajaniha Cana Coaunerane coaraana jaun jetao, jataain coroaeye Berenabeen. Nitohaneein coroaeeinte, esinaae rauhijiriin Jesocurisito esenetaain, baaso coacuelanaala esinaae rauhijiriin nere tonoraauruhane coina, suujuatenajae Berenabeen.

<sup>24</sup> Caohacha cachaneein, Cana Coaunera Suujue que suujuequuin, jataain Jesocurisito esenetaera nihana jaunte, nitohane Berenabeen. Nitohaneein jetaote suujua coreein Jesocurisito ranojoinunru aina neeure arajii cachaauru.

<sup>25</sup> Nii baiha jetaote, Tarosoo cue Berenabeen, Saoro arihane coina.

<sup>26</sup> Nitohaneein cuhin jetaote, cuu eruhin, amae Antioquihau. Cuu jetaote neeurelu, itolereneein lejaanacaain, cuu nenacaauru Jesocurisito ranojoihunru aina cuu nenacaauru cachaauru relaa. Nii Antioquihau jetaote, jauriaanejeein, “Curisitianoneein” Jesocurisito ranojoihunru curuaateeu-ruhane nunuheteurelu.

<sup>27</sup> Nii bana jetaote, Jerosaleeun caje cuhin, Antioquihau turuha cuure- *profetacuru* tabaauru.

<sup>28</sup> Niichuru taba- Acaboneein curajai jetaote, ita taojiaauruha Jesocurisito esenetaeraaurune jana, acaauru cataaun nichaauraaain:

“Aonacuchena, inara rai caa bete, coitucuhichera. Nerinaain jetao carajaaajoaain quinacai, Jodea batane sacutaainta,” naain be nii Acabo, que beratiha Cana Coaunera Suujuene jaun.

Nii mijitena jetaote nelu, Romanocuru curuaanaacuru- curuaanaa niha enferadoro- Culaodione bana.

<sup>29</sup> Nii niritoha Acabone jaun jetaote, naain Jodea nenacaauru Jesocurisito coreniha cana nejeraauru- coroatajanena jerecure, nii Antioquihau nenacaauru Jesocurisito esenetaeraauru. Nitohaneeinte, ita jeonijianaain coriqui teein, taojiaaure, le cachaauru cachaauru caje, tenaa nainecuruhane rijiinanaain.

<sup>30</sup> Nitohaneein taojiaain jetaote, nii Jodea nenacaauru Jesocurisito esenetaeraauru- bichauhenaauru rai letoaaure, Berenabeen, Saoro, naaonjoaihunru aina.

## 12

*Saantiaao sohin jaohinte, caresero cuhane Fedoro eno- haature.*

<sup>1</sup> Nii bana jetaote, Jesocurisito ranojoinunru aina nejeratihane nunuheteein, tabaauru mucerate jetao, Israelitaauru curuaanaa *rey* Erodesi.

<sup>2</sup> Nitohaneein jetaote, sabere que, Joaan nejera Saantiaao sohin joerate.

<sup>3</sup> Nii rautatiin, coaracuruha Jorioocurune jaun jetaote, Fedoro netonai mucerate Erodesi. Jorerera colane ichanohinfaan quihuruhane jaan- beseta cojoanonaacuru bana jetaote, nitohaneein Fedoro mucuure.

<sup>4</sup> Nii mucuherateein raeratihane baiha jetaote, Fedoro enoaerate caresero cuhane- Erodesi. Nitohaneein caresero cuhane enoaerateein jetaote, caohatiin beraichate. Jena lauriin, janaanain, nenacaauru soondarooru que, ita roherererojeein caohatiin beraihuruha le laurichuru cajene coina, letoanajae, nii Fasocoa beseta bitohariin, satiin

coarajeeurera notaracae, caresero caje rocohin, coaraain chatohaneein teeuruhane coina.

<sup>5</sup> Nitohaneein caresero cuhane caohatiin beraichaain niha Fedorone tonohanau jetaote, ita taojiaain, rai Cana Coaunera bajaaure mainajeein Jesocurisito ranojoihunru.

*Caresero Caje Fedoro mitaa Cana Coaunerane*

<sup>6</sup> Nii jaun jetaote, eresinejeeonriin lanajeeca, satiin coarajihha cachane notaracae, chatohaneein Fedoro tihanerai niha-Erodesine jana jetao, coroatajai soondarooru cataaun, jeranu *cadena* que cosiin sinitoha Fedorone jana, acujua ni-hacuru neein- beraihuruha soondaroorune jana jetaote,

<sup>7-8</sup> rai letono- anjera letoae jetao, Cana Coaunera. Nii jaun jetaote, luhecotariin, Fedoro rohan neeoritoha Cana Coaunera letono anjerane jana jetao, jiiichoo rijijieein conoe, caresero cuhane. Nii jana jetaote, sinitoha Fedorone jana, jaleri dada dadariin nocoain jetao:

“Chajaain nimiichuura,” naa Cana Coaunera letono anjera, Fedoro raine rijieeoritiin jetao, rai biji caje nejasajasarilha- nii biji ichora *cadenane* jana jetao: “Chajaaajoaain nimioritiin ichajione jiaain, ii safato jiaain, canu jiniichotaaura,” naa, nii Cana Coaunera letono- anjerane jana jetaote, nii aitohane rijijieein jiniichotae jetao, Fedoro.

<sup>9</sup> Nitohaneein jetaote, mituha cue, Cana Coaunera letono- anjera caaijie cuhin, coetacainein cuhin, mituha cuhane esenetaelanaala, “Nechu jataaen sini anuu jecha aite.” naain.

<sup>10</sup> Nitohaneein cuhin jetaote, jaurihaanejeein acujua beraicha caje situure. Nii leeocho caje situhin jetaote, nii coata que bacujuana jaun, turuuruhane jana jetao, raajenihane neyoracae, nii coata que bacujuanaa, naain aerene nena enonaanaja rijia bacujua. Nitohaneein mituhin, le co-coaantaain bero cuhane cujueeru baiha jetaote, jelai Fedoro ratiriin amuhe- Cana Coaunera letono anjera.

<sup>11</sup> Nii jaun jetaote, nainacori Fedoro. Nainacoriin jetaote: “Esinaaete, rauhijiriin letono anjera letoae- Cana Coaunera. Jataain caque necosuujuaain, canasineene rijitoha Erodesi aina Jorioocurune janate, nabana chatohaneein caetecuruhane coataa, letono anjera letoae Cana Coaunera, canu ichoteratihane coinara,” nae jetao Fedoro.

<sup>12</sup> Nitohaneein, inae nainain jetaote, Joaan Maroconein curuajai- neba- Mariha rene turuha cue. Nii jana jetaote, cuu najiniha, nii Mariha loreri asaae, ita taojiaain, Cana Coaunera bajaa neure arajii cachaauru.

<sup>13</sup> Nii jana jetaote turuhin, nii aerene nena enonaanaja rijia acujua faofaorihane jana jetao: “Cha cha aite,” naain, coaraa cue leinjiin ranuna Rodee.

<sup>14</sup> Nii jetaote, Fedoro ere nihane aonaain jetao, coroaena caun jetao, nii acujua joracae lanaala soroneein biha cue: “Fedoro te aitera,” naain.

<sup>15</sup> Nii jana jetaote: “Esinaaenna aitohite,” naauruhane jana jetao:

“Esinaae rauhijiriin acate aicha,” naane jana jetao:

“Rai suujete jerihane ai caihara,” naaure.

<sup>16</sup> Nii tonohanau jetaote, nii acujaniha neein, nii acujua faofaonijanae, acaauru bajaebajajeein Fedoro. Nii jaun jetaote, nii acujua joracaain coaracuruhane jana, esinaae aca nihana jaun, cuu nesoonetiin coarajeeure.

<sup>17</sup> Nii jana jetaote, acaauru rai, biji sarasarari, nabana tonaain ereeuruhane coataa. Nitohaneein jetaote:

“Naaonjoaainte, caresero caje, canu mitaerateein, canu ichoterate, Cana Coaunerara. Caritiin, Saantiaao rai benichuchera. Satiin, cana nejeraauru- Jesocurisito coitucuurera rai netonai beeuchete, coitucuuruhinera,” naain beratihane baiha jetaote, jelai caje mituhin jetao, amuhe Fedoro.

<sup>18</sup> Nii jana jetaote, jano jana, cuu neniha Fedorona jaun, nesoonetiin: “Cha quena nerurujuae, caa aansai,” naain jetao, acaauru suujua auhacaain nererojoeccaure- nii beraihurera-soondarooru.

<sup>19</sup> Nitohaneein, nenihana jaun jetaote, arihuruhane coina, acaauru letoaa- nii curuaanaa Erodesine jana, nitohaneein Fedoro arihuruhane jana, ruurenihana jaun, nii beraihurera choae nalutiaain jetao, acaauru sohin joerate jetao Erodesi. Nii baiha jetaote, nii Jodea batane caje mituhin Sesareeau ichaoha cue jetao Erodesi.

### *Oha Erodesine*

<sup>20</sup> Tiro, Sidoon, naaonjoaain cocoaichacuru aina jetaote, niqui obaje Israelitaauru curuaanaa *rey* Erodesi. Nii jana jetaote, ita suujuau tacaain:

“Coanete, atiin rene turuhin raotojoein erenaa neeinaera,” naain jetao, jaurihaanejeein, nii que jaurii- nere tonoraera Balasito rene turuhin jetao, ereeure nii curuaanaa Erodesi rai, nii Erodesiicha beraai atane cajeecha quinacai raajeein ichaaoruha, nii Tiro, Sidoon naaonjoaain cocoaichacurune jaun. Nii jaun jetaote, nii curuaanaa Erodesi rai:

“Coanete, nii cachaauru coroatajanena neeinaera,” naa nii Erodesi que jaurii- Balasito najaun jetao,

<sup>21</sup> “Banajian uunite coana neeinaera,” nae jetao, nii curuaanaa Erodesi. Nii jaun jetaote, nii aitohane bana, rene netaojiaauruhane jana jetaote, curuaanaa nihane cajione jiaain jetao, nii curuaanaa nihane nelauriana jaan- rori choae nelauriaain jetao, ereereje Erodesi.



<sup>22</sup> Nii jana jetaote:

“Coatia caritiin erenaa nainihei, cana rijijieein cachata. Caate cana chosinera,” naure jetao, eehequiin satiin nii cuu nere aonajeeurera cachaauru, nechu jataain acauru belaiha Erodesine coina.

<sup>23</sup> Nii jana, coroaeca Erodesine jaun jetaote, nii rijieeoritiin, letono anjera letoae- Cana Coaunera, nichoae cunai naluti-aane coina. Nii jaun jetaote, cunaiteein corianohin rihano jitanoinnein ohe, Cana Coaunera nujuaneein coroaeca ne jaun.

<sup>24</sup> Nii jana jetaote, inae jelai amuritoheriin, Cana Coaunera ere coitucuhajeein cuujueeure cachaauru, itolere sacutaain, amuhemujueein beebejeeuruhana jaun.

<sup>25</sup> Nii jana jetaote, inae Jerosaleeun, niicha ichanenu nainaauruha najaun jetao, Antioquiha cauha cuure, Berenabeen aina- Saorocuru, acauru jiniichaain “Maroco” naain acaauruhacha curuaatei- Joaan amaain.

## 13

*Letononeein amuhemujueein, Jesocurisito beebejeeuruhane nunueteuruha- Berenabeen aina Saorone*

<sup>1</sup> Nihalu jetao, Antioquihau Jesocurisito ranoinunru coaraauru jelai teein, Cana Coaunera caje- erenaa raain acauru rai beeureraauru *profetacuru*, chaen Cana Coaunera aitoonjoa que cacha relaureraauru, naaonjoainuri. Niichuru aina jetaote neurelu, Berenabeen, chaen Simoon- jichojoainnein acaauruhacha curuaatei, chaen Losio- Sirene cocoaicha, chaen nii Calileea coberenadoroneein nenaalu- Erodesi aina fohena- Manaen, chaaen Saoro, naaonjoainuri.

<sup>2</sup> Niichuru jetaote, corootajanenaaca Cana Coaunerane coina, cosinacaa suri couu ita taojiaain, Cana Coaunera bajaee bajaecuruhane jana jetaote:

“Carai nii Berenabeen aina Saoro letoaauchete, jelai teein acauru rai quiicha teei amihanenaa ichaa cuuruhinera. Nii ichacuruhane coinane cotihanajaain ranajaain neunlura,” nae jetao, acauru rai Cana Coaunera Suujue.

<sup>3</sup> Nii jaun jetaote, coaiten cosinacaa suri couu neein, Cana Coaunera bajaee bajaecuruhane nainain jetao, acauru choaae biji merecaain, Cana Coaunera bajaare. Nitohaneein acauru rai, Cana Coaunera bajaauruhane baiha jetaote, acauru rai necoeeure.

*Chifereu turuuruha, nii Cana Coaunera Suujue letoaeratenojihunru- afosotoorune*

<sup>4</sup> Berenabeen aina Saoro jetaote, Cana Coaunera Suujue letononeein Seleosiau cuure. Jelai caje coauneein jetaote, Chifere cunaa bote cuhane fauhin, cucuana cuhane coriaae cuuhin turuure, nii Chifere coobenau nenea nese- Salaminau.

<sup>5</sup> Nii nese Salaminau turuhin jetaote, nii cuu nenea ita taojiaauruhana jaan loreri- sinacoca asaae netaojiaauruha Jori-oocurune jana jetao, cuu enohin, acaauru rai, Cana Coaunera ere beebejeeure. Joaan Maroco netonai jetaote, acaauru aina cue, acaauru coroatajanera rijijieein.

<sup>6</sup> Salaminau neeuruhane baiha jetaote, caje cuhin, jitariin nii obena tinonohin cuhin jetao, nii cu nenea leecha nese-Pafosoo turuure. Nii Pafosoo turuuruhane jana jetaote, cuu nee- leeinjiin benane- Jorioneein casajenetiin- Cana Coaunera letononiha nocoetiin- cachaauru coritaera- Barajesoso.

<sup>7</sup> Nii benane jetaote, cuu jataain nainaan nenea- Coberenadoro Serijio Faoro aina nei nejesina ne. Nii coberenadoro jetaote, nii Pafosoo turuhin neeuruha- Berenabeen aina-Saorone coitucuhane jaun jetao, cotiharatenajae, nenajaun cuhin, rai Cana Coaunera que ereerecuruhane aohana jerihane jaun.

<sup>8</sup> Ne jetaote, Berenabeen aina Saoro que nejerate nii benane- Barajesoso- “Elima” neein Curiecocuruhacha curuaatei, nabana acaauru esenetaa nii coberenadorone coataa.

<sup>9-10</sup> Ne jetaote, Cana Coaunera Suujue que suujuequin jetao, nunajeein coarajeein:

“Nechu aansai. Casaje. Moconajaera nebaneein nenea. Ii te itolere caohacha aina nejeratenaaneein neeincha. Chanute Cana Coaunera tenojohin ichaonaa caohacha auha-caaita,” nae jetao Saoro- “Faboro” neein curuaaneni.

<sup>11</sup> Niritiin cotaicha rijitiin jetaote: “Nitohaneein neeine corenihate, ichasetecareein Cana Coaunerara. Maosaneeinte nedariquiin carajaojoaaincha. Nihei jiichoo coaririheeinita,” naa Faborone rijieeoritiin jetaote, maosaneein nedae nii benane.

Nitohaneein nocohenaneein nedaa rai notana jaun jetaote, rai biji que mucuhin- amaeranu ari, amaa ne coina- nii Elima, inae conoeniha notana jaun.

<sup>12</sup> Nii jaun jetaote, cojoaelatiin, jataain caohatoha nii Cana Curuaanaa- Jesocurisito que aitiin, acaauruhacha beebejei- Cana Coaunera ere esenetae- nii coberenadoro.

*Psidia batane que nenea- nese leecha- Antioquihau turuha Faboro aina Berenabeenne*

<sup>13</sup> Nii Pafosoo neeuruhane baiha jetaote, leeinjiin bote cuhane fauhin, Paanfiliau cue nii corihaneraauru aina-

Faboro. Jelai caje coauneen jetaote, atane ichoaae cuhin, turuha cuure, nii cuu nena nese- Perejeu. Nii jana, Joaan Maroco jetaote, cuu ratirinajaain, Jerosaleeun cauha cue.

<sup>14</sup> Nii Perejeu caje cuhin jetaote, nii Pisidia batane roohan nena- nese Antioquihau turuure nii Berenabeen aina Faboro. Cuu jetaote, nebetacanaa janonaa bana- ita taojiaauruna jaan- sinacoca asaae, ita taojiaauruha Jorioocurune jana, cuu enohin nelauriaain, aonajenajaunre.

<sup>15</sup> Nii jana jetaote, cuu aonajenajaauruhane jana, Cana Coaunera Quiricha Inoaesi ereretaaure. Inae nii nainaauruhane baiha jetaote, acaauru rai:

“Chasocuru, niha chaaelai que ereeichene jaanne, ereeuche te, aonaain suujua laraajiaauruhine- caa cachaauru,” nae nii netaojiaauruna jaan- sinacoca curuaanaacuru.

<sup>16</sup> Nii jaun jetaote, nimichuhin nichaaaurariin, acaauru rai, biji sarasarari Faboro, inauheneeicha curuaequiin aonajeeruhane coina. Nitohaneen acaauru rai, biji sarasarariin jetaote:

“Aonacuche satiin- Isaraelitaauru, satiin Jorioniheichuru netonai- Cana Coaunera ere esenetaain tonorana jerenacaauru.

<sup>17</sup> Egiptoo cuhin ichaauruhane ajiniha jetaote, cana ferateeurera Isaraeli cocoaichacuru janijiin ranajaelu Cana Coaunera. Nii baiha, rai natane nihei que cuhin, nejelau ataneu- Egiptoo ichaauruha cana inoaesihuru Isaraelitacurune jana jetaote, arajiin fanajaelu Cana Coaunera. Nitohaneen nii nejelau ataneu netiin, inae arajiin nefaaauruhane jana jetaote, jelai caje, niicha ichana nainei coarateein roconajaelu Cana Coaunera.

<sup>18</sup> Nii Egipto caje roconajaane baiha jetaote, nere tonoraaurerihane saijieein, atiin acaauru abaantaelu, jenachoonca janacaneen desieretoo Cana Coaunera.

<sup>19</sup> Nitohaneen nere tonoraaurerihane saijieein jetaote, acaauru rai neein niha nii atanene coina, Canaan batane que, caaunsineen nena nese que ichaonacaauru cachaauru itaje jetao Cana Coaunera.

<sup>20</sup> Itolereenein, Egiptoo cuuruhane que jojohin jetaote, jena fasha saogui choonca ajaanacaneen jetao, acaauru que banihateein inoaelu- niicha tenaa jerei- atane que tenajae jetao Cana Coaunera.

Nii baiha jetaote, acaauru curuaanaacuru tihacoae, Cana Coaunera, enoha nere bera inoaesi- Samoerinereein tihajoain.

<sup>21</sup> Nii jana jetaote, itolere curuaanaanein- itolere sirichaaunu que jetao leeinjiin *rey* bajaure jetao. Nii

jaun jetaote, Beenjamiin lauri caje neferatenaaneein nenea Sisi calaohi- Saoro tee jetao, Cana Coaunera, jena choonca ajaanacaneein, acaauru rai- *reyneein* nihane coina.

<sup>22</sup> Nii jana jetaote, renaatonorae lanaala, jeriha Cana Coaunerane rijijieein, ichana jereniha Saorone jaun jetao, Rabiri que core jetao Cana Coaunera, satiin Israeli-taauru curuaanaaneein- itolere sirichaneein- *reyneein* nihane coina. Nitohaneein teein jetaote: 'Inae laen, casuujuu rijitoojeein nenea- cacha ruhanura. Acate, Isaihasi calaohi-Rabiri inera. Acate laen, jatoroain ne, itolere quiicha jerenohi ichaane coinara.' naain jetao Saoro mitaain, Rabiri tee jetao, coreeraniha, Cana Coaunera.

<sup>23</sup> Nii Rabiri caje neferatenacaauru inamacooru caje nanaaneein jetaote, nenaanelu Jesoso. Aca jetaote, letoaelu Cana Coaunera, nere bera inoaesihuru que beratihalune tocohaneein Israeli cocoaichacuru ichoteratihane coina.

<sup>24</sup> Inae turu catainajihua Jesusone jana jetaote, Joaan letoae jetao Cana Coaunera, satiin itolere Israeli cocoaichacuru sacutaain, beebejihua Joanne coina. Nii jaun jetaote: 'Cao-hachaain inara suujua rucujueein, coaiten Cana Coaunera aitoonjoa esenetaain tonoraain neeuche te, baotisaain co-jounacatenohineeichera.' naain, Israeli cocoaichacuru rai aite jetao, Joaan.

<sup>25</sup> Inae ohane catainaane jana jetaote: 'Coatia nii inaraacha cohajei- cacaaijie- nii turuha uhenenu nihaaun. Canute, letoae Cana Coaunera, nii beraaunu que. Acate laen, caichoaae jauhecotojoeriin, jataaen cocoainaain letoanojoneein ne. Nii jaun, rai safato ichora rucuheraane que nihanatiin, nelatihahaun.' naain jetaote, rauhijiriin be jetao, acaauru rai- Joaan.

<sup>26</sup> Chasocuru, Abaraaun caje neferatenaaneein nenacaauru, satiin- Jorioniheichuru netonai- Cana Coaunera ere tonorana jerenacaauru, satiin, caa inara rai quiicha beebejeite- jianacoo cacha culucohin mitaeranute, satiin- inara rai beratenojoneein ne.

<sup>27</sup> Satiin- nii Jerosaleeun nenacaaurulu, acaauru curuaanaacuru, naaonjoaihunrite, cajiha turuha Jesusone jana, coitucuurenenu. Nere bera inoaesihuru quete niqui, laenaer- aatein beratelu Cana Coaunera. Nii jaunte niqui, nii Cana Coaunera ere bera inoaesihuruhacha- laenanohilu ereretai nejesinanecure, nebetacanaa janonaa bana naineein. Nitohaneein, ita taojiaauruhana jaan- sinacoca asaae ereretai nejesinanecuruhane sajainejeeinte, cajiha turuha Jesusone jana, 'Aca caara.' naain coitucuurenenu. Nii jaunte, sohin joerateuruhana jaun, aitiin: 'Naaonjoaante, cuureeincha.'

naain nere bera inoaesihuru que laenaeratihalu beein- Cana Coaunerane nainauruhane coina,

<sup>28</sup> Filato rai colurujueein, sohin joerateeurelu, Filato que, lera colane.

<sup>29</sup> Nitohaneein teeinte, inae satiin aitoha Cana Coaunera Quiricha Inoaesine nainaane jana, nii coroso caje fauhin, rai jabereco rucuhecure- ajeri jachu cuhane.

<sup>30</sup> Nete, nii jana, oo caje ichate Cana Coaunera.

<sup>31</sup> Nii jaunte, nii Calileea caje coauneein, Jerosaleeun tiaetiajeein namu corihaniha amuhemuhenacaauru rai ecohin, cuu araai janohi acaauru aina nerejetelu. Acaaurute, enene itolere sacutaain amuhemuhejueein, nii Jesoso que erereecure, itolere cachaaauru rai.

<sup>32-33</sup> Inara caohachanu quena, inara rai, caa caohati erena bihacaanu, coitucuhichene coina. Caa quete, cana inoaesihuru rai aitelu Cana Coaunera, catohanihane coina. Nii jaunte, acaauru inamaconeein nihacachena jaun, cana rai, cana inoaesihuru rai naitoonjoa nainaane coina, catohaneein ichae Cana Coaunera. Acate, oo caje Jesoso ichate, rai Quiricha Inoaesi- Salmo- coroatajai cuhane aitohane tocohaneein. Raite, 'Iite, canu calaohineein neeicha. Canuna, chacaneein neeunra.' naain laenaeratelu Cana Coaunera, rai Quiricha Inoaesi cuhane.

<sup>34</sup> Nitohanihane coinante, nii ajiniha: 'Oo caje jene, ichatereeuni, nabana setuha rai jaberecone coataara.' naain nii ajiniha- rai Quiricha Inoaesi cuhane belu- Cana Coaunera. Chaentechu: 'Satiin Rabiri rai caitoonjoane, ichaa cureunnicha.' naain belu Cana Coaunera.

<sup>35</sup> Nitohanihana jaunte, coaiten leeocho cuhane, 'Coatia laen, setuha nii ii letono jaberecone naihatejeriheeinita.' naain laenaelu Rabiri.

<sup>36</sup> Aihana jaun, esinaaente niqui, Rabiri letoaa Cana Coaunerane rijijieein, nii nihane bana nenacaauru cachaaauru coroatajanelu. Nete, nii baiha ohin, rai foerateeurera ainane jana, rai jabereco inae setuelu.

<sup>37</sup> Nete, nii Cana Coauneraacha ichatei- Jesoso jabereco laen cuu neein setuenelu.

<sup>38-39</sup> Aihana jaun, chasocuru, caa inara rai canacaanuhacha beebejei- Jesusohacha corenihate, atiin, osaaocane nihanatiin, rauhijiriin esenetaane, nosa caje nichotena nainereein- saain cachaaauru, Jorioniheichuru nihanatiin. Aihana jaun, nii nosa coreniha caseteco coaracuruhane rai niha- Moisesaacha benojoinurute, Jesoso coreniha laen nainecurureein nii caseteco caje nichoteeuruhane. Aihana jaun, satiin- nii Jesoso esenetaeraaurute, atiin coreniha- osa caje rocohin- culuhoca cureein Cana Coaunera.

<sup>40</sup> Caohachaaain coaracuche, batohin esenetana jereneeich-enete, inara choaae nalureein inoaelu laenaratihalu Cana Coaunerane jaun, laenacuruhalu *profetacurune* rijijieein:

<sup>41</sup> ‘Aonacuche.

Satiin caohacha ichaonaa-caitoojjoa que jaolequiin nenacaauru cojoaelatooche.

Nitajihate curiquicheein, inae ecu tihane bana.

Nii cojoanonaa banane,

itolere ichaain inara notaaca cureeunnicha.

Chunicoha inara rai, nii que ereein bihane, esenetariheecheta.’

naain laenacuruhalu *profetacurune* rijijieein,” naain jetao, nii Antioquihau nena sinacoca asaae- netaojianacaauru rai ereerejeein jetao beebeje Faboro.

<sup>42</sup> Inae, nii que irihane nainaan jetaote, nii ita taojiaauruha Joriocurune jaan- sinacoca caje corihaneraauru aina mituha cue Faboro. Nii jana jetaote, jiniichaaain cuhin mituha cunacaauru- Jorioneein nerotonacaauru jetaote:

“Coaiteen leecha- nebetacanaa janonaa bana uhin, coaiteen nii que ererejiha uuni, canaacaanu rai,” naain jetao, Faboro cotihacure.

<sup>43</sup> Inae sinacoca asaae netaojiaauruhane nainaan jetaote, Faboro aina Berenabeen caajie cuure- arajii Jorioocuru aina- Jorioneein nerotonacaauru- Cana Coaunera ere tonorana jerenacaauru, naaonjoaihunri. Nii jaun jetaote, acaauru rai: “Nijiaonriha, inara belaiha nere aina cuaain, inara cotihaca Cana Coaunerane jaan jianequichenera. Nirijieeincha, jianelanaala, nii jelai sacuuchete, inara coroatajaneein, inara belaine Cana Coaunerara,” naain jetao, acaauru suujuatein, acaauru ratirihure.

<sup>44</sup> Nii baiha jetaote, leecha nebetacanaa janonaa bana coaiteen, netaojiaaure- nii nese sacutaain caje uhin- coroatajaje lanaanla cachaaauru, acaauruhacha beebejei- Cana Curuaanaa Jesocurisito beratenojoi aonacuruhane coina.

<sup>45</sup> Nii jaun jetaote, nitohaneein coroatajaje lanaala, tururuha cachaaauru, Faboro aina Berenabeen aonaana jaun, nechu jataaen, acaauru que necoelai caun, nabana esenetaauruhane coataa, “Nechu aansai casaje cachaaauru,” naain, Faboro necoeje chanuure Jorioocuru.

<sup>46</sup> Nii jana jetaote, nii que nelararajiaain, chaque casilanaala:

“Inara Jorioneeichene raite niqui, jaurihaanejeein nere beebejihacaanune coina canaacaanu letoaaain ne Cana Coaunera niquicha. Nete, naitoojjoa batocoichene jaun, rautaaain aohana jerelanaala que jaolecohichera. Nitohaneein, inara rai, ichaonaa sanaacharanejeein nena

bihacaanune coinat niqui, canacaanu letoaain ne- Cana Coaunerara. Nena aohanna jereneeiche coarajihacaanune jaun, Jorioniheichuru rene curichaanuhin.

<sup>47</sup> Nitohaneein canacaanu letoaainte:

‘Canuna, inara letoareeuni,

satiin- caa chauratane que nenacaauru- Jorioniheichuru rai nihanatiin,

amuhemujeein beein, canu neein nihanune coitucueratein,

acaauru ichoterateein neeichene coinara.’

naain Isaihasi que beratihalune rijijieeinte, ena canacaanu letoae Cana Curuaanaa- Cana Coaunerara,” naauruha Faboro aina Berenabeen, Jorioocuru raina jaun jetaote,

<sup>48</sup> coroaacure- nii Jorioniheichuru.

Nitohaneein corojeein jetaote, esenetaain, “Caohatoha jataaen cana rai, Cana Coauneraacha beratenojoincha,” naain esenetaaure, satiin- nii ichaonaa sanaa charanejeein nenea raaureraanu que nenacaauru- Jorioniheichuru.

<sup>49</sup> Nitohaneein jetaote, nii jelai batane sacutaain nenacaauru- jelai cocoaichacuru rai, Cana Curuaanaa- Jesocurisito beebjeeure.

<sup>50</sup> Nii jaun jetaote, nii rautaain coaracurenihana jaun, nii caohachaaain suujua coaraain Cana Coaunera bajaaureraneccuru suujuau tacaare- Jorioocuru. Nii cuu nenacaauru- acaauru rai jataaen nelatenacaauru cachaauru- suujuaune maajeein tacaare, satiin ita suujua rijitocoriin, acaauru que nejeratein, jelai caje Berenabeen aina curuataain, Faboro sitaauruhane coina.

<sup>51</sup> Nitohaneein, jelai caje sitanajaauruhana jaun jetaote, mituuru neein, nii acaauru safato que nenea- utuune faofaohin, riariaain, ratiriin amuure. Nii jetaote ichacure: “Aihana jaun, inae canacaanu, nii ujuaihoneein nihaacaanu. Coaraain aihane nitajeeuche.” naauruhane coina. Nitohaneein rai safato que nenea- utuune faofaohin riariaain ratiriin jetaote, jelai caje amuhin, Iconio cuure Berenabeen aina Faboro.

<sup>52</sup> Ne jetaote, rachoojoenaa cataaun nedaaure, nii Antioquiha nenacaauru Jesocurisito ranojoihunru, acaauru suujueniha, niha Cana Coaunera Suujuena jaun.

## 14

### *Iconio turuuruha Faboro aina Berenabeenne*

<sup>1</sup> Antioquihau neeuru baiha, jelai caje amuhin jetaote, Iconioo turuure jetao- Faboro aina Berenabeen. Nii Iconioo turuuruhanane jana jetaote, nii cuu nenea ita taojiaauruna

jaan- sinacoca asaae netaojiaaure Jorioocuru. Nii jana jetaote, cuu turuhin, enohin, Jesocurisito beratenojoi beebjeeuruha rauhijiriin, rauhi cuhane cuaaine jaun jetao, esenetaacoaaure arajii- Jorioocuru, Jorioniheichuru naaonjoainuri netonaine maajeein, esenetaacoaaure arajiin.

<sup>2</sup> Nii jana, esenetaaichuru Jorioocuru jetaote, nii Jorioniheichuru suujuateure jetao, esenetaauruhane coataa, baasoneein Faboro aina Berenabeen que ereein, nechu jataain acaauru cotaiha.

<sup>3</sup> Nejetaote, cuu carajaain acaauru aina neeurejeto- curelu jetao, nii Jesocurisito letonocuru afosotooru. Nitohaneein jetaote, acaauru coroatajanerichain Cana Curuaanaane coitucuuruhane jaun jetao, cuu neein Cana Curuaanaa ere beebjerejetocurelu jetao, nii afosotooru. Nii jaun jetaote, acaauru coroatajaniha- Cana Curuaanaa jaun jetao, jataain cacha belaiha Cana Coaunerane beebjeein jetao, cunaitenacaauru rautaaain cacha notaacure, esenetaauruhane coina, Faboro aina- Berenabeen.

<sup>4</sup> Nejetaote, nelerujuacoaaure, nii jelai nese cocoaichacuru cachaauru. Tabaauru jetaote, Jorioocuru cocoaeratiha jetao, jelai teein nelerucure nejesihajeein. Nii jana, afosotooru cocoaerateurera netonai jetao, jelai teein nelerucure.

<sup>5</sup> Nitohanihana jaun jetaote, cocoinanacaainuru aina ita suujuau tacaare jetao Jorioocuru Jorioniheichuru aina, Faboro aina- Berenabeen que nejerateein, ajeri que bodoosinajaain sonajaauruhanene coina niqúi.

<sup>6</sup> Nii jana jetaote, nii coitucuriin jetao, Iconio caje, Licaniha batane cuhin, Listrau, Derebeeu, naajoainunri rohan nenacaauru neseeuuru cuhin jetao sorohin,

<sup>7</sup> amuemujueein, Jesocurisito beratenojoi- erenaa caohati beebjeeure jetao.

*Listrau, Faboro bodoosihuruha ajeri quene*

<sup>8</sup> Nitohaneein, nii Listrau turuuruhane jana jetaote, eculleeinjiin bacosaneein nejanohanaa cacha. Nii jetaote, chabana nichaauraaain amuhene, nejanoha caje coauneein.

<sup>9</sup> Aca jetaote, Cana Coaunera ere beebjiha Faborone jana, rautatiin, cuu lauhequiin aonaje. Nii jana, rautaaain coaraa Faborone jana jetaote, esinaae rauhijiriin, nerautaane esenetana nainihane coarajiha, suujua cuhanena jaun jetaote,

<sup>10</sup> rai tonijiaain:

“Nimichuhin nichaauraute coaracaara,” naa rai Faborone rijieeoritiin jetaote, chujuleneein, jeluhatiin inae ruharujuae nii cacha.

<sup>11</sup> Nii coaraain jetaote, ita rijitiin jachaleneein jetao, nere cuhane cuaain jetao:



“Chosichurute cacha neein cana rai faaurera,” naaure jetao, Licaoniha ere cuhane cuain.

<sup>12</sup> Niritiin jetaote, nii acaauru ichanohineein nena, acaauru chosineein acaauruhacha tei Seoso jecha naaure jetao, Berenabeen que. Jana Faboro que jetaote, leecha chosi Eremesi jecha, naaure jetao, aca irihane jaun.

<sup>13</sup> Nii jana jetaote, turuha uhe jetao, nii nese coenorau nena- acaauru chosi Seoso rai Teenforo rai saseredote. Nii saseredote jetaote, Seoso rai, lenone nihane sohin, moco-hin tenajaaocane tocohaneein tajiha itolere torocuru, chaen, caohatiin curuteein rucuheneehineein nena- enuha juane, naaonjoaain uhaain turuha uhe jetao, que Faboro aina Berenabeen belaaain coroaecuruhane caina.

<sup>14</sup> Nii jana jetaote, nii coaraain, acaauru chosiniha benajaauruhane que, inae nainacorichure jetao, Faboro aina- Berenabeen. Nitohaneein, nainacoriin jetaote, nobiri soaisoaain jetao, acaauru jana cuhin, acaauru rai nujuaaen soaisoaain:

<sup>15</sup> “Chanuna nitohanain ichana jeriquiche, inara rijijieein, cacha neein nihacaanu natiin. Nitohaneein neeichene jianequichene coinana turuha uhacaanu, inara rai bihacaanune, nii jiaaneein neeichene coinara. Nii jiaanecuchera. Coatia chaelai que nelatejeehai niita. Inae nii jiaaneein, Cana Coaunera eesine- itolere dede, cana rai chauratane, cucuana, nii cuhane coneracuru, naaonjoaain coaunera- Cana Coaunera coroaeein, nere tonoraain neeuchera.

<sup>16</sup> Inoaelute niqiu, niicha jerei ichaa cachane nihanatiin, inauheneecha coarajerejetelu Cana Coaunerara.

<sup>17</sup> Coatia, chaelai janonaa bana, caohacha ichaain nihane jianihei- Cana Coaunerata. Nete, ‘Naaonjoaaine neeunra,’ naain chabana necoharaeratene cacha notajaaincha. Acate, inara corootajane, temulejaain naaonjoaaineeichenera. Inara temule setejiaeraanuque, elo letoaain naaonjoaera. Setejiaane, caoachain marohin, caohatiin tihane, jeejoiriin nihane, raotojoein quihajein- aina raotojoein neeichene jaan- teraneein nenaanera,”

<sup>18</sup> naain acaauru rai beeuruha Faboro aina Berenabeenne sainejeein jetaote, erenaa tonorae lanaala jetao, acaauru chosi rai ichara tocohaneein jetao, nii irihuru sohin, moco-hin, acaauru coroaeein, acaauru belaaain, acaauru ranaa jerecure.

<sup>19</sup> Nii jana jetaote, Antioquiha caje, Iconio caje, naaonjoaain caje uhin, tajiha turuha uure- Jorioocuru. Nitohaneein, turuhacoaain jetaote, nii ecu nenacaauru suujua elonaauruhana jaun jetaote, ajeri que Faboro bodoosiin jetao soore. Nitohaneein sohin jetaote, “Inae jecha atinaauruha,” naain jetao, tararaain amaain, nii nese caje, naain jaoha cuure.

<sup>20</sup> Nii jana jetaote, sacuhin, curuhacaain netaojiaain coara-jeeuruha Jesocurisito ranojoihunrune jana jetao, nimichu-juaaite Faboro. Nitohaneein nimichuhin jetaote, coaiten nii neseeu cue. Nii cojoanoo jetaote, Berenabeen aina, naain Derebeeu cuure.

<sup>21</sup> Nii Derebeeu turuhin, cuu raotojoein, Cana Coaunera Ere Caohati beebejeeuruhane jaun jetaote, Jesocurisito esenetaeranein nedaaure arajii cachaauru. Nitohanihana jaun jetaote, cuu neeure arajiin Jesocurisito ranojoinunru. Nii Derebeeu, cache relaauruhane baiha jetaote, Listrau, Iconioo, Antioquihau, naaonjoaainunri coaiten cuure.

<sup>22</sup> Cuuru turuhin jetaote, Jesocurisito esenetaeraauru sujuateure jetao, caohatiin, nirijieein janelanaala, esenetaain tonoraauruha, caoachaaain rauhijiriine coina. Nitohaneein jetaote: “Cana Coaunera Cojoanonaa que ichaonaa jerichaane, itolere necairichanaa coaraain, necairichanaa abaantaacanete nera,” naain jetao, suujuatenajaauure.

<sup>23</sup> Niritiin, suujuatenajaain jetaote, le laurichuru Jesocurisito ranojoinunru nainetiin, acaauru coaaraanuuru que, acaauru bichauhenaauru tihacoaaure. Nitohaneein, tihacoaain jetaote, acaauru coroatajaniha Cana Coaunerane coina, suri couu neein cosinacaain, Cana Coaunera bajaain, nii acaauruhacha esenetai- Cana Curuaanaa bijiu tenajaain ratirinajaauure.

*Siria batane que nenea Antioquihau jelaiha cuuruha Faboro aina Berenabeenne*

<sup>24</sup> Pisidia batane choaae situhin cuhin jetaote, Paanfiliau turuure.

<sup>25</sup> Inae Paanfiliau batane turuhin jetaote, nii neseeu-Perejeu, Jesocurisito beratenojoi beebejeeure, nii cuu nenacaauru rai. Nii baiha jetaote, Ataliau cuure jetao, Faboro aina Berenabeen.

<sup>26</sup> Cajee coaanein jetaote, bote cuhane fauhin cuhin, Antioquihau turuure. Nii neeuruhane jana, acaauru teeuruhane acaauru leeochoaauru, Cana Coaunera icharatenojoi ichacuruhane coinana jaun jetao, turuure, inae nii niicha icharatenojoi jitaauruhana jaun.

<sup>27</sup> Nitohaneein cuhin jetaote, inae Antioquihau turuhin jetao, jitariin cuu nenacaauru- Jesocurisito ranojoihunru taojiaain jetao, acaauru rai, acaauru coroatajaniha Cana Curuaanaa- Cana Coaunerana jaun, Jorioniheichuru netonoai- rai suujua coreein, inae esenetaauruhane beebejeeure Faboro aina, Berenabeen.

<sup>28</sup> Nitohaneein jetaote, cuu acaauru aina, carajaain neeururejetecurelu Faboro aina Berenabeen.

# 15

## *Netaojiaauruha Jerosaleeunne*

<sup>1</sup> Nii Antioquihau neeuruha Faboro aina Berenabeenne bana jetaote, Antioquihau cuure nii Jodea nenacaauru tabaauru. Nii Antioquihau turuhin jetaote, nii cuu nenacaauru- Jesocurisito coreniha cana nejeraauru relaaure jetao, aitoha Moisesane jaan que. Inoaelu aitoha Moisesane rijitjoeein:

“Inara jabereco cari jiununuhin saaerateneeichene, inara osa caje inara culucohin, inara ranaa nainerihehi Cana Coaunerata,” naaure jetao.

<sup>2</sup> Nii jaun jetaote, coreniha acaauru aina, ita cotaicha rijitocure jetao Faboro aina Berenabeen. Nii jaun jetaote, inae Faboro aina Berenabeen que tacaajeein jetao, acaauru aina, nii cuu nenacaauru tabaauru naaonjoaainunri letoaaure jetao- nii cuu nenacaauru- Jesocurisito ranojoihunru- bichauhenaauru, nii que iriha cuuruha nii Jerosaleen nenacaauru- Jesocurisito ranojoinunru bichauhenaauru, afosotooru, naaonjoainuri ainane caina.

<sup>3</sup> Nitohaneein jetaote, letoanajaauruhane jaun, nii Antioquihau- nese caje, Jerosaleeun cuure- Faboro aina Berenabeen, cuu nenacaauru- tabaauru aina. Nitohaneein cuhin jetaote, Fenisia batane, Samaria batane, naaonjoainuri choaae situurunein jetao, nii cuu nenacaauru- Jesocurisito ranojoihunru rai beeure:

“Naaojoaainte, Jorioniheichuru netonai coroatajane Cana Coaunera, jauriaa acaauruhacha sacui jianein, nere tonoraauruhane coinara,” naain beeuruhana jaun jetaote, coroaacure jetao- nii cana nejeraauru- Jesocurisito ranojoinunru, acaauru rai nii beeuruhana jaun coitucuhin.

<sup>4</sup> Inae nii Jerosaleeun tururuha- Faboro aina Berenabeen jana jetaote, raotojoein acaauru raare satiin- nii Jesocurisito ranojoinunru, saain nii acaauru bichauhenaauru, saain nii afosotooru, naaonjoaainunri. Nii jana jetaote, satiin itolere ichaain, acaauru coroatajaniha Cana Coaunerane beebejeure, acaauru rai.

<sup>5</sup> Nii jaun jetaote, nimichuhin, nichaaurain jetao:

“Nii Jorioniheichuru Jesocurisito esenetaeraauru raite caohachae aitocoaachene, aitohalu Moisesane rijijieein rai jabereco cari saerateeuruhane coinara. Nii choaae tacaainte caohachae, satiin Moisesa aitoonjoalu rijijieein ichaohin, esenetaain tonoraauruha nii Jorioniheichurunera,” naaure, tabaauru fariseeocuru- Jesocurisito ranojoinunru.

<sup>6</sup> Nii niritocuruhana jaun jetaote, satiin netaojiaaure- afosotooru, nii cuu nenacaauru ichauhenaauru, naaonjoainuri, nii que ita rai ereein, coitucuuruha jiniiquiine coina.

<sup>7</sup> Cuu nii que ereerecuruhane jana jetaote, Fedoro netonoai nimichuhin:

“Curisito coreniha- chasocuru, inarate raotojoein, inae carajaa catohanein canu cotijiaain canu raa Cana Coaunera- ane coitucuhiche, jianacoo nosa caje mitunaa nainecuruha Jorioniheichuru netonaine coina, Jorioniheichuru rai nere beebejihanune, esenetana nainecuruhane coinara.

<sup>8</sup> Leeinjiin- Cana Coauneraachate, satiin- cache suujua coitucuujuera. Nii Cana Coauneraate, cana que coarateein, Jorioniheichuru rai, rai Suujue tera. Nii jaunte raotojoein acaauru raane coitucuhacache, cana rai, rai Suujue tihalune rijijieein, acaauru rai netonai, rai Suujue tihane jaunra.

<sup>9</sup> Coatia nejelauneein, Jorioniheichuru coaraain nihei- Cana Coauneraata. Satiin cana coaraane rijijieeinte, joareein cache coaraain ne Cana Coaunera. Nii jaunte, esenetaauru- acaauru netonaine jaun, acaauru suujue coulucoe Cana Coaunera, cana rai ichaane rijijieein. Satiinte, itaneein ne cache.

<sup>10</sup> Aihana jaun, chanute inara raajenhane, Cana Coaunera leratenaa jerequiche, caa nere esenetaeraauru rai caaintati ichaonaa- anajiin tenaa jereeinta. Nihei, canacaanu nihanatiin, nitohanai- ichaonaa abaantana nainera lanaalata. Niheichu cana inoaesihuru nihanatiin, nitohanai ichaonaa sacunaa nainesihuruhalune coalanaalata.

<sup>11</sup> Nete, rai Calaohi Jesoso coreniha atiin nechu nirijieein core colane, cana suujue ichoterateein, couluuoca Cana Coauneraane coitucuhacachera, jerichanejeein acaauru suujue couluuocane rijijieeincha,” naa acaauru rai Fedorone jana jetaote, ereeuruhane janeein jetao,

<sup>12</sup> curuatoroaain, satiin- curuaequiin aonajeeure. Nitohanein:

“Naaonjoaainte, canacaanu aina cuaain cojoelanaacojoa ichaain, canacaanu coroatajane Cana Coaunera, Jorioniheichuru aina nihacaanune janara,” naain acaauru rai jetao beebejeeure, Faboro aina Berenabeen.

<sup>13</sup> Inae ereeuruhane ninaauruhane jana jetaote, acaauru rerohariha jetao ere Saantiaao:

“Aonacuche satiin Jesocurisito coreniha canejeraneein nacaauruna, caa que erete aonaquichera.

<sup>14</sup> ‘Naaonjoaainte, jauriaa Jorioniheichuru raenihane baiha, inae enene janijiin niicha ranojoinunru- Jorioniheichuru coroatajane Cana Coaunera, acaauru

netonoai nichao que ichaoruha jerihane rijijieeine coinara.' naainte canacaanu rai be Simoon- Fedoro.

<sup>15</sup> Niritiin inoaelu beein, nere bera inoasihuru que laenaeratihalu- Cana Coaunerane tocohaneein:

<sup>16</sup> 'Rabiri inamacooru caje neferatenaaneein nenacauruna, coroatajaniha cuureeunni.

Leeinjiin canuhacha jerenohicha ichana jerenacauruna, coroatajaniha cureeunnicha,

<sup>17</sup> itolere chaauruatane sacutaain canu ere beebejeeuruhane, cacoitucuhin carohan nichuuntanaa nainecuruha Jorioniheichuru netonaine coinara.

<sup>18</sup> Caritiinte, inoaelu caje coauneein berateein Nere laenaeratelu Cana Coaunera, coitucuhacachene coinara.' naain Quiricha cuhane laenacuruhalu Cana Coaunera ere bera- *profetacurune* rijijieeinte, nii nainauruhane coina ahurera.

<sup>19</sup> Aihana jaun, coa Jorioniheichuru rai, caaintati ichaonaa tenaa coacache, inae jauriaa acaauruhacha esenetai jianein, Cana Coaunera ere tonoraauruha natiinta.

<sup>20</sup> Raujiaainchate naine, quiricha cuhane laenaain: 'Jiaonriha, cacha ichanohineein nenea chosi rai niicha teeuri lenone quichenera. Jiaonriha, sinijieraaquichene nihanatiin, nejelau ene aina naosateichenera. Niheichu, sinijeraquelanaala neeichene nihanatiin, jiaonriha jelai tein raelanaala, ene aina ichaohichenera. Jiaoarihachu, enecuru nihanatiin, sinijieraaocane nihanatiin, nejelau quicha aina ichaohanera. Niheichu, jiaonriha lanaquelanaala nihane nihanatiin, jelai tein raelanaala quicha aina ichaohanera. Niheichu, jiaonriha raro ruluhin sonojoin lenone quiin naonjoaichenera. Niheichu chaen, ichana niha natiin, jiaonriha quiichenera.

<sup>21</sup> Nii coataate neure, inoaelu caje coauneein, neseeuu nainetiin, nebetacanaa janonaa bana nainetiin, nii netaojiaauruna jaan- sinacoca asaae netaojiauuruhane, nii Moisesa aitojoan ereretaain que cana relaeranuurrura.' naain laenaain letoaacachenete caohachare," naain jetao acaauru rai ereereje Saantiaao.

*Jorioniheichuru rai Jerosaleen caje letoanojineein nenaquiricha*

<sup>22</sup> Nii jaun jetaote, saain Jesocurisito ranojoinunru, acaauru bichauhenaauru, afosotooru, naonjoaain jetao

Jesocurisito ranojoinunru nejesinanejeein netiin, coacuhin jetao, acaauru tabaauru janiichure, Antioquihau, Faboro, Berenabeen, naaonjoainunru aina, letoanajaauruhane coina. Nitohaneein tabaauru janiijin jetaote, Jodasi-Barasabanein acaauruhacha curuaatei, chaen Silasi, naaonjoainunru letoaaure. Acaauru jetaote, nii Jesocurisito ranojoinunru- cana nejeraauru rai, jataain nelatineein neeure.

<sup>23</sup> Nitohaneein letoanajaain jetaote, acaauru aina quiricha laenaain jetao letoaaure, naain Antioquihau nenacaauru- Jesocurisito ranojoinunru rai, nii Jerosaleen nenacaauru- afosotooru, acaauru bichauhenaauru, naaonjoainuri.

Nii quiricha- acaauruhacha laenai cuhane jetaote:

“Saainna- afosotonichaanu nena, inara coaucaanura. Saain, Jesocurisito ranojoneein nenacaauru- cana nejeraauru bichauhenaauru ainane, inara coacuhin, caa laenaain letoacaanura. Saain Jesocurisito coreniha- canacaanu nejeraneein, Antioquihau, Siriau, Silisiau naaonjoainun- Jorionelanaala- neniquichene raina, caa laenaain letoacaanu,

<sup>24</sup> canacaanu letononelanaala, caa Jerosaleen caje cuhin, inara suujua rohecaa cuuruha, inara jabereco cari molo- hiche, aitoa Moisesane rijijieeine que aitiin, leinjiin cha- coitucuhi rijijieein, inara tenaa jerecuruhane coitucuhacaan- nune jaunra.

<sup>25</sup> Nii jaunna, satiin coacuhin, coroatajaain canacaanu caje nenacaauru- cachaauru letoacaanu, jataaen canaacha belaihuri- Jesocurisito coreniha- cana nejeraneein nenacaauru- Faboro, Berenabeen naaonjoainunru aina, canacaanu aina nenacaauru coroatajai cachaauru letoacaanu, inara coaraa uuruhane coinara.

<sup>26</sup> Nii Berenabeen aina Faboro ichaote, jataaen lunajeriin ne, Cana Curuaanaa Jesocurisito ere tonoraain, nere beeb- jeeuruhane corenihara.

<sup>27</sup> Nitohaneeina, nii Jodasi, Silasi naaonjoaain letoa- caanu acaauru ainara. Acaaurute, inara rai ereein, jitariin inara rai niriinanai biha cuurureein, nujuaaen cajera.

<sup>28-29</sup> Cana Coaunera- Suujue- sujuatenojoneeinte, canacaanu rai caohachae, inara rai ichaonaa caaintati tenaa nainenihacaanura. Raujiaainchane inara rai aitiin laenacaanu: ‘Jiaonriha, cacha ichanohineein nena- chosi rai niicha teuri- lenone quiichenera. Jiaonriha, raro ruluhin sonojoin lenone quiin naaonjoaichenera. Niheichu chaen, ichana nihanatiin, jiaonriha quiichenera. Jiaonriha, sinijeraaquiichene nihanatiin, nejelau ene

aina naosateeeichenera. Niheichu, sinijieraquelanaala neeichene nihanatiin, jiaonriha jelai teein- raelanaala ene aina ichaohichenera. Jiaonrihachu, enecuru nihanatiin, sinijieraacane nihanatiin, nejelau quicha aina ichaohanera. Niheichu, jiaonriha lanaquelanaala nihane nihanatiin, quicha raelanaala jelai teein aina ichaohanera,' Nihei nenacaaen nii baihata. Caa aitocooaanune rijijieein, tonoraain ichaohichenete, caohachaaain ichaain, caohachaaain ichaaonaa naineriquicheeincha. Raotojoeein neeuchera,"

naain jetaote, nii Antioquihau- acaauruhacha letoaaene-quiricha laenaauere, letoaaauruhane coina.

<sup>30</sup> Nitohaneein jetaote, inae nainaaauruhane jaun jetao, ita rai necoeein, Antioquihau cuure nii Faboro, Berenabeen, Jodasi, Silasi naaonjoainuri. Nii Antioquihau turuhin jetaote, nii cuu nenacaauru- Jesocurisito ranojoinunru jitariin taojiaain jetao, nii acaauru rai- afosotooruhacha letoai- quiricha teure jetao, acaauru rai.

<sup>31</sup> Nii jaun jetaote, joracaaain ereretaain coaraain jetao, corooaecure jetao, nii cana nejeraauru- Jesocurisito ranojoinunru, caohatiin acaauru suujuaateein, acaauru suujua lararajiaain, ichacuruhana jaun.

<sup>32</sup> Nii Jodasi aina Silasi netonai jetaote, Cana Coanera caje erenaa raauruhane, cacha rai beebejeraneein neeure. Nii jaun jetaote, niha acaauru rai rauhina jaun jetao, nii Jesocurisito ranojoinunru rai ereein jetao, acaauru suujua lararajiaain jetao, acaauru suujua nunaaure, acaauru rai ereein acaauru suujuateein.

<sup>33</sup> Nitohaneein jetaote, cuu carajaaajoaain neeuruhane baiha jetao, inae acaauru rai necoeeure nii Antioquihau nenacaauru- Jesocurisito ranojoinunru. "Raotojoeein caunichuchera." naain jetao, acaauru rai necoeeure,

<sup>34</sup> jelaiha Jerosaleeun cauhacuuruha, nii letoanajaaaurera rene, Jodasi aina Silasichurune coina.

<sup>35</sup> Nii jana, Berenabeen aina Faboro jetaote, cuu nii Antioquihau nedaaure. Nii cuu arajiin nenacaauru aina jiniinquin, cuu jetaote, cojoanoonetojoein Cana Curuaanaa ere beebejeein, cachaauru relaaure.

*Misionero neein amuhane coroata satiha Faborone*

<sup>36</sup> Nii baiha carajaaajoaain neein jetaote:

"Coanete, turunichaaca, satiin nii jauriaa Cana Curuaanaa beratenojoi beebejihacaluna jaaunru- neseeuu sacutaaincha. Chatohaneeincha neeure, nii cuuru nenacaauru- cana nejeraauru- Jesocurisito ranojoihunruta," naa Faboro, Berenabeen raina jaun jetaote niqui,

<sup>37</sup> acaauru aina Joaan naain curuajai- Maroco amanaa jeriha aina- Berenabeenne jana jetaote,

<sup>38</sup> rautaaajoaenihana jaun, jerecojoaene jetao Faboro, jauriaanejeein cuuru bana, Paanfiliau ratirinajaain, cauha cuhalune jaun jetao, acaauru jiniichaain- acaauru amiha- neeon ichajeein sacuenihalune jaun.

<sup>39</sup> Nitohaneein jataaen amaane jerelanaala, jataaen coi- intiha Faborona jaun jetaote, jelai teein jetao, nii Maroco cotijiae jetao Berenabeen, corianeraaunu que. Nitohaneein cotijiaain jetaote, aina Chifereu cuure jetao, ucuae cunaa bote cuhane fauhin.

<sup>40</sup> Nii jana, Faboro jetaote, jelai teein, corianeraaunu que Silasi cotijiae. Nii jana jetaote, acaauru coroatajaniha Cana Coaunerane coina jetao, acaauru rai Cana Coaunera bajaain letoanajaaunre nii Antioquihau nenacaauru- Jesocurisito ra- nojoinunru. Nitohaneein jetaote, jelai caje nerocohin cuure jetao,

<sup>41</sup> Siriau, Silisiau naaonjoainun. Cuuru turuuruna jaun jetaote, nii cuuru nenacaauru- Cana Curuaanaa Jesocurisito ranojoinuru rai ereein jetao, acaauru suujuateure, cao- hachaaain rauhijiriin, jianelanaala Cana Coaunera ere tono- raain, niicha jerenohicha ichacuruhane coina.

## 16

### *Faboro aina Silasi corihaniha cuha Timoteeone*

<sup>1</sup> Nitohaneein cuhin jetaote, Derebeeu, chaen Listrau, naaonjoaihun, turuha cue Faboro. Nii jana jetaote, cuu leein- jiin cacha- Jesocurisito esenetaera- Timoteeoneein curuajai- Jorio bene que nebaain- Curieco que inacanaa ruha cue Faboro. Nii neba jetaote, Jesocurisito esenetaera ne.

<sup>2</sup> Satiin- Listrau, Iconioo, naaonjoaihun nenacaauru- Jesocurisito coreniha cana nejeraauru jetaote, “Aca jete, jataain, caohacha cachaneein ne,” naaure jetao que, coitucuurerauru.

<sup>3</sup> Niritiin, rai beeuruhane jaun jetaote, acaauru cori- haniha cuha Timoteeone jere Faboro. Nitohaneein acaauru corihaneraanu que amauruhane coina jetaote, Timoteeo jabereco cari jihununurateein, saerate Faboro. Nabana rautaelanaala, que nererojoecaauruha cuu nenacaauru- Jo- rioocurune coataa jetaote, nitohaneein terate Faboro, inae, satiin cuu nenacaauru- Jorioocuru, Curieconein niha Timo- teeo inacane coitucuuruhane jaun.

<sup>4</sup> Nitohaneein, acaauru aina Timoteeo amain cuhin jetaote, situuruna jaun nenacaauru neseeuu naineein, Jorioniheichuru- Jesocurisito esenetaeraauru rai jetao, aitiin



berateeuruha afosotooru aina- Jerosaleeun nenacaauru- Jesocurisito ranojohunru- coaraaurune rijitoejin beebjeein jetao kujueure.

<sup>5</sup> Nitohanihana jaun jetaote, jelai choae jauhecotojoeriin, esenetajeein cuujueein nejeeonteejeein, sacuire Jesocurisito ranojohunru.

*Leeinjiin Masedonia cocoaicha que, Faboro notaaca Cana Coaunerane*

<sup>6</sup> Asia batane que nenacaauru rene cuhin beebjeeruhane jereniha Cana Coaunera Suujuene jaun jetaote, rauhijiriin cuure, Forijia batane, Galasia batane, naaonjoaihunri jelson situhin.

<sup>7</sup> Nitohaneein jetaote, rauhijiriin cuhin, Misia batane-nunuhe que turuha cuure. Jelai caje coauneein jetaote, Bitiniau bataneun que turuha cunaa coaacure niqui. Ne jetaote, cuuruhane caohate jetao, Jesoso Suujue.

<sup>8</sup> Nii jaun jetaote, nirijieein, rauhijiriin Misiau turue lanaala, rauhijiriin situhin, Toroasi cofauhanaun, turuure.

<sup>9</sup> Ecu netiin jetaote, janotiin sinihu coetacai rijitoejin leeinjiin cacha- Masedonia cocoaicha que notaaca Cana Coaunerane jaun jetao, nii Masedonia cocoaicha aina, itaque taca cue Faboro. Que tacaain jetaote, nacatiha nichaaurain: "Atiin, Masedoniau, turuha uute, cuu canacaanu re-laaicha," nae jetao, Faboro sinihu.

<sup>10</sup> Nitohaneein notaaca Cana Coaunerane biha Faborone jaunne, nii rijijieein neruujueein, Masedoniau cuhacaanu. "Jerihane, cuu Jesocurisito que erejeein beebjenaa cointate, cuu cana cotiharate, Cana Coaunerara," naaina, cuhacaanu.

*Filipoo turuuruha Faboro aina Silasine*

<sup>11</sup> Nitohaneeina, Toroasi cofauhanaun caje, nesaruna-leeinjiin bote cuhane fauhin, cucuana cuhane cuujueein, rauhijiriin Samotoroasi cobenaun, tacanacanejeein cuhacaanu. Nii cojoanoo cuhine, turuha cuhacaanu Neapolisihu.

<sup>12</sup> Jelai, cajena, atane choaen cuhin, Filipoo turuha cuhacaanu. Nii Filipo te, Masedonia batane que nena- nese tabaaineein- Romanocuru nejesina que cocoaichaquuin ne-naane. Cuuna inata janoejin, neorihacaanu.

<sup>13</sup> Nitohaneeinna, cuu, nebetacanaa janonaa bana, naain nese edaa cuhacaanu, nucuhe auhaniha cuhin. Cuu niha netaojiaain- Cana Coaunera bajaauruha- Jorioocuruna jaan coitucuhacaanuna jaun. Cuuna turuhin, nelauriaain, cuu netaojianacaauru- enecuru rai, Jesocurisito que ereerejeein beebjihacaanu.

14 Nii cuu netaojianacaauru jana nenea- leeinjiin- ene curuaate, Lidia ne. Acate Tiatira nese caje unaaneein, cajiione caohacha- lanaajihajoaain que- necoretiha nenea ne. Nii enete, aihuruha Jorioocurune rijijieein, Cana Coaunera coroaera nihana jaun, coroatajane Cana Coaunera, rautain, Faborohacha beebejei aonaane coina.

15 Nii jaunte, saain loreri asae nenacaauru naraaichuru aina jiniiquiin, baotisanajoineein neuruhane baiha:

“Esinaaen rauhijiiiriin Cana Curuaanaa esenetaeraneein nihanune esenetaaichene, caloheri asaae, siniha uuchera,” naain canacaanu chunaa Lidiana jaun, cuu nihacaanulu.

16 Inae, ita taojiaain- Cana Coaunera bajaauruhane jaan cuhacaanune janate, leeinjiin ranuna- coseenraneein nenea aina ita eruhacaanu. Nii ranunate, saruha Moconajaerane que, enaacha, chaelai nihane, cojoeluhinae. Nitohaneein, enaacha chaelai nihane, cojoeluhinaane jaunte, que nihane, chaelai cojoeluhinaerateein, coreniha arajiin coriqui nihane, raerajeure, nii sirichaauru.

17 Nii ranunate Faboro aina, cuujihacaanune jana, canacaanu caaijie uhin, ehequiin:

“Caa cachaaurute, acaihanejei Cana Coauneraneein nenea- aitoonjoa beebejeeureranera. Acaaurute, raotojoeein caseteco caje nichoteein jianacoo nenea nainiha cachanejaan beeureranera,” nae, ehequiin- nii ranuna.

18 Nii jaun jetaote, cojoanooonetojoein, niriti nejesina nihane jaun, inauhene aonajenajaaocane baiha, inae tabiicha, coetae Faboro, araai janohin, niritonajaaocane jaun, coetaain jetaote, nii chaelai cojoeluhinaa- enaacha- nii ranunane jaan rai:

“Cana Coaunera Calaohi- Jesocurisito coreniha, nii ranuna caje mituhin amuura,” naa Faborone rijijieein jetaote, caje mituhin amue, nii ranuna saruhera.

19 Nii jaun jetaote, inae neniha saruherane jaun, chaelai cojoeluhinasinihane coaracuruha nii ranuna sirichaaurune jaun inae coreniha coriqui erunaa nainecurenihane jaun jetaote, Faboro aina curuataain Silasi mucuure nii ranuna sirichaauru. Nitohaneein, mucunajaain jetaote, amana- jaunre, cocoinanacaihuri acatiha, naain nese cataaun nenea- ita colurujeeuruhana jaun amanajaunre.

20 Nitohaneein, amanajaain turuhanajaain jetaote, joe- siocuru rai, nechu jataain, acaauru cotaiha nohanein jetao:

“Caa Jorioocurute, satiin canacaanu nese sacutaain, satiin- cachaauru rohecaaurera.

21 Chaentechu, cana Romanonihacachene ichao corenaa jereein, nejelau ichaonaa que ichaohacachene coina, que cana relaaurera. Aihana jaun nainihe, nii que ereein, que

cacha relaauruhane jerichaachenera. Nitohanei ichaonaa que ichaonaa nainihacache, cana Romanonihacachene jaunta,” naaure jetao.

<sup>22</sup> Nii jaun jetaote, satiin acaauru aina obajeein jetao, mucunajaauruhane jana, acaauru cajione rocoerateein jetao, enuha que bisichatenajaaure joesiocuru.

<sup>23</sup> Nitohaneein, mainajeriin bisichatenajaauruhane baiha jetaote, caresero cuhane enohanajaaure, caohatiin berainajaan caresero beraichane coina, aitiin.

<sup>24</sup> Niritiin suujuateein letoaauruha joesiocuruna jaun jetaote, caresero fuuniha, tenajae, sefo que acaauru tijia mucerateein, nii caresero beraicha.

<sup>25</sup> Nii jana jetaote, cuu dede cataaun, Cana Coaunera bajaebajajeein, nenatecuruha- Faboro aina Silasine jana jetaote, cuu aonajeeunre, nii cuu nenacauru leeochoaauru- casetecocuru.

<sup>26</sup> Nii jana jetaote, luhecotariin uhe cana lialiaera, mijieinetiin. Nii jaun jetaote, mijieineein nerurujuaa nii caresero cuhanaine jana jetao, neyoracaacoaa caresero bacuujuaarune jana, satiin- nii cuu nenacauru- casetecocuru caje nerojoirojoiirii nii acaauru biji ichoracuru- *cadenacuru*.

<sup>27</sup> Nii jana jetaote, jitoroaa nii caresero beraicha notane jana, nii caresero coaraane jana, satiin jetao, neyoracaacoae nii caresero bacuujuaaauru. Nii jaun jetaote, “Inae jecha sorooruha, nii casetecocuru,” naain jetao, rai esefara rocohite, raajenhane nesohin nijiaohanne coina.

<sup>28</sup> Nii jana jetaote, rai ehequiin:

“Coaa ichaajenhane, chatoaneein necunaitaara. Satiina cau nihacaanura,” nae jetao, rai Faboro.

<sup>29</sup> Nii jaun jetaote, cono bajaain, soroneein cuhin, enohin jetao, Faboro aina- Silasi acatiha, rijijijianein coasina caaun jetao, acaauru acatiha neseonrae nii caresero beraicha.

<sup>30</sup> Nii baiha jetaote, caresero caje mitanajaain jetao:

“Cachaauru, cha ichareeun, nitajihanune coataa, nichotihanune coinata,” naain bajaane jana jetaote:

<sup>31</sup> “Cana Curuaanaa- Jesocurisito esenetaaute, nichoteei, ii sinijiera, ii calaoichuru, satiin ii loreri asae nenacauru, naaonjoaihunri ainara,” naain jetao, tonoraare, Faboro aina Silasi.

<sup>32</sup> Niritiin tonoraain jetaote, rai Cana Curuaanaa Jesocurisito beratenojoi beebejeure, satiin- nii loreri asae nenacauru raine maajeein.

<sup>33</sup> Nitohaneein, dede catairijihu nihanatiin jetaote, temuha acaauru que- acaauru bisihuruhane jaaunne jaun jetao, acaauru rai culeje nii caresero beraicha. Nii baiha jetaote,

inae rai sinijiera aina, saain rai loreri asaae nenacaauru aina jiniiquiin, baotisanojoneein neeure.

<sup>34</sup> Nitohaneein jetaote, rai loreri asaae jetao, Faboro aina curuataain Silasi amaain jetao, coroaatenajae nii caresero beraicha. Nitoaneein jetaote, rai loreri asaae nenacaacuru aina jiniiquiin satiin- sinijiera aina jetao corojeein, raotjoein neeure, inae Cana Coaunera esenetaauruhane jaun.

<sup>35</sup> Inae jano jana jetaote, folisihacuru letoaaure jetao, joesiocuru, Faboro aina Silasi joracaeratiha cuuruha, caresero beraicha quene coina.

<sup>36</sup> Nii jaun jetao te:

“Carait, nere letoaaure joesiocuru, inara joracaain, inara jianichaaune coinara. Aihana jaun, inae nainiquiche, raotjoein mituhin, amuhichenera,” naa nii caresero beraicha, Faboro raina jaun jetaote,

<sup>37</sup> nii folisihacuru rai jetao:

“Canacaanu Romanonihacaanu natiinte, caohachaaain rautaaain, canacaanu rai bajaaurihe amuneein, satiin coarajih cachane notaracae canacaanu bisiin, canacaanu enoaerateeure caresero cuhanera. Nii natiinte, nechu jataaen asinojoneein, inae canacaanu mitaeratenaa jerecurea. Aihana jaun coatia miturihaacaanuhi, raajenhane uhin, canacaanu mitaa uuruhinera,” nae jetao, Faboro, nii folisihacuru rai.

<sup>38</sup> Nii jaun jetaote, turuhin beeuruha nii folisihacuru, joesiocuru raine jaun jetao, nesoonetoore jetao, Romano neeuruhane beeuruha acaauru raine beeuruha, nii acaauru letonocuru- folisihacuruna jaun.

<sup>39</sup> Nii jaun jetaote, raaje cuhin jetao, turuhin, Faboro aina Silasi joracaerateein jetao:

“Atiin, inara rai, baasoneein ichacaanuneeque, canacaanu que inara suujua acateein, atiin, caelai caje amuuchera,” naaure jetao, nii joesiocuru, acaauru mitaain.

<sup>40</sup> Nitohaneein, caresero caje inae mitanajaauruhane jaun jetaote, mituhin jetao, Lidia rene, turuha cuure jetao, Faboro aina Silasi, cuu nenacaauru- Jesocurisito coreniha- cana nejeraauru coaraain, acaauru suujuateein, acaauru suujua lararajiaauruhane baiha jetaote, jelai caje amuure.

## 17

*Tesalonecau turuuruha Faboro aina Silasine jana, acaauru que nererojoeccain, acaauru aina baaecuruhane*

<sup>1</sup> Tesalonecau turuuruhane coina jetaote, Anfipolisi, chaen Apolonia, naaonjoaain neseuru choae situhin, cuhin jetao, turuha cuure Tesalonecau Faboro aina Silasi. Cuu jetaote,

ita taojiaauruhana jaan coloheri- sinacoca sirichure cuu nacaauru Jorioocuru.

<sup>2</sup> Nii asaae jetaote, turuha cue Faboro, nitohaniha rai nichaona jaun. Nitohaneein jetaote, nebetacanaa janonaa bana naineen jetao, nii sinacoca asaae cunajaque Faboro. Cuu jetaote, Jorioocuru aina nihane, ita cotaicha rijitonajaaocure jetao, cuu acaauru rai, Cana Coaunera Quiricha Inoaesi ereretaain, nichata semanaai reentiaain.

<sup>3</sup> Cuu nihane jetaote:

“Inae nitohanihane coina, letononeei nihana jaunte, ohin caje ichanaelu Mesihasi, Cana Coaunera Quiricha cuhane aitothane nainaane coinara,” naain jetao, rauhijiriin beebeje Faboro. Niritiin been jetaote: “Caa inara rai- quiicha beebejeite, jeelai Jesosoneein, canaacha cohajei- Mesihazine,” naain jetao, beebeje Faboro.

<sup>4</sup> Nii jaun jetaote, tabaauru Jorioocuru, arajii Curiecocuru- Jorioocuru aina ita taojiaain- Cana Coaunera bajaaurera naaonjoainuri jetaote, esenetaacoaaure, arajii enecuru- caohachanejeein nenacaaurune maajeein jetao, esenetaain jetao, Faboro, Silasi, naaonjoainuri aina neure.

<sup>5</sup> Nii jaun jetaote, acaauru que necoelai caaun jetao, acaauru aina obajeein, chachaelanaala, nelanaae caaun bero cuhane amuhemuhenaacaauru- neechu aansaineein ichaonacaauru ariin jetao taojiaaure, nii esenetaichuru Jorioocuru nii nese sacutaain acaauru aina cachaauru rerohecaain, cachaauru suujua auhacaeraanu que. Nitohaneein jetaote, arajiin cacha taojiaain jetao, Jasaan loreri asaae jetao, codoonetoha cuure jetao, Faboro, Silasi, naaonjoaain ariha, runajaaauruhane, acaauru mucuhin, tararanajaain, cachaauru rai tenajaaauruhane coina jetao, niqui.

<sup>6</sup> Ne jetaote, cuu Faboro aina Silasi ruurenihana jaun jetao, Jasaancha aina curuataain- cuu nenacaauru- Jesocurisito coreniha cana nejeraacuru- tabaauru amaaure, tararanajaain, cocoinanacaihuru rene. Nitohaneein, amanajaain jetaote, cocoinanacaihuru acatiha turuanajaain jetao, ehehequuin:

“Satiin cana rai chauratane sacutaain, cachaauru rerohecaain, cachaauru suujua auhacaaurerate, inae cau netonai turuurera.

<sup>7</sup> Nii inatiinte, turuuruhane jana raotojoein ranajae, caa Jasaanra. Acaaurute, Romanocuru curuaanaacuru curuaanaa eenferadoro- aitoonjoa ichoae iniin: ‘Nihaje leecha curuaanaacuru- curuaanaa- Jesosoneein curujaicha.’ naaure,” naain jetao, coulurujuenajaure Jorioocuru letonocuru- nechu aansaineein ichaonacaauru.

<sup>8</sup> Nii jaun jetaote, niritocuruhane jaun jetao, aonacuruhane que nererojoeaaure saain- nii cuu nenacaauru cachaauru, nii cocoainanacaihuru, naaonjoaihunri.

<sup>9</sup> Nejetaote, nii cocoainanacaihuru rai coriqui tee jetao, Jasoon, nii aina nenacaauru aina, inae nii nese caje mituhin amuuruha Faboroorune jana, acauru rai cainacuruhane coina. Nii aina jetaote, jianenaacure.

*Bereau turuuruha Faboro aina Silasine*

<sup>10</sup> Inae nocohecane jana jetaote, luhecotariin, naain Berea nichae, Faboro aina Silasi letoaaure jetao, Jesocurisito coreniha- cana nejeraauru, ucuuae cuuruha soronacanejeeine coina. Cuu turuhin jetaote, cuu nena- sinacoca asaae turuha cue jetao, Faboro aina Silasi.

<sup>11</sup> Nii cuu nenacaauru- Jorioocuru jetaote, naain Tesaloncau nenacaauru- Jorioocuru amuritoheriin jetao, caohachaaain suujua coaraain neeure. Nii jaun jetaote, nii Faborohacha beebejei- Jesocurisito beratenojoi aonajeeure, corojeein. Nii jaun jetaote, cojoanoonetojoein, Cana Coaunera Quiricha Inoaesi ereretaaure jetao, jiniiquiin, esinaae rauhijiriin aitocuruha Faboro aina Silasine rijiichane coaracuruhane coina.

<sup>12</sup> Nii jaun jetaote, esenetaaure arajiin cachaauru- Jorioocuru, arajiin Curiecocuru aina acauru benecuru- caohacha nejeein nenacaauru, naaonjoainuri.

<sup>13</sup> Nejetaote, nitohaneein, Bereau neein, Cana Coaunera aitoonjoa beebejiha Faborone coitucuuriin jetao cuuhin, cachaauru suujua rohecaa cuure jetao coaiten, nii Tesaloncau nenacaauru- Jorioocuru, acauru que nejerateeruha nii Bereau nenacaaurune coina.

<sup>14</sup> Nii jaun jetaote, chajaain caeneenejelanaala, nii Bereau, Timoteeo aina Silasi, naaonjoaain ratiriin, luhecotariin jelaicaje mituhane coina jetao, Faboro letoaaure jetao, cana temura nichae- cuu nenacaauru- Jesocurisito coreniha cana nejeraauru.

<sup>15</sup> Nii jaun jetaote, Faboro corianiha cuure jetao, nii aina amuhemuhenacaauru, Atena neseeu tiaain. Nii baiha jetaote, cuu Faboro ratiriin cauha cuure, chajaaajoaain coaraa cuuruha Silasi aina- Timoteeocurune coina aitiin, acauru letoaa Faborona jaun.

*Atenau niha Faborone*

<sup>16</sup> Nii Atenau neseeu neein, Silasi, Timoteeo, naaonjoaain cohaca nihana jaun jetaote, cuu itolere- araai laurii- cuu nenacaauru ichanohi- ecaanto coaraain jetao, jataain nererojoeae jetao, Faboro.

<sup>17</sup> Nii jana jetaote, sinacoca asaae, Jorioocuru aina ita co-taicha rijite jetao, leeochoaauru- ita taojiaain- Cana Coaunera coroaeraauru ainane maajeein. Nitohaneein jetaote, co-joanonetojoein jerichanetojoein, jeelai que aitiin, ita co-taicha rijitonajaque, nese cataaun netaojianacaauru aina.

<sup>18</sup> Chaen, cuu coroata lauriin nenacaauru- itolere coitu-cueracuru *filosofooru*, le laurii “epicoreeocuru,” le laurii “estooicocuru,” naaonjoaihunri aina jetaote, Faboro aina, ita cotaain jetao:

“Cha quena ereereje caa nereretanaa inatoroa,” naauruha tabaaaurune jana jetao:

“Nejelau ataneu nenacaauru rai chosichuru- bera necai-hara,” naaure jetao leeochoaauru, raotojoein, oo caje ichanaa Jesusone beebejiha Faborona jaun.

<sup>19</sup> Nitohaneein jetaote, niha jataain chatohaneein, mijiei-neein rucuheneacaine, ita taojiaain rucuhecuruhana jaun jetao, ichatane ucuuno- ajerineeojoaain- Areopago neein, acaauruhacha curuaateihu jetao, Faboro cotijiaain amaain, cuu turuaain jetao:

“Nii canaacaanu rai- iicha beebejei- ena ecoona- erenaa benaa naineeina, canaacaanu rai,

<sup>20</sup> Jataain canacaanuhacha coitucuhi que ereeina jaunna, ‘Naaonjoaain quene aitoonra.’ naain, canaacaanu rai beeine jerichaanu, jataain coitucunaa jerichaanune jaunra,” naaure jetao,

<sup>21</sup> satiin Atena cocoaichaneeurhane, chaen nejelau atane caje uhin- cuu nenacaauru naaonjoaihunri, niha chatohanaine, aonaain, que ita rai ereereena rautatooruhana jaun.

<sup>22</sup> Niritiin Faboro caje bajaauruha, nii niha chatohanaine rucuhecuruhane jaan- ichatane ucuuno- Areopago netiine jana jetaote, acaauru cataaun nichaauraaain jetao:

“Satiin inara Atena cocoaichaneeichenete, esinaae rauhi-jiriin, inara chosichuru coroaajeein ichaohin neeiche.

<sup>23</sup> Nii jaunte, ita taojiaaichene jaancuru naineein, coara-caaunne jana, cuuru ne- inara chosichuru rai lenone mo-cohichene jaancuru rorihuru. Nii rorihuru naineein coara-caaunne janate, ‘Chabana coitucueraai Cana Chosi rai’ naain laenanhine- nii leeinjiin rori. Nii coitucuelanaala, inaraacha coroaajte, Acaihanejei Nena- Cana Coaunerane. Quena, caa inara rai ereere jeein beebejeun.

<sup>24</sup> Acate, Cana Coauneraneein, itolere, cana rai chaauru-atane Coauneraneein, itolere, que nenacaauru Curuaanaaneein, itolere, satiin cana janonaa sirichaneein ne. Coatia, raajenihane- cacha ichanohineein nena loreri- Teenforo asaacha ichaohi.

<sup>25</sup> Nieichu chaen, rai chaaelai icharaaunu latihei. Acate, itolere cana rai ichaonaa teein, neraain ichaonaana jaanu teein, itolerene maajeein coaunaelu cana rai.

<sup>26</sup> Chaen jetaotechu, jauriaanejeein leeinjiin cacha coaunaelu, caje arajiin nefoerateein, laurilauri catohaneein- cana rai chauratane sacutaain- neenenu que. Nitohaneein, cacha coanaain jetaote, nenajaauru nenajaauru neeuruha le laurichurune coina, acaauru ichaona jaannu jelai been jetao, cuu ichaooruhane jinatelu Cana Coaunera.

<sup>27</sup> Chaen, esenetaain coitucunaa nainihane, coitucuha cachane cointe, nitohaneein ichaelu Cana Coaunera. Coatia niqui, cana caje corihae nihei Cana Coaunera.

<sup>28</sup> Cana Coaunera corenihate, ichaohin, nerurujuaain, naaonjoaain ichaohacache. Inara araaichuru tabaauru- raotojoein erenaa que ereereena inaaaureraauru jetaote: 'Cana Coaunera cajete, nefoeratenaaneein nihacache,' naain ereretocure.

<sup>29</sup> Nitohaneein, Cana Coaunera caje, nefoeratenaaneein nihacachena jaun, nainihe nejechauneein, cana suujua cuaain, 'Aiha coata, ajeri, naaonjoaain caje- cacha ichanohineein nena- chosichuru- ecaantoorune tocohaniha jecha, Cana Coaunera,' naain cana suujua cuaain nihacachene.

<sup>30</sup> Inoaelu jetaote laaen, coitucuurenihaluna jaun, niicha rautaa ichaa cachane jana, inauheneeicha coarajerejetelu jetao, Cana Coaunera. Jana, enenete laaen, inae jinatihana jaan que tihana jaun, coitucuhin nere tonoraa, itolere sacutaain cachane coina berate.

<sup>31</sup> Nitohaneein beratihana jaunte, inae Cojoanonaa- que banihateein- niicha rucujuei que tihane bana, caa chaaauru- atane que, satiin- neinichaachene coareein Cana Coaunera, esinaae rauhijiriin rai cachaneein neein- caohachaaain suujua coaraauru coitucuha- nii leeinjiin cacha janijiin niicharanojoi aina cuaaine coina. Niite raotojoein coitucuhacache, aca rai, nii ichaeraanu que, oo caje ichateein nihalune jaun," nae jetao Faboro.

<sup>32</sup> Niritiin, oo caje ichanarichaaain cachane biha Faborone jaun jetaote, oo baiha ichanaain nena nainiha cachane esenetaaurenihana jaun jetao, batocure tabaauru. Jana leeochoaauru jetaote:

"Leeocha banana, ii ere aoharihacaanuhincha," naaure jetao Faboro rai.

<sup>33</sup> Niritocuruha raine jaun jetaote, cuu ratirinajaain amuhe jetao, jelai caje Faboro.

<sup>34</sup> Nii jana, tabaauru jetaote, esenetaauruhana jaun, caaijie cuure. Nii jana jetaote, cuu acaauru aina cue leeinjiin cacha- Dionisio. Nii jetaote, nii ita taojiaauruna jaan- Areopago-



netaojianacaauru bichauhenaneein, niha chatohanaine rucuherraneein nenaane. Chaen leeinjiin ene- Damarisineein curuajai, chaen leeochoauru naaonjoainuri jetao, Faboro caaijie cuure.

## 18

### *Coriintoo turuha Faborone*

<sup>1</sup> Nii baiha jetaote, nii Atena caje amuhin, Coriintoo cue-Faboro.

<sup>2</sup> Cuu jetaote, Poonto batane caje unaa- leeinjiin Jorio-Aquila neein curuajai aina, ita ruure. Aca jetaote, rai comasai- Firisila aina, enanejeein Italia caje turuhin neeure Coriintoo. Nii bana, Romanocuru curuaanaacuru curuaanaa- eenferadoro neein nena- Culaodio, nii Roma caje, satiin mituuruha Jorioocurune coina, mijieinetiin aitothane jaun jetao, jelai caje mituure. Nii jana jetaote, acaauru rene turuha cue jetao, Faboro.

<sup>3</sup> Jerichanejeein, acaauru rijijieein, jacari caje lohanarinu que, acaauru ichanaa que amihaniha acaentonaina jaun-coaranaaca cue Faboro, cuu acaauru aina neein, jiniiquiin acaauru aina amihanihane coina.

<sup>4</sup> Cuu jetaote, nebetacanaa cojoanonaa bana naineein, ita taojiaain- Cana Coaunera bajaauruha Jorioocuruna jaan loreri- sinacoca asae turuha cuhin nejesina ne Faboro. Cuu Jesocurisito beratenojoi beebjeein, Jorioocuru relaain, Jori-oniheichurune maajeein relaane, esenetana nainecuruhane coina.

<sup>5</sup> Inae Masedonia batane caje, rene turuuruha Silasi aina Timoteeocurune jana jetaote, jacari caje lohanarinu namihaneeo jianeein, Cana Curuaanaacha beratenojoi benaacha que ne Faboro, rauhijiriin, aitoaha Cana Coaunera Quiricha Inoaesi cuhanene rijitoojoein: "Jesosote esinaae rauhijiriin canaacha cohajei Mesihasi ne," naain coitucuruha Joriocurune coina.

<sup>6</sup> Ne jetaote, rautaaurenihana jaun, aina obajeein co-taain, Faboro necoeje chanuure Jorioocuru. Nii jaun jetaote, rautaaurenihana Jorioocuruna jaun, jelai caje mituhane, co-jounacanu que jetao, cuu cajione romaromaain jetao,

"Inaraacha jerei ineente, caseteconein nitajeriquicheein-cha. Inae canu enene caje coauneein, cha ujuaihoneein nihaaunra. Inarate, nii ujuaihoneein neeiche. Inae aihane amuhanu. Ena caje coauneeine Jorioniheichuru rene aihane cureeunnicha," nae jetao Faboro, Jorioocuru rai.

<sup>7</sup> Nitohaneein, nii ita taojiaauruhana jaan sinacoca caje mituhin jetaote, rohan nena- leeijiin cacha- Tisio Josto loreri asae turuha cue Faboro. Nii cacha jetao, Jorionihei. Ne

jetaote, esiaaen rauhijiriin laaen Cana Coaunera ere esenetaain corojeein, tonoraera ne.

<sup>8</sup> Nitohaneein jetaote, sinacoca curuaanaa- Curisifo, saain rai bereecuru, rai comasai, saain rai loreri asae nenacaauru aina jiniiquiin, Cana Curuaanaa ere esenetaaure. Nitohaneein jetaote, arajii- Coriinto cocoaichanecuruhane jetao, beebejiha Faborone aonaain esenetaauruhana jaun, baotisanajoineein neeure.

<sup>9</sup> Le janotiin cuhane jetaote, coetacai rijitjoeein jetao, Faboro siniha cue Cana Curuaanaa. Sinihu, rai ecocohin jetaote: “Coaa canu ere beebejeeine jianihara. Jiaohine casiin jianeeinera.

<sup>10</sup> Canuna, ii aina nereeunicha. Nerihaain, caohachanainejeein chatohaneein cheterata, cau, caa nese que neeuruha arajiin canu cachaaurune jaunne ichei aitoonra,” nae jetao, Cana Curuaanaa, Faboro sinihu.

<sup>11</sup> Nii jaun jetaote, coroata jaanacai cataaun tiaain jetao, nii Coriintoo neein, jelai cocoaichacuru rai, Cana Coaunera ere beebeje jetao Faboro.

<sup>12</sup> Ne jetaote, Acaiha batane coberenadoro neein niha Calioonne jana jetao, Faboro aina nejerateein jetao, ita taojiaaure Jorioocuru. Nitohaneein, ita taojiaain jetaote, Faboro mucuhin amaare, ita colurujueeuruhana jaan coloheri- *tribonal* asae.

<sup>13</sup> Nitohaneein, mucuhin amaaain, coberenadoro acatiha turuaain jetaote:

“Caa cachate, cachaauru suujua tacaain, nejelauneei Cana Coaunera corojeein tonoraauruha cachaaurune jereein ne, cana rai cocoaeraa nitohanai ichaonaane saijjeein, rautanaa cojoaelanaalara,” naauruhane jana,

<sup>14</sup> cuu irihane coina, aonajiha Faborone jana jetaote, cuu Jorioocuru cotaicha rijitiin jetao:

“Jataain baaso ichaain, sonajaain jaohin, naaonjoaain que inara ere nihane jana nihanena, nainereun canu rohecaachene latelanaala, jeriquichene rijijjeein, inara- Jori-onequichene aonacaun tonajelanaalanera.

<sup>15</sup> Nena, inara aohana naineneun, joaereein, nitohaniha inara ichaona jaun aitiin, inara raajenihane inaraacha coacui que aitocohichene jaunra. Inara nii rucuhecuche. Coatia canu, nii que enonaa nainihaaun, nitohanai rucuherranu que nenihanune jaun,” naain jetao,

<sup>16</sup> nii ita colurujueeuruhana jaan coloheri- *tribonal* caje, nii Jorioocuru sitae, coberenadoro Calioon.

<sup>17</sup> Nii jaun jetaote, sinacoca curuaanaa- Sosetenesi mucuhin jetao, faohacure, nii ita colurujueeuruhana jaan coloheri- *tribonal* acatiha teein. Ne jetaote: “Coaraain

nainauruina, ” naain jetao cuu coarajenajae coberenadoro-  
Calioon.

*Antioquihau cauhin, jelai caje nacoauneein misioneroneein  
cuhane nichata satiha Faborone*

<sup>18</sup> Araai janohin, Coriintoo nihane baiha jetaote, Jesocurisito coreniha- cana nejeraauru rai necoeure jetao, Aquila- chaen rai sinijiera Firisila, naaonjoaain aina jiniiquiin- Faboro, Siria bataneu cuuruhane coina. Nitohaneein cuhin jetaote, cucuana cuhane cujueein, Sencurea turuhin jetao, caje amuhane coina bote cuhane fau rai, rai couturi loroaecaain joerate jetao Faboro, Cana Coaunera rai naitoonjoanlu nainane cojounacaneein.

<sup>19</sup> Nitohaneein cuhin, inae Efesoo turuhin jetaote, cuu Aquila ratiri, rai sinijiera Firisila aina. Nitohaneein cuu ratiriinajaain jetaote, naain nena sinacoca asae turuha cue jetao- Faboro. Cuu turuhin jetaote, enohin cuu nenacaauru- ita taojiaeraauru- Jorioocuru rai ereerejeein jetao, relanajae Faboro.

<sup>20</sup> Nii jaun jetaote, cuu carajaain acaauru aina nihane coina, Faboro chunaure. Ne jetaote, ainaa jerelanaala, acaauru rai:

<sup>21</sup> “Jerih, Cana Coaunera nena, caa baiha inara rene turuha ureeunicha, ” naain jetao necoe acaauru rai Faboro.

Nitohaneein, necoein jetaote, leinjiin bote cuhane fauhin, Efeso caje amuhe Faboro.

<sup>22</sup> Nitohaneein amuhin jetaote, Sesareea turuhin, jelai caje coaunein, atane choae cuhin, Jerosaleeun turuha cue Faboro, cuu nenacaauru Jesocurisito ranojoinunru coaraane coina. Nii baiha jetaote, caje Antioquihau cue jetao- Faboro.

<sup>23</sup> Nii baiha carajaojoaain neein jetaote, coaiten amuhemuhena nunuhetein, itolere Galasia batane, Firijia batane, naaonjoainuri sacutaain amuhemujueein, Jesocurisito esenetaeraauru suujuatein, acaauru suujua laraajiae jetao Faboro.

*Efeso Jesocurisito que ereerejiha Aforone*

<sup>24</sup> Nii jana jetaote, amuhemuheca Faborone naniha, Efesoo turuhe jetao, leinjiin cacha- Alejaandiria cocoaicha- Aforoneein curuajai. Nii jetaote, caohatiin Cana Coaunera Quiricha Inoasi coitucuhin, raotojoein ereerejeein, cacha relanaa coitucue jetao.

<sup>25</sup> Aca jetaote, esinae rauhijiriin, Cana Curuaanaa aitoonjoa coitucuhin, esenetaain, tonoraain nenaane. Nii jaun jetaote, raotojoein ereerejeein coroajeein, rauhi cuhane cuaain, Jesoso aitoonjoa beebejeein, que cacha relae. Ne jetaote, Jesocurisito esenetaeraauru rai, rai Suujue tiha Cana

Coaunerane coitucuhelanaala, acaihanejeein Cana Coaunera ere tonoraera neein niha cachane coujounacanu que, cacha baotisaa Joaan neeicha coitucuujiha natiin jetao, nitohanein cacha relae jetao, Aforo.

<sup>26</sup> Nitohanein jetaote, chaque tonaje lanaala, ita taojiaauruha Jorioocuruna jaan loreri- sinacoca asae cacha relae, satiin aonajera urichoo. Nii jana cuu neein aonajiha Aquila, rai sinijiera Firisila ainane jaun jetao, cotijiaain bujuaihu amaain jetao, rauhijiriin jeriha Cana Coaunerane rijijieein jetao, beeure Aforo rai, jelai amuritoheriin coitucuhane coina.

<sup>27</sup> Nii baiha jetaote, Acaiha batane cunaa jeriha- Aforone jaun jetao, quiricha laenaain, aina letoaaure, nii Acaiha nenacaauru- Jesocurisito esenetaeraauru rai, caohachaaain belaaain raauruhane coina. Inae Acaiha turuhin jetaote, Cana Coauneraacha belainojoinnein- Jesocurisito- esenetaeraauru coroatajane jetao, jataain Aforo.

<sup>28</sup> Nitohanein jetaote, rauhi coaraain, rauhi cuhane cuaain, Jorioocuru rai ere, satiin aonajera urichoo. Nitohanein, acaauru rai ereerejeein jetaote, acaauru rai Cana Coaunera Quiricha Inoasesi ereretae jetao, Cana Coaunera jerenohinein, letononeein Mesihasi niha Jesoso ne que, aitoaha Cana Coaunerane beein. Nii jaun jetaote, chunijiu cuaain tonaain Aforo batiin tonaain erenaa nainecurene jetao, Jorioocuru, acaauru que coarateein aitohana jaun.

## 19

### *Efeso turuha Faborone*

<sup>1</sup> Coriintoo niha Aforone nainiha jetaote, Efeso cue Faboro. Efeso turuhane coina jetaote, ichtatane tabai ucuuno que iniin, ichtatane tabai choae situhin, turuha cue jetao, Efeso Faboro. Cuu jetaote, le laurijieein Jesocurisito esentaeraauru aina ita eruure jetao.

<sup>2</sup> Nitohanein, runajaain jetaote, acaauru rai:

“Tana, Jesocurisito esenetaichene nunuheteichene bana, inae Cana Coaunera Suujue raain neeicheluneta,” naain acaauru caje bajaa Faborone jana jetaote:

“Aihahacaanuta. Coatia chaabana niritiin, esenetaeraauru rai, rai Suujue tiha Cana Coaunerane coitucuhacaanuta,” naain tonoraauruhane jaun jetaote:

<sup>3</sup> “Chatohanai quetejian, baotisanoinnein neeicheta,” naain bajaa Faborone jana jetaote:

“Cacha baotisaain coujunacatihalu Joanne rijijieinchate, canacaanu coujounacatein neeurelura,” naain tonoraauruhane jaun jetaote:

4 “Aiha chuhisicha. Nii Joaante chuisi rauhijiriin Cana Coaunera esenetaeraauru cojounacaatelu baotisaain. Chaentechu nii caaijie turuhenei- Jesoso esenetaauruha saain cachaaurune coina beebejelu,” naain beebejiha acaauru rai Faborone jaun jetaote,

5 Cana Curuaanaa Jesocurisito coreniha, inae baotisaain cojounacatenohineein neure.

6 Chaen, acaauru choae biji merecaain, Cana Coaunera bajaa Faborone jana jetaote, acaauru choae fauha uha Cana Coaunera Suujuena jaun, itolere nejelau ere que ereein, aitoroatiha Cana Coaunerane beebejeeure. Nitohaneein jetaote, rai nere cuhanene maajeein Cana Coaunera beratenojoi ita rai beebejeeure.

7 Itolereneein jetaote, lechoonca coroatajaure, nii cachaauru- Cana Coaunera Suujue raeracuru.

8 Nichata ateein, cuu neein jetaote, netaojiaauruha- Jori-oocuruna jaan loreri- sinacoca asaae cuhin, Cana Coaunera ere beebeje jetao, Faboro, chaque casilanaala. Cuu jetaote, “Naaajoarichaain nii Cana Coaunera Cojoanona- Ena Turunaa,” naain beebeje, esenetaauruha cachaaurune coina.

9 Ne jetaote, tabaauru, nechuhataain, cotaiha esenetana jerecurenihana jaun, esenetana jerelanaala jetao, satiin aonajeeurera urichoo baasoneein, nii Ena Turunaa Ichaonaa que ereeuruhane jaun jetao, cuu ratirinajaain, cachaauru relaa- leeinjiin cacha- Tiranoneein curuajaine jaan- coloheri asaae, nii Jesocurisito esenetaeraauru- jitariin amaain jetao, nelonae Faboro. Cuu jetaote, cojoanonetoejin, Cana Coaunera ere beebeje jetao, Faboro.

10 Nitohaneein jetaote, cuu coroata jaanacaain, cacha relaae jaun jetao, Asia batane sacutaain nenacaauru, Jori-oocuru, Jorioniheichurune majeeinchuru, Cana Curuaanaa aitojoan beebejiha Faborona jaun, aonacure.

11 Nitohanihana jaun jetaote, Faboro aina cuaain jetao, itolere cojoaelanaacojoai ichaain jetao, cachaauru notajae- Cana Coaunera.

12 Nitohaneein coroatajaniha Cana Coaunerana jaun jetaote, Faboro que, cajione turuaain, amaain jetao, cunaitenacaauru dadaauruhane jetao, nerautaaure- itolere cunai caun cunaitenacaauru, itolere coitucuhichuru ichanaaneeinchuru- cunaitenacaauru caje jetaote, nii coitucuhichuru sitae.

13 Nii jana jetaote, neeurelu- benaneneein nenacaauru- Joriocuru- amuhemujeein- moconajaera ichanaaneein cunaitenacaauru rautaeraniha nenacaauru. Niichuru jetaote, “Jesoso coreniha mituuche,” naain, nii suujua cuhane moconajaera letono sirichauru caje sitaauruhane coina jetao,

coacuhin, ichaa Faborone rijijieein jetao, nii moconajaera ichanohineein coitucuchuhi que, cojoeonacaauru rai jetao: “Faborohacha beebejei- Jesoso coreniha, nii cacha caje mituhin amuura,” naaure jetao.

<sup>14</sup> Leeinjiin Jorio- Esesebaneein curuajai calaohichuru-caaunsineein nenacaauru jetaote, nitohanecure. Nii Esesebate, saseredotecuru curuaanaanein ne.

<sup>15</sup> Ne jetaote, coitucuhichuru sitanaa jerecuruha, que cojoeonaa cajene jana jetao:

“Canuna, Jesoso coitucuhin, Faborone maajeein coitucunra. Jana laaen, inara coitucuhaaun. Cha nequiche chaainti inarata,”

<sup>16</sup> naa nii cacha suujueniha netiin- nii coitucuhuhine rijieeoritiin jetaote, acauru choae tacaatiin jetao, sonajae jetao, acauru amuritiin nunujuetohana jaun jetao, banelelanaala jataain cunaitanajaain, jitariin acauru cajionene majeein, caohachanainejeein, soaisoairiin sonajae jetao, nii coitucuchuhi que- cojoeona cacha. Nii jaun jetaote, machorojoa machorojoaain jetao, nii neeurunajaa loreri caje jetao, soroore.

<sup>17</sup> Nii nitohanihana jaun jetaote, satiin- nii Efesoo nenacaauru Jorioocuru, Jorioniheichuru, naaonjoaihunri-satiin, nii coitucuhin casihure. Nii jaun jetaote, itolereenein, Cana Coaunera Calaohi niha Cana Curuaanaa- Jesocurisitone coitucure jetao, beebejeeuruhane jaun.

<sup>18</sup> Nitohaneein jetaote, arajiin cachaauru nii coaraain esenetaeraauru, satiin, aonajeeuruha cachaurune jana jetao, jauriaa jaiti coitucuelanaala itolere baaso- acaauruhacha ichai beeure jetao, jitariin caohachanainejeein.

<sup>19</sup> Chaen, arajiin benanecuru jetaote, nii nerelaauruhana jaan- acauru quiricha jitariin uhaain jetao, satiin coarajeeurera notaracae tein, jitariin mocoore. Nii acaauruhacha mocoli- acauru quiricha core rocooruhane jana jetaote, saouquichoonca oaraacani, acauru coriquineein jataain coretineein jetao mitue rai core.

<sup>20</sup> Nii jaun jetaote, itolere sacutaain, jelai amuritoheriin Cana Curuaanaa Jesocurisito esenetaain jetao neeure cachaauru. Nii jaun jetaote, esinaae rauhijiriin nelateein- itolere ichaa- Cana Coaunerane coaracuuruhane jaun jetao, leochaauru cachaauru netonoai esenetaaure.

<sup>21</sup> Nii nitohanihane baiha jetaote, coaiten Masedonia, Acaiha, naaonjoaihunri, cunaa jere jetao, Faboro, nii caje cuaain, Jerosaleeun cuhin, caje coauneein Romau cunaa jerihane jaun.

<sup>22</sup> Nitohaneein coacuhin jetaote, ichoaichania coroatajai- coroatajaneraauru- Timoteo, Erasto, naaonjoaihunri letoae

jetao, Masedoniau, Faboro, turuha curichaaaine beeuruha-ichoaichaniha, amaaine coina. Nitohaneein, ichoaichania letoanajaain jetaote, nii Asia batane que nedae jetao, Faboro.

*Faboro aina, rai corihacuru que nejerateein, ita rohecaauruha Efesoo nenacaaurune*

<sup>23</sup> Nii bana jetaote, satiin- nii Efesoo nenacaauru jetao, ita que nejerateein, ita rohecaauru nejesinajeein, nii Ena Turunaa Ichaonaa que, acaauru relauruhane jana, esentaauruhane coreniha.

<sup>24</sup> Leeinjiin cacha-Demetirioneein curuajai-coata que amihanenaa jetaote, nii leratera ne. Nii Demetirio jetaote, itolere ecaantoneenanain ichae jetao, coata caje, nii acaauru chosineein- acaauruhacha tei- eneneein nena- Aretemiasa rai Teenforo cojounaca sirijiacoaain. Nii que coretiin que cachaauru rai necoreteein jetaote, nii aina amihanenacaauru coretenajaque jetao, jataain coretiin.

<sup>25</sup> Nii Demetirio jetaote, jitariin coroatajaneraauru cotijiae jetao, leecha cachaauru- acaauru rijijieein- jelai- ecaanto icharaneein- amihanenacaauru cotijiaain jetao, acaauru rai jetao:

“Niha naaonjoaain- raotojoein amihaneein- raotojoein ichaohacachenajaan- cana amihaneeo core aasaerane jaunna, inara cotijiaaun, nii que erenaa coinara,” nae jetao, nii coata caje- ecaanto ichaera- Demetirio.

<sup>26</sup> Niritiin jetaote: “Inara netonaite, raotojoein coitucuhin, inara uricho que, nii aonaain neeichera. Nii Faboro naain acaauruhacha curuaatei cachate, cajieneein amuhemujueein, cachaauru rai: ‘Nelatihejie caa canaacha ichaichacha ichanohineein nena- cana chosicha.’ naain, arajii cachaauru rai bihana jaun jetaote, inae esenetaaure arajiiin cachaauru. Coatia leeinjiin cau Efesohacha nitohanai ichaaita. Itolereneein, Asia batane sacutaee lalajeeinte, amuhemujueein, nii chosi esetaauruhane jiaanecuruha cachaaurune coina relanajaane jaun, esenetaacoaure.

<sup>27</sup> Niite laaen, jataain cana rai ulunaain nedaera. Nabana chunei, cana amihaneeon coretena nainenihane, cana amihaneeon niha natiinte, nitajenaa naine. Chaentechu, Asia batane sacutaain, satiin chauratane sacutaain coroaeno-joinnein niha, jataain nelateein nihane corenihane saijieein, caa cana rai chosi- Aretemiasa que jaolecoorureein cachaaurura. Chaen inae turuururihaain rai Teenforo asaae, coroaeca,” nae jetao Demetirio.

<sup>28</sup> Nii jaun jetaote, nii aonaain obajeein nujuae soaisoaain jetao:

“Caohachaaain laraajiin neeine- Efeso cocoaichanichaachene- chosi- Aretemiasara,” naaure jetao, nii coata que- amihanenacaauru.

<sup>29</sup> Nitohaneein jetaote, cajiianein, ita cotaicha rijitiin jetao, nii coroatajai cachaauru- Faboro corianiha cunacaauru- Masedonia caje unacaauru- Caiho, chaen, nii leecha- Arisitaroconeein curuajai naajoaihunri curuataain jetao, codoonetiin mucuunajaain jetao, acaauru tararaain, ita taojiaain- chaelai coaracuruhana jaun- *teatro* neein acaauruhacha curuaateihu amanajaain jetao, ita taojiaeraauru acatiha jetao, tenajaa cuure.

<sup>30</sup> Nii jaun jetaote, acaauru coreniha enohin, cachaauru rai, iriha cunaa jeriha Faborone jana jetao, caohateeure, ecu nenacaauru- Jesocurisito- esenetaeraauru, nabana, chatohaneein teeuruhane coataa.

<sup>31</sup> Nii cuu- Asia batane nenacaauru- cocoinanacaihuru tabaauru jetaote, Faboro belaichaaauru nihana jaun jetaote, “Jiaonriha jera, nenoainera,” naerateeure jetao.

<sup>32</sup> Nii nainiha jetaote, nii ita taojiaauruhana jaun jetao, ita rai cajianein nujuae soaichure jetao, ita rohecaain. Jana, tabaauru jetaote, “Naaonjoaain coinata ne caa netaojianaara,” naain jetao, coitucuurene.

<sup>33</sup> Nii jaun jetaote, acaauru tabaauru jetao, “Naaonjoaana jaunte, nii rucuhacuruhane coina, netaojiaaure,” naain jetao, leeinjiin cacha- Alejaandoro neein curuajai rai, beeure. Nitohaneein rai berateein jetaote, acaauru ajiniha teein jetao, Alejaandoro sarasaracaain amaure Jorioocuru, nii netaojianacaauru acatiha, cuu nichaauraaain, nii ita rohecaeraauru rai, iriha Jorioonecuruhane corenihane coina. Nii jaun jetaote, turuhin, nii netaojianacaauru rai jetao, biji sarasarari, curuatoraain aonajeeuruhane, acaauru rai, satiin urichoo, Jorioocuru coreniha, irihane coina.

<sup>34</sup> Nitohaneein, irihane jana jetaote, nere cajeecha nainacorichure, acaentonai, Jorionihane que. Nitohaneein, nainacoriin jetaote:

“Caohachaaain, laraajiin neeine, Efeso cocoaichanihacachene- chosi- Aretemiasara,” naaure jetao, ita rai nujuaen soaajiin, carajaain, coroata oraain, acaauru chosi niha- Aretemiasa beuruhane jana, esenetaaureniha Jorioocurune coitucuuruhane jaun.

<sup>35</sup> Nii jana, nii neseeu- acaauru rai- chaelai queereeuruhane- laenaain rucuhera- “secretario” jetaote, inae aitoa acaauru raine jaun, sitonaaonjoauruhane jana jetao, acaauru rai:

“Aonacuche, Efeso nese cocoaichacuru. Satiin- itolere cachate, nii jataain- cana rai nelateein nena- cana chosi



loreri- Teenforo, chaen, nii dede caje- ajerineein Aretemiasa tocohaneein nalunaane maajeein beraihane coina nenaaneein niha- caa nese cocoaichanihacachanene coitucuurera.

<sup>36</sup> Nihei chunei, nii que, 'Nohanenaa,' naain iriha chuneine jaanu. Nii jaun, inae nii jiaanecuchera. Coa obaaecache. Coa caohachaaain inara suujua coarihei amuneein, chatohaneein, baaso chana coaucachera.

<sup>37</sup> Coatia, chatonaain cana chosi que ereein, niheichu Teenforo asaae asijiauhin naaonjoaauruha caa inaraacha mucuhin inaraacha uhaauri- cachaaurune coalanaalata.

<sup>38</sup> Chatonaain, acaauru colurujueein niha, nii coata que amihanenaa- Demetirio, nii aina amihanenacaauru ainane, taute neeure- nii rucuheraaunu que nenacaauru- joesiocuru, chaen, acaauru curuaanaacuru, naaonjoaihunri. Niha chunicoaha, acaauru coulurujuerane, taa, nii rucueraaunu que nenacaauru rene amanajaauchete, neruujueeuruhine, ecu le cachaauru jabereco coreniha irihane coinara.

<sup>39</sup> Niha esinaae rauhijiriin chatohanaine, rucuhenaajerequichene, satiin cocoinanacaihuru aina, ita taojiaain, nii rucujueein neeuchera. Nii banate, esinaae rauhijiriin, caohachaaain ita taojiana esineneein rucuhერიquicheeincha.

<sup>40</sup> Jana, jerichanejeein, sacunaa coauquichenete, cana colurujuenaa nainecurureein, 'Cana jecha cachaauru suujua rohecache,' naain. Nii quete, jataain lunaain nihacachera. Charijieein nejeein, coitucuhin, cana caje, 'Chatoaneein, lera- teein, ita rohecaaureta,' naain bajaauruha cocoinanacaihurune, tonaainte berichaacheta," naain jetao:

<sup>41</sup> "Chajaaincha cauhachanichuchera," nae acaauru rai, nii chaelai que ereeuruha nii neseeu nenacaaurune- laenaain- rucuhera.

## 20

*Masedonia, Curesia, naaonjoaihunri turuha cuha Faborone*

<sup>1</sup> Inae nitohaneein, cajianeein, ita rohecaaauruhane jianecuruhane baiha jetaote, jitariin, nii Jesocurisito coitucuurera cotijiaain jetao, suujuatenajae- Faboro. Nitohaneein, suujuatenajaane baiha jetaote, acaauru rai necoein, Masedonia batane cue jetao.

<sup>2</sup> Cuu jetaote, neseuru neseuru naineein, cuu nenacaauru- Jesocurisito coreniha cana nejeraauru rene bedaenein, cuu acaauru suujuateein, jelai amuritoheriin Jesocurisito esenetaauruhane coina, acaauru rai ereereje Faboro. Nitohaneein, acaauru rai ererejeein, acaauru suujua lararajihane baiha jetaote, Curesia batane cue jetao Faboro.

<sup>3</sup> Nitohaneein, Curesia batane turuhin jetaote, cuu ne nichata ateein. Cuu nichata ateein nihane baiha jetaote,

inae Siriau cuhane coina, bote cuhane fau rai, nihane jana jetaote, que necosuujuaauruha Jorioocurune coitucuuriin jetao, jelaiha atane ichoae cauha cunaa jere jetao, nacoauneein Masedonia choae situhin cuhin, Faboro.

<sup>4</sup> Nii janate, canacaanu corihaniha uure, Berea cocoaicha-Firo calaohi Sofate, chaen Tesaloneca cocoaichacuru- Arisitaroco aina Secoondo, chaen Derebe caje unaa Caiho, chaen Timoteeo, chaen Asia batane caje unacaauru- Tiquico aina-Torofimo, naaonjoaihunri.

<sup>5</sup> Satiin niichurute, ichoaichania amaain, Toroasihu, canacaanu cohaca cuure, Masedoniau canacaanu ratiriin.

<sup>6</sup> Nii janana, canacaanu, Filipo caje nesaruhacaanu, leeinjiin bote cuhane, jorerera colane ichanohi faan quihuruhana jaan cojoanona- Fasocoa beseta bitoacaanune baiha. Nitohaneein nesaruhin kuhina, saogui janone cuhane, turuha kuhacaanu Toroasihu. Cuuna canacaanu cohacuruha, nii ichoaichania cunacaauru- Jesocurisito coreniha- cana nejer- aauruna jaun, cuu erunajaacaanu. Nii Toroasihuna, caaunsi janoneein nihacaanu.

### *Toroasihu nenacaauru rene bedainiha Faborone*

<sup>7</sup> Cuuna, semana nunuhe cojoanona bana ita taojiacaanu, cana coreniha ohalune coaacuruha, satiin esenetaeraa- rune coina, faan chaluhin quihalu- Jesocurisitone rijijieein, ita aina jiniiquiin faan chaluhin quihacaanune coina. Nitohaneein netaojiaacaanune janate, Jesocurisito coreniha cana nejeraauru rai, carajaain itolere que, dede cataaun tiaain, ereereje Faboro, nii cojoanoo, jelai caje amuhane nihane jaun.

<sup>8</sup> Nitohaneeina, leeinjiin loreri ucuunetiin nena nichata coarana saatono que, netaojiacaanu. Cuurute, nihacoae arajiin conooru, moconojoineein.

<sup>9</sup> Nii janate, jelai caje nemarote, leeinjiin enamanaa- Eoticoneein curuajai. Acuujuua laa-joiri bacuujuaniha lauhe- quuin, cuu carajaain ereereeca Faborone aonajihana jaunte, amuritooriha sinirenana jaun, nemarote, nii loreri ucu- unetiin nena nichata coarana caje. Nii janate, soroneein fauhin, michuuruhane jana, inae ohe nii enamanaa.

<sup>10</sup> Nii jaunte, fauhin nii enamanaa que baluunetiin, cuu nenacaauru cana nejeraauru rai:

“Coa nesoonetohachera. Esinaaete niqui inae ohera. Nete, inae ichanaera,” nae Faboro.

<sup>11</sup> Nii baihate, jelaiha iniin, faan beeunebeeunein chaluhin quihane baiha, coaiten janohajeein ereerecane baihate, inae jelai amue.

<sup>12</sup> Nitohaneein, nemaroteein oha nii enamanaane jana, oo caje ichtiha Faboro aina cuaain Cana Coaunerane jaunte, jataain que nelararajiaaure.

*Toroasi cajene Miletoo cuhacaanu.*

<sup>13</sup> Nii janana, ichoaichania bote cuhane cuhin, Asoo, Faboro cohaca cuhacaanu, aca nitohaneein jereein, atane ichoae cuhana jaun.

<sup>14</sup> Inae nii Asoo, ita ruhacaanune janate, canacaanu aina, bote cuhane faain cue Faboro, Mitileneu.

<sup>15</sup> Jelai caje nesaruhinna, cojoanoo Quihoo situha cuhacaanu. Nii cajena, le janohin turuha cuhacaanu, Saamo cofauhanau. Cajena cojoanoo cuhin, turuhacaanu Miletoo.

<sup>16</sup> Asiau jeloon cuhin, carajanaa jerenihana jaunte, Efe-soo cunaa jerene Faboro, Jorioonecuruhane beseta- Feentecosetesi bana Jerosaleeun nenea jerihana jaun, chajaa-joaain Jerosaleeun turuhane coina.

*Efesoo nenacaauru- Jesocurisito ranojoihunrubichauhenaauru rai ereerejiha Faborone*

<sup>17</sup> Inae Miletoo turuhinte, jelai caje coaauneein, Efe-soo nenacaauru- Jesocurisito ranojoihunrubichauhenaauru cotiharate Faboro.

<sup>18</sup> Inae tururuha nii niicha cotiharateurine janate, acaauru rai:

“Cau caa- Asia batane que turuhanune caje coaauneein, inara ainaacha ichaohanulune jaunte, inara raotojoein canu ichao coitucuhichera.

<sup>19</sup> Itolere janonaa banana, joareein cacha rijijieein inara aina amuhemujeein, Cana Curuaanaacha jerenohi ichajein nerejetoonu, casuujua fononoichuru, itolere necairichanaa abaantaain, canasinee rijitocuruha Jorioocurune abaantaain.

<sup>20</sup> Nena, atiin janelanaala, inara caohachanu que, tabaauru que inara loreri asae, tabaauru que nenaanaja cataaun, naaonjoaihun teinchuru, satiin aonajeeurera urichoo inara rai, Cana Coaunera ere beebejeein, inara relarejetoonu.

<sup>21</sup> Chaen nechu, Jorioocuru rai, Joriooniheichuru, naaonjoaihunri raine maajeein: ‘Coaiten enacoauneein Cana Coaunera ere tonoraain, rai Calaohi- Jesocurisito netonoai esenetaain tonoraachera,’ narejetoonlura.

<sup>22</sup> Enana laen, inae Jerosaleeun cureeuni, ucuae caletoha Cana Coaunera Suujuene jaun. ‘Naaonjoarichaauni cuura,’ naain coitucuelanaalana, caa cureeunicha.

<sup>23</sup> Leeinjiin, neseuru naineein, cuhanunejaauru naineeinchurute, cuu turuhanune, caresero cuhane

caenoaain, cacairichaaaururichaaaine benajaque canu rai, Cana Coaunera Suujue, acaihanejei niichane coitucuujeen.

<sup>24</sup> Nena, chaque tonajeneen. Coatia chaque nelatihei canu rai, canu ichao. Nenacaenajian, cacairichaaauruhane que nelararajiaain, rachoojoein caletooa Cana Coaunera Calaohi- Jesocurisitona jaan nainana jereen. Niicha berateierenaa caohati beebejeen, jataain cacha belaiha Cana Coaunerane maajeenna beebejereenni.

<sup>25</sup> Esinae rauhijiriine, satiin, cau neniquichene raina, bee-oricheeni, Cana Coaunera Janonaa beebejihanune aonajera neeichene, coatia inae chunei enacoauneen cacoharar- ihaain.

<sup>26</sup> Nii jaunna, enene inara rai aitona jereen, rauhijiriin, nihei chunei coreniha, cha ujuaihoneen nenerihanuhine jaun,

<sup>27</sup> nii chunei que suujuelanaala, satiin cacha urichoo, Cana Coauneraacha jerei beebejihanune jaunna, cha ujuaih- oneen nenereenni.

<sup>28</sup> Aihana jaun, itolere que nainaain, necohalajiin, cao- hachaaain necoeraain neen, Cana Coaunera rai ita taoji- aeraauru beraihuhe, acaauru coreniha, coroso que ohalu rai Calaohine jaun. Niicha ranojihunru beraichanu quete, inara cotijiaain, nii beraichaanu que inara te Cana Coaunera Suujue.

<sup>29</sup> Inae amuhanune baihate, turuha uurureen nechu aansai ataibinaaeneen cacha quicha rijijieen nenacaauru- cachaauru, nechu jataaen Jesocurisito ranojihunru itajeene rijitiin.

<sup>30</sup> Chaente, inara tabaauru nihanatiin, nechu jataaen joaereen caje rocohin, relaa cuurureen, nii casaje esene- taain, acaauru aina cuuruha Jesocurisito ranojihunrune coina. Nitohaneente, nechu jataaen casaje que, cacha relaa cuurureen, suujua caje rocohin.

<sup>31</sup> Nii jaun, inara aina, nichata ajaanacaain nihanune bana, cojoanoo netojoeen, janotiin inetojoeinchuru, inara su- ujuaterejetocaaunlu, casuujua fononohine coacuhin, que nainaain necohalajiin ichaooche.

<sup>32</sup> Nii jaun, Jesocurisito coreniha- canejeraneen nenacaauru, caa inara rai- quiicha beebejei- naitoonjoa nerete, inara coroatajanereen, jelai amuritoheriin caohachaaain coitucuhin, esenetaichene coina. Cana Coaunerate naine satiin rai cachaneen neeninuru rai aitohane tocohaneen, inara coroatajanihane, nitohaneen coitucuhin esenetaeraauru coroatajanihane coina aitohaluna jaun.

<sup>33</sup> Coatia, canu caohachanu que, inara relarejetohaaunlu, nirijieein core colane. Nieichu, chunei cacha cajione bajarejetohaaunlu.

<sup>34</sup> Nii jaunte, inara raotojoein, cacoii que amihaneein quicha latei raain, canu aina nenacaauru rai netonaine, acaauruhacha lateine majeein ranune coaraain coitucuhichelu.

<sup>35</sup> Nitohaneein, inara netonai, itolere janonaa bana ichao-hichene coinana, inara que coarateein, inara rai aitorae-toonlu, chaelai que jataaen carichainejeein nenacaauru coroatajaneguichene coina: ‘Nenacaetejian, tihacane, raacane amuritoheriin raotojoein nenea nainichaa, chaelai que, cairichainejeein nenea rai, cha teein coroatajanichaane.’ naain cana relaaluu Cana Coaunera Calaoihi Jesusone coacuhin ichaquichene coina,” naain jetao, acaauru suujuate Faboro.

<sup>36</sup> Niritoha, acaauru raine baihate, neseonraain, acaauru aina jiniiquiin Cana Coaunera bajae Faboro.

<sup>37</sup> Nitohanihane janate, satiin Faboro que baalu balu-uneeinchuru, loalocoaainchuru coisichure.

<sup>38</sup> “Inae caachanijia cacoharariichenera,” naain rauhijiriin biha Faborone jaunte, jataain coinaderaaure. Nii baihate, corianiha cuure, nii cunaa jerihana jaan- bote nenajaun tiaain.

## 21

### *Jerosaleeun cuha Faborone*

<sup>1</sup> Nitohaneein, cuu Jesocurisito coreniha cana nejeraauru ratiriin, leinjiin bote cuhane fauhin, cucuana cuhane, rauhijiriin cuhinna, Cos cobenau turuha cuhacaanu. Nii cojoanoona, Rodasi cobenau turuhacaanu. Jelai caje coauneeina, turuha cuhacaanu, Patara neseeu.

<sup>2</sup> Nii Patarauna, leeocho bote Fenisiau cunaa eruhin, cuhane fauhin cuhacaanu.

<sup>3</sup> Nitohaneein cuhinna, Chifere cobena coarajeein situujihacaanu. Caje situhinna, cana ajaabiji nichajai que tacaain, nii Chifere ratiriin cuhacaanu, rauhijiriin Siria batane tiaain. Nii Siria auhaniha nenea Tiro cofauhanau, niicha amai ru-cuhele ratirihane niha nii botena jauna, cuu najauriha cuhacaanu.

<sup>4</sup> Cuuna, nii Tiro neseu, Jesocurisito esenetaeraauru eruhin, acaauru aina caaunsi janoneein nihacaanu. Nii janate, acaauru que coitucueratiha Cana Coaunera Suujuene jaun, coitucuhin, Jerosaleeun cuha Faborone caohateeure.

<sup>5</sup> Nena, caaunsi janoneein, cuu, acaauru aina nihaca-nune baiha, inae jelai caje amuhacaanu. Nii janate, satiin, canacaanu corianiha uure, acaauru sinijieraauru, acaauru

bereecuru, naaonjoaihunri aina jiniiquiin, naain nii nese bujuau tiaain. Cuuna, carene ichoae, acaauru aina neseon-raain, Cana Coaunera bajaacaanu.

<sup>6</sup> Nii baihana, acaauru rai necoeein, bote cuhane fauha cuhacaanu. Nii janate, inae acaauru netonai, nenajaun cauha cuure, canacaanu que janoriin.

<sup>7</sup> Tiro caje cuhinna, cucuana cuhaneeincha cuujueein Tolemaidau turuhacaanu. Nii Tolemaidauna turuhin, cuu Jesocurisito coreniha- cana nejeraauru eruhin, acaauru neeuruhane coitucuhin, cuu acaauru aina nihacaanu, le janohin.

<sup>8</sup> Nii cojoanoonna, jelai caje nesaruhin cuhin, Sesareea turuha cuhacaanu. Cuu turuhinna, Ferifi rene turuha cuhacaanu. Acate, Jesocurisito coitucuuruha cachaaurune coina amuhemujueein- Jesocurisito bera- “evangelista” neein afosooru coroatajaneraauru caaunsine ne.

<sup>9</sup> Nii Ferifite, jenaain cacunuque, ichauhenanihacoaain lanaquelanaala. Nii Ferifi cacunucurute, Cana Coaunera caje erenaa raain- cacha rai beeurera- *profetacuru* ne.

<sup>10</sup> Inae janojanoheriin, cuu nihacaanune janate, tajiha turuha uhe Jodea caje, Cana Coaunera caje erenaa raain- cachaauru rai bera- *profeta* Acabo.

<sup>11</sup> Acate, canacaanu rene turuhin, Faboro ichora raaoriin, canacaanu acatiha, raajenhane biji aina tija taotaain nichojoainte:

“Cana Coaunera Suujuete, carai be. Catohaneein jetaote, Jerosaleeun, caa ichora erora teein, nejelau ataneu nenacaauru bijihu tiha cuurureein Jorioocurura,”

<sup>12</sup> naain, bihana jaunna, Jerosaleeun cuha Faborone caohatihacaanu, nii Sesareea nenacaauru aina, niqi.

<sup>13</sup> Nete:

“Chanuna chanaain, canu inaderaaquiche. Canuna, itolere que jatoroaain neun. Coatia, leinjiin canu ichojoaain, camaauruhaneicha coina jatoroaain nihaaun. Canuna naineeun, Cana Curuaanaa Jesoso coreniha ohanu Jerosaleeunne,” naainte, canacaanu tonorae Faboro.

<sup>14</sup> Nii jaunne, inae tonaain chunijihu cuaain caohatenaa nainenihacaanune jaun jihanein:

“Coanete aihane, aina niicha jerei ichamiin- Cana Coaunera,” naain jianichaanu.

<sup>15</sup> Nii baihana, inae neruujueein Jerosaleeun cuhacaanu.

<sup>16</sup> Nii janate, canacaanu corianiha uure nii Sesareea nenacaauru- Jesocurisito esenetaeraauru tabaauru. Acaaurute, canacaanu amaure Chifere cocoaicha- Manasoon rene, cuu sinihacaanu ainane coina. Inae carajaa Jesocurisito esenetaera neein niha nii Manasoonne.

*Saantiaao rene turuha cuha Faborone*

17 Inae Jerosaleeun turuhacaanune janate, canacaanu corojeein, canacaanu raare, cuu nenacaauru- Jesocurisito coreniha cana nejeraauru.

18 Nii cojoanoote, canacaanu aina cuhin, Saantiaao rene turuha cuhe Faboro. Nii janate, cuu neure satiin Jesocurisito esenetaeraauru coaraneein nenacaauru- bichauhenaauru.

19 Nitohaneeinte, nii jitariin acaauru neeuruhane coitucuhane baiha, acaauru rai jitariin nunuhe caje coaunein, itolere que aina cuaain, Jorioniheichuru netonoai coroatajaniha Cana Coaunerane beebeje Faboro.

20 Nii jaunte: “Caohatoha Cana Coaunerara,” naain, Cana Coaunera corojeein:

“Inae coaraai- ichaso. Arajii oharaancanei cana araachuru Jorioocuru netonoaite, esenetaaure. Satiin acaaurute, jataain cana rai nelatiha Moisesa aitoonjoane que aitiin tonoraacachene jerecure.

21 Nete satiin, nejelau ataneu nenacaauru- Jorioocuru rai jete, Moisesa aitoonjoa tonoraauruhane caohatein, quichaneein nejanoha canaanaine, jabereco macohi cari saera teeuruhane caohatei, chaen cana ichaonijihanai que ichaooruhane jianein ichaooruhane coina jete aitohi, naain ii beure.

22 Tonareei jana, canacaanu rai, nii queta. Cha icharichaa-cheta. Satiin cachate, cau turuhine coitucuha cureeincha. Nihei chunei coitucuelanaala nainejerinaainta.

23 Aihana jaun, cana Jorionichaachene ichao rijijieein, ichaohine coitucuuruhane coina, cau caa jenaain canacaanu aina nenacaauru- cana araachuru, Cana Coaunera rai naitoonjoa nainacuruhane coina- nenacaauru

24 amaaui jiniichaaincha. Chaen iitonoai, Jorioniheichuru jana neein iicha ichai caje nuculucohine coina, ii coturiji loroaecaain joerateein, nii ii aina unacaauruhacha teeninuuru- itolere coreteeute, rai coturiji loroaecaain joeratenaa nainecurumiincha. Nii banate: ‘Acaentonaite, Moisesa aitoonjoa tonorae. Aihana jaun chujian nohani-hate, joenreein nere rocohin coulurujueure.’ naaurureein-satiin cachaaurura.

25 Nena laen, Jorioniheichuru netonai esenetaaurera rai, quiricha cuhane: ‘Coo acaauru chosineein acaauruhacha teiecaanto rai- inara araachuru tenojoi- lenone quihachera. Nijiaonrihachu, ichana jabereco quichenera. Nijiaonrihachu chaen, raro ruluhin sonojoin lenone niha natiin quichenera. Nijiaonrihachu, nejelau ene- inara sinijierane lanaala nena aina ichaohichera.’ naain laenecaanulura,” naaure nii Saantiaao rene turuhin nenacaauru- Jesocurisito esenetaeraauru coaraauru Jorioocuru- bichauhenaauru, Faboro rai.

*Ita taojiaauruna jaan loreri- Teenforo asae Faboro mucuuruhane*

<sup>26</sup> Nii jaunte, niritiin Faboro letoauruhana jaun, nii jenaain cuu nenacaauru- Jorioocuru amaain, nii cojoanoo Teenforo acatiha jetao, acaauru aina jiniiquiin neculucoore. Nii baiha jetaote, Teenforo asae enohin jetao, “Naaonjoai banana, caa Cana Coaunera rai canacaanu aitoonjoa nainarichaanuhincha. Jana naaonjoaain banana, Cana Coaunera belaihacaanune jaan- itolere terichaanuhicha,” naain jetao bee Faboro.

<sup>27</sup> Inae caaunsi janone naiinane lalajeeuruhane jana jetaote, Teenforo asae Faboro eruhin, cachaauru suujua rohecaau- Asia batane caje unacaauru- Jorioocuru. Nitohaneein Teenforo asae Faboro eruhin jetaote,

<sup>28</sup> rene cuhin ruhanihajaaintiin leeochoauru Isaraelita- neeuruhane cotijiaain, nujuae soaijiin:

“Canejeraauru, canacaanu coroatajanecuche. Caa cachate, itolere atane sacutaain, cacha relaa amuhemujuera. Itolere Jorionichaache neecha rautai que, nechua jataaen cana cairichaa, itolere Moisesa aitoonjoan tonoraacachene caohateein, chaen, caa ita taojiaain- Cana Coaunera bajanaanaja- Teenforo quene maajeein ereeinchurura. Chaentechu, nejelau cachaauru- Curiecocuru cau enohain, caa ita taojiananaja- Teenforo aansaerate, jataaen colalajinacai niha, Cana Coaunera loreri nihana jaun natiincha,” naaure jetao.

<sup>29</sup> Jauriaa Efeso caje unaa Torofimo aina, nii neseu coaracuruhane jaun jetaotera, “Teenforo asae jecha nii Torofimo enoaelu Faboro,” naain aitocure.

<sup>30</sup> Nii jaun jetaote, cajihaneein suujua cuuain, satiin obajeein, soroneein ruhaneeure, satiin- nii neseu nenacaauru cachaauru, codoonetiin Faboro mucuuruhane coina. Nitohaneein inae mucuhin jetaote, tarataracaain mitaaure, nii ita taojiaauruhane jaan Teenforo caje. Nitohaneein tarataracaain mitaain jetaote, enonaanaja- acuujuua fuhitocure jetao,

<sup>31</sup> cuu atinanacaneein Faboro sooruhane coina, niqui.

Nii jana jetaote, le lauriin Romanocuru soondaro curuaanaa- comaandaanti rai beeorihure:

“Leinjiin ainate, satiin nejerateeure Jerosaleeun nenacaurura,” naain jetao beeure.

<sup>32</sup> Nii jaun jetaote, coitucuuriin luhecotariin nii rijieoritiiin, acaauru curuaanaacuru, acaauru rai soondarooru, naaonjoaain jitariin taojiaain jetao, soroneein cuhin, nii neeuruha cachaaurune jaun turuha cue comaandaanti. Nii acaauru curuaanaacuru, acaauru soondarooru, naaonjoaain aina cuha nii acaauru comaandaantine coariin jetaote, Faboro faohacuruhane jianecure.



<sup>33</sup> Nitohaneein cuhin jetaote, Faboro roha turuhin, Faboro mucuhin, coroatajai *cadena* que ichoharate. Nii baiha jetaote, acaauru caje bajae:

“Chatohanaina caa cache. Chatohanaina ichae,” naain bajae.

<sup>34</sup> Nii jana jetaote, cajihaneein joaereein nujuaen soaachure. Nii jaun jetaote, cajihaneein, ohaohacooruhana jaun, caohachaaain rautaaain aonaain, rucuhenea nainene nii soondarooru curuaanaa- comaandaanti. Nii jaun jetaote, soondarooru que amaerate, acaauru loreri asae Faboro amaauruhane coina, acaauru comaandaanti.

<sup>35</sup> Inae acaauru lorerihu turuaain jetaote, ininaana jaun turuaain jetao, baijiaain Faboro inaaure soondarooru, nabana chatohaneein Faboro teeuruhane coataa,

<sup>36</sup> satiin caijie cuhin nujuae soajiin:

“Coaraain atinaauchera,” naain nujuae soaichuruhana jaun.

### *Satiin cache notaracae ereerejiha Faborone*

<sup>37</sup> Inae nii soondarooru loreri asae enoanaa jerecuruhane jana jetaote, enoauruhane ajiniha, nii le laurii soondaro curuaanaa- comaadanti rai jetao:

“Erenaa nainichaunna, ii aina basiinjiin,” naain bajaa Faborone jana jetaote:

“Curieco ere inaaainajian,

<sup>38</sup> Taa ii, jauriaa Egipto cocoaichaneein- cache areroo jena oharaancai sonajaain jaaoreraauru aina cuhin Romanon-ichaanune aina nejeratenaa neeineta,” naain bajae.

<sup>39</sup> Nii niritiin bajaane jana jetaote:

“Canuna Joriooneein, jataaen nelateein nenea- Romano nese tabai- Silisia batane que nenea- Taroso cocoaicha neein neeunra. Atiin jereeunna, cachaauru rai erete, aonacurumi- incha,” naa Faborone jana,

<sup>40</sup> jeriha nii comaandaantine jaun jetaote, nii ininaana- jaun nichaauraaain, cachaauru rai biji sarasarari Faboro, in- auhene curuatoroaain, curuaequuin aonajeeuruhane coina. Nii jaun cuu inauheneeicha, curuatoroaain aonajeeuruhane jana jetaote, Ebereeo ere cuhane cuaain:

## 22

<sup>1</sup> “Canu ere aonacuche, canejeraauru, ichauhenaauru, naaonjoaihunrina, canu jabereco coreniha caa que ere inara raite, aonaquichera,”

<sup>2</sup> naain jetaote, acaauru ere- Ebereeo cuhane cuaain, acaauru rai aitohane aonaain jetao, curuatoroaain, inauhene

curuaaequiin aonajeeure. Nii jana jetaote, inauhene curuaaequiin, aonajeeuruhane jana jetao:

<sup>3</sup> “Canuhetonoaina- Joriooneun. Silisia batane que nena Tarosone, nejanohanaaneein neeun. Nena laen cau, Jerosaleeun fojianohineein nenaaneeun. Jataain itolere coitucuhin nena- Camalieli relanojoneeina, rauhijiriin cana inoaesihuru jerenohi rijijieein nerelaain neeunlu. Nii jaunna, itolere bana, cacoichana aina cutaain, Cana Coaunera jerenohin ichana jereeun, nii ena netojoein ichaquichene rijijieein.

<sup>4</sup> Canuhetonainachu, caa Ena Nena Ichaonaa Caohacha esenetaain tonoraain- sacuurera rohecaain, atinanacaneeinchuru, tabaauru mucuhin caresero cuhaneuru, teratenajarejetoonly, satiin quichauru, enecuru, naaonjoaihunru aina curuaaeccaain.

<sup>5</sup> Satiin batirichuru curuaanaa, satiin Jorionichaachene coaraneein nenacaauru ichauhenaauru, naaonjoaaihunrite, rai nota que nii coaraneein neure. Acaaurute, nii Damasoco nenacaauru cana araaichuru- Jorioocuru rai, quiricha letoaaure, jerecuruha acaauru netonoaine, Jesocurisito esenetaeraauru ariin mucunajaain, cau Jerosaleeun uhanajaanune, caseteco coaracuruhane coina,” naain jetaote:

*Jesocurisito coitucuhin, esenetaane nunuhetihane beebijiha Faborone*

*(Ich 9.1-19; 26.12-18)*

<sup>6</sup> “Nete mucunajaanune coina, Jorionichaachene coaraneei nenacaauru ichauhenaauru caje erena rocohin, aina Damasoco cuhanune jana, enoto chujutaain turuhelalajein, bero cuhane cuujihanune jana, luhantiin, dede caje conotiin, luhecotariin canu jilenete.

<sup>7</sup> Nii jaunne, coasiha nuluna caaun, nii canu cunaja caje nalatoon atane ichoae. Nii janate, canu curuaa que, cacurujuateein: ‘Saoro, Saoro, chanuna, jataain, caniha nejerateein cacairichaaeriin, carerojoecaaita.’

<sup>8</sup> naain tonihana janane:

‘Chaneein inaate Curuaanaa.’ naain, bajaanune janate:

‘Canuna, nii iicha cairichaaerii Nasarete cocoaicha- Jesoso neeunra.’ naain catoonrae nii erena.

<sup>9</sup> Nii canu corihaniha cunacaauru netonoaite, nii cono coaraain, acaauru netonai nesoonetoore. Nete laen, nii carai irihane aonacurene.

<sup>10</sup> Nii jaunna:

‘Chatohanaina ichareeunte, Curuaanaa,’ naain bajaanune janate:

‘Chajaain nimichuhin, nii cuujueeine jaaun Damasoco neseu cunihute, cuu, ichei, iicha chanenenu beeuruhinera.’ naain, catoonrae Cana Curuaanaa.

<sup>11</sup> Nii jana, maosaneein caratiriha nii conone jaunte, canu biji que canu mucuhin, canu taraetaraecaain, camaaure nii canu corihaneraauru, Damasoco neseu tiaaincha.

<sup>12</sup> Nii janate, cuu nelu, leinjiin cacha- Ananihasineein curuajaain, nii Damasoco neseu. Nii jetaote, jeriha Cana Coauneraane rijijieein, rauhijiriin caohacha ichaain, Moisesaacha laenailu tonoraeraneein ne. ‘Acate, caohacha cachaneein nera.’ naauruha que, satiin Damasocoo nenacaauru- Jorioocuru.

<sup>13</sup> Nii Ananihasite, turuhin cacoharaain: ‘Ichaso Saoro, coaiteen, enacoauneein conohine inotara.’ naane rijieeoritinte, inae enacoauneein conoha canotane jaun, nii Ananihasi coaraaun.

<sup>14</sup> Nii baihate, carai:

‘Cana inoaesihuru Coaunera- Cana Coaunerate, ii coaraain, ichotijiae, niicha jerenohi coitucuhin, esinae rauhijiriin caoacha nejesina icharaneein nenea coitucuhin, chaen raaje nujuae caje ichei irihane aonaaine coinara.

<sup>15</sup> Iite, ichaajenhane, nii iicha coarai coaraneein, aohanranein, beebejiha curiquiin, itolereneein chauratane quenacaauru sacutaaincha.

<sup>16</sup> Chajaain, caeneeneje lanaala cuhin, Cana Curuaanaa Jesocurisito bajaain nebaotisaerateeute, ii colucomiincha.’ naain caletoe nii Ananihasicha,” naain jetaote:

*“Naaonjoaainte, Joriooniheichuru rene caletoe Cana Curuaanaara,” naain beebejiha Faborone*

<sup>17</sup> ‘Inae Damasoco caje cauhin, Jerosaleeun turuhin, cuu nenea Teenforo asae enohin, Cana Coaunera bajaanune janate, carai ecocoe Cana Curuaanaara.

<sup>18</sup> Carai ecocohinte: ‘Chajaain luhecotariin caa Jerosaleen caje amuura. Cauhacha neein canu ere beebejeeine, coatia chesenetaaururihaainta.’ naane janane:

<sup>19</sup> ‘Canu Curuaanaa, acaaurute, raotojoein, satiin sinacacuru naineein ii ere tonoraeraauru mucuhinchuru raanu, caseteconeeuruhane coinane coitucuurera. Chaentechu, tabaauru faoharatihanune coitucuuere raotojoeincha.

<sup>20</sup> Chaen, ii ere beebejera Eseteba sohin jaooruhane coina, mucuhin, ajeri que bодоosihuruhane janane, cuu neeunlu canuhetonoai, sohin jaooruhane coarajihanune coinara. Chaennachu, canu, nii soeraauru cachaauru- cajione be- raichaneein neeunlura.’ naanune saijieeinte:

<sup>21</sup> ‘Chajaain cuhachanihura. Canune eletohaaun, coriajai ataneeuru nenacaauru rai, canu ere beebejiha cuhine

coinara.' naain caletoe, Cana Curuaanaara," naain jetaote, acaauru rai, beebeje Faboro.

*Comaandaanti bijihu niha Faborone*

<sup>22</sup> Nii jaun jetaote, inauhene aonajeeonrihuruhanee baiha jetao, nujuae soaijiin jetao:

"Ichaonaa nainiheine caa cachata. Letonoaneein, caa cana rai chauratane caje betacaainera," naauruha

<sup>23</sup> nujuae soaijiin, cajionene maajeein romasiinchuru, cajihanein ucuun cuaainchuru, butuuneneenanain riajaainna jaun jetaote,

<sup>24</sup> soondarooru loreri asae, Faboro joerateein jetao, bisichate niqui soondarooru curuaanaa- comaandaanti, "Naaonjoain ichacaaunne corenihate, caniha obajeein caque nejerateeurera," naain biha Faborone coina niqui.

<sup>25</sup> Nejetaote, inae bisihuruhanee coina, ichohacuruhanee jana jetao:

"Roma rai sioraranooru nihanatiin, bisichene coina nootejian- cocoaainanojoneein neeicheta," naain bajaain jetaote: "Nii ichoae tacaain, niheichu, 'Naaonjoain corenihate, ai caa cachara.' naain coitucueralanaala, Roma rai siorarano casetecana nainiheeicheta," naa nii comaandaanti que jaurii- cafitaan rai Faborone jaun jetaote,

<sup>26</sup> nii comaandaanti coinetein jetao:

"Coaraain aihu, taa cacha ainara, Roma rai siorarano jetaora," naain jetao be nii cafitaan.

<sup>27</sup> Nii jaun jetaote, Faboro rohan nichuuntaain jetao:

"Esinae chachu rauhijiriin, Roma rai siorarano neeinta," naain bajaa nii comaandaantine jana jetaote:

"Esinae rauhijiriine aca neeunra," naa Faborone jaun jetaote:

<sup>28</sup> "Caraita, banejelanaala core coriqui que, Roma rai siorarano nihanune coinara," naa nii comaandaantine jana jetaote:

"Canu nejanoha caje coauneeina aca neein neeunra," naain jetao, tonorae Faboro.

<sup>29</sup> Niritoha Faborone aonain jetaote, caje amuhacooaure nii bisinaa jereraauru. Nii comaandaanti netonoain jetaote, coasiha nesoonete, Roma rai siorarano nihane saijieein, *cadena* que Faboro ichoaratihana jaun.

*Jorioocuru curuaanaacuru, acatiha niha Faborone*

<sup>30</sup> Nii cojoanoon jetaote, caohachaaain rauhijiriin, Faboro colurujueeruhane jaan leranu coitucuha rauhijiriine coina jetao, jauriaanejeein Faboro caje *cadena* batuhichateein, jitariin Jorioocuru curuaanaacuru, batirichuru curuaanaacuru, naaonjoaihunri taojiaerate

comaandaanti. Nitohanein, taojianaaratein jetaote, nii baiha Faboro raeratein, acauru acatiha te jetao, cuu irihane aonajeeuruhane coina.

## 23

<sup>1</sup> Nii jaun jetaote, nii Jorioocuru curuaanaacuru netaojiaain nenacaauru coarajeein jetao:

“Chasocuru, enanetojoeine ichaajojeein raotojoein casuujua coaraain neeun, Cana Coaunera notaracae,” nae jetao Faboro.

<sup>2</sup> Nii jaun jetaote, cuu niha batirichuru curuaanaacuru curuaanaa-Ananihasineein curuajaine jaun jetao, nii Faboro roha nenacaauru letoae jetao, nii Faboro ujuae faohitocuruhane coina.

<sup>3</sup> Nii jaun jetaote, nii batirichuru curuaanaacuru curuaanaa rai:

“Cana Coaunera netonaite, ishoeraterein, coitucuha nocoetohi inatiin, caohachaain ishujua coariheei rijitohina jaunra. Esinae rauhijiriin baaso ichacaaune coaraaine, aitha Cana Quiricha cuhanene tocohanein ichaaine coinat, nii ii nelauriana jaun, nelauriaai. Coatia aitha Cana Quiricha cuhanene rerotiin, casoerateine coina niheita,” naain jetao tonorae Faboro.

<sup>4</sup> Nii jaun jetaote,

“Niritiina, Cana Coaunera rai batirichuru curuaanaacuru curuaanaa nocoeje chanureeite,” naaure jetao, nii cuu-nenacaauru.

<sup>5</sup> Nii jaun jetaote,

“Batirichuru curuaanaa nihane coitucuhaaunnaate, chasocuru,” naain tonoranajaain jetao, “Cana Coaunera Quiricha inoaes cuhane: ‘Caa inara curuaanaa que, tonaain baasoneein iriachera.’ naa natiinna, coitucuenihanune jaun aitoonra,” nae jetao Faboro.

<sup>6</sup> Nii baiha jetaote, “Caa batirichuru curuaanaacuru tabaaurute, sadoseeone. Jana tabaaurute, fariseeocurune,” naain, nainaain coaranajaain jetaote:

“Chasocuru, canuhetonaina fariseeo neeun, fariseeo caje nefoeratenaaneein nenea nichaaunna jaun. Canuhetonai, ichanana nainiha onacaaurune esenetaanune corenihate, cacoluruhecure,” nae jetao tonijjaain Faboro.

<sup>7</sup> Niritoha Faborona jaun jetaote, nejesinajeein, ita cotaicha rijitocure nii fariseeocuru aina sadoseeocuru. Niritiin jetaote, ita cotaicha rijitiin jetao, ita caje nelerucure,

<sup>8</sup> “Ohane baiha jera, caje ichanaai nihei cacha. Chaen jera nihei Cana Coaunera letono-anjeraauru. Chaen jera nihei cacha suujue, cacha corii,” naauruha sadoseeocurune jaun.

Jana, fariseeocurute laaen, niha nitohanaine esenetaaure, itolereneein.

<sup>9</sup> Nitohaneein, cuu ita rai nujuae soaichuruha, satiin cuu nenacaaauruna jaun jetaote, fariseeocuru laurineeuruha nii cuu nenacaauru cacha relaaurerana jaun jetao, Faboro co-coaeratiha nimichuhin jetao:

“Coatia chatohaneei baaso ichaain nihei caa cachata. Jerihanete, leeinjiin suujue, rai erecaihara. Ainihane, Cana Coaunera letono leeinjiin anjerate rai erecaihara,” naaure jetao, nii Cana Coaunera Quiricha Inoaesi que cacha relaaurera- fariseeocuru.

<sup>10</sup> Nii jaun jetaote, jelai choae jauhecotojoeriin, nejesinajeein ita suujua rohecaain, ita que nejerateeuruhana jaun jetao, nabana cunaitaain, Faboro teeuruhane coataa jetao nii coasiha rai soondarooru tabaauru cotijiaain jetao, na-coauneein jelaiha soondarooru loreri asaae jetao Faboro joerate, nii soondarooru curuaanaa- comaandaanti.

<sup>11</sup> Nii cojoanotiin, Faboro rai ecocohin jetaote:

“Chaque casilanaala, laraajiin, chaque tonajelanaala, rao-tojoein neura. Cau Jerosaleeun, quere beebejeeine rijito-joein, jerichanetojoein, Romau cuhin, Romau nenacaauru rai netonai, quere beebejeeinete nera,” nae jetao Faboro rai, Cana Curuaanaa.

*Ita suujuau tacaain, Faboro sohin jaonaa jerecuruhane*

<sup>12</sup> Nii cojoanoon jetaote, janone ita suujuau tacaure Jorioocuru tabaauru, Faboro sohin jaoruhane coina. Nitohaneein, ita suujuau tacaain jetaote: “Faboro sohin jaonaa-reein tiaain, coatia lenoneein, acau coriahacacheein. Jana, nii saijjeein, Faboro sohin joelanaala lenoneein, acau cohin, naaonjoaacachene, cana carichaaine Cana Coaunerara,” naaure jetao,

<sup>13</sup> jenachoonca amuritiin Jorioocuru, Faboro sohin jaoruhane coina, ita suujuau tacaain.

<sup>14</sup> Nitohaneein, coaucuruhana jaun jetaote, batirichuru curuaanaacuru, Jorioocuru coaraauru bichauhenaauru, naaonjoaihunri rene turuha cuure jetao. Turuhin jetaote:

“Faboro sohin jaohacaanune reein tiaain, coatia lenoneein, acau coriaacaanuhinta. Jana, nii saijjeein, Faboro sohin joelanaala, lenoneein acau cohin, naaonjoacaanune, canacaanu carichaaine Cana Coaunerara,” naaure jetao, acaauru rai.

<sup>15</sup> Niritiin jetaote: “Aihana jaun, inara le lauriin neiniquichene, inara leochaauru aina, nii coaraneein neiniquichene, esine rijitojoein eresi: ‘Caohachaain rai rucuhenacai bajaacaanu cajene coina.’ naain esine rijitojoein, comaandaanti caje bajaain, cotihacuchete,

inara rene jaoha uuruhane jana cojoaain, turuasichuruhane ajiniha, sohin jaohacaanura,” naaure jetao.

<sup>16</sup> Nii jana jetaote, beorihuruhana jaun jetao, coitucuriin, nii Faboro rai biha cue jetao, soondarooru loreri asae turuhin, rai calaohi riji- rai bai calaohi.

<sup>17</sup> Niritiin bihane jaun jetaote, leinjiin cafitaan cotijiaain jetao,

“Carai caa enamanaa amaaui comaandaanti renete, leinjiin erenaa beenera,” nae jetao Faboro.

<sup>18</sup> Nii jaun jetaote, nii enamanaa amaain jetao, comaandaanti acatiha turuhaain jetao,

“Nii caseteconeein nenea Faborote, carai ereein caletoe, ii rene caa enamanaa turuanune, ichei leinjiin erenaa bihane coinara,” naain jetao, biha nii cafitaan, nii comaandaanti raine jana jetao,

<sup>19</sup> biji que, nii enamanaa mucuuriin taratarajiaain, jelai amaain jetao:

“Tonai erenaate carai benaa jereeita,” naain bajaane jana jetaote:

<sup>20</sup> “Jorioocurute, ita suujuau tacaure, ii caje bajaauruha eresine, nii coaraneein nenacaauru rene Faboro letoaaine coina jetao. Esine rijitoein: ‘Caje rai rucuhencai bajacaanu raotojoeine coinara.’ naaurureein jetao.

<sup>21</sup> Nijiaonriha, nii esenetaain neenera. Jena choonca amuritiin acaauru cachaaurute, cohacure, bujuaihu netiin, letonoa jatoroain, Faboro sohin jaoruhane coinara. ‘Faboro sohin jaonaa reein tiaain, coatia lenoneein, acau coriaacacheein. Jana, nii saijieein, Faboro sohin joelanaala, lenoneein acau cohin, naaonjoacachene, cana carichaaaine Cana Coaunerara.’ naauruha jetao. Leinjiin, ii letoaineeicha jetaote, cohajeure,” naain biha nii enamanaane jana jetaote:

<sup>22</sup> “Nijiaonriha, caa carai beeine rijitiin, chunei cacha rai beenera,” naain jetao, nii enamanaa suujuateein letoae nii comaandaanti, cauha cuhane coina.

*Coberenadoro Ferisi acatiha neruujue coina, Faboro letoaauruhane*

<sup>23</sup> Nii jaun jetaote, coroatajai rai cafitaancuru cotijiaain, letoanajae jetao, coroata fashai soondarooru taojiaauruhane, tijiaacha que cuuruhane coina. Jana, caaunsi chooncaneein cabario choae cuuhenuuru, naaonjoaain neruujueuru coina. Jana coroata fashai rejoin aina cuhenenuuru, naaonjoaain jetao neruujueure, Sesareea curu coina. Nitohaneein jetaote, netoona rijihu amuritoheriin, Sesareea cuuruhane coina jetao, niritiin erenaa te nii comaandaanti.

<sup>24</sup> Chaen jetaotechu, nichoae cuha Faboronone coina, leeiijin cabario terateein jetao: “Nijiaonriha chatoaneein cunaitaauruhane nainatejeein amaaichenera. Nirijieein raotojoein raurono turuanichuchera,” naain jetao, caohatiin beraichateein, Coberenadoro Ferisi rene, Faboro turuaerate jetao nii comaandaanti.

<sup>25</sup> Chaen jetaotechu, acaauru aina quiricha laenaain letoae, Coberenadoro rai, nii comaandaanti. Cuu jetaote, nii niicha letoai quiricha cuhane jetao:

<sup>26</sup> “Jataaen caohati Coberenadoro Ferisi neeine raina, ii coacuhin caa laenaain, ichei letoaaun. Canuna Calaodio Lisihasi neeun.

<sup>27</sup> Jorioocurute, caa leinjiin cacha mucuhin, sohin jaonaa coaacure. Nena, Roma rai siorarano nihane coitucuuriin, canu rai soondarooru taojiaain, acaauru aina cuhin ichoterateun.

<sup>28</sup> Nitohaneeinna, ‘Cha jaun cha. Cha corenihacha caa colurujueureta.’ naain caraajenhane coitucuhane nune coina, acaauru coaraauru bichauhenaauru- rene amaaunlu.

<sup>29</sup> Nitohaneein, amaain bajaanune janate, acaauru quiricha cuhane aitohane rijijieein que aitiin, joareein colurujueure. Niha chatohaneein, sohin jaoruhana jaan lera colane techu, sohin jaonaa jerecure niqui. Nieichu, nii caresero cuhane nihane jaanu lera nihanatiin, nete, nii choae tacaain, sohin jaonaa jerecure.

<sup>30</sup> Nitohaneein, sohin jaonaa coacuruha Jorioocurune coitucuurina, caa ii rene letohaun. Chaennachu, raotojoein, ii acatiha, caohachajeein colurujueeruhana jaan lera beein, rucuhecuruha caa colurujueererane coina aitoonra,”

naain jetaote, quiricha laenaain letoae Coberenadoro Ferisi rai, nii comaandaanti.

<sup>31</sup> Nitohaneein, erenaa teein letohanajaa comaandaantine jaun jetaote, Faboro amaaure jetao, janotiin nii soondarooru, Antipatriaau tiaain, nii letoanajaane rijijieein.

<sup>32</sup> Nii cojoano jetaote, jelaiha soondarooru loreri asae cauha cuure nii tijia que cunacaauru soondarooru. Jana cabario choae cunacaauru jetaote, Sesareea tiaain cuure jetao, Faboro jiniichaain.

<sup>33</sup> Nitohaneein, cuhin jetaote, Sesareea turuhin jetao, nii Coberenadoro rai, nii comaandaanti letono- quiricha teein jetao, Faboro netonai teeure jetao.

<sup>34</sup> Nii jaun jetaote, quiricha jasaracaain ereretaain coaraane baiha jetao:



“Chaa cajete, unaa neeita,” naain Faboro caje bajaa nii coberenadorone jana jetaote:

“Silisia batane cajena unaa neeunra,” naain jetao rai be Faboro. Niritiin rai biha Faborona jaun jetaote:

<sup>35</sup> “Inae tururuha nii icholurueraaurunena, ii ere aoha-reeunicha,” nae jetao Faboro rai, nii coberenadoro.

Nii baiha jetaote, nii caohatiin ajeri caje- Erodesi charatenohin-loreri asae Faboro fuerate, caohatiin beraichateein.

## 24

### *Coberenadoro Ferisi acatiha ereejiha Faborone*

<sup>1</sup> Saoqui janohi baiha neoriin jetaote, turuha uhe nii batirichuru curuaanaacuru curuaanaa- Ananihasi, acaauru bichauhenaauru tabaauru, ita coulurujueeurera corootajanera Teorotorosi neei curuajai *abogado*, naaonjoainuri uhaain turuha uhe. Acaauru jetaote, nii coberenadoro acatiha nichaauraaure, Faboro coulurujueeuruhane coina.

<sup>2</sup> Inae nitohaneein, Faboro mitaain, turuaauruhana jaun jetaote, nii coberenadoro rai ere jetao nii *abogado* Teorotorosi:

“Jataaen narihara, curuaanaa Coberenadoro. Ii corenihate, raotojoein nihacache. Narihara, itolere coitucuhin, caohachaain cana atane rucuheca, nitohaneein ichaaine coreniha.

<sup>3</sup> Itolere sacutaain, nitohaneein ichaaine coitucuhacaanu, inetono janonaa bana. Jataaente, caohati coberenadoro neein neecha, Ferisi. Jataaena, ii coroaajihacaanu banejelanaalara,” naain irihane baiha jetaote, inae Faboro coulurujuenaa nunuhetein jetao:

<sup>4</sup> “Nabana, ii rai caeneenejihacaanune coataa, atiin canacaanu aonaauna irihacaanu.

<sup>5</sup> Caa cachate, itolere baaso uhai nejesina ne. Acate itolere, cana rai chauratane sacutaain amuhemujueein, Jorioocuru lerurucoai nejesina ne. Acate le laurii cacha- nasarenoneein curuajaihuri curuaanaa neein nena nera.

<sup>6-7</sup> Chaentechu, rautaenihacaanune asajainejeein, nejelau cachaauru enoae Jorionichaanune rai Teenforo asae. Nii corenihana, mucuhacaanulu.

<sup>8</sup> Caje nachuinti bajaaute, esinae rauhijiriin, itolere ichaane coreniha caa coulurujihacaane coitucuhi,” naain jetao, nii Faboro coulurujuee nii ita coulurujueeuruha joricocurune, acaauru corootajanera- *abogado* Teorotorosi, coberenadoro Ferisi rai.

<sup>9</sup> Nii jana jetaote, jerichanetojoein cuaain coulurujeeure nii cuu nenacaauru leechaauru Jorioocuru netonai.

<sup>10</sup> Nii ainate, Faboro rai, biji lalari jetao nii coberenadoro, iriha Faborone coina. Nii jaun jetaote:

“Nihei chaque tonajelanaalana, ichei erereeuni cajabereeo coreniha, ii cana atane rai- itolere rucuheraanu que nenaaneei, bajaanacaain, inoaelu caje coauneeine coitucuhanune jaunra.

<sup>11</sup> Lechoonca coroata janoheca, Jerosaleeun turuhin, Cana Coaunera bajaebajaecaunera. Ichaajenihanete bajanaa naineeicha.

<sup>12</sup> Coatia chunei cacha aina, ita cotaihajihaanune jana caurucuruhi, chaelai janonaa banata. Niheichu chaen, ita taojiananaja- Teenforo asae nihanatiin, chunei cachaauru rohecahaunta. Niheichu, ita taojiaauruhane jaancuru sinacocacuru asae nihanatiin. Niheichu, cuu netiin chunijiun cachaauru rohecahaun.

<sup>13</sup> Nii jaun, nihei, chunijiun cuain tonaain cacoluruecuruha caa cachaaurune jaanuta.

<sup>14</sup> Nena caraajenihane, canu ichao bereeunicha, rauhijiriin. Canuna cana inoasihuru coauneraneein nena Cana Coaunera rai niicha jerei icharaneein neeunra. Nii Ena Ecoona Ichaonaa Caohacha- Jesocurisito tenojoine, canu, esenetaain tonoraun, Cana Coaunera ere bera inoasiuruhacha laenanohineein nena nihana jaun. Nete, nii canacaanuhacha esenetai que, ‘Chaqueje nelatihei,’ naaure, caa canu coulurujueracuru.

<sup>15</sup> Aihuruhane rijijieina, canu netonai inae cuu tihane bana, satiin onacaauru ichaterichaaain Cana Coaunerana jaun, ichanacururichaaain nechua aansaineein onacaauru, caohacha cachaneein naaonjoainurine esenetaaun.

<sup>16</sup> Nii jaauna, caohachaaain rauhijiriin, jeriha Cana Coaunerane rijijieein, casuujua coaraain neeun, Cana Coaunera notaraca, satiin cachaauru notaracaene maajein.

<sup>17</sup> Itolere sacutaain, cajihanein amuhemuhecaun bajaanacaaine baihana, coriqui uhaain, jelaiha canu ataneu caaun, itolere que necairichajeein ichaonacaauru rai teein acaauru coroatajanichaaunne coina, chaen, Cana Coaunera bajanaanaja coloheri Teenforo asae, Cana Coaunera rai, itolere lenonecuru sohin tihanune coinara.

<sup>18-19</sup> Nii ina ichaaun, nukulocohin, canu couturi loroaloroariin joeratihanune baiha, aitha cana Quiricha Inoasi cuhanene rijijieein. Coatia arajii cacha codoriaain, ichahaunluta. Niheichu chunei cacha rohecaenihanune janate, nii ita taojiananaja Teenforo asae canu coaracurelu- Asia batane caje unacaauru tabaauru Jorioocurura. Acaaurutejian uhin, cacoluruhecuruhane

laen caohachae, esinae rauhijiriin chatohanai baaso ichacaaunne coaracuruhane.

<sup>20</sup> Nete uurene. Caa cau turunacaauru Jerosaleen caje unacaaurute, Jorioocuru curuaanaacuru, batirichuru curuaanaacuru, naaonjoaain acatiha teein, acaauru rai, cacoluruecuruhana jana, ecu neeurelura. Acaaurute aihane jaun naine, chatohanein baaso ichacaaunne coitucuhin cacoluruecuruhane caohachae, nete nainecurenera.

<sup>21</sup> Acaihanejei, nii cacoluruecuruhane banaachana, satiin codoaquiin aonajeeuruhane jana, tonijiaain: 'Ichanana nainiha onaane esenetaanune corenihacha nachura, cacoulurujeein, canasina coauquichete.' naaunlura," naain jetao be Faboro.

<sup>22</sup> Nii jaun jetaote, inae raotojoein, Nii Ena Ecoona Ichaonaa coitucuha, nii coberenadoro Ferisine jaun jetao, nirijieein nii ratiriin:

"Inae turuha comaandaanti Lisihazine banana, inara cotiaratereeuni enacoauneein, nii neruujue coina," nae jetao, Ferisi.

<sup>23</sup> Niritiin jetaote, nirijieein mucuhineein Faboro sirichuruhane coina, cafitaan rai aite Ferisi. Chaen raotojoein Faboro rene turuhin, rai niicha latei teein naaonjoaain, aina erenaa nainecuruha belaichaaaurune coina jetao aite.

<sup>24</sup> Nii cojoanoo cojoanoo jetaote, nacoauneein turuha uhe Ferisi, rai comasai Dorosila aina. Nii comasai jetaote, Jorioocuru bene ne. Nitohanein turuhin Faboro cotiharatiha Ferisine jaun jetaote, turuhin acaauru rai Jesocurisito esenetaain, tonoraane que, acaauru rai ereerejiha Faborona jaun jetao, cuu rautatiin aonajeeure, itolere que, acaauru rai ereerejihana jaun.

<sup>25</sup> Ne jetaote, "Caohacha nejesina ichaechajeein ichaoinete caohachae. Jana baasohacha ichajeein ichaohine caoachaai, inae cuu tihane bana, satiin colurujihana curichaain Cana Coaunerana jaunra," naain rai biha Faborona jaun jetaote laen nesooneite, nii Ferisi. Nesooneitiin jetaote:

"Inae, chajaain caunihu. Inae nainichaaune banana, coaiten ii cotiharatereeunicha," nae jetao, Faboro rai, Ferisi.

<sup>26</sup> Niritiin jetaote, coriqui que, coretiha Faborone jeriha, jianihane coinana jaun jetao, araai saain nihane cotijiae, rai irihane coina Ferisi.

<sup>27</sup> Nirijieein, coroata jaanacaain ichaane baiha jetaote, coberenadoro nihane caje jetao mitue Ferisi. Inae mituha Ferisine jana jetaote, coreenraniha enoe- Forisio Fesetoneein curuajai. Ne jetaote, jerecuruha Jorioocurune rijijieein ichaane coina jetao, caseteconein Faboro ratiriin jetao,

mitue Ferisi, nabana baasoneein cotaairiin coaracuruha Jorioocurune coataa.

## 25

### *Feseto acatiha niha Faborone*

<sup>1</sup> Inae coberenadoro nihane coina, Sesareea turuhin, coberenadoro neein enohane baiha jetaote, nichata janohane cuhane jetao, Sesareea caje, Jerosaleeun cue jetao Feseto.

<sup>2</sup> Nii jana jetaote, cuu rai Faboro coulurujueeure jetao, nii Jerosaleeun nenacaauru, batirichuru curuaanaacuru, Jorioocuru rai jataaen nelateein nenacaauru naaonjoainuri jetao, Faboro coulurujueeure.

<sup>3</sup> Nitohaneein, coulurujueein jetaote:

“Atiin canacaanu rai, cau Jerosaleeun nii Faboro joerateura,” naain bajaare jetao, bero cataaun coharatein, Faboro sohin joerateeuruhane coina coacuhin niqui.

<sup>4-5</sup> Ne jetaote:

“Cuute, Sesareea caseteconein nedaelura. Nena, ena chajaaajoaain jelaiha cureeunnicha. Inae jelaiha cuhanune janate, nainecure cajiniichaaain uhin, cuu teein, chaelai que situha, nii cachane, coulurujuenaa nainecure inara rai jataain nelateineein nenacaauru- cocoainanacaihurura,” naachae jetao, acaauru rai Feseto.

<sup>6</sup> Nii Jerosaleeun, fosa janone nihane, lechoonca janonein nihane baiha jetaote, jelaiha Sesareea cauha cue jetao Feseto. Nii cojoanoo jetaote, ita coulurujueeureru rucuhecuruhana jaan coloheri- *tribonal* asae rori ichoae nelauriaain jetao, Faboro raerate.

<sup>7</sup> Inae Faboro turuaauruhane jana, enoha Faborone jana jetaote, rohan nichuuntaacoaain jetao, coulurujueeure Jerosaleen caje uhin turunacaauru- Jorioocuru. Itolere baaso cuhane cuaaichuru, joareein caje erenaa rocohichuru, coulurujueeure jetao, baaso ichaenihane sainejeein. Nii jaun jetaote, esinae rauhijiriin erenaa nihane coitucuurene.

<sup>8</sup> Nii jaun jetaote, acaentonai, rai jabereco coreniha jetao:

“Coatia chatonai baaso que irihaun, Jorioocuru aitoonjoa, Jorioocuru ichao coacuhinta. Niheichu, ita taojiananaja Teenforo coacuhin irihaunta. Niheichu Romanocuru curuaanaa coacuhin irihaun baasoneeinta,” naain jetao, ere Faboro.

<sup>9</sup> Nii jaun jetaote, caohachaain Jorioocuru aina nedanaa jerihane jaun jetao:

“Cureeina Jerosaleeun, cuu teein nii ichei rucuhencai rucuhacaaunne coinaneta,” naain jetao, Faboro caje bajae Feseto.

<sup>10</sup> Nii jana jetaote:

“Nena jerichanejeein, Romanocuru curuaanaa- cana netonai curuaanaa- eenferadoro icharatenohi neruujuenanaja coloherihu *tribonal* asae caa neeun, cau teein neruujuenaa nainichaaune coinara,” naain jetao, tonorae Faboro. Niritiin tonoraain jetao te: “Ii te, raotojoein Jorioocuru rai baaso ichaenihanune coitucuhin neeicha.

<sup>11</sup> Esinae rauhijiriin, jataain baaso ichaain, baaso que situhin nihanune coaraain, nii coreniha casohin cajaaonaa jerera nihane, coatia nii caohaterihaaun, coatia onaa coasihaaun. Jana, esinae rauhijiriin, erenaa nenihane, nihei chunei acaauru rai canu tenaa nainihei, casohin cajaooruhane coina. Nii jaunna, ii caje bajareeunni, raajenihane canu rai- rucuhenacai rucuheca Romanocuru curuaanaa- eenferadorone coinara,” nae jetao Faboro.

<sup>12</sup> Nii jaun jetaote, nii cuu nenacaauru rai coroatajaneraauru caohachaaain suujua rauhi coaraauru caje jetao bajae Feseto. Nitohaneein, bajaane baiha jetaote:

“Inae Romanocuru curuaanaa, ii rucuhecane coina bajaaina jaunte, Romanocuru curuaanaa rene curiquiinha,” nae jetao Feseto, Faboro rai.

### *Curuaanaa Aquirifa acatiha niha Faborone*

<sup>13</sup> Nii baiha neenejeein jetaote, namujera Berenisi aina jiniquiin cuhin, Sesareea turuha cue, curuaanaa *rey-* Aquirifa, Feseto coaraane coina.

<sup>14</sup> Cuu araai janohin aina niha- nii curuaanaana jaun jetaote:

“Cautene leinjiin cache caseteconeein Ferisiicha ratirilura,” naain jetao, bee Feseto.

<sup>15</sup> Niritiin beein jetaote: “Jerosaleeun turuhanune janate, carai coulurujeeurelu batirichuru curuaanaacuru, saain Jorioocuru bichauhenaauru, naaonjoainuri, casetecaanune coinara.

<sup>16</sup> Nena, acaauru rai: ‘Coatiha nainihei aonaeniha cachane jana, nedaa coulurujeein niha namute cachane, nii coulurujuenojoi cache casetecaaain, chatoaneein teein, sohin joaera jereein, naaonjoaain niha Romanocuru rai rauhineti. Niha ita coulurujueranete, ita acatiha netiin, nii colurujera aina iriha nii coulurujuenojoinete jere Romanocuru rai rauhicha.’ naaina acaauru rai beeunra,” naain jetao beebeje Feseto.

<sup>17</sup> Niritiin beebejeein jetaote: “Nii jaunna, cau turuuruha nii satiin coulurujeeurerane jana, nii cojoanoonecoriin, cache rucuhecaaunna jaan coloheri *tribonal* asae rori ichoae nelauriaain, nii cache raerateeun, nii rucuhecaaunne coina,

<sup>18</sup> inacojoein niqui, ‘Chatohaneein jecha sosereein, chatohaneein Romanocuru curuaanaa aitoonjoa tonoraa cachane caohatihane coreniha jecha carene letoaaure.’ naain niqui.

19 Nete, leinjiin acaihanejeein, nii acaauruhacha esenetai que aitiin, chaen nii onaalu Jesusoneein curuajai queecha maroain coulurujeeure, 'Enanetojoein jete, ichoae,' naa que Faborona jaun.

20 Nii jaunna, nii aina, chaa coitucuenihanune jaun, Faboro rai: 'Cureeina Jerosaleeun, cuu nii ichei rucuhencai rucuhequine coina' naain bajaan.

21 Nii janate, 'Cana curuaanaa, Romanocuru curuaanaa eenferadoro jete, rucuhere raajenihane,' naain baja, cana curuaanaacha rucuhene coina. Nii jaunna, rucuhene eenferadorone coina letoaanunereein tiaain, caseteconein nihane coina aitoon," naane jana jetaote:

22 "Canuhetonaina, iriha nii cachane aohana jereunra," nae jetao, curuaana *rey* Aquirifa, Feseto rai. Nii jaun jetaote:

"Eresite aohanriquiincha," naain jetao tonorae Feseto.

23 Nitohanein jetaote, nii cojoanoo, ita taojiaauruha cachaauruna jaan coloheri asae, netaojiaauruhane jana, enoha cuure jetao, jataain nelateineein neeuruhane coaraatein Berenisi aina, *rey* Aquirifa, chaen soondarooru curuaanaacuru aina nii cuu nenacaauru nese cocoaichacuru, jataain nelatein nenacaauru naaonjoainuri aina jiniiquiin. Nii jana jetaote, Faboro joracaeratein jetao, raerate caresero caje, Feseto.

24 Nii jana jetaote, inae turuaauruhane jana:

"*Rey* Aquirifa, satiin cau canacaanu aina netaojiaain nenacaauru, nocoacaa cacha coulurujuejoin. Satiin Jorioocurute, carai coulurujueure. Saain Jerosaleeun nenacaauru, cau Sesareea nenacaauru, naaonjoaihunrite nujuen soaisoaihanaain, 'Sohin joerateeura.' naain jataain ohane jerecure.

25 Nete, chatoaneein baaso ichaene, caa cacha. Nihein sohin jaoha- cachana jaan leranu carai. Nete raajenihane rucuhene- cana curuaanaa- Romanocuru curuaanaa- eenferadorone coina, bajaana jaun, inae nii jerichaauna jaun, ucuae letoareeunicha," nae jetao Feseto.

26 Niritiin jetaote:

"Nete nene, 'Naaonjoaain que situhin, naaonjoaain ichaana jaunte, caa cacha coulurujueurera.' naain been, laenaain, canu curuaanaa Romanocuru curuaanaa- eenferadoro rai, been quicha letoaaene. Nii jaunna, satiin cau neeichene jaun, caa raerateeun, caohachaaain, ii cau neeina jaunra curuaanaa Aquirifa. Inara acatiha tein, bajaanune, raotojoein tonaain ereeuruhane, laenaain letoanaa nainichaaun, cana curuaanaa eenferadoro raine coinara.

27 Jana, 'Naaonjoaain corenihana, caa ii rene, caa cacha letoaaunra.' naain chaaelai que tonaain benihanunete, 'Chanuna joareein, caa cacha letoae, lera colane.' naain nii que, nererojocare cana curuaanaa- Romanocuru curuaanaara," nae jetao Feseto.

## 26

*Coulurujueuruha Jorioocuru najaa lera biha curuaanaa  
Aquirifa rai Faborone*

<sup>1</sup> Nii jaun jetaote, Faboro rai:

"Inae laen nainein, ii jabereco coreniha ereeiner," naa rey Aquirifane jaun jetaote, acaauru rai ucuun biji sijitaain jetao:

<sup>2</sup> "Jataaenna coroaeejeun, rey neeine acatiha, cau ererichaaunine jaunra, rey Aquirifa. Aihana jaun, atiin canu ere aonaanna, itolere que cacoluruhecuruha Jorioocuru najaa que, erete aonaain coitucuhicha.

<sup>3</sup> Iite laen, jitariin itolere Jorionichaanune ichao coitucuhin, ita rohecaain ita rai ereerecaanune jaanne maa-jeen coitucuhin neeicha- curaanaa. Nii jaunna, atiin quere aonaaine jereunra- curuaanaa," naain jetaote:

*Jaiti Cana Coaunera coitucuhin, esenetaenihane bana, rai  
nichao biha Faborone*

<sup>4</sup> "Satiin Jorioocurute, canu ichao coitucuuere, acaauru aina ichaorejetocaaunlu, canu ataneu, chaen Jerosaleeun, naaonjoaihun, canu enamanacane caje coauneeina jaun.

<sup>5</sup> Chaen techu, raotojoein fariseeonein nihanune coitucuhin, rauhijiriin benaa nainecure ii rai, jerecuruhane. Nii coitucuhichene rijijieina, leochaauru amuritoheriin jataain rauhijiriin, canaacha esenetai tonoraera neein niha-caanu.

<sup>6</sup> Cana inoaensihuru rai Cana Coaunera aitoonjoa nii nicha letoanaa jerei canaacha cohajei esenetaain tonoraanune corenihate, caa cacoulurujueein, caa chaatiha canu turuaer-ateurera.

<sup>7</sup> Canacaanu lechoonca coroota laurii Israeli cocoaichacuru- foeratenojoein nihacaanunena, nii cana foerateeurera rai Cana Coaunera aitoonjoa cohajihacaanu enanetojoein. Nii jaunte, Cana Coaunera coroaeein bajajein, naitoonjoan niicha jerenohin ichacaanun, jiiicho, janotiin, naaonjoaainchuru. Nii cana inoaensihuru rai Cana Coaunera aitoonjoa- canaacha cohajei ere tonoraanune corenihate, caa cacouluruheecure Jorioocurura, rey Aquirifa.

<sup>8</sup> Chanuna onacaauru ichatiha Cana Coaunerane esenetae-neeiche inara."

*Jesocurisito ranojoihunru rohecaain cairichaerichaaetohalune biha Faborone*

<sup>9</sup> “Canuhetonainechu, jauriaa, ‘Caohacha jecha ichaaun,’ naain, Nasarete cocoaicha Jesoso ere esenetaain tonoraeraauru rohecaain, acaauru cairichaaain,

<sup>10</sup> Jerosaleeun batirichuru curuaanaa letononeein caresero cuhanena maajeein arajii Jesocurisito esenetaeraauru teraterejetoonlu. Chaennachu, tabaauru sohin jaoruhane rautatiin coroaerejetoonlu.

<sup>11</sup> Inaajoan saneein chaainti, acaauru casetecaraetoonlu, ‘Inae jian laaen, tonorarihaacaanuhinta.’ naain, nii acaauruhacha esenetai acaauruhacha ere tonorai- Jesoso ere tonoraauruhane jianecuruhane coina. Jataaenna, nechuhane anainein mijiaaainein, acaauru rohecaeraaetoonlu, naain coriaae nejelau ataneu- nenacaauru neseeurune maajeein cuhinchurura.

*Coaiteen, ‘Naaonjoaaina, nunuheteen, Jesocurisito coitucuhin esenetaain tonorana nunuheteenlura.’ naain biha Faborone*

*(Ich 9.1-19; 22.6-16)*

<sup>12</sup> Nitohaneein, Damasoco neseeu nenacaauru mucuhin raanune coina coacuhin cuhanu, batirichuru curuaanaa letononeeine janate,

<sup>13</sup> bero cuhane cuujihanu, turuelalajeeine jana, enoto chujutaain, luhecotariin, canu, nii canu aina unacaauru, naaonjoainihacaanune rohan enoto cono amurijiriin conotiin, luhantiin lanaanete dede cajera, *rey* Aquirifa. Nii jaunne, saain jiniiquiin,

<sup>14</sup> atane ichoae nemarotihacaanune janate, carai Ebereeo ere cuhane cuaain: ‘Saoro, Saoro, chanuna jataen caniha nejerateen carerojoecaai. Nechu jataaen ichaajenihanete, baaso ichaaain, ijiabereeon cairichaaain, cunaitaa nii aaicha.’ naain canu caje bajaane jana ne:

<sup>15</sup> ‘Chaneeinaate curuaanaa.’ naanune janate: ‘Canuna- nii iichaa cairichaaerii- Jesoso neeunra.’ naainte:

<sup>16</sup> ‘Chajaain nimichuuna, ichei erete aonaaicha. Cauna ecocoon, ichei irihanune, canu letononeein neeine coinara, chaen ena, caa iicha coarai beein, ii que caa baiha- quiicha coaratenenine maajeein beein, canuneein nihanune coitucuerateeine coinara.

<sup>17</sup> Canuna, Jorioniheichuru, Jorioocuru, naaonjoaihunri caje, ii ichoteratiha cureeunicha. Acaauru renena caa ena elotoareeunnicha.

<sup>18</sup> Coanaanihute, acaauru nota jirichaeranuque, acaauru rai canu ere beebejeeite, Acaauru Coaunera nicaanune coitucuhin, quere tonoraain, canune maajeein



coitucuuruhine, nabana taeneein cuajeein, moconajaera ere tonoraain sacuelanaala, canu, nosa caje cacha mitaeranichaaunne coitucuuruhane, nosa coreniha caseteconein neeuruhane rai- neeuru caje nichoteein, Acaauru Coaunera nichaanune rene tacanaa nainecuruhane coina, leeochoauru Jesocurisito ranojoihunru aina jiniiquiin neeuruhane coinara.' naainte caletoa Cana Coaunera Calaohi Jesusora," naain jetao:

*Rai ereein letoaa Jesocurisitone tonoraa Faborone*

<sup>19</sup> "Nii jaunna, dede caje ecocohin- caletoaera lacoelanaala,

<sup>20</sup> jauriaanejeein Damasoco neseeu nenacauru rene turuhin, acaauru rai Jesocurisito ere beebejeeunra, *Rey Aquirifa*. Nii caje cuaaina, Jerosaleeun nenacauru rai beebejiha cuun, itolereenein Jodea batane sacutaain nenacauru raine maajeeinchuru, chaen Jorioniheichuru raine maajeeina beebejeeunra, baaso ichajeein, neosatihajeein ichaoruhane jianein, Cana Coaunera esenetaain, niicha jerenohi rijijieein ichaohin, inae esinae rauhijiriin Cana Coaunera esenetaeranein ichaoruhane coarateeuruhane coinara.

<sup>21</sup> Nii corenihate, ita taojiananaja Teenforo asaae canu eruuruhane jaun, canu mucuhin, casohin, cajaanaa jerecure Jorioocurura.

<sup>22</sup> Nete atiin, cacorataaniha Cana Coaunerane jaun, enanetojoein jaiti ichaojoein, Cana Coaunera ere beebejeein sacuunra, satiin- cairicheihuru rai, saain cocoinanacaihuru raine maajeeincha. Coatia chaelai janonaa bana, Cana Coaunera ere bera inoaensihuru- Moisesa, naaonjoaihunri aitoonjoa jojohin, rerohin irihaaunta. Jerichanetojoeina, rauhijiriin, 'Naaonjoarichaaain jetao,' narejetocuruhalune rijitoein:

<sup>23</sup> 'Ohanete ne nii Cana Coaunera letononeein unaa- Mesihasicha. Nete, nitohanein ohane baiha, aca niicha ranojoihunru ajiinchateraniha, oo caje ichanananein niha cureeincha. Nii baihate, itolere sacutaain, beebejenojoeinein niha cureein, satiin cacha nota jirichaeraaunu quera, nii aina, Cana Coaunera coitucuuruha, satiin cana araaichuru necoina, chaen nejelau ataneu nenacauru niha natiinine coinara.' naain aitoroetooruhalune rijitoeina aitoonra," naain Aquirifa rai beebeje Faboro.

*Jesocurisito esenetaain, tonoraa curuaanaa Aquirifane jereein, rai ereerejiha Faborone*

<sup>24</sup> Niritiin, ereerejiha jabereco coreniha Faborone jana jetaote, rai nujuae soaisoain:

"Mainajiriin nerelaacha neeine jaunna, nesooneeojoaain joareein ereeite, Faboro," naa rai Fesetone jana jetaote:

25 “Coatiana nesooneeojooain joaereein irihaaunte, caohati coberenadoro Feseto. Caa aitocoanne jaante, esinae rauhijiriin erenaane.

26 Caute ne, caa curuaanaa *rey* Aquirifa- itolere niriinanai coitucuera. Nii jaunna, chaque tonajelanaala, nacatiha caa ereerejeeun, acaentonai niriinanai coitucuhin nihane jaun. Coatia chaaelai asinojoneein nenea que caitono nihei.

27 Cana Coanera ere beracuru- *profetacuru* inoesihuru aitoonjoa esenetaaina, *Rey-* Aquirifa. Rauhijiriina, itonai esenetaaine coitucuunra,” naa Faborone jana jetaote:

28 “Basijiin lanajeje, caque jererateeine jaun, canuhetonai Jesocurisito rainein nihanunera,” naa curuaanaa *rey* Aquirifane jana jetaote:

29 “Coatia jerihane, iicha aiheeita, curuaanaa. Satiin cauneein aonajeeurera raina, Cana Coanera bajaaun, esenetaana nainecuruhane, caa aihanune tocohaneein *cadena* que cositenojoneein nelanaala esenetaauruhane coinara,” nae jetao Faboro.

30 Nii jaun jetaote, nimichuhin, naain jelai cuure coberenadoro aina curuaanaa *Rey* Aquirifa, chaen, Berenisi, chaen, nii leochaauru cuu acauru aina nelauriaain nenacaauru, naaonjoaihunri aina, cuu jelai teein,

31 nii que ereeuruha nejesinajeein, ita raine coina. Cuu jetaote, ita rai nejesinajeein:

“Coatia chatoanei baaso ichaai caa cachata. Cha corenhate, sohin joaerareta. Nainiheinchu, caresero cuhane nihanatiin caseteconein nihaneta,” naaure jetao ita rai nejesinajeein.

32 Niritiin, ita rai ereeuru baiha jetaote, Feseto rai:

“Raajenhane rucuheca satiin curuaanaaneein nenea- eeneradorone coina, aitoaha caa cachane colanete, jianena naaineeicha,” nae jetao *Rey* Aquirifa, coberenadoro- Feseto rai.

## 27

### *Romau, Faboro letoaauruhane*

1 Inae Italiau canacaanu letoanaa jerecuruhana jaunte, casetecocuru coaraain raeraanu que le laurii soondarooru- Eenferadoro rainein- curuajaihuru rai cafitaan- Jorio neein curuajai rai, leochaauru caseteconein nenacaauru teeuruhane jiniichaain, rai Faboro netonai teeure.

2 Nii jaunna, Andaramitio cofauhana caje cucuana cuhane cuhin coriae nenea- Asia batane que nenacaauru neseeuru- cofauhanau tiaain cunaa bote cuhane fauhin, nesaru rai nihana jaun, cuhane fauhin cuhacaanu. Nii janate, ecu neein,

canacaanu corihaniha uhe- Masedonia batane que nenea Tesaloneca cocoaicha Arisitaroco.

<sup>3</sup> Nii cojoanoo, Sidoon cofauhanau turuhin, cuu najauriha-caanune janate, jataain Faboro belai, nii soondarooru curuaanaa Jorio. Caseteconeein cuha Faboro natiinte, bote caje iniin, belaichaauru rene bedaeniha Faborone coarajeein, cuu rai niicha latei teeuruhane coaraje, belaiha cafitaan Jorio.

<sup>4</sup> Nii Sidoon caje nesaruhina, canacaanu que tacaain uha cujuanane jaun, nii cujuana que acateraain, Chifere cobene jelson cuujihacaanu.

<sup>5</sup> Nitohaneein kuhina, cucuana jera jaoha kuhacaanu, Silisia batane auha jelson. Inae cucuana jera jaohina, Silisia, Paanfilia, naaonjoainuri batane auhaniha situhin kuhin, Lisia batane que nenea neseu- Mira turuhacaanu.

<sup>6</sup> Cuute, Alejaandiria caje unaa leinjiin bote Italiau cuujee-naa rue, nii soondarooru curuaanaa- cafitaan. Nii cuhanete, canacaanu fauherate, kuhane kuhacaanune coina.

<sup>7</sup> Nitohaneeine, araai janohin, jataain jeraaen cuujiha-caanu. Nii jaunna, necairichajeein turuhacaanu Nidoneein-niicha curuaatehuri jeraniha. Nii jana, jaiti canacaanu que tacaain uha cujuanane jaunna, Cureta cobena nichaae niti-nonohin, Salomoonneein acaauruhacha curuaatei cobene jeraniha situha kuhacaanu.

<sup>8</sup> Nitohaneaina, necairichajeein kuhin, Cureta auhani-hacha rauhijiriin cuujeein, Laseaneein curuajaai nese rohan nenea- Caohatiin Cofauhanaineein curuajaihu turuhacaanu.

<sup>9</sup> Inae carajaa kuhacaanune jaunte, nii tonohana inae cujuana aina jelarona que turuhelalajihana jaun, luhante-cucuana kuhane amunaa, banejenihaha cujuanane jaun. Nii jaunte, acaauru rai:

<sup>10</sup> “Aonacuchena caa que erete, aonaquiche. Jataaina banelajanaala, cana rai lunaa curichaain, caa amunaane coitucuun. Baana cauhacha nelanaalate, aihacachera. Saainte, nii iicha amai rucuhale aina jiniquuin nitajiha cureein, caa botera. Cana niha natiinte, onaa nainichaachera,” naain niqui suujuatenajae Faboro.

<sup>11</sup> Nete, nii bote erora, nii bote curuanaa cafitaan, naaonjoainunru, ereecha tonorae, nii soondarooru curuaanaa-cafitaan, Faboro ere tonoraelanaala.

<sup>12</sup> Nii jaunte, caohachaojoaeniha saneein, nii neeuruhane jaan cofauhanane jaun, cuu neein cujuana aina jelarona bitoanaa jerecurene. Nii jaunte, satiin lalajeein, leecha fuhana- nii jeelai Cureta cobena que nenea- Fenisiau cunaa jerecure, cuu cujuana aina jelarona bitoauruhane coina.

Jelaite, enoto soo jeloon neein, cana raoto nichajai que, cana ajaabiji nichajai que naaonjoaain inanacae.

*Cucuana cuhane niha cujuana tabaine*

<sup>13</sup> Nitohaneeinte, “Tonaje lanaala jecha cuu-juerichaanuhin,” naain nesaruhin cuhacaanu, enoto soo jeloon neein ajaabiji nichajai caje uha raujiaain aasaaeriin jouhaquiin- cujuanane jaun. Nitohaneein kuhina, Cureta auhaniha cuujihacaanu niqui.

<sup>14</sup> Nete, nii baiha neeoriin, enoto soo nichaae cujueein cana raotono nichajai que, enoto mitu dararo caje uhe jataain mijieeinetiin cujuana. Niite, bote que tacaain, richorochoe.

<sup>15</sup> Nitohaneeinte, richorochoaain, cuanaa jerichaanune jaan edacai que, bote cuae nii cujuana, que tacaain macohi auriteein, acatena nainenihacaanune jaun. Nii jaunna, cuu canacaanu amanaa jerihane jaan jeloon, canacaanu amaane coarajihacaanu.

<sup>16</sup> Nitohaneein kuhina, leinjiin obena laojoiri Caaodaneein curuajai rohan situha cuhacaanu. Ucuajai que saaneein mijieeinetiin tacaeniha cujuanane jaunna, jataain necairichaaoriin, tijichaaain canacaanuhacha amai- naluha botene nichoteeuruhana jaan- bote laojoiri inacaanu.

<sup>17</sup> Nitohaneein mucuhin tararaain inaacaanune baihate, cuu, inori que, nii cuhacaanune jaan bote ichohacure, nunaane coina. Nitohaneeinte, carene araraca- Siretenein curuajai que tacanaa coasichuruhane jaun, cujuana aina amuuruhane jaan bela serichure, ocoai nichaae cuaain, cujuana ainaacha cuujueeuruhane coina.

<sup>18</sup> Nii cojoanoo, jaiti mijieeinetiin uha cujuanane jaunte, cucuana cuhane, nii bote coneracuru jaonaa nunuheteure.

<sup>19</sup> Nitohaneeinte, nesarucuaanune nichata jano kuhane, bela nujuaauru tabaauru, chaen itolere nii nichotihacaanune que nelatelanaala nenacaaurune majeein jaoore.

<sup>20</sup> Nitooaneeine, araai janohin enoto coarilanaala, nii arasijie nihanatiin coarinihacaanu. Nechu jataain nirijieein nesurocorihei rijijieein, bote nalaaene amuneein sacuha fichafichanaane jaunne, “Inae jecha ecu ohacaanune nita- jerichaanuhin,” naacaanu niqui.

<sup>21</sup> Nitohaneein, araai janohin lenonelanaala nihacaanune jaunte, satiin canacaanu cataaun nichaauraaain:

“Coaracuche cachaurute, quere tonoraelanaala, kuhacha nena richae, Cureta caje cana uhaichelu. Colane chachu, cuu raotojoein nihacache. Colane, catohanai baaso que siturihaacache. Nii colane, chaelai que siturihaacache.

<sup>22</sup> Nijiaonriha joaereein, inara suujua cuaaichene. Coatia leinjiinejeein orihaain chunei cacha. Caa botete laaen, nita-jiha cureein.

<sup>23</sup> Enene cojoanotiinte, canu rene, rai cacha neein-letononeein nihanune rai, letono anjera letoae- Cana Coaunera.

<sup>24</sup> Canu acatiha ecocohinte: 'Coaa casihara, Faboro. Atiinte, Romanocuru curuaanaa- eenferadoro acatiha tururiquiin-cha. Ii corenihate, atiin onaa caje nichotiha cuurureein saain nii ii aina bote cuhane nenacaaurura.' nae carai Cana Coaunera letono- anjera.

<sup>25</sup> Aihane jaun, cha que tonajelanaala, joaenreein inara suujua cuaelanaala, caa caitoonjoan esenetaachacuche. Nii aitoha Cana Coaunera letono anjerane tocohanihate cureein. Esinaete rauhijiriin aite. Canuna, esinae rauhijirin aitohane coitucuhin esenetaun.

<sup>26</sup> Nete laen, leinjiin obena que tacaain baulenetoha caa botene jana, cuu nerarichaacheeincha," naain bee Faboro.

<sup>27</sup> Inae coroata semanaa nesarucuaanunena janate, Ariaticoneein curuajai cucuana cuhane cuujihacaanu, janotiin. Nii janate, dede catai rijiu, cuu cajianeein bote amaa cujanane jana, inae cucuana auhaniha nichuuntaacaanune que nainacure bote beraihurera- marinerooru.

<sup>28</sup> Nitohaneeinte, inae coitucuuruhane jaun, nucuhaano cojounacateein coaracuruhane jana, nichatachoonca saota metorone rai nucuaano. Nii caje cuujueein, coaiten nucuaano cojounacateein coaracuruhane janate, coroatachoonca caaunsi metorone rai nucuaano.

<sup>29</sup> Nii jaunte, ajeri que tacanaa coasia, bote roeniha jenaain anajiin nena coata- aancla nalaare, cuu bote acatein, cuu mucuhane coina. Nii nalaecuruhane nainihate, Cana Coaunera bajaebajaecure, chajaain janohane coina.

<sup>30</sup> Nii janate, bote macohiniha anajiin nena coata- aanclauru nalaera rijijieein, nii- naluha botene nichotee-uruhana jaan- bote laaojiri faunaa nunuheteure nii bote beraihurera- marinerooru, nii bote caje sorooruhane coina.

<sup>31</sup> Nii janate, coaranajaain, nii soondarooru curuaanaa cafitaun rai beein, nii soondarooru raine maajeein beein:

"Berainajaeneeichenete, caa bote ratiriin sorooruha acaauruhachane, nenereein nichoteeichene jaanura," nae Faboro.

<sup>32</sup> Nii jaunte, acaauruhacha amaemajei bote laaojiri ichora saaujihure, nii soondarooru, acauhanau naluhane coina.

<sup>33</sup> Inae janonaa raite, satiin acaauru rai, lenonecuruhane coina:

“Inae coroata semanaa, nirijieein caohachaain lenonelanaala neein, situha cujuana aina fichafichanaane cohaquichenera.

<sup>34</sup> Aihana jaun, chajaain chaaelainiji que lenonecuchete, nii aina abaantaain nichotena nainequichene, nichotee-iche. Coatia nitajerihaaain leinjiinejeein nihanatiin chunei couturiujicha,” nae Faboro.

<sup>35</sup> Niritohane baihate, satiin acatiha teein, faan teberiaain, nichoae Cana Coaunera bajaane baiha, nii faan tatuhin, bee-unebeeuneein que lenone Faboro.

<sup>36</sup> Nii jaunte, lenonena coaujueeurenihane baiha, inae satiin lenonecure.

<sup>37</sup> Itolereneeina, coroata fasha caaunsi choonca saotaneein, nii bote cuhane nihacaanu.

<sup>38</sup> Nitohaneeine jerenihacaanune jaun tiaaajoaain, nainaain lenonichaanune baiha, nii canacaaunu lenone tirico caute jaohacaanu cucuana cuhane, nesaraca nii botene coina.

*Cucuana cuhane naluha botene*

<sup>39</sup> Nii janate, inae janoe. Nete, “Caelai caara,” naain, nii atane coitucuurene nii bote beraihurera marinerooru. Nete atiin, cuu- cucuana auha leororo- carene siricha coaraain, cuu nii bote jauriaanaa coacure niqui.

<sup>40</sup> Nitohaneein, cuu jauriaanaa coacuhinte, nii bote lara-caauruha acau cataaunna jaan anajiin nena coata- aanaclauru ichora saujiin ratirihure. Nitohaneein teinte, bote cocoihacuru, roeneraaunu que nelateein nena cosi lecoaracaure. Nii baihate, bote macohiniha nena bela tocoore. Nii jaunte, nii aina inae erojoein cucuana auhania nichuuntae nii bote.

<sup>41</sup> Nitohaneein cuhinte, nichuuntaain carene araraca raroaqui choae, baulenetoha cue nii bote. Nii jaunte, caohatiin baulenetoha nii bote macohi nichajaine jaun, carene raroaqui choae liquiinetiin, rurujuanacaje lanaala nedae nii bote macohi. Nii jaunte, jataaen mijieineein tacaa- fichafichanaana jaun, fichafichanaa caaun, nefejeein, nichalunihaje bote roe nichajai.

<sup>42</sup> Nii jaunte, nii casetecoreein cunacaauru sohajein jaonaa jerecure nii casetecocuru beraihureraauru soondarooru, nabana joichohin sorooruhane coataa.

<sup>43</sup> Nete, caohate nii soondarooru curaanaa cafitaan, Faboro coreniha, nabana Faboro netonai sohin jaoruhane coataa. Nitohaneein caohateinte, joichona inaurera letoae ichoaichania, acauhana naluhin cuhin, atane que cohanaacuruhane coina.

<sup>44</sup> Jana, leochaauru, acaauru caaijie cuuruha tabara choaene jana, tabaauru leochaauru netonoai cuuruha nii-

bote nichalunenaa jerooru choaaene coina, letoanajae- nii cafitaan. Nitohaneeine, satiin, leeinjiin obene que neraain, onaa caje nichotihacaanu.

## 28

### *Malata cobena neraa Faborone*

<sup>1</sup> Satiin, obene que neraaina, Malataneein curuaaca nii obenene coitucuhacaanu.

<sup>2</sup> Jelai cocoaichacuru cachaaurute, jataain caohacha nejeeuruhana jaun, saain canacaanu belaihure. Nii janate, uheuheca elone jaun, jelarotohane jaun, enuha codoriaain mocohin, iihane jana, canacaanu cotihacure, nichaatihacaanune coina.

<sup>3</sup> Nii janate, enuha cohi taojiaain raane jaun, usi jana tihajiha Faborone jana, iihaniha usine jaun, ajaano caaun sorohalaain, Faboro biji que tijileneein calae acano.

<sup>4</sup> Nii Faboro biji que tijileneein calaa acanone coaraainte: “Jerihanete, soserena necaiha caa cachara. Cucuana cuhane naluhin, onaa caje nichotihane jaunte, ichaohane jerene, dedeeu nenea- nii rucuherrara,” naaure Faboro coarajejin, nii cuu nenacaauru cachacuru.

<sup>5</sup> Nii janate, nii usi iihanei cataaun, nii acano chatachataain siheitiin, cuu tonajelanaala nee Faboro.

<sup>6</sup> Nii jaunte, satiin, “Laraarichaain jecha,” naain cuu, laraacane coarajejure. Nii janate, laracaene. “Luhecotariin jecha cora aonaain, tocojoaain tacaain oreein,” naainte niqui, cuu, carajaain coarajejuruhane jana, tonajeerinihane jaun, suujua elonaain:

“Leeinjiin chosi necaihara,” naaure Faboro que.

<sup>7</sup> Nii nihacaanune jaan rohante ne nii obene que nenacaauru coara Fobirio neein curuajai cacha rai atane. Nii Fobiriote, canacaanu belaaain, canacaanu rae, rai loreri asaae. Nii jaunne, cuu aina nihacaanu nichata janohin.

<sup>8</sup> Nii janate, ajaa que jeraain ujuee caaun cunaiteein ecu niha nii Fobirio inacana jaun, rene turuha cue Faboro. Rene turuhinte, coaraain nichoae Cana Coaunera bajaane baiha, nichoae biji merecaain, dadaain aonaane rijieeoritiin inae nerautae.

<sup>9</sup> Nii coitucuhinte, satiin uure nii obene que nenacaauru leeochoauru cunaitenacaauru. Nii jaunte, rautanaaca Faborone jaun, nerautaacoaain caaure.

<sup>10</sup> Nii jaunte, satiin canacaanu belaijuruhane jaun, jelai caje amuhacaanune coina, bote cuhane fauhacaanune rai, cuujueein canacaanuhacha quiinenu que- canacaanu achanojoaauure, itolere amunaa rai nelatecuri teein.

*Romau turuha Faborone*

<sup>11</sup> Nitohaneein, cuu nichata ateein nii obeneu nihacaanune baihana, leinjiin bote- Alejaandiria caje unaa- cuu cujuana aina jelarona bitoha nenea bote cuhane fauhin, cuhacaanu. Nii botete, coujunacanu que nihane coina, fafone neein, acaauru chosichurune que Curiecocuruhacha tei- Castaro, Polosi, naain curujaihuru ecaantooru- coujunaca amaerane, bote macohiniha teein.

<sup>12</sup> Nitohaneein cuhina, turuha cuhacaanu, Siracosa cofauhanau. Cuuna nihacaanu nichata janohin.

<sup>13</sup> Nii cajena, nesaruhin cuujihacaanu, cucuana auhaniha, rauhijiriin Rejioo turuhacaanune coina. Nii cojoanoonte, cuujihacaanune jana, canacaanu cunaja bote roe caje uhe, raujiaan jouhaquiin cujuana. Nii cojoanoon cojoanoonna, turuhacaanu Poteeoliu.

<sup>14</sup> Cuuna, Jesocurisito coreniha cana nejeraauru tabaauru ruhacuhacaanu. Acaaurute, canacaanu cotijiaain, cuu canacaanu chunaaure, le semanaain acaauru aina nihacaanune coina. Nirijieein inacuhe inacujueein cuujueeina, tabiicha turuujihacaanu Romau.

<sup>15</sup> Nitohaneein cuhin, atane ichoae inacuhe inacujueein cuujihacaanune coitucuuruha nii Romau nenacaauru Jesocurisito coreniha cana nejeraaurune jaunte, canacaanu que taca uure, Apio rai Foro neseu tiaain. Nii jana, leeochoaurute, Nichatajai Taberenaneein- acaauruhacha curuaatei neseu canacaanu cohacure. Nii cuu neeuruhane coaraainte, corojeein, Cana Coanera bajae Faboro. Nii ainate, raotojoein suujua aonae Faboro.

<sup>16</sup> Nii jana, Romau turuhacaanune janate, jelai loreri asae teein, nirijieein caseteconein, jianacoo teein, leinjiin soondaro que beraichaaain, Faboro sirichuruhane coina jerecure.

### *Romau niha Faborone*

<sup>17</sup> Nitohaneein, nichata janojoein turu baiha neeoriinte, nii Romau nenacaauru- naraaichuru Jorioocuru rai nelateein nenacaauru- jitariin cotiharate Faboro, acaauru rai irihane coina. Inae satiin turuhacoaain, netaojiaauruhane janate, acaauru rai:

“Caraichuru, chaelai janonaa bana cana Jorionichaachene que baasoneein irihaaunta. Niheichu, chaelai janonaa bana, cana inoaesihuru ichao coacuhin baaso neein irihaaunta. Nii atiinte, Jerosaleeun cacoulurujueein, baaso ichara nihane rucuheraaunu que Romanocuruhacha cocoinanohi rai canu teure Jorioocurura.

<sup>18</sup> Nii janate, jitariin caohachanainejeein, cacaje bajaauruhane baiha, caihanenaa jerecure, neniha casohin cajaoruhane jaan- lernane jaun niquicha.



<sup>19</sup> Nena, onaa caje nichotihanune jerecurenihä nii cacouluruheraauru Jorioocurune jaun, canu rucuheca satiin- curu- aanaa neein nenaä eenferadorone coina bajaaun, nii neniha caraaichuru coulurujihanune jaan lerane saijieeincha.

<sup>20</sup> Nitohanihana jaunna, inara jitariin cotiharateen, inara coaraain, inara rai irihanune coitucuhichene coinara. Cana Isaraelita nichaachene, canaacha cohajei esenetaanune corenihane, cau caa *cadena* que cositenojoneein neenra, ”naa acaauru rai Faborone janate:

<sup>21</sup> “Coatiha chaelai quirichanejeein letoaauruhi Jodea caje canacaanu rai, ii que, ‘Acate, naaonjoaain que situhin nera.’ Nii jaunna, ii berenaä coitucuhenihaacaanura. Niheichu, ucujai caje turunacaauru- cana araaichuru- Jorioocuru nihanatiin, ‘Acate, baaso ichaechajeein ne jetaora.’ naain, ii que ereeuruhita.

<sup>22</sup> Nena laen, nii le laurijieein- enanenaä Jorioocuru ichao beeine jerichaanura. Tonaai ii, nii queta. Itolere sacutaain, baasoneein nii que ereeuruhane coitucuhacaanune jaunna, ii, coitucuhina jaun, nii beeine aohana jerichaacaanura, ”naaure Romau nenacaauru Joriocuru, Faboro rai.

<sup>23</sup> Niritiinte, “Naaonjoaain cojoanonaa banana, turuha urichaanuhin, nii que ereei canacaanu raine, coitucuhacaanune coinara, ”naaure. Nii jaunte, nii aitocuruhane cojoanonaa bana, netaojiaaure arajii cachaauru, nii niha Faborone jaan loreri asae. Nii jaunte, janone caje coauneein, acaauru rai ereereje Faboro, Cana Coaunera Cojoanonaa que, sonafaajeein. Nitohaneeinte, Moisesa aitoonjoa quene maajeein, chaen Cana Coaunera ere bera inoaesihuru *profetacuruhacha* laenai, naajoainunru aina cuaain, acaauruhacha cohajei Mesihaseenein niha Jesusone esenetaauruhane coina, acaauru que jererateein, acaauru rai beebeje.

<sup>24</sup> Nii ainate, tabaauru, nii aitoaha Faborone esenetaain tonoraature. Jana, leeochoaurute, esenetana jerecurene.

<sup>25</sup> Nitohaneeinte, ita suujua rijitojoenaa jerelanaala, mituhajeein caunaa nunuheteuruhane jaunte, acaauru rai:

“Esinaete, rauhijiriin nitohaneeichene coitucuhin, inara foerateeurera rai biha nere bera inoaesi Isaihasine coina, berateein:

<sup>26</sup> ‘Caritiin benihu,  
taa cachaauru rai:  
Aonaquichene nihanatiin,  
caohachaain aonaain,  
coitucunaa naineriheeicheeinta.

<sup>27</sup> Chaen,  
nii coaraquichene nihanatiin,  
coaranaa jeriheeicheeinta.’

naain berateein:

'Banejelanaala nauhacaa  
 acaauru suujuane jaunte,  
 raajenhane aonana jerecurene,  
 acaauru rai beraane nihanatiincha.  
 Niheichu,  
 acaauru notaracaae nihanatiin,  
 coana jerecuruhita.

Nii jaunte,

coitucunaa nainecurenera,  
 nabana nesoone caaun,  
 canu rene necohaleeuruhane,  
 acaauru rautain nihanune coataara.'

naain rai nere bera inoasesi- Isaihasi que beratelu jetao, Cana  
 Coaunera Suujuera.

<sup>28</sup> Aonacuche. Caa acaihanejeein Cana Coaunera tenojoin  
 jianacoon cana mitaeranu esenetana jerelanaala, aohana  
 jereneeichene jaun, ena caje coauneein, Jorioniheichuru rai  
 beebejiha cureeunicha. Acaaurute laen, aonain esenetaain,  
 tonoraa cuurureeincha," naa Faborone jaunte,

<sup>29</sup> nejesinajeein, mainajeein ita cotaain cauha cuure Jori-  
 oocuru.

<sup>30</sup> Nitohaneeinte, cuu itolereenein, coroata ajaanacaain  
 neelu Faboro, nasae nihane coreniha coretejeein, niicha sirii  
 loreri asae. Nii jaunte, rene turuha cunacaaurunihane, cuu  
 ranajaque.

<sup>31</sup> Nitohaneeinte, cuu tonajelanaala, Cana Coaunera Co-  
 joanonaa beebejeein, Cana Curuaanaa Jesocurisito quene  
 maajeein ereerejenajaque, nii chunei rohecaera colane.

## Roma nenacaauru rai Faborohacha letoai

*Inara coaaucaun.*

<sup>1</sup> Canune Jesocurisito letono Faboroneein inara rai caa quiricha laenaun. Cana Coaunerate canu janijiin canu raain nelu, jelai teein rai letono afosotoloneein cacha ichoteraneein enachasine ichaonaa beebejihanu cachaauru raine coina.

<sup>2</sup> Niite rai nere bera inoensihuru *profetacuru* que be-rateein laenaeratelu rai Quiricha Inoensi cuhane Cana Coaunera.

<sup>3-4</sup> Nii niicha berateite, Rabiri inamoconein cachaneein niha Cana Curuanaa Jesocurisitone beraneein nena ne. Nete rai Suujue aina cuaain onaa caje ichateein, rai itolere que laraajiin nihane jaanu teein rai Calaohineein nihane coitucueratelu Cana Coaunera.

<sup>5</sup> Nii rai Calaohi Jesocurisito aina cuaainte, rai letono afosotolo nihanune jaanu teein nelu Cana Coaunera. Acane beebejeeun, chauratane sacuritaain satiin laurilauri nenacaauru cachaauru netonai Cana Coauneraneein nihane coitucuhin, nere tonoraain neeuruhane coina.

<sup>6-7</sup> Inara netonai nii Romau ichoainiquichenete laurilauri nenacaauru cachaauru aina jiniiquiin niicha ranojoneein neeiche. Inara belaitohane jaunte, Jesocurisito ranojoneein neein rai cachaneein neeichene coina inara raelu Cana Coaunera.

Satiin inacaneein nena Cana Coaunera, rai Calaohi Jesocurisito naaonjoainuri inara rai raotojoein neeichene jaanu teeurumiin.

*Romau bedainiha cunaa jeriha Faborone*

<sup>8</sup> Jesocurisito aina cuaaine satiin le cachanequichene coreniha, jataain Cana Coaunera coraajeeun, esinae rauhi-jiriin esenetaaichene coitucuuruha itolere sacutaaine coitucuhanune jaun.

<sup>9</sup> Rai letononeein casuujua aina cuaritaain rai Calaohi que ereerecaauinne jaan- Cana Coaunerate, itolere bana bajaanune naineein inara coaaucaauinne coarajera ne.

<sup>10</sup> Chaen nechu aca jerihane, tabiicha inara coaraa uhanune coina itolere bana caje bajaebajajeeun.

<sup>11</sup> Jataaine inara coana jereeun, jeriha Cana Coaunerane rijijieein inara rai beein, inara coroataja nichaaunne, inara suujua corelanaala ijiin neeichene coina.

<sup>12</sup> Jiniiquiin esenetaacachene rijijieein, ita suujua que cora-  
jerateein nihacachene coinane caa aitoon.

<sup>13</sup> Cana Coaunera coreniha cajeraauru, coitucuhichene  
jerichaaunne jaunne inara rai bereeuni. Araain saaine  
niqui inara coaraa unaa jereeun. Nene enanetojoein  
nainesineeun. Charijieeinteeinti leochaauru lauri lauri  
nenacaauru aina acaauru rai caohacha ichaa aihun; nii  
rijijieein inara rai netonai caohacha ichacaaunne jere-  
nacaunne inara rene turunaa jereeun.

<sup>14</sup> Chaque nelatenihanune saijieein canu rai Cana  
Coaunera tenojoi raeranichaaunne jaunne, satiin cha  
coitucuelanaala, aansijiin relanojoein nenacaauru,  
itolere coitucueracuru, cha coitucunaa jeriheichuru,  
naaonjoaihunru rai, nii quicha ranojoi tenaa jereeun.

<sup>15</sup> Nii jaunne, nii Romau neiniquichene rai, jataain enacha-  
sine ichaonaa que inara rai erenaa jereeun.

*Itolere ichana nainiha enachasine ichaonaane*

<sup>16</sup> Coatiha nii cana rai beratenojoi enachasine ichaonaa  
bihanune coejihaaun, aca niicha ichana nainei ichaa Cana  
Coaunerane jaan nihane jaun, satiin esenetaeraauru Jo-  
riocuru osa caje jauriaanejeein ichoteratenojoiniha cuu-  
rurichaaaine jaun. Jorioniheichuru esenetaeraauru netonaite  
nichoteeurureein.

<sup>17</sup> Nii cana rai beratenojoite, cana que esenetaacachene  
coreniha, cha ujuaihonelanaala nihacachene coina jiana-  
coon cana tiha Cana Coaunerane coitucuerate. Nitoha-  
neeinte ichae Cana Coaunera, nechu esenetaacachene jaun-  
cha. Nitohanihane coinante: "Leinjiin acaacha esenetaerate,  
niicha ichai ujuaihonelanaala nena rijijieein ichaoreein,"  
naain laenanohineein ne, Cana Coaunera quiricha cuhane.

*Niicha ichai ujuaihoneein niha satiin cachaaurune*

<sup>18</sup> Cana Coaunerate, caohacha que ichaaoruhane coina  
cachaaauru rai niicha tei caohateraauru nechu aansaineein  
ichaonacaauru casetecarichaaain dede caje coauneeinne  
coarate cana que.

<sup>19</sup> Acaaurute niqui, nii acaauru que Cana Coauneraacha  
coitucueratei coitucuure raotojoein, raajenhane coarati-  
hane jaun.

<sup>20</sup> Cana Coauneraacha ichai asinojoein nenaate coitu-  
cunaa nainichaache, caohachaaain cana suujua coaraain ni-  
icha ichai que coaaucaachene. Necoaunaain nihalu cana  
rai chauratanene caje coauneeinte, esinae rauhijiriin Aca  
Cana Coauneranein nihane jaun chabana satonoenerihani  
nii niicha ichana naineine coitucuhacache. Nii jaun, nechu  
aansaineein coitucunaa jeriheichuru nii ujuaihoneein nee-  
ruhane caje nichoteeururinaain.

21 Nitohaneein raotojoein, Aca Cana Coauneranihane coitucuuruhane saijieeinte, chabana nere tonoraain esenetaain, niheichu chabana acanihane coroaecurene. Nitohaneein nenea coacuelanaalate, baasohacha que coaacuuruhane jaun, inae nauhacaa acaauru suujuane jaun, noco-hanaanau nenea rijjijiein neeure.

22 Itolere coitucueranihate niqui nocoetocure. Nete cha coitucuhin aitocurene.

23 Nitohaneein cha coitucuurenihane jaunte, Cana Coauneraacha coaunanohineein- onaa inaeranein nenea cacha tocohaneein nenea ecaanto jaure. Nii choae tacaain techu, tajaacuru, atane choae terecuri, atane choae tijariin amunacaauru, naaonjoainuri tocohaneein ecaanto jaainchuru que chabana ohelanaala nenea Cana Coaunera necaohacha coreeure.

24 Nitohaneeuruhane jaunte, nii acaauru suujua baaso letono ichacuruhane coina, inae acaauru janiha Cana Coaunerane jaun, nejesinajeein ita rai coejenacai ichacure.

25 Esinae rauhijiriin Cana Coaunera niha Cana Coaunerane saijieeinte, aca coroaena coacuelanaala niicha coaunano-joihunri coroaecure. Nii Cana Coaunerate, acaauru netonai coaunaain nihalune jaun, itolere bana leinjiin acaacha coroaenoinihane caohachae. Nitohanemiin.

26 Nii jaunte, inae acaauru que jaolecoha Cana Coaunerane jaun, itolere coejenacai ichajeein necairichaaure. Acaauru benecuru nihanatiinte, inae aina niicha jerei ichaa acaauru lanaaurune jerelanaala, inae nichao coreein namute ene aina niicha jerei ichacure.

27 Nii rijjijiein techu, acaauru cocoichacuru netonai, inae acaauru comasaihuru aina niicha jerei ichana jerelanaala namute quicha aina niicha jerei ichacure, baasoneein acaauru letoaa acaauru suujuane rijjijiein necoelanaala. Nitohaneeinte, necha aansaineein, erenaa tonoraarenihane jaun, caseteconein raajenihane jaberoco cairichaaure.

28 Acanihane coitucunaa jerecurenihane coreniha, acaauru suujua baaso letononein niicha ichai coitucuelanaala ichacuruhane coina, acaauru que jaolecoha Cana Coaunerane jaunte nitohaneein neeure.

29 Nitohaneeinte caohacha ichana coacuelanaala baaso nejesinaacha ichaain, itolere bana niicha lateeicha que coacuhin baaso ichaain, namute cacha que necoelajaauharitiin, sonajaain jaohin, suujua acatelanaala, enaacha nohaneein, acaauru ichaonihei que ichaohin, namute cacha cairichaa casajenetiin, naaonjoaain neeure.

<sup>30</sup> Chaen techu, leeochoauru coacuhin acaauru que baasoneein ereein, Cana Coaunera que nejerateein, cha coitucualanaala enaacha cacha tonoraain, itolere baasohacha coacuhin necohasitaain, baaso ichaain, inaca ere tonoraelanaala,

<sup>31</sup> cha coitucunaa jerelanaala, tonaain ereeuruhane nihanatiin chabana ichaelanaala, nihei chuni belaihuruhi, cacha que suujua acatena inaelanaala, chabana cairichaaajoaain namute cacha coaracuruhi, naaonjoaauru.

<sup>32</sup> Raotojoeinte niqui, satiin nitohaneein ichaonacaauru atinanohineein neeuruhane coina, nitohanei rai rauhi tihalu Cana Coaunerane coitucuure. Nete, enanetojoein nitohaneein neeuruhane jianecurenihane jaun, leeochoauru netonai nitohaneein neeuruhane rautatiin coaracure.

## 2

*Cana Coaunerate, esinae rauhijiriin niicha ichai ujuaihoneein nenacaauru casetecareein.*

<sup>1</sup> Nitohanihane jaun coatiha ii que suujua acatena nainerinaain Cana Coaunera, ii netonai acaauru rijijieein neeine saijieein acaauru que ereeine jaun. Chatohaneineein neeine nihanatiin coatiha nii caje nichoteriheeini. Acaauru rijijieein ichaohine saijieein acaauru que ereeine jaunte, ii raajenihane necoluruhequi.

<sup>2</sup> Nete nitohaneein ichaonacaauru casetecaane bana, esinae rauhijiriin acaauruhacha casetecarihanine coitucuhacache raotojoein.

<sup>3</sup> Aihane jaun acaauru rijijieein ichaohine saijieein, acaauru que ereeine jaun jiaonriha ii casetecarihani Cana Coaunerane caje nichotena coaauquine.

<sup>4</sup> Nitohaneeinte iicha jerenohicha ichaain neeine que nainaain, aca Cana Coauneraneein nihane coitucuhin neeine coina, ii cojoaain ne Cana Coaunera, chabana cacha belaitohane jianenihane jaun niqui.

<sup>5</sup> Nete ii suujua coitucueeneine jaun, Cana Coaunera coitucunaa jerelanaala baasohacha ichaaine jaun, inae ecu tihane bana baaso icharaauru casetecain,

<sup>6</sup> Iecachaauru naineein acaauruhacha ichai nainijianaain acaauru coretiha Cana Coaunerane bana caseteco coariquiin.

<sup>7</sup> Nitohaneeinte jataain nelateineein chabana satonoe-lanaala necaohachanaa coaracuruhane coina itolere bana caohacha nejesina ichajeein ichaonacaauru rai, chabana sanaachara ichaonaa tereein Cana Coaunera.

<sup>8</sup> Nete laen, cha coitucunaa jerelanaala caohacha icharaauru que nejerateein baaso ichara neein nenacaauru coroatajaneraauru casetecareein obajeein.

9 Satiin baaso icharaaurute inaderanaa aina necairichanaa coaracurureein. Jorioocurute ichoaichaniha casetecanohiniha cuurureein. Jorionihechuru netonai nihanatiinte jerichanejeein caseteco coaracurureein.

10 Nete laen satiin caohacha ichajeein ichaonacaauru rai, rai necaohacha aina jataain nelateineein nihane jaan tereein Cana Coaunera. Jorioocurute ichoaichaniha nitohanai raeraneein neurureein. Jorionineichuru nihanatiinte nitohanai raeraneein neurureein.

11 Nitohanihate cureein leechaneein itolere cacha coaraeniha Cana Coaunerane jaun.

12 Satiin Jorioniheichuru- nii Moisesa rai Cana Coaunera tenojoin rauhi coitucuhelanaala onacaurute, nii rauhi colane oorureein. Nii rijijieein techu Jorioocuru, nii Moisesa rai Cana Coaunera tenojoin rauhi sirichuruhane jaun, inae raotojoein coitucuuruhane saijieein osaque nesarucuruhane jaun, nii acaauruhacha sirii rauhi aina cuaain colurujuenojoneein caseteco coaracurureein.

13 Coatiha nichoterinaain nii chuni nii rauhi aonaane saijieein tonoraelanaala nena. Nii rauhi aonaain, aithane rijijieein tonoraain ichoaite laen, nii caje nichotereein.

14 Nete Jorioniheichuru, nii Moisesa rai Cana Coaunera tenojoin rauhi coitucuurenihane saijieein, nechu acauru ichaoneein nii rauhi aitoonjoa ichacuruha suujua caje rocohinne, jelai tein nitohaniha acauru rai rauhine jaun aihurureein.

15-16 Nii jaunte, acauru nerurujua caje inanacareein nii rauhi acauru suujua cuhane acaauruhacha sirii. Acaaurute baaso ichaain, caohacha ichaain, naaonjoaauruhane coitucueratereein acauru suujua inae saa cana janonaane bana, Calaohi Jesocurisito aina cuaain satiin suujua cuhane asinojoneein cachaauruhacha ichai coitucuerateein rucuhereein Cana Coaunera, caa inara rai aitiin inara relaanune rijijieein.

*Moisesa rai rauhi rijijieein niha nocoetocuruha Jorioocurune*

17 Iite niqui Jorioneeine jaun, Moisesa rai rauhi coitucuhin, aina inae necoasitaain Cana Coaunera aina niha nocoetohi.

18 Inarate niqui Cana Coauneraacha jerei coitucuhin, itolere caohacha nejesina janijiin coitucueratiha ii que nii rauhine jaun, itolere caohacha coitucuhi.

19 Nii ainate maosaneein nena rijijieein cha coaraelanaala nenacaauru,

20 cha coitucuelanaala nenacaauru, naaonjoainuri relaain neeine coina jatoroain niha nocoetohi, ii Cana Coaunera rai rauhi coitucuhine jaun.

<sup>21</sup> Nitohaneein leeochoaauru relaeraneein neeine saijieein, chanuna jana chaen ii raajenihane ii suujua coaraain relaanaa naineneei. “Coa asijiauha,” naain ereeine saijieein chanuna asijiauhi.

<sup>22</sup> Chaen techu, “Nainihej nejelau ene aina ichaoha cachaneta,” naainte ereei niqui. Chanuna jana chaen, ii nejelau ene aina ichaohi. Chosichuru ecaantooru quete niqui jaolecoha nocoetohi. Chanuna jana chaen nii saijieein, acaauru rai Teenforo asaae coretiin nenacaauru ecaantooru basijiauhi.

<sup>23</sup> Cana Coaunera tenojoi rauhi tonoraain cha chaain ichaonaa rijijieeinte niqui ereereequi. Nete rai rauhi tonoraain cha chaeneeine jaun, baasoneein Cana Coaunera coaratihia aitoi.

<sup>24</sup> Nii quete esinae rauhijiriin nitohaneeichene que: “Inara Jorionequichenete Cana Coaunera que jaoleconaanein Jorioniheichuru terateeiche,” naain laenanohineein ne, Cana Coaunera Quiricha cuhane.

<sup>25</sup> Esinae rauhijiriinte niqui nelate Moisesa rai rauhi tonoraain nihane, rai jaberoco macohi cari saerateein niha cachane. Nete nitohaneein nihane saijieein, nii rauhi tonoraain ichoaenihane, nirijieein jaberoco macohi saerate-lanaala nena cache rijijieein ne.

<sup>26</sup> Nete laen Jorionihechuru, rai jaberoco macohi saerate-lanaala neuruhane saijieein, nii aitoa rauhine rijijieein tonoraain ichaauruhane, jaberoco macohi saerateein nena cache rijijieein coanojoinecurureein.

<sup>27</sup> Nii jaberoco macohi saeratelanaala nena, nii aitoa rauhine rijijieein tonoraain ichoaite, nii rauhi siriin rai jaberoco macohi cari saerateein neuruhane saijieein nii rauhi siriin tonoraelanaala nenacaaru colurujueeurureein.

<sup>28</sup> Nitohanihane jaun, coatihia esinae rauhijiriin Jorio esine nihei nii jaberocohacha que Jorio nihane coarateein nena. Niheichu coatihia Jorio nihei nii jaberocohacha macohi cari saeratera.

<sup>29</sup> Esinaen rauhijiriin Jorio esinete, satiin rai suujua cuhanene maajeein aca ne. Nii jaunte, rai suujua caje coauneein coacuhin, rai jaberoco macohi saeratihane late-lanaala Jorio esine neein ne. Coatihia laenanohineein niha rauhine lateein aihei. Niite Cana Coaunera Suujue ichanohineein ai. Nitohaneein ichoai cache, coatihia rijijiei cache caohacha ichaane coitucuhane coina coujuhin coarana nainerinaain. Leinjiin Cana Coauneraachate rai nichao coujuhin coaraain coitucureein.

### 3

<sup>1</sup> Nitohanihane jaun, chaque nelate Jorio neein, cana jabe-



roco macohi cari saerateein, naaonjoaain nihacane.

<sup>2</sup> Araai laurii coinete niqui nelate Jorio nihacane. Jauriaanejeente, Jorioocuru rai nere beratelu Cana Coaunera, esenetaauruhane coina.

<sup>3</sup> Aihane jaun chachareein nii naitoonjoa rijijieein neureenihane coreniha. Nii naitoonjoa rijijieein neureenihane corenihanacha, aitothane jaan ichaenerichaaain Cana Coaunera.

<sup>4</sup> Aihei jerihane. Cana Coaunerate, casajenetooruha satiin cachaaurune nihanatiin, itolere bana naitoonjoa rijijieein cha chaain nereein. Nitohanerichaaaine quete:

“Inae cuu tihane banate,  
esinae rauhijiriin aitohine rijijieein  
chachaaine coitucuurureein.

Nii banate,

ii esenetaauruhi casetecaa nohanelanaalane  
coitucuurureein.

Nitohaneente

joaenreein ii colurujuera amuritoriquiin,”

naain ne laenanohineein Cana Coaunera Quiricha inoaensi  
cuhane.

<sup>5</sup> Nete nitohaneein aitocuruha tabaaaurune rijijieein canaacha ichai baaso, jataain necaohachaa Cana Coauneraane coaratihane, chanuna jana chaen nii baaso ichacaachene coreniha cana casetecae Cana Coaunera. Nete nii baaso ichacaachene coreniha cana casetecaa Cana Coauneraane nihanatiin baaso icharaniha benaa nainenihacache.

<sup>6</sup> Coatiha nitohanihei. Nitohaneein baaso icharanihane, coatiha satiin chauratane que nenacaauru cachaauru ichao cojuhin coaraain rucuhena nainerihei.

<sup>7</sup> Nitohaneein nohaniha cachane aina jataain necaohachaa Cana Coaunera beeichene saijieein, chanuna jana chaen osaaotoha canu beeiche.

<sup>8</sup> Nitohanihanete satiin baaso icharichache, niha caohachane coina. Niritiinte, cacha relaa canacaanu beeuru, nechu acaauru esenetaain, canu que jaolecooruhane coina. Nete niritiin erenacaauru cachaauru inae caseteco coaracureein.

*Satiinte cana osa ujuaihoneein nihacache.*

<sup>9</sup> Chatonaain chaainti coaauquiche. Cana Jorio nichaacheneena, Jorio niheichuru amurijiriin cacha caohachaneein nihacache. Aihei jerihane. Inae inaraque, Jorioocuru, Jori-oniheichuru, naaonjoainunru aina satiin osaaonaneein nihacachene coitucueratihacaanu.

<sup>10</sup> Nii quete:

“Nihei chuni cacha,  
canu rai caohacha ichaain nei.

Nihei caohachanainejeein leinjiiniji.

<sup>11</sup> Nihei leinjiiniji

Cana Coaunera coacuhin  
caohacha coitucuhin ichara.

<sup>12</sup> Satiinte

baaso jelson suujua cuaain  
caohacha ichana coacuelanaala  
baaso ichacure.

Nii jaunte

nene leinjiiniji caohacha ichara.

Nihei caohacha nainejeein leinjiiniji.

<sup>13</sup> Acaauru rarote

leeinjin calani ne,  
neforacaa atanebanane rijijie.

Jana acaauru lelete,

enaacha cacha coritaauruhane jaaneein ne.

Acaauru ujuaaete,

aiha acano catu corane rijijieein

cacha cunaitaeraniha ne.

<sup>14</sup> Jana acaauru ujuaae cajete

enaacha mituhe cacha cotaain,  
nechu aansainiha beeuruha ne.

<sup>15</sup> Enaachate

sonajaain jaonaa

jerecuruhane jaun

cuhin sonajaain jaaore.

<sup>16</sup> Amuuruhane jaaunrute

aansijiiniji cautijiaelanaala  
niicha eruuri itajeeure.

<sup>17</sup> Nii jaunte,

chabana caohacha ichaain,

raotojoein ichaonaa nainecurene.

<sup>18</sup> Nii chabana

acaauru casetecarichaain

Cana Coaunerane que

coacuhin casihuruhi,"

naain ne laenanohineein Cana Coaunera Quiricha cuhane.

<sup>19</sup> Nete satiin nii rauhi aitoonjoan tonoraain nenacaauru netonai, osaaonaneein neeuruhane coitucuhin neeuruhane coina aitoaha nii rauhine coitucuhacache. Aihane jaun cacha coujuhin coaraa Cana Coaunerane bana, nerinaain nii que tonaain erenaa nainei.

<sup>20</sup> Nii jaun coatiha rauhi tonoraain necaauru nihanatiin, nii rauhi tonoraauruhane coreniha acaauru osa caje ichoteratenajarinaain Cana Coaunera, nii rauhi, esinae rauhijiriin osaaocaachene coitucunaa coinaacha nelatihane jaun.

*Esenetaacachene aina cuaainchate nichoterichaacheein*

21-22 Nete laen, inae ena nii rauhi colane cana ichoteraterichaaaine coitucuerate Cana Coaunera. Niite coitucunaa nainichaache, nii rauhi aina nere beracuru *profetacuru* laenanohi ereretaain coaraain. Leinjiin Jesocurisito esenetaacachene aina cuaainchate naine, cana osa caje cana ichoteratiha Cana Coaunerane. Nii rijijieein techu, satiin esenetaain nenacaauru netonai ichoteratereein.

23 Satiin osa que nesarucuruhane jaunte, Cana ichoteraneein niha Cana Coaunerane saijieein que jaolequiin neeure.

24 Nete jataain cana belaitohane jaun, Jesocurisito aina cuaain inara ichoterate core colane Cana Coaunera. Coatiha rai caohacha ichaain neeichene jaun, inara ichoteratihei Cana Coaunera.

25 Nitohaneein jeriha Cana Coaunerane jaunte ohelu Jesocurisito, rai coichana aina cuaain cana osa aninoaain, cana que suujua acatena nainihane coina. Nechu queecha jaequiin nihacachene corenihachate, cha ujuaihonelanaala nenea rijijieein cana tein cana coaraane coitucuerate Cana Coaunera,

26 esinae rauhijiriin luhecotariin cha coetana inaenihane jaun. Enate esinae rauhijiriin caohacha ichaain, canaacha ichai ujuaihoneein nenea caje satiin Jesocurisito esenetaeranichaachene ichoteratihane coarate.

27 Nitohanihane jaun, coatiha chaelai que nelatihei Cana Coaunera coitucuhin rai caohacha ichaa nocoetiin necoasitaa cachane. Nii necohasitanajate, caohacha nainejeein nitaje. Aihane jaun coatiha nii rauhi tonoraane coreniha, osa caje nichoteein nihei chuni cache. Nechu Cana Coaunera esenetaane corenihate nichoteein ne cache.

28 Nitohaneeinte, nii rauhi tonoraain nihacachene, cana ichoteraterichaaaine coina aitelanaala esenetaacachene coreniha osaaocaachene caje cana ichoteratihane coina aitoa Cana Coaunerane coitucuhacache inae.

29 Leinjiin Jorioocuruhacha Coauneraneeinna niha Cana Coaunera. Tana satiin lauri lauri nenacaauru cachaauru netonai Coauneraneein nihane. Aihanete ne. Satiin lauri lauri nenacaauru netonai Coauneraneeinte ne Cana Coaunera.

30 Coatiha nihei nii baiha chuni Coaunera. Acate rai jabero macohi cari saeratelanaala neein esenetaeraaurune maajein ichoterateraneein ne.

31 Nitohanihane jaunna, nii canaacha esenetai esenetaacachene jaun, inae chaque nelateniha nii rauhi. Coatiha aihei. Nii ainate esinae rauhijiriin nelatiha nii rauhine que aitocoaache.

## 4

*Cana Coaunera esenetaa Abaraaunne que erenaa*

<sup>1</sup> Nitohanihane jaun, tonarihacache cana foeratera inoaensi Abaraaun que.

<sup>2</sup> Esinae rauhijiriin caohacha ichaane coreniha, osa caje colunohineein nenea raane rijijieein tein raa Cana Coauneranete laen caohachare caohacha icharanihane que aitoha Abaraaunne. Nete neniha leinjiinniji caohacha icharane jaun, caohacha icharanihane que aitoha cachane rautaene Cana Coaunera.

<sup>3</sup> Nitohanihane quete: “Esenetaa Abaraaunne jaunte, osa caje colunohineein nenea raane rijijieein tein rae Cana Coaunera” naain laenanohineein ne Cana Coaunera Quiricha cuhane.

<sup>4</sup> Chunocoha amihaneein nihane jana, rai coreteraa nii rai namihaneeon, coatiha que nirijieein joaereein coreniha belaiha rai tihei nii coretera. Nii rai namihaneeon coretihane jaante, nii namihaneeon cainaeraniha rai tenojoi ne.

<sup>5</sup> Nete laen Cana Coauneraacha que jaeequiin neein esenetaera, nii esenetaaneecha coreniha osa caje colunohineein nenea raane rijijieein tein rae Cana Coaunera, niicha ichai coreniha rai cha chaain neuruhane que airijiin.

<sup>6</sup> Nitohaneein osaaocane nihanatiin, esenetaain niha cachane, osa caje coulunohineein nenea neein tein raa Cana Coaunerane quete:

<sup>7</sup> “Rachoojoeinte neeure,  
baaso ichajein osa que nesarucuruhane nihanatiin,  
osa caje coulunohineein  
nenaaneein tein  
Cana Coauneraacha ranojoinunri.

<sup>8</sup> Rachoojoeinte ne,  
nii nichotenaacha,  
rai nosa coreniha  
casetecaenerichaaain Cana Coaunerane jaun,”  
naain niha erenaane rijitoein aitelu cana inoaensi Rabiri amure.

<sup>9</sup> Rai jaberoco macohi cari saerateeurera *circuncidadocuru* raaicha aitenihanena, nirijieein rai jaberoco cari saeratelanaala nenacaauru raine maajein niritiin niha nii erena. Inae acaihaniji que esenetaaneecha coreniha osa caje coulunohineein nenea raane rijijieein tein Abaraaun raa Cana Coaunerane coitucuhacache raotojoein.

<sup>10</sup> Chatohaneein niha Abaraaunne jana osa caje coulunohineein nenea raane rijijieein raelu Cana Coaunera. Inae rai jaberoco macohi cari saerateein nihane janana osa caje colunohineein nenaaneein tein raalu Cana Coaunera. Coatiha aihei. Jaiti rai jaberoco macohi cari saeratenihane janate raelu Cana Coaunera.

<sup>11</sup> Inae nitohaneein osa caje colunohineein nenea raane rijijieein teein raa Cana Coaunerane baihate laen, nii cojunacanu que rai jaberoco macohi cari saeratelu Abaraaun. Nitohanihane jaunte, satiin rai jaberoco macohi cari saeratelanaala neein, osa caje colunohineein nenea rijijieein neeururichaaaine esenetaeraauru netonai inacaneein ne nii Abaraaun. Nii rijijieein techu, nii esenetaauruhane coreniha osa caje coulunohineein nenea raane rijijieein ranajae Cana Coaunera.

<sup>12</sup> Jerichanejeein techu, jaiti rai jaberoco macohi cari saerateein nelanaala, esenetaalu Abaraaunne rijijieein neein esenetaeraauru cachaauru inacaneein ne nii Abaraaun. Nii rijijieein techu, jaberoco macohi cari saerateein neein, nii aihalune rijijieein esenetaeraauru netonai inacaneein ne nii Abaraaun.

*Esenetaacachene aina cuaainte, cana rai naitoonjoa tereein Cana Coaunera.*

<sup>13</sup> Cana Coaunerate Abaraaun rai aitelu, rai nefoerateeuru aina nirijieein core colane acaauru rai chauratane tihane, neroraneein neeruhane coina. Coatiha, Moisesa rai rauhi tonoraain niha Abaraaunne jaun, nii rai chauratane tihane coina aitohilu Cana Coaunera. Nechu esenetaane jaunte, nii rai chauratane tihane coina aitiin, osa caje coulunohineein nenea raane rijijieein teein raelu.

<sup>14</sup> Nii rauhi tonoraeraauru, nii Cana Coauneracha tenaa jerei raeranuneein neeuruhane jana nihane, coatiha chaque nelateein nerihei nii canaacha esenetai. Inacojoeinte esenatarichaaache, nii tihane coina aitohalu Cana Coaunerane jaan nihanatiin cana raineein nerihei.

<sup>15</sup> Nii rauhite cha ujuaihoneein caseteco coaracaachene coina nenaaneein ne. Nii niha rauhine colane nerihei cha ujuaihoneein caseteco coaraane rai nei.

<sup>16</sup> Nii jaunte satiin nii rai nefoerateeuru aina Abaraaun rai niicha teeni tiha core colane esenetaauruhane aina cuaaine coina aitelu Cana Coaunera. Aihane jaun, coatiha nii rauhi tonoraeraauru raaicha nii tihane coina aitohilu Cana Coaunera. Acate esenetaalu Abaraaunne rijijieein, satiin esenetaeraauru raineein nenea ne. Nitohaneein esenetaane jaunte, satiin cana inacaneein ne Abaraaun.

<sup>17</sup> Rai Quiricha Inoainsi cuhane: “Canune, arajii lauri lauri nenacaauru cachaauru inacaneein ii tereeunni” naain rai aitohalu Cana Coaunerane rijijieeinte, nii Abaraauncha esenetai Cana Coaunera, onacaauru rai ichaonaa teein, jaiti coaunanoinelanaala nenea, naaonjoainuri Coauneranein nenea ne.

<sup>18</sup> Inae calaohirichaaaine esenetaeniha Abaraaunne janate: “Arajii lauri lauri nenacaauru cachaauru inacaneeinte neriquincha” naa rai Cana Coaunerane

esenetaain acaacha cohajihane jaunte, acaauru inacaneein ne Abaraaun, “Caa jeeonihate cuurureein ii nefoerateeurura” naain que arasijie coarateein rai aitohalu Cana Coaunerane rijjijeein.

<sup>19</sup> Inae lefasha jaanacaneelalajeein ichaohane jaun, inae rai comasai Sara aina jiniiquiin biinaaneein, leinjiiniji canaanai sirilanaala ooruhane rai neeuru saijieeinte, nii rai aitoha Cana Coaunerane esenetaane jianenelu Abaraaun.

<sup>20-21</sup> Nitohaneeinte, esenetaane jianena coacuelanaala, jelai amuritoheriin esinae rauhijiriin nii rai naitoonjoan ichar-ihani Cana Coaunerane esenetaane jaun, Cana Coaunera corojeein, acaacha cohajeein nelu Abaraaun.

<sup>22</sup> Nitohaneein esenetaane jaunte, osa caje coulucohin raelu Cana Coaunera.

<sup>23</sup> Coatiha nii esenetaa Abaraaunne jaun, leinjiin acaacha raane caina aitiin laenaeratiheilu Cana Coaunera,

<sup>24-25</sup> cana netonai quete aitiin laenaeratelu. Nii jaunte, cana netonai esenetaacachene jaun, cana colucohin cana netonai rae Cana Coaunera. Satiin cana osa coreniha cana coreenraniha ohalu. Cana osa ujuihoneein nena caje cana mitaeranu que Cana Curuanaa Jesocurisitone esenetaacachene jaunte, cana netonai rae Cana Coaunera.

## 5

### *Inae cha ujuaihoneein nihaacache.*

<sup>1</sup> Aihane jaunte, esenetaacachene coreniha Jesocurisito aina cuaain inae cha ujuaihonelanaala Cana Coaunera aina raotojoeein nihacache.

<sup>2</sup> Nii Jesocurisito esenetaacachene aina cuaainte, cana coroatajane Cana Coaunera. Nii ainate cana suujua letono ichana coacuelanaala rachoojihacache, rai Cojoanona que nerichaacheeinne cohajeein.

<sup>3</sup> Coatiha acaacha nihei. Nii rijjijeein techu, necairichanaa coaracaachene nihanatiin rachoojoein nihacache, nii necairichanaa aina cuaain jelai amuritoheriin laraajiin itolere abaantain nihacachene coitucuhacachene jaun.

<sup>4</sup> Nii necairichanaa abaantain laraajiin nenaate, inae esinae rauhijiriin ijiin neein canaacha cohajei cohana nainerichaacheein.

<sup>5</sup> Nii canaacha cojoai coatiha inacojoein cohahaacache, rai Suujue cana rai niicha tei aina cuaain jataain cana belaiha Cana Coaunerane jaan nihane jaun.

<sup>6</sup> Nitohaneeinte, cana osa caje nichotena nainelanaala nihacachene jana, inae cojoinaca que turuhane jana, cana baaso icharanichaachene coreenraniha ohelu Jesocurisito.

<sup>7</sup> Coatiha nerihei chuni, leecha cacha baaso ichara coreenraniha nesohin nijioaenrateein nei. Niheichu caohacha ichara cacha coreenraniha nihanatiin nesohin nijioaeratenaa nainihei chuni. Coaraain aihane nihane chachu jerihane, leinjiin caohacha ichara cacha coreenraniha nesohin nijioaenratere chuni.

<sup>8</sup> Nete jataain cana belaitohane coaratiha, cana osa coreniha oha rai Calaohi Jesocurisitone coina letoaelu Cana Coaunera.

<sup>9</sup> Inae nitohaneein cana osa coreniha ohalu Jesocurisitone jaun, inae cha ujuaihonselanaala nihacachene jaunte, nii amuritoheriin aina cuaain caseteco caje nichoterichaacheein.

<sup>10</sup> Nitohaneein jaiti que nejeratenaaneein nihacachene jana ohalu rai Calaohine aina cuaain, aina raotojoein jiniiquiin nihacachene coina ichaalune jaun techu, nii amuritoheriin cana ichoteratereein Cana Coaunera, inae cana que suujua acatihane jaun.

<sup>11</sup> Coatiha niicha nijihe. Rai Calaohi Jesocurisito aina cuaainte, Cana Coaunera coroaecaache. Nii Curisito, Cana Coaunera que nejeratenaaneein nihacachene caje, aina jiniiquiin raotojoein cana teraneein nenea nihane jaun.

### *Adaan aina Jesocurisito*

<sup>12</sup> Nii rijijieein techu, leinjiin cacha caje nunuheteein caa chauratane que turuhin nelu osa, cacha itajeranu que. Nii cacha itajeranu onaate satiin cachaauru lomohelu, osa que nesarucuruha satiine jaun.

<sup>13</sup> Nitohaneeinte jaiti neniha Moisesa rai rauhine jana, inae nii ajiniha nesilu chauratane que osa. Coatiha niqui coitucueraailu nii osa, jaiti neniha nii rauhine jaun.

<sup>14</sup> Nii jaunte nihalu Adaane caje coaaneein nihalu Moisesane que tiaaajoaain osa que nesarucuruhane jaun, ohin nitaje rai neeurelu satiin cachaauru. Coatiha niqui, leinjiin rauhi tonoraain neeurenihane coreniha osa que nesaruhin neeuruhilu aiha Adaane rijijieein. Charijieein teeinti, nii jaurianejeein nenea Adaan- jauriaanejeein osa raain nelu, nii rijijieein techu, nii Adaan amurijiriin nenea canaacha cohajei- leinjiin cacha ichaonaa turuaain nelu.

<sup>15</sup> Nete nii Adaancha ichai nii chaque nelateein nedae ne, amurijiriin jataain nelatiha nii cana belaiha cana rai Cana Coauneraacha teine jaun. Nitohaneeinte baaso ichaa leinjiin cachane coreniha, satiin osa que nesaruhin nitajenaaneein neeurelu satiin cachaauru niqui. Nete core colane cana belaiha cana rai leinjiin Jesocurisito aina cuaain Cana Coaunera tenojoi, nii amurijiriin nelateein, satiin cachaauru rai caohacha ichaeraneein ne.

16 Nii naosatiha leinjiin Adaane jaan, coatiha chaque nelateein nedaai, nii cana belaiha Cana Coaunerane jaan aina cuaain. Nii jaunte niqui, leinjiin cacha osa coreniha, satiin caseteco coaracuruhane rai neeurelu cachaauru. Nete nii cana rai niicha tei aina cuaain, nosa que namuritiin niha cachane nihanatiin, inae nii ujuaihonneein neureniha cachaaaurune coina aitelu Cana Coaunera.

17 Nitohaneein leinjiin cacha coreniha, cachaauru que niicha ichana nainei ichaain satiin cachaauru itajiha nii on-aane jaunte, nii amurijiriin niicha ichana nainei ichacurureein, jataain acaauru belaitohane jaun, Jesocurisito aina cuaain enachasine ichaonaa que ichaohin neuruha nii core colane osa caje Cana Coaunera roconojoinunru cachaaaurune coina.

18 Charijieein teeinti, osa que nesaruha Adaane coreniha satiin cachaauru caseteco coaracuruhane rai neeurelu. Nii rijijieein techu, caseteco coaracuruhane rai neuruha cachaaaurune jana, niicha ichai aina cuaain, jianacoon osa caje cacha rocoheranu ichaonaa uhaain turuhelu Jesocurisito.

19 Nitohaneeinte erenaa tonorae niha Adaaneecha coreniha arajii cachaauru osa que nesarucurelu. Nii rijijieein techu, erenaa tonoraain niha leinjiin cachane coreniha, jianacoon neurureein cha ujuaihonelanaala arajii cachaauru.

20 Moisesa rai rauhite niqui, osa que nesaruhane coitucuhin janiha cachane coina nenaanelu. Nete nii saijieein aina jelai amuritoheriin osa que namuritocurelu cachaauru. Nete nitohaneein jataain osa que namuritocuruha cachaaaurune jana, jeelai amuritoheriin jataain cachaauru belaitohane coarate cana que Cana Coaunera.

21 Charijieein teeinti cachaauru lomohin ne osa, cachaauru atinaain itajihane coina. Nii rijijieein techu itolereneein cachaauru lomoritin ne, nii osa caje cacha mitaeranu que cacha belaitohane jaan Jesocurisito aina cuaain ichaonaa satonohelanaala nenea Cana Coaunera tenojoin.

## 6

*Osa coreniha onaaneein nihacachene nihanatiinte, Jesocurisito coreniha ichaorichaacheein.*

1 Aihane jaun chajana icharihacache. Osa que nesarujueeinna ichaorichaache, jelai amuritoheriin cana belaiha Cana Coaunerane coina.

2 Aihei jerihane. Inasiina inae osa jianeein ichaonaa saijieein, nacohauneein osa que nesarujueein ichaorichaache.



<sup>3</sup> Tana inae cana baotisaauruhane aina cuaain, aina jiniiquiin o caje ichanaalu Jesocurisitone rijijieein inae niha-cachene coitucuhichene.

<sup>4</sup> Nitohaneeinte Jesocurisito aina jiniiquiin cana jaberoco conauteraneein ne cana baotisaauruhane jaan. Aina ohin, nii o caje ichatihalu, jataain itolere niicha ichana nainei ichaain Cana Coaunerane rijijieein, cana netonai nii onaa rijijieein nenea caje enachasine ichaonaa que ichaohacachene coina.

<sup>5</sup> Aihane jaun inae aina jiniiquiin onaa rijijieein nihacachene jaunte, o caje ichanaain nihalune rijijieein cana netonai aina jiniiquiin cana o caje ichanaain nerichaacheein.

<sup>6</sup> Nii jauriaanejeein cana ichao que ichaohacachelune jaante, inae Jesocurisito aina jiniiquiin coroso que tenojoneein itajenojoi nelu. Nii cana ichao rijijieein ichaohin naosatenaanaja itajenojoneein nihane jaun, inae nainiheii cana saruha osane rijitoejeiin nacoauneein neosatihajeiin nihacachene.

<sup>7</sup> Leinjiin cacha inae ohane, inae nacoauneein naosatena nainiheii.

<sup>8</sup> Nii rijijieein techu inae Jesocurisito aina onaaneein cana jaberoco tihacachelune jaun, aina jiniiquiin ichaorichaacheeine cohajihacache.

<sup>9</sup> Chaen techu, inae onaa caje ichanaalune jaun inae nacoauneein ohenerihani Jesocurisitone coitucuhacache, inae aina chachana naineniha onaane jaun.

<sup>10</sup> Nii ohalu Jesocurisitonete, osa itajeranu que lesajeeincha ailu, inae chabana nacoauneein ohenihane coina. Nete laen inae enene, Cana Coaunera rai ichaonaa que ichoae.

<sup>11</sup> Nii rijijieein techu, inara netonai osa coreniha onaaneein inara jaberoco teein, Cana Coaunera rai ichaonaa que Jesocurisito aina jiniiquiin ichaohichene caohachae.

<sup>12</sup> Aihane jaun jiaonriha nenacaeneein inara jaberoco ohane rai nenea amuritonaa jeriha osane rijitoejeiin, inara jaberocohacha jerei ichaain neechene.

<sup>13</sup> Jiaonriha inara jaberoco aina cuaain niicha jerei baaso ichaa osane coina, rai inara jaberoco teein neechene. Nitohaneein nenea coacuelanaala, ohin caje ichanaain ainaa rijijieein, Cana Coaunera rai inara jaberoco teeuchete, coujuriu Cana Coaunera rai caohacha ichaeraneein neeiche.

<sup>14</sup> Nitohaneein neechene, coatiha inae inara amuritonaa nainerinaain osa, inae Moisesa rai rauhi aina nelanaala, inara belaiha Cana Coaunerane jaancha aina neechene jaun.

### *Jaiti osa aina ichaonaa bana*

<sup>15</sup> Nitohanihane jaun chatohanerihacache. Inae Moisesa rai rauhi aina nelanaala, cana belaiha Cana Coaunerane jaan

aina nenea jaunna, osa que naosatihajeein ichaorichaache. Coatiha aihei. Nainihei nitohaneein ichaohacachene.

<sup>16</sup> Inarate raotojoein leinjiin fatoroon letononeein rai ni-icha jerei ichaquichene coina aina cuhin neeichene, leinjiin acaacha letononeein rai nere tonoraain neeichene coitucuhiche. Nii rijijieein osa letononeein nenea jeriquichenete, ohin nitajeeichene rai neriquicheein. Jana Cana Coaunera esenetaain, Aca jerihane rijijieein neeichene coina ichohichenete, rauhijiriin ichaonaa esine que ichaoriquicheein.

<sup>17</sup> Nete jataain caohacha ichae Cana Coaunera, inae inara jauriaa osaacha sacurejetocoichene jianein, inae inara suujua aina cuaritaain inara relaacaanune jaan tonoraain acaacha esenetaain neeichene jaun.

<sup>18</sup> Nitohaneeinte osa letononeein neeichene caje, inae jianacoon neein rauhijiriin ichaonaa esine que ichaonaa tera letononeein ichaohichene coina neeiche.

<sup>19</sup> Aitoha joareein cachane rijitoeine caa inara rai beebjeeun, jaiti joareein cacha rijijieein neeichene jaun coitucunaa nainesineeichene coataa. Charijieein teeinti inara jaberoco teeichelu nii baaso icharaneein nenea rai, aina cuaain baaso ichaane coina, nii rijijieein chu nii inara jaberoco teeuche nii caohacha ichaera rai, aina cuaain caohacha ichaane coina.

<sup>20</sup> Jaiti osa letononeein neeichene bana, coatiha nii rauhijiriin ichaonaa esine rai cha chaeranein ichaohieichelu.

<sup>21</sup> Nete inara ichao rai caohachanu erunaa naineneeichulune jaun, ohin nitajeeichene coinaacha inara sarueranihalu nii baasone jaun, inae enene taolu inara ichao coejeein ichaohiche.

<sup>22</sup> Nete laen inae enene, inae nii inara osa letononeein neeichene caje jianacoon neein, jeriha Cana Coaunerane rijijieein inaraacha ichai ichaain neeichene coina jatoroain neeiche. Niite laen jataain inara caohachanu que ichaquiche, Cana Coaunera que banijiaain nenea ichaonaa que ichaoha aaichene jaun, chabana satonoelanaala nenea ichaonaa rariquicheein.

<sup>23</sup> Nii inara osa inaraacha sacuhite, nechuh inara rai onaa teein, inara itajeranu que nelu. Nete laen, nii ena inara belaiha Cana Coaunera tenojohin, ichaonaa sanaacharanejeein cana Curuanaa Jesocurisito aina jiniiquiin ichaohichene teranein nereein.

## 7

*Inae nisirihateein nihane aiha cachane rijijiei que erenaa*

<sup>1</sup> Canejeraauru, inarate raotojoein Moisesa rai rauhi coitucuhin neeiche. Nii jaunte nii rauhi, jaiti ichaoha

cachane tonohanau rai nelatejeeane coitucuhiche raotojoein.

<sup>2</sup> Coaracuche nachuhinti, nii rauhi, leinjiin ene nisirihateein nihane, oha nii lanane reeintiaajeein ainaacha ichaohane coina aitothane. Nete inae oha nii lanane, inae nii rauhi lanaacha aina ichaohane coina aitothane caje jianacoo ne nii ene.

<sup>3</sup> Nitohanihane jaunte niqui, jaiti ichaoha rai lanane tonohanau, leecha quicha aina niicha jerei ichaane, osa que nesarurichaaanne que aite nii rauhi. Nete inae oha nii lanane, inae leecha quicha raane nihanatiin osa que nesaruha aihane que aitene nii rauhi.

<sup>4</sup> Nii rijijieein techu inara netonai inae Jesocurisito o aina cuaain rauhi caje nichoteeichene jaun, inae inara aina chachana nainene nii rauhi. Nitohaneeinte inae nii o caje ichanaai nena Jesocurisito raineen neeiche. Inae nitohanihane jaunte, jataain Cana Coaunera notaracae rai jataain nelateinneein ne cana ichao.

<sup>5</sup> Jaiti joaereein cacha rijijieein naosatihajeein ichaohacachene banate, cana jaberoco aina cuaain baaso coacuhi baasohacha ichajeein nihacachene jaun, inae ohin nitajihacachene rai nihacachene coaratiha cana quene coinaacha nelateein nelu Moisesa rai rauhi.

<sup>6</sup> Nete laen inae ena aitoha rauhine tonoraain naitoonjoaacha ichajeein nihacachene itajeein jianichaache. Inae colane jianacoon neein, Cana Coauneraacha jerei ichajeein, rai Suujue tenojoi ichaonaa que ichaohacache, raujiaain inoaelu rauhi laenanohineein nena tonoraain ichaohacachene jianein.

*Moisesa rai rauhi colane osa coitucuhaacache.*

<sup>7</sup> Nitohanihane jaunna osa que cana saruhane coina nihalu rauhine que aitorichaache. Aihei, coatiha osa que cana saruhi Moisesa rai rauhi. Nihalu nii rauhine colane, coatiha “Naaonjoaite osa ne” naain coitucurihaanulu. Niheichu: “Jionriha chamute cachacha sirii jereein coaraain que necoelaaine,” naain biha nii rauhine colane, coatiha chabana nii coitucurihaanulu.

<sup>8</sup> Nete nii rauhi aina cuaain nelararajiaain, nechu itolere baaso coacuhin aca jerihane rijijieein ichacaaunne coina canu sarue nii osa. Nii rauhi colane nerihei naosateein nihane coitucuhin nei.

<sup>9</sup> Nii jaunna jaiti neniha rauhine jana, “Caohachaaanne ichaon,” narejetoonlu. Nete, inae niha nii rauhine aina cuaain canu ichao coaracaaunne jana, ohin nitajenaaneein niha canu ichaone coitucuunlu.

10-11 Nitohaneeinte, canu rai ichaonaa telanaala, ohin nitajihanune coina, cacha itajera rai canu te osa, nii rauhi aina cuaain nelararajiaain canu coritaaain canu itajihane coina.

12 Nii inara rai aitocoaaunne rijijieeinte, nii rauhi leinjiin acaneein ne. Chaen nii rauhi naitoonjoante casajenelanaala jataain caohachaneein nena ne.

13 Nitohanihane jaunna, nii caohacha ichara canu ichao itajeriha. Coatiha aihei. Nii osa te, esinae rauhijiriin osa nihane coaratihana canu quene coina caohachaneein nena rauhi aina cuaain canu atinaain canu itajelu. Nitohaneeinte jataain banejelanaala baasoniha naosatenaane coitucuerate canu que nii rauhi.

14 Raotojoeinte Cana Coaunera tenojoinnein niha niicha tei rauhine coitucuhacache niqiu, nete canu jaberoco, osa letononeein nihanune jaun, itolere bana baaso ichaaun.

15 Chanuchaainti nitohaneein neun. Coatiha canuhacha ichai coitucuhin ichahaaun. Nena laen, enaacha canuhacha ichana nainihe i chaaun.

16 Nii canuhacha ichana jerihe i chacaaunnena laen, aina cuaain jataain caohacha icharaniha nii rauhine coitucureeun.

17 Nitohanihane coatiha canu raajenihane ichahaaun, canu jaberoco cuhane nena osate nii ichae.

18 Nii joaenreein cacha rijijieein osaaotohanune jaunte, canu jaberoco cuhane neniha caohachane jaun, caohacha ichana jerichaaunne nihanatiin ichana nainesineeun.

19 Nii jaunne caohacha canuhacha ichana jerei ichaelanaala, baaso canuhacha ichana jerihe i chaaun.

20 Nitohaneein canuhacha ichana jerihe i chacaaunne, coatiha canu inae nii ichahaaun. Nii osa canu suujueniha nenaate ichae.

21 Nii ainane caohacha ichana jerichaaunne nihanatiin, itolere bana baaso nejesinaacha ichacaaunne que inae naihaaun.

22 Canu suujua cuhanena niqiu Cana Coaunera rai nii rauhi rautatoon.

23 Nete canu suujua cuhane ne canu rai caohacha coaacaaunne caohatera. Acate nii osa rai rauhinee in canu suujua cuhane ne in baaso ichacaaunne coina canu suujua sarueranee in ne.

24 Cairichaaajoaanu nohane. Chajana nohane, nii canu suujua siriha onaane caje, jelai caje canu suujua rocore.

25 Cana Coaunera canuhacha corojaite, rai Calaohi Jesocurisito aina cuaain nainere, nii caje canu rocohin nihane. Nete jaiti joaere in cacha rijijieein nihanune jaun, jaiti canu rohecae osa. Inae satononejeeine Cana Coaunera rai rauhi tonoraain nihanune coina aitoon.

## 8

*Jeriha Cana Coaunera Suujuene rijijieein ichaohacachene*

<sup>1</sup> Nitohanihane jaun coatiha inae caseteconein neeururi-naain leinjiinniji Jesocurisito cachanein Aca jerihane rijijieein aina ichaonacaauru.

<sup>2</sup> Nitohaneeinte Cana Coaunera Suujue rai rauhi, Jesocurisito aina cuaain cana rai ichaonaa tera, cana atinaain cana itajihane rai niha osa rai rauhine caje cana rocoeranein ne.

<sup>3</sup> Rai nichaohacha sacuhin satiin osaaotooruha cachaaurune jaun acaauru aina cha ichana naineniha Moisesa rai Cana Coaunera tenojoin rauhine janate, Cana Coaunera laen nii Moisesa rai rauhicha ichana nainesiheilu ichaelu. Nii icharaanu quete leinjiin cacha rijijieein nenea rai Calaohi letoaain nelu Cana Coaunera. Nitohaneeinte turuhin joenreein cacha osaaona rijijieein, satiin cana osa amuritiin coreniha ohelu cana amute cacha rijijieein Jesocurisito.

<sup>4</sup> Nitohaneeinte ichaelu Cana Coaunera, satiin cana nii aitoha rauhine rijijieein tonoraain nihacachene, joareein cacha rijijieein naosatihajeein ichaohacachene jianein, jeriha rai Suujuene rijijieein ichaonaa caina.

<sup>5</sup> Joareein cacha osaaona rijijieein ichaonacaauru cachaaurute, joareein suujua letonohacha ichajeein queecha coacuhin ichaaore. Nete laen jeriha Cana Coaunera Suujuene rijijieein ichaonacaauru, Cana Coaunera Suujue jerenohicha que coacuhin ichaaore.

<sup>6</sup> Nechu jeriha cana suujuane rijijieein coaaucaanete, ohin nitajihacane caina aihaca. Nete jeriha Cana Coaunera Suujuene rijijieein coaaucaane laen, jataain raotojoein ichaonaanaja que ichaohacane caina aihacache.

<sup>7</sup> Nii jeriha suujuane rijijieein coacuhin ichaonacaauru cachaaurute, Cana Coaunera que nejeratenaanein ichaaore, jeriha rai Suujuene rijijieein nenea jerelanaala, niheichu tonorana jerecurenihane jaun.

<sup>8</sup> Nii jaun jeriha osane rijijieein coacuhin ichaonacaauru cachaaurute, Cana Coauneraacha jerei ichana nainecurene.

<sup>9</sup> Nete laen inara, nitohaneein coacuhin ichoaelanaala, inae jeriha Cana Coaunera Suujuene rijijieein coacuhin ichaohiche. Aihachu esinae rauhijiriin inara suujueniha niha Cana Coaunera Suujuene. Suujueniha Jesocurisito Suujue sirilanaala nenea cacha, coatiha Jesocurisito cachanihei.

<sup>10</sup> Nete inara suujueniha niha Jesocurisito Suujuene, inara rai ichaonaa tiha aicheein Cana Coaunera, inara osa coreniha inae ohin nitajeeichene rai neeichene jana, nii caje inara ichoterateein nihalune jaun.

<sup>11</sup> Nitohaneein inara suujueniha ichaoha nii o caje Jesocurisito ichateralu Cana Coaunera Suujuenete, nii jeelai Jesocurisito ichateralu ohin nitajeeichene rai neeichene caje inara ichateein inara rai ena nenea ichaonaa tereein nii Cana Coaunera Suujue inara suujueniha nenea.

<sup>12</sup> Aihane jaun coatiha cana letoaa cana suujuane rijijieein, leeochoaauru osaaonaneein nenacaauru cachaauru ichao rijijieein ichaohacachene coina letononeein nihaacacheta canejeraauru.

<sup>13</sup> Nitohaneein osaaona cacha rijijieein coacuhin ichaohichenete, ohichene bana nitajeriquicheein. Nete laen Cana Coaunera Suujue aina cuaain, nii baaso inaraacha coacuhi baaso itajeeichene, nitajenaacharanejeein nenea ichaonaa que ichaoriqicheein.

<sup>14</sup> Jeriha Cana Coaunera Suujuene rijijieein naitoonjoa ichajeein ichaonacaaaurute, satiin Cana Coaunera calaohineein neure.

<sup>15</sup> Nii Cana Coaunera Suujue inaraacha ranojoin coatiha coasinacai nihei, osa rene coaiten cacha amaeranenihaane jaun. Acate esinae rauhijiriin Cana Coaunera Suujueneein rai calaohineein inara terane. Nii rai Suujue canaacha rai aina cuaainte, Cana Coaunera coaaucaachene nainein, "Ofa" naain coaaucaache.

<sup>16</sup> Nii jeelai Cana Coaunera Suujuete, cana suujue aina jiniiquiin ne, inae Cana Coaunera calaohineein nihacachene bihacachene coina.

<sup>17</sup> Nitohaneein rai calaohineein nihacachene jaunte, nii cana que niicha banihatei naitoonjoalu raeranein nerichaacheein. Niite Jesocurisito aina jiniiquiin rarichaacheein, esinae rauhijiriin rai Cojoanonaa que nihacachene coreniha necairichaacachene.

### *Rai Cojoanonaa que turuhenu*

<sup>18</sup> Coatihane cha nihei, cau caa ena necairichaaecaachene jaan, cana rai caa baiha rai necaohacha niicha teeni aina teein coaracaane.

<sup>19</sup> Itolere Cana Coaunera coaunanojoinurute, coitucueratenojoinecuruha Cana Coaunera calaohineein nenacaarune que turuhane luhecaain cohaje.

<sup>20-21</sup> Nitohanihalu cana necooauna, coaunanojoneein nihalune baiha cojiotanohineein nihalune jaun. Coatihane sujua caje coauneein aca jerihane jaun nitohaneein niheilu. Cana Coaunera nitohaneein ichaane jaunte ailu. Nete osa que nesaruhin necairichanaa tabai que ichaohane caje

mitanojoinerichaaine cohaje itolere bana, jataain necaohachaaain jianacoon tenojoinecuruha Cana Coaunera calaohineein nenacaurune que nenea nainiha acaentonaine coina.

<sup>22</sup> Nitohaneeinte necairichaa canaanai cuna aina nebane rijijieein, enanetojoein necairichaaeca nii Cana Coaunera coaananojohne coitucuhacache.

<sup>23</sup> Coatiha acaacha necairichai. Cana rai niicha teeni ajinchateranu que, rai Suujue tiha cana rai Cana Coaunerane saijieeinte, cananetonai necairichaacache. Nitohaneeinte, Cana jaberoco netonai jataain mainajeein necairichae, inae rai calaohineein cana raain, ena nenea cana jaberoco tiha Cana Coaunerane que turuhane cohajein.

<sup>24</sup> Nii canaacha cohajei corenihate, ichoteratenojohineein nihacache. Inae nii canaacha cohajei coaracaachene jananihane, coatiha inae coharihaacache.

<sup>25</sup> Nete nii Canaacha cohajei coaraenihacache jaitine jaun, itolere bana cana suujua corelanaala neein cohacaachene caohachae.

<sup>26</sup> Nii rijijieein techu, necairichaacachene nihanatiin, nii cana necairichanaja que cana coroatajane Cana Coaunera Suujue. Cana Coaunera bajaacachene nihanatiin, coatiha inaain bajahaacache. Nete nii rai Suujue cana rai niicha tei, cana rai Cana Coaunera bajaee, canaacha coitucuhi erenaa cuhane cuaain.

<sup>27</sup> Nete itolere cachauru suujua coitucueraneein nihane jaun, caje nii rai Suujue bajanojoi coitucue Cana Coaunera, nii Cana Coaunera jerihane rijijieein niicha ichaneni bajanaa jerecuruha cachaurune rijijieein bajaane jaun.

*Itolere laraajiha nocoetonacauru amuritoeraneeinte nihacache.*

<sup>28</sup> Chaentechu rai cachaneein belaichaneein nenacauru rai, inae nitohaneein ichaane coina coausihalune rijijieein, itolere caohacha icharaneein niha Cana Coaunerane coitucuhacache.

<sup>29</sup> Inae nii ajiniha caje coauneein niicha coitucuurite, rai nejeraneein tein raelu rai calaohi Jesocurisito, tabaauru rai nocoalanein, tabaauru bainein, naaonjoaain neeuruhane jana, Aca acaauru inananeein nihane coina.

<sup>30</sup> Nii nunuhe caje coauneein niicha ranojoneein neenihurune maajeente cotijiaain, niicha ichai ujuaihoneein neeuruhane caje jianacoon mitanajaain rai Cojoanonaa que neeuruhane coina tenajaen.

<sup>31</sup> Tonarihacache jana nii que. Nitohaneein cana cocoaeratera neein niha Cana Coaunerane jaun, nerinaain chuni cana inasina nainera.

<sup>32</sup> Cana coreniha oha rai Calaohine coina Cana caje chunaelanaala teein nihalune jaunte, nii amurijiriin rai Calaohi rai niicha teeni tereein, Calaohi aina jiniiquii raacachene coina.

<sup>33</sup> Nii jaun nerinaain chuni Cana Coauneraacha janijiin niicha ranojoinunru colurujuenaa nainera, Cana Coaunera inae cha ujuaihonnein neurenihane que aitiin jianacoon tenajaane jaun.

<sup>34</sup> Chajana acaauru casetecareein. Jesocurisitote cana coreniha ohin, nii caje ichanaain ena Cana Coaunera raotono nichajai que neein, cana coreniha bajaebajaje.

<sup>35</sup> Cha cana belaitoha Jesocurisitone jaan caje cana rocohin nere. Necairichanaa, caaintati ichaonaa que ichaohin, arinojoneein, mijitena, cajione que latejiojiriin, onaa coasina, naaonjoaihunrina cana belaitoa Jesocurisitone jaan caje cana rocohin nerihane.

<sup>36</sup> Nii quete:

“Ti corenihane saatiin ohacaanune coina jatoroaain nihaacaanu.

Carenero sooruhane coina soera rene amauruhane rijijieinte canacaanu teure,”

naain ne laenanohineein Cana Coaunera Quiricha cuhane.

<sup>37</sup> Nete nitohanihane saijieein, nii cana belaitora aina cuaain, itolereenein nii cana amuritora amuritiin nihacache.

<sup>38-39</sup> Nii jaunna nenerihani nii cana belaitoha Cana Coaunerane jaan caje, cana rocoerane esenetaaun. Onaa, ichaonaa, aanjeraauru, moconajaera letonocuru, ena nena, cabaiha neenihu, dede, chauratane, leeochoauru Cana Coaunera coaunanojoneein nenacaauru, naaonjoaihunri nainecururinaain, cana belaitoha Cana Coaunerane caje cana rocooruhane. Niite cana que coarateein coitucuerate Cana Coaunera, rai Calaohi cana Curuaanaa Jesocurisito aina cuaain.

## 9

### *Israelitacuru janijiinte raelu Cana Coaunera.*

<sup>1</sup> Jesocurisito esenetaeraneein nihanune jaunne, inara que asilanaala esinae rauhijiriin caa aitoon. Coatiha nohaniha aitoahaun. Nii ichoae tacaainte, Cana Coaunera Suujue coitucueratenojoneein, esinae rauhijiriin nohanelanaala aito-coaanne coitucue canu suujua.

<sup>2</sup> Jataaine itolere bana inaderaaun. Itolere banate jataain cunae casuujua.

<sup>3</sup> Canu arainein nenacaauru corenihane caseteconein nena jereeun, jelai teein Jesocurisito colane, nii coreniha nichotena nainecuruhane coina niqui.



<sup>4</sup> Acaaurute niqui Israeli nefoerateneein neeuruhane jaun, rai calaohineein nenea rijijieein neeuruhane coina ranajae Cana Coaunera. Aca techu rai necaohacha jana acaauru aina neein, acaauru rai tonoraain neeuruhane coina Moisesa rai rauhi teein, ita taojiaain corojeein neeuruhane coina aitiin, cana rai niicha teenine maajeein belu.

<sup>5</sup> Acaaurute cana foerateeurera inamaconeein neurelu. Acaauru caje nenaaneeinte cacha neein turuelu Mesihasi jeelai itolere Coauneranein nenea. Itolere bana acanidane coroaecuruhine satiin cachaauru. Nitohanemiin.

<sup>6</sup> Coatiha Israeli rai ichaane coina naitoonjoan aninoaa Cana Coaunerane jaun, nitohaneein caseteco coaracuruhane rai neeuruhi nii Israeli inamaconeein nenacaauru. Esinae rauhijiriin Israeli inamaconeein neureniha tabaaurune jaunte aihure.

<sup>7</sup> Niheichu, Abaraaun inamaconeein nenacaaru nihanatiin, coatiha Abaraaun inamaco esineneei neeuruhi tabaauru. Nii quete: “Ii inamaco esineneei neenihurute, Isacaacha caje nefoeratenaa neein neeurureein,” naain Abaraaun rai belu Cana Coaunera.

<sup>8</sup> Niite chuni Cana Coaunera calaohineein nenea naineniha nechu rai lauri coreniha cachane coitucuerate cana que. Nii cana rai niicha teeni bihane esenetaain coreniha rai calaohineein nenacaarute laen esinae rauhijiriin rai calaohi esine neein coitucunojineein neure.

<sup>9</sup> Nii coinat: “Enene rijiu nacoauneein turuhanune janate, inae canaanai siricheein ii comasai Sara,” naain Abaraaun rai niicha ichaneni belu Cana Coaunera.

<sup>10</sup> Nete acaachanejene. Coaracuche nachuhinti coroatajaain, Rebeca aina cana foeratera Isacaacha sirii rai calaohichuru, nii Isacaacha que inacaain neeuruhalu niquine.

<sup>11-13</sup> Nete jaiti nejanoa que telanaala, niheichu jaiti baaso aina caohacha ichaain neurenihane jana: “Rai inanate rai nocoala cachanein nereein,” naain acaauru neba Rebeca rai bialu Cana Coaunerane rijijieein neurelu. Nitohanerichaanne que techu: “Jacoboacha belaanne Esao cointereeni,” naain ne laenanohineein Cana Coaunera Quiricha cuhane. Nitohaneinte inae nunuhe caje coauneein coacuhin, chatohanei ichaa cachane nihanatiin, niicha ichai coitucuhi rijijieein, niicha janijiin raain nihane coina aitohalune nainaelu Cana Coaunera.

<sup>14</sup> Nitohanihane jaunna casajenetiin baaso icharaniha Cana Coaunera berichaache. Aihei. Coatiha niritiin erenaa nainihaacache.

<sup>15</sup> Nitohanihane coinat: “Canu suujua acatena jerichaanne jaan quena casuujua acatereenni.

Chaen nechu cairichaaajoaain canuhacha coana jerei,  
cairichaaajoaain coarareeunni,”

naain Moisesa rai belu Cana Coaunera.

<sup>16</sup> Aihane jaun raa Cana Coaunerane coina chatohanineein nena jeriha cachane nihanatiin coatiha cha que nelatihei, cairichaaajoaain niicha coaraaicha raa Cana Coaunerane jaun.

<sup>17</sup> Nitohanihane jaunte, Egipto curuaanaa rai: “Canune curuaanaaneein ii teeunlu, ii que canuhacha ichana nainei ichacaaunne, canunein nihanune coitucuuruha satiin chauratane sacutaain nenacaauru cachaaurune coina,” naalu Cana Coaunerane jaan, laenanohineein ne rai Quiricha Inoaensi cuhane.

<sup>18</sup> Nitohaneente cairichaaajoaain niicha coarana jerei cairichaaajoaain coarae Cana Coaunera. Jerichanejeein techu cairichaaajoaain niicha coarana jerihei coaraene cairichaaajoaain.

<sup>19</sup> Nete chunocoha nainere: “Nitohanihane cha corenihana jana cha ujuaihoneein cacha tere Cana Coaunera, niicha jerei ichaane jana, niha rai nii caohateein neine coalanaala,” naain bajaane.

<sup>20</sup> Chaneeina nereei ii, Cana Coauneraacha ichai que ereeine coina. Coaraaunachuhinti atane codarajoe jaera rai: “Chanuna catohaneein canu coaunaain neei,” naain jaera caje bajanaa naineriha.

<sup>21</sup> Nii atane caje darohe janaa inaerate, aca ichana jerihane rijijieein ichana naine. Nii jeelai atane cajete naine jataain rai nelateineein neeni, chaen raujiaain rai nelateneni, naaonjoaain ichana naine.

<sup>22</sup> Nechu cacha casetecana nainihane coitucuuruhane coinete, niicha ichana nainei coarateein, niicha casetecanohineein nitaje rai nenacaauru abaantaain cohanajae Cana Coaunera.

<sup>23</sup> Nii aina cuaainte cairichaaajoaain cana coaraane jaun, jataain rai necaohacha coitucuhin nihacachene coina, inae nii ajiniha cana rai rucuhesihalune jaun, cana netonai rai necaohacha sirichaneein nihacache.

<sup>24</sup> Nitohanihane jaunte tabaauru Jorioocuru caje, tabaauru Jorioniheichuru caje, naaonjoaain neinichaachene cotijiaain raain ne Cana Coaunera.

<sup>25</sup> Nii quete,

“Canu cachanelanaala nenacaaaurune,

inae canu cachaneein tein ranajareeunni.

Canuhacha belainohinelanaala nenacaaaurune,

inae canuhacha belaaineein tein

belaicheeunni.

<sup>26</sup> Jerichanejeein techu, taolu

‘Coatiha inara,  
 canu cacha niheeiche,’  
 naa Cana Coaunerane jaaun nenacaauru raite,  
 ‘Ichaonaa Cana Coaunera calaohineein neure,’  
 naaurureein,”  
 naain laenaclu rai Quiricha cuhane *profeta* Osiasi.

<sup>27</sup> Isaihasi netonai techu Isaraelitacuru que:

“Cucuana cuhane nenaacarene catuneji jeeoneeite niquni nefaaurureein Isaraelitacuru. Nete acaauru cautecuruhacha, coroatajajeein ichoteratenojineein neeurureein,  
<sup>28</sup> inae nii aitohalune rijijieein, satiin chauratane sacutaain naitoonjoa icharihani Cana Coaunerane jaun,”  
 naain belu Isaihasi.

<sup>29</sup> Nii ajiniha techu:

“Nirijieein cana foerateracuru coarajeein nihalu Cana Coaunerane colanete, aihalu Comora aina Sodoma cocoaichacurune rijijieein nerichaache,”  
 naain aitelu Isaihasi.

*Jorioocuru aina ena nena Cana Coaunera Ere*

<sup>30</sup> Tonarihacache jana nii que. Cana Coaunerate esenetaauruha Jorioniheichurune coreniha ichoteratenaajain nelu, nitohaneein nichoteeuruhane coacuelanaala neeuruhane jana.

<sup>31</sup> Nete laen Isaraelitacuru, Moisesa rai rauhi tonoraain nichotenaa coaucuruhane saijieein nainesihurene, nii aitoha rauhine jitariin tonorasihurenihane jaun.

<sup>32</sup> Chanuna nichotenaa nainecurene. Esenetaauruhane coreniha nichotenaa nainecuruhane esenetaelanaala, niicha ichai coreniha nichotenaa coaucuruhane jaun. Nii jaunte nii lacurocuruhane coina tenojoi ajeri que lacurocure.

<sup>33</sup> “Leeinjiin ajerine teeun Sioon. Nii ajeri quete lacuroha cuurureein cachaauru. Nii jaunte nii ajeri que jaaequiin nena jaoleneein nenereein,”  
 naain Jesoso que aitiin laenanohineein ne Cana Coaunera Quiricha cuhane.

## 10

<sup>1</sup> Canejeraauru, nichotena nainecuruha Israelitacurune coinane, acaauru que jataain coacuhin Cana Coaunera banajacoon.

<sup>2</sup> Jataainte niqui jeriha Cana Coaunerane rijijieein nena jerecure. Nete esinae rauhijiriin coitucuhin aihurenihane jaun nainecurene.

<sup>3</sup> Cacha ichoterateraneein niha Cana Coaunerane coitucuhin esenetaaurenihane jaunte, niicha letoai esenetana coacuelanaala, rai suujua letonohacha sacuure raajenihane nichotena coacuhin.

<sup>4</sup> Nii rauhi aitoonjoante nelatelu turuhalu Jesocurisitone que tiaajeein. Cajee coauneente laen nechu Jesocurisito queecha jaequiin esenetaauruhane coreniha niicha ichai ujuaihoneein neeuruhane cajee couluunojoneein neeure satiin esenetaeraauru.

<sup>5</sup> Nicha bei rauhi tonoraain nihane coreniha nichotena coacuhin nei raite: “Leinjiiniji cautijaelanaala caa rauhi tonoraain ichoai cachate, coreniha nichotereein,” naain laenaelu Moisesa.

<sup>6</sup> Nete laen nii esenetaauruhane coreniha couluunojoneein nihane coina aitiin, “Cha inicheein dedeeu, cajee Jesocurisito fauhane coina,” coa naain coaauache.

<sup>7</sup> Niheichu, “Cha onacaauru rene faureein ucuun Jesocurisito inaane coina,” coa naain coaauache.

<sup>8</sup> “Nii erenaate inae ii rohan neein ii suujua, ii ujuaae, naaonjoaainunri cuhane ne,” naain ne laenanohineein. Caa erenaate esenetaain nenacaauru rai beratenojoneein nena ne. Nii quene caa inara relaacaanu.

<sup>9</sup> Aihane jaun, cana Curuaanaa niha Jesocurisitone coitucuhin que ereerejeein, ii suujua aina cuaritaain o cajee ichatihu Cana Coaunerane esenetaainete nichoteriquiin.

<sup>10</sup> Nitohaneente, cana suujua aina cuaritaain esenetaain nihacache, couluunojoneein canaacha ichai ujuaihoneein nena cajee nichoteein nihacachene coina. Jana cana ujuaate Jesocurisito coitucuhin inae nichoterichaacheeinne jaan beraneein ne.

<sup>11</sup> Cana Coaunera Quiricha cuhanete: “Esinae rauhijiriin icharihanine esenetaain acaacha cohajeein nena, coatiha inacojoein airinaain,” naain ne laenanohineein.

<sup>12</sup> Coatiha nejelau cachaneein neuruhi Jorioocuru aina Jorioniheichuru, leinjiin Curuaanaa- satiin acaauru Curuaanaa neein- cajee acaauruhacha bajai teraneein nihane jaun.

<sup>13</sup> Nii coinane: “Cana Curuaanaa coitucuhin que ereerejeein ichaonacaaurute nichoteeurureein,” naain aitelu.

<sup>14</sup> Chasiina que ereereena nainecurure, coitucuhin esenetaauruhane coalanaala. Niheichu coitucuhin esenetana

nainecuruhi, que acaauru rai ereein nei aonacurenihane jaun. Niheichu aonana nainecuruhi neniha acaauru rai beratenojoi berane jaun.

<sup>15</sup> Chasiina nere acaauru rai bera, niha acaauru coroatajanein acaauru letoeranune coalanaala. “Jataainte caohate cana rene tururuha Ena nena ichaonaa tera Jesocurisito que erenaa turuaaurerane,” naain niha Cana Coanera Quiricha cuhanene rijijieein.

<sup>16</sup> Nete satiinelanaa tabaauruhacha, ichoteratenojieein neerurichaaaine coina beratenojoin esenetaaure. Nii quete: “Curuanaa, cha ii beratenojoi canuhacha beebejei esenetae,” naelu Isaihasi.

<sup>17</sup> Nii jaunte, nii canaacha aonai caje unaaneein ne nii canaacha esenetai. Jana nii canaacha aonaite, Jesocurisito que aitiin beratenojoi ne.

<sup>18</sup> Nena canu aitoon, acaauru rai beratenojoi aonacurenihane jaunna esenetaaurenihane. Aihei jerihane, aonacuruhane saijieeinte esenetaaurene. Nii que te aitiin:

“Chauratane sacutaainte amuhemujueein que ereerecure.

Nii jaunte itolereneein

chauratane sacutaain nenacaauru rene turuhe nii erenaa,”

naain laenanohineein nelu Cana Coanera Quiricha cuhane.

<sup>19</sup> Nii que jaiti nainacurenihane jaunna esenetaaurenihane Israelitacuru. Aihei jerihane, nainacuruhanete ne. Jauriaanejeein acaauru rai:

“Canu cachanelanaala nenacaauru que

necoelaichene coinane,

acaauru aina canuhacha ichaneni ichaain,

cha coitucunaa jerelanaala nenacaauru aina

nejerateeichene coina ichareeunni,”

naain beratihane acaauru rai Cana Coanerane jaun belu Moisesa.

<sup>20</sup> Nii baihate:

“Chabana canu aina nena coacuelanaala nenacaaurute, canu aina neeureein.

Chaen nechu

canu coitucunaa coacuelanaala nenacaauru quene

necoitucueratereunni”

naain,

<sup>21</sup> “Itolere banane

erenaa tonoraelanaala

nechu aansainein nenacaauru cachaauru

cotijaaain cohajeun,”

naa Israelitacuru nichaanune que Cana Coanerane belu Isaihasi.

# 11

## *Janijiin ranojoin nihalu Isaraelitacurune*

<sup>1</sup> Nii quene canu aitoon. Rai cachaneein nenacaauru que jaolecohane jaunnacha aitoha Cana Coaunera. Coatiha aihei. Canuhetonaine Isaraelita neeun, Abaraaun ichoala Beenjamiin lauri caje nefoeratenaa nichaaunne jaun.

<sup>2</sup> Inoaenlu caje coaauneente rai cachaneein neeuruha Isaraelitacurune coina ranajaain nelu Cana Coaunera. Nii jaun coatiha ena acaauru que jaolecohin nihei. Tana rai Quiricha inoaensi cuhane Isaraelitacuru que:

<sup>3</sup> “Cana Coaunera, ichei *profetacuru* sohin jaohinte ichei rorihuru- *altar* ranuusiin itajeeure. Leinjiin canuhachane jaiti ichaaojoeun. Canune maajeente inae sohin jaonaa jerecure,” naain Cana Coaunera bajaa Irihasine laenanohineein nihane coitucuhichene.

<sup>4</sup> Nete niritohane jana: “Inae acaauru chosi Baal corojelanaala, caainsi oaraancaneein nenacaauru cachaauru jelai tihanu canu cachanu que,” naain tonorae Cana Coaunera.

<sup>5</sup> Nii rijijieein techu, ena corojatajajeeincha neeure Isaraelitacuru nichaanune caotecuru, cairichaaajoaauruhane jaun acaauru belaiha janijiin ranajaa Cana Coaunerane jaun.

<sup>6</sup> Nitohaneein acaauru belaiha acaauru raa Cana Coaunerane jaun, coatiha rai caohacha ichacuruhane coreniha ranajaain nihei Cana Coaunera. Caohacha ichacuruhane coreniha ranojoinecuruhane, coatiha chanerihei cana belaitohane jaan cana rai Cana Coauneraacha tei.

<sup>7</sup> Nii jaunte nirijieein rai suujua letonohacha ichajeein nichotena coaacuruhane jaun, nichoteurenereein Isaraelitacuru. Nete laen janijiin Cana Coaunera ranojoineein nenacaauru nichoteeurureein. Jana leochaaurute suujua letonohacha ichajeein neuruhane jaun nichotena nainecurene.

<sup>8</sup> Cana Coaunera Quiricha cuhane:  
 “Cana Coaunerate  
 niicha ichai coitucunaa  
 nainecurenihane coina ichae.  
 Nii jaunte enanetojoein  
 cha coitucunaa nainelanaala neeure,  
 nechu cha coarana nainecurenihane jaan que  
 acaauru nota teein,  
 cha aonana nainecurenihane jaan que  
 acaauru irichotihane jaun,”  
 naain laenanohineein nihane rijijieeinte aihure.

<sup>9</sup> Rabiri netonai techu:  
 “Ita taojiaain lenone jaain,  
 lenonecuruhane jaan baaso ichaain  
 osa que nesarucuruhane jaaneein neeinete

caseteco coaracurumiin.  
<sup>10</sup> Acaauru nota nihanatiin conoeneeinete,  
 cha coarana nainelanaala  
 baaso ichaain neeuruhane,  
 chabana satonohelanaala  
 caseteco coaracurumiin,”  
 naain aitelu.

*Nichoteeuruha Jorionihechurune jaan*

<sup>11</sup> Canune aitoon. Nitohanein baaso ichaain inae casetecanohineein neeuruhane jaunacha, inae caohachanainejeein jaoleneein neeuruha Jorioocuru. Aihei, coatiha caohacha nainejeein jaoleneein neeuruhi. Nenacaaen tejian erenaa tonoraureniha Jorioocurune aina cuaain, inae ichoteretenojineein neeureein Jorioniheichuru netonai. Nitohanein inae ichoteratenojineein neeuruhane coaracuruhane banate, acaauru que necoelaihurureein Isaraelita nichaaunne laurichuru.

<sup>12</sup> Aihane jaun baaso ichaain caseteco coaracuruha Jorioocurune, Cana Coaunera coitucuelanaala nenacaauru Jorioniheichuru rai caohacha ichaa aihuruhane jaan cajete, jataain nii amurijiriin caohacha icharichaaain, inae nacoaunnein Jorioocuru raane bana Cana Coaunerane coitucuhacache.

<sup>13</sup> Nena laen canu, inara Jorionelanaala neiniquichene rai erenaa jereen coitucuhichene coina. Nii coinata inara Jorionelanaala neiniquichene rene caletoaain nelu Cana Coaunera. Nii jaunna jataain inara aina neein, jataain corajeein canu amihaneen ichana jereen,

<sup>14</sup> inara que necoelaain, canu foeratera caje nenacaauru tabaauru netonai nichotenaa nainecuruhane coina.

<sup>15</sup> Nii ranojoinelanaala neeuruha Jorioocurune coreenraniha, inae Cana Coaunera que nejeratenaa rijijieein neeuru caje, ranojioeein Cana Coaunera aina raotojoein neeuruha Jorioniheichurune jaunte, nii amurijiriin ranojioeein nena nainecure Jorioocuru. Nii jaunte ohin nitaje rai neeuru caje inae nacoauneein ichaohin sanaacharanejeein nena que ichaaore.

<sup>16</sup> Coaracuche nachuhinti, coliha caje ichoaichaniha ichanohi faan, jelai teein Cana Coaunera que banijiaain nihane jaun, satiin nii coliha netonai que banijiaineein nihane. Nii rijijieein techu leinjiin enuha cojoaisi Cana Coaunera que banijiaain nihane, rai nunecuru netonai que banijiaineein ne.

<sup>17</sup> Charijieein teinti toroonjoan nujuan sauriin cuhane limoon uune temuhacane, rai nujuan que nujuuain nena

rijijieein inacae nii limoon. Nii rijijieein techu, inara Jorioniheichuru nequichene nii limoon uune rijijieein neeichene jana, Joriocuru nii inara nujian toroonjoan nujian rijijieein neeure. Nitohaneeinte nii toroonjoan uune sauhin jaohin, inara Jorioniheichuru nequichene nii limoon uune rijijieein nii toroonjoan nujian necuruha nii Joriocurune jaun, acauru que temuratenojieein neeiche.

<sup>18</sup> Aihane jaun jiaonriha uune sauhin jaonojoneein nenea coreenraneein neeine jaun, nii uune esineneein neinichaanune amurijiriin nenea coahin nihache. Jiaonriha rai nujian esine neein neinichaanune cuhane teein temunojoneein neeichene baitiquichene.

<sup>19</sup> Nete, “Aiha niqi. Nete nii jauriaanejeein uune neein nenacaauru sauhi jaohin, canu temuurelu coreenraniha,” nariquiin.

<sup>20</sup> Nete esenetaenihacaanune jaun, sauhin jaonojoin rijijieein nihacaanune jana, inara esenetaaichene jaun canacaanu coreenraniha ranojoneein neeiche. Aihane jaun jiaonriha niique necohasitaain neeichene. Necohasitanaa coacuelanaala casiin neeichenete caohachae.

<sup>21</sup> Nii, rai nune esineneein nihacaanune saijieein jaonojoneein nihacaanulune jaun techu nii amurijiriin inara que suujua acatena nainenereein baaso ichaquichene Cana Coaunera.

<sup>22</sup> Aonacuche. Jataainte caohachaneje Cana Coaunera. Nete laen suujua letonohacha ichaa cachane abaantaene. Nitohaneein naitoonjoa esenetaauruhi casetecaa natiinte inara raain nelu. Nete laen inara belaiha inara raain nihilune rijijieein ichaohichene caohachae, inara netonai sauhin jaonojoneein neeichene coataa.

<sup>23</sup> Jorionichaanune netonaite, esenetaenihacaanune jianein inae nacoauneein esenetaacaanune, jelaiha nune que tenojoinerichaanuhi, niicha ichana nainei ichaain, jelaiha canacaanu temurichaa in Cana Coaunerane jaun.

<sup>24</sup> Coaracuche nachuhinti inara Jorionelanaala neiniquichene, limoon uune rijijieein neeichene saijieein temunojoneein neeiche, nii toroonjoan uune esine neein neinichaanune coreenraniha tenojoneein ne. Nii jaun techu Jorionichaanune inara amurijiriin nacoauneein jelaiha nii rai nujua esine que teein temunojoneein nenea nainerichaanuhi.

*Satononiha ichoteratenojieein neeururichaa in Isaraelitacurune*

<sup>25</sup> Canejeraauru, Cana Coauneracha ichaneni asinojoneein nenea coitucuhichenena jereeun, nabana cha coitucuera niha nocoetiin neeichene coataa. Isaraelitacurute



baaso ichacuruhane jaun, Cana Coanera que nejeratenaaneein jaoleneein neeurelu, satiin Isaraelitanelanaala nenacaauru netonai ranojoneein neeuruhane que tiaaajoaain.

<sup>26</sup> Inae satiin ranojoneein neeuruha Isaraelitanelanaala nenacaaurune janate, satiin ichoteratenojoiniha cuurureein Isaraelitacuru. Cana Coanera Quiricha cuhane:

“Sioon jelai cajete ureein  
jianacoon cache mitaeranu.

Baaso ichajeein niha Jacobone cajete,  
nii baaso rocoreein caje.

<sup>27</sup> Nitohaneeinne  
acaauru aina caitoonjoan  
canuhacha ichaneni ichareeuni,  
inae acaauru osa caje jianacoon tenajaanune bana,”  
naain nii coina ne laenanohineein.

<sup>28</sup> Nete beratenojoi niha ichoteratenojoneein  
neeururichaaain cachaaaurune aina cuaain, Cana Coanera  
que nejeratenaaneein neeure Jorioocuru, inara  
ichoaichaniha coitucunaa nainequichene teranu que.  
Nete enanetojoein cairichaaajoaain acaauru coarae Cana  
Coanera, acaauru foerateracuru janijiin raalune jaun.

<sup>29</sup> Coatiha cana rai niicha teeni ruluhin nihei Cana  
Coanera. Niheichu janijiin niicha raauri que jaoleconaa  
nainihei.

<sup>30</sup> Jauriaalute inara netonai Cana Coanera ere esenetaain  
tonoraelanaala neeichelu. Nete nere tonorana jerecureniha  
Jorioocurune jaun, inae enene cairichaaajoaain inara coarae  
Cana Coanera.

<sup>31</sup> Nii jauriaalu nere esenetaain tonoraelanaala  
neeichelune rijijieeinte, enene nere esenetaain  
tonoraelanaala neeure Jorioocuru, nechu cairichaaajoaain  
inara coaraain nihalune rijijieein, ena cairichaaajoaain  
acaauru netonai coaraa Cana Coaunerane coina.

<sup>32</sup> Cana Coaunerate nitohaneein ita rijijieein nere  
tonoraeniha cachane coina ichae, ita rijijieein jiniiquiin  
cairichaaajoaain cache coaraain nihane coina.

<sup>33</sup> Jataainte banejelanaala caohacha icharaneein, itolere  
ichara neein, cha coitucueraneein ne Cana Coanera. Coat-  
iha nihei chuni, niicha coacui aina niicha ichaneni coitu-  
cuhin beranu.

<sup>34</sup> Nii jaun, “Cha Cana Coanera suujua coitucue. Cha  
sujuatenaaneein.

<sup>35</sup> Cha rai cha teen nelu rai cainaain nihane coina,”

<sup>36</sup> Itolerete Cana Coanera caje unaa neein ne, niicha  
coaunanojoneein nihane jaun. Nii jaunte satiin itolere  
raineein neeure.

Itolere bana coroaenohineein neeine Cana Coaunera. Nitohanemiin.

## 12

### *Cana Coaunera que banijiaineein nenea ichaonaa*

<sup>1</sup> Canejeraauru inara raine aitoon. Jataain inara belaitoha Cana Coaunerane jaun, inara raajenhane rai inara ichao teeuche jelai teein que banijiaineein, rautaa Cana Coaunerane rijijieein. Niite laen jataain Cana Coauneraacha jereineein, rai caohacha neein ichariquicheein.

<sup>2</sup> Jiaonriha suujua cuhane coacuhin ichaaoruha Cana Coaunera coitucuhichurune rijijieein, inae nenacaen coacuhin acaauru rijijieein ichaohichene. Nitohaneein ichaonaa coacuelanaala, inara suujua coreein ichaaochete, inara ichao coreein ichaohin, Cana Coaunera jerenohineein, “Naaonjoainte caohachae. Naaonjoaite rautae Cana Coaunera. Caate esinae rauhijiriin caohacha ne,” naain coacuhin, caohacha nejesina coitucuhin ichajeein ichaohiche.

<sup>3</sup> Jataain cana belaitoha Cana Coaunerane jaun, canu cocoinaain caletoaain beratihane jaunna satiin inara rai aitoon, nabana leeochoauru amurijiriin nenea coacuhin niha chunine coataa. Aihane jaun jiaonriha esenetaichene coreniha inara rai Cana Coauneraacha tei rerohin, cha coacuhin ichana jereein neeichene.

<sup>4</sup> Charijieein teeinti cana ichao rai nelatihane coina araai lauriin nihacoae cana jaberoco que cana nerurujuana jaan.

<sup>5</sup> Nii rijijieein techu arajii Jesocurisito esenetaeranichaachene, ita ichao que ichaohin Jesocurisito aina cuaain leinjiin que jaberocoanaa rijijieein ita jaberoco que jaberocohin nihacache.

<sup>6</sup> Nitohaneinte le cachanichaachene rai aca jerihane rijijieein tenaa jerihane jaancuru rai, lauri lauri canaacha ichaneni ichana nainena jaanu teein ne Cana Coaunera. Aihane jaun, rai nere beraneein cana letoaa Cana Coaunerane esenetaacachene rijijieein coitucuhin ichacaachenete ne.

<sup>7</sup> Leeochoauru coroatajanera neein nihachene coina, cana teein niha Cana Coaunerane, jerecuruhane rijijieein acaauru coroatajanichaachenete ne. Jana chunocoha, cacha relaeraneein nihane coina aca tiha Cana Coaunerane, leeochoa ichana coacuelanaala acaacha ichamiin.

<sup>8</sup> Jerichanejeein chu, chunocoha cacha suujua anihoeraaneein nihane coina tenojoinihane cacha suujua anihoeraaneein neeine leeochoa ichana coacuelanaala. Chunocoha cha teein niha leeochoauru raine, chunaelanaala teeine. Jana

chunocoha cacha letoaeraneein nihane, coujuriu rai nami-haneeoneein nihane coitucuhin ichamiin. Cairicheihuru rai cha teeichene, tonajelanaala rachoojoein teeuche.

*Naajoaainte caohachae ichaoha Jesocurisito ranojoneein nenaane*

<sup>9</sup> Ita que asilanaala jiniiquiin ita suujua rijijieein ita belain neein, itolere baaso ichana coacuelanaala caohacha nejesinaacha ichacuche.

<sup>10</sup> Jesocurisito aina cuaain ita nejeraneein neeichene coitucuhin, jiniiquiin ita belain ita suujua rijijieein coacuhin, itaque inara suujua acatein ichaaoche.

<sup>11</sup> Nelararajiaain coiintelanaala corajeein inara suujua aina cuaritaain Cana Coaunera jerenohin ichacuche.

<sup>12</sup> Rachoojoein neeuche nii inaraacha cohajei coreniha. Chaen laraajiin neein necairichanaa abaantaain itolere bana Cana Coaunera bajaebajajeein ichaaoche.

<sup>13</sup> Cha latein neuruha Cana Coaunera cachaneein nenacaaurune, inara raajenihane cha latera rijijieein acauru corootajanecuche. Inara rene turuhin niha cachane, raotojoein cotijiaain raauche.

<sup>14</sup> Inara rohecaeraauru rai caohacha ichacuche. Jiaonriha, "Coaraain nainamiin," naain acauru que ereeichene.

<sup>15</sup> Rachoojoenacaauru aina rachoojoein, inaderaain chananacaauru aina inaderaain chanaauche.

<sup>16</sup> Ita rijijieein coacuhin ichaaoche. Jiaonriha chuni amurijiriin nena coacuhin neeichene. Cairichaaerinojoneein ichaonacaauru rijijieein ichaaoche. Jiaonriha leeochoauru amurijiriin cha coitucueraneein nena coaauquichene.

<sup>17</sup> Jiaonriha chuni inara rai baaso ichaain nihane, inara netonai rai baaso ichana coacuhi nihache. Nitohanena coacuelanaala satiin notaracae, caohacha nejesina ichajeein ichaaoche.

<sup>18</sup> Atiin leeochoauru aina jiniiquiin raotojoein acauru cotainaa coacuelanaala ichaaoche.

<sup>19</sup> Canejeraauru, jiaonriha inara cairichaera cairichanaa coacuhin neeichene, Cana Coaunera, baaso ichaeraauru ichanohin coitucuhin casetecarichaaaine jaun. Nii coinatate rai Quiricha inoansi cuhane:

"Canune baaso icharaauru coitucuhin casetecaain, caohacha icharaauru coretereunni," naain aite Cana Coaunera.

<sup>20</sup> Aihane jaun iicha cotaairii mijitihane coroaateu. Jana cocoirihane acau que cocoaerateu. Aihute nocoejein aonamiin.

<sup>21</sup> Jiaonriha baaso nejesina coacuhin jeriha inara suujuane rijitojoein neeichene. Nitohanein baaso ichaelanaala caohacha nejesina ichajeein baaso amuritoche.

## 13

<sup>1</sup> Satiin cocoainanohineein niha cocoainacaine jaun, satiin rai nere tonoraain aca jerihane rijjijeein neeuche. Nihei chuni cocoainanacai, Cana Coaunera tenojoinelanaala nei. Satiin cocoainanacaihurite Cana Coaunera tenojoineein cocoainanohineein neeure.

<sup>2</sup> Nii jaunte chunocoha cocoainanacai ere tonoraelanaala nei, Cana Coaunera jerenohin tonoraenihane jaun aicheein. Chaen techu caseteco coaracurureein, nii nere tonoraauruhi,

<sup>3</sup> caohacha icharaauru casetecaelanaala, baaso icharaauruhacha casetecaraneein niha cocoainanacaine jaun. Aihane jaun ii casetecaa cocoainanacaine coasiinne, baaso ichana coacuelanaala caohachaaain neeute, esinae rauhijiriin caohachaaain neeine coaramiin cocoainanacaihuri,

<sup>4</sup> acaauru jeriha Cana Coaunerane rijjijeein, ii rai caohacha ichacuruhane coina neeuruhane jaun. Nete laen baaso ichaaain neeine, cocoainanacai coasiinne ne, esinae rauhijiriin baaso ichara casetecaane coina teein niha Cana Coaunerane jaun.

<sup>5</sup> Nii jaunte jeriha cocoainanacaine rijjijeein nere tonoraain ichaohacachene caohachae. Coatiha cana casetecaane coasihacha nihei. Caohachaaain cana suujua coaraain ichaohacachene cointate aihacache.

<sup>6</sup> Nitohanihane jaunte cocoainanacaihuri rai coriqui teein neeiche, Cana Coaunera jerenohineein leinjiin rai namiha-neeocha ichajeein neeuruhane jaun.

<sup>7</sup> Le cachaauru nainein, inara caje acaaruhacha raaeni teeuche. Niha chatohanei inaraacha coretenenine rai coretecuche. Niha chatohanei, cobiereno rai inaraacha coreteneni *impoestone* coretecuche. Niha cacha inara suujua acatequichene jaaneeine que inara suujua acatecuche. Niha cacha inaraacha belainenine belaihuche.

<sup>8</sup> Jiaonrihachu chuni que nerebeteein neeichene. Nete laen jiniiquiin ita belaaichene caohachae. Chunocoha namute cacha belaaain ichoaite, aitoa Cana Coaunera rai rauhine rijjijeein, inae ichaohane jaun aicheein.

<sup>9</sup> Cana Coaunera rai rauhi cuhanete, “Jiaonriha ii sinijieranelanaala nena ene aina ichaojeraquiin neeine. Jiaonrihachu sonajaain jaohine. Jiaonrihachu asijiauhine. Jiaonrihachu chamute cacha rucuhele, rai nirihuru, rai sinijera, naaonjoaaihunri jereein neeine,” naain ne laenanohiheein. Nete satiin nii naitoonjoan coitucuhin nihacachene coina: “Ti raajenihane ijiabereeo belaaaine rijitoein chamute cacha belaihu,” naain ne laenanohineein.

<sup>10</sup> Aihane jaun namute cacha belaaain ichoai, coatiha nainihei baaso ichaa namute cacha raine. Nitohanein jiniiquiin

ita belaa'in nihacachenete, satiin aitoha nii rauhine rijijieein ichaohacachene jaun airichaacheein.

<sup>11</sup> Satiin sininaa rijijieein ichaohacachene caje nocohin cana ichao coaraain coitucuhin ichaohacachene cojoanonaa que turuhane que nainacaachenete caohachae, inae jauriaanejeein cana rai beratenojoi nihane jana esenetaacachene bana amuritoheriin inae ichuunejeeonriha ichoteratenojoneein nerichaacheeinne jaun.

<sup>12</sup> Inae satonohelalajiha caa nocohenaanau ichaonaa rijijieein ichaohacachene jaan janonaa. Inae turuhelalajiha nii ena nena jaonaa canaacha cohajeine jaun, nocohenaanau nena rijijieein baasohacha ichajeein ichaohacachene jianein coujurihu Cana Coaunera cachaneein nena tocohaneein nihacachene coarateein nihacachenete caohachae. Charijieein teinti letona jatoraa'in ne sondaro, rai curuaanaa aitoonjoan ichaane coina. Nii rijijieein techu cana netonai jatoraa'in nihacache, Cana Coaunera aitoonjoan ichacaache chuni que asilanaala satiin notaracaane coina.

<sup>13</sup> Aihane jaun caohacha nejesina ichacaachene coaracuruha cachaaurune coina, nainihaacache joenreein ene jereein, ajetoritiin enaacha joenreein cha ichaa'in, niheichu canamute cacha cotaairiin coaraain, canamute cacha que necoelaain, naaonjoaain nena nainihaacache.

<sup>14</sup> Aihane jaun nitohaneein nena coacuelanaala, coujuriu Cana Curuaanaa Jesocurisito cachaneein neeichene coarateein laraajiin neeuche, joaereen cacha rijijieein inara suujua letono tonoraelanaala.

## 14

*Jiaonriha inara nejera ichao que ereeichene.*

<sup>1</sup> Inara rene turuhin niha cana nejera canaacha esenetai aina ijilanaala nenaane, rai tonaain erena coacuelanaala raotojoeein raauche.

<sup>2</sup> Coaracuche nachuhinti tabaauru itolere lenone que ita rijijieein lenoneein neeuruhane. Jana tabaauru iijilanaala nena, iniho quilanaala jasisichuruhacha que lenoneeine.

<sup>3</sup> Aihane jaun, itolere lenone que lenoneein nenacaauru, nainihe'i nii itolere lenone que lenonena nainelanaala nenacaauru que ereein neeuruhane. Jerichanejeeinchu nainihe'i, nii itolere lenone que lenoneein nena que erena nainihe'i nii itolere lenone que lenonelanaala nena, Cana Coaunera acaantonai raain nihalune jaun.

<sup>4</sup> Aihane jaun chaneena neei ii, leecha rai niicha latei tera que baaso ichaa been que ereein neeine coina. Nii acaauru letoeraneein nena Cana Coauneraachate baaso ichaa'in aihurenihane, caohacha ichaa aihuruhane coitucureein. Nete

itolereneein caohachain raotojoein neeurureein, Cana Curuaanaa raotojoein neeuruhane coina icharaneein nihane jaun.

<sup>5</sup> Niha coaiten tabaauru, jataain leeochoaauru janonaa amuritoheriin nelateineein lejanohane coaraaauru. Jana tabaaurute satiin janonaa ita rijijieein nelatihane que aito-cure. Nii jaunte lecachanichaachene, canaacha esenetai coitucuhin esenetaacachene caohachae.

<sup>6</sup> Leeochaauru janonaa bana amuritoheriin le janonaa coaraain, bana Cana Coaunera coroaena jerihane, nii janonaa bana coroaemiin. Jana Cana Coaunera rai caohacha ichaa itolere lenone que lenoneein nenea jerihane, itolere lenone que lenoneein Cana Coaunera coroaemiin. Jerichanejeeinchu Cana Coaunera rai caohacha ichaa itolere lenonecuru que lenonena nainiheichuru, quilanaala neein Cana Coaunera coroaemiin.

<sup>7</sup> Coatiha cana jerichaachene jaun ichaohin, ohin, naaonjoaain nihaacache.

<sup>8</sup> Nii rijijieein techu ohin, ichaohin, naaonjoaain nihacachene nihanatiin Cana Coaunera rainnein nihacache.

<sup>9</sup> Nii coinate ohin, o caje ichanaain, naaonjoaelu Jesocurisito, ichaonacaauru, onacaauru, naaonjoaainunri Curuaanaanein nihane coina.

<sup>10</sup> Chanuna jana chaen nitohanihane saijieein, ii nejera ichao que ereein rai necoeje chanuhin neei, Cana Coaunera acatiha satiin tururichaacheein aca canaacha ichai coitucuhin rucuherrichaaaine saijieein.

<sup>11</sup> Nitohanerichaaaine quete:

“Canu ichao coreniha esinae rauhijiriin airichaainne quene aitoreeunni.

Satiin cachaaurute canu acatiha neseeonriaain canu nichaanune coitucuhin Cana Coaunera coroaecurureein,”  
naa Cana Curuaanaane ne laenanohineein Cana Coaunera Quiricha Inoaensi cuhane ne.

<sup>12</sup> Nitohaneinte le cachanichaachene, cana raajenihane canaacha ichai berichaacheein Cana Coaunera rai.

*Jiaonriha inara nejera ichao lacuroaaichene.*

<sup>13</sup> Aihane jaun inae nainihaacache cana nejeraneein nenacaauru que baasoneein ereein, chatohanei ichaain, naaonjoaain nenea nainihaacache. Chatohanei ichana coacuelanaala neeichenete caohachae, nabana esenetaa cana nejerane lacuroaaichene esenetaane jianihane coataa.

<sup>14</sup> Canune esinae rauhijiriin Jesocurisito esenetaeraneein aitoon. Nihei chuni lenone, calanineein quichaenihane coina coaunanojoi. Nete lenone tabaauru, leeochoaauru cachaauru rai lenoneneein nene.

15 Niheichu nainiheeii quinaa inaelanaala nenea ii nejera notaracaae rai baaso ichara tocohaneein quiine. Ii lenoneecha coreniha nitajeein niha ii nejera, coreniha netonai ohin nihalu Jesocurisitone saijieeine coataa. Nitohaneein neeine coatiha chamute cacha belaine coaratiha airiheeini.

16 Aihane jaun itolere lenone que lenonena naineein neeichene jaan aina cuain nainiheeiche baasoneein inara que ereein neeuruha cachaaurune jaanu ichaain neeichene.

17 Jeriha Cana Coaunerane rijijieein rai Cojoanonaa que ichaonaa jerichaachene, coatiha joenreein lenone que lenoneein nihacane latihei. Nete laen esinae rauhijiriin baaso ichaelanaala rai Suujue aina cuain rachoojoein ichaohin, raotojoein nihacachene caohachae.

18 Nitohaneein ichaohin Jesocurisitohacha jerei ichaa cachanete laen rautatiin coarae Cana Coaunera. Cachaauru nihanatiinte esinae rauhijiriin caohacha ichaane coaracurureein.

19 Aihane jaun, atiin ita aina raotojoein ichaohin nihacachene jaanuhacha ichacaachenete caohachae. Nii banate laen esinae rauhijiriin, jiniiquiin ita coroatajaneein, jeriha Cana Coaunera Suujuene rijijieein nerichaacheein.

20 Nainihei lenoneecha coreniha Cana Coaunera ichanohin itajeein nihacachene. Esinae rauhijiriinte niqui, satiin lenonecuru lenone caohachaneein neeure. Nete caohachaene que lenonelanaala nenacaauru notaracaae que lenoneein acauru suujua lacuroaera tocohaneein nihacachene.

21 Nii jaunte caohachaene, iniho leeochoaauru quinojoinelanaala nenea quiin, bino cohin, naaonjoaain nihacachene. Niheichu leeochoaauru suujua lacuroaera tocohaneein nainihei joenreein chachanaa nainihaacache.

22 Aihane jaun ii joaereen lenone que lenoneeine, Cana Coaunera notaracaaecha que lenoneeu. Rachoojoein neeine suujua cuhane nocoatelanaala joenreen lenone que lenoneein nenea.

23 Nete laen inae rootojoein quinaa naihenihane coituhane saijieein que lenoneein nei, aca nii ujuaihoneein ne, niicha quiinelanaala nenaanihanane coitucuhane saijieein quihane jaun. Nii jaunte inae canaacha ichana nainihei ichaaa raotojoein coitucuhane saijieeine, osa que nesaruha aihaca.

## 15

*Ii rainuhacha que caohacha ichana coacuelaanaala chamute cacha rai caohacha ichaau.*

<sup>1</sup> Inae cana, jeriha Jesocurisitone rijijieein laraajin neinichaachene, nii ena nunuheteein sacuhajeraauruhacha ichai que tonaain erenaa nainihaacache. Atiin acaauruhacha ichai rautenihacachene nihanatiin abaantaacachenete ne.

<sup>2</sup> Satiin canate, canamute cachaauru rai caohachanu que cha ichaain nihacachene caohachae, caa canaacha esenetai aina ijieein sacuhajeein ichaauruhane coina.

<sup>3</sup> Coaracuchenachuhinti Jesocurisito netonai, aca jerihane rijijieein nena nainenihane jaun: “Ii necoeje chanuureraauru coreenranihane canu caseteco coaraaun,” naain que aitiin laenanohinihane nainaaluu, rai suujua letono rijijieein nena coacuelanaalane.

<sup>4</sup> Satiin Quiricha Inoaensi cuhane laenanohineein nenaate, cana suujuateraanu que laenanohineein nelu, itolere bana jianelanaala, cairichaaajoaain cana coaraane aina cuaain canaacha cohajei ranaa nainichaachene coina.

<sup>5</sup> Nii Cana Coaunera itolere bana cairichaaajoaain cana coara, inara coroatajanemiin. Cana relaalu Jesocurisitone rijijieein

<sup>6</sup> jiniiquiin ita belaaain rachoojoein Cana Coaunera coroa-jeein ichaoche, jeriha Cana Coaunera Cana Curuaanaa Jesocurisito Inacaneein nenaane rijijieein neeichene coina.

*Jorioniheichuru rai benojoiniha Jesocurisitone que erenaa*

<sup>7</sup> Aihane jaun Cana Coaunera rai caohachanu que inara raain nihalu Jesocurisitone rijijieein, inara netonai jiniiquiin raotojoein ita raain neeuche.

<sup>8</sup> Esinaena aitoreeunni inara rai. Inae cana foeratera inoaensihuru rai, nitohaneein ichaane coina aitosihalu Cana Coaunerane nainaane coinate, Jorioocuru nichaanune rai nelatihane coina turuhin nelu Jesocurisito, caje esinae rauhi-jiriin nohanelanaala tihane coina, naitoonjoan ichaa Cana Coaunerane coaracuruha cachaaurune coina.

<sup>9</sup> Chaen techu Jorioniheichuru netonai, aca Cana Coauneraneein nihane jaun, cairichaaajoaain acaauru netonai coaraane coitucuhin, Acaneein nihane coroaecururichaaaine coitucueratihane coinane maajeein turuhin nelu. Nii ajinihate nitohanerichaaaine que:

“Nitohanei ichaaine corenihane lauri lauri nenacaauru cachaauru aina neein-  
iineein neeine coroaajeein nenatereeeunni,”  
naain laenanohineein ne Quiricha Inoaensi cuhane.

<sup>10</sup> Quiricha Inoaensi cuhane techu coaiteen:

“Cana Coaunera cachaneein nenacaauru aina jiniiquiin  
rachojeeuhe

lauri lauri nenacaauru cachaauru,”



naain ne laenanohineein.

<sup>11</sup> Rai Quiricha Inoaensi cuhane techu coaiteen:

“Lauri lauri neiniquichene

Cana Coaunera cachaneein nenacaauru aina jiniiquiin

Cana Coaunera coroaecuche,”

naain ne laenanohineein.

<sup>12</sup> Isaihasi netonai techu:

“Isaihasi caje nefoeratenaa-

Israelitacuru curuaanaa neein nenea-

Rabiri cajete

ocooreein leinjiin Curuaanaa,

Israelitanelanaala nenacaaurune maajeein

curuaanaa neein nihane

acaacha que jaaequiin neeuruhane coina,”

naain laenaclu.

<sup>13</sup> Canaacha cohajei teraneein nenea Cana Coaunera, Aca acaneein nihane esenetaeraniquichene rai, raotojoein rachoojoein jiniiquiin neeichene jaanu teein, inara aina niicha ichana nainei ichaa rai Suujuene coina ichamiinte, leinjiin acaacha cohajein neeiche.

<sup>14</sup> Canejeraauru, saain inara leeochoauru belaaain ichaohin, itolere coitucuhin, jiniinquiin ita suujuatenaa coitucuhin ichaohichene coitucuhanu.

<sup>15-16</sup> Nena laen caa quiricha inara rai canuhacha laenai cuhane inara que asilanaala inara rai aitoon, nabana baitequichene chatohanei ichaquichene coataa. Nitohaneein Jorioniheichuru rai caohacha ichaa Jesocurisitone beebejihane nune coinata, canu rai caohacha ichaane coina canu raain nelu Cana Coaunera. Nii jaanne Cana Coaunera beratenojoi ichoteratenojoein neeururichaanee beebejeeun. Nii canuhacha beebejei esenetaauruha Jorioniheichurune, Cana Coaunera rai iniho mocohin teeuruha saseredotecuru Jorioneei nenacaaurune rijijieein, Cana Coaunera rai, jeriha rai Suujuene rijijieein couluunojoein Jorioniheichuru tihanune coina.

<sup>17</sup> Coujuriu Jesocurisito letononeein nenea tocohaneein, Cana Coauneracha jerenohi ichaain nihanune jaanne raotojoeun.

<sup>18</sup> Nii jaanne Jorioniheichuru relaain nihanune jeriha Cana Coaunerane rijijieein neeuru coina, canu relaain nihalu Jesocurisitone jaan caje cuaain, leeocheaneein cuaain Jorioniheichuru relanaa coacueneun. Niine ichaauun acaauru rai ereerejein, acaauru aina neein canu ichao que acaauru notajaain,

<sup>19</sup> cojoelanaacojoai ichana nainichaaunne jaan aina cuaain, Cana Coaunera Suujue aina cuaain, naaonjoaain. Nitohaneene cana ichoterateraneein niha Jesocurisitone

beebejihanune nainaaun jataain caohatiin, Jerosaleeun caje nunuhetein itolere sacutaain Iliria batane que tiaaajoaain.

<sup>20</sup> Nitohaneeine chabana turuureniha leeochoaurune jaunru cuhecujueein chabana aonaeraeniha Jesocurisito que erenaane jaunru Jesocurisito beebejeeun, nabana leeochoauru amihaneeona jaunru turuhin, acaauru amihaneeo rohecaanune coataa.

<sup>21</sup> Nitohanei ichana coacuelanaalane, “Chabana que erena aonaelanaala nenacaurute, inae aca Acanihane coaracurureein. Chabana aonaelanaala nenacaurute, aonaain coitucuha cuurureein,” naain laenanohineein niha Cana Coaunera Quiricha cuhana rijijieein ichaun.

*Romau cunaa coaauca Faborone*

<sup>22</sup> Jaiti nii ichajihanune jaunne, araai saain inara coaraa unaa coaaucaunne nihanatiin nainesineen.

<sup>23</sup> Nene laen inae ena canu amihaneeo nainaaun, nii canuhacha beebejei atane sacutaainchurune jaun, inae inara coaraa unaa jereen araai jaanacai baiha.

<sup>24</sup> Nii jaunne Españau cuhanune ucuaetoha, cuujihataain inara rene bedaenereeni, bajaanachuhinti aineen. Nene laen atiin, inae nainaaun inara rene bedainichaaune baiha, jelai caje amuhanune coina canu coroatajaniquichene jereen.

<sup>25</sup> Nene jaiti ena Jerosaleeun cureeunni, ecu nenacauru coroatajaniha leeochoauru cana nejeraauru taojiai tihanu acaauru raine coina.

<sup>26</sup> Masedoniau nenacauru, Acaihau nenacauru, naaonjoainurite suujua caje coauneen, Jerosaleeun cairicheinejeein nenacauru coroatajaniha letoaauruhane coina, niicha letoaenihunru taojiaaure. Nitohaneeinte rai suujua caje coauneen coacuhin, jataain caohacha ichacure.

<sup>27</sup> Charijieein teinti Jorionecurenihane saijieein, acaauru que Jesocurisito coitucuerateeurelu, Jorioocuru Jesocurisito esenetaeraneen nenacauru, nii rijijieinte Jorioniheichuru netonai, Jesocurisito esenetaeraneen nenacauru Jorioocuru coroatajanecure, acaauruhacha sirii taojiaain letoaain.

<sup>28</sup> Nii jaunne inae nii leeochoauru coroatajaniha acaauruhacha taojiai amaain tihanune baihane laen, Españau cureeunni. Nii ucuaetohane laen cuujihataain inara rene bedaenereunni.

<sup>29</sup> Inara rene bedaenichaaune, cana coroatajanerichaain jelai amuritoheriin Jesocurisitone coitucuhanu.

<sup>30</sup> Inara raine aitoreeunicha canejeraauru. Atiin Jesocurisito aina cana belaiha cana rai Cana Coaunera Suujue tenojoi coreniha, caohachaaain cuha canu amihaneone coina, canu rai atiin Cana Coaunera bajaauchete,

<sup>31</sup> canu que chachana nainecureneeine Jodea nenacaauru Cana Coaunera coitucuhichuru. Chaen Jerosaleen turuhane raotojoein canu ranaa nainecuruha ecu nenacaauru cana nejeraaurune coina.

<sup>32</sup> Jeriha Cana Coauneranena inara rene turuhin bedaenereeeunni, inara coaraain rachoojoein ecu inara aina neein nebetacaanune coina.

<sup>33</sup> Raotojoein nihacachene teraneein nenea Cana Coaunera, inara coroatajanemiim. Nitohanemiin.

## 16

### *Arajii cachaauru coaauca Faboro.*

<sup>1</sup> Jesocurisito rai iclesia neein nenacaauruhacha latei que acaauru coroatajaneraneein Cencrea nenaalu- cana nejera- neein ene neein nenea- Febe quene inara rai aitoreeunni,

<sup>2</sup> coujurihu Jesocurisito esenetaeraneein nenea tocoha- neein, inara rene turuhane raotojoein Jesocurisito coreniha raain, satiin niicha latei que coroatajanequichene coina. Acate leeochoaauru coroatajanein canune maajein coroata- janelu.

<sup>3</sup> Canu rai Jesocurisito tenojoi amihanenaa que canu coroatajanera neein nenacaaurulu- Aquila, Firisila, naaon- joainuri coaucaanne beeuche acaauru rai.

<sup>4</sup> Acaaurute canu coreniha nichao itajerateeuruhane rai neeurelu, canu sohin canu jaonaa jerecuruhane bana. Nii jaun coatiha canuhacha acaauru coaauhaaun, satiin Je- socurisito rai iclesianein nenacaauru- Jorioniheichurute acaauru coreniha Cana Coaunera bajanajaaocure.

<sup>5</sup> Jerichanetojoeinchu Aquila, Firisila, naaonjoaainunri loreri asaae netaojianacaauru canejeraauru coaaucaane beeuche acaauru rai. Jataain canuhacha belai- Efeneto coaaucaane beeuche. Acate jauriaanejeein Asia batane que Jesocurisito esenetaera neein nelu.

<sup>6</sup> Taolu carajaain inara jana neein, inara coroatajanera- neein nenea Mariha netonai coaaucaane beeuche.

<sup>7</sup> Chaen canu araichuru canu aina jiniiquiin caresero cuhane nenacaaurulu- Andronico, Joniasi, naaonjoainuri rai acaauru coaaucaane beeuche. Acaaurute afosotooru que caohacha cachanecuruhane coarateein, canu ajiniha Jesocurisito esenetaeraneein neeurelu.

<sup>8</sup> Jesocurisito coreniha jataain canuhacha belainein nenea- Ampliato rai coaaucaane beeuche.

<sup>9</sup> Chaen canu rai Jesocurisito tenojoi amihanenaa que canu coroatajaneraneein nena- Orobano, canuhacha belaa Estaguis, naonjainunri coaaucaanne beeuche acauru rai.

<sup>10</sup> Jesocurisito esenetaeraneein nihane jaun, mainajeein coujunojoneein nenaalu- Apeles netonai coacuhin, Aristobolo aina rai naraichuru coaaucaane beeuche acauru rai.

<sup>11</sup> Chaen canu arai Erodion, nii baiha Narsiso aina nejerauru Jesocurisito esenetaeraneein nenacaauru, naonjoainuri coaaucaane beeuche acauru rai.

<sup>12</sup> Jerichanejeeinchu Jesocurisito icharatenohi icharaneein nenacaauru- Tirifena, chaen Tirifosa, naonjoainuri rai acauru coaaucaane beeuche.

Chaen cana nejera, Jesocurisito coreniha- cana bainein nena- Persida- nii mainajeein Jesocurisito tenojoi amihanenaa icharaneein nenaalu rai netonai coaaucaane beeuche.

<sup>13</sup> Rofo rai netonai coaaucaane beeuche. Acate leochaauru amuritoheriin Jesocurisito esenetaeraneein nihane coarate.

Chaen rai nebate canu neba rijijieein cacoelaichanein nelu.

<sup>14</sup> Chaen Asiincrito, Fleconte, Eremesi, Patrobas, Eremasi naonjoainuri, chaen acauru aina nenacaauru canejerauru netonai rai acauru coaaucaane beeuche.

<sup>15</sup> Chaen Filologo, Jolia, Nereo aina rai bai Olimpias, naonjoanunri rai acauru coaaucaane beein, canaacha esenetai coreniha canejerauru rai netonai acauru coaaucaane beeuche.

<sup>16</sup> Jiniiquin raotojoein ita rai ereein neeuche, ita nejeranein nena rijijieein. Satiin Jesocurisito esenetain rai cachanein nenacaauru netonante inara coaacuruhane berateure inara rai.

<sup>17</sup> Inara canejera neeichene raine aitoreunni, atiin nii jelai leochaauru lerueraneein- inara amihaneeo lacuroeranein nenacaauru coaraain, acauru que nainaan ichaohichene coina. Nitohanei icharate relanojoneein neichelune jaan ichaquichene caohateranein aicheein. Aihane jaun jiaonriha acauru rohan neeichene.

<sup>18</sup> Jesocurisitohacha jerei ichana coacuelanaalate nechu acauru jerecuruhane rijijieein- raihunchacha que chachaain neure. Chaentechu enaacha cache coritana inatiin aihuruhane jaun, acauru coitucuelanaala nena cache coritacure enaacha.

<sup>19</sup> Satiinte Jesocurisitohacha jerei tonoraain ichaohichene coitucure. Nii jaunne jataain rachoojoeun inara coreniha. Aihane jaun baaso ichana coacuelanaala, itolere coitucueranein neeichene coaratein caohacha nejesina ichacuche.

<sup>20</sup> Aihate inara tijia asaae jaolenein niha nii baaso icharatera moconajaerane coina ichamiin raotojoein nihacachene

teraneein nenea Cana Coaunera. Inara coroatajanemiin Cana Curuaanaa Jesocurisito.

<sup>21</sup> Canu amihaneeo que cacorataaneraneein nenea- Timoteo netonaite inara coacue. Chaen canu araaichuru- Locio, Jasoon, Sosipater, naaonjoaihunri.

<sup>22</sup> Canu caa Faboroacha laenaeratei quiricha laenara-Tersio nichaaunena canuhetonai cana Curuaanaa coreniha inara coacuun.

<sup>23</sup> Chaen caa nihanune jaan- loreri erora Caiho netonaite inara coacue. Acate rai loreri tee, satiin iclesianeein nenacaauru- turunacaauru nasaae netaojiaaauruhane coina. Chaen caa nihacaanune jaan nese cocoaichacuru rai coriqui beraichaneein nenea- Erasto netonaite inara coacue. Chaen cana nejera Coarto netonaite inara coacue.

<sup>24</sup> Cana Curuaanaa Jesocurisito, satiin inara coroatajane-miin. Nitohaneeine.

*Raotojoein rachoojoein Cana Coaunera coroaecuche.*

<sup>25</sup> Cana ichoterateraneein niha Jesocurisitone que inara relanaanune rijijieein, leeinjiin Acaacha jerihane rijijieein neeichene coina icharaneein nenea Cana Coaunera coroaecuche. Nii inara relaanulune jaante, chuni que coitucuerate-lanaala sirihane caje, cana que coitucuerate Cana Coaunera. Acate asinojoneein sirilu, jaiti cana rai chauratane coa-naenihane ajiniha caje coauneein Cana Coaunera.

<sup>26</sup> Nete laen, inae enene cana que coitucuerate nere bera inoaensihuru- *profetacuru* que, aca jerihane rijijieein been laenaeratihalu Cana Coaunera chabana satonoelanaala nenaane rijijieein. Nii niicha ichaneni asinojoneein nenaate, satiin lauri lauri nenacaauru cachaauru que coitucuerate Cana Coaunera, esenetaain tonoraain neeuruhane coina.

<sup>27</sup> Leinjiin itolere coitucuhin nenea Cana Coaunera necaohacha coitucuhin coaracurumiin chabana satonoelanaala rai Calaohi Jesocurisito aina cuaain satiin cachaauru. Nitohanemiin.

## Coriintoo nenacaauru rai Faborohacha letoai leinjiin

*Chatohaneein neeiche Coriintoo neiniquichene.*

<sup>1</sup> Canune Faboro neeun. Cana Coaunera jerenohi neeinne, Jesocurisito cocoinanohi afosoto neein neeun. Cana nejera Sosetenesi aina jiniiquiin neeinna

<sup>2</sup> caa quiricha laenacaanu. Satiin Coriinto neseu Cana Coaunera que banijiaineein rai iclesianein nenacaauru cana nejeraauru raina, caa laenaain letoacaanu.

Satiin inarate Cana Curuaanaa Jesocurisito aina cuaain araai laurii caje ranojoneein neeichene saijieein, Cana Coaunera que banijiaineein le laurii caje nenea rijijieein neeiche, itolere sacutaain Jesocurisito coroejeein nenacaauru aina jiniiquiin.

<sup>3</sup> Cana Coaunera, Cana Curuaanaa Jesocurisito, naaonjoainuri inara coroatajanemiin raotojoein neeichene coina.

*Jesocurisito aina cuaainte rausiaenojoinichaache.*

<sup>4</sup> Jesocurisito aina cuaain inara rausieca Cana Coaunerane corenihane, itolere bana corojeeun.

<sup>5</sup> Nii rai Calaohi Jesocurisito ere tonoraain esenetaaichene aina cuaainte, jataain inara coroatajane Cana Coaunera, niicha jerenohin coitucuhin que ita rai raotojoein ereeichene coina.

<sup>6</sup> Nitohanihane ainate, esinae rauhijiriin erenaa niha Curisito quene coitucuhin esenetaain rijijieein neeiche.

<sup>7</sup> Nitohanihane jaun, inara rai lanarinaain caohacha ichaquichene coina inara rai Cana Coaunera tenojoin, ocooca uha Cana Curuaanaa Jesocurisitone coaraquichene que tiaojoaain.

<sup>8</sup> Inara berairichaaain Cana Coaunera satono que tiaain, inara suujua letono ichaelanaala neeichene coina, nabana turuha Cana Curuaanaa Jesocurisitone bana niha inara que tonaain ereine coataa.

<sup>9</sup> Itolere banate, satiin naitoonjoa ichae Cana Coaunera. Acate inara cotijiae, jiniiquiin rai Calaohi Jesocurisito aina ichaohichene coina.

*Ita caje nelerucuruha Jesocurisito ranojoinunrunne*

<sup>10</sup> Canejeraauru, Cana Curuaanaa Jesocurisito corenihane inara rai aitoon, atiin ita suujua rijitojoein nii leochanein inara suujua cuaelanaala jiniiquiin raotojoein ichaohichene coina. Rachoojoein ichaaoche ita rijijieein coacuhin, ita rijitojoein abaantaain.

11 Nejesinajeein ita cotaairiin neeichene coitucuhanu Clohe laurichuru cajene jaunna, caa inara rai aitoon.

12 Chaen techu, inara aina nenacaauru tabaaauru, “Canune Faboro lauri caje neeun,” jana leochaaurute, “Canune Aforo lauri caje neeun” jana leochaaurute, “Canune laen Fedoro lauri caje neeun” jana leochaaurute, “Canune laen Curisito lauri caje neeun,” naaure.

13 Chasiinna araai lauriin neleruhin niha Curisitone coalanaala niritiin ereriquiche. Coatihachu canu Faboro nichaaunne inara coreniha coroso que ohanulune coalanaala. Niheichu, Faboro nichaaunne coreniha baotisanojohi niheeiche.

14 Cana Coaunera coroaajihanu, Curisifo, Caiho, naa-joainunri baotisaanune baiha leochaauru cachaauru baotisa-e nihanulune jaun.

15 Nitohanihane jaun nii chuni, Faboro nichaaunne laurinihane coreniha baotisanojohiniha nocoetiin erenaa nainihe.

16 Chaen nechu Esetefana lauri baotisaanlu. Coatiha nii baiha chuni baotisaanune coitucuhaaun.

17 Coatiha cacha baotisaanune coina caletoaailu Curisito. Raujiaaincha jianacoon nenea nainecururichain cachaaurune bihanune coinate caletoaelu. Coatiha amurijiriin cha coitucueraneein nihanune coina caletoaailu. Nitohanihane saijieein cha coitucueraneein nenea rijijieein nere bihanune, cha que nelaterihe cana ichoteraneein nihane coina coroso que ohalu Curisitone.

*Curisitote, niicha ichana naine aina niicha coitucuhi ichaa Cana Coaunerane jaan ne.*

18 Nii coroso que ohalu Jesocurisitone que erenaate aonacure nii cha que nelatihei rijijieein nii nitajeeuruhane coina nenacaauru coitucuhichuru. Nete laen cana rai jianacoon cacha mitaeranein ne nii erenaa, jeelai Cana Coaunera ichanohineein.

19 Rai Quiricha Inoaensi cuhane:

“Itolere coitucuureraauru coitucunojoi itajeeinne, nainaan ichaauruha nainanacaaurune jaan itajereunni,” naain bihalu Cana Coaunera.

20 Inae cha que nelateein nedaauruhi itolere coitucuureraauru aina cacha relaaureraauru. Niheichu nelateein nedaauruhi, caa cana rai chauratane que nenacaauru itolere coitucuureraauru niha natiin. Satiin itolere coitucutoha no-coenacaaurute, leinjiin aaso rijijieein ratiri Cana Coaunera.

21 Cana Coaunerate niicha coitucui ichae, nabana nii niicha coitucui aina cuaain niicha tei ichaonaa coitucuhin nichotenaa nainecuruha nii coitucuhichurune coataa. Nitohanihane jaaunte, rai nere letoae, satiin esenetaain jeriha cachane jianacoon ichaonaa nainihane coina. Nete, nii

nere esenetaaichuru, joaenreein nelatihei rijjijeein aonacuruhane niha natiin, esinae rauhijiriin jianacoon cacha mitaeraneein ne.

<sup>22</sup> Nitohanihane jaunte, cojoelanaacojoai coana jerecure Joriocuru nichaaunne. Jana Curiecocuru, cha coitucuuruhane jaanu ariiriichure.

<sup>23</sup> Nena canacaanu, jianacoon cacha mitaeranu que Cana Coaunera letono coroso que onaaluu beebjihacaanu. Niite Joriocuru rai leiijiin nererojoecanaaneein acaauru tee. Jana Jorione lanaala nenacaurute, nechu joaenreein nelatihei rijjijeein aonacure.

<sup>24</sup> Nete Cana Coaunera cotihanoichuru, Jorioneein, Curieconein, naaonjoaain nihacachene niha natiin, nii letono Mesihasi Curisitote jeelai Cana Coaunera ichanohin ichaain, niicha coitucui coitucuhin nihane coitucuhacache.

<sup>25</sup> Cana Coaunera beratenojoin, joaereein nelatihei rijjijeein coaraa cachane niha natiinte, satiin cachaacha coitucui amurijiriin nelate. Chaen techu Cana Coaunera icharatenohi, nelatelanaala coaraa cachane niha natiin, jataain cachaacha ichai amurijiriin, laraajiin mijiaineein nereein itolere bana.

<sup>26</sup> Canejeraauru, coroatajajeeincha inara tabaauru cha coitucuera rijjijeein neeichene saijjeein, jitariin inara cotijiaain niha Cana Coaunerane que nainaaichaaache. Nii ichoae tacaain techu coroatajajeeincha inara tabaauru nelateinnein nenacaauru cachaauru lauri caje neein, cocoinanacainein, naaonjoainein neeichene saijjeein jitariin inara rae Cana Coaunera. Nii que nainaaichaaache.

<sup>27</sup> Nitohaneein itolere que nainaa nocoetonacaauru necoeje chanunaa jerenacaunte, jaolecooruha nii nainanacaaaurune jaancuru cachaauru janijiin cotijiae Cana Coaunera. Chaen techu nii leeochoauru amurijiriin nelatenacaauru raelanaala, nii nelatelanaala acaauruhacha coaracuri cachaauru raain ne Cana Coaunera, acaauru necoeje chanunaa jerenacaun.

<sup>28</sup> Nitohaneeinte jerenohinelanaala, coiintenojonein, nelatelanaala, naaonjoaain cachaauruhacha coarai cotijiaain ranajaain ne Cana Coaunera, nechu nii acaauruhacha itolere amurijiriin nelatiha nocoenacaauru que jaoleconaa jerenacaun.

<sup>29</sup> Nitohaneein Cana Coaunera acatiha nihacachene jaun, nainihaacache leeochoauru amurijiriin nihacachene coaratihacachene.

<sup>30</sup> Cana Coaunerate raajenihane inara raain ne, rai Calaohi Jesocurisito aina neeichene coina. Chaen techu nii rai Calaohi Curisito coreniha chabana canaacha coitucuhi coitucuhin, coreniha osa caje mituhin, cha juaihoneein nena caje



ichoteratenojoneein, jelai teein que banijiaain raotojoein nena caina ichae Cana Coaunera.

<sup>31</sup> Nitohanihane quete: “Caohachaa cana raajenihane canaacha ichai coreniha necohasitaacachene. Cana Curanaacha ichanojoiincha coroaecaachenete laen caohachae,” nae Cana Coaunera Quiricha Inoaensi cuhane.

## 2

### *Coroso que atinanojoin Curisito beratenojoin*

<sup>1</sup> Aonacuche canejeraauru. Inara rai Cana Coauneraacha ichaneni coitucueraelanaala nena que iriha uhanune bana coatiha inaraacha coitucunaa nainihe que irinaaunlu.

<sup>2</sup> Nii inara aina nihanune bana, coatiha leecha coacuhin que inara rai irihaaunlu, esinae rauhijiriin coroso que neein onaalu Jesocurisitohachane coacuhin que inara relaaunlu.

<sup>3</sup> Chaen nech u inara rene turuhanune nunuheneein, joaenreein cacha chaque nelatihei rijijieein turuunlu.

<sup>4</sup> Niheichu Cana Coaunera jerenohin que inara relaanune bana coatiha canu esenetaaichene jerenacaaun nii aitocuruha nii itolere coitucuerane rijitiin ereein inara relahaaunlu. Nena rai Suujue aina itolere ichana nainiha Cana Coaunerane jaan aina cuaain inara que jereratichaaune jaun nii aina esenetaaichelu.

<sup>5</sup> Leinjiin Cana Coauneraacha ichanenu esenetaain que jaecohichene coinane, nitohaneein inara relanajacoon, nabana suujua caje rocohin cachaauruhacha coitucunojoi que jaecohichene coataa.

### *Rai suujue aina cuaainte necoitucuherate Cana Coaunera*

<sup>6</sup> Nena laen inae acaauru suujua cuhane niicha esenetai aina iinacaauru rai jelai amuritoheriin canacaanu que Cana Coaunera coitucueratenojoi que irihacaanu. Coatiha caa chauratane que nenacaauru cachaauruhacha coitucui que nihei. Niheichu acaauru rai cocoinanacaaihuri nitajerai nenacaauru coitucunojoneein nena que aitohaacaanu.

<sup>7</sup> Acate caa cana rai chauratane coaunaane ajiniha, enene cana necaohachanu que niicha ichanenine que inae coausilu Cana Coaunera. Nii quene caa inara rai irihacaanu.

<sup>8</sup> Nii coitucueraelanaala nena niicha ichanenu coausihalu Cana Coaunerane coitucuu renihane jaunte, coroso que teein nii cana rai caohacha icharaannu que letono atinaaurelu. Coitucuuruhane jananihane, coatiha coroso que teein atinaaururiheilulu caa chauratane que nenacaauru cocoinanacaaihuri.

<sup>9</sup> Nete Quiricha Inoaensi cuhane:

“Cana Coauneraate  
belaichaaauru rai,

chabana coanojoinelanaala nena  
 aonanojoinelanaala nena,  
 naaonjoainuri ichaain  
 acaauru que banihateein rucujue.

Niheichu chuni,

‘Naaonjoanrichaain’ naain que coaaura,”

naain beratihalune nainaane coina ichae Cana Coaunera.

<sup>10</sup> Nii niicha ichaneni, niicha coacuilute cana que coitucuerate, rai Suujue aina cuaain Cana Coaunera. Nii Cana Coaunera Suujuete, satiin niicha ichaneni coitucue, satiin suujua cuhane niicha coaculine maajeein.

<sup>11</sup> Nihei chuni ita suujua coitucuna nainera. Leinjiin nii suujua cuhane nena, rai suujuete naine cacha suujua coitucuhane. Nii rijijieein techu nene chuni Cana Coaunera Suujua coitucuera. Acaihaniji rai Suujue rai suujuaacha cuane nenaachate rai suujua coitucue.

<sup>12</sup> Coatiha canacaanu, caa Cana Coaunera coitucuelanaala nenacaauru cachaauru rijijiein Moconajaera suuje rahaa-caanu. Acaihaniji Cana Coaunera Suujuene raacaanu, aina cuaain jataain cana belaitohane jaun, cana rai niicha tei coitucunojoin aonaain coitucuhin nihacachene coina.

<sup>13</sup> Canacaanu relaa Cana Coaunera Suujuene jaan quene aitocaaanu. Coatiha canacaanu suujua cuhane canacaanuhacha coacuhi que aitoaacaanu. Nitohaneeinna Cana Coaunera Suujue beratenojoi bihacaanu, Cana Coaunera Suujue coitucuhin nenacaauru rai.

<sup>14</sup> Nitohanihane jaunte, Cana Coaunera Suujue raenihane coina ichaonaa, nii Cana Coaunera Suujue jerenohi coitucuhin tonorana nainene, nii chaque nelatihei rijijieein aonaane jaun. Niheichu aonaane niha natiin coitucunaa nainihei, Cana Coaunera Suujue sirinihane jaun.

<sup>15</sup> Nete laen Cana Coaunera Suujue siricha itolere coitucuhin coulurujuenaa nainereein. Nerinaain que tonaain que ereein aca coulurujuenaa nainera.

<sup>16</sup> Nitohanihane coinete, “Nihei chuni suujua cuhane Cana Coauneraacha coacui coitucuera. Niheichu chuni suujuete-naa nainera,” nae rai Quiricha Inoaensi cuhane. Nete laen cana, coaauca Jesocurisitone rijijieein coaaucaache.

### 3

*Canacaanune Cana Coaunera letononeein ita amihaneeon coroatajaneraneein nihacaanu.*

<sup>1</sup> Canejeraauru, nii jauriaanejeein inara relaa uhanune bana, coatiha Cana Coaunera Suujue letono rijijieein inae ijiin ichaonacaauru cachaauru relaanune rijijieein inara

relanaa nainihaaunlu. Nii jaunna Cana Coaunera coitucuhichuru cachaauru rijijieein ichaohichene jaun, Cana Coaunera Suujue letono rijijieein inara relanaa nainenee-unlu.

<sup>2</sup> Nitohaneechene jaunte, caaintaelanaala inara relaanu-lune jana, tonoraelanaala abaantana naineneeichelu. Nihe-ichu enanetojoein nihanatiin tonorana nainiheechel.

<sup>3</sup> Aihuruha Cana Coaunera coitucuhichurune rijijieein enanetojoein inara suujua coaraquichene jaunte, nii ita que necoelaain, ita que nererojoeaain, naajoaain neeiche, aihuruha satiin Cana Coaunera coitucuelanaala nenacaauru cachaaurune rijijieein.

<sup>4</sup> “Canune Faboroacha ere tonoraaun,” jana leeochoauru “Canune Aforoacha ere tonoraaun,” naain ereeichene jaunte, jaiti Cana Coaunera coitucuelanaala nenacaauru cachaauru rijijieein ichaohichene jaun aitocoiche.

<sup>5</sup> Coatiha canu Faboro nichaaunne chanihaaun. Nihe-ichu cha nihei Aforo netonai. Canacaanune raujiaain Cana Coaunera letononeein, inara aina niicha ichaneni coitucuer-ateraneein canacaanu letoaa Cana Coaunerane rijijieein, ni-icha icharatenohin icharaneein nihacaanu.

<sup>6</sup> Canune inara que Jesocurisito coitucuerateraneein neeun. Jana Aforote caohachaaain coitucuhichene coina que inara relaeraneein ne. Nete laen Cana Coaunera, nii aina cuaain chabana nitajenaachara ichaonaa teraneein ne inara rai.

<sup>7</sup> Nitohanihane jaun, nii inara que coitucueratera nichaaunne, nii inara relaera aina chaneein nihaacaanu. Cana Coaunerate laen nii inara relaacaanune jaan aina ijiin ichaohichene coina icharaneein ne.

<sup>8</sup> Nitoanihane jaun, canu inara que nii Cana Coauneraacha ichai cotucueratera nichaaunne, nii que inara relaera aina jiniiquiin ita rijijiaaanu. Nete laen nii inara que niicha ichaneni coitucueratihacaanune cainareein Cana Coaunera.

<sup>9</sup> Canacaanune Cana Coaunera letononeein canacaanu rai niicha tei amihanenaa que ita coroatajaneraneein niha-caanu. Inarate leinjiin ocoana aina leinjiin loreri rijijieein neeiche Cana Coaunera rai.

<sup>10</sup> Jana canune, inara que amihanenaa nunuheteraneein neeun Cana Coaunera letononeein. Jana leeochoaurute, nii quiicha banesijiatei bucutejeeure. Nete, le cachanichaachene caohachaaain ichacaachene coaraain ichacaachene cao-hachae.

<sup>11</sup> Nihei chuni nainiheii nii banesijia quiicha tenojoin coreein leocha tenaa nainera. Nii banesijia canuhacha teite Jesocurisito ne.

12 Nii rai banesijia quiiha temunojoin ichoaete nainere, coata coreti, ajeri coreti, enuha, elele, jiarana nujua, naajoain caje nainecurure loreri ichacuruhane.

13 Nete, inae le cachanichaachene ichao cojuhin coaraa Cana Coaunerane cojoanona que turuhane bana, le cacha cachaauru amihaneeon inanaca cureein. Nii banate, usi tabaineein ureein nii cana ichanaa cojuhin coaraane coina.

14 Chariji ichanaa teeinti mocohelanaala nii usi abaantae, nii icharate core raa cureein.

15 Jana mocoha nii niicha ichainete, nitajiha cureein rai namihaneeo. Jana nii que amihaneite, nii usi caje nichotereein cha colane.

16 Tana Cana Coaunera loreri neeichene jaun, inara suujue cuhane niha Cana Coaunera Suujuene coitucuhichene.

17 Nii Cana Coaunera loreri neeichene jaunte, osa que inara saruhin baasoneein inara teranihane, Cana Coaunera loreri aasaeca aicheein. Niite aca itajiha cureein Cana Coaunera, acaihaniji rai loreri neeichene saijieein inara ichao asaacane coreniha. Inarate nii rai loreri neeiche.

18 Coa inara raaje necoritaache Cana Coaunera coitucuhichuru rijijieein itolere coitucuha nocoetiin. Nitoaneein neeichene, nii baiteein enacoauneein Cana Coaunera coitucuhin neeuchete, esinae rauhijiriin cha coitucueraneein neeiche. Nii banate laen esinae rauhijiriin cha coitucueraneein neriquicheein.

19 Nii quete, “Nii itolere coitucutoha nocoeeuruhane jaan aina raajenihane necoritaauruha que jaoleconacaaurune coinete ichae Cana Coaunera,” naain ne laenanohineein Cana Coaunera Quiricha Inoaensi cuhane.

20 Chaen techu coaiten, “Nii itolere coitucutoha no-coenacaauru coaunojoite, nii cha que nelatenihane coitucue Cana Coaunera,” naain ne laenanohineein Cana Coaunera Quiricha Inoaensi cuhane.

21 Nitohanihane jaun chunocoha cacha, joenreein namute cacha rijijieein ichaohane nainihe, raotojoein niha nocoetiin necohasitaane. Satiin itolere inaraacha lateite, inara rai teein ne Cana Coaunera. Aihana jaun, Cana Coauneraaachate coroaena nainequiche, inara rai itolere teein ni-hane coreniha.

22 Canu, Aforo, cana rai chauratane, cana rai ichaonaa, caa ena nena, cabaiha neenihun, niichurute Cana Coaunera tenojoineein neeure inara rai.

23 Jana inarate Curisito rainequiche. Jana Curisitote Cana Coaunera raine.

## 4

*Afosotooru amihaneeo.*

1 Cana Coaunera ichanohi coitucuheraelanaala nena que Curisito letononeein rai cacha relaeraneein nihacaanune coitucuhichenete caohachae.

2 Chaelai icharaanu que letononeein nihacanete, nii cana letoaera suujua rijijiein nere tonoraain ichacaane caohachae, nere tonoraain nihacane coitucunaa nainiha nii cana letoaerane coina.

3 Nena laen baasoneein ichacaaunne coitucueralanaala canu que ereein neeiche cocoainanacaaihuri ainane nihanatiin, cha que tonajeneeun. Niheichu canu raajenihane nihanatiin baasoneein, caohachaaain, naajoaain ichacaaunne coitucunaa nainihaaun.

4 Nena, nii casuujua cuhane baaso ichaenihanune coaucaunne, canu baaso ichacaaunne coitucunaa naineneeun. Cana Coaunera laen, baaso ichaain, caohacha ichaain, naaonjoannune coitucuha cureein.

5 Aihana jaun, "Acate baaso ichae," naain leeochoaauru que erena nainiheeiche acaauru ichao coitucueralanaala. Jauriaanejeein turuha cana Curuaanaane cohacuche. Acate laen nainereein, jitariin nii suujua cuhane acaauruhacha coacuhi, acaauruhacha ichai, naaonjoainuri coitucuhane. Nii banate caohachaaain icharaauru lecachaauru coroaereein Cana Coaunera.

6 Canejeraauru, inara caohachanu quene caa inara rai Aforo, canu, naaonjoain nichaanune ichanohin que cuaain inara rai beeun, caje coauneein canacaanu ichanohi que coacuhin, rijijieein ichaquichene coina. Nabana Quiricha cuhane aitohane edaa cuaain ichaquichene, nabana leeochoaauru amurijiriin cha coitucueraneein nena coacuhin, acaauru que jaolecohichene coataa.

7 Chariji inara rai leeochoaauru amurijiriin neeichene jaannu teein ne. Chariji inaraacha sirii, Cana Coaunera tenojoinelanaala siriqiche. Tana Cana Coaunera, inara rai itolere tihane coitucuhichene. Nii saijieeinte inara raajenihane cha eruhera rijitiin inara necohasitaacha que neeiche.

8 Nitohaneichene jaunte, itolere inaraacha jerei siriin, itolere cacha curuaanaa *rey* niha nocoetiin, canacaanu latiha nocoeteneeiche. Bajiaanachuhinti esinae rauhijiriin *rey* esineneein neneeiche, inara caje canacaanuhacha latei bajaain, inaraacha sirii sirichanein nihacaanu canacaanu netonaine coina.

9 Canacaanu afosotooru nichaanune raite, jataain leeochoaauru amurijiriin necairichanaa coaraain ohacaanune coina ichara tocoaneein canacaanu te Cana Coaunera. Chaen nechu, satiin anjeraauru, cachaauru, naaonjoainuri notaracae nihacaanu, nii cairichei coaraain.

10 Curisito esenetaain niicha jerenohin tonoracaanune

corenihane, aaso cha coitucuhi rijijieein nihacaanu. Jana inarate, itolere Curisitoacha jerenohin coitucutoha nocoetiin neeiche. Chaen techu, joaereein nelatihei rijijieein nihaacaanune jana, inara itolere amurijiriin laraajia nocoetiin neeiche. Nitohaneechene jaunte, inara leeochoaauru aina jiniiquiin, canacaanu que jaolecohiche. Jana leeochoaurute, inara que suujua acatecure.

11 Enanetojoein mijitena, cocoiinina, cajione, naaonjoain que necairichaacaanune jianihacaanu. Nii canacaanu que jaolecooruhane ichoae tacaain techu, canacaanu que nererojoecaure. Niheichu nii canacaanu nenaja niha natiin.

12 Chaen nechu cotaecaanu canacaanu bijiicha que amihanejeein. Canacaanu cotaicha raine, caohachaaain nihane caina irihacaanu. Chaen nechu canacaanu rerohecaauruhane niha natiin abaantaacaanu.

13 Canacaanu rai baasoneei iriha cachanena, raotojoein tonoraacaanu. Nitohaneente caa cana rai chauratane que jaoleneein nena utoone rijijieein canacaanu coaraain, enanetojoein canacaanu que jaolecoore.

14 Coatiha inara necoeje chanuha aitiin laenahaaun. Inara suujuatihane ichaaun. Inara belaihanu canu calaohi rijijieein neeichene jaun.

15 Inara Jesocurisito ranojoeinein neeichene relaeraneein neeuruha lechoonca oaraancaneein niha natiin, coatiha acaauru inara inacanihei. Canune laen inara que, nii enene inaraacha esenetai Jesocurisito coitucuerateein, nii osa caje nichotiha cachane jaan ichaonaa, naaonjoain beraneein inara inacaneein neeun.

16 Nitohanihana jaunne inara rai aitoon, canu ichao rijijieein ichaohichene caina.

17 Nii ichaohanune rijijieein ichaohichene coinane, nii Cana Curuaanaa coreniha cacalabi-casuujua rijijieein nena Timoteeo letoaaun. Acate Jesocurisito esenetaeraneein nihanune ichao rijijieein, Jesocurisito ranojoihunru rene turuhannune jaunru inara relaanune coaquichene caina inara rai bereein.

18 Inara tabaaurute inae itolere coitucuha nocoetiin raotojoein neeure, inae inara rene nacoauneein tururichaaunine esenetaaurenihane jaun.

19 Nena Cana Curuaanaa jerihane enanocoojoa inara rene bedaeniha ureeunni. Nii banane, nii itolere coitucutoha nocoenacaauru coareeunni, nii nelatecuruhane coaraaunne caina.

20 Coatiha erenaacha nihei Cana Coaunera Cojoanona. Acate canacaanu cocoinae, itolere ichana nainein, itolere rucuhena nainichaanune jaannu tein.

<sup>21</sup> Aihana jaun cha jeriquiche. Rauhijiriin inara casetecaa uhanunena jeriquiche. Ainihane jataain inara belaa inara coaraa uhanunena jeriquiche.

## 5

### *Baasoneein ichoai sitaauche inara caje.*

<sup>1</sup> Leinjiin nii inara jana nenea, rai inaca comasai- nebaene siriha rai comasaineeinne coitucuhanu. Nitohaneein ichaonaate, jataain coasinacai ne. Nii Cana Coaunera coitucuelanaala nenacaauru niha natiin, nitohaneein ichaonaa nainecuruhi.

<sup>2</sup> Nii saijieeinte caohacha ichaa nocoetiin rachoojoeiche, bana nii baaso ichaquichene que coacuhin inaderaelanaala. Aihana jaun inara jana nitohaneein ichaoa cachane sitaauche.

<sup>3</sup> Canu jaberoconeein inara aina nenihanune niha natiinne, canu sujua cuhane inara coaareeunni. Nii jaunna caa inara rai canu jaberoconeein netiin aitocooaunne rijitoejein aitoon, canu Jesocurisito cocoainanohinee inii caitoonjoa tocohaneein baaso ichara casetecaaichene coina.

<sup>4</sup> Ita taojiaaichenena canu suujua cuhane inara coreniha Cana Coaunera bajareeunni, caohachaa inaraacha ichaneni ichaquichene coina. Chaen techu Cana Curuaanaa Jesoso netonai ecu nicha ichana nainei letoareein, ecu inara aina nihane coina.

<sup>5</sup> Nii jana laen, nii baasoneein ichaonaa cacha teeuche Moconajaera rai, nitajiha rai jaberocone niha natiin, inae turuha Cana Curuaanaa Jesusone bana rai suujue nii caje nichotihane coina.

<sup>6</sup> Nitohaneein neeichene jaun, nainiheiche caohacha ichaa nocoetiin ereeichene. Inarate, “Coaerai curu cuhane jorerera tihacanete enaacha coerae,” naa erenaane coitucuhiche. Charijieein teeinti nii jorerera lomohe nii coaerai, nii rijijieein techu inara ichao aasaeraneein ne nii inara jana nenea baaso ichara cacha.

<sup>7</sup> Aihana jaun charijieein teeinti jorerera jaohin, jorerera colane faan jaaure Fasocaa beseta bana quihuruhane coina. Nii rijijieein nii inara jana nenea cacha baso jaoche, nabana rai nichao baaso aina inara ichao asaecane coataa. Curisitote, carenero sooruhane rijijieein Fasocaa bana cana coreniha sohin jaaorelu, jianacoon nihacachene coina.

<sup>8</sup> Charijieein teeinti baaso ichara cojunacaneein niha jorerera jaun, Fasocaa beseta bana nii jorerera colane ichanohi faan quihacache. Nii rijijieein techu nii jorerera colane ichanohin faan rijijieein, aihalu Jesocurisitone rijijieein, cana jana baaso sirilanaala ichahacachene caohachae.

<sup>9</sup> Nii leeocho quiricha, inara rene canu letoanojoin cuhana beeun inara rai, nabana namute quicha aina, leeocho ene aina, canaanaihunru aina, naaonjoaainunri aina niicha jerei ichana jereein nenacaauru raain neeichene coataa. Nii rijijieeinchu enecuru nihanatiin namute ene aina, leeocho quicha aina, canaanainunru aina, naaonjoaainunri aina niicha jerei ichaai ichaonacaauru ranaa nainiheeiche.

<sup>10</sup> Coatiha nii Cana Coaunera coitucuelanaala nenacaauru, namute quicha aina, leeocho ene aina, canaanaihunru aina, naaonjoaainunri aina niicha jerei ichana jereein nenacaauru caje amuhichene coina aitohaaun, Chunijiun cuhichene niha natiin lanaenerichaa in baaso icharaaurune jaun.

<sup>11</sup> Raujiaaine inara rai aitoon nabana nii Cana Coaunera coitucuhin neeuruhane saijieein, nii nejelau sinijeranelanaala nena aina ichaonacaauru, barionein ichaonacaauru, nii ichanohineein nena coauneraacha esenetaeraauru, casajenetiin, ajetoritiin, asijiauharitiin, naaonjoaain nenacaauru aina, “canejera,” naain acaauru rai ereein neeichene coataane aitoon. Jiaonriha Cana Coaunera coitucuha nocoetocuruhane saijieein nitohanein ichaonacaauru aina nelaurihaain lenonequichene.

<sup>12-13</sup> Coatiha nii joaenreein Cana Coaunera coitucuelanaala nenacaauru, baaso ichacuruhane niha natiin acaauru rai ereein rucuhena nainihaaun canu. Cana Coaunera telaen, nii baaso ichacuruhane coitucuhin, acaauru que niicha ichaneni coitucureein. Nete laen inara nainequiche, nii cana rijijieein Cana Coaunera coitucuhin nenacaauru baaso ichacuruhane rucuhequichene caohachae. Aihana jaun, nii inara jana baasonein ichaonaa cache sitaauche.

## 6

*Jiaonriha nejesinajeein inara rai niha chatohanai rucuhenacaine Cana Coaunera coitucuelanaala nena cocoinanacai rene cuhichene.*

<sup>1</sup> Chunocoha inara rijijieein Cana Coaunera coitucuera, inara rai baaso ichaane jana colurujueanaa jeriquichene, nainiheii nii Cana Coaunera coitucuelanaala nenacaauru cocoinanacaihuri jaesiocuru rene coulurujueeichene. Raujiaainchate nainere Cana Coaunera coitucuurera bichauhe neeuru rai beeichene, caohachae acaauru coitucuhin rucuhacuruhane coina.

<sup>2</sup> Tana Cana Coaunera coitucuelanaala nenacaauru, baaso ichaain, caohacha ichaain, naaonjoaauruhane coitucuhin, rucuherrichacheein Cana Coaunera coitucueraneeine coitucuhichene. Nitohanein Cana Coaunera coitucuhichuru



ichanohin coitucuhin rucuherraneein nerichaacheeinne saijeeinte, nii aansijiin laajoiri caaintaelanaala nenea rucuhena naineneeiche.

<sup>3</sup> Tana Cana Coaunera letonocuru, anjeraaurune maajein baaso ichaain, caohacha ichaain, naaonjoaauruhane coitucuhin rucuhena nainerichaacheeine coitucuhichene.

<sup>4</sup> Aihana jaun chanuna jana chaen jaiti cau nenea ichaonaa que ichaohichene jana inara aina baaso ichaa inara rijijiein Cana Coaunera coitucuherrane, nii Cana Coaunera coitucurera rai chanelanaala nenacaauru joesiocuru rai couluru-juein naaonjoaainche.

<sup>5</sup> Nocojequichene jaan nuquene caa aitoon inara rai. Tana inara Cana Coaunera coreniha ita nejera nejesinaneeinne, ita rai baaso ichaain neeichene nihanatiin niha leinjiin inara jana rucuhena nainerane coitucuhichene.

<sup>6</sup> Chaen techu nii ita nejera nejesinajeein ita cotaachene, nirijiein jianena coacuelanaala cocoinanacaaihuri-Cana Coaunera coitucuelanaala nenea rene amain naaonjoaainche.

<sup>7</sup> Nitohaneinte, nejesinajeein ita rai aasaeriin baaso ichaquichene coreniha ita coulurujuein jataain banejelanaala baaso ichaquiche. Chanuna baaso ichaain ita coulurujueichene ajiniha, baaso icharanihane abaantaeneeiche. Chanuna coaraain inara basijiaauruhane abaantana naineneeiche.

<sup>8</sup> Nete nii abaantana coacuelanaala, Cana Coaunera coitucuherrane nejesinaneein ita basijiauhin naaonjoaainche.

<sup>9-10</sup> Tana nitohanein necha aansaineein nenacaauru, Cana Coaunera Cojoanonaa que nenea nainecurenerichaanne coitucuhichene. Nitohanihana jaun jiaonriha inara coritaaauruha Cana Coaunera coitucuhichurune esenetaaichene. Coatiha Cana Coaunera Cojoanonaa que neeururinaain namute quicha aina, leecha ene aina, canaanainunru aina, naaonjoaainunri aina niicha jerei ichana jereein nenacaauru, nii rijijieenchenecuru nihanatiin namute ene aina, leecha quicha aina, canaanainunru aina, naaonjoaainunri aina niicha jerei ichaai ichaonacaauru, namute cacha ichanohineein nenea coauneraniha niicha beeri belaichauru, sinijeraocuruhane niha natiin leecha ene aina ichaojeraquiin nenacaauru, namute quicha aina ichaonacaauru, asijiautooru, coriquiicha que coacuhin ichaonacaauru, ajetoriaacuru, namute cacha cairichaa casajenetiin ichaonacaauru, nii nechunamute cacha cairichanaa jerenacaun baasoneein suujuateeureraauru, naaonjoainurine coitucuhichene.

<sup>11</sup> Nii rijijieinte nerejetocure inara tabaauru netonai. Nete

inae enene nii caje couluunojoneein jianacoon neeiche, Cana Coaunera cachaneein. Chaen techu, inae nii ujuai-honeein neeichene caje, inae Cana Curuaanaa Jesocurisito, Cana Coaunera Suujue, naonjoainuri coreniha jianacoon neeiche.

*Suujua letono ichana nainihe i cachea.*

<sup>12</sup> Chaen techu, “Nainichaaun joenreein quiicha jerei ichacaanne,” naain ereeiche. Esinae rauhijiriinte niqui aitocoiche, nete caohachaene satiin itolere joaereeincha ichana jerichaane. Aihana jaun nainihe cana jaberoco amuritoeratihaca nii canaacha ichai que ne.

<sup>13</sup> Esinae rauhijiriinte niqui, “Itolere lenonete coaunanojoi ne, que lenoneein ichaohanune coina. Nii rijijieein techu jatoroaain ne, canu suri jitariin canuhacha quii raane coina,” naain ereeiche. Nete inae ecu tihane bana, lenone, cana jaberoco, naonjoain satonotereein Cana Coaunera.

Nii rijijieein techu cana sinijera ainaacha ichaohacachene coina cana coaunaain nelu Cana Coaunera. Coatiha joenreein cana sinijeranelanaala nenacaauru aina canaacha jerei ichaai ichaonaa coina nihein.

Nii jaun nainihaacache joenreein naosateein nihacachene.

<sup>14</sup> Nitohanihane jaunte, Aca jerihane rijijieein tonoraain nena, Cana Curuaanaa ichatiha O cajene rijijieein cana ichatiha cureein Cana Coaunera.

<sup>15</sup> Tana nii nitohanihana jaun, Curisito jaberoco niha inara jaberocone coitucuhichene. Aihana jaun nainihe, Curisito jaberoco niha inara jaberocone jaun, leinjiin coriqui jeriha quicha aricha ene jaberoco rijijieein inara jaberoco teiche. Nitohaneein jerihane inara jaberoco tenaa nainiheeiche.

<sup>16</sup> Tana leinjiin ene cojoaeloroe aina, niicha jerei ichaa cachane, inae ita jaberoco que jaberocoha cachane coitucuhichene. Cana Coaunera Quiricha cuhane techu, “Ene aina ita raain niha cachanete, jiniquuin ita jaberoco que jaberocona rijijieein ichaaurureein” naain ne laenanohineein.

<sup>17</sup> Nitohanihane jaunte Cana Coaunera coitucuhane, Cana Coaunera suujue aina suujue te cachea.

<sup>18</sup> Nitoanihane jaun leeocho ene jereein coaraain, aina inaraacha jerei ichana coaauquichene jelai caje amuuche tonoraelanaala, nii rai sinijeranelanaala nena ene aina naosatelanaala. Leeocha osa que neosatiha cachane niha natiin, coatiha laen rai jaberoco aasaehai. Nii comasinelanaala nena ene aina niicha jerei ichaain niha cachanete laen, raajenihane rai jaberoco aasajeein naosatiha ai.

<sup>19</sup> Tana inara jaberoco, Cana Coaunera tenojoin rai suujue nenaja nihane jaun, inara suujue cuhane ichaoha Cana Coaunera Suujuene coitucuhichene. Aihana jaun coatiha inara, inara raajenhane inara jaberoco eroraniheeiche.

<sup>20</sup> Cana Coaunera jataain coreein inara coreteen nihalune jaunte, acaihaniji raachaneein neeiche. Aihana jaun naitoonjoan tonoraain niicha jerei ichaain neeichenete caohachae.

## 7

### *Nisinijerateein niha cachane que suujuatera*

<sup>1</sup> Enane laen nii quiricha inaraacha letoai cuhane, canu caje inaraacha bajai bereeunni inara rai. Caohachariha niqui ene raelanaala niha quichane.

<sup>2</sup> Nete enaacha joaereein ene aina niicha jerei ichana jeriha quichane jaun, le cacha cachaauru comasaihocane caohachae. Nitohanihane jaunte, enecuru netonai niha natiin caohachae nelanajaain neeuruhane.

<sup>3</sup> Chaen techu jiniiquiin nii rai lana aina, ita ere tonoraain raotojoeein jiniiquiin ita coiintelanaala neeuruhane caohachae.

<sup>4</sup> Coatiha nii ene inae lanaaocane raaje jaberoco eroranihei. Rai lanate rai jaberoco erora ne. Niheichu nii quicha niha natiin comasaihocane raaje jaberoco erora nihei. Rai comasaite rai jaberoco erora ne.

<sup>5</sup> Aihana jaun nainiheii inara sinijera aina ita coiinteein neeichene. Cana Coaunera bajanaa jeriquichenete laen jiniiquiin cosinacaichene coina nainequiche inara sinijera rai beein, ita suujua rijitoejin coacuhin ichaquichene caohachae. Nii baihate naineriquiche coaiten jiniiquiin raotojoejin inaraacha jerei ichaquichene caohachae, nabana inara amuritoa moconajaerane osa que nesarucichene coataa.

<sup>6</sup> Coatiha inara letoahaaun necoansajiaaichene coina. Niheichu nii coatiha, “Coa necoansajiaache” nahaaun.

<sup>7</sup> Raujiaainchane niqui canu rijijieein neeichene jereeun. Nete Cana Coaunera tenojoinnein nejelaunihacoaain ichaohacache, tabaauru leochaneein, naaonjoaain.

<sup>8</sup> Ene colane nenacaauru, autanaauru, naaonjoainuri raine aitoon, nirijieein sinijeraaona coacuelanaala neeu-ruha canu rijijieeinne coina.

<sup>9</sup> Jana nichao berainaa nainecurenihane necoansajiauruhine. Nii amuritoeriinte caohachae sinijeraaocuruhane, nabana inacojoejin necairichauruhane coataa.

<sup>10</sup> Inae sinijera aina nenacaauru raine laen aitoon, casuujua letononeein que airijiin, caa caitoonjoante Cana Curuaanaa aitoojoanne. Jiaonriha inae leesajeein nisinjerateein niha enene, nii rai lana jaonaa coacuhin nihane.

<sup>11</sup> Jana nii rai lana jaohin niha nii enene, jiaonriha nacoauneein leocha quicha ranaa coaucane. Chaen techu naine nacoauneein nii quicha niicha joai rai ereein, ajetein cainaa nii enene caohachae. Nii rijijieein techu rai comasai jaonaa nainene quicha netonai.

<sup>12</sup> Caa caitoonjoa caje cuaainna laen casuujua caje rocohin inara rai aitoreeunni. Coatih laen Cana Curuaanaa aitoonjoan nihei. Chunocaa cana nejeraauru inae sinijeraquuin neein Cana Curuaanaa esenetaera nihane jana nii ene Cana Curuaanaa esenetaelanaala nena niha nii enene, ainaacha ichaonaa jeriha nii enene, nainiheii nii ene jaoha nii cana nejerane.

<sup>13</sup> Jana ene, inae leeinjiin quicha aina nisinjerateein neein Cana Curuaanaa esenetaera neniha nii rai lanane, ainaacha ichaonaa jeriha nii lanane, nainiheii nii rai lana jaoha nii enene.

<sup>14</sup> Nitohanihane jaunte nii quicha, Cana Curuaanaa esenetaelanaala nena nii Cana Curuaanaa esenetaera ene que sinijeraquuin nihane jaun, Cana Coaunera que banijiaain ne. Jerichanejeein techu Cana Curuaanaa esenetaera ene, Cana Curuaanaa esenetaelanaala nena quicha que lanaoocane, inae acaentonai Cana Coaunera que banijiaain ne, nii Cana Curaanaa esenetaera que sinijeraaocane jaun. Nitohaneein nenihane, coatih Cana Coaunera que banijiaain neein neeururihei inara bereecuru. Nete Cana Coaunera que banijiaain nena bereeneein neeuruhane jaun, jerichanejeein inara rijijieein Cana Coaunera cachaauru aina jiniiquin neeurureein.

<sup>15</sup> Aihana jaun nii ene, quicha, naaonjoainuri Cana Curuaanaa esenetaelanaala nenacaauru, nii rai sinijera Cana Curuaanaa esenetaera jaonaa jerihane jaohine. Nitohanihanete nii ene cana nejera, nii quicha netonai cana nejeranihane, nii ujuaihonneeuruhane caje jianacoon neeurureein. Cana Coaunerate inara raain nelu, raotojoein caohacha ichaonaa que ichaohin neeichene coina.

<sup>16</sup> Tana ii lana nihane jaun, ii coreniha ichoteratenojoneein jianacoon nena nainerihanine coitucuhine. Jana ii, lananeeine tana ii coreniha ichoteratenojoneein jianacoon nena nainerihani ii comasaine coitucuhine.

<sup>17</sup> Atiin nanequichene rijijieein, inara rai cha chaquichene jaanu tein nihalu Cana Curuaanane rijijieein neein, nii inara cotijiaain nihalu Cana Coaunerane jana ichao-

hichelune rijjijeein ichaaoche. Caa inara rai aitocoaaunne jaan quene, satiin Cana Coaunera ranojoneein nenacaauru rai aitoon.

<sup>18</sup> Aihana jaun chuni jaberoco macohi cari molonojoin nihane jana cotijiaain niha Cana Coaunerane, jiaonriha molonojoin niha rai jaberoco macohi carine suujihane. Jana chunocoha jaberoco macohi moloeratelanaala nihane jana cotijiaa Cana Coaunerane, jiaonriha rai jaberoco cari moloeratihane.

<sup>19</sup> Coatiha chaque nelatihei, molonojoneein, molonojinelanaala, naaonjoaan cacha jaberoco carine. Cana Coaunera aitoonjoan tonoraain ichaohacanete nii amuriiriin nelate.

<sup>20</sup> Nitohanihane jaun satiin Cana Coaunera cotihanohichurute naine, nii cotijiaain nihalu Cana Coaunerane jana ichaohalune rijjijeein jerichanejeein ichaohane caohachae.

<sup>21</sup> Aihana jaun inara amute cacha letononeein core colane rai amihanejeein esclavo neeichene jana inara cotijiaa Cana Coaunerane, coa nii que tonajeein nihache. Nete laen inae ena nii esclavo neeine caje nichotena naineine, raotojoeein jianacoo nichoteeu.

<sup>22</sup> Nii rijjijeeinte Cana Curuaanaa jerenohin esenetaane caina cotihanohichuru osaaonacaauru, inae enene rai nosa caje jianacoon, Cana Curuaanaa letononeein neure. Jerichanejeein techu nii letononelanaala nenacaauru cotihanohichuru, enene Curisito letononeein rai niicha jerei icharaneein rai esclavo neein neure.

<sup>23</sup> Cana Coaunerate jataain coreein inara coreteein nelu. Aihana jaun nainiheeiche inara amute cacha letononeein nena coaaquichene.

<sup>24</sup> Aihana jaun canejeraauru, atiin jerichanejeein nii cotihanohineein neeichene bana ichaohichelune rijjijeein, inara ichao corenaa coacuelanaala Cana Curuaanaacha jerei rijjijeein ichaaoche.

<sup>25</sup> Nii necoansajaeniha cachane que, carai beniha Cana Curuaanaane jaunna coitucuheneen rauhijiriin. Nete aca canu coroatajanihane aina cuaain, inara rai rauhijiriin beeun.

<sup>26</sup> Caraita nii nihane rijjijeein, comasaihocane comasaiquelanaala, lanaaocane, lanaquelanaala, naaonjoaain neeuruha enecuru aina jiniiquiin quichaurune caohachae, caa ena caaintati ichaonaa que ichahocachene jaun.

<sup>27</sup> Aihana jaun comasaihoquichene jiaonriha jaohichene. Niheichu inara comasai colane neeichene jiaonrihachu ariichene.

28 Nete necoansajain neeichene naosatiha aineriquicheein. Niheichu leinjiin ranuna niha natiin nelanajaane naosatiha aihei. Nete laen necoansajaaain neeichene necairichaa curiquicheein, nitohaneeeichenena niqui jereneeun.

29 Canejeraauru, caa quene inara rai erenaa jereeeun. Inae ichuunnejeeonriha cana rai janonaa. Aihana jaun nii sinijeraaonacaauru, rai sinijera colane nenea rijijieein neeuruhine.

30 Jana nii onaa coinaderaa nenacaauru, beseta que nenea rijijieein rachoojoeeuruhine. Jana nii beseta que nenacaauru onaa coinaderaa rijijieein inaderaauruhine. Itolere ru-cuhele sirichaaauru, cha sirihei rijijieein neeuruhine.

31 Jana caa cana rai chauratane que netiin raotojoeein necoriquijiaain itolere niicha latei siriin ichaonacaauru, cha sirihei rijijieein ichaauruhine, caa janonaa canaacha coarajei saa curichainne jaun.

32 Leeocha que coacuhin neeichene cajene niqui inara rocohene rijitoeun. Aiha sinijera colane nenea, Cana Coauneraacha jerei que coacuhin nihane jaun.

33 Nete laen inae comasaiquiin nenea, Cana Coaunera que coaucane jianein, rai comasai rai caohachanuhacha que coacuhin ne.

34 Nitohaneeeinte ita caje neleruhin neeure. Jerichanejeein techu enecuru lana colane nenacaauru, chaen chabana lanaque lanaala nenacaauru, naaonjoainuri Cana Coauneraacha jerei que coacuhin neeure, acaauru jaberoconein, acaauru suujuenein, naaonjoaain que banijiaain neeuruhane jaun. Jana lanaaonacaaurute, acaauru lana rai caohachanuhacha que coaacuruhane jaun Cana Coauneraacha jerei que coaacurene.

35 Coatiha inara rai caohatiha aitohaaun. Nenacaeneeinjian inara caohachanu quene aitoon, caohachaaain ichaohin Cana Curuaanaacha jerei ichajeein ichaonaa nainequichene coina.

36 Chunocoha nii niicha jerei ene ranaa coauca inae ichauhena nihane jaunne, rai caohachaa nii coaucane tocohaneeinne, nii niicha coacuhi rijijieein nii ene raaine. Coat-  
iha naosatenaa nihei ene raain niha cachane.

37 Jana chunocoha nii cha que tonajelanaala jelai jinacoon netiin niicha jerei ichaane coina, rai suujua cuhane sinijeraqueni-hane coina coaucane, niite rai caohachanu que aicheein.

38 Jerichanejeein techu caohacha ichareein, nii niicha jerei raain nihane. Jana nirijieein sinijeraquelanaala nihanete, jelai amuritoheriin caohacha ichareein.

<sup>39</sup> Inae lanaaocanete nii rai lanaacha sacunaa naine nii ene, oha nii rai lanane que tiaaajoaain. Jana inae oha nii rai lananete nainere chunocoha raain niha rai lananu quene caohachae, aihachu Cana Curuaana coitucuera quicha aina.

<sup>40</sup> Nii amuritoheriinte niqui nenea naine raotojoein, na-coauneein lanaquelanaala nihane. Caritoha canu suujua. Chaen nechu Cana Coaunera suujue siriin caa aitoon.

## 8

### *Ichanoherinein nenea choosi ecaanto rai tenojoin lenone*

<sup>1</sup> Enane laen ichanoherinein nenea choosi ecaanto rai tenojoin lenone que erereeeunni inara rai. “Satiinte itolere coitucuhacache,” naain irihacache. Nete nii canaacha coitucui aina, inae leeochoaauru amurijiriin itolere coitucueraneein nenea jerichaachene chaque nelatene. Jana laen Cana Coaunera Suujue jerihane rijijieein jiniiquiin nihacachenete caohachae.

<sup>2</sup> Aihane jaun chunocoha cha coitucueraneein nenea coaacane, coatiha jitariin nii niicha coitucunaa jerei coitucurinaain.

<sup>3</sup> Nete laen Cana Coaunera belaaain niicha jerei ichaa cachane, nii belaicha coitucue Cana Coaunera.

<sup>4</sup> Ichanoherinein nenea choosi ecaanto rai tenojoin lenone quiha cachane niha natiin, cha ichana naineniha nii ichanoherinein nenea choosi ecaantone coitucuhacache raotojoein. Nete laen ne, rauhijiriin leinjiin Cana Coaunera.

<sup>5</sup> Neeuruha dedeeu, chauratane que, naaonjoain nii acaauru choosichuru. Tabaaaurute ichanohichurune. Arajiinte neeure nii acaauruhacha esenetai choosichuru.

<sup>6</sup> Nete laen cana rai ne leinjiin cana inaca Cana Coaunera-itolere Coaunera neein nenea. Chaen techu coreniha rai cachaneein nihacache. Nii rijijieein techu, ne leinjiin Cana Curuaanaa Jesocurisito. Corenihate ne itolereuru. Cana netonaite coreniha nihacache.

<sup>7</sup> Nete satiin Jesocurisito esenetaeraauru nii coitucuhin neeurenihane jaun, tabaaauru jaiti enanetojoein nii choosi ecaanto ichanoherinein nenea rai tenojoin que lenonecure, chaelai que nelatiha been. Jaiti nii acaauruhacha esenetai aina caohachaaain ijiniha acaauru suujuane jaunte, jaiti aasaeriin nii choosi ecaanto esenetaauruha acaauru netonaina jaun, “Baasojecha ichacure,” naaure.

<sup>8</sup> Nete Cana Coaunera jerihana jaun, joareein lenonichaane niha natiin, chaachaene nii canaacha quii. Niheichu nii canaacha quii coreniha jeelai amuritoheriin caohachaaain nenea nainihaacache. Niheichu quilanaala nihacachene nihanatiin, jeelai amurijiriin baasoneein nerihaacacheein.

<sup>9</sup> Nete inae inara ijiin neeichene jaun, leeochoaauru jaiti ijilanaala nenacaauru saruhin, osa que acaauru nalutiaaichene jianequichene caohachae.

<sup>10</sup> Ii raotjoeein coitucuhi natiin, nii ichanohin choosi rai tenojoin lenone quiche nelauriaainne jana, inara coaraain niha leeochoa cana nejera ijilanaala nenaane, acaentonai nelauriaain nii ichanohin choosi belaiha tenojoin lenone quinaa nainere. jaiti caohachaaain coitucuenihane jaun rai cocoaeraa nitohanei icharane saijieein.

<sup>11</sup> Nitohaneeinte jaiti caohachaaain coitucuelanaala nena cana nejera itajerateein neeiche, jaiti rai cocoaeraa nii chosi rai tenojoin iniho que lenonihanene saijieein, inae ii raotjoeein coitucuhi natiin, notaracaae nii iniho que lenoneeine jaun, acaentonai coreniha ohin nihalu Curisitone saijieein.

<sup>12</sup> Nitohaneein cana nejeraauru caohachaaain coitucuelanaala nenacaauru, niicha esenetai esenetaauruhane jana, acaauru rai bacohin neeinchene jaunte, inae Curisito que nejeratenaaneein, inara raaje osa que nesarucuiche.

<sup>13</sup> Aihana jaun lenone que cana nejera saruhin nihanu canune, caraita caohachare chabana iniho quilanaala nihanune, nabana osa que leeochoa saruhin nihanune coataa.

## 9

### *Esinae rauhijiriin afosotoneein nihacane*

<sup>1</sup> Canune laen cha ujuaihonelanaala jianacoon neeun. Chaen techu ne canu rai rauhi afosoto nichaaunne jaun. Nii ichoae tacaainechu, Cana Curuaanaa Jesoso coaraaun. Inarate, canu amihaneoo caje ecoona neeiche, Cana Curuaanaa icharatenohineein.

<sup>2</sup> Tabaaauru jerihane afosotonichaaunne esenetaain coana jerecuruhi. Inarate laen afosotonichaaunne coitucuhiche. Nii Cana Curuaanaa esenetaaichene jaan caje coauneeeinte, canu esinae rauhijiriin acanichaaunne coitucuhiche inara.

<sup>3</sup> Caate, nii canu que erenacaauru tonoraanune jaan ne.

<sup>4</sup> Niha carai rauhi joenreein lenone, conacai, naaonjoainuri tera nihane, raain naaonjoannune coina.

<sup>5</sup> Chaen nechu naineeun leinjiin ene Jesocurisito esenetaera que comasaihocaaunne, aihuruha leeochoaauru afosotooru, Cana Curuaanaa nejeraauru, chaen Fedoro, naaonjoainurine rijijieein.

<sup>6</sup> Canu, Berenabeen, naaonjoinichaanune rai netonai te ne rauhi, canacaanuhacha latei teeuruha Cana Coaunera coitucuurerane coina.

<sup>7</sup> Nihei chuni raajenihane aiha soondarone rijijieein namihaneoo coreteein nei. Niheichu chuni temule temuhane



inae nihane bana quilanaala nei. Niheichu chunei, carenero beraihane rai nitaari niicha rocoi coelanaala nei.

<sup>8</sup> Jiaonriha cacha suujue caje nenea niha caa erenaa beeichene. Moisesa aitoonjoan netonaite jerichanetojoein be.

<sup>9</sup> Jerichanejeein techu rauhi rai quiricha cuhane, “Jiaonriha rojoene jaera *buey* ujuae conaaquichene,” naain ne laenanohineein. Niheichu coatiha *buey* que coaucane jaun aitohi Cana Coaunera.

<sup>10</sup> Cana quete aite canaacha que coaucane jaun. Cana corenihate laenanohineein nelu nii rauhi siricha quiricha. Aihana jaunte nii rai nucuhe rojoera aina, nii atane retuurera netonai ita rijijieein inae taojiana que turuhane jana, acaauru netonai leruhin raauruhane coina ichacure.

<sup>11</sup> Canacaanune mainajeriin inara coreniha amihaniha-caanu, Cana Coaunera coitucunaa nainequichene coina. Aihana jaun coatiha baasonerihei coreniha canacaanu coroatajanequiche canacaanuhacha latei quene.

<sup>12</sup> Coaracuche nachuhinti leeochoaauru acaauru coroatajaneein neeichene jerecuruhane, cha caaunna canacaanu coroatajanequichene jerenerichaanu canacaanu netonai.

Nene jaiti chabana jerenihacaanu. Raujiaainchane abaan-tajeein nihacaanu, nabana Curisito que erenaa rerohecaacaanune coataa.

<sup>13</sup> Inarate raotojoein coitucuhiche, satiin Teenforo asaae amihanenacaauru, nii Teenforo asaae nenea que ichaaoruhane. Nitohaneeinte, nii iniho mocooruhane jaan coaraneein nenacaauru, nii iniho Cana Coaunera rai niicha teuri caute que lenoneein ichaaore.

<sup>14</sup> Nii rijijieein techu aitelu Cana Curuaanaa, nii niicha jerenohi que cacha relaera, nii namihaneeocha que ichaoane coina.

<sup>15</sup> Nene chabana nitohanai ichana jereneeun. Niheichu coatiha carai cha teeichene coina caa aitiin laenahaan. Jataaine raotojoein neeun, cha teneeiche canu raine jana inara relaanune jaun. Nii colane raotiin nenea naininaan.

<sup>16</sup> Coatiha carai coretera coina cacha relahaan nii jianacoon cacha mitaera que. Jataain carai caohacha nihana jaunna, chatohaneein niha natiin, cacha relareeunni. Cairichaojoarichaan cacha relaenihanune.

<sup>17</sup> Nii nitohanihane jaunte, canu raajenihane cacha relaanune, inae carai cainanojoneein ne. Jana coiintihanune saijieein ichacaaunnena jerichanejeein caletooa Cana Coaunera jaan ichareeunni.

<sup>18</sup> Aihana jaunne, nii carai cainaane jaan aina, jataain raotojoein core bajaelanaala cacha relaanune. Nii canu rai rauhi tonoraelanaala, core bajaelanaa cacha relaanune jaunna, caa aitoon.

19 Coatiha niqui nii chuni rai cha icharaneein ninaaun, nena satiin rai niicha jerei icharaneein neeun, nainichaaunne jeoneein Curisito rai cachaauru tenaa nainichaaunne coina.

20 Nii jaunna Joriocuru aina nihanune acaauru rijijieein neeun, esenetaauruhane reeintiaain. Esenetaauruhane coinane, nii Moisesa aitoonjoa rijijieein ichaonacaauru cachaauru rijijieein canuhetonai neeun, nii Moisesa aitoonjoan rijijieein nena nainenihanune saijieein.

21 Jerichanejeein nechu Moisesa aitoonjoan tonoraelanaala nenacaauru que coitucueratena jerenacaun, acaauru jana turuhanune acaauru rijijieein neeun. Cana Coaunera aitoonjoan rijijieeina ichaon, inae Curisito aitoonjoan tonoraain rijijieein ichaonune jaun. Nii saijieeina nii acaauru rijijieein neeun.

22 Nii jaiti iiji lanaala nenacaauru rene turuhanunena, acaauru ichao rijijieein ichaon, coitucunaa nainecuruha acaauru netonoaine coina. Satiin rijijieeinchane neeun, tabaauru ichoteratichaaunne jianacoon nena nainecuruhane coina.

23 Satiin caa caitoonjoaaurune ichaun jianacoon cana mitaera coreniha, ecu nena nainichaaunne coina.

24 Inarate coitucuhiche, jiniquiin soronacaauru satiin sorooruhane niha natiin, leinjiincha rai core raane coitucuhiche. Aihana jaun inara netonai sorohichenete ne, nii aihuruhane rijijieein rai core raaichene coina.

25 Nocoatijianacaaurute inae leecha aina nocoatijianaa jerecuruhane, chatohaneein acaauru jaberoco tenaa nainera que necohalajiin neruujueeure. Aiha leeinjiin ajaena jujuhin enaicha ohina inaeraneein nena caje nena comai que coretenajaera coina. Jana canate necairichaecaache coreniha chabana ohina charanejeein nena raacachene coina.

26 Aihana jaun coatiha canu joaereein coitucuhelanaala sorohoaun. Niheichu coatiha joaereein sonacaunne faoracahaun.

27 Nitohanihana jaunna caraajenhane cajabereeo cairichaaun, casuujua tonorana nainichaaunne coina. Nabana leechaauru relaeraneein nihanune saijieein, cha colane baasoneein nedaanune coataa.

## 10

*Cana Coaunera nelanaala nena choosi ecaanto belaihuruhane coataate, suujuatenajae Faboro.*

1 Canejeraauru, jiaonriha acaauru conaca dede sacarine jana, satiin jana cuhin, Cucuana Lanajai jera jaaoruhalu, cana foerateracurune baitequichene.

<sup>2</sup> Nitohaneein nii Moisesa aina nii dede sacari que amaer-aain cucuana jera jaaoreraaurute ita rijijieein ichaaorelu.

<sup>3</sup> Jerichanejeein techu, satiin jiniiquiin Cana Coaunera tenojoi lenone que lenoneein

<sup>4</sup> cuuruhane corihanune que Cana Coaunera tenojoin ajeri caje nalunaa acau que netonai cocohin cuuruhane jaun, jerichanetojoein Cana Coaunera tenojoin acau que cocohin neeurelu. Nii ajeri, acauru corihaneraanu que Cana Coaunera tenojointe Curisito nelu.

<sup>5</sup> Nete nitohaneein acauru coroatajaniha Cana Coaunerane saijieein niicha rautaaichacuruhane jaun, cache areroo neleruhin amurijiriin ohacoaaurelu.

<sup>6</sup> Nitohaneein nabana cana netonai rai baaso ichana coauna coataa, nii que nainaaichaaonaa jaan nuque nitohaneein ichaelu Cana Coaunera.

<sup>7</sup> Nitohanihana jaun, jiaonriha Cana Coaunera aina iriha niha Moisesane tonohanau nii acaauruahacha ichai choosi ecaanto coroaecuruhalune rijijieein inara netonai ecaanto coroaequichene. “Satiin nelauriaain lenoneein cocooruhane baihate, satiin nimichuhuin rachoojoeure,” naalu Cana Coaunera Quiricha Inoaensi cuhanene rijijieeinte aihure.

<sup>8</sup> Aihana jaun niheichu nainihaacache aihuruhalune tocohaneein nejelau ene dadaain nihacachene. Nitohaneeruhane corenhate coroatachoonca nichata oaraancaain oorelu lejiichoo cuhane.

<sup>9</sup> Jiaonrihachu inara casetecaa Curisitone coujuha chatonaaain baasoneein que ereein neeichene. Tabaauru nitohaneein baasoneein erenacaurute acano calanojineein ohacoaaurelu.

<sup>10</sup> Nii rijijieeinchu inara netonai baasoneein Cana Coaunera que erenaa nainiheeiche, tabaauru Cana Coaunera que baasoneein ereeruhane jaun cache atinaera aanjera letoaa Cana Coaunerane jaun, atinanaacane rijijieein inara atinaeratihane coataa.

<sup>11</sup> Nitohaneein jetaote cana foerateracuru casetecaeratelu Cana Coaunera, nii caje nainaaichaaonaa coina. Chaen techu cana satiin enene ichaohacachene rai nii beeraanu que Cana Coaunera Quiricha Inoaensi cuhane laenanohineein ne.

<sup>12</sup> Nitohanihane jaun chunocoha baaso ichana coacuelanaala, jeriha Cana Coaunerane rijijieein satono que tiaain nenaajerihane, caohachaaain necohalajiin neeine.

<sup>13</sup> Nete inara jaiti chabana cache nejesinaneein abaan-tanacainelanaala, inara coujuera coaraeneeiche. Aihana jaun Cana Coauneraacha que jaecoochete inara beraaine, nabana inara cairichaaain inara nainatijihane, jataain abaan-tanacaelanaala nenaajerihane que cairichanojineequichene coataa.

Nii banate inae niha baasoneein inara teranune jana, caje inara ichoteratereein, abaatana nainequichene coina, Cana Coaunera.

<sup>14</sup> Aihana jaun canejeraauru, jiaoriha Cana Coaunera nelanaala nenea choosi ecaanto coroaeraauru aina cuhin coroaquichene.

<sup>15</sup> Inarate caa inara rai caitoonjoan coitucuhiche. Nii jaunte baasoneein aitenihanune caohachaaain aitocoaaunne coitucunaa nainequiche.

<sup>16</sup> Nitohanihane jaunte Cana Coaunera coroaeein satiin cana ichao coreniha orichaaaine rai neein rai coichana niha been Cana Curuanaacha coi, rai coco bino cohacachene, nii rai coichana aina cuaain coichana que coichanaquiin nenea rijijieein nihacache. Nii rijijieein techu nii jaberoco niha been niicha taturii faan quihacachene, inae rai jaberoco aina cuaain aina ita jaberoco que jaberocooa rijijieein nihacache.

<sup>17</sup> Charijieein teeinti arajiin nihacachene nihanatiin, satiin nii leinjiin faan quihacache, nii rijijieein techu leinjiin jaberoco que jaberocooa rijijieein nihacache.

<sup>18</sup> Coaracuche nachuhinti cana foerateracuru inoansi-huru Isaraelitacuru, Cana Coaunera rai niicha mocoori iniho quihuruhane, acaauru raajenihane tera rijijieein saain que lenonecuruhane.

<sup>19</sup> Coatiha chaque nelatiha Cana Coaunera coitucuhichuru chosine jaun aitoaaun, niheichu rai niicha mocoori iniho leecha iniho amurijiriin nihane jaun aitoaaun. Acate joaenreein leecha iniho rijijieein ne.

<sup>20</sup> Cana Coaunera coitucuelanaala nenacaauru, acaauru chosi rai lenonecuru mocooruhanete, moconajaera rai ichacure. Nitohanihane jaun coatiha nii moconajaera aina enohichene jerihaaun.

<sup>21</sup> Aihana jaun nainiheeiche nii Cana Curuanaa que banijiaain nenea, rai coco bino cohichene baiha, nii moconajaera coroaeca acaauru chosi rai niicha ichacuri iniho quiha nenacaauru aina nenea nainiheeiche. Niheichu nii Cana Curuanaacha tei bino cohichene baiha nainiheeiche, moconajaera coroaeca coconacaauru aina cocoin naaonjoaichene.

<sup>22</sup> Chasiina Cana Curuanaa baijaeraanu tocohaneein, jianeein leecha sacurichaache cana casetecaane abaantanaa nainerichaachene coalanaala.

*Leeochaaururuhacha coacuhi que suujua acateein niha Jesocurisito ranojoine*

<sup>23</sup> “Chunite nainere joaereein niicha jerei ichaane” naaiche niqui. Esinae rauhijiriinte aitocohiche. Nete caohachaene itolere bana joaereeincha ichacaane. Chunite niqui esinae naine niicha jerei ichaane. Nete tabaauru joaereeincha

ichana jerichaane, coatiha cana coroatajanihei nii canaacha ichai Cana Coaunera jerenohin ichacaane coina.

<sup>24</sup> Nitohanihana jaun caohachaa'i cana rai caohachanuhacha ichacaane, satiin rai caohachanu ichacaanete caohachae.

<sup>25</sup> Inara rai teraa joaenreein iniho ne, inae coitucuhichene jaun bajaelanaala que lenonecuche,

<sup>26</sup> satiin caa cana rai chauratane aina que nenacaauru, Cana Curuanaa rai nihana jaun.

<sup>27</sup> Chunocoha esenetaeranelanaala nena inara cotihaca lenonequichene coinane jana, cunaa jeriquichene inae coitucuhichene jaun, bajaelanaala inara rai niicha teeuri que lenonecuche.

<sup>28</sup> Nii lenonequichene coina, inara cotihacuruhane jana, chunocoha inara rai, "Caa inihote leinjiin canacaanu choosi rai moconojoina" naain bihane jiaonriha quichene. Chaen inae raotojoein coitucuhichene jaun, nabana nii inara rai bera cairichaaichene coataa.

<sup>29-30</sup> Tabaaaurute, "Chanuna nainichaaun joaereein lenonichaaunne saijieein caohatere nejelau cacha, itolere bana 'Nariha Cana Coaunera' naanu lenonichaaunne naineeinne saijieein, chasiinna canu que ereeurure," naaurureein.

<sup>31</sup> Nitohanihane jaan caje coauneente, lenoneein, acau cohin, cha ichaain, naaonjoaichene Cana Coaunera rai caohachanu que ichaquichene caohachae.

<sup>32</sup> Jiaonriha baaso ichaain leeochoaauru relaain neeichene, niheichu nii Joriocuru rai niha natiin, niheichu Jorioniheichuru rai niha natiin, niheichu Cana Coaunera cachaneein nenacaauru rai niha natiin ichana nainiheeiche.

<sup>33</sup> Canune laen satiincha rai caohachanu ichana jereun, canu raaicha caohachanu coacuhelanaala, acaauru netonai nichotena nainecuruhane coina.

## 11

<sup>1</sup> Caa canuhacha ichai rijijieein cha ichaain neeuche. Charijieein teeinti, cha ichaain nihalu Curisitone rijijieein cha ichaain neeun, nii rijijieein.

*Inara aina netaojianacaauru enecuru rai*

<sup>2</sup> Jataaine inara corojeeun, itolere bana canu coacuhin inara relaanune jaan tonoraain neeichene coreniha.

<sup>3</sup> Nena laen Curisito satiin quicha nichaachene couturi nihane jana, rai comasai couturi niha satiin quichane rijijieein, Curisito couturi niha Cana Coaunerane coitucuhichene jereun.

<sup>4</sup> Nitohanihana jaunte, leinjiin quicha, couturi conajaain Cana Coaunera bajaain, Cana Coaunera ere been naaonjoanne niha natiin rai couturiji conaaca, rai couturi niha

Curisitone saijieeinna jaun, nii letoaa rai couturi Curisitone tonoraenihana jaun aicheein.

<sup>5</sup> Jana enete laen naine couturiji conajaain, Cana Coaunera bajaain, Cana Coaunera ere beein naaonjoanne caohachae. Jana couturiji conajaelanaala aihanete, rai couturineein nena rai lana tonoraenihane jaun aicheein, loraecaain jaonjoiniha rai couturiji jaun aihane rijijieein.

<sup>6</sup> Nitohanihane jaun leinjiin ene, rai couturiji conajaenihanete caohachare rai couturiji loraecaain joeratihane. Jana nii couturiji joeratiha loraecaainne coejiha nii enene, rai couturiji conaamiin.

<sup>7</sup> Jana quicha laen nainihe rai couturiji conaacane, Cana Coaunera rijijieein neein, rai cache neein nihane coarati-hane coina. Enete laen lana que suujua acatihane coaratiha rai couturi conaacane caohachae.

<sup>8</sup> Ene caje nena neniha quicha jaberocone jana, quicha jaberocono caje nena niha ene jaberocona jaunte nitoha ne.

<sup>9</sup> Coatiha ene ichao coreniha necoanaain niheilü quicha. Jana enete laen, quicha ichao coreniha necoanaain nelu.

<sup>10</sup> Nitohanihana jaunte anjeraauru naaonjoainuri coreniha, nii cojunacaniha rai couturiji conaaca enene caohachae.

<sup>11</sup> Jana Cana Curaanaa Jesocurisito coitucuhin esenetaera nichaachene raite laen, ene colane ichaonaa nainenere quicha, jana ene netonai quicha colane ichaonaa nainihe.

<sup>12</sup> Nitohanihane jaunte, esinae rauhijiriin quicha caje necoanaain nena niha enene rijijieein, quicha netonai ene caje nejanoain ne, nitohaneein jeriha Cana Coaunerane jaun.

<sup>13</sup> Caohachaana inara rai couturiji conajaelanaala Cana Coaunera bajaa enene.

<sup>14</sup> Nitohaneein niha cana necoaaunane jaan caje coauneente, necoejena ne leinjiin quicha rai couturiji fojiaane.

<sup>15</sup> Nete laen enecuru, nelatecuruhane coujunaca nihane jaun, rai couturiji fojiaauruhane caohachae, nii coina tenojoi niha acaauru couturine jaun.

<sup>16</sup> Chunocoha caa aitocooaunne jaan que tonaain erena jerihane, Cana Coaunera ranojoihunru aina jiniiquiin leecha ichaonaa coitucuenihacachene coitucuhin aitomiin.

*Baasoneein Cana Curuaanaa que banijiain lenone que lenonecuruhane*

<sup>17</sup> Caa, que jauhecaain canuhacha laenai cuhane laen, inara coroaena naininaaun, netaojiaaiche inara caohachanu quene niha natiin, baaso ichaquichene coreniha.

18 Jauriaanejeeinte canu rai beeurelu, Cana Coaunera coroaequichene coina netaojiaaichene, ita caje neleruhin netaojiaaichene que aitiin. Nii jaunna acaauru aitoonjoa tabaauru esenetaaun esinae aitocuruhane jaun.

19 Nii ita caje nelerujuacoaain netaojiaaichenete ichaquiche, le nelerucuru coaraauru esinaen rauhijiriin Cana Coaunera sacueraneein neeichene coarateeichene coina.

20 Nii nelerujuacoaain netaojiaaichene jaun, Cana Curuaanaa que banijiaain nena lenone que lenonequichene niha natiin, coatiha jeriha Cana Curuaanaane rijijieein ichaeneeichene jaun, que banijiaain nena lenone que lenoneriheeicheein.

21 Nii lenonequichene rai neeichene jana, tabaauru inae lenonihane jana, tabaauru mijitenaana neure, jana nitonohana leeochoauru ajeein naaonjoaane jaunte, baaso ichaquiche.

22 Chanuna leeochoauru sinnaa jereneeichene, inara loreri asaaecha lenonelanaala, Cana Coaunera cachaauru que jaolecohin, cha colane nenacaauru necoeje chanuhin naaonjoainche. Chasiina nitohaneeinchene inara coroaena nainereun. Inara coroaena naininaaun nitohaneein neeichene jaun.

*Canu Curuaanaa que banijiaain nena lenone.*

*(Mt 26.26-29; Mr 14.22-25; Lc 22.14-20)*

23 Canune laen Cana Curuaanaa caje, caa inara relaanune jaan raain neeunlu. Nii coulurujuenojoin nihane cojoanotiin cuhanete faan mucuhin teberiaain, “Nariha Cana Coaunera” naane baiha,

24 cataaun tacaain nii faan tatuhin, “Caa faante inara coreniha quiicha tei canu jaberoco ne. Caa ena ichacaaunne rijijieein ichacuche canu coacuhin,” naelu Cana Curuaanaa Jesoso.

25 Jerichanejeein techu inae nainaanii nii faan que lenonihane baiha, bino mucuhin teberihain, “Caa binote ena nena Cana Coauneraacha tei rai rauhi coujunaca cacoichana ne. Aihana jaun caa ena ichacaaunne rijijieein ichacuche canu coacuhin,” naelu Cana Curuaanaa.

26 Nitohanihane jaun nacoaauneein turuha Cana Curuaanaane que tiaaajoaain ohalune beeichene raite ne, nii lenone que lenonequichene naineein, chaen nii acau niicha cohi coohichene naineein.

*Canu Curuaanaa lenone que lenoniha cachane.*

<sup>27</sup> Nitohanihane jaunte chunocoha nii bino, nii lenone, naaonjoain que lenonihane, jeriha Cana Curuaanaane tocohanelanaala ichaane, Cana Curuaanaa jaberoco rai coichana naaonjoain sarue osa que nii ichara.

<sup>28</sup> Aihana jaunte nii lenone que lenoneein, nii bino cohin, naaonjoanne ajiniha, jaurianejeein rai suujua coaraa cachane caohachae.

<sup>29</sup> Jaurihanejeein suujua coarii amuneein, “Naaonjoaane jaunte caa Cana Curuaanaa jaberocone. Naaonjoaane jaunte caa Cana Curuaanaa coichanaane,” naain coitucuhera amuneein que bino cohin, lenonihanete, raaje rai jaberoco casetecaa aicheein.

<sup>30</sup> Nitohanihane jaunte inara tabaauru cunaiteein, aterojoriin, tabaauru oore.

<sup>31</sup> Caohachaaain cana suujua coaraain nihacachene jana nihane, coatiha cana casetecarihei Cana Curuaanaa.

<sup>32</sup> Cana casetecaane niha natiinte, raujiaain nacoauneein baaso ichaelanaala, jeelai amuritoheriin caohacha ichana que nerelana coina cana casetecae. Coatiha nii coitucuruhi casetacaane tocohaneein nitajenaa coina cana casetecaa Cana Curuaanaa.

<sup>33</sup> Nitohanihane jaan caje coauneein, ita taojiaaiche Cana Curuaanaa lenone que lenonequichene coinane, ita jiniichaaain lenonecuche.

<sup>34</sup> Jana chunocoha mijitena caun leeochoaauru ajiniha lenonena jerihane, nenajaun lenonemiin, nitohaneein baasoneein ichacuruhane coreniha inara casetecaa Cana Curuaanaa ne coataa. Nitohaneein neeichenete caohachaera canejeraauru. Inae inara coraa uhanune banane, inara rai leeochoa rucuhenacai rucuhereunni.

## 12

*Niicha nainei ichaa cachane jaanu tiha Cana Coaunera Suujuene.*

<sup>1</sup> Canejeraauru, niicha nainei ichaa cachane jaanu tiha Cana Coaunera Suujuene coitucuhichenena jereeun.

<sup>2</sup> Inarate jaiti Cana Curuaanaa coitucuhin esenetaeneeichene bana, nii chosi ecaanto ichanohineein nena rene inara amaauruhane, aiha maosane rijijieein curejetocohichene coitucuhiche raotojoein.

<sup>3</sup> Nitohanihane jaunte inae enene chuni, “Nechu aansaineein ichaanaa Jesoso,” naain erenaa nainene, inae enene Cana Coaunera Suujue letononeein irihane. Nii coitucuhin ichaohichenena jereeun. Chaen nihei chuni, “Jesosote Curuaanaa ne,” naain erenaa nainihei cache, Cana Coaunera suujue letononeein erenihane.



<sup>4</sup> Araai lauriin cha ichana nainihane jaannute ranaa naine cacha, Cana Coaunera tenojoineein. Nete laen nii tera, jeelai Cana Coaunera Suujueneein leinjiincha ne.

<sup>5</sup> Niha araai lauriin rai nelateein nihacane jaanu, cana que jeelai Curuaanaa icharatenojoineein.

<sup>6</sup> Jerichanejeein techu araai lauriin ne nelateein cha ichana nainiha cachane jaannu. Nete araai lauriin nihane nihanatii nii jeelai Cana Coaunera caje satiin unaaneein ne.

<sup>7</sup> Cana Coaunerate aina nihacachene coitucuhacachene jaa te rai cachaneein neinichaachene rai, nii aina raotojoein nihacachene coina.

<sup>8</sup> Rai Suujue aina cuaainte, le cachaauru tabaauru rai coitucuhin erenaa nainecuruhane jaannu te Cana Coaunera. Jerichanejeein techu jataain itolereenein cha coitucuhin neeuuha cachaaaurune jaanu teein ne, nii jeelai Cana Coaunera.

<sup>9</sup> Tabaaurute esenetaauruhane jaannu rae, jeelai Cana Coaunera Suujue tenojoineein. Tabaaurute, nelateein cunaiteenaa rautaane jaannu rae.

<sup>10</sup> Tabaaurute cojoelanaacojai ichaain nelatihane jaannu rae. Jana tabaaurute, Cana Coaunera caje unaa erenaa bihane coina, nelatihane jaannu rae. Tabaauru te, Monajaaera suujue ichanohin aina Cana Coaunera suujue ichanohin coitucuhane jaanu rae. Tabaauru raite, leecha erenaa cuhane erenaa nainecuruhane jaannu te. Chaen techu, tabaauru rai nii leecha erenaa cuhane ereeruhane jaan aonaain benaa nainiha leechane jaannu te.

<sup>11</sup> Satiin niichurute te, tenaa jerihane jaaunru rai, nii jeelai Cana Coaunera Suujue; janijiin niicha rai cachaauru rai.

*Araaichaache niqui nete leinjiin que jaberocnaa rijijieein nihacache.*

<sup>12</sup> Cacha nichaachene jaberocote, araai lauriin neleruhane niha natiin, jeelai cana jaberoconeein netiin ai. Nii rijijieeinte satiin nihacache araai laurii caje nihacachene nihanatiin Jesocurisito cachaneein neinichaachene.

<sup>13</sup> Nii rijijieein techu satiin cana, Joriocuru, Jorioniheichuru, letononeein nenacaauru, letononelanaala nenacaauru, naaonjoainuri aina jiniiquiin coujunacatenohineein nihacache, leinjiin jaberoco que jaberocohin nena rijijieein nihacache, Cana Coaunera Suujue ichanaaneein. Nii rijijieein techu nii jeelai Cana Coaunera suujue caje ocoona que satiin cocohin nihacache.

<sup>14</sup> Coatiha le turijieeincha nihei cana jaberoco, araai laurinte ne cana jaberoco nelerucuru.

15 Nii nitohanihana jaun cana tija, “Cacha biji nenihanune jaun coatiha cacha jaberoco nihaaun,” naane, coatiha cacha jaberoco neein nihane jianerihei.

16 Cana uricho netonain, “Chanuna nota neneeun,” naain irihane, coatiha cana jaberoco que nihane jianerihei.

17 Satiin cana jaberoco cana nota nejesina nihane, coatiha cha aonaain ichaonaa nainerihaacache. Satiin cana jaberoco cana uricho nihane, chelai juuno aohanna nainerihaacache.

18 Nete lauri lauri cana jaberocooru coaunaain rai caohachaain inanacaane jaan jeeloncuru tein coaunaelu Cana Coaunera.

19 Le turijieeincha ijiabereeonu niha cana jaberoco, rai neleru colanene coatiha nerihe cana jaberoco esine.

20 Nitohanihane jaunte araai turiin neleruha cana jaberocone niha natiin, rauhijiriin leinji cana jaberoco.

21 Nii nitohanihane jaan caje coauneein, cana nota nainihe cana biji que, “Latinaaun,” nanaa nainihe. Niheichu cana couturi niha natiin cana tija que, “Latinaaun,” nanaa nainihe.

22 Nete nii nelatihei rijijieein canaacha coarai cana jaberoco-jataain nelateineein ne.

23 Nii cana jaberoco leeochoaauru fautaain canaacha colalajiite cajionetein sirichaache. Jana nii cana jaberoco, coanojoinelanaala nenaate, jeelai amuritoheriin cajionetein sirichaache coara coataa,

24 nii cacha notaracaae nanaa sirichaachene amurijiriin. Cana Coaunerate, nitohaneein cana jaberoco coaunae, nii coaraelanaala canaacha sirii amurijiriin nii cacha notaracaae nanaa belaaain, caohatiin beraain sirichaachene caina.

25 Nabana jeelai jaberoco neein nihane saijieein, rai jaberoco nelerucuru leeochangein coaraelanaala, rai nelatena nainihane caina.

26 Nii nitoanihane jaunte, chatohaneein necunaitaa le turijieein cana jaberocone niha natiin, saain cana jaberoco necairichae leinjiin coreniha. Nitohanihane jaunte, cha latein niha cana jaberoco nelerune jana, rai teraa nii niicha lateine, satiin cana jaberoco rachoojoe.

27 Nii rijijieein techu inara, Curisito jaberoco neleruneein neeichene jaun, le cachanequichene nainein inaraacha ichaneni siriin neeiche.

28 Nii coinate jere, satiin rai cachaauru iclesianein nenacaauru jana niha afosotooru, Cana Coaunera suujue aina cuaain ichaonaa coitucuhin beeurera *profetacuru*, cacha relaureraauru, cojoaelanaacojoai icharaauru cachaauru, cunaitenacaauru rautaeraauru, leeochoaauru coroatajaneraauru, cachaauru coaraneein nenacaauru, nejelau erena

cuhane erenacaauru, naaonjoainuri neeuruhane jerelu Cana Coaunera.

<sup>29</sup> Nete saain rai cachaauru afosotonena nainecurene. Niheichu saain *profetane* naanainecuruhi. Niheichu satiin cacha relaeraneein nenea nainecuruhi. Niheichu saain cojoelanaacojoai ichana nainecuruhi.

<sup>30</sup> Jerichanejeein chu saain cunaitenaa rautaauruhane coina nelatena nainecuruhi. Niheichu saain leeochoa erenaa cuhane erenaa nainecuruhi, jerichanejeein chu nihei saain nii leeochoa erenaa cuhane erenacaauru aohana nainecuruhi.

<sup>31</sup> Nii jaunte inara jataain caohachaaain nelatei jerena nainequiche.

## 13

### *Cana coichana aina cutaain belaina inaacane*

<sup>1</sup> Leeocha cacha ere cuhane ereein, anjeraauru ere cuhane niha natiin irihanune saijieein, cacoichana aina cutaain belaina inaelanaala aihanunena, leinjiin coata tonijiaain nenea fautaain chaque nelaterinaaun.

<sup>2</sup> Jerichanejeein techu Cana Coaunera que ereerejeein, niicha ichanenu coitucuhin, leinjiin atane ucuunno rurujuaana nainichaaune coina esenetaanune niha natiin, esinae rauhijiriin cacoichana aina cutaain belaina inaenihanune, coatiha chaque nelaterihe i canuhacha ichai.

<sup>3</sup> Cairicheihuru rai jitariin quiicha sirii teein, cajabereone maajeein tihanu acaauru corenihane nihanatiin, esinaen rauhijiriin cacoichana aina cutaain belaina inaenihanune coatiha nii cha que nelaterinaaun.

<sup>4</sup> Esinae rauhijiriin cana coichana aina cutaain belaina inaacanete abaantana coitucuhin, caohachaaain leeochoaauru aina neein, chaque necoelailanaala, cana rainuhachaque coacuelanaala, leeochoaauru amurijiriin nenea coacuelanaala,

<sup>5</sup> erenaa baaso que erelanaala, niheichu itolere bana cana rai caohachanuhacha que coacuelanaala, obajelanaala, baaso icharaauru que cana suujua acateein,

<sup>6</sup> baaso ichacuruha leeochoaurune corojelanaala, caohacha icharaacha corojeein nihacane te caohachae.

<sup>7</sup> Cana coichana aina cutaain belaina inaacanete, satiincha necairichanaa abaantaain, cana corojatanihane cojoaain, itolereenein esenetaain, itolere abaantaain, naaonjoaain nihacane caohachae.

<sup>8</sup> Nii cana coichana aina cutaain belaina inaacane chabana sarihaain. Inae ecu tihane bana, coatiha nerihain caa Cana Coaunera ere bera *profetacuru*. Niheichu coatiha leeochoa erenaa cuhane erenacaauru niha natiin nerihain.

<sup>9</sup> Aihana jaun caa canaacha coitucui aina cana rai *profetacuruhacha* bei, coatiha jitariin canaacha coitucuheni coitucueratihei.

<sup>10</sup> Nete inae turuha nii cana relaera esine chaaelon baaso sirilanaala nenaane, sareein nii aasaeriin canaacha coitucui.

<sup>11</sup> Jaiti canaanainichaaunne banane, canaanainichaaunne ere que ereein, canaanainichaaunne suujua que coacuhin, naaonjoan rejetonlu. Nene inae enene ichauhenaneein nii canaanaineein canuhacha coacuhi jianeeun.

<sup>12</sup> Enate aasaeriin inanaca cana suujuane jana coaraache. Charijieein teeinti, acuhanau inanacae cana cojunaca nii rijijieein. Nete inae ecu tihane bana, caohachaaain coaraain coitucurichaaheein. Aihane jaun caohachaaain jaiti ena coitucuaaun. Nene inae ecu tihane bana charijieein teeinti cacoitucue Cana Coaunera nii rijijieein canuhetonai coitucureeunni.

<sup>13</sup> Nichata lauriinte ne itolere bana canaacha coacuheeni. Jauriaanejeein Cana Coaunera esenetaain ichaohacane, nii baiha cana ichao rucujueein niha Cana Coaunerane cohajeen nihaacane, satononejeein esenetaain jereein ichaohacane, naaonjoaain nihaacachene te caohachae. Nete nii nichata laurii caje ne jataain nii coroatajai amurijiriin jataain itolere que nelateineein nena. Acate cana coichana aina cutaain belaiha inaacane jaan ne.

## 14

*Leeocha erenaa canaacha aonaai cuhane irihacane.*

<sup>1</sup> Aihane jaun atiin inara coichana aina cutaain belaina in-aeraneei neeuche, chaen inara rai Suujue tiha Cana Coaunerane corajeein jerecuchete, inara que niicha beratei, que erenaa beeichene jaannu que nelatei teeine inara rai.

<sup>2</sup> Nii aonaelanaala nejelau erenaa cuhane ereite, Cana Coaunera rai iriha aite. Coatiha cache rai aitohi. Nii jaunte aohana nainecurene cacheaauru. Nii naitoonjoante Cana Coaunera Suujue caje unaaniane jaun chuni coitucue.

<sup>3</sup> Nete laen Cana Coaunera aitoonjoa bera, satiin que coitucuerate, leeochoaauru quene maajeein. Chaen techu acaauru suujua aninoaaain acaauru suujuate jeriha Cana Coaunera Suujuane rijijieein neeuruhane coina.

<sup>4</sup> Nii nejelau erenaa coitucueraelanaala nena cuhane ereite, jelai acaachanejeein Cana Coaunera Suujue coitucuhin aina ijiin ne. Nete laen nii Cana Coaunera aitoonjoan berate, Cana Curuaanaa ranojoneein nenacaauru que coitucuerate aina ijiin, Aca jerihane rijijieein caohachaaain neeuruhane coina.

<sup>5</sup> Nitohanihane jaunne niq̄ui, Cana Coaunera Suujueecha tei erenaa cuhane satiin ereeichene jereeeun. Nena nii amurijiriin, Cana Coaunera aitoonjoan beeichene jereeeun. Acate jataain caohachane, nii leecha erenaa cuhane irihacane amurijiriin. Niite amuora latelanaala aonaain, jelai amuritoeriin coitucunaa nainecure Cana Curuaanaa ranojooineein nenacaauru.

<sup>6</sup> Nitohanihana jaun canejeraauru, coatiha nelaterihe i inara coaraa uhanune bana, inara rai leecha erenaa cuhane irihanune. Caohacharihei inara rai cana ere cuhane Cana Coaunera aitoonjoa que erelanaala, leecha erenaa cuhane irihanune. Ainihane ichaonaa rauhi que inara rai erelanaala, leecha erenaa que irihanune caohacharihei. Niheichu caohacharihei leecha erenaa cuhane, inara rai irihanu, Cana Coaunera beratenojoi erenaa que ne. Niheichu caoacharihei, inara relaelanaala, leecha erenaa cuhane inara rai irihanune.

<sup>7</sup> Satiin auno aina, ita rijitoojoein toniha quitarane, coatiha nejelauneein aohanrarihei rai toni.

<sup>8</sup> Nii rijijieeinchu, coatiha neruujueeururihei ita soha nenacaauru, nii ita sooruhane bihane toni rijitoojoein, toroonfeta toteniha toterane.

<sup>9</sup> Nii rijiiquiche inara netonai, aonacuruhane coina ereeichene saijieein, leecha erenaa cuhane ereeichene. Chasiina inara ere aohanre, nejelau erenaa cuhane ereeichene, nii ereeichene jaancuru. Nechu joaereeinchate ereereeriquiche inacoojoein.

<sup>10</sup> Esinae rauhijiriinte niq̄ui ne, araai lauriin caa cana rai chauratane que erenaa. Niite le laurichuru nejelauniha-coaain ne rai toni.

<sup>11</sup> Nii nitohanihane jaun, canu rai, nere cuhane iriha nejelau cachane coatiha canu rai chaque nelaterihe i nii erenaa. Nii rijijieeinchu nii nejelau cacha rai canu ere cuhane irihanune jana aonaenihane, chaque rai nelatihei canu ere netonai.

<sup>12</sup> Inae inara netonai Cana Coaunera Suujue caje nenea sirina jeriquichene jaun, nii Cana Curuaanaa ranojooineein rai iclesianeein nenacaauru que jeelai amuritoheriin coitucuerateraneein nenea raauche.

<sup>13</sup> Aihana jaun, nejelau erenaa cuhane erei, Cana Coaunera caje bajaainete, rai amuucane jaannu teine.

<sup>14</sup> Canu nejelau erenaa cuhane Cana Coaunera bajaanunete, canu suujue ainaacha Cana Coaunera bajaanunete. Nete laen, canu suujua coitucunaa nainene.

<sup>15</sup> Aihane jaun Cana Coaunera bajaanune, canu suujua, canu suujue, naaonjoain aina jiniiquiin bajaanunete caohachae. Nenatichaaunne niha natiin canu suujue aina jini-

iquiin canu suujua cuhane coitucuuhin aitocooaunnete caohachae.

<sup>16</sup> Aihana jaun, inara suujue ainaacha Cana Coaunera coroajeein que ereereequichene jana, nii inara aitoonjoan coitucuelanaala nena, inara aonaane niha natiin, nii inara aitoonjoan coitucuenihane, coatiha inara aina turuhin nii aitocohichene jaan aohanna nainerihe.

<sup>17</sup> Nii inara aitoojoante niqui jataain nelateinere, nete, leeochoaauru coroatajanena nainene, jeriha Cana Coaunera Suujuane rijijieein coitucuuruhane coina aonacurenihana jaun.

<sup>18</sup> Nariha Cana Coaunera, leeochoa erenaa cuhane irihanu inara amurijiriinne coreniha.

<sup>19</sup> Nena, Cana Coaunera coitucuurera rai irihanune, saouquijiei erenaa acaauruhacha aonai cuhane erenaa jereeun, aonaain acaauru netonai nerelaauruhane coina, inacojoein leeochoa erenaa cuhane lechooca oaraancaneein erenaa que acaauru rai irihanune niha natiin aonacurenihane ajiniha.

<sup>20</sup> Canejeraauru, jiaonriha suujua coaauca canaanaine rijijieein inara suujua coaauquichene. Itolere baaso rai, canaanai rijiiquichenete laen caohachae. Nete laen, inara caohachanu que coaauquiche ichauhenaneeichene suujua que cuaainne caohachae.

<sup>21</sup> Ichaonaa rai rauhi rai, quiricha cuhanete, “Leeocha erenaa cuhane ne, caa cachaauru rai erereeeunni. Chaen nech, nejelau caje unacaauru cachaauru que canu ere beratereeeunni. Nitohaneein acaauru rai beratihanune niha natiin, coatiha canu ere tonoraaururinaain’ naa Cana Curuanaa,” naain ne laenanohinnein.

<sup>22</sup> Aihana jaun, leeochoa erenaa cuhane irihacanete, Cana Coaunera coitucuhichuru que, Cana Coaunera coituhacachene cojunacaniha aitocooache. Coatiha laen Cana Coaunera coitucuurera rai cojunacaniha aihaacache. Nete laen, Cana Coaunera aitoonjoan bihaca, Cana Coaunera coitucuurera raine, Cana Coaunera coitucuurera rai Cana Coaunera coitucuhacachene cojunacaniha aitocooache. Coatiha, Cana Coaunera coitucuhichuru rai nihei.

<sup>23</sup> Satiin Cana Coaunera rai iclesianeein neiniquichene netaojiaain netiin, leeochoa erenaa cuhane ita rai ereereequichene jana, inara rene enohin aonaa neechu joaenreein nena cacha aina Cana Coaunera coitucuelanaala nena cachanete nainere, “Caa cachaaurute joaenreein ereerejeeure jaeloroherihuruhane jaun,” naain erere.

<sup>24</sup> Nete laen inara ere cuhane Cana Coaunera caje unaa erenaa que ereereequichene jana, enoha uha inara rene nech joaereein cacha, leeochoa cacha Cana Coaunera coitucuhi, naaojoaaurine, le cachanecuruhane laen nainere, nii

aitocoichene jaan aonaain raajenihane osaaocane coitucunaa naine, jitaain nii aitocoichene aonaane jaun.

<sup>25</sup> Nii banate, satiin rai suujua cuhane niicha coacuhi coitucuhin, neseeonraain Cana Coaunera corojeein, inara aina niha Cana Coaunerane coitucureein.

*Cha ichaquichene caohachaaain ichacuche, joaaenreein ichaelanaala.*

<sup>26</sup> Canejeraauru, aihane jaun caa inara rai caitono tocohaneein netaojiaaichene, tabaauru salmo que nenatemiin. Jana tabaaurute nainere cachaauru relaane. Tabaauru que Cana Coauneraacha coitucueratei que ereereemiin. Jana tabaauru leeocho erenaa cuhane ereerejeein, leeocho erenaa aonacuruhi rai beeine, nii niicha beebejei aonaain coitucuhin aina iichuruhane coina.

<sup>27</sup> Chaen leeocho erenaa cuhane erenaa jeriquichene, coroatajaain nichatajaain netiin ita roherererojoein aitocuche le cachanequichene. Jana chunucohate nainere, nii aitocoichene jaan biha leeocho erenaa aonacuruhi raine.

<sup>28</sup> Jana neniha cache, nii erenaa aonaain benaa coitucuelanaala, nii Cana Coaunera rai iclesianeein nenacaauru janane, jiaonriha nii leeocho erenaa cuhane ereeichene. Nii leeocho erenaa cuhane erenaa jeriquichene, le cachaauru ereeine jelai netiin Cana Coaunera aina.

<sup>29</sup> Jerichanejeein techu, Cana Coaunera aitoonjoan erenaa que erenajeriquichene, nainequiche coroatajaain, nichatajaain, naaonjoaain netiin ereeichene caohachae. Nii jana leeochoauru, nii inara aitoonjoan que coaacuruhine.

<sup>30</sup> Jana, Cana Coaunera rai ereeichene jana, nii ecu lauhequiin aonajera rai irihane coina aitoha Cana Coaunerane, jauriaanejeein irihane jianiha nii ichoaichaniha erenaane cohamiin.

<sup>31</sup> Nii banate satiin le cachaauru irihane jaan que turuhane naineein, Cana Coaunera aitoonjoan bihane, satiin nerelaain suujua aninoain jeriha cuurureein acaauru netonai.

<sup>32</sup> Cana Coaunera aitoonjoan que ereite, nainere nii rai aitoha Cana Coaunerane rijjijeein sacuhane.

<sup>33</sup> Cana Coaunerate, jianacoon raotojoein nihacachene Coauneraneen ne; coatiha joaereein coaunera nihei, Cana Coaunera.

Satiin Cana Coaunera cachaneein nenacaauru ichanaa rijjijeein sacunaa jaun,

<sup>34</sup> enecurute nainere netaojiaauruha Cana Coaunera cachaaurune jana, inauheneeicha erelanaala neeunruhane. Coatiha laen jereraai ereeuruha enecurune. Aitoha Cana Coaunera rai rauhine rijjijeein rai lanaacha ere tonoraain

jerecuruha acaauru lanaaurune rijijieein neeuruhine enecuru.

<sup>35</sup> Aihana jaun, cha bajanaa jerecuruha enecurune, rai lana caje bajaauruhine rai loreri asaae neein. Caohachaa leinjiin ene iriha netaojiaanaa que netiinne.

<sup>36</sup> Coatiha inara janaacha nunuheteein benojoineein nihein Cana Coaunera ere. Niheichu, coatiha inaraacha nii Cana Coauneraacha beratei sirichaneein niheeiche. Nii que, itolere bana nainaan ichaaoche.

<sup>37</sup> Chunocoha, Cana Coaunera aitoonjoan bera *profetaneein* nena coacuhin, Cana Coaunera Suujue aitoonjoa rijijieein nihanete, caa inara rai quiicha laenai, Cana Coaunera letononeein ichacaanne coitucureein.

<sup>38</sup> Jana coitucueniha nete, Cana Coaunera coitucuhenihana jaun coitucunereein. Niheichu Cana Coaunera niha natiin acaantonain coitucuriaain.

<sup>39</sup> Canejeraauru, nitohanihana jaun, jataain corajeein Cana Coaunera aitoonjoan beeuhe. Jiaonrihachu leeocho erenaa coitucueraelanaala nena cuhane ereeuruhane caohateeichene.

<sup>40</sup> Nete cha ichaquichene rauhijiriin joenreein ichaelanaala leinjiana leinjianaain ichaquichene caohachae.

## 15

### *Oo caje ichanaa Curisitone.*

<sup>1</sup> Canejeraauru, enane laen inara relaanulune jaan, cana ichoteraneein nena erenaa coaaquichene jereeun. Nii inara rai canuhacha bei erenaate esenetaaichene jaun, nii aitothane rijijieein baaso ichana coacuelanaala neeiche.

<sup>2</sup> Chaaen techu, nii inara rai beratenojoin erenaa coreniha raotojoein jianacoon ichoteratenojoineein neeiche. Aiha nii naitoonjoan rijijieein, baaso ichana coacuelanaala neeichene. Jana aineeichene, inacojoeinte inara relaanune bana esenetareeichelu.

<sup>3</sup> Jaurihanejeeine, inara que nerelaanulune coitucuratee-unlu. Chaen nechu, cana osa coreniha ohalu Curisitone que inara relaanlu;

<sup>4</sup> Ajeri jachu cuhane conautecuruhane janate, “Nichata janone cuhane ichanae,” naain laenanohiniha Cana Coaunera Quiricha inoansi cuhanene rijijieein.

<sup>5</sup> Chaen techu, Fedoro rai ococoe. Nii baihate, lechooncai coroatajai afosotooru rai ococoe.

<sup>6</sup> Nii baihate laen ococoe saoqui fashai amurijirii cana nejeraauru rai. Tabaurute jaiti enanetojoein ichaaoere, inae ohacoaauruha leeochoaurune saijieein.

<sup>7</sup> Nii baihate ococoe Saantiaao rai. Nii caje cuuainte leeochoauru afosotooru rai ococoe.



<sup>8</sup> Satononihate inae dedeeu cuhane baiha carajaaajoaain catiaain canu rai netonai ococoe, jauriaanejeein niicha rano-joinnein nihanune que airijiin, esinae aca cana Curuaanaa nihane coitucuhanune coina.

<sup>9</sup> Nitohanihana jaunna jataen leeochoaauru afosotooru fauhecaain nelateeeun. Cana Curuaanaa cachaaauru rerohecaain sorejetocooaanne jaun chanihaaun canu afosotoneein canu curuaateeuruhane coina.

<sup>10</sup> Nena atiin jataain canu belaiha Cana Coaunerane coreniha canuneein neeun. Nete nii canu belaiha Cana Coaunerane inacojoeein aine. Nii jaunna mainajeriin amiha-neeun, jataain leeochoaauru amurijiriin caraajenhane aihanune que airijiin; jataain cana belaihana jaun, cacorataaniha Cana Coaunerane aina.

<sup>11</sup> Coatiha canu ichacaauneecha que caohacharihei, niheichu leeochoaauru ichaane niha natiin caohacharihei. Nete laen caa caitoonjoan Cana Coaunera aitoonjoan ne. Acate nii esenetaichelu inara.

*Oo cajete ichanacure onacaauru.*

<sup>12</sup> Canacaanune oo caje ichanaa Curisitone que inara relaacaanu. Chanuna jana chaen inara tabaauru oo caje ichanana nainiha cachane esenetaelanaala ereeure.

<sup>13</sup> Oo caje ichanana naineniha cachane jana nihane, coatiha oo caje ichanarihei Curisito.

<sup>14</sup> Niheichu coatiha nelaterihei naitoonjoan inara relaacaanune jaan, oo caje ichanaeniha Curisitone. Niheichu chaque nelaterihei nii inaraacha esenetai.

<sup>15</sup> Nitohanihane chujianra nechu casajeneein Cana Coaunera que ererichaanuna, Curisito ichatihane que irihacaanune jana, esinae rauhijiriin oo caje ichanaeniha onacaaurune jana aitocooaanune.

<sup>16</sup> Esinae rauhijiriin oo caje ichanaeniha onacaaurune coatiha oo caje ichanarihei Curisito netonai.

<sup>17</sup> Jana oo caje ichanaeniha Curisitone, coatiha nii chaque nelaterihei nii inaaraacha esenetai. Jerichanejeeinte inara osaacha aina ichaoriquiche.

<sup>18</sup> Nii oo caje ichanaeniha Curisitone chujianra, nitajeeurure nii esenetaain onacaauruna.

<sup>19</sup> Curisitoaacha cohajihacache caa ichaonaa que netiinne jana, oo caje ichanaeniha chujianra, Cana Coaunera coitucuhichuru amurijiriin cairichaaajoaain nerichaache.

<sup>20</sup> Nete esinae rauhijiriin oo caje ichanae Curisito. Acate jaurihanejeein ichoaichaniha oo caje ichanaelu.

<sup>21</sup> Charijieein teeinti caa cana rai chauratane que leinjiin cacha coreniha turuhelu onaa. Nii rijijieein techu leinjiin cacha coreniha turuhelu, onaa caje ichanaa cachane jaanu.

22 Nii rijijieein techu Adaan coreniha saain ohe cacha, nii rijijieein techu Curisito coreniha satiin rai nereein ichaonaa.

23 Nete laen le cachanichaachene dadaane rijijieein nerichaacheein. Curisitote nunuhe neein nereein. Nii baihate rijijieein neurureein rai cachaauru, inae nacoauneein turuhane bana.

24 Nii baihate laen nii curuanaanein nenacaauru, cocoinanacainein nenacaauru, nii nelaaetiin niha nocoenacaauru, naaonjoainuri amuritiin itajeein, rai cojoanonaa tiha Cana Curuanaa Cana Coaunera raine janate, inae Cana Coaunera Cojoanonaa que turoreein.

25 Curisitote nii rucuhecane rai ne, satiin que nejerate-nacaauru, rai tijia asae neseeonriaauruhane reentiaain.

26 Satononiha niicha itajeenite nii cana que nejeratenaanein nena onaa ne.

27 Cana Coaunerate satiin itolere Curuaanaa nihane coina nitohanein telu niqiu. Nete laen itolere Curuaanaa nihane coina aitoha Cana Coaunera natiin, Cana Coaunera Curuaanaanena nainene, Cana Coaunera itolere Curuaanaanein cocoinaain tihane jaun.

28 Inae satiin Curuaanaa niha Curisitone coina ichaa Cana Coaunerane baihate, inae satiin itolere bijiu nihane jana, nii rai Calaohi Curisito, Cana Coaunera rai jitaain nii itolere tiha cureein. Nii banate Cana Coaunera itolere Curuaanaanein nereein.

29 Aihana jaun nii onacaauru coreniha camujuaain baotisanjoinunru niriimiin. Oo caje ichanana naineniha onacaaurune, nainihei acaauru coreniha camujuaain baotisanjoinichaane.

30 Chanuna jana chaen, neniha ichanaa oo caje onaane jaanne saijieein, necairichaecaache itolere bana.

31 Canejeraauru, esinaae rauhijiriine inetono janonaa bana ohanune rai neeun. Nii rijijieeinechu raotojoeein neeun, Cana Curuaanaa Jesocurisito esenetaeranein neeichene coreniha.

32 Chaen nechu Efesoo nii necha aansai taibinae neein nenanacaauru amuritoonlu mainajeein necairichanaa coaraain. Chaque jana canu rai jelaiha caaujue nii necairichaanune. Chanuna jana neniha onaa caje ichanaa cachane jaanne, inacojoein necairichareeun. Aihana jaun chujianra, "Lenoneein, acau cohin ichaoacache, eresi onaa ajiniha," naauruha tabaaurune rijijieein ichaorichaachena.

33 Jiaonriha inara coritaauruhane esenetaaichene. Chuno-cohate inara rai, "Chanuna baaso ichaquiche. Nechu joaenreein casajete nii ichaquiche. Nii jianein caa aihacaanune rijijieein ichaaoche," naain inara suujua auhacaaurureein.

34 Aihana jaun nacoauneein caohachaa'in inara suujua coaraain neeuche, naosatena coacuhelanaala. Inara tabaaurute jaiti Cana Coaunera coitucuurene. Necojeeeichene jaan nuquene caa inara rai aitoon.

*Chatohaneeinna oo caje ichanacurure onacaauru*

35 Tabaaaurute jerihane, "Chatohaneeinna oo caje ichanacurure onacaauru. Nitohanihane chatohanai quena jana jaberocore," naaure.

36 Jataain aasohachate nainere niritiin coaacane. Chaelai ucuhe temuhacanete ohe, nii rai nucuhe ichaohin omarona nainihane coina.

37 Aihana jaun coatiha canaacha temuhi nii ajaena neein omarohi. Nechu jataain aansijiin nena cajete omarohe, tirico caje, leecha ucuhe caje, naaonjoaain.

38 Jana Cana Coaunerate Aca jerihane rijijieein tein le laurichuru rai acaauru jaberoco te.

39 Coatiha saain jaberocohin neinichaachene, ita rijijieein jaberocohaacache. Cana cachanichaachenete jelai tein ne cana jaberoco. Jana lenonecurute jelai tein rai jaberoco que jaberocoore. Tajaacurute jelai tein jaberoco que jaberocoore. Ateuru netonainte jelai tein jaberoco que jaberocohin neure.

40 Nii rijijieein techu ne dedeeu itolere jaberocoori. Jerichanejeein techu jaberocohacoaain ne itolere caa cana rai chauratane que. Nete laen nii dedeeu nena nihane jaberoco necaohacha que necaohachaa'in neure. Jana caa chauratane que nenacaaurute, chauratane que neuru jaberoco caohacha que necaohachaa'in neure.

41 Enoto cono niha natiinte nejelauneein conohe, atene, arasijie, naaonjoaaihunri cono aina ita rijijielanaala. Jerichanejeein techu arasijieeuru niha natiin nejelaunihacoaain conohe, ita rijijieein conohelanaala.

42 Nii rijiiicha oo caje ichanaa onacaaurune jaan. Rai jaberoco conautenohinte setuhe, jana rai suujue ichanana coatiha chabana setuhi.

43 Jaberoco canaacha conautei nii cha que nelatihei. Jana rai suujue ichananate laen, nelateein necaohacha que necaohachaa'in ne. Nii jaberoco conautenohin, nii cha que nelatihei. Jana, rai suujue ichananate laen nelateein ne.

44 Nii jaberoco conatenohinte jaberocohin bucuhin ne. Jana nii rai suujue ichananate suujue nejesinaneein ne. Nete aiha jaberocohin cachane rijijieein ne, rai suujue netonai.

45 Cana Coaunera Quiricha inoaensi cuhanete, "Jaurihanejeein cacha nunuheneein nena Adaante cachaneein ichaoin nelu. Jana nii baiha cacha satononeein nena Adaante,

suujue nejesinaneein ichaonaa teraneein ne,” naain ne laenanohineein.

<sup>46</sup> Nitohanihane jaun coatiha suujue nejesinaneein nena ichoaichaniha niheilu. Jaberocohin nenaate, ichoaichaniha nelu. Nii baihate laen ne nii suujue nejesinaneein nena.

<sup>47</sup> Nii jauriaanejeein cacha nenaate atane caje coaunanojoneein nelu. Jana, nii baiha nena cachate laen dede caje nenaane.

<sup>48</sup> Caa chauratane que nenacaauru jaberocote, nii atane caje nenaalu cacha jaberoco rijijie. Jana nii dedeeu nenacaauru jaberocoorute, nii dede caje nena jaberoco rijijie.

<sup>49</sup> Nii cacha atane caje coaunanojoneein nena tocohaneein nihacachene rijijieein techu, nii dede caje nena cacha tocohaneein nerichaacheein.

<sup>50</sup> Canejeraauru, inara raine benaa jereeun, jaberocohin bucuhin nena cacha, Cana Coaunera Cojoanonaa que nena nainihe. Aihana jaun nii setunaa inaera, niha nii setuhelanaala nenaane jaun nena nainihe.

<sup>51</sup> Nena laen coitucueraelanaala nena coitucuhichene jereeun. Coatiha saain orihacacheein. Nete laen, corenejoin niha cureein cana jaberoco.

<sup>52</sup> Inae tonihane satonotiha jaihane janate, cana nota mitaain cana nota toretana rijijieein, inae turureein Cana Coaunera Cojoanonaa. Inae Cana Coaunera Cojoanonaa que turuhane janate, ichanaa cuurureein onacaauru, inae chabana ooruhane coina que airijiin. Nii jana canate laen, corenojoin niha curichaacheein.

<sup>53</sup> Nii cana jaberoco setu rai nenaate, necoriha cureein setunaa inaa que. Jerichanejeein techu nii cana jaberoco onaa inaera nihane caje, onaa inaelanaala nena que corerareein.

<sup>54</sup> Inae nii cana jaberoco setunaa inaera, setunaa inaa que coreraain, nii cana jaberoco onaa inaera netonai onaa inaa que necorihane janate, inae Cana Coaunera quiricha cuhane, “Onaate corenojonne, chabana onaa inaa que.

<sup>55</sup> Chu neeinte onaa. Itolere amuritiin nena jerei. Onaa, chu ne cachauru cairichaeriine jaan,” naain laenanoineein nihane que turureein.

<sup>56</sup> Nii cacha cairichaa onaane jaante osa ne. Jana nii inoaenlu rauhi, acaauru aitoonjoante nii osa laraarajaera ne.

<sup>57</sup> Nariha Cana Coaunera. Cana Coaunerate, nii onaanaja itajerate Cana Curuaanaa Jesocurisito aina cuaain.

<sup>58</sup> Canejeraauru, aihana jaun nii baaso coacuelanaala, rao-tojoein itolere bana neeuche. Itolere bana, jelai amuritoheriin Cana Curuaanaacha jerei ichajeein neeuche. Inarate, Cana Curuaanaa aina jiniiquii canaacha ichai inacojoein nenihane coitucuhiche.

## 16

*Coriqui taojiaauche cana nejeraauru rai.*

<sup>1</sup> Canaacha esenetai esenetaeraneein nenacaauru- cana nejeraauru rai coriqui taojiaaichene, Galasia bataneun nenacaauru, Cana Coaunera coitucuureraauru relaanolune rijjiseen ichacuche.

<sup>2</sup> Tomiho bana naineen, inara amihaneeo coreniha inaraacha eruujuei neleru rucuhecuche jelai teen, nabana turuhanune janaacha taojiana coaauquichene coataa.

<sup>3</sup> Aihune inae turuhanune bana, inaraacha letoaenenuuru cachaauru letoae, acaauru rai quiricha laenaain teen, nii coriqui inaraacha taojiai aina amaain teuruha cana nejeraauru raine coina.

<sup>4</sup> Canuhetonai cunaa jerichaaunnena, acaauru aina jini-iquiin curichaanuhin.

*Coriintoote cunaa jere Faboro.*

<sup>5</sup> Inae inara rene turuha uhanunena, Masedonia batane jelon cuhin, caje coauneen laen Coriinto turureeunni.

<sup>6</sup> Jerihanena, carajaaajoaain inara aina nereeunni. Nainichaaunena inara aina nereeunni, situha elohenane reentiaain. Nii banate, canu coroatajanena nainer-iquicheein, jelai caje chunijiun cunaa jerichaaunne.

<sup>7</sup> Coatiha canu situneeicha inara coana jerihaaun. Nii jaunna inara aina carajaeriin nena jereeun, jeriha Cana Curuaanaa ne.

<sup>8</sup> Nena laen Efesoo nereeunni, Feentecosetesi janonaa bana que tiaaajoaain.

<sup>9</sup> Aiha jataain ecu Cana Curuaanaa rai amihanihanune, caohachaaain mituha canu amihaneonne rai nihane jaun. Arajiin caque nejeratenaaneen neeuruhane saijjeenna aicheeunni.

<sup>10</sup> Inae inara rene turuha Timoteeone caohachaaain raachete raotojoeen inara aina neene. Acaentonainte jerichanejeein canu rijjiseen Cana Curuaanaa amihaneon ichana coitucue.

<sup>11</sup> Aihana jaun jiaonriha chuni nere tonoraenihane. Rautiaaincha namu que coroatajanecuchete nii chaque situhelanaala raotojoeen canu coaraa uhine. Cauna leeochoaauru canejeraauru aina cohajihacaanu.

<sup>12</sup> Canejera Aforo netonai raine maajeeinne niqui aitoon, leeochoaauru cana nejeraauru aina uhin inara coaraa uhane coina. Nete unaa jerene. Caa baiha nainihane banate ureein.

*Satononihate necoe Faboro.*

<sup>13</sup> Caohachaaain nainaaain necohalajiin, itolere que laraajiin baaso ichana coacuelanaala neeuche.

14 Chaelai ichaquiche leeochoaauru raine, jataain belaaïn corajeeïn ichacuche.

15 Canejeraauru, inarate rai naraaichuru aina curuae-quin jauriaanejeeïn Cana Coaunera esenetaalu Esetefana, Acaïha batane quene coitucuhiche raotojoeïn. Chaen techu acaauru nii cana nejeraauru coroatajaneraneeeïn neeure, canaacha esenetai coitucuuruhane coina.

16 Nitohanihana jaunna nii Cana Coaunera coitucuurera aina, satiïn acaauru coroatajaneraaurune maajeeïn, que inara suujua acatequichene jereeun.

17 Jataainne rachoojoeun inara aina nenihanune jana, canu rene turuuruha Esetefana aina Forotonato, Acaico, naaonjoainurine jaun.

18 Acaauru ainate raotojoeïn nedae casuujua, jerichanejeeïn inara rijijieeïn aihuruhane jaun. Acaauru rijijieeïn caohachaaïn nenacaauru cachaauru coitucuhin neeuche.

19 Asia batane que nenacaauru Cana Curuaanaa Jesocurisito ranojoinunrute inara coaacure. Aquila, Firisila, chaen rai loreri asae netaojianacaauru naaajoainunrite inara coaacure, Cana Curuaanaa Curisito coreniha.

20 Satiïn cana nejeraaurute inara coaacure. Raotojoeïn ita rene turuhichene ita raain neeuche.

21 Canune Faboroneeïn inara rai canu raajenihane cacooi que caa laenaaun inara coacuhin.

22 Chunocoha Cana Curuaanaa belainihane, baaso jana nijiaoine. Inae cataainjian Cana Curuaanaa.

23 Cana Curuaanaa Jesocurisito, inara rai caohachaaïn neeïnchene jaanu teeine.

24 Satiïn inarane jataain belaihun cana Curuaanaa Jesocurisito coreniha.

## Coriintoo nenacaauru rai Faborohacha letoai coroataja

*Coriinto cocoaichacuru rai “Raotojoein neeuhe,” naa Faboro.*

<sup>1</sup> Canuna Faboroneeun. Cana Coaunera jerihane jaunne, rai Calaohi Jesocurisito letono afosotoneeun. Cana nejera Timoteeo aina jiniiquiina, Acaiha batane que nenea Coriintoo Jesocurisito ranojoneein iclesianeein neiniquichene rai, chaen nii Acaiha batane sacutaain Cana Coaunera cacha-neein satiin neiniquichene raine maajeeine caa quiricha lae-nacaanu.

<sup>2</sup> Cana Curuaanaa Jesocurisito, Cana Inaca Cana Coaunera, naaonjoaihunri raotojoein jianacoon rachoojoein neeichene jaanu teuruhine inara rai.

*Necairichaane biha Faboro.*

<sup>3</sup> Cana Curuaanaa Jesocurisito Inacaneein nenea Cana Coaunera coroaecaachenete ne. Acate satiin Cana Inacaneein nihane jaun, cairichaojoaain cana coaraain cana necairichanaja caje cana suujua nunaeraneein ne.

<sup>4</sup> Acate satiin itolere necairichaacachene jaanru caje, cairichaojoaain cana coaraain, cana suujua nunaeraneein ne. Nitohaneeinte cana netonai nii cairichaojoaain cana coaraain cana suujua nunaane rijijieein, necairichaauruha leeochoaurune coaraain, cairichaojoaain acaauru coaraain acaauru suujua nunaain nenea coina ichae Cana Coaunera.

<sup>5</sup> Nii mainajeein necairichaalu Jesocurisitone te, canacaanu que nerotohane jaunne nii aihalune rijijieein necairichanaa abaantaacaanu. Nii rijijieein techu nii Jesocurisito aina cuain cairichaojoaain leeochoauru coaraain nihacaanu.

<sup>6</sup> Nitohaneeine necairichaacaanu, inara netonai ichoteratenojoneein inara suujua nunaeraanu siriin nenea nainiquichene coina. Nii rijijieein techu, Cana Coaunera canacaanu suujua nunaane, inara netonai suujua nunanohinein neriquicheein, aina cuain itolere necairichanaa abaantaain neeichene coina.

<sup>7</sup> Nitohaneein neriquicheeine esenetaacaanu. Charijieein teeinti necairichaacaanune rijijieein inara netonai necairichanaa abaataain neeiche. Nii rijijieein techu cairichaojoaain cana coaraain cana suujua nunaain cana rai Cana Coauneraacha tei sirichaneein neeiche.

<sup>8</sup> Canejeraauru, Asia batane que necairichaacaanulune coaucuche. Ecune jataain mijiaaieein cairichanojoneein

cojunojoinichaanulu. Nii jaunne inae abaantasinihacaanune jaun, “Inae jecha orichaanuhi,” naacaanu,

<sup>9</sup> ohacaanune coina ichara tocohaneein cairichanojoinichaanune jaun. Nete Cana Coaunera onaa ichateein ichoteranihane que jaequiin nihacaanune coina necairichaacaanulu, Cana Coaunera colane nenea rijijieein canacaanu jaberocohacha nejesina que itolere bana jaecohacaanune coataa.

<sup>10</sup> Nii Cana Coaunerate, necairichaain ohacaanune rai nihacaanune caje canacaanu ichoteratelu. Nii rijijieein techu satiin cana ichoteratereein, ohin nitajenaa rai nenea caje. Acatechu ohacachene bana nitaje rai niha cana suujuene caje, cana suujue ichoterateraneein nereein.

<sup>11</sup> Nitohaneeinte cana ichoteratejeein sacureein, canacaanu aina bajaebajaequichene. Arajii cachaauru canacaanu coreniha Cana Coaunera bajaanete, arajiin netonai Cana Coaunera coroaecurureein, canacaanu rai caohacha ichaane coreniha.

### *Coriintoo cuenihane biha Faborone*

<sup>12</sup> Jataaine raotojoihacaanu inara coritana coacuelanaala, niheichu chatohaneein caa chauratane que baaso ichaelanaala, niheichu inara aina nihacaanulune bana inara rai baaso ichaenihacaanulune jaun. Coatiha canacaanu raajenihane cha coitucuera nihacaanune jaun aihahacaanu. Cana Coaunerate jataain canacaanu belaitohane jaun, nitohaneei ichaohacaanune jerihana jaunna aihacaanu.

<sup>13</sup> Caa inara rai canacaanuhacha laenanajaqui quirichauru cuhane, coatiha leechaneein inaraacha coitucunaa nainihe i laenahacaanu. Bajiaanachuinti jitaain aonaain caohatiin coitucuneeiche.

<sup>14</sup> Nii reretaain aonaain coitucuhichene rijijieeinte, canacaanu coreniha raotojoein neriquicheein, inae nacoauneein turuha Cana Curuaanaa Jesocurisitone bana. Nii rijijieeinechu canacaanu netonai raotojoerichaanuhi inara coreniha inae turuhane bana.

<sup>15</sup> Niritiin esenetaainna niqui, jauriaanejeein inara coaraa unaa jereeunlu, atiin coroatasain inara rene bedaenichaaunne coina.

<sup>16</sup> Jauriaanejeeine niqui, Masedoniau cuujihataain inara rene bedaenena jereeun, coaiten caje caaujihataain nacoauneein bedainichaaunne baiha jelai caje coauneein Jodea cuhanune que, nainequichene canu coroatajanequichene coina.

<sup>17</sup> Niheichu canuhacha ichaneni coaucaunne, coatiha inara coritaa inae leesajeein “Airichaaunni,” naanune, canu suujua cuhane “Airihaaunni,” naain coacuhin irihaan.



<sup>18</sup> Cana Coaunerate, inara rai cha que erenaa jerichaanune “Airichaanuhi,” naacaanune canacaanu suujua cuhane “Airihacaanuhi,” naenihacaanune coaraje.

<sup>19</sup> Nii rijijieein techu, canu, Timoteeo, Siribano, naaonjoainichaanune, inara rai canacaanuhacha beebejei Cana Coaunera Calaohi Jesocurisito esinae rauhijiriin acaneein ne. Nii Jesocurisitote esinae rauhijiriin ichaane coina, “Icharichaaunni,” naa Cana Coaunera, suujua cuhane “Icharihaaunni,” naelanaalane jaane.

<sup>20</sup> Nii aina cuaainte, satiin niicha ichaneni niicha coacuilu ichae Cana Coaunera. Nii jaunte, Cana Coaunera coroa-jeein bajaacachene, “Nitohaneein ichamiin Cana Coaunera, Jesocurisito aina cuaain” naacache.

<sup>21</sup> Chaen techu Aca cana janijiin cana taojiaain Jesocurisito aina cana teein, “Caaurute canu cachaauru ne” naelu Cana Coaunera.

<sup>22</sup> Nitohaneein cana janijiin cana raainte, rai cacha cojunacatihane jaanque cana cojunacateein, cana rai rai Suujue telu Cana Coaunera, esinae rauhijiriin cana rai niicha teenu ichoaicha teranu que.

<sup>23</sup> Nena jaiti nii coaaucaaulune rijijieein Coriinto inara rene turuha uhenihanune, inara rai caohacha ichaa aihun. Cana Coaunerate inara rai caohacha ichaa aihanune coitucue.

<sup>24</sup> Coatihachu inae caohatiin coitucuhin esenetaaichene jaun inara rai, “Naaonjoain ichaquichenete caohachae” naain erenaa nainihacaanu. Raujiaainchana inara coroatajanena jerichaanu, raotojoein rachoojoein esenetaaichene rijijieein neeichene coina.

## 2

<sup>1</sup> Nitohanihane jaunne nabana inara inaderaacaaunne coataa, nacoauneein inara coaraa unaa jerichaaunne baiha aineeun.

<sup>2</sup> Inara inaderaacaaunne, neneriha raotojoein canu rachoojiaeraanune jaun.

<sup>3</sup> Nii jaunne inara rene turuelanaala, raujiaaincha inara rai quiricha cuhane aitiin laenaaunlu, canu inaderaaaguichene coina inara rene turunaa jerenihanune jaun, inae turuhane bana inaderanaa coacuelanaala, nenacaeneeinjia jini-iquiin rachoojihacachene coina.

<sup>4</sup> Nena laen nii quiricha laenacaaunlune bana, jataain inara coacuhin que nererojoecaain chanaaunlu. Coatiha nii que coacuhin inaderaaichene coina nii been laenahaunlu, jataain inara belaichaaunne coitucuhichene coinane niritiin been inara rai laenaaunlu.

*“Nii canu que nejeratena que inara suujua acatecuche” naa Faborone.*

<sup>5</sup> Nitohaneein inara rai baaso ichara cacha, canu raaicha inaderanaa tiha aiheilu, inara rai netonaite inaderanaa tiha ailu. Amuritiin rerohin aitona jerenihanune jaunne caa caritojoein aitoon.

<sup>6-7</sup> Inae nii cacha aina nejerateein mainajeriin casete-caaichene jianeein, que inara suujua acateein, belaaain coroatajanecuche, nabana joaenreein suujua cuuaain inaderaane niicha ichanenu coitucuenihane coataa.

<sup>8</sup> Nii jaunne inara rai aitoon, jauriaanejeein belaiquichelune rijijieein belaaichene coina.

<sup>9</sup> Esinae rauhijiriin, canu ere tonoraain rijijieein ichaquichene coaracaaunne coinane, nechu inara cojuha inara rai quiricha cuhane aitiin laenaanlu.

<sup>10</sup> Nitohaniane jaunne, inara suujua acatequichene jaanque canuhetonai casuujua acatereeeni. Aiha niha chatohanai que casuujua actichaaunne jaanunena, Jesocurisito notaracae que casuujua acatereeeni inara coreniha.

<sup>11</sup> Nitohaneein ichaohacachene, coatiha canaque niicha jerei ichana nainerinaain moconajaera, inae raotojoein rai nerurujua coitucuhacachene jaun.

*Toroasihu turuhin raotocojoaeniha rai suujuane biha Faborone.*

<sup>12</sup> Jesocurisito beratenojoi beebejihanu cachaauru raine coina, Toroasihu turuhanune janate, Cana Curuaanaa jerenohi ichacaaunne coina jatoroaain neeunlu.

<sup>13</sup> Nena ecu cana nejera Tito eruhenihanune jaun, raotenelu casuujua. Nii jaunna ecu nenacaauru rai necoein jelai caje amuhin Masedoniau cuunlu.

*Jesocurisito ainate namuritoroatena coacuelanaala niha-cache.*

<sup>14</sup> Nariha Cana Coaunera itolere bana namuritoroatena coacuelanaala, cana aina cuuaain Jesocurisitohacha ichai naitoonjoa beratihane jaun, itolere sacutaain bihacachene coreniha. Nii canaque naitoonjoa niicha berateite, aiha jujuhine rijijieein itolere lomoritiin riaaneein aonanojohi ne.

<sup>15</sup> Canacaanuna Cana Coaunera rai Jesocurisitohacha mo-coi jujui rijijieein, inae nichotenaaneein nenacaauru rene, nitaje rai nenacaauru rene, naaonjoainuri rene letono neein nihacaanu.

<sup>16</sup> Nitajerai nenacaauru raite, leinjiin jujui cacha atinaeraanuneein toni nii canacaanuhacha beebejei. Nete laen nichote rai nenacaauru rai, leinjiin jujui ichaonaateraneein toni

nii canacaanuhacha beebejei. Nihei chuni cacha nitohanei ichana naineraneein nei.

<sup>17</sup> Chabana aihuruha leeochoaurune tocohanein, Cana Coauneraacha beratenojoi beebejihacaanune coreniha, canacaanu coretera jerenihacaanu. Nenacaaennejian nitohanein nena coacuhelanaala, esinae rauhijiriin nohanelanaala Cana Coaunera notaracaae, coujurihu rai letononeein netiin inara relaacaanu, rai calaohi Jesocurisito cachanein nihacaanune jaun.

### 3

#### *Ena nena Rauhi Cana Coauneraacha tei*

<sup>1</sup> Niritiin inara rai irihacaanunete, jerihane nechu caohachaaain canacaanu raauruha itolere cachaaurune coina necoasitaa aitoha, canacaanu beeiche. Niritiin coaauquichene coataa, coatiha aihuruha nii leeochoaurune rijijieein, cajihanein amuhemujueein: “Canacaanune naonjoaineeinne nihacaanu,” naain cachaauru rai ereein nihaacaanu. Niheichu inara rai nihanatiin chabana, “‘Naonjoaineeinte neeure,’ naain canacaanu beein cachaauru rai quiricha laenacuchete aina canacaanu raauruhine,” naain chabana inara rai irihacaanu.

<sup>2</sup> Inaraachane latichaanu, inara aina cuaain inanacaa canacaanu suujuau tenojoin que inara relacaanune coara-teeiche cachaauru quene coina. Nii ainate canacaanu ichanaa coaraain canacaanu coitucuurureein cachaauru.

<sup>3</sup> Nitohaneente, quiricha laenanohineein nena rijijieein, Jesocurisito ichanohineein, cachaauru rai canacaanu aina cuaain teratenojoneein neeichene coaracure cachaauru. Coatiha nii aiha quiricha laenanohine rijijieein niheeiche. Inarate Cana Coaunera Suujue ichanohineein nitohanein neeiche. Niheichu atane jeeu que tein laenanohi rijijieein quiricha neein niheeiche. Inarate cachaauru suujuau canacaanu aina cuaain Cana Coaunera teratenojoneein nena que suujuequiin neeiche.

<sup>4</sup> Nii jaanne, Jesocurisito aina cuaain, nii aitocoaanune rijijieein ichaa Cana Coaunerane esenetaacaanu.

<sup>5</sup> Coatiha canacaanu raajenihane nitohanei ichana nainerihacaanu. Cana Coaunerate, nitohanei ichana inaeranein canacaanu tein ne.

<sup>6</sup> Nii jaunte Aca canacaanu relae, nii enachasine rauhi naitoonjoan beranein nihacaanune coina. Nii rauhi coatiha laenanohineein nena nihei. Acate jeriha Cana Coaunera suujuene rijijieein nena ne. Nii laenanohineein nena rauhite, tonoraeniha cachane ohin nitajihane coina aitelu. Nete laen nii ena nena rauhi jeriha Cana Coaunera Suujuene rijijieein chabana nitajeniha cachane coina ichaonaa tera ne.

<sup>7</sup> Nii rauhi atane jeu que tein laenanohineein nenaate, uhaa Moisesane jana, rai nomeri coaana nainecurenelu Isaraelitacuru, jataain jiquihacoha nii niicha uhai caun rai nomerine jaun. Nii rai cono jiquihaquite, jacaain satonohelu. Nete, nii rauhi cana atinarateraneein nihane saijieein, jataain necaohachaain cojoelanaacojoaain ococohin nelu.

<sup>8</sup> Nii jaun techu jataain nii amuritoheriin necaohachaain cojoelanaacojoae nii ena turunaa Cana Coaunera rai rauhicana suujue cuhane niicha tei rai Suujue.

<sup>9</sup> Nitohaneein, itolere canaacha ichai ujuaihoneein niha-cachene coina tenojoinihane saijieein, cojoelanaacojoaain nihalu, nii cha ujuaihoneein nena coina tenojoine jaunte, nii amuritoheriin cojoelanaacojoaain nereein ena nena rauhi Cana Coaunera tenojoi, cha ujuaihonelanaala nena coina canacaanuhacha beebejei.

<sup>10</sup> Nitohanihane jaun, coatiha inae chaque nelateein nihei nii jauriaanejeein nena rauhi, caa ena nena rauhi jataain caohachaain cojoelanaacojoaain amurijiriin nihane jaun.

<sup>11</sup> Nitohaneein, nitajerai nihane saijieein, jataain cojoelanaacojoaalu nii jauriaanejeein nenaane jauntechu, nii amurijiriin jataain cojoelanaacojoaain nereein nii chabana satonoelanaala neenihu.

<sup>12</sup> Nitohaneein nii que jaequinne, satiin acatiha queecha ereerejihacaanu cachaauru rai.

<sup>13</sup> Coatiha aihalu Moisesane rijjijieein, canacaanu meri conajaain aihacaanu canacaanu. Moisesate, nabana jacajeein cuha nii nomeri jiquihaquine coaracuruha Isaraelitacurune coataa, rai nomeri conajaain ererejetelu acaauru rai.

<sup>14</sup> Nete nii naitoonjoan aonaain coitucusichurenelu Isaraelitacuru. Enanetojoeinte nii inoanlu nena cana aina Cana Coauneraacha ichanenu naitoonjoan ereretaauruhane nihanatiin aonasihurene, jaiti acaauru suujua aina, acaauru nota caje itajenojoineniha nii conaarane jaun. Jesocurisito-hachate naine, nii conaara itajeein niha cacha caje ne.

<sup>15</sup> Nitohanihane jaunte, enanetojoein nii Moisesa rai rauhi ereretaauruhane nihanatiin, acaauru suujua anioane jaun coitucusichurene cachaauru.

<sup>16</sup> Nete laen naosatihajeein ichaohane jianein, Jesocurisito esenetaain ichaoha cachane, nii cha coitucuhane coataa, rai suujua conaara itaje rai Jesocurisito.

<sup>17</sup> Cana Coaunera Suujueneein niha Cana Curuaanaa Jesocurisitone jaunte, itolereneein niha nii rai Suujuene jaunru, raotojoein ichaohin, cha ujuaihonelanaala neeu-ruereein cachaauru.

<sup>18</sup> Inae cana, Jesocurisito ranojoneein nihacachene jaunte, inae cana caje nii cana suujua aina cana nota conaara itaji-

hane jaun, aiha esefejo conone rijijieein conohe, cana aina jataain caohacha ichaa Jesocurisitone jaan cono. Nii jaunte Cana ichao corihajeein sacuha itolere bana Jesocurisito rai Suujue aina cuaainne jaun, rijijieein inae ichaohacache.

## 4

<sup>1</sup> Cairichaaajoaain cana coaraane jaun, canacaanu rai nii amihanenaa tiha Cana Coaunerane jaun, nii canacaanu rai niicha tei amihanenaa bihacaanune coiinteein jianena nainenihacaanu.

<sup>2</sup> Nii jaune coejenacai ichana coacuelanaala, niheichu asinojoneein cha ichaelanaala, itolere que jaolequiin satiin notaracaae niicha icharatei ichacaun. Coatihachu chaen canacaanu esenetaa cachane jerenacaun, nohaneein nii Cana Coaunera beratenojoi udaa cuaain cacha relahacaanu. Nitohaneeinne cacha coritana coacuelanaala, esinaen rauhi-jiriin nii canacaanu coitucuhichene rijijieein, Cana Coaunera notaracaae aitocaaanu.

<sup>3</sup> Aihane jaun chunocoha, nii osa caje cana ichoter-aanu canacaanuhacha beebejei aonaane saijieein coitucuenihanete, inae nitaje rai nihane jaun aicheein.

<sup>4</sup> Inae esenetaaurenihane jaunte, maosa rijijieein acaauru te moconajaera, nabana jataain necaohachaa Jesocurisito Cana Coaunera rijijieein nena tenojoin ichaonaane coaraain coitucunaa nainecuruhane coataa.

<sup>5</sup> Coatiha canacaanu ichaoque inara relahacaanu. Acaihanijin Cana Curuanaa Jesocurisito ichao quene inara relacaanu. Jataain canacaanu belaitoha Jesocurisitone jaan aina cuaainne inara rai caohachanu ichaeraneein nihacaanu.

<sup>6</sup> Charijieein teeinti nocohena jana conoha conone coina aitoha Cana Coaunerane jaun neconaelu cono. Nii rijijieein techu nii jeelai Cana Coaunera canacaanu suujua cuhane rai cono tein ne, aina cuaain Jesocurisito merique conoha rai conone coitucuhacaanune coina.

*Canaacha esenetai aina cuaainte ichaohacache.*

<sup>7</sup> Nete laen nii Cana Coaunera tenojoi jataain nelatei raain, chaque nelatelanaala aiha atane codarojoene rijijieein nena cana jaberoco cuhane sirichaache. Nitohaneinte chaneei nenihacachene saijieein cana aina cuaain rai nelate coarate Cana Coaunera.

<sup>8</sup> Nitohanihane jaunne necairichanaa coaracaanune nihanatiin, canacaanuhacha ichanenu chacaanu, chaque casilanaala. Coatiha chabana amuritonojoneein nihaacaanu.

<sup>9</sup> Canacaanu ariiriichuruha canacaanu sohin jaaoruhane coina niqui, nete canacaanu nainatejene Cana Coaunera. Canacaanu comaauruha niqui, nete canacaanu itajenaa nainesihurene.

<sup>10</sup> Itolereneein cuhacaanune jaanru nihanatiinte, aihalu Jesocurisitone rijijieein cairichanojoneein ohacaanune rai nihacaanu, ichaohalune rijijieein canacaanu aina cuaain rai nichao coaracuruha cachaaurune coina.

<sup>11</sup> Jataaina necairichaacaanu, Jesocurisito coreniha canacaanu atinaauruhane rai neeuruhane jaun. Nitohaneeinne Jesocurisitohacha tei ichaonaa que ichaohacaanune coaratihacaanu.

<sup>12</sup> Nitohaneeinne ohacaanune rai nihacaanu. Nete laen inara, inae raotojoein ichaonaaque ichaohiche, canacaanu que inara rai niicha teratei ichaonaa coreniha.

<sup>13</sup> Niique te, “Esenetaanune jaunne ereeun,” naain aitoa Cana Coaunera Quiricha cuhanene rijijieeinne, canacaanu netonai jerichanejeein esenetaacaanune jaun, que ereereecaanu.

<sup>14</sup> Nitohaneeine nihacaanu, ohane caje Jesoso ichatihalune rijijieein, onaa caje canacaanu ichaterichaa in Cana Coaunera esenetaacaanune jaun. Nitohaneeinte onaa caje cana ichatein cana rareein nacatiha rai calaohi aina jiniiquiin nena coina.

<sup>15</sup> Nitohaneeinte, jataain caohacha ichae inara rai Cana Coaunera. Nitohaneein araai laurii que inara coroatajaniha Cana Coaunera coaracuruhanete, araai laurii cachaauru netonai Cana Coaunera necaohacha coroaecurureein.

<sup>16</sup> Nii jaunna chabana bihacaanune jianena coacuelanaala, niheichu namuritoroatena coacuelanaala nihacaanu. Cau caa ichaonaa que ichaohinte inae binaanihacache. Nete, cana suujua cuhane, itolere janonaa bana nenamanacainacache.

<sup>17</sup> Cau caa chauratane que ichaohin necairichanaate sorotiin sareein. Nete, nii necairichanaa coreniha, jataain nii amuritoheriin, chabana sanaacharanejeein nena ichaonaa rarichaacheein.

<sup>18</sup> Aihana jaun nainihe i tolere cana notaracae nenaacha que coaucaachene. Nii chabana, coaraelanaala nenaacha que coaucaachenete caohachae. Nii satiin canaacha coaracurite, satiin nitajera i ne. Nete laen nii chabana canaacha coaraa i chabana nitajenereein.

## 5

<sup>1</sup> Cana jaberocote cana amunajau leinjiin loanari sorotiin nelatenenu rijijieein ne. Nete laen chatohaneein itajenojoiniha nii cana jaberecone niha natiin, dedeeu cana jaberoco ena nena rucuheca Cana Coaunera coitucuhacache.

<sup>2</sup> Nii jaunte ichanohineein nena, chabana nitajenaachara jaberoco cuhane inae ichaoha cunaa jere canacaanu suujue.

<sup>3</sup> Nii jaberoco te laen canacaanu suujue que necurujua-reein, machoequuin nenaane rijijieein nihane caje.

<sup>4</sup> Jaiti nii loanari rijjijeein nenea cana jaberoco que jaberocohin ichaohacaanune jaunne, cha lateein, nererojoe-caaeriin, naaonjoaain ichaohacaanu. Coatiha itolere bana, nii canacaanu jaberoco que ichaohacaanune colatiha aihahacaanu. Inae nii canacaanu que banihateein Cana Coaunera ichanohi jaberoco que ichaohacaanunete, nii canacaanu jaberoco jauriaanejeein loanari rijjijeein nenea, nii ena nenea canacaanu jaberoco jana nitajereein.

<sup>5</sup> Cana Coaunerate nitohaneein nihacaanune coina canacaanu relaain nii ichoae tacaain canacaanu rai, rai Suujue te, nii cana rai naitoonjoan sirichaneein nerichaanuhine cojunacanu que.

<sup>6</sup> Nii jaune satiin nii canacaanu rai naitoonjoa terichaaaine coitucuhin esenetaacaanu. Jaiti canacaanu jaberoconeein ichaohin nihacaanune jaunne, Cana Curuaanaa rohan neni-hacaanu.

<sup>7-8</sup> Ena niqui coarahaacaanu rohan jaiti neni-hacaanune jaun. Nete nitohaneein nerichaanuhine coitucuhacaanu, jataain esenetaacaanune coreniha. Inae niqui caa canacaanu jaberoco ratiriin Cana Curuaanaa rene turunaa jerichaanu.

<sup>9</sup> Nii jaunne cana Curuaanaa jerihane rijjijeein itolere bana ichaorichaanuhin, ohin, ichaohin, naaonjoaacaaanune niha-natiin.

<sup>10</sup> Inae itolere baaso ichara, caohacha ichara, naaonjoain ichao coitucuhane coina niha Cana Coaunerane bana nacatiha tururichaacheein, baaso ichaain, caohacha ichaain, naaonjoaacachene coitucuhin, lecachanichaachene ichanohi coitucuhin rai niicha tenaa jerei tihane coina.

*Aina raotojoein nihacachenete jere Cana Coaunera.*

<sup>11</sup> Nii jaunne inae coitucuhacaanune jaun, jeriha Cana Coaunerane rijjijeein ichaauruha cachaaurune coina acaauru que jereratiha acaauru rai ereereecaanu. Cana Coaunerate canacaanu coitucuhin, canacaanu suujuane maajeein coitucue. Bajiaanachuhinti esinae rauhijiriin rai letononeein Aca jerihane rijjijeein ichaohacaanune coitucueneeiche inara netonai.

<sup>12</sup> Coatiha canacaanu raajenihane necohasitaa caa aito-hacaanu. Nenacaanejian raotojoein coitucuhin nainain, nitohaneein suujua cuhane coaralanaala nohanein inara relaa nocoetonacaauru tonorana nainequichene coina caa inara rai aitocaaanu, nenacaan inara coritaauruhane esenetaaichene coataa.

<sup>13</sup> Jeriha Cana Coaunerane rijjijeein itolere ichaain nihacaanune jaunte, leinjiin jaelorohe nerurujua cha que nelatihei rijjijeein coaracure leeochoauru cachaauru. Jana

inara, esinae rauhijiriin caohatiin coacuhin aihacaanune coaraqichenete, inara caohachanu que aihacaanune coitucuriquicheein.

<sup>14</sup> Jataain cana belaitohane jaunte, cana ichao rucuhaneen beraichaneen ne Curisito, aca satiin ichao coreniha ohalune coitucuhacachene caje coauneen nunuheteen. Nii ohane aina cuaainte satiin cana netonai ohacachelu rai ichaonaa que ichaohacachene coina.

<sup>15</sup> Nitohaneente satiin cachanichaachene coreniha ohelu Jesocurisito. Inae satiin cana coreniha ohalune coitucuhin, esenetaain nihacachene jaun jeriha cana suujuane rijijieein ichaonaa coacuelanaala, Aca jerihane rijijieein ichaohacachene coina.

<sup>16</sup> Canacaanu netonaine niqui, nii namute cacha que coaacuruha Cana Coanera coitucuhichurune rijijieein Jesocurisito netonai que coaurejetocooaanulu. Nena laen inae enene nitohaneen coacuenihacaanu.

<sup>17</sup> Aihane jaun inae Jesocurisito aina jiniiquiin esenetaain ichaoha cachanete, inae nii jauriaanejeein nena rai nichao jianeen nii ena nena ichaonaa enachasine que ichoae cacha.

<sup>18</sup> Nitohaneente Jesocurisito aina cuaain ichae Cana Coanera, que nejeratena rijijieein nena caje aina jiniiquiin ita belaa raotojoein nihacachene coina. Nii jaunte canacaanu letoae inara que coitucueratihacaanune, inara netonai aina jiniiquiin raotojoein neeichene coina.

<sup>19</sup> Cana Coanerate nitohaneen Jesocurisito aina cuaain satiin cachanichaachene osa que suujua acatihane, aina raotojoein jiniiquiin nena coina ichaain, nii niicha ichai beranu que canacaanu telu.

<sup>20</sup> Nii jaunte acaneei nena rijijieein canacaanu tein inara rai bihacaanune coina berate Cana Coanera. Niine raajenhane aitoha Cana Coaneran rijitojoein, caa inara rai bihacaanu. Nitohaneen Jesocurisito letononihacaanune jaunne, inara rai aitocooaanu, atiin caa inara rai Cana Coanera beratenojoi tonoraain esenetaain neeichene, inara osa que suujua acatena nainihane coina.

<sup>21</sup> Coatiha aansijieenniji osa que nesaruhin niheilulu Jesocurisito niqui. Nete, satiin cana osa coreniha caseteco coaraelu, aina cuaain cana osa que suujua acateen jianacoon cana tihane coina nainatejiha Cana Coaneran jaun.

## 6

<sup>1</sup> Nitohaneen niicha ichai que Cana Coanera coroatajaneraneen nihacaanune jaunne, inara rai aitocooaanu. Nabana jataain inara belaitohane jaun inara rai Cana Coaneraacha



beratenojoi que jaoleconaa coacuelanaala que nerausiaequichene coina.

<sup>2</sup> Nitohanihane coinata rai Quiricha inoaensi cuhane: "Canu bajaae bajaaequine aonajihanu.

Chaen nechu nichotenaajereein, canu ariirijieeine jana, ii ichoterateeun," naain been laenaeratelu, nii coina Cana Coaunera.

Enate, inae nii aithalune rijijieein ichoteratenojoin nequichene caohachae, inae rai cojoanonaa nihane jaun.

<sup>3</sup> Coatiha chatohaneein baaso ichaain chuni notajaain nihaacaanu. Nabana canacaanuhacha ichai baaso rijijieein cha ichaain neeuruhane, inara rai canacaanuhacha beebejei esenetaelanaala que jaolecohichene coataa.

<sup>4</sup> Nitohaneein nenea coacuelanaalane, Cana Coaunera letononeein nihacaanune coaratihacaanu, itolere necairichanaa, latijiojiriin, caaintati ichaonaa que ichaohin,

<sup>5</sup> taba que canacaanu bisihure, caresero cuhane canacaanu enoaain, taba que canacaanu que nererojoecaaure, jataain mainajeriin amihanenaa, sinerena, mijitena, naaonjoainurine abaantacaanu chabana nererojoecaelanaala.

<sup>6</sup> Jerichanejeein nechu esinae rauhijiriin nii chatohaneein baaso ichaelanaala ichaohacaanune coaratihacaanu, esinae rauhijiriin canacaanu aina niha Cana Coaunera Suujuene coaracuruha cachaaaurune coina, chunique asilanaala satiin cachaauru belaaain ichaoin.

<sup>7</sup> Nitohaneaina nihacaanu, esinae rauhijiriin canacaanuhacha beebejei esenetaain, canacaanu aina cuaain niicha ichanenu ichaa Cana Coaunerane coaracuruha cachaaaurune coina. Nitohanihacaanune jaunne, baasoneein canacaanu tenaajerera nihane, chatohaneein baasoneein tenaa coacuhelanaala, rauhijiriin nohanelanaala rai irihacaanu. Nitohaneeine canacaanu rai baaso icharanihane, baaso ichaelanaala ichaonaa esine que ichaohin nihacaanune que cuaain acauru rai ereein necocaaeratihacaanu.

<sup>8</sup> Nete taba que canacaanu que suujua acateein, taba que canacaanu cotaain, taba que canacaanu que raotojoeiin ereein, taba que cacha baasoniha canacaanu been, naajoain canacaanu que ereeure cachaauru. Nitohaneainte nohanelanaala cachaauru rai irihacaanu natiin, nohaneein cachaauru coritaa canacaanu beeur.

<sup>9</sup> Chaen techu canacaanu coitucuuruhane saijieein, canacaanu coitucuhi rijijieein canacaanu coaracure.

Canacaanu sohinte niqui canacaanu jaonaa jerecure, nena jaiti ichaaojihacaanu. Canacaanu casetecaauruha niqui, nete canacaanu atinaaurene.

<sup>10</sup> Jataain inaderanaanajaanu tocohaneeinte niqui canacaanu ichacure, nena atiin raotojoein rachoojoein nihacaanu. Leinjiin cha coitucuhi cairichei rijiichaanu niqui, nene arajii cachaauru rausiaecaanu canacaanuhacha coitucui que, raotojoein neeuruhane coina.

<sup>11</sup> Canejeraauru satiin Coriintoo neiniquichene. Esinae rauhijiriinne canacaanu suujua aina cutaain, inara coreniha canacaanuhacha coacuhi que inara rai caa suujuelanaala aitocaaanu.

<sup>12</sup> Coatiha aansijieenniji inara que asiin irihacaanu. Nete laen inara niha chatohaneine nihanatiin canacaanu que asiiche.

<sup>13</sup> Nii jaunne atiin inara rai aitoon, nere tonoraane coina bereecuru rai iriha cachane rijijieein. Esinae rauhijiriin caa inara rai aitiin nihanune rijijieein, canu que cha suujuelanaala beein neeichene coina.

### *Cana Coaunera rai Teenforo rijijieinte nihacache.*

<sup>14</sup> Jiaonriha chatohanai ichaain neeuruha Cana Coaunera coitucuhichurune, acaauruhacha ichai ichaain neeichene. Baaso ichajeein ichaonacaauruhacha ichai ichana nainihe caohacha nejesina ichajeein ichaonaa cache. Nii rijijieein techu jiichoo amuritona nainene nocohena.

<sup>15</sup> Charijieein teeinti moconajaera belaina nainene Jesocurisito, nii rijijieein techu nainene moconajaera cache aina chatohanai ichaain nena nainene Cana Coaunera cachanein nena.

<sup>16</sup> Nitohanein nena nainihaacache cana, inae Cana Coaunera rai Teenforo rijijieein niha cana jaberocone jaun. Nitohanein nihacachene cinate:

“Inara aina neeine inara aina jiniiquiin amuhemuhereeunni. Canuna inara Coauneraneun. Inarate jana canu cachanequiche,” naain raajenhane aitelu Cana Coaunera.

<sup>17</sup> Nitohanihane coina techu:

“Acaauru aina neeichene caje amuhin jelai neeuche. Jiaonrihachu acaauru chosichuru rai lenone acaauruhacha tei dadaain neeichene.

<sup>18</sup> Caa inara rai aitocaaanne tonoraain neeichenena inara rareeunni, inara Inacanein nihanune jana, inara canu calaohinein, canu cacununein, naonjoaaineein neeichene coina,” naain aitelu itolere icharanein nena Cana Coaunera.

## 7

<sup>1</sup> Niritiinte aite cana rai Cana Coaunera. Aihana jaun cana casetecarihanine que casiin, cana ichao aasajeein, cana

suujuene maajeein itajenaa nainera que necohalajiin niha-cachenete ne. Nii jaun baaso ichaelanaala raujiaaincha cana rai Cana Coaunera aitoonjoan rijjijeein ichaoha cachenete caohachaera canejeraauru.

*Cana Coaunera coitucuuruhane coarateeuruha Coriinto cocoaichacurune.*

<sup>2</sup> Caohachaaain inara suujua coaraain canacaanu aonacuche. Coatiha chuni rai baaso ichaain, chuni cairichaaain, chuni coritaain, naaonjoahaacaanulu.

<sup>3</sup> Coatiha inara que iriha aitohaaun. Inara rai aitocooaun-lune rijjijeeinne, casuujua aina cutaain inara belaaain inara aina jiniiquiin neein ohanune coina jatoroaain neeun, nii te raotojoein coitucuhiche inara.

<sup>4</sup> Esinae rauhijiriina inaraneein neeichene coitucuhin, nii chuni que asilanaala inara rai aitoon, raotojoein canu coitucuhin neeichene jaun. Itolere necairichanaa coaraain niha-caanune saijjeeeine, inara coacuhin jataain raotojoein corajeein rachoojoein neeun.

<sup>5</sup> Masedoniau turuhacaanune caje coauneein aansijjeeein-niji nebetacaorihacaanu. Itolereenein turuhacaanune jaunru naineeine necairichanaa coaracaanu. Chaen nechu necairichaecuruha leochaaurune coaracaanune jaun, canacaanu suujua cuhane casihacaanu.

<sup>6</sup> Nete Cana Coaunera, cha ichana coasiha cachane niha-natiin, enaacha que ichana corajerateranein nihane jaun, canacaanu que corajerate turuha Titone aina cuaain.

<sup>7</sup> Coatiha turuhane jaauncha nihei, raotojoein neeichene coaraane jaun, acaantonai suujua aninoaaain corajihane jaunne, canacaanu netonai canacaanu suujua aninoaaain corajihacaanu. Acate jataain canacaanu coana jeriquichene que aitiin, canu coreniha inaderaain canu que coaauquichene beebeje canacaanu rai. Nii jaune jataain jeelai amuritoheriin rachoojoein neeun.

<sup>8</sup> Inara rai quiricha laenacaaunlune jaun, coaraain inaderaaichelune que inae enene netojoehaaun. Jariaalune niqui, nii inara rai quiricha laenacaaunne jaun, inaderaaichelu carajaelanaalane coitucuhin netojoetoonlu.

<sup>9</sup> Nena laen inae enene nii inara rai quiricha laenacaaun-lune corojeeun. Coatiha inaderaaichelune coroaehaaun. Nii inaderaaichelune aina cuaain inae nacoaunein jeriha Cana Coaunerane rijjijeein ichaohichene jaune corojeeun. Inarate jeriha Cana Coaunerane rijjijeein nii inaderanaa abaantaain neeichelu. Aihane jaun coatiha inara rai baaso ichaa nii quiricha laenahaacaanulu.

<sup>10</sup> Nitohaneein jeriha Cana Coaunerane rijjijeein, inaderanaa abaantaain cana ichao coreein nihacane, nii coreniha nichoterichaacheeine jaun, nihei chaque netojoeena jaanu. Nete laen Cana Coaunera coitucuhichuru nechu baasohacha que coacuhin, itolere bana inaderaauruha, niha leijiin itolere necairichanaa caje cana rocoerane que coacuelanaalane jaun inae nitaje rai neeure.

<sup>11</sup> Nete laen inara, jeriha Cana Coaunerane rijjijeein inaderaain, cha abaantaain neeichene jaun, inara rai bihanune rijjijeein ichaain canu cocoaerateeichelu. Chaen techu nii choae tacaain obajeein, casiin, naaonjoaachelu. Nete atiin, nii baiha canu coana jereein, nii inara jana baaso ichara casetecaaichene coina inae jatoroain neeichelune jaun, esinae rauhijiriin inara nii ujuaihoneein neneeichene coarateeichelu.

<sup>12</sup> Nii inara rai quiricha laenacaaunlune bana, coatiha nii baaso ichara cacha que coacuhin, niheichu nii baaso ichaane jaan cacha que coacuhin, naaonjoaain laenahaunlu. Cana Coaunera notaracaae canacaanu coacuhin aitocaaunune rijjijeein ichaquichene coarateeichene coinane inara rai laenacaanulu.

<sup>13</sup> Niite jataain canacaanu suujua nunaain, canacaanu suujua aninoaelu.

Nete nii amuritoheriin canacaanu rachoojiae Tito, inae raotojoein neeichene coaraain suujua aninoain nacoauneein niicha ichaneni corajerateeiche quene jaun.

<sup>14</sup> Nii Tito raine, chatohaneein inara rai baaso ichaenihanune jaun, jataain inara aina raotojoein nihanune que aitoonlu. Nii nohanelanaala inara rai aitocaaunulune rijjijeein nechu, inara coreniha raotojoein nihacaanu que aitocaaunulu nohanelanaala Tito rai.

<sup>15</sup> Chaen techu nere tonoraain que inara suujua acatein raaichelune coaucane naineein, inara ainaacha itolere bana nenea jere nii Tito.

<sup>16</sup> Jataaine rachoojoeun, inae inaraacha ichaneni coitucuhin nenea nainequichene esenetaanune jaun.

## 8

*Arajiin niicha teenihuru taojiaauruha Masedonia nenacaaurune.*

<sup>1</sup> Canejeraauru enane laen, Masedoniau nenacaauru Jesocurisito ranojoneein nenacaauru belaitohane coaratiha, acaauru que Cana Coaunerane berichaanuhin inara rai.

<sup>2</sup> Jataain maainajeriin cojunojoneein neeuruhalune jaun, necairichaauruhalune saijjeeinte, inae chaque tonajelanaala

raotojoeein enene neeure. Nii jaunte cairicheinejeeun-  
 ruhane saijieein, coriquihonaneein nena rijijieein jataain  
 arajiin, Cana Coaunera rai nii niicha teenihuru taojiaaure.

<sup>3</sup> Canuna jataain arajiin nii tenaa nainecuruhane amuri-  
 toheriin, chunaelanaala nii Cana Coaunera rai niicha teeni-  
 huru teuruhane coaraaun.

<sup>4</sup> Chaen techu canacaanu rai aitocure nii niicha taojiaauri  
 amaain, Cana Coaunera cachaneein nenacaauru rai tihacaan-  
 une coina.

<sup>5</sup> Nitohaneinte taojiaaururichaaaine coaucaanne amu-  
 ritojoaain teeure. Jauriaanejeein Cana Coaunera rai be-  
 natecuruhane baihate, jeriha Cana Coaunerane rijijieein  
 canacaanu rai teeure.

<sup>6</sup> Nii jaunne Tito rai aitocoaanu leeochoaauru rai caohacha  
 ichaa, inaraacha taojiaa raa uha inara caje, jauriaa aihalune  
 rijijieeine coina.

<sup>7</sup> Inara leeochoaauru amurijiriin esenetaain neein, cha que  
 tonajelanaala leeochoaauru rai erenaa inaaain, itolere coitu-  
 cuhin inara relaacaanune jaan rijijieein jereein neeichene  
 coina jatoroaain, naaonjoaain neeichene jaun, nii rijijieein  
 leeochoaauru amuritoheriin, leeochoaauru latijiojiriin ne-  
 nacaauru coroatajaneguichene coina ichaguichenete ne.

<sup>8</sup> Coatiha inara letoaa inara rai binaaun. Caohatiin ichacu-  
 ruha leeochoaurune coitucuhin aina cuaain leeochoaauru  
 belaaichene coarateein inara netonai tenaa nainequichene  
 coina ne aitoon.

<sup>9</sup> Inarate jataain itolere que nelateein itolere ichana nain-  
 eraneein nihane saijieein, jataain inara belaitohane jaun,  
 aina cuaain rausiaenojoneein raotojoeein neeichene coina,  
 inara coreniha cha que nelatihei rijijieein cairichei coaraain  
 nihalu Jesocurisitone coitucuhiche.

<sup>10</sup> Inara rai caohachanu quene, nii que inara rai aitoon.  
 Inae inara, leeochoa jaanaa bana inae nitohanei ichana  
 nunuheteichelune jaun, satono que tiaain ichana cora-  
 jeeuche.

<sup>11</sup> Aihane jaun nii jauriaanejeein tenaa nunuheteichene  
 bana corajejin teeichulune coarateichelune rijijieein,  
 enene tenaa nainequichene jeonijihanaain tihajejin  
 leeochoaauru coroatajaniha inaraacha teenu taojiaaichene  
 nainacuche.

<sup>12</sup> Chunocoha Cana Coaunera rai cha tenaa jerejin tenaa  
 nainihane jeonejeein tihanete, raotojoejin nii niicha tei  
 rareein Cana Coaunera. Coatiha cha sirinihane saijieein, cha  
 tiha cachane jerihei Cana Coaunera.

<sup>13</sup> Coatiha cha sirineeichene nihanatiin, leeochoaauru rai  
 acaihaniji teein necairichaaichene coina erenaa nihein. Rau-  
 jiaain ita rijijieein ita coroatajanejin niha cachane coinete

ereanaane.

<sup>14</sup> Enate inara, acaauruhacha sirihei siriquichene jaun, acaauru rai tenaa nainequiche. Acaauru netonai cabaiha inaraacha sirihei sirichuruhane, inara rai netonai tenaa nainecuruhane coina. Nitohanihanete ita rijijieein inaraacha latei siriin neriquicheein, ita amuritoheriin sirina coacuelanaala.

<sup>15</sup> Cana Coaunera Quiricha cuhane: “Nihei cautihei amuritoheriin raera rai. Niheichu lanaai fautaeriin raera rai,” naain laenanohinihane rijijieein.

*Rai corihaneraauru aina Tito letoaaauruhane.*

<sup>16</sup> Nariha Cana Coaunera inara que coaaucaaunne rijitoein inara que coaauca Titone coina, casuujua rijitoein rai suujua tihane coreniha.

<sup>17</sup> Nii jaunte acaantonai inara que coaacane jaun, rai aitocaaunne tonoraain inae suujua caje coaunein inara coaraa uhe.

<sup>18</sup> Nii Tito jiniichaaaine inara rene leinjiin cana nejera letoaaun. Acate raotojoein coitucuure leeochoauru Jesocurisito ranojoihuru, acaauru rai ichoteratenojieein nerichaacheeine beebejia raotojoeine jaun.

<sup>19</sup> Nii jaunte nii ichoae tacaain aca janiichure Jesocurisito rai iclesianein nenacaauru, canacaanu aina amuhemu-juein, cairicheinejuein nenacaauru rai Cana Coaunera que canacaanu suujua acatein nere tonoraain leeochoauru coroatajanena jerichaanune coaratihacaanune coina, taojiaain letoanojoin raeranu que canacaanu coroatajaneraanu que.

<sup>20</sup> Nitohaneeine ichana jerichaanu, nabana tonaain canacaanu que ereein neeuruha cachaauru, nii leeochoauru coroatajaniha tenojoi canacaanuhacha taojiai quene coataa.

<sup>21</sup> Nii jaunna Cana Coaunera notaracaae, cachaauru notaracaae, naonjoaain itolerenein caohachaaain ichana jerichaanu.

<sup>22</sup> Acaauru jiniichaaai nechu leeochoauru cana nejeraauru caje unaa leinjiin cana nejera letoaaun. Acate satiin canacaanuhacha ichai que canacaanu coroatajanein, acaantonai ichaane coina jatoroaain nihane coarate. Nii jaunte teriquicheein inara netonaine esenetaane jaun, jataain ena jeelai amuritoheriin ichana jere.

<sup>23</sup> Chunocohacuru inara caje: “Chariji cachana caa inara aina uhin turue” naain Tito bajaauruhane: “Caate Faboro corihaneranein, cana coroatajanihane que coroatajaneranein nenaane,” naain acaauru rai beeuche. Jerichanetojoeinchu, nii coroatajaain aina unacaauru cana nejeraauru

bajaeranihane: “Caaurute leeochoaauru Jesocurisito rai iclesianein nenacaauru letononeein unacaauru ne. Chaen techu Jesocurisito ere tonoraain, naitoonjoan icharaneei nenacaaurune,” naain acaauru rai beeuche.

<sup>24</sup> Chaen jataain acaauru belaaichene coarateeuchete: “Esinaenachuhisi catohaneein ichaaoruhane jaun, acaauru coreniha raotojoein neuruhate,” naain inara coreniha raotojoein nihacaanune esenetaauruhine leeochoaauru Jesocurisito rai iclesianein nenacaauru.

## 9

### *Leeochaauru cana nejeraauru rai inaraacha teenu.*

<sup>1</sup> Inae raotojoein inara rai bihanune latelanaala, tenaa nainequichene coitucuhanune jaunna canaacha esenetai coreniha cana nejeranein nenacaauru rai, taojiaain inaraacha letoaaenu que aitiin inara rai laenaeneun.

<sup>2</sup> Nii jaunna itolere bana raotojoein Masedoniau nenacaauru rai, inara Acaiha bataneu nena Coriintoo neiniquichene, inae taolu ajaanaa situsina bana caje coaanein inae nitohanein leeochoaauru cana nejeraauru coroatajanequichelu jatoroaain neinne beebejeun acaauru rai. Nii ainate caohacha ichaa leeochoaauru coroatajaniha ichaquichene coaraain, neleruhin amurijiriin acaauru netonai ichana corajeein, inae jatoroaain neure, acaauru netonai ichacuruhane coina.

<sup>3</sup> Nii coaranu quene caa cana nejeraauru letoaaun inara rai beranu que, letona jatoroaain neeichene coina.

<sup>4</sup> Nabana inae uhanune bana, canu aina uuruha Masedoniau nenacaauru tabaaunijine, acaauru aina uhin jaiti ichaeneeichene jana inara rene turuhacaanune coataa. Nitohanein ichaquichene esenetaain leeochoaauru rai beebejihanune saijjeein, jaiti ichaeneeichene jana turuhacaanunete laen jataain canacaanu rai necoejena tiha airiquicheein. Chaen techu, inara raajenihane inara rai nocoejena tiha airiquicheein.

<sup>5</sup> Nitohanihane coataanejian, jauriaanejeein ichoaichaniha uhin inara coaraa uruha nii cana nejeraaurune jerichaaunne jaun, acaauru rai aitoon inara coaraa uuruhane coina. Jaiti nii aitocoichelune tocohanein taojiaaichene nainaeneeichene, inara coroatajanecuruha taojiana quene coina. Nitohanein inae jatoroaain taojiaain neeiche jana, inara rene turuhacaanunete laen, esinae rauhijiriin chunaelanaala tenaa jereein teeichene coaratiha leeochoaauru amuritoheriin teriquicheein.

<sup>6</sup>“Chunocoha coroatajajeein temule jaerate, coroatajajeein taicheein. Jana arajiin temuerate arajiin taicheein,” naain niha erenaane que coaucuche.

<sup>7</sup> Aihana jaun le cachaurute naine suujua cuhane coacuhin tenaa jerihane jeeonijihanaain tihane caohachae. Nainihe chunocoha tenaa jerenihane, tihane coina conujiha chunine.

<sup>8</sup> Itolere quete inara coroatajanereein Cana Coaunera, itolere bana latequichene rijijieein inaraacha latei siriin neeiche cauteinne, nii caute que leeochoaauru coroatajaniha acaauru rai teein, naaonjoaain caohacha ichajeein ichao-hichene coina.

<sup>9</sup> Cana Coaunera Quiricha cuhane:  
“Cairicheinejeein ichaonacaauru cachauru raite,  
chunaelanaala  
acaauruhacha latei te.

Acate  
chabana satonoelanaala  
itolere bana  
caohacha nejesina ichareein,”  
naain laenanohineein ne.

<sup>10</sup> Cana Coaunera temule jaera coina rai nucuhe teraneein lenonene maajeein teranihane jaun, nii rijijieein Aca inara rai arajiin nucuhe tereein arajiin temuhin arajiin taojiaain neeichene, latejiojoiiriin nenacaauru coroatajaniha teeichene coina.

<sup>11</sup> Nii ainate itolere siriin, cha latelanaala raotojoeein neein, jelai amuritoheriin leeochoaauru rai tenaa naineriquicheein.

Nii canacaanu aina, inaraacha letoaaenu inaraacha taojiai corenihate, Cana Coaunera coroaecurureein leeochoaauru cana nejeraauru.

<sup>12</sup> Coatiha acaauru rai lanaane jauncha, nii acaauru rai inaraacha taojiai amarihacaanuhin, nechu Cana Coaunera coroaecuruha inara corenihane coinane amarichaanuhi.

<sup>13</sup> Jesocurisito aina cuaain, enachasine ichaonaa que ichao-hichene coaratihate nii inaraacha sirii taojiaain letoaaiche. Nii te coaraain Cana Coaunera coroaecurureein.

<sup>14</sup> Nii ichoae tacaain techu, jataain inara belaaain, inara rai Cana Coaunera bajaaurureein, inara belaitoha Cana Coaunerane coaratiha ichaquichene coreniha.

<sup>15</sup> Narihara Cana Coaunera, nitohanei ichana nainichaachene jaanu tihane coreniha. Nihei que tonaain erenaanjaanu.

## 10

*Afosotoroneein cocoinanohinihane coaratenaa jeriha Faborone.*



<sup>1</sup> Canuna Faboroneein inara belaiha Jesocurisitone rijjieeein inara belaaichaaunne jaun inara rai aitoreeuni. “Inara caje coriaae nihanunejene, enaacha inara rai tonaain ereeun,” naauruhane coitucuhanune jaun.

<sup>2</sup> Nii jaunna inara rai aitoon, nii joareein cache rijjieeein, cha ichaa canacaanu beracuru aina, nii rucujueein neeichene jana, inara rene turunaa jerichaaunne jaun. Inae nir-itocuruhane rucuhecaaun acaauru ainane coina jatoroaain urichaaunni.

<sup>3</sup> Esinae rauhijiriina niqui cachanichaanu, nena niha chatohanei rucuhenacaine, aihuruha Cana Coaunera coitucuelanaala nenacaaurune rijjieeein rucujuenihacaanu.

<sup>4</sup> Coatiha niha chatohanaine caa chauratane que nena que biji achunequuin neein rucuhehaacaanu. Nii canacaanu biji achunete Cana Coauneraacha ichana nainei caje unaaneein, itolere que laraajiin nena jerenacaauru amuritiin itajenaa naineraneein nena ne.

<sup>5</sup> Nitohaneeine canacaanu que ereein, Cana Coaunera coitucuruha cachaaurune coina beebejihacaanune caohat-eraauru itajerichaanuhin. Itolere cachaauruhacha coaculine Jesocurisito rai tein nihacaanu, leinjiin Aaacha tonoraain neeuruha cachaaurune coina.

<sup>6</sup> Nii jaunne esinae rauhijiriin, canacaanuhacha beebejei esenetaain tonaraain neeichene, nii tonoranajerelanaala nenacaauru casetecarichaanuhin.

<sup>7</sup> Inarate itolere bana inaraacha coarai cache esenetaquiche, itolereneein coitucueralanaala. Aihana jaun chunocoha Jesocurisitohacha jerei icharate, canacaanu netonai Jesocurisitohacha jerei ichacaanne coaraain coitucureein.

<sup>8</sup> Caa cocoainanohi nichaaunne rerohin canu ere tonoraichene coina inara counujichaaunne que coatiha coejinaaun. Cana Coaunera, canacaanu cocoainaan nihalu inara que Acanihane coitucueratihacaanune, nere tonoraain neeichene coinana jaun. Coatiha inara itajihacaanune coina, canacaanu cocoainaan niheilu Cana Coaunera.

<sup>9</sup> Niheichu caa quiricha cuhane cuaain inara casataa aito-haun.

<sup>10</sup> Inara aina nenacaauru tabaaurute: “Nechu quiricha cuhaneicha cuaainjene mijiaaeneein inara rai aitoon. Nete laen inae inara aina nihanune, inara rai tonaain mijiaaeneein erenereuni. Coatihaje cache rai irihanune tonijiaain cache rai erenaa nainichaaunne coalanaala,” naure.

<sup>11</sup> Nena laen mijiaaeneein erenaa nainenihacaanune saijieein, coriaae caje quiricha cuhane cuaain mijiaaeneein aito-coaanune rijjieeein, inae inara rene turuhacaanune bana icharichaanuhine coitucuha nii aitime jerichaanu.

<sup>12</sup> Coatiha nii raajenihane necohasitaain nenacaauru rijijieein nena jerihacaanu. Nete laen acaauru cha coitucuurenihane jaun, leeochoauru amurijiriin niha nocoetiin raajenihane necohasitaure.

<sup>13</sup> Canacaanu laen coatiha canacaanuhacha ichana nainei rerohin necohasitanaa nainihaacaanu. Nii rijijieein chu Cana Coaunera cachaaauru relaacaanune jaaunru cojunacateraneein nihane jaun, nii canacaanu rai cojunacatihane jaan rerohin turunaa nainihacaanu. Nii jaunte Aca canacaanu turuaelu Coriintoo neiniquichene rene tiaaajoain.

<sup>14</sup> Aihana jaun coatiha nii canacaanu rai cojunaca rerohin turuhaacaanu. Chabana inara rene turuenihacaanune saijieein, ena turuhacaanune jana nihanena laen, canacaanu rai cojunaca rerohitiin tururichaanu. Canacaanune jaiti inara rene turueniha chunine jana, ichoaichaniha inara rene turuhin, Ichaonaa Enachasine teraniha Jesocurisitone beebjihacaanulu inara rai.

<sup>15</sup> Coatiha chabana turuenihacaanune jaan turuhin, chuni amihaneero ruluhin neroraneein nihaacaanu. Nitohaneein canacaanu turunajanihei cunaa coacuelanaalane, inara ainaacha neein Cana Coaunera icharatenojoin amihanenaa ichajerichaanuhi. Aiha leinjiin Acaacha esenetaain ichaohin, ichacaanne jerequichenene airichaanuhin.

<sup>16</sup> Chaen nech, nii neeichene jaan jelai caje coriaae cuhin, osa caje nichotenaa nainecururichaaaine beebjenaa jerichaanu leeochoauru rai. Nene laen, inae cachaaauru relaauruha leeochoaurune jaaun turunaa jerenihacaanu. Nabana leeochoauru amihaneero ruluhin necohasitanaa tochanihacaanune coataa.

<sup>17</sup> Chunocoha raajenihane necoasitanaajerihane, Cana Coaunera coasitaainne.

<sup>18</sup> Cana Coaunera coitucueraneei rai cachaneein nena cachate, Cana Coauneraacha ichanohicha coasitaain ichoae, chabana raajenihane necohasitanaa coacuelanaala.

## 11

*Afosotoneein niha nocoetonacaauru que ereereeca Faborone.*

<sup>1</sup> Bajiaanachuhinti cha coitucuhi jaelorohe rijitjoeein inara rai ereereecaaunne rautaaain aonaeneeiche. Atiin aonacuchene inara rai aitate coitucuhiche.

<sup>2</sup> Jataain leeochoauru esenetaain acaauruhacha ere tonoraain, Jesocurisito esenetaaichene jianequichene jaun rautaeniha Cana Coaunerane jaan quene inara rai aitoon. Canune rai lanaacha ere tonoraain neeuruha enecurune rijijieein, leinjiin Jesocurisitohacha ere tonoraain neeichene coina, rai inara tein inara que coitucurateeunlu. Nii

jaunna leinjiin Acaacha ere tonoraain queecha coaauquiche leeocheenein inara suujua cuaelanaalane coina aitoon.

<sup>3</sup> Nena laen Eba coritaalu acanone rijijieein inara coritaeranihane esenetaaichene coasihun. Nabana Jesocurisito-hacha que coacuhin neeichene jianein, leecha que coaauquichene coataa.

<sup>4</sup> Inarate inara relaacaanune jaan nihei que, nechu nejelauneein cuaain Jesocurisito nihei que inara rai ereeruhane rautatiin neeichene jaun, Cana Coaunera Suujue inae inaraacha esenetailunihei esenetaain, osa caje ichotenojoineriquicheeine jaan, inaraacha esenetailunihei esenetaaiche.

<sup>5</sup> Coatiha nii inaraacha esenetacuri, afosotonichaanune amurijiriin niha nocoetonacaauru fautaain nena jerinaaun.

<sup>6</sup> Cacha rai irihanune que nelatinaaun niqiu, nena laen esinae rauhijiriin coitucuun banejelanaala. Niite raotojoein coitucuhiche inara, satiin canacaanu ichanaa coaranein neeichene jaun.

<sup>7</sup> Inara rai baaso ichaana, inara caje core bajaelanaala inara fautaerineein nena rijijieein neein inara relaaunlu ichoteratenojoneein nerichaacheeine que, canu amurijiriin neeichene jerenacaaun.

<sup>8</sup> Nitohaneeine inara caje chaelai bajanaa coacuelanaala, leeochoaauru Jesocurisito ranojoneein nenacaauru coriqui ruluera tocokanein raanlu, inara coroatajanena nainichaaune coina, canu rai teeruhane rijitojoein raanune jaun.

<sup>9</sup> Coatihachu inara aina nihanune bana, inara caje cha lateein cha bajaain nerejetohaaunlu. Masedoniau caje uhin turunacaauru cana nejeraauruhachate canu rai canuhacha latei terejetocurelu. Aihana jaun coatiha inara caje cha bajarejetohaaunlu. Nirijieeine itolere bana nereeunni.

<sup>10</sup> Nitohaneeine satiin Acaiha batane sacutaain turuhanune jaaunru nainein neeunlu, esinae rauhijiriin Jesocurisito coitucuhin rijijieein naitoonjoan tonoraain nihanune jaun. Nerinaain canu caje nii ruluera.

<sup>11</sup> Coatiha inara cotaiha aitohaaun. Jataain inara belaichaaune jaunne aitoon. Cana Coaunerate jataain inara belaichaaunne coitucue.

<sup>12</sup> Nena laen inara aina inae canuhacha ichailu ichajeein sacureeunni, nabana nii canacaanu rijijieein raotojoein nena coaauca nocoenacaauru rausiaecaaunne coataa.

<sup>13</sup> Acaaurute nechu casejenein, Jesocurisito letono afosotoniha nocoetocure. Nete esinae acaneein aitocurene.

<sup>14-15</sup> Coatiha enaacha nihei nitohanei. Moconajaera netonai, Cana Coaunera cononiha nocoetiin tocokanein

nedaane jaunte, rai letonocuru netonai rijijieein neeuruhane jaun, cacha caohacha rijijieein inanacaaure. Nete, caohacha ichacurenihane jaun, ecu tihane bana casetecaain itajenojoiniha cuurureein moconajaera aina jiniiquiin.

*Jesocurisito letono afosoto nihane jaun necairichaa Faborone.*

<sup>16</sup> Nacoauneeine coitucuhichene coina inara rai aitoreeunni. Jiaonriha cha coitucuenihanune jaun leinjiin jaelorohe rijijieein iriha canu biha chunine. Atiin canu aonacuchene inara rai aasaeriin necoasitaete aonaquiche.

<sup>17</sup> Coatiha jeriha Cana Curuanaane jaun nii necoasitarihaauni. Nechu cha coitucuhi rijijieein ereerecaaune jaune aitoreeunni.

<sup>18</sup> Coaracuchenachuinti, Suujua caje rocohin niicha ichai coasitauruha nii leeochoaurune, nii rijijieeinechu canuhetonai necohasitareeunni.

<sup>19</sup> Inarate niqui itolere coitucuhiche. Nete cha coitucuelanaala nenacaauru cachaauru inara relaauruhane, acauru aonaain acauru rautatiin neeiche.

<sup>20</sup> Nitohaneeichene jaun te inara basijiauhin, inara coritaain, inara que jaolequiin, inara meri faoracaain, naaonjoaruhane niha natiin acauru abaantaain neeiche.

<sup>21</sup> Jataaine coejeeun, nelatihei rijijieein nii aihuruhane tochaneein nenaanainenihacaanune jaun. Nene laen, necoasitanaa coaacuruha nii leeochoaurune canuhetonai necohasitareeunni. Cha coitucuhi rijijieeine ena caa ereerejeeun.

<sup>22</sup> “Canacaanune Ebereeo nichaanu” naauruhane, canuhetonaine Ebereeo neeun. Jana, “Canacaanune Isaraelita nichaanu” naauruhane, canuhetonaine Isaraelita neeun. Jana, “Canacaanune Abaraaun nefoeratenichaanu” naauruhane, canuhetonaine Abaraaun nefoerateneeun.

<sup>23</sup> Jana, “Canacaanune Jesocurisito letononeein nihacaanu,” naauruhane, canune jataain acauru amuritoheriin acaneein neeun. Cha coitucuhi rijijieein aitocoanne nihanatiine, esinae rauhijiriin aitoon. Canune acauru amurijiriin amihaneein araaisaain caresero cuhane enoanojineein, acauru amurijiriin mainajeriin bisinojineein, araai saain onaa caje nichoteein, naajoaain neeun.

<sup>24</sup> Saoqui sai cuhanete, nichatachoonca isocoon tacanei bisicha que canu casetecaare Jorioocuru.

<sup>25</sup> Nii rijijieein techu nichata sai cuhane enuha que canu faojoaain, lesajei que ajeri que canu bodoosihure. Nichata saicuhanetechu naluha cuhanune jaan botena jaun ohanune rai neeunlu. Nii jaunna lesajei que cucuana cataaun, lejiichoo lejanotiineein neeunlu.

26 Araai saain nucuhe cuhane amuhanune jaaunrune necairichanaa coaraaun. Tabaauru quene canu basijiaauruha asijiautoorune que, chatohaneein canu teeuruha canu araachuru Jorioocurune que, nejelau cachaauru nihanatiin chatohaneein canu teeuruhane que, naaonjoaainunri que casihun. Jerichanejeeinechu, neseeuuru nihanune jaaunru, bero cuhane, cucuhana cuhane, naaonjoainunru nihanune jaaunru, necairichanaa coaraain neeun. Nii rijijieeinechu, necairichanaa coaraain neeun, nii Jesocurisito coreniha cana nejera niha nocoetonacaauru cataaun nihanune.

27 Chaenechu mainajeriin amihaneein necairichanaa coaraaun. Tabaauru que sinilanaala, tabaauru que mijitena aina cocoirena abaantaain, naaonjoaaun. Araai saain tabaauru que lenoninaaun. Jelaronaa caaunne taba que necairichaaun neniha canu cajionene jaun.

28 Nitohaneein itolere que necairichaanune saijieeine, jeelai amuritoheriin satiin Jesocurisito ranojoneein nenacaauru iclesiacuru que coacuun.

29 Nii jaunna chunocoha cunaitihane inaderaaun coreniha. Jana chunocoha suujuateeuruha baasoneein suujua coaraane coinanete, jataain canu baijiae.

30 Canu necoasitaanunena nelatenihanune nainejeein canuhacha ichai que necoasitareeuni.

31 Cana Curuaanaa Jesocurisito Inaca Cana Coaunera itolereneein coroaenojoneein nenaate, esinae rauhijiriin nohanelanaala aitocooaunne coitucue.

32 Damasoco nihanulune banate, *rey* Aretasi rai coberenadoroneein nenea rai coardiaauru letoaelu, nii nese rai rijia bacuujuuuru naineein neein canu cojoaain canu mucuuruhane coina niqui.

33 Nete nii coitucuuuriin, omari seeonjoa cuhane canu teein, nii nese rai rijia bujuau, acuujuu laojoiri ucuun nenea cuhane cuaain canu faauruhane jaun acaauru caje nichotee-unlu.

## 12

*Notajaain que necoitucueratiha Jesocurisitone beebejiha Faborone.*

1 Nihei chaelai que rai cainera, raajenihane necohasitaain niha cachane. Nena laen canu, canu notajaain canu que niicha ichai coitucueratiha Cana Curuaanaane bereeunni inara rai. Aihana jaun coatihana canu raajenihane necohasitaa aitorihaauni.

2 Inae lechoonca jena jaanacaa Jesocurisito esenetaeranichaaunne dede nichata burihu amanojoinichaaunlune. Nechaainti canu jaberoconein amanojone

nihanulune canu suujueneein amanojoin nichaaunlu. Coatiha coitucuhaaun, Cana Coauneraachate coitucuujuue.

<sup>3-4</sup> Nena laen esinae rauhijiriin dedeeu amanojineein, ecu chabana aohanraai erenaa aonaaunlu. Nechaainti canu jaberoconein netiin aonaenihanulune, canu suujueneein netiin aonacaaunlu, Cana Coauneraachate coitucuujuue. Nihei chuni cacha que chabana aohanratenojineein nihei nii canuhacha aonai erenaa.

<sup>5</sup> Chunocoha nitohaneein nihanena naineen coasitaanune. Nene laen caraajenhane niritiin necohasitaanaa naineneun.

<sup>6</sup> Coatiha esinae niqui, necohasitaanune nohaniha aitorihaaun, esinae rauhijiriine casajenelanaala aitoreeun. Nena aitona jereneun, nabana ainihanune saijieein nechuu canu esenetaera coina aitoha canu beeuruha cachaaurune coataa.

<sup>7</sup> Nitohaneein canu notajaain niha Cana Coaunerane aina cuaain nabana canunein nihanune roerohin necohasitaanune coataate, leinjiin moconajaera tenojoi cunai tocohaneein, oja que foconojoi rijitocojoaain canu jaberoco cunaitaerate Cana Coaunera.

<sup>8</sup> Nii jaunne niqui, canu jaberoco caje nii cunaitaera jaohane coina nichata saain Cana Coaunera rai aitoon.

<sup>9</sup> Nete, "Nelatelanaala nenacaauru aina cuaain canuhacha ichana nainei coaratihanune coina ichacaaune jaunte aaicha. Jataain, ii belaitohanune jereene jaunte nii aaicha," naain canu tonorae Cana Coaunera. Nii jaunne, canu rai niritoha Cana Coaunerane jaun, jataain rachoojoein neeun, chaque nelatenihanune saijieein canu aina cuaain niicha ichana nainei ichaa Jesocurisitone coina.

<sup>10</sup> Nii jaunna nelatenihanune que ereein, latijiojoiin, arinojineein, Jesocurisito coreniha necairichaaain, naaonjoaain nihanune saijieein jataain rachoojoein ichaaon. Nitohaneeine, itolere que nelatihei rijijieein nihanune saijieein, jataain itolere que laraajiin neeun.

*Coriintoo Jesocurisito ranojineein necaauru iclesiacuru que jataain coaauca Faborone.*

<sup>11</sup> Inara canu rai lerateechene jaune, cha coitucuhi jaelorohe rijijieein inara rai ereerejeeun. Inara, canu coreniha erenaa nainequichene saijieein, acaauru fautaain nelatenihanu que, inara rai ereeuruha nii Jesocurisito letono afosoto niha nocoetonacaaaurune jana, acaauru rijijitoein acaauru esenetaain acaauru ere tonoraquichene jaunna aitoon. Coatiha nii canu amurijiiriin nena jeriha nocoein ereeuruhane que tonajihaaun.

<sup>12</sup> Nena laen canu Jesocurisito letono esine nichaaune jaun, inara abantaain itolere cojoelanaacojoi ichaain inara nota-

jaain neeunlu. Nii cajete esinae rauhijiriin canu afosoto esine nichaaunne coitucuhiche.

<sup>13</sup> Inara rai cotainacai que irihanune, canu que inara suujua acatecuche. Jerihane leeochoaauru Jesocurisito ranojoneein nenacaauru iclesiacuru caje, canuhacha latei bajarejetocoaaunlune rijijieein, inara caje canuhacha latei bajaenihanune jaanne jerihane, inara rai baaso ichaaunlu.

<sup>14</sup> Inae jatoroain nihanu, nacoauneein inara coaraa uhanune coina. Quete nichata sareein inara rene turuhannune. Nenechu inara caje canuhacha latei bajaanune coina ainereunni. Coatiha inaraacha sirii latichaaune jaun coina airinaauni. Inara caohachanu que inara coroatajanichaaune coinane inara rene turuha ureunni. Rai bereecuru caje cha lateein nelanaalate, rai bereecuru rai acaauruhacha latei tein ne acaauru inaca. Nii rijijieeinechu canuhetonai inara inaca rijijieein nihanune jaun, inara rai nelatichaaune coina neun.

<sup>15</sup> Nii jaunne, acaihaniji canuhacha ichana nainei ichareunni inara caohachanu que. Canu jaberoco nihanatiine inara coreniha tereunni. Nete, nitohaneein inara caohachanu ichaain, jataain inara belaaain inara coroatajanena jereein nihanune saijieein, canu que nererojoecaain, canu coointein, naaonjoaain neeiche.

<sup>16</sup> Coatiha niqiu inara rai chatohanei ichaain nihaaunlu. Nete inara tabaauru: “Acaauru coritaainjena baasoneein osa que acaauru ichao saruerateun,” naaure.

<sup>17</sup> Niheichu coatiha nii cachaauru canuhacha letoaaui que, inara coritaeratihaaunlu.

<sup>18</sup> Canu jerichaaune jaunna, nii coroatajai cana nejeraauru aina Tito letoaaunlu, inara coaraa uhanne coina. Chaen techu inara raotojoeein Tito aina ita rijijieein ita suujua que suujuaain, inara coroatajanichaanulune coitucuhiche. Nii jaun chasiina inara coritare Tito.

<sup>19</sup> Jerihanete: “Canacaanu que inara suujua acatequichene coinajecha inara rai aitocooanu,” naaiche. Nete aine. Nitohanei coacuelanaalane Cana Coaunera notaracae, cojoerihu Jesocurisito letononeein nihacaanune jaun, coitucuhichene coina aitocooanu. Satiin caa inara rai canacaanu aitoonjoate, jelai amuritoheriin Cana Coaunera coituhin ichaohichene coinanera canejeraauru.

<sup>20</sup> Inara coaraa uhanune bana, baasoneein neeichene jana inara eruhanune rautaenihanune, inara netonai rautaeneeichene coataane aitoon. Nii jauna ita suujua rijijieein coacuelanaala, ita que necoelaain, ita cotaairiin, inara rainuhacha que coacuhin, leeochoaauru cairichaa nohaneein, ita que ereein, necohasitaain, ita caje neleruhin, naaonjoaain neeichene jana, inara rene turuhanune que necoatoon.

<sup>21</sup> Chaen nechu nacoauneein inara rene turuha uhanune jana, inae Jesocurisito esenetaeraneein neeichene saijieein, chabana nitohanei osa que nesaruna naineniha cachane saijieein, inara amute quicha aina osa que nesaruhuin neeichene Cana Coaunera notaracaae inara que necoejeein chana-reeunni.

## 13

### *Acaauru suujuateein necoiha Faborone.*

<sup>1</sup> Nii inara coaraa urichaaunine quete, inae nichata sareein inara rene tururichaaunine. Aihane jaun nii caitono tocohaneein niha chatohanei rucuhencaine, nihanete ne coroatajaain nichatajaain, naaonjoaain baaso ichaane coarain beranu.

<sup>2</sup> Nii jauriaa osa que nesarunacaauru rai, satiin inara rai, naaonjoaain raine caa coriaae caje coauneein aitoreeunni. Nii inara coaraa uhanune coroata sacuhane, caraajenhane inara rai aitocooaunlune rijijieein, inae nacoauneein inara coaraa uhanune bana, niha chatohanei ichara inara janane inae laen nii baaso ichara que canu suujua acaterinaauni,

<sup>3</sup> Jesocurisito letononeein aihanune esenetaeneeichene jaun. Coatiha chaque nelatenihane jaun, inara aina niicha ichanenu ichaai Jesocurisito. Acate inara que itolere que laraajihane coaratenaa naine.

<sup>4</sup> Esinae techuhisi cairichei ichara rijijieein coroso que teein atinaaurelu niqui. Nete niicha ichana nainei ichaain ichatihalu Cana Coaunerana jaun enanetojoein ichoae. Nii rijijieein nechu, canacaanu netonai nelatihei rijijieein nihacaanune saijieein, niicha ichana nainei ichaa Cana Coaunerane aina, aina jiniiquiin ichaohin laraajiin nerichaanuhin inara coroatajanichaaunne coina.

<sup>5</sup> Aihana jaun inara raajenhane inara suujua cuhane Jesocurisito esenetaeraneein neeichene jaun, esinae rauhijiriin baaso ichaeneeichene coaracuche. Tana inara aina niha Jesocurisitone coitucuhichene. Nii jaun coujunojoinequichene rijitoejin inae baaso ichaquichene coitucuriquichene.

<sup>6</sup> Nena laen canacaanu jerichanejeein nii leochaneein coacuelanaala nihacaanune coaraain coitucuhichene jerichaanu.

<sup>7</sup> Nii jaunna Cana Coaunera bajaacaanu inara coreniha. Nabana nenacaan baaso chaain neeichene coataa. Coatiha canacaanu baaso ichacaanuna jaun nihei. Nechu inara caohachanu ichaquichene jerichaanuna jaunna canacaanu baaso ichara rijijieein aitocooaanu.



<sup>8</sup> Nitohaneeine nihacaanu, canacaanuhacha esenetai que jaoleconaa nainenihacaanune jaun. Acaihaniji nii canacaanuhacha esenetai rai caohachanuhachane ichana jerichaanu.

<sup>9</sup> Nii jaunna nelatihei rijijieein nihacaanune que rachoojoein nihacaanu. Nii aina nelararajaaain Aca jerihane rijijieein, baaso ichaelanaala neeichene coinana, inara rai Cana Coaunera bajaabajajeein nerichaanuhi.

<sup>10</sup> Nitohanihana jaunna inara coaraa uhane ajiniha caa inara rai beein laenaanun. Nabana Jesocurisito cocoinanohineein nihanune coarateein, jataain mijiaineein inara rai aitocooaunne coataa. Coatiha inara itajihanune coina, cocoinanohineein nihaaunlu, raujiaain esinae coujuriu Cana Coaunera cachaneein neein, itolere bana jelai amuritoeriin coitucuhajeein ichaoichene coina, inara coroatajanichaaunne coinane cocoinanohineeun.

<sup>11</sup> Inae satononejeeine jianichaaunne coina caa aitoreeunicha canejeraauru. Jataaina jiniiquiin raotojoein ichaohin, inara ichao rucujueein baaso ichana coacuelanaala ichaoichene jereeun. Esinae rauhijiriin corajeein, raotojoein ita suujua rijijieein coacuhin ichaaoche. Raotojoein ichaohacachene coina cana belaitora Cana Coaunerate inara coroatajanereein.

<sup>12</sup> Coujuriu Cana Coaunera cachaneein, jelai amuritoheriin ita belaaain ita rai ereein neeuche.

<sup>13</sup> Satiin Jesocurisito coreniha cana nejeraneein nenacaaurute inara coaacure.

<sup>14</sup> Cana Curuaanaa Jesocurisito, inara rausiaemiin cana belaicha Cana Coaunera aina. Cana Coaunera Suujue itolere bana inara aina neeine raotojoein neeichene coina.

## **Galasia batane nenacaauru rai Faborohacha letoai**

*“Inara coaaucaun,” naa Faboro.*

<sup>1</sup> Canuna Faboroneeun. Coatiha, cachaauru canu co-cainaain canu letoaain nihei. Jesocurisito aina rai Inaca Cana Coaunera- nii ohane caje ichateralute canu cocoaainain caletoaain nelu.

<sup>2</sup> Cau canu aina nenacaauru- canejeraauru aina jiniiquiin neeinna, satiin Galasia batane que Jesocurisito ranojineein neiniquichene rai caa quiricha laenaun.

<sup>3</sup> Cana Inaca Cana Coaunera, rai Calaohi Jesocurisito, naaonjoainuri aina jiniiquiin raotojoein neeichene jaanu teeuruhine inara rai.

<sup>4</sup> Nii Jesocurisitote cana osa coreniha ohelu, cau chau-ratane que itolere curuaanaaneein niha moconajaerane jaun aina jiniiquiin caseteco coaracaachene rai nenea caje, aina cuaain cana ichoteratihane coina, nitohaneein jeriha Cana Coaunerane jaun.

<sup>5</sup> Nii coreniha Cana Coaunera coroaecuruhine itolere bana. Nitohanemiin.

*“Coatiha nihei nii baiha cana ichoterateraanu,” naa Faboro*

<sup>6</sup> Jataaine inara cojoelatoon, inara belaiha rai Calaohi Jesocurisitone coreniha inara raain nihalu Cana Coaunerane saijieein, nii niicha tei erenaa que jaolequiin leecha cana ichoteranihei erenaa sacuhichene jaun.

<sup>7</sup> Nete nene leecha cana ichoteraanu erenaa. Inara laurijiracuru tabaaurute, inara rohecaain, nii inara ichoteraneein niha Jesocurisitone que erenaa corenaa jerecure.

<sup>8</sup> Nete laen, inae nii inara relaacaanune jaan corenaa coacuhin leechaneein nenea erenaa que inara relaera nihane casetecareein Cana Coaunera. Canu leecha erenaa que inara relaane nihanatiinte canu casetecareein Cana Coaunera. Leinjiin anjera dede caje fauhin, leecha erenaa que inara relaane nihanatiinte casetecareein Cana Coaunera.

<sup>9</sup> Jerichanetojoeine nacohauneein caa aitoreeunni. Chunocoha inae nii jauriaanejeein nenea erenaa inara relaacaanune jaan corein leechaneein inara relaerate casetecareein Cana Coaunera.

<sup>10</sup> Coatiha baaso ichaenihanune caohacha ichacaaunne coaracuruha cachaaurune jerenacaaun aitohaaun. Cana Coaunerate baaso ichaenihanune caohacha ichacaaunne coitucureein. Jana jerecuruha cachaaurune rijijieein jerichaaunne coatiha esinae rauhijiriin Jesocurisito letononeein nerihaaun.

*Jesocurisito letono Afosoto niha nunuhetihane biha Faboro.*

<sup>11</sup> Aonacuche canejeraaurune caa que inara rai aitete coitucuhiche. Coatiha cache suujua caje unaa nihei nii osa caje cana ichoterateraanu erenaa- caa inara rai canuhacha beejei.

<sup>12</sup> Niheichu, leinjiin cache nii que canu relaain niheilu. Leinjiin Jesocurisitohachate canu que nii coitucuerateein nelu.

<sup>13</sup> Nii coitucuhichene rijijieeine, canuhetonai jaiti Jorionichaanune ichao que ichaohanune bana Cana Coanera rai Jesocurisito ranojoneein nenacaauru- iclesiacuru laurichuru que nejerateein, acaauru rerohecaain acaauru itajenaa jereenlu.

<sup>14</sup> Nii Jorionichaanune ichao que jaiti ichaohanune banane, jataain leeochoauru canu araachuru, canu rijiu nenacaauru amurijiriin canacaanu foerateracuru ichao rijijieein ichaohin, nii canacaanu ichao corera caohatein beeraain nerejetoonlu.

<sup>15</sup> Nete, inae catohaneein rai letononeein nihanune coina- jaiti nejanoaenihanune jana canu janijiin canu raain nelu Cana Coanera, jataain canu belaitohane jaun.

<sup>16</sup> Nii jaunte, inae nitohaneein jerihalune jaan que inae tihane jaun, canu que rai Calaohi coitucuerate, coreniha osa caje nichoteeururichaaain cachaaaurune beebelijanu Jorioniheichuru raine coina. Coatiha nii chuni aina ereein aihaaunlu.

<sup>17</sup> Coatihachu, Jerosaleeun nii canu ajiniha Jesocurisito letono afosoto neein nenacaauru coaraain acaauru rai irihanune coina cuhaaunlu. Nitohanena coacuelanaalane jauriaanejeein Arabia batane cuhin- nii baiha Damasocoo cauha unlu.

<sup>18</sup> Nii baiha nichata jaanacaain catiaainne Jerosaleeun cuunlu, ecu Fedoro coaraain coitucuhanune coina. Ecuna aina neeunlu lechoonca saouqui janohin.

<sup>19</sup> Nena laen, leeochoauru afosotooru coaraeneenlu, acaihaniji cana Curuaanaa Jesocurisito ocoala Saantiaaochane coaraaunlu. Ecu, niheilu nii baiha chuni.

<sup>20</sup> Cana Coanera notaracaane esinae rauhijiriin nohanelanaala aitiin caa laenaan inara rai.

<sup>21</sup> Nii baihane Siria, Silisia, naaonjoaiunru batanecuru cuunlu.

<sup>22</sup> Nete, jaiti raajenihane canu coitucuurenlu Jodea nenacaauru- Jesocurisito ranojoneein nenacaauru iclesiacuru.

<sup>23-24</sup> Raujiaainchate: "Taolu jauriaa cana que nejerateein cana rerohecaain cana itajenaa jerera jetaote, inae enene amuhemujeein caa canacha esenetai erenaa que cachaauru

relae,” naain canu benaa coitucuhin, canu coreniha Cana Coaunera coroaecurelu.

## 2

*Afosoto niha Faborone esenetaauruha leeochoaauru afosotoorune*

<sup>1</sup> Lechoonca jena jaanacaain nii baiha catiaainne, nacoaauneein Jerosaleeun cuhacaanulu Berenabeen aina. Chaen nechu canu jiniichaain Tito netonai amaaunlu.

<sup>2</sup> Nitohaneein cuhanune jeriha Cana Coaunerane jaunne ucuaae cuunlu. Inae turuhinne, ecu nenacaauru Jesocurisito ranojoihunru coaaraneein nenacaauru aina nejesinajeein ita taojiaain, “Naaonjoaainne Jorioniheichuru rai ichoteratenojoinichaachene que erenaa beebejeeun,” naai beun acaauru rai, nabana joaereein cachaauru relaa canu beein baasoneein caetena coaacuruhane coataa.

<sup>3</sup> Nete, ecu niha canu aina Tito- Curiecocuru caje nenaanihane saijieein, jaberoco macohi cari saeratihane coina aito-curene saain nii ecu canu aonajeeureraauru.

<sup>4</sup> Nii janate, nechu joaenreein acaneein nelanaala Jesocurisito coreniha cana nejeraauru niha nocoetonacaaurucanacaanu que nasiin turuure nechu esinae rauhijiriin-Moisesa rai Cana Coauneraacha tei rauhi tonoraelanaala Jesocurisito aitoonjoaacha tonoraacaanune coaracuruhane coina.

<sup>5</sup> Nena nii aansijiiniji acaauru ere tonorana jerenihacaanu, nabana inae inara relaacaanune saijieein nii inara relacaanune jaan jianein acaauru esenetaaichene jerenihacaanune jaun.

<sup>6</sup> Nii iclesianein nenacaauru curuaanaa neein coitucunojinein nenacaauru, coatiha nii canuhacha beebejei baiha cuaain cha beeuruhi. Nete leeochoaauru curuaanaa neeuruhane niha natiin, canu curuaanaa neeurene, namute cacha rai chanein niha cachane niha natiin leeocheanein coaraeniha Cana Coaunerane jaun.

<sup>7</sup> Nitohanein canu relanaa coacuelanaalate, Cana Coaunera, Jorioocuru rene cuhin acaauru relaa Fedorone coina letoaalune rijijieein, Aca, Jorioniheichuru rene cuhin, acaauru netonai osa caje ichoteratenojinein neeururichaaaine beebejihanune coina canu letoaane que inae nainacure.

<sup>8</sup> Nitohaneinte, nii jeelai Cana Coaunera, afosoto neein Fedoro cocoinaain Jorioocuru rene letoaera- afosoto neein canu netonai cocoinaain canu letoaelu Jorioniheichuru rene.

<sup>9</sup> Nii jaunte, nitohanein inae Cana Coaunera, nii canu rai amihanenaa tihane esenetaauruhane jaun, acaauru amihaneoo que acaauru corootajanera neein Berenabeen

aina canacaanu raauruhane coaratiha, satiin notaracaae canacaanu belaa'in raotojoe'in canacaanu raare, nii ecu nenacaauru rai jataain leeo'chaauru amurijiriin nelateineein acaauru coaraneein nenacaauru, Saantiaao, Fedoro, Joaan, naaonjoainuri. Nitohane'in canacaanu raainte, Jorioocuru aina neein acaauru relaa'urhane tonohanau canacaanu netonai Jorioniheichuru rene cuhin acaauru relaacaanune jerecure.

<sup>10</sup> Raujiaainchate laen inae jauriaalu caje coaune'in coaaucaaulune rijijie'in, cairicheihuru coacuhin acaauru corootajanichaanu chaelai quene coina canacaanu rai aito'curelu.

*Antioquihau Fedoro suujuatiha Faboro ne*

<sup>11</sup> Nena laen, Antioquihau nihanune jana canu rene turuha uha Fedorone bana, rai nacatiha neein aitoonlu raujiaain baaso neein ichaane jaun,

<sup>12</sup> jauriaanejee'in Jorioniheichuru aina lenoneein naaonjoane saijie'in inae ecu tururuha Saantiaao laurichuru-Jorione'in nenacaa'urune jana inae nii Jorioniheichuru caje nelerue Fedoro, nii ena turunaa jaberoco cari macohi moloorera coasihane jaun.

<sup>13</sup> Nii jaunte nitohane'in baasoneein ichaa Fedorone rijijie'in ichacure leeo'chaauru Jesocurisito esenetaeraauru Jorioocuru, Berenabeen netonaine maajee'in.

<sup>14</sup> Nii jaunne, nitohane'in esinae rauhijiriin naaonjoaain osa caje ichoteratenojoneein nerichaache'inne que cana relaalu Jesocurisitone rijijie'in ichacurenihane coaracaaunne jaun, satiin ecu Jesocurisito esenetaerane'in nenacaauru acatiha nii Fedoro teteriin: "Chanuna jataain baaso ichaai Jorioniheichuru rerohecaain, Jorione'in nihacachene ichao rijijie'in ichaa'oruhane coina. Ii Jorione'in, inae acaauru ichao rijijie'in jauriaa ichaohilune saijie'in," naain rai aitoonlu.

*Esenetaauruhane corenihachate Jorioniheichuru aina jini-iquii osa caje nichoteeurureein Jorioocuru*

<sup>15</sup> Canate cana foerateracuru caje coaune'in Jorione'in nihacache. Coatiha leeo'chaauru cachaa'uru, nechu Cana Coaunera coitucuelanaala neein osa que nesarujueein nenacaauru rijijie'in nihaacache.

<sup>16</sup> Nete laen, nii Moisesa rai Cana Coaunera tenojoi ichaonaa rai rauhi tonoraa cachane niha natiin, itolere niicha ichai ujuaihoni'hanane caje nichotenaa nainenihane coitucuhacache raotojoe'in. Jesocurisito esenetaa cachanete laen, itolere niicha ichai ujuaihoneein nihane caje ichoteratenojoneein nereein. Nitohane'in nii Moisesa rai Cana Coaunera tenojoi- rauhi esenetaain tonoraain niha cachane nihanatiin, itolere niicha ichai ujuaihoneein nihane caje

nichotena nainenih cachane jaunejian, canacaanu netonai Jesocurisito esenetaacaanu.

<sup>17</sup> Nitohaneein itolere canaacha ichai ujuaihoneein nena caje cana ichoteratiha Jesocurisitone jaaunna, osa que nesaruhin nihacache. Aihei, coatiha Jesocurisito esenetaacacachene osa que nesaruha aihaacache.

<sup>18</sup> Inae nii Moisesa rai Cana Coanera tenojoi rauhi jianichaaunne saijieein, nacoauneein rijijieein nena jerichaaunena laen osa que nesaruha aicheeun.

<sup>19</sup> Esinae rauhijiriin, Cana Coanera tenojoi ichaonaa que ichaohanune coinane Moisesa rai jauriaa niicha teilu rauhi tonoraain ichaohanune jianeunlu.

<sup>20</sup> Nitohaneeinte coroso que ohin, itolere baaso ichajeein ichaohanune jaan itajeein canu ichao coreein, canu suujueniha rai Suujue te Jesocurisito. Aihana jaun, jataain canu belaitohane jaun, canu coreniha ohalu Cana Coanera Calaohi Jesocurisitone esenetaanune jaunne, acaacha que jaeequiin ichaon.

<sup>21</sup> Coatiha canu belaihane jaun, canu rai Cana Coaneraacha tei ichaonaa que jaoleconaa nainihaaun. Nitohaneein itolere canaacha ichai ujuaihoneein nena caje cana ichoteraneein niha nii Moisesa tenojoi rauhine chujianra, inacojeein cana coreniha orelu Jesocurisitona.

### 3

#### *Moisesa rai rauhi aina canaacha esenetai.*

<sup>1</sup> Galasia cocoaichacuru- aansocuru. Cha inara suujua auhacaain inara ichao core, cha coitucuhi rijijieein ichao-hichene coina. Nii coataane niqui, esinae rauhijiriin cana coreniha Coroso que ohalu Jesocurisitone coitucueratein, inara que coaratein inara relaacaanulu.

<sup>2</sup> Raujiaain canu tonoraachene coinane, inara caje baja-reeunni: Moisesa rai rauhi tonaraachene jaunna, inara rai Suujue tein nihalu Cana Coanera. Tana, nii inara relaacaanune esenetaachene jaun inara rai Suujue tihalu Cana Coaneranane coitucuhichene.

<sup>3</sup> Jataainachura cha coitucuhi rijijieein neeiche, inae acaihaniji que Cana Coanera Suujue raaichelune saijieein, jerecuruha cachaaurune rijijieein ichaohin nichotena coaauquichene coinane.

<sup>4</sup> Jataainachura inacojeein, nii caohacha- inaraacha esenetai jianeriquiche caohacha nainejeinte. Aihei jerihane. Coatiha inacojeein nihei.

<sup>5</sup> Nii inara rai Suujue tein cojoelanaacojoai icha Cana Coaneranane, coatiha nii Moisesa rai rauhi tonoraachene

jaaun ichaai. Inae nii inara relaacaanune jaan aonaain esenetaaichene jaunte ichae Cana Coaunera.

<sup>6</sup> Coaracuchenachuhinti, rai aitoaha Cana Coaunerane esenetaain queecha jaecoha Abaraaunne jaun, nii esenetaane corenihacha niicha ichai ujuaiho nelanaala teein raa Cana Coaunerane.

<sup>7</sup> Aihane jaun, satiin Cana Coaunera esenetaain que jaaequiin nenacaauru, Abaraaun nefoerate esine neein neeururichaaine coitucuhin neeuche.

<sup>8</sup> Inoaelu jaiti turueniha Jesocurisitone ajiniha caje coaanein, nitohaneein Jorioniheichuru netonai, itolere niicha ichai ujuaihonnein neeuruhane caje niicha ichai ujuaiho nelanaala tenajarichaaine jaunte: “Satiin caa chauratane sacutaain nenacaauru cachaaaurune ii aina cuaain rausiaereeunicha,” naain Abaraaun rai been, nii caohati erenaa raotono laenaeratelu Moisesa que rai Quiricha Inoaensi cuhane Cana Coaunera.

<sup>9</sup> Aihana jaunte, nii esenetaalu Abaraaun ne rijjijeein esenetaerate rausiaereein Cana Coaunera.

<sup>10</sup> Nitohanihana jaunte, nii Moisesa rai rauhi tonoraain ichaoha cachane nihanatiin caseteco coaraa cureein, “Caseteco coaraate cureein, jitaain caa rauhi laenanohi tonoraelanaala nena,” naain been laenaratihalu Moisesa que Cana Coaunerana jaun.

<sup>11</sup> Nitohanihane jaunte, rauhijiriin nii Moisesa rai rauhi tonoraain ichaoha cachane coreniha coatiha caohacha ichaeranein teein rarinaain Cana Coaunera. “Jesocurisito esenetaain queecha jaaequiin nenaate caohacha ichaeranein teein rareein Cana Coaunera,” naain laenanohinein nihane rijjijeein.

<sup>12</sup> Nete laen, nii Moisesa rai rauhi, raujiaain esenetaa cachane coreniha ichoteratihane coina aitelanaala: “Esinæ rauhijiriin aitoaha nii rauhine rijjijeein, leinjiin niji cautijiaelanaala tonoraerate ichaoreein,” naain laenanohinein ne.

<sup>13</sup> Nitohaneeinte, cana cairichaeranu que niha nii rauhine jana, caje cana ichoteratihane coina leinjiin osaaona rijjijeein cana osa coreniha ohelu Jesocurisito. Nii quete: “Niicha ichai ujuaihonnein nena- saain enuha que ucuun teein atinanohi cacha,” naain Cana Coaunera Quiricha cuhane laenanohinein ne.

<sup>14</sup> Nitohaneeinte ichaelu Cana Coaunera, satiin cachaauru rausiaaecane coina, Abaraaun rai aitohalune rijjijeein, Jesocurisito aina cuaain Jorioniheichuru netonai rausiajeein, nii esenetaain queecha jaecohacachene, nii naitoonjoan rai Suujue tiha cana raine coina.

*Moisesa rai rauhi aina, cana rai tihane coina Cana Coaunera aitoonjoan.*

<sup>15</sup> Aonacuchene inara rai, joaenreein cacha rijjijeein inara rai aitete coitucuhichera canejeraauru. Leinjiin cacha, chaelai ichaane coina aitiin laenaain, ecu teein curuaa laenaa ne. Nihei nii niicha laenai jожohin, niheichu nii niicha laenai jaonaa nainihe chuni.

<sup>16</sup> Nii rijjijeeinte, Abaraaun aina rai nefoerate, naaonjoain rai, esinae rauhijiriin niicha teenu tihane coina aitelu Cana Coaunera. Coatiha: “Nefoerateeuru,” naain laenanohinihei Cana Coaunera Quiricha cuhane. Nitohaneein arajii que aitelanaalate leinjiincha que: “Ti nefoerate,” naain laenanohineein ne. Jesocurisito quete nii aite.

<sup>17</sup> Naaonjaain quene inara rai caa aitoon; Cana Coaunerate, Abaraaun aina cuaain cana rai niicha teeni tihane coina esinae rauhijiriin nohanelanaala aitelu. Inae jauriaaneein Abaraaun rai besihalune baiha jena fasha jaanacaneein catiaainte nenea ne nii Moisesa rai rauhi. Nii jaunte, nii ichoaichaniha Abaraaun rai aitosihalune jaan itajenaa nainene Cana Coaunera.

<sup>18</sup> Nii Moisesa rai rauhi aina cuaain nii Abaraaun rai niicha benatei tiha Cana Coaunerane, coatiha chaque nelateriheii nii cana rai niicha benatei. Nete niha Moisesane ajiniha Abaraaun aina cuaain cana rai niicha teenu tiha core colanene cointate aitelu Cana Coaunera.

<sup>19</sup> Aihana jaun chaque nelate nii Moisesa rai rauhi. Acate, turuha nii nefoeratenaa- nii Abaraaun rai naitoonjoane reentiaain, esinae rauhijiriin tonoraain ichaaoreniha cachaaurune coaratihane coina tenojoineein nelu. Rai letono aanjera quete nii rauhi teratelu Cana Coaunera. Jana Moisesate cachaauru rai beraneein nelu.

<sup>20</sup> Nete laen, bera colane raajenhane nii niicha teenu que aitelu- leinjiin acaacha neein nenea Cana Coaunera.

*Naaonjoaain cointate nelu nii rauhi.*

<sup>21</sup> Cana Coauneraacha ichanenu aina ita rijjijeein niha nii Moisesa rai rauhina jaunna nii niritiin niha. Aihei, coatiha ita rijjihai. Nii rauhi, cana rai ichaonaa teranihanechujianra, satiin nii rauhi tonoraain nenea, itolere canaacha ichai ujuaihoneein nenea caje nichoteein nerichaachena.

<sup>22</sup> Nete, Cana Coaunera Quiricha aina cuaain, satiin nii Moisesa rai rauhi tonoraain nenihacachene coreniha osaaonanein nihacachene coitucuhacache. Nitohaneein coitucuhin, Jesocurisito esenetaacachenete, inae nii Cana Coauneraacha teenu ranaa nainerichaacheein.

<sup>23</sup> Nii jaunte, jaiti turueniha nii canaacha esenetai jaeconaanajane jana, caseteco coaracaachene coina mucuhineein cana sirilu nii Moisesa rai rauhi, turuha nii canaacha esenetaine reentiaaajoaain.



<sup>24</sup> Nii Moisesa rai rauhite, canaanaihuru amaa beraichane rijijieein, Jesocurisito rai cana amaeraneein nelu, nii Jesocurisito esenetaacachene, itolere canaacha ichai ujuaihoneein nena caje ichoteratenohineein nihacachene coina.

<sup>25</sup> Nii jaunte laen ena, inae turuha nii jaecohacachene jaan canaacha esenetaine jaun, cana beraichaneein niha nii rauhine caje mituhacache.

<sup>26</sup> Nitohaneein inae Jesocurisito esenetaaichene jaunte, satiin inara, Cana Coaunera calaohi rijijieein neeiche.

<sup>27</sup> Inae nii esenetaaichene aina cuaainte baotisaain coujunacatenohineein Jesocurisito aina neeichene, niicha tei ichaonaa que ichaohiche.

<sup>28</sup> Aihana jaun, Jorioneein, Curieconein, letononeein, nirijieein letononelanaala, quichaauru, enecuru, naaonjoaaineein neeichene nihanatiin, inae nihei nii que cha. Inae Jesocurisito aina jiniiquiin neeichene jaunte, lelaurijiei caje ranojoneein nena rijijieein neeiche.

<sup>29</sup> Nii jaunte, Jesocurisito esenetaeraneein neeichene jaun, Abaraaun nefoerateneein, nii rai tihane coina Cana Coaunera aitoonjoalu raeraneein neeiche.

## 4

<sup>1-2</sup> Naaonjoaane jaunne caa inara rai aitoon. Jaiti canaanainiha nii itolere rai inaca rucuhele eroraneein neeninete, jerichanejeein letono rijijieein ne, esinae rauhijiriin satiin nii rucuhele erora nihane saiijieein, jaiti canaanai nihane jaun. Nitohaneinte leecha cacha que beraichaaain ne jinaa tiha inacane jaan que tihane reeintiaain.

<sup>3</sup> Nii rijijieein techu, jaiti turueniha Jesocurisitone bana, nechu cana itajeranuneein caa chauratane que nena que beraichaaain nihacachelu.

<sup>4</sup> Nete, inae nitohanihane coina jinaa tihalone jaan que inae turuhane jaun, rai Calaochi letoaelu Cana Coaunera, cachaneein leinjiin ene caje nejanoaane coina. Acaachate cana amute cachaneein nii Moisesa tenojoi rauhi tonoraera rijijieein ichoaelu.

<sup>5</sup> Nii corenihate cana cairichaeraneein niha nii rauhine caje cana rocohin nelu, rai calaohineein cana teein cana raa Cana Coaunerane coina.

<sup>6</sup> Nii jaunte, inae esinae rauhijiriin rai calaohi nihacachene coaratiha rai Calaochi Suujue te cana suujueniha Cana Coaunera. Nii rai Suujuete cana suujueniha neein: "Ofa," naain Cana Coaunera bajae.

<sup>7</sup> Aihane jaun inae ii, nii rauhi tonoraeraneein niheei. Iite, inae Cana Coaunera calaohineein neei. Nitohaneein rai

calaohineeine jaunte, Aca jerihane rijijieein, ii que banijieeinein nenea raeraneein neriquiin.

*Jesocurisito esenetaeraauru que suujuaa Faborone*

<sup>8</sup> Jaiti, Cana Coaunera coitucuelanaala neeichene banate, cha nelanaala nenea- cana coaunera niha nocoetonacaauru letononeein nerejetocoichelu.

<sup>9</sup> Nete laen, inae enene Cana Coaunera coitucuhichene jaun, inara coitucue Cana Coaunera. Aihana jaun, chanuna coaiten nacoauneein nii chaque nelatiheichuru- cairicheineein nenacaauru tonoraain letononeein nenea jeriquiche.

<sup>10</sup> Nitohaneein neeichene jaunte, nii enanetojoein jauriaa aichejetocoichelune rijijieein, atenechuru, cojoinacaauru, ajaanaacuru, naaonjoaaihunri cojoinaca que turuhane inara rai chosichuru corojeein bitoaaiche.

<sup>11</sup> Nii jaunne jataain casihun, cacoichana aina cutaain inara relaanulune saijieein nitohaneein neeichene jaun.

<sup>12</sup> Canejerauru, canu Jorionichaaunne jaunne niqui nii taolu inoaelu nenea rauhi tonoraain ichaorejetoonlu. Nena inae enene nii jauriaa nii rauhi tonoraelanaala ichaorejetocoichene rijijieein inae enene ichaaon. Aihana jaun nacoauneein nii rauhi colane inoaelu ichaohichelune rijijieein ichaaooche.

Nii jauriaanejeein inara relaanulune bana coatiha canu que jaoleconaa coaauheechelu.

<sup>13</sup> Nenacaaentejia cunaitichaaunne saijieein jauriaanejeein inara rai ichoteratenojoeinein neriquicheeine beebelijhanune bana, jataain rachoojoein canu corojeein canu raachelu canu coiintena coacuelanaala.

<sup>14</sup> Nii cunaitichaaunlune banate, esinae rauhijiriin, nii canu cunai coreniha canu que jaolequelanaala, niheichu canu coiintelanaala, naaonjoaain leinjiin Cana Coaunera letono- anjera aina Jesocurisito raera rijijieein canu raachelu.

<sup>15</sup> Chanuna jana chaen, inae enene nii aaichelune rijijieein rachoojoein nenea naineneeiche. Esinaete chuhisi niqui, nii cunaitichaaunne jana rachoojoenaa caaun roconacainiha inara notane jana nihane, inara nota rocohin teriquichelu canu rai.

<sup>16</sup> Nitohanihane saijieein rauhijiriin nohanelanaala inara rai aitocoaune jaaunna inara que nejeratenaa nichaaun.

<sup>17</sup> Nii cachaaurute niqui jataain inara aina nenea jecure. Nete, caohachaaain inara tenaa jerenacaaun aihurene. Nechu canacaanu que jaolequiin, acaauruhacha tonoraain neeichene cinate aihure.

<sup>18</sup> Esinaetechuhisi niqui caohachae, leeochoauru cachaauru rai caohacha ichacaane coina coaaucaane. Aiha

esinaen rauhijiriin acaauru rai nelatenenu nihane. Nete itolere bana coacuelanaala, inara aina nihanuneecha que coaacuruhane nelatene.

<sup>19</sup> Cacalabi rijijieein neiniquichene corenihane, jataain coacuhin cunaiteeun. Charijieein teeinti, canaanai janoanaa jerihane cunae rai neba, nii rijijieeine inara coreniha cunaiteeun. Nirijieeine, itolere bana cunaiteeriin nereeuni, esinae rauhijiriin jeriha Jesocurisitone rijijieein neeichene reeintiaaajoaain.

<sup>20</sup> Bajaana chuhinti ena inara aina neneeun, canu raajeni-hane inara rai leechaneein raotojoeein aitocooaunne coina. Nena inara caje coriaae nihanune jaun inara aina cha chana coitucueeneun.

### *Acara aina Sara*

<sup>21</sup> Inara, Moisesa tenojoi- rauhi tonoraain nenea jeraauru, canu rai aitocoichenena jereeun. Tana esinae rauhijiriin, aitohalu nii Moisesa rai rauhine aohanraneein neeichene.

<sup>22</sup> Aonacuche: “Coroatajaainte canaanai sirilu Abaraaun. Leinjiin rai calaohite sirilu rai coseenra neein nenea Acara aina. Jana, nii leecha rai calaohi coroatajate sirilu rai comasai esine neein nenea Sara aina,” naain aitohane coitucuhichene.

<sup>23</sup> Nii jaunte, nii rai coseenra aina Abaraauncha sirii- rai calaohi cachanichaachene ichao rijijieein nihane coina nejanoaelu. Nete laen, nii rai comasai esine- Sara aina ni-icha sirii- rai calaohi, rai aitosihalu Cana Coaunerane jaan nainaane coina nelu.

<sup>24</sup> Naaonjoaane jaunte nii nitohane, nii coroatajai Abaraaun comasaichurute, coroatajaain cana aina niicha ichanenenu ichaa Cana Coaunerane coujunacaneein neeure. Nii Acarte Sinaai bichataneu, Moisesa rai ajeri caje nenaatabara que teein laenanohineein nenea- rauhi tihalu Cana Coaunerane coujunaca ne. Nii rauhi tonorana nainelanaala neenihurute nii coina nejanoaain neeure.

<sup>25</sup> Nitohaneinte, nii Arabia nenea- Sinaai bichataneu Moisesa ranojoi rauhi tonoraeraneein, Jerosaleen cocoaichaneein nenacaauru foeratera ne Acara.

<sup>26</sup> Nete laen cana, nii Jerosaleen cana que banihateein coaunanojoi cocoaichaneein nihacachene coina, nii comasai esine Sara aina Abaraauncha sirii nefoerateneein nejanoaain nihacachelune jaun, rai calaohi esineneein niha-cache.

<sup>27</sup> Nii quete:

“Rachoojoein neeu canaanai sirina inaelanaala nenea ene, cojioriin rachoojoeu chabana canaanai sirineeine saijieein.

Jaoleneein neeinne nihanatiin, lanaaona amurijiriin arajiin canaanai siririquire jaun,” naain laenanohi ne.

<sup>28</sup> Canejeraauru, ichaane coina aitohalu Cana Coaunera, Abaraaun raine rijijieeinte nenaanelu Isaca. Nii rijijieeinte inara netonai nenaaneei neeiche.

<sup>29</sup> Nii bana cachanichaachene ichao rijijieein Acara aina Abaraauncha sirii rai calaohite nii Cana Coaunera Suujue ichanohineein nejanoanaa Isaca ichao rohehecaelu. Nii rijijieein techu enanetojoein inara netonai rohehecaure nii Cana Coaunera Suujue ichanohinelanaala nenacaauru cachaauru.

<sup>30</sup> Nete nii que: “Nii rai calaohi aina, nii ii coseenra sitaaute amuhine. Coatihā nainiheī, nii ii comasai esine aina iicha sirii- ii calaohi aina, nii ii rucuhēle eroraneēin nihane,” naain laenanohineein ne Cana Coaunera Quiricha cuhane.

<sup>31</sup> Aihana jaun, coatihā nii coseenraneēin nēnā nēfoerate- neēin nihaacache. Nii comasai esineneēin nēnā nēfoerate- neēinte nihaachera canejeraauru.

## 5

*Inae Moisesa tenojoi rauhi caje jianacoon nihaacache.*

<sup>1</sup> Jesocurisitote, Moisesa tenojoi rauhi coreniha caseteco coaracaachene rai nēnā caje cana rocohin nihane jaun, inae raotojoein jianacoon nihaacache. Aihana jaun, naini- heeiche nacoauneein nii Moisesa tenojoi rauhi tonoraain nenacaauru aina acaauruhacha ichai ichaain nihache.

<sup>2</sup> Canu Faboro nichaaunne aonacuchena, inara rai aitete aonaquiche. Aitocuruha Jorioocurune rijijieein nii Moisesa rai ruhīn tonoraain inara jaberoco macohi cari saerateeich- ene, coatihā inara rai cha que nelateēin nerinaain jianacoon neeichene coina Jesocurisito esenetaaichene jaan.

<sup>3</sup> Coaitēn nacoauneeine aitoon. Chunocoha Jesocurisito cachaneēin nēnā Moisesa tenojoi rauhi caje ichoterateno- joineēin nihalune saijieēin nacoauneein nii rauhi tonoraane coina rai jaberoco cari saerateēin nēnāte leinjiiniji cautiji- aelanaala nii Moisesa rai rauhi tonoraanete ne.

<sup>4</sup> Inara, inae jauriaa jerihā Jesocurisitōne rijijieēin ichao- hichene coina esenetaaichene saijieeinte, ena Moisesa rai rauhichā tonoraain nēnā jeriquiche, Jesocurisito aina inara belaiha Cana Coaunerane jaan que jaolequiin.

<sup>5</sup> Nete laen cana, rai Suujue cana rai niicha tei aina cuaain esenetaacachene jaun, itolere canaacha ichai ujuaihōneēin nēnā caje nichoterichaacheēinne que jaaequiin cohajiha- cache.

<sup>6</sup> Aihana jaun, Jesocurisito aina jiniiquiin nihaacachene, inae nelatihei cana jaberoco macohi cari saeratihacachene. Esenetaain queecha jaaequiin nihaachenete laen nelate,

nii esenetaain nihacachene aina cuuain ita belaaain ichaoha-cachene coina icharihanine jaun.

<sup>7</sup> Inarate niqui inae esenetaain queecha jaaequiin nee-ichelu. Chariji cacha inara coritaane jaun, nii inaraacha esenetai tonoraain neeichene jianequiche.

<sup>8</sup> Tana Cana Coaunera jerihane jaun inara cotijiaain ni-halune coitucuhichene.

<sup>9</sup> Nete, "Aansijiin coerati que rai coliha jasiitihacanete, jitaain nii rai coliha ichonai coeralae," naain nihane coitu-cuhiche. Nii rijijieeinte leinjiin cacha inara ichao auhacaain aasaeraneen ne.

<sup>10</sup> Nena canu, leeochangeen inara suujua cuuaichene coataa, inara coroatajanerichaaain cana Curuaanaa Jesocurisitone esenetaaun. Nete laen, nii joaenreein inara suujua auhacaera cacha casetecareein Cana Coaunera. Coatiha chunocoha aihane nihanatiin que Suujua acatena nainerinaain.

<sup>11</sup> Canejeraauru, jauriaa aihanulune rijijieein enaneto-joein rai jaberoco macohi saerateeuruha satiin Jesocurisito esenetaeraaurune coina acaauru conujichaaunne, coatiha canu cairichaaaururihei Jorioocuru. Nitohaneen jerecuhane rijijieein nii Jesocurisito beratenojoi beebelijanune acaauru baijiaenerichaaunne jaun.

<sup>12</sup> Nete, raajenihane jitariin rai jaberoco molohin jaaoruha nii inara suujua rohecaeraaurune caohachae.

<sup>13</sup> Canejeraauru, inarate cha ujuaihonelanaala jianacoon raotojoein neeichene coina, cotijiaain ranojoein nee-ichelu. Nete, inae cha ujuaihonelanaala neeichene jaun, naineneeiche inara suujua letono rijijieein cha ichaain nee-ichene. Nenacaaentejia caohachae nii amuritoheriin, ita belaaain, cha lateen niha leeochange corootajaneen, naajoaain neeichene.

<sup>14</sup> Satiin nii rauhi aitoonjoan cajete leinjiincha neeje. Acate: "Chamute cacha belaaain ichaao, ii raajenihane ii jaberoco belaaaine rijitojoein," nae.

<sup>15</sup> Aihane jaun, nii que necohalajiin neeuche. Jana necohalajilanaala nejesinajeein ita aina obaejeriin, ita co-tairiin, naaonjoaain neeichenete inara raajenenihane nita-jeriquicheen.

*Joanreein cacha ichao aina, Cana Coaunera Suujue tenojoi ichaonaa*

<sup>16</sup> Nii jaauna inara rai aitoon, jeriquichene rijijieein baasohacha que coacuhin ichoaelanaala, jeriha Cana Coaunera Suujuene rijijieein coacuhin ichaohichene coina.

<sup>17</sup> Nii cana suujua cuhane baaso canaacha coacuite, cana aina Cana Coaunera Suujue ichanenu caohateraneen ne. Nii

rijijieein techu nii cana suujua, Cana Coaunera Suujue que nejeratenaaneein ne. Nii corenihate inaraacha ichana jerei ichana naineneeiche.

<sup>18</sup> Nete esinae rauhijiriin, inaraacha ichanenu ichaquichene coina inara rai beraneein niha Cana Coaunera Suujuene, inae nii Moisesa tenojoi rauhi rijijieein cha ichaquichene jianeriquicheein.

<sup>19</sup> Caaintiaai, “Acaauru acaaurute, jeriha suujuane rijijieein baaso ichajeein ichaaore,” naain coitucuhacane. Nitohaneein ichaonacaaurute, sinijeranelaanaala nenea ene que ichaojeraquin, rai chosi rai niicha teeuri iniho que lenoneein, naaonjoaauru.

<sup>20</sup> Chaen techu, acaauru chosichuru coroajeein, benaneneein, ita coiinteein, ita coana jerelanaala, ita que necoelajaauharitiin, enaacha obajeein, ita amurijiriin nenea coacuhin, ita caje neleruhin, acaauruhacha coaacuruhane rijijieein neeuruha leeochoaurune jereein,

<sup>21</sup> ajetoritiin, achotoritiin, naajoaain neeuruhane cajete enaacha nitohaneein ichaonacaauru cachaauru coitucuhaca. Nacoauneeinne inararai aitoreunni, que nainaan ichaohichene coina. Nitohaneein ichaonacaauru, coatiha Cana Coaunera Cojoanonaa que ichaonaa nainecuruhi.

<sup>22-23</sup> Nete laen Cana Coaunera Suujue tenojoi ichaonaa, ita belaan, rachoojoein, raotojoei ichaonaa que ichaohin, cha abaantaain, cana rai chaelai que cainaane latelanaala cacha rai cha tein, nii cana ichao corenaa coacuelanaala, leeochoauru amurijiriin nenea coacuelanaala, cana suujua letono tonoraelanaala nihacachene coina, naaonjoaain nihacachene jaanu teraneein ne. Coatiha nihei nii chuni rauhi nitohaneein ichaohacachene caohatera.

<sup>24</sup> Nitohanihane jaunte, Jesocurisito ranojoeinein nenacaauru, inae coroso que tein itajera rijijieein, itolere rai nichao rijijieein ichaohin neosateein necairichanaa, rai suujua baaso, naaonjoaihunri itajeein inae ichoae.

<sup>25</sup> Nii jaun, inae ena Cana Coaunera Suujue aina ichaohacachene jaun, coanete jeriha Cana Coaunera Suujuene rijijieein ichaohacache.

<sup>26</sup> Aihane jaun, necohasitaain, ita amuritona coacuhin, itaque necoelaain, naaonjoaain nenea nainihaacache.

## 6

### *Le cachanequichene ita coroatajanecuche.*

<sup>1</sup> Canejeraauru, osa que nesaruha chunocohane coaraqichene, inae inara Cana Coaunera Suujue que suujuecohichene jaun, rai aitocuchete raajenihane baaso ichaane coitucuhin rai suujua coaraain ichaohine. Nete inara

netonai, nitohaneein coujunojoneein neeichene coataa que necohalajiin jataain belaaïn rai aitocoichene caohachae.

<sup>2</sup> Nejesinajeein itolere que ita coroatajaneein neeichenete, esinae rauhijiriin jeriha Jesocurisitone rijjijeein ichaoriquicheein.

<sup>3</sup> Jana chunocoha, chanelanaala nihane saijieein leeochoaauru amurijiriin nenea coaucanete raajenihane necoritareein.

<sup>4</sup> Nii jaunte caohachae, le cachaauru baaso ichaelanaala caohacha ichaane coitucuhin, raotojoein rachoojoein nihane caohachae. Nete laen, leeochoaauru baaso ichacurhane coaraain, acauru que necohasitaain rachoojoein nihane caohachaene.

<sup>5</sup> Aihana jaun, le cachaurute naine itolere niicha ichai coitucuhin rai suujua coaraain ichaane caohachae.

<sup>6</sup> Ena Nenea Cana Coanera Ere que relanojoneein nihane, nii relaera coroatajanemiin itolere niicha sirii que.

<sup>7</sup> Jiaonriha inara raajenihane necoritaachene. Chateeinti baaso ichae, niite baaso raeraneein nereein. Jana caohacha ichaerate caohacha raeraneein nereein.

<sup>8</sup> Nitohanihana jaunte, chunocoha rai suujua letono baasohacha ichajeein ichaonaa itajereein nii baaso- rai suujua cuhane coacuhin niicha ichai. Nete laen, chunocoha jeriha Cana Coanera Suujuene rijjijeein itolere caohacha nejesina ichajeein ichaohane, nii caohacha- rai suujua cuhane coacuhin caohacha niicha ichaite chabana sanaacharanejin nenea ichaonaa que tereein.

<sup>9</sup> Aihana jaun, caohacha ichacaachene coiinteein jianena nainihaacache, inae cojoanonaa que turuhane bana cana rai cainanohinerichaaïn nii canaacha ichaine jaun.

<sup>10</sup> Nii jaunte, satiin rai, nainichaachene jaan que leeochoaauru belaaïn coroatajaneein nihacachenete caohachae. Chaen jeelai amuritoheriin nii canaacha esenetai coreniha cana nejeraneein nenacaauru coroatajaneein nihacachenete caohachae.

### *Acaauru suujuateein acaauru rai necoiha Faborone*

<sup>11</sup> Enane laen, canu raajenihane canu biji que caa quiricha laenaun. Nii jaunte, tabanae caa canuhacha laenai.

<sup>12</sup> Nii inara jaberoco macohi cari molohichene coina inara rohecaeraaurute, nechu rai lauri aina caohachaaïn nenea jerenacaaun aitocure. Nabana Jesocurisito esenetaeraneein neeuruhane coitucuhin acaauru sooruhane coataa acaauru coasiha.

<sup>13</sup> Nete, acaauru jaberoco macohi cari moloerateein neeuruhane nihanatiin, satiin aitoha nii Moisesa tenojoi rauhine rijjijeein tonorana nainecurene. Chaen techu, inara netonai

inara jabereco macohi moloerateeichene, inae coujunaca siriha inara jaberocone que necohasitaauruhane coina nii inara rerohecaare.

<sup>14</sup> Nena laen canu, joaereein coreniha necohasitanaa naineneeun. Canu coreniha coroso que ohalu Jesocurisi-tone corenihachane naineeun acaacha coasitaanune. Nitohanein, canu coreniha coroso que ohalu Jesocurisitone jaun, coitucuelanaala ichaonacaauru cachaauru ichao riji-jieein ichaonaa nainihaaun. Niheichu Cana Coaunera coitucuhichuru nihanatiin, canu arinaa nainecuruhi acaauru riji-jieein ichaohanune coina.

<sup>15</sup> Coatiha chaque nelatihei, cana jaberoco macohi cari moloerateein, moloeratelanaala, naaonjoain ichaohacane. Jesocurisito esenetaacachene jaunte, ena coaunanojoi nihacache. Niite jataain nelate.

<sup>16</sup> Satiin caitoonjoan tonorain ichaonacaauru cairichaa-joain coaramii Cana Coaunera, raotojoein neeuruhane coina, satiin Cana Coaunera cacha esineeuru aina jiniiquiin.

<sup>17</sup> Ena caje coaunein, inae nenacaaen canu cairichaer-ateichene jerinaaun. Inae esinae rauhijiriin Jesocurisito letononein nihanune coujunacanein cajabereeo que, canu bisihuruhane jaan cure sirichaaune jaun.

<sup>18</sup> Canejeraauru, cana Curuaanaa Jesocurisito jataain jelai amuritoheriin corajeein neeichene jaanu teeine inara rai. Nitohanemiin.



## **Efesoo nenacaauru rai Faborohacha letoai**

*“Chatohaneeiche,” naa Faborone*

<sup>1</sup> Canune, Cana Coanera jerenohineein rai Calaohi Jesocurisito cococainanohineein rai afosoto Faboro neeun. Efesoo satiin, Cana Coanera cachaneein rai Calaohi Jesocurisito esenetaeraauru raine caa quiricha laenaun.

<sup>2</sup> Cana Coanera aina rai Calaohi Jesocurisito inara rai raotojoein neeichene jaanu teuruhinete raotojoein neeiche.

*Naaonjoaainte Jesocurisito aina cuaain rai cachaauru rausiaje.*

<sup>3</sup> Cana Curuaanaa Jesocurisito Inaca Cana Coanera coroaecaachenete ne. Acate dedeeu cana suujue que itolere caohacha ichaain cana rausiaje, rai Calaohi Jesocurisito cachaneein nihacachene jaun.

<sup>4</sup> Jaiti cana rai chauratane coaunaane ajiniate, cana janiin cana raain nelu Cana Coanera, rai Calaohi Jesocurisito aina cuaain cha ujuaihonelanaala notaracae que banijiainee rai cachaneein nena coina.

<sup>5</sup> Jataain cana belaihane jaunte, rai Calaohi Jesocurisito aina cuaain rai calaohineein nena coina ichae Cana Coanera, nitohaneein coausihalune rijijiein.

<sup>6</sup> Nitohaneein raotojoein nena coina cana belaiha cana rausiaeca jataain niicha belai- rai Calaohi Jesocurisito aina cuaaine coreniate, itolere bana Cana Coanera coroaecaache.

<sup>7</sup> Jataain cana belaitohane jaunte, rai Calaohi coichana aina cuaain cana osa caje cana rochin, cana que suujua acatelu Cana Coanera.

<sup>8</sup> Nii cana rai itolere coitucuhin, itolere que nainain, naaonjoain ichaohacachene jaannu tihane cajete jataain cana belaitohane coitucuhacache.

<sup>9</sup> Chaen techu nitohaneein cana belaitohane jaun, cana que nii asinojoneein nena niicha ichaneni niicha coacui coitucuerate.

<sup>10</sup> Inae cuu tihane banate, nii aitiin coaualune rijijiein nii naitoonjoan nainain, satiin nere tonoraauruha chauratane que nenacaauru, dedeeu nenacaauru, naaonjoain urine coina satiin curuaanaaneein rai Calaohi terein Cana Coanera.

<sup>11</sup> Acate cana janiin cana raain nelu, rai Calaohi Jesocurisito aina cuaain rai calaohi rijijiein cana que banihaatein niicha rucujuei tiha nii coausihalune rijijiein, niicha jerei ichaane coina.

12 Nitohaneeinte jauriaanejeein cana raain nelu Cana Coaunera, rai Calaohi Jesocurisito esenetaain queecha jaaequiin ichaohacachene, cana ichao coaraain, niicha ichai coroaecuruha cachaaaurune coina.

13 Nii rijijieein techu, esinae rauhijiriin inara osa caje nichoteriquicheeine beeuruhane aonaain, Jesocurisito esenetaain jerihane rijijieein ichaohichene jaun, rai Suujue aina cuaain rai cachanequichene cojunacate Cana Coaunera, nitohaneein ichaane coina aitohalune rijijieein.

14 Rai Suujute nii cana que banihateein niicha rucujuei tihane jaan rarichaacheeinne cojunacaneein ne. Nitohaneeinte ichareein Cana Coaunera, satiin nosa caje ichoteratenojoniha rai cachaneein neenihurune coaraain, itolere ichana nainihane coitucuhin coroaecuruha cachaaaurune coina.

*Coitucuurera rai, cha coitucuuruhane jaanu tiha Cana Coaunerane coina bajaa Faborone.*

15 Nitohanihane jaunne, Cana Curuaanaa Jesocurisito esenetaain, satiin Cana Coaunera cachaneein nenacaauru aina ita belaaain neeichene coitucuhanune jaun,

16 inara coreniha bajaanune naineein inara coacuhin, Cana Coaunera coroaenajacoon.

17 Cana Curuaanaa Jesocurisito Inaca necaohachaaain nena Cana Coaunera cajene bajaaun, inara rai inara suujue cuhane chacoitucuhin neeichene jaanu tihane, nii caje inara aina niicha ichana jerei coitucuhin, jelai amuritoheriin Acanihane coitucuhin neeichene coina.

18 Chaen nechu, "Naaonjoain cohajihacachene cointate cana raain nera," naain coitucuhichene coina inara suujua que coitucueratiha Cana Coaunerane coina caje bajaaun. Jataainte itolere caohacha amurijiriin necaohachae satiin rai cachaneein nenacaauru que banihateein niicha rucujuei.

19 Nii rijijieeinechu chabana satonoelanaala nena niicha ichana nainei ichaain, esenetaeraneein nena coina ichaane coitucuhichene coina caje bajaaun.

20 Nii jeelai jataain laraajiin mijjainetiin nena niicha ichana naineite coaratelu, o caje rai Calaohi Jesocurisito ichateein que jauriineein tein,

21 itolere cocoainanacaihuri, curuaanaacuru, naaonjoainuri amurijiriin cocoainanacaineein niha ena janonaa que, chaen nii baiha neeni janonaa que, naaonjoain quene coina.

22 Nitohaneein itolere curuaanaaneein Jesoso cocoaainante, satiin niicha ranojoihunru, rai cachaneein nenacaauru iclesia curuaanaaneein telu, acauru suujua raujaeraneein nihane coina.

<sup>23</sup> Nii jaunte, satiin niicha ranojoihunru- rai jaberoco iclesianeein neeuruhane jaun, itolere que Jesocurisito corihaneraneein neure. Nii Jesocurisito corenihate ne satiin itolere. Nihei colane nenea nainihei itolere cautene rijihuru.

## 2

*Jataain cana belaiha Cana Coaunerane corenihate cana osa caje nichoterichaacheein*

<sup>1-2</sup> Jauriaalute, ichaauruha cana rai chauratane sacutaain nenacaauru cachaurune rijijieein, baaso ichaechajeein osaque nesarujueein ichaohichene jaun, nitajenaaneein nerejetocoichelu, Cana Coaunera coitucunaa jeriheichuru suujua saruera moconajaera inara suujua saruhane rijijieeincha ichaohichene jaun.

<sup>3</sup> Nitohaneeinte jauriaa joareein cana suujua letono rijijieein, baaso ichaechajeein jerichaachene rijijieein ichaorejetocoaachelu satiin. Nii jerichaachene rijijieein, cana suujua letononeein baaso ichaechajeein, osa que nesarujueein ichaohacachelune jaunte niqui, cana casetecaane rai nelu Cana Coaunera.

<sup>4</sup> Nete jataain cairichaaajoaain cana coaraain cana belaihanee jaun, nii osa que nesaruhin inae nitajenaa neein nihaachene jana,

<sup>5</sup> rai Calaohi Jesocurisito aina cuaain, cana osa caje cana coulucohin nelu Cana Coaunera, chabana nitajenaa charanejeein nenea ichaonaa que ichaohin nenea nainichaachene coina. Jataain caohachanijihane jaunte, inara osa caje nichoteeichene jaanu terate inara rai.

<sup>6</sup> Nii jeelai Acate, inae ohacachene bana, nitaje rai niha cana suujuene jana, o caje rai Calaohi Jesocurisito ichatihane jiniichaain cana suujue ichateein raain, rohan cana suujue lauriaelu dedeeu.

<sup>7</sup> Nitohaneeinte ichaelu, caa baiha rai Cojoanonaa neeni que neein jataain cana belaiha rai Calaohi Jesocurisito aina cuaritaainne coitucunojoneein nihane coina.

<sup>8</sup> Inara belaiha Cana Coaunerane jaunte nii esenetaaichene jaan aina cuaain nii nichoteeichene jaan raain neeiche. Nii jaun coatiha inara raajenihane inaraacha eruineein nihei. Acate inara rai Cana Coaunera tenojoneein ne.

<sup>9</sup> Coatiha inara raajenihane inaraacha ichai que nii inara osa caje nichotiheeiche. Niicha ichoteratenohineeinte nii inara osa caje nichoteeiche. Nii jaun nainiheeiche inara raajenihane, nii inara osa caje nichotenaan rijitiin, nii que ereein necohasitaachene.

<sup>10</sup> Acate rai Calaohi Jesocurisito aina cuaain cana coaanaain nelu, coujuriu rai cachaneein, aca- Cana Coaunera

nihane corojeein, ita belaa'in, chaaelai lateein neeuruha leeochoaurune, acaauru coroatajane'in, naaonjoa'in nii inoaenlu coa'ausihalune rijijee'in nihacachene coina.

*Jesocurisito corenihate, leeochoanee'in nii chuni coaraelanaala ita aina raotojoe'in nihacache*

<sup>11</sup> Inara Jorionene'eichene jaunte, "Jaberoco cari moloelanaala nenacaauru," naain inara curuaate'eure Jorioocuru. Jana acaauru Jorionecuruhanete, rai jaberoco cari molooruhane jaun: "Canate laen, Jaberoco cari moloorera neein curuaacaache," naain raaje necurujuatecure.

<sup>12</sup> Esinaente chuhisi jauriaalu, inara Jorionene'eichene jaun, Jesocurisito cachanee'in nenea nainelanaala, niheichu Isaraelitacuru rene turuhin, ita rai ereein, naaonjoana nainerejetene'eichelu, nii que coacuhin neeuche. Chaen techu, nii niicha ichanenu naitoonjoan tenaa nainenelu inara rai Cana Coaunera, inara que jaolecohane jaun. Nii jaunte colane nenea rijijee'in, inara coroatajanerihanine cohana coacuelanaala nitajenaanee'in neeichelu.

<sup>13</sup> Nete satiin coreniha ohalu rai Calaohi Jesocurisitone jaun, nii rai coichana aina cuaa'in coreniha atiin Jorionene'eichene saijee'in inara raain ne, inara netonai esenetaaichene jaun.

<sup>14</sup> Nii Jesocurisitote, canacaanu Jorionichaanune, inara Jorionene'eichene aina ita que nejeratenaanee'in ita coarajenaa caje, ita jaberoco que jaberoco'naa rijijee'in raotojoe'in ita belaa'in, ita coroatajane'in, naaonjoa'in nenea coina, nii ita que nejeratenaanee'in nihacachene jaan itajee'in, lelaurijiei caje nenea rijijee'in rai cachanee'in cana te.

<sup>15</sup> Nitohane'einte nii tonora'a'in niha cachane coina nenea rauhi cache relaalune jaan itajelu nii Jesocurisito. Nitohane'einte, le laurijiei caje nenea rijijee'in cana raain ne, jiniiquiin raotojoe'in neein le laurijee'in rai cachanee'in nenea coina.

<sup>16</sup> Canacaanu Jorionichaanune, inara Jorionene'eichene aina lenoneein, inara loreri asaa'e turunaa nainelanaala, naaonjoa'acaanune janate, coroso que ohin nii itajee'in, jiniiquii raotojoe'in Cana Coaunera cachanee'in nenea coina, ita jaberoco que jaberoco'naanee'in cana te Jesocurisito.

<sup>17</sup> Nitohane'einte Cana Coaunera cachanee'in nenea nainene'eichene caje, coreniha inae canacaanu aina jiniiquiin rai cachanee'in nihacachene coina, cana rai nii enachasine ichaonaa que ichaorichaache'eine bera Erenaa Raotono turu'aelu Jesocurisito.

<sup>18</sup> Jataa'in caohachate ichae cana rai Cana Coaunera, rai Calaohi Jesocurisito aina cuaa'inte coreniha Jorioniheichuru,

Jorioocuru, leochaauru cachaauru, naaonjoaihunru aina leinjiin rai Suujuecha coreniha rai inaca Cana Coanera rene turunaa nainichaache satiin.

<sup>19</sup> Aihane jaun inae enene nejelau natane edaa ichaonaa cacha rijijieein niheeiche. Inae inara netonaite, aihuruha Jorioocurune rijijieein ne inara rai rauhi. Jerichanejeein rai cachaneein neeuruha Jorioocurune rijijieeinte, inara netonai, rai cachaneein neeiche.

<sup>20</sup> Inarate loreri ichacuruha icharaaurune rijijieein, loreri ichanohi rijijieein neeiche. Nii jaunte, nii loreri nunuheneein nena ajeri rijijieein neeuruha Jesocurisito cocoinanohichuru afosotooru aina *profetacurune* jana, inara acaauru ichoae tenojoineein neeiche. Jana Jesocurisitote, nii loreri ichoae satononiha nunaera aina janori bucuneein ne.

<sup>21</sup> Charijieeinteinti loreri jaane, jauriaanejeein anesijia temuhin jitaain bucutejeein loreri besautiae ichara. Nii rijijieein techu Jesocurisito ranojoinichaachene, inae satiin jiniiquiin rai cachaneein nihacachene jaun Cana Coanera loreri rijijieein nihacache.

<sup>22</sup> Nii rijijieein techu Jesocurisito ranojoineein rai loreri Teenforo rijijieein neeichene jaun, inara suujue jana ichoae Cana Coanera Suujue.

### 3

*Jorioniheichuru rai Cana Coanera ere beebejihane coina letononiha Faborone*

<sup>1</sup> Nitohaneeine canu Faboro nichaanne, Jesocurisito coreniha caresero cuhane neeun, inara Jorioneneeichene rai caohachanuque.

<sup>2</sup> Inae coitucuhichene rijijieeinte, jataain inara belaihane jaun, nii inara rai caohacha icharichaaaine beebejeranu que canu tein nelu Cana Coanera.

<sup>3</sup> Acate canu que nii asinojoineein coitucueraelanaala nena niicha ichanenu coarateein coitucuerate, nii inara rai been laenacaanne rijijieein.

<sup>4</sup> Inae ereretaain coaraquichenete, esinae rauhijiriin Jesocurisito aina cuaain Cana Coaneraacha ichaneni asinojoineein nena coitucuhanune coitucuriquicheein.

<sup>5</sup> Coatiha niqui nii chuni que nii coitucuerateein niheilu jauriaa. Nete inae enene rai afosotooru, rai *profetacuru*, naaonjoainuri que coarateein coitucuerate rai Suujue aina cuaain Cana Coanera.

<sup>6</sup> Niicha ichaneni asinojoineein coitucueraelanaala nena niicha coitucuerateite, nii osa caje cana ichoteraanuneein nena esenetaauruha Jorioniheichuru netonaine jaun, inae

acaauru netonai Jorioocuru rai niicha teeni raauruhane rai neeure. Inae acaauru netonai, rai jaberoconeein neeuruhanane jaunte, rai Calaohi Jesocurisito aina cuaain niicha teeni eroraneein neeureein.

<sup>7</sup> Jataain baaso ichaechajeein ichaorejetocooaunne saijeeinte, itolere ichana nainihane jaan ichaain, quichao coreein, niicha ichanenu beebejihanune coina canu telu Cana Coaunera.

<sup>8</sup> Nitohaneein leeochoaauru, rai cachaneein nenacaauru amurijiriin baasoneein chaque nelatenihanune saijeeinte, canu janijiin canu cocoainaan Jorioniheichuru rai janiinacajelanaala caohacha icharihani Jesocurisitone que, caohati erenaa beebejihanune coina canu raain nelu.

<sup>9</sup> Chaen techu niicha ichaneni itolere bana coitucueraelanaala asinojoneein nenea coarateein, inara que coitucueratihanune coina caletoe nii itolere Coauneranein nenea Cana Coaunera.

<sup>10</sup> Nitohaneente ichaelu, ena caje coauneein janijiin niicha ranojoihunru aina cuaain, itolere niicha coitucui ichana nainihane coaracuruha dedeeu mijiainetiin nenacaaurune coina.

<sup>11</sup> Cana necoaauna ajiniha caje coauneein, chabana sato-noelanaala inae nitohaneein icharihanine coina coaushalune jaunte, nii coaualune rijijieein rai Calaohi Cana Curuaanaa Jesocurisito aina cuaain ichae.

<sup>12</sup> Nii jaunte rai calaohi Jesocurisito aina cuaain inae reneturunaa nainerichaacheein, tonajelanaala acanihanane esenetaacachene jaanu teranihanane coitucuhin.

<sup>13</sup> Nii jaun nainiheeiche, inara coreniha caa caresero cuhane nihanune que nererojoecaain, inara relaunune jaan rijijieein neeichene jianeein neeichene, nenacaaenejia inara rai caohacha ichaane ainun, que nelararajiaain neeichene coina.

*Naaonjoaainte cana belaita Cana Curuaanaa Jesocurisito.*

<sup>14-15</sup> Nii corenihane, satiin rai cachaneein dedeeu, caa cana rai chauratane que, naaonjoaain laurilauri neinichaachene Inacanein nenea Cana Coaunera bajanajacoon neseonri-aain.

<sup>16</sup> Jerichanejeeinnechu inara rai, Suujue aina cuaain chachana naineein laraajiin neeichene coina, acaihaniji rai jataain caohachaneein nenea tiha inara suujuaune coina Cana Coaunera bajaun.

<sup>17</sup> Chaen inara suujuau ichaonaa nainiha esenetaaichene coreniha Jesocurisito Suujuene coina, nitohaneein nii jataain inara belaiha Jesocurisitone esenetaain, jerihane rijijieein neein sacuhichenete,

18 satiin esenetaeraauru aina jiniiquiin, naaonjoaain itolere cautenu rijihuru ichaa cana belaiha Cana Coaunerane coitucuriquicheein.

19 Nitohaneeinne jataain coitucunaa nainichaachene amuritoheriin cana belaiha Cana Coaunerane coitucuhichene coina Cana Coaunera bajaaun, Aca Acaneein nihane coitucuhin, Acaacha cohajeein queecha jaequuin neein leocha coacuelanaala Cana Coaunera ainaacha neeichene coina.

20 Aihane jaun, Acaneein nihane coitucuhin Aca coroaacaachenete ne, jataain coaaucaachene amurijiriin cana aina cuaain itolere niicha ichana nainei ichana nainihane jaun.

21 Jerichanejeein chu coroaecuruhine, rai Calaohi Jesocurisito aina cuaain niicha ranojoihunru cachaauru, cana janonaa besaute que turuhanereein tiaain. Nitohanemiin.

## 4

*Cana Coaunera Suujue aina cuaain ita jaberoco que jaberocona rijijieein neeuche.*

1 Nii jaunne Jesocurisito coreniha cau caresero cuhane netiin atiin inara rai aitoon, esinae rauhijiriin caohachaain inara suujua coaraain Cana Coaunera ranojoneein neeichene jaun nitohaneein ichaaoche.

2 Leeochaauru amurijiriin nenea coacuelanaala, leochaauru belaaain, chatohanai ichaa chunocoha inara leochaaurune niha natiin que inara suujua acateein abaantaain, jiniiquiin ita belaaain neeuche.

3 Atiin rai Suujue aina cuaain inara coroatajanihane aina, itolere bana jiniiquiin ita suujua rijijieein coacuhin jataain raotojoein neeuche.

4 Leinjiin Jesocurisito jaberocohachate iclesianeein ne. Jerichanejeein techu leinjiincha ne Cana Coaunera Suujue.

5 Leinjiin Jesocurisitohachate Cana Curuaanaa ne. Leinjinchate ne cana osa caje cana ichoteraanu canaacha esenetai. Jerichanejeein techu leinjiincha ne cana coulucohin cana cojunacatecuruhane jaan baotismo.

6 Nii rijijieein techu leinjincha ne Cana Coaunera, satiin Inacaneein, satiin ichoae neein, satiin suujue cuhane neein aina cuaain itolere icharaneein.

7 Nete laen tenaa jerihane jaancuru rai le cachanichaachene nainetiin aina cuaain cana que niicha icharatei ichaain nihacachene jaanu te.

8 Nii quete:

“Dedeu cuhinte jiniichaain caseteconein nenacaauru amaain, cachaauru que niicha icharatei ichacuruhane jaanu te,” naain belu rai Quiricha Inoaensi cuhane.

<sup>9</sup> Nii Dedeu cuhalune que aitothane jaante, jauriaanejeein cana rai chauratane que turuhin nihalune baiha, jelaiha cuhalu dedeeune que aite.

<sup>10</sup> Nii jeelai dede caje unaate, jelaiha dedeeu cuelu, Aca acaneein itolereneein dedeeu netonai Acaneein nihane coarati-hane coina.

<sup>11</sup> Acatechu, tabaauru sacuureraauru cocoinae afosotoneein curuaatenajaain. Jana tabaaurute cocoinae *profetane*ein, jana tabaauru nosa caje jianacoo neeururichaaain cachaaurune beraneein, jana tabaauru esenetaain rai cacha-neein nenacaauru beraicha fastoroneein cocoinanajaen, jana tabaaurute acaauru relaeranuune que cocoinae.

<sup>12</sup> Nitohaneeinte acaauru relae ita belaaain ita coroataja-neein neuruhane nefaa rai jaberoco iclesiane coina,

<sup>13</sup> jerihane rijijieein, jiniiquiin ita suujua rijijieein coacuhin niicha ichanenu ichaane coitucuhin nihacachene coina. Nitohaneein nihacachenete laen, esinae rauhijiriin itolereneein jiniiquiin canaacha esenetai aina ijiin, aiha Jesocurisitone rijijieein nerichaacheein.

<sup>14</sup> Inae laen aihuruha canaanainurune rijijieein, joaereein cana suujua letonoacha ichajeein, joenreein cana relaera esenetaelanaa neein nechu jataain baaso que cana coritana jeriha cachaauru baasoneein ichaonacaurune nihanatiin esenetaaacacheein.

<sup>15</sup> Nenacaeneeintejian caohachae, esinae rauhijiriin ita suujua rijitoejein, ita rai ereerejeein, jeriha Jesocurisitone rijijieein ijieein ichaohacachene caohachae, aca cana suujua temura rijijieein nihane jaun.

<sup>16</sup> Nii jaunte rai jaberoconein nena rijijieein neein ita suujua rijijieein coacuhin raotojeein nihacache. Nitohaneein neeinte, cana rai niicha tei aina cuaain jiniiquiin canaacha ichana nanei ichacaachene aina raotojeein ijiin nihacache.

*Jesocurisito ainate, enachasine ichaonaa que ichaohacache.*

<sup>17</sup> Atiin Jesocurisito corenihane, caa que inara rai erenaa jereen. Jiaonriha inae nenacaaen aihuruha, Cana Coanera coitucuuruhine rijijieein ichaohichene. Acaaurute joaereein suujua letonohacha ichajeein, niicha ichai coitucuelanaa chachaain neeure.

<sup>18</sup> Nii jaun coatiha niicha tei ichaonaa que ichaauruhi baasohacha coauca acaauru suujuane jaun, nii niicha tei ichaonaa que jaolecooruhane jaun.

<sup>19</sup> Nitohaneein nauhacaa acaauru suujuane jaunte, inae ichaonaa baaso que ichaohin, rai nichao colalajilanaala itolere baaso ichajeein ichaaoore.



20-21 Nete laen inara nabana nitohaneein ichaohichene coataa, Jesocurisito coitucuhin neeiche, esinaen rauhijiriin naitoonjoan aonaain tonoraain neeuche.

22 Aihane jaun nii jauriaanejeein inara ichao, nechuh inara coritaa inara suujuane sacuha baaso ichajeein ichaohichene jaan jianeein ichaaoche.

23-24 Inarate inae nainequiche inaraacha coacui coreein, inara suujue coreein, naaonjoain ichaohin, nii ena jerihane rijijieein ichaohichene coina Cana Coaunera tenojoin ichaonaa que ichaohin, inae esinae rauhijiriin ichaonaa esine que ichaohichene coarateein neeichene caohachae.

25 Aihana jaun inae ita jaberoco que jaberocooa rijijieein nihacachene jaun, le cachanequichene inae nainiheeiche inara amute cacha coritaaichene. Chaelai que erenaa jeriquichene, esinaen rauhijiriin nohanelanaala aitocuche.

26-27 Jiaonrihachu ita que nejerateein ita sonaa coacuhin neeichene. Itaque nejerateeichene nii rijieoritiin baitecuche. Coa inara suujua cuhane enoha moconajaerane jaanu tera tocohaneein sonafaajeein obaaecache.

28 Asijiautoneein ichaorejeti, asijiauhane jianeein amihaneete, chaelai sirijieecane, chalateraauru rai chaelai tenaa nainemii.

29 Jiaonriha erenaa baaso que ereeiche leeochoaauru raine. Erenaa caohacha nejesina que ita rai ereeuchete, caohati erenaa que aitocoichene aonaain, jeelai amuritoheriin esenetaain tonoraain neeuruhine aohanraauru cachaauru.

30 Inae ecu tihane bana, inara osa caje nichoteeichene coina jelai teein rai cachanequichene jaan cojunacaneein inara cojunacatiha Cana Coaunerane jaan rai Suujue nocoeje chanuera tocohaneein nenea nainiheeiche.

31 Jiaonriha obajeein, ita cotaairiin, ita que nererojoe-caeriin, leeochoaauru que ereein, naaonjoaain neeichene.

32 Charijieinteeinti Jesocurisito coreniha, inara osa que suujua acateein ne Cana Coaunera, nii rijijieein ita que inara suujua acateein, jiniiquiin ita belaaain ichaaoche.

## 5

*Chatohaneein nainere ichaoha Cana Coaunera cachaaurune.*

1 Jataain inara belaaain rai calaohineein teein inara raa Cana Coaunerane jaun, inara netonai belaaain naitoonjoan tonoraain ichaaoche.

2 Charijieein teeinti rai coichana aina cutaain jataain cana belaihane jaun chaelai jujui mocohin que Cana Coaunera belaihuruha saseredotecurune rijijieein cana coreniha rai

jaberoco telu Jesocurisito, nii rijjijeein inara coichana aina cutaain jiniiquiin ita belaaain ichaaoche.

<sup>3</sup> Inae inara, rai cachaneein neeichene jaun, inae naini-  
heeiche leeocho ene coacuhin, niheichu que ninichaajeein,  
erenaa baaso que ereeein, inaraacha lateeicha que coacuhin,  
barijjiitiin, naajoain ichaonaa nainiheeiche.

<sup>4</sup> Jiaonriha erenaa baaso que ereein neeichene. Coatiha  
cha que nelatejeehai niritiin iriha cachane. Nenacaaentejian,  
niritiin erenaa coacuelanaala, Cana Coaunera coroaajeein  
ichaohichene caohachae.

<sup>5</sup> Inae coitucuhiche, sinijeranelanaala nenea ene aina  
ichaohin, erenaa baaso que ereein, niicha lateeicha que  
coacuhin, barijjiitiin ichoae, nii Cana Coaunera aina Je-  
socurisito Cojoanona que ichaonaa nainihe.

<sup>6</sup> Jiaonriha rai suujua caje rocohin joaenreein inara rai  
chaque iriha cachane tonoraain neeichene. Nitohanein  
joaenreein rai suujua caje rocohin erenacaaaurute, raujiaer-  
ilanaala casetecareein Cana Coaunera, rai aitoonjoan ton-  
raelanaala que jaolequuin aitocuruhane coreniha.

<sup>7</sup> Aihana jaun acaauru rijitiin ereein, acaauru rijjijeein  
ichaonaa nainiheeiche inae inara.

<sup>8</sup> Inae nocohena tabai jana nenea rijjijeein ichaorejeto-  
coichelune caje, ena Jesocurisito esenetaain naitoonjoan  
tonoraachene jaunte, inae nii nocohena caje jianacoon ena  
ichaohiche. Aihane jaun cojoeriu jianacoon ichaohichene  
coarateein,

<sup>9</sup> chaaelai lateein neeuruha leeochoaurune acaauru  
coroatajanein, esinae rauhijiriin baaso ichaelanaala,  
niheichu nohanelanaala, naaonjoaain ichaaoche.

<sup>10</sup> Atiin Cana Coaunera jerenohicha ichajeein ichaaoche.

<sup>11</sup> Jiaonriha nii nocohenaanau nenea rijjijeein, chachaer-  
aauru cachaauru rijjijeein ichaohichene. Acaauru rijjijeein  
ichaonaa coacuelanaala, nii nocohena caje acaauru mi-  
taauchete, acaauru netonai jianacoon mituhin, niicha ichai  
coaraain coitucuhin ichaauruhine.

<sup>12-13</sup> Jataainte coejenacaaain benacatochoelanaala niha-  
natiin, asinojoneein chachaaain neeure. Nete inae nii no-  
cohana caje mitanajaaichene jianacoon neeuruhane, jitariin  
niicha ichai coitucuhin coaraain neeureein, inae jianacoon  
nocohana caje mituhin neeuruhane.

<sup>14</sup> Nitohanei que tejian:

“Sininaa rijjijeein neeichene caje  
inara nota jirichaauche.

Ohin nitajeeichene rai neeichene caje  
Jesocurisito aina ichaaochete,  
inara que itolere coarateeinete,

coaraain coitucuhichera,”  
naain ne erenaa.

<sup>15</sup> Aihana jaun chatohanei ichaquichene que necohalajiin neeuche. Jiaonriha chacoitucuhi cacha rijijieein ichaohichene, itolere coitucuhin, itolere que nainaan ichaaoche.

<sup>16</sup> Atiin necohalajiin neeuche, jataain baasoneein ichaonacaauru cachaauru cataaun ichaohichene jaun.

<sup>17</sup> Jiaonriha chacoitucuelanaala nenacaauru cachaauru rijijieein, joareein chachaain nenea coacuhin neeichene. Atiin jeriha Cana Coaunerane rijijieein inaraacha ichai ichaain ichaaoche.

<sup>18</sup> Jiaonrihachu ajeichene, nabana ajenaacha que coacuhin baasohacha ichajein ichaohichene, inara ichao aasajein neeichene coataa. Nenacaaen tejian, ajenaa coacuelanaala Cana Coaunera Suujue jerenohi nejesinaacha que coacuhin, jerihane rijijieein ichaohichene caohachae.

<sup>19</sup> Nejesinajein ita rai salmo beebejein, nenatenanaja que nenatein, inara suujua aina cutaain Cana Curuaanaa coroa-  
jein rachoojoeuche.

<sup>20</sup> Itolere bana Cana Curuaanaa Jesocurisito aina cuaain, Itolere Inacanein nenea Cana Coaunera coroaecuche itolere niicha tei coreniha.

*Raotojoein sinijiera aina ichaauruhine Jesocurisito rano-  
joihunru.*

<sup>21</sup> Jesocurisito que inara suujua acatequichene coara-  
teen, jiniiquiin ita suujua rijijieein ita belaaichaa. ichaaoche.

<sup>22</sup> Enecuru nihanatiin jeriha Cana Coaunerane rijijieein jerecuruha acaauru lanaaurune rijijieein neeuruhine.

<sup>23-24</sup> Charijieein teeinti niicha ranojoihunru iclesia neein nenacaauru coturineein niha Jesocurisitone jaun, rai jabero-  
conein itolerenein jerihane rijijieein neeure niicha rano-  
joihunru, nii rijijieein rai sinijiera coturineein neeuruhane  
jaun, rai lana jerihane rijijieein nere tonoraain ichaauruhine  
enecuru. Nii jeelai Jesocurisito techu, nii rai jaberoconein  
nenacaauru iclesia ichoterateranein ne.

<sup>25</sup> Charijieein teeinti rai coichana aina cutaain, jataain ni-  
icha ranojoihunru belaihane jaun, acaauru coreniha rai jabe-  
roco telu, sohin jaaoruhane coina Jesocurisito, nii rijijieein  
rai coichana aina cutaain sinijiera jerein belaihuruhine  
acaauru lanaauru.

<sup>26</sup> Nitohaneente niicha ranojoihunru coulucoelu rai  
naitoonjoan aina cuaain, acau que camujuaain,

<sup>27</sup> esinae rauhijiriin niicha ranojoi iclesia neein, jelai tein  
rainein que banijiaain necaohachaaain osa colane neeu-  
ruhane coina.

<sup>28</sup> Charijieein teeinti ii rai caohachanu ichaain neei, nii rijijieein ii comasai rai netonai caohacha ichaain neeu. Rai comasai belaaain ichoai cachate, raaje rai caohachanu ichaa aicheein.

<sup>29-30</sup> Nihei chuni raajenihane rai jaberoco que nejera-teen nei. Nitohaneein nenea coacuelanaalate, raotojoein lenoneein, rai jaberoco colalajiin ichoae. Nii rijijieein techu, rai jaberoco rijijieein neeuruha niicha ranojoihunrine jaun, acaauru colalajiin ichaolanajaen Jesocurisito. Canate nii jaberoconeein nihacache.

<sup>31</sup> Nii quete:

“Nii jaunte rai inaca aina rai neba naaonjoain ratiriin, rai sinijiera raain nereein cacha, ita jaberoco que jaberocanaa rijijieein neeuruhane coina,” nae Cana Coaunera Quiricha cuhane.

<sup>32</sup> Niite asinojoin rijijieein nihane jaun, coitucunaa nainene chuni. Nene laen canu, aiha niicha ranojoinunru iclesia aina Jesocurisitone que aitoon.

<sup>33</sup> Aihane jaun le cachaauru rai jabereco belaihane rijitojoein rai sinijiera belaaain neeuruhine. Enecuru netonai rai lana que suujua acateein, niicha jerei rijijieein neeuruhine.

## 6

*Inaca ere tonoraain ichaaoruhine acaauru calaohichuru.*

<sup>1</sup> Ranunacuru, enamanaacuru, naaonjoaineeichene, Cana Coaunerane belaaichene rijijieein inara inacaauru belaaain acaauru ere tonoraain neeuche.

<sup>2</sup> Jauriaa nejeein tonoraain ichaoha cachane, rai tihane coina Cana Coaunera aitoonjoate: “Ii inaca, ii neba, naaonjoainuri belaihu Cana Coaunera belaaaine rijijieeine,

<sup>3</sup> raotojoei ichaonaa que nerausiaaejeein ichaohi,” naain ne Cana Coaunera Quiricha cuhane.

<sup>4</sup> Aihana jaun, inara acaauru inacaneein, inara belaaain inara relaa Jesocurisitone rijijieein, inara bereecuru baijiaelanaala belaaain, chatohanei ichaane coataa suujuateein relaauche.

<sup>5</sup> Nii rijijieein chu caa cana rai chauratane que acaauru fatorooneein nenacaauru ere tonoraain, que suujua acateein, amurijiriin nenea coacuelanaala, que asinojoneein cha coacuelanaala, naaonjoaain neein letoaane jaan ichamiin rai cacha, Jesocurisito rai ichaane rijijieein.

<sup>6</sup> Cojuriu Cana Coaunera cachaneein neeichene jaun, jerihane rijijieein inara fatoroon icharatenohin ichaain neeuche. Jiaonriha nechu inara aina caohachaaain nihane coina, notaracaaecha caohachaaain chachaaain neeichene.

7 Inara letoaane jaan ichaquichene, jiaonriha rai ichaquichene que coacuhin ichacache, Cana Curuaanaa Jesocurisito rai ichaquichene que coacuhin, corajeen ichacuche.

8 Fatoroon cachaneein neein, fatoroon cachanelanaala, naojoaain netiin, caohacha ichaa cachane, rai cainarihani cana Curuanaa, niicha ichai rijijieeine coitucuhin neeuche.

9 Jana inara acaauru fatoroon nequichene, nii leeochangeein chuni coaraeniha Cana Coaunerane coitucuhin, nii inara que suujua acateen jeriquichene rijijieein neeu-ruha inara cachaaaurune rijijieein, inara netonai acaauru que inara suujua acateen nii chatohaneein acaauru tenaa coacuhelanaala, naaonjoaain acaauru belaaain neeuche, inae acaauru aina jiniiquiin Cana Coaunera cachaneein neeichene coitucuhin.

*Jesocurisito aina cuaain laraajihururichaaain niicha ranojoihurine.*

10 Jesocurisito aina jiniiquiin neein, nii itolere que laraajiin neeichene jaanu niicha teenu aina cuaain, itolere que laraajiin neeuche canejeraauru.

11 Nabana inara coritaa moconajaerane esenetaain neeichene coataa, que acatena nainequichene coina, inara biji achune, inara rai Cana Coaunera tenojoi que acateen tonoraelanaala neeuche.

12 Coatiha cana tocohaneein cachaneein bucuhiin nena, cana que nejerateen cana saruhin nihein. Acaaurute moconajaera letononeein dede caje uhin, nechu joaenreein baasoneein cacha saruhin, Cana Coaunera coitucuelanaala nenacaauru que niicha ichana nainei ichaane coina letononeein nena neeure.

13 Aihana jaun inara rai nitohanei acateen neeichene jaanu que, inara rai Cana Coauneraacha tei aina jatoroaain neeuchete, chatohaneein inara tenaa coaauca moconajaerane niha natiin, abaataain amuritiin neeiche. Inaen leesajeein jatoroaain neein amuritoichene, nii namuritoratena coacuelanaala neeuche.

14 Nitohaneein namuritoratelanaala, niheichu nohanenaa coacuelanaala, naaonjoaain neein esinaen rauhijiriin ichaohichene que necouhateein neeuche.

15 Itolere bana jatoroaain neeuchete, Ena Nena ichaonaaaja que jiniiquiin raotojoein neriquicheeinne coina beratenojoi beebejeeiche amuhemujuein.

16 Nii itolere caje inara ichoteratena nainera inaaraacha esenetai, moconajaera rai usi cofatojoi bujuateein caje inara ichoteratemiin.

17 Jana inara rai Suujue tenojoi rai Nere, inara biji achune neeine. Jana nii jianacoon cha ujuaihonelanaala neeichene

coina inara mitaera, inara asihoneein inara coturi bujuatera niha neeine, chatohaneein inara amuritonaa nainiha mo-conajaerane coataa.

<sup>18</sup> Itolere bana Cana Coaunera bajaebajajeein, rai Suujue jerenohin rijijieein neeuche. Itolere que nainaaain jatoroaaain inara suujua corelanaala neein, satiin rai cachaneein nenacaauru coreniha Cana Coaunera bajaauche.

<sup>19</sup> Bajaaichene naineein, atiin canu coacuhin canu rai netonai bajaauche, canu rai laraajiin ereein nihanune jaanu teeine ne, aina laraajiin ereein Aca cana osa caje cana ichoteranihane beebeje coitucuelanaala nenacaauru raite coitucuurumii.

<sup>20</sup> Acate coreenra niha canu teein rai naitoonjoan beebejihanune coina caletoaain ne. Nii corenihate caa caresero cuhane canu enoaauruhane jaun, ena caresero cuhane neeun. Chaque casilanaala, Acanihane beebejihanune coina canu rai atiin bajaauche.

*Necoiha Faborone.*

<sup>21</sup> Canu rai Cana Coaunera tenojoin amihanenaa que casuujua rijijieein cacorataanera cana nejera Tiquicote, inara rai canuhacha ichai beein, canu ichaone maajeein bereein.

<sup>22</sup> “Naaonjoaainne nihacaanu,” naain inara rai beein, inara suujua aninoaane coinane nii inara rene letoaaun.

<sup>23-24</sup> Cana Inaca Cana Coaunera, rai calaohi Jesocurisito aina esenetaain jiniiquiin ita belaaain raotojoein ichaauruha canejeraaurune jaannu teeine. Jerichanejeein chu itolere-neein, satiin belaaain naitoonjoan rijijieein jianelanaala nenacaauru canejeraauru rai, raotojoein neeuruhane jaanu teeine.

## **Filipoo nenacaauru rai Faborohacha letoai**

*Caresero cuhane neein Filipoo nenacaauru Cana Coaunera coitucuurera rai laenaa Faborone*

<sup>1</sup> Canuna Faboro neeun. Timoteeo ainane Cana Coaunera Calaohi Jesocurisito cachaneein nihacaanu. Satiin nii Filipoo neiniquichene Cana Coaunera Calaohi Jesocurisito esenetaeraauru raina caa laenain letoacaanu. Saain nii inara beraihurera ichauhenaauru, chaen nechu nii inara coroatajaneraauru- diaconooru, naaonjoainuri rai reein tiaaina caa letoaacaanu.

<sup>2</sup> Raotojoein neeichene coina, inara belaa'in inara coroatajaneine Cana Inaca Cana Coaunera, Cana Curuaanaa Jesocurisito, naaonjoain.

*Cana Coaunera Ere esenetaeraauru rai Cana Coaunera baja Faborone*

<sup>3</sup> Inara coaaucaanne naineeine, "Nariha" naaun Cana Coaunera rai inara coreniha.

<sup>4</sup> Cana Coaunera bajaanunena, rachoojoein bajaau'n inara rai, inara coroatajanihane coina,

<sup>5</sup> nunuhe caje coaune'in, Cana Coaunera Calaohi Jesocurisito Ere que cacha relaacache jiniiquiin ena netojoeina jaun.

<sup>6</sup> Rauhijiriina coitucuun, inara suujua rucujue'in coriha Cana Coaunerana jaunte, jerichanejee'in rucuhejee'in sacure'in, enacoaune'in turuha rai Calaohi Jesocurisito nere'in tiaan.

<sup>7</sup> Cacoichana aina cutaain satiin inara belaihanuna jaunte ne carai rauhi, nitohane'in inara que coaucaanne coina. Caresero cuhane nihanune janate, cacoelaain cacorataane Cana Coaunera. Chaen techu nii choae tacaain, cocoinanacaaihuri acatiha te'in cacorataane, esinae rauhijiriin jianacoo cana mitaera neein niha Cana Coaunera Calaohi Jesocurisitone que irihanune coina. Nii cacoratanihane rijijie'in inara coroatajanerichaa'in Cana Coaunerane coitucuhanu.

<sup>8</sup> Esinae Cana Coaunerate coaraje, inara belaa'in inara jeriha Cana Coaunera Calaohi Jesocurisitone rijijie'eina jataain inara belaihun.

<sup>9</sup> Jeelai amuritoheriin Cana Coaunera Ere coitucuhin, Cana Coaunera Calaohi Jesocurisito jere'in,

<sup>10</sup> nii que inara suujua coarain, inara suujua coitucuhichene coinana Cana Coaunera bajaau'n inara rai. Nitohane'in

neeichenete nenereein inara que cha, coaiteen turuha Jesocurisitone bana.

<sup>11</sup> Nitohanihanete inara coroatajanereein Cana Coaunera Calaohi Jesocurisito, raotojoein jiniiquiin ita coroatajaneein leeochoaauru aina ita belaaain neeichene coina. Nitohaneein neeichenete, caohatiin inara coroatajaniha Cana Coaunerae aina cuaaain rai caohacha ichaquichene coaraain, nii coreniha Cana Coaunera coroaeca cuurureein cachaauru.

*“Chanu nihei ohanune, jerichanetoheca carai,” naa Faborone*

<sup>12</sup> Aonacuchena inara rai erete aonaquiche. Caresero cuhanete niqui caenoaain, cacairichaaure niqui. Nenacaen tejian carausiaaeca catohaneein caetecure, nenacaen jeelai amuritoheriin Cana Coaunera Calaohi Jesocurisito Ere beebejihanu cau nenacaauru raine coina.

<sup>13</sup> Nii jaunte Jesocurisito ere tonoracaaunne coreniha, caa caseteco neein nihanune coitucuure saain Roma curuaanaa rai soondarooru, saain cau nenacaauru, naaonjoainunru.

<sup>14</sup> Nitohaneein caseteco neein nihanune coitucuuruhane jaunte, nii que nelararajiaain laraajiin nihei chaque casiirilanaala Cana Coaunera Ere beebejeeure cana nejeraauru Cana Coaunera coitucuurera cachaauru.

<sup>15-16</sup> Tabaaaurute caichoae ininaa coacuhin Jesocurisito ere beebejeeure. Leeochoaurute laen esinae rauhijiriin, suujua coaraain Jesocurisito ere beebejeeure cacoelaain cacoataanena jerena caun, laraajiin Jesocurisito ere beebejihanune coreniha cau casetecoo neein nihanune coitucuuruhana jaun.

<sup>17</sup> Nii caichoae ininaa coaauraurute, suujua coaraelanaala Jesocurisito ere beebejeeure, cacairichanaa jerena caun niqui.

<sup>18</sup> Chanu nihei caohatoha nitohanai caraina jaun. Joenreein cacha Jesocurisito Ere beebejihanena nenacaen rachoojoein nereeunni.

<sup>19</sup> Nitohanihana jaunna carai Cana Coaunera bajaebajaequichene coreniha cacorataanerihani Jesocurisito suujuene coreniha, raotojoein jianacoo miturichaaunine coitucun.

<sup>20</sup> Nii jaunna chunei que necoejelanaala nihanune jereeun. Jerichanejeein cuajejin nenacaen nauruta naurutaain Jesocurisito rijijieein nihanunena jereeun. Chanu nihei ohanune jerichanetoheca carai.

<sup>21</sup> Ichaaojihanunena jataain Jesocurisito ere tonoraera neein niha cureeunni. Jana ohanunena jian nenacaen raotojoein aina nereeunni.



<sup>22</sup> Jana ainihanena carijieein atiin ichaaojoein sacuhanunena, cana Curuaanaa Jesocurisito tenojohin amihanenaa ichana nainereeeunni. Chariji teeinti carai caohachare.

<sup>23</sup> Tabaquena ohanune luhecaun, Cana Coanera Calaohi Jesocurisito aina niha cuhanune coina. Niite laen jataain carai caohachare.

<sup>24</sup> Nete laen inara caohachanu que caohachae carijieein ichaaojoein sacuhanune.

<sup>25</sup> Aihana jaunna jaiti ichaojoeereunni, inara coroatajanichaaunne Jesocurisito ere esenetaain, tonoraain raotojoein rachoojoein jeelai amuritoheriin neeichene coina.

<sup>26</sup> Nitohanihana jaunna coaiten enacoauneein inara aina nereeeunni. Nii banate raotojoein Cana Coanera Calaohi Jesocurisito coroejeriquicheein, caohatiin cana belaihana jaun.

<sup>27</sup> Atiin coujurihu Jesocurisito coitucuera neein nenea tocohaneein, inara suujua coaraain inara ichao que ichaaoche. Inara coaraana uhene rijitoeun niqiu, nechaainti nainerichaaunni. Jana inara coaraa uhenihanune nihanatiin, jiniiquiin laraajiin Jesocurisito ere tonoraain neeuche atiin. Nii inara aina nejeratenacaauru coasijirilanaala raotojoein neeuche atiin.

<sup>28</sup> Nitohanein neeichenete chaque casineeichene coaracuruha inara aina nejeratenacaaurune, raajenihane Moconajaera rene taca cuururichaine coitucuha cuurureein. Nitohanein coitucuhinte esinae rauhijiriin Cana Coanera coreniha jianacoo neeichene coitucuha cuurureein, que acaauru notaarichain Cana Coanera jaun.

<sup>29</sup> Coatiha raujiaain esenetaaichene coinaacha jianacoo inara mitai Jesocurisito. Coreniha necairichanaane maejein abaantaain neeichene coinate jianacoo inara mitae.

<sup>30</sup> Ita rijitoeinte necairichanaa abaantaain laraajihacache. Inarate necairichanaa abaantaanulu laraajiine coaraquichelu. Nii rijijieeine chu nii inara rai beeuruhane tocohaneein laraajiin enanetojoein necairichanaa abaantaain neeun.

## 2

*Suujua coaraa Jesocurisitone rijijieein inara suujua coaraain neeuche.*

<sup>1</sup> Inaderaaichene nihanatiin inara belaaain, inara coroatajanein, inara suujua laraajiaain, naaonjoaan Jesocurisito suujuena jaun,

<sup>2</sup> ita belain raotojoein jiniiquiin neeuche, coujurihu Jesocurisito ere tonoraera neein nenea tocohaneein. Aihuna inara coaracaunne, raotojoein rachoojoein ne.

<sup>3</sup> Coa leeochoaauru choae ininaa coacuhin, leeochoaauru que necohasitanaa coacuhin nihache. “Acaaurute jian cana amuritoherihure,” naaiche neechate caohachae.

<sup>4</sup> Coa inara caohacha nuhacha que coacuhin inaraacha ichai ichaain nihache. Leeochoaauru rai netonai caohachanu quene maajeein nelateneni coacuhin ichaain neeuche.

<sup>5</sup> Charijieein teeinti suujua coarae Cana Coaunera Calaohi Jesocurisito. Nii rijijieein inara suujua coaraain neeuche.

<sup>6-7</sup> Jerichanejeein Cana Coaunera rijijieein niha natiinte, Cana Coaunera letono neein cacha neein nejanoaa natiinte, “Naaonjoaina Cana Coaunera rijijieein neeun,” naain erenelu.

<sup>8</sup> Nitohaneente nejanoaain ichauhena neein letoaa Cana Coaunerana jaun, nere tonoraain leeochoa ataibinae necoje-naachara rijijieein coroso que ohe, Cana Coaunera rijijieein nihanatiin.

<sup>9</sup> Nii jaunte satiin leeochoa cocoainanacaihuri choae jauhecotojoeriin Jesocurisito cocoainae Cana Coaunera,

<sup>10</sup> jataain cocoainanacai neein nihane coitucuhin, nere tonoraauruha saain dedeeu nenacaauru, caa chauratane que nenacaauru, saain cana asae nenacaauru, naaonjoaihunri nihanatiin nere tonoraauruhane coina.

<sup>11</sup> Jataain acaauru curuaanaanu que Jesocurisito tiha Cana Inaca Cana Coaunerane coitucuhin, “Iite Cana Curuaanaa neei, nitohanein jeriha Cana Coaunerana jaun,” naain ereeuruha saain caa chauratane que nenacaaurune coinate satiin leeochoa cocoainanacaihuri choae jauhecotojoeriin Jesocurisito cocoainae Cana Coaunera.

*Chauratane que nenacaauru rai cono rijijieein neeuruha Cana Coaunera esenetaaurerane*

<sup>12</sup> Aihana jaun, caa ena inara caje coriaae inara caje nihanune jaun, inara aina nihanune bana quere tonoraraae-tohichene amuritoheriin quere tonoraauche. Inara suujua coaraain, raotojeein Jesocurisito ere tonoraain neeuche atiin, inara casetecaa Cana Coaunerane coataa.

<sup>13</sup> Inara coroatajanerichaain Cana Coaunera, inara suujua coaraain nere tonoraain niicha jerei ichaquichene coina.

<sup>14-15</sup> Chatohanai amihanenaa que inara letoaera nihane, nii inara letoaera que chaque ere lanaala raotojoeein ichacuche, nabana baaso chaquichene inara necoejechanuha chuneine coataa. Nechu aansai ataibinae cachaauru quete laurijiraquiin neeiche. Aihana jaun coa nohanein, cacha coritaain, asijiauhin, naosateein, naaonjoaain nihache, Cana Coaunera Calaohineein neeichene jaun.

Aihute neneeine inara que tonaain baasoneein chaque erei. Cana Coaunera Ere tonoraaichene corenihate jianacoo osa que lanaala neeichene coitucuha cuurureein nii

inara curuhacaain nenacaauru, Cana Coaunera coitucuu-  
ruhi cachaauru.

<sup>16</sup> Nitohaneeinte coitucuha cuurureein, ichaonaa tera Cana Coaunera ere que ereeiche acaauru raine.

Nitohaneein neeichenena raotojoein nereeunni, coaiteen enacooauneein cau turuha Jesocurisitone, inacojoein laraa-  
jiin inara relaenihanune coitucurichaaunine jaun.

<sup>17</sup> Chanu nihei coaraain casohin cajaaoruha Cana Coaunera Ere bihanu inara raine coreniha ne. Nenacaaenna jian raotojoein nereeunni ohanune nihanatiin, atiin Cana Coaunera Calaohi Jesocurisito ere tonoraa curiquicheeina jaun.

<sup>18</sup> Nitohaneein raotojoein nihanune jaun, carijitoein caniha raotojoein neeuche inara netonai.

*Timoteo letoanaa jeriha Faboro ne*

<sup>19</sup> Jeriha Jesocurisito nena, enanecoojoa Timoteo letoaaene rijitoeun, inara coaraa uhane coina, inara coaraain chunocoha que carai beratihane raotojoein nihanune coina.

<sup>20</sup> Coatiha nihei nii Timoteo rijijiein coaaucaunne rijijiein inara caohachanu que coacuhin nei.

<sup>21</sup> Cana Coaunera Calaohi Jesocurisitohacha jerei ichana amuritoheriin acaauruhacha ichana jereeicha que coaacu-  
ruha saain nii leochaauruna jaun.

<sup>22</sup> Nii coitucuhichene tocohaneeinte caohatiin cacorataane Cana Coaunera Ere beenaa que nii Timoteo, Fojiara coroota-  
janiha rai calaohine rijijieinte cacorataane.

<sup>23</sup> Cha teeinti ichacurureein caniha cocoinanacaihuri. Inae nii coitucuhanunena letoaaene rijitoeun, inara coaraa uhane coina niqui.

<sup>24</sup> Jeriha Cana Curuaanaanena, canu netonai inara coaraa ureeunni enanecoojoa.

<sup>25</sup> Caraita caohachare nii cacorataaneraannu que inaraacha letoailu cana nejera Efaforoto letoaanu ichoaichaniane. Acate laraajiin cacorataane camijianeeo que.

<sup>26</sup> Cunaitihane coitucuhichena jaunte, nii que suujua rohecaaeeriin nihana jaun jataain inara coaana jere.

<sup>27</sup> Esinaete chuhisi rauhijiriin banejelanaala ninauhene neein cunaitelu niqui. Nete cairichaaajoaain coaraana jaun rautae Cana Coaunera. Coatiha leinjiin acaacha cairichaaajoaain coaraai Cana Coaunera, canu netonai nihanatiin techu cairichaaajoaain coaraana jaun rautae Cana Coaunera, ohane ena amuritoheriin jataain inaderaain niha-  
nune coataa.

28 Nii jaunna letoanaa jereun, luhecotariin turuhin inara coaraa uhane coina. Inara netonai coaiteen coaraain raotojoein rachoojoein neeichene coina. Nitoanihanena canuhetonai raotojoein niha cureeunni.

29 Inara coaraa uhane, corojeein belaa in raauche, coujurihu Cana Curuaanaa Jesocurisito coreniha ita nejera neein nena tocohaneein. Jerichanejein chu rijijieein nenacaauru belaihu.

30 Basijiin lanajeje Jesocurisito jerenohin ichaane coreniha oha ne. Inara raajenihane canu corootajane-nanaine neeichene janate, lunaa nitohanai ichana saijieein acaacha canu corootajanelu.

### 3

*Ena nena Cana Coaunera Ere rauhi que acaauru relaa Faboro ne*

<sup>1</sup> Cana Curuaanaa Jesocurisito coitucuera neein neeichene jaun raotojoein rachoojoein neeuchera chasocuru. Jauriaana inara rai laenasihunlu niqui. Nena jerichanejeein coaiteen enacooauneein caa laenaain letoareeunni, raotojoein coitucuhin neeichene coina.

<sup>2-3</sup> Coaracuche, “Esinae rauhijiriin Cana Coaunera Ere tonorana jeriquichene, inara jaberoco cari sauhichenete neere,” naain inara coritaa nii nechua aansai, jaberoco cari saurerane coataa. Nitoaneente niqui cojunacaacoaa nitohanaine coina cacha relaelu Moisesa inoaenlu niqui. Nete inae cau chauratane que turuha Jesocurisitone jaun, inae nene nitohanai, inae Jesocurisito Suujue que cana suujua cojunacatiha Cana Coaunerana jaun.

<sup>4</sup> Canuhetonaina Israeli nefoerate esine neein- Moisesa aitoonjoan tonoraera neein neeunlu jauriaa itolere amuritoheriin.

<sup>5</sup> Inae fosa janoniha nejanoaanune janate, cajabereon cari jiununuhin moloorelu, Israeli esine nichaaun- Israeli niha canu inacane jaun. Canuna Beenjamiin lauri caje nefoeratenaa neeun. Ebereeo ere quete ereeure cofiaraauru, jerichanejeeina chu acaauru rijijieein Ebereeo ere que ereeun. Canuna fariseeo neein Moisesa aitoonjoan rijijieein ichaera neein neeunlu.

<sup>6</sup> Casuujua coarihei amuneeinne Cana Coaunera Calaohi Jesocurisito ere tonoraaurera cairichaeriin nerejetoonlu. Jataainna rauhijiriin Moisesa aitoonjoan rijijieein icharaaetoonlu.

Nii jaunte caque chaque erena nainenelu chunei.

<sup>7</sup> Nitohaneente carai nelateenneein nelu carai nii Moisesa aitoonjoan niqui. Nena inae canu ichao coriha Jesocurisitona jaun, inae enene jianeun, inae nelateniha caraine jaun.

<sup>8</sup> Nitohaneeinte inae Cana Coaunera Calaohi Jesocurisito coitucuhanune jaun, carai inae nelatene, nii jauriaa carai nelatei. Cana Coaunera Calaohi Jesocurisito ere tonoraanuna jaunna jitariin nii itajeeun. Coatiha canu rai chaque nelatejeehai nii jitariin canuhacha itajei, inae que jaolecohanune jaun. Cana Curuaanaa Jesocurisito coitucuhin

<sup>9</sup> aina nihanune coreniha inae chaque nelatihei nii jauriaanejeein nena. Coatiha nii Moisesaacha aitoonjoan tonoraanune coreniha jianacoo caeterihei Cana Coaunera. Jesocurisito esenetaanune corenihate, jianacoo caete Cana Coaunera.

<sup>10-11</sup> Aihana jaunna Cana Coaunera Calaohi Jesocurisito suujua que suujuaquiin nihanune jereeun. Acaihanejein nitohaneein nihanunena coacuun. Charijiein teeinti necairichanaa abaantaain ohane caje ichanaain nelu Cana Coaunera Calaohi Jesocurisito. Nii rijijieina canuhetonai nena jereeun.

*Itolere jianeeinna satono que turuhane reentiaain laraajiin nereeunni.*

<sup>12</sup> Coatiha, “Inae esinae rauhijiriin aca jerihane rijijiein nihanu,” naain irihanune jaun aitohaaun. Nena laen Aca jerihane rijijiein sacureeunni, caa baiha rijijiein nihanune coina.

<sup>13</sup> Coatiha, “Rijijieinna inae neeun,” naanune caun aitohaaun. Itolere canuhacha icharaaetilu jianeeinna jelai choae jauhecotojoeriin laraajiin nereeunni satono que tiaain,

<sup>14</sup> Jesocurisito aina cuaain cana rai niicha teeni tihane coina cana raain nihalu Cana Coaunerane jaan raanune coina.

<sup>15</sup> Caitono tocohaneein coaaucaachenete ne, esinae rauhijiriin cana suujua coitucuhin, Jesocurisito esenetaeranein ijiin niha cana suujuane coina. Jana ainihanete, inara que nii coaratereein Cana Coaunera, inara netonai nii coaraain coitucuichene coina.

<sup>16</sup> Nete laen inae nii coitucuujiacachene rijijiein tonoraain ichaohacachene caohachae.

<sup>17</sup> Chasocuru charijiein teeinti cha ichaain neeun, nii rijijiein inara netonai cha ichaain neeuche. Chaen nii aihacaanune rijijiein nenacaauruhacha ichai rijijiein cha ichaain neeuche inara netonai.

<sup>18</sup> Inae araai saain aitocooaun. Niite jataen canu inaderajae. Atinne coaiten aitoreeunni. “Cana Coaunera coitucuhanu,” naainte niqui ere cacha tabaauru, nete satiin coreniha coroso que ohin nihalu Jesocurisitone saijiein aina nejeratanaa tocohaneein ichaaoore, joenreein necairichanaa abaantanaa nainecurenihane jaun.

19 Nitohaneein ichaonacaaurute nitajiha cuurureein, necoejena charaneein ataibinae rijjijeein ichaaoruhana jaun. Cana Coanera coacuelanaala, acaihanejein caa chauratane que nenacaauru itolereeicha que coaucuruhane jaun.

20 Nitohaneein nihaacache laen cana. Dede curuaanaa neein niha cana Curuaanaa Jesocurisitona jaunte, dede coaicha neein nihacache. Aihana jaunte enacoauneein dede caje fauha uha nii jianacoo cana mitaera Jesocurisitone coahacache.

21 Acate cana jaberoco coriha cureein culocohin rai jaberoco tocohaneein necaohacha que necaohachaaain. Itolere amuritonaa nainihane jaan aina cuaainte nitohaneein ichareein.

## 4

### *Raotojoein inetono janonaa bana rachoojoein neeuche*

1 Nitohaneein rauhijiriin Cana Curuaanaa ere tonoraauchera cacoelaichaauru chasocuru. Jatainna inara coana jereeton. Inara ainana raotojoein rachoojoein neeun, quesenetaaichene coreniha Cana Curuaanaa coitucuhichene jaun.

2 Aonacuchena inara rai aitate, acaauru rai aitocoiche. Ita aina obaejerihuruhane jianeincha, jiniiquiin ita belaijjeincha neeuruhine, nii Ebodia, Siintique, enecuru, naaonjoai-hunri coujurihu Cana Coanera coreniha cana nejera neein nena tocohaneein.

3 Nii Filipoo nihanune bana saain Culemente, leeochoauru, naaonjoain aina cajiniichaaain ichaonaa tera erena que amihaneeuruhane jaun. Acaauru curuaate inae laenanohinein ne ichaonaa tera- Cana Coanera Quiricha cuhane.

4 Raotojoein inetono janonaa bana rachoojoein neeuche, Cana Curuaanaa Jesocurisito aina neeichene jaun. Aonacuchena coaiten inara rai aite. Raotojoein rachoojoein neeuche.

5 Aihute esinae rauhijiriin inara amute cacha belaina in-aera cachaneein neeichene coaraain inara coitucuurumiin saain cachaauru itolere bana. Inae cataainjia turuha Cana Curuaanaane.

6 Jiaonriha aansijiin laojoiiri coreniha nererojoeaache ne. Niha inara que chatohanaine Cana Coanera corojeein bajaain, rai beeuchete coitucuhine.

7 Nitohaneein ichaquichenete, inara suujua rachoojiaa cureein Cana Coanera, raotojoein neeichene coina.

Nitohaneeinte itolere cachaauruhacha coitucunojoi amurijiriin raotojoein ichaonaanaja tereein inara rai

Cana Coaunera. Nii Cana Coaunera tenojoin cana suujua rachoojiaerate inara suujue suujuatereein Jesocurisito aina jiniiquiin neeichene coina.

*Coa cajihaneein inara suujua coaracache*

<sup>8</sup> Satononejeeinne ena cuhane ichei caa que erereeunni. Coa cajihaneein inara suujua coaracache. Acaihanejein rauhi cuhane cuaain cana suujuatera erenaa que inara suujua ereein nii que coaucuche. “Leeochaauru belain, caohatiin leeochoaauru coaraain, caohatiin camijianeeneonne maajeein ichaain, naaonjoain nihanunete caohachae,” naain inara suujua tocharaain inara suujua coaracuche.

<sup>9</sup> Nii inara relaanulune jana aonaain esenetaaichelune tocohaneein neeuche. Charijieein teeinti cuu nihanune bana quichao que ichaorejatoon, nii rijijieein inara netonai caohachaaain inara ichao que ichaooche. Nitohaneein neeichenete, inara aina niha cureein cana suujua rucuhera Cana Coaunera, raotojoein neeichene coina.

*Cairicheineein nihanune nihanatiina jerichanejeein raotojoein nereeunni.*

<sup>10-11</sup> Tabiicha carajaain cacoaaquichene jaunna, Cana Curuaanaa coroejeeun. Naaonjoaainte, “Cacoaaucurenera,” coatiha naa casuujuaane caaun caitono nihei, neniha chuni letoaichene jaannune jaun, cacoelaichene jaannu coriqui letoaeneichene coitucuhanune jaun. Coatiha inara caje chaelai bajaa caitono nihei. Cairicheineein nihanune nihanatiina jerichanejeein raotojoein nereeunni. Inae nitohaneein nerelaain nihanune jaun.

<sup>12</sup> Aihanune banana necairichanaa coaraain neeun. Ai banana, chaque latijiojoi lanaala neeun. Nii jaunna itolere necairichanaa, mijitena, naaonjoaain ichaonaa que ichaonaa coitucuhin neeun. Inae nitohanei coriaanune jaunna, neniha chaelai caraine nihanatiin chaque tonajelanaala neeun.

<sup>13</sup> Jatoroaina neeun, chatohaneein caetera nihane abaantain nihanune coina. Nitohaneeinna joenreein abaantana naineen, casuujua lararajiaa cacorataaniha Cana Coaunera Calaahi Jesocurisitona jaun.

<sup>14</sup> Chaen caohachate ichaquiche, necairichaaecaaunne jana canu rai coriqui letoaain.

<sup>15</sup> Coaaquiche chachu inara netonai natiin, taolu inara ratiriin Masedoniau cuhanune bana techu, inara Filipoo Jesocurisito ranojoneein neiniquichene coaiten carai coriqui letoaaichelu. Acaihanejein inaraachete Jesocurisito que

catcha relaanune nunuhetihanune caje coaaneein cacorataanera neein neeiche, Cana Coaunera Calaohi Jesocurisito que inara relaanune cainaera rijijieein.

<sup>16</sup> Atiin Tesalonecau nihanune jana techu, coroata sai cuhane coaiten le catchaauru catchaauru caje coriqui taojijeein carai letoaaichelu.

<sup>17</sup> Coatiha cacorataaneichene coina caitono nihei. Nitohaneein cacorataaneichene corenihate jeelai choae jauhecotojoeriin nii cainaa cureein Cana Coaunera dedeeu.

<sup>18</sup> Ena cuhanena raaun latichaaunne amuritoheriin Efaforoto aina inaraacha letoai que jojohin. Nitohaneein inara suujua caje coaaneein ichaquiche Cana Coaunera notaracaana jaunte, nii coaraain rachoojoe Cana Coaunera, nitohaneein ichaera catcha rautaana jaun.

<sup>19</sup> Nii jaunte chaelai latein neeichene inara rai ecotiha cureein Cana Coaunera, Jesocurisito ere tonoraera neeichene jaun. Acaachate Cana Coauneraneein nihana jaun nitohanai ichana naine.

<sup>20</sup> Aihana jaun coanete Cana Inaca Cana Coaunera coroaeejin nihacache inoaenlunetiin. Nii rijijieein neeine atiin.

*“Inara coaauca jera Faboro,” naain beeuche.*

<sup>21</sup> Satiin nii cuu nenacaauru Jesocurisito coitucuurerera rai, “Inara coaauca jera Faboro,” naain beeuche. Cau caniha Cana Coaunera Calaohi coitucuurerate chu inara coaacure.

<sup>22</sup> Romanocuru curuaanaa loreri asaae nenacaauru netonai techu inara coaacure, saain cau nenacaauru Cana Coaunera coitucuurerera netonai techu inara coaacure.

<sup>23</sup> Inara suujua laraarajiaain, inara coroatajaneeine Cana Curuaanaa Jesocurisito.

Inae jianichaaun.



## Colosau nenacaauru rai Faborohacha letoai leinjiin

*Chatohaneein neeiche Colosau neiniquichene.*

<sup>1</sup> Canuna Cana Coaunera jerenohineein, rai Calaohi Jesocurisito letono- afosotoro Faboroneeun.

<sup>2</sup> Jesocurisito coreniha cana nejera Timoteeo aina jiniquiiine caa quiricha laenacaanu, satiin Cana Coaunera cachaneein, canacaanu suujua rijijieein Colosau Jesocurisito coreniha canacaanu nejeraneein neiniquichene rai. Cana Inaca Cana Coaunera jeelai amuritoheriin inara coroatajaneeine jiniiquiin raotojoeein neeichene coina.

*Jesocurisito esenetaeraaru rai Cana Coaunera bajaa Faborone*

<sup>3</sup> Inara rai Cana Coaunera bajaacaanune naineeine, itolere bana: “Narihara Cana Coaunera,” naain Cana Curuaanaa Jesocurisito Inaca Cana Coaunera coroaecaanu,

<sup>4</sup> aiha Jesocurisito esenetaain neein, satiin Cana Coaunera cachaneein nenacaauru aina jiniiquiin ita belaa in neeichene coitucuhacaanune jaun.

<sup>5</sup> Inae dedeeu inara que banijiaain rucuhenojoneein nena rariquicheeine cohajein neeichene jaunte, leeochoauru aina ita belaa in neeiche. Cana osa caje cana ichoteraneein nena erena caohacha aonaquichene caje coauneinte, nii inaraacha cohajei sirichaneein neeiche.

<sup>6</sup> Nii erena inara rai beratenojoite, itolere chauratane sacutaain coitucuhin, inae rijijieein ichaaore cachaauru. Charijjein teeinti esinae rauhijiriin cana belaitoha Cana Coaunera beeuruhane aonaain, esinae rauhijiriin erena nihane esenetaichelune rijijieein.

<sup>7</sup> Nii quete jeriha Jesocurisitone rijijieein inara relaa in nelu, nii jataain canuhacha belainein nena Efaforasi. Acate canacaanu amihaneon que canacaanu coroatajaneraneein, inara rai jeriha Jesocurisitone rijijieein cha ichaeranein nena ne.

<sup>8</sup> Aca techu canacaanu rai, inara suujuatiha Cana Coaunera Suujuene rijijieein leeochoauru belaa in ichaohichene benaa belu.

<sup>9</sup> Nii jaunna coituhacaanune caje coaunein jianelanaala inara rai Cana Coaunera bajaacaanu, inara que jeelai amuritoheriin niicha jerei coitucueratein, itolere inaraacha ichai coitucuhin, rai Suujue jerenohin coitucuhin, naonjoaainchene coina.

10 Nii ainate Cana Curuanaacha jerei rijijieein itolere caohacha nejesina ichaain neriquicheein, jeelai amuritoheriin Cana Coaunera coitucuhin coujuriu Cana Coaunera cachaneein nenea tocokanein.

11 Nii coinana itolere amurijiriin niicha ichana nainei aina cuaain, inara laraarajaa Cana Coaunerane, laraajiin nererojocaelanaala neeichene coina bajaacaanu.

12 Nii ainate rachoojoein, nii satiin notaracae rai cachaneein nenacaauru rai niicha teenu- rai Cojoanonaa raain neeichene coina, inara rai teranuneein nenea Cana Inaca Cana Coaunera coroequiche.

13 Cana Coaunerate, cana curuaanaaneein niha moconajaerane jana, caje cana ruluhin Cana Curuaanaa niha rai Calaohi Jesocurisitone coina rai Cojoanonaa que cana telu.

14 Nii rai Calaohi corenihate cana osa caje cana ichotera- teein, cana que suujua acatelu Cana Coaunera.

*Ohalu Jesocurisitone corenihate Cana Coaunera aina raotojoein ichaohacache.*

15 Chabana Cana Coaunera coarahaacache niqui. Nete rijijieein nenea- rai Calaohi Jesocurisito coaracaache. Acate, jauriaanejein rai Calaohineein nelu, itolere coaunaane ajiniha caje coauneein.

16 Aina cuaain techu itolere dedeeu neenihuru, chauratane que neenihuru, chabana coanojoinelanaala neenihuru, chabana inanacaelanaala itolere ichana naineraneein itolere que mijiaaanein neenihuru, naaonjoainuri coaunaeratelu Cana Coaunera. Satiin niichurute rainein nihane coina, aina cuaain coaunanojoein nelu.

17 Nitohaneeinte itolere ajiniha nenaanelu Jesocurisito. Chaen techu coreniha, Aca jerihane rijijieein neeure satiin niicha coaunaauri.

18 Chaen techu satiin niicha ranojoein nenacaauru, rai iclesia neein neeure. Nii iclesiate Jesocurisito jaberoco ne. Jana nii jaberoco coturite jeelai Jesocurisitohacha ne. Aca techu itolere ajiniha nihalune rijijieein, aca satiin ajiniha o caje ichanaelu. Nitohaneeinte nelu, itolere que satiin ichoaichateraneein nihane coina.

19-20 Jesocurisito aina itolere bana nenea jerihane jaunte, aina cuaain satiin itolere cana rai chauratane, dede, cana janonaa, naaonjoainuri que neein, que nejeratenaaneein neeuruhane caje, aina raotojoein neeuruhane coina ichaelu Cana Coaunera. Niite ichaelu, coroso que rai coichana jaohin ohalu Jesocurisitone aina cuaain.

21 Jauriaalute niqui Cana Coaunera cacha nelanaala aina inara suujua cuhane que nejeratenaaneein neeichelu, nechu baasohacha ichajeein ichaohichene jaun.

<sup>22</sup> Nete laen inae enene, aina raotojoein rai cachaneein que banijiaaanein neeichene coina, inara que suujua acatelu Cana Coaunera. Nii coinate joanreen cacha rijijieein, atinohinelu rai Calaoi Jesocurisito. Nitohaneeinte inara coulucoelu, nacatiha cha ujuaihonelanaala, osa colane neeichene coina.

<sup>23</sup> Nete nitohaneein nena jeriquichene, inara rai benojoiniha ichoteratenojoein neriquicheeine jaanune jana, aonaain esenetaaichelune rijijieein, leinjiin acaacha coha-jeein, leecha ichana coacuelanaala neeichene caohachae. Nii jeelai inara rai beratenojointe, satiin chauratane sacutaain benojoineein ne. Chaen canu Faboro nichaaunnena nii que cachaauru relaaurera coroatajaneranein neeun.

*Jesocurisito cachaneein iclesiacuru coroatajaneranein niha Faborone.*

<sup>24</sup> Ena inara coreniha necairichanaa coaracaane jaunna rachoojoeun. Nii Jesocurisito jaberoco-niicha ranojoineein nenacaauru- iclesiacuru coroatajanena quete Jesocurisito coreenraniha necairichanaa coarae cajabereeo.

<sup>25</sup> Nitohaneeinte Jesocurisito cachaneein iclesiacuru coroatajaneranein nihanune coina, canu telu Cana Coaunera, inara caohachanu que, inara rai niicha beratenojoi beebejahanu, aca jerihane rijijieeine coina.

<sup>26</sup> Nii niicha coitucuerateite inoaelu caje coaanein chuni que coitucueratelanaala asinojoineein sirilu Cana Coaunera. Nete laen inae enene, satiin rai cachaneein neinichaachene que coitucuerate.

<sup>27</sup> Nii jataain caohachaneein niha Jesocurisitonete, satiin Jorionelanaala nenacaauru que coitucuerate Cana Coaunera. Nii asinojoineein nena niicha coitucuerateite, Jesocurisitonein inae inara suujueniha ne. Acaachate cohajeeiche.

<sup>28</sup> Nii jaunna Jesocurisito que cachaauru relaacaanune, itolere niicha ichai coitucuhin ichacuruhane coina acaauru suujuatihacaanu, esinae rauhijiriin caohachaaain aca jerihane rijijieein, Jesocurisito rai tenajaacaanune coina.

<sup>29</sup> Nitohaneini amihanenaa ichacaanne coina canu lararajiaain, itolere ichana nainichaaunne jaanu tiha Jesocurisitone ainana caa niicha icharatei ichaain neeun.

## 2

<sup>1</sup> Laodiseau nenacaauru, chae inara, chaen chabana canu coaraelanaala nenacaauru- canu benaa caje cacoitucuureraauru, naonjoainuri neeichene corenihane, jataain mainajeriin necairichaaun.

<sup>2</sup> Nitohaneeinne caohachaaain rai suujua lararajiaain, jeelai amuritoheriin jiniiquin corajeein, itolere bana ita belaaain

neein, nii chuni que Cana Coauneraacha coitucueratelanaala nena- Jesocurisito coitucuhin neeichene coina jataain laraa- jihun.

<sup>3</sup> Esinae rauhijiriin Jesocurisito coitucuhin neeichenete, rai caohacha aina itolere coitucuhin neriquichein.

<sup>4</sup> Nabana chuni inara coritaa raotojoein inara rai ereein, osa que inara saruhane jana, esenetaaichene coataane caa inara rai beeun.

<sup>5</sup> Inara aina canu jaberoconein nenihanune niha nati- ine, itolere bana canu suujua cuhane inara coacuun. Nii jaunna jiniiquiin rauhijiriin inaraacha ichai ichaain neein, Jesocurisito esenetaaichene jaun, aca jerihane rijijiein ichaohichene coitucuhanune jaun jataain rachoojoeun.

*Ena nena ichaonaa teraneeinte ne Jesocurisito.*

<sup>6</sup> Nitohanihane jaun jeriha Jesocurisitone rijijiein ichao- hichene coina esenetaaichelune jaun, itolere bana aca jeri- hane rijijiein ichaaoche.

<sup>7</sup> Aihana jaun, leinjiin acaacha jerihane rijijiein inara suu- jua aina cutaain ichaohin nii acaneein nena rijijiein ichao- hichene coina inara relauruhane jaan esenetaaichelune rijijiein, itolere bana Cana Coaunera coroaecuche.

<sup>8</sup> Itolere que necohalajiin neeuche, nabana nechu joaereen nichao que inara coritaain nena jereranihane, esene- taain neeichene coataa. Nii cacha coritaeranein ne- nacaauru, coatiha Jesocurisitohacha jerei icharanein neeu- ruhi. Acaaurute nechu Cana Coaunera coitucuelanaala ne- nacaauru cachaauru ichao que cacha relaain, moconajaera icharatenohin icharanein neure.

<sup>9</sup> Jerichanejeeinte rai Inaca Cana Coauneraacha ichai ichana naineranein ne nii rai Calaohi Jesocurisito.

<sup>10</sup> Nii jaunte Jesocurisito aina neeichene jaun, rai Inaca Cana Coaunera aina netonai neeiche. Nii Jesocurisitote, itolere que laraajiin satiin Cana Coauneraacha cocoainano- joinein nenacaauru Curuaanaanein ne.

<sup>11</sup> Chaen techu inae Jesocurisito aina neeichene jaun, inae cojunacatenohinein neeiche. Coatiha rai jaberoco que cou- junacatenohinein neuruhalu Jorioocurune rijijiein nihei. Niite inae necoriha inara suujuane jaun, inoaenlu osa que ne- sarujuein ichaohichene jianein neeichene jaan cojunaca- nein rauhijiriin Jesocurisito caje unaa neein ne.

<sup>12</sup> Nii atinaain conautenojonein nihalune caje ichanaalu Jesocurisitone rijijieinte, inara atinaain inara itajihane rai niha osane caje, Curisito aina cuaain nichoteeichene cou- junacaniha acauhanau tein baotisanojonein neeichelu. Nitohaneeinte neeiche, niicha ichana nainei ichaain oo caje ichateralu Cana Coaunera esenetaain neeichene jaun.

<sup>13</sup> Inara Jorionelanaala neiniquichenete jauriaa inara jabe-roco que coujunacatenohinelanaala neechelu, jauriaanejeein nena Moisesa tenojoi rauhi tonoraelanaala nitajenaaneein neechelune jaun. Nete laen inae ena, Jesocurisito aina jiniiquiin ichaohichene coina, inara rai ichaonaa teein ne Cana Coaunera, nii Jesocurisito cana osa caje cana ichoterat-eraneein nihane jaun.

<sup>14</sup> Nii jauriaanejeein nena Moisesa rai rauhi tonoraeni-hacachene jaunte niqui, caseteco coaracaachene rai niha-cachelu. Nete coroso que ohalu Jesocurisitone aina cuaain, nii itajeein nelu Cana Coaunera.

<sup>15</sup> Nitohaneeinte Jesocurisito aina cuaain, moconajaera aina rai letononeein nenacaauru amuritoheratelu Cana Coaunera, satiin coarajeerera notaracae tenajaain.

*Itolere dedeeu nenaacha que coacuhin neeuche.*

<sup>16</sup> Aihana jaun, inara ichao que ichaohin, inara lenone que lenoneein, inara coco que cocohin, naaonjoaain neeichene, nihei chuni nii que ereein nena nainei. Jiaonrihachu nebetacanaa cojoanonaa bitoaain neein, atene ujuarichuru bitoaain, naaonjoaauruhane rijijieein ichaohichene coina inara counujeeunruhane tonoraachene.

<sup>17</sup> Nete satiin necoreereein inae ecu tihane bana. Jana Jesocurisito tenojoi ichaonaa chabana necorerinaain, niheichu chabana satonorinaain.

<sup>18</sup> Jiaonrihachu baaso ichaa inara beein, acaauru rijijieein neeichene coina, inara rai aitiin neeuruha nii Cana Coaunera letono aanjeraauru letononiha nocoetiin, acaauru notaaca Cana Coaunerane beein, nechu jeriha acaauru suujuane rijijieein ichaohin necohasitaacha que nenacaaurune tonoraain neeichene.

<sup>19</sup> Jesocurisito cachaneein rai suujua cuhane sirichureni-hane jaunte, jeriha Cana Coaunerane rijijieein, jiniiquiin neein ita belaaichahene coina cana teein niha Jesocurisitone saijieein ita caje neleruha cachane jerecure.

<sup>20</sup> Jesocurisito esenetaain neeichene jaunte, inae nii jauriaanejeein inara relauruhane jaan jianein neechelu. Aihana jaun, inae nainiheeiche ichaauruha Jesocurisito coitucuelanaala nenacaaurune rijijieein ichaohichene.

<sup>21-22</sup> Nii jaiti Jesocurisito coitucuelanaala ichaohichene bana: "Jiaonriha dadaain, niheichu quiichene. Niheichu inara biji cuhane teberiana nainiheeiche," naain dadaain quiichene caohateein inara relauruhane jaante, nechu cachaauru suujua caje unaaneein nihane jaun inae nitaje.

<sup>23</sup> Esinaete chuhisi niqui rauhijiriin Cana Coaunera coitucuera rijijieein neein aitocure. Nete cana jaberoco cairichaeraneein ne. Nii acaauru aitoonjoan osaacha que

coacuhin nenea caje cana suujua corenaa nainenihane jaunte, nii chaque nelatene.

### 3

<sup>1</sup> Nitohaneein inae ohin nitajenaa rijijieein neeichene caje Jesocurisito esenetaain neeichene jaun, rai Inaca Cana Coaunera aina jiniiquiin, rai raotono nichajai que niha Jesocurisitone jaan-dedeuecha que coacuhin ichaaoche.

<sup>2</sup> Nii jaun, inae nainiheeiche Cana Coaunera coitucuelanaala nenacaauru rijijieein coacuhin neeichene. Dedeu nenacaauruhacha que coacuhin neeuche. Jiaonriha caa chauratane que nenacaauruhacha que coaauquichene.

<sup>3</sup> Nitohanihana jaun, inae jauriaalu nenea inara ichao que ichaoheeiche, ena nenea inara ichaote, Jesocurisito aina Cana Coaunera aina asinojoneein ne.

<sup>4</sup> Nitohaneein Jesocurisito, inara ichao sirichaneein nihane jaunte, inae ecu tihane bana nacoauneein turuhane bana, aina jiniichaain inara ocotiha ureein, aina jiniiquiin necaohacha que ichaohichene coina.

*Jauriaanejeein nenea ichaonaa aina ena nenea ichaonaa.*

<sup>5</sup> Aihane jaun, coaacuruha Cana Coaunera coitucuelanaala nenacaaurune rijijieein coacuhin ichaohichene jianecuche. Jiaonriha joenreein ene aina ichaohin, quicha nejesina neein ichaohin, ene nejesinaneein ichaohin, naaonjoaain Cana Coauneraacha rautainelanaala nenea ichaain, chaelai siriquichene chunaain, naaonjoaaincha que coacuhin ichaohichene. Nitohanei ichaonaate jataain cana ichao aasaaera ne.

<sup>6</sup> Nere tonoraelanaala nitohaneein ichaonacaaurute, jataain mainajeein casetecaeratereein Cana Coaunera.

<sup>7</sup> Nii rijijieeinte inara netonai ichaorejetocoiche, jaiti necoreniha inara ichaone bana.

<sup>8</sup> Nete inae necoriha inara ichaone jaun, ita cotaairiin, ene aina ichaohichene coinaacha baasoneein coacuhin, inara amute cacha baijiaain, rautanacaai que ereein, naaonjoaain ichaohichene jianequiche.

<sup>9</sup> Inae nitohaneein necoriha inara ichaone jaun, jiaonriha jaiti necoreniha inara ichaone bana, inaraacha ichai ichaain, ita coritaain, naaonjoaain ichaohichelune rijijieein ichaonaa nainiheeiche.

<sup>10</sup> Nitohaneeinte, ena nenea ichaonaa que ichaohin, ena nenea cachaneein nenea rijijieein, jeriha Cana Coauneraane rijijieein ichaohichene, itolereneein niicha jerei coitucuriquicheein.

<sup>11</sup> Aihana jaun, coatiha chaque nelatihei, Curieconein, Jorionein, Jorionelanaala, leecha cachaneein, cha coitucuelanaala cairicheinein, letononein, letononelanaala, naaonjoainein nihacane. Jesocurisito cachaneein nihacanete, jataain itolere amurijiriin nelate.

<sup>12</sup> Jataain inara belaitohane jaunte, rai cachaneein neeichene coina, inara janijiin inara raain nelu Cana Coaunera. Aihana jaun, coujurihu inara ichao coreein nenea tocohanein esinae rauhijiriin cairichaojoaain ita coaraain, ita coroa-janeein, leeochoaauru amurijiriin nenea coacuelanaala, ita que nererojoecaelanaala, naaonjoaain ichaaoche.

<sup>13</sup> Jiniiquiin ita que nererojoecaelanaala neein, tonaain itaque ereein neeuruha chunocohacurune, que inara suujua acatein, naaonjoaain neeuche, inara que suujua acatein nihalu Cana Coaunerane rijijiein.

<sup>14</sup> Itolere baaso caje inara suujua coreein, ita belaa in jiniiquiin neeuche.

<sup>15</sup> Nitohanein neeichenete, inara suujua raujiareein Jesocurisito, raotojoein neeichene coina. Nii coinete inara raain nelu Cana Coaunera, jiniiquiin rai jaberoco rijijiein neeichene coina.

<sup>16</sup> Itolere bana inara rai Jesocurisitohacha beratei coaacuche inara suujua cuhane. Inara suujua que coitucueratiha Cana Coaunerane rijijiein, jiniiquiin ita relaain, ita suujua aninoain, chatohanai ichaain niha chunine coataa ita suujuatein, naaonjoaain neeuche. Inara suujua aina cutaa in Cana Coaunera coroa-jeein, salmo que nenatein, itolere nenatena Cana Coaunera coroaenanaja que nenatecuche.

<sup>17</sup> Itolere inaraacha ichai ichaquichene, jeriha Jesocuristone rijijiein aina cuaain ichacuche. Jerichanejeeinchu chaelai que ereein neeiche cacha raine, aca jerihane rijitoein ereein neeuche. Chaen chu, nii rai Calaohi Jesocurisito aina cuaain, rai Inaca Cana Coaunera coroaecuche.

*Curisito ranojonein nenacaauru ichao.*

<sup>18</sup> Inara ene neeichene, inara lanaauru ere tonoraain jerecuruhane rijijiein neeuche, acaachate inaraacha ichanenein ne, coujuriu Jesocurisito esenetaeranein nenea tocohanein neeichene coina.

<sup>19</sup> Jana inara lananein inara comasaihuru belaa in neeuche, jiaonriha inara comasaihuru cotaairiin coaraquichene.

<sup>20</sup> Canaanaihuru nihanatiin, rai fojiaraauru ere tonoraain neeuruhine. Nitohanein neite rautaa in coarae Cana Curuaana Jesocurisito.

21 Jiaonrihachu, inara acaauru inacaneein, inara bereecuru baijiaain neeichene, nabana caoacha coroaecuruhane jianecuruhane coataa.

22 Fatoroon letononeein nenacaauru, cau chauratane que acaauru fatorooneein nenacaauru ere tonoraain neeuruhine. Jiaonriha coarajeeuruhane notaracaaecha acaauru belaihuruhane jerenacauncha acaauru ere tonoraain neeuruhane. Coaracurenihane jana nihanatiin, suujua aina cutaain, jerecuruha acaauru fatorooncurune rijijieein neeuruhine, nitohaneein jeriha Cana Curuaanaa Jesocurisitone jaun.

23 Itolere inaraacha ichai ichaain neeichene, esinae rauhi-jiriin corajeein ichacuche, inara amute cacha rai ichaquichene que coacuelanaala, Jesocurisito rai ichara rijitoein.

24 Inarate inae ecu tihane bana, inara rai aca cana Curuaanaa nihane rai niicha jerei ichara neein neeichene jaun, rainein nena que inara coreterihani Cana Curuaanaa Jesocurisitone coitucuhiche raotojoein.

25 Nii choae tacaain coatiha nejelauneein chuni coaraain nihei Cana Coanera.

#### 4

1 Inara, fatoroon neeichene, inara letonocuru aina caohachaain inara suujua coaraain, rauhijiriin acaauru aina neeuche. Inara netonai leinjiin dedeeu nena Curuaanaa letononeein neeinchene jaun, rai inaraacha ichai beeichene rai neeichene que nainain ichaaoche.

2 Itolere bana Cana Coanera corojeein bajaee bajajeein itolere que nainain ichaaoche.

3 Canacaanu rai netonai Cana Coanera bajaachete canacaanu rai acuujua joracaaine ne itolereenein cuhin Jesocurisito que Erenaa coitucueraelanaala nena- niicha beratei beebejihacaanu. Nii coitucueraelanaala nena Erenaa canuhacha beebejei corenihane, caa caresero cuhane neeun.

4 Cacoreniha Cana Coanera bajaachene raotojoein aohana nainecuruhane coina, rauhijiriin nii Erenaa beebeje cachaauru rai.

5 Chaen techu Cana Coanera coitucuhichuru que caohacha nejesina ichajeein itolere bana ichaohichene coaraatein, caohachaain coacuhin nii canaacha esenetai que acaauru rai raotojoein beebejeeche caeneenejelanaala.

6 Nitohaneein ereeichene raotojoein ereeuchete itolere bana rautatiin aonacurumiin aohanraauru. Chaen tonaain ereeuruhane nihanatiin, raotojoein baaso coacuelanaala acaauru tonoraain neeuche.



<sup>7</sup> Canu suujua rijijieein, Jesocurisito icharatenohi amihanenaa que cacorataanera- jataain canuhacha belaa- Jesocurisito coreniha cana nejera Tiquicote, inara rai canu benaa bereein.

<sup>8</sup> Nii coinane inara rene aca letoaaun, inara rai: “Naaonjoaaine nihacaanu,” naain inara suujua lararajiaane coina.

<sup>9</sup> Ainate uhe inara laurijiraneein nenaalu- jataain canuhacha belaa- Jesocurisito coreniha cana nejera Onesimo. Acaaurute inara rai caaelai benaa beeurureein.

<sup>10</sup> Canu aina caresero cuhane nena- Arisitarocote, inara coacue. Chaen Berenabeen calaohiriji- Maroco netonaite inara coacue. Inae inara rai bihanulune rijijieein, inara rene bedainiha nii Marocone raotojoeein raauche.

<sup>11</sup> Chaen techu Josto neein acaauruhacha curuaatei- Jesoso netonai inara coacue. Acaauruhachate canu araaichuru- Jorioocuru caje, Cana Coaunera icharatenohi amihanenaa que cacorataaneraneein, jataain canu suujua nunaeraneein neure.

<sup>12</sup> Inara laurijiraneein nenaalu Jesocurisito cachaneein nena- Efaforasite inara coacue. Acate itolere bana inara rai Cana Coaunera bajaee bajaenaja que, leecha ichana coacuelanaala itolereneein Cana Coauneraacha jerei ichaquichene coina.

<sup>13</sup> Canune nitohaneein, Laodiseau nenacaauru, Erapolisiu nenacaauru, chaen inara, naaonjoaineeichene que, jataain coaunajaaoca nii Efaforasine coarajenajacoon.

<sup>14</sup> Canuhacha belaaieein nena- docotoro Locasi netonaite inara coacue, chaen Demasi netonai.

<sup>15</sup> Laodiseau nenacaauru Jesocurisito coreniha cana nejeraneein nenacaauru rai acaauru coaaucaanne beeuche. Chaen Ninfasi aina rai loreri asaee netaojianacaauru coaaucaanne beeuche.

<sup>16</sup> Inae nainain caa inara rai canuhacha laenai quiricha reretaain coaraquichene nainaquichene, Jesocurisito ranojoneein Laodiseau nenacaauru rai letoaauchete, acaauru netonai reretaain coaracurumiin. Acaauru netonai, acaauru rai quiiha letoai quiricha, letoaauruha inara rene ne, reretaain coaracuche inara netonai.

<sup>17</sup> Chaen Arquipo rai: “ ‘Atiin ichei Cana Curuaanaacha icharatei amihanenaa ichaauje, nii icharatihalune rijijieeincha.’ naainte ichei nere letoae Faboro,” naain beeuche.

<sup>18</sup> Inae satonotichaaunne raine Canu Faboronichaune caraajenhane, caa quiricha cuhane inara coaaucaanne laenaaun. Atiin Caresero cuhane nihanune que coaucuche. Jeelai amuritoheriin inara coroatajanemiin Cana Coaunera.

## Tesalonecau nenacaauru rai Faborohacha letoai leinjiin

*Tesalonecau nenacaauru rai laenaauruha Faboroorune*

<sup>1</sup> Canuna Faboro neeun. Inara raina Siribano, Timoteo, naaonjoain nichaanunena laenaain letoarichaanuhin. Saain nii Tesalonecau nenacaauru Cana Coaunera rai ita taojiaera neeichene raina caa laenaain letoacaanu. Saain nii Cana Inaca Cana Coaunera, Cana Curuaanaa Jesocurisito, naaonjoain coitucuhin neeichene raina caa letoacaanu. Inara belain, inara coroatajaneene Cana Inaca Cana Coaunera, Cana Curuaanaa Jesocurisito naaonjoainte raotojoein neeiche.

<sup>2</sup> Cana Coaunera bajaacaanune naineena, “Nariha,” naain coroejeein, inara rai bajaacaanu inara coroatajanejeein sacuha Cana Coaunerane coina.

<sup>3</sup> Nitohaneena inara coaucuhin nihacaanu, Cana Inaca Cana Coaunera bajaacaanune naineenna rauhijiriin inara coroatajanerichaaain Cana Coaunera Calaohi Jesocurisitone esenetaain, caohachaaain laraajiin necairichanaa abaantaain amihaneen leochaauru belaaain neeichene jaun.

<sup>4</sup> Coichana aina cutaaante inara belai Cana Coaunera. Aihana jaunna, janiijiin Cana Coaunera ranojoein neeichene coitucuhacaanu.

<sup>5</sup> Coatiha joaenreen erenaa rijijieein nihei caa cacha relaacaanune jaan Cana Coaunera Ere. Mijiaainetiinte cacha suujua que tacaе, nitohaneen tiha Cana Coaunera Suujuene jaun. Nitohanihana jaunna esinae rauhijiriin Cana Coaunera Ere neein nihane coitucuhacaanulu.

Inarate canacaanu ichao coitucuhiche, inara aina nihaacaanune bana inara nota que canacaanu coaraquicheluna jaun. Nenacaen inara caohachanu que tejian canacaanu coaraquichelu inara nota que, jericanejeein caohachaaain ichaohichene coina.

<sup>6</sup> Nii jaunte jericanejeein canacaanu ichao rijijieein, Cana Curuaanaa Jesocurisito naaonjoain rijijieein inara netonai inara ichao que ichaohiche. Nitohaneen caohacha ichaaain ichaohichene corenihate inara rohecaain, inara cairichaerihure niqui, nete inara coroatajaneein naaonjoaan Cana Coaunera Suujuene jaun, raotojoein rachoojoein Cana Coaunera Ere aonaain tonoraache atiin.

<sup>7</sup> Nitohaneen atiin laraajiin necairichanaa abaantaain raotojoein neeichene jaunte, inara coitucuuruhana jaun, jericanejeein inara rijijieein ichaonaa caohacha que ichaonaa coaacure saain Masedonia, Acaiha, naaonjoaihunri nenacaauru Cana Coaunera coitucuurera.

<sup>8</sup> Nitohaneeinte Masedonia batane, Acaiha batane, itolere sacutaain Cana Curuaanaa Ere coitucuerateechene jaun, esinae rauhijiriin Cana Coaunera esenetaain rauhijiriin nere tonoraain neeichene coitucuure itolere neein. Nitohaneein itolere neein raotojoein inara coitucuuruhana jaunna, inae cha que erenaa nainenihacaanu canacaanu inae.

<sup>9</sup> Nii jaunte inae acaauru rai cha que irihacaanune late-curene, jauriaa nejeein inara rene turuha uhacaanune jana, canacaanu belaaain, canacaanu raain, canacaanuhacha bee-bejei Cana Coaunera Ere esenetaain tonoraain, nii enuha caje cacha chanohineein nenea inara coaunera niha inaraacha tei jianein raatiriin, esinae rauhijiriin nii ichaohin nenea Cana Coaunera Esine Ere esenetaain tonoraain, nii beebejeeiche leeochoaauru raine coitucuuruha itolere neeina jaun.

<sup>10</sup> Chaen techu enacoauneein dede caje turuha uha nii Cana Coaunera Calaohi, nii oo caje Cana Coaunera ichatenohin Jesusone cohajeichene beebejeeure. Nii Cana Coaunera Calaohi Jesusote cana casetecaeratihane rai niha Cana Coaunerane jana jianacoon cana mitaeranein ne.

## 2

### *Tesalonecau namihaneeo ichaa Faborone*

<sup>1-2</sup> Nii coitucuhichene tocohaneeinte jauriaa nejeein Filipoo turuhacaanune jana, canacaanu batohin, canacaanu necoejechanuhin, canacaanu que jaolecooruha natiinte, inae enene esinae rauhijiriin aitocoanune coitucuure. Nii coitucuhichene tocoaneeinte canacaanu aina nejerateeuruha nii Tesaloneca cocoaichacurune jana, canacaanu coroatajane Cana Coaunera, acaauru que casilanaala laraajiin inara rai nere bihacaanune coina.

<sup>3</sup> Nitohaneeina joenreein caje rocohin inara relaenihacaanu. Nitohaneein rauhijiriin aitocoaanu natiinte canacaanu ataibinaene been, naaonjoaaunre canacaanu belaiheichuru, chaelai chunei coritana coacuhin joenreein canacaanu ereniriaala que aitona rijitiin.

<sup>4</sup> Canacaanu suujua coarajihana jaunte, canacaanu letoae Cana Coaunera, jianacoon cana mitaain, Cana Rai Ichaonaa Tera Nere bihacaanune coina. Coatiha canacaanu belaaain niha cachane jerena caaun cacha relaain nihaacaanu. Canacaanu belaiha Cana Coaunerane jerena caaunna jerihane tocohaneein cacha relaain nihacaanu.

<sup>5</sup> Nii coitucuhichene tocohaneein, coatiha canacaanu coretequichene coina inara belaihaacaanu. Esinae Cana Coaunerate coaraje.

<sup>6</sup> Canacaanu cocoainaaain canacaanu letoaaain niha Cana Coaunera Calaohi Jesocurisitona jaunte niqúi neere canacaanu rai rauhi. Nena “Naaonjoain canacaanu que

suujua acateein neeine cachara,” naain erenihacaanu inara rai nihanatiin.

<sup>7</sup> Nechu jataen joenreein cache rijjijeein turuhin, canacaanu nerotohin inara belaa'in inara jana amuhemuhecaanulu. Charijieein teeinti bereecuru belaa'in fojiae neba. Nii rijjijeeina inara belaa'in inara relaacaanu.

<sup>8</sup> Coatiha Cana Coaunera Ereeicha que inara relaacaanuneeicha coina turuhin inara aina nihaacaanulu. Inara netonai canacaanu ichao coaraain jerichanejeein canacaanu rijjijeein ichaohichene coinana itolere necairichanaa abaan-taain turuhin nihacaanulu, canacaanu coichana aina cutaain inara belaa'in nihacaanune jaun.

<sup>9</sup> Jauriaana janotiinnetojoein, laraajiin mainajeein amihaneraetoacaanulune coaauquiche chachu natiin. Nitohaneeina canacaanu raajeni'hane amihaneein, coreniha canacaanuhacha latei coreteein, Cana Coaunera Ere beebjeein ichaorejetocooaunlu, nabana inara cairichaacaanune, chaelai que latejihojoiriin neeichene coataa.

<sup>10</sup> “Baaso chaainjene nihacaanu,” naain iriha cache natiin, chatohaneein baaso chaain nihaacaanu. Inara, Cana Coaunera, naaonjoain neeichenete rauhijiriin canacaanu suujua coaraain, Cana Coaunera coitucuera neeichene que canacaanu suujua acateein nihacaanune coarajerejetocoichelu. Nii jaunte nene nihei chaelai que ujauteein canacaanu coulurujaha chuneine jaannu.

<sup>11</sup> Nii choae tacaainachu calaohi suujua nunaain lararajiaa inacane rijjijeein inara suujua nunaain lararajiaain nihacaanune coitucuhiche.

<sup>12</sup> Nitohanihana jaun, coujuriu Cana Coaunera coitucuera neein nena tocohaneein rauhijiriin ichaooche, nii jauriaa inara rai aitocooanulune tocohaneein raotojoein rachoojoein aina neeichene coina inara cotijiaain nihalu Cana Coaunerana jaun.

<sup>13</sup> Coatiha joenreein cache ere aonajenaa rijjijeein Cana Coaunera Ere aonajiheechelu inara rai bihacaanune jana. Nii jaunna Cana Coaunera bajaacaanune, “Nariha,” naain bajaacaanu. Nii caje coauneeinte esinae rauhijiriin caohachaain inara ichao coreein ichaohichene coarateein neeiche. Nitohanihane cajete esinae rauhijiriin Cana Coaunera Ere nihane que necoarate.

<sup>14</sup> Cana Coaunera Calaohi Jesocurisito ere tonoraachene corenihate inara aina nejerateurelu inara araachuru. Nii rijjijeein techu nii Jodeau nena Cana Coaunera Calaohi Jesocurisito ere tonoraaurera aina nejerateurelu acauru araachuru Jorioocuru.

15 Nii Jorioocurute acaauru rai Cana Coaunera ere beera inoaensi sohin jaaoruhane rijijieein Cana Curuaanaa Jesoso sohin jaaorera ne. Nitohaneeuruhana jaunte acaauru aina nihacaanune bana canacaanu sitaaurelu. Nihei aansijieeiniji Cana Coaunera jerenohin ichana coaucuruhi, nechuhatiin cacha aina obaejeriin ichaauruha neechate laen jerecure.

16 Nii jaunte jianacoon mituhin neuruha Jorioniheichurune coina, Jorioniheichuru rai Cana Coaunera Ere benaa jerichaanune, caohateeure. Nitohaneeuruhana jaunte jataen mululuhin osaqiun neure. Nii jaunte tabiicha acaauru abaantana nainene Cana Coaunera. Nii jaunte inae cuu tihane, nii core coaraa cuurureein acaauru notaanaa.

*Coaiteen Tesalonecau turuha cunaa jeriha Faboro ne*

17 Inara caje amuhacaanune caje coaaneaina, inara coacuhin nihacaanu. Carajaain ita coarinihacache natiine jericha nejeein inara coacuhin nihacaanune jaun, inara coaraa uhene rijitojoihacaanu.

18 Inara coaraa unaa jerichaanune naineeinte canacaanu acate Moconajaera. Canuna Faboro neein caraaje nihane inara coaraa unaa jereun araai saain.

19 Inae coaiteen cau turuha Cana Coaunera Calaohi Jesocurisitone banana, raotojoein rachoojoein nereeunni, cacoreniha coitucuhin rai cacha neeichene jaun.

20 Nii jaunna esinae rauhijiriin raotojoein rachoojoein nihacaanu.

### 3

1 Jataenna inara coaraa unaa jeretohacaanu niqiu, nena nainenerichaanuhin. Nii jaunna cau Atenau nerichaanuhin.

2 Acaihanejein cana nejera Timoteeochana letoarichaanuhin inara coaraa uhane coina. Acate Cana Coaunera letononeein canacaanu coroatajane, Cana Coaunera Ere benaa que. Nii jaunte inara coaraa ureein, inara suujua laraarajiaain nihane, nii aina nelaraarajiaain, inara suujua nunaaain neeichene coina,

3 nabana chatohanein nejelau suujua cuaain niha chuneine coataa. Inarate raotojoein niriinanai coitucuhiche. Saain nitohanein necairichanaa coaraain nihacache nete ne.

4 Nii inara aina nihacaanune bana, inara rai aitocoaanulune tocohaneinte nelu cana suujua reroecaeraauru. Nitohaneinte situelu, nii coitucuhichene tocohanein.

5 Nitohaniha jaunna inara coarateeunlu. "Esinaete chuhisi rauhijiriin Cana Coaunera Calaohi Jesocurisito ere esenetaain tonoraain neure," naain nitohanein coitucuhane jereha caaunna inara coarateeunlu. "Baaso que

sarunajaain niha Moconajaerane, baaso chaain neeuruhane inacojoein inachujian acauru rai Cana Coaunera Ere benaa que amihanihacaanulu,” naanune jaunne, inara coarateenulu, nitohanein coitucuhanune coina.

<sup>6</sup> Nii jaunna nitohanein esinae rauhijiriin Cana Coaunera Ere esentaain, tonoraain ita belaaain, raotojoein neeichene coitucun, inara caje turuhin biha Timoteeo canacaanu raina jaun. Chaen techu canacaanu belaaain canacaanu coacuhin, canacaanu coana jeretohichene be. Inara coana jeretohacaanune rijitoein canacaanu coana jeretohichene be canacaanu rai.

<sup>7</sup> Nii jaunna necairichaacaanu natiin, raotojoein nii que nelararajiaain atiin rachoojoein nihacaanu.

<sup>8</sup> Nitohanein rauhijiriin Cana Curuaanaa ere tonoraain neeichene jaunna, cha que tonajelanaala nihacaanu.

<sup>9</sup> Nii jaunna inara coreniha, “Nariha jataen,” naacaanu, Cana Coaunera notaracae.

<sup>10</sup> Nii jaunna janotiin netojoein Cana Coaunera bajaain nihacaanu, canacaanu coroatajanihane inara rene turuhin inara rai beebejihacaanune, jataain jelai amuritoheriin esenetaain queecha jaaequiin neeichene coina.

<sup>11</sup> Aihana jaunna canacaanu coroatajaniha Cana Inaca Cana Coaunera, Cana Curuaanaa Jesocurisito naaonjoaine jerichaanu inara coaraa uhacaanune coina.

<sup>12</sup> Inara coroatajaneine Cana Curuaanaate jelai amuritoheriin esenetaain, tonoraain neein ita belaaain, cachaauru belaaain, naaonjoaain neeiche inara belaichaaunne rijitoein.

<sup>13</sup> Aihute nitohanein rauhijiriin inara suujua coaraain ichaohichene jana inara eruhine Cana Coaunera Calaohi Jesocurisito, rainein nenacaauru aina turuha uhane bana.

## 4

### *Nitohanein ichaoha cachane jeriha Cana Coaunerane*

<sup>1</sup> Cana Curuaanaa Jesocurisito coitucuera neeichene jaunna, atiin inara rai aitorichaanuhin, nii jauriaa inara relaacaanune rijijiein ichaohin neeichene coina. Nenacaenjian jelai choae jauhecotojoeriin neeichene coinana aitocaaanu, nitohanein jeriha Cana Coaunerana jaun.

<sup>2</sup> Inarate nere coitucuhiche, canacaanu que inara relaeratiha Cana Curuaanaa Jesocurisitona jaun.

<sup>3</sup> Acaiha nejein nere tonoraache neechate jere Cana Coaunera. Nabana ita raelanaala ene aina ichaojeraquiin niha chuneine coataa.

<sup>4</sup> Acaiha nejein sinijiera ainaacha ita jereein jiniiquiin suujua coarain niha cacha nete caohachae.

<sup>5</sup> Caohachaai, Cana Coaunera coitucuuruhi rijijieein inara suujua coarihei amuneein neeichene.

<sup>6</sup> Coa nejesinajeein ita coritaain ita shaquiin nihache. Ni-tohaneein neinihanete banejelanaala choae osa nalutiareein Cana Curuaanaa, nii core coaraain nihane coina, nii inara rai aitiin inara relaain bihacaanulune tocohaneein.

<sup>7</sup> Coatiha canaacha jerei ichaechajeein ichaonaa coina cana cotijiaain, cana raain niheilu Cana Coaunera. Rauhi-jiriin cana suujua coaraain ichaohacachene cointate cana raain nelu Cana Coaunera.

<sup>8</sup> Cha teeinti, caa inara relaacaanune jaan batoe. Nihei canacaanu batoha aitorinaain. Nechu nii rai Suujue que cana suujua lararajiaera Cana Coaunera batohate aitoreein.

<sup>9</sup> Jiniiquiin raotojoein ita belaijieein saain itolere cacha belaa ineeichene coina, inara relaa Cana Coaunerana jaunna, inae nii que inara relanaa nainenihacaanu.

<sup>10</sup> Nitohaniha jaunte, saain Masedonia nenacaauru Cana Coaunera coitucuurera belaa ineeiche. Nii jaunna jelai choae jauhecotojoeiin inara suujua coaraain inara amute cacha belaa ineeichene jereeun.

<sup>11</sup> Inara letoacaanune tocohaneein raotojoein ichaohin, nihei casaje que erenaa coacuelanaala inara amihaneeochoa ichacuche.

<sup>12</sup> Aihute inara que suujua acateein naaonjoanruhine Cana Coaunera coitucuuruhi.

### *Coaiten turuha uha Cana Curuaanaane*

<sup>13</sup> “Naaonjoaainte neeure Cana Coaunera Calaohi Jesocurisito esenetaain onacaauru,” naain inara netonai coitucuhichenena jerichaanu. Nabana cha coitucuneeichene ohin naaonjoan chuneine, nabana Cana Coaunera coitucuuruhi cachaauru rijijieein jataen tabai inaderanaa que inaderaain neeichene coataa.

<sup>14</sup> Charijieein teeinti, ohin ichanae Cana Coaunera Calaohi Jesoso, nii rijijieein techu aina ichanaa cuurureein esenetaain onacaauru.

<sup>15</sup> Nii jaunna inara rai aitocaaanu, cacha relaa Cana Curuaanaane rijitoein. Cha teeinti, coaiten turuha uha Cana Curuaanaa neren tiaain ichoae, nii ichoaichaniha onacaauru ajiniha Cana Curuaanaa aina niha curinaain.

<sup>16</sup> Letonocuru- anjeraauru curuaanaa que beratiha Cana Coauneranete inae toniha Cana Coaunera rai jaihane jana, dede caje fauha uha nii Cana Curuaanaane, ichanaa cuurureein esenetaain onacaauru.

<sup>17</sup> Nii baihate acaauru aina jiniiquiin nihacachene coina, dede sacari jana Cana Curuaanaa aina ita ruhine

curichaacheein jiniiquiin. Nitohanihanete Cana Curuaanaa aina niha curichaacheein cha bana satonoelanaala.

<sup>18</sup> Aihana jaun caa erenaa que ita suujua lararajiaain neeuche raotojoeein.

## 5

<sup>1</sup> “Naaonjoain banate turuha ureein Cana Curuaanaara,” naain coitucuhi chunei, nii coitucuhichene tocohaneein.

<sup>2</sup> Nii coitucuhichene tocohaneeinte cha coatajeniha chuneine jana turuha ureein. Charijieein teeinti janotiin turue asijiauto. Nii rijijieeinte turuha ureein.

<sup>3</sup> Nitohanerichaine banate, “Jataain raotojoeeinte ichaohacache. Coatiha nihei cana que nejerateein chatohaneein cana ichao itajeranu,” naain ereein neeurureein Cana Coaunera coitucuruhi cachaauru. Nii lacuritiinte caseteco coaraa curureein luhecotariin, acaauru casetecaa Cana Coaunera ne. Nihei chunijihun cuhin nichotenaa nainecururinaain. Charijieein teeinti, canaanai siriha enene, inae saa rai batenene, rai cunaane, cuna caje nichotenaa nainene. Nii rijijieein techu luhecotariin cau turuha Cana Curuaanaane acaauru casetecaa ne nii cuna aonacurureein.

<sup>4</sup> Jana inara laen nesoonenaa coariheeicheein, cohajeeichene jana tururichaaaina jaun.

<sup>5</sup> Cana Curuaanaa jerenohin coitucuhin tonoraachene jaunte, jiichoo conaera- cono cachaneein neeiche. Coatiha Cana Curuaanaa ere tonoraauruhi rijijieein nocohenaana nenea cache neein nihaacache.

<sup>6-7</sup> Nii jaun nainihei ninauhene neein ajenacaauru rijijieein nihacachene. Itolere bana cana suujua coaraain niha-cache nete caohachae.

<sup>8</sup> Charijieein teeinti, nalarijia que coata teeure soondarooru, acaauru jaberoco acateraanu que, nabana chatohaneein tenajaera nihane, acaauru que temuhin nihane coataa. Nii rijijieein techu inara netonai, cana acateraanu que Cana Curuaanaa esenetaain, tonoraain, ita belaaain, cache belaaain, naaonjoain nihacachenete cana acatera niha nereein nii canaacha esenetai. Nitohaniha cacheneite cana rohan nichuutaain cana coritana nainenereein Moconajaera. Charijieein teeinti, coata caje ichanohin asiho lauriae soondaro, nabana chatohaneein couturi tiha aina nejerateine coataa. Nii rijijieein techu, chatohaneein cana suujua tenaa nainenereein Moconajaera, batoelanaala esinae rauhijiriin jianacoo cana mitaa Cana Mitaerane esenetaacachene.

<sup>9</sup> Coatiha caseteco coaraain nihacachene coina, cana raain nihei Cana Coaunera. Rai Calaohi Jesocurisito coreniha jianacoo mituhin nihacachene cointe cana raain ne Cana Coaunera.



<sup>10</sup> Ohacachene nihanatiin aina nihacachene coinata cana coreniha ohe Cana Coaunera Calaohi Jesocurisito.

<sup>11</sup> Nii jaun nii aachene rijijieein jiniiquiin ita suujua lararajiaain laraajiin neeuche.

*Satono nejeein Cana Coaunera coitucuurera suujuatiha Faborone*

<sup>12</sup> Aonacuchena inara rai irihacaanu. Nii inara beraihurera que inara suujua acateein, nere tonoraain neeuche, Cana Coaunera coitucuurera beraichaneein neeuruhana jaun.

<sup>13</sup> Nii jaun acaauru que inara suujua acateein belainajaain, leeochoauru aina jiniiquiin raotojoeein neeuche.

<sup>14</sup> Amihanenaa jeriheichuru cotaicha rijitiin suujuateein letoaauche. Chaen chu nererojoeccain nenacaauru belaaain suujuateechete, suujua tocharaaain suujua nunaain neeuruhine. Chaen chu nacanacaenaauru coroatajanecuche. Raotojoein satiin acaauru suujuateein, acaauru suujua lararajiaain neeuche.

<sup>15</sup> Coaracuche, jiaonriha inara rai baaso chara nihane coa nacatiha tacaain cainaain nihache. Ita belaaain, saain itolere cacha, Cana Coaunera coitucuuruhi nihanatiin belaaain neeuche.

<sup>16</sup> Raotojoein rachoojoeeriin neeuche inetono janonaa bana.

<sup>17</sup> Cana Coaunera bajaebajajeein neeuche inetono janonaa bana.

<sup>18</sup> Chatohaneein inara tera nihane nihanatiin coroaecuche, nitohaneein coujuriu Cana Coaunera Calaohi Jesocurisito esenetaera neein nena tocohaneein neeichene jeriha Cana Coaunerana jaun.

<sup>19</sup> Inara suujuatenaa jeriha Cana Coaunera Suujuene, aonaaain tonoracuche.

<sup>20</sup> Cana Coaunera Ere biha Cana Coaunera letonone, nijiaonriha batohin neeichene.

<sup>21</sup> Esinae rauhijiriin suujua coaraain inara relaacaanune rijitajoein inara relaauruhane esenetaain tonoraacuche.

<sup>22</sup> Itolere baaso jianein neeuche.

<sup>23</sup> Acaiha nejein nere esenetaain tonoraera neein neeichene coina inara suujua coreeine atiin cana rai raoti ichaonaa tera Cana Coaunera. Aihute neculocohin neeine inara jaberoco, inara suujue aina coaiten turuha Cana Curuaanaa Jesocurisito nereein tiaain.

<sup>24</sup> Nitohaneeinte ichareein nii Inara Cotiharalu, nitohaneein nihana jaun.

*Laenaane satononiha acaauru corojeein acaauru coaacane biha Faborone*

<sup>25</sup> Cana Coaunera bajaacuche canacaanu rai atiin.

26 “Inara coaucuruha jera Faborooru,” naauche satiin cana nejeraauru Cana Coaunera coitucuurera rai.

27 Aihana jaun acaauru rai caa canuhacha laenai erere-taauche, Cana Curuaanaa letoaeratenojohin neein nihana jaun.

28 Inara coroatajaneeine Cana Curuaanaa Jesocurisitote raotojoein neeiche.

Nitohaneein neeine.

## Tesalonecau nenacaauru rai Faborohacha letoai coroataja

*“Chatohaneein neeiche” naa Faborone*

<sup>1</sup> Canu Faboro nichaaune, Siribano, Timoteeo, naaonjoain nichaanunena caa laenaain letoarichaanuhin. Saain nii Tesalonecau nenacaauru Cana Inaca Cana Coaunera, Cana Curuaanaa Jesocurisito naaonjoaunri coitucuurerera raina caa laenaain letoaacaanu.

<sup>2</sup> Inara coroatajanein Cana Inaca Cana Coaunera, Cana Curuaanaa Jesocurisito naaonjoainte raotojoein neeiche.

*“Nariha” naain coroajeein Cana Coaunera bajaa Faborone*

<sup>3</sup> Esinae rauhijiriin jelai choae jauhecotojoeriin Cana Coaunera esenetaain, ita belaaain neeichene jaun, “Nariha,” naain Cana Coaunera rai inara coroaecaanunete caohachae.

<sup>4</sup> Nii jaunna Cana Coaunera rai ita taojiaeraauru rai raotojoein inara beebelijhacaanu, Cana Coaunera Calaohi Jesocurisito coitucuhichene coreniha inara rerohecaain, inara cairichaaauruhane nihanatiin, cha que erelanaala abaantaain itolere necairichanaa abaantaain neeichene jaun.

<sup>5</sup> Nitohaneein abaantaain neeichene jaunte esinae rauhijiriin caohatiin inara raain niha Cana Coaunerane coaraa cuurureein inara coaraauru.

<sup>6</sup> Nii inara cairichaaeriin nenacaauru cairichaaain niha Cana Coauneranete caohachae.

<sup>7</sup> Inae dede caje turuha uha Cana Curuaanaa Jesocurisito, rai letonocuru mijiaainetoori- anjeraauru ainane banate, nebetacanaa tereein cana rai Cana Coaunera. Nebetacacachene jana, acaauru cana rerohariha necairichaaauruhane caina.

<sup>8</sup> Cana Coaunera esenetaauruhi, chaen nii jianacoo cana mitaera Jesocurisito ere esenetaauruhi, casetecaa usi tabai quene cointate turuha ureein Cana Coaunera Calaohi.

<sup>9-10</sup> Canacaanuhacha beeberei esenetaaichene jaunte, Cana Curuaanaa coroaecurureein saain esenetaeraauru inae turuhane bana. Nii banate caseteco coaraa cuurureein, cha bana jelai caje mituuruhane caina que aina rijijieein. Nii banate coriae Cana Curuaanaa coarihei rijijieein niha cuurureein nii nere esenetaauruhi.

<sup>11</sup> Nii jaunna inara rai Cana Coaunera itolere amurijiriin nena bajaacaanu, inacojoein inara cotijiaeniha Cana Coaunerana jaun. Chaen nachu caohachaaain coaauquichene rijijieein inara tiha Cana Coaunerane caina Cana Coaunera bajaacaanu. Chaen nachu nii nunuheteichene rijijieein,

jerichanejeein inara amihaneeo ichaain neeichene coina Cana Coaunera bajaacaanu, esenetaain ichaquichene jaun.

<sup>12</sup> Nitohaneein ichaquichene jaunte, inara coreniha Cana Curuaanaa Jesocurisito coroaecurureein satiin. Nitohaneein Jesocurisito letononeein neeichene jaunte inara coroaeca cuurureein, nitohaneein jeriha Cana Coaunera, Cana Curuaanaa Jesocurisito, naaonjoaine jaun.

## 2

*Inae cuu tee lalajiha Cana Curuaanaa turune janate niha cureein leinjiin cache coritaraanu*

<sup>1-2</sup> “Naaonjoaainte turuha ureein Cana Curuaanaa Jesocurisito,” naain bihacaanulu inara raina jaun, coa inara coritaera nihane esenetaain nihache. Inara rene turuhin, “Canacaanu rai beein beratiha Cana Coaunerana jaunna coaiten turuha Cana Curuaanaane bihacaanune coina, cau inara rene turuha uhacaanu,” naa chuneine nijiaonriha esenetaaichene. Chaen chu, “Canacaanuhacha letoai je,” naain inara rai quiricha tera nihane nijiaonriha esenetaain neeichene.

<sup>3</sup> Nijiaonriha chatohaneein nihanatiin, tonaain inara coritana jerera nihane esenetaain neeichene. Inae cuu tee lalajiha Cana Curuaanaa turune janate niha cureein leinjiin necha ansai cache coritaera, Cana Coaunera niha nocoetiin. Nii erete tonoraa cuurureein, Cana Coaunera ere tonorana coacuelanaala. Niqui nete nii acaauruhacha ere tonorai itajiha cureein Cana Coaunera.

<sup>4</sup> Niite Cana Coaunera aina nejerateein, niicha tonorai tonoraa cachane, aina nejeratereein. Acaihanejein acaacha ere tonoraacachane jereein Cana Coaunera niha nocoetiin nelauriaa cureein Jerosaleen nenea Cana Coaunera Loreri asaa.

<sup>5</sup> Coauquiche chachu natiin, inara aina nihanune banana chu caritiin inara rai bihacaanulu.

<sup>6</sup> Inarate cojoinacatiha Cana Coaunerane ajiniha turuenerihanine coitucuhiche raotojoein.

<sup>7</sup> Inae nunuejiha nii Osa Neba amihaneeon asinojoein. Inae jianiha nii acatera neechate cohaje,

<sup>8</sup> ecooca nii nechu aansai atebinaene coina. Nii banate turuha uha Cana Curuaanaa Jesocurisitone, neraaicha que jiheitiin itajiha cureein Cana Curuaanaa Jesocurisito.

<sup>9</sup> Nii nechu aansai ataibinaen osaaonate turureein nechu aansai atebinaen Moconajaera letono neein, nechu jataen itolere ichaain cache coritaeraanu que, nohanein itolere ichaain cache notaaranu que.

<sup>10</sup> Nitohaneeinte itolere que nohanein ichaonaa rauhi aonana jerecuruhi coritaa cureein.

11 Nitohaneeinte casajeje esenetaauruhane coina, inauhene coarajenajareein Cana Coaunera,

12 nitajeeuruha nii nere rauhi jerelanaala casajeeicha tonoraeraaurune coina.

13 Nii jaunna inetono janonaa bana, "Nariha," naain Cana Coaunera coroaecaanu inara coreniha. Jataaente inara belai Cana Curuaanaara, canejeraauru, jauriaa nejeein inara que tacaajeein inara raa Cana Coaunerana jaun. Nere rauhi esenetaaichene corenihate, rai Suujue que inara suujua coreein inara rae Cana Coaunera.

14 Nii jaunte nii canacaanuhacha beebejei nere aina cuaain inara cotijiae Cana Coaunera aina Cana Curuaanaa Jesocurisito rijijieein aina neeiche caohatiine coina.

15 Aihana jaun nitohaneein rauhijiriin ichaaoche. Coa nii quiricha cuhane reein tiaain inara suujuateein nihacaanune jaan baitichache.

16-17 Inara suujua laraajiaain, nunaaine Cana Curuaanaa Jesocurisito, Cana Inaca Cana Coaunera nii inoaenlu caje coauneein cana belaicha, nii cha bana satonohane que ainaa rijijieein aina niha curichaacheine tera. Aihute inara suujua coaraain raotojoein ereerejeein caohacha ichaain neeiche, Cana Coaunera coreniha.

### 3

#### *Cana Coaunera bajaachete, canacaanu coroatajaneine*

1 Inae satono nejeeine caa inara rai aitoreeunicha canejeraauru. Cana Coaunera bajaachete canacaanu coroatajaneinete, itolere sacutaain turuhine caa canacaanuhacha beebejei Cana Curuaanaa ere. Aihute nii aachene rijijieein caohachaain esenetaain, caohatiin raain tonoraauruhine.

2 Esenetaeniha saain cachana jaun, aihute nii aansaanein nenacaauru canacaanu que janoriteeine Cana Coaunera, nabana chatohaneein canacaanu teuruhane coataa.

3 Cana Curuaanaate inetono janonaa bana inara suujua laraajiaain inara beraicheein, nabana chatohaneein inara tiha joaenreein chaelaine coataa.

4 Nitohaneeinte esinae rauhijiriin inara coroatajaniha cureein Cana Curuaanaa caa canacaanu aitoonjoan rijijieein ichaechajeein ichaohichene coina.

5 Inara coroatajaneine Cana Curuaanaate, inara belaa in niha Cana Coaunerane coitucuhin, aiha Curisitone rijijieein chatohanai nihanatiin abaantaain neeiche.

6 Cana Curuaanaa Jesocurisito cocoainanohineeinna mijiaainetiin inara rai aitiin letoarichaanuhin, chunei cana nejera, Cana Coaunera coitucuera amihanena jerelanaala, caa

inara relaacaanune jaan tonorana jerenihane ratiriin caje amuuche.

<sup>7-8</sup> Inarate raotojoein coitucuhiche, inara aina nihacaanune bana chaelai janonaa bana nirijieein amihanelanaala nirijieein core colane inara caje lenone bajaain nenihaacaanune coitucuhiche. Nitohaneeina janotiin inetojoein amihaneein coreniha canacaanu lenone coreteein nerejetocooanulu, nabana canacaanu coreniha chaelai que latejiojoiiriin niha chuneine coataa.

<sup>9</sup> Niha canacaanu rai rauhi, inara caje chaelai bajaacaanune natiina amihaneein coreniha canacaanuhacha latei coreteein nerejetocooanulu, jericha nejeein canacaanu rijijieein neeichene coina.

<sup>10</sup> Nii inara aina nihacaanune bana inara rai aitocooanulune rijijieein, "Chunei amihanena jerenihane coa lenoniha," naacaanulu.

<sup>11</sup> Nii inara laurijiracuru tabaauru jetaote, "Nechu jataen nirijieein amihanelanaala nechu jataen amuhemujeure, joenreein acaauruhacha jerei ichaechajeein," naaina coitucuhacaanu.

<sup>12</sup> Aihana jaunne Cana Curuaanaa Jesocurisito cocoainanohi neein nihacaanune jaun aitorichaanuhin, acaauru rai aitocoichene raotojoeincha amihaneein ichaaoruhane coina.

<sup>13</sup> Coa caohacha ichaain neeichene jianichache coiinteein. Jericha nejeeincha sacuuche.

<sup>14</sup> Cha teeinti, erenaa tonoraelanaala caa quiricha cuhane aitiin, aitocooanune tonoraene; nitohanei nihane, nijiaonriha tonaain ereichenete necoejeeine.

<sup>15</sup> Nijiaonriha aina obajeein nejerateeichene. Coujuriu Cana Coaunera coreniha ita nejera neein nena tocohaneein, raotono que cuaain suujateein neeuche.

*Satonotihane rai, "Raotojoein neeuche" naa Faborone*

<sup>16</sup> Inetono janonaa bana inara coroatajaneeine cana rai raoti ichaonaa tera Cana Curuaanaate, raotojoein neeiche. Satiin inara coarajeeine Cana Curuaanaa.

<sup>17</sup> Canuna Faboro neein caraaje nihane cacoi que laenaain caa quiricha letoaaun. Catohaneeina laenaain letoaun canu.

<sup>18</sup> Satiin inara coroatajaneeine Cana Curuaanaa Jesocurisito.

Nitohanemiin.

## **Timoteeo rai Faborohacha letoai leinjiin**

*Jauriaa nejeein Timoteeo rai Faboroacha letoai quiricha*

<sup>1</sup> Canuna Jesocurisito letono Faboro neeun. Cana Coaunera corenihate jianacoo nihacache. Aihana jaun, Jesocurisito-hachate cohajihacache coaiten enacoauneein cau turuhane chabana satonoelanaala rai Cojoanonaa que nihacachene coina. Cana Coaunera, Calaohi Jesocurisito, naaonjoainte canu cocoainaan caletoe.

<sup>2</sup> Ii raine caa quiricha laenaunra cacalabi Timoteeo. C-coreniha Cana Coaunera Calaohi Jesocurisito coitucuhina jaunte, cacalabi neeinha. Raotojoein neeine coina rai raotonoque ii rausiajeein ii coroatajaneeine Cana Inaca Cana Coaunera, Cana Curuaanaa Jesocurisito, naaonjoain.

*Baasoneein cacha relaaurera que necoeraain niha Timoteone coina suujuatiha Faborone*

<sup>3</sup> Masedonia cuhanulune ajiniha ichei aitocoaulune tocohaneein nii Efesohacha neeu. Coa baaso que nii quiicha relaauri relaeranihane, coa inauhene coarajiha.

<sup>4</sup> Coa nereretanaa inoaei baasoque nereretanaaauru aina inara suujua cuaain nihache. Coatiha Cana Coaunera Aitoonjoan ichaain tonoraacachene coina cana letoaera nihei. Rauhijiriin relanajaau Cana Coaunera esenetaain tonoraauruha caohatiin saaine coina.

<sup>5</sup> Baaso coacuelanaala caohatiin inara suujua coaraain, esinaaen rauhijiriin Cana Coaunera esenetaain, ita belaaichene coinana caa caritiin inara rai laenaun.

<sup>6</sup> Baaso erenaa que ita rai ereerejeein, Cana Coaunera Ere esine tonorana jihanein raaje nitajeeuruha tabaaurune jaunna aitoon.

<sup>7</sup> Nitorijihanei cachaaurute, cacha relaeraneein nenaajerecureeein nechujataen joaenrein.

*Jeriha Acane rijijieein ichaoha cachane coinante, aitiin Naitoonjoan laeneratelu inoaelu Cana Coaunera*

<sup>8</sup> Acaihanejein Cana Coauneraachate, rauhijiriin caohacha ichae. Baasoneein ichaoha cachane coataate niicha jerei tocohaneein aitiin laenaeratelu inoaelu Cana Coaunera, Moisesa que. Aihana jaun, caohachaain rauhijiriin Cana Coaunera Aitoonjoan tonoraacachenete caohache.

<sup>9</sup> Coatiha caohacha cachaauru suujuateraanu que aitiin Naitoonjoan laenaeratiheilu Cana Coaunera. Erenaa tonoraauruhi, itolere cacha amuritoheriin suujua coaraain niha

nocoetocuri suujuateraanu quete aitiin Naitoonjoan laenaeratelu Cana Coaunera. Nechu aansai osaaonaauru, Cana Coaunera Ere tonoraauruhi suujuateraanu quete nitohanein laenaeratelu Cana Coaunera. Fojiara que suujua acatieichuru, sonajaain jaorera,

<sup>10</sup> chaenchu sinijeranelanaala nenea ene aina ichaojeracoori, ene rijijieein namute quicha aina ichaojeracoori, quicha rijijieein namute ene aina ichaojeraqui, cacha basijiauhin necoretenacaauru, casajeeuru, chaenchu “Cana Coaunera te coaraje,” naain nohanenacaauru, naonjoainuri suujuateraannu quete niicha jerei tocohanein aitiin Naitoonjoan laenaeratelu Cana Coaunera. Caohati cacha relanaanajaa caohateranein nenacaauru suujuateraannu quete, niicha jerei tocohanein aitiin Naitoonjoan laenaeratelu Cana Coaunera.

<sup>11</sup> Caa inara relaunune jaan caletoaera Cana Coaunera Ere rijijieeinte aite caa Cana Coaunera Aitoonjoan Inoaensi.

*Faboro letoaa Cana Coaunerane*

<sup>12</sup> Jataainna corojeeun, laraajiin cacha relaunune coina caletoa Cana Curuaanaa Jesocurisitona jaun. Caohachaaain rauhijiriin icharichaaunnine coitucuhana jaunte caletoaenicha jerenohin ichacaaunne coina.

<sup>13</sup> Baasoneinna Jesocurisito que erein nere tonoraaurera cairichaerichaetoonlu. Nii atiinte aitiin cacoelaaain carae Cana Coaunera. Nii bana esenetaain coitucuenihanuluna jaunna nitohanein nerejetoonlu.

<sup>14</sup> Jataen cacoelaiha Cana Curuaanaana jaunna, nii ucuaetoa caa esenetaain jereein neeun.

<sup>15-16</sup> Esinaente rauhijiriin turuha uhe caa chauratane que Jesocurisito, jianacoon osaonaauru mitaane coina. Jana canuna osaonaauru nujuaneein neeunlu niqui. Nete aitiin cacoelai Cana Coaunera, osaonaauru nujua belaiha Cana Coaunerane coitucuuruha satiin cachaaurune coina. “Charijiejieeinteeinti Faboro belai Cana Coaunera. Nii rijijieeintechu canu belaichein,” naain Cana Coaunera esenetaerate nitajenaa charanejeein nenea ichaonaa raa cureein.

<sup>17</sup> Nii coreniha coanete caohatiin chabana onaa charanejeein nenea Cana Curuaanaa que raotojoein ererejeein nihacache. Coanete acaihanejein chabana coarai Cana Coaunera ere tonoraain, caohatiin que ererejeein nihacache inoaenlu netojoein.

*Timoteeo suujuatiha Faborone*

<sup>18</sup> Nere beracuru que eletoaeratiha Cana Coaunerane rijijieein, laraajiin, neeunaain nere tonoraain ichaaura cacalabi Timoteeo.



<sup>19</sup> Tabaaaurute Cana Coaunera sacunaa jerecuruhane niha-natiin, suujua coaraelanaala neein, rauhijiriin ichacurenihane necairichanaa coaracure.

<sup>20</sup> Nitohaneeinte situurelu Imeneeo, Alejaandoro, naaonjoaunri. Nii caaijena Moconajaera que casetecaeratenajaunlu, coaiten enacoauneein Cana Coaunera que baasoneein ereeuruhane coataa. Nijiaonriha iitonai nitoanein situhine.

## 2

*Bajaebajaecuchete satiin cachaauru coroatajanemiin Cana Coaunera*

<sup>1</sup> Jauriaanejein Cana Coaunera bajaebajaecuchete satiin cachaauru coroatajanemiin.

<sup>2</sup> Bajaichenete, satiin curuaanaacuru, cocoinanacaihuri, naaonjoaunri suujuatiha Cana Coaunerane, raotojoein Cana Coaunera ere tonoraain ichaaorureein cachaauru.

<sup>3</sup> Nitohaneeinte jeere nii jianacoo cana mitaera Cana Coaunera.

<sup>4</sup> Acate satiin jianacoo neein, nere esine coitucuhin neein nihacachene jeere.

<sup>5</sup> Jana, Jesocurisitote laen, Cana Coaunera aina caohachaain nihacachene coina, nii rucuheraanu que nenea ne. Cana rijijieein cachaneein nihana jaunte naine.

<sup>6</sup> Inae nitohaneein letoaa Cana Coaunerana jaunte, raajenihane cana coreniha coroso que ohe Jesocurisito, coreniha osa caje jianacoo nihacachene coina.

<sup>7</sup> Nii jaunna Jorio niheichuru relaeraannu que Cana Coauneraacha letoanojoneein neen, rauhijiriin Jesocurisito coitucuuruhane coina. Curisito esenetaera nihanuna jaunna, rauhijiriin aitoon noanenaanelanaala.

*Caohachaain suujua coaraain neeuruha quichaauru aina enecurune*

<sup>8</sup> Nii jaunna itolere sacutain, Cana Coaunera bajaauruha satiin cachaaurune jereeun canu. Ita baijiaelanaala, raotiin suujua aina neein, biji michuin Cana Coaunera bajaa satiin nere tonoraeraaurune jereeun.

<sup>9</sup> Coa cajione jataen coreti que necoreeteeuruha enecuru.

<sup>10</sup> Coujuriu Jesocurisito esenetaeraneein nenea tochaneein cacha belaihuruhine enecuru.

<sup>11</sup> Cacha relaa relaerane, inauheneeicha aonajeein nere-laauruhine enecuru.

<sup>12</sup> Coatihachu chaen quichaauru relaauruha enecurune jerinaaun. Nijiaonria quichaauru amuritiin letoaaauruha enecurune,

<sup>13</sup> necoaunaa Ebane ajiniha, Adaan coaunaain niha Cana Coaunerana jaun.

<sup>14</sup> Cachaauru coaunaa Cana Coaunerane bana, coatiha nii Adaan coritaai Moconajaera. Acaihanejein nii Ebaachate laen coritae. Nii jaunte osa que nesaruelu nii ene.

<sup>15</sup> Nii jaunte canaanai sirihane, inae janoaane rai cuna caaun necairichanaa coaareein ene. Nete atiin jianacoon niha cuururein ichoteratenajarichain Cana Coaunerane es- enetaain nere tonoraaurera enecuru.

### 3

#### *Cana Coaunera cachaauru beraicha neein nenacaauru*

<sup>1</sup> Esinaena rauhijiriin aitoreeunni. Cana Coaunera coitucuurera beraicha neein nena jeriha chuneinete, caohati amihanenaa ichana jererein.

<sup>2</sup> Caohachain ichaohanete caohachae, neniha cotaichane caina. Leinjiin ene lananeein nihanete caohachare. Chaen suujua coaraneein nihanete caohachae. Chaen nenajaun turuhi nihane, caohachain raeraneein neinihanete caohachae. Chaen caohachain cacha relaanete nere.

<sup>3</sup> Nihein chu chaen ajetoritelanaala, cacha leratelanaala, que tonaain chaque ereiniane abaantaain, coriqui mucuhanajaacha que coacuelanaala, naaonjoain nihanete caohachae.

<sup>4</sup> Chaen, caohachain sinijiera suujuateein, bereecuru suujuateein, saain nii loreri asaae nenacaauru suujuateein nihanete caohachare. Chaen suujua acateein, erena tonorain neeuruha bereecurunete caohachare.

<sup>5</sup> Inasiinte comasai suujuatenaa inaelanaala, niheichu bereecuru suujuatenaa inaelanaala nihane, chaen Cana Coaunera coitucuurera beraiche- beraichacuru.

<sup>6</sup> Chaen chu ena Cana Coaunera aina enonaa nihane, caohacharihei leecha cachaauru amuritoheriin suujua coaraain itolere inaa nocoetohane. Charijieein teeinti ai Moconajaera, nii rijijieein situhane casetecaa Cana Coaunerane coataa.

<sup>7</sup> Chaen chu Cana Coaunera coitucuuruhi cachaauru rai nihanatiin, suujua coaraneein nihanete caohachare, nabana batocuruhane coritaa Moconojaerane, nabana baasoneein ichaane coataa. Nitohaniha Cana Coaunera coitucuurera beraichanete caohachae.

#### *Cana Coaunera coitucuurera coroatajanera- diaconooru*

<sup>8</sup> Suujua coaraneein niha Cana Coaunera coitucuurera coroatajaneranete caohachare. Chaen chu casajenete- lanaala, ajetoritelanaala, nihein chu chaen coriqui basijiauna coacuelanaala,

<sup>9</sup> chaen chu chatohaneein teeinti nerejetelu Jesocurisito, caohatiin nii coitucuera nihanete caohachare. Chaen chu nii niicha coitucui suujuelanaala nihanete caohachare.

10 Nitohaneein neeuruhane acaauru coujuhin acaauru coaracuchete, neniha acaauru rai lanaine Cana Coaunera coitucuurera coroatajaneraneein neeuruhine.

11 Jerichanejeein enecuru netonai, caohachaaïn suujua coaraain neeuruhanete caohachare. Chaenchu casajenete-lanaala, niheinchu erenacaaotelanaala neeuruhanete caohachare. Itolereneein rauhijiriin caohachaaïn neeuruhanete caohachae. Nitohaneein neeuruha Cana Coaunera coitucuurera coroatajaneraneein nenecaauru- diaaconooru enecurunete caohachae.

12 Jana quicha nihane leinjiin ene sinijieraneein nihanete caohachare. Chaenchu, sinijiera suujuateein bereecuru suujuateein, saain nii loreri asae nenacaauru suujuateein nihanete caohachare. Nitohaneein neite caohachae Cana Coaunera coitucuurera coroatajanera- diaacono neein nihane.

13 Nitohaneein caohatiin acaauru amihaneon ichacuruhanete, acaauru belaiha cuurureein cachaauru. Chaentechu jeelai amuritoheriin laraajiin Jesocurisito que cache relanaa nainecurureein.

### *Cana Coaunera ranojoihunru cachaauru*

14 Enanecoojoana turuhin ichoharaa uhene rijitojoeun niqui, nechaainti nainerichaaunni.

15 Nii jaunna inaen ichei caa quiricha letoareeunni, cojoinihanune, coujuriu Cana Coauneraacha ranojoiineeïn ne-naa nicha tei idesia neeichene jaan tocohaneein caohachaaïn neeichene coina. Cana Coaunera Ere Rauhi acateranigate neeure Cana Coaunera ranojoinunru cachaauru.

16 Jataainte caohate esinaae rauijiriin nii canaacha es-enetai Jesocurisito niqui, nete coitucuurene Cana Coaunera coitucuuruhi cachaauru.

Caa chauratane quete ecocoe Jesocurisito cachaneeïn.

Nii janate coujuhin coaraa Cana Coaunera Suujuene jana caohate.

Coujuhin coaraane janate, coarajeeure Cana Coaunera letonocuru anjeraauru.

Nii jaunte amuhemujeeïn laurilaurichuru nenacaauru cachaauru rai beebejeure Cana Coaunera coitucuurera, itolereneein caa chauratane sacutaain coitucuuruha cachaaurune coina.

Chaentechu enacoauneeïn dedeeu rae Cana Coaunera. Nitohaneinte saain coitucuhacache.

## 4

*Baaso que cachaauru relaaurea*

<sup>1</sup> Rijieeri banate Cana Coaunera ere jianeein ratiriin casaje que acaauru relaaïn, acaauru coritaa osaaonaaurune esenetaain tonoraa cuurureein tabaauru.

<sup>2</sup> Nitohaneeinte necoejenaä charaauru casaje cachaauru ere tonoraa cuurureein, niritiinte be rauhijiriin Cana Coaunera Suujue.

<sup>3</sup> Nitohaneeite ene ranaa jeriha cachane caohatiha cuurureein. Chaentechu nelanajanaa jeriha ene ne caohatiha cuurureein. Chaentechu joaenreein lenone que lenoniha cachane caohatiha cuurureein. Raotojoein coroa-jeein Cana Coaunera bajaain que neleenijiaain niha Cana Coaunera Ere coitucuhin esenetaaurera cachaaurune coina, itolere lenone coaunaain niha Cana Coaunera natiinte, que neleenijiaain niha cachane caohatiha cuurureein.

<sup>4</sup> Itolere Cana Coauneraacha coaunanohinte caohachae. Nii jaun nainiheï chaque irihacane. Nitohanihana jaunte, coroa-jeein Cana Coaunera bajaain joaereein raacachene caohachae.

<sup>5</sup> Nitohanein biha Cana Coaunera Erena jaunte caohachae. Chaenchu lenonichaachene ajiniha bajaacachenete caohachae.

### *Jesocurisito letono esine*

<sup>6</sup> Caa caitoonjoan que cana nejeraauru- Cana Coaunera cachaauru relaaïnete, esinaaen rauhijiriin Jesocurisito letono esinenein niha curiquiin. Charijieein teeinti, lenonihane baiha raotojoein nelararajiae cacha. Nii rijijieeinte Cana Coaunera ere coitucuhine laraajiin niha curiquiin, nii caohati nerelana najaan coitucuhin tonoraaine.

<sup>7</sup> Aihana jaun, casaje tonoraelanaala Cana Coauneraacha jerenohincha ichajeeincha neeu.

<sup>8</sup> Najaicharoraa cana jaberocone coinante nelate cojoanoone-tojoein necoatijiaacane. Nii amuritoheriinte nelate itolere que rauhijiriin Cana Coaunera Ere tonoraacachene.

<sup>9</sup> Esinaaena aitoon, aihane jaun esenetaaichenete ne.

<sup>10</sup> Acaihanejein Cana Coaunera esenetaacachena jaunte cana batohin, cana necoeje chanuuruhane niha natiin, neeunaain mainajeein amihanihacache.

Satiin cachate coroatajane Cana Coaunera. Jana esinaen rauhijiriin esenetaauruhanete, nii esenetaaurera coroatajaniha cureein, leeochoauru coroatajanihane amuritoheriin.

<sup>11</sup> Caritiin suujuatenajaain relanajaau.

<sup>12</sup> Enamanaa neena jaun, ii batohin, ii necoeje chanuuruhane niha natiin, coa tonoraa. Aihana jaun, atiin caohacha ichaain neute, ii coaraain ichejijieein caohachaaïn neeuruhine Cana Coaunera esenetaaurera. Caohatiin ereerejein,

caohatiin ii ichao que ichaohin, Cana Coaunera, leeochoaauru, naaonjoaainunri belaaain, Cana Coaunera Ere esenetaain, ishujua coaraain, naaonjoaain neeu atiin.

<sup>13</sup> Turuhanune reeintiaain, ita taojiaa cachaaurune jana Cana Coaunera Ere coaraain itolere bana ereretaau. Chaenchu Cana Coaunera coreniha cana nejeraauru suujuatein relanajaau.

<sup>14</sup> Jiaonriha ichei Cana Coauneraacha tei amihanenaa jianeene. Acaauru letoaa Cana Coaunera Suujuene jaunte, ichouturi ichoae biji tein, ii cocoainaaunre Cana Coaunera coitucuurera ichauhenaauru, nii niicha tei amihanenaa nainaaaine coina. Aihana jaun, coa jianiha.

<sup>15</sup> Atiin itolere bana ii amihaneeon chaaechajeein neute, taeneein naurutanaurutaain cuujiha ii amihaneeonne coaracurumiin satiin cachaauru.

<sup>16</sup> Aonaau. Caohatiin ishujua coaraain necohalajiin neein rauhijiriin cachaauru relaaau laraajiin. Nitohaneein ichaainete, nichoteein jianacoo nerequiin ii ere aohanraauru aina.

## 5

### *Cana Coaunera coitucuurera aina suujua coaraain nihane*

<sup>1</sup> Baasoneein ichaa chunei ichauhenane, coa cotaicha rijiitiin suujuatiha. Charijiein teinti chaca suujuateeine suujuateei. Nii rijijiein raotojoein belaaain suujuateeu. Chaenchu chocoalacuru belaaaine rijitoein enamanaacuru belaihu.

<sup>2</sup> Jericha nejeeinchu choba aina caoachaain neeine rijijiein enecuru aina caoachaain neeu. Jericha nejeeinchu ii baihuru aina caoachaain neeine rijijiein ranunaaauru aina netonai caoachaain neeu.

<sup>3</sup> Niha autananeein enene coroatajaneeu, esinaen rauhijiriin cairichainein nihane.

<sup>4</sup> Jana, niha calaohi, nichoala, naaonjoainne fojiaraauru nihane coitucuhin, coitucueracuru neein nihane coitucuhin coroatajanecuruhinete, nii acaauru fojiaa acaauru fojiarane acatiha tacaain cainaaauruhine, nitohaneein jeriha Cana Coaunerana jaun.

<sup>5</sup> Canaanai sirilanaala jataen jelai nihanete, Cana Coaunera bajaebajaecure janotiin netojoein autanaauru esineeu, acaauru coroatajanena nainiha Cana Coaunerane coitucuuruhana jaun.

<sup>6</sup> Jana, itolere rucuheleeuruhacha coacuhin caohatiin neruujuein raotojoein ichaonaa coaauca autananete, ninauhene nena rijijiein niha cureein.

<sup>7</sup> Caritiinchu acaauru relaaau, suujuatera latecuruhane coataa.

<sup>8</sup> Chunicoa chaelai latiha naraaichurune jana coroatajanena jerenihane choae tacaain fojiaraauru coroatajanena jerenihanete, Cana Coaunera coitucuruhi fautaeriin nereein, “Cana Coaunera coitucuhanu,” naane niha natiin, Cana Coaunera Ere tonoraenihane.

<sup>9</sup> Coa joaenreein autana curuaa laenaa, autana esine canaacha coroatajaneeni curuaacuru siricha quiricha cuhane. Caohachaaain saota choonca ajaanaca niha autanane curuaa laenaa. Chaen leiijiin quicha aina neein autana nihane, curuaa laenaa.

<sup>10</sup> Chaenchu jaiti jiniiquiin ichaohin neeuruhane caje coauneein, caohatiin bereecuru fojiara neein, rene bedaenecuruha niicha coitucuruhi cachaaurune jana caohatiin raera neein, rene bedaenecuruha cana nejeraauru-Cana Coaunera coitucurerane jana jataen belaaain raera neein, necairichaa chuneine jana coroatajanera neein, naaonjoaain neinihanete caohachare.

<sup>11</sup> Jana jaiti ena nichauhenane cataaun tiha autanane, coa curuaa laenaa quiricha cuhane. Nabana “Inae coaiteen nelanajariaunni,” naain iriha Jesocurisito raine baiha,

<sup>12</sup> Jesocurisito ere tonorana coiinteein enacoauneein nelanajaane, caseteco coaraane coataa.

<sup>13</sup> Chaenchu bajaritiin neein, le lorerichuru asae cuhin cajihaneein casaje que ereerejeein itolere cachaacha rautaa que enohane coataa.

<sup>14</sup> Nii jaunna, jaiti ranunaniha autanane nelanajaane jereeun. Nelanajain bereecuru fojiaain, rai namihaneon ichaane jereun, nihei cha que lerateein coulurujuenaa nainenih Moconajaerane coina.

<sup>15</sup> Tabaauru Cana Coaunera jianein, Moconajaera ere tonoraauruha autanaaurune jaun.

<sup>16</sup> Cana Coaunera coitucuhin esenetaeraauru enecuru, autananiha chuni naraaine coroatajanemii. Nabana jataen mainajeein amihanein coroatajanecuruha Cana Coaunera rai ita taojiaerauru cachaaurune coataa. Nitohanein ichaquichenete, esinaen cairicheinein nenacaauru autanaauru coroatajanena nainecurureein Cana Coaunera rai ita taojiaeraauru cachaauru.

*Cana Coaunera rai ita taojiaeraauru cachaauru ichauhenaauru coroatajanecuche*

<sup>17</sup> Atiin caohatiin Cana Coaunera rai ita taojiaeraauru cachaauru suujuateein beraihurera ichauhenaauru belain coroatajanecuruhine. Chaenchu acaihanejein Cana Coaunera Ere beebejeein cachaauru relaaureraacha

coroatajanecuruhine, leeochoaauru coroatajanecuruhane amuritoheriin.

<sup>18</sup> “Baca amiharateeiche aroso rojoena a quene, coa aroso quihane coataa borasa que nujuaen conajain amiharati-hache,” aitoha Cana Coaunera ere cuhanaine jaun, amihaniane coreniha quihanete caoachae. Nii rijijiein core raauruha nii Cana Coaunera Ere beebejeein cacha relaaurera ichauhenaaurunete caohachae.

<sup>19</sup> Neniha coroatajaain, nichatajaain, naaonjoain coaraaurune jana ii rai ichauhena coulurujiha chuneine coa tonoraa.

<sup>20</sup> Chaenchu baaso ichaechajeein nosatihajeein sacuha chunei ichauhenane, ita taojiaauruha cachaaurune jana, aonajeeuruha satianne urichoo mijiainetiin rai aitiin suujuateute caje coaraain casihuruhine nii leeochoaauru.

<sup>21</sup> Chunei jataain ii suujua acateeine jaan niha natiin baaso ichaane, ita taojiaauruha cachaaurune jana acaauru suujuatee, caa aitocoanne tocoaneein. Cana Coaunera, Cana Curuaanaa Jesocurisito, chaen janijiin nii niicha raauri letonocuru anjeraauru, naaonjoaihunri notaracaena caa caritiin eletoaun, aitiin nitohaneein ichaine coina.

<sup>22</sup> Ena Jesocurisito esenetaera nihane, coa Cana Coaunera rai ita taojiaeraauru bichauhenaneein enoha, nabana enoin baasoneein ichaane, coroatajaneraneein ii nerotohine coata. Aitiin ishujua coaraain neeu.

<sup>23</sup> Cunaitejerii ii suriquene rijijiein, coa jeesiaanca neeesinaacha coha. Aansijiin bino cohin coaraau.

<sup>24</sup> Inanacaa tabaauru osaque nesaruhane, “Naaonjoaainte nera,” nain que iriha chuneine latelanaala. Jana tabaauru raite inanacaene, “Naaajoaainte nera,” nain que erei colane.

<sup>25</sup> Jericha nejeeintechu nii rijijiein inanacae caohacha ichaain niha cachane. Jana jauriaanejeein inanacaenihane nihanatiinte nirijieein cuaajeein inanacaa cue.

## 6

### *Niha fatoroonne*

<sup>1</sup> Rebeecuruha fatoroon quene, nere tonoraauruhine. Nabana Cana Coaunera que ereein, nii Jesocurisito que cacha relaacachene que ereein cana que baasoneein ereeuruhane coataa.

<sup>2</sup> Chaenchu Jesocurisito coitucuhin esenetaera niha fatoroonne jerichanejeein nere tonoraauruhine. Jesocurisito coitucuha fatoroonne coreniha acaauru nejera rijijiein nihane coreniha, coa baasonein nere tonoraauruha. Nii choae jauhecotojoeriin coroatajanecurumiin nere tonoraain, Jesocurisito esenetaera fatoroon nihane.

### *Itolere coitucuha nocoetocuri*

<sup>3</sup> Caritiin relanajaeniha chuneine, Cana Curuaana Jesocurisito ere rauhi tonoraelanaala neeuruhane coataa, rauhijiriin cana relaa cana relaaaurerane jaan tonoraelanaala nenaate,

<sup>4</sup> itolere coitucuera niha nocoetoreein. Niite ita cotainaa jererein joenrein casaje coreniha nejesinajeein. Nitoneeinte ita inasinee rijitoherijitoein, ita cotaain, ita que ereein, ita esenetaelanaala,

<sup>5</sup> ita que nejesinnajeein nejerateein ita cotaairiin neeururein. Nitohaneente neeururein esinaen erenaa rauhi baitein naasaenacaauru. Nitorijia neeinchurute necoriquijiaain, nerujueleitein nenea coacuhin Cana Coanera Ere tonorana jererein inacoein. Nitohanai nihane, caje neloonaau.

<sup>6</sup> Jataaente nelate, caa chauratane que nenea rucuhele que cana suujuatelanaala, raotojoein Cana Coanera esenetaain tonoraacachene.

<sup>7</sup> Charijiein teeinti nejanoaacachene cha colane nejanoaacache. Nii rijijieintechu ohacachene, cha amaelanaala curichaachein dedeeu.

<sup>8</sup> Aihana jaun neejihha cana lenone, cana cajione naajeine, niicha aina raotojoein nihacachenete caohachae.

<sup>9</sup> Jana coriqui, rucuhele, naaonjoain taojiana jereraaurute raaje necairichaurure. Inacoein necoriquihana que sujuateinte, raajenihane necoritaain necairichaururein nitohanein nenea jereraauru.

<sup>10</sup> Caohachaai jataen coriquiicha jeriha cachane, cacha aasaeranein niha coriquina jaun. Nii corenihate Cana Coanera esenetaain tonorana jianein, raajenihane necairichaaure cacha tabaauru.

### *Jesocurisito esenetaain neunaain ichaau*

<sup>11</sup> Jiaonriha nitohanei ichaain neei Cana Coanera coitucuera neeina jaunne. Cana Coanera Ere tonoraain, Cana Coanera Ere esenetaain, Cana Coanera belaaain, cachaauru belaaain, joenreein abaantain, ishujua coaraain, naaonjoain nii ichaonaa caohachaacha sacuu.

<sup>12</sup> Arajiin aonajeeurera urichoo, "Inaen Cana Coanera Calaohi Jesocurisito esenetaain nere tonorarichaanu," naailune jaun, laraajiin neeunaain, caohachaain nii sanaachara nejeein nenea ichaonaa caohati que nemucuhin atiin ichaau. Nii ichaaine coina ichotijiaa Cana Coanera jaan ichaau.

<sup>13</sup> Itolere cachaauru rai ichaonaa tera Cana Coanera notaracae, chaen nii cocoainacai Ponsio Filato rai caohati erenaa que erei Jesocurisito notaracaena, ichei caa aitiin eletoaun.



14 Caa ichei aitocoauinne rijijiein rauhijiriin ichaau. Nabana coaiten caa chauratane que turuha Jesocurisitone bana que necocauhataiaaine coataa.

15 Inae cuu tihane banate, Jesocurisito ecotiha cureein acaihanejein Cana Coaunera- canaacha belaa satiin curu- aanaacuru curuaanaa.

16 Acate chariji bana onaachara nejeein ne. Chabana cacha turunaja nihein cono tabai jana ne nii Cana Coaunera inanacaelanaala nenea. Acate acaneein nereein itolere amuritoheriin laraajiin itolere bana coroaenohineein.

Nitohaneein neeine.

*Coriqui nebaauru suujuatihane*

17 Coriqui neba niha chuneine, coa “Chabana, cha lateriaunni,” naain leeochoauru que necohasitaain niha. Enaaichate nitajihane, nitajeeoricheein coriqui. “Cana coroatajanerihani Cana Coaunerana jaun cha lateriaunni,” naauruhine. Acate canaacha latei teraneein ne, raotojoein cha latelanaala nihacachene caina.

18 Aihana jaun cairichaihuru coroatajanejeein neein, raotojoein neein chaelai latecuruha leeochoaurune, acaauru rai tihajeein neeuruhine coriquihonaauru.

19 Nitohaneein neeuruhanete, nii acatiha tacaain belainaanca Cana Coaunerane, nii niicha tei ichaonaa chabana nitajenaachara nejeein nenea raa cuurureein, necairichanacaauru coroatajanecuruhane jaun.

*Satonotihane rai Timoteeo suujuatiha Faborone*

20-21 Caa ichei caitoonjoa erenaa rauhi tonoraau inoanlu netojoein. Coa caa chauratane que ecocohin nenea erenaa tonoraa. Coa, coitucuhera rijitiin turuhin casaje que inara relaeranihane coa tonoraa. Nitohanai tonoraauruhane, Cana Coaunera bero rauhi edaa cuuruha tabaaurune jaun.

Ichoelaain ii beraaine Cana Coaunerara Timoteeo.

Inaen saa.

## **Timoteeo rai Faborohacha letoai coroataja**

*Coaiteen enacoauneein Timoteeo rai quiricha laenaa Faborone*

<sup>1</sup> Jeriha Cana Coaunerana jaunte caletoe, Jesocurisito que cachauru relaanune, esenetaauruhane ichaonaa esine raauruhane coina.

<sup>2</sup> Ii raine enacoauneein laenaunra quiiha belai cacalabi Timoteeo. Raotojoein neeine coina, rai raotonoque ii rausiajeein ii coroatajaneuruine Cana Inaca Cana Coaunera, Cana Curuaanaa Jesocurisito, naaonjoain.

*“Nariha,” naain ichoreniha Cana Coaunera corojeeun*

<sup>3</sup> Jerichanejeein aichejetocuruha caferateracurune riji-jieina Cana Coaunera belain, nere tonoraain casuujua coaraain neeun. Itolere banana janotiin netojoein Cana Coaunera bajaebajaecaunne jana casuujuanaha neeoritohine, “Nariha,” naain ichoreniha Cana Coaunera corojeeun.

<sup>4</sup> Itolere banana inonta baca raainaine coaujeeun. Nii jaunna ichoaranaa jereun, jataen raotojoein raachoojoein nihanune coina.

<sup>5</sup> Ishuujua coarain Cana Coaunera esenetaaine quena, casuujua ereerejeun coaucaunne. Jerichanejeein techu Cana Coaunera esenetaaurelu edaae Loira, choba Eonise, naaonjoaihunri. Nii jaunna, “Daae, rai neba, naaonjoaihunri riji-jieinte esinae rauhijiriin Cana Coaunera tonorae Timoteeo,” naain casuujua ereerejeun.

*Atiin coejelanaala, “Canacaanu Curuaanaa Jesocurisito ere tonoraera nichaaun” naain joaenrein cache rai beeu.*

<sup>6</sup> Nii jaunna ichei aitoon, atiin enacoauneein que nemucuhin, nii Cana Coaunera tenojoin amihanenaa ichaaine coina. Nii ichouturi choae cacoi meecanune jana Cana Coauneraacha tei amihanenaa ichaau.

<sup>7</sup> Coa casiha. Coatiha casiinaa najaannu que rai esenetaera suujua corihe Cana Coaunera. Laraajiin, neunaain, Cana Coaunera, leochaauru, naaonjoain belain nererojoecaelanaala neein, suujua coaraain nihane coinete esenetaera suujua core Cana Coaunera.

<sup>8</sup> Atiin coejelanaala, “Canacaanu Curuaanaa Jesocurisito ere tonoraera nichaaun,” naain joaenreein cache rai beeu. Coa caresero cuhane caseteco neein nihanune que necoejiha, Jesocurisito que cache relaanune coreniha caseteco neein nihanune jaun. Aihana jaun, iitonai Jesocurisito que cache

relaaine coreniha, iitonai rohecaauruhane, atiin laraajiin neeunaain neeu. Ii coroatajanerichaaain Cana Coaunerana jaunte, abaantaain neunanaa naineriquiin.

<sup>9</sup> Caohachaaain nihacachene que ainaa tocohaneeinte, cana cotijjaain cana rae Cana Coaunera, acaihanejein nere tonoraera neein nihacachene coina. Niritiin jauriaanejeein aitiin cacha coaunaane jaunte, Jesocurisito cacha nichaachene coreniha cana belaaain cana rae Cana Coaunera.

<sup>10</sup> Nitohanihana jaunte jianacoon cana teranu que Jesocurisito letoae Cana Coaunera, coaraain coitucuhacachene coina. Cana coreniha ohin ichanaa Jesocurisitona jaunte, ohacachene necairichanaa coaraelanaala, neculucohin on-aacharanejeein nerichaachein coaiten turuha Jesocurisitone.

<sup>11</sup> Nii jaunte canu cocoaain caenoain caletoe Cana Coaunera, rai nere beebejeein Jorioniheichuru relaane coina.

<sup>12</sup> Nii jaunna chaque casilanaala nere beebejeein cachaauru relaane coreniha, caa catohanein caseteco neein neeun niqui, nena coejelanaala caa neeun, cana coroatajanera coitucuhanune jaun. Acate laen naine cacorataanein cacoraiha ne, coaiten enacoaunein turuhane reentiaain.

<sup>13</sup> Nii jauriaa ichelaanulune rijijieein ichaechajeein neeu. Jesocurisito cacha nichaachene jaun, coanete Jesoso esenetaain, Cana Coaunera, leeochoauru, naaonjoain belaaain nihacache.

<sup>14</sup> Cana suujua cuhane ichaoha Cana Coaunera Suujuena jaun uhaain, atiin que neeunaain nii ichei Cana Coauneraaacha tenojoin erena rauhi tonoraain ichaau.

### *Cacoelaain cacorataaniha Onesiforo ne*

<sup>15</sup> Nii coitucuhine tocohaneeinte caque jaolecoore saain Asia cocoaichacuru. Fijelo, Eremojene, naaonjoaaihunri nihanatiinte saain caque jaolecoore.

<sup>16</sup> Onesiforo sinijiera, bereecuru, naaonjoain belaaain coroatajaneine Cana Coaunera atiin carai, araai saain cacoelaain cacorataanihane coreniha. Acate caseteco neein nihanu natiin, cacoreniha necoejelanaala cacorataane.

<sup>17</sup> Cau Romau turuhinte, mainajeein amuhemujueein caariin, tabiicha cauruhin atiin cacorataane.

<sup>18</sup> Nii choae tacaain techu, nii Efesoo nihaca jiniiquiine bana, jataain cana coroatajanelu nii Onesiforo. Nii coreniha atiin belaine Cana Curuaanaa Jesocurisito, inae coaiten cau chauratane que turuhane bana.

## 2

*Coujuriu Jesocurisito ere tonoraera neein nenea tocohaneei necairichanaa abaantaain neeu*

<sup>1</sup> Laraajiin atiin neeunaau, ichorataaniha Jesocurisitona jaunra cacalabi.

<sup>2</sup> Cha teeinti letoaera nihane erena tonorain ichae, nii coaraain relaaute leeochoauru relaera neein neeine. Inae araai saain cachaauru relaanune jana, aonajerejetohilune jaun, nii rijijieein acaauru relaa.

<sup>3</sup> Charijiein teeinti letoaa acaauru curuaanaane, atiin necairichanaa abaantain ichacure caohati soondarooru laraajiuruhane. Nii rijijieein coujurihu Jesocurisito ere tonoraera neein nenea tocohaneein necairichanaa abaantaain neeu.

<sup>4</sup> Joaenreein cacha rijijieein ichaonaa nainihe soondaro. Curuaanaa ere tonoraain nihanete ne. Nii rijijieein chu cana Curuaanaa neein niha Jesocurisitona jaun, abaantaain nere tonoraacachenete ne, rai letono neein nihacachene jaun.

<sup>5</sup> Charijieein teeinti necoatijiaacane, cacha amuritona nainenihaca necoatijianaa beraicha ere tonoraain necoatijiae nihacane. Nii rijijieein techu nii Moconajaera amuritona nainenihaca Cana Coanera Ere tonoraenihacane.

<sup>6</sup> Charijiein teeinti temule jaacane jana inae nihane, tonajelanaala caje raain que lenoneein nihacache. Nii rijijieein techu Cana Coanera tenojoin amihanenaa ichacaachene, tonajelanaala raotojoein nerichaacheein, itolere que cana belairichaaain Cana Coanera jaun.

<sup>7</sup> Caa caitoonjoan que ishujua ereerejeein coaacute, coitucueeneine ichorataanemiin Cana Coanera, aonaain coitucuhine coina.

*Jesocurisito que coaacu*

<sup>8</sup> Cana Curuaanaa inoainsi Rabiri feratenojineein niha Jesocurisitone que ishujua ereerejeeu. Acate ohane caje ichanae.

<sup>9</sup> Nii beebejeein relanajaanune corenihate, leeocho ataebinae chara tocohaneein *cadena* que canu cositeein, catohaneein cacasetcaure niqui, nete caa quere cacha relaanune jaan cositena nainecurene laen.

<sup>10</sup> Nii jaunna itolere necairichanaa abaantaain atiin Cana Coanera janiinohinchuru relaaun, Jesocurisito coreniha jianacoo neein, nitajenaa charanejeein neeuruha Cana Coanera janiinohinchuru cachaaurune coina.

<sup>11</sup> Esinaena rauhijiriin aitoreeunni.

Cana Coanera esenetaain ohacachenete aina ichaorichaachein.

<sup>12</sup> Necairichanaa abaantaacachenete, aina rai Cojoanona que nerichaachein.

Que jaolecohacachenete, acaetonai cana que jaolecoreein.

<sup>13</sup> Cana aitoonjoan ichaenihacachenete, aca laen naitoonjoan ichaa cureein.

Nitohaneein laen niha acana jaun.

*Caohachaa'in suujua coaraain niha Timoteeone*

<sup>14</sup> Caohachaeniha nitohanaina jaunna ichei aitoreeunni, suujuatenajaain neeine coina, nabana nitohaneein neeu-ruhane coataa. “Coa erenaa laaojiriicha coreniha ita co-taine rijitocoache,” naain Cana Coaunera Ere beeurera su-juateeu, atiin Cana Coaunera notaracae. Nelatihei erenaa laaojiriicha coreniha ita cotaicha rijitiin iriha cachane, na-bana que nererojoecaain neeuruha aohanraaurune coataa.

<sup>15</sup> Atiin naineine jaun uhajein Cana Coaunera Ere que relanajaaun rauhijiriin, charijieein teeinti ai leeinjiin cache, laraajiin amihanihane letoaera que necasaene nii rijijieein Cana Coaunera acatiha caohatiin ichei amihanenaa niicha tei ichaa. “Caohatoha chamijianeeonra,” naain ichei iriha Cana Coaunerane coina. Jana rauhijiriin relanajaeneeinete ii necoeje chanureein Cana Coaunera.

<sup>16</sup> Aihana jaun, coa Cana coaunera coitucuruhi rijitiin erenaa baaso que irihache, nabana nirijiein cuaajein Mo-conajaeraacha ere tonoraachene coataa.

<sup>17</sup> Charijieein teeinti, nijiriha cachane, inae suujua lomoha nii cunaine ohe. Nii rijijieein techu, nii erenaa baaso que ereerejeein tonoraachene, inara suujua lomoha nii erenaa baasone nitajiha curiquicheein. Nii corenihate nitajeeure Imeneeo, Fileto, naaonjoaaihunri,

<sup>18</sup> “Chabana oo caje enacoauneein nejaberecaain nichaauraa'in nerinaain cache,” naauruhana jaun. Niritiin ereeuruhana jaunte, nererojoecaure acaauru aohanraauru tabaauru.

<sup>19</sup> Nii jaun, “Cana Coaunerate esinaen esenetaeraauru su-ujua coitucue. ‘Cana Coaunera coitucuera nichaaun,’ naain iriha chunei cachane, baasoneein ichaohane jianemiin,” naa Cana Coaunera Erena jaunte, esinaen Cana Coaunera cacha-neein nihacachene coitucuhacache, inae nii jianeein niha-cachena jaun.

<sup>20-21</sup> Charijieein teeinti coriquihona loreri asaee ne itolere coata coreti caje ichanohin ojoaichu, baichaje, atane caje ichanohin ojoaichu, baichaje, darohe, enuha caje ichanohin jecoro, coshara, erauru, naaonjoain; tabaauru nelateein joenreein lenone curunu que; jana tabaauru nechua jataain joenreein calani joanaana jaannu que nelatei. Nii rijijieein

techu, osa jianein Cana Curuaanaa Jesocurisito ere tonoraacachene, nelatiha curichaachein Jesocurisito cachanein joenrein amihanenaa caohati ichacaachene.

<sup>22</sup> Aonaau. Enamanaa neeine rai caohacha tocohaneein nenea baaso caje naururuu. Suujua coaaraauru cachaauru aina jiniiquiin Cana Curuaanaa bajaebajajeein neeu. Cana Coanera tenojoin ichaonaa rauhi sacuhin, esenetaain Cana Coanera, chamute cacha naaonjoain belaa'in raotojoein neeu.

<sup>23</sup> Casaje que ita rai ereerecuruha leochaurune coa iriha, nabana ita baijiaain ita cotaachene coataa.

<sup>24</sup> Nainihe'i Cana Curuaanaa Jesocurisito ere que cacha relaeranein nenea namute cacha aina nejerateein nihane. Itolere cacha aina jerichanejeein ita belaa'in nihanete caohachae. Chaenchu raotojoein caohatiin rai suujua coaraain, cotailanaala relaain

<sup>25</sup> raotono que cuaain cacha suujuateein nihanete caohachae. Caitono tocohaneein nihanete jerecureniha tabaaurune nihanatiin, acaauru suujuateein acaauru suujua corenaa nainereein Cana Coanera.

<sup>26</sup> Inae nitohanein acaauru suujua coriha Cana Coaner-anete, erenaa rauhi coitucuuruhane caohachanainejeein nichotiha cuururein Moconajaera caje.

### 3

*Naaonjoaante cururein cana janonaa satono rai coaiten cajiha turuhelalajiha Jesocurisitone bana.*

<sup>1</sup> Aonaaute coitucuhi. Cana janonaa satonohelalaje raite, Cana Coanera coitucuurera cairichaeriin rerohecaa cuururein Cana Coanera coitucuuruhi.

<sup>2</sup> Nitohaneurite nelaaetoha nocoetiin, jataain coriqui mucunaa coacuhin leochaa'uru que necohasitaain, ita cotaain, niheichu fojiaraauru ere tonoraelanaala, nech'u jataain aansai ataibinaen rijijieein Cana Coanera Ere tonoraelanaala niha cuururein.

<sup>3</sup> Chaentechu necairichanacaauru coroatajanena coacuelanaala, casajenetiin, baaso ichana jerecuruhane suujua coaraelanaala ichaain, naaonjoaan cuururein. Chaen techu nech'u aansai ataibinaen rijijieein itolere ichaonaa caohacha aina nejerateein, naaonjoaan cuururein.

<sup>4</sup> Chaen techu itolere coitucuha nocoetiin niicha jerei ichaain niha cuururein, Cana Coanera arinaa coacuelanaala.

<sup>5</sup> Baaso neein ichaohinte Cana Coanera coitucuha no-coetoha cuururein.

Coa nitohanai cacha raa.

<sup>6</sup> Nabana raaichene jana, nechu aaso ene cojoaelorohe coritaain nihane coataa. Nitohaneeurite, suujua coarae-lanaala niicha ichana jerei ichaain neeurettein.

<sup>7</sup> Itolere banate niqui nerelaaurureein, nete chabana ichaonaa rauhi coitucuurenereein.

<sup>8</sup> Charijieein teeinti Moisesa ere tonoraaurene nii coroatajai benanecuru- Janesi, Jambresi, naaonjoaaunri. Nii rijijieein techu Cana Coanera Ere Rauhi tonoraaurenereein nitorijianein cachauru. Naasaheca acauru suujua cuhanena jaunte, Cana Coaneraacha tei ichaonaa rauhi aasaaena jerecureein.

<sup>9</sup> Jataain chatohanai ichacururiaain, nechu aasoneeojoaunruhane coitucuurichaaain saain cachaurune jaun. Charijieein teeinti aihure nii Moisesa ere tonorauruhi. Nii rijijieeinte situha cuurureein nitohaneuri.

*Timoteeo suujuatiha necairichanaa que Faborone*

<sup>10</sup> Ichelaanune tocohaneeinte chuhisi caohachaaain neei. Chaen techu cachauru relaanune jaan coitucuhin, quichao coitucuhin, camijianeeon coitucuhin, esenetaain quiicha belai coitucuhi. Chaen techu neunaa casujuane coitucuhi.

<sup>11</sup> Chaen techu caniha nejerateeuruhane jana abaantaa-nune coitucuhi. Antioquiha, Iconia, Listra neein curuajai-huri neseuru nihanune janate, caniha nejerateein carerojoecauruhane jana, jianacoo camitaa Cana Coaneranane coitucuhi.

<sup>12</sup> Esinae rauhijiriina caa aitoon. Jesocurisito ere tonorana jereraaurute roheca cuurureein niqui, nete

<sup>13</sup> raajenihane necairichaa cuurureein nechu aansai casajeeuru. Nechu jataain nii rijijieeinte ita coritajeiin jeelai amuritoheriin necairichaa cuurureein nechu jataain casajene jaun

<sup>14</sup> Ii laen rauhijiriin nii que nerelaaina jaun iicha esenetai sacuu. Iite nii ichelaera coitucuhi.

<sup>15</sup> Canaanai neeine caje coaaneente, Cana Coanera Quiricha coitucuhi. Nii Cana Coanera Quiricha que nere-laan esenetaaichenete, jianacoo inara tereein Jesocurisito.

<sup>16</sup> Satiinte Cana Coanera tenojoineein ne Cana Coanera Quiricha. Acate cacha relaaain, cacha suujuateein, cacha suujua raujiain, naaonjoainu que nelate, ichaonaa rauhi coitucuhin caohachaaain ichaoha cachane coina.

<sup>17</sup> Itolere Cana Coanera jerenohin amihanenaa ichaain niha Cana Coanera coitucuurerane coina.

## 4

*“Atiin aohana jerecureniha cachaurune nihanatiin beeu,”  
naa Faborone*

1 Cana Coaunera aina nii turuha uhenenu, nii cau chauratane que nenacaauru ichaonacaauru, saain onacaauru, naaonjoaihunri rucuheranu notaracaena caa mijiaainetiin eletoaaun Cana Coaunera Ere beebejeeine coina.

2 Atiin aohana jerecureniha cachaaaurune nihanatiin rauhi-jiriin beeute esenetaauruhine. Baaso ichacuruhane raotojoein raujiaain cuaain suujuatenajaaun,

3 inae ecu tihane bana erenaa rauhi aohana jerecurener-ichaaaine jaun. Nitohaneeinte, baasoneein coacuhin arajiin acaauru relaeranu ariha cuururein, acaauruhacha jerei tocohaneein baaso que relanajaeraanu que.

4 Nitohaneeinte erenaa rauhi aohana jerelanaala que janoriin amuurureein. Amuhin joenreein casajeeicha esenetaain tonoraain raaje necairichaaaurureein.

5 Ii laen ishujua coaraain necairichanaa abaantaain Cana Coaunera Ere beebejeeu, jianacoo osa caje mituhin neeuruha esenetaaurerane coina. Nitohaneein caohatiin chamijianeon ichaau.

*Inae Cana Coaunera tenojoin amihanenaa jitaanu*

6 Inae ichuunejeeonriha ohanune que tihane.

7 Inae Cana Coaunera tenojoin amihanenaa jitaanu jianelanaala rauhijiriin ichaain.

8 Inae nerichaaain canu amihaneoo core, caque banihateein Cana Coauneraacha rucujuei, acaachana inae caa cohajeeun. Inae turuha nii Cana Curuaanaa Joesio, caohacha nejesina ichara neein nenaanete, Aca nii canu amihaneoo coretereein. Coatiha canuhacha rai coreterinaain. Satiin nii turu jereein cohajeraauru rai netonaite coretereein.

*Saatono*

9 Cacoharaa uu atiin chajaaojoaain.

10 Caquete jaoleque Demasi, caa chauratane que nenacaauru itolere rucuhele cautenu rijihuru jerihana jaun. Nii jaunte naain Tesalonecau cue. Jana Cresentete Galasia bataneu cue. Jana Titote Dalmasia bataneu cue.

11 Acaihanejein Locasichate caniha ne cau. Maroco ariin cotijiaain ijiniichaain uhaau. Acate laen camijianeoo que cacorataanena naine.

12 Tiquicono laen letoaaun Efesoo.

13 Toroasihu nihanune banana Carpo loreri asaae quela ratirihunlu, uhaau carai uhine. Chaenchu nii canu quirichaauru nii quiicha laenajacoaine maajeein uhau.

14 Nii coata que amihanenaa Alejaandorote, jataain baasoneein caete niqui, nete inae cacocaeraterreein Cana Curuaanaa.



15 Coaraau. Necoeraain neeu, Cana Coaunera Ere-canaacha beebejei que nejeratihana jaun.

16 Camucuhin, cacaje bajaauruha cocoinanacaaihurine janate, cajaohin caratiriin amuure satiin. Nii coreniha jiaonriha chatohaneein tenajaa Cana Coaunerane.

17 Nii janate, canu coroatajanein casuujua lararajie Cana Curuaanaa. Nii jaunna, itolere caa chauratane que nacaauru Jorio niheichuru rai Cana Coaunera Ere beebejeeun, jianacoo neeuruha esenetaaurerane coina. Nitohaneeinte necha aansai ataibinaen leon ujuaae caje jichorocaaain jianacoon caete Cana Curuaanaa.

18 Itolere baaso cajete canu mitaain canu beraicheein, aina dedeeu nihanune coina. Coanete Cana Curuaanaa corojeein belaiacache inoaenlu netiin. Nitohaneein neeine.

*Cana Coaunera esenetaeraauru rai necoiha Faborone*

19 "Inara coaujiha jera Faboro" naain beeu, Firisila, Aquila, Onesiforo araachuru, naaonjoaihunri rai.

20 Coriintoote nedae Erasto. Jana Torofimona ratirihun Miletoo, cunaitihana jaun. Naineeine elohena ajiniha uu.

21 Eobolo, Poreente, Lino, Cularia, naaonjoaihunrite ii coaacure. Chaenchu saain cana nejeraauru Cana Coaunera coitucuurerate ii coacue.

22 Ii aina neeine cana Curuaanaa Jesocurisito. Satiin inara belaaain inara coroatajaneeine atiin Cana Coaunera.

Nitohaneein neeine.

## **Tito rai Faborohacha letoai**

*“Inara coaaucaun” naa Faborone*

<sup>1</sup> Canu Faboro nichaaunnena, nii coitucuhiche raotojeeinne rijijieein, Cana Coaunera jerenohineein rai Calaoihi Jesocurisito letono afosotoneeun. Acate caletoe, satiin chauratane sacuritaain janijiin nii ranojoihunru rai amuhemu-jueein beebelijhanune,

<sup>2</sup> rauhijiriin coreniha cana osa caje nichoteein jianacoon neein, chabana satonoelanaala nena ichaonaa teranihane cohajihacachene coina. Chabana cana coritaai Cana Coaunera. Acate nitohaneein cana rai ichaonaa tihane coina aitelu, cana rai chauratane coaunaane ajiniha.

<sup>3</sup> Inae nii jihanteein aitoahalune jaa que turuhane jaaunte, inae nii aca jianacoon cana osa caje cana mitaeranihane coitucuerateein beebelijhanune coina caletoaclu Cana Coaunera.

<sup>4</sup> Nii jaunna caa ichei quiricha laenaain letoaaunra Tito. Iite esinaen rauhijiriin canu calaohineei, cacoreniha nii canaacha esenetai Jesocurisito esenetaaine jaun. Cana Inaca Cana Coaunera, Cana Ichotera Jesocurisito, naaonjoaain raotojoeein neeine jaanu teeuruhine ii raite aina raotojoeein jianacoo neeine coina.

*Curetau Cana Coaunera coitucuurera relaa Titone*

<sup>5</sup> Nii Curetau cobenau ii ratirihanune ajiniha taone, jaiti rucuhara coina lananacaauru rucujueein, iclesiacuru nainein Cana Coaunera coitucuureraauru- canaacha relaaari coaranu que acaauru bichauhenaauru cocoainaaaine coina ichei aitoonlu.

<sup>6</sup> Nii le iclesiacuru bichauhenaauru bichauhena cocoainanohichuru, cojuriu nitohanei coaraneein nena tocuhanein suujua coaraain ichaohine, nabana que tonaain iriha chunine coataa. Chaen techu leinjiin eneecha que sinijeraaocane caohachae. Jana rai calaohichuru netonai Jesocurisito esenetaeranein, caohachaain suujua coaraain erenaa tonoraain neeuruhine, nabana baasoneein erenaa tonoraelanaala ichaauruhane, acaauru que ereein niha chunine coataa.

<sup>7</sup> Nii Cana Coaunera ranojoinuri iclesia coaraneein- acaauru bichauhenanein nenaate, jeriha Cana Coaunerane rijijieein caohachaain suujua coaraain, que Cana Coaunera- aacha icharatei ichaain rauhijiriin ichaohane caohachae. Nainihe i erenaa tonoraelanaala, namute cacha coiintetiin,

ajetoritiin, ita cotainaa rautatiin, asijiautoneein, naaonjoaain ichaohane.

<sup>8</sup> Nitohaneein baasoneein ichoaelanaala, turuhin niha cachane belaaain, cotijiaain, loreri asae raain, naaonjoaain ichaohine. Chaen techu caohacha ichaera cachaneein, caohatiin suujua coaraain, Cana Coanera que banijiaaoneein neein, chabana jeriha suujuane rijijieein ichoaelanaala, naaonjoaain nihane caohachae.

<sup>9</sup> Nii esinaen rauhijiriin aitiin relaeraalune jaacha tonoraain, acaacha esenetaain que leeochoaauru relaaine, acaauru netonai leeochoaauru suujua laraajiaain nerelaacachene jaan coitucuerateeuruhane coina. Chaen nii caohateein erenacaauru relaain acaauru suujua baaso aninoaainete, acaauru netonai esenetaauruhine.

### *Relanajaurera baaso*

<sup>10</sup> Arajiichurute, nii acaauru relaacane jaan tonorana jerelanaala, “Jorioniheichuru jaberoco macohi cari saerate-laanaala nenea, nainihe Cana Coanera esenetaeraneein ranojoineein nihane,” naain nechua jataain cha coitucuurenihane jaun cachaauru coritaaure.

<sup>11</sup> Niritiin erenacaauru erete, caohachare niritocuruhane coataa caohatihacane. Nii casaje aina cuaainte laurijiracuru aina arajii cachaauru suujua auhacaain, cachaauru coritain, arajii coriqui ranaa coaacure.

<sup>12</sup> Coaraaunachuhinti nii Cureta cobenau nenea *profeta*, nii jeelai acaauru araacha: “Satiin Cureta cocoaichacurute casajenetiin, necha ansai ataebinae rijijieein neein, bajeritiin, achotoritiin, naaonjoaunre,” naain acaauru ichao bihalune.

<sup>13</sup> Esinae rauhijiriinte acaauru ichao coaraane jaun aitelu. Aihana jaun, caohachaain laraajiin acaauru relaau, coujurihu Jesocurisito esenetaeraneein nenea tocoaneein neeuruhane coina,

<sup>14</sup> nabana, nii suujua caje rocohin relanajaaunruha Joriocurune jaancha esenetaauruhane coataa. Niheichu nainecuruhi Jesocurisito esenetaeraneein neeuruhane sainejeein que jaolequiin, nii naitoonjoan tonoraelanaala nenacaauru ere tonoraauruhane.

<sup>15</sup> Caohachaain suujua coaraain niha cachanete, itolereenein nichanaane maajeein caohachaain coanojoi ne. Jana canaacha esenetai esenetaelanaala nenaate baaso nejesina que coacuhin itolere bana baasoneein ne, nichanaane maajeein, nechua jataain baasoneein coacuhin cha ichacuruhane jaun.

16 Cana Coaunera coitucutohate niqui nocoetocure, nete acaauru ichanaacha caje coitucunojoinecure baasonee-  
 ruhane. Namute cacha cotairiin, namute cacha que erena-  
 jaauharitiin, erenaa tonoraelanaala neein, nii charijibana  
 caohacha ichaain neeuhi.

## 2

### *Nohanelanaala relanajaacachene jaan*

1 Caohachaaain nii ichelaanune jaan tonoraain, esinae  
 rauhijiriin que acaauru relainete caohachae.

2 Nii acaauru bichauhenaurute, esinae rauhijiriin tonaain  
 ereeuruha chaachacuruhane coinane, nii naitoonjoa ichaain  
 ichaaoruhane caohachae. Esinae rauhijiriin nii niicha es-  
 enetai rijijieein neein, satiin belaaain, laraajiin, naaonjoaain  
 ichaohine, itolere necairichanaa abaataain nena nainihane  
 coina.

3 Jerichanejeein techu, coujuriu inara bene  
 bichauhenauru jeriha Cana Coaunerane rijijieein ichaohin,  
 ajetoriaanelanaala, erenacaotelanaala, naaonjoaain que  
 coacuelanaala, caohachaacha que coacuhin neeuruhane  
 caohachae.

Coujurihu ranunauru bichauhenaneein nena tocoha-  
 neein, ranunauru notajaain,

4 rai sinijeraauru aina rai bereecuru belaaain neeuruha  
 ranunaurune coina acaauru relaain,

5 caohachaaain itolere que nainaaain suujua coaraain, loreri  
 asae nenacaaurune maajeein beraain, osa que nesaruhin,  
 barijiitiin, naaonjoaain neeuruhane coataa acaauru suuju-  
 ateein nihanete caohachae. Chaen acaauru sinijeraauru  
 aina ita suujua rijijieein coacuhin neeuruhine, nabana  
 tonaain Cana Coaunera coitucueraneein neeuruhane saine-  
 jeein acaauru que iriha cachane coataa.

6-7 Jerichanejeeinchu caohacha nejesina ichaain nii enam-  
 anaacuru notajaain acaauru que corajerateeu. Acaauru re-  
 laaine caohachaaain ii suujua coaraain, coujuriu ichauhen-  
 neein nena tocohanein,

8 raotojoein acaauru rai ereein canaacha esenetai que  
 aitiin acaauru relaau, nabana tonaain baasoneein cana que  
 erenaa nainiha chunine coataa. Nitohanein ichaainete cana  
 que nocoejeeurureein nii acaauru relaacane jaan caohatera  
 rijitiin erenacaauru.

9 Chaen rai fatoroon ere tonoraain, letoanajaa acaauru fa-  
 toroone jaan ichaain, tonaain baasoneein tonorana coacue-  
 lanaala neeuruha rai letononein nenacaaurune coina suu-  
 juatein relanajaa.

10 Jiaonrihachu asijiauhin neeuruhane. Baaso coacue-  
 lanaala caohatiin suujua coaraain neeuruhine. Nii banate,

acaauru ichao caje jataain caohatoha Cana Coaunera cana ichoterateraneein nenea que acaauru relaacachene jaan coaracurureein satiin cachaauru.

<sup>11</sup> Cana Coaunerate cana belaitohane coaratiha, satiin caa chauratane que rai cachaneein neinichaachene ichoteraanu letoaelu.

<sup>12</sup> Acate cana relae, Cana Coaunera coitucuhichuru rijijeein baaso ichaaechajeein nihacachene jianein, caohacha que coacuhin, coujuriu Cana Coaunera cachaneein nenea tocohanein rauhijiriin Cana Coaunera corojeein caa chauratane que ichaohacachene coina.

<sup>13</sup> Nitohaneeinte nii cana rai tihane coina naitoonjoan nainaane cohajeein raotojoei ichaonaa que ichaohin, turuha urichaain nii Cana Coaunereaneein cana ichoteraneein necaohachaain nenea Jesocurisitone cohajeein nihacache.

<sup>14</sup> Acatechu itolere baaso canaacha ichai cana osa caje cana ichoteratihane coina rai jaberoco teein nelu, oha cana corenihane, nii baaso caje cana coulucohin rai cachaneein caohacha ichanaacha que coacuhin nenea coina ichaelu.

<sup>15</sup> Nii ichei aitocooaunne rijijieein, coointeeturuhane niha-natiin, acaauru que corajerateein acaauru relaau, coujuriu cocoinanohineein nenea tocohanein, nabana nii relana-jaaine jaan tonoraelanaala ii que jaolecoha chunine coataa.

### 3

*Esinae rauhijiriin caohachaain suujua coaraain neuruha Cana Coaunera coitucuerane*

<sup>1</sup> Nabana baitecuruhane coataa, acaauru rai nacoaauneein aitoote, coujuriu Cana Coaunera coitucueraneein nenea tocohanein, rai curuaanaa, cocoinanacaaihuri, naaonjoainuri ere tonoraain itolere bana jatoroaain neeuruhine caohacha nejesina ichacuruhane coina.

<sup>2</sup> Jiaonriha tonaain baasoneein chuni coacuhin ereein neeuruhane. Niheichu ita sonaa coacuelanaala caohacha cachaneein ichaohin, jiniiquiin ita belaaain, caohachaain neeuruhane coarateein neeurumiin.

<sup>3</sup> Jauriaalute cana netonai tonaain irihacachene joaen-reein ererejetocoaache, Cana Coaunera ere tonoraelanaala nechu jataain nitajenaaneein neein, cana suujua letono rijijieeincha itolere baaso ichaonaa ichaaechajeein nerejeto-coachelu. Nitohaneeinte baaso ichaaechajeein ichaonaa jana, cana que nererojoecaeriin nerejetecuruha leeochoaaurune rijijieein ita que nererojoecaeriin nerejetocoaachelu.

<sup>4</sup> Nete satiin caa chauratane que cachaneein ichoainichaachene belaitohane coaratiha, satiin cachanichaachene ichoteratelu cana osa caje Cana Coaunera.

<sup>5</sup> Coatiha rai caohacha ichacaachene jaun nii cana ichoter-  
atiheilu. Cairichaaajoaain cana coaraane jaunte, nii cana  
osa caje cana coulucohin cana ichoteratelu. Rai Suujue  
aina cuaain cana coulucohinte, nacoauneein nejanoaain ne-  
naa rijijieein nena coina cana rai nacoauneein ena nena  
ichaonaa telu Cana Coaunera.

<sup>6</sup> Jataain cana belaitohane jaunte, rai Calaoihi cana Ichoter-  
aneein nena Jesocurisito aina cuaain, cana rausiaaeca jelai  
amuritoeriin rai Suujue telu cana rai Cana Coaunera,

<sup>7</sup> itolere ujuaihoneein nena caje caohachaaain neein nii  
chariji bana sanaachara nejeein nena- canaacha cohajei  
ichaonaa que nena coina.

<sup>8</sup> Esinaetechuhisi nitohaneein cana osa caje cana coulu-  
cohin cana raain ne Cana Coaunera. Nii jaaunna ichei  
aitoon, nii Cana Coaunera esenetaeraauru itolere bana cao-  
hachaacha que coacuhin neeuruhane, nii leecha relana-  
jaera ere tonoraelanaala neeuruhane coina acaauru rai aito-  
hine coina. Nitohaneein ichaohacachenete, jataain cana rai  
nelateineein nereein.

<sup>9</sup> Nete laen nii cana rai aitocuruhalu cana coitucueracu-  
rune esenetaain, Moisesa aitoonjoan que ita rerohecaain  
naaonjoaain nena naineneei. Niite nechu jataain nohane-  
naaneein nii chaque nelatene cana rai.

<sup>10</sup> Niha nitohanei que cachaauru relaain lerunaa jererane,  
coroata saain, nichata saain, naaonjoaain cotijiaain rai aito-  
hine jana chere tonorana jerenihane, jelai caje sitaaute  
amuhine.

<sup>11</sup> Nitohaneein nenacaauru cachaaurute itolere osa que  
nerotocuruhane jaun aihure. Nitohaneeinte acaauruhacha  
ichai caje osa que nesarucuruhane coanojoi ne.

### *Nicopolisihu canu cohacu*

<sup>12</sup> Inae ichene Artemasi letoaenihanune, Tiquico letoaa-  
nune, atiin Nicopolisi cuhin canu cohanihute ecu ita coara-  
caa. Ecune jelarona bitoanune coina ucuae ureeunni.

<sup>13</sup> Chaen nii ecu nena *abogado* Senasi aina Apolo coroata-  
janeun acaauruhacha latei teein, nabana nii cuuruhane-  
jaun turuuruhane reetiaain lanaa acaauru rai acaauruhacha  
lateine coataa.

<sup>14</sup> Canaacha relainein nenacaauru, itolere que caohacha  
ichaaain, cha latein niha chunucohane coaracuruhane  
coroatajanena que nerelaaurumiin, nelateineein niha  
acaauru ichaone coina.

### *Raotojoein neeuruhane coina aitiin necoiha Faborone*

<sup>15</sup> Satiin caniha cau nenacaaurute ii coaacure. Nii ecu ne-  
nacaauru canaacha esenetai Jesocurisito coreniha canaacha  
belaihuri- cana nejeraauru coaucaaune beu acaauru rai.

Satiin raotojoein neeichene jaanu tein, inara coroatajane-  
miin Cana Coaunerate raotojoein neeiche.

## **Filemoon rai Faborohacha letoai**

### *Acaauru coaucane biha Faborone*

<sup>1</sup> Canune Faboroneein Jesocurisito coreniha caresero cuhane neein cana nejera Timoteeo aina, ii canacaanu amihaneeo que canacaanu coroatajaneraneein neeine rai, caa quiricha laenaain letoaacaanura Filemoon.

<sup>2</sup> Chaen Jesocurisito ranojineein iclesianein nenacaauru- ii loreri asaae ii aina netaojianacaauru, chaen canacaanu amihaneeo que canacaanu coroatajaneranein nenacaauru- cana nejera ene neein nena- Apia aina Arquipo, naaonjoainuri rai netonaine caa laenaain letoaacaanu.

<sup>3</sup> Cana Inaca Cana Coaunera, rai Calaohi Jesocurisito, naaonjoainuri jeelai amuritoeriin inara coroatajanecurumi- inte raotojoein neeiche.

### *Coichana aina cutaain belaina inaain esenetaain niha File- moonne*

<sup>4</sup> Cana Coaunera bajaanune naineeine, itolere bana ii coacuhin Cana Coaunera corojeeun,

<sup>5</sup> Cana Curuaanaa Jesocurisito belaaain jataain esenetaaine rijijieein satiin Cana Coaunera cachanein nenacaauru be- laaine beeuruhane jaun.

<sup>6</sup> Nii jaunne ii canacaanu rijijieein acaacha esenetaain neeine jaun, jataain canacaanu rai caohacha icharanein, canacaanu coroatajaneranein niha Jesocurisitone coitu- cuhin neeine coina, Cana Coaunera bajaaun ii rai.

<sup>7</sup> Jataaina jeelai amuritoheriin corajeein rachoojoeun ca- suujua cuhane. Jataainte caohacha ichaai canejera, Je- socurisito esenetaeranein nenacaauru belaaain, acaauru su- ujua nunaaine jaun.

### *Atiin canu coreniha ii letono Onesimo raau.*

<sup>8</sup> Canu Jesocurisito rai afosoto nichaaunne jaunte niqii ne canu rai rauhi, iicha chanenu ichaaine coina ii letoaanune coina.

<sup>9</sup> Nena raujiaain nii canaacha belaaeinein canaacha esene- tai coreniha ichei aitoreeunni. Canuna Faboroneein- inae biinaanein- Jesocurisito coreniha caresero cuhane netiin ichei aitoon,

<sup>10</sup> cau cajinichaain caresero cuhane neein, Jesocurisito coreniha cacalabi rijijieein nena Onesimo belaaaine coina.



11 Jauriaalute niqui ichei chaque nelatelanaala, ii letononeein nelu Onesimo. Nete laen inae ena jiniiquiin cana rai jataain nelateinneein ne.

12 Inae nacoauneein jelaiha ii rene cauhane coina letoaanu. Atiin canu coaraaine rijijieein nii coaraain neeu.

13 Cana Coaunera ere beebjihanune coreniha, cau caresero cuhane nihanune jaunne, iineein nenea rijijieein canuhacha latei icharaneein nihane coina, cau canu aina nihane jereeun niqui.

14 Nena jereneeine coataa aihane jereneeun. Nabana canu ii caje bajaanune jaauncha jereeine coataa, ii suujua caje coauneein jereeine jerichaaunne jaun.

15 Jerihane ena chabana satonoelanaala ii aina nihane coinata, ii caje amuhin nelu- nii ii letono Onesimo. Nete inae naineneei ii letono siriine rijijieein siriine.

16 Raujiaain ii letono siriine amuritoheriin, ii nejeraneei teein belaaain coaraau. Jataaina belaaain coaraau canu. Nete nii amuritoheriin joaenreein cacha rijijieein coaraelanaala, Cana Curuaanaa Jesocurisito coreniha, ii nejeraneei teein coaraaine caohachae.

17 Aihane jaun canaacha esenetai coreniha ii nejeraneein canu coaraain neeine, nii canu coaraain neeine rijijieein acaantonai coaraain raau.

18 Ichei chatohanein baaso ichaain, ichei rebequuin, naaonjoaain nihilune canu cobaraau coreniha.

19 Canuna Faboroneein ichei aitiin caraajenhane caa laenaanun. Nii ichei aitocooaunne rijijieeina, canu ichei coretereuni. Nainichaaun niqui canu que ijiabereeo coreniha rebeoquine coaaucaunne.

20 Aihara canejera. Cojuriu Jesocurisito cachaneein nenea tocohaneein caa ichei bajaanune rijijieein atiin ichaain, Jesocurisito coreniha canejeraneeine jaun canu suujua nunaau.

21 Canuhacha bajai amuritoheriin ichariquiin quere tonoraane esenetaanune jaunne caa ichei aitiin laenaanun.

22 Nii choae tacaainechu turuhanune jaanu rucuhequine jereeun, caresero cuhane nihanune jaun, cacoreniha bajaabajaaequichene tonoraain, inara coaraa uhanune jererichaaain Cana Coaunerane cohajihanune jaun.

*Ii coaacuruha raotojoein neeu.*

23 Jesocurisito coreniha caresero cuhane canu aina nenea Efaforasite ii coacue.

24 Chaen Maroco, Arisitaroco, Demasi, Locasi, naaonjoainuri canu coroatajaneranein nenacaaurute ii coaacure.

25 Cana Curuaanaa Jesocurisito jeelai amuritoheriin inara coroatajanemiin.

## Ebereeocuru rai letoai

*Rai Calaoahi aina cuaainte cachaauru rai erelu Cana Coaunera.*

<sup>1</sup> Inoaclu jetaote nere bera inoaasihuru- *profetacuru* aina cuaain araaaisaain cana inoaensihuru rai ere Cana Coaunera, ecoetacaeneein mituhelanaala, taba que acaauru sinihu, taba que letonocuru anjeraauru letoae, acaauru rai ecocohin beeuruhane coina, naaonjoaain.

<sup>2</sup> Nete laen inae enene Calaoahi que nere berate Cana Coaunera, Cana Coaunera nihane coitucuhacache itolere-neeinne coina. Nii rai Calaoahi aina cuaainte, itolere cana rai chauratane, dede, itolere cautenu rijihuru, itolere cana janonaa, naaonjoainuri coaunaain niichuru Curuaanaa neein telu Cana Coaunera.

<sup>3</sup> Nihei chunei cacha niqul Cana Coaunera coaraai. Nete caje uhin canaacaanu rene ecooca rai Calaoahine jaun, canaacaanu rohan turuaain coaracaanune jaun, “Naaonjoaan Cana Coaunera,” naain coitucuhacaanu, jeelai Cana Coaunera tocohaneein necaohachaain nichao que ichaohana jaun. Acate Cana Coaunera Calaoahineein itolere sirichaneein coaraneein ne. Acate Cana Coaunera Calaoahineein caa chauratane que ohelu, jianacoon osa caje cana mitaeranu que. Nitohaneeinte inae osa caje cana mitaeranu que ohane baiha, rai Inaca Cana Coaunera raotono nichajai que roritrone ichoae nelauriaa cuclu.

*Anjeraauru amurijiriinte cocoinanojoneein ne Cana Coaunera Calaoahi.*

<sup>4</sup> Jataain rai letonocuru anjeraauru cocoinaane amurijiriinte, rai Calaoahi cocoinaelu Cana Coaunera, acaauru amurijiriin nihane coina.

<sup>5</sup> Nitohanihane jaun, nihei chuni letono anjera rai:

“Tite cacalabineein  
canuhacha jereineein  
canuhacha teineein  
nenaaneeicha,”

naain irihei Cana Coaunera. Niheichu chuni letono anjera que:

“Leinjiin acaacha  
canu calaoahineein nihane janana,  
Canu, leinjiin  
inaca neein nereeunicha,”  
naain irihei Cana Coaunera.

<sup>6</sup> Caa chauratane que nenacaauru cachaauru que, leinjiin acaacha rai calaohineein nihane coitucueratihane coinatē laen:

“Quere tonoraain

canu coroaeequichene rijijieein,

jerichanejeein nere tonoraain

coroaeeuche satiin,”

nae, rai letonocuru anjeraauru rai, Cana Coaunera.

<sup>7</sup> Nii rai letonocuru anjeraauru quete laen:

“Canu letonocuru- anjeraaurute laen aiha cujuanane rijijieein, usi rijijieein

naaonjoaain canuhacha jerei icharaneein neeurureein,” nae Cana Coaunera.

<sup>8</sup> Jana rai Calaohi quete laen:

“Chabana sarinaain

itolere Curuaanaa neein-

itolere Coaunera neein neeine.

Chaen techu

chabana satonoenereein

caohacha ichaain neeine.

<sup>9</sup> Nii rijijieein techu

caohacha nejesina ichara

curuaanaa neein neeina jaun,

esinae rauhijiriin

baaso ichaain nenacaauru aina nejerateein,

caohacha icharaauru belairiquiin.

Nii coinane

Canu, Itolere Coaunera neein

ii Coauneranichaaunne

ii teein neein,

ii, jataain

leechaauru amuritoheriin

raotojoeein rachoojoeein

neeine coina,”

nae Cana Coaunera.

<sup>10</sup> Chaen techu:

“Ii canuhacha tei

Curuaanaa neeinete,

jauriaanejeein

nunuhe caje coauneein niha

cana rai chauratanene coina

aitiin dede coaunaailu.

<sup>11</sup> Satiin iicha coaunanojoite sareein.

Jana iite laen chabana nitajenereeni.

<sup>12</sup> Inae ecu tihane banate,

siriteein saa cajionene jaohin,

enachasine que coreein jianaa rijijieein,

janonaa coreriquiin.

Nete laen,

ii chabana satonoelanaala  
ichaoriquiin,”

naelu rai Calaohi rai Cana Coaunera.

<sup>13</sup> Nii jaun coatiha chuni, rai letono anjera rai:

“Chajaaute

caraaotono nichajai que nelaauriaena,

ii tijia asaae

iniha nejeratenacaauru

amuritiin tee te coaraaicha,”

naailu Cana Coaunera. Chabana nii Calaohi que aitothane  
rijijieein letono anjeraauru que irihe.

<sup>14</sup> Nechu raujiaain ichoteratenojineein nerichaacheeinne  
rai, cha beraneeichate suujueneein Cana Coaunera tenojoi-  
neein neure rai anjeraauru.

## 2

*Cana ichoterateraneein nenea que jaoleconaa nainihaa-  
cache.*

<sup>1</sup> Nitohanihana jaun, nere beracuru que Cana  
Coauneraacha beratei aonaain tonoraain- esenetaain  
nihacachenete caohachae. Jana nii cana rai niicha  
beratenojoin aonaain caohatiin coitucunaa saijieein  
tonoraenihacachenete, aihuruha coitucuelanaala  
nenacaaurune rijijieein nitajerichaacheein.

<sup>2</sup> Coaracuche nachuhinti, nii rai letonocuru- anjeraauru  
que niicha teratei niha nii rai jauriaanejeein nenea-  
rauhine saijieein tonoraelanaala naosatenacaauru  
cachaauru-  
esinae rauhijiriin baaso ichacuruhane coreniha caseteco  
coaracuruhalune.

<sup>3</sup> Nitohanihane jaun, caseteco caje nichotenaa naineri-  
hacacheein, nii jauriaanejeein nenea amuritoheriin, cana  
ichoteraneein nenea esenetaenihacachene. Esenetaain niha-  
cachene coinata, jauriaanejeein raaje nihane cana rai been  
nelu Cana Curuaanaa Jesocurisito. Nii baihate cana rai  
beeurelu aina amuhemujueein nota que coaraauru.

<sup>4</sup> Nii ichoae tacaain techu, cana que coitucuerate Cana  
Coaunera itolere cojoelanaacojoaihuru ichaain. Chaaen  
techu Aca jerihane rijijieein, le cache nichaachene rai niicha  
tei- Suujue aina cuaain cana que coitucuerate.

*Cana nejera rijijieein niha Jesocurisitone*

<sup>5</sup> Coatiha rai letonocuru anjeraauru, nii cabaiha neenihu  
rai Cojoanonaa caa ereerecaachene jaan coaraneein neeu-  
ruhane coina aitohi Cana Coaunera.

<sup>6</sup> Nitohanenihane quete:

“Chaneein ne cache.

Chatohanaineeina nenaane cache.

Chanuna acaacha coacuhin,

jataaen queecha coaauqui.

<sup>7</sup>Jauriaanejeeinte niqui  
ii letonocuru- anjeraauru  
cocoainaine fautaain cocoainailu.

Nete nii baiha laen,  
jataain leeochoauru amurijiriin cocoainain,  
que itolere Curuaanaa nihane comai lauriaain,

<sup>8</sup>satiin nere tonoraain  
neeuruhane coina ichaain,  
tjia asaae que nejeratenacaauru  
teilu,”

naain ne laenanohineein Cana Coaunera Quiricha cuhane.  
Nitohaneein satiin nere tonoraain nihacachane coina, co-  
coainain rai tjia asaae que nejeratenacaauru tihane coina,  
aitohane saijieein jaiti nitohaneein ichaa Cana Coaunerane  
coarahaacache.

<sup>9</sup>Nete laen, inae anjeraauru fautaain nelatihei rijijieein tu-  
ruhin nihalu carajaojoaain Jesocurisitone coaracaache. Ni-  
tohaneein turuhinte, rai chaneein nenihacachene saijieein,  
jataain cana belaitohane jaun, cana coreniha ohane coina  
ichaelu Cana Coaunera. Nii cana coreniha cairichanojoi-  
neein ohalune corenihate, itolere curuaanaacuru Curuaanaa  
neein nihane cojunacaneein necaohachaa Cana Coaunerane  
que comaitenojineein ne.

<sup>10</sup>Satiin itolerete Cana Coaunera raineein ne, niicha  
coaunanojineein niha itolerene jaun. Nii jaunte niicha  
coaunanojineein rai calaohi neein nihacachene jaun, rai  
Cojoanonaa caa baiha neeni que nihacachene jere Cana  
Coaunera. Nii jaunte cana coreniha necairichaa Jesocurisi-  
tone aina cuaain, nii aansijiiniji osa colane telu, satiin niicha  
coaunanojoinunru ichoteraneein nihane coina.

<sup>11</sup>Nitohanihane jaunte, ita Inaca que Inacaain nihacache,  
nii cana osa caje cana ichoteratera aina jiniiquiin. Nii jaunte,  
rai nejera neein inae nihacachene jaun coejelanaala: “Cane-  
jeraauru,” nae cana rai Cana Coaunera Calaohi.

<sup>12</sup>Niritorichaine quete:  
“Canejeraauru raine  
lineein neeine beebejeein,  
netaojiaain  
Ii coroaeraauru cataaun  
nenatereeunni,”

naalune, laenanohineein nelu Cana Coaunera Quiricha  
cuhane.

<sup>13</sup>Chaen techu:  
“Leinjiin Acaachane  
niicha ichai ichaane coina  
cohajereunni,”

naain.

“Cauna neeun,  
canu rai Cana Coaunera  
tenojoihunru- cacalabihuru  
ainara,”  
naain ne laenanohineein.

<sup>14</sup> Charijieein teeinti, ita araainein niha cachane, ita inihō que inihōquuin, ita coichana que coichanaain, naaonjoaen cacha, nii rijijieeinte cacha inihō que inihōquuin cacha coichana que coichanaain naaonjoaelu Jesocurisito, caa chauratane que ohin, nii cacha itajeraneein nenea moconajaera amuritohane coina.

<sup>15</sup> Nitohaneein moconajaera amuritiinte, ohin nitajeeururichaaine que satiin casiiriin ichaonacaauru- cachaauru ichoteratelu.

<sup>16</sup> Aihane jaun, coatiha anjeraauru coroatajanihane coina turuhin niheilu, Abaraau nefoeratenein nenacaauru coroatajanihane coinatē turuhin nelu.

<sup>17</sup> Nitohanihane coinatē, jerichanejeein cana nejeraneein, nihacachene rijijieein tenojoineein nelu, Cana Coaunera notaracae coujurihu cana rai saseredotecuru curuaanaacuru Curuaanaanein, cairichaaajoaain cana coaraain, cana coreniha cairichei coaraain ohane, satiin cachaauru osa que suujua acatena nainiha Cana Coaunerane coina.

<sup>18</sup> Nitohaneein raajenihane necairichanaa coaraain, cojunojoineein nihalune jaunte, rijijieein necairichanaa coaraain, cojunojoineein niha cachane coaraane, coroatajanein naaonjoaen.

### 3

#### *Moisesa amurijiriin cocoainanohi niha Jesusone*

<sup>1</sup> Canejeraauru, aihane jaun Cana Coaunera ranojoineein, inae rai cachaneein neeichene jaun, niicha icharatenohi icharaanu que niicha tei- Jesocurisitohacha que coaucuche. Nariha jataain coreniha chabana satonoelanaala esenetaacachene jaun.

<sup>2</sup> Jerihane rijijieein nere tonoraain niha Jesocurisitone jaunte, niicha icharatei icharaanu que cocoainaaain nelu Cana Coaunera. Nii rijijieein techu, Cana Coaunera cachaneein nenacaauru aina, niicha icharatenohi icharaneein nelu Moisesa.

<sup>3</sup> Charijieein teeinti, niicha jai loreri amurijiriin jataain nelateineein ne loreri ichara, nii rijijieeinte, jataain Moisesa amurijiriin nelateineein nelu Jesocurisito.

<sup>4</sup> Itolere lorerite, niha icharane jaun neein naaonjoaen. Nete laen Cana Coaunera coaunaane jaun, neein naaonjoaen itolere.

<sup>5</sup> Nii rijijieein techu, rai cachaneein nenacaauru rai Cana Coauneraacha icharatei icharaneein nihane jaun, raujiaain nota que coaraain, que niicha beratei beraneein nelu Moisesa.

<sup>6</sup> Nete laen rai Calaohi Jesocurisito, cana rai cachaneein-rai loreri rijijieein nihacachene amurijiriin, cocoaain cana inana neein telu. Nii jaunte, rai loreri rijijieein nerichaacheein, esinae rauhijiriin jerihane rijijieein neein, chabana cohajihacachene coiinteein jianelanaala canaacha cohajei cohajihacachene.

*Acaauru que Cana Coauneraacha banihatihu turuurenerichaa in rai cachaauru tabaaurune*

<sup>7</sup> Nitohanihane jaun, rai Quiricha Inoaensi cuhane:

“Enene cojoanonaa  
cuhane inara rai niicha jerei  
biha Cana Coaunerane,

<sup>8</sup> jiaonriha  
inara suujua aohana jerelanaala,  
aihuruhalu nere tonoraelanaala,  
nechu acaauru casetecaa  
Cana Coaunerane cojuhin coaraa  
cacha areroo ichatane janane  
rijijieein nihache.

<sup>9</sup> Ecute  
jenachoonca jaanacaneein  
mainajeriin acaauru notajaain,  
acaauru coroatajanichaaunne saijieein,  
acaauru casetacaanune coujuha  
quere tonoraarenelu- inara foerateracuru.

<sup>10</sup> Nii jaunna,  
nii inara foerateracuru aina obajein:  
‘Nechu itolere bana  
joenreein rai suujua cuaauruhane jaunte,  
acaauru que

canuhacha coitucueratena  
jerei coitucunaa jerecurene.’  
naain:

<sup>11</sup> Aihane jaun,  
coatiha acaauru que banihateein  
canuhacha rucujueihu  
turuururinaain,”  
naain biha Cana Coaunera Suujuene jaun ne laenanohineein.

<sup>12</sup> Aihane jaun canejeraauru, le cacha nequichene- inara netonai nabana cana rai Cana Coaunera beratei esenetaain

neeichene jianequichene coataa, que nainaan necohalajjin ichaaоче.

<sup>13</sup> Nitohaneein nenea coacuelanaala, janeein lecacha nequichene jiniiquiin ita suujua lararajiaain neeuche: “Enene cojoanonaa,” naain aitoha Cana Coaunera Quiricha cuhanena jaan que turusihane ajiniha. Nabana inara tabaauru saruhin niha osane, rijitjoeein chatohanai ichaquichene, inara netonai canaacha esenetai esenetaelanaala naitoonjoan tonoraeneeichene coataa.

<sup>14</sup> Nitohanihane jaun, esinae rauhijiriin Jesocurisito aina nenea jerichaachene, nii esenetaacachene bana canaacha cohajei que turuhane reeintiaain esenetaacachenete ne.

<sup>15</sup> Nii coinete:  
 “Enene cojoanonaa cuhane  
 inara rai niicha jerei biha  
 Cana Coaunerane,  
 jiaonriha  
 inara suujua aohana jerelanaala,  
 aihuruhalu  
 nere tonoraelanaala  
 nenacaaurulune rijijieein nihache.”  
 nae Nere Inoaesi.

<sup>16</sup> “Charijihuru Cana Coaunera ere aonacuruhane saijieein nii baiha nere tonorana jerecurenelu,” naaichena. Acaaurute, satiin Egipto batane caje Moisesaacha rocoorinelu.

<sup>17</sup> Nii jeelaihuru que techu, nitohaneein nere tonoracurenihane jaun, acaauru que nejerateein acaauru coroatajanihane jianiha jenachoonca jaanacaneein Cana Coaunerane jaun, ichataneu cacha areroo satiin ohacoaaurelu.

<sup>18</sup> Chaen techu nii jelaihuru, rai nitohaneein nere tonoracurenihane jaun, esinae rauhijiriin acaauru que baniha-teein niicha rucujuihu enoorenerichaaine que aitelu Cana Coaunera.

<sup>19</sup> Nii jaunte, esenetacurenihane coreniha nii acaauru que banihateein niicha rucujuihu turuurenerichaaine coitucuhacache raotojoeein.

## 4

<sup>1</sup> Aihane jaun, jaiti cana rai niicha teeni, rai nebetacanaa cojoanonaa tihane rai niha Cana Coaunerane jaun, ecu turunaa nainichaachene coina, jataain necohalajjin ichaohacachenete caohachae. Nabana inara tabaauru, ecu turunaa nainecurenihane coataa.

<sup>2</sup> Nitohaneein cana netonai ecu turunaa nainichaachene coinete, nii Moisesa que beratihalu acaauru raine rijijieein, cana rai netonai beratelu.



Nete laen inacojoein acaauru rai beratelu, aonacuruhane saijiein, aihuruha nii niicha beratei esenetaain tonoraer-aaurune rijijiein, acaauru netonai esenetaaurenihane jaun.

<sup>3</sup> Nete laen cana, esenetaera neein nihacachene jaun, nii Cana Coaunera aitoonjoan- nebetacana jaun enorichaacheein. Nitohanein nere tonoraaururichaaine jaun, aitorichaaine quete:

“Nii jaunna obajeein,

esinae rauhijiriin

nebetacaanune jaun

turuurenerichaaine que aitoon”

naain belu Cana Coaunera. Nete cana rai chauratane coaunaane nainaalune caje coauneein nelu, nii nebetacanajaa cojoanonaa naitoonjoa.

<sup>4</sup> Nii jaunte rai Quiricha Inoaensi cuhane:

“Caainsi janone cuhane jetaote,

itolere coaunaane nainain- bana

nebetacaelu Cana Coaunera,”

naain laenanohineein ne.

<sup>5</sup> Nii baihate coaiten rai Quiricha cuhane, nii Israelitacuru que:

“Coatiha canu nebetacana jaun turuururinaain,”

naalu Cana Coaunerane, ne laenanohineein.

<sup>6</sup> Nete, nere tonoraain ichoteratenojoein neeururichaaine aonacuruha ichoaichaniha natiin, esenetaaurenihane jaun, nii nebetacana jaan Cana Coaunera aitoonjoaun turuureniha Israelitacurune coina aitohalune saijiein, jaiti neeure satononiha nii naitoonjoan esenetaeraauru, acaauru coreenraniha nii nebetacana jaun turuheninuunru.

<sup>7</sup> Nii jaunte, nii nacoaunein le janonaa que cojoinacate Cana Coaunera:

“Enene cojoanonaa,”

naain. Nii Quiricha Inoaensi caje coitucuhichene rijijieinte, que beratiha Cana Coaunerane jaun:

“Enene cojoanonaa cuhane

niicha jerei beratiha

Cana Coaunerane,

jiaonriha tonoraeneichene,”

naain belu Rabiri.

<sup>8</sup> Nii aina cunacaaurulu- Israelitacuru turuaalu Josoene jaan jelai que, aitohalu Cana Coaunerane jana nihane, coatiha leecha janonaa berihei Cana Coaunera, rai nebetacana jaun nihacachene que aitiin.

<sup>9</sup> Nitohanihane jaunte, satiin Cana Coaunera cachanein nenacaauru rai, ne jelai tein acaauru que banijiaain nebetacaauruna jaanu.

<sup>10</sup> Charijieein teeinti itolere coaunaane nainaan nebeta-caelu Cana Coanera, nii rijijieein techu, rai namihaneeo caje nebetacaa aicheein, nii Cana Coanera nebetacanajau turuhin nei.

<sup>11</sup> Aihane jaun, nii nere tonoraelanaala nenacaauru rijijieein nenea coataa, atiin caaintati ichacaachene coina cana letoaane nihanatiin nere tonoraacachenete ne, nii rai nebetacanajau turunaa nainichaachene coina.

<sup>12</sup> Nii cana rai Cana Coanera beratenojoi Erenaate, cana ichao coreein, cana rai leecha ichaonaa teraneein, naajoaineein nenea ne. Acate aihha soondarooru rai sabere-jerane ajinaain nenaane amurijiriin nihane jaun, cana suujua cuhane enohin cana suujuene maajeein coitucue. Nii jaunte cana suujua cuhane canaacha coacui, canaacha ichana jerei, naaonjoainuri baasoneein, caohachaneein, naaonjoane coitucue raotojoein.

<sup>13</sup> Nitohanihane jaun, nihei chuni Cana Coanera coaunanojoneein nenea, que nasiha nainera. Acate inae ecu tihane bana rai canaacha beenei coitucue.

#### *Saseredotecuru curuaanaa Curuaanaa Jesoso*

<sup>14</sup> Cana Coanera Calaoi Jesusote, acaihaniji cana rai saseredotecuru curuaanaacuru Curuaanaa neein dedeeu cuelu. Aihane jaun, leinjiin acaacha esenetaain cohajihacachene rijijieein, itolere bana jianena coacuelanaala beebjeein, acaacha cohajihacachenete caohachae.

<sup>15</sup> Acate cana rai saseredotecuru curuaanaacuru Curuaanaa nihane jaun, coujunojoinichaachene enaacha osa que nesaruna nainichaachene coitucue; acaentonai aihacachene rijijieein coujunojoneein nerejetohalune jaun. Nete laen, nii saijieein chabana osa que nesaruenelu.

<sup>16</sup> Aihane jaun, chaque tonajelanaala, atiin cana belaiha Cana Coanera rori- *trono* rohan netichaachenete ne; cairichaojoaain cana coaraain, latichaachene naineein cana rai caohacha ichaain cana coroatajanena nainihane coina.

## 5

<sup>1</sup> Satiin saseredotecuru curuaanaacuru curuaanaate, cachaauru jana janijiin, Cana Coaneraacha teineein ne, aca cachaauru osa coreniha, Cana Coanera rai itolere teein, inihocuru mocoeranu *sacrificios* que nihane coina.

<sup>2</sup> Nii jaunte acaentonai joaenreein cacha rijijieein nihane jaun, cairichaojoaain-cha coitucuelanaala nenacaauru, nitajerai nenacaauru, naaonjoainuri coarae.

<sup>3</sup> Nitohaneein joaenreein cacha rijijieein nihane jaunte, rai nosa, cachaauru osa, naaonjoain coreniha, Cana Coanera rai itolere lenonecuru *sacrificios* sohin mocoee.

<sup>4</sup> Nihei chuni raajenihane jerihane rijijieein, saseredote neein cocoainanohineein nei. Aaroon janijiin raain cocoaainalune rijijieein, raain cocoaainaa Cana Coaunerane banaachate laen saseredote neein nenea naine cacha.

<sup>5</sup> Nii rijijieeinchu coatiha raajenihane saseredote neein nihane coina, cocoainanohineein niheilulu Jesoso, Cana Coaunerate cocoaainain nelu. Acate rai:

“Iite canu calaohineein,  
enene canuhacha teineein  
neei,”  
naelu.

<sup>6</sup> Chaen techu, rai Quiricha Inoaensi cuhane:

“Iite chabana satonoelanaala  
saseredote neein neriquiin,  
aihalu Melquisedee ne rijijieeincha,”  
naain ne laenanohineein.

<sup>7</sup> Jaiti cana rai chauratane que ichaohane bana, atinaaururichaaaine caje ichoteratiha Cana Coaunerane coina, jataain chanaain, caje bajaa Jesocurisitone janate, jataain nere tonoraeranihane jaun, coroatajanelu nii cairichaaaururichaaaine abaantana nainihane coina rai Inaca Cana Coaunera.

<sup>8</sup> Nitohaneente Cana Coaunera Calaohinihane saijieein, necairichaaanaa coaraain nelu Jesocurisito, jeriha rai Inaca Cana Coaunerane rijijieein nenea jerenacaaun.

<sup>9</sup> Nitohaneein jataain Inaca ere tonoraeraneein nihane jaunte, Aca, satiin nere tonoraain neinichaachene ichoteraterraneein ne.

<sup>10</sup> Nii jaunte Melquisedee rijijieein nenea saseredote neein cocoainaelu Cana Coaunera.

*Jataainte elunae esenetaain nihancane jianichaane.*

<sup>11</sup> Niha jataain arajiin inara rai irihanune jaanu niqui. Nete jataain caaintate inara rai bihanune, cha aonaquichene nihanatiin coitucusineeichene jaun.

<sup>12</sup> Inae niqui carajaa, inara cacha relaeraneein neeichene jaanu rijijieein Jesocurisito coitucuhin neeichene. Nete enanetojoeein caaintajelanaala cana relaa Cana Coaunerane jaan que nihanatiin nacoauneein inara relaera jerequiche. Nii jaunte aiha leinjiin canaanai ujuarine rijijieein neeichene jaun, iniho quinaa nainenihane jaun, itariicha cohajiha canaanai ujuarine rijijieein jataain caaintaelanaala nenea que inara relaera jerequiche.

<sup>13</sup> Nii itari coha canaanai ujuarine rijijieein, caaintajelanaala relaera jereraaurute, leinjiin canaanai rijijieein neein niicha ichai coitucuelanaala ichoae.

14 Nete laen nii iniho que cuaain inara relaanune jaan Cana Coanera Ere neein nenea ne. Acate, inae acaauruhacha coacui coitucuhin, “Naaonjoainte baaso ne,” jana, “Naaonjoainte caohacha ne,” naain coitucuhin nenacaauru rai benojoi ne.

## 6

1 Aihane jaun, inae caohatiin jauriaanejeein Jesocurisito que nerelacaachelune jaun, inae leechaneein coacuelanaala, ainaacha iicha cana suujuane reentiaain sacuhacachenete ne.

Inae nainiheĩ nacoauneein jauriaanejeein esenetaacachene nunuhetihacachelune rijijieein neein, baaso ichaquichene coreniha cana nitaje rai nihacachelune rijijieein nenea nainihaacache.

2-3 Raujiaain Cana Coanera esenetaain, cachaauru baotisaain, biji que Jesocurisito esenetaeraauru dadaain acaauru rai Cana Coanera bajaain, o caje ichanaain neeururichaain onacaaurune, nerichaain chabana satonoelanaala casetecone, naaonjoainuri coitucuhacache caohatiine jaun, jianein nenea coacuelanaala que leechaauru relaacachenete ne. Jeriha Cana Coaneranete nitohanein icharichaachein.

4 Nitohanihane jaun, inae le sajeein itolere coaraain coitucuhin, Cana Coanera Suujue siriin,

5 jataain caohatoha cana rai Cana Coanera beratenojoine coitucuhin, itolere que jataain nelateineein nerichaain caa baiha neeni janonaa quene coitucuhin,

6 naaonjoaain neeichene saijieein jianequichene, inae nacoaaunein jeriha Cana Coanerane rijijieein ichaonaa naineriheicheein, coroso que Jesocurisito teein, nocoeje chanuuruhalune tocohanein rai nocoeje chanuha airiquicheeine jaun.

7 Nete laen atane caohacha que temule jaera rai, atane setejiaa elone caohatiin omarohin inacaain nihane rijijieein, jeriha Cana Coanerane rijijieein neeichene, inara rai caohacha ichaain inara coroatajanereein Cana Coanera.

8 Jana nii temule jaera rai ojoa aina omane neeojoaain niha nii temulene rijijieein neeichenete, laen inara cojiotaain inara mocoeratereein Cana Coanera.

*Canaacha cohajete leinjin acaacha cohajihacachene icharanein ne.*

9 Nete, inara rai caritiin aitocooaunne rijijieein, inara inae jeriha Cana Coanerane rijijieein ichaohin iiquichene coina, nichoterichaacheeine esenetaaichene caje cuaain leechaneein coacuelanaala neeichera canejeraauru.

<sup>10</sup> Nii jaunte, chabana baaso ichaenihane jaun, nii enaneto-joein ichaquichene rijijiein, leochaauru cana nejeraauru-canaacha esenetai esenetaeraauru belaiquichene coara-teenin, coroatajanequichelune baitenereein Cana Coaunera.

<sup>11</sup> Nete laen, jataain ainaacha iiquichene reentiaain, acaacha cohajeein, esinae rauhijiriin corajeein ichaquichene coarateein, inaraacha ichai ichaquichene caohachae.

<sup>12</sup> Coatiha chaque nelatihei chachaaain neeichene coiinteein ichaquichene. Charijieein teeinti itolere bana janelanaala esenetaain neeuruhane jaun acaauru rai tihane coina Cana Coaunera aitoonjoa raeraneein neeure esenetaeraauru, nii rijijieein neeuche inara netonai.

<sup>13</sup> Abaraaun rai niicha teeni tihane coina aitoahalune bante, leinjiin Acaacha itolere amurijiriin nihane jaun, inae neniha amurijiriin neine jaun, aca Cana Coaunera neein coarajeein icharichaaaine coina:

<sup>14</sup> “Canune ii coroatajaneein, arajiin janiinacajelanaala ne-faauruha iicha foerateeurine coina ichareeunicha,” naain Abaraaun rai biha Cana Coaunerane jaun,

<sup>15</sup> luhecaelanaala carajaain cojoaain, nii rai tihane coina Cana Coaunera aitoonjoa raelu Abaraaun.

<sup>16</sup> Nete laen cachaauru cha chana jerecuruhane, “Cana Coaunera coarajihane jana icharihanine que,” aitiin ichae. Nii jaunte, cha chana jereein nihane esinae rauhijiriin icharihanine esenetaera coina, “Cana Coaunera notaracaae icharihanine coina,” aitothane, inae nene nenacaaen rerohecaera.

<sup>17</sup> Nii rijijieein techu, nii niicha teeni raeraneein neenihuri rai, aansijiinniji nii aitothane corelanaala, esinae rauhijiriin icharichaaaine coitucuuruhane coina, aca Cana Coaunera-neein coarajeein icharihanine que aitelu Cana Coaunera.

<sup>18</sup> Cana coritaelanaala niicha teeni naitoonjoan, aca-Cana Coauneraneein coarajeein icharihanine coina, Cana Coaunera aitoonjoante raacache, Aca itolere baaso caje cana beraichaneein nihane coina, naitoonjoaacha cohajeein niha-cachene jaun.

<sup>19</sup> Nii cana rai niicha teeni- canaacha cohajeite, nitajihane coataa cana suujue nunaeraneein ne. Charijieein teeinti, cujuana nichajai que auriteein bote nunae rai nunaera- ancla, nalaa fichafichaanaane coataa nii rijijieein. Nii canaacha cohajeite chabana turunaa nainenihacache Teenforo cuhanai bujuaneein nena ne jaun- cana turuhaeranu que nenaaneein ne.

<sup>20</sup> Nitohaneein ecu cana turuaeranu quete cana rai chabana satonoelanaala nena saseredoteneein nelu Jesoso, aihalu Melquisedee ne rijijieein.

## 7

*Saseredote inoaensi- Melquisedee rijijieeinte nelu Jesoso.*

<sup>1</sup> Nii Melquisedee jetaote- Cana Coaunera rai saseredote neein, Saleen batane curuaanaa neein nelu. Nii Melquisedee jetao techu, leeochoaauru curuaanaacuru reychuru cachaauru amuritiin sohin jitariin acaauruhacha sirii ruluha acaauru cajene baiha caaujiha Abaraaunne jana, que tacaain cuhin, corootajaniha Cana Coaunerane aina leeochoaauru amuritohane que aitiin cojiotaain corojelu.

<sup>2</sup> Nitohanein coroaecane jaun jetaote, nii leeochoaauru amuritiin sohin acaauru caje niicha ruluhi lechooncanu telu rai Abaraaun. “Melquisedee” naane jetaote: “Caohacha ichara curuaanaa” naane aite. Jerichanejeein jetao techu: “Saleen” naane: “Raotojoein nena” naa aite. Nii jaun jetaote, nii Saleen batane curuaanaa nihane jaun: “Raotojoein nihacachene tera curuaanaa” naaure Melquisedee que.

<sup>3</sup> Nihei coitucueraai rai inaca, rai neba, foerateracuru, naaonjoainuri. Niheichu coitucueraai nejanoa, ohin, naaonjoane. Nii jaunte, acaihaniji chabana satonoelanaala nena Cana Coaunera rai saseredoteneein ne, aihalu Cana Coaunera Calaohine rijijieein.

<sup>4</sup> Coaracuche nachuhinti jataain nelateineein niha nii Melquisedee ne jaun, nii leeochoaauru curuaanaacuru cachaauru sohin, niicha rului lechooncanu tihalu rai, cana foeratera inoaensi Abaraaunne.

<sup>5</sup> Moisesa tenojoi rauhite niqui, Lebi nefoerateneein nenacaauruhacha- saseredote neein leinjiin acaauruhacha, satiin cachaauruhacha sirii lechooncanu raauruhane coina aitelu, satiin cachaauru, acaauru araainein- acaauru rijijieein Abaraaun nefoerate neuruha acaauru netonoaine sijieein.

<sup>6</sup> Nii Melquisedee coatiha laen niqui, Lebi inamoco nihei. Nete nii sijieein, nii Cana Coaunera aitoonjoa raeraneein niha Abaraaun natiin, caje nii niicha rului lechooncanu bajaain Abaraaun cojiotaain corojaje.

<sup>7</sup> Nii coitucuhacachene rijijieeinte, nii cojiotaain niicha corojaje cacha amurijiriin nelateineein ne, nii cojiotaera.

<sup>8</sup> Satiin caa chauratane que cachaauru caje acaauruhacha sirii lechooncan raaurerate ooruhane rai neein aihure. Nete laen nii Cana Coaunera Quiricha cuhane, Melquisedee que naitoonjoa enanetojoein jaiti ichaonaa que aitona rijitoein aite.

<sup>9</sup> Nii rai niicha rului tiha Abaraaunne cajete, nii Lebi inamoconein nenacaauru- saseredotecuru, enene cachaauru caje acaauruhacha sirii lechooncanu bajaain

raeraneein neenihuru netonai, Melquisedee rai niicha sirii teeuruhane coitucuhacache.

<sup>10</sup> Nii que tacaa cuha Melquisedeene jana, rai jaberoco cuhane jaiti najanoaelanaala neeuruha niicha foerateenihurune jana, rai niicha rului tihalu Abaraaunne jaunte, jaiti nejanoaelanaala netiin acaauru netonai acaauruhacha sirii lechooncanu teein neeurelu.

<sup>11</sup> Nii coitucuhichene rijijieeinte, Aaron foerateno-joinnein nenea- Lebi inamocooru- saseredote neein nenacaauru aina cuain, Isaraelitacuru rai rauhi teein nelu Cana Coaunera niqiu. Nete nii rauhi tonoraeraauru, esinae rauhijiriin jeriha Cana Coaunerane rijijieein neeurenelu. Nii jaunte nacoaauneein saseredote letoaelu Cana Coaunera. Nete laen, nii niicha letoai Aaron nefoerate caje nenaanelanaala nihalu Melquisedeene rijijiein nenaane.

<sup>12</sup> Nii jaunte, nitohaneein necorihane saseredotene jaun, Cana Coaunera rai rauhi netonai necore.

<sup>13</sup> Nii ena nenea cana rai saseredote- cana Curuaanaate, leeocho Isaraelitacuru lauri caje nenea nihane que aitiin laenanohineein ne Cana Coaunera Quiricha cuhane.

<sup>14</sup> Nii jaunte, nii coitucuhacachene rijijieein, Jodaa lauri caje nenaanein nelu cana Curuaanaa. Jana Moisesa coatiha nii Jodaa lauri caje nerichaaain saseredotene coina coacuhin iriheilu, neeururichaaain saseredotecurune bihane bana.

<sup>15</sup> Nii jaunte, jataain caohati saseredote Melquisedee rijijieein niha, nii ena nenea cana Curuaanaa- saseredotene coitucuhacache.

<sup>16</sup> Aihane jaun, coatiha aihuruha leeochoaurune rijijieein, “Acate rai laurineein ne,” naain rauhi cuhane laenanohineein nihei. Acate chabana nitajenaachara ichaonaa caje unaaneein ne.

<sup>17</sup> Nii jaunte, nii rai:  
“Iite Melquisedee rijijieein  
chabana satonoelanaala  
saseredote neein neriquincha,”  
naa Cana Coaunerane, ne laenanohineein Quiricha Inoaensi  
cuhane.

<sup>18-19</sup> Nitohaneeinte nii jauriaanejeein nenea rauhi, Moisesa rai rauhi, naaonjoain aina chaque nelatenihane jaun, jeriha Cana Coaunerane rijijieein cachaauru ichao rucuhena nainenihane jaun, itajeein nacoaauneein jataain amurijiriin nelateineein nenea te Cana Coaunera. Acate laen Cana Coaunera rene cana turuaeraneein ne.

<sup>20</sup> Chaen techu, aca Cana Coaunera neein coarajeein chabana satonoelanaala nihane coina, cocoinarihanine esenetaacachene coina raajenihane aitelu. Jana leeochoaauru saseredotecuru, coatiha chabana satonoelanaala

neeuruhane coina, aca Cana Coaunera neein coarajeein cocoinaane coina aitohi Cana Coaunera.

<sup>21</sup> Nete laen cana Curuaanaa, chabana satonoelanaala nihane coina, aca raajenhane coarajeein cocoinaane que:

“Canune

Cana Coaunera neein  
caraajenhane coarajeein  
icharihanuhine coina aitoon.

Nii jaun

nii caitoonjoan corerihaaunni.

Iite chabana satonoelanaala  
saseredote neein neriquiin,”

naain ne laenanohineein rai Quiricha Inoaensi cuhane.

<sup>22</sup> Nitohaneeinte nii jauriaanejeein nenea amuritoheriin nenea, cana rai Cana Coauneraacha teeni terateraneein neane Jesoso.

<sup>23</sup> Leeochaauru jauriaanejeein saseredote neein nenacaaurute, cana rijijieein cachaneein neeuruhane jaun, arajiin neeurelu, ohin nii baiha ichanana nainecurenihane jaun.

<sup>24</sup> Nete laen Jesoso ohin nitajenaa nainenihane jaun, leinjiin acaacha chabana satonoelanaala cana rai saseredote-neein ne.

<sup>25</sup> Nii jaunte, aina cuaain Cana Coaunera coacuhin ichaonacaauru ichoteratereein chabana satonoelanaala nihane rijijieein, acaauru netonai chabana satonoelanaala Cana Coaunera aina neeuruhane coina. Nitohanihane jaunte, chabana ohenihane jaun, itolere bana satiin esenetaeraauru coreniha bajaee bajaareein Cana Coaunera caje.

<sup>26</sup> Nitohaneeinte esinae rauhijiriin canaacha latei saseredotecuru curuaanaacuru Curuaanaa neein letono neein ne Jesoso. Acate Saantoneein baaso colane-niheichu osaquelanaala- osaaonacaauru caje, jelai dedeeu tenojineein ne.

<sup>27</sup> Coatiha leochaauru saseredotecuru rijijieein, jauriaanejeein rai nosa coreniha, nii baiha cachaauru osa coreniha, naaonjoaain iniho mocohin Cana Coaunera rai tihane coina nenea nihei. Nitohanelanaalate, le sajeein chabana coaiten ohenihane coina, raajenhane cana coreniha rai jaberoco telu sohin atinaauruhane coina.

<sup>28</sup> Jana nii Moisesa rai rauhi que cocoinanohineein nenacaauru saseredotecurute- nechu joareein cachaneein osaaonanein neeurelu. Nete laen, nii Moisesa rai rauhi que cocoinanohichuru baiha, ena nenea saseredote cocoinaane coina, aca Cana Coaunera neein coarajeein icharihanine que aitohalune jaan, rai Calahineein osaquelanaala- chabana satonoelanaala saseredote neein nihane coina cocoinaelu Cana Coaunera.



## 8

*Ena nenea- cana rai, Cana Coauneraacha teeni terateraneein niha Jesoso ne.*

<sup>1</sup> Nii cana rai saseredote curuaanaacuru Curuaanaa- caa inara rai ereerecaanne jaante- jataain itolere amurijiriin nelateineein Cana Coaunera rijjijeein nihane jaun, Cana Coaunera nelaurihanaja raotono nichajai que nelauriaelu Cana Coaunera rohan.

<sup>2</sup> Acate cana rai esinae rauhijiriin saseredote esine neein Cana Coaunera ichanohineein nenea- *santuario* cuhane neein, Cana Coaunera rene cacha turuaeraneein ne. Coatiha aihuruha leochaauru saseredotecurune rijjijeein, raajeni-hane cacha ichanohineein nenea- *santuario* cuhane nihei.

<sup>3</sup> Satiin saseredotecuru Cana Coaunera rai chaelai teraneein, inihocuru mocohin teranihane coina cocoainanohi nihane jaunte, Jesocurisito netonai nii rijjijeein cana osa coreniha raajeni-hane netelu atinaauruhane coina.

<sup>4</sup> Coatiha caa chauratane caje nenea nihane, saseredote nenea nainerihei. Inae caa chauratane que arajiin neeuruha saseredotecuru, Moisesa rai rauhi cuhane aitohane rijjijeein niqiu, Cana Coaunera rai nii Teenforo asaae lenonecuru sohin mocooruhane coina.

<sup>5</sup> Nii saseredotecurute, nechu dedeeu ichacuruhane cojunacaneein nitohanei icharaneein neeurelu. Canate esinae rauhijiriin, nechu dedeeu nenacaauru rijjijei icharaneein ichacuruhane coitucuhacache, *santuario* ichaa Moisesane coina rai: "Aonaaun. Nii ichei ichatane ucuunno coarati-hanulune rijjijeein ichaaura," naalu rai Cana Coaunerane caje.

<sup>6</sup> Nete cana rai saseredote laen, jataain nii leochaauru amurijiriin, jataain cana rai caohacha ichaain, cana rai tihane coina aitohalu Cana Coaunerane rijjijeein, Cana Coaunera rene cana turuaeraneein ne.

<sup>7</sup> Bana caohachaaain cachaauru ichao rucuhena nainiha, nii jauriaanejeein nenea Cana Coauneraacha teine, coatiha neriheilu Jesocurisito caa ena niicha tei ichaane coina.

<sup>8</sup> Nete nii jauriaanejeein niicha tei rijjijeein neureniha cachaaurune jaun:

"Inae cojoanona que turuhane banane,  
Israeli, Jodaa, naonjoainuri aina,  
enachasine canuhacha ichaneni  
ichareeunnicha.

<sup>9</sup> Nii ena acaauru aina  
canuhacha ichanenu,  
coatiha  
Egipto batane caje  
acaauru foerateracuru  
rocohanulune coina,

canuhacha ichailu rijiirinaai.

Nene,

nii acaauru aina  
canuhacha ichanenu

tonoraelanaala

ichaaoruhane jaun,

acaauru que jaolecoonlu.

<sup>10</sup> Nii caa baiha Isaraeli aina

canuhacha ichanenute,

acaauru suujua cuhane laenanohineein niha

Canu rai rauhine,

suujua caje coauneein

coitucuuruhane coina

canuhacha ichanenu ne,

Canu,

acaauru Coauneraneein

nihanune coitucuhin,

canu cachaneein neeuruhane coina.

<sup>11</sup> Nii bana,

inae le cachauru,

leochaauru,

acaauru laurichuru,

acaauru araachuru,

naaonjoainuri,

inae Canu que

ita relauruhane latelanaalate,

Canu,

acaauru Coaunera nichaaunne

coitucuurureein

satiin ichauhenaauru,

canaanaihunru,

naaonjoainuri.

<sup>12</sup> Nii banane

baaso ichacuruhane que casuujua acateein,

acaauru osa que canu suujua acatereeunni,”

naelu Cana Coaunera.

<sup>13</sup> Nii cana rai nacoauneein enachasine niicha ichanenu

biha Cana Coauneranete, inae chaque nelatelanaala nitaje

rai niha nii jaurihaanejeein niicha ichanenune coitucuer-

atiha aite.

## 9

*Santuario chauratane que nenaalu aina dedeeu nena santuario.*

<sup>1</sup> Nii jauriaanejeein Cana Coauneraacha teite, caa chauratane que rene nichuuntaauruhane jaanu que *santuario* neein telu Cana Coaunera.

<sup>2</sup> Nitohaneeinte, nii jauriaanejeein *santuario* neleru asaae jetao nelu leinjiin usi nujua, leinjiin mesa Cana Coaunera que banijaain nena faan siriin, naaonjoaain.

<sup>3</sup> Jana, que jauriin nena bujua cuhane jetaote, jelai tein Cana Coaunera turunajanein curuajaelu.

<sup>4</sup> Nii cuhane jetaote, nelu oro caje ichanohineein nena rori, jujui- incienso mocooruhane jaanu que, chaen camela itolereenein oro que carihanojoneein nena. Nii camela cuhane jetaote nelu, oro caje ichanohineein nena- leinjiin baichaje, cuhane manaa neein curuajaain nena quinacaimanaa siriin. Chaen jetao techu, nii camela cuhane nelu Aaron bastoon omaronalu, Cana Coaunera rai rauhi- ajeri caje nena tabara que tein laenanohineein nena, naaonjoainuri.

<sup>5</sup> Nii camela ichoae jetaote nelu- coroatajai cacha rijiinanai itaroojianaain. Acauru jetaote, ecu niha Cana Coaunerane beranein jetao, nii nitaro que nii camela fuera asaaranein ne. Nete ena nelatene jitariin nii coitucuerateein niique irihacane.

<sup>6</sup> Inae nitohanein satiin ichanohineein nihane jana jetaote, itolere bana nii nunuhenein nena- Cana Coaunera rene nichuuntaauruna jaan turuure saseredotecuru, ecu Cana Coaunera rene nichuuntaain ereereecuruhane coina.

<sup>7</sup> Nejetaote nii que jauriin nena- jelai tein Cana Coaunera turunaja neein nenaau jetao, saseredote curuaanaacuruhacha ecu turue le sajeein le jaanacaauru nainein. Ecu enohane nainein jetaote, lenonecuru coichana amaure, jauriaanejeein rai nosa coreniha tein, nii baiha coitucuelanaala neosateeuruha cachaaurune coreniha tihane coina.

<sup>8</sup> Niite cana que coitucuerate Cana Coaunera Suujue, nii nunuhenein nena- Cana Coaunera rene nichuuntanaanaja neein nihane jaun, jaiti neniha nii jelai tein Cana Coaunera turunajaun cana turuaerane jaan, ecu turunaa nainenihacachene que.

<sup>9</sup> Satiin niite, nech u cau jaiti ichaohacachene tonohanau cana que coitucuerateranu que nelu. Nii itolere inihocuru mocohin Cana Coaunera belaihuruhane jaan, coatiha nitohanei ichaain coroaeraauru cachaauru suujua couluoona nainiheilu.

<sup>10</sup> Acate raujiaain lenonecuru, conacaihuru, naaonjoainuri couluoranein, cachaauru netonai chatoanai ichacuruhane, rai jaberoco caje niicha ichai jaaoruhane coarateeuruhane jaanu que nelatelu, cana suujue coriha Cana Coaunerane que turuhane reentiaajeein.

<sup>11</sup> Nete laen inae turuhelu Jesocurisito. Acate enene inae cana rai saseredotecuru curuaanaa Curuaanaa esineneinchabana satonohelanaala nereein. Nii saseredote neein niicha ichai ichaane jaan- *santuariote*, esinae rauhijiriin

nesineneein nenea ne. Coatiha raajenihane cacha chanohineein nenea nihei, niheichu cau chauratane que nihei.

<sup>12</sup> Nitohaneeinte *santuario* cuhane enohelu Jesocurisito, coatiha aihuruha caa chauratane que nenacaauru saseredotecurune rijijieein, Cana Coaunera rai, cabara curuanaa, toro narejeen, naaonjoainuri coichana tihane coina nihei. Acate raajenihane rai coichana tihane coina, le sajeein enohelu chabana coaitenihane coina. Nitohaneeinte cana rai ichaonaa chabana satonoelanaala nenea teraneein nihane jaanu raelu.

<sup>13</sup> Esinaete niqiu, nii toro narejeen coichana, cabara curuanaa coichana, baca narejeen moco bajane, naaonjoainunri que, chaelai Cana Coaunera que banijiaelanaala nenea cabuuruhane couluoorejetelu, Cana Coaunera que banijiaaaineein nihane coina. Nete laen cacha suujue couluoona nainenelu nii ichanacuru.

<sup>14</sup> Nete laen jataain nii amuritoheriin nelateineein ne Jesocurisito coichana, aca Cana Coaunera Suujue, chabana nitajenaacharanejeein nenea aina cuaain, raajenihane Cana Coaunera rai cana coreniha ohane coina netihalune jaun. Nitohaneeinte cana suujua letononeein, canaacha ichai coreniha, cana nitaje rai nenea caje, cana suujua coreein nelu nii rai coichana-osa colane nenea- Cana Coaunera jerei ichaain nihacachene coina.

<sup>15</sup> Nii cointate ohelu Jesocurisito, ena nenea Cana Coauneraacha ichaneni aina cuaain, ichoaichaniha neein onacaaurulu, ena neinichaachene, naaonjoainichaachene Cana Coaunera aina cana tihane, nii inoaelu jauriaanejeein niicha ichai, raujiaain cachaauru osa bujuateraneein nihane caje, acaauru osa que suujua acatena nainiha Cana Coaunerane, satiin niicha ranojoneein nenacaauru netonai nii naitoonjoa niicha teeni chabana satonohelanaala nenea ichaonaa raeraneein neeuruhane coina.

<sup>16</sup> Oha cachane baiha, rai rucuhele niicha cocoirichai raauruhane cointate, jauriaanejeein oha nii cachane coitucuuruhane rai ne.

<sup>17</sup> Nii jaun, jaiti oheniha nii rucuhele erora cachane, coatiha nii niicha cocoirichai rucuhele ranaa nainihe i cacha. Inae ohane baihate laen naine nii rucuhele raa nii banihatihane jaan ne.

<sup>18</sup> Nitohanihane jaunte, nii jauriaanejeein nenea Cana Coaunera ichai tonoracuruhane coina, carenero sohin rai coichana chororejetucurelu.

<sup>19</sup> Jerichanejeein jetao techu, aina nenacaauru cachaauru rai jetao, nii Cana Coaunera aitoonjoa rauhi bihane baiha jetao, carenero ujui caje, lana caje ichanohi cajione lanajai aina, leinjiin enuha- isopo uune raain jetao, toro

narejeencuru, cabara curuaanaa, naaonjoainuri coichana acau que jasiitenohineein nenea que setejiaain jetao, Cana Coaunera tenojoi rauhi laenanohineein nenea ichoae riajaain cachaauru ichoae netonai riajae Moisesa.

<sup>20</sup> Nitohaneein acaauru ichoae riajaain jetaote: “Caate nelaterichaaain nii cana rai tonoraacachene coina Cana Coaunera tenojoine coitucuhichene coina, coitucuerateraneein nenea Cana Coaunera icharatenohi ichananera,” nae jetao Moisesa.

<sup>21</sup> Chaen jetao techu, loanari *santuario* aina, nasaae enohane saseredote rai nelatenei corujueleuru, naaonjoainuri ichoae riajae Moisesa.

<sup>22</sup> Nitohaneeinte, satiin itolere coichana que rujuaain, jelai tein culuonojooineein nihane coina aitelu nii rauhi. Nii jaun, neniha coichana joaera cana corenihane, nerihei cana osa que suujua acatiha Cana Coaunerane jaanu.

<sup>23</sup> Nitohaneeinte carenerocuru sohin rai coichana que, nii dedeeu nenacaauru cojunaca neein nenea couluoocurelu. Nete laen, jataain nii amuritoheriin couluoora latelu nii dedeeu esineneein nenea.

*Cana osa caje cana rocoeranu quete ohelu Jesocurisito.*

<sup>24</sup> Coatiha nii Cana Coaunera nenaja esine cojunacatiha cachaauruhacha ichai asaae enohilu Jesocurisito. Acate rauhijiriin Cana Coaunera nenaja dedeeu cuhin, Cana Coaunera rai, enene cana coreniha iriha ne.

<sup>25</sup> Coatiha aihuruha saseredotecuru curuaanaacuru, le jaanaca naineein nejelau coichana teeuruhane coina araai saain nii *santuario* enohine rijijieein, araai saain ohilu Jesocurisito.

<sup>26</sup> Nitohanihane chujianra, necoaanaa cana rai chauratanene caje coauneein, ore araai saain Jesocurisitona. Nete aca satononiha ecocohin- le sajeeincha raajenihaanetein ohelu- chabana satonoelanaala cana osa caje cana rocoeranu que.

<sup>27</sup> Charijieein teeinti le sajeein ooruhane caseteco coaracure cachaauru,

<sup>28</sup> nii rijijieeinte le sajeein atinaain, arajii cachanichaane, osa aina nenea caje cana rocoeranu que tenojooineein nelu Jesocurisito. Inae nacoauneein tururichaaain niqui. Nete osaaonacaacuru ichoteratihane coina ainereein, esenetaain acaacha cohajeein nenacaauru ichoteratihane coinete aicheein.

## 10

<sup>1</sup> Nii Moisesa rai rauhi, nechua raujiaain nii turuha uhene-nilu rijijieein nihalu nesinenelanaalane jaunte, acaauru osa

caje- nii le jaanaca naineein- araai saain jeelai lenonecuru mocohin Cana Coaunera rai teeurera couluoona nainenelu.

<sup>2</sup> Bana nii acaauru osa caje acaauru couluooca nii Moisesa rai rauhine jana nihanete, inae osa caje couluoonohineein neeuruhane coitucuhin, inihocuru mocohin teeuruha Cana Coaunera raine jianecurure.

<sup>3-4</sup> Nete nii toro narejeencuru, cabara curuaanaa, naaonjoainuri coichana, acaauru osa caje, acaauru couluoona nainenihane jaun, osaaonaneein neeuruhane coaauca, nii le jaanacaauru naineein, nii inihocuru mocohi teure Cana Coaunera rai.

<sup>5</sup> Nitohanihane jaunte, inae chauratane que uhane rai:

“Ti rai lenonecuru teein,  
que ii belaihuruhane  
jereneeine jaunte,  
ii rai canu jaberoco tihanune coina  
caletoaaicha.

<sup>6</sup> Niheichu  
acaauru osa caje  
couluoonaquine coina,  
ii rai iniho mocohin tein,  
chaelai que  
ii belaihuruhane coina jeriheei.

<sup>7</sup> Aihane jaun, nocoaaun,  
nii Quiricha cuhane  
laenanohineein nihane rijjijeein,  
iicha jerei icharaneein  
nihanune coinara  
Cana Coaunera,”  
naelu Jesocurisito Cana Coaunera rai.

<sup>8</sup> Niritiin nii acaauru osa caje couluonajaane coina, rai lenonecuru sohin tein, chaelai que belaihuruhane coina aitiin, rai lenonecuru mocooruhane coina aitiin, naaonjoaan, rai naitoonjoan rauhi rijjijeeine saijjjein, rautaeniha Cana Coaunerane que rai aithane baihate:

<sup>9</sup> “Nocoo inae cuhanu iicha jerei ichacaaunne coina” naain aite Cana Coaunera rai. Nitohaneente nii lenonecuruhacha sohin teeuruhane coina nena rauhi itajeein, raajenihane rai jaberoco tee, ena nena cana rai Cana Coauneraacha teineein nihane coina.

<sup>10</sup> Nitohaneein jeriha Cana Coaunerane rijjijeein, le sajeein chabana coaitenihane coina, cana coreniha ohane coina, raajenihane rai jaberoco tihalu Jesocurisitone corenihate, cana osa caje cana couluocoelu Cana Coaunera.

<sup>11</sup> Chabana osa caje cacha couluoona naineniha lenonecuru sohin teeuruhane saijjjeinte, satiin saseredote

Jorioneein nenacaauru, araai saain itolere bana lenonecuru sohin teeurelu.

<sup>12</sup> Nete laen Jesocurisito, le sajeein, chabana coaiten ichaenhane coina, osa coreniha rai jaberoco tihane baiha, Cana Coaunera rohan nelauriaelu.

<sup>13</sup> Ecute ena neein, que nejeratenacaauru amuritoeratiha Cana Coaunerane cojoae,

<sup>14</sup> rai jaberoco teein coreniha Cana Coaunera cachaneein neeuruha cachaaaurune coina couluoocane jaun.

<sup>15-17</sup> Jana Cana Coaunera Suujuete:

“Inae chabananiji

acaauru rai canuhacha ichanenite;

acaauru suujua cuhane laenanohineein niha

Canu rai rauhine,

suujua caje coauneein coitucuuruhane jaan nereein.

Nii jaun inae nenacaaeneein

acaauru osa aina baaso ichacuruhane coaaurihaaunni,”

naain aitohalu Cana Coaunerane coitucuerate cana que.

<sup>18</sup> Aihane jaun, inae nitohaneein cana osa que suujua acatiha Cana Coaunerane jaun, inae nainiheini nenacaaen osa coreniha iniho mocohin tenaa nainiheini cache.

*Cana Coaunera rohan nichuuntaacachenete ne.*

<sup>19</sup> Nitohanihane jaunte rai coichana jaohin ohalu Jesocurisitone coreniha, aina cuaain, inae enene nainichaache, chaque casilanaala tonajelanaala Cana Coaunera nenaja esine *santuario* turuhacachenera canejeraauru.

<sup>20</sup> Nitohaneeinte Cana Coaunera rene turunaa naineniha-cachene jaan bujuateraneein nenea itajeein, nii ena nenea ichaonaa que turunaa nainichaachene jaanu ajiinchateraneein, rai jaberoco telu Jesocurisito.

<sup>21</sup> Nii jaunte Jesocurisito cana rai saseredote esine neein nihane jaun, aca Cana Coaunera nenaja acatiha cana turuaeraneein ne.

<sup>22</sup> Aihane jaun cana suujua cuhane asinojoneein cha coacuelanaala, niheichu leeocho coacuelanaala, canaacha cohajeeicha que coacuhin, esinae rauhijiriin cana suujua cuhane coitucuhachene saijieein, chachaain nihacachene jianein, Jesocurisito aina cuaain couluonojoneein Cana Coaunera rohan turuhacachenete ne.

<sup>23</sup> Nii jaun coujurihu Jesocurisito esenetaeraneein nihacachene jaun, itolere bana esenetaacachene rijijieein nihacachenete ne. Inae ecu tihane bana, cana rai niicha tenu naitoonjoalu terichaaain Cana Coaunerane jaun.

<sup>24</sup> Nitohanihane jaun ita rijijieein caohachaain neein, itolere bana ita belaaain nihacachene coina, ita coroatajanein nihacachenete caohachae.

<sup>25</sup> Aihane jaun nainihei aihuruha leeochoaurune rijijieein, ita aina netaojiaain ereerecaachene coiinteein jianena nainihaacache. Coiintelanaalate naine, inae tururichaaain Cana Curuaanaa cojoanonaa que turuelalajihane que nainaaain, jiniiquiin itaque corajerateein, ita rai coitucueratihacachene caohachae.

<sup>26</sup> Jana inae raotojoeein Jesocurisito coitucuhin nihacachene saijieein, naosatenaa coacuhin nihacachene inae neriinaain nacoauneein cana osa coreniha ohenu.

<sup>27</sup> Nechu usi tabai jana necairichanaa coaraain nitajeeururichaaain Cana Coaunera coitucunaa jerelanaala que negeratenaa rijijieein nenacaaurune que banijiaain nenaachate cohajerichacheein.

<sup>28</sup> Chunocoha, Moisesa rai rauhi tonoraelanaala nihane jana, neeuruha nichatajaain coaraain beureranete, cairichaaajoaain coaraelanaala, sohin jaaorurejetucurelu.

<sup>29</sup> Tana, nii amurijiriin casetecanohiniha cuururichaaain, chaque nelatihei rijijieein Cana Coaunera Calaohi teein, cana coreniha ohin rai coichana jaohin naaonjoaan, cana belaiha Cana Coaunera Suujuene saijieein, que jaolequiin nenacaaurune coitucuhichene. Nii rai coichana cana coreniha ohin niicha joailute niqui, acaauru rai niicha teeni terichaaain Cana Coaunerane coitucuerateein, jelai teein Cana Coaunera cachaneein neeuruhane coina, acaauru couluooraneein ne-naane.

<sup>30</sup> Chaen techu: “Canuna cachaauru rai caohacha icharaneein coretereenuini,” naain “Cana Coaunerate rai cachaauru rucuhereein,” naelu Cana Curuaanaa.

<sup>31</sup> Nii jaunte, jataain coasihacaine Cana Coaunera nere tonoraain nenihacane.

<sup>32</sup> Nete inara, jauriaanejeein Jesocurisito esenetaaichene nunuheneein, itolere que laraajiin necairichanaa abaan-taichelune coaauquichene caohachae.

<sup>33</sup> Inara tabaaurute, satiin notaracaae teein nocoeje chanuhin bisihururejetelu. Nii jana inara tabaaurute, inara aina jiniiquiin necairichaaaururejetelu inara coinaderaa.

<sup>34</sup> Jerichanejeein techu, cairichaaajoaain caresero cuhane nenacaauru coaraain acaauru coinaderarejetocoichelu. Chaen techu inara rucuhelu ruluuruha inara cajene nihanatiin, raotojoeein rachoojoeein nerejetocoichelu cochunaelanaala. Inae nii amurijiriin chabana nitajenaa nainelanaala dedeeu niha inaraacha raenine coitucuhichene jaun.

<sup>35</sup> Aihane jaun, jiaonriha nitohaneein rariquicheeine esenetaain ichaohichene jianiquichene. Acate inara rai jelai amuritoheriin cainareein.



<sup>36</sup> Nii jaunte, jataain jeelai amuritoheriin necairichanaa abaantaain nenea nainequichene jaanu que, itolere que laraajiin neeichene jaanu latequiche. Cana Coaunera jerei ichajeein ichaohichene, tihane coina naitoonjoa raeraneein neeichene coina.

<sup>37</sup> Nitohanihane cointate:

“Inae ena caeneenejelanaalate turureein nii turuha uheni. Coatiha inae carajarihaain.

<sup>38</sup> Canu cachaneein, canuhacha esenetaain ichaonacaaurute, chabana nitajeeurenereein. Nena laen canu cachaneein nihane jianein, jauriaa ichaohalune rijjijeein ichoi que nejeratereeeunni,”

naalu Cana Coaunerane, ne laenanohineein rai Quiricha inoansi cuhane.

<sup>39</sup> Jana cana, coatiha nii rai cachaneein neeuruhane jianein, jauriaa ichaoruhane rijjijeein ichaonacaauru caseteco coaracuruhane rai nenacaauru nihaacache. Canate esenetaain ichaoruhane jaun, ichoteratenojineein neeururichaaaine rai nenacaauru rijjijineein nihaacache.

## 11

### *Cana Coaunera esenetaain niha cachane*

<sup>1</sup> Esinae rauhijiriin Cana Coaunera esenetaacanete, chabana canaacha coaraai terichain cana raine cohajeein ichaohaca.

<sup>2</sup> Cana foerateracurute raujiaain esenetaauruhane jaun, cacha caohacha rijjijeein acaauru coarae Cana Coaunera.

<sup>3</sup> Cana Coaunera esenetaacachene jaunte, nereecha que chauratane coaunalune coitucuhacache. Nii jaunte, chabana cachaacha coaraai caje coaunanojineein nene, caa enene canaacha coarai.

<sup>4</sup> Cana Coaunera esenetaane jaun techu, nii rai nihana Caain amurijiriin, jataain caohacha nejesina mocohin que Cana Coaunera belaiha Abeline jaun, caohacha icharaneein raain nii rai niicha tei raelu Cana Coaunera. Nii jaunte, inae ohalune saijieein enanetojoein Abeli coaaucaache, Cana Coaunera esenetaeranein nihane coitucueratiha cana quene jaun.

<sup>5</sup> Cana Coaunera esenetaane jaun techu, nabana ohane coataa jaberoco neein Enoco raa Cana Coaunerane jaun, inae nii baiha coarihurenelu. Cana Coaunera Quiricha inoansi cuhanete, jaiti raeniha Cana Coaunerane ajiniha, jeriha Cana Coaunerane rijjijeein ichaohalu Enocone que aite.

<sup>6</sup> Nete esenetaenihane Cana Coauneraacha jerei ichajeein ichaonaa nainene chuni cacha. Cana Coaunera aina nenea jerichaanete, niha Cana Coaunerane esenetaain, aina nenea

jerenacaaun, niicha jerei ichajeein ichaonacaauru cainaeraneen niha Cana Coaunerane esenetae esenetaera.

<sup>7</sup> Cana Coaunera esenetaane jaun techu, inae chabana acaauruhacha coaraai icharichaaaine beein suujuatiha Cana Coaunerane tonoraain, leinjiin bote tabai jaelu Nohe, cuhane rai comasai aina saain rai bereecuru aina nichotihane coina. Nitohaneein esenetaane jaun techu, nii esenetaelanaala chauratane que satiin nenacaauru cachaauru caseteco coaracuruhane jana, esenetaain nenacaauru ichoteratenojineein neeruhane rijijieein ichoteratenojineein nelu Nohe.

<sup>8</sup> Nii rijijieein techu, Abaraaun netonai Cana Coaunera esenetaane jaun, cotihacane tonoraain rai natane ratiriin, nii cunaja jelai coitucuelanaala cuhin, esenetaeraneein nihane cainaeraneein, rai Cana Coaunera teenu atane que ichaoha cuelu.

<sup>9</sup> Nitohaneein Cana Coaunera esenetaane jaunte, nii rai Cana Coaunera teenu atane que leecha atane caje unaneein ichoaelu Abaraaun. Ecu jetaote, neloheritelanaala raujiaain loanariicha asaae ichoaelu, aihuruhalu nii rai, Cana Coauneraacha tei raeraneein neeninunru Isaca, Jacobo, naaonjoainurine rijijieein.

<sup>10</sup> Cana Coauneracha ichai- chabana nitajenaachara nese que ichaonaa jerihane jaunte, leecha neseu cuhin ichoaelanaala loanariicha asaae ichoaelu Abaraaun.

<sup>11</sup> Cana Coaunera esenetaane jaun techu, inae camotojoe nihane jaun canaanai sirina naineniha Sarane jana, inae Abaraaun netonai biinaa nihane saijieein, rai naitoonjoan icharistani nohanelanaalane esenetaane jaun, lararajiaa Cana Coaunerane aina nelararajiaain canaanai sirilu Abaraaun.

<sup>12</sup> Nitohaneeinte, inae jataain biinaa nihane saijieein, janiinacajelanaala cucuana cuhane nena carene catu aina arasijiejeeoneein, cachaauru foerateraneein nelu Abaraaun.

<sup>13</sup> Satiin nii cachaaurute ohelu, jaiti nii acaauru rai tihane coina Cana Coaunera aitoonjoa jitaain raelanaala. Nete jataain Cana Coaunera esenetaauruhane jaun, nota que coara rijijieein coitucuruhane jaun, nechu leecha atane caje unaneein, caa cana rai chauratane que ichaauruhane coitucurelu.

<sup>14</sup> Nitohaneein ichaauruhane coitucuhacachene cajete, jaiti caa chauratane que, nii acaauru rai Cana Coauneraacha teenu chabana satonoelanaala acaauru ichaonajaanu atane raurenihalune coitucuhacache.

<sup>15</sup> Bana nii jeelai nataneecha que coaacuruhane jana nihanete, jelaiha caaururelu.

16 Nete nii acaauru rai Cana Coaunera teenu atane raauruhane coina, jelaiha caunaa nainecurenelu. Nii atane acaauruhacha raaenute dedeeu nenaane. Nii jaunte, nitohaneein acaauru que leinjiin nese banihateein rucuhacane jaun, acaauru Coauneraneein nihane coejene Cana Coaunera.

17 Nitohaneein Cana Coaunera esenetaane jaun techu, esenetaane cojuha rai calaohi Isaca sohin mocohane coina, rai aitoaha Cana Coaunerane jana, Isaca sohin mocoha nejerelu Abaraaun.

18 Nitohaneeinte: “Ii calaohi Isaca cajete nefoerateeu-rureein iicha foerateeuricha” naa rai Cana Coaunera natiin, acaihaniji rai calaohiniha Isaca ne saijieein rai sohin mocoha Abaraaun ne jere Cana Coaunera.

19 Ohane caje, cacha ichatena nainiha Cana Coaunerane esenetaane jaunte, nii rai calaohi atinaain tihane jere Abaraaun. Nii jaunte, Cana Coaunera rai tihane baiha, nacoauneein nii rai calaohi raelu. Nitohaneeinte jataain chaque nelateineein nelu nii Abaraaun.

20 Cana Coaunera esenetaane jaun techu, rai calaohichuru-Jacobo, Esao, naaonjoainuri coroatajanerichaaain Cana Coaunerane coitucuhin cojiotaelu Isaca.

21 Cana Coaunera esenetaane jaun techu, inae ohane rai netiin, rai calaohi Jose calaohichuru- le cachaauru cojiotaain coroatajanerichaaain Cana Coaunerane que aitiin, rai nunera que netemeriaain, Cana Coaunera corojelu Jacobo.

22 Cana Coaunera esenetaane jaun techu, inae ohane rai netiin, Egipto caje mituururichaaain rai naraaichuru Isaraelitacurune que aitiin, rai jaberoco amaauruha acaauru jini-ichaaaine coina aitelu Jose.

23 Cana Coaunera esenetaauruhane jaun techu, canaanai-huru soaajeratiha Egipto curuaanaa *reyne* jana, nejanoaa Moisesane jana casilanaala, nichata ateein asinojoneein aina sirichurelu, jataain caohachajei canaanai nihane jaun, rai fojiaraauru.

24-25 Cana Coaunera esenetaane jaun techu, *Rey* Faraaon cacunu, calaohi rijjijieein nena jerenihane jaun, inae ichauchenaneein rai naraaichuru- Cana Coaunera cacha neein nenacaauru aina jiniinquin cairichanojoneein nelu Moisesa. Jaiti caa chauratane que osaonacaauru aina ichaohane bana.

26 Nitohaneeinte, jataain Cana Coaunera esenetaane jaun, rai cainarichaaain Cana Coaunerane coitucuha nota que coara rijjijieeine jaun, Egiptoo raotojoei ichaonaa que

ichaonaa nainihalune que jaolequiin, jataain nii amurito-heriin nelateineein cacha ichoteratera- Mesihasi rijijieein co-coinanohineein necairichanaa jerihane jaun, naraaichuru rene cuelu Moisesa.

<sup>27</sup> Cana Coanera esenetaane jaun techu, sohin jaohane coina arichatiha curuaanaa *reyne* jana, casilanaala Egipto batane caje amuhin, ecu aina neein coarajiha Cana Coaneraane jana ainaan rijijieein, Aca jerihane rijijieein nelu Moisesa.

<sup>28</sup> Nitohaneein esenetaane jaun techu, besetaneein neeni-Fasocoa janonaa nunuhe bitoaain, satiin Isaraelitacuru nenaja bacuujuuauru rujuaerate ichana que Moisesa. Nabana Isaraelitaneuruhane calaohichuru ajichacuru atinaa Cana Coanera letono anjerane coataa.

<sup>29</sup> Cana Coanera esenetaauruhane jaun techu, atane jacoro que ainaa rijijieein, cucuana jera jaorelu Isaraelitacuru. Jana Egipto cocoaichacuru acaauru caaijie cuhalaain satiin naluhin oorelu.

<sup>30</sup> Cana Coanera esenetaauruha Isaraelitacurune jaun techu, caainsi janoneein cojoanoonetojoein cuhin, caainsi saneein Jericoo nese tinonocuruhane jana, neranuha tinonoritiin nena nii ajeri caje ichanohineein nena nii nese tinoritiin ucuuneti rijiane jana, satiin cocoaichacuru sohin jaorelu.

<sup>31</sup> Cana Coanera esenetaane jaun techu, nii Jericoo nenacaauru cachaauru sohin jaaoruhane ucuatoha, nii ecu nena ene cojoaelorohe sohin jaorenenu. Nitohaneein esenetaane jaun, acaauru letonocuru coroatajai cunacaauru raa raotojoein rai loreri asaaene jaun.

<sup>32</sup> Jaitite lanacure Gedeeon, Baraca, Saansoon, Jefete, Rabiri, Samoeri, chaen *profetacuru*, naaonjoaainunri que inara rai irihanune, nena inae jianeun.

<sup>33</sup> Satiin niichuru jetaote, Cana Coanera esenetaauruhane jaun, lauri lauri nenacaauru atanecuru ruluhin jetao, jeriha Cana Coaneraane rijijieein ichaain jetao, acaauru rai niicha teeni Cana Coanera aitoonjoan atane raarelu. Tabaauru leon ucuha cuhane jaonojoinecuruhane nihanatiin quinaa nainenelu leon, leoncuru ujuae fuhane coina, rai anjera letoaa Cana Coaneraane jaun.

<sup>34</sup> Jana tabaauru jetaote, Cana Coanera esenetaauruhane jaun, usi tabai jana jaonojoinecuruhane nihanatiin, tonajelanaala usi caje nichoteurelu. Chaen tabaauru jetaote, sabere caje nichoteein sonaana que casihuruhane saijieein, nii baiha nelararajiaain sonaana que acaauru que nejeratenacaauru amuritoorelu.

<sup>35</sup> Tabaauru enecuru rai jetao techu, acaauru araaichuru onacaauru ichatecurelu.

Jana tabaaurute cairichanojoneein neeuruhane caje nichotenaa coacuelanaala oorelu, ooruhane nihanatiin Cana Coaunera aina raotojoei ichaonaa que ichaaorurichaaine esenetaauruhane jaun.

<sup>36</sup> Jana tabaaurute acaauru nocoeje chanuhin bisinojoneein, *cadena* que ichoanojoneein caresero cuhane tenojoneein, naaonjoaaurelu.

<sup>37</sup> Jana tabaaurute, ajeri que bodoosiin, sera que cataaun terunojoneein, sabere que sonojoneein, naaonjoaain oorelu. Chaen techu, cajihaneein amuhemujueein cairicheinejeein, carenero, cabra, naaonjoainuri ujui que cajionecoojoein, cairichanojoneein nererojoecaaeriin, naaonjoaain neurelu.

<sup>38</sup> Nii cachaaurute chauratane que, nelatihei rijijieein, cunaja coitucuelanaala cajihaneein, cache areroo cuhin, ichatane ucuunno cuhin, ajeri jioararo jachu cuhane neein, atane jachu ucuacaain nena cuhaneuru cuhin amuhemujueein nerejetocurelu.

<sup>39</sup> Nete nitohaneein esenetaain neeuruhane coreniha cache caohacha rijijieein coaranaaca Cana Coaunera natiin, chuni rai naitoonjoan niicha teeni tenelu,

<sup>40</sup> cana coacuhin cana rai jataain caohachaneein niicha tei esenetaeraneein neinichaachene aina cuaain, acaauru netonai cana aina jiniiquiin esinae rauhijiriin caohacha icharaneein ranojoneein neeuruhane coina.

## 12

*Jesoso coarajeein nena rijijieein, itolere bana queecha coaacuche.*

<sup>1</sup> Nitohaneein inae cana que Cana Coaunera esenetaauruhane coarateein coitucuhateeuruhalu nii cachaaurune jaun, jeriha Cana Coaunerane rijijieein ichaonaa jerichaachene nihanatiin itolere bana osaacha ichana coacuhin nihaachene coina cana acateraneein nena jianein, canaacha esenetai jerenohi ichajeein laraajiin ichaohacachenete caohachae.

<sup>2</sup> Aihane jaun, nii esenetaacachene jaan tera neein aca cana suujua rucuhaneein niha Jesosone jaun, queecha coaacachenete ne. Inae nii baiha raotojoein rachoojoein Cana Coaunera rori- *trono* raotono nichajai que nelauriaain nerichainne coitucuhane jaunte, rai nocoeje chanuhin coroso que teein atinaauruhane jana, coejenelu.

<sup>3</sup> Nitohanihane jaun, itolere bana Jesoso cairichaaeriin neeuruhalu osaaonacaauru cachaaurune que, inara suujua cuhane coaucuche. Aihane jaun, chatohanei coaraain neeichene nihanatiin, jiaonriha coiinteein esenetaaichene jianequichene.

<sup>4</sup> Niheichu nii osa que nesarucuhichene coataa necairichanaa coraquichene jaun coreniha oriheeicheein.

<sup>5</sup> Nete inae inara, rai calaohi suujuatiha casetecaane rijijieein, inara suujuatiha inara casetecaa Cana Coaunerane jaan baitequiche. Rai Quiricha cuhanete:

“Jiaonriha

ii suujuatiha, ii casetecaa

Cana Curuaanaa que jaolecoina cacalabi.

Niheichu

baaso ichaaine coreniha

ii casetecaane,

nainiheeii

esenetaaine jianeeine.

<sup>6</sup> Niicha belaaite suujuate

Cana Curuaanaa.

Jerichanejeein techu,

rai calaohi rijijieein

niicha rai casetecaain ne,”

naain ne Cana Coaunera Quiricha cuhane.

<sup>7</sup> Nitohanihane jaun, inara casetecaane abaantaain neeichenete, rai calaohi belaihane rijijieein inara belaicheein Cana Coaunera. Nihei chuni canaanai- inacaacha suujuateinelaanaala nei.

<sup>8</sup> Jana rai calaohi rijijieein nenacaauru casetecaa suujuatihaane rijijieein inara suujuatiha, inara casetecaeniha Cana Coauneranete, rai calaohi esinenelanaala, rai nere tonorae neeichene jaun aicheein.

<sup>9</sup> Chaen techu, caa chauratane que nenacaauru- cana fojiaraauru- cana casetecaain cana suujuateeuruhane, tonoraain nerejetocoaachelu, tonaain erenaa coacuelanaala. Nitohanihane jaun, cha caaunna nii amuritoheriin dedeeu nena Cana Inaca Cana Coaunera cana suujuatiha, cana casetecaane abaantaain nenerihacache, chabana satonohelanaala nena ichaonaa raacachene coina.

<sup>10</sup> Cana fojiaraaurute, jaiti caa chauratane que ichaohacachene jana, nechu raujiaain acaauru jerecuruhane rijijieein nihacachene coina, cana suujuateurelu. Nete Cana Coaunera laen, Nesineneein caohacha icharaneein nihane jaun cana rai caohacha icha cana suujuatiha cana casetecae.

11 Coatiha niqui raotohi caseteco coaracaane, rijieeoritiin cunaain tacaane jaun. Nete nitohaneein cana teein cana re-laera tonoraain ichaohacane, rauhijiriin raotojoei ichaonaa que ichaohaca.

*Jataainte elunae cana rai Cana Coauneraacha beratei que jaolecohacane*

12-13 Aihane jaun, nacoauneein nelararajiaain caohachaaain ichaaoche. Nacoaauneein caohachaaain rauhijiriin inara suujua coaraain ichaohin, jerichanejeein nacanacaaena coacuelanaala neeichene coina.

14 Satiin cachauru aina raotojoein ichaaoche, cojoerihu jeriha Cana Coaunerane rijijieein ichaohichene coina. Jeriha Cana Coaunerane rijijieein ichoaeniha cachane, nihei chuni Cana Curuaanaa coarana nainerinaain.

15 Atiin jiniinquin, jeriha Cana Coaunerane rijijieein, ita coroatajaneein neeuche. Nabana chuni nitohaneein nihane jianihane, cacha atinaa ajaena corainei rijijieein leechauru ichao aasaecane coataa.

16 Jiaonrihachu chunocoha inara caje, nejelau ene aina ichaohane. Niheichu rai Cana Coauneraacha tei que jaoleconaa nainihe. Nitohaneein ichaane jaunte, nechu lenoneecha coreniha, aca nihana saijieein, rainein nenea telu rai nocoala rai Esao.

17 Nii jaunte, nii coitucuhichene rijijieein, rai caohachanu tiha rai inacane coina bajaane saijieein tenelu rai inaca. Mainajein chanaain bajaane saijieeinte, tenelu inae nitohanihane jaun.

18 Nete laen inara, aihuruhalu Israelitacurune rijijieein, chatohanai dadaain coanacai, usineein iihanei, nocohena tabai, cujuana tabai aina nocohena, naaonjoain nenea rohan nii nichuuntaeneeiche.

19 Niheichu toniha jaihane aonaheeiche. Niheichu toniha Cana Coaunerane aonaheeiche.

20 Nii aohanrauru jetaote laen, nii naitoonjoan tonorana nainesihurenihane jaun, abaantasilanaala acauru rai iriha Cana Coaunerane jianeratecurelu. "Chunocoha, caa nihanune jaan- ichtatane ucuunno rohan nichuuntaain, ecu turuhin, jelai shaquiin, naaonjoainte ajeri jaberoco, rejoon, naaonjoain que sohin jaonjoinereein, lenone neein aihane nihanatiin" naain iriha Cana Coaunerane jaun.

21 Nitohaneein jataain coasinacaa, nii acaauruhacha coaraine jaun jetaote: "Jataaine rijijijianeun canu nesoone caunra" nae jetao Moisesa.

22 Nete laen inara nii amuritoheriin, Cana Coaunera nenaja esine Sioon bichatane ucuunno, dedeeu nenea Jerosaleeun nichuuntaaiche. Chaen techu oaraanca neein netaojiaain

Cana Coaunera coroaecuruha coina, netaojiaain neeuruha anjeraaurune jana coaraqiche.

<sup>23</sup> Chaen techu, ichoaichaniha Cana Coaunera calaohi neein dedeeu cocoirichanojineein nenacaauru rohan turuhin coaraqiche. Nitohaneeinte satiin caohachaaain ichaonacaauru cachaauru, aca jerihane rijijieein teein niicha ranojoihunru rai Joesioneein nenea- Cana Coaunera rene turuhiche.

<sup>24</sup> Chaen techu nii ena nenea Cana Coauneraacha teratei teraneein nenea Jesocurisito- rai coichana que cana coulu-oorane maajeein coaraqiche. Nii rai coichanate jauriaanejeein cana cairichaeranu que nihalu Abeli coichana jana, jataain nii amuritoeriin cana rai nelateineein ne.

<sup>25</sup> Nitohanihane jaun, cana rai ereein niha Cana Coaunerane que jaolecohin, batiin neeichene que necohalajiin neeuche. Coaracuche nachuhinti nii jaiti cau chauratane que ne bana, suujuatenajaane coina Cana Coauneraacha cotihacurilu, caje nichotenaa nainecururiha. Aihane jaun, nii amuritoheriin nichotenaa nainerihacacheein dedeeu netiin cana suujuatihane que jaolequiin nihacachene.

<sup>26</sup> Nii iriha Cana Coaunerane bana jetaote, nii rai nereecha caun nerurujaaelu canarai chauratane. Nete ena laen: "Nacouneeina chauratane rurujuareeunni le sajeein. Coatiha Chaurataneecha nerurujuarinaain, cana rai dede netonaite nerurujuareein," nae Cana Coaunera.

<sup>27</sup> Niritiin: "Nacoauneein le sajeein" naain aitohanete, satiin niicha coaunanojineein nerurujuanaa naineein nenacaauru itajihane jana, nerurujuanaa nainelanaala nenaacha nedaane coina aitoha Cana Coaunerane coitucuerate cana que.

<sup>28</sup> Nii cana rai Cana Coauneraacha tei- rai Cojoanon-aate chabana nitajenaa nainene. Nii coreniha "Narihara Cana Coaunera," naain jiniiquiin rai cachaneein neeuruhanee coarateein aca jerihane rijijieein coroaeraauru aina coaroaecaachenete ne,

<sup>29</sup> itolere baaso itajera- usi rijijieein niha Cana Coaunerane jaun.

## 13

*Naaonjoaain, rai suujua rijijieein nihacachenete jere Cana Coaunera.*

<sup>1</sup> Jiaonriha ita nejeraneein nenea rijijieein, jiniiquiin ita belaaain neeichene jianeein neeichene.

<sup>2</sup> Niheichu inara rene turunacaauru belaaain raaichene jianeein nenea nainiheiche. Nitohaneein nenacaaurute,



acanihane coitucuelanaala Cana Coaunera letonocuru anjer-  
aaurune maajeein raurelu rai loreri asaee.

<sup>3</sup> Aitiin caresero cuhane nenacaauru netonai coaucuche,  
acaauru aina jiniiquiin caresero cuhane nenea  
rijijijieein. Chaenchu cairichaaerinojoneein nenacaauru  
netonai coaucuche, inara netonai acaauru rijijieein  
cairichanojoneein nenea nainequichene jaun.

<sup>4</sup> Nitohanihane jaun, inara quichaauru, enecuru, naaon-  
joineeichene nisirihateein neeichene, itaque inara suujua  
acatein, leocha inara sinijerane lanaala nenea coacue-  
lanaala, inara sinijiera ainaacha ichaaoche; satiin baaso  
ichain rai sinijerane lanaala nenea aina ichoai casete-  
carichain Cana Coaunerane jaun.

<sup>5</sup> Jiaonrihachu coriquicha que coacuhin neeichene. Inara  
rucuhele inaraacha sirii ainaacha raotojoein ichaaoche:  
“Chabana nihei inara jianein inara que jaolecohanune”  
naalu Cana Coaunerane jaun.

<sup>6</sup> Niritohalu cana rai Cana Coaunerane jaun chaque tonaje-  
lanaala nainichaache:

“Cana Coaunerate canu coroatajaneranein ne.

Nii jaun chaque casinaaun.

Chatonai ichana nainihei canu que camute cache,” naain  
erenaa nainichaache.

<sup>7</sup> Inara suujuatein Cana Coaunera ere que inara relaa-  
reralu coacuhin, acaauru ichao que coacuhin, esenetaain  
ichaaoruhalune rijijieein ichaaoche.

<sup>8</sup> Jesocurisitote jeelainein nereein, chabana satonoe-  
lanaala.

<sup>9</sup> Aihane jaun jiaonriha nejelau cuaain inara relanaajerera  
nihane, rijitojoein esenetaain neeichene. Nii amuritoeriinte  
jataain nelate, jeriha Cana Coaunerane rijijieein cana suujua  
ilaain ichaohacachene. Coatiha chaque nelatihei, nii niicha  
quinelanaala nenea iniho quiniha cachane nihanatiin. Coat-  
iha chabana cana rai chaque nelatejeehai nii.

<sup>10</sup> Canate coroso que ohalu Cana Coaunera Calaohi Curisi-  
tone coreniha jianacoon osa caje nihacache. Nii *santuario*  
teen saseredotecuru ichanaa coatiha inae chaque nelatein  
nedaai.

<sup>11</sup> Jana jauriaanejeein nenaalute, saseredotecuru curua-  
naacha lenonecuru sohin, *santuario* cuhane rai coichana  
terejetelu osa anihoeraanu que. Nete laen, nii lenone  
jaberocooru, acaauru loanari caje naain amaain jelai teen  
mocrejetocurelu.

<sup>12</sup> Nii rijijieein techu Jesoso netonai, naain nese caje  
amaain jelai teen atinanohinelu; rai coichana que satiin rai  
cachanein neinichaachene culuocane coina.

<sup>13</sup> Aihane jaun, aina jiniiquiin nese caje amanojoneein cana netonai nesarichanaa abaantacachenete ne, aihalune rijijieein.

<sup>14</sup> Coatiha caa chauratane que nihei cana rai leeinjiin nese chabana nitajenaacharanejeein nei. Nii jaun, chabana nitajenaacharanejeein nenea ariirijiacachenete ne.

<sup>15</sup> Aihane jaun, itolere bana Cana Coaunera coroaecaachenete ne, rai Calaohi Jesocurisito aina cuaain. Nii Cana Coaunera coroaecaachenete belaiha rai canaacha teenineein nereein. Aihana jaun cana ujuaae caje coroaecaachenete ne.

<sup>16</sup> Jiaonriha caohacha ichana baiteein, leeochoauru rai inaraacha sirii teein naaonjoaain neeichene jianequichene. Nitohaneein ichoaite rautaaain coarae Cana Coaunera.

<sup>17</sup> Inara relaaunera ere tonoraain jerecuruhane rijijieein neeuche. Acaaurute nebetacaelanaala inara beraaihure, Cana Coaunera rai jitaain inara aina nichanaa beeuruhane rai neeuruhane jaun. Aihane jaun, acaauru jerecuruhane rijijieein, inaraacha ichai ichaain neeuche; acaauruhacha rautaaai ichaelanaala. Jana aineeichene, coatiha inara rai chaque nelateriaain inaraacha ichai.

<sup>18</sup> Atiin canacaanu coreniha Cana Coaunera bajaauche. Jataain raotojoiha canacaanu suujanena jerichaanu; itolere que caohachaaain ichana jerichaanune jaun.

<sup>19</sup> Jataain inara aina nacoauneein nenea jerichaaunne jaunna, inara aina nihanune coina Cana Coaunera bajaai- chene coina, inararai aitoon.

*Raotojoein jiniiquiin neeuche.*

<sup>20</sup> Rai coichana aina cuaain chabana satonoelanaala nenea ichaonaa tera- rai cachaneein nihacachene beraichaneein nenea- nii o caje Jesoso ichatera Cana Coaunera,

<sup>21</sup> inara ichao rucuerateeine Jesocurisito que, aca jerihane rijijieein cha chaain neeichene coina. Chaen Jesocurisito aina cuaain canacaanu que niicha jerei ichamiin. Itolere bana satonoelanaala, Curisitoneein niha Curisitone coitucurumiin satiin cachaauru. Bajiaanachuhinti aihurene.

<sup>22</sup> Atiin raotojoein caa inara suujua nunaeraanu que inara rai canuhacha laenai raauchera canejeraauru.

<sup>23</sup> Cana nejera Timoteote, inae caresero caje mitue. Enanocoojoa turuhanena, inae inara coaraa uhanune, canu jiniichaain uhareunni.

<sup>24</sup> Satiin inara bichauhenaauru aina, satiin Cana Coaunera cachaneein nenacaauru rai, acaauru coaaucaunne beeuche. Italiau nenacaauru netonoaite inara coaucure.

<sup>25</sup> Jataain jeelai amuritoeriin inara coroatajanemiin Cana Coaunerate, satiin raotojoein neeiche.

## Saantiaaocha letoi

*Jesocurisito esenetaeraauru rai Saantiaao letono quiricha*

<sup>1</sup> Canuna Saantiaao neeun Cana Coaunera ere tonoraera neein, calaohi Jesocurisito naajoain ere tonoraeraneeinne neeun. Nii Cana Coaunera Calaohi Jesocurisito ere esenetaain nenacaauru, caa cana rai chauratane sacutaain riaa-neein nenacaauru raina, caa quiricha letohaun.

<sup>2</sup> Aonacuche satiin Cana Coaunera Calaohi coreniha canejeraauru. Chatohaneein nihanatiin inara tera nihane chaque tonajelanaala raotojoein rachoojoein neeuche.

<sup>3-4</sup> Cana Coaunera esenetaaichene coreniha itolereque coujunojoinequichene coitucuhin, nellararajiaain itolere necairichanaa abaantaaain neeuche. Nitohanihane banate itolere necairichanaa nihanatiin abaantana naineriquicheein aina iiquichene. Nii banate esinaae rauhijiriin Cana Coaunera jerenohi ichana naineriquicheein. Aihute coujurihu Jesocurisito ere tonoraera neein nena tocohaneein neeiche rauhijiriin.

<sup>5</sup> Inaraacha chanenu coitucuheneeichene, Cana Coaunera caje bajaauchoete inara coroatajanemiin. Acate inara rai coitucuhichene jaanu tereein, Cana Coaunerate canaacha latei tera ne chaque tonajelanaala.

<sup>6</sup> Cana Coaunera bajaaiichene, esinae rauhijiriin esenetaain necoatoelanaala bajaauchoe. Necoatiin Cana Coaunera bajaerate, esinaae rauhijiriin Jesocurisito ere tonorana nainene, cajiineein suujua letono sacuhane.

<sup>7</sup> Nitohaneein neeichene, inara coroatajanena nainerihe Cana Coaunera esenetaeneeichene,

<sup>8</sup> leinjiincha que suujua cuaain nena naine niha nitohaneein nenacaauru cachaaurune jaun.

<sup>9</sup> Cairichaineein neeichene jana, inara raa Cana Coaunera jaun, raotojoein rachoojoein neeuche.

<sup>10-11</sup> Cana Coaunera coitucuhin esenetaera coriquihona neein nihane, coriqui que nanejiaane niha natiin raotojoein rachoojoein neeine, Cana Coauneraacha tenojoin amuri-toheriin jataaen nelatena naineniha coriquine coitucuhin. Cana rai Cana Coauneraacha tei ichaonaa laen, chaelai janonaa bana nitajenaa nainihe. Nii coitucuhin raotojoein rachoojoein neeine.

*Chabana nitajenaachara ichaonaa terichain Cana Coaunera*

12 Nerausiaaequiche esinaae necairichanaa abaantaain Cana Coaunera coitucuhin, esenetaain, jereein, nere tonoraain neeichenete, chabana nitajenaa charanejeein nena ichaonaa caohacha esine tereein inara rai Cana Coaunera, belaaain nere tonoraeraauru rai nitohaneein tihane coina aitiin nihalune jaun.

13 Chunei chatohanei baaso ichana coacuhin nihane, coaa “Cana Coaunerate jere caa baaso coaucaaanne coina,” naain iriha. Coatiha joareein cache rijijieein chabaaso coacuhin nihei Cana Coaunera.

14 Nii cana raajenihane canaacha coacuite, ecocoe cana suujua caje baasoneein. Aihana jaun baasoneein sacuichechene coataa, caohachaaain coaracuche.

15 Baasoacha coacuhin nenaate, nechu jataaen caohacha nainejeein nitajiha cureein. Coatiha Cana Coaunera jerihane jaun, nii baaso neein ichaoheiche. Niheichu nii nitajiha chuneine jerihe Cana Coaunera.

16 Coaa inara raajenihane nohanihache canejeraauru.

17 Coatiha Cana Coaunera caje uhi chabaaso. Coatiha chaaelai janonaa bana suujua lonaai Cana Coaunera. Leinjiiin acaachate aca neein ne. Itolere neeincha caohacha nejesinaachate uhe Cana Coaunera caje. Acate itolere rai cono neein ne. Aca techu enoto, atene, arasijie, naajoainunri coaanaelu dedeeu. Chabana coreenrai Cana Coaunera.

18 Nii jaunte nere berate cana rai, aonaain, coitucuhin, esenetaain tonoraacachene coina. Nii jaunte, nere esenetaain tonoraacachene jaun, ichaonaa esine tee cana rai, raotojoein Cana Coaunera nihane coroaeejin niicha jerei ichacaachene coina.

19 Nii coreniha canejeraauru, caohachaaain rauhijiriin esinaae Cana Coaunera ere aonaain, Cana Coaunera ere tonoraache, chaenchu erenacaotelanaala, chaenchu joareein coreniha obaje lanaala, naaonjoaain.

20 Joareein coreniha obajei cache, nihei Cana Coauneraacha jerenohi ichaai.

21 Aihana jaun itolere baaso nejesina inaraacha sacui jianecuche. Nii Cana Coaunera ere, inara suujua cuhane inaraacha rucujuei Cana Coaunera ere tonoraache, caohachaaain inara suujua coaraain. Acate osa caje jianacoo inara suujue mitareein.

22 Cana Coaunera ere coitucuhin neeichene jaun, tonoraain Cana Coaunera jerenoiha sacuuche. Aineeichene nelatihei raujiaain aonaquichene. Niite nechu jataaen inara raajenihane necoritariquicheein.

23 Cha teeinti Cana Coaunera ere beebejiha beebejerane aonaa natiin tonoraene.

24 Niite enaacha Cana Coaunera ere baitereein.

<sup>25</sup> Cha teeinti aitoha Cana Coaunera erene baitelanaala rauhijiriin tonoraain ne, niite raotojoein nereein. Cana Coaunera ere tonoraacachenete nainichaache caohachaaain ichaohacachene. Niicha jerenohicha ichacaachenete caohachae. Nii jaun Cana Coaunera ere tonoraain naitoon-joan ichajeein sacuhacachenete caohachae, cana aina niha caohachaaain Cana Coaunerane raotojoein ichaohacachene coina.

<sup>26</sup> “Aitoha Cana Coaunerane rijijijeeina caohachaaain rauhijiriin neeun,” naa natiin joenreein baaso neein leocha cacha que irihanete raajenihane necoritae.

<sup>27</sup> Cha latein neuruha ujuatejээрune coroatajanein, cha latein niha autanaaurune coroatajanein nihacanete, esinaae rauhijiriin aitoha Cana Coaunerane rijijijeein nerichaachein. Nainihei Cana Coaunera Calaohi Jesocurisito coitucuruhi rijijijeein nihacachene.

## 2

### *Nejelauneein leocha cacha coaana naineniha cachane*

<sup>1</sup> Nitohanihane jaun Cana Coaunera Calaohi Jesocurisito esenetaera neein neeichene jaun, jiaonriha nejelauneein chunei coaraain neeichene.

<sup>2</sup> Ita taojiaain Cana Coaunera bajaachene jaan coloheri-Teenforo asaae ita taojiaaichene jana, enoha leinjiin coriquihona, oro que anichoquiin, cajione caohacha que necoreeteine jana, cajione siri ruhecaain enoha cairichaiineein neanae,

<sup>3</sup> nii oro que anichoquiin cajione caohacha ruhacaera belaaain, rori caohacha choaae lauriaain, nii cairichai cacha rai, “Nihu chujuhecoo. Ainihane nihu atanichoaae nelaurihau,” naaichenete,

<sup>4</sup> baaso ichariquicheein, caohachaaain cairichai belaaain coaraeneeichene. Nii coriquihona belaaichene rijijijeein, cairichaihuru belailanaala, “Nelatihei cairichaihuru belaiha-cane,” naaichene jaun. Satiin coriquihona, cairichai, naajoainunri belaihacanete caohachae. Nihei cana belaihuruha caohachaaaine jerena caaun nihei. Nitohanai ichaquichenete baaso ichariquicheein.

<sup>5</sup> Caohachaaain aonacuchena inara rai caa que aite te coitucuhiche. Nere esenetaain tonoraa cairichainein ne-naa cacha netejian, nenacaaen belaaain coroatajane Cana Coaunera, jeelai amuritoheriin esenetaain tonoraain nihane coina. Cairichainein caa cana rai chauratane que nihane niha natiinte, belaaain coroatajane Cana Coaunera, aitohane tocohanein chaelai janonaa bana satonoelanaala aina nihane coina.

<sup>6</sup> Nete inara, cairichaihuru necoejechanuhin neeiche. Coatiha cairichaihuru, inara necoejechanuhi, inara cairichaairiin neeuruhi chaaelai janonaa bana. Coriquihonaaaurutejian, inara necoejechanuhiriin, inara cairichaaeriin neeure. Cunaa jereneeichene niha natiin, inara tararaain inara amaain cocoaina nacaihuru rai inara teure, caseteconeein neeichene coina.

<sup>7</sup> Chaaen techu inara que baasoneein ereein neeure, Cana Coaunera Calaohi Jesocurisito sacuhin neeichene coreniha. Caohachaaain inara belaihuruhane coaraelanaalate inaraacha acaauru belaaiche, cairichaihuru belaaichene amurijiriin. Coaa nitohaneein nihache.

<sup>8</sup> Quiricha cuhane aitoha Cana Coaunerane tocohaneein, charijieein teeinti nii raotojoein ichaonaa jereein neeiche. Nii rijijieein raotojoein ichaonaa nainecuruha acaauru netonaine coina, nii leecha cachaauru coroatajanecuchete, acaauru netonai raotojoein ichaonaa nainecurumiin. Nitohaneein neeichenete esinaae rauhijiriin Cana Coaunera aitoojoan ichariquicheein.

<sup>9</sup> Inara araaichuruhacha caohachaaain coaraain belaaain, coroatajaneein, nii nejelaauru coroatajanena jereneeichenete osa que nesarureeicheein, Cana Coaunera notaracaae aitoha Cana Coaunerane tonoraelanaala, nitohaneein rauhi-jiriin ichaeneeichene.

<sup>10</sup> Cana Coaunera aitoonjoan tonoracaache neniha natiin, jitariin caohacha nainejeein Cana Coaunera aitoonjoan tonoraenihacachenete, cana nii ujuaihoneein nerichaacheein.

<sup>11</sup> Nabana nitohaneein neeichene coataa: “Jiaonriha chu chaaen nejelau ene, inara sinijerane lanaala nena aina naosatein neeichene. Chaaen techu jiaonriha sinijera nelanaala nena quicha aina naosatein niha enene,” nae Cana Coaunera. Chaen techu, “Jiaonriha sonajaain jaohine,” nae Cana Coaunera. Aihane jaun rai sinijeranelanaala nena aina ichoanehane nihanatiin sonajaain jaohanete, Cana Coaunera rai rauhi tonoraenihane jaun aicheein.

<sup>12</sup> Aihana jaun coa nejelauneein chunei coaraain nihache. Cairichainein nihacachene sajaainejeein, cana belaaain cana raa Cana Coaunerana jaun jerichanejeein belaaain cachaaaraain nihacachenete caohachae.

<sup>13</sup> Inae ecu tihane banate caseteco coaraa cuurureein nechu ansainein nenacaauru, necairichanacaauru que “cairichaaajoaa” naelanaala nenacaauru. Necairichanacaauru coroatajanena jeriheichurute, “cairichaaajoaa” naelanaala casetecaeratiha cureein Cana Coaunera. Jana, necairicha nacaauru que, “cairichaaajoaa” naain coroatajaneraaurute, caseteco caje nichotiha cuurureein. Niite belaaain raa cureein Cana Coaunera.

*Cana Coaunera coitucuhin esnetaane coaratihā cachane*

<sup>14</sup> Cana Coaunera coreniha canejeraauru, chaque nelatihei raujiaain Cana Coaunera coitucuhin esenetaeranichaaun naain iriha cachane. Coatiha nii coreniha osa caje jianacoon nerianaain jeriha Cana Coaunerane rijijieein cha lateein niha namute cachane belaaain coaraain coroatajaneein netiin naitonone nihane jaun.

<sup>15</sup> Lenone, cajione, naajoain que, anejiin niha, Jesocurisito coreniha cana nejera, cana bai naajoain ine jana,

<sup>16</sup> “Cairichaaajoaa nohane, bajiaa nachuhinti chunijihu lenone, cajione, naajoain eruujue ne,” naaca cha telanaalane, nihei cairichai coroatajanihaaca. Niicha laatei tein coroatajanichaa nete caohachae.

<sup>17</sup> “Cana Coaunera coitucuhanu,” naaichene jaun esinaae Cana Coaunera coitucueraneein neeichene, leeochoauru notaaquiche nete caohachae. Jana leeochoauru notajaelanaala, raujiaain esenetaaichene chaque nelateein nedariheeicheein.

<sup>18</sup> Inasina caohacha ichaain cacha notajaenihane, “Esinaete chuhisi Cana Coaunera coitucuhin esenetaera ne,” naain coitucuurure cachaauru. Jana esinaae rauhijiriin Cana Coaunera coitucuhin esenetaera nihanete, quiricha cuhane aitoha Cana Coaunerane rijijieein ichaa cachane laen esenetana nainichaache.

<sup>19</sup> “Cana Coaunera coitucuhanu canu,” naa chuneine, caohacharia niqui Cana Coaunera esenetaane niqui, nete nechu aansai ataibinaaecuru coitucuchuhichuru niha natiin, niha Cana Coaunerane esenetaain que casihure nere tonoraaurenihane coreniha, acaauru casetecarihani Cana Coaunerane coitucuuruhane jaun.

<sup>20</sup> Niicha jerei ichaelanaala, raujiaain esenetaa cachane rarihaain Cana Coaunera. Tana nii coitucuhin neeiche ne.

<sup>21-23</sup> Coaraauna chuhinti nii coitucuhichene tocohaneein, nihei leinjiinejeein canaanai sirilanaala biinaa niha Abaraaunne jana jetaote, “Inae nerichaaain ichai leinjiin canaanaicha,” naa Cana Coaunerane jana, esenetaa Abaraaunne jaun, laenaeratelu quiricha inoasi cuhane Cana Coaunera. Nitohaneein Cana Coaunera esenetaa Abaraaunne jaunte, caohachaain rae Cana Coaunera. Nii baihate Abaraaun coujuhin coarae Cana Coaunera, nechu jataaen coujuha, “Carai nii acaihanejein leinjiin nenea ichalabi Isaca uhaain, sohin mocoo carai,” naa Abaraaun rai Cana Coaunerane jana, nere tonoraain calaohi sohin jaohane caina, inae anojoan mucuha Abaraaunne jana: “Ichalabi sohin jaohine coataa, caa carenero soora. Coa canaanai sohin jaohara. Esinaete chuhisi quesenetaain quere tonorana jereeina jaunte, caohacha ichaacha,” nae Abaraaun rai

Cana Coaunera. Nitohaniha Abaraaunne jaunte Cana Coaunera belaichaneein Abaraaun curuaateure satiin cana inoaesihuru.

<sup>24</sup> Jerichanejeein techu coitucuhin, nere tonoraain, caohacha ichaain nenacaauru rae Cana Coaunera. Coatiha raujiaain esenetaaneecha coreniha nihei.

<sup>25</sup> Charijieein teeinti ai leinjiin ene- Raba neein curu- ajaain nena, jaurihanejeein jaelorohe neein nihane jianein, esinae Cana Coaunera coitucuhin esenetaane jaun, coroatajaniha Cana Coaunerane que tonajelanaala, nihei chaque casilanaala Jericoo turuuruha coroatajai Israeli cocoaichacurune jana, coitucuuriin arinajaauruha sohin jaon- ajaauruhane coina Raba araaichurune jana, acaauru coasi- lanaala nii coroatajai Israeli cocoaichacuru asi loreri asaae tein Raba, sohin jaonajaauruha Jerico cocoaichacuru Cana Coaunera coitucuuruhine coataa ichoteratenajae.

Nitohaneein caohacha icharate belaa in rae Cana Coaunera.

<sup>26</sup> Esinaae rauhijiriin Cana Coaunera esenetaerate, nere tonoraain naitoonjoan ichaain ne. Jana “Cana Coaunera coitucuhanu,” naain iriha natiin Cana Coaunera jerenohi ichaelanaala nenaate Cana Coaunera coitucue. Nitohanein niha cachane coatiha ichaonaa chabana sanaacharanejeein nena ranaa nainerinaain.

### 3

#### *Caaintaeniha baaso que iriha cachene*

<sup>1</sup> Cana Coaunera ere benaa que cacha relaera neein nena jeriquichene caohachaain aonacuche. Nelatihei joareein cacha, caohachaain suujua coarae lanaala Cana Coaunera ere benaa que arajiin enonaa jerihane. Niite nere aohan- raauru ichoaae jaecotojoeriin caseteco coaraa cureein, nii cacha rai beebejihane rijijieein Cana Coaunera ere tonoraenihane.

<sup>2</sup> Inaaajoan sanein chaainti Cana Coaunera rai baaso que nesarucuaache satiin. Chaen techu inaaajoan sanein chaainti baaso que irihacache, jerenihacache neniha natiin. Nihei caaintiaai baaso que irihacachene. Chateeinti tonaain baaso que erene. Niite itolere neein caohachaain ichaonaa naine.

<sup>3</sup> Aonacuche. Tasinojoan cabario natiinte nujuae cuhane coata laajoiri tein, que raujiaeraujiajeein jerichaane jaan jelon rauhijiriin amaaca.

<sup>4</sup> Jerichanejeein techu timoon laajoiri que, jerihana- jaan jelon raujiaeraujiajeein rauhijiriin bote seejoan niha natiin amae timoon inaera.



<sup>5-6</sup> Charijieein teeinti ocoana mocohaca fosocoro busi laaojiri quene, nii fosocoro busi laaojiri caje necoaaunaain tabaain neleereein, jitariin ocoana mocohe nii usi. Nii rijijieein techu chatohaneein, cacha cunaitaain cacha itajenaa nainere baasoneein cana ujuae caje mitunaa cana ere, chatonaain, cacha inauhene cunaain cacha janoriteein nihacane. Moconajaerate nii que cana saruhin ne, nitohaneein usi tabai que cacha sarueranihane jaun.

<sup>7</sup> Caaintatohane sainejeeinte, itolere nunaana nenacaauru, itolere tajaacuru, itolere atanichoaee teerei cana lenone, itolere ataibinae, janolari, acano, itolere acauhana nenacaauru, taji, itolere cautenu rijihuru irilaaure irilaeraauru.

<sup>8</sup> Nete chunei, rai nere baaso jianeein nenea nainene. Charijieein teeinti cacha calaa acanone nii acano catu caje cuhin, nii cacha coichana lomoha nii acano catu corane, ohe nii acanoacha calai. Nii rijijicha cana suujua baaso caje coauneein, cana ujuae caje mitunaa cana ere, leeochoauru cana laurijiracuru, naajoainunri jitariin aasaecane jaun.

<sup>9</sup> Nii jeelai cana suujua baaso, cana ujuae caje mitunaa Cana Inaca Cana Coaunera coroaecaachene jaan quete rijijieein niicha counanojineein nihane baiteein, “Cha quete nelatere caa cacha,” naain irihacache obajeein cacha aina nererojoecaacachene, “Coaraain nainaaine caa aansai,” naain irihacache, coaraain cuu necairichaane coina, chatohaneein necairichaa cachane coaracaachene.

<sup>10</sup> Nii jeelai cana ujuae caje mitunaa quete, Cana Coaunera coroaecaachene jaan que techu cachaauru cotaihacache. Caohachaa nitohaneein nihacachene, canejeaauru.

<sup>11</sup> Charijieein teeinti le curuhacha caje mitunaa nainene acau ichonai, acau elonai, naajoain. Nii rijijieein techu cana suujua cuhane nefaa baasone, erenaa caohacha que erenaa nainenihacache.

<sup>12</sup> Charijieei teeinti leeocho enuha inaaque inaana nainene *iquera*, nihechu acau cotebei nihana natiin ichonainein nerotona nainihe. Nirijieein techu caohacha que erenaa nainene cacha, baasoneein niha rai suujuane.

### *Cana Coaunera coitucuhane coaratiha cachane*

<sup>13</sup> Esinaae rauhijiriin Cana Coaunera jerenohi coitucuhin neechene, inara suujua coaraain, leeocho cachaauru rai caohacha ichaain, itolereneein caohachaa raotojoein neeuchete, esinaae rauhijiriin Cana Coaunera jerenohi ichana coitucuhichene coaracurumiin cachaauru.

<sup>14</sup> Jana inara leeochoauru que necoelaain, inara suujua cuhane obajeein, inaraacha jerei ichaquichene, “Cana Coaunera coitucuera nihanu,” naain coa raotiin nenea

coaaucache. Niite laen nohanenaa ne, Cana Coaunera esene-taenihana jaun.

<sup>15</sup> Nitohaneein neeichenete Cana Coaunera coitucuuruhi cachaauru rijjiiriquicheein. Acaaurute nitohaneein coaacure, nitohaneein acaauru suujua tiha Moconajaerane jaun. Nihei leeochoaauru cachaauru aina, ita belaiha cachane jerihei Moconajaera. Moconajaerate ita belai lanaala, itaque nejeratiha cachane jere.

<sup>16</sup> Nenainetiin rai caohachanuhacha que coacuhin nenacaauru cachaaurute, ita que nererojoecaain, ita que necolaain naajoaauruhane jaun, nainecurene ita belain leeochoaauru cachaauru aina caohachaaain nena nainecurene.

<sup>17</sup> Nii Cana Coaunera coitucuhin nenacaaurute, nejelauneein caohachaaain ichaaore. Cana Coaunera ere tonoraauruhana jaunte, caohachaaain ichaaore, rai caohachanuhacha que coaacuruhane jianeein, leeochoaauru belain, ita belain, ita que nererojoecaelanaala, inae nohanelanaala, leeochoaauru coroatajanein, cha latiha leeochoaurune tein, suujua coaraain, naajoaain neeuruhana jaun.

<sup>18</sup> Nitohaneein neeichenete, Cana Coaunera jerenohi ichaaechajeein, nauruta naurutaain cuujeein, jelai choaae jauhecotojoeriin caohachaaain ichaohichene, ita aina, leeochoaauru, naajoainunri ainane coaraanete, raotojoein nereein inara aina Cana Coaunera. Acate inara suujua cuhane raoti ichaonaa esine tereein, rachoojoein neeichene caina. Nitohaneein raoti ichaonaa esine que ichaohichene, coaracuruha leeochoaauru nete, acaauru netonai nii inara rai raotojoein ichaohichene jaan ichaonaa esine teera Cana Coaunera, ere tonorana jerecureein.

## 4

*Caa chauratane que nena baasohacha jereein sacuha cachane*

<sup>1</sup> Nitohaneein Cana Coaunera jerenohicha, ichana coacuhincha ichae lanaala, inaraacha jereecha coaaquichene jaunte, ita que nejeratein, ita que nererojoecaain neeiche, leeochoaauru aina ita belain neeichene jeriha Cana Coaunerane niha natiin.

<sup>2</sup> Cha teeinti chaaelai sirihane jana, inara rai nenihane que necohelaain, nii niicha sirii rucuhale coreniha que nererojoecaain cotaain, coaraain inae nii niicha sirii basijiauhichene jana tonaa nii nerorane, inae coreniha sonaa coacuhin que nererojoecaain, tabaque sohin jaohin, naajoaainche, cha latein neeichene Cana Coaunera caje bajaalanaala.

<sup>3</sup> Tabaque bajaachene niha natiin inara rai terihaain Cana Coaunera, niicha jerei ichana coacue lanaala leinjiin inara raihuancha que bajaachene.

<sup>4</sup> Cana Coaunera coitucuuruhi cachaauru. Tana caa chauratane que nenaacha jereein sacuera cacha, Cana Coaunera que nejeratenaa neein nihane coitucuhichene. Aihane jaun chunocoha caa chauratane que nenacaauru jereein Cana Coaunera aitoonjoan que jaolequiin nenaate Cana Coaunera que nejeratiha aicheein.

<sup>5</sup> Nii que nainaquichene jaanu quete quiricha inoaesi cuhane, laenaera que laenaerateein aitoaha Cana Coauneraane rijijieein, esinaae rauhijiriin aitothane rijijieein inetono janonaa bana inara suujua letonohacha ichana jerequiche.

<sup>6</sup> Nete jataain cana belaihane jaun, itolere janonaa bana cana coroatajane Cana Coaunera, rai Quiricha Inoaensi cuhane aitothane tocohaneeinte que ninichaaajenaa tocohaneein rai baaso icharaauru que nejerate Cana Coaunera. Jana esinae rauhijiriin esenetaain nere tonoraeraaurute belain coroatajane Cana Coaunera.

<sup>7</sup> Nitohanihana jaun nelararajiaauche, Cana Coaunera ere tonorana que. Atiin nii Moconajaera sitaauchete inara caje amuhine.

<sup>8</sup> Aihana jaun, Cana Coaunera rai caohacha rene nichuuntaain Cana Coaunera jerenohicha ichajeein ichaauche. Aihute inara rohan neeine Cana Coaunera. Enate ichaonaa baaso que ichaohiche. Nii jaun Cana Coaunera bajaache. Aihute inara suujua rucujueein, baasoneein neeichene caje jianacoo inara mitaain, inara coroatajanemiin Cana Coaunera. Aihute nii baaso ichaquichene jianeein itolere bana Cana Coaunera jerenohicha ichaquiche. Aihana jaun cajihaneein inara suujua coaraqichene jianecuche. Coaa cajihaneein inara suujua coaracache.

<sup>9-10</sup> Cana Coaunera jerenohi ichaquichene jianeein neeichene coejeein, inara jaberoco coinaderaain, baaso ichaain neeichene coitucuhin, rauhijiriin suujuelanaala been Cana Coaunera bajaache. Bajaachenete inara coroatajanereein jeelai choaae jauhecotojoeriin Cana Coaunera.

### *Cunaain nejera coacuhin niha cachane*

<sup>11-12</sup> Canejeraauru jiaonriha cunaain ita coacuhin, ita janoriteein neeichene. Chunei Cana Coaunera coreniha rai nejera inauhene nejerateein nenaate Cana Coaunera rai baaso ichareein. Inasiina Cana Coaunera colaihaje tacaain nejelaauru ichao coaraain, "Acate naajoaain ichoae," naain coulurujuera rijitiin ereriquiche. Leinjiin Cana Coaunerate

laen, chatohaneein baaso ichaain, caohacha ichaain, naaonjoaain ichaonacaauru coaraain, nii que, “Acaauru acaaurute, naajoaain jataaen baaso ichaechajeein ichaaoore,” Jana, “Acaauru acaaurute laen caohachaaain suujua coaraain caohachaaain ichaaoore,” naain cacha ichao coitucuhin que ere-naa naine. Aitoha quiricha cuhane Cana Coaunerane tonorae lanaala, leeochoaauru ichao coaraain coulurujuera rijiitiin ereeichenete, chatohaneein inara itajeein, chatohaneein inara tenaa nainereein Cana Coaunera. Aca techu chaen naine, jianacoo baasoneein neeichene cajé inara mitaane.

*“Naaojanrichaaain eresi,” naain coitucueniha cachane*

<sup>13</sup> Tabaaaurute, “Naaajoain neseuna cureeunni, cuu amiha-nenaa que necoreteein coriqui taojiaa,” naaure. Caohachaaai nitohaneein coauquichene.

<sup>14</sup> Niheichu, “Naaojanrichaauni eresi,” naain coitucuhiche. Inoaelu netojoein inoo tejian ichaoriquicheine coitucuhiche. Tana janoneecha mituhin nii baiha nitajiha suruaa neeojoaane rijiicha inara ichaone coitucuhichene.

<sup>15</sup> Raujiaaaincha caohachaaain coaacucuche. “Cana Coaunera jerihanena ichaajoihanune caa ichaain, leeochoa ichaain, naajoanreeunni,” naauche.

<sup>16</sup> Nii inatiinte chaelai nihane coasitaain ereeiche. Caohachaaai niritiin irihacane.

<sup>17</sup> Cana Coaunera jerenohi coitucuhacache natiin, nii canaacha coitucuhi caohachaaain ichaenihacache nete osa tabai que nesarurihacachein.

## 5

*Caseteco coaracuurrichaaain cairichaihuru cairichaaurera coriquihonaaurune*

<sup>1</sup> Aonacuche satiin coriquihona neein nenacaauru, nii que caohachaaain casiin neeichene coina. Tabai inaderanaa caaunte chanaa curiquicheein, ecu tihane bana necairichaa curiquicheeina jaun. Satiin nii inara coriqui aina caohacha nainejeein nitajeeichene coina, tururichaaain Cana Coaunera jaun.

<sup>2</sup> Inara coriquihona neeichenete arajiin coriqui jaohiche, leinjiin inaraacha latei corenihacha. Nihei chaque nelaterinaain nii inaraacha sirii rucuhele. Nii inaraacha rucujuei rucuhele nacodohaqui, nii inara coriqui, inara cajione, inara lenone nacodohaqui, nechu inacojoein nelaterinain, coroneein setuhin naajoanrichaaine jaun, chaen quirichaaain cojoanone jaun.

<sup>3</sup> Coriqui niha natiinte, caohatiin rucuhequichene niha natiin nitajiha cureein.

Inae saa cana janonaane banate satiin baaso icharaauru itajeratereein usi tabai que Cana Coaunera. Nii banate, nii nacododojoanei acaauruhacha rucujuei rucuhele, chabana lateein neeuuha cairichaineein nenacaaurune, acaauru coroatajaneein, naajoaunrenihane coaraane jaun, nii coreniha coriquihonaneein nenacaauru casetecareein Cana Coaunera.

<sup>4</sup> Nitohaneein cairichaihuru cairichaauruha acaauru amihaneeo corete lanaalanete rautaene jataain Cana Coaunera. Cana Coaunerate jana, nii cairichaihuru cachaauru cairichaaeriin neeuuha coriquihona neein nenacaaurune coaraje. Nihei chaen aohana jerecuruhi rai namihaneeon coreniha aitucuruha cachaaaurune. Cana Coaunerate laen aitocuruha cairichaihurune aonaje.

<sup>5</sup> Satonoote raotojoein caa chauratane que ichaohiche, itolere inaraacha latei que nerujueleteein, nete inae nii coreniha inara que, nii core coaratiha cureein Cana Coaunera inae cuutihane bana.

<sup>6</sup> Joaereein lera colane cairichai cha coitucuruhi cachaauru sohin jaohin naajoaaiche, inara rijijieein neeurinaauruhane jaan que airijiin. Nii corenihate inara casetecaain, jataain inoaelu netojoein inara cairichareein Cana Coaunera.

*Cana Coaunera bajajeein raotojoein cohacuruhine Cana Coaunera coitucuurera*

<sup>7</sup> Nitohaneein cuu tihane bana nii core coaraterichaaain Cana Coaunerane jaun coa nererojoecaache. Nii inara cairichaaurera aina abaantaain, turuha Cana Coaunerane reeintiaain cohacuche. Charijijieein teeinti, nocoanajaaauruhane, temule jaauruhane, omarohin nihane cohajeure, inacaain, tainacaa que turuhane taihuruhane coina.

<sup>8</sup> Nii rijijieein turuha Cana Coaunerane reeintiaain cohacuche. Jiaonriha Cana Coaunera ere tonorana jianiquichene. Atiin cohacuche, inae carajarinaain turuha caa cana rai chauratane que Cana Curuaanaa Jesocurisitone. Nii coreniha atiin inara suujua laraajiaain, Cana Coaunera ere tonoraain sacuuche.

<sup>9</sup> Canejeraauru jiaonriha ita que inara suujua rerohecaain ita que nejerateein neeichene. Nitohaneein neeichenete inara casetecaeratereein nii rucueraaunu que nena, nii turuha uhenenu Cana Coaunera.

<sup>10</sup> Chatohaneein necairichaaichene niha natiin, charijieein teeinti aichejetecurelu *profetacuru*, nii rijijieein neeuche. Inoaelu aitiin acaauru letohaa Cana Coaunerana jaan que, cachaauru rai ereerejeein beebejeure, jataain necairichaaauruhane niha natiin. Nii necairichanaa abaantaain, nihei Cana Coaunera ere beebejeuruhane

jianelanaala, nii aihuruhalune rijijieein nihacachenete caohachae.

<sup>11</sup> Acaaurute jataain caohatiin neeurelu Cana Coaunera aina. Coaraauna chuhinti, nii inara netonai coitucuhichene tocohaneein jetao, tabai inaderanaa que situhin nihalu Joobe ne. Nii baiha caohacha icharichaaain rai Cana Coaunerane esenetaana jaunte, nitohaneein jeelai amuritoheriin coroatajaniha Cana Coaunerana jaun, enacoauneein calaojoiin, cacunuquiin, baca siriin, caohatiin raoti ichaonaa que ichaohin nelu Joobe. Aiha Joobene rijijieein necairichanaa abaan-taain, inara coroatajanerihani Cana Coaunerane coitucuhin esenetaain neeuche.

<sup>12</sup> Caohachaaain aonacuchena inara rai aite. Baasoneein ichaonaa corihaaichena jaunte joaenreein, “Cana Coauneraate coaraje. Acate esinae aitocoaaunne coitucue,” naain esinae rijitiin nohaneiche. Coa niritiin nohanihache inara casetecaa Cana Coaunerane coataa. “Icharichaaunni,” naain chaelai que ereeichene ichacuche. Jana, “Coatiha icharihaaunni,” naaichene coa ichacache. Jiaonrihachu chaen, “Cana Coauneraate coaraje,” naain nohanenaa coaauquichene, nabana inara casetecaa Cana Coaunerane coataa.

<sup>13</sup> Chatohaneein necairichajeein niha chuneine, Cana Coaunera bajaaine. Jana chunei inae raotojoein nihane, rachoojoein Cana Coaunera coroejeein nenatemiin.

<sup>14</sup> Chatohaneein cunaitiha chuneine, Cana Coaunera coitucuurera ichauhenaauru cotihacuchete, erene que rujuaain rai Cana Coaunera bajaauruhinete, nii cunaitenaa rautaaaine Cana Coaunera.

<sup>15</sup> Esinae rauhijiriin, nii cunaitenaa rautarichaaain Cana Coaunerane esenetaain bajaauruha nete, nerautareein nii cunaitenaa. Aihute, chaen chatohaneein osa que nesaruhin nihane niha natiin, atiin que suujua acatena nainemiin Cana Coaunera.

<sup>16</sup> Nitohanihane jaun, chatohaneein baaso ichaaain osa que nesaruhin neeichene suujue lanaala ita rai been, ita rai Cana Coaunera bajaauche jiniiquiin. Nii banate, chatohaneein baaso ichaaain osa que nesaruhin naaojoaain neeichene niha natiin, atiin inara que suujua acatena nainereein Cana Coaunera. Caohachaaain nere tonoraera caohachanejein cacha bajaa nete tonorae Cana Coaunera.

<sup>17</sup> Coaraauna chuhinti Cana Coaunera ere bera inoasesi Irihasi. Cana rijijieein cacha neein niha natiin jetaote, uheniha elone coina Cana Coaunera bajaane jana, nichata jaanaca cataaun tiaaojoaain uhene elo aansijieeinijn.

<sup>18</sup> Nii baiha coaiten Cana Coaunera bajaa Irihasine jana jetaote, elo letoae Cana Coaunera, atane setejiaane enacoauneein omarona nainiha temulene coina.

19-20 Aonacuche, saatono neeina inara rai aitoreeunni. Chunei baaso ichaaechaejeein ichaoha Cana Coaunera baiteein inete, ohane bana cuhanete nereein necairichana jaun, cuu nitajihane coina. Nihei nitohaneein chunei casetecana jeriheii Cana Coaunera niqii. Esinae Cana Coaunera esenetaera neein nena tocohaneein, nii Cana Coaunera esenetaauruhi rai ereein relaacachenete jere Cana Coaunera, Cana Curuaanaa Jesocurisito naajoaain, acauru netonai Cana Coaunera esenetaain nere tonoraauruhane nii baaso neein neeuruhane caje roconajaain ranajaa Cana Coaunerane coina. Chaen techu tabaauru Cana Coaunera coitucuurera, inae nere baiteein baaso ichacure. Nabana caseteco coaraa nii Cana Coaunera baiterane coataa, caohachaain aina ereein coroatajanecuchete nacoaaunein Cana Coaunera ere esenetaain tonoramiin. Nitohaneein osa que nesaruha namute cachane jana, Cana Coaunera rai caohacha que namute cacha suujua raujiaain nenaate, osa que namuritohane niha natiin que suujua acatereein Cana Coaunera.

## Fedoroacha letoi leinjiin

### *Inara coaaucaun.*

<sup>1-2</sup> Canuna Jesocurisito letono afosoto Fedoro neeun. Inae jauriaalu caje coauneen coausihalu cana Inaca Cana Coaunerane rijijieein nii niicha ranojoinequichene, Poonto, Galasia, Capadosia, Asia, Bitinia, naonjoainuri batane que cuhin inara atane udaa riaaneen neinequichene raine caa quiricha laenaain letoaaun. Nitohaneen rai cachaneen naitoonjoan tonoraain neeichene coinate, jelai tein rai Suujue que inara suujue tein, Calaohi Jesocurisito coichana aina cuaain inara coulucohin inara raain nelu. Aihane jaun, jeelai amuritoheriin inara coroatajanemiin Cana Coaunera jiniiquiin raotojoein neeichene coina.

### *Itolere bana canaacha cohajei ichaonaa*

<sup>3</sup> Cairichaojoaain cana coaraain, cana coreniha ohane baiha caje ichanaa Jesocurisitone aina cuaain, nacoauneen ena nejanoaain nena rijijieein nena jaun, cana Curuaanaa Jesocurisito Inaca Cana Coaunera coroaecaachenete ne. Nii Cana Coaunera itolere bana canaacha cohajei ichaonaanaja tereen cana rai.

<sup>4</sup> Chaen techu aca inara que banihateen dedeeu Cana Coauneraacha rucujuei- nii ichaonaa caohacha inaraacha cohajei tereen. Nii inara rai niicha teeni nii chatohaneen nitajenaa nainerinaain.

<sup>5</sup> Nitohaneen esinae rauhijiriin inara ichoteraterichaaain Cana Coaunerane esenetaain neeichene jaunte, niicha ichana nainei ichaain inara beraicheen, jianacoon neen nii inara ichoteraterichaaaine jaan que turuhichene, inara que banihateen niicha rucujuei coitucueratiha inae ecu tihane bana inara quene coina.

<sup>6</sup> Nitohaneen neriquicheeine jaunte, raotojoein rachoojoein neeiche ena, itolere que coujunojoneen cairichanojoneen neeichene nihanatiin.

<sup>7</sup> Charijieein teinti usihanau oro tein mocoore caje mituha baasone coina, nii rijijieeinte inara netonai coujunojoneen neriquicheen. Inae nitohaneen coujunojoneen coanojonequichene jana, itolere necairichanaa abaantaain, inara sarunaa jeriha moconajaerane tonoraelanaala, itolere que laraajiin neeichenete, nii jataain coreti- nitaje rai nena oro amurijiriin nelateineen neriquicheen. Nitohaneen coujunojoneen neeichene abaantaain laraajiin



neeichenete, coroaenojineein neriquicheein inae turuha cana Curuaanaa Jesocurisitone bana.

<sup>8</sup> Coatiha niqui charijibana Jesocurisito coaraain niheeiche inara. Nete coara rijitoejin jataain belaa in coraajeein rachoojoejin neeiche. Chaen techu, “Naaonjoan,” naain inara ere nejesinaacha que benaa nainiheeiche, jataain necaohachanaa nihane jaun.

<sup>9</sup> Nitohaneein inae ichoteratenojineein niha inara suujuene jaunte, raotojoejin rachoojoejin neeiche. Nitohaneein neeichene cointate Jesocurisito esenetaain neeiche.

<sup>10</sup> Nitohanihane cointate inoanlu caje coaaneein jianacoon cana ichoteraanu que cuaain caohachaa in coitucuuruhane cointa que nerelaain, cairichaa ojaain cana coaraain ichoteratenojoi nichaachene jaanu terichaa in cana rai Cana Coaunerane beebejerejetecurelu *profetacuru*.

<sup>11</sup> Nitohaneinte inae jauriaalu caje coaaneein *profetacuru* que coitucueratelu Jesocurisito Suujue, ateinaauruhane baiha nacoaaneein ichanaain rai caohacha icharaanu que tiha Cana Coaunerane coitucueratelu. Nii jaunte niqui: “Charijicha nii aicheein. Chatohanai banacha aicheein,” naain niqui coitucunaa jecure, acauru que coitucueratiha Cana Coaunera Suujuene jaun.

<sup>12</sup> Nete acauru raineen nenerihani nii Cana Coauneraacha beratenojoi- inara rai caohachaneein neeninu coitucueratelu acauru que Cana Coaunera. Nii jaunte nii ichoteratenojineein neeichene jaan, inae inara que coitucuerateure nii Ena Nena Cana Coaunera Ere beracuru dede caje letononeein nena Cana Coaunera Suujue aina cuaain. Niite niqui jataain caohatiin coaraain coitucunaa jecurelu Cana Coaunera letono anjerauru netonai.

*Esinae rauhijiriin aca jerihane rijijieein ichaonaa cointate cana cotijiaain ne Cana Coaunera.*

<sup>13</sup> Nitohanihane jaun jatoraa in niicha que coacuhin coujurihu inara suujua coaraain, nacoaaneein turuha uha Jesocurisitone jana inara rai Cana Coauneraacha tenaa jerei-icha que jaaequiin neeuche.

<sup>14</sup> Coujuriu Cana Coaunera calaohineein nena tocohaneein naitoonjoan tonoraain neeuche. Jiaonriha jauriaalu Cana Coaunera coitucuelanaala inara suujua letono rijijieein ichaohichelune rijijieein ichaohichene.

<sup>15</sup> Nitohaneein ichoaelanaala, Cana Coauneraacha que banijiaaneein saantoneein ichaaoche, nii inara cotihara acaihanejei Cana Coauneraacha Saantoneein nihane jaun.

<sup>16</sup> Nitohanihane jaunte rai Quiricha inoansi cuhane: “Acaihanejei inara Coauneranein Saantoneein nihanune

jaun, canu que banijjainein saantonein leinjiin canuhacha cachanein ichaaoche,” nae Cana Coaunera.

<sup>17</sup> “Cana Inaca Cana Coaunera,” naaiche Cana Coaunera quene jaun, aca chuni ichotelanaala canaacha ichai caje cana ichao coaraain rucuherranein nihane coitucuhin esenetaain ichaohichene coarateein ichaaoche, jaiti cau chauratane que ichaonaa que neein.

<sup>18</sup> Inara foerateracuru ichao rijijieein nii chaque nelate-lanaala nitaje rai nenea ichaonaa que ichaohichene janate, inara ichoteratelu Cana Coaunera. Nii jaunte inara nii nitajerai nenea oro, coriqui, naaonjoain que coretenohineniha nii inara ichaone raotojoein coitucuhiche.

<sup>19</sup> Nitohaneente caohatiin chaeloon baasoneerilanaala nenea carenero narejeen sohin acaauru osa coreniha coichana terejetocuruhalu cana inoaensihurune rijijieein, nii chaeloon osaojoejelanaala nenea Jesocurisito sohin, coichana jataain necaohachaaain nenea que coretenojoinein ne nii inara ichao.

<sup>20</sup> Inae nitohanein cana coreniha orichaaaine cointate jaiti necoanaeniha cana rai chauratanene ajiniha caje coauneein nesilu Cana Curuaanaa Jesocurisito. Nii jaunte inae ecu tihane jaun jeriha Cana Coaunerane jaun, nii bana inara caohachanu que ecocohin nelu.

<sup>21</sup> Jesocurisito aina cuainte, nii oo caje ichateein rai caohacha icharaanu teranein nenea Cana Coaunera coitucuhin esenetaain neeiche. Nitohanein inara coroatajaneranein niha Cana Coaunerane jaunte, leinjiin acaacha cohajein que jaeequiin neeiche.

<sup>22</sup> Inae nitohanein Cana Coaunera beratenojoi esenetaain tonoraain neeichene jaunte, inae couluunojoinein ne inara suujue, jataain inara suujua aina cutaain jiniiquiin Jesocurisito ranojoinein nenacaauru canejeraauru aina ita belaaain neeichene coina. Nitohanein le cache nequichene atiin ita acatiha tacaain, inara suujua aina cutaain ita belaaain neeuche, nii baaso coacuelanaala.

<sup>23</sup> Enate nacoaunein nejanoaain nenea rijijieein neeiche. Coatih cache onaa inaeranein nenea jaberoco caje nii nejanoaheeiche. Cana Coaunera Ere chabana nitajenaa charanejein satonoelanaala nenea aina cuainte nii nacoaunein nejanoaache.

<sup>24</sup> Nitohanihane cointate: “Satiin cachate nejanoaain fojoein ichauhenanein inae biinaanihane ohe.

<sup>25</sup> Nete laen Cana Coaunera ere nii charijibana satonoe-lanaala nereein,” naain laenanohinein ne Cana Coaunera Quiricha cuhane. Nii inara rai beratenojoinein nenea Er-ena esenetaaichene jaunte, inae ichoteratenojoinein neeiche.

## 2

<sup>1</sup> Inae nitohaneein ichoteratenojineein neeichene coina, inara rai beratenojoin Erenaa esenetaaichene jaun, jauri-aalu baasoneein ichaohin inara amute cacha cairichaa nohaneein, necoelajauharitiin, inara amute cacha cotaairiichene nihanatiin belaicha rijitoejeen rai ereein neeichene coara-teen neeichene jianein neeuche.

<sup>2</sup> Aiha ena nejanoanaa canaanai ujuari, itaariicha que coacuhine rijijieein, Cana Coauneraacha jerei que coacuhin, aca jerihane rijijieein ichaohin, inara suujua ilaachete ichoteratenojineein neeiche.

<sup>3</sup> Nitohaneente neriquicheein, esinae rauhijiriin caohacha teranein niha Cana Coaunerane coitucuhin esenetaain neeichene.

*Ajeri neloheriteeuruhane jaan rijiicha Curisitone que cuaain acaauru relaa Fedorone.*

<sup>4</sup> Nii Cana Coaunera rai ajeri ichaohin nena Jesocurisito, nii chaque nelatihei rijijieein jaolecohin neeuruhalu Isaraeli-taacurune jaancha que coacuhin raacha nelateein neeuche. Nitohanein nelatihei rijijieein coaracuruhane sainejeente, ajeri ichaohin jataain itolere que nelatineein janijiin Cana Coauneraacha tenojineein nena ne.

<sup>5</sup> Nirijieein techu esinae rauhijiriin aca jerihane rijijieein ichaohichene- ajeri ichaohin nena caje Cana Coaunera lorerineein ichanohin Teenforo rijijieein rai saseredote esine neein Cana Coauneraacha jerei ichajeein saantoneein neriquicheein. Nete inoaenlu aichejetocuruha saseredote-curune rijijieein, carenerocuru sohin coichana teranein nenereeeicheein. Inarate Jesocurisito aina cuaain Cana Coauneraacha jereineein, rai cachaauru suujuateranein neriquicheein.

<sup>6</sup> Nitohanerichaaine quete:  
 “Sioon neseeune, ajeri jataain nelateinnein nena quiicha janijii teun. Aihana jaun esinae rauhijiriin caohachaniha nii ajeri quiicha teine coitucuhin esenetaain nena que chabana jaolecorinaauni,”  
 naain laenanohineein ne Cana Coaunera Quiricha cuhane.

<sup>7</sup> Cana, esenetaera nichaachene rai nii Cana Coauneraacha tei ajerite jataain nelateineein ne. Nete Cana Coaunera Quiricha cuhane laen nii esenetaelanaala nenacaauru que: “Jaolecooruha loreri icharaaurune jaan ajerite, loreri nunuheneein temuranein nerotoha cureein.

<sup>8</sup> Acate leinjiin ajeri jaberoconein lacurocuruhane jaanein nereein,”

naain laenanohi nihane rijijieeinte, inae lacurocure, nitohaneeuruhane coina inae ichanohineein neeuruhane jaun.

<sup>9</sup> Nete inara le laurineeichene, Cana Curuaanaa rai sasere-doteneein niicha janijiineein, Cana Coauneraacha jereineein rai cachaneein neeiche. Nitohaneeinte inara raain nelu Cana Coaunera, jataain rai caohachaneein nena niicha beratei beeiche leeochoaauru raine coina. Acate nocohenaanau nena rijijieein neeichene jana, inara cotijiaain nelu, rai caohachaneein nena Cojoanona que neeichene coina.

<sup>10</sup> Jauriaalu niqui cairichaaajoaain inara coaraain niheilu Cana Coaunera, rai cachaneein neneeichene jaun. Nete inae enene rai cachaneein neeichene jaun, inae cairichaaajoaain inara coarae Cana Coaunera.

*Cana Coauneraacha icharatei ichajejin ichaaоче*

<sup>11</sup> Canejeraauru, atiin inara suujua coaraain, inae nejelau cachanequichene ichao que ichaaоче, nabana nitajiha inara suujuene coataa.

<sup>12</sup> Cana Coaunera coitucuelanaala nenacaauru aina neeichene nihanatiin, coujurihu Cana Coaunera coitucueraneein neeichene coarateein neeuche. Nitohaneein ichaohichenete, baaso ichara niha inara beeuruhane nihanatiin caohacha ichaquichene coaraain Cana Coaunera coroaecurureein, inae le cachaniquichene caje inaraacha ichanohi rucuhecane cojoanona que turuhane bana.

<sup>13</sup> Inae Cana Coaunera cachaneein neeichene jaun, satiin inara amute cachaauru-cocoinanacainein nenacaauru ere tonoraain neeuche. Chaen leeochoaauru cocoinanacaihuru amuritoheriin cocoinanacainein nena enferadoro ere tonoraain neeuche.

<sup>14</sup> Nii rijijieein chu nii rai letonocuru- baaso icharaauru casetecaain caohacha ichaeraauru coroaeraneein nenacaauru ere tonoraain neeuche.

<sup>15</sup> Nitohaneein neeichenete jere Cana Coaunera, nabana tonaain ereeuruha inara que caohacha ichaera cacha no-coeje chanuheriin ichaonacaauru aina cha coitucuhichuru cachaaurune coataa.

<sup>16</sup> Inaraacha jerei ichana nainequiche niqui. Nete laen nii inaraacha ichai aina cuaain naineneeiche leeochoaauru rai baaso ichaquichene. Aihana jaun coujuriu Cana Coaunera cachaneein caohacha ichaain neeuche.

<sup>17</sup> Satiin que inara suujua acateein jiniiquiin ita belainjeriha Cana Coaunerane rijijieein neein- enferadoro que inara suujua acateein neeuche.

*Cana relaeranu que necairichaaain nihalu Curisitone*

<sup>18</sup> Nitohanihane jaun rai fatoroon ere tonoraain aca jerihane rijijieein neeine letononeein nena. Jiaonriha caohachaaain belaaain aca jerihane rijijieein siriha fatoroone

jauhancha nere tonoraain nihane. Nechu aansainein co-taitiin niha fatoroone nihanatiin nere tonoraain neeine.

<sup>19</sup> Jeriha Cana Coaunerane rijijieein ichaohacachene coreniha, lera colane rai cacha nihacachene corenihacha cana casetecaain cana cairichaane nihanatiin, jianelanaala abaantaacachenete jataain caohate.

<sup>20</sup> Jana esinae rauhijiriin baaso ichaquichene coreniha inara casetecaain neeuruhane abaantaain neeichene, coatiha caohacha ichaa airiheicheein. Nete laen caohacha ichaquichene coreniha, inara casetecaain inara cairichaeranihane, soroelanaala abaantaaichene Cana Coaunera notaracaee caohacha ichaa airiquicheein.

<sup>21</sup> Nitohaneein neeichene coinete, inara cotijiaain nelu Cana Coaunera. Inara coreniha necairichanaa abaantaain nihalu Curisito inara que coarateeine rijijieein, inara netonai necairichanaa abaantaain neeuche.

<sup>22</sup> Coatiha niqui aansijieeiniji osa que nesaruhin nihei chuni coritaain niheilu Curisito.

<sup>23</sup> Niheichu nocoejehanuuruhane nihanatiin coatiha acaauru nocoejehanuhin nerejetohilu. Niheichu cairichaaauruhane nihanatiin tonaain ereein nerejetohilu. Cana Coaunera esinae rauhijiriin baaso icharaauru coitucuhin nii rucuhecane coinaachate aitoraaetelu.

<sup>24</sup> Nii Curisitote jaberoco aina cuaain cana osa amaain coroso que ohin aina jiniiquiin cana osa atinaelu, aina cuaain ichaonaa esine que ichaohin osa colane nena coina. Nitohaneeinte cana osaacha que nesarujueein nihacachene caje cana mitaeranu que coroso que ohelu Curisito.

<sup>25</sup> Jaurihaalute niqui aih a beraicha colane nena carenerone rijijieein nitajenaa neein nerejetocoaachelu. Nete laen inae ena carenerocuru beraicha beraichane, nitajenaa nainecurenihane rijijieein inara beraain niha Curisitone jaun, nitajenaa naineneeichene jaan ichaonaa que ichaohiche.

### 3

#### *Naaonjoaai ichaaoruhine sinijeraaonacaauru.*

<sup>1</sup> Aihana jaun inara lanaauru ere tonoraain neeuche enecuru. Aihute inara ichao cajeecha coaraain, acaauru rai erenaa latelanaala, nii Cana Coaunera beratenojoin erenaa coitucuhin esenetaain neeuruhine esenetana jerelanaala nacaauru inara lanaauru,

<sup>2</sup> esinae rauhijiriin caohachaain neein, nii baaso ichaelanaala inara suujua acateein ichaohichene coaracuruhane.

<sup>3</sup> Esinae rauhijiriin caohachaain nena jeriquichene, nii nitajenaa inaurera rucuhele oro caje ichanohichuru, cajione caohachaauru, naaonjoainuri que coacuelanaala,

<sup>4</sup> inara suujua aina cutaain esinae rauhijiriin Jesocurisito suujue que coacuhin neeuchete raotojoeein neeiche. Caohachaaain Cana Coaunera notaracaae nihacanete jataain nelate.

<sup>5</sup> Nii rijijieein techu nerejetocure cana inoaensihuru benecuru- jeriha Cana Coaunerane rijijieein ichaonacaauru. Nitohaneein jeriha Cana Coaunerane esenetaauruhane jaunte, jeriha acaauru lanaaurune rijijieein acaauru ere tonoraain neeurelu nii acaauru benecuru.

<sup>6</sup> Nitohanihane jaun techu: “Canu curuaanaa,” narejete lana Abaraaun rai Sara, nere tonoraain aca jerihane rijijieein nihane jaun. Nii aihalu Sarane rijijieein casilanaala coejelanaala neeichenete, rauhijiriin coujuriu nii Abaraaun aina Sara nefoerateneein nena rijijieein neriquicheein.

<sup>7</sup> Jana inara acaauru lananequichene, jeriha inara sinijeraaurune rijijieein jiniiquiin ita suujua rijijieein neeuche. Coa ene neeuruhane amihaneeon amurijiriin, inara sinijeraauruhacha ichanenu teein nihache. Inara rijijieein acaauru caohachane quete, nitohaneein acaauru rai ichaonaa teein nelu Cana Coaunera. Aineeichenete Cana Coaunera bajaain neeichene, inara ere tonoraenereein Cana Coaunera.

*Satiin Cana Coaunera ranojineein nenacaauruhacha ichanenu*

<sup>8</sup> Aihana jaun ita suujua rijijieein neein ita janojera rijijieein ita belaaain, leeochoauru coroatajaneein, nii leeochoauru amurijiriin nena coacuelanaala neeuche.

<sup>9</sup> Jiaonriha tonaain baasoneein inara que ereein neinihane, nii tonaain que baasoneein ereeichene. Niheichu inara nocoeje chanuheranihane, coa inara netonai nocoeje chanuhache. Nitohanenaa coacuelanaala acaauru rai caohacha ichacuche. Nitohaneein inara rai caohacha ichaane coha inara raain nihalu Cana Coaunerane rijijieein.

<sup>10</sup> Nii coinatē:  
 “Chunocoha nichao colalajiin  
 raoti ichaonaa que ichaonaa jerihane,  
 namute cache que baasoneein erelanaala,  
 nii casajenelanaala,

<sup>11</sup> baasoneein ichaonacaauru aina nelanaala,  
 caohachaacha ichaain  
 raotojoeein ichaohane jaanuhacha ariin  
 acaacha sacuhine.

<sup>12</sup> Cana Coaunerate  
 caohachaaain suujua coaraain ichaonacaauru beraichaneein  
 nihane jaun,  
 bajaauruhane aonaain ne.  
 Nete laen baaso ichajeein ichaonacaauru que  
 jaoleconaa rijijieein ne,”

naa Cana Coaunera Quiricha inoaensi cuhane.

<sup>13</sup> Nitohaneein itolere bana caohacha nejesinaacha que coacuhin neeichene, nerihei inara rai baaso ichara.

<sup>14</sup> Nete laen caohacha ichaquichene coreniha necairichanaa coaraqichene nihanatiin rachoojoein nerausiajeein neriquicheein. Jiaonriha nii chuni que casiin nesooneein neeichene.

<sup>15</sup> Nesoonenaa coacuelanaala raujiaaincha inara suujua cuhane Cana Curuaanaa Jesocurisito coacuhin bajaebajae-cuche. Chaen letona jatoroaain neeuche chunocoha inara caje, “Chatohanihana nii jaecoichene jaan,” naain bajaa inara cajene, raotojoein belaa in beeuchete coitucuhin neeine.

<sup>16</sup> Nete acaauru amurijiriin nena coacuelanaala, acaauru que inara suujua acateein acaauru rai beeichene caohachae. Nitohaneein coujuriu Jesocurisito esenetaeraneein caohacha nejesina ichaain neeuchete nocoejecurumiin inara que baasoneein erenacaauru.

<sup>17</sup> Baaso ichacaachene coreniha necairichanaa coaracaachene amuritoeriinteja nenacaeneein caohachae caohacha ichacaachene coreniha necairichanaa coaracaachene, nitohaneei jeriha Cana Coaunerane jaun.

<sup>18</sup> Nii rijieein techu Jesocurisito netonai lesajeeincha cana osa coreniha cairichanojoein ohin nelu. Coatiha niqui nii chatohanai baaso ichaain osa que nesaruhin niheilua aca, nete erenaa tonoraelanaala baasoneein ichaonacaauru coreniha necairichaa in nelu, rai Inaca Cana Coaunera rene cana amaane coina. Joaenreein cacha rijijieeinte niqui ohin nelu rai jaberoco. Nete aca Cana Coaunera suujuenihane jaun oo caje ichanaain enanetojoein ichaohin ne.

<sup>19-20</sup> Nitohaneeinte suujue nejesinaneein cuhin, acau tabai itajenojoein moconajaera casetecanohineein nitajenacaauru suujue relaelu. Acaaurute bote nainaa Nohene reentiaain esenetaauruhane cohaca Cana Coaunerane sainejeein, esenetaaurenihane jaun nitajeurelu. Acaauru tabaauru esenetaeraauruhachate, itolereneein fosanejeein acau tabai caje nichoteurelu.

<sup>21-22</sup> Nii acaute cana osa jianeein ichaohacachene coina baotisanoinichaane jaa cojunacaneein nenaanelu. Nii aina cuaainte, inae ichoteratenojoein nihacache cana netonai. Coatiha raujiaain culuonoiniha cana jaberocone coina baotisanojoi nihaacache. Acate raujiaain cana jaberoco coulocihin, oo caje ichanaai dedeeu cuhin Cana Coaunera raotono nichajai que neein, itolere anjeraauru amurijiriin, cocainanacaihuru amurijiriin nihane coina nena Jesocurisito aina cuaain, aina nena coina cana suujue coulooca Cana Coaunerane jaan neein ne.

## 4

*Cana Coaunera tenojoi inaraacha ichana nainei que leeochoauru coroatajanecuche.*

<sup>1</sup> Aihane jaun cana coreniha jaberoco cairichaaïn nihalu Curisitone rijijieein, inara netonai necairichanaa coaraqichene cõina jatoraaïn neeuche.

<sup>2</sup> Suujua letono rijijieein ichaohane jianeerein Cana Coaunera jerenohicha ichaane coreniha necairichanaa coaraaïn neite osa caje nichotereein.

<sup>3</sup> Jauriaalute inara netonai aihuruha nii Cana Coaunera coitucuelanaala nenacaaurune rijijieein nerejetocoichelu. Nitohaneeichene jaunte, jataaïn baasoneein ichaohin, inara suujua coaraelanaala necha ansaneein nerejetocoichelu, jianelanaala cocohin, tonijiaaïn ichaaïn ajenacaauru aina niha natiin neein, nii ichanohichuru ecaantooruniha natiin coroajeein, naaonjoaaïn nerejetocoichelu.

<sup>4</sup> Nete laen inae enene, chabana jianelanaala baaso ichaaïn nenacaauru aina ichaorejetocoichene jianequichene jaun, inae inara coaracureniha acaauru aina nejauïn inara cojoe-latiin inae baasoneein inara que ereeure.

<sup>5</sup> Nete inae ecu tihane bana onacaauru, ichaohin nenacaauru, naaonjoainuriicha ichai coitucuhin nii rucuheraanu que nena cojoanonaa que tihane bana, raajenihane niicha ichai biha cuurureein.

<sup>6</sup> Nii onacaauru raite Cana Coaunera ere berejetecurelu, ohin neeuruhane nihanatiin aitoha Cana Coaunerane rijijieein suujue nejesinaneein ichaohin neeuruhane cõina. Jerichanejeein techu niqui, aitocuruha cachaaaurune rijijieein caohacharelu jaiti jaberoconeein neeuruhane bana rucuhenohinihalu niine.

<sup>7</sup> Inae satonoha itolerene que tururichaje. Aihane jaun inara que Cana Coaunera icharatenohin ichajeein Cana Coaunera bajaæ bajajeein ichaaõche.

<sup>8</sup> Itolereneein inara suujua aina cutaaïn jiniiquiïn ita belaaïn ichaaõche. Jataaïn ita belaaïn ichaoha cachanete arajii rai nosa que suujua acatereein Cana Coaunera.

<sup>9</sup> Inara rene turuhin niha chunine tonaaïn leeochoauru que erena coacuelanaala inara loreri asaæ raauche.

<sup>10</sup> Coujuriu lauri lauri inara que Cana Coauneraacha icharatenohi icharaneein nena tocohaneein, ichana nanequichene rijijieein inara rai Cana Coauneraacha tenojoi aina cuaaïn leeochoauru coroatajanecuche.

<sup>11</sup> Chunocoha tonaaïn erena jerihane jaa que irihane, jeriha Cana Coaunerane rijijieein ereein neeine. Chunocoha coroatajanera latihane, ii rai Cana Coauneraacha tei que laraajiin coroatajaneu. Itolere iicha ichai ichaaine, itolere



bana caohachaain ichaaute ii coroatajaniha Cana Coaunera aina Jesocurisitone coaraain coroaecuruhine cachaauru. Acate rai necaohacha que necaohachaain itolere ichana naineraneein ne- chariji bana satonoelanaala. Nitohane- miin.

*Coujuriu Jesocurisito ranojoneein nenea tocohaneein necairichanaa abaantaauche.*

<sup>12</sup> Canejeraauru, jiaonriha mainajein coujunojoneein neriquicheeine que jatoroaelanaala neeichene.

<sup>13</sup> Raujiaaincha aihalu Curisitone rijijieein necairichanaa coaraain neeichene nihanatiin rachoojoein neeuche- inae turuha necaohachane bana rachoojoein neriquicheeine jaun.

<sup>14</sup> Curisito cachanein neeichene coreniha inara batohin nei nihanete, nerausiaaequiche jataain caohachaain nenea Cana Coaunera Suujue inara aina nihane jaun.

<sup>15</sup> Nitohanihane jaun necoejemiin, sonajaaain jaohin, asi- jiaotonein, leochaauru rai cotainacai ichaain, naaonjoain ichaane coreniha cairichanojoneein nenea.

<sup>16</sup> Jana Jesocurisito cachanein neeichene coreniha inara casetecaain neinihane, jiaonriha nocoejequichene. Raujiaaincha coreniha Cana Coaunera bajaain corojeein neeuche.

<sup>17</sup> Inae cana rai cachanichaachene ichanohi rucuheca Cana Coaunerane cojoanona que turuha. Nitohanein rai cachanichaachene que nunuhetein, nitohanein icharichaainne jaun, chatohaneeururichaaain Cana Coaunera ere tonoraelanaala nenacaauru.

<sup>18</sup> Coaracuche nachuhinti rai cache nichaachene saijiein, necairichanaa coaraain nichoterichaacheeine. Nii jaun chatohaneeururichaaain chaainti, nech u aansainein osaonacaauru.

<sup>19</sup> Nitohanihane jaun, Cana Coauneraacha jerei ichaquiche- ene coreniha necairichanaa coaraain neeichene nihanatiin, itolere bana caohacha ichajeein ichaohin, naitoonjoa riji- jiein cha ichaeranein nenea Cana Coaunera bijiu inara suujue teeuche.

## 5

*Jesocurisito ranojoneein nenacaauru suujuatera*

<sup>1</sup> Enane laen nii inara aina ita taojieraauru bichauhenaauru sujuatenaa jereeun. Canuhetonaine acaauru rijijieein ichauhenanein cana coreniha necairichaalu Jesocurisitone beraneein neeun. Nii rijijieeinechu canuhetonai acaauru aina jiniiquiin Cana Coaunera Cojoanona que nereeunni, inae ecu tihane bana.

<sup>2</sup> Nii inara que Cana Coauneraacha beraichatenojoi, rai cachaneein nenacaauru beraihuche. Nii cinate inara que beraichatenajae Cana Coaunera. Caohachaain inara suujua coaraain jeriha Cana Coaunerane rijijieein acaauru beraihuche. Jiaonriha inara letoaera lateein core coinaacha ichaquichene. Raujiaain jeriha Cana Coaunerane rijijieein corajeein ichacuche.

<sup>3</sup> Acaauru curuaanaaneein nenea coacuelanaala, raujiaain caohacha nejesina ichaain neeichene coarateeuche acaauru quete, acaauru netonai inara caje nerelaaurumii.

<sup>4</sup> Nitohaneein neeichenete, inae turuha cana beraicha esinenei nenaane bana, inara que rai necaohacha que necaohachaain nenea- comai lauriareein inara couturi que. Nii comai chariji bana setuhin naasaerinaain.

<sup>5</sup> Jana inara enamanaacuru, jerecuruha inara bichauhenaaurune rijijieein neeuche. Satiin ita suujua rijitoejin ita amurijiriin nenea coacuelanaala nii:

“Cana Coaunerate,

itolere amurijiriin nenea jereraauru

lacuroaeranein,

cairichanojoneein nenacaauru cairichaaajoaain coaraain

coroatajaneranein ne,”

naain niha erenaane que nainae.

<sup>6</sup> Aihane jaun Cana Coaunera bijihu neein, nii chaque nelathei rijijieein neeuche. Acate inae ecu tihane bana jataain nelateineein neeichene coina ichareein.

<sup>7</sup> Coa itolereecha que coacuhin nererojoeaeriin nihache, itolereecha que inara berairichaaain Cana Coaunerane jaun.

<sup>8</sup> Aihana jaun caohachaain jataain itolere que nainaaain neeuche. Charijieein teeinti jatoraain quihane rai netiin nesari ariirijie janolari, nii rijijieeinte jatoraain inara ariirijie moconajaera inara itajihane coina.

<sup>9</sup> Charijieeinijin chatohanai que inara sarunaa jereranihane, jiaonriha rijitoejeichene. Raujiaaincha nii inaraacha esenetai aina cuaain laraajiin, satiin chauratane sacuritaain nenacaauru cana nejeraauru netonai, nii jelai necairichanaa abaantaain neeuruhane coitucuhin abaantaain neeuche.

<sup>10</sup> Nete inae carajaaajoaain necairichanaa abaantaain neeichene baiha, inara coroatajaniha Cana Coaunerane aina rauhijiriin baaso ichana coacuelanaala laraajiin acaacha esenetaain neriquicheein. Nii jeelai Cana Coaunerate, jataain cana belaitohane jaun, rai calaohi Jesocurisito aina cuaain cana cotijiaain cana raain nelu, rai Cojoanonaa que aina nenea coina.

<sup>11</sup> Nitohaneein itolere ichana naineraneein neeine chaabana satonoelanaala. Nitohanemiin.

*Satono tihane rai nocoilha Fedorone.*

<sup>12</sup> Casuujua rijijieein nena cana nejera Siribano quene caa quiricha laenaerateeun inara rai-chaque tonaelanaala inara suujuatiha. Chaen jataain esinae rauhijiriin inara belaiha Cana Coaunerane jaun, coujunacaniha rausiaenojoineein neeichene jaanu tihane coitucuhichene coina. Aihane jaun jataain inara belaiha Cana Coaunerane jaun, aca jerihane rijijieein ichaaoche itolere bana.

<sup>13</sup> Janijiin inara raain nihalune rijijieein, Babiloniau jani-jiin Cana Coaunera ranojoineein nenacaaurute inara coacue. Cacalabi rijijieein nena- Maroco netonaite inara coacuhe.

<sup>14</sup> Ita rene turuhin neeichene, raotojoein jiniiquiin ita belain ita raain neeuche. Satiin Jesocurisito cachaneein neiniquichene raotojoein neeuche.

## **Fedoroacha letoi coroataja**

### *Acaauru coaucane biha Fedoro*

<sup>1</sup> Canuna Jesocurisito letononeein- rai afosotolo Simoon Fedoroneeun. Cana Coaunera, chaen nii cana ichoteraneein nena Jesocurisito, naaonjoainuri chabana nohanelanaala cana rai caohacha jataain nelatei teraneein neeuruhane esenetaeranequiche canacaanu rijijieeine raine caa quiricha laenaun.

<sup>2</sup> Nii Cana Coaunera aina Cana Curuaanaa Jesocurisito coitucuhichene jaan aina cuaain, itolere inaraacha latei que inara rausiaemiin Cana Coaunera, jeelai amuritoheriin raotojoein neeichene coina.

### *Jesocurisito ranojoi ichao*

<sup>3</sup> Cana Coaunerate itolere niicha ichana nainei ichaain, cana ichao rai canaacha latei tein, leinjiin cana suujua coaraain nihacachene jaanu tein ne. Nitohaneeinte nii niicha ichana nainei ichaain, cana cotiharaneein nena coitucuerate cana que Cana Coaunera.

<sup>4</sup> Satiin nii cana rai niicha tei aina cuaainte, cana rai tihane coina naitoonjoa jataain itolere amurijiriin itolere que nelateein nena te Cana Coaunera. Nii aina cuaain niicha tei ichaonaa que ichahin, nii itolere bana baaso coacuhin nitajerai niha cachane jaan jianein ichaohichene coina.

<sup>5</sup> Aihana jaun, jereniha inara suujuane nihanatiin, atiin jeelai amuritoheriin jeriha Cana Coaunerane rijijieein esenetaain cha coitucuhereein neeichene coarateein,

<sup>6</sup> inaraacha coitucui aina cuaain caohatiin coacuhin, baasoneein coaauquiche inara suujua cuhanene tonoraelanaala, nererojoecaelanaala neein,

<sup>7</sup> inara belaiha Cana Coaunerane rijijieein jiniiquiin ita belaaichaa.

<sup>8</sup> Nitohanai ichaain ichaohichene, coatiha inacojoein nelatelanaala nerinaain inara ichao. Niheichu inacojoein Cana Curuaanaa Jesocurisito coitucuriheeicheein.

<sup>9</sup> Nete laen, nitohanai ichaelanaala nena, leinjiin maosa rijijieein cha coaraelanaala nihane jaun, jauriaalu rai nosa caje couluonohinihane baiteein nihane jaun aicheein.

<sup>10</sup> Canejeraauru, nitohanihane jaun, inae inara janijiin inara raain nihalu Cana Coaunerane jaun, esenetaaichene ilaauche inara suujua cuhane. Nitohaneein neeichene coatiha chabana esenetaaichene jianeriheeicheein.

<sup>11</sup> Chaen techu nitohaneein neeichene, cana Curuaanaa Jesocurisito Cojoanona chabana satonoelanaala nena bacujuja nejoracaane jana ranojineein neriquicheein.

<sup>12</sup> Nii jaunne, inae caohachain inara relaauruhane jaan coitucuhin jeriha Cana Coaunerane rijijieein ichaohichene nihanatiin, itolere bana inara rai coaareeunni nabana baitequichene coataa.

<sup>13</sup> Jaiti ichaaojihanune jaunte ne carai rauhi inara suujua-teen nihanune coina.

<sup>14</sup> Cana Curuaanaa Jesocurisitote, inae enanocoojoa orichaaunine coitucuerate canu que.

<sup>15</sup> Nena atiin nainichaaunne jaau tiaajeein inara coroota-janereeunni, inae ohanune baiha satiin canuhacha ichai coacuhin neeichene coina.

*Itolere amurijiriin niicha ichana nainei ichaa Jesocurisitone*

<sup>16</sup> Nii niicha ichana nainei ichaain, turuhalu Cana Curuaanaa Jesocurisitone que inara relaacaanune jaan, coatiha raujiaain nereretanaa neein nena nihei. Niheichu coatiha canacaanu suujua caje rocohin cojoeluinaain nohaniha aito-hacaanu. Canacaanu nota que itolere ichaa Cana Curuaanaa Jesocurisitone jana coaracaanune jaan quena aitocaaanu.

<sup>17</sup> Coarajihacaanune jana techu, rai necaohacha tein jataain erena raotono que ereein rai Calaohi nihane cooainaa: “Caate jataain canuhacha belaaineein, janijiin canuhacha tei cacalabine,” naain rai nii Calaohi cocoainaelu Cana Coaunera.

<sup>18</sup> Nitohaneeine que banijiaain nena ichatane ucuunno neein, Cana Curuaanaa aina jiniiquiin neein, dedeeu neein rai iriha Cana Coaunerane jana aonacaaunlu.

<sup>19</sup> Niite, esinae rauhijiriin berejetocuruha *profetacurune* coitucuhin esenetaain neeichene jaanu neein nena ne. Aihana jaun, caa canacaanuhacha beebejeite, leinjiin no-cohenaanau jeraaen conohajeein conoha conone rijijieein inara conoera neein, janonaa rai mituhin conoha soaene rijijieein, inara suujua cuhane conaeranein nereein, turuha rai cojoanonaane que tiaain.

<sup>20</sup> Aihana jaun, esinae rauhijiriin berejetocuruha *profetacurune* esenetaaichenete ne. Nii jaun, satiin Cana Coaunera Quiricha cuhane laenanohineein nena, coatiha suujua caje rocohin aitocuruha *profetacurune* jaan nihei.

<sup>21</sup> Aihana jaun, satiin *profetacuru* coatiha rai suujua caje rocohin aitoroetocuruhi, Cana Coaunera Suujue acauru que coitucueratihane jaunte, acauru que coitucueratihane rijijieein berejetocurelu.

## 2

*Nechu joaenreen nohaneein cacha relaauruhane.*

<sup>1</sup> Isaraelitaauru jana nihalu nohaneein cacha relaaurera *profetacurune* rijijieeinte, inara jana netonai neeurureein cacha coritaain cacha relaaureraauru. Acaaurute jerichanejeein inara relaa nocoetiin, inara que asinojoneein nechu nohaneein inara relaaureein suujua baaso caje rocohin. Nitohaneente inara ichoteraneein niha Jesocurisitone saijieein, acaacha esenetaaichene caohateraneein neeurureein. Nitohaneeuruhane jaunte itajenojohi necurureein.

<sup>2</sup> Arajichurute nechu nichao aasaaeraanu que acauru ichao baaso rijijieein ichaaorureein. Nii coaraainte chabana satonohelanaala nenea ichaonaanaja coero cuhane cana amaeraneein niha Jesocurisitone saijieein que baasoneein ereeurureein cachaauru.

<sup>3</sup> Nitohaneeuruhane jaunte, coriquiicha que coaacuruhane jaun inara cairichaaureein, inara coritaain inara relaauruhane coreniha. Nete inae inoaenlu caje coauneein casetecanohineein neeuruhane coina, inae ichanohineein nihane jaun caseteco coaracuruhane rai neeure. Nerihaain nii caje acauru ichotera.

<sup>4</sup> Cana Coaunera, osa que nesaruhin neeuruha rai letonocuru aanjeraaurune jana, acauru que suujua acatelanaala, usi tabai aina nocohena tabai jana *cadena* que ichohanohineein jaonajaelu, satiin coulurujuenojoi niha cachaaurune cojoanonaa que turuhane reentiaain cuu neeuruhane coina.

<sup>5</sup> Nii rijijieein techu satiin coitucuelanaala nenacaauru cachaauru que suujua acatenelu Cana Coaunera, inoaenlu acau tabai que chauratane jooratihane bana. Acaihaniji Nohechate esinae rauhijiriin aca jerihane rijijieein ichaohin nihane coaratihane jaun ichoterateein, chaen aina caainsineein nenacaauru cachaauru ichoteratelu.

<sup>6</sup> Jerichanejeein techu, Sodoma, Gomora, naajoaihunri neseeuuru cocoaichacuru mocoeratelu ajaneneein nitajeeuruhane que tiaajoaain Cana Coaunera. Nitohaneente ichaelu Cana Coaunera, nii baiha neenihuru baaso ichajeein ichaonacaauru cachaauru notaaca niqui, nii caje nainaan baaso ichaelanaala ichaaoruhane coina.

<sup>7</sup> Nete laen Loto ichoteratelu, aca caohachaain ichaohin, nii baaso ichacuruha necha aansaneein ichaonacaauru cachaaurune rautaan coaraenihane jaun.

<sup>8</sup> Nitohaneein jetaote, cojoanonetojoeein baaso ichaain neeuruhane coaraain, baasoneinchuru ita rai ereeuruhane aonaane jaun, que suujua rohecaeriin niha Lotone jana ichoteratelu Cana Coaunera.

<sup>9</sup> Nitohaneeinte esenetaain rai cachaneein nenacaauru ichoterate cairichanojineein neeuruhane caje Cana Coaunera. Nii rijijieein techu, caseteconeein neenihuru casetecae, rai cojoanonaa que turuhanereein tiaain caseteco neeuruhane coina.

<sup>10</sup> Nitohaneeinte letoaa suujuane rijijieein baasohacha ichajeein, Cana Curuaanaa Jesocurisito batojoeriin nenacaauru casetecareein Cana Coaunera. Chaen techu erenaa tonoraelanaala enaacha joaenreein cha chaain, chaque casilanaala acaauru amurijiriin nenacaauru necoeje chanuhin naajoaaurunre.

<sup>11</sup> Nete laen anjeraauru acaauru amuritoheriin cocoainanohineein neeuruha natiin, acaauru amurijiriin Cana Coauneraacha cocoainanohineein nenacaauru nocoeje chanunaa nainecurene.

<sup>12</sup> Nii suujua letono rijijieein baaso ichajeein ichaonacaauru cachaaaurute, nechu aiha leinjiin ataebinaene rijijieein cha coitucuelanaala ichaaoruhane jaun, cha coacuelanaala joaereein niicha ichai ichacure. Chaen techu sohin jaonojineein itajenojineein neeuruhane coina inae ichanohineein neure. Chaen techu niicha coitucuhi que nihanatiin enaacha baasoneein ereure. Nete ooruha ataebinaecurune rijijieein ohin,

<sup>13</sup> acaauru netonai leochaauru cairichaain neeuruhane coreniha cairichei coaracurureein. Raotojoein niha no-coetiin niqiu rachoojoenaa nitaje rai nena que rachoojoeure. Chaen techu jataain coejenacai aina osa que inara saruha inara aina rachoojoeure nechu inara coritaa beseta ichaain neeichene.

<sup>14</sup> Chaen techu ene coaracuruhane itolere bana jereein coaracure. Nii jaunte chabana osa que nesarucuruhane coejeein jianena nainecurene. Chaen techu enaacha osa que leochaauru saruhin, itolere niicha latei jereein, queecha coacuhin nechu aansaineein ichaaore.

<sup>15</sup> Nitohaneein neeuruhane jaunte, inae nitajenaaneein neure; Cana Coaunera bero rijijieein rene cana turuaeraneein niha Jesocurisitone saijieein, sacuelanaala jianein neeuruhane jaun. Nii jaunte aihalu Beor calaohi *profeta* Balaamne rijijieein neure. Aca jetaote coriqui jeriha baaso ichana jerihane jana jetao,

<sup>16</sup> rai suujua coarihei amuneein baaso ichaa cuhane coataa jetao, cacha rijitiin rai ereein, baaso ichaane caohate nii amaera cabario rijijieein nena asno.

<sup>17</sup> Nitohaneei cacha relaeraneein nenacaaurute, caohacha que cacha relaelanaala, nechu cacha ichao asaeraneein nena que cacha relaaure. Nii jaunte chabana satonoelanaala nena nocohenaanau caseteconeein neeurureein.

18 Itolere quete niqui ereeure. Nete jataain joenreein aitocure. Nitohaneeinte, acaauru ichao rijijieein ichaauruhane jianeein, ena Cana Coaunera coitucunaa nunuhetejeeureraauru- cachaauru saruure osa que.

19 Itolereneein niicha ichana jerei ichaa cachane jereeinte niqui ereeure. Nete acaauru itajeranu letononeein netiin aitocure, satiin cache, rai suujua saruhera tonoraain nena rai letononeein nihane jaun.

20 Nitohanihane jaunte inae Cana Coaunera coitucuhin, cana ichoteraneein nena Jesocurisitone maajeein coitucuhin nihane jaun, inae Cana Coaunera coitucuelanaala nenacaauru ichao rijijieein ichaohane caje nichoteein nihane saijieein, nacoauneein nii jauriaalu aihalune rijijieein ichaohin niha cachane, jauriaa aihalune amuritoheriin baasoneein ichoae.

21 Nitohanihane coataate niqui nirijieein, cana ichoteraneein niha Jesocurisitone coitucuelanaala neeuruhane caohachae. Nabana acaauru rai tenojoinnein niha nii cana rai beratenojoi Cana Coaunera caje nenaane saijieein que jaolecooruhane coataa.

22 Nete inae nitohaneeururichaaaine que: “Narohane baihate jeelai naro qui remaae. Caohatiin culeenjoinihane saijieeinte inae nacoauneein naticho cuhane cue coosi,” naa acaauru que erenaane rijijieein neeure.

### 3

#### *Nacoauneei tururichaaain Jesocurisitone*

1 Caa quete, inae coroata sae quiricha laenaain letoaanu jataain canuhacha belaaaneein neiniquichene rainera canejeraauru. Nii coroatajai canuhacha laenai quiricha cuhanena inara suujuateeun, caohachaaain inara suujua coaraain, baaso coacuelanaala rauhijiriin coacuhin neeichene jerichaaunne jaun.

2 Inoaenlu inara rai berejetocuruha Cana Coaunera tenojoinnein nenacaauru *profetacurune* coacuhin, inara relaerateein nihalu rai afosotooro que cana ichoteraneein nena Jesocurisitone coacuhin neeuche.

3-4 Inae caa baihate nechuh inara necoeje chanuha: “Aanca Jesocurisito. Nacoauneein turuhane cointate niqui aitelu. Inae ohacoaauruha cana foerateracuru niqui, nete jerichanejeein sacue necoaunaa cana rai chauratanene caje coauneein nihane rijijieein,” naain ereeururichain nechuh jeriha acaauru suujuane rijijieein baaso ichajeein ichaonacaauru cachaaurune que nainaan ichaaoche.



<sup>5</sup> Nitohaniha acaauru ichaone jaunte, jaiti necoauaeniha satiin itolerene ajiniha, inae nesiha dedene jana, acau nejesinaneein niha caa chauratanene jana, nitohaneein jeriha Cana Coaunerana jaun, acau caje counanohineein nihalu caa cana rai chauratanene coitucuhin esenetana jerecurene.

<sup>6</sup> Nii rijijieein techu, elo tabai aina cuaain itajenojoneein nelu caa cana rai chauratane.

<sup>7</sup> Nete laen, caa ena nena dede, chauratane, naaonjoainuri, inae nitohaneein jeriha Cana Coaunerana jaun, usi tabai que nitajeeuruhane coina rucuhenhineein neeure. Nii usi tabai, baaso icharaauru itajeranuneein nenaate, acaauru mocoreein cana janonaa satono bana.

<sup>8</sup> Canejeraauru, jiaonriha Cana Coaunera rai le jüichoo, le oaraanca jaanacanei carajanihane jana, le oaraanca jaanacanei le jüichoonejihane baitichache.

<sup>9</sup> Coatiha niqui aitocuruha esenetaaichuru tabaaurune rijijieein, cana rai naitoonjoan tihane baitihane jaun, caeneenejihei Cana Coaunera. Chuni nitajihane jerenihane jaunte, saain nichoteein niha cachane jerihane jaun, jaiti inara cojoe Cana Coaunera.

<sup>10</sup> Nete inae ecu tihane bana, coitucueraelanaala turuha asijiautone rijijieein, coitucueraelanaala turoreein cana Curuaanaa Jesocurisito. Nii janate tonijiaain coasinacaain neranuha cureein caa canaacha coarajei dede. Itolere, que nenacaauru netonaite itajereein usi. Jana chauratanete satiin que nenacaauru aina jiniiquiin coaraain benojoinereein Cana Coaunera rai.

<sup>11</sup> Nitohaneein nitajerichaaain itolerene jaun, leecha que coacuelanaala, jeriha Cana Coaunerane rijijieein ichaaoche.

<sup>12</sup> Aihana jaun, chajaain jeriha Cana Coaunerane rijijieein neeuchete carajaelanaala turuhine. Inae turuhane banate, usi tabai que itajenojoiniha cureein caa dede canaacha coarajei. Itolereite nii usi jana neein mocoreein.

<sup>13</sup> Nete nitohanihane nihanatiin, cana laen ena nena dede, ena nena chauratane, naaonjoaihunri cana rai tihane coina Cana Coaunera aitoonjoa cohajerichaacheein. Ecu coatiha inae nerinaain baaso, caohacha nejesinaachate nereein.

<sup>14</sup> Canejeraauru, aihana jaun, nii que turuhane cohajein, caohachaaain ichaaochete osa colane raotojoein cha ujuaihonelanaala neeichene jana, inara eruhine Cana Coaunera.

<sup>15</sup> Aihana jaun, satiin nichotena coina, cana cohaca jaiti turueniha cana Curuaanaane coitucuhin que nainaain neeuche. Nii quete inara rai niicha laenai quiricha cuhane been laenaeraete cana nejera Faboro, que coitucueratiha Cana Coaunerane caje coitucuhin.

<sup>16</sup> Le quirichaauru niicha laenai nainetiinte, nii que aitiin beein laenaeraaete cana nejera Faboro. Nete tabaauru coitucunacaene caaintatiin aitohane jaun. Nii jaunte, leeochoaauru Quiricha laenanohineein nenea ichacuruhane rijijieein, acaauru jerecuruhane rijijieein rotohi que cacha relaaure, tabaauru caohachaaain suujua coaraelanaala nenacaauru cachaauru. Nii corenihate, caseteco coaracurureein inae ecu tihane bana.

<sup>17</sup> Canejeraauru, nitohanihane jaun, inae nii ajiniha caje coaaneein nii coitucuhin neeichene jaun, inara coritaauruha nechua aansai cachaaurune esenetaaichene coataa que nainaaain ichaaoche. Nabana inara coritaauruhane esenetaain inara suujua coreein acaauru rijijieein neeichene coataa.

<sup>18</sup> Nete jeelai amuritoheriin cana ichoteraneein nenea Cana Curuaanaa Jesocurisito coitucuhin, jiniiquiin aca jerihane rijijieein ita belaaain neeichene caohachae. Aca acaaneein nihane coitucuhin coroaecuruhine chabana satonoe-lanaala. Nitohaneein neeine.

## Joancha letoai leinjiin

### *Ichaonaa esine tera erenaa*

<sup>1</sup> Necoaunaa cana janonaane ajiniha inoaelu caje coauneein nesina, canacaanuhacha aonai, canacaanuhacha coarajei, naaonjoainne caa been inara rai laenaain letoacaanu, canacaanu nota que coaraain, biji mucuhin, naaonjoacaanune jaun. Acate, ichaonaa chabana nitajenaa charanejeein nenea esine tera Erenaa ne.

<sup>2</sup> Canacaanu rene ecocohin iriha nii ichaonaa esine chabana sanaacharanejeein nenea terane jaunna, inara rai nii que ereerecaanu. Acate, Inaca Cana Coaunera aina nelu. Nii jianein ratiriin turuhinte, canacaanu aina neein, jianacoon teteriin satiin rai beebeje, amuhemujueein itolere sacutaain.

<sup>3</sup> Nitohaneeinte itolere ichaain satiin cachaauru notajae. Niine canacaanu raajenihane coaraain beebejihacaanu, inara netonai canacaanu aina jiniiquiin esenetaain neeichene coina. Charijieein teeinti canacaanu, Cana Inaca Cana Coaunera, rai Calaohi Jesocurisito, naaonjoain aina jiniiquiin nihacaanu, nii rijijieein inara netonai canacaanu aina jiniiquiin raotojoein neeichene coina.

<sup>4</sup> Nii jaunna, jitariin been inara rai laenaain caa letoacaanu, inara netonai coitucuhin neeichene, raotojoein rachoojoein jiniiquiin nihacachene coina.

### *Cacha cononeein niha Cana Coaunerane*

<sup>5</sup> Caa erenaa- canacaanu relaa Jesocurisitone jaan- inara rai canacaanuhacha beebejeite, cacha cononeein niha Cana Coaunerane jaun, nota beroteniha cachaacha ichaine jaan ne. Nihei charijieein niha natiin jetao, que nasina nainihe chaelai, Aca itolereneein baaso ichaain nihacachene nii coarajein nihane jaun.

<sup>6</sup> “Ainate jiniiquiin nihacache,” naain irihacachene saijiein, asiin canaacha jerei ichacache suujueinete, cana raajenihane nohanein necoritarichaachein.

<sup>7</sup> Nete laen satiin acatiha cana ichao teteriin aiha Cana Coaunerane rijijieein asinojoinelanaala chachaain jiniiquiin ita suujua rijijieein nihacachene, cana osa culeerein rai coichana que rai Calaohi Jesocurisito.

<sup>8</sup> “Chatohanai baaso ichahaun. Coatiha chaque osaojoehaun,” naain irihacachenete, cana raajenihane necoritarichaachein. Cuute casajenetiin nedarichaachein.

<sup>9</sup> Jana laen chatohaneein baaso ichaain nihacachene, suujelanaala beein, Cana Coaunera nitohanei rucuhaneen nihane que jaaecohacachenete, cana osa coreniha caseteco coaracaachene rai nihacachene caje, cana que suujua acatein, itolere baaso ichacaachene berotiha cureein cana caje Cana Coaunera.

<sup>10</sup> “Chaaelai janonaa bana, chatohaneein naosatein nihaaun,” naain irihacachenete, Cana Coaunera ere tonoraene richaacheein. Cuute casaje tocuhanein Cana Coaunera ratiririchaachein.

## 2

*Cana Coaunera acatiha cana rai cha rucuharanu Jesocurisito*

<sup>1</sup> Cana Coaunera coreniha cacalabi rijijieein nenacaauru, nabana Cana Coaunera ere lacohin, chatohaneein nosatein neeichene coataane catohaneein laenaain letoaaun. Chuno-coha chatohaneein baaso ichaain osa que nesaruhin nihane, niha cana rai Cana Coaunera acatiha nii rucuharanu Jesocurisito- esinae rauhijiriin caohacha esine coitucuhin rucuhaneen nena.

<sup>2</sup> Osaotohacachene caje cana que suujua acatiha Cana Coaunerane coinata raajenihane netelu Jesocurisito, coroso que teein atinaauruhane coina. Coatiha leinjiin cana corenihacha aiheilu. Satiin caa chauratane sacutaain que nenacaauru caje osa berotihane coinata nitohaneein nelu.

<sup>3</sup> Esinae rauhijiriin naitoonjoan tonoraacachenete, esinae rauhijiriin Cana Coaunera coitucuera nihacachene coitucunaa nainerichaachein.

<sup>4</sup> Jana tabaauru: “Cana Coaunera coitucuhanu,” naa natiin naitoonjoan tonoraenihanete, nechujataain casajenetohane jaun aitoreein.

<sup>5</sup> Esinae rauhijiriin, nere tonoraerate esinae rauhijiriin Cana Coaunera belaichaneein nihane coitucunaa nainereein. Nii ainate esinae rauhijiriin jiniiquin, aina nihacachene coitucunaa nainichaache.

<sup>6</sup> Chunocoha “Jeriha Cana Coaunerane rijijieeine ichaaon,” naain erei, nii ichaohalu Jesocurisitone rijijieein ichaohine.

*Ena nena Cana Coaunera aitoonjoan*

<sup>7</sup> Chasocuru, caa inara rai canuhacha laenai canuhacha letoai- Cana Coaunera aitoonjoan, coatiha ena ecoonaneen nihei. Acate inoaelu caje coauneen, inara rai berateno-joineen nenaane. Nii Cana Coaunera aitoonjoante, inae inoaelu caje coauneen inae inaraacha aonai ne.

<sup>8</sup> Nete laen, caa ena inara rai quiicha laenai quiicha letoaite, ena Cana Coaunera aitoonjoan- ena nena ne. Esinae rauhijiriin Curisito aina jiniiquin nena neen, inae

nocohena caje mituhajeein, jihanacoo jiiichoo mituhichene jaunte, inara raajenihane nii coaraain coitucunaa nainer-iquicheein.

<sup>9</sup> “Cana Coanera cono conohanau neeinne, jianacoon teteriin chachaaain neeun,” naa natiin nejelau namute cacha belainiha chunocohanete, jaiti moconajaera aina nocoenaana nihane jaun aicheein.

<sup>10</sup> Chunocoha nejelau namute cacha belaaain neite, jianacoon ichaohane coaratiha aicheein. Nitohaneein ichaohane nerinaain chuni osa que sarunaa nainera.

<sup>11</sup> Jana, namute cachaauru aina nejerateein belaiheite, nocohenaana joenreein moconajaera aina jaiti amuhemujue aiha maosane rijijieein, nii nocohena rai suujua aninoane jaun.

<sup>12</sup> Nii jaunna, cacalabihuru rijijieein neiniquichene rai caritiin rauhijiriin inara rai beein laenaain letoaaun, inoaelu beratihalune tochaneein nere nainaane coina, Acaneein nihane aina cuaaain inara caje inara osa beroteratiha Cana Coaunerane coitucuhichene coina.

<sup>13</sup> Saain ichauhenaauru, inara rai netonaina caa laenaain letoaaun, inoaelu caje coaneein nii nesina coitucuhin neeichene jaun. Saain enamanacauru raine maajeeinna, caa caritiin laenaain letoaaun moconajaera amuritiin ichoae iniichene jaun.

<sup>14</sup> Cana Inaca Cana Coanera coitucuhin neeichene jaunna, caa caritiin inara rai laenaain letoaaunra cacalabihuru. Saain inara ichauhenaneeichene raine maajeeinna laenaain letohacaanu, nii inoaelu caje coaneein nii nesina coitucueraneein neeichene jaun. Saain enamanacauru raine maajeeina letoaaun, chaae inara coichana aina cutaaain Cana Coanera Ere esenetaain, caohachaaain laraajiin moconajaera choae iniichene jaun.

<sup>15</sup> Coa nechu jataain cacha sarueraanu que caa chauratane curuaanaa moconajaera tenojoin nichaae inara suujua letoache. Chunocoha nii moconajaera tenojoin itolere nichaae suujua letoerate, nechu Cana Coanera que jaolequiin belainihane jaun aicheein,

<sup>16</sup> Cana Coanera caje nenea neniha nii chauratane que tenojoine jaun. Nii chauratane que tenojoite, nechu jataain osa que cacha sarueraanu que nenea ne. Acate cana nota rai caohati tochanihane nichaae suujua letoaera, niicha sirii aina cuaaain leochaauru amurijiriin nenea coacuhin, naaonjoaain niha cachane jaan tera ne.

<sup>17</sup> Nete inae cuu tihane bana, chauratane aina jiniiquiin nitajiha cureein, nii satiin cacha sarueranu tera moconajaera. Nete laen chaaelai janonaa bana nitajenaa charane-

jeein niha cuurureein Cana Coanera jerenohi ichajeein ichaonacaauru.

*Esinae rauhijiriin nohanelanaala niha leinjiin ereine, nii caje mitunaa naineniha casajene.*

<sup>18</sup> Aonacuche cacalabihuru. Inae besaute nichaae cuujiha cana janonaa. Nii jaunte, inae uhe lalaje nii Curisito aina nejerateein nena cache cairichaera moconajaera. Nitohaneeinte, inae caa arajiin ocojoacoaaure Jesocurisito que nejerateein nenacaauru. Nii cajete inae besaute nichaae cuujiha cana janonaane coitucuhacache.

<sup>19</sup> Cana ainate neeururejete niqui, nete mituhin amuurelu cana caje. Coatiha acaauru, cana suujua rijjijeein coacuhin neeuruhilu. Baana cana suujua rijjijeein coacuhin aihuruhalunete enanetojoein cana aina neeurure. Nitohaneeinte neurelu, acaauru caje esinae rauhijiriin cana suujua rijitojoein neurenihana cana aina nenacaaurune coitucunaa caina.

<sup>20</sup> Nitohaneeinte inara rai Cana Coanera Suujue teein nelu Curisito, aina cuaain inara itolere coitucuhin neeichene caina.

<sup>21</sup> Esinae nohanelanaala erena niha Curisito que erenaane coitucuneeichene jauna caritiin inara rai laenaan, coatiha coitucuneeichene jaun nihei. Nitohanihane jaun inarate coitucuhiche, casajenelanaala nena caje mitunaa nainenihana casajene.

<sup>22</sup> Aihana jaun, chateeinti casajenetiin ichoae, niite: "Canaacha cohajei Mesihasi nihei Jesocurisito," naain Jesocurisito esenetaelanaala que erereein. Acatechu, nii rai Inaca Cana Coanera aina rai Calaohi Jesocurisito batohin acaauru que nejeratenaaneein ne.

<sup>23</sup> Chunocoha cache, Jesocurisito coitucunaa jerenihanete, acaentonai ranaa jerenereein rai inaca Cana Coanera. Nete laen chunocoha, nii rai Calaohi Jesocurisito coitucuhin leochaauru que coitucuerateraneein nihane, acaentonai coitucuhin rareein rai Inaca Cana Coanera.

<sup>24</sup> Nii inoaelu caje coauneein, inara rai beratenojoin inaraacha aonai rucujueein sirichuche, inara suujua cuhaneecha. Chaen jiaohine Cana Coanera Calaohi caje naluhichene. Aihate Cana Coanera caje netonai naluheneeiche.

<sup>25</sup> Nii cana rai tihane caina aitoha Jesocurisitone jaante chabana nitajenaacharanejeein nena ichaonaa esine ne.

<sup>26</sup> Nabana inara coritacuruha nii inara coritana jereraaurune coataane, caa inara rai aitiin laenaan.

<sup>27</sup> Nete laen inara, inara relaa'in inara suujuateranu late-neeiche, Jesocurisitohacha teratenojoin, Cana Coaunera Suujue siriin neeichene jaun. Nii inara rai niicha teratei Cana Coaunera suujuete, caohachaa'in rauhijiriin inara relaa cureein, inara suujuatein. Inara rai cha bihane, coatiha nohanenaa nerinaa'in. Esinaete erenaa nereein. Aihana jaun, Curisito esenetaa'ichene jianena coacuelanaala aina jiniiquiin neein inara relaa rai Suujuene rijijieein ichaa'oché.

<sup>28</sup> Aihana jaun cacalabihuru, enene caje coaauneein, jiaohine Jesocurisito esenetaa'ichene jianein neeichene. Aihate chaque casiin necoatelanaala jiniiquiin queecha jaequuin, niheichu Jesocurisito que coejelanaala nihacache ena-coaauneein turu bana.

<sup>29</sup> Inarate raotojoe'in esinae rauhijiriin caohacha ichaeranein ichaoha Jesocurisitone coitucuhin neeiche. Nii rijijieein techu, baaso ichaelanaala esinae rauhijiriin caohacha nejesina ichara cacha, Cana Coaunera calaohinein inae nihane coitucuhin neeiche.

### 3

#### *Cana Coaunera calaohinein nenacaauru*

<sup>1</sup> Aonacuche. Jataa'in mainajeein cana belaa'in niha Cana Inaca Cana Coaunerane que nainaa'in coitucuhin neeuche. Nii jaunte nainecure, Cana Coaunera calaohi ineein cana curuaateeuruha cachaaurune, esinae rauhijiriin acaneein nihacachene jaun. Nii jaunte cana coitucuhin, cana belaa'in cana coana nainecurene caa chauratane que nenacaauru cachaauru Cana Coaunera coitucuurenihane jaun.

<sup>2</sup> Canejeraauru, inae esinae Cana Coaunera calaohi neeinte nihacache. Nete nii baiha: "Naa'ojoin ineeinte niha curichaachein," naa'in rauhijiriin coitucuenihacache. Leinjiin, coaiten enacoauneein cau turuha Jesocurisitone bana, rijijieein niha curichaacheinnete laen coitucuhacache, aito-hane rijijieein, jerichanejeein coaraa curichaacheinna jaun.

<sup>3</sup> Satiin acaacha esenetaa'in queecha jaequuin nenaate, raajenhane itolere baaso caje necoulucuhin neeurureein, baaso colane ichaoha Jesocurisitone rijijieein ichaauruhane coina.

<sup>4</sup> Nete laen, satiin osa que nesaruhin nenacaauru baaso ichaa'in neeure, baaso icharanein niha satiin osane jaun.

<sup>5</sup> Inara netonaite cana caje osa beroteraanu que caa chauratane que turuhalu Jesocurisitone raotojoe'in coitucuhin neeiche. Coatiha Aca charijieeinijiji chaque osaa'ojee'in niheilu.

<sup>6</sup> Nitohanihane jaun, Cana Coauneraacha jerei ichajee'in jianelanaala nenaate, osa que nesaruna nainenereein. Nete

osa que nesaruhin nenacaauru, coaracuruhane niha natiin chabana coitucuurenereein, nii jaun coatiha rai cacha necururinaain.

<sup>7</sup> Coa inara coritaain neeuruha nejelau cachaaaurune esene-taain nihachera cacalabihuru. Chateeinti baaso que jaolequiin caohacha nejesina ichae, niite caohacha ichara ne, aiha nii caohacha nejesina icharane rijijieein.

<sup>8</sup> Chateeinti osa que nesarujueein ichoae, nii te moconajaera raineein nihane jaun aicheein, inoaelu caje coauneein osa neba niha moconajaerane jaun. Nii jaunte caa chauratane que turuha uhelu Cana Coaunera Calaohi, nii moconajaera ichanaa itajeein beroteranu que.

<sup>9</sup> Cana Coaunera coitucuin, Cana Coaunera calaohineein nenea, inae osa que nesarujueein ichaonaa nainiheein, inae rai Cana Coaunera tenojoi ichaonaa que ichaohane jaun. Chaen inae Cana Coaunera calaohi nihane jaunte, inae osa que nesarujueein ichaonaa nainene.

<sup>10</sup> Coitucunojoineeinte neeure Cana Coaunera calaohichuru. Nii rijijieein techu coitucunojoineeintee neeure moconajaera calaohichuru, caohacha ichaelanaala, namute cacha belailanaala, naaonjoaain nenacaauru, Cana Coaunera cachaneein neurenihane jaun.

*Leeochaauru aina jiniiquiin ita belaaain nihacane*

<sup>11</sup> Caate nitohaneein nihacachene coina: “Jiniiquiin ita belaaain, leecha cachaauru niha natiin belaaain, naaonjoaain ichaaoche,” naain inoaelu caje coauneein beratenojoeineein nenea ne.

<sup>12</sup> Aihana jaun, nainihaacache moconajaera cacha neein nihilune jaun nocoala sohin jaohalu Caainne tocokaneein ichaohacachene. Chanuna nocoala sohin joae Caain. Caohachaaain suujua coaraa nii rai nocoalane jaunte sohin joae, baasoneein ichaoha nii Caainne jaun.

<sup>13</sup> Inara belaihureniha Cana Coaunera coitucuuruhine coa nii que nererojoeacache. Coatihana enaacha inaraacha coarai inerinaainta canejeraauru.

<sup>14</sup> Ohin nitajenaa rai nenea janate nii caje cana ichoterate, chabana nitajenaa charanejeein nenea ichaonaa que ichaohacachene coina. Nii jaunte cana amute cachaauru belaaain naaonjoaacache, inae raotojoeein coitucunaa jaun. Chateeinti namute cacha belaine, niite ohin nitaje rai nihane jaun aicheein.

<sup>15</sup> Satiin namute cacha que jaolequiin nenacaaurute leinjiin nechu aansai sonajaineein ne. Inarate raotojoeein coitucuhin neeiche, nitohaneein nechu aansai sonajaaain nenea, coatihana chabana ichaonaa nitajenaa charanejeein nenea ranaa nainihei.



16 Coichana aina cutaain cana belaiha Jesocurisitona jaunte, Cana osa corenia coroso que neteein ohalune coitucuhacache. Nitohanihana jaunte, raotojoein jianacoon ichaoha cana amute cachane coina coreniha itolere necairichanaa abaantaain acaauru coroatajanein nihacachene caohachae.

17 Raotojoein ichaohane jaanu que coriqui siriin niha chunine jana, jataain cairichei inejeein coroatajanera lateein niha leinjiin namute cachane jana tenihanete, aina cutaain Cana Coaunera belainihane jaun aicheein.

18 Cacalabihuru, nainihe i cana ereecha que cana amute cacha belaiha nocoetiin ereein nihacachene. Esinae rauhijiriin cana amute cacha belaichaachene, niicha latei teein belaichaachenete ne.

*Chaque necoatoelanaala tonajelanaala Cana Coaunera acatiha nihacachene*

19 Nitohanein nenaate, esinae rauhijiriin ichaonaa chabana nitajenaa charanejeein nena tera aina esinae nihacachene coitucuha curichaachein, Cana Coaunera acatiha nena bana.

20 Chatohanei ichaain nihacachene coreniha cana coulurujia cana suujuane sainejeeinte, canaacha ichai coitucueranein ne jianacoon cana tera- Cana Coaunera, Aca itolere coitucueranein nihane jaun.

21 Canejeraauru, jana cana suujua cuhane chatohanein baaso ichacaachene coaracaachene jana, chatohanei ichaeniha cachenete, Cana Coauneraacha que jaaequiin nacatiha nerichaacheein.

22 Acate satiin canaacha bajai tereein, cana rai naitoonjoan tonoraain, Aca jerihane rijijieein chachaai nihacachene jaun.

23 Nitohanein tonoraain nihacachene coina cana rai naitoonjoante, rai Calaohi Jesocurisito esenetaain, le cacha nichaachene jiniiquiin ita belaa in ichaohacachene coina ne.

24 Satiin naitoonjoan tonoraain nenacaaurute, nii naitoonjoan jianena coacuelanaala, aina jiniiquiin neeuruhane jaun, acaentonai acaauru aina ichoae. Nitohaneinte cana aina ichaohane coitucuhacache, cana que coitucueratiha nii cana rai niicha tei rai Suujuene caje.

## 4

*Cana Coaunera Suujue aina nejeratiha moconajaera suujuene*

1 Aonacuche canejeranein cacoelaichauruna caa que erete aonaquiche. Coa Cana Coaunera letono niha noco-hetiin inara rai satiin erenacaauru esenetaain nihache. Nitohanein inara coritana jerera nihane, esinae rauhijiriin Cana Coaunera Suujue sirichuruhane coitucuhichene coina

coujunajaain coaranaacuche, jataain lanaeniha arajiin caa chauratane que casajeeurune jaun, tabaauru cana Coanera letononiha nocoetiin ereuruhane jaun.

<sup>2</sup> Nitohanein coujunajaain coaranaaquichenete, esinae rauhijiriin Cana Coanera Suujue siricha coitucuriquicheein. Satiin, cachanein turuhin nejanoaalu Jesocurisitone coitucuhin nenacaurute, esinae rauhijiriin Cana Coanera Suujue siricheein.

<sup>3</sup> Jana nitohanein niha Jesusone coitucunaa jerelanaala nenacauru, coatiha Cana Coanera Suujue siririnaain. Leinjiin Curisito aina nejeratena moconajaera suujuete siricheein. Inarate coitucuhin neeiche, inara uricho que bera aonaain naonjoaain neeichene jaun. Nii moconajaera suujuete inae caa chauratane que turuhin ne. Acate Curisito que nejeratena nera cacalabihuru.

<sup>4</sup> Jana inarate Cana Coanera Suujue siriin neeichene jaun, nii casajeeuru ichoae inii neeiche. Nii inara suujua cuhane inaraacha siriite, jataain mijiaainetiin ne, caa chauratane que nenacauru rai tenojoin ichoae jauhecotojoriin.

<sup>5</sup> Acaaurute jelai teein caa chauratane que nenacauru neein neeure. Nii jaunte raujiaain caa chauratane que nenacauru itolereeicha que ereerecure. Nii jaunte acaauru ere aonaain esenetaain tonoraure acaauru rijijieein caa chauratane que nenacauru cachauru.

<sup>6</sup> Jana canate Cana Coanera caje nena nichaache. Nii jaunte Cana Coanera coitucuurera, cana ere aonaain tonora. Jana Cana Coanera coitucuuruhite cana aohana jerene. Niicha cajete nainacaache, “Acate Cana Coanera Suujue siri. Jana acate casaje moconajaera suujue siri,” naain coitucunaa nainichaache.

### *Jataain cache belaiha Cana Coaunerane*

<sup>7</sup> Canejeraauru, coanete cana laurijiracuru, chaen nelau cachauru, naonjoainuri belain nihacache, Cana Coanera caje coaunein unaaniha ita belaichaachene coinane jaun. Satiin nitohanein namute cachauru belaiachte Cana Coanera calaohinein ne. Niite esinae rauhijiriin Cana Coanera coitucureein.

<sup>8</sup> Chateeinti namute cache belaine, niite Cana Coanera coitucue. Cana Coanera coitucuera, aiha Cana Coaunerane rijijieein jataain cache belaihane jaun.

<sup>9</sup> Cana quete jataain cana belaitohane coarate Cana Coanera, caa chauratane que acaihanejein rai Calaohi letoain, nitajena charanejein nihacachene coina.

<sup>10</sup> Belain cana arihacachene que ainaa tochaneein cana belaiha Cana Coaunerana jaunte Calaohi letoaelu, cana osa

coreniha raajenhane onaa que netihane coina, nabana cana osa coreniha necairichanaa coataa, atiin cana ichoterate cana osa coreniha necairichanaa caje.

<sup>11</sup> Aonacuche canejeraauru. Nitohaneein jataain cana belain niha Cana Coaunerane jaun, coanete cana netonai cana laurijiracuru, nejelaauru, naaonjoain belain nihacache.

<sup>12</sup> Coatiha Cana Coaunera coaraain nihei chunei cacha niqui, nete, ita belain, cana laurijiracuru, nejelau cachaauru, naaonjoain belaichaachene cana aina nereein Cana Coaunera. Nii cajete cana belaitoha Cana Coaunerane rijijieein ichaohacachene coaracurureein cachaauru.

<sup>13</sup> Nitohaneeinte aina nihacachene jana, acaentonai cana aina nihane coujunacanu que cana rai Suujue te Cana Coaunera.

<sup>14</sup> Canacaanune, caa chauratane que osa caje cachaauru ichoteratihane coina, nii rai Calaohi letoaa Cana Inaca Cana Coaunerane coaraneein caa beebejihacaanu.

<sup>15</sup> Satiin cacha, Cana Coaunera Calaohineein niha Jesusone coitucuhin berate Cana Coaunera aina ne. Jana Cana Coaunera netonaite, aina nereein.

<sup>16</sup> Nitohanihane jaunna Cana belaiha Cana Coaunerane coitucuhin esenetaacaanu. Cana Coaunera cana belaichaneein nihane jaun, rijijiein namute cacha belaichate, Cana Coaunera aina ne. Jana Cana Coaunerate aina netonai ne.

<sup>17</sup> Nitohaneeine esinae rauhijiriin jianacoo teteriin cacha belain nihacaanune jaun, chaelai que casilanaala, chaque tonajelanaala nerichaanuhin, inae cacha coulurujuihane coina coaitee turuha Cana Coaunera Calaohi Jesocurisito bana.

<sup>18</sup> Esinae rauhijiriin cana amute cacha belain ichaohacachene, nihei chaque casiin ichaonaana jaanu. Ita belain ichaohacanete, jaoleneein ne nii cana casataera cana casete-caeraanu. Jana chaque casiin nihacachenete, cana amute cacha belai ichaohenihacachene jaun airichaacheein.

<sup>19</sup> Canacaanune Cana Coaunera belain nihacaanu, aca jauriaanejein ichoaichaniha canacaanu belain nihalune jaun.

<sup>20</sup> Chunocoha: “Canune Cana Coaunera belaihun,” naain iriha natiin, namute cacha belainihane, acate leinjiin casaje neba ne. Coaracuche nachuhinti, notaracaae neeuruha nii namute cachaaurune saijieein acaauru belairiha. Nii jaun techu, nii amuritoheriin Cana Coaunera belaina nainene, chabana coaraain esenetaenihane jaun.

<sup>21</sup> Jesocurisitote cana rai: “Chateeinti Cana Coaunera belain ne, nii namute cachaauru belain neeine,” naain cana letoain cana ratirilu.

## 5

*Canaacha esenetai aina cuaainte moconajaera amiritohacache.*

<sup>1</sup> Satiin Cana Coaunera letono Mesihasi niha Jesusone esenetaaurerate Cana Coaunera calaohineein neeurureein. Nii cana inaca Cana Coaunera belaichate, satiin rai calaohineein nenacaauru belaicheein.

<sup>2</sup> Cana Coaunera belaichaache esinae rauhijiriinete, cana letoaane jaan icharichaachein. Nii banate Cana Coaunera calaohineein nenacaauru netonai belaichaachene coitucurichaachein.

<sup>3</sup> Cana Coaunera belaihacanete, nii cana letoaane jaan tonoraain rijijieein chaachacaane ne. Niheichu coatiha caaintai ichaonaa nihein nii naitoonjoan.

<sup>4</sup> Satiin Cana Coaunera calaohineein nenacaaurute, chauratane que nenacaauru itolere baaso choae ini. Satiin nii canaacha esenetaite cana suujua lararajiain cana coroatajane, chauratane que nenacaauru cana que nejeratenacaauru amuritoeraneein nihacachene coina.

<sup>5</sup> Cana Coaunera Calaoheinein niha Jesusone que jaaequiin nenaate, caa chauratane que nenacaauru moconajaera letonocuru amuritoreein.

*Caa nichata laurii erenaate, "Naaonjoaaineinte ne Jesocurisito," naain berane.*

<sup>6</sup> Cau chauratane que niha Jesocurisitone janate, acau que baotisanajoineein neein, coroso que ohin rai coichana jaochalune que, naaonjoain que cojunacatenohineein nedaclu. Cana Coaunera suujuete esinaaen nitohanihane coitucuerate cana que. Nii Cana Coaunera Suujuete chabana nohanelanaala cana rai beraneein ne.

<sup>7</sup> Nichatajaainte neure rai Suujue que, nii Aca nihane coitucuhin beracuru.

<sup>8</sup> Nii coitucuhin nenacaaurute, Cana Coaunera Suujue, acau, ichana, naaonjoainuri ne. Acaaurute ita suujua rijijieein beraneein neure.

<sup>9</sup> Cachaauru, cana rai nii acaauruhacha coarai beebejeeuruane esenetana nainichaache niqui. Nete jataain nii amuritoeriin nelate, "Naaajoaan" naain biha Cana Coaunerane, nii rai Calaohi que aitohane jaun.

<sup>10</sup> Cana Coaunera Calaohi esenetaerate, esinae rauhijiriin aitoha Cana Coaunerane rucujueein siricheein suujua cuhane. Chateeinti Cana Coaunera esenetaene, niite casaje tochaneein Cana Coaunera tereein, Calaohi que aitoha Cana Coaunerane esenetaenihane jaun.

<sup>11</sup> Nii erenaa cajete cana rai chabana nitajenaa charanejeein nena ichaonaa tiha Cana Coaunerane coitucuhacache.

Jana rai Calaohi Jesocurisitote nii ichaonaa chabana satonoe-lanaala nena teraneein nena ne.

<sup>12</sup> Chateeinti Cana Coaunera Calaohi esenetaain ne, nii netonaite chabana ichaonaa nitajenaa charanejeein nena rareein. Jana Cana Coaunera Calaohi esenetaaite raenereein.

*Niicha letoai satonotihane rai acaauru suujuatiha Joanne.*

<sup>13</sup> Cana Coaunera Calaohi esenetaera niqichene raina caa caritiin laenareeunni, ichaonaa chabana nitajenaa charanejeein nena raeranein neeiche inara netonaine coitucuhichene coina.

<sup>14</sup> Cana Coauneraaacha quete jaaequiin nihacache, jeriha rai Suujuene rijijieein caje cha bajaain nihacachene cana rai nii canaacha bajai teraneein nihane coitucuhacachene jaun.

<sup>15</sup> Nii caje cha bajaacachene aonaa Cana Coaunerane coitucuhin nihacachene rijijieein techu, cana rai nii canaacha bajai terichaaaine coitucuhin nihacache.

<sup>16</sup> Osa que nesarujuiha chunei cana nejerane coara chuneine, rai Cana Coaunera bajaaine. Aihate jianacoon osa caje teine Cana Coaunera, jataain nitajena jaanu osa tabai nenihane. Jana nitajena jaanu que, jataain osa tabai que nesaruhin nei nihane, coa rai Cana Coaunera bajaache.

<sup>17</sup> Satiin itolere osate baaso neein ne. Nete ne cacha itajeranune lanaala nena osa.

<sup>18</sup> Saain canate, inacaneein tein Cana Coaunera coitucuera, inae osa que nesaruna nainenihane coitucuhacache. Inae Cana Coaunera Calaohi que beraichaaain nihane jaun inae dadanaa nainihe moconajaera.

<sup>19</sup> Canate Cana Coaunera caje nena nichaachene coitucuhacache. Jana caa chauratane sacutaain nenacaauru Cana Coaunera coitucuuruhite satiin moconajaera bijiu neeure.

<sup>20</sup> Chaen techu rai Inaca Cana Coaunera coitucuhin nena coina turuhin cha coitucuhin nihacachene jaanu tein cana que rai Inaca Cana Coaunera esine neein nena coitucueratein nihalu rai Calaohi Jesocurisitone coitucuhin nihacache. Nii jaunte, nii esine neein nena rai Calaohi Jesocurisito aina ichaohacache. Acate Cana Coaunera esine neein, ichaonaa chabana nitajenaa charanejeein nena teraneein ne.

<sup>21</sup> Cacalabihuru caohachaaain necoeraain neeuche, nabana inara coritana coaacuruha nechua aansaneein nenacaauru, Cana Coaunera letononiha nocoetonacaauru casajeeurune coataa.

## **Joaancha letoi coroataja**

### *Ichaonaa rauhi aina ita belaa'in niha'cane*

<sup>1</sup> Canuna, Cana Coauneraacha janijiineein rai ita taoji-aain coroaeraneein neiniquichene bichauhenaneein, inara rai caa quiricha laenaain letoaaun. Jataaine casuujua aina cutaain inara belaihun. Coatiha canuhacha nii inara belai-haaun. Satiin nii canaacha esenetai ichaonaa nitajenaachara tera esenetaeraaurute inara belaihure.

<sup>2</sup> Ichaonaa chabana nitajenaa charanejeein nenea tera coitucuichene corenihane inara belaa'in neeun. Nii ichaonaa niicha tei cana suujua cuhane nenaate cuu niha cureein, nirijieein inoaelu netiin nitajenaa charanejeein.

<sup>3</sup> Atiin cairichaa'joaain inara coaraain inara belaa'in inara coroatajanemiin Cana Coaunera, rai Calao'hi Jesocurisito aina.

<sup>4</sup> Jataaina rachoojoeun, jeriha Cana Coaunerane rijijieein caohachaain ichaa'oruha inara caje nenacaaurune jana erunajaanune jaun.

<sup>5</sup> Aonacuche quiicha belaihuri canejeraaurune caa que inara rai aite, inara laurijiracuru, nejelauru cachaauru, naaonjoain belaa'in ichaa'oché. Coatiha niqui ena ecoona cana letoaa Cana Coaunerane jaan nihei, jeelai inoaelu caje coauneein cana letoaa Cana Coaunerane jaan quene, aitiin caa inara rai laenaun.

<sup>6</sup> Nii cana letoaa Cana Coaunerane jaante, belaa'in neein ichaohacachene jaan ne. Nii nunuhe caje coauneein aito'ha Cana Coaunerane aonaquichene rijijieein ita belaa'in ichaa'oché.

### *Cachaauru coritaa amuhemuhenacaauru*

<sup>7</sup> Caa chauratane sacutaainte amuhemujueeure nechu jataain casajeuru cacha coritaa. Acaaurute itolere que nelatei cachaneein cau nejanoaain turuhalu Jesocurisitone esenetaain coitucunaa jerecurene. Nitohanein ichaonacaaurute, Jesocurisito que nejeratenaanein icha'oruhane jaun, aihure.

<sup>8</sup> Coaracuche, nabana inara coritaa'in neeuruhane nii esenetaain neeichene, joaenreein nitajiha inara relaacaanune jaanne coataa. Aihute coreniha inara rai nii cainaa'in neeine Cana Coaunera.

<sup>9</sup> Chateeinti, cacha relaalu Jesocurisitona jaan edaa cuaain cacha relae. Niite Cana Coaunera coitucuenihane jaun

aicheein. Chateeinti, jerichanetoein rauhijiriin aitoha Jesocurisitone rijitoein cacha relae. Niite Cana Inaca Cana Coaunera coitucuhin, nii Calaohi netonai coitucuhana jaun aicheein.

<sup>10</sup> Jana, caa caitono tocohanelanaala rauhijiriin cacha relaelanaala, nejelauneein cuaain cacha relaeraneei, inara rene turuhane, coa inara loreri asaae raache. Coachu tonaain rai irihache.

<sup>11</sup> Chateeinti, rai ereein loreri asaae raain ne. Niite nii baaso turuaane ujuaihoneein nereein.

*Satononejeeinne caa inara rai aitoreeunni.*

<sup>12</sup> Banejelanaalate ne inara rai irihanune jaanu niqui. Nena quiricha cuhane cuaain aitona jereneun. Nii jaunna inara rene turuha unaa jeretoon caraajenihane. Inae turuha uhanune banana inara rai beebejereunni, inara netonai nii coitucuhin neeichene, jiniiquin raotojoein rachoojoein nena coina.

<sup>13</sup> Cana Coaunera rai ita taojiaain Cana Coaunera bajaaurera aina nenacauru- janijiin Cana Coaunera ranojoinunru inara nejeraaurute saain inara coaacure.

## Joaancha letoi nichataja

### *Caiho coroaeca Joanne*

<sup>1</sup> Canu inara bichauhenaneeinne, caa quiricha laenaain letoareunni jataain esinae rauhijiriin quiicha belaa Caiho rai.

<sup>2</sup> Cana Coaunera coreniha quiicha belaa Caiho, icheina Cana Coaunera bajaau ichorataanihane, nii ena caohatiin jeriha rai Suujuene rijijieein neeine tocohaneein raotojoein raurohin neeine coina.

<sup>3</sup> Jerichanejeein caohachaaain rauhijiriin ii suujua corelanaala Cana Coaunera aitoonjoan tonoraain neeine beeu-ruha cana nejeraauru tabaauru turuhinne jaunna, nii coitucuhin jataain rachoojoeun.

<sup>4</sup> “Esinaete chuhisi aitoha Cana Coaunerane tonoraajeein neeure Cana Coaunera coreniha cacalabihuru,” naaina jataain rachoojoeun.

<sup>5</sup> Casuujua aina cutaain quiicha belaa, jataain caohatiinte erenaa tonoraain nii cana letoaa Cana Coaunerane jaan ichaain neei. Lechoaauru cana nejeraauru coroatajaneein, nii coriajai caje uhin turunacaauru cana nejeraaurune maa-jeein coroatajaneeine jaunte, jataain jelai amuritoheriin caohacha ichaai.

<sup>6</sup> Nii jaunte, turuhin satiin aonajeeuruha Cana Coaunera ranojoneein nenacaaurune jana, jataain acaauru belaa caohatiin ichaain neeine beebejeure. Atiin chaaelai latecuruha namuna jaan raine quene acaauruhacha latei teeu, jeriha Cana Coaunerane rijijieein.

<sup>7</sup> Acaaurute Jesocurisito que erenaa beebejena que amihanenaa ichaa nii uure. Coatiha acaauru coroatajanena jerecuruha Cana Coaunera coitucuhichurune jana jerecuruhi.

<sup>8</sup> Nii jaunte, cana itolere que acaauru coroatajanichaachene caohachae, aina raotojoein abaantaain Cana Coaunera ere beebejeuruhane coina.

### *Baasoneein ichaa Diotrefesine jana, caohacha ichaane coaratiha Demetirione*

<sup>9</sup> Cana Coaunera rai ita taojiaain Cana Coaunera bajaaurera raina leinjiin quiricha laenaain letoaaunlu. Nete coocainanohineein nihacaanune ere tonorana jerene Diotrefesi, acaacha cache letoaane rautatohane jaun.

<sup>10</sup> Chaente jataain casajenetiin, nechuh jataain joenreein canacaanu ere rocohin canacaanu irijiae. Nii jaunna



rautaenihacaanu. Chaen jetaote, Cana Coaunera coroaecuruhane coina ita taojiaauruhane jana turuuruha cana nejeraaurune, enooruhane caohateein sitanajae. Chaen jetaote, niha cotijiaain ranajaerane caohate. Niina jataain rautaenihanune jaun, inae turuha uhanune bana cotijiaain rai aitoreeunni.

<sup>11</sup> Aonaaun canejera. Jiaonriha ii netonai, nitohaneein baaso jeloon ii suujua cuaain neeine. Caohachaacha que ii suujua coaraain neeun. Caohacha ichaera cachate, Cana Coaunera aina nereein. Jana baaso ichaera cache, Cana Coaunera aina nerinaain.

<sup>12</sup> Satiin cachaaurute caohachaain suujua coara cachaniha Demetirione beeu, esinae rauhijiriin caohachanejeein nihane jaun. Canacaanu netonainechu caohachanijihane bihacaanu. Iite chabana nohanelanaala irihacaanune coitucuhi.

*Niicha laenai quiricha satono tiha Joanne*

<sup>13</sup> Jataainte ne banejelanaala ichei irihanune jaanu. Nena quiricha cuhane cuaain ichei aitona jereneeun.

<sup>14</sup> Nii jaunne ena ichoharaa unaa jereeun, caraajenihane ichei aitocooaanne coina.

<sup>15</sup> Chaque tonajelanaala raotojoein neeun. Satiin cana belaichaurute ii coaacure. Atiin, "Inara coaacuruhajera," naain nii cuu nenacaauru cana belaichauru rai beeu.

## Jodasiicha letoi

### *Inara coaaucaun*

<sup>1</sup> Jesocurisito cachaneein Saantiaao nejera Jodasi niha-nunena caa quiricha laenaun, Cana Inaca Cana Coaunera niicha jereineein niicha cotihacuri- Jesocurisito berainojinee-in nenacaauru rai.

<sup>2</sup> Cairichaojoaain inara coaraain inara coroatajanemiin Cana Coaunera, leeochoaauru aina jiniiquiin ita belaa-in rao-tojoein neeinchene coina.

### *Nechu jataain nohanenaa que inara relaaureraauru (1Fd 2.1-7)*

<sup>3</sup> Jataaina niqui inara aina jiniiquiin cana ichoterater-aneein nena que cuaain laenana jereeunlu niqui inara rai, canejeraneein neeinchene jaun. Nete laen jataain ena caohachae inara rai laenacaaunne, Cana Coaunera cachaneein neeichene jianelanaala, canaacha esenetai esenetaain neeinchene coina.

<sup>4</sup> Inae Cana Coaunera Quiricha cuhane besihalune rijijieein, inara aina neeuruha nechu jataain nohaneein cacha relaaureraauru, caseteco coaracuruhane rai nenacaaurune coitucuhanune jaun. Acaaurute jataain necha aansai cachaauru ne. Necha jataain cana belaiha cana rai Cana Coaunera tenojoinee-in nena aasaaeraneein nenacaauru ne. Chaen techu cana eroraneein nena-Can Curuaanaa Jesocurisito coitucuha nocoetelanaalane maajeein aihure.

<sup>5</sup> Inae niqui coitucuhiche inara, nena nacoaauneein inara rai benaa jereeun, Egipto caje coitucuurera Israeli co-coaichacuru rocohane baihate, esenetaaurui cachaauru ita-jelu Cana Coaunera.

<sup>6</sup> Coaracuche nachuhinti coujurihu Cana Coaunera letononeein nena tocohanein neeurenihalu anjeraaurune jaun, charijibana satonoelanaala nena nocoehena tabai jana neeuruha, satiin rucuheca Cana Coaunera que tihanereen tiaaine.

<sup>7</sup> Nirijieein techu ailu Sodoma, Gomora, naaonjoainuri cocoaichacuru aina curuaequuin, rohan nenacaauru ne-seuru cocoaichacurune maajeein, nejelau ene aina ichao-hin, ajenaacha que namuritiin, namute quicha aina ichaojer-aquuin naaonjoaunrelu, nitohaniha cana ichaone que airi-jiin. Nii jaunte charijibana satonoelanaala nena usihanaun

caseteco coaracure. Niite satiin cana suujua coaraain, que nainaain ichaohacachene coina ailu.

<sup>8</sup> Nitohaneein inae coitucuuruha sainejeeinte, nii inara rene turunacaauru cachaauru, nechu joaereen raaje osa que jaberoco aasajeein, sini anuu caje cha coitucuha no-coetiin cachaauru relaain, Cana Curuaanaa Jesocurisito no-coeje chanuhin, acaauru amurijiriin cocoinanacainein nenacaauru quene maajeein mainajeein ereeure.

<sup>9</sup> Coaraanachuhinti nenacaeneein Moisesa jaberoco amanaa jeriha moconajaerane jana, nii tonaain batohin, que baasoneein ereein nocoje chanunaa coacuelanaala, raujiaain acatein: “Ii suujua raujiaaine Cana Coaunerara,” naain nihalu moconajaera rai anjeraauru curuaanaanein nena Miqueline.

<sup>10</sup> Nete niritiin erenaa nainiha cache natiin, niicha coitucuhi que nihanatiin ereein neeure cachaauru. Nechu jataain leinjiin ataebinae rijijieein neein, nitajia acaauru jaberocone coina, jaberoco teure.

<sup>11</sup> Jataainte cairichaaajoaure, aihalu Cainne rijijieein ichaauruhane jaun. Aihalu Balaam aina Corene rijijieein coriquiicha que coaacuruhane jaunte, Cana Coaunera sacuuruhane jianecuruha erenaa tonoraelanaalane jaun nitajera neunre.

<sup>12</sup> Ita belaaihuruhane jaa beseta bitoaache jiniiquine jaaunrute, nechu jataain inara rai nocojena tiha, inara aina lenoneein acau cohin rachoojoein naaonjoaunre no-cojelanaala, nii chuni sinaa coacuelanaala. Cache beraicha niha nocoetiin churute aihure. Nete nii chuni berailanaala, nechu jataain jaberocohacha beraihure. Acaaurute nii conacainelanaala nena acau rijichure. Aiha temule inaacane cojoanana bana, inacaelanaalane rijijieeinte neeure. Chaen cojoaisi aina curuataain enuha rochin jaohacane rijijieeinte neeure.

<sup>13</sup> Enaachate baaso ichaa cucuana cuhane fichafichanaane rijijieein, chunijihun nihanatiin baaso ichacure cojelanaala. Chaentechu sona nalu rijijieein mituhin janoajeein cuujueein, jaiti cunajaun turuelanaala, nocoenaanaun nitajia arasijene rijijieein nitajia cuurureein nocoenaanaun acaauru netonai.

<sup>14-15</sup> Chaen techu nitohaneeururichaain nii cachaaurune que aitoroatiha Cana Coaunerane jaun, Adaan que jauriichuru baiha, acaauru caaunsini inein nena- Enoco netonai jetao: “Satiin nere tonoraeraauru cachaauru janijiin raain, jataain necha aansainein ichaonacaauru, naansaine aina cuhaain nocojena charanein, osaacuruhane jaun naansaine caaun que baasoneein erenacaauru casetecain

itajenajaane coina, araai oaraancanei rai nere tonoraer-aauru anjeraauru uhaain uha Cana Coaunera Calaohi Jesocurisitone janane coaraaun,” naain belu beratiha Cana Coaunerane jaun.

<sup>16</sup> Chaen techu acaauru cha coitucueraniha nocoetiin, satiin que nererojoecaain, satiin que maihajein ereein, niicha jereeicha que coaucure. Nechu jataain cache que niicha jerei ichacuruhane coinaachate, cache rai raotojoein ereeure.

*Cana Coaunera coitucuurera rohecaeraauru*

<sup>17-18</sup> Canejeraauru, inara rai: “Cana janonaa satonoelalaje raite nereein, nechu jataain baasoneein suujua letonohacha ichajein ichaonacaauru cacheaauru,” naain inara rai beeuruhalu Cana Curuaanaa Jesocurisito rai afosotoorune coaucuche.

<sup>19</sup> Acaaurute ita caje neleruhin niha cachane jereein, nechu jataain suujua letono rijijiein ichaohin ichacuruhane jaun, Cana Coaunera Suujua sirichurenihane jaun aihure.

<sup>20</sup> Nete inara, coujurihu Cana Coaunera esenetaeranein, rai cachanein Cana Coaunera Suujue que suujuequiin, Cana Coaunera bajaebajajein neeiche inarane caohachaera ca-coelaichanein nenacaauru canejeraauru.

<sup>21</sup> Cairichaojoaain inara raain, inara belaaain nihalune rijijiein ichaohin, chariji bana satonoelanaala nenea tiha Cana rai Cana Coaunera Calaohi Jesocurisitone cohajein neeunche.

<sup>22</sup> Atiin cairichaojoaain nii esenetana jeriheeichuru coaraain neeuche.

<sup>23</sup> Nabana nitajeeuruha usi tabai jana nii esenetaichurune coataa, cairichaojoaain acaauru coaraain, tabaauru ichoteratecuche usi tabai caje, acaauru que nocohalajiin, jataain baasonein ichaohin nichao aasajein neeuruhane jaun.

*Raotojoein rachoojoein neeuche*

<sup>24-25</sup> Acaihanijin cana ichoterateranein nenea Cana Coauneraachate, inara beraicheein chatohanein baaso ichaain neeinchene coataa. Nii chaeloon baasoneerilanaala, aca Cana Coaunera nihane acatiha rachoojoein turuhin neeinchene coina. Jauriaa caje coaunein nii chariji bana satonoelanaala, aca itolere que laraajiin cocoinanacainein niha Cana Coaunerane coitucuratein neine Cana Curuaanaa Jesocurisito. Nitohanemiin.

## **Jesocurisitohacha Coaratei Afocarifisi**

*“Naaonjoanrichaain,” naain coaratiha Jesocurisitone*

<sup>1</sup> Caate, inae nichuuntaa nitohanerichaaainene jaun rai cachaneein nenacaauru que coaratiha rai Calaohi Jesocurisito aina cuaain Cana Coaunerane jaa ne. Nii jaunte rai nere beraneein nena Joaan nichaaunne rene, rai nere bera anjera letoae Jesocurisito, canu que niicha coaratei coaratiha nii anjerane coina.

<sup>2</sup> Nii jaunna, canu que coaratiha Jesocurisito aina cuaain Cana Coaunerane rijijieein, esinae rauhijiriin nii coaraaneein coaracaunne rijijieein laenaun.

<sup>3</sup> Nerausiaecururichaaain caa Cana Coaunera beratenojoin reretaera aina aonaain caa laenanohineein nihane rijijieein tonoraain nenacaauru, inae ichuunejeeoriha nitohanerichaaainene jaun.

*Caaunsi laurineein Jesocurisito ranojoneein nenacaauru iclesiacuru rai laenaa Joanne*

<sup>4</sup> Asia batane que caainsii laurineein Jesocurisito ranojoneein nenacaauru iclesiacuru raine canu Joanneein caa laenaun. Raotojoein neeichene jaanu teein neeuruhine- nii nunuhe caje coauneein neein- ena acaneein neein turuha uhenei neein nena Cana Coaunera, rai nelaurianajaantrono acatiha caainsiineein suujueneein nenacaauru aina,

<sup>5</sup> chaen esinae rauhijiriin, aca jerihane rijijieein neein nere beraneein nena Jesocurisitone maajeein. Acate jauriaanejeein ohane caje ichanaelu. Nii jaunte, satiin chauratane sacuritaain nenacaauru curuaanaacuru curuaanaaneein ne Jesocurisito. Nii Curisitote jataain cana belaitohane jaun, rai coichana aina cuaain osa caje cana rocoelu.

<sup>6</sup> Nitohaneein cana teeinte, jelai teein rai cachaneein aihuruhalu saseredotecurune rijijieein- rai Inaca Cana Coaunera rai caohacha icharaneein- niicha jerenohin ichacaachene coina cana teein nelu. Aihana jaun Cana Coaunera necaohacha aina, itolere niicha ichana nainei itolere bana Jesocurisito rainein neeine. Nitohanemiin.

<sup>7</sup> Inae nacoaauneein dede sacari jana uhin fauha uha Curisitone janate,

satiin coanojoinereein.

Nii sohin jaaoreraluniha natiinte coaraa cuurureein.

Nii jana caa chauratane que laurihu laurihu ichaonacaauru  
 cachaaurute,  
 chanaa cuurureein coreniha.  
 Aiha nitohanerichaaain.

<sup>8</sup> “Canune nunuhe caje coaauneein itolere coauneraneein satono que tiaain acaneein neeun,” naa Cana Curuaanaa Cana Coaunera- itolere curuaanaaneein turu rai nena.

*Jataain caohacha que necaohachaain necoaaratiha Jesocurisitone*

<sup>9</sup> Canune satiin inara nejera Joanneeun. Jesocurisito corenihate, canu nejeraneein neeiche. Nii rijijieein techu, jiniiquiin coujunojoneein necairichanaa abaantaacache, laraajiin cana coroatajaniha Cana Coaunerane jaun. Nitohanihane jaunne, Cana Coauneraacha jerei Jesocurisito-hacha coitucueratei beebjihanune coreniha caseteconeein Patmo cobeneu neeun.

<sup>10</sup> Ecute tomiho cojoanonaa bana, caniha neeoritoha Cana Coaunera Suujuene jana, canu janori nichaae toniin:

<sup>11</sup> “Leinjiin quiricha cuhane iicha coarai laenaain, caainsii laurineein Asia batane que nenacaauru- Efeso, Esmirna, Pergamoo, Tiatira, Sardisi, Filadelfia, Laodisea, naaonjoainun Jesocurisito cachaneein nenacaauru rene letoaaau,” naain mijiaaanein toniha carai jaiha rijijieein nena- toroonfeta rijitiin erenaane jana aonaan.

<sup>12</sup> Nii carai erena coaracaanne coina nauriterichaaunne janate, tirichotiin jiquihaquiin ne ecu caainsineein cono nujua- oro caje ichanohin.

<sup>13</sup> Nii caainsiineein cono nujua- oro caje ichanohin cataanne cacha tocohaneein- tijia que uujoai cajonequiin, somajain cajione que cajionequiin- nalarijia que ujoaain oro caje ichanohin sintoroon que ichoraane coaraan.

<sup>14</sup> Nii jana rai couturi ujuite dede sacari tocohaneein somajae. Jana, rai notate tirichotiin usi lanaro tocohane.

<sup>15</sup> Nii jana rai tijiaaurute, orono cuhane tucuhacaain ichanohin bronce tocohaneein jiquihaque. Nii jana rai nerete, jataain mijiaaanein caraturi toni rijitiin tonihane jana,

<sup>16</sup> rai raotono nichajai que caainsiineein arasijie siri biji cuhane. Nii jana rai nujuae cajete mitue jerane jataain ajinaain sabere. Nii jana rai merite, jataain conotiin conoha enotone tocohaneein jiquihaque.

<sup>17-18</sup> Nii jaanne coaariin tijia asae comoon onaa rijijieein. Nete biji raotono nichajai que canu mucuhin: “Jiaonriha casine. Canune ichaohin itolere coaanaain satono que tiaain Coauneraneun. Canune niqui oonlu, nene ichanaan. Inae

charijibana orinaaunni. Canune cana asaae nitajenacaauru rai chabi sirihun.

<sup>19</sup> Caa ena nena a iicha coarai laenaain, caa baiha neeninu iicha coarai laenaan.

<sup>20</sup> Caa canu biji raotono nichajai que caainsiinei arasijie, chaen caainsiinei cono nujuaneen nena oro, naaonjoainuri iicha coaraite, charijibana coitucueraelanaala asinojoneen nena ne. Nii caainsiinei arasijiete Cana Coaunera ranojoneen nenacaauru- iclesiacuru beraihurera anjeraauru ne. Jana nii caainsiinei cono nujua oro caje ichanohinte, caainsii laurineen Cana Coaunera ranojoneen nenacaauru- iclesi-acuru ne.”

## 2

*Caainsii laurinei iclesiacuru rai beratenojoin. Caate nii caainsii beratenojoi caje Efesoo Cana Coaunera ranojoneen nenacaauru iclesia beraicha- anjera rai beratenojoin*

<sup>1</sup> “Caritiin Efesoo Cana Coaunera ranojoinuri- iclesia beraichaneen nena- anjera rai laenaau.

‘Aonacuche, caritiinte inara rai laenarate nii biji raotono nichajai que caainsiinei arasijie siichaain- cainsiinei oro caje ichanohi usi nujua cataaun amunaa:

<sup>2</sup> Canuna, itolere iicha ichai coitucuhin, caaintatohane niha natiin jianelanaala neeine coitucuun. Chaen nech, nii necha ansaineen ichaonacaauru abaantasineeine coitucuun. Chaen techu, afosotooru niha nocoetonacaauru niha natiin coujuhin coaraaine jana aca necurene. Nitohaneente casajenetooruhane coitucuhi.

<sup>3</sup> Itolere banate coiinteen jianelanaala jataain canu coreniha necairichanaa abaantaai.

<sup>4</sup> Nete jauriaanejeen aailune tocohaneen corajeen quicha jerei icharaneen neneei.

<sup>5</sup> Aihane jaun, jauriaa aichejetohilune que coacuhin, nii nunuheneen corajeen icharejetohilune rijijieen nacoauneein corajeen quicha jerei icharaneen neen, jeriha Cana Coaunerane rijijieen. Ainihanena, nii nihane jaa jelai caje, nii cono nujuaneen nena rultureeuni ii caje, nacoauneein Cana Coauneraacha jerei icharaneen ichoaneene.

<sup>6</sup> Nete caohacha ichaai, nii Nicolasa sacuureraauru ichanohichuru rautaaain coaraeneene jaun. Canuheton- aichu acaauru ichanohichuru rautaaain coarahaan.

<sup>7</sup> Aohana jereraauru, caa ereretaain Cana Coaunera ranojoinuru- iclesiacuru rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacuerate, nii chariji bana

sanaachara ichaonaa tera enuha inaa Cana Coaunera nenajaun nena que lenonereein,' naain laenaau Efeso beraicha- anjera rai,"

nae nii canu notaara.

*Esmirnau Cana Coaunera ranojoineein nenacaauru iclesia beraicha- anjera rai beratenojoi*

<sup>8</sup> "Caritiin Esmirnau Cana Coaunera ranojoinuri- iclesia beraichaneein nena- anjera rai laenaau:

'Aonacuche, caritiinte inara rai laenaerate nii nunuhe caje coauneein satono que tiaain acaneein nena- ohalune caje ichanaain nena:

<sup>9</sup> Canune jataain necairichanaa abaantaain, cairichainejeein neeichene coaraaun. Nete chaque lanaeneriquicheein dedeeu. Chaen nechu jataain baasoneein ichei ereeuruha Joriooniha nocoetonacaaurune coitucuun. Acaaurute esinae rauhijiriin moconajaera letono laurineein neeure.

<sup>10</sup> Jiaonriha necairichanaa coariquiine que casiin neeine. Moconajaerate caresero cuhane inara tabaauru enoeratereein, nii aina cuaain satiin inara coujunojoineein coanojoinequichene coina. Jataainte necairichariquicheein lechoonca janohin. Nete ohichene que tiaaajoaain nirijieein janelanaala abaantaain sacuhichene, canu nii cainaraanuque chariji bana nitajenaacharanejeein nena ichaonaa tereenni inara rai.

<sup>11</sup> Aohana jereraauru caa Cana Coaunera ranojoinunru- iclesiacuru rai Cana Coaunera Suujue beratenojoin aonacurumiin. Laraajiin itolere necairichanaa amuritiin nenacaauru- coatiha ooru baiha nacoaauneein ohin nitajerinaain acaauru suujue,' naain laenaau Esmirnau Cana Coaunera ranojoinuri iclesia beraichaneein nena anjera rai,"

nae nii canu nae nii canu notaara.

*Pergamoo Cana Coaunera ranojoineein nenacaauru iclesia beraicha- anjera rai beratenojoi*

<sup>12</sup> "Caritiin Pergamoo Cana Coaunera ranojoineein nenacaauru iclesia beraicha- anjera rai laenaau:

'Caate aitiin laenaerate nii nujuaae cuhane jerane jataain ajinaain sabere siricha:

<sup>13</sup> Raotjoeeine moconajaera rori rohan ichaohichene coitucuun. Nete atiin caitoonjoa esenetaain canuhacha icharatei ichaquichene janelanaala neeiche. Niheichu nii canu ere bera Antipas sohin jaaoruhalu, nii moconajaera neseu natiin, canu esenetaain neeichene jianein niheeiche.



14 Nete neeje ichei baaso, iniha nenacaauru que ichei aitocooaunne jaanu coitucuhine coina. Nii iniha nenacaauru tabaaaurute, Isaraeli inoaensihuru relaain nihalu Balaamne jaacha tonoraain jianena jerecurene. Nii Balaamte baaso que Balac suujuatihane jaun, ecaantooru que banijiaain nenea lenone que Isaraelitaauru coroaatein, itolere osa que sarueratenajaaine maajeein naaonjoaenlu.

15 Chaen techu, tabaauru iniha nenacaauru acaauru relaain nihalu Nicolasa sacuurerane jaan jianena jerecurene.

16 Aihana jaun, chajaain ena esinae Cana Coaunera esenetaeranein jeriha Cana Coaunerane rijijieein quiicha jerei icharanein neeuche. Ainihanena ena inara rene uhin, nii canu ujuae cuhane jerane ajinaai nenea- sabere que acaauru soreeunni.

17 Aohana jereraauru Cana Coaunera raonjoinuru iclesia rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacurerane raine chariji bana coaraaelanaala asinojoneein nenea manaa que acaauru coroaatereunni. Chaen nechu, nii chariji bana coitucueraelanaala nenea- cacha curuaa siriin laenanohinein leinjiin ajeri somajain nenea tereuni acaauru rai. Nete laen nii ajeri raera, nii curuaa erora coitucureein, 'naain laenaau Pergamoo Cana Coaunera ranojoinuri iclesia beraichanein nenea anjera rai,"

nae nii canu notaara.

*Tiatirau Cana Coaunera ranojoinuri beraicha- anjera rai beratenojoin*

18 "Jerichanejeeichu, Tiatirau janijiin Cana Coaunera ranojonein nenacaauru iclesia beraicha- anjera rai laenaau:

'Caritiinte aitiin laenaerate nii usi lanaro tocohanei notaain- coata lanajai jicharoanohi tocohanei tijaain nenea- Cana Coaunera Calaohi:

19 Canune jitariin iicha ichai coitucuun, jataain cachaauru belaaain, iicha esenetai esenetaain, itolere necairichanaa abaantaain itolere ichaaine coitucuhanu. Chaen nechu, jataain jauriaalu amuritoheriin ena caohachaaain ichaaine coitucuun.

20 Nete neejen ichei aitocooaunne jaanu, Canu cachaanein nenacaauru coritaa, nechu Cana Coaunera coitucueraniha nocoetiin, ecaantooru que banijiaain nenea lenone que acaauru coroaatein, chabana nitohanai osa que nesaruna naineniha cachane saijieein itolere osa que acaauru rohecaa nii ene Jesabeline abaantaaine jaun.

<sup>21</sup> Canune niqúi Cana Coaunera coitucueraneein nihane cojoaaun. Nete ainaa jerelanaala, niheichu osa tabai que nesaruhane jianena jerene.

<sup>22-23</sup> Nii jauna, nii ene cunaitaain bereecurune maa-jeein ateinareeunni. Chaen nechu, nii ene aina ichaojeraquiin neeuruhane jianelanaala nenacaauru ateinaain, jataain necairichanaa tabai que cairichanajareeunni. Nitohaneein ichacaaunne banate, suujua cuhane cachaauruhacha coacuhi coitucuhanune que nainaa cuurureein satiin Cana Coaunera ranojoneein nenacaauru iclesiacuru. Jana inara raine, le cacha cachanequichene rai, inaraacha ichanohin rijijieein inara rai tereeunni.

<sup>24</sup> Nete laen inara Tiatirau neinequichene, nii relana-jaain neeuruhane jaan moconajaera suujua asinojoneein nena coitucuhin tonoraain neneeichene, nihei nii que tonaain inara rai irihanune jaanu.

<sup>25</sup> Aihana jaun, turuhanune reentiaain jerichanejeein sacuuche jianelanaala.

<sup>26</sup> Itolere necairichanaa abaantaain satono reentiaain canuhacha jerei ichajejin sacuureraaurune cocoinareeunni, lauri lauri nenacaauru cachaauru curuaanaaneein neeuruhane coina.

<sup>27-28</sup> Charijieein teeinti canu cocoinaain nelu Ofa Cana Coaunera, nii rijijieeine inara cocoinareeunni, lauri lauri nenacaauru cachaauru curuaanaaneein neeichene coina. Nii banate coata caje nena otiha que erena tonoraelanaala lauri lauri nenacaauru tuteneriquicheein, darohe tutenecuruhane rijijieein. Chaen nechu nii choae tacaain janonaarai mitunaa arasijie tereeuni acaauru rai.

<sup>29</sup> Aohana jereraauru, caa Cana Coaunera ranojoinuri iclesiacuru rai, Cana Coaunera Suujue beratenojoin aonacurumiin, ”

naain laenarate nii canu notaara.

### 3

*Sardisihu Cana Coaunera ranojoneein nenacaauru iclesia beraicha- anjera rai beratenojoi*

<sup>1</sup> “Caritiin Sardisihu Cana Coaunera ranojoinunru beraicha anjera rai laenaau, naain laenaerate nii caainsiinei Cana Coaunera suujue aina caainsiinei arasijie siricha:

‘Canune jitariin iicha ichai coitucuun. Ichao hate niqúi ii beeure. Nete inae ohi.

<sup>2</sup> Aihana jaun, itolere que caohachaaain nainaanii cautenacaauru lararajiaau. Inae ohin nitajeeuruhane raite

neeure. Chaen nechu esinae rauhijiriin Cana Coaunera notaracaae, caohachaain iicha ichai ichaain neneeine coitucuun.

<sup>3</sup> Nii jeriha Cana Coaunerane rijijieein, caohachaain ichaohin neeine coina nerelaailune coacuhin- nacoaauneein caohachaain ichaao. Canu jerichaaune rijijieein, itolere que nainaain caohachaain ichaeneeine ne, coitucueniha cachane jana turuhin basijiauha asijiautone rijijieein cha coatejeneeine jana turuhin ii casetecareeunni.

<sup>4</sup> Nete nii Sardisihu neeure corotajajeein chabana cajione calanoajelanaala nenacaauru. Acaaurute cajione somajai jiaain cajiniichaain amuhemuhecurureein, nitohanein neeuruhane coina nelatecuruhane jaun.

<sup>5</sup> Itolere necairichanaa abaantaain, canu jerichaaunne rijijieein nenacaaurute, nitohanein cajione somajai que necoreeteurureein. Nii choae tacaainchu, canu quiricha caje acaauru curuaa elonarinaaunni. Chaen nechu, canu Inaca, rai anjeraauru, naaonjoainuri acatiha teein acaauru coitucureeuni.

<sup>6</sup> Aohana jereraauru, Cana Coaunera ranojoinuri iclesia rai Cana Coaunera Suujue beratenojoin aonacurumiin,' ”

naain laenarate nii canu notaara.

*Filadelfiau Cana Coaunera ranojoinnein nenacaauru iclesia beraicha- anjera rai beratenojoin*

<sup>7</sup> “Caritiin Filadelfiau Cana Coaunera ranojoinnein nenacaauru iclesia- beraicha rai laenaaun:

‘Caate aitiin laenaerate nii Rabiri rai chabi siricha- Cana Coaunera esineneein nena. Acate acuujua joracaane, nii chuni funaa nainene. Jana acuujua fuhane, nihei chuni joaracaera.

<sup>8</sup> Canune jitariin iicha ichai coitucuun. Aonaaun, ii raine joaracanojoinnein canu acuujua siricheeunni, neri-naain chuni funaa nainera. Jataain laraajiin neeineque air-ijiinte, quere tonoraain quiicha jerei icharanein neei.

<sup>9</sup> Canune ichareeunni nii nechu moconajaera rai cacha raeranein nenacaauru- nii Joriooneeuruhane que airijiin Joriooniha nocoetonacaauru- casajeeuru itiha asae neseon-riaauruhane coina. Nii banate, jataain ii belaitohanune coitucuha cuurureein.

<sup>10</sup> Esinaete rauhijiriin, itolere bana caitoonjoan tonoraain canu jerichaaunne rijijieein neei. Nii jaaunne, inae cojunojoincuruhane coina, satiin colurejenojoincururichaain caa chauratane que nenacaaurune bana, ii beraicheeunni chatohanein teraaine coataa.

<sup>11</sup> Enane nacoaauneein turureeunni. Aihane jaun, caa ena neeine rijijieein jerichanejeein sacuu, nabana chuni ii que banijiaain nenea ruluhin raane coataa.

<sup>12</sup> Itolere necairichanaa abaantaain sacuureraaurune, Cana Coanera loreri banesijianein tihanune, nii chariji bana satonoelanaala caje mituelanaala ecu neeurureein. Chaen nechu, acaauru jaberoco que teein Cana Coanera curuaa laenaain, dede caje ena nenea Cana Coanera nenajan Jerosaleen curuaane maajeein laenareeunni, acaauru jaberoco que teein. Chaen nechu acaauru jaberoco que teein ena nenea canu curuaa laenareeunni.

<sup>13</sup> Aohana jereraauru, Cana Coanera ranojoinuri iclesia beraicha- anjera rai Cana Coanera Suujue beratenojoin aonacurumiin,' ”

naain laenarate nii canu notaara.

*Laodiseau Cana Coanera ranojineein nenacaauru iclesia beraicha- anjera rai beratenojoi*

<sup>14</sup> “Caritiin Laodiseau Cana Coanera ranojineein nenacaauru beraicha- anjera rai laenaan.

‘Caate aitiin laenarate nii Cana Coaneraaacha ichai coaraneein, nohanelanaala beraneein itolere Cana Coaneraaacha coaunai Coanera Esine neein Nenea:

<sup>15</sup> Canune jitariin iicha ichai coitucuun. Bajianachuhinti canu jerichaaunne rijijieein, corajeein quiicha jerei ichaeneei. Jana ainhane corajeein moconajaeraacha jerei ichaeneei.

<sup>16</sup> Nete quiicha jerei corajeein ichaelanaala, niheichu moconajaeraacha jerei corajeein ichaeneeine jaun, nii chaneein neneei. Nitohaneein ajajainein niheichu, jelajerilanaala, naajoaain neeine jaun, chaneein neneeine jaunne ii naraaareeunni canu ujuaae caje.

<sup>17</sup> Iite niqui Inae jataain raotojoein nihanu cha latejelanaala, inae caohacha ichacaaune jaun, naain ereei. Nete jataain cairichaaajoaai, cairichanojineein aiha leinjiin cairichai cha colane nenea rijijieein neein- maosa rijijieein neeine jaun.

<sup>18</sup> Nii jaunne ichei aitoon, canu caje mocohin tucua- canohin oro coreteeine coina. Nii banate esinae rauhijiriin canu jerichaaunne rijijieein neein, aiha leinjiin cairichanejeein cha colane nenea rijijieein neeine caje, cha caohacha ichaain, caohachaaain chaachaaain neeine coaraain neriquiin.

<sup>19</sup> Canune satiin canuhacha belai canu cachaauru baaso ichaain neeuruhane coaracaaunne, acaauru cotaain acaauru suujuateein cairichanajaan. Aihane jaun, nii

baaso ichajeein neeine jianelanaala baasoneein jerichanejeein sacuhinene ii cairichareeunni. Aihane jaun, chajaain ena caje coauneein nunuhetein jeriha Cana Coaunerane rijijieein ichaao.

<sup>20</sup> Aonaun, canune itolere bana acuujuua beraicha rijijieein acuujuaniha neein inara cotijiaaun. Chateeinti bajaee bajaecaunne aonaain canu raain ne rai suujua cuhane, nii ainane jiniiquiin lenonerichaanuhin.

<sup>21</sup> Chateeinti itolere necairichanaa abaantaain jerichanejeein jianelanaala sacue, nii raine canu rohan nelauriaane jaanu rori tereeunni. Charijieein teeinti, itolere necairichanaa abaantaanune jaun, canu Inaca Ofa nelaurianajan rori ichoae jiniichaain nelauriaaun, nii rijijieein.

<sup>22</sup> Aohana jereraauru Cana Coaunera ranojoinuri iclesia beraicha- anjera rai Cana Coaunera Suujue beratenojoin aonacurumiin,'”

naainte laenarate, nii Cana Coauneraacha ichai coaarenein nohanelanaala beraneein- itolere Cana Coauneraacha coaunai coaunera esine neein nena.

## 4

### *Dedeeu Cana Coaunera coroaecuruhan*

<sup>1</sup> Niritoha caraine baiha dede coaracaaun jabatoroainne janate, joaracaeratihaneein ne cana dede bacuujuua. Nii janane, jauriaanejeein leinjiin jaiha rijijieein nena- toroonfeta rijitiin tonihane jana aonacaunne janate:

“Chajaau cajiha iniha uune, caa baiha nitohaneein airichaaaine coarate ii quete coaraaicha,” naain carai toni eheona.

<sup>2</sup> Nii rijieeoritiin, caniha neeoritoha Cana Coaunera Suujuene janane, dedeeu jataain caohatiin nelauriananaja rori-*trono* coaracaunne janate, ecu nii nelauriananaja rori-*trono* ichoae laujuue leinjiin.

<sup>3</sup> Nii nelauriananaja rori ichoae nenaate, ajeri jataain caohati colohin nena- jaspé tocohanenihane cornalino tocohaneein jataain caohatiin colohe rai jaberoco. Nii nelauriananaja rori tinonoritiinte, tinohanre leinjiin iino, jataain conotiin beraurosihojoain colona esmeralda tocohaneein.

<sup>4</sup> Chaen nechu nii nelauriananaja rori-*trono* tinonoritiin niha jataain caohatiin coroaata choonca jenaain rori caohachaurune jana coaracaune janate, ecu nichoae neeure coroaata choonca jenaain ichauhenaauru, somajaain cajione que cajionecohin, oro caje ichanohin comai siriin.

<sup>5</sup> Nii rori- *trono* cajete, jataain mijiaaaineein mitue jiacano, erenaa, arara, naaonjoainuri. Nii janate, nii rori acatiha lanalanaque caainsineein siricho. Nii caainsine lanalanaqui sirichote, nii caainsine Cana Coaunera suujueneein ai.

<sup>6</sup> Chaen techu, nii rori- *trono* acatiha cucuana baca tocohaneein, jataain ajiarojoeritiin asaaun tiaain jiquihaquiin inanacae. Nii nelauriananaja rorihuru cataaun nenea rori tinonoritiinte ne, jenaain cacha tocorijianeein, janori, nacatichai, naaonjoain jeloon notaacoaain.

<sup>7</sup> Nii leinjiinte aain tabai- leon tocohane. Leeochate jana, baca curuaanaa toro tocohane. Jana nii acaauru nichatajate leinjiin cacha tocohane. Jana acaauru nejenate, uujuirii tabai- aquila tocohane.

<sup>8</sup> Nii jenai jelai rai nichao que ichaohi nenacaaurute, nenainetiin saotaneein itarohin, jianacoon, asaaun, naaonjoaain acaauru jaberoco nainecojoaain nota sirichure. Janotiin, jiichoo, naaonjoaainte:

“Cana Curuaanaa Cana Coaunera esine,  
itolere que laraajiin  
itolere ichana naineraneein nenea,  
iite iineein neeilu,  
enanetojoein acaneein neei-  
iineein turuha uriquiin,”

naaure jiichoo, janotiin, naaonjoaain jianelanaala.

<sup>9-10</sup> Nii cacha tocohaneein nenacaaurute, acaneein necaohachaaain niha- nii rori caohacha ichoae- nii chariji bana ohelanaala nenaane coroaecure. Nii nainihate coroaata choonca jenai ichauhenaauru, nii ecu nenacaauru nacatiha neseonriaain coroajeein, nii rori acatiha acaauru rai comai siheitiin:

<sup>11</sup> “Iite esinae rauhijiriin,  
canacaanu Curuaanaaneein canacaanu Coauneraneein-  
ii necaohacha que iineein neei, laraajiin.  
Iite itolere coaunaain neeilune jaun,  
ii jereeine rijijieein necoaunaain nihacoaelu,”

naaure coroaecuruhane naineein.

## 5

*Quiricha laenanohineein nenea aina carenero narejeen*

<sup>1</sup> Nii janate nii rori caohacha choaae lauheconaa coara- caaunne jana biji raotono nichajai que leinjiin Quiricha sichaain lauheque. Nii quirichate retutonohineein, jeranu

laenanohineein ne, caainsinei fuera que caohatiin funojoinnein.

<sup>2</sup> Nii jana coaracaanne janate ecu ne leinjiin anjera jataain itolere ichana nainihane que nelateein. Nii anjerate jataain tonijiaain: “Chana jataain nelate que nelateein, caa quiricha fuera beuhin joracanaa naaine,” naain bajae.

<sup>3</sup> Nete dedeeu, chauratane tinonocoritiin, chauratane asaae, naojoaain niha natiin nene chunei nii quiricha joara-caain coaana nainera.

<sup>4</sup> Nitohaneein neniha chunei nii coina nelateein nii quiricha joracaain coaraain ereretanaa nainera cachana jaanne jataain chanaaun.

<sup>5</sup> Nii janate: “Coa jataain chanaa. Niha leinjiin nii coina nenea- nainera. Acate Joda lauri caje nenea Leon- cana curuanaa inoaensi Rabiri nefoerate ne. Niite nitohanei ichana nainihane coina itolere amuritiin nihane jaun, nii cainsineein nenea rai fuera soaain joaracareein,” nae canu rai leinjiin acaauru bichauhena.

<sup>6</sup> Nii janate, nii nelauriananaja rori caohacha- *trono* aina nii jenaain rai nichao que ichaohin nenacaauru, nii coroata choonca jenai ichauhenaauru, naaonjoaainunri cataaun niha Carenero Narejeen ne jana coaraaun. Nii Carenero Narejeen coaracaanne janate ecu chujuheque, cairichaaain atinanojoinihalune saijieein, Cana Coaunera Calaohi Jesusoneein. Nii Carenero Narejeente, caainsiniha rai jichone jana caainsine rai nota. Niichurute Cana Coaunera suujue- neein satiin chauratane que letononeein neeure.

<sup>7</sup> Nii Carenero Narejeente cutiin, nii rori caohacha choaae raotono nichajai que quiricha siichaain lauheconaa caje quiricha raaori.

<sup>8</sup> Nitohaneein nii quiricha raaoriha nii Carenero Narejeenne rijieeoritiinte, neseeonriaaure nii Carenero Narejeen acatiha, nii jenaain ichaohin nenacaauru aina, nii coroata choonca jenaain nenacaauru ichauhenaauru. Satiin acaaurute, nenainetiin quitara rijijieein nenea- arapa sirichure. Chaen techu, nenainetiin oro caje nenea acau cooruhane jaan- curu nainecojoaain enuha sacari jujuuain nenea sirichure- nii coroata choonca jenai ichauhenaauru. Nii enuha sacari juujuite Cana Coaunera bajaauruha Cana Coaunera cachaneein nenacaaurune jaan neein ne.

<sup>9</sup> Nitohaneein neeinte ena nenea nenatena que nenateein:

“Iite nii quiricha fuera soaain joracanaa naineei.  
 Ii sohin jaaoruhane janate,  
 ii coichana que acaauru coreteei,  
 acaauru ranaa nainiha Cana Coaunerane coina.  
 Nitohaneente,

satiin caa chauratane tinonocoritiin lauri lauri neein nena  
 nacaauru cachaauru,  
 lauri lauri nere que ereein,  
 naaonjoainunri caje raain,  
 cachaauru coreteei  
 acaauru ranaa nainiha Cana Coaunerane coina.  
 Nitohaneein ichaaina jaunte,  
 quiricha fuera soaain joracanaa naineei.  
<sup>10</sup> Nitohaneeinte acaauru cocoaiaai,  
 saseredote neein, curuaanaa neein,  
 naaonjoaineein neuruhane coina.  
 Nii jaunte, satiin chauratane sacutaain curuaanaa neein  
 neure,”

naain nenatecure nii coroata choonca jenai ichauhenaauru.

<sup>11</sup> Nii baiha coaracaanne janate, ecu ereerecure arajiin  
 nii rori- *trono* caohacha rohan nenaauru anjeraauru. Nii  
 baiha nii jenai ichaohin nenaauru, nii coroatachoonca  
 jenai ichauhenaauru naaonjoainuri. Nii janate ecu neeure  
 jataain arajiin oaraanca milloonneein amurijiriin.

<sup>12</sup> Acaaurute jataain tonijiaain:

“Jataainte nelate  
 nii sohin jaonojoneein nenaalu Carenero Narejeen.  
 Nii jaunte,  
 itolere ichana nainihane jaanu,  
 itolere nerausiajeein nihane jaanu,  
 itolere coitucuhin nihanu jaanu,  
 itolere que laraajiin nihanu jaanu,  
 coasitanojoinihane jaanu,  
 necaohacha que necaohachaane jaanu,  
 coroaenojoneein nihane jaanu,  
 naaonjoaain raeraneein ne,”

naaure nii araai oaraanca milloonneein nenaauru anjer-  
 aauru.

<sup>13</sup> Nii rijieeoritiinne, ereerecuruha satiin Cana Coauner-  
 aacha counanohine jana aonaaun. Satiin dede que teein  
 niicha coaunai, atane que teein niicha coaunai, nii baiha  
 satiin cana temurau cucuana cuhane nenaauru, atane  
 cuhane nenaauru, naaonjoainunri Cana Coauneraacha  
 coaunai ere aonaaun.

“Nii rori choae lauheconaa,  
 chaen nii Carenero Narejeen, naaonjoaaihunrite,  
 coroaenojoneein aca neein  
 necaohacha que necaohachaain nelate que  
 nelateein neuruhane jaanu teure,”



naain ereereecure.

<sup>14</sup> Nii janate, “Nitohaneein neeine,” naaure nii jenai ichaohin nenacaauru.

Nii jana, nii coroata choonca jenai ichauhenaaurute, nii Carenero Narejeen acatiha neseonriaain corooaecure.

## 6

### *Caainsine fuera*

<sup>1</sup> Jaurihanejeein, leinjiin fuera joracaa nii Carenero Narejeenne jana coarajihanune janate, nii jenaain ichaohin nenacaauru caje leinjiin ere arara rijitojoaaintiin tonijiaain toniin: “Chajaau cajiha,” naane jana,

<sup>2</sup> coaracaaunne janate ecu leinjiin cabario somajain choaae lajuuae leinjiin cacha tenuna sijaain. Nitohaneein comai teuruha nii cacha raine baihate, amue nii que nejeratenacaauru amuritiin, itolere bana acaauru amuritoeraneein nihane coina.

<sup>3</sup> Nii janate, nii fuera que jaurii joracaa nii Carenero Narejeenne jana, nii ichaohin nenacaauru coroataja: “Chajaau,” naane jana aonaain coaracaaunne jana,

<sup>4</sup> ecu mitue leecha cabario lanajaain. Nii janate nii cabario choaae nelaurianaa rai nelatei teure, ita sohin ita jaaoruha caa chauratane sacutaain nenacaauru ne coina. Nitohaneeinte leinjiin Sabere seeonjoa teure nii cabario choaae nelaurianaa cacha rai.

<sup>5</sup> Nii baiha, nii fuera nichataja joracaa Carenero Narejeenne jana coarajihanune janate, nii ichaohin nenacaauru caje acaauru nichataja:

“Chajaau” naane jana coaracaaunne janate, ecu mitue cabario jichojoaain. Nii janate, nii cabario jichojoai choaae lauheconaa leinjiin balaansa siichae.

<sup>6</sup> Nii janate, nii jenai ichaohin nenacaauru caje ecu toniin:

“Le quilojoei aroso rijijieein nena tiricote corereein le janohin amihanenaa neein. Nii jana, nichata quilojoei aroso rijijieein nena sebadate corereein le janohin amihanenaa neein. Coa laen erene, bino, naaonjoaain aasaeca,” naain toni erenaa nii jenaain ichaohin nenacaauru cataaun toniin.

<sup>7</sup> Nii fuera nejena joracaa nii Carenero Narejeenne janate: “Chajaau,” nae nii jenai ichaohin nenacaauru caje leinjiin. Nii jana coaracaaunne janate,

<sup>8</sup> ecu ne cabario somaajiojoaain. Nii cabario choaae nelauriaain cunaa curuaate Onaane. Nii ichohachaniha unaa caaijie unaate onaa curuaanaa moconajaerane. Nii Onaa curuaanaa- moconajaera raite, chauratane neleru nejena que niicha ichana naini ichaane jaanu teure, ita sohin ita jaaoruha arajiin cachaaurune coina, tabai mijitena caaun

ooruha cachaaaurune coina, cunai caaun ooruha cachaaaurune coina, cachaauru sooruha atane que nenacaauru aain tocohaneein nenacaauru coitucuchuhichurune coina.

<sup>9</sup> Inae nii fuera nesaogui joracaa Carenero Narejeenne jana coaracaaunne janate, Cana Coaunera belaihuruhane jaan rori- *altar* asaae neeure Cana Coaunera beratenojoin beeuruhane coreniha atinanohichuru.

<sup>10</sup> Nitohaneein ecu neeinte jataain tonijiaain: “Itolere curuaanaacuru amuritoheriin Curuaanaa- osa colane nenea saanto- cha ichaaine coina aito hine icharaneein nenea, chatohanai bana caa chauratane que nenacaauru ichao colurujueein, canacaanu atinaeraauru cairichareei,” naaure nii ecu nenacaauru onacaauru.

<sup>11</sup> Niritocuruhane janate, acaauru rai cajione somajain teein: “Jauriaa nebetacaaorihuche coa carajaaeriin. Jaiti lanajeeca, inara sohin jaaoruha ne rijijieein, leeochoauru inara nejeraauru Jesocurisito beratenojoin beeurera sohin jaaoruhane ninaauruhane reentiaain cohacorihuche,” nae acaauru rai.

<sup>12</sup> Nii fuera nesaotane joracaa Carenero Narejeenne jana coaracaaunne janate, uhe jataain mijiaaieein carora tabai. Nii janate, jataain jicholeneein conoene enoto. Nii janate, atene netonai conoelanaala ichana tocohaneein ne.

<sup>13</sup> Nii janate, jataain mijiaainetiin uhin liaaca cujuanane jana naluha *iquera* inaa nujuarine amuneein nalue dede caje chauratane choaae arasijie.

<sup>14</sup> Nii janate, retutunohiniha faferone tocohaneein nereetuhitiin nitajiheite dede. Nii janate, nerurujuaacooain nelonae satiin situha cataaun nenacaauru obenecuru aina ichatane ucuunooru.

<sup>15</sup> Nii jaunte, chauratane que satiin curuaanaa neein nenacaauru atane jachuru cuhane, ichatane cataaun nenacaauru ajeri cuhaneuru nasichure, tabaaihuri aina jiniiquiin, chaen soondarooru curuaanaacuru, coriquihonacaauru, jataain itolere que laraajiin nenacaauru. Cairichanojoneein nenacaauru, chaen cha ujuaihonelanaala nenacaauru, naaonjoainuri nasichure atane jachu, ajeri jachu, naaonjoainunri cuhane.

<sup>16</sup> Nitohaneeine: “Canacaanu choaae nefaruhin canacaanu asihu, canacaanu coaraa taa rori caohacha- *trono* choaae lajuaine coataa, jataain necairichanaa cuhane canacaanu casetecaa Carenero Narejeenne coataa.

<sup>17</sup> Inae catohaneein caseteco coaraain necairichanaa cojoanonaa que turuhane jaun, nerinaain chunei abaantanaa nainera,” naaure.

## 7

*Israeli laurichuru cojunacatenohineein nenacaauru*

<sup>1</sup> Nii baiha coaracaaunne janate, enoto mitu jeloon, enoto soo jeloon, enoto soo coarajeein cana raotono jeloon, enoto soo coarajeein cana ajaabiji jeloon, naaonjoainuri jeloon chujurijiatocure jenaain anjeraauru. Ecu neeinte situha nii jenai laurii jeloon caje uhin cujuanane coataa acatecure. Nabana situhi chauratane, cucuana, nuna, naaonjoainuri ichoae situhin jiatuhane coataa.

<sup>2</sup> Chaen techu coaracaaune jana, enoto mitu asajai caje uhe leinjiin anjera. Acate Cana Coaunera ichaohin nenea cojunaca *seecho* siri. Nii anjerate tonijiaain eheque, nii jenaain nenacaauru anjeraauru, chauratane, cucuana cuhanai, naaonjoainuri aasaaena nainecuruhane jaanu raurera rai. Nitohaneein tonijiaain ehequiinte:

<sup>3</sup> “Jiaonriha jaiti Cana Coaunera cachaneein nenacaauru nauri que Cana Coaunera cojunaca siricha *seecho* tenihacachene jana, chauratane, cucuana, nunacuru, naajoainunri aasaaecache,” naain, eeheque nii leinjiin nii jenaai naraai aanjeraauru rai.

<sup>4</sup> Nii jana, aonacaaunne janate, le faasha jena choonca oaraancaain satiin Isaraelitaauru lauri caje nauri que Cana Coaunera cojunaca *seecho* sirichaauru curuaacuru janiichure.

<sup>5</sup> Nitohaneeinte,

Jodaa lauri caje lechoonca coroata oaraancaain nauri que Cana Coaunera cojunaca *seecho* que cojunacatenoine.

Jana Robeen lauri caje lechoonca coroata oaraancaain.

Jana Gada lauri caje lechoonca coroata oaraancaain.

<sup>6</sup> Jana Asere lauri caje lechoonca coroata oaraancaain.

Jana Nefatalii lauri caje lechoonca coroata oaraancaain.

Jana Manasee lauri caje lechoonca coroata oaraancaain.

<sup>7</sup> Jana Simeon lauri caje lechoonca coroata oaraancaain.

Jana Lebi lauri caje lechoonca coroata oaraancaain.

Jana Isacara lauri caje lechoonca coroata oaraancaain.

<sup>8</sup> Jana Saboloon lauri caje lechoonca coroata oaraancaain.

Jana Jose lauri caje lechoonca coroata oaraancaain.

Jana Beenjamiin lauri caje lechoonca coroata oaraancaain naaonjoaain Cana Coaunera cojunaca siricha *seecho* que acaauru auri que cojunacatenoinecuruhane janiichuruhane jana aonaun.

*Arajiin cachaauru somajai que cajionecooruhane*

<sup>9</sup> Nii baiha coaracaaunne janate, ecu araai lauriinchuru satiin chauratane sacutaain nenacaauru, araai lauriin nere que ereein nenacaauru, jelai natane que ichaohin nenacaauru, naaonjoainuri cachaauru ecu arajiin neeure. Acaaurute rori caohacha- *trono* aina Carenero Narejeen

acatiha ecu arajiin chujuhacoore janiinacaje lanaala. Nitohaneeinte cajione somanerei que cajionecohinte, elele tocorigiane siijiariin cuure.

<sup>10</sup> Nitohaneein cuhinte, tonijiaain ehequuin:

“Cana Coaunera- rai rori caohacha- *trono* ichoae nenea aina nii rai Carenero Narejeente, arajiin itolere, que nejeratenacaauru amuritoeraneein ne,”

naaure tonijiaain nii ecu satiin caa chauratane sacutaain nenacaauru araai laurii cachaaauru.

<sup>11</sup> Nii janate nii rori caohacha aina nii coroata choonca jenaichauhenaauru, nii jenai ichaohin nenacaauru, naaonjoainuri tionoritiin chujuhacoore satiin anjeraauru. Nitohaneeinte nii rori caohacha acatiha neseeonriaain, atane que nauri turuanacanejeein nenorocooain Cana Coaunera corooaacure nii anjeraauru.

<sup>12</sup> “Nitohaneein neeuruhine.

Jataain caohatoha Cana Coaunerane coitucuuruhine itolere bana.

Necaohacha que necaohachaa Cana Coaunerane coitucuuruhine itolere bana.

Jataain itolere coitucueraneein niha Cana Coaunerane coitucuuruhine itolere bana.

‘Narihara,’ naauruhine acaauru rausiaaeca Cana Coaunerane coreniha itolere bana.

Jataain nelatiha Cana Coaunerane coitucuuruhine itolere bana.

Acaneein nihane coitucuhin, itolere icharaneein laraajiin nihane coitucuuruhine.

Nitohaneein neeuruhine chabana satonoelanaala. Nitohaneein neeine,”

naain, Cana Coaunera cocoasitaare satiin nii ecu nenacaauru anjeraauru.

<sup>13</sup> Nii janate, nii coroata choonca jenaain ichauhenaauru caje leinjiin canu rai:

“Chaaauruna caa somajai cajione que cajionecohacoaain cau ne. Chaaelai cajena uure,” naain canu caje bajaane janane:

<sup>14</sup> “Iite acaauru coitucuhicha curuaanaa,” naain tonoraun.

Nii jaunte canu rai: “Caa cachaaaurute necairichanaa tabai abaantaauruhana jaun, Carenero Narejeen coichana aina cuaain somarianohiniha acaauru cajionene jaun nesomariaain nedae acaauru cajione.

<sup>15</sup> Nii jaaunte,

nii Cana Coaunera rai rori caohacha- *trono* acatiha neeure, jiiichoo, janotiin, naaonjoaain Cana Coauneraacha jerei ichacuruha rai Teenforo asaaene coina.

Nii rori caohacha choaae lauheconaaate acaauru beraicheein acaauru rohan neein.

<sup>16</sup> Mijitena, cocoirena, enoto ajaano, ajaaronaa, naaonjoaain niha natiin acaauru roeroecarinaai,

<sup>17</sup> acaauru beraiha nii rori caohacha cataaun nenea Carenero Narejeen ne jaaun.

Nii Carenero Narejeente acaauru beraicheein, carenero beraihuraha beraihurerane rijjijieein.

Acate, esinaaeca caohacha- ichtaonaa tera que acaauru cocoa-reein,

raotojoeein ichaaoruhane coina.

Inae acaauru coroatajaniha Cana Coaunerane jaun necairichanaa coaraain chanaaururinaai chabana,”

nae nii coroata choonca jenaain ichauhenaauru caje leinjiin.

## 8

*Nii fuera caainsine aina jujuai mocooruhane jaan curu oro caje nenea*

<sup>1</sup> Nii fuera caainsine joracaa Carenero Narejeenne janate, carajaojoaain curuatoraain curuaaecoore dedeeu nenacaauru.

<sup>2</sup> Nii catiariine ecu caainsinei anjeraauru coaraaun Cana Coaunera acatiha chujurujua chujurujuaauruhane jana. Nii janate nii caainsiine anjeraauru nainetiin nii toroonfeta teeure.

<sup>3</sup> Nii janate uhe leecha anjera, jujuai mocooruhane jaan curu oro caje nenea uhaain. Nitohaneein uhinte, nichaaurae nii Cana Coaunera belaihuruhane jaan rori *altar* acatiha. Nii janate tabaain nii enuha sacari jujui teeure, nii rori caohacha oro caje ichanohi *altar* acatiha, ichoae teein mocohane coina. Nitohaneeinte mocohane nainiha Cana Coaunera bajaareu nii ecu satiin Cana Coaunera cachaneein nenacaauru.

<sup>4</sup> Nitohaneein nii enuha sacari jujuai mocoha nii anjerane janate, rai biji caje Cana Coaunera acatiha ecuun cue rai cousuraca. Mocohane nainiha Cana Coaunera bajaareu nii ecu satiin Cana Coaunera cachaneein nenacaauru.

<sup>5</sup> Nii baiha, nii enuha sacari jujuai mocohane jaan curu raaoriin, Cana Coaunera belaihuruhane jaan rori caje, usi biine taotaoriin nii curu cuhane teein, usi biine joae nii anjera atane choaae. Nii janate, toni arara, erenaa, jiacano, carora, naaonjoaainunri jataain mijiaaieein.

*Toroonfeta toteuruha anjeraaurune*

<sup>6</sup> Nii janate, inae neruujeeure nii caainsine anjeraauru acaauru rai toroonfeta toteeuruhane coina.

<sup>7</sup> Inae rai toroonfeta totiha nii leinjiin anjerane janate, chauratane ichoae nalue jelajinaa jaberoco aina usi ichana que jasiin. Nii jaunte chauratane neleru nichataja mocohane jaun, satiin chauratane neleru nichataja que nenacaauru nunacuru, chaen omanecuru, naaonjoaainunri mocoe.

<sup>8</sup> Nii jana rai toroonfeta totiha nii anjera coroatajane janate, dede caje nalue jataain tabai usi jaberoco cucuana cuhanene jana, nii cucuana neleru nichataja neleruhin ichana tocohaneein nedae rai baca.

<sup>9</sup> Nii naluha usi jaberocone jaunte, itolere nii cucuana cuhane nenacaauru nichata saain neleruhin oore. Nii cucuana cuhane nenacaauru boteeuru netonaite nichata saain neleruhin mocohin nitajeeure.

<sup>10</sup> Nii janate, rai toroonfeta totiha anjera nichatajane jana, siricho tocohaneein mocohin dede caje nalue arasijie seeonjoa, satiin nucuhecuro nichata neleru aina atane jachu caje mitunacaauru esinaaeca ichoae.

<sup>11</sup> Nii arasijie curuaate Elonaine. Nii jaunte nichata saain neleruhin elonaa nucuhecuro baca aina atane jachu caje mitunaa esinaaecane jaun, ohacoaure arajiin cachaauru.

<sup>12</sup> Nii janate rai toroonfeta totiha nii anjera nejenane jana, nichata saain nelerujuacoaain nocohejaaitiin naasajeein conoene enoto, atene, arasijie, naaonjoaainunri. Nii jaaunte, jiichoo aina nocohena nichata neleru que carajaain conoene nii enoto, atene, arasijie, naaonjoain.

<sup>13</sup> Nii jana coaracaanne janate, dede catai jelson jiaauluhin situha cuha leinjiin uujuirii tocohaneeine jana aonacaanne janate: "Jataainte cairichaojoaaurureein caa chauratane que ichaonacaauru cachaauru, inae toroonfeta toteeuruha nii leecha nichatajai anjeraaurune," nae leinjiin uujuirii tocohanei tonijiaain.

## 9

<sup>1</sup> Nii janate, toroonfeta totiha anjera nesaquine jana dede caje naluha uha arasijie chauratane choaaene jana coaraaun. Nii arasijie raite, cana asajai cochabi teure.

<sup>2</sup> Nii cana asaae nena atane jachu bacuujuua joaracaane janate, jelai caje mitue suruaa orono caje aihane tocohaneein. Nii suruaate nocohenaneein enoto teein, cujuanane maajeein nocohena neein te.

<sup>3</sup> Nii janate, nii suruaa caje mituhin chauratane sacuritaain riaaniha sisiincho semanaane jana, aiha canaanne rijijieein cacha cunaitaane jaanu teure rai.

4 Nitohaneeinte letoanajaain, omane, ajaena, enuha, naaonjoaainunri aasaacuruhane caohateein, nii nauri que Cana Coaunera cojunaca siricha *seecho* que cojunacatenohine lanaala nenacaauru cunaitaauruhane coina aitocure nii sisiincho semanaa rai.

5 Nete cachaauru atinaauruhane coina letononeeurene. Raujiaaincha cacha atinaelanaala cusihane, canaun cusi rijitocojoaain cunaain saoqui ateein cacha cunaitaauruhane coina aitiin letononeeure.

6 Nii cojoanonaa banate niqui onaa jerecureein cachaauru, nete ooreneerein jaiti ooruhane jaan que turuenihane jaun.

7 Nii sisiinchoorute, sonaana que neeuruhane coina relanojoneein nenacaauru cabario tocorijaneein, oro caje nena- comai tocohanei que asihocoin cacha meri tocorijiane acaauru meri.

8 Nii sisiinchooru couturi ujuite caratohanae ene couturi ujui tocohanein. Rai catute aain tabai tocohanein nenaaleon catu tocorijiane.

9 Acaauru jaberocote, coata que bujuaain ne. Jana acaauru itarote jataain mijiaaaineein toni jiaauluuruha ne. Sonaana que neein caro tararaa cabarione jana tonihane rijitocojoaain toni.

10 Jana rai cusite rai nuseei que ne, canaun cusi tocohanein. Nii rai cusi que cacha cunaitaraneente neeurelu saoqui ateein.

11 Nii sisiinchooru curuaanaate cana asaae atane jachu cuhane nena anjerane. Jana rai curuaate Ebereeo ere cuhane Abadoonne. Jana Curieco ere cuhanete, Apolihoonne.

12 Nitohaneeinte situe nii necairichanaa nunuhe. Nete jaiti lanae coroatajai.

13 Inae rai toroonfeta totiha nii anjera nesaotanene janate, Cana Coaunera acatiha oro caje nena rori- *altar* que jenaain nena jicho caje toni eheeona.

14 Nitohanein toniinte:

“Nii jenaai anjeraauru ichoharaain nenacaauru jihaneeu. Acaaurute nucue tabai Eofarate auhaniha ichohanohineein neeure,” nae nii eheeona.

15 Nitohaneeinte, nii jenai anjeraauru jianecure, cachaauru nichata neleru sohin jaaoruhane coina. Nitohanei ichacuruhane coina jatoroaain neeuruhane bajaanaa, rai batene, cojoanonaa, naaonjoain que inae tihane jaun.

16 Nii jana aonanaacaaunne janate, ecu neeure coroata fasha millonneein cabario choaae cunacaauru soondarooru.

17 Nii cabario choaae nelaurianacaauru coaracaaunne janate, usi lanaro tocohaneein nena que bujuatenohini-jiacoae acaauru nalarijiaauru. Nichata lauriinte coloe nii acaauru nalarijia que nena coata, beraurusiojoaain, lanajiojoaain, asofere tocohaneein, naaonjoaain. Jana nii cabariocuru couturite janolari couturi tocorijianihane jana acaauru ujuae caje mitue suraa, usi, asofere, naaonjoain.

18 Nii cabariocuru ujuaae caje cacha cairichaeranu que mitunaa suraa, usi, asofere, naaonjoaain caaunte nichata saain neleruhin ohacoaaure cachaauru.

19 Nitohaneente rai nujuaae cuhane, rai nuseei que, naaonjoaain nii nitohanei ichaane jaanu rai nelate sirichure nii cabariocuru. Nii rai nuseeite acano tocohane. Chaen rai coturi quete cacha cunaitaaure. Arajii cachaaurute ohe nii necairichanaa caaun.

20 Nete acaauru cautecuru nii necairichanaa caje nichotenacaauru, enanetoejein baaso ichacuruhane jianecurene. Nii jaunte, Moconajaeracuru bajaebajaecuruhane jianecurenihane jaun jerichanejein oro caje nena ecaantooru, coata-bronce caje nena ecaanto, coata plata caje nena ecaanto, ajeri caje nena ecaanto, chaen enuha caje nena ecaanto, naaonjoaain bajaebajaecure, ichaohin, nerurujuaain, amuhin, ereein, notain, naaonjoaauruhane que airijiin.

21 Niheichu sonajaain jaohin, benane neein, nitohanai osa que nesaruhin nena naineniha cacha natiin namute quicha aina ichaohin niha natiin, baaso osa que nesaruhin, asijiauhin, naaonjoaain ichaauruhane jianecuruhi.

## 10

### *Quiricha laenanohi siichaa anjerane*

1 Nii jana coaracaaunne janate, dede sacari cataaun, couturi ichoaae iino baijiaain, dede caje fauha uhe-jataain nelate que nelatei leecha anjera. Enoto tocohaneein jiquihacoha rai merine janate, usi lanaro tocohane rai fero.

2 Nitohaneente biji cuhane retutunohineein joaracanojoi quiricha sichaain, cucuana ichoaae rai tijia raotono nichajai tein, rai jera najaa biji nichajai te chauratane ichoae.

3 Nii anjerate, nesari corajiha mijiaaainein aitoa aainne rijitiin tonijiaain ere. Nii jana, caainsinei araracurute tonihure.

4 Nii toniha caainsinei ararane baiha, quiricha cuhane laenana jerichaaunne janate:

“Ti suujua cuhane aitiin toniha nii caainsinei ararane jaan rucuhecu chunei rai belanaala. Coa quiricha cuhane laenaa,” naain dedeeu toni.



<sup>5</sup> Nii ereeuruha caainsinei araracurune catiaaeriinte, nii cucuana choaae raotono nichajai tijia chujuhecaain, chauratane que jera chujuhequera, raotono nichajai biji sijitae.

<sup>6-7</sup> “Inae nenacaaen nerinaain cojoanonaa. Inae toroonfeta totiha nii anjera necaainsinene janate, inae asinojoneein Cana Coauneraacha sirii que turuhane jaan aicheein, nii aitiin berejetocuruhalu nere bera inoaensihurune rijijieein,” nae, itolere bana ichaohin, dede, chauratane, cucuana, chaen itolereeuru coneraneein nenacaauru, naaonjoaainunri coauneraneein nenea Cana Coaunera notaracaae neein aitohane coarateein nii anjera.

<sup>8</sup> Coaiteen nii dedeeu toniin quicha aonai erenaate:

“Chajaain cuhin, nii cucuana aina chauratane choaae chujuhequi anjera caje nii quiricha laojoiri joracanojoneein niicha siichai raaorinihu,” nae canu rai.

<sup>9</sup> Niritoha canu raine jaun, cuhin nii quiricha bajaanune janate:

“Nocoo. Quihu. Chujuaae cuhanete irichaje rijitocojoaain ichohantoreein. Nete laen ii suri cuhane elonainein nerotoreein,” nae carai nii anjera.

<sup>10</sup> Nii jana nii anjera biji caje nii quiricha raaoriin quihanune janate, canu ujuaae cuhane irichaje rijitocojoaain ichohante. Nete inae quihanune baiha, canu suri cuhane elonainein nerotoe.

<sup>11</sup> Nii janate:

“Coaiteen, araai laurii cachaauru, lauri lauri jelai teein atane siriin que ichaonacaauru, nere que ereein nenacaauru, itolere curuaanaacuru, naaonjoaainunri que aitiin Cana Coauneraacha beratei beebejiha cuhinete ne,” naaure canu rai.

## 11

*Niicha icharatei coaranuuru letoaa coroatajaain Cana Coaunerane*

<sup>1</sup> Nii baihate, carai jiarana tocohaneein leinjiin bara teein: “Chajaain nimichuhin cuhin Jerosaleeun nenea Cana Coaunera bajaauruhane jaan coloheri, Cana Coaunera belaihuruhane jaan rori, naaonjoaainunri cojunacateeu. Chaen ecu janiichu, inaaajoaaincha Cana Coaunera coroaacea neeurureein.

<sup>2</sup> Coa Cana Coaunera bajaauruhane jaan coloheri rohan nenea airiniha cojunacatiha. Niite teeure Jorioniheichuru rai. Acaaurute Cana Coaunera nese cocoaichacuru amihara-teeurureein, jataain cairichanajaain, jena choonca coroata ateineein.

<sup>3</sup> Canune coroatajai canu ere beeurera letoaareunni, uhin le oaraanca coroata fasha saota choonca janoneein canu ere beeuruhane coina,” naain canu letoaare.

<sup>4</sup> Nii coroatajai Cana Coaunera ere beracurute coroatajai olibo nujuan aina coroatajai usi temura neein neeure, cana rai chauratane coauneraneein nenea Cana Coaunera acatiha.

<sup>5</sup> Chunocoha chatohaneein acaauru tenaa jerera nihanete, acaauru ujuaae caje usi mitaaurureein jitariin acaauru que nejeratenacaauru mocohane nitajeeuruhane coina. Nitohaneeinte oorureein nii acaauru rerohecaeraauru.

<sup>6</sup> Nii coroatajaihurite nelate que nelateein, cana dede funaa nainecurureein Cana Coaunera ere beebejeeuruhane jana uha elo ne coataa. Chaen techu, ichana neein acau corenaa naainecurureein. Nii rijijieein techu, araai laurii necairichanaa turuanaa nainecurureein caa cana rai chauratane que, acaauru jerecuruhane tocohaneein.

<sup>7</sup> Inae acaauru que Cana Coauneraacha beratenojoi benaa naainauruhane janate, mitureein cana asajai caje leinjiin neecha aansai ataebinae tabai, acaauru sohin acaauru jaohane coina.

<sup>8</sup> Nitohaneein acaauru sohin acaauru jaohane janate, Cana Coaunera Calaohi cairichaauruha coroso quene jaan nese coero cuhane nereein acaauru jaberoco. Jerosaleen nihane saijieein Sodoma, Egipto, naaonjoaineein acaauruhacha curuaateihu.

<sup>9</sup> Nichata janohin cataan uujue banate acaauru jaberoco coaraa cuurureein araai laurii nenacaauru, coriaae caje unacaauru, lauriu lauriu nichao que ichaohin nere que ereein nenacaauru cachaauru, naaonjoainuri. Nete, acaauru jaberoco conautecuruhane caohatereein.

<sup>10</sup> Nii nainihate jataain rachoojoeurureein caa chauratane que nenacaauru cachaauru, ooruha nii coroatajai Cana Coaunera ere beebejeeurerana jaun. Nitohaneeinte rachoojoein beseta ichaain ita belaiha cuurureein itolere nijihanai que, jataain acaauru cairichaeranuneein aihuruha nii coroatajai Cana Coaunera ere beebejeeurera rautaaurenihane jana, inae atinanohineeuruhane jaun.

<sup>11</sup> Nete coaiten nichata janohin cataan uujue bana acaauru ichatiha Cana Coaunerana jaun ichanaain nimichucuruhane coaraain jataain casihure satiin nii acaauru coaraauru cachaauru.

<sup>12</sup> Nii catiaaeriinte, dedeeu mijiaaenein toniha erena jana, “Chajaauchete ini,” naain toniha nii erenaane aonacure nii coroatajai Cana Coaunera ere beebejeeurera. Niritoha nii erenaane aonaainte nii acaauru que nejeratenacaauru notaracaae dede sacari aina cuhin dedeeu iniha cuure.

13 Nii rijjeeoritiinte uha carora tabaine jaun comoe nii nese neleru lechooncaniu nenacaauru lorerichurune jana, oorureein caainsi oaraancani cachaauru. Nii jana acaauru caute- ecu nedanacaauru cachaaurute nesoone caaun Cana Coaunera coroaecurureein.

14 Nitohaneeinte situe nii necairichanaa tabai coroataja. Nete nii baiha coaiteen ureein necairichanaa nichatajanu.

*Toroonfeta totiha anjera necaainsinene*

15 Nii baiha, toroonfeta totiha nii anjeraauru caainsinene janate, mijiaaineein dede que toniin:

“Caa chauratanete  
Cana Coaunera aina rai Calaohi Jesocurisito raineen nihane  
jaun,  
acaauruhacha satonoreein tiaain caa chauruatane Curua-  
naaneen neroranereein,”

naaure.

16 Nii jana, nii coroata choonca jenaain rai rori ichoae Cana Coaunera acatiha neein laurujualaurujanacaauru ichauhenaaurute neseonraain atane que tiaain nenoro-coaain:

17 “Ii, nunuhe caje coaaneen satono que tiaan  
itolere Coauneraneen-  
itolere ichana naineraneen neeine  
coroaecaanura Cana Coaunera.  
Iite ichaohin itolere janonaa bana neein  
itolere que laraajiin chabana satonoelanaala  
Curuanaaneen neeine  
nunuhetei inae.

18 Ii ainate niqui obaaecure  
caa chauruatane que nenacaauru ii coitucuhichuru.  
Nete inae turue acaauru cairichaaaine jaan cojoanonaa.  
Inae turuha onacaauru rucuequine jaan cojoanonaa.  
Ii letonocuru- ii ere beebejeein amuhemuhenaacaauru *pro-  
fetacurute*

coroatajaniha curiquiin;  
acaauru ii cachaneein ii jereeine rijjijeein neeuruhane jaun.  
Inae ii sacuurera coroatajaniha curiquiin,  
itolere canaanaihuru, ichauhenaauru, naaonjoaain.  
Nitohaneeite  
itolere caa chauratane que nenacaauru itajeraneen nena  
itajeriquiin,”

naain Cana Coaunera coasitaare.

19 Nii janate, neyoracae dedeeu Cana Coaunera coroaecuruhane jaan coloheri Teenforone jana ecu inanacaain ne

Cana Coaunera rai rauhi curu camela. Nii janate dede caje ococoe jiacanocuru, tonijjainunri, araracuru, caroracuru, jelajinaa jaberocooru, naaonjoainuri.

## 12

### *Leinjiin ene aina leinjiin ataebinae dragon*

<sup>1</sup> Nii janate dede que ecooca leinjiin cana dede cojunacane jana, inanacae leinjiin ene- enoto que conaanojoneein que cajioneconaa rijijieein- rai tijia asaae atene siriin, leinjiin comai lechoonca coroatajai arasijie siricha lauhecaain.

<sup>2</sup> Nii enete canaanai cosuriu nihane jaun janoanaa jereein cuna caaun necairichajeein auhauhaque.

<sup>3</sup> Nii catiaaeriinte coaiten ecooca cana dede cojunacane jana inanacae leinjiin ataebinae- *dragon* lanajai tasinojoain-caainsinei couturiin lechoonca jichohin. Satiin nii caainsinei couturi nainetiinte ne rai comai.

<sup>4</sup> Niite rai nuseei que dede nichata neleru caje arasijieuru joae chauratane ichoae. Nii ataebinae- *dragonte* ococoe nii ene rene, nii beree nejanoaneni quiha nejanoaha rijieeoritiinne coina.

<sup>5</sup> Nii janate, inae quicha cojoaajiineein nejanoae nii ene beree. Aca satiin chauratane que lauri lauri nenacaauru curaanaa nihane coina- coata caje nena otiha que biji achunequiin. Nete inae nejanoa rijieeoritiin nii beree raain amaare Cana Coaunera aina rai rori acatiha.

<sup>6</sup> Nii jaaunte, neniha cachane jaan cuhin soroe que baniha-teen Cana Coauneraacha rucujueihu cuhin nii ene, ecu teein beraichateein coroaaterate le oaraanca coroata fasha saota choonca janohin Cana Coaunera.

<sup>7</sup> Nii baihate, nii dedeeu ita soore nii tabai ataebinae-*dragon* aina, Miqueli aina rai anjeraauru.

<sup>8</sup> Nitohaneein ita soorua nii tabai ataebinae ainane janate, acaauru amuritonaa nainesihurene nii ataebinae rai anjeraauru. Nii jaaunte, inae dede que nena nainecurene nii tabai ataebinae aina rai anjeraauru.

<sup>9</sup> Nitohaneinte, nii ataebinae- *dragon* tabai jaaore dede caje. Nii ataebinae- *dragonte* inoanlu caje coauneein nena acano tabai inoansi- Moconajaera ne. Acate satiin chauratane tinonoritiin cache coritaeranein ne. Acate, nii rai anjeraauru aina jiniiquiin chauratane que jaonojoinecure.

<sup>10</sup> Nii janane dedeeu mijiaaenein toniin:

“Inae ichoteratenojoi niha cachane jaan cojoanonaa que turuha. Niicha ichana nainei ichaain itolere curuanaa neein niha Cana Coaunera aina cocoainanacai niha Mesihazine jaan cojoanonaa quete inae turue. Inae Cana Coaunera sacurera coulurujuera Moconajaera jaaorua. Acate acaauru

coulurujue, jiichoo, janotiin, itolere cojoanonaa bana, naaonjoaain Cana Coaunera acatiha neein.

<sup>11</sup> Cana Coaunera coreniha cana nejeraneein nenacaaaurute cana osa coreniha atinanojoneein nenea Cana Coaunera Calaohi coichana aina, niicha beratei acaauruacha beebejeei, naaonjoainuri aina cuaain inae amuritoore. Nitohaneeinte Cana Coaunera ere beebeejeeuruhane coreniha coasilanaala ooruhane coina jatoroaain neein aihure.

<sup>12</sup> Rachoojoeuche dedeeu neiniquichene. Jana, chauratane que nenacaauru, cana temurau- cucuana cuhane nenacaauru, naaonjoaainunrite jataain cairichaojoaure, inae ichuunnijia necairichanaa coaraane cojoanonaa que turuhane que nainaane jaun, acauru rene fauha cuha jataain obajein Moconajaerane jaun,” naane jana aonajeun.

<sup>13</sup> Chauratane choaae jaonjoinihane que nainacoriin, nii ene canaanai janoaera coinetein soha cue nii nechu aansai ataebinae.

<sup>14</sup> Nii janate, nii ene itaro jaaure tasionjoaain ujuuri tabai itaro tocohanein, coriaae cuhin nii acano inoaensi caje soroha neniha cachane jaaun cuhine coina. Ecu teeinte, nii ene coroaateure nichata jaanacai cataaun reein tiaain.

<sup>15</sup> Nii acano inoaensite nujuae caje acau mitaain nucuhe jae, raotojoein nii ene sohin jaohane coina.

<sup>16</sup> Nete, nii ene coroatajane chauratane, nujuaae caje acau jaohin nucuhe jaa nii ataebinae tabai- *dragonne* jana lichurujuaaitiin jacolohitiin.

<sup>17-18</sup> Nii jaaunte, jataain nii ene cotaain coraje nii ataebinae- *dragon*. Nii jaaunte cuhin, nii eneecha foerateeuri aina rai bereecuru, satiin Cana Coaunera ere tonoraain Jesoso cachaneein neeuruhane beeuruhane que casilanaala nenacaauru, naaonjoainuri soha cue nii ataebinae tabai.

## 13

### *Coroatajai ataebinae tabai*

<sup>1</sup> Nii janane caainsine couturiin, le choonca jichohin, naaonjoaain cucuana caje mituhin iniha uha leinjiin ataebinae tabaine jana coaraaun. Le jichooru naineein niha comaine janate, Cana Coaunera baijiaraanu rijitiin couturichuru naineein laenanohineein ne erenea.

<sup>2</sup> Nii ataebinae tabai canuhacha coaraite, leinjiin aain tocohanein acomari tijia tocohane rai tijia. Nii jana rai nujuaante, aain tocohanein nenea leon ujuaae tocohane. Nii leeocha ataebinae- *dragonte*, nii aain tocohanein nenea rai, jataain nelatein nihane jaane maajein rai tein co-cainaain, nelaurianaja rorine maajein rai te.

<sup>3</sup> Nii aain tocohaneein nenea ataebinae couturi leinji-inte, ohane coina ichanohin tocohaneein jataain temuhin cunaitanohi ne. Nete nii rijijieein coichanojoneei ner-autaa nii necoasajane coaracuruhane jaun, jataain cojoe-latiin coaraain, nii janolari tocohaneein nenea ataebinae tabai esenetaain sacuure, satiin chauratane sacuritaain nenacaauru cachaauru.

<sup>4</sup> Nii jaunte, nii aain tocohaneein nenea cocoainaa nii leeocho ataebinae- *dragonne* jaun, acaneein neeuruhane coroaecure, “Cha caa leinjiin ataebinae tabai- aain tocohaneein nenea amuritonaa naine. Nihei chuni amuritonaa nainera,” naain acaneein niha nii aain tocohaneein nenea ataebinae tabaine coroaecure, nii leeocho aina curuaecaain.

<sup>5</sup> Chaen techu, Cana Coaunera baijiaraanu rijitiin, itolere que nelaetoha nocoetiin iriha nii janolari tocohaneein nenea ataebinae tabaine jereein, jena choonca coroata ateein cocoaina nacainein nihane coina cocoainae nii leeocho ataebinae- *dragon*.

<sup>6</sup> Nitohaneinte, Cana Coaunera baijiaraanu rijitiin que nejeratein, rai nenaja *santuario* quene maajeein ereein, dedeeu nenacaauru quene maajeein nejerate.

<sup>7</sup> Chaen techu nii ichoae tacaain, coaiten nii leeocho ataebinae cocoainae nii *dragon*. Cana Coaunera cachaneein nenacaauru que nejeratein, acaauru amuritohane reentiaain sonaana que nihane jereein, lauri lauri nichao que ichaohin, lauri lauri nere que ereein, lauri lauri natane que ichaohin, naaonjoainuri curuaanaanein nihane coina cocoainae.

<sup>8</sup> Nii janolari tocohaneein nenea ataebinae coroaeraaurute, satiin caa chauratane que ichoteratenojonee lanaala nacaauru cachaauru neeure. Coatoha laenanohinihei acaauru curuaa nii necoaaunaalu chauratanene caje coaanein nichoteeneuri curuaacuru siriin nenea quiricha cuhane. Nii quirichate cana coreniha sohin jaonojoin Carenero Narejeen rai nichoteeneuri curuaa cocoiricha ne.

<sup>9</sup> Chunocoha aonana naineraauru aonacurumiin:

<sup>10</sup> Caresero cuhane neeuruhane coina nenacaurute, caresero cuhane amanojonecurureein.

Jana sabere que sohin jaonojonecuruhane coina neeninurute sabere que sohin joeracurureein.

Caute coarareein esinae rauhijiriin itolere que laraajiin, niicha esenetai esenetaauruha Cana Coaunera cachaneein nenacaurune.

<sup>11</sup> Nii baihane, atane caje iniha cuha leinjiin ataebinae tabaine jana coaraaun. Nii jana rai jichote carenero narejeen

jicho tocohaneein coroatajae. Nete nii leinjiin ataebinae-*dragon* tabai rijitiin ere.

<sup>12</sup> Acate nii jauriaanejeein nenea ataebinae tabai rijieein jataain cocoinanohineein ne, nii jauriaanejeein nenea acatiha neein. Nii jaunte, nii jauriaanejeein nenea ataebinae tabai- temuhin cunaitanohin couturii- coroaecuruha satiin caa chauratane que nenacaauru cachaaurune coinane maajeein ichae.

<sup>13</sup> Chaen techu, satiin cachaauru notaracae itolere cojolanacojoai ichaain, dede caje atane choaae usine maajeein nalutiae.

<sup>14</sup> Nii jauriaanejeein nenea ataebinae tabai notaracae cojolanacojoai ichaane aina cuaainte, caa chauratane que nenacaauru cachaauru coritaain- acaauru que nii sabere que temuhin cunaitanohin niha natiin ichaohin nenea ataebinae tocohaneein ecaanto jaerate.

<sup>15</sup> Nii ataebinae tocohaneein niicha ichacuri ecaanto rai ichaonaa teeinte erelarate nii ataebinae tabai coroataja. Nii jaunte, satiin corojelanaala nenacaauru cachaauru sohin joerate nii ecaanto acaauruhacha ichai.

<sup>16</sup> Nii choae tacaain techu, satiin canaanaihuru, ichauhenaauru, coriquihonacaauru, cairichaihuru, letononeein nenacaauru, letononelanaala nenacaauru, naaonjoainuri, biji raotono nichajai que, acaauru auri que, naaonjoaaine maajeein rai cachaneein neeuruhane coujunacanein acaauru coujunacaterate.

<sup>17</sup> Nitohanihane jana coaracaauinne janate, chuni nii ataebinae curuaa aina rai coujunaca sirilanaala nenea, nii chaelai coreteein, chaelai que necoreteein, naaonjoaana nainecurene.

<sup>18</sup> Caute laen coaarareein itolere coitucuurera. Coitucuerate, nii ataebinae coujunaca janijiin coitucureein. Nii ataebinae coujunacate, cacha coujunaca rijijieein ne. Acate, saota fasha saota choonca saotaneineein ne.

## 14

*Nenatecuruha le fasha jena choonca jena oaraancai cachaaurune*

<sup>1</sup> Nii baiha, Sioon bichatane ucuuno ichoae chujuhecoha Cana Coaunera rai Carenero Narejeene jana coaracaauinne janate, ecu rai nauri que Carenero Narejeen- atinanohineein nenaalu curuaa aina rai Inaca curuaa siriin ecu aina neeure le fasha jena choonca jena oaraancaain cachaauru.

<sup>2</sup> Nii janane, caraturi caje naluha acaune rijitiin, toniha ararane rijitiin, naaonjoaain jataain mijiaaainein toniha dedeeune jana aonaun. Aonacaauinne janate, arajii quitara

rijijieein nenea arafa toteeuruha arajiin cachaaaurune rijitiin netonijiae.

<sup>3</sup> Nitohaneein netonijiaainte ena nenea nenatena que natecure, nii rori caohacha ichoae nenea, chaen nii cacha tocorijaneein jenaain nenacaauru, chaen nii ichauhenaauru, naaonjoainuri acatiha neein. Nihei nii chuni, nii nenatena que nenatena nainera. Acaihaniji caa atane caje le fasha jena chonca jena oaraancaain ichoteratenojoneein nenacaauruhachate, nenatena naine nii nenatena que.

<sup>4</sup> Acaaurute, chabana suujua corelanaala niheichu nii chuni acaauru suujua corera tonoraelanaala neein- cunaa jerihane jaaun cuha nii Carenero Narejeene jiniichaain amuhemujeein neeurure. Niichurute, satiin cachaneein neinichaachene caje ichoaichaniha ichoteratenojoneein nii Carenero Narejeen aina Cana Coaunera belaiha tenojoneein neeure.

<sup>5</sup> Acaaurute, nii chariji bana casaje ujuaihonelanaala- niheichu baasoneein ereein, naaonjoaain neeurene.

*Nichatajai Cana Coaunera letono anjera benojoin*

<sup>6</sup> Nii janane dede catai jeloon jiaauluhin situha uha leinjiin anjera, nii chariji bana satonoelanaala nenea beratenojoin erenaa biha uha, lauri lauri natane siriin nenacaauru, lauri lauri nichao que ichaonacaauru, lauri lauri nere que ereein nenacaauru, lauri lauri nenaja que nenacaauru, naaonjoainuri raine jana coaraaun.

<sup>7</sup> Nitohaneein jiaauluhin situhinte: “Baaso ichara casetecaera niha Cana Coaunerane coitucuhin Cana Coaunera coroaecuche. Inae caohacha ichaeneeichene, baaso ichaguichene coitucuhane jaa cojoanonaa que inae turuha. Cana rai dede, chauratane, cucuana, atane suujua caje nalunaa acau, naaonjoainuri coauneraneein nenea Cana Coaunera coroaecuche,” nae tonijiaain ehequiin.

<sup>8</sup> Nii baihate coaiten caaijie uhe rai corootaja- leecha anjera. Nitohaneein uhinte: “Inae nitajeeuruha Babilonia cocoaichacuru, nechu joareein jataain baasoneein ichaoha cachane coina ichao ajaelaera que satiin chauratane lauri laurii ichaonacaauru cachaauru ichao ajaelae ajaelajeein nerejetilu,” nae nii anjera corootaja.

<sup>9</sup> Nii baihate coaiten caaijie uhe rai nichataja leecha anjera. Acate: “Chunocoha nii ataebinae tabai corojeein nii tocohanein nenea ecaantone maajeein corojeein, rai nauri, biji, naaonjoain que cojunaca sirichate,

<sup>10</sup> obajeein nitohanai icharaauru caseteco coaracuruhane coina acaauru que banihateein Cana Coauneraacha rucujei bino que cocohin, asojoere tocohanein moconaa usi



tabai jana mocoorureein, Cana Coaunera rai anjeraauru, rai Carenero Narejeen, naaonjoainuri acatiha netiin.

<sup>11</sup> Nii chariji bana satonoelanaalate itolere janonaa bana mocoha cuurureein, janotiin, jiichoo, naaonjoaain nii atae-binae coroajeein, nii tocohaneein nenea ecaantone maajeein coroajeein, rai curuaa cojunacane maajeein sirichauru,” nae ehequiin nii anjeraauru nichataja.

<sup>12</sup> Enate laen itolere que laraajiin neeuruha Cana Coaunera cachaneein nenacaauru, nere tonoraain itolere bana janelanaala jeriha Jesusone rijijieein ichaauruhane necoharareein.

<sup>13</sup> Nii jana aonacaunne janate:

“Aonaain laenaau: Nerausiaecate cuurureein ena caje coauneein nunuhetein Cana Coaunera esenetaain ooruhane que tiaaajoaain nere tonoraain ichaonacaauru,” naain toniha dedeeune jana:

“Aihachuhisicha. Acaaurute nebetacaaurureein namiha-neeon caje. Canune acaauru que acaauru amihaneon coaratereunni,” naain tonorae Cana Coaunera Suujue.

*Caa chauratane que nenacaauru taojiaera*

<sup>14</sup> Nii jana coaracaunne janate, dede sacari jana laujuae leinjiin cacha tocohaneein nenea- coturi que oro caje ichanohin comai siriin- sabere ajihanti que biji achunequiin.

<sup>15</sup> Nii janate Teenforo asajai caje mitatiin: “Chajaain nii taojiaaine jaanu que iicha amai que- nii iicha raaeninuru taojiaain ranajaau, inae cataa caa iicha raaeninuru- caa chauratane que nenea- inae rai cojoanonaa que turuhane jaun,” naain eheque nii leeocho anjera, dede sacari jana lajuuai rai.

<sup>16</sup> Nii jaunte, nii niicha amai sabere que niicha raaeninuru taojiaain, caa chauratane caje ranajae nii dede sacari jana lajuuai.

<sup>17</sup> Nii baihate coaiten dedeeu nenea Teenforo caje mitue leeocho anjera- acaentonai sabere ajinai que biji achunequiin.

<sup>18</sup> Nii janate Cana Coaunera belaihuruhane jaa rori caje mitatiin: “Chajaain nii ii sabere que nii chauratane que nenea oba inaa saau. Inae cataa nii oba inaacuru,” naain ehequiin nii sabere que biji achunequiin nenea cotijiae, nii leeocho anjera- usi curuaanaa.

<sup>19</sup> Nii jaunte, sabere que nii chauratane que nenea oba taain, raain, rucuhacane jaa cuhane te, ecu teein oba baca rocohane coina. Nii oba tainaate inae caseteco tabai letoaa Cana Coaunerane beraneein ainaa ne.

<sup>20</sup> Nitohaneein nii rucuhacuruhane jaan cuhane rucujeein, nese udaa nii oba baca rocooruhane janate, ichananeein

mituhin nichata fasha oaraanca metoroneein jelaai jooje cabario ujuaae ucuunejeein ucuacaain.

## 15

*Caaunsine anjeraauru- caainsii laurinei itolere necairichanaa satono uhaaurera*

<sup>1</sup> Nii jana dede coaracaaunne janate que ococoe jataain cojoelanaacojoai- coara coina ecotenojoin tasionjoaain. Nii janate, ecu neure caainsiineein anjeraauru, itolere necairichanaa que cacha cairichaeranu uhaain. Nii quete, jataain nobaaeneein niicha coacui satonote Cana Coaunera.

<sup>2</sup> Nii jana cucuana baca coaracaaunne janate, usi que jasisii tocohaneein ajarotiin ne. Nii cucuana baca tocohaneein ajarotiin nena auhanihate, acaauru rai Cana Coauneraaacha tei quitara rijjijeein nena arafa siijariin neure arajiin cachaauru, nii ataebinae tabai, chaen nii tocohaneein nena ecaanto, chaen nii coujunaca aina curuaa, naaonjoainuri amuritooreraauru cachaauru.

<sup>3</sup> Acaaurute, Cana Coaunera ere bera inoansi Moisesa nenate que nenatecure. Chaen Cana Coaunera rai Carenero Narejeen naaonjoainuri nenate que nenateinte:

“Jataainte, cojoelanaacojoaain janiinacajelanaala itolere que laraajiin, esinae rauhijiriin aithohine rijjijeein caohacha ichaacha Cana Coaunera.

Iite, satiin lauri lauri rai natane que ichaonacaauru cachaauru curuaanaa *Rey*neein neeicha.

<sup>4</sup> Nihei nii chuni ii que suujua acatelanaala naineijeita Curuaanaa.

Neiheichu nii chuni ii corojelanaala nainejei.

Nii jaunte, leinjiin iicha saantoneein neeine jaun, satiin lauri lauri rai natane que ichaonacaauru cachaauru ii coroaecurureein, itolere baaso, caohacha, naaonjoain ichaain coarateeine jaaura,”

naain nenatecure.

<sup>5</sup> Nii baiha nojoracaa dedene jana coaracaaunne janate, ecu niha acaauru aina niicha ichaneni ichaane coina Cana Coauneraaacha icharatei Teenforone jana, ecu ne Cana Coauneraaacha turunajaanu jeelai *santuario*.

<sup>6</sup> Nii Cana Coaunera turunajaanu jeelai cajete mituure caainsiineein anjeraauru, itolere caainsii laurini que cacha cairichaeranu amaain cunacaauru. Cajione somaratiin jiquihaqui que cajionecohin, jaleri cataaun oojoaain oro caje ichanohin siintoroon que siintorooncohin.

<sup>7</sup> Nii cacha tocorijianein ichaohin jenaain nenacaauru caje leinjiinte, nii caainsiineein nenacaauru anjeraauru

rai, oro caje ichanohin cocoorunajaan curu nainocojoaain casetecocuru que banijjaain nenea- nii chariji bana satonoe-lanaala nenea Cana Coaunera caje unaa te le anjeraauru nainetiin.

<sup>8</sup> Nitohaneeinte, itolere que laraajjin necaohacha que necaohachaane coaratihä Cana Coaunerane jaan- suruaa caaun nocojoe nii Cana Coaunera turunajaan- *santuario*. Nii jaunte, nii chuni ecu turunaa nainene, nii caainsii laurinei que cacha cairichaeranu jitariin berotecuruha nii amaur- eraauru caainsiini anjeraaurune reen tiaain.

## 16

### *Casetecocuruhacha coheni curu muruaae*

<sup>1</sup> Nii janane nii Cana Coaunera turunaja *santuario* tonii: “Chajaain nii casetecocuru que banihateein Cana Coaunera- aacha tei caainsii curuneein nenea- muruaae cuhane nenea chorocuche chauratane ichoae,” naa tonijjaain nii caainsiini anjeraauru rai erenaane jana aonaun.

<sup>2</sup> Nii janate, nii curu muruaae cuhane nenea necairichanaa tera choroha leinjiin anjera chauratane ichoane jana, atae- binae cojunaca siriin nii tocohaneein nenea ecaantone maa- jeein corojeein nenacaauru cachaauru jaberoco que cu- naain mitue abero jataain tasionjoaain.

<sup>3</sup> Nii janate, cucuana cuhane leecha curu muruaae cuhane nenea necairichanaa tera choroha nii anjera corootajane jana, ichana nejesinaneein nerotoe cucuana baca esinaeaca, sonajaain jaoha cachane aihane tocohaneeine jaun satiin oore nii cucuana cuhane ichaohin nenacaauru.

<sup>4</sup> Nitohaneeinte, nucuhe cuhane, atane jachu caje acau nalunajaunru cuhane, naaonjoaain nii necairichanaa tera choroha nii curu muruaae caje anjeraauru nichatajane jana, ichana nejesinaneein nerotocure nii nucuhe bacaauru esinaeacaauru.

<sup>5</sup> Nii catiariin aonacaanne janate:

“Iite, esinae rauhijiriin nitohaneein caohacha aina baaso icharaauru coaraain casetecaraneein neei.

Iite Cana Coauneraneein acaihanejei Saantoneein inoanlu caje coauneein neei.

Chaen techu, nii chariji bana satonoelanaala neriquiin.

<sup>6</sup> Acaaurute ii cachaauru sohin jaohin ii ere beebejeraneein nenea *profetacurune* maajeein sohin jaorelu.

Nii jaunte, nii niicha sohin niicha jaaorilu coichana que cocooruhane coina

acaauru cairichaa ichaai, baasoneein ichaauruhälune jaun. Nitohaneein terate latecure,”

nae nii nucuhe bacaauru esinaeaca asaecane coina que banijiaain nenea Cana Coaunera rai anjera.

<sup>7</sup> Nii janate, Cana Coaunera rai jujuai mocooruhane jaan rori rohan toniin: “Aichuhisi laesinaera, itolere ichana nain-eraneen neeine jaunra Cana Coaunera, esinae rauhijiriin nii baaso ichaelanaala nenacaauru casetecaelanaala, baaso icharaneen nenacaauru casetecaeraneen neeine jaunra,” naane jana aonaun.

<sup>8</sup> Nii janate, nii niicha amai muruaae conera chohitoha enoto ichoae nii anjeraauru nejenane jana, nii aina cuaain niicha ichana naine ichaain cachaauru mocoe najaano que nii enoto cono.

<sup>9</sup> Nii jaunte, jataain banejelanaala mocoore. Nete nitohaneen mainajeein mocooruha natiin, Cana Coaunera coroaena coacuelanaala baijiaraanu rijitiinchuru jataain baasoneen que ereeure, nii itolere cunaihuru amurijiriin niicha ichana nainei icharaneen niha Cana Coaunerane saijiein.

<sup>10</sup> Nii jana, nii niicha amai muruaae conera chohitoha nii ataebinae nelaurianajan rori ichoae nii anjeraauru nesaoquine janate, jataain caohacha nocohenaneen nedae rai cojoanonaa. Nii jaunte, nii mocooruhane curiha cuna caun lele calaauere cachaauru.

<sup>11</sup> Nete nitohaneuruha natiin, nii baaso ichacuruhane janelanaala, nii acaauru abero aina acaauru moco curihuruha natiin, Cana Coaunera que nejerateen baijiaraanu rijitiin ereeure.

<sup>12</sup> Nii jana, nucuhe Eofarate cuhane nii niicha amai muruaae conera chohitoha anjera nesaotane janate, jera jaonaa nainecuruha enoto mitu nichajai caje unacaauru *reychurune* coina jacoroe nii nucuhe baca.

<sup>13</sup> Nii janane, nii ataebinae tabai- *dragon* ujuae caje, chaen nii necha aansai ataebinae tabai caje, chaen nii *profeta* niha nocoeti, naaonjoainuri ujuae caje mituha dari tocorijianeen nichatajaain nechu coitucuchuhi suujuene jana coaraaun.

<sup>14</sup> Acaaurute nii nichatajai coitucuchuhi suujueneen itolere cojoelanaacojoai ichaain, satiin chauratane sacuritaain rai cachaneen nenacaauru *reychuru* taojiaain sonaana que niha uurureen, inae itolere ichana nainera Cana Coaunera Cojoanonaa que turuhane bana.

<sup>15</sup> “Aonacuche, nii nainajeneeichene janane aiha leinjiin asijiautone rijijieen inara rene luhecotariin neeoritoreeni. Jataainte nerausiaeca cureein caohachaaain nainaaain letona jatoraaain cajione ruhecaain canu cohara, nabana machoharohane, nii machoharohane que cojeein cacha cataaun nihane coataa,” nae Cana Coaunera.

16 Nitohaneeinte, nii nere cuhane Armajedoonnein Ebereocuruhacha curuaatei ita taojiaaure- nii satiin chauratane sacuritaain nenacaauru *reychuru*.

17 Nii janate, joaereein nii curu muruae cuhane nenea cabuhitoha nii anjera caainsiinene jana: “Inae jatoroa,” naain tonijiaain toni erenaa dedeeu nenea Cana Coaunera turunaja *santuario*- nii nelaurianaja rorihu toniin.

18 Nii janate, jataain mijiaaonein niha jiacanone jana, jataain mijiaaonein toni erenaa arara aina. Nii janate jataain mijiaaonein luhecotariin uha carorane jana, jataain mijiaaonein nerurujae atane, niha caa chauratane que cachaaaurune jaan caje coaunein niha leecha caroracurune amurijiriin jataain mijiaaonein uhane jaun.

19 Nii janate, mijiaaonein uha carorane jana nichata turiin nefaruhe Babilonia nese tabai. Nii jana nefaaruusiha satiin chauratane sacuritaain nenacaauru neseurune janate, nii Babilonia nese tabai coacue Cana Coaunera, nii nobaaenein casetecocuru cocoaane coina niicha rucujuei bino elonai que acaauru cocoaane coina.

20 Nii jana satiin obenecuru, ichtane ucuunooru, naaonjoainurite nefaruusiin nitajihane jana,

21 dede caje cachaaauru ichoae naluhacoae ajeri jaberoco rijjieein nenea- jelajinaa jaberoco jeenachoonca quiro amurijiriin anajiin. Nii jaunte, acaauru ichoae nichoroha dede caje uhin nii ajeri jaberoco rijjieein nenea- jelajinaa jaberocone jaun, jataain necairichanaa tabai caseteco nihane jaun, Cana Coaunera que nejerateein baijiaraanu rijjitiin ereeure cachaaauru.

## 17

*Jataain ene cojoaeloroheri esineneein nenea casetecaauruhane*

1 Nii caainsii laurinei cacha cairichaeranu curu muruae amaurera caainsiini anjeraauru caje leinjiinte: “Chajaaune, naaonjoaain casetecanohinerichaain taa cucuana baca ichoae lauhequi ene cojoaelorohene coarate ii que.

2 Caa chauratane curuanaa *reychurute*, taa ene cojoaeloroheri aina ichaojeraquiin neeure. Chabana nitohanai ichaain ichaonaa naineniha cachane saijieein, rai nichao baaso aina cuaain satiin chauratane que nenacaauru ichao aasajeein osa que sarunajaelu,” nae canu rai nii anjera.

3 Nii baihate, Cana Coaunera Suujue coaratenojoin coaraaunne jana, cacha areroo canu amae nii anjera. Nii janate, ecu niha leinjiin ataebinae tasionjoaain lanajaainne jana, nichoae laujuae leinjiin ene. Nii ataebinae tabaite, Cana Coaunera baijiaraanu rijjitiin jaberoco sacuritaain

laenanohineein rai curuaa siriin, caainsiine couturiin lechooncae rai jicho.

<sup>4</sup> Nii jana nii ene cajionete, lanajaain jichohajiojoai que jasiin, oro caje ichanohin que corujuelequuin, jataain coretiin nena ajeri jaberoco que urerianohineein, jiquihaquuin nena perla, naaonjoainuri que urerianohine rai cajione. Oro caje ichanohin acau cooruhane jaa curu muruaae que biji achunecohin, nainecojoaain rautaaain coaanacaaajoaelanaala nena siri, nechu jataain leinjiin calani dadanacaaajoaelanaala nena amae nechu joaenreein cachaauru que ichaojeraquuin neosateein nihane jaun.

<sup>5</sup> Nitohaneeinte: “Babilonia nese tabai, ene cojoaeloroherihuru nebaneein satiin chauratane sacutaain itolere cachaauruhacha rautaa icharaneein nena,” naain laenanohineein curuaa siri nauri que, chabana coaraa nitohanaine que airijiin.

<sup>6</sup> Nii baihane nainaaun, Cana Coanera cachaneein rai nere beebejeraneein neuruhane coreniha, chaen Jesocurisito beebejeeuruhane coreniha ateanohineein nenacaurulu, naaonjoainuri coichana caaun ajiha nii ene cojoaeloroherine que. Nii jaunne coarihanune rijijieein jataain cojelatoon.

<sup>7</sup> Nii jaunte canu rai: “Chanuna jataain cojelatohi. Tane ichei caa ene ichao coitucueraelanaala nena aina nii caainsiinei couturiin lechoonca jichohin- nii amaera ataebinae tabai, naaonjoainuri beete coitucuhi.

<sup>8</sup> Inoaenlute niqiu ichoaelu nii iicha coarai necha aansai ataebinae tabai, nete inae nitaje. Nii jaunte, caohacha nitajeeiin nitajesihane ajiniha, nii chariji bana satonoelanaala nena atane jachu caje inicheein. Nii necoaaunaa cana rai chauratanene jaa caje coaaneein Cana Coanera coitucurera curuaacuru siricha quiricha cuhane laenanohineein curuaa sirilanaala caa chauratane que nenacauru cachaaurute, nii necha aansai ataebinae tabai cojelatiin coaraa cuurureein, inoaenlu ichahalunatiin inae nitajihane jaun. Nete inae nacoaaunein ichaoreein.

<sup>9</sup> Caute laen esinae rauhijiriin coaarareein niicha coitucui coitucuhin biha coitucuerane. Nii caainsiinei couturiite, caainsiinei ichatane ucuuno nii lauhaca ene cojoaeloroherine jaan beraneein aiha ne. Chaen nii caainsiinei couturichurute nii caainsiinei *reychuru* beraneein ainaa ne.

<sup>10</sup> Nii saouii *reychurute* inae chaque nelateein nedaaurene. Leinjiinchate jaiti itolere curuaanaanein ne. Nii jana leechate jaiti turuene. Nii acaauru caaijie nedanaa turuhenein inae turuhane bana coatihacarajaain nerinaain.

11 Nii inoaenlu ichaonaa necha aansai ataebinaete, acaauru curuaanaa *reyneen* acaauru fosaneineein nelu. Nete inae nitaje. Nii choae tacaain techu, nii caainsiineein nenacaauru caje nena nelu. Nitohaneeinte, jataain caohachanainejeein raajenhane itajeranu ichajeein sacue.

12 Nii lechooncaain jicho iicha coaraite, lechooncai *reychuru* neein jaiti curuaanaaneein cocoinanohi nelanaala nenacaauru ne. Nete inae carajaelanaala, nii necha aansai ataebinae jiniichaain aihuruha *reychurune* rijijieein cocoinanohi neeurureein.

13 Nii lechooncai *reychurute*, ita suujua rijitoejeen niicha ichana nainei ichaa nii necha aansai ataebinae tabaine coina cocoinaa cuurureein.

14 Nitohaneeinte, nii Carenero Narejeen aina ita soha cuurureein. Nete acaauru amuritoha cureein nii Carenero Narejeen. Nii suujua rijijieein janijiin Cana Coaunera ranjoinurilu rai cachaneein nenacaauru aina, satiin curuaanaacuru curuaanaa neein, satiin *reychuru* rai *Reyneen* niha nii Carenero Narejeenne jaun,” nae carai nii anjera.

15 Chaen techu canu rai: “Nii lauhaca nii ene cojoaeloroherine jaan- iicha coarai acaute, nenaanaja, cachaauru, nere que ereein nenacaauru, natane que ichahin nenacaauru, naaonjoainuri beraneein ainaa ne.

16 Jana nii necha aansai ataebinae tabai jicho lechooncaain iicha coaracurite, nii ene cojoaeloroheri que nejerateein, machorocoaain que jaolecohin, rai jaberoco quiin usihanau mocoorurichaaine jaan beraneein ainaa ne.

17 Cana Coaunerate, acaauru suujua jichochoe, aca jerihane rijijieein niicha jerei ichaain, jiniiquiin ita suujua rijitoejeen, nii *reyneen* cocoinanohineein neeuruhane jaan teuruha nii necha aansai ataebinae raine coina. Nitohaneein jeriha Cana Coaunerane que tihane jaan que tiaajein.

18 Nii ene iicha coaraite, itolere amurijiriin nena Babilonia nese que satiin chauratane sacuritaain nenacaauru *reychuru* amuritoeraneein nena beraneein ainaa ne,” nae carai nii anjera.

## 18

### *Nitajiha Babilonia nesene*

1 Nii baihane niicha ichana nainei ichaane coina cocoinanohineein, rai necaohacha que necaohachaaain dede caje fauhin chauratane jiliitoha rai cono necaohacha que leeocho anjerane jana coaraaun.

2 Nii janate tonijiaain:

“Inae nitajiha itolere amurijiriin nena Babilonia nese tabai.

Inae moconajaera nenajaneeinte,  
itolere lauri lauri coitucuchuhi que suujuequiin,  
chaen rautaaïn coaanacaaajoae lanaala nena itolere atae-  
binae coitucuchuhi, tajaecuru coitucuhichuru,  
naaonjoainuri ucuhaneein inae nerotoe.

<sup>3</sup> Nitohanihane jaunte,  
chabana nitohanai ichaain ichaonaa naineniha cachane sai-  
jjein,  
rai nichao baaso aina cuaain,  
satiin chauratane que nenacaauru cachaauru ichao  
aasajeein osa que sarunajaelu.

Chaen techu,  
que ichao jeraquiin nerejetocure satiin chauratane que ne-  
nacaauru curuaanaacuru.

Chaen techu,  
satiin caa chauratane que necoretenacaauru coriquihocure,  
nechu jataain joareein baaso ichacuruhane jaanuhacha que  
necoreteein,”

nae carai nii anjera.

<sup>4</sup> Nii janate, nacoaauneein dedeeu tonii.

“Chajaain nii nese caje amuuche inara canu cachanequich-  
ene.

Nabana nii osaaonacaauru aina neeichene  
acaauru osa leruhiche acaauru ainane,  
necairichaaiche nii necairichaaauruhane jaan quene coataa.

<sup>5</sup> Dede quete  
turuhelalajeein lajuuae jataain acaauru osa tabai.

Nii jana Cana Coaunerate,  
nii baaso chacuruhane coitucuhin chabana baitenereein.

<sup>6</sup> Leeochaauru cairichaane amurijiriin,  
coroata saain jeelai amuritoheriin nii niicha coheni jataain  
coaerai jasiiteein que cairichaa.

<sup>7</sup> Jataain necairichanaa tabai que cairichaa,  
leeochaauru cairichaane amuritoheriin.  
Nechu jataain joareein nocohasitaa nocoetohane jaunte,  
rai suujua cuhane:

‘Caune aiha curuaanaane rijjijeein raotojoein neeun.  
Coatiha aiha autanane rijjijeein necairichanaa  
coarinaauni,’

naain necohasitae.

<sup>8</sup> Nii jaunte,  
le jiiichonijin cuhane nichoae nalureein itolere  
necairichanaa, onaa, mijitena, nererojoecana,  
naaonjoainuri.

Chaen techu  
usihanau moconojoiniha cureein.



Jataain itolere que laraajiin niicha ichana nainei ichaain cha rucuharaniha nii casetecaeraneen nenea Cana Coauneraane jaun,”

naa erenaane jana aonaan.

<sup>9</sup> Inae moco caaun suruaa tabai niha nii nesene coaracurhanete, jataain inaderaain chanaa cuurureein caa chauratane que nenacaauru curuaanaacuru, nechu joenreein nichao aasajeein nii nese aina ichaojeraconacaauru, nii baaso ichacuruhane que netojoejein.

<sup>10</sup> Nii jaunte, inae caseteconihane coaracuruhane coasiha rohan nichuuntanaa nainelanaala caje coriae netiin:

“Jataainte cairichaaajoaai itolere que laraajiin niha nocoetohi natiin Babilonia nese tabai, coatejeneeine jana luhecotariin ii rene turuha casetecone jaun,”

naaurureein coarajeein.

<sup>11</sup> Satiin chauratane sacuritaain ecu necoretenacaauru techu, nii nese coinaderaain chanaa cuurureein. Inae nenerihani nii coroatajajelanaala acaauruhacha sirii rucuhale coreterane jaun.

<sup>12</sup> Nii itolere, oro, plata neein curuajaain nenea coata coreti, ajeri jataain caohatiin coreti, jataain cajione caohacha, cajione lanaajionjoai, cajione lanajai, itolere araai laurii enuha jujuhi caje nenea, ebucu caje ichanohichuru rucuhaleeuru, enuha jataain coretiin nenea, coata lanajai boronce, leecha lauri coata, ajeri jaberoco jataain nojoein nenea,

<sup>13</sup> arajiin jujuaain nenea canera, sacari jujuaain nenea, miraa chaen leechaauru jujuaain nenacaauru, *perfume*, bino, erene, arina caohacha, tirico, atane choae terei anajiin icharaauru, carenero, cabario, cabario que tararaeraain nenacaauru, chaen cachaauru letononeein nenacaauru, naaonjoainuri que necoreteeuruha, nii Babilonia cocoaichacuru raine jaun, jataain coinaderaaure.

<sup>14</sup> Nii janate jataain inaderaain:

“Inae nihei iicha rautati rucuhale coreti satiin iicha sirii. Inae chabana nihei jerichanejeein sirii neeine,”

naaurureein nii neseu necoretenacaauru.

<sup>15</sup> Nii neseu necoretenacaaurute jataain coriquihotiin neeure. Inae caseteco coaraane janate, caje coriae neein coinaderaain chanaain coarajeeurureein jataain coasina caaun. Chaen techu jataain coisiin:

16 “Jataainte cairichaaajoaai, itolere nese amurijiriin tabaain nena.

Cajione caohacha que necoreeteen, lanajaain jichohajiojai que necoreeteen oro,

chaen jataain coretiin nena ajeri jaberoco, perla, naaonjoainuri que urerihanohin cajione que necoreetiha leinjiin enene tocohaneei niqi.

17 Nete luhecotariin coacueneene jana, inae nitaje nii itolere iicha sirichuri,”

naaurureein.

Satiin bote cuhane curuaanaanein nenacaauru curuaanaacuru cafitaancuru- cucuana cuhane amuhemuhenaacauru, chaen marinerooru, satiin cucuana cuhane nichao que ichahin raotojeein amuhemuhenaacauru, naaonjoainurite coriae netiin coarajeure.

18 Inae moco caaun suruaa niha, nii nesene coaraainte: “Coatiha catohanein jataain leeochoauru amurijiriin jataain caohatiin nena nese caa catohanein nedaai,” naaure tonijiaain.

19 Chaen techu, coinaderaain chanaain, couturi ichoae atane bujuinaa chorohin:

“Jataainte cairichaaajoae taa nese itolere amurijiriin nena, naain chanaaurureein,

satiin nii cucuana cuhane bote sirii amunacaauru, nii nese aina cuaain coriquihonanein nedanacaauru.

20 Nii nese cairichaa Cana Coaunerane coroaecuche dedeeu Cana Coaunera cachanein janijiin niicha cotihanohinein nenacaauru,

chaen afosotooru, *profetacuru*, naaonjoainuri. Acaauru casetecaane ucuatohate, inara rai caohacha ichae Cana Coaunera,”

21 Nii jaunte, nii itolere que nelateen, niicha ichana nainera neein nena anjera, nii leinjiin ajeri jaberoco seeonjoancha tutuuruhane jaa tocohaneein nena baihataain cucuana cuhane siheitiin:

“Catohaneente,

itolere amurijiriin nelaetiin niha nocoetohinatiin,

inae chaque nelatelanaala neei Babilonia nese. Inae chaelon nihei nacoaaunein jerichanejeein neeine jana ichoharaauruhane.

22 Inae chelai janonaa bana nihei nacoaaunein ii que aohanraa,

nenateein quitara rijijieein nena totteen, aunone maa-  
jeein totteen, coreneta tocohaneein nena toroonfeta,  
naaonjoainuri toteeuruhane.

Inae nerinaain ii que amihaneeni.

Niheichu aohanrarinaain tonijiainiha natiin ichaain cha  
tutuera.

<sup>23</sup> Chaenchu

chaelai janonaa bana nihei, ii que niha conone jana,  
ii que aohanraa tonijiai ichaain nisirihateeuruhane jaa bese-  
tane.

Coatiha

inae chaque nelateein neeuruhi ichei rucuhele que necore-  
teein nenacaauru,

satiin chauratane que nenacaauru amurijiriin itolere que  
nelaetoha nocoetiin neeuruhalu natiin.

Chaen techu,

benaneniha nocoetohine que,

satiin lauri lauri nenacaauru cachaauru coritaain nereje-  
tohi,”

nae nii anjera.

<sup>24</sup> Nii nese quete erunojoi ne niicha sohin niicha jaaorilu  
*profetacuru* coichana, chaen nii janijiin Cana Coauneraacha  
ranojoinurilu rai cachaauru, chaen satiin caa chauratane  
que sohin niicha jaaorilu coichana, naaonjoainuri.

## 19

<sup>1</sup> Nii baiha jataain arajiin dedeeu tonijiaain ereeuruha  
cachaaurune jana aonacaaunne janate:

“Cana ichoteraneein nena cana Curuaanaa coroaecuche.

Nii itolere ichana naineein,

rai necaohacha que necaohachaaain,

naaonjoaain nihane jaunte

cana ichoteraneein Cana Coauneraaneein ne.

<sup>2</sup> Acate

esinae rauhijiriin baaso icharaauru coaraain

casetecaeraneein ne.

Nitohanihane jaunte,

rai jaberoco aina cuaain

satiin chauratane sacuritaain nenacaauru cachaauru  
saruhin niha osa quene jaun,

nii ene cojoaeloroheri rijijieein nena casetecae.

Cana Coaunerate

rai cachaneein nenacaauru ateinaain nihalune

core coarate que,”

naaure.

<sup>3</sup> Nii baihate nacoaauneein:

“Cana ichoteraneein nenea cana Curuaanaa coroaecuche.  
Nii chariji bana jianelanaalate  
ecuun iniha cureein nii ene cojoaeloroheri rijijieein nenea-  
Babilonia nese moco cousuruca,”

naaure dedeeu tonii.

<sup>4</sup> Nii janate, curuaanaa nihane jaan rori- *trono* ichoae lauhaca Cana Coaunerane jana, nacatiha neseonriaain: “Cana ichoteraneein nenea cana Curuaanaa coroaecuche. Nitohanemiin,” naain Cana Coaunera coroaecure, nii coroata choonca jenaain nenacaauru ichauhenaauru, chaen nii jenaain cacha tocorijianein ichaohin nenacaauru naaonjoainuri.

<sup>5</sup> Nii janate, nii curuaanaa nihane jaan rori- caje toniin:

“Satiin inara canaanainuru, ichauhenaauru, naaonjoainee-  
ichene  
Cana Coaunera coroaecuche,  
nelateein acaneein nihane que casiichene coarateein  
neinequichene,”

naain toniha erenaane jana aohanrae.

*Rai cachaneein nenacaauru aina beseta ichaa Carenero Narejeene jaan cojoanona que turuhane*

<sup>6</sup> Chaen nechú tonijiaain toniha arara aina caraturine rijitinchuru iriha arajii cachane jana aonaun. Nii janate: “Cana ichoteraneein nenea Cana Curuaanaa coroaecuche. Inae itolere Curuaanaa neein nihane nunuhetiha cana Curuaanaa,  
itolere que nelateein,  
itolere ichana naineraneein nenea Cana Coaunera.

<sup>7</sup> Aihane jaun

coanete rachoojihacache.

Esinae rauhijiriin

rai necaohacha que necaohachaaain niha Cana Coaunerane coroaecaache,

inae nisirihatiha Carenero

Narejeenne jaan cojoanona que turuhane jaun.

Inae letona jatoraaain neruujihai rai comasainu.

<sup>8</sup> Nitohanein jereraane jaunte,

somajai cajione caohacha jiquihaqui que necoreete nii Carenero Narejeen comasainu.

Nii cajione caohacha somajaain jiquihaquiin nenaate,

esinae rauhijiriin jeriha Cana Coaunerane rijijieein

niicha ranojoneein nenacaauru ne,”

naain tonijiaain toni erena. Satiin rai cachaneein nenacaauru raa Cana Coaunera Calaohi Jesocurisitone que.

<sup>9</sup> Nii janate canu rai: “Caa laenaanun: ‘Raotojoein turuu-ruhine nii Carenero Narejeen beseta que cotihanohichuru.’ naa caraine baihate: ‘Caa erenaate, inae rauhijiriin Cana Coaunera beratenojoin erenaane,’ ” nae carai nii anjera.

<sup>10</sup> Nii jana coroaaceaaune coina, nii anjera tijia asaae neseoriaanune janate: “Coa nitohanai ichana coaauca. Canuhetonaine Cana Coaunera cacha neein neeun, jerichanejeein nii aaine rijijieein. Aihuruha nii ii nejeraauru, acaauru rai aitoha Jesocurisitone rijijieein, naitoonjoan tonoraain nenacaurune rijijieein. Aihane jaun, Cana Coauneraacha coroaaceu,” nae canu rai nii anjera.

Nii Jesocurisito que erena techu, *profetacuru* que beratenoinnein nelu.

### *Cabario somajain ichoae cunaa*

<sup>11</sup> Nii janate dede que ecooca somajaain cabarione jana, nichoae lajuuae- nii suujua rijijieein nesineneein curuajai. Acate esinae rauhijiriin baaso icharaauru cachaauru ichao rucujueein, que nejeratenacaauru amuritiin nelu.

<sup>12</sup> Rai notate jiquihaquiin usi lanaro tocohane. Nii janate, arajiin rai coturi que comai amaane jana, que laenanohineein ne rai curuaa. Leinjiin acaachate nii curuaa coitucuuje.

<sup>13</sup> Nii jana rai cajionete, ichana que lomonojoin tocohane. Jana rai curuaate: “Cana Coaunera Ere,” nae.

<sup>14</sup> Nii janate caaijie uure dedeeu anjeraauru- cajione caohacha somajai que necoreteein- cabario somanerei ichoae uhin.

<sup>15</sup> Nii janate rai nujuaae caje mitue sabere ajihantiin, satiin lauri lauri nenacaururu amuritoheraneein nihane cojunacaneein. Acate coata caje nena otiha que biji achunequiin, acaauru Curuaanaa niha cureein. Acate, cana tijia que oba shaoquiin, rai baca rocohacane rijijieein, baaso icharaauru coaraain casetecaain, rai nobaeneein casetecocuru que banihateein niicha rucujei- bino que acaauru cocoa cureein nii itolere que nelateein- itolere ichana naineraneein nena Cana Coaunera.

<sup>16</sup> Chaen techu rai cajione, rai nanaae, naaonjoain que:

### *Reychuru rey- curuaanaacuru Curuaanaa*

naain laenanohineein ne Acaneei nihane coitucueratera rai curuaa.

<sup>17</sup> Chaen nechu enoto conohanau chujuhecoha leinjiin anjerane jana coaracaaunne janate, satiin tajaee iniho

que lenoneein ecuun jiaauluhin amunacaauru rai tonijiaain: “Chajaauchete netaojiaete tabai lenone que inara coroaatemiin Cana Coaunera.

<sup>18</sup> Aihate Curuaanaacuru *reychuru*, soondarooru curuaanaacuru, laraajiin nenacaauru cachaauru, cabariocuru, nichoae cunacaauru, itolere inihocuru, letononelanaala nenacaauru, letononeein nenacaauru, nelatelanaala nenacaauru, nelateein nenacaauru, naaonjoainuri iniho que lenonequiche,” naain ehequiin nii iniho que lenonenacaauru tajaacuru cotihacane aonaun.

<sup>19</sup> Nii baihane, nii necha aansai ataebinae tabai aina, satiin caa chauratane que nenacaauru curuaanaacuru aina sonaana que neeninuru acaauru soondarooru coaraaun. Acaaurute, nii cabario ichoae lauheconaa aina rai anjeraauru sooruhane coina netaojiaaure.

<sup>20</sup> Nii janate, nii necha aansai ataebinae tabai mucuhin casetecaure, nii rai *profeta*- nacatiha neein itolere cojoelanaacojoai ichara aina curuaaecaain. Nii itolere cojoelanaacojoai ichaane aina cuaainte, nii necha aansai ataebinae tochaneein niicha ichacuri cojunaca terateein rai ecaanto coroaeraauru cachaauru coritae nii rai *profeta* niha nocoeti. Nii jaunte, nii *profeta* niha nocoeti aina curuaaecaain, nii necha aansai ataebinae tabai jaaore ichaaojihane jana, usi conemuri asojoereneein moconaa cuhane.

<sup>21</sup> Nii jana leochaaurute, sohin jaonojoinecure, nii cabario somajai choae laujuaain cunaa ujuaae caje mitunaa sabere ajainai que. Nii janate, nii onacaauru iniho quihure nainain obejein nii iniho que lenonenacaauru tajaacuru.

## 20

*Le oaraanca jaanacaneei ichohanojoi niha moconajaerane*

<sup>1</sup> Nii janane, *cadena* que biji achunequiin atane jachu chariji bana satonoelanaala nena cochabi uhaain fauha uha leinjiin anjera dede cajene jana coaraaun.

<sup>2</sup> Nii anjerate fauhin, nii ataebinae tabai acano inoansimoconajaera ichojoae, le oaraanca jaanacai que tihane reein tiaaajoaain.

<sup>3</sup> Nitohaneein ichojoaainte, nii chariji bana satonoelanaala nena atane jachu tabai cuhane fuhin, nii fuera que nii cochabi te, le oaraanca jaanacaneei que tihane reein tiaaajoaain, nabana caa chauratane que nenacaauru cachaauru coritaane coataa. Inae le oaraanca jaanacaneei que turuhane banate jianenohiniha cureein carajaelanaala.

<sup>4</sup> Nii jana, nii curuaanaacuru rori- *trono* coaracaauune janate, nichoae launereure nii baaso icharaauru coaraain rucuherranu que cocoainanohineein nenacaauru. Chaen

nechu, Cana Coaunera aitonjoan beebejeein, jataain esinae rauhijiriin beratenojoinihane rijijieein Jesocurisito aitonjoan tonoraauruhane coreniha, coturi molonojoneein onacaauru suujue netonai ecu neure. Acaaurute, rai biji, nauri, naaonjoain que nii necha aansai ataebinae coujunaca teeuruhane jerelanaala, chaen nii necha aansai ataebinae tabai aina nii tocohaneein nenea ecaantooru corojelanaala nenacaauru nelu. Acaaurute nii ooruhane baiha nacoaauneein ichanaain le oaraanca jaanacaneein Cana Coaunera Calaohi Jesocurisito jiniichaain curuaanaanein neeuruhane jana coaraaun.

<sup>5</sup> Niichurute ichoaichaniha oo caje ichananacaauru ne. Leeochaauru laen ooruhane baiha ichanacuruhi, le oaraanca jaanaca reein tiaain.

<sup>6</sup> Jataainte nerausiaaejeein niha cuurureein nii ichoaichaniha oo caje ichananacaauru, inae Cana Coaunera cachaneein aina jiniiquiin neeuruhane jaun. Oha cachane baiha itajeraneein nenea coatiha acaauru aina chaachasihei. Acaaurute Cana Coaunera aina rai Calaohi Jesocurisito rai saseredoteneein le oaraanca jaanacane reein tiaain aina curuaanaa neein neeurureein.

### *Moconajaera amuritooruhane*

<sup>7</sup> Inae le oaraanca jaanacanei baihate, caseteconihane caje mitanojoi niha cureein atane jachu tabai caje nii moconajaera.

<sup>8</sup> Nitohaneein mituhinte satiin caa chauratane que lauri lauri natane que ichaonacaauru cachaauru rene cuhin, enoto mitu nichajai jeroon, enoto so nichajai jeroon, enoto mitu nichajai coarajeein cana ajaabiji nichajai jeroon, enoto so coarajeein cana ajaabiji nichajai jeroon, naaonjoainuri nii Gog aina Magog neein niicha curuaateuri coritareein. Nitohaneinte cucuana cuhane nenea carene catuniji jeoneein acaauru cachaauru taojiareein sonaana que nihane coina.

<sup>9</sup> Nitohaneite satiin chauratane sacuritaain cuhecujeein, jataain nii Cana Coauneraacha belai nese tinonohin, nii Cana Coaunera cachaneein nenacaauru curuacaain tinonocure. Nete inae dede caje naluha usine jaun, jitariin acaauru mocohin acaauru itaje.

<sup>10</sup> Nii jana, nii acaauru coritaera moconajaerate, usi conemuri asofere neein mocohin nenea cuhane jaonojoneei ne, nii *profetaniha* nocoeti aina curuaaecaain, nii necha aansai ataebinae tabai jaaoruhane jaan cuhane. Ecute janotiin, jiichoo, naaonjoain caseteconein mocoha cuurureein nii chariji bana satonoelanaala.

*Rori somajai acatiha tein caohacha ichacurenihane, baaso ichacuruhane coitucuuruhane*

<sup>11</sup> Nii jana curuanaacuru rori- *trono* somajai coaracaaunne janate nichoae lauhaca leinjiine jana notaracaae jataain caohacha nitajeeriin nii chunijihun coarinojoinelanaala nitaje chauratane aina dede.

<sup>12</sup> Nii janane itolere que nelateein nenacaauru, chaque nelatelanaala nenacaauru, naaonjoainuri onacaauru coaraaun, nii curuaanaacuru rori- *trono* acatiha chujunereeuruhane jana. Nii janate, ecu joaracaeraain nihacoaa quirichaaaurune jana, nii chabana satonoelanaala nena ichaonaa que ichaohenihuru curuaa siricha leecha quiricha netonai ecu joaracaeraain ne. Nii onacaaurute colurujuenojoinneen neeuruhane caje rucuhenojoinneen neeure- acaauruhacha ichai rijijieein, nii quiricha cuhane laenanohineein nihane rijijieein.

<sup>13</sup> Nii jana satiin nii cucuana cuhane jaonojoinneen onacaaurute caje mitaain tenojoinneen. Jerichanejeein techu nii ohin aina nenacaauru te, nii onaa curuaanaa neein nena. Nii janate satiin acaauruhacha ichai rijijieein rucuhenojoinneen neeure le cacha cachaauru.

<sup>14</sup> Nii baihate, usi conemuri cuhane jaonojoinneen ne nii onacaauru curuanaa neein nena, nii nitajerai nenacaauru aina jiniiquiin. Nii usi conemurineein nenaate, oha cachane baiha cacha itajeraneein nena ne.

<sup>15</sup> Ecute jaonojoinneen neeure, chabana nitajenaachara nejein nena ichaonaa que ichaohenihuru curuaa siricha quiricha cuhane laenanohineein curuaa sirilanaala nenacaauru.

## 21

*Ena nena chauratane aina ena nena dede*

<sup>1</sup> Nii baihane ena nena chauratane, ena nena dede, naaonjoaain coaraaun, inae nitajiha nii jauriaanejein nena dede, chauratane, cucuana, naaonjoainurine saijieein.

<sup>2</sup> Nii janate, dedeeu Cana Coaunera acatiha nihane caje fauha uhe Cana Curuaanaa nese neein nena- enachasine Jerosaleen. Charijieein teeinti, nelanajanaa jerihane caohatiin necoreetein ne leinjiin ene, nii rijijieeinte jataain caohatiin rai necaohacha que necaohachaain niha nii ena nena Jerosaleenne jana coaraaun.

<sup>3</sup> Nii janate, nii Cana Coaunera<sup>3</sup> nelaurianajaan rori caohacha tonii: "Inae ena caje coauneite, cachaauru aina ichaoreein Cana Coaunera. Nii janate, acaauru aina ichaohane jana, rai cachanein niha cuururein. Chaen techu nii jeelai Cana Coaunera, acaauru Coaunereein acaauru aina nereein.



<sup>4</sup> Nii bana inae nerinaain chananaa, nerinaain onaa, inaderanaa, cunaeriin niha cachane jaan, naaonjoainunri. Nitohaneein inoaenlu nena ichaonaate inae nitaje,” naa erenaa dedeeu toniine janane aonaun.

<sup>5</sup> Nii janate:

“Canune nacoauneein enachasine neein itolere coaunaain neeun. Caa erenaa ichei aitorichaaunine jaan laenaun. Acate esinae rauhijiriin nohanelanaala ichei aitorichaaunine rijijieein airichaaanne coina erenaa ne,” nae canu rai, nii rori caohacha ichoae laujui.

<sup>6</sup> Nii baihate:

“Inae nitohaneein ichanohiniha. Canune itolere nunuheteraneein satono teraneein neeun. Chateeinti cocoirihane jesinaeca arihane rijijieein Canu ariin ne, niine core colane cocoareeuni, nii chariji bana satonoelanaala ichaonaa tera jesinaeca que.

<sup>7</sup> Chateeinti itolere necairichanaa abaataain satono que tiaain ne, nii raite cainanohiniha cureein. Chaen techu rai Coaunera nichaaunne jana, aca canu calaohineein nereein.

<sup>8</sup> Nena laen nii Canu sacunaa jeriheichuru, nii Canu esenetana jeriheichuru, namute cacha cotaairiin nenacaauru, sonajaain jaaoreraauru, rai sinijeranelanaala nena ene aina ichao jeraquiin nenacaauru, namute quicha aina ichao jeraquiin nenacaauru, benaneein nenacaauru, nii ichanohichuru ecaanto coroaeraauru, satiin casajeeuru, naaonjoainurite, nii ohane baiha cacha itajeraneein nena usi conemuri asofereneein moconaa cuhane jaonojoiniha cuurureein.” nae canu rai.

### *Ena nena Jerosaleen nese*

<sup>9</sup> Nii janate, nii caausineein anjeraauru nii caainsii muruaaeneein satononejeein cacha cairichaeranu que biji achunequiin nenacaauru caje nena leinjiin anjera:

“Chajaaute caa coarae. Caate Carenero Narejeen comasainu que nenacaaurune,” nae carai, nii satiin Jesocurisito ranojoneein nenacaauru coarateein.

<sup>10</sup> Nii janate, nii canu que Cana Coaunera Suujue coaratenojoin ichatane ucuuno seeonjoan que canu amaain, dede caje Cana Coaunera acatiha fauha unaa Cana Coaunera nese Jerosaleen coarate canu que, nii leinjiin anjera.

<sup>11</sup> Nii janate, conoha Cana Coaunera necaohachane tochaneein, jataain caohatiin cono te nii nese. Jataain coretiin nena ajeri jaberoco tochaneein jiquihaquiin, ajeri jataain nojoein nena jaspe tochaneein asaun tiaain inanacatiin.

<sup>12</sup> Nii nese tinonocoritiinte ne, jataain ecuuneein rijia lechoonca coroata bacuujaain. Nii janate, nii acuuja

nainetiin neeure leinjihanaain anjeraauru. Nii nese bacuu-  
jua nainetiinte ne, laenanohineein lechoonca coroata lauriin  
nenacaauru Isaraelitacuru nefoerate curuaacuru.

<sup>13</sup> Nichatajai acuujuate ne, enoto mitu nichajai que. Jana  
nichatajai acuujuate ne, enoto soo nichajai que. Jana nichata-  
jai acuujuate, enoto soo coarajeein cana raotono nichajai que  
ne. Jana leecha nichatajai acuujuate, enoto soo nichajai  
coarajeein cana ajaabiji nichajai que ne.

<sup>14</sup> Nii ajeri laenanohineein niha lechoonca coroatajai  
Carenero Narejeen rai afosotooru curuaacurune jaan ajeri  
quete temurae nii nese coriha rijija.

<sup>15</sup> Nii canu aina erenaa anjerate, oro caje ichanohin coju-  
nacatihane jaannu amae, que nii nese coujunacateein acuu-  
juaauru, rijia, naaonjoainuri cojunacatihane jaanu que.

<sup>16</sup> Nii janate, rai caare aina ita jaraaone rai jaratono. Nii  
cojunacatihane jaanu que niicha amai que, nii nese coju-  
nacatiha nii anjerane janate, coroata oaraanca coroata fasha  
quilometorone rai caare, jaratono, nucuuno, naaonjoainuri.

<sup>17</sup> Nii baiha nii rijia ucuuno cojunacatiha, joaenreein cha  
cojunacatiha cachaaurune rijijiei metoro quene janate, saota  
choonca saogui metoroe.

<sup>18</sup> Ajeri jataain nojoein nenea jaspe caje ichanohiniha  
rijiane janate, bidirio jicharoaain ichanohin tocohaneein,  
oro nejesina caje ichanohi ne nii nese.

<sup>19</sup> Nii janate, jataain coreein nenea araai laurii ajeri  
caohacha que urerianohineein ne, nii rijia temuracuru  
ajerichuru. Nii jauriaanejeein nunuhe neein nenea rijia  
temurate, ajeri nojoein nenea jaspe caje ichanohi ne. Jana  
nii coroata temurate, ajeri caohacha safiro neein niicha cu-  
ruaateuri caje ichanohi ne. Jana nii nichatajate, jataain  
jiquihaquiin nenea agata caje ichanohi ne. Jana nejenate,  
esmeralda caje ichanohi ne.

<sup>20</sup> Nii jana nesaoquite, ajeri onesi caje ichanohi ne. Ne-  
saotanete, lanaajiojoaain nenea cornalino caje ichanohi ne.  
Jana caainsiinite, jataain jiquihaquiin nenea crisolito caje  
ichanohi ne. Jana fosanite, berilo caje ichanohi ne. Jana  
isconite, topasio caje ichanohi ne. Lechooncanite, berau-  
rosiojoaain asauntiaain inanacaaain nenea curisoprassa caje  
ichanohi ne. Jana nii lechoonca leinjiinte, jataain coretiin  
nenea ajeri jasinto caje ichanohi ne. Jana nii lechoonca  
coroatajate, jichosijiojoaain nenea amatista caje ichanohi ne.

<sup>21</sup> Nii lechoonca coroatajai acuujuate ichanohi ne, le-  
choonca coroatajaain jataain ajeri caohachaneein nenea  
perla caje. Le bacuujaauru acuujuate ichanohi ne, lein-  
jihanaai ajeri perla caje. Jana nii nese cataaun cunaa

nese coerote, bidirio tocohanein jiquihaquuin asaaun tiaain inanacaain oro nejesina caje ichanohi ne.

<sup>22</sup> Nii jana coatiha nii leinjiinijin Teenforo coarinaaun nii neseu, cana Curuaanaa itolere que nelateein itolere ichana naineranein nenea Cana Coaunera, rai Calaohi- Carenero Narejeen aina ecu nenea Teenforo neeuruhane jaun.

<sup>23</sup> Nii jaun coatiha enoto, atene, naaonjoainuri lateein nihei nii nese conaeranu que, inae rai necaohacha que conaa Cana Coaunerane jana, rai cono neein niha Carenero Narejeene jaun.

<sup>24</sup> Satiin lauri lauri ichaonacaauru cachaaaurute, nii nese que conaeraain nii nese que amuhemuhecurureein. Nii jana satiin caa chauratane que nenacaauru curuaanaacuru reychurute, itolere acaauruhacha latei teeurureein acaauru rai.

<sup>25</sup> Niheichu nii chariji bana nefurinaain acuujuu. Niheichu ecu nerinaain nocohena.

<sup>26</sup> Satiin lauri lauri ichaonacaauru cachaaaurute, raotojoein neeuruhane jaanu, acaauru necaohacha que necaohachaain neeuruhane jaanu, naaonjoinunru amaaurureein nii neseu.

<sup>27</sup> Nete laen, nii chariji bana enoorenereein nii Cana Coaunera rai caohachanelanaala baasonnein nenacaauru. Niheichu, nii namute cacha cotaairiin casajenetiin nenacaauru enonaa nainecururinaain. Leinjiin nii Carenero Narejeen nii chabana satonoelanaala nenea ichaonaa que ichaohenihuru curuaa siricha quiricha cuhane laenanohineein curuaa sirichaauruhachate, enonaa nainereein nii neseu.

## 22

<sup>1</sup> Nii baihate, leinjiin nucuhe ajiarojoeritiin nenea ichaonaa tera nucuhe coarate canu que nii anjera. Nii janate, Carenero Narejeen nelaurianaja aina, Cana Coaunera nelaurianaja rori *trono* jeelai caje mitue nii acauajiarojoeritiin asaaun tiaain inanacanaa.

<sup>2</sup> Nii nese cataaun cunaa bero cuhane, chaen nii nucuhe auhaniha, naaonjoaainte ita jeraniha omarohin le ateeuru nainein inacae nii ichaonaa tera enuha. Nitohaneinte le jaanaca cuhane lechoonca coroata saain inacae nii enuha. Jana nii enuha ichaonaa tera alote nelate que necoichacuruha lauri lauri ichaonacaauru cachaaaurune caina.

<sup>3</sup> Nerinaain ecu nechu aansaineein ichoai. Cana Coaunera aina Carenero Narejeente, nii neseu nereein jelai Curuaanaa neein cocoainanacaineein. Nii jana rai cachaaaurute coroaeca cuurureein.

<sup>4</sup> Cana Coaunera ainate ita acatiha neein ita coaraain rai nauri que Cana Coaunera curuaa sirichurureein.

<sup>5</sup> Ecu nerinaain nocohena. Cono laatecururinaain nii rai cachaauru. Enoto niha natiin laatecururinaain. Cana Coaunerate, acaauru cono neein nereein. Nii rai cachaneein nenacaaurute curuaanaa niha cuurureein chabana satonoe-lanaala.

*Ichuunijiha turuha Jesocurisitone*

<sup>6</sup> Nii baihate:

“Caa erenaate esinae rauhijiriin, nii nohane lanaala ichei aitorichaaunine rijijieein airichaaaine coina erenaa ne. Nii Cana Coaunera, nere beebejeeuruha *profetacurune* coina berateralute rai anjera letoae, inae ichuunejeeonriha nitohanerichaaainene jaun, rai cachaneein nenacaauru que coaratihane coina,” nae canu rai nii anjera.

<sup>7</sup> Nii janate aonacaaunne jana: “Carajae lanaalane inae turuha ureeunni. Nerausiaaecate cuurureein caa quiricha cuhane laenanohineein nenea Cana Coaunera beratenojoin tonoraain nenacaauru,” nae Cana Coaunera Calaohi Jesoso.

<sup>8</sup> Canune Joaan neein coaraain aonaaun. Nii coaraain aonacaaunne baihane, nii canu que coaratera anjera tija asaae neseeonriaaun, coroaaceaaune coina.

<sup>9</sup> Nete canu rai:

“Coa nitohanai ichaa. Canu netonaine aaine rijijieein, Cana Coaunera cachaneein neeun. Satiin ii nejeraauru, caa quiricha reretaain coaraain tonoraeraauru, Cana Coaunera ere que erenacaauru- *profetacuru*, naaonjoainuri rijijieein neeun canu netonai. Cana Coauneraacha coroaaceu,” nae nii anjera canu rai.

<sup>10</sup> Nii baihate coaiten aite carai:

“Coaa leeochoauru rai belanaala caa quiricha cuhane laenanohineein nenea- Cana Coaunera ere rucuheca ii suujuaacha cuhane. Leeochoauru rai beeu. Inae jataain ichuunijiha nitohanai cojoanonaa que turuhane.

<sup>11</sup> Chunocoha cacha Cana Coaunera ere aohana jerenihane, nihei tonaain erenaa najaanu. Nirijieeincha baaso ichajein sacuhane coina reroecanaa nainihaacache. Esinae rauhijiriin caohachaaain suujua coaraain Cana Coaunera sacunaa jeriha cachane, jelai teein Cana Coaunera cachaneein nihane jeriha Cana Coaunerane rijijieein sacuhane raite ne,” nae nii anjera canu rai.

<sup>12</sup> Niritiinte: “Aiha. Carajaelanaalane turuha ureeunni. Chaen nechu, acaauruhacha ichai nainejeein cainacaaune jaanu uhaain ureeunni, le cacha cachaauru rai tihanune coina.

<sup>13</sup> Canune jauriaanejeein itolere nunuheteraneein satonoteraneein nenea neeun” nae Cana Curuaanaa Jesoso.

<sup>14</sup> Nerausiaaecate cuurureein canu esenetaauruhane coreniha rai nosa caje canu ichoteratenojieein

nenacaauru, nii ichaonaa tera enuha inaa leein, Cana Coauneraacha rucujuei nenaanjaun enonaa nainecuruhane jaun.

<sup>15</sup> Nete laen enoelanaala jianacoon nedaaurureein, nii Cana Coaunera coitucuelanaala nenacaauru, baasoneein ichaonacaauru cacha baasooru, benaneneein nenacaauru, sinijerane lanaala nena ene aina ichaojeraconacaauru, enecuru nihanatiin rai lananelanaala nena quicha aina ichaojeraquiin nenacaauru, sonajaain jaaorera, ichanohin ecaanto corojeein nenacaauru, satiin nechu jataain coritaraacha ichajeein, acaacha ichajeein nenacaauru, naaonjoainuri. Nii janate:

<sup>16</sup> “Canune Jesusoneein caa canu rai anjera letoaaun, satiin caa aitothane rijitoojoein, janijiin canuhacha raauri canu cachaauru rai biha cuhane coina. Canune Rabiri caje neferatenaaneein neeun. Canune janonaa rai mitunaa arasijie rijijieein neeun,” nae.

<sup>17</sup> Cana Coaunera Suujue, Carenero Narejeen comasai, naaonjoainurite: “Chajaau,” naauruhane jana: “Chajaaujian,” naaurureein aohanraauru. Chunocoha cocoireein acau conaa jereein uhite, nii core colane ichaonaa tera acau coreein.

<sup>18</sup> Satiin caa quiricha cuhane laenanohineein nena caitoonjoante aitocooaanne rijijieein situreein. Chunocoha cau caa quiricha cuhane nihane amurijiriin jojoin nenaate, caa quiricha cuhane laenanohineein niha caainsii laurini cacha cairichaeranu jaan que cairichaa cureein Cana Coaunera.

<sup>19</sup> Jana chunocoha caa canuhacha beratei quiricha cuhane laenanohineein nena coreein, que cacha relaelanaala, naaonjoain nena cajete, nii ichaonaa tera, que banihateein niicha rucujuei enuha inaa rulureein. Chaen caa quiricha cuhane laenanohineein nena Cana Coaunera nese neein nenaane maajeein caje rulureein.

<sup>20</sup> Caritiin aitiinte: “Aiha, carajaelanaalane inae turuha ureeunni,” nae Cana Curuaanaa Jesoso.

Nitohanemiinjian. Chajaain sorotiin uu Cana Curuaanaa Jesoso.

<sup>21</sup> Cana Curuaanaa Jesoso itolere inaraacha latei teein inara rausiaaemiinte raotojoein neeiche.